


# IRUHIN ANANIN BARAEN



The New Testament in the Central dialect of the Arapesh  
language of Papua New Guinea

**IRUHIN ANANIN BARAEN  
The New Testament in the Central dialect of the Arapesh  
language of Papua New Guinea  
Nupela Testamen long tokples Arapesh long Nuigini**

copyright © 2003 Wycliffe Bible Translators, Inc.

Language: Arapesh

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-05

---

PDF generated using Haiola and XeLaTeX on 11 Nov 2022 from source files dated 9 Oct 2020

2bc22d5b-c527-53fd-8d75-3cc4c2e66cc9

## Contents

|                                  |     |
|----------------------------------|-----|
| IRUHIN ANANIN BARAEN . . . . .   | 1   |
| NYARIK IRI BARAEN . . . . .      | 3   |
| MATYU . . . . .                  | 4   |
| MAK . . . . .                    | 85  |
| LUK . . . . .                    | 135 |
| JON . . . . .                    | 217 |
| APOSEL . . . . .                 | 277 |
| ROM . . . . .                    | 349 |
| 1 KORIN . . . . .                | 386 |
| 2 KORIN . . . . .                | 421 |
| GALESIA . . . . .                | 444 |
| EFESUS . . . . .                 | 456 |
| FILIPAI . . . . .                | 469 |
| KOLOSI . . . . .                 | 478 |
| 1 TESALONAIIKA . . . . .         | 487 |
| 2 TESALONAIIKA . . . . .         | 495 |
| 1 TIMOTI . . . . .               | 500 |
| 2 TIMOTI . . . . .               | 512 |
| TAITUS . . . . .                 | 520 |
| FILEMON . . . . .                | 525 |
| HIBRU . . . . .                  | 527 |
| JEMS . . . . .                   | 556 |
| 1 PITA . . . . .                 | 566 |
| 2 PITA . . . . .                 | 576 |
| 1 JON . . . . .                  | 583 |
| 2 JON . . . . .                  | 593 |
| 3 JON . . . . .                  | 595 |
| JUT . . . . .                    | 597 |
| REVELESEN . . . . .              | 601 |
| Read the New Testament . . . . . | 644 |

**IRUHIN ANANIN BARAEN**  
**The New Testament in the Arapesh Language**  
**(Central Dialect), East Sepik Province, Papua New**  
**Guinea**

**Nupela Testamen long tokples Arapesh long  
Nuigini**

aon]

Translation: © 2003, Wycliffe Bible Translators, Inc.

Print publication, 2003 by Bible League International

Web version

2013, Wycliffe Bible Translators, Inc.

<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manneri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik strem samting i no orait long dispela tok orait, strem tok, salim Buk Baibel, o tainim Tok bilong God long nupela tok ples, yu ken **askim mipela.**

Ogeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

## NYARIK IRI BARAEN

Douk putik enen namba nyupe namudok 2-3 okudok buk um, enyudok nyakri baraen um lain 2 aria 3 douk nyape atugun. Douk putik enen kak namudok [ ] nyutatapokuk enen baraen um, ipak wosik pudukemesh um enyudok baraen douk madae nyutem seiwokin kopi (trenslesen) um tokples Grik um Nupela Testamen uwé, uwok. Baraen nyape nyarik um sabaisi shus iri douk nyetem debeinyl leta, shakri seksem heding. Enyen douk baugenym baraen um enyudok nyetem shukam iri. Aria enen sapta aria ves nyape shukam um nyarik iri debeinyl baraen iri nyakri enyudok atin baraaen nyetem kupaikwi buk.

Enen baraen kros referens douk nyakripap kupainyi baraen um enyudok atin baraen kabi nyak nyarik nyatarihen um iri, um nyutaurum enyudok nyarik iri baraen. Enyudok baraaen kros referens douk nyape atapis um sisigukis shus.

Baraen nyetem kros referens iri douk nyanaki sisigukiyu bumeb um buk Baibel. Oudak bumeb douk madae shuwem shuknñ nyeigur uwé, uwok. Tukwanin atin kabi enyudok um: Mt, Mk, Lk.

Putarih baraaen punak arigha putik enen leta nyupe iruh um enen baraaen um, baugenym enyudok baraaen douk nyape atapip um apudok shup. Putarihien aria ta pudukem baugenym enyudok baraaen.

Sagikuk iri shus um okudok buk, ipak ta putik enen barin kabi diksineri um shakri ki tem. Enyudok baraaen douk nyawerehumap baugas um enen debeinyl baraen nyetem Nupela Testamen iri.

Enen enyudokmori baraaen Tok Pisin douk shakri Pikinini bilong Man, Farisi, Kingdom bilong God. Aria pagikuk iri shup abom um okudok buk, ipak ta putik biap mep piyabigepe sabaihi yeh Aposel Pol narahe nanak nakripesh Iruhin Ananin Baraen um hani abudók debeibi amnab douk Maria kwobuki Jisas um.

### Preface

This book contains a translation of the New Testament into the Arapesh language (Central Dialect). The language is also known as Coastal Arapesh. It is spoken by approximately 8,000 people who live in the coastal villages from Wautogik/Bogomatai to Kumunim/Sowom. A few of the people also live in the low mountains south of the ocean (Wautogik, Woginara 1 and 2, Sapuain).

The Arapesh language preface also explains the details of Greek Textual differences, cross references, verse identification, book abbreviations, etc. We give thanks to God for the many prayers and gifts of many people who have helped in the production of this book. In particular we thank God for the Bible League, South Holland Illinois, USA, who have graciously underwritten the cost of this edition. We hope and pray that this book will be used by the Spirit of God to lead many of the Arapesh people to faith in Christ and to build up those who are already Christians. We dedicate this book to God, whose continual presence and gracious enabling at each step has made it possible. We desire that it may glorify Him.

# Iruhin Ananin Yopinyi Baraen Matyu Nenyem

## Iri

## Banenyi Baraen Um Matyu

1:1-2:23 Jisas ananim yamehem

3:1-12 Jon neneb baptaisumesh iri nakripesh Jisas ananin baraen

3:13-4:11 Jisas neneb baptais aria Satan nanaki nakwiraehan um nunek yoweishi inahos

4:12-18:35 Jisas nanak shokugi nahobig Galili nakripesh Iruhin ananin yopinyi baraen aria nagabe eneheneh arugeh henekesh iri yopish

19:1-20:34 Jisas nakutukuk Galili nanak shokugi nahobig Judia nakripesh Iruhin ananin yopinyi baraen

21:1-27:66 Jisas nanak Jerusalem nakripesh baraen, aria eshesh sheman baraan aria shenek nyiliman rowogin kruse

28:1-20 Shabo Jisas nagok aria ta nikitak nape nekesh mour ananish disaipel ba iyoh aria nato iruhw heven

*Jisas Krais Ananish Popehesh Yamehesh Esheshish Nyeiguhw  
(Luk 3:23-38)*

<sup>1</sup> Jisas Krais ananish popehesh yamehesh esheshish nyeiguhw douk eshudok. Jisas ananin yamenen Devit. Devit ananin yamenen Abraham.

<sup>2</sup> Abraham ananin nuganin Aisak.

Aisak ananin nuganin Jakob.

Aria Jakob nabuki Juda nani ananim owarhim.

<sup>3</sup> Juda nabuki Peres nani Sera.

Amamik amakek douk Tamar.

Peres ananin nuganin Hesron.

Hesron ananin nuganin Ram.

<sup>4</sup> Ram ananin nuganin Aminadap.

Aminadap ananin nuganin Nason.

Nason ananin nuganin Salmon.

<sup>5</sup> Salmon ananin nuganin Boas.

Boas ananik amakek douk Rehap.

Boas ananin nuganin Obet.

Obet ananik amakek Rut.

Obet ananin nuganin Jesi.

<sup>6</sup> Jesi ananin nuganin douk king Devit.

Devit ananin nuganin douk Solomon.

Solomon ananik amakek seiwok Uria ananik irohukwik.

<sup>7</sup> Solomon ananin nuganin Rehoboam.

Rehoboam ananin nuganin Abiya.

Abiya ananin nuganin Asa.

<sup>8</sup> Asa ananin nuganin Jehosapat.

Jehosapat ananin nuganin Joram.

Joram ananin nuganin Usia.

<sup>9</sup> Usia ananin nuganin Jotam.

Jotam ananin nuganin Ahas.

Ahas ananin nuganin Hesekia.

<sup>10</sup> Hesekia ananin nuganin Manase.

Manase ananin nuganin Emon.

Emon ananin nuganin Josaia.

<sup>11</sup> Josaia ananim nugamim douk Jehoiakin nani ananim owarhim. Abudok nyutob eshesh Israel shanak shonoweshik shape gani Babilon.

<sup>12</sup> Shanak shonoweshik shape Babilon aria Jehoiakin nabuki Sealtiel. Sealtiel ananin nuganin douk Serubabel.

<sup>13</sup> Serubabel ananin nuganin Abiut.

Abiut ananin nuganin Eliakim.

Eliakim ananin nuganin Asor.

<sup>14</sup> Asor ananin nuganin Sadok.

Sadok ananin nuganin Akim.

Akim ananin nuganin Eliut.

<sup>15</sup> Eliut ananin nuganin Eleasar.

Eleasar ananin nuganin Matan.

Matan ananin nuganin Jakob.

<sup>16</sup> Jakob ananin nuganin Josep.

Aria Josep narao Maria aria kwobuki Jisas douk shuhwaran um Krais, douk Iruhin nakriyan neshopokan nanaki iri. <sup>17</sup> Namudok aria shadarehi awiros arpesan douk shape iri Abraham napenyobi nyutob arigaha shanak shatogrumeri Devit natogur obi nyutob asudok awiros sanak satogram 14-poreis. Aria ta shadareh Devit napenyobi nyutob arigaha shanak shatogrumeri abudok nyutob eshesh Babilon shanaki sharao eshesh Israel shanak showeshikes shape Babilon obi douk shopuk shadarehas sanak satogur um 14-poreis awiros. Aria shopunek shadarehi abudok nyutob shabi shape Babilon obi arigaha shanak shatogur um Krais natogur nape obi nyutob um douk shopuk namudok atin, shadarehas sanak satogur 14-poreis.

### *Maria Kwokwarumori Jisas*

(Luk 2:1-7)

<sup>18</sup> Jisas Krais nonokwarum ahi aih douk namudok. Ananik amakek Maria douk shagraehok um kurao Josep. Eshesh biyesh ta shunoraum aria madae shishuh atugun uwe, uwok aria okwok kwanodukem um okwok kwonorahaen Iruhin ananin Mishin nyanaki nyawishok aria shatik um okwok douk kwunarahaen. <sup>19</sup> Josep yopini arman, madae nunek inahos uwe, uwok. Ananabraen nyan aria nanaiwos nukok abraen Maria uwe, uwok. Aria anan nabo bараen shokubur atin um anan kanak ta nunoiwos irohukwik, Maria. <sup>20</sup> Anan nape nonek urkum um enyudok bараen obi nyutob, enen Iruhin ananin ensel nyatogruman anas yomnis aria nyakripan, "Josep, Devit barhonin, mare nyunottik um nyurao Maria um nyakik irohukwik. Okwok kwonorahaen um Iruhin ananin Mishin. Madae anan arman nonukok uwe, uwok. <sup>21</sup> Okwok ko kwubanuh kubuki anan nuganin. Aria nyak ta nyuhwaran nyeigur Jisas, um maresh anan ko nugamoh arpesan shukutukuk yoweishi inahos aria shutanamori shupe wosik atin." <sup>22</sup> Eshudok eneshenesh shenenek shagipesha bараen seiwok anan profet noko Iruhin bараen iri anan nakri namudok, <sup>23</sup> "Onok madae kuti armam iri ta kweyetueguk, kwubanuh aria kubuki anan nuganin, aria shuhwaran Emanuel. Enyudok bараen nyakri namudok, Iruhin nani apak nape." <sup>24</sup> Aria Josep neshuh nakitak aria narao Maria um ananik irohukwik, kabi da Iruhin nakripan um. <sup>25</sup> Aria Josep madae nini Maria shishuh atugun uwe, uwok. Aria Maria kwobanuh kwobuki anan nuganin. Aria nodowan nyeigur Jisas.

<sup>1</sup> Maria kwobuki Jisas abrudok wabur Betlehem. Ababur douk bape agudok shokugi nahobig Judia. Aria abudok nyutob, Herot douk nenen king nape Debeini um Judia. Maria kwobuki Jisas ba iyoh aria anam hadukem eneshenesh iri hape iri gani aun nakihumori hanaki hatografi Jerusalem. <sup>2</sup> Hanaki aria harigesh hakri, “Anudok batowinyin nonokwarum um nunek king um eshesha Juda iri nape agunum? Apak douk matik ananik unuk gani aun nakihumori aria douk manakumori munek lotuman.”

<sup>3</sup> King Herot nemnek enyudok baraen, ba akas sanun. Ihish arpesh shape Jerusalem iri shopunek arugoguhwiar waesh. <sup>4</sup> Aria nenenkumam baraen amam pris amamim debeimi hani amudok anam henek skulumesh um lo iri hanaki hatrun. Hanaki aria narigam nakri, “Anudok arman Krais douk Iruhin nakriyan neshopokan nunaki iri ko nunukwarumori meiburi wabur?”

<sup>5</sup> Aria hakripan hakri, “Gani Betlehem douk bape agudok shokugi nahobig Judia iri. Seiwok anan profet nowemaguk baraen aria nakri namudok, <sup>6</sup> Seiwok Iruhin nakri, ‘Ipak pape abrudok wabur Betlehem douk bape agudok shokugi nahobig Judia iri, ipak pumnek. Ipak madae pupe pigigi um amam debeimi douk hasuhw merik um Judia iri uwe, uwok. Aria amu wouwokuk. Umum maresh, um nyak atin kweipon anan debeini arman nutogur ipak arpesh pape Betlehem iri. Aria anan kweipon nupe debeini um ipak eikish arpesh Israel.’”

<sup>7</sup> Herot nemnek namudok aria nanabeshuk nenenkumam baraen amudok douk hape iri aun nakihumori hanaki iri. Nenenkumam baraen aria hanak hatrun. Aria anan narigam um da marab nyutob okwudok unuk da kwatogur. <sup>8</sup> Aria anan neshopokam hunak Betlehem, aria nakri namudok, “Punak aria shokubur atin gamo pupe purim anudok nugarin. Ipak puriman ba puparugon aria ta putanamori ba pukrip eik. Umum maresh, eik shopunek yakana inak inek lotuman.”

<sup>9</sup> Douk hemnek king ananin baraen aria amam hanak. Amam hanak yah aria ta hatik okwudok apunik unuk douk harik hatrukwi gani aun nakihumori iri. Okwok kwarig atin aria amam hagipeshok arigaha kwanak kwotem iruhw anudok nugarin neshuh atari urupat. <sup>10</sup> Amam hatik okwudok unuk aria amam hanadudareh hanaboum mishish. <sup>11</sup> Aria amam hunak hawish atudok urupat aria hatik nugarin nani amakek Maria shape. Aria habuh hoduk ohrubus hatao atap henek lotuman. Aria hapuk amamigas banagas hatuki eshudok hatorishi debeibori utabor iri aria hukanesh. Hakon gol rani paura nyeisig yopuri unar iri shohwaren um frankinsens aria sani enen yopuni sanda nyeigurinyum mir. <sup>12</sup> Hakon eshudok aria heshuh nagundok Betlehem. Heshuh habo anas yomnis aria Iruhin nakripam dodogowinyi baraen um maresh hutanam hutiguk Herot uwe, uwok. Namudok aria amam hagipesh kupaihi yah hatanam hanam amamig nahobig.

### *Josep Nani Armatok Aria Nugarin Sharuwok Shanam Agudok Nahobig Isip*

<sup>13</sup> Douk amudok biom atun hanakuk aria Josep neshuh nonabek anas yomnis. Aria enen Debeini ananin ensel nyatogruman aria nyakripan nyakri, “Nyikitak nyurao nugarin nini amakek aria arigah punam agudok nahobig Isip. Punak pupe ganudok arigaha eik ta ikripep aria ta putanamori. Umum maresh, Herot douk nakana nupe nurim nugarin um ta non nugok.”

<sup>14</sup> Namudok aria Josep naktak nurao nugarin nani amakek aria abudok atub wab shapa shanam Isip. <sup>15</sup> Josep nani Maria shabuh shape nagundok

arigaha Herot nagok. Enyudok douk nyatogram enen baraen seiwok Debeini nohur anan profet neyagwrehenyuk iri nyatogur adurin atin. Baraen enyudok. Iruhin nakri, "Eik yohwar eikin Nuganin nakutukuk Isip nanaki."

### *Herot Noguwak Ananim Soldia Hanak Habo Sabaimi Batowishim Hagok*

<sup>16</sup> Herot nape aria nadukemeshum amudok hape iri aun nakihumori hanaki iri douk hagiayiman hanak kupaihi yah. Namudok aria ananibur nyibur akasibur atubur. Aria noguwak anam soldia hanam Betlehem bani warub bape hurukatin um Betlehem iri um hubo ihm shokumi batowishim hugok. Hubo amudok douk biyesh aka atin atin kwarahos shadiyom iri atum. Umum maresh, anan nadukemeshum douk hakripan hakri abudok nyutob hatik unuk um. <sup>17</sup> Enyudok douk nyatogur um enen baraen seiwok Iruhin nohur profet Jeremaia neyagwrehenyuk iri nyutogur adurin atin. Baraen enyudok. Iruhin nakriyeni.

<sup>18</sup> "Shemnek anah mah abrudok wabur Rama. Shemnek onok armatok kworeh kwabo sawiyeguh kunak. Resel kwape kworep okwokwim nugamim. Kworeh aria madae enen arpen ko wosik nyugapeshumok okwokwish urkum apawh."

### *Josep Nani Armatok Aria Nuganin Shakutukuk Isip Aria Shatanam Shanam Wabur Nasaret*

<sup>19</sup> Arigaha douk Herot nagokuk aria Josep nonabek anas yomnis gani Isip. Enen Debeini ananin ensel douk nyonohur aria nyakripan namudok.

<sup>20</sup> Nyakri, "Nyikitak nyurao nuganin nini ananik amakek aria ta putanam punam Israel. Amudok douk hakrium hubo nuganin nugok iri douk hagok." <sup>21</sup> Namudok aria Josep nakitak nurao nuganin nani ananik amakek aria ta shatanam shanam Israel. <sup>22</sup> Shanak aria Josep nemnek baraen um shakri Akeleas narao ananin yaken Herot ananik outuk natogur king nape Debeini um agudok shokugi nahobig Judia. Namudok aria Josep ta nanogugur um nunam Judia. Arigaha douk ta nonabek anas yomnis aria Iruhin nakripan enen baraen. Namudok aria shanam agudok shokugi nahobig nyeigurigum Galili. <sup>23</sup> Shunak aria shabuh shape anabur wabur shohwarabur um Nasaret iri. Namudok aria enen baraen seiwok amam profet henyemaguk iri nyatogur adurin atin. Baraen enyudok. "Anan douk ko shuhwaran shakana anan Nasaret-epimin."

## 3

### *Jon Neneb Baptaisumesh Iri Nakripesh Iruhin Ananin Yopinyi Baraen (Mak 1:1-8; Luk 3:1-18; Jon 1:19-28)*

<sup>1</sup> Abudok nyutob Jon neneb baptaisumesh iri douk nanaki nape apa nakripesh Iruhin ananin yopinyi baraen. Arpesh shanaki aria apa nape nakripeshen agudok shokugi nahobig Judia agundok wehigunum arpesh wokagunum. <sup>2</sup> Nakripesh namudok. Nakri, "Ipak pubukuk yoweishi inahos aria putanam pukon aparuh Iruhin aria putogur ananish arpesh. Umum maresh, abudok nyutob um arpesh shuwish um agundok Iruhin nape Debeini um ananish arpesh shapeum heven douk hurukatin um ko butogur." <sup>3</sup> Jon anan douk anudok arman seiwok Iruhin nohur profet Aisaia neyagwrehuk enen baraen nakri namudok,

"Enen arpen nyape nyohwar gani wehigunum arpesh wokagunum. Nyohwar nyakri, 'Gapeshuman yah Debeini.'

Pugapesah ba greg atin hatem um anan nugimah nunaki um!"

<sup>4</sup> Jon nenekah iri rupah douk shenekah enen mahin shohwaren um kamel iri enyenyrub ehirub. Aria let nuwashot iri douk shenekat anap mahinyip yegenyihwip. Worigun nagnoh iri douk napeum nawok gormish aria akehinyi lele da nyor numun maribusigas aragas iri. <sup>5</sup> Aria abudok nyutob arpesh shape iri Jerusalem iri, shape iri ihirub warub agudok shokugi nahobig Judia iri, shape iri ihirub warub bape hurukatin um worub Jodan iri, worobaishi shanaki um shumnek Jon. <sup>6</sup> Shanaki showereh shenekeshi yoweishi inahos aria nenebaptaisumesh abudok worub Jodan.

<sup>7</sup> Jon natik worobaimi Farisi hani Sadyusi hanamori hutrun um nunek baptaisumam aria nakripam namudok, “Ipak ogwuhwudok yoweiguhiw yuguwhim nugamim, Iruhin da akasin atun um ipak. Amiapan nyakriep um ta puruwok um eshudok yoweishi douk nakri nenekehi shutogurum ipak iri? <sup>8</sup> Ipak douk pubodig nyirub aria ko punek yopishi eneshenesh um ta wosik piyabigesih namudok adur atin ipak da punek gihauum ipakish yoweishi inahos aria putanam pukon aparuh Iruhin aria putogur ananish arpesh. <sup>9</sup> Ipak pur urkwip ipakiruh aparuh namudok, ‘Abraham anan douk apakin yaken. Eik yakri ikrip ipak namudok, Iruhin anan douk adur atin ko nuhur abrudok utabor aria nubranam um butogur Abraham ananish batowish.’ <sup>10</sup> Arubar iganigadae banowatak bakus um buburow rowogig baug. Ihigosum rowos madae subuki yopipi shurkwip ba piragos iri, agusudoki rowos ko shuburo-ogos aria shuwashogos um nyih hunugos.

<sup>11</sup> “Eik douk yenek baptaisumep um abar kabi da enen kak um ipak douk pubukuk eshudok yoweishi inahos ipak da penekeshi iri aria pubodig nyirub aria patanam pakon aparuh Iruhin aria putogur ananish arpesh. Aria anudok ko nugimori eik iri, anan ko nunek baptaisumep nukwu Iruhin ananin Mishin. Anudok ananin dodog nyenek uhwin um eikin dodog eik madae yopue ipe wosik um ta isuhwuman ananiyu su uwe, uwok. Anan ko nunek baptaisumep nukwu Iruhin ananin Mishin nyini nyih. <sup>12</sup> Anan ko nunaki kabi da anan arman nasuhwi anap neitip ananis wis um aria nunaki nudum ihish witish nyubuhas nushubuk sik. Aria yaputi shuruwepit wit anan ko nutubuk gani ananit urupat nobuk wit ati. Aria ihish witish nyubuhas anan ko nushaisheh nukwu ehudok yoweishi nyih douk hanu hape namudok atin iri madae ta hugoki uwe, uwok.”

### *Jon Nenebaptais Um Jisas (Mak 1:9-11; Luk 3:21-22)*

<sup>13</sup> Abudok nyutob Jon nape apa nenebaptaisumesh abar, aria Jisas nikitak nakutukuk agudok shokugi nahobig Galili aria nanam worub Jodan. Anan nanam Jon um nakanan Jon anan kanak ta nenebaptaisuman.

<sup>14</sup> Aria Jon nakri uwok um ta nunek baptaisuman aria nakripan nakri namudok, “Eik yakri wosik um nyak ta nyunek baptaisum eik.” Umum maresh, ba nyak ta nyunakmori eik?” <sup>15</sup> Aria Jisas ta nasuhman bareaen nakripan namudok, “Meyoh um enyudoki bareaen, douk nyak nyenekesh kabi da eik yakri um. Namudok wosik um apak munekesh namudok um miyabig ihishmorim um ihinyumorim yopiyopinyi bareaen um Iruhin nakriyenyi um enyudok yopinyi poe.” Aria Jon nemnek Jisas aria nunekesh kabi da anan nakri um nunek baptaisuman.

<sup>16</sup> Douk Jon nenebaptaisuman jurug, aria Jisas nakutukuk worub nanatu natowi neyotu iruhw hurus. Aria atub nyutob anan nanig natik utag ganupok um heven ibur wabur, aria anan natik Iruhin ananin Mishin nyabuhi kabi da anar armir runahwaram manyun um rabuhi retem Jisas.

<sup>17</sup> Aria anah mah heyagwrehi gani iruhw heven namudok, “Anudok eik

kanak eikin nunganin. Eik yanawash abom iri. Eikish urkum apahw shakri shanadudareh shanawashaman abom iri.”

## 4

### *Satan Nakwiraeh Jisas (Mak 1:12-13; Luk 4:1-13)*

<sup>1</sup> Douk Jisas neneh baptaisum jurug aria Iruhin ananin Mishin nyaran nyunak gani wehigunum arpesh uwok um, aria Satan ko nukwiraehan um nunek yoweishi inahos. <sup>2</sup> Aria Jisas nanak nape nubatib tenabih nyumnegwihi weibus nape meyoh um madae nuwok worigun uwe, uwok. Arigaha takweirubi nyurub ban.

<sup>3</sup> Aria Satan nanaki nakripan namudok, “Nyak da Iruhin in nunganin um aria nyak krip abrudok utabor ba butog brét.”

<sup>4</sup> Aria Jisas nakripan namudok, “Baraen nyetem Baibel iri nyakri namudok, ‘Arpesh madae shuwok bret atut ba ta shupe wosik atin uwe, uwok. Arpesh ta shupe wosik atin um shumnek Iruhin ananin ihin baraen niyagwrehenyi.’”

<sup>5</sup> Jisas nakri namudok aria Satan ta naranum yopuburi wabur Jerusalem. Aria nakh nowem Jisas neyotu gani iruhw iruhuguk um atudok Iruhin ananit debeiti urupat.

<sup>6</sup> Aria Satan nakripan namudok, “Nyak douk Iruhin ananin Nuganin um, aria nyak sapurak buh gani atap. Umum maresh, baraen nyetem Iruhin ananik buk iri nyakri namudok, ‘Iruhin ko nukripesh dodogowinyi baraen ananish enselahos um shunaki shegemenyukuk aria shusuwenyukuk iruhw esheshis wis. Namudok aria nyakiruh yeriweruh ko mare hunubo anam atum utom uwe, uwok.’”

<sup>7</sup> Aria Jisas nakrip Satan namudok, “Baraen nyetem Iruhin ananik buk iri shopunek nyakri namudok, ‘Nyak ta mare nyukwiraeh nyakin Debeini um nenek yoweishi inahos, anan da nyakin Iruhin.’”

<sup>8</sup> Aria ta shopunek Satan ta naran nato onohw hwato abom iri yoduhw. Hakih aria Satan neyabigan ihigsmorim nahobigos sape abudok amnab iri sani ihishmorim yopishi eneshenesh shape agudok nahobig iri.

<sup>9</sup> Aria anan nakrip Jisas namudok, “Nyak douk atin nyuduk ohrubus aria nyuhwido barag gubuh atap aria nyenek beten um eik, aria eik ko iken eshudok ihish eneshenesh um nyak.”

<sup>10</sup> Aria Jisas nakripan namudok, “Satan nyak karuwok-mokuk um eik! Baraen nyetem Iruhin ananik buk iri douk nyakri namudok, ‘Nyak ta ko nyunek beten um Debeini atun anan da nyakin Iruhin aria nyunek anan atun ananin atin mour.’”

<sup>11</sup> Jisas nakripan namudok aria Satan nakutunukuk aria nanak. Aria enesh enselahos shanaki shatauruman.

### *Jisas Nari Neneh Mour Nahobig Galili (Mak 1:14-15; Luk 4:14-15)*

<sup>12</sup> Abudok nyutob Jisas nemnek Jon da nonoweshik nape shunuweshik-ati urupat, aria anan nikitak natanam nanak agudok nahobig Galili. <sup>13</sup> Aria anan madae nanak nupe ananibur wabur Nasaret aria amu neneh atin nanak nape kupaiburi wabur Kaperneam. Abrudok wabur douk bape anagas um debeigi Galilieg waiyag hurukatin um abudok biyah amnab nyeiguribum Sebulun aria Napitali. <sup>14</sup> Jisas neneh namudok um enen baraen seiwok Iruhin nohur profet Aisaia neyagwrehenyuk iri nyatogur adurin atin.

<sup>15</sup> Baraen enyudok. Nyakri,

“Debeibi amnab Sebulun aria debeibi amnab Naptali,  
abudok amnab douk bape hurukatin um debeihi yah  
hanam youg gwani amnab douk bape gani wobrab worub Jodan iri um  
agudok nahobig douk Galili.

Agundok worobaishi arpesh douk eshesh madae Judaishi aria eshesh  
shopunek da shanaki shape agundok.

<sup>16</sup> Eshudok arpesh shapeum arukwut iri, eshesh douk shatik  
bogaragun um!

Eshudok arpesh shapeum arukwut-igunum atugun iri,  
douk shape bogaragun um atin!”

<sup>17</sup> Aria abudok nyutob Jisas nape nakripesh baraen nakri, “Ipak pubukuk  
apa punegeshi yoweishi inahos aria putanam pukon aparuh Iruhin aria  
putogur ananish arpesh. Umum maresh, abudok nyutob um arpesh  
shuwish um agundok Iruhin nape Debeini um ananish arpesh shapeum  
heven douk hurukatin um ko butogur.”

*Jisas Nahwar Nubatim Armam Hatogur Disaipel  
(Mak 1:16-20; Luk 5:1-11)*

<sup>18</sup> Anah nyumnah Jisas nape nanarahaen nanak anagas um debeigi  
Galilieg waiyag aria natik biom armam ashuken nani wanin. Anan  
douk Saimon. Ananin kupainyi nyeigur da shohwaran um Pita. Anan  
nani ananin wanin Andru, amam douk hape howashak umbenab agudok  
Galilieg waiyag. Amam biom hatuk eiguuhw um ta shutoruguh shukam  
utabor. <sup>19</sup> Douk natrum aria nakripam nakana, “Ipak biom yowi pugipes  
eik, aria eik ta iyabigep um ta purao arpesh shunaki shugipes eik.” <sup>20</sup> Douk  
amam hemnek atin aria hakutukuk amamib umbenab bakuk aria hagipes  
Jisas hanak. <sup>21</sup> Anan nagim waiyag nanaku shopunek, aria ta natigu  
kupaimi biom armam ashuken nani wanin, Jems, Sébedi ananin nunganin,  
nani ananin waninuman Jon. Amam biom hani amamin yaken, Sébedi  
da hatem bot, aria apa hagabe amamib umbenab. Jisas natrumugu aria  
nahwaram um hugipes anan. <sup>22</sup> Nohwaromugu aria atub nyutob ahudok  
atuh nyumnah hakutukuk bot tani amamin yaken napeik, aria hakitak  
hanaman hanak.

*Jisas Nakripesh Iruhin Ananin Yopinyi Baraen Aria Nagabe Worobaishi  
Arugeh Henekeshi Yopish  
(Luk 6:17-19)*

<sup>23</sup> Jisas narahaen nanak ihirub warub agudok nahobig Galili. Nanak  
nawish agundok eshesh Juda shantorum shape sheneyagwreh-ogwi urusag  
aria nape nakripesh Iruhin ananin yopinyi baraen. Nakripesh um agundok  
eshesh ko shuwish um agundok Iruhin nape debeinum ananish arpesh  
um. Nakripesh baraen aria nagapesh ihishmorim da yowe yoweihi  
arugeh henekeshi iri aria yopish. <sup>24</sup> Aria baraen nyanak ihigunum agudok  
nahobig Siria um enyudok Jisas neneken iri mour. Namudok aria shrauri  
ihishmorim douk yoweshum yomo yomogihi arugeh henekeshi kabi da  
debeiri eriger rapeyeshi, yoweishi sagabehos shapeyeshi, eshudok shatu  
ba krukruk shakuh iri aria eshudok roguhw aiyas shagokesh iri. Aria  
Jisas nugabe ihishmorim ba yopish. <sup>25</sup> Aria sabaishi shemnek baraen  
ba shunaki, eshesh da shanaki arbudok warub bani nahobigos. Eshesh  
shanaki Galili, Jerusalem aria Judia. Enesh douk shape iri gani wobrab  
worub Jodan shanaki. Aria enesh douk shanaki anab amnab douk 10  
poreirub warub bapeim shahwarogun um Dekapolis, eshudok ihishmorim  
eshesh shape arbudok warub iri shanaki aria shagipesh Jisas.

**5***Jisas Nakripesh Worobainyi Yopinyi Baraen Iruhw Anag Mihig*

**1** Jisas natik eshudok worobaishi arpesh shantorum shanaki aria nanak nato anag mihib. Aria nakih nape atap. Aria ananish disaipel shanaki shanaman shape.

*Jisas Nakripesh Baraen Um Yopih Aih Douk Apak Mugipesheh Aria Ko Mupe Manadudareh Abom Um  
(Luk 6:20-23)*

**2** Aria Jisas neyagwreh nakesh yopinyi baraen namudok, **3** “Eshudoki arpesh douk shadukemesh um esheshish mishish madae shupe hurukum Iruhin iri, aria shakri Iruhin um ko numnekesh iri, eshesh wosik ta shanadudareh. Umum maresh, eshesh ko shuwish agundok Iruhin nape Debeini um ananish arpesh shapeum heven aria shupe wosik atin gani iruhw heven.”

**4** “Eshudok arpesh douk esheshiruh aparuh yoweruh ba shureh atinyi aria madae shunududareh um, yoweishi inahos eshesh shenekeshi iri aria shukri um maresh ta shenek yoweishi inahos um, eshesh wosik ta shanadudareh. Umum maresh, Iruhin ko nugamohesh um esheshiruh aparuh.”

**5** “Eshudok samokwiyaishi arpesh madae shubo mishish ba shutuk esheshish nyeiguhw shuto iruhw aria shenek kupaishi yoweishi inahos iri eshesh wosik ta shanadudareh. Umum maresh, Iruhin ko nokesh abudok amnabish ihish eneshenesh aria shunogremesh.”

**6** “Eshudoki arpesh douk shanawasham abom um shigipesheh Iruhih ananir baraen ba shupe yopunyi poe, kabi da nyurub baesh um worgun nani abar um, eshesh wosik ta shanadudareh. Umum maresh, Iruhin ko gamo nugamohesh nenekekesh shupe duguresh atin shupe.”

**7** “Eshudok douk shenek gihau kupaishi arpesh iri aria shutaurumesh um eneshenesh iri, eshesh wosik ta shanadudareh. Umum maresh, Iruhin shopunek ko nenekekesh gihau eshesh.”

**8** “Eshudok douk esheshish apahw urkum shape yopiyopishi madae shur um shenek yoweishi inahos iri, eshesh wosik ta shanadudareh. Umum maresh, eshesh ta shutik Iruhin.”

**9** “Eshudok douk shapeum shiyatak rupanitak iri, eshesh wosik ta shanadudareh. Umum maresh, Iruhin ta nuhwaresh ananish nugashish.”

**10** “Eshudok douk shenek Iruhin nakriyeni yopinyi mour aria namudok ba kupaishi shaesh, shahiyahesh aria shuweshikesh um, eshesh wosik ta shanadudareh. Eshesh douk ta ko shuwish agundok Iruhin nape Debeini um ananish arpesh shapeum heven.” **11** “Ipak douk shutrip pigipesheh eik, ba shuhep shurukwep nubug, shuhiyahesh aria shugiyagim ipak shudukumep nyau nyatograri baraen, aria wosik ipak ta panadudareh.” **12** Ipakish urkum apahw ko shupe wosik atin aria ipak ko gamo punadudareh. Umum maresh, ipak ko purao yopishi eneshenesh gani iruhw heven. Eshesh ta shenekesh um ipak kabi da seiwok shehiyah anam profet harigum ipak iri.”

*Ipak Douk Pene Bilip Aria Pape Kabi Sol Rani Lait Um  
(Mak 9:50; Luk 14:34, 35)*

**13** “Ipak douk pape kabi da sol um abudok amnab. Aria sol kwehig miyair ba mare ta akehir aka nubutir, aria ta menekar mumam ba ta akehir aka nubutir? Arudoki sol arar mour wokar. Aria ta arpesh shuwashar-uguk, aria shishar shukwu esheshiruh yeriweruh.

**14** “Ipak douk pape kabi da lait um abudok amnab. Anabur wabur da betem gani iruhw onohw yoduhw iri ta mare bunubeshuk. **15** Arpesh ta mare shutik eneh nyih aria shushapumeh shukwu anap marup uwe, uwok. Eshesh ko shutik nyih hukus wehiwegigunum, um ta hukesh arpesh lait um ihishmorip arpesh numun urupat. **16** Aria douk ipak ta pupe namudok atin kabi da nyih hanu hakus um. Pupe um punek yopishiyan aria ta arpesh shutrip aria ko shuhur ipakin Yaken ananin nyeigur nyuto gani iruhw douk nape heven iri.”

### *Jisas Nakripesh Baraen Um Iruhin Ananin Lo*

**17** Aria Jisas ta nakri namudok, “Mare pure urkwip namudok eik douk yanaki um iyatakuk Iruhin ananin lo seiwok nakrip Moses ba nenyem iri nyani enyudok baraen seiwok amam profet hakripeschuk-enyi, uwok. Eik douk yanamori inek enyudok baraen douk lo nyani amam profet amamin baraen nyakrium aria nyutograri adurin atin. **18** Douk ipak gamo pumnek enyudok baraen eik adur atin yakripepum! Kweipon heven aria agudok nahobig guniyatak ahi nyumnah, enyudok ihin Iruhin ananin lo kweipon nyupe atin nyupe aria ta mare nyuniyatokuk uwe, Uwok. Enyudok mehimainyi baraen shenyem shus iri aria ihin baraen sheneken nyape lo iri ihinyumorim baraen kweipon nyupe atin nyupe. Enyudok lo kweipon nyupe atin nyupe namudok atin arigaha ihish kupaishi eneshenesh shiniyatokuk agudok nahobig. **19** Namudok aria douk meinyiah arpen nyutik anabikum enyudok shokwinyum ihin Iruhin ananin lo aria nyubrigen nyenek skulum kupaishi arpesh um nyigiyagimeshum shenekehnamudok, enyudok arpen nyenekesh namudok iri enyen kweipon nyeigur shokwin um nyuwish abrudok wabur Iruhin nape Debeini um ananish arpesh shapeum gani iruhw heven. Aria namudok atin um meinyiah arpen douk nyigipesh ihinymorim lo, aria shopunek nyenek skulum kupaishi um enyudok lo, enyenyin nyeigur ko nyutogur debeiniyi um ganik Iruhin nape Debeini um ananish arpesh shapeum iruhw heven. **20** Aria douk adur atin eik yakripep namudok, ipak douk pupeum aria ta mare pugipes Iruhin ananin lo ba baraenum, aria ipakih yopihi aih douk ta mare henek uhwin um douk amam Farisi hani amudok anam henek skulumesh um lo iri henekehi um ba mare punekesh kabi da Iruhin nakri um, aria ipak ta mare puwisch aburdok wabur Iruhin ananish arpesh shapeum heven iri uwe, uwok.”

### *Jisas Nakri Um Agundok Shugabe Baraen Um (Luk 12:57-59)*

**21** Aria Jisas ta nakri namudok, “Ipak douk pumnek seiwok shakrip ipakish popehesh yamehesh um. ‘Mare pubo arpesh shugok. Pubirok namudok um aria ko piyotu um debeigwi kwotog.’ **22** Douk eik yakripep namudok. Ipak amiapen nyukri akas um ananin anokwinen, aria ko shuran shunak um kwot. Aria ipak amiapen pukrip anokwinen namudok, ‘Nyak yoweini’ anan shopunek ko shuran shunak um kwot. Aria amiapen nyuho anokwinen, ba nyukana nyak yoweigunum, anan nape huruhuruk um yoweihy nyih hanugunum gani hel. **23** Aria ipak ko pakana pugabe mishish um Iruhin iri. Ipak pure urkwip pani enesh kupaishi panitok um, aria ipak pubukuk eneshenesh pakana pugabe Iruhin eshi. **24** Ipak purik punak, ba pugabe baraen puni ipakishi aria ko putanam punak pugabe Iruhinin Mishin. Douk akas wata sapenyep obi nyutob mare punam Iruhin.

**25** “Ipak douk enesh arpesh shakana shuraep shunak um kwotog um, aria pugabe baraen adukum kwot, da nyutob wata bape adai. Kadak pukuna piyotu abom um ta shuraep shunak um kwot aria shuko jasep aria jas ko

noko ipakum polis. Aria polis ko haraep hunam shunuweshik-ati urupat aria punuweshik. <sup>26</sup> Aria nagundok ipak ko pupe abom piyatak ipakibor utabor um putor yoweiti shunuweshik-ati urupat.”

### *Jisas Nakri um Arpesh Shunaraum Iri Sheshuh Atugun Shenek Yoweishi Inahos Shani Kupaikwi Kupainari*

<sup>27</sup> Aria Jisas ta nakri namudok, “Ipak seiwok pemnek shakrip arpesh enyudok baraen namudok, ‘Ipak arman armatok punoraum iri mare puni kupaishi arman armatok punek wehrur.’ <sup>28</sup> Aria douk eik yakrip ipak namudok, douk anan arman nushakam onok armatok aria douk anudok arman iganigadea nenek wehrur numun um ananish urkum apahw um okwudok armatok. <sup>29</sup> Aria douk nyakip nabep pape yopunyi rogur ehahi ponuk nyak um nyunek yoweishi inahos, namudok aria douk atin nyutuk apudok nabep ba nyuwashopuk. Namudok wosik um anabik um nyak kanak yowegun ba nyuwashagunuk aria douk madae nyenek yoweishi inahos uwe, uwok, aria ta mare shuwashokuk ihinyum nyak kanak nyubuh gani yoweishi nyih hanu um hel iri. <sup>30</sup> Aria douk nyakin yopunyi rogur nyubirok nyak ba nyuguruki um nyenek yoweishi inahos, namudok aria douk atin nyutupok enyudok rogur ba nyuwashenyuk. Namudok wosik um anabik um nyak kanak yowegun ba nyuwashagunuk aria douk madae nyenek yoweishi inahos uwe, uwok, aria ta mare shuwashokuk ihinyum nyak kanak nyubuh gani yoweishi nyih hanu um hel iri.”

### *Jisas Nakripesh Um Agundok Douk Shabrigesh Eshesh Kanak Da Shana-raum Um*

*(Matyu 19:9; Mak 10:11-12; Luk 16:18)*

<sup>31</sup> Aria Jisas ta nakri namudok, “Seiwok eshesh shakri namudok, ‘Douk anan arman niyatokuk ananik irohukwik, aria anan ta nukok irohukwik anap shup um ta shubrig eshesh kanak eshesh shunoraum um.’ <sup>32</sup> Aria douk eik yakana ikrip ipak namudok, aria douk anudok arman niyatok ananik irohukwik aria douk abudok nyutob ananik irohukwik madae kwonek wehrur kuni anan arman, namudok aria douk anudok arman nenek armatok um kwabrig enyudok shunoraum enyi lo. Umum maresh, ta okwudok armatok kurao kupaini arman, aria okwudok armatok kwonek wehrur um kwani anudok anan arman sheshuh um. Aria ta anan arman nurao onok armatok, seiwok okwokwin raminen niyatokuk iri, anan shopunek nabrig enyudok shunoraum enyi lo aria anan shopunek nenek wehrur um nani okwudok armatok sheshuhum.”

### *Jisas Nakripesh um maresh Shukuna Adur Iruhw*

<sup>33</sup> Aria Jisas ta nakripesh namudok, “Ipak pumnek enen baraen seiwok shakrip ipakish popehesh yamehesh shemnek aria ipak shopunek douk pemnek, enyudok baraen nyape namudok, ‘Nyak mare ta nyigiyagig um agundok ta nyukri adur iruhw um. Aria agundok nyukri adur iruhw um nyakanra nyenek enen mugu um, aria ta adur atin nyigipesh, enyudok baraen aria nyenekesh shutogur adur atin um Debeini ananis nabes.’ <sup>34</sup> Aria douk eik yakrip ipak, douk ipak mare ta piyagwreh pukri adur iruhw. Amu wouwokuk. Ipak mare ta piyagwreh pukri heven um punek enen baraen nyutogur dodogeshin. Umum maresh, Iruhin napayenyi debeinyi wagitur da nyape heven. <sup>35</sup> Aria ipak mare ta piyagwreh pukri agudok nahobig um punek enen baraen nyutogur dodogeshin. Umum maresh agudok nahobig douk kabi da wabur um Iruhin noduk ananiruh yeriweruh heyotu agudok nahobig. Aria shopunek ipak mare ta piyagwreh pukri wabur Jerusalem shopunek um punek enen baraen nyutogur

dodogeshin. Umum maresh, abrudok wabur douk anudok atun Debeini King ananibur wabur. <sup>36</sup> Aria ipak mare ta piyagwreh pukri ipakigos baragos um punek enen baraen nyutogur dodogeshin. Umum maresh, nyak madae nyukana wosik atin um ta nyenek anap nyakip baragitep nyakig barag um ta putogur shigorihwipi aka behrabipi, uwok. <sup>37</sup> Aria ipak ta pukri pukuna ‘Adur’ aria ‘Uwok’ atin. Enyudok atin ipak ta pukriyen aria meyoh. Ihin kupainyi baraen da shiyagwrehen ba shagiayig aria shaduronen um enyudok baraen iri enyudok baraen da nyatograri enyudok yoweinyi sagab Satan da neyagwrehen ba nyatogur.”

*Jisas Nakripesh um maresh Ta Shubeiri Baraen Wanohw Douk Kupaishi Shenekehesh-umesh Iri  
(Luk 6:29-30)*

<sup>38</sup> Aria Jisas ta nakri namudok, “Ipak seiwok pemnek shakri namudok, ‘Douk anan arman nununu kupaini arman ananip nabep, aria anan ko shopunek nutanam nununu nanudok ananip nabep. Aria douk anan arman nudar kupaini arman ananihw nahw, aria anan ko shopunek nutanam nudar nanudok ananihw nahw.’ <sup>39</sup> Aria douk eik yakrip ipak namudok, Ipak mare ta putanam pubeiri nigwanoh, baraen um douk kupaishi shenekesh yowiyokuk um ipak iri, uwok. Aria douk anan arman nubo enesh nyakish popaeshohos, aria nyak nyukonugu wobresh popaeshohos shopunek ba nesh. <sup>40</sup> Aria douk anan arman nakana nenemen kwot aria nutritr nyakit siot, aria nyak shopunek ta nyukonugu nyakit saket shopunek um anan. <sup>41</sup> Aria douk anan arman dodogeshin um nyak ta nyusahumon ananih jah ba nyigim yah nyunak 1 kilomita, namudok aria nyak nyusah jah nyigim yah nyinak 2 kilomita. <sup>42</sup> Aria douk anan arman norig nyak um nyukon enesh muguhwos um anan, aria nyak wosik shukron eshudok muguhwos anan da narigen-meishi. Aria douk anan arman nakana nyukon enesh muguhwos meyoh ba kweipon aria anan ta nutanam nukenyeshi um nyak, aria nyak mare nyukon agab um ananin baraen uwe, uwok.”

*Jisas Nakripesh Um Agundok Apakish Urkum Apahw Shukri Shu-nawasham Apakish Horik Horin  
(Luk 6:27-28, 32-36)*

<sup>43</sup> Jisas ta nakri namudok, “Ipak seiwok pemnek shakri namudok, ‘Ipak ko gamo pukri punawasham ipakishi arpesh atish, aria ipakish urkum apahw ko yoweshum ipakish horin horik.’ <sup>44</sup> Aria douk eik yakriep namudok, ipak douk aria ta putanam pukesh ipakish urkum apahw aria pukri punawasham ipakish horin horik, aria ipak punek beten um eshesh aria Iruhin ta gamo nugabe eshesh douk shenekesh yowiyokuk um ipak iri. <sup>45</sup> Namudok aria ipak ta pupe kabi da Iruhin ananish nugashish um ipakin Yaken douk nape heyen iri. Anan douk nene wah hutao um yoweishi arpesh aria shopunek um yopishi arpesh. Aria anan shopunek nene eshah hormorim um yopishi arpesh aria shopunek um eshudok arpesh da shanahwaram um yoweishi arpesh shopunek. <sup>46</sup> Douk ipak pukuna pukri eshudok arpesh douk shakri ipak atip iri, aria ipak ta purao maresh yopishi? Douk harao takis iri, amam shopunek douk henek apunih aih. <sup>47</sup> Aria douk ipak punek ruwahep wabigep um ipakish wanaruh atish, aria ipak ta punek uhwin um kupaishi arpesh esheshish urkum apahw mumam? Eshesh madae shudukemesh um Iruhin ananin baraen iri douk shenekesh namudok atin. <sup>48</sup> Aria ipak douk ta putogur yopip abom um punek yopishi eneshenesh atin aria pupe kabi da ipakin Yaken nape heyen iri douk nape yopuyopuni abom.”

**6***Jisas Nakripeshum Shusuhw Yopuhwi Ruwohwum*

<sup>1</sup> Aria Jisas nakri namudok, "Ipak ko gamo pudukemesh. Ipak mare pusuhw ípakihw yopuhwi ruwohw yopugunum um ihish arpesh ta shutik uwok. Douk punekesh namudok, aria ipak ta mare purao yopishi enesh-enesh um ipakin Yaken douk nape heven iri, uwok.

<sup>2</sup> "Aria douk ipak pakana pukes heneshenesh um eshudok douk enesh-enesh wokeshi, aria shopunek mare pukrip arpesh shurik shunak ba shuhwar shukripesh um nyak nyenekesh namudok kabi da enesh arpesh shabirak um gani numun lotuig urusag aria gani debeihi yeh. Eshudoki arpesh shakana shigiyagim ihish arman armatok, aria eshesh kupaikwi kupainari ta shukana eshudoki arpesh da yopishi aria shuhur esheshish nyeiguhw shuto gani iruhw. Eik yakriep adurin baraen, eshudoki arpesh douk sharao esheshishi yopishi eneshenesh aria jurug. <sup>3</sup> Douk nyakana nyutaurum eshudok jah eneshenesh wokeshi, aria douk ruwohw nyasuhwi nyakin yoweinyi rogor mare nyudukemesh um marohw ruwohw douk nyakin yopuni rogor nyasuohwi. <sup>4</sup> Namudok aria enyudok mour um shutaurum jah um eneshenesh wokeshi douk nyubeshuken nyeneken iri ta nyupe nyunubeshuk-igunum. Aria ta nyakin Yaken nutik eneshenesh shape nyunubeshuk-igunum iri, aria anan ko nuken yopishi eneshenesh um nyak."

*Jisas Nakripesh Um Agundok Shunek Beten Um  
(Luk 11:2-4)*

<sup>5</sup> Aria Jisas nakri namudok, "Ipak pakana punek beten um, aria ipak mare punekesh kabi da amudok hagiayigi henekeshum. Amam hakana hiyotu henek beten numun um lotuig urusag aka hiyotu agundok worobaishi arpesh sharahaen um debeihi yeh um kupaishi arpesh shutrum. Eik yakriep adurin baraen um ipak, amudok iganigadae harao amamibor utabor jurug. <sup>6</sup> Aria douk pakana punek beten um, aria puwih ipakig urusag aria puwaru witog aria punek beten um ipakin Yaken douk nape nonobeshuk-igunum. Aria ipakin Yaken douk apa natik eshudoki, anan ta gamo nugabe ipak nukep ipakish yopishi eneshenesh. <sup>7</sup> Aria abudok nyutob ipak pakana punek beten obi nyutob, aria mare punek beten piyawreh sabain atin baraen meyoh, namudok eshudok madae shudukumesh um Iruhin iri shabirak um. Esheship urkwip por namudok eshesh ta shiyagwreh sabainyi baraen aria Iruhin ta numnek eshesh. <sup>8</sup> Ipak mare pugipes hesh da shenekeshum, uwok. Douk ipak madae pupuk ipakig nukwatog obi nyutob um porig ipakin Yaken um enesh eneshenesh, aria anan iganigadae nadukemesh um ihish eneshenesh ipak douk wokeshi.

<sup>9</sup> "Ipak pakana punek betenum, aria punek beten namudok. 'Apakin Yain, nyape iruhw heven iri, apak makri ihishmorim arpesh shutuk nyakin yopuni nyeigur nyape holi iri nyuto gani iruhw.

<sup>10</sup> Apak makri nyak nyupe debeini um sabaishi arpesh. Apak mape atap iri makri mugipes nyakin baraen atin, kabi da eshesh shape iruhw heven iri shenekesh um.

<sup>11</sup> Douk nyukop doukigun worigun ahudok atuh nyumnah.

<sup>12</sup> Aria nyukweshih-umap ihish yoweishi inahos apak monekesh iri, kabi da apak shopunek menekesh um kupaishi shenekeshomap iri.

<sup>13</sup> Aria nyak mare ta nyukrip yoweinyi sagab Satan um nukwiraeh apak ba munek yoweishi inahos uwwe, uwok.

Aria nyak nyutaurum apak nyukrip Satan um ta mare nunamori apak aria nyukweshihuk yoweishi inahos um apak.  
 [Nyak atin nyape nyohwar arpesh um shuwish agundok nyak nyape Debeinarium nyakish arpesh um, aria nyak dodogowinyi abom aria sabaishi arpesh shatuk nyakin yopunyi nyeigur nyape holi iri nyuto gani iruhw ihih nyumneh. Adur atin.]

<sup>14</sup> “Pumnek. Douk ipak puwaromesh kupaishi shenekeshi yoweishi inahos, aria ipakin Yaken nape heven anan ta nukweshih ipakish yoweishi inahos shopunek. <sup>15</sup> Aria douk ipak mare pukweshih yoweishi inahos um eshesh kupaishi arman armatok, aria ipakin Yaken shopunek ta mare nukweshih ipakish yoweishi inahos.”

*Jisas Nakripesh Um Agundok Shashakur Um Worigun Eneh Nyumneh  
 Aria Shunek Beten Atin Um*

<sup>16</sup> Jisas nakri namudok, “Douk pakana pushakur um worigun eneh nyumneh, aria ipakigos yomogos mare yowegos kabi da arpesh shagiagigi shenekesh um. Esesh shenek esheshigos yomogos yowegos, aria ihish arpesh shutrish aria shudukemesh namudok eshesh da shushakur um worigun. Eik yakriep um adurin barea ipak, eshesh iganigadae sharao yopishi eneshenesh aria jurug. <sup>17</sup> Aria ipak douk pakana pushakur um worigun, aria pukrup yomogos ba puwem yopuri wel ipakigos baragos. <sup>18</sup> Namudok aria ihish arpesh ko mare shudukemesh namudok ipak da pushakur um worigun. Aria ipakin Yaken da nape nunubeshuk-igunum iri, anan atun ko nudukemesh. Aria ipakin Yaken apa natik eneshenesh shunubeshuk iri, anan ko nukek yopishi eneshenesh um ipak.”

*Jisas Nakripesh Um Yopishi Eneshenesh Shurimesh Shushubuk Heven Iri  
 (Luk 12:33-34)*

<sup>19</sup> Jisas nakri namudok, “Ipak mare putorum yopiyopishi eneshenesh ipakish aria pushubuk atugun agundok um agudok nahobig, uwok. Puneshubuk agundok um yomiyamish aria ros ko shununish, aria eshudok shakwaruhi ko shubrig narub urusag ba shukwumesh aruh. <sup>20</sup> Namudok aria ipak ko putorum yopiyopishi eneshenesh aria pushubuk atugun gani iruhw heven. Umum maresh, gani iruhw heven yomiyamish aria ros ko mare shununish aria eshudok shakwaruhi ko mare shubrig narub urusag ba shukwumesh aruh uwe, uwok. <sup>21</sup> Aria abrudok wabur eshudok yopiyopishi eneshenesh ipakish shakus aburi, aria douk abrudok wabur atubur ko ipakish urkum apahw ko shunuwasham-agun abom um ta shupe.”

*Arpeshis Nabes Asas Douk Kabi Enen Lam Um  
 (Luk 11:34-36)*

<sup>22</sup> Aria Jisas ta nakri namudok, “Nabes sape kabi da lam um ipakiruh yegeshiweruh. Aria douk ipakis nabes yopusium, ta lait shunukit ihigunum ipakiruh yegeshiweruh. <sup>23</sup> Aria douk ipakis nabes yowes, aria ihigun um ipakiruh yegeshiweruh ta hupeim arukwut. Namudok aria douk atudok lait tipe numuninyum douk kabi da arukwut um, aria ta atudok arukwut ko tutogur debeiti abom.”

*Anan Arman Ko Mare Wosik Um Neneck Mour Um Biom Takwiym Atugun  
 (Luk 16:13)*

<sup>24</sup> Jisas nakri namudok, “Madae anan arman douk ta wosik um nupe shukam um biom takwiym atugun uwe, uwok. Aria ta ananish urkum apahw shukri anan aria yowesh um naniganan. Aria ta numnek bareaen

um anan aria nukon agab um naniganan. Aria ipak douk shopunek ta mare puwo shukam um Iruhin aria utabor shopunek uwe, uwok.”

*Jisas Nakripesh Um Agundok Eneshenesh Wokesha Aria Eshesh Urkwip Yowep  
(Luk 12:22-31)*

<sup>25</sup> Aria Jisas nakri namudok, “Namudok aria eik yakripep, ipak mare urkwip aparuh yowesh um ipak kanak aria pakri, ‘Douk ta apak muwok maresh muguhwos? Aria ta muwok marabar abar?’ Aria mare urkwip aparuh yowesh um ipakiruh yegeshiweruh aria pakana, ‘Douk ta muwah mireh rupeh?’ Enyudokmori ipak mare ta piyagwrehen atin uwe, uwok. Ipak douk ta mare pupe dodogowip um rupeh hani worigun atish aria pupe roubi nyutob agundok atap uwe, uwok. Ipak purik gamo pupe yopip abom ba iyoh aria eshudok ko pugiguk pure urukumomesh. <sup>26</sup> Ipak douk putik armiguhw hwohwebur iruhw iri. Ogwoguh madae hwu worigun uwe, uwok. Aria ogwoguh madae hutorumogun ba hugunubuk shawok worigun ati urupat uwe, uwok. Ogwoguh douk ipakin Yaken nape heven iri nukoguh worigun. Aria ipak douk peshagrakuk armiguhw, aka uwok? <sup>27</sup> Aria douk enen um ipak enyeniyish urkum apahw shor shunak yoweshum ta nyupe anagun shopunek banogun nyutobigun nyupe agundok atap nyishagrakuk abudok nyutob douk ko nyugok obi? Namudok ta uwok.

<sup>28</sup> Aria umum maresh ba ipakish urkum apahw yowesh um rupeh? Ipak ko putik kabi da eshudok wanorish aruruhih shatogur um. Eshesh douk shatogur mumam? Eshesh madae shunek enen debeinyi mour uwe, uwok. Eshesh madae shenek rupeh uwe, uwok. <sup>29</sup> Aria douk eik yakrip ipak, seiwok King Solomon nere sabaihwi yopuyopuhwi ananihw suruhw ba uwok, eshudok aruruhih shenek uhwih um Solomon ananihw suruhw. <sup>30</sup> Aria douk aruhudok utoruh hape ihigunmorim, aria nuhut atin arpesh ta shutuporuh aria shuwashoruh um nyih hunuruh. Aria aruhudok utoruh douk Iruhin naginohwaruh. Namudok aria ipak armam armago papeum shokwinyi bilip meyoh, ipak douk gamo pudukemesh namudok, Iruhin ta gamo nuginohw ipak shopunek. <sup>31</sup> Namudok aria ipak mare ipakish urkum apahw shor shunak yowesh aria pukana, ‘Ta apak muwok maresh? Ta apak muwok marabar abar? Ta apak mure mireh rupeh? Uwok.’ <sup>32</sup> Eshesh eshudok madae shudukemesh um Iruhin iri eshesheko eshesheish urkum apahw ta yowesh um shurim eshudok ihish eneshenesh. Douk ipakin Yaken nape iruhw heven iri anan iganigadae nadukemesh jurug um eshudok ihish eneshenesh ipak wokeshi. <sup>33</sup> Aria douk nyarik iri mugu ipak ta ko gamo punekenyi douk nyakri namudok. Ipak pupe dodogowip atip um puwish agundok Iruhin nape Debeini um ananish arpesh um aria punek yopihi atih aih. Ipak purik punek enyudok aria ihishmorim eneshenesh eshudok ta anan nukepesh shopunek um ipak. <sup>34</sup> Namudok aria ipak mare urkwip aparuh yowesh um maresh ta shutogur nuhut, uwok. Umum maresh, eneshenesh ko shutogur nuhut iri nyunekesh wokish shutogur nuhut. Aria maremaresh eneshenesh shakana shutogur doukih nyummah iri nyunekesh wokish shutogur douk.”

## 7

*Jisas Nakripesh um maresh Shuduk Heh Um Kupaishi Arpesh Sheneh Yoweishi Inahos Um  
(Luk 6:37-38, 41-42)*

<sup>1</sup> Aria Jisas nakri namudok, “Ipak mare pusuhw wis ba puduk heh aria bareaen um kupaishi ba pakana eshesh da yoweishi, uwok. Ipak penekesh

namudok aria Iruhin ko ta nenekeh namudok atin um ipak shopunek. <sup>2</sup> Iruhin ko nusuhw wis aria nuduk hah aria baraen um ipak kabi da ipak penekeshum kupaishi arpesh um. Aria ahudoki atatahiah aih, baraen atish ipak da penekesh um kupaishi arpesh iri, ahudok atatahiah aih, baraen atish ko Iruhin nutanam nenekeh um ipak namudok atin shopunek.

<sup>3</sup> “Umum maresh, ba ipak patik mehimainyi nyubuhasin nyor ipakin anokwinen ananip nabep iri, aria ipak da madae urkwip purum debeipi rowogip aidap da por ipakis nabes iri? <sup>4</sup> Aria douk aidap por ipakis nabes, aria umum maresh ba ipak ta pukrip ipakin anokwinen, ‘Anokwin, eik yakana itukuk nyubuhas da shor nyakip nabep iri?’ <sup>5</sup> Ipak douk penek rohw iri aria pagiyagigi. Riguk ipak ta putukuk debeipi rowogip aidap por ipak kanak ipakis nabes iri ba jurug. Aria kwehig ba gamo putik aria ko putukuk shokushi nyubuhas da shor ipakin anokwinen ananip nabep iri.

<sup>6</sup> “Ipak mare puhur yopiyopishi eneshenesh shugraeheshum Iruhin iri, aria puko nubagwesh. Umum maresh, nubag ta gutanom aria gunatuk ipak. Aria ipak mare puwashok yopiyopibi ipakib weiyoub bunam burguhw. Um maresh, ogwogwuhw ta hwusish weiyoub hurukutunab hwukwu ohwip.”

### *Jisas Nakripesh Um Shenek Beten Um Iruhin Aria Ta Nukesh Yopiyopishi Eneshenesh*

(Luk 11:9-13)

<sup>7</sup> Aria Jisas nakri namudok, “Ipak penek beten aria porig Iruhin um ta nukep eneshenesh, aria anan ta nekepesh. Ipak penek mour dodog um purim eneshenesh aria ta putrish. Ipak pubo wit, aria Iruhin ta nujik wit um ipak. <sup>8</sup> Ihish arpesh shenek beten um Iruhin iri, eshesh ta shurao eneshenesh. Arpesh shenek mour dodog um shurim eneshenesh iri, eshesh ta shutrish. Arpesh ko shubo wit iri, Iruhin ta nujikomesh wit.

<sup>9</sup> “Aria ko enen batowin um enen arpen um ipak ko nyorig enyenyin yaken um nuken bret, aria ko yakenomen nuken utomum batowin aka? Namudok ta uwok. <sup>10</sup> Aria ko batowin nyorig yaken um nuken anar eyur, aria ko yakenomen nuken anar yoweiri yur aka? Namudok shopunek ta uwok. <sup>11</sup> Ipak yakenyim penek sabaishi yoweishi eneshenesh iri agudok nahobig, aria ipak madae pigiyagim batowish uwe, uwok. Aria ipak padukemesh um pukesh yopishi eneshenesh um ipakish nugashish. Namudok aria ipak ta gamo pudukemesh namudok, ipakin Yaken da nape heven iri anan ta nunadudareh um nukep yopiyopishi eneshenesh um arpesh shenek beten um anan iri.

<sup>12</sup> “Namudok aria iih yopipi aih ipak pakana ta kupaishi arpesh shenekeh um ipak, aria ehudoki atih yopipi aih ipak ta punekuh um kupaishi arpesh shopunek. Enyudok douk baugenylum baraen um lo, aria enyudok douk shopunek baugenylum baraen um seiwok profet hakriyenyi.”

### *Jisas Nakripesh Um biyeh Yeh*

(Luk 13:24)

<sup>13</sup> Jisas nakri namudok, “Ipak punak puwish atudok shokwuti wit. Aria wit douk tunam yoweishi yah ta punak puwishukuk ahi ahudok debeihi yah, douk sabaishi arpesh shatik shokubur um shakana shigimoh. <sup>14</sup> Aria wit tunam abrudok yopuburi wabur iri um arpesh shunak shupe wosik yopinyi poe iri, atudok wit shokukutet abom iri, aria yah hunam abrudok wabur iri shopunek sabaishi arpesh madae shigimoh uwe, uwok. Aria douk atin atin arman armatok wosik shatik shadukemesh aria shagim ahudok yah.”

*Apak Ko Gamo Mudukemesh Um Amudok Henek Rohw Aria Hagiyagigi  
Profet Um Amamin Baraen  
(Luk 6:43-44, 13:25-27)*

<sup>15</sup> Aria Jisas ta nakri namudok “Ipak ta gamo pudukemesh um amudok hagiayagigi profet. Amam ko hiyagwreh yopinyi baraen um honuk ipak. Amam hakana ta hiyagwreh higiyagig um ipak aria honunip. Amam kabi da wanarig nubag um gwure sipsipihw yegenyihw, aria ta gwunak huruhuruk um eshesh sipsipahos aria ta gwusuwesh. <sup>16</sup> Ipak ta ko putik kabi da hiyagwreh henek eneshenesh um aria ta pudukemesh, amudok da hagiayagigi profet, aka uwok? Aria ko pudukemesh. Arpesh ta shunam segego watogur-aruhi madururuh aria ta shudi wainip shuruwep, aka? Aria arpesh ta shakana shudi shuruwep peir rowog da nyunuhwarom fik iri, aka ta shunam nyugwugwus-ruhi yoweiruhi utoruh? Namudok uwok. <sup>17</sup> Namudok atin ihigosum yopugosi rowos sobuki yopipi shuruwep. Aria yoweigosi rowos sobuki yoweipi shuruwep. <sup>18</sup> Yopugosi rowos ko mare subuki yoweipi shuruwep. Aria yoweigosi rowos ko mare subuki yopipi shuruwep. <sup>19</sup> Ihigos rowos da madae subuki yopipi shuruwep iri, eshesh ta shubro-ogos aria shuwashogos sunam nyih ko hunugos. <sup>20</sup> Namudok aria ipak ta gamo putik amam da henek eneshenesh um aria hiyagwreh um aria ta pudukemesh um amudok henek rohw ba hagiayagigi profet.”

*Jisas Nakripesh Um Eshudok Arpesh Anan Ko Mare Nuhwaresh Ananish  
Arpesh Iri*

*(Luk 13:25-27)*

<sup>21</sup> “Ipak mare pur urkum apahw namudok. Ihish arpesh da shuhware, ‘Debeini, Debeini,’ aria eshesh ta shunak shuwish agundok Iruhin nape Debeini um ananish arpesh shapeum heven, uwok. Arpesh shagipesh eikin Yain ananin baraen iri aria ananish urkum apahw shakri um gani heven, eshesh atish ko shuwish agundok Iruhin nape Debeini um ananish arpesh um. <sup>22</sup> Nohudok nyumannah Iruhin ananilh kwotogwih nyumannah, sabaishi arpesh ko shukrip eik namudok, ‘Debeini, Debeini,’ apak seiwok masuhw nyakin mour profet um nyakin nyeigur. Umum nyakin nyeigur apak mohiah yoweishi sagabehos. Umum nyakin nyeigur apak menek Iruhin atun neneken iri mour. <sup>23</sup> Aria um abudok nyutob eik ko ikripesh namudok, ‘Eik madae idukem ipak uwe, uwok. Ipak eshudok arpesh da apa pape penek yoweishi inahos atish iri, ipak karuwokuk um eik!’”

*Jisas Nakripesh Wobuwobren Baraen Um Biom Armam Harok Urusag Iri  
(Luk 6:47-49)*

<sup>24</sup> Jisas nakri namudok, “Ipak amiapen pumnek enyudok eikin baraen iri aria pigipeshen, enyen kabi da enen arpen yopugi barag gorenyi, nyarok enyenyit urupat totem utaborigunum. <sup>25</sup> Aria eshah harari, dodogowinyi uhwin nyahur, aria uhwin eshah shabo atudok urupat. Aria atudok urupat madae tutu uwe, uwok. Umum maresh? Arpen nyarok urupat utabor bor amnab iri buwapom urupat aria dodogeshit atut. <sup>26</sup> Aria arpen da nyemnek enyudok elkin baraen aria madae nyigipeshen, enyen kabi da enen nyogugaki arpen nyarok enyenyit urupat totem arukot atut takusum. <sup>27</sup> Aria debeishi uhwin eshah shatogur aria debeibusi worubus sawori, aria shadigur atudok urupat. Aria atudok urupat tanadigur tabuh takus atap aria tutukarot yowiyokuk.”

*Jisas Ananin Dodog*

<sup>28</sup> Aria Jisas neyatok ihin baraen um eshudok eneshenesh, aria iihish armam armago esheshish urkwip aparuh shakitak yowiyokuk um ananin baraen. <sup>29</sup> Umum mares? Anan madae niyagwreh nukesh skul kabi da amudok henek skulumesh um Iruhin ananin lo iri uwe, uwok. Aria anan da neyagwreh kabi da anan debeini morim.

## 8

### *Jisas Nagapesh Anan Um Ehudok Yoweih Arugeh Lepra Hapenyan Iri Arman*

(Mak 1:40-45; Luk 5:12-16)

<sup>1</sup> Aria Jisas nakitak nabuhi mihib, aria sabaishi arpesh shagipesan shanak. <sup>2</sup> Aria anan ehudok arugeh lepra hapenyan iri nanaki um Jisas aria nabuh noduk ohrubus huruk um Jisas aria nakri namudok, “Debeini, nyak nyukri wosik um, aria nyak ko nyugapeshe aria ta eik yopuwe.”

<sup>3</sup> Aria Jisas nuwem ananis wis anudok arman aria nakripan namudok, “Eik yakri wosik um nyak nyutogur yopunyi arpen.”

Aria atub nyutob ehudok arugeh lepra haniyatokuk um anan, aria natogur yopuni arman. <sup>4</sup> Aria Jisas nakripan namudok, “Nyak ko gamo nyudukemesh. Aria mare nyukrip enen arpen um eshudok eneshenesh da shatogur um nyak iri, uwok. Nyak kare ba nyiyabig nyakihw yegenyihw um anan pris aria nyenek ofa kabi da seiwoh Moses nakri um. Nyunekesh namudok um aria arpesh ko shudukemesh namudok nyakih arugeh iganigadae hatuh.”

### *Jisas nagapesh Anan Arman Douk Neneh Mour Um Anan Debeini Soldia Iri*

(Luk 7:1-10)

<sup>5</sup> Jisas nanak nawish wabur Kaperneam aria anan debeini soldia um amam 100-poreim soldia iri um Rom esheshin ami anan nanaki aria narik Jisas debeg namudok, <sup>6</sup> “Debeini, anudok neneme mour um eik iri, arugeh hapeyan aria neshuh nakus urupat. Aria anan nemnek ananihw yegenyihw erigerishihw atuhw.” <sup>7</sup> Aria Jisas nakri namudok, “Wosik eik ko inak ba igabeyan aria yopun.”

<sup>8</sup> Aria anudok debeini soldia nakrip Jisas namudok, “Debeini, eik madae yopuwe iri uwe um nyak nyunaku nyuwish eikit urupat uwe, uwok. Nyak nyukri baraen atin aria anudok arugehin neneme mour iri ko ta yopun. <sup>9</sup> Umum mares? Eik shopunek yenek mour um ami aria anam debeimi heyotu harig um eik. Aria eik shopunek eik kanak debeini um anam kupaimi soldia. Aria eik ikrip anan, ‘Nyak kare,’ aria anan ta nunak. Aria eik ikrip kupainari, ‘Nyak yowi,’ aria anan ta nanaki. Aria eik ikrip anudok neneme mour eik iri, ‘Nyak nyenek enyudok mour,’ aria anan ta neneken.”

<sup>10</sup> Jisas nemnek enyudok baraen aria nakitak yowiyokuk. Aria nakrip eshudok arpesh shagipesan iri namudok, “Eik yakripep adurin baraen, eik nubo madae itik enen arpen orokohun um eshesh Israel um nyenek bilip dodog kabi da anudok arman um uwe, uwok. <sup>11</sup> Aria eik yakrip ipak, sabaishi arpesh shape nahobigos gani aun nakih-morim aria gani aun nabuhum ta shanaki, aria eshesh ta shunaki shupe shuwok worigun shuni Abraham nini Aisak aria Jekop abrudok wabur Iruhin nape Debeini um ananish arpesh shapeum heven. <sup>12</sup> Aria ipak Juda pakana puwish pupe agundok Iruhin ananish arpesh shupe um. Aria enep um ipak Iruhin ko nipuhur nowashep putogur aduk um arukwutibur wabur. Aria nabrudok wabur eshesh ko shureh yowiyokuk aria shurapk naruh shuwegoruh.”

<sup>13</sup> Aria Jisas nakrip anudok debeini soldia namudok, “Nyak douk kare. Aria ihish eneshenesh ta shutogurum nyak kabi da nyenek bilip um.”

Aria douk abudok atub nyutob anudok arman nenen mour um debeini soldia iri arugeh hatuh aria natogur yopunyi arpen.

### *Jisas Nagabe Pita Ananik Nakwurikwik Yopuk*

(Mak 1:29-31; Luk 4:38-39)

<sup>14</sup> Aria Jisas nanak nawish Pita ananit urupat, aria natik Pita ananik nakwrikwik kweshuhw kwotem aras, okwok da arugeh hapeyok aria okwokwihw yegenyihw juwehosihw atuhw. <sup>15</sup> Aria Jisas nasuhw okwokwis wis aria okwokwihw arugeh hatuh. Aria okwok kwakitak kwape kwoneku-man Jisas worigun.

### *Jisas Nagabe Sabaishi Ehudok Arugeh Henekeshi Shatogur Yopish*

(Mak 1:32-34; Luk 4:40-41)

<sup>16</sup> Douk wabigep hurukatin um wab aria shape sharauri sabaishi yoweishi sagabehos shapenyeshi arpesh shanamari Jisas. Sharaesi aria nakripesht atin baraen meyoh aria eshudok yoweishi sagabehos shatogur sharuwok. Aria anan nagabe ihishmorim arugeh da hapeyeshi. <sup>17</sup> Anan douk nenen enyudok um enen baraen seiwok profet Aisaia neyagwreh-enyuk aria nyatogur adurin atin. Baraen enyudok, Iruhin nakri namudok, “Anan meyoh nahiayahuk yomo yomogih apakih arugeh nagabeyap um yopup.”

### *Jisas Nakrium Agundok Arpesh Shukri Shugipesh Anan Um*

(Luk 9:57-62)

<sup>18</sup> Jisas natik sabaishi arpesh shanaki sheyatuh shersharian aria nakrip ananim disaipel um hunam gani wobrag Galilieg waiyag. <sup>19</sup> Aria anan nenen skulumesh um lo iri nanaki nakrip Jisas namudok, “Tisa, ihigun nyak nyunak um, eik shopunek ta inamen unak atin.”

<sup>20</sup> Aria Jisas nakri namudok, “Wanarig nubag gweshuh nuwagos-igunum. Aria armiguhw huhwebur iruhw aria shopuk hweshuh was. Aria Eik Anudok Arman douk yatogur adurinyi arpen iri, eik douk urupat uwok um inak ishuh ipeum, uwok.”

<sup>21</sup> Aria kupaini arman apa nagipesh Jisas iri ta nakripian namudok, “Debeini, eikin yain watak nape. Nyak yotum eik ba inak ba itrun anan nugok ba iroman ba iyoh aria inaki inamen unak.”

<sup>22</sup> Aria Jisas nakripian namudok, “Nyak bukeshuk. Eshesh shagok iri, eshesh ko shurom eshesh kanak. Nyak yowi douk ba nyigipesh eik.”

### *Jisas Naho Debeinyi Uhwin Eshah Um Jurug*

(Mak 4:35-41; Luk 8:22-25)

<sup>23</sup> Aria Jisas naprok nato anat bot, aria ananim disaipel shopunek hato bot aria heiran hanak. <sup>24</sup> Hanak orokohun um waiyag, aria atub nyutob enesh uhwin eshah shakitak shohur waiyag aria debeibi morub jirigarab bawish bot aria bot hurukatinyum tubuhuk waiyag. Aria Jisas anan douk neshuh notem bot. <sup>25</sup> Ananim disaipel hanak henyubarun aria hakripian hakana, “Debeini, kwakitak ba nyutaurumap. Apak hurukatinyum ko mugok.”

<sup>26</sup> Aria Jisas nakripian namudok, “Ipak panogugur um maresh? Ipak douk madae punek bilip um eik uwe, uwok.”

Nakripian namudok aria ta naktak naho eshudok debeishi uhwin eshah shani morub. Namudok aria uhwin eshah shagok shabuh. Aria waiyag ta gabuh gor shemshem.

<sup>27</sup> Aria amam disaipel hikitak yowiyokuk ba minih ham meyoh. “Anudok meini arman aria uhwin eshah ba waiyagib morub shopunek shomnek ananin bareaen!”

*Jisas Nagabe Biom Armam Yoweishi Sagabehos Shapenyam Iri  
(Mak 5:1-20; Luk 8:26-39)*

<sup>28</sup> Aria Jisas nanak natogur gani wobur ehahum Galilieg waiyag gani Gadara eshesig nahobig aria biom armam hape wonugwegwiruh um iri hatogur hanaki hatik Jisas. Amudok biom, yoweishi sagabehos shawisham ba dodogeshim atum. Arpesh shanogugur aria madae shugim nohudok yah uwe, uwok. <sup>29</sup> Amam hatik Jisas aria huhwar debeg, “Nyak Iruhin ananin Nuganin nyak nyakana nyenekap mumam apak? Abudok nyutob nyak nyanaki um nyop nyihiyahap obi nyutob da madae butogur uwe, uwok.”

<sup>30</sup> Huruk um nagundok anogwuh burguhw hwetu apa hwashohagun.

<sup>31</sup> Aria eshudok yoweishi sagabehos shunokrep Jisas, “Nyak nyakana nyihiyah apak mutogur munak um, aria nyak shopukap munak muwish gwagwuhwudok burguhw.”

<sup>32</sup> Aria Jisas nakripesh namudok, “Ipak togur kare.”

Aria eshudok yoweishi sagabehos shakutukuk amudok biom armam, aria shatogur shawish burguhw. Aria agwuhwudok ihigwuhw um burghw hwahur debeg abom hwanak hwaporok hwabuh enen natogur gani yowegunum. Aria hwabuh Galilieg waiyag hwabaruhk aria hwagok.

<sup>33</sup> Amudok hape hako burguhw iri hatik namudok aria haruwok. Amam hanak hatogur wabur aria hakrip armam armago um eneshenesh da shatogur iri. Hakripesh um maresha shatogur um amudok biom yoweishi sagabehos shapeyomi shopunek. <sup>34</sup> Aria ihish arpesh shape abrudok wabur iri shanamori Jisas. Eshesh shatrun aria shakripan um nukutukuk eshesig nahobig ba nanak kupaigenum.

## 9

*Jisas Nagabe Anan Douk Roguhw Aiwas Shagokan Iri  
(Mak 2:1-12; Luk 5:17-26)*

<sup>1</sup> Aria Jisas ta naprok anat bot, aria nutanam nabinawish gani wobrag Galilieg waiyag aria nanak natogur abrudok wabur da napeyabur iri. <sup>2</sup> Aria anam armam husahi anan roguhw aiwas shagokan iri notemi anas aras. Aria Jisas natik amudok da adur atin henek bilip aria nakrip anudok arugeh hapeyoni namudok, “Nuganin, nyakish urkum apahw ko shupe wosik atin. Nyakish yoweishi inahos eik douk yokweshihesh yeyatesh iyoh.”

<sup>3</sup> Aria anam douk henek skulumesh um lo iri hemnek Jisas ananin bareaen, aria hiyagwreh um amam kanak namudok, “Anudok arman douk nabubunim Iruhin.”

<sup>4</sup> Aria Jisas nadukemesh um amudok amamish urkum apahw shor ahi aih aria nakri namudok, “Umum maresh? Ba ipakish urkwip aparuh yowesh um enyudok eikin bareaen? <sup>5</sup> Maren bareaen enyen wosik shokubur um eik ta ikriyen? Wosik um eik ta ikana, ‘Eik yokweshih nyakish yoweishi inahos,’ aka douk wosik shokubur um eik ta ikana, ‘Nyak kitak ba nyurahaen?’ <sup>6</sup> Aria eik yakana ipak ta pudukemesh namudok, Eik Anudok Arman douk yatogur adurinyi arpen iri yasuuhw dodogum agudok nahobig aria eik ta wosik um ikweshih yoweishi inahos.”

Aria Jisas nashakom anudok roguhw aiwas shagokan iri aria nakrip namudok, “Nyak kitak aria nyuhur nyakish shuhish, aria kare nyunam nyakit urupat!”

<sup>7</sup> Aria anudok arman nikitak nanak wabur. <sup>8</sup> Eshudok ihish arpesh shatik namudok aria shanogugur. Aria eshesh shohur Iruhin ananin nyeigur nyato gani iruhw. Umum maresh? Anan da nukesh enyudoki dodog um arpesh shenek enyudoki mour.

*Jisas Nakrip Matyu Um Nigipeshan  
(Mak 2:13-17; Luk 5:27-32)*

<sup>9</sup> Jisas nakutukuk nagundok aria nagim yah nanak aria natik anan naraø takis iri arman, nyeigurinum Matyu, nape apa shurao takis ati urupat. Aria Jisas nakripan namudok, “Nyak yowi bá nyigipesh eik.”

Aria Matyu nikitak nanak nagipesh Jisas.

<sup>10</sup> Hanak aria abudok nyutob Jisas nani ananim hantorum hape Matyu ananit urupat hape hawok worigun. Worobaimi harao takis iri hani eshudok shenek yoweishi inahos iri shanak shanamam shape shawok worigun. <sup>11</sup> Aria anam Farisi hatik namudok aria harig ananim disaipel namudok, “Yaipo, ipakin Tisa douk nani amam harao takis iri hani eshudok shenek yoweishi inahos iri shape atugun aria shawok worigun. Anan nenekeh namudok um maresh?”

<sup>12</sup> Jisas nemnek enyudok baraen aria nakri namudok, “Arpesh arugeh wokeshi, eshesh madae shunam dokta uwe, uwok. Eshudok arugeh hapeyeshi atish eshesh ko shunak um shutik dokta. <sup>13</sup> Ipak kare ba putik baraen nyape Iruhin ananik buk, ‘Eik yanaiwos um ipakin wehinyi ofa ipak apa penekenyi. Eik yakri abom um ipak penek giha aria pusuhw yopuhwi ruwohw um ihish arpesh.’”

Aria Jisas ta nakri namudok, “Eik madae inamorim ihwar yopishi arpesh atish uwe, uwok. Eik yanamorim ihwar eshudok arpesh shenek yoweishi inahos iri um shutanam shukon aparuh Iruhin aria shutogur ananish arpesh.”

*Jisas Nakripesh Um agundok Shashakur Um Worigun Eneh Nyumneh  
Aria Shunek Beten Atin Um  
(Mak 2:18-22; Luk 5:33-39)*

<sup>14</sup> Aria abudok nyutob Jon nenekeh Baptaisumesh iri ananim disaipel hanamori Jisas aria harigan namudok, “Umum maresh? Ba apak mani Farisi apak mushakur um worigun, aria nyakim disaipel madae hushakur uwe, uwok?”

<sup>15</sup> Aria Jisas nakripam wobuwobren baraen namudok, “Abudok nyutob anan arman narao onok armatok obi aria ta ananish wanaruh ta urkwip aparuh yoweshum anan douk wata nani eshesh shapeum aka uwok? Namudok ta uwok. Aria anob nyutob, enesh arpesh shunaki shurao anudok arman shunakuk aria anan madae ta nini ananish wanaruh shupe, aria eshesh ta shushakur um worigun.

<sup>16</sup> “Madae enen arpen ko nyuhur anap namupi rupahip aria nyutapeyop um onohw umunihw um jugwaitori saket. Enyudok arpen nyibirak namudok akure, aria ko nyukrup saket aria apudok rupahip ko punokunish aria pubrig saket aria umunihw ko hwutogur dedebehw atuhw. <sup>17</sup> Aria madae enen arpen nyushar namuni wain um jugwaipi memeip munuhwip uwok. Enyudok arpen nyenekesh namudok, aria apudok munuhwip ta purop aria wain ta nutaurakuk nubuh amnab aria apudok memeip munuhwip ta yowep shopunek. Namudok aria enyudok arpen ko nyushar namuni wain nubuh namupi memeip munuhwip aria ta biyebiyesh shupe wosik atin.”

*Jisas Nagabe Onok Armatok Douk Kwasusuhw Ananih Rupah Iri Aria  
Nohuri Onok Batowinyik Kwagok Iri Kwakitak  
(Mak 5:21-43; Luk 8:40-56)*

<sup>18</sup> Jisas wata apa niyagwreh nari Jon ananim disaipel aria anan debeini douk debeini um atudok eshesh Juda shantorum ati urupat iri nanaki natu nabuh noduk ohrubus hurukatin um Jisas ananigas aiyas. Aria nakri, “Eikik nugawik douk atin kwagok. Eik yakri wosik um nyak nyunaku nyuwem nyakis wis iruhwik um aria ta kwikitak.”

<sup>19</sup> Aria Jisas nikitak nunaman hunak aria ananish disaipel shopunek sheiran shunak. <sup>20</sup> Aria onok armatok okwok seiwok arugeh hapeyok 12-poreish kwarahos um owishibor banakok. Aria okwok kwanaki agabinum Jisas aria kwasusuhw anagas um ahudok rouhi rupah anan nenekah iri. <sup>21</sup> Okwok da apa kwaneyagwreh kwakri, “Ikri isusuhw ananih rupah atuh um, aria eik ta yopuwe.”

<sup>22</sup> Aria Jisas natanam natruk aria nakripok nakri, “Nugawik, nyakihw apahw mare yowehw, uwok. Nyak nyenek bilip um eik, aria nyak ta yopin.”

Aria abudok atub nyutob okwok owishibor tukaruboruk aria okwok ta yopuk. <sup>23</sup> Aria Jisas nanak natogur anudok debeini ananit urupat aria natik eshesh armam armago shape apa shereh. Amam apa hohipur buwaen aria apa shereh shanoruwor shabo sawiyeguh. <sup>24</sup> Aria Jisas nakripesh namudok, “Ipak ihipmorim kita togur aduk ba punak. Okwudok batowinyik madae kwugok uwe, uwok. Okwok da kweshuhw meyoh.”

Aria eshesh shagokoruh anan shabo brakahas. <sup>25</sup> Aria nakrip ihishmorim um shutogur shupe aduk aria Jisas nawish nasuhw okwokwis wis aria nakwuhur kwakitak kwape yopuk. <sup>26</sup> Namudok aria baraen nyanak ihirub warub bape abudok amnab iri um agundok Jisas da nohur okwudok kwagok iri kwakitak kwape wosik atin um.

*Jisas Nagabe Biom Naben Seshuhomi*

<sup>27</sup> Jisas nakutukuk nagundok aria nagim yah nanak. Aria biom nabes se-shuhomi hagipesan aria hohwar namudok, “Nyak Devit Ananin Barhonin, nyak ko nyenek gihauum ohwak biohw.”

<sup>28</sup> Anan nanak nawish urupat aria amudok biom nabes seshuhomi hanamori anan. Aria Jisas narigam namudok, “Ipak biom penek bilip namudok eik ko wosik inek enyudok mugu nyutogur adur atin, aka uwok?”

Aria amam biom hakripan namudok, “Adur atin Debeini. Ohwak biohw wonek bilip um nyakin ddogum nyugabeyohw.”

<sup>29</sup> Namudok aria anan nuwem ananis wis um amamis nabes aria nakri namudok, “Ipak biom penek bilip um eik. Namudok aria yakri ipak ta purugun.”

<sup>30</sup> Aria amamis nabes ta yopus sanapok. Aria Jisas nakripam dodogeshinyi baraen um amam biom namudok, “Ipak biom mare ta pukrip enen arpen nyudukemesh um eik yagabe ipakis nabes yopus um uwe, uwok.”

<sup>31</sup> Aria amam hanak hakrip ihishmorim armam armago um ihirub warub bape abudok amnab iri um ihin yopinyi mour Jisas apa nenekenyi.

*Jisas Nagabe Anan Madae Niyagwreh Uwe Iri*

<sup>32</sup> Amudok biom hakutukuk Jisas apa hanaku aria enesh arpesha sharauri anan arman um Jisas. Anan douk enen yoweiniy sagab nyapeyan aria madae niyagwreh uwe, uwok. <sup>33</sup> Aria Jisas nahiayuhk enyudok yoweiniy sagab aria anudok madae niyagwreh iri ta niyagwreh. Aria ihish armam

armago shanosorim esheshish urkwip aparuh aria shakri, "Seiwok madae enen namudokinyi mugu nyutogur agudok nahobig Israel uwe, uwok."

<sup>34</sup> Aria amam Farisi hakri namudok, "Anan douk nahiyyah yoweishi sagabehos um anan da narao dodog um enyudok debein yi nyarik iri yoweini sagab um ihishmorim yoweishi sagabehos."

### *Jisas Neneh Gihau Arpesh*

<sup>35</sup> Aria Jisas narahaen nanak ihirub warub debeirubi aria shokurubi. Aria anan neneh skulum ihish armam armago numun urusag eshesh Juda shantorum ba sheneyagwreh baraen-ogwi. Anan nakripesh um yopinyi baraen um arpesh shuwish um agundok Iruhin nape Debeini um ananish arpesh um aria anan nagabe ihihmorim arugeh da hape esheshiruh yegeshiweruh iri.

<sup>36</sup> Anan natik sabaishi armam armago aria anan neneh debein yi gihau eshesh. Umum maresh? Esheshish urkwip aparuh madae shupe wosik uwe, uwok. Eshesh shape kabi da sipsipahos douk arman madae nupe ba niyohesh iri uwe, uwok. <sup>37</sup> Namudok aria nakrip ananim disaipel, "Sabaiguni worigun jurugigun nape nubarig aria arpesh ta shenek mourum shurimi agundok worigun iri madae sabaishi uwe, uwok. <sup>38</sup> Aria ipak ko penek beten um agudok nubarigin Debeini Yaken aria porigan ta neshopoki eshudok ko shunaki shenek mour um shutorumori ananigun worigun shugunubuk atugun."

## 10

### *Jisas Ananim 12-poreim Aposel Amamish Nyeiguhw (Mak 3:13-19; Luk 6:12-16)*

<sup>1</sup> Aria Jisas nahwar ananim 12-poreim disaipel hanaki heyotu atugun aria nakom ananin dodog um huhiyah yoweishi sagabehos shape arpesh iri aria hugabe ihih arugeh. <sup>2</sup> Amudok Jisas ananim 12 poreim disaipel douk nahwaram aposel iri amamish nyeiguhw eshudok.\* Narik iri anudok Saimon douk shahwaran Pita; anokwinen Andru; Jems nani anokwinen Jon, Sebedi ananim nagamim. <sup>3</sup> Aria Pilip nani Bartolomyu aria Tomas aria Matyu, anan da nurao takis iri. Aria Jems Alfius ananin naganin, aria Tadius <sup>4</sup> aria Saimon anan da natogur Selotip† awirop iri, aria Judas Iskariot, anan da kweipon nuwereh Jisas um ananim horim iri.

### *Jisas Nakom Mour Ananim 12-poreim Aposel (Mak 6:7-13; Luk 9:1-6)*

<sup>5</sup> Jisas neshopok amudok aposel hanak aria nakom enyudok baraen, "Mare punam eshudok madae shudukemesh um Iruhin iri esheshigos nahobigos aria Samaria esheshirub warub, uwok. <sup>6</sup> Ipak ta punam nahobig Israel ba putik eshudok arpesh da shape kabi da shanatukki sipsipahos um. <sup>7</sup> Ipak punak aria pukripesh namudok, 'Abudok nyutob um arpesh shuwish um agundok Iruhin nape Debeini um ananish arpesh shapeum heven douk hurukum butogur!' <sup>8</sup> Ipak punak pugabe arugeh hapeyeshi aria ta puhuri arpesh shagok iri aria piyatak ehudok arugeh lepra hapeyeshi shutogur yopish aria puhiyah yoweishi sagabehos da shape arpesh iri.

\* **10:2:** aposel douk nyakri eshesh Iruhin neshopokesh um shukripesh ananin yopinyi baraen.

† **10:4:** Enyudok nyeigur Selot douk shahwar anap awirop um armam um eshesh Israel. Amudok armam douk dodogowim atum um hakri eshesh Israel ta shurao indipendens. Hakri hanoiwos um shupe shukamum eshesh Rom uwe, uwok. Aria Saimon douk anan um amudok armam shahwaram um Selot iri.

Eshudok eneshenesh ipak paraesh iri, douk puraesh meyoh aria madae putorish pukwu utabor uwe, uwok. Namudok aria ipak ta pukesh meyoh um arpesan. Ipak ta mare puhwar arpesan um shukep utabor um eshudok eneshenesh uwe, uwok.

<sup>9</sup> “Aria ipak ta mare puruk gol, utabor, siliwa aka kapaibor utabor banagos uwe, uwok. <sup>10</sup> Ipak ta purahaen um mare pusuhw banagos uwe, uwok. Aria mare pusuhw biobiog siotog, su aka butip, uwok. Arman neneh mour iri, eshesh ko shubiroman um worigun nini enesh eneshenesh.

<sup>11</sup> “Aria punak puwish anabur debeiburi wabur aka anabur shokuburi wabur, aria putrugun ba gamo pudukemesh, meimeishi da shape abrudok wabur iri da yopishi arpesan. Aria ipak puni enyudok arpen atin pupe arigaha nyumnah ipak pakana ta punak ahi. <sup>12</sup> Ipak punak puwish anat urupat, aria ipak ta pukrip arpesan shape atudok urupat iri namudok, ‘Iruhin ko gamo nutaurum ipak.’ <sup>13</sup> Aria eshudok shape atudok urupat iri eshesh shukep aparuh shukri wosik shunadudareh um ipak pupe puni eshesh, aria enyudok ipakin yopinyi baraen ko nyupe um eshesh. Aria eshesh ko mare shunadudareh um ipak uwe, aria ipak ko ta putanam purawi ipakin yopinyi baraen. <sup>14</sup> Aria ta anan arman ko nunoiwos um ipak punam ananit urupat, aria nonoiwos um numnek ipakin baraen, aria nyutob ipak pukuna pukitakuk atudok urupat aka wabur obi nyutob aria ipak pugudukuk nypruk kwape ipakiruh yeriweruh iri. Punekesh namudok um eshesh shutrip aria shudukemesh shukri eshesh douk shenek yoweishi inahos iri. <sup>15</sup> Eik yakriep adaptur baraen, nahudok nyumnah Iruhin nakri um ko neneh kwotog um armam armago um, debeinya amain ko ta nyutogur um eshesh shape abrudok wabur iri ko nyenek uhwin um amain seiwok nyatogur um eshesh shape narbudok warub Sodom bani Gomora iri.”

### *Jisas Nakrip Ananim Aposel Um Wanohw Baraen Ko Shutogur Um Amam Iri*

*(Mak 13:9-13; Luk 21:12-17)*

<sup>16</sup> Aria Jisas nakri namudok, “Ipak pumnek. Eik ko yeshopokep panak kabi da sipsipahos shunak orokohun um wanarig nubag. Aria ipak ta penekesh kabi da yuguhw um, aria ipak ta gamo pudukemesh um eneshenesh ipak pakana penekeshi. Aria ipak ta pugipesh ogwuhwudok maishubiguhw armiguhw hwenekahi aih aria ipak ta mare urkwip aparuh shur um penek enen yoweinyi mugu uwe, uwok. <sup>17</sup> Ipak ko pudukemesh um arpesan. Eshesh ta shenemep kwotog, aria eshesh ta shupruk ipak gani numun eshesh Juda shantorum-ogwi urusag. <sup>18</sup> Eshesh ko urkwip aparuh shur um shenek eikin nyeigur nyubuh atap, aria shurao ipak shunam gavman aria amam king-omi. Namudok aria ta ipak ko pukrip amudok debeimi um eikin yopinyi baraen, aria um eshudok madae shudukemesh um Iruhin iri shopunek. <sup>19</sup> Aria nyutob eshesh shurao ipak shunam um kwotog, ipak mare punogugur aria urkwip aparuh shur yowiyokuk namudok, ‘Apak ta miyagwreh maren baraen?’ ‘Uwok.’ Douk abudok nyutob bakana butogur aria Iruhin ko niyabigep um maren baraen ipak ta piyagwrehen iri. <sup>20</sup> Umum maresh? Ipak kanak ta mare piyagwreh, uwok. Ipakin Yakenin Mishin ko nyukwu ipakig nukwatog aria nyiyagwreh.

<sup>21</sup> “Arpesan ko shenek kwotog um esheshim anokwihem aria shukripesh um shubo amudok anokwihem hugok. Aria amam yakenyim ta henek apunih aih um amamish nugashish. Aria eshesh nugashish ta shutogur horin horik um esheshish amakek yaken aria shukrip kupaishi arpesan um shesh shugok. <sup>22</sup> Aria ihish arpesan ko urkwip aparuh amu yowesh um ipak.

Umum maresh? Eikin nyeigur nyape um ipak. Aria armam armago ko shiyotu dodog um bilip arigaha ko hahi hagiguki nyumnah hutogur obi nyutob, Iruhin ta ko nutanam nurao eshesh. <sup>23</sup> Aria um eshesh armam armago um anabur wabur da shenekesh yowiyokuk um ipak um, aria ipak ko puruwok punam kupaiburi wabur. Eik yakriep adurin baraen, ipak ta ko mare piyatay mour um Israelirub ihirub warub aria Eik Anudok Arman yatogur adurinyi arpen iri ko ta itanamori. <sup>24</sup> Eshudok batowish shenek skul iri madae shenek uhwin um esheshin tisa uwe, uwok. Aria eshudok shenek mour um kupaishi iri shuteogur kabi da esheshin tisa um, aria wosik. Aria ta eshudok shenek mour um kupaishi iri shuteogur kabi da esheshin debeini um, aria namudok shopunek wosik. Eshesh nubo shakon nyeigur Belsebul um urupatin yaken,<sup>‡</sup> namudok aria apak madukemesh, eshesh ko shukri sabaishi yoweishi nyeiguw um eshudok ananishi shape urupat iri.”

### *Jisas Nakripesh Um Ta Shunogugur Um Iruhin Atun (Luk 12:2-7)*

<sup>26</sup> Aria Jisas nakri namudok, “Ipak mare punogugur um arpesh da shakana shununu ipak iri. Ihish eneshenesh da shunushapom shakus iri ko shuteogur yopugunum. Aria iihin baraen da nyunabeshuk iri ko arpesh shudukemen. <sup>27</sup> Baraen eik yakrip ipaken wab iri, ipak ko piyagwreng nyumnah. Aria baraen ipak ta shokubur pumneken iri, aria ipak pukih putem iruhw modukwigum urusag aria pukrip ihish armam armago. <sup>28</sup> Aria ipak mare punogugur um arpesh da shabo abudok amnabihw yegenyihw hwagok iri, aria eshesh ta mare shubo enyudok mishin nyor numun ipak iri. Uwok. Ipak ta punogugur Iruhin atun. Anan atun ko nununu abudok amnabihw yegenyihw aria mishin shopunek gani ehudok yoweishi nihiburi wabur hel.

<sup>29</sup> “Ipak padukemesh, arpesh da shator bioguhw shokuguhwi armiguhw um 10-poreibor utabor. Aria ipakin Yaken da gamo apa neyoh ipak um agwuhwudok armiguhw. Aria da anan nunoiwos akure, aria ta mare anar um agwuhwdok armiguhw ta rugruki rubuh amnab uwe, uwok. <sup>30</sup> Aria shopunek, Iruhin da iganigadai nadareh ihirub ehirub betem ipakigos baragos iri, aria anan gamo nadukemesh um ipak. <sup>31</sup> Namudok aria ipak mare punogugur. Ipak penek uhwin um sabaigwuhwi shokwugwuhwi armiguhw.”

### *Apak mare Murao Abraen Um Mukripesh Um Agundok Apak Mape Jisas Ananish Arpesh Um, Uwok (Luk 12:8-9)*

<sup>32</sup> Aria Jisas nakri namudok, “Ihish arpesh douk shuwereh shukrip kupaishi um shape shani eik iri, eik shopunek ko iwereh eshesh um ikrip eikin Yaken nape heven namudok eshudok douk eikish arpesh. <sup>33</sup> Aria ihish arpesh douk shuwereh baraen shukrip kupaishi namudok eshesh douk madae shupe shuni eik iri, eik shopunek ta ko ikrip eikin Yaken nape heven namudok eshudok madae eikish arpesh uwe, uwok.”

### *Jisas Narawi Wanohw Aria Yopinyi Poe Uwok (Luk 12:51-53, 14:26-27)*

<sup>34-35</sup> Aria Jisas nakri namudok, “Ipak mare pure urkwip aparuh namudok eik douk yanaki um iyatak wanogwiruh agudok nahobig, uwok. Eik madae

<sup>‡</sup> **10:25:** Enyudok baraen um urupatin yaken nyakri Jisas.

inamori um iyatak wanohw, uwok. Eik douk yanamori inek ihishmorim arpesh shukitak shurpak.

‘Arman ko nuhwar ananin yaken horin,  
aria nagawik ko kuhwar okwokwik amakek horik,  
aria armatok kurao arman iri  
ko kuhwar okwokwik nakwurikwik horik,

<sup>36</sup> aria raminen ananish wanaruh ko shutogur ananish horik horin.’

<sup>37</sup> “Meishi arpesh da esheshish urkum apahw shakri shunawasham esheshish amakek yaken abom iri, aria madae shukri shunawasham eik abom iri, eshesh ko mare shupe kabi da eikish arpesh um uwe, uwok. Aria meini arman da nakri nunawasham ananin naganin aria ananik nugawik abom iri, aria anan da madae nukri nunawasham eik abom iri, anan ko mare nupe kabi da eikin arpenyi um uwe, uwok. <sup>38</sup> Aria meinyi arpen da madae nyusah enyenin rowogin kruse aria nyigipesh eik iri, aria nyanaiwos um kupaishi shen nyugok um agundok nyagipesh eik um, enyudok arpen ko mare nyupe kabi da eikin arpen um uwe, uwok. <sup>39</sup> Aria meishi arpesh ko esheshish urkum apahw ta shukri um shuhogom eshesh kanak atin um esheshin yopinyi poe atin iri, aria eshesh ko shunak yowegunum shuwishuk. Aria meishi arpesh ko esheshish urkum apahw shukri shunawasham eik aria kupaishi shesh shugok um agundok shakana shugipesh eik um, eshesh ko shurao yopinyi poe.”

### *Arpesh Shutaurum Enesh Krais Ananish Arpesh Iri Iruhin Ko Nukesh Yopishi Eneshenesh*

(Mak 9:41)

<sup>40</sup> Aria Jisas nakri namudok, “Meishi arpesh ko shuhwar ipak aria shenek yopihai aih um ipak, eshesh da shuhwar eik aria shenek yopihai aih um eik. Aria meishi arpesh shenek yopihai aih um eik, eshesh shenek yopihai aih um Iruhin. Umum maresh, anan da neshopok eik ba yanaki. <sup>41</sup> Aria meishi arpesh da shutik anan profet aria shukri, ‘Eik yakri um itaurum profet’, anan douk yopuni arman narahaen neneke Iruhin ananin mour iri aria eshesh sharauri anan profet um urupat aria sheyehan shatauruman, aria Iruhin ko noko eshudok arpesh eshudok atatahish yopishi eneshenesh kabi da amam profet haraesh iri um. Aria meishi arpesh shutik anan yopuni arman aria shukri, ‘Anudok arman douk yopuni arman, aria eshesh sharawi anan nanaki urupat aria sheyehan shatauruman,’ aria eshesh ko shurao yopishi eneshenesh kabi da anudok yopuni arman nuraesh iri um. <sup>42</sup> Aria meishi arpesh shutik enesh eshudok nyeiguuh wokeshi arpesh aria shukri, ‘Eshudok arpesh Jisas ananish disaipel,’ aria shuken eneh abarih um enen arpen nyape nyagiguki um ihish disaipel douk eikishi, aria eik yakritep adurin atin bareaen, eshudok arpesh esheshish yopishi eneshenesh ko mare shunatukuk uwe, uwok.”

## 11

### *Jon Neneck Baptaisumesh Iri Neshopok Ananim Disaipel Hanak Hatik Jisas (Luk 7:18-35)*

<sup>1</sup> Aria Jisas nakrip ananim 12-poreim disaipel um enyudok bareaen da neneck skulumam-enyi jurug, aria nakutukuk abrudok wabur aria nunam debeirubi warub bape agundok iri aria neneck skulum arpesh nakripeshum Iruhin ananin bareaen.

<sup>2</sup> Jon nape shunuweshik-ati urupat, aria nemnek bareaenum ihih mour da Krais nenekenyi, aria neshopok ananim disaipel um hunak hutik Jisas. Aria Jon nakrip ananim disaipel um <sup>3</sup> horig Jisas namudok, “Nyak kripap.

Nyak da enyudok arpen Jon nakripap um ko nyunaki iri, aka apak mupe ba mubeim enen kupaingyi?"

<sup>4</sup> Aria Jisas nakripam namudok, "Ipak kare pukrip Jon um ihish enesh-enesh ipak pemnek baraenyumeshi aria patrishi. Eshudok douk namudok.

<sup>5</sup> Eshesh nabes seshuheshi ta shatrugun, aria eshesh aiyas yowegasesi sharahaen. Eshudok yoweih i arugeh lepra hapeyeshi yopish, aria arigos seshukeshi ta shemnek. Eshudok shagok iri ta shakitak, aria eshudok eneshenesh wokesh iri shemnek Iruhin ananin yopinyi baraen. <sup>6</sup> Aria arpesh shutik eik aria shusuhw eikin baraen dodog shigipeshen aria eshesh ko gamo shunadudareh."

<sup>7</sup> Abudok nyutob Jon ananim disaipel hape hanak obi, aria Jisas nakitak nakrip sabaishi arpesh um Jon namudok, "Nabudok nyutob ipak panak patik Jon agundok wehigunum douk arpesh wokagunum, ipak douk panak um putik maresh? Panak um putik anah aruh da uhwin nyasusuoh ba nyaunihoh iri aka? Namudok ta uwok. <sup>8</sup> Ipak da panak um pakana putik maresh? Douk ipak panak um putik anan arman nore yopiyopihi rupeh iri aka? Namudok ta uwok. Armam hore yopiyopihi rupeh iri, amam da hape king-omi amamig urusag. <sup>9</sup> Aria umum maresh ba ipak punak? Punak um putik anan profet aka? Namudok um enyudok douk adur atin. Aria eik yakrip ipak, douk anudok profet Jon anan neneh uhwin um ihm kupaimi profet-omi. <sup>10</sup> Umum anudok arman atun ba da anan profet nenyem baraen nyetem Iruhin ananik buk iri kwakri namudok,

'Eik ko ta ishopokugu eikin arman

um ta nukriep eikin baraen,

aria anan ko nirikum nyak.

Aria anan ta nugasapeshmen nyakih yah.'

<sup>11</sup> Eik yakri adurin baraenyum ipak. Jon neneh baptaisumesh iri anan neneh uhwin um ihm-morim kupaimi armam hatogur agudok nahobig iri. Aria meiniy arpen douk nyape shokwinyi um arpesh shuwish aburdok wabur Iruhin nahe Debeini um ananish arpesh shapeum heven iri, enyudok arpen douk nyenek uhwinyum Jon.

<sup>12</sup> "Riguk abudok nyutob Jon neneh baptaisumesh iri nape nakripesh Iruhin ananin baraen obi nyutob arigha douk, enesh dodogowishi wanohwish arpesh shape dodogeshish atish shape shabirak um shuwish heven aburdok wabur Iruhin nahe Debeini um ananish arpesh shapeum.

<sup>13</sup> Aria ihm profet aria enyudok lo Iruhin seiwok nako Moses enyi, eshesh shakri enyudok Iruhin ananin baraen um heven agundok Iruhin nahe debeini um ananish arpesh um arigha douk Jon natogur nape obi nyutob.

<sup>14</sup> "Aria douk ipak pakana pumnek um enyudok yopinyi baraen um, aria ko pumnek. Iruhin ananik buk kwakri namudok aria enyudok baraen da nyakri anudok Jon atun. Profet Elija douk seiwok Iruhin ananin baraen nyakri anan ko ta nanaki. <sup>15</sup> Aria douk ipak arigos sapeyepi aria ko pumnek enyudok baraen.

<sup>16</sup> "Aria eik douk ikrium ba iwerek doukish arpesh shapeyohi aih, aria eik ko ikri maren wobuwobrenyi baraenyum eshesh? Eshesh da kabi batowish shape agegwiruh aria shahwarum kupaishi batowish namudok,

<sup>17</sup> 'Apak mahwapur buwaen um ipak piyarub,  
aria ipak da panoiwos um piyarub.

Aria apak manoruwor ba meayrub, aria ipak panoiwos  
um punoruwor ba pureh.'

<sup>18</sup> Aria Jisas ta nakri namudok, "Jon nanaki aria madae nuwok sabaiguni worigun aria madae nuwok wain. Aria eshesh shakri namudok, 'Yoweinyi

sagab da nyapeyan.’ <sup>19</sup> Aria Eik Anudok Arman yatogur adurinyi arpen iri yanaki, aria yawok worigun nani abar aria shakri, ‘Putik, anan nawok sabraiguni worigun abom, aria anan nawok sabaini wain abom. Anan neneck arpeshim nani amam harao takis iri hani eshudok shenek yoweishi inahos iri.’ Aria eik yakripep namudok, Ipak putik eshudok arpesh sharao Iruhin ananin saki shagipeshen aria shenek yopihi aih iri aria ipak ko pudukemesh pukri, eshesih aih douk yopihi.”

*Anarub Warub Da Arpesh Madae Sheneb Bilip Um Jisas Iri  
(Luk 10:13-15)*

<sup>20</sup> Anarub warub da Jisas neneck sabainyi Iruhin atun neneken iri mour, aria eshudok arpesh madae shumnek ba shubodig nyirub shubukuk yoweishi inahos apa shenekeshi. Namudok aria Jisas nahao eshudok arpesh shape arbudok warub iri nukesh dodogowinyi baraen eshesh.

<sup>21</sup> Aria nakri namudok, “Eik yenek gihauum ipak arpesh pape wabur Korasin iri. Aria eik yenek gihauum ipak pape wabur Betsaida iri. Aria nubo enen arpen nyunak wabur Tair aria Saidon aria nyunek enen Iruhin atun neneken iri mour kabi da eik yenekken orokohun um ipak iri akure, seiwokdai eshesh Tair aria Saidon eshesh ko shubodig nyirub aria shure shagoki shohwurari suruhw aria shuwish weshigabus um shunyabig namudok eshesh da amu shabukuk yoweishi inahos eshesh shenekeshi.

<sup>22</sup> Namudok aria eik yakrip ipak um ahudok nyumnah Iruhin nakriyohi um nunek kwotog um ihihs arpesh, enyudok amain ko nyutogur um ipak iri ta nyenek uhwin abom um amain ko nyutogur um eshudok arpesh shape warub Tair aria Saidon iri. <sup>23</sup> Aria ipak pape Kaperneam iri, ko shutukep puto gani iruhw heven aka uwok? Namudok ta amu uwok. Ipak ta pubuh gani atap atap uguk um gani shagoki esheshibur wabur. Aria nubo enen arpen nyunam wabur Saidon aria nyunek enen Iruhin atun neneken iri mour kabi da eik yenekken orokohun um ipak iri akure, wabur Sodom da wata bupe. <sup>24</sup> Namudok aria eik yakrip ipak, um ahudok nyumnah Iruhin nakriyohi um neneck kwotog um ihihs arpesh, amain ko nyutogur um ipak iri ta nyunek uhwin abom um nubo rig nyatogur um Sodom iri.”

*Ipak Punamori Eik Aria Purao Uhwin  
(Luk 10:21-22)*

<sup>25</sup> Abudok nyutob Jisas nakri namudok, “Yain, nyak Debeini um heven aria agudok nahobig, eik yakri yanadudareh um nyak. Umum maresh? Nyak da nyebeshuk eshudok eneshenesh um arpesh shadukem eneshenesh aria worobainyi saki iri, aria nyeyabig eshudok arpesh shape kabi da shokushi batowish um. <sup>26</sup> Aria eik yakri wosik, Yain, nyak nyagipesh nyakish urkum apahw shakri um aria douk nyabirak namudok.”

<sup>27</sup> Aria Jisas ta nakri namudok, “Eikin yaken anan iganigadae nobuk ihihs eneshenesh um eikis wis. Aria madae enen arpen da nyudukemesh um Nuganin, Yaken atun douk nadukemesh um eik. Aria madae enen arpen da nyudukemesh um Yaken uwe, uwok. Nuganin atun nani eshudok arpesh douk Nuganin atun niyabig Yaken um eshesh iri, eshesh atish da shadukemesh um Yaken.

<sup>28</sup> “Ipak arpesh douk penek debeinyi mour abom iri aria purao debeinyi amain, ipak ihpmorim punamori um eik aria eik ta ikep uhwin um ipak.

<sup>29</sup> Ipak ko purao saki um eik aria pupe shakamum eikin baraen. Namudok aria puhur aidap da shopemum um bulmakauin aruhwigur iri um da shanuk eneshenesh enyi. Ipak purao eikin saki. Umum maresh? Eik da samokwiyain arpen aria eik yenekesh shokubur um ipak arpesh. Aria eik yape shokubur atin kabi da enen batowin um. Aria ta eneshenesh mare

shukep amaenyibi bagab ipak aria ipak ta purao uhwin um ipakish urkum apahw. <sup>30</sup> Apudok aidap eik douk yopemum ipakish aruhwiguhw iri apap douk horihorip aria ipak ta wosik pupusah. Aria eneshenesh eik yakо ipakeshi um pушусах eshesh da madae amaenyish atish uwе, uwok.”

## 12

### *Jisas Douk Debeini Um Nukri Shunek Maren Mour Um Ahudok Nyumnah Sabat*

(Mak 2:23-28; Luk 6:1-5)

<sup>1</sup> Anob nyutob banak banakuk aria anah nyumnah douk eshesh Juda mour uwok shape meyoh ahi hanak hatograri, aria Jisas nani ananim disaipel hawish hanak anag nubarig douk shau witagari. Aria ananim disaipel nyurub bam, aria amam hadi anat shuruwepit wit ba apa hatoh hanak. <sup>2</sup> Aria amam Farisi hatik, aria hakrip Jisas namudok, “Nyak nyutik ahudoki aih da nyakim disaipel henekohi, apakin lo nyakri uwok um menek enen mour ahudok nyumnah Sabat, uwok.”

<sup>3</sup> Jisas nemnek namudok aria ta nakripam namudok, “Ipak da madae putik ba pudukemesh um seiwok Devit nenekehi eneshenesh? Eik yakri nabudok nyutob Devit nani ananim da nyurub bam <sup>4</sup> aria Devit nawish Iruhin ananit debeiti urupat aria nohur atudok bret amam pris da hatubuk um Iruhin iri aria nani ananimi hatoh. Atudok bret da shakri uwok um kupaishi ta shutoh iri. Amam pris atum da shakri wosik um hutoh. <sup>5</sup> Aria ipak shopunek madae putik ba pudukemesh namudok enyudok baraen nyape numun Iruhin ananit lo nyetem buk iri, nyakri namudok. Amudok pris henek mour numun Iruhin ananit debeiti urupat iri amam ta henek mour ahudok nyumnah Sabat? Amam pris da habrig enyudok lo da nyakri Sabat iri, aria amam pris da madae enen baraan nyupeyam uwе, uwok.

<sup>6</sup> Aria eik douk yakana ikriep, douk eik yape agundok iri, eik debeini yenek uhwinyum Iruhin ananit debeiti urupat. <sup>7</sup> Aria baraen douk nyape Iruhin ananik Buk iri douk nyape namudok, ‘Eik yanaiwos um ipakin ofa ipak peneken meyoh iri. Eik yakri yanawasham yopihi aih um ipak pusuhw yopuhwi ruwohw aria penek gihauk kupaishi.’ Aria nubo ipak gamo pudukemesh um enyudok baugosin um enyudok baraen, aria ipak ta mare puwem amaenyibi bugob um kupaishi da madae shenek enesh yoweishi inahos iri. <sup>8</sup> Umum maresh? Eik Anudok Arman yatogur adurinyi arpen iri douk eik kanak yape debeiwe iri um ikrip arpesh shunek maren mour ahudok nyumnah Sabat.”

### *Jisas Nagapesh Anan Arman Rogur Nyagokan Iri*

(Mak 3:1-6; Luk 6:6-11)

<sup>9</sup> Aria Jisas nakutukuk amam Farisi nagundok aria nanak nawish anat eshesh Juda shape sheyagwreh baraenyati urupat. <sup>10</sup> Nawish aria natik anan arman rogur nyagokan iri nape. Anam armam hape hakana heneman baraen Jisas, namudok aria harigan hakri, “Jisas nyak nyukri, Iruhin ananit lo da nyakri wosik um mugabe arugeh henekeshi arpesh ahudok nyumnah Sabat aka, uwok?”

<sup>11</sup> Aria Jisas nakripam namudok, “Douk anan arman orokohun um ipak aria anan da nagrem enen atin sipsip aria enyudok sipsip nyunak ba nyugrukuk anag nuwag douk ahudok nyumnah Sabat aria ipak da padukemesh jurug, anudok arman ta nunak nusuhw enyudok sipsip aria ta nutukenyi agudok nuwag. <sup>12</sup> Aria anan arman douk amu nenekehi uwwin abom um enen sipsip aka, uwok? Namudok aria douk yopunyi um apak monek yopunyi mugu nyutogur douk ahudok nyumnah Sabat.” <sup>13</sup> Aria

Jisas nakrip anudok rogur nyagokanari namudok, “Nyak nyunu nyakin rogur.”

Aria anudok arman nonu ananin rogur, aria ananin rogur ta nyatogur yopin kabi da enyudok enen ananin yopunyi rogur da nyape meyoh iri.  
<sup>14</sup> Aria amam Farisi hatik namudok aria hakitak hatogur hanak ba hape habo baraen haurim yah um ko hubo Jisas nugok.

### *Iruhin Nagraeh Jisas Um Nene Ananin Mour*

<sup>15</sup> Aria Jisas nadukemeshum enyudok amam Farisi hakri um ta hunekenyum anan iri, aria nakitak nakutukuk abrudok wabur aria nanak. Nanak aria worobaishi arpesh shagipesan. Shagipesan aria nagabe eshudok ihishmorim da arugeh hapeyeshi arpesh shatogur yopish meyoh.

<sup>16</sup> Aria nakripesh dodogowinyi beraen um mare ta shunak shukrip kupaiishi um anan uwe, uwok. <sup>17</sup> Umum ahudok aih atuh, Jisas nene enen beraen seiwok Iruhin nohur profet Aisaia ba neyagwrehenyuk iri beraen nyatogur adur atin. Aria beraen enyudok,

<sup>18</sup> “Anudok eikin arman nene mour um eik iri.

Eik kanak yagraeh anan.

Eik yakri anan abom, aria eikish urkum apahw shanawasham shanadudareh um anan abom iri.

Eik ko ikan eikin yopunyi Mishin nyuwish um nyupe anan, aria anan ko niyagwreh nuwerek beraen um yopin poe aria yopihi aih ko hutogram

ihishmorim arpesh madae shudukemesh  
um eikin beraen shape agudok nahobig iri.

<sup>19</sup> Anan ta mare niyagwreh rupanitakin beraen aria nuhwar debeg uwe, uwok.

Aria eshesh arpesh ta mare shumnek anan niyagwreh debeihi yeh shop-unek uwe, uwok.

<sup>20</sup> Aria aruh hanounih iri ta mare nutugwaruh.

Aria anan ta mare nubuweh lam da madae gamo hininyi.

Anan ta nupe nene mour arigaha ko enyudok yopin poe aria yopihi aih shutogur ba shenek uhwinyum ihishmorim yoweishi inahos shutuhuk.

<sup>21</sup> Aria ihish madae shudukemesh um eikin beraen iri arpesh eshesh ko shenek bilipum anan.”

### *Jisas Nani Yoweiniy Sagab Belsebul*

(Mak 3:20-30; Luk 11:14-23)

<sup>22</sup> Nabudok nyutob enesh arpesh sharauri anan arman da yoweiniy sagab nyapeyan iri. Aria da madae niyagwreh nukwat teshukan ba nabes shopunek seshukan aria madae nutrugun uwe, uwok. Aria sharan shanamorim Jisas. Aria Jisas nagabeyan yopun, aria ta neyagwreh ba natrugun shopunek. <sup>23</sup> Aria ihish arpesh shakitak yowiyokuk aria shakri namudok, “Anudok arman da Devit ananin barhonin,\* aka?” <sup>24</sup> Aria amam Farisi hemnek enyudok beraen, aria hakri namudok, “Anudok arman da nahiyyah yoweishi sagabehos um nakwu enyudok yoweiniy sagab Belsebul enyenyin dodog, enyudok yoweiniy sagab da debeiniy um ihish yoweishi sagabehos.”

<sup>25</sup> Aria Jisas da nadukemesh um amamigos baragos urkwip da shorum, aria nakripam namudok, “Douk enesh arpesh shupe anag nahobig aria

---

\* <sup>12:23:</sup> Enyudok beraen Devit ananin barhonin douk wobuwobren beraen um anudok Krais, Iruhin nagraehan aria nakri um noshopokan nunaki iri um nunarao arpesh iri.

shunorupok ba shupe tukwotukwan, aria arpesh shape agudok nahobig iri ko shunanunukuk. Aria enesh arpesh shape anabur wabur aka anat urupat iri shunarupok ba shupe tukwotukwan, aria arpesh shape abrudok wabur urupat iri ko mare shupe dodogeshish uwe, uwok. <sup>26</sup> Namudok aria douk Satan nukuna nupotik anan kanak um, aria apak ta mudukemesh namudok. Satan ananishi iganigadae shanabrig shape tukwotukwan. Namudok aria anan ta nurao dodog agunum um ta niyoh ananishi arpesh shuni eneshenesh? Aria namudok ta uwok. <sup>27</sup> Aria douk adur atin um Belsebul nutaurum eik um aria yehiyah eshudok yoweishi sagabehos um, namudok aria amiapen douk nyataurum ipak aria pohiyah yoweishi sagabehos? Ipakishi arpesh douk shahiyah yoweishi sagabehos iri ta shiyabig ipak namudok enyudok bareaen ipakin madae adurinyi bareaen uwe, uwok. <sup>28</sup> Aria douk eik yadukemesh namudok Iruhin ananin yopunyi Mishin nyataurum eik nyeke dodog aria eik yahiyah eshudok yoweishi sagabehos aria ipak ta pudukemesh namudok, abudok nyutob um ipak puwish agundok Iruhin nape Debeini um ananish arpesh um douk batogur.

<sup>29</sup> “Enen bareaen shopunek nyakri namudok. Anan arman ta wosik um nunak nuwish anan dodogowini arman ananit urupat aria nukwuaruh um ananish eneshenesh aka uwok? Namudok ta uwok. Anudok arman ko nuweshik anudok dodogowini arman nukwu dodogowihwi maduhw ba iyoh, aria ta nenekeh namudok, aria ta ko nuwish ba nuhur eneshenesh shakuh anudok dodogowini arman ananit urupat iri.

<sup>30</sup> “Meishi arpesh madae shunahwaram eikish arpesh iri, eshudok arpesh ko shunahwaram eikish horik horin. Aria meishi arpesh madae shutaurum eik ba murauri ihish arpesh iri, eshesh ko shuhiyahesh shuruwok shushutogur.

<sup>31</sup> “Namudok aria eik yakrip ipak, Iruhin ko nukweshih ihish yoweishi inahos aria ihin yoweinyi bareaen arpesh sheneken iri. Aria arpesh sheneyagwreh shabubunim Iruhin ananin Mishin iri, Iruhin ta mare nukweshih enyudok yoweinyi ina uwe um eshudok arpesh. <sup>32</sup> Meishi arpesh sheneyagwreh shabubunim Eik Anudok Arman yatogur adurinyi arpen iri, Iruhin ta nukweshih enyudok yoweinyi ina um eshudok arpesh. Aria meishi arpesh da sheneyagwreh shabubunim Iruhin ananin Mishin iri, Iruhin ta mare nukweshih enyudok yoweinyi ina um eshudok arpesh uwe, uwok. Douk aria kweipon babi bagiguki nyutob shopunek amu uwok.”

### *Yoweinyi Rowog Nyabuki Yoweipi Shuruwep Peir (Luk 6:43-45)*

<sup>33</sup> Aria Jisas nakri namudok, “Douk enen yopunyi rowog aria ta nyubuki yopipi shuruwep ba pir. Aria yoweinyi rowog, aria ta nyubuki yoweipi shuruwep ba pir. Arpesh ko shutik shuruwepigun worigun ba iyoh, aria ta shudukemesh enyudok rowog da yopunyi aka yoweinyi. <sup>34</sup> Ipak yoweishi arpesh, ipak kabi da yoweiguhi yuguuhw um. Umum maresh ba ipak da madae piyagwreh yopinyi bareaen uwe? Arpesh shadukemesh um shuwereh bareaen da shunukin nyor esheshish urkum apahw iri. <sup>35</sup> Yopishi arpesh shor yopinyi bareaen esheshish urkum apahw. Namudok aria eshesh shadukemesh um ta shunek yopihi aih aria shupe yopinyi poe. Aria yoweishi arpesh shor yoweinyi bareaen esheshish urkum apahw. Namudok aria eshesh shadukemesh um ta shunek yoweishi aih aria shupe yoweinyi poe.

<sup>36</sup> “Aria douk eik yakrip ipak, um ahudok nyumnah Iruhin nugraehahi um nunek kwotog um ihish arpesh um, anan ko urkum mur um ihin nyaunyatograri aria ihin yoweinyi bareaen ihish arpesh sheyagwrehan iri

aria anan ko nunemesh kwotog. <sup>37</sup> Um ipak kanak ipakin baraen Iruhin nemneken aria ta nuhwarez um yopishi arpesh aka yoweishi arpesh.”

*Anam Armam Harig Jisas Um Neneke Iruhin Atun Neneken Iri Mour  
(Mak 8:11-12; Luk 11:29-32)*

<sup>38</sup> Aria anob nyutob, anam henek skulumesh um lo iri hani anam Farisi hakrip Jisas namudok, “Tisa, apak makri nyak nyunek enen Iruhin atun neneken iri mour ba mutrin aria ta ko mudukemesh um nyak da adur atin nyenek Iruhin ananin mour iri.”

<sup>39</sup> Aria anan nakripam namudok, “Ipak doukipari um abudok nyutob, ipak da yoweipari aria ipak madae gamo pukon urkwip aparuh um Iruhin uwe, uwok. Ihib nyutob ipak pakri puwar eik um putik enen kak um Iruhin atun neneken iri mour. Aria ipak ta mare putik enen enyudoki kak uwe, uwok. Atin arag kak ipak ko putrin iri, enyudok seiwok Iruhin neneken um profet Jona iri. <sup>40</sup> Jona nubo nor 3-poreih nyumneh aria 3-poreibus weibus numun um debeiri eiyur araribur nyibur, aria namudok atin Eik Anudok Arman yatogur adurinyi arpen iri ta iyur 3-poreih nyumneh aria 3-poreibus weibus numun um annab. <sup>41</sup> Ahudok nyumnah Iruhin nakriyohi um ta nunemesh kwotog ihish arpesh, Nineveish arpesh ko shiyotu um baraen aria shenekumesh baraenymum doukish arpesh shape obi doukib nyutob um yoweishi inahos eshesh shenekesh iri. Umum maresh, eshesh Nineve shemnek baraen profet Jona nakripesh-enyi aria eshesh shabadig nyirub shabukuk yoweishi inahos shekesh agab. Aria eik douk anan arman yape orokohun um ipak iri, eik douk yenek uhwin abom um Jona. Aria ipak douk madae pubukuk yoweishi inahos pigipesh eik uwe, uwok. <sup>42</sup> Nabudok nyutob Iruhin nakriyobi um nunemesh kwotog ihish arpesh, kwin kwape saut iri ta ko kwiyotu um kwot kwereh yoweishi inahos um doukish arpesh shapeyobi doukib nyutob. Umum maresh? Okwudok kwin kwape gani nagiguk um agudok nahobig, aria okwok kwanaki um kwomnek Solomon nuwerek ananin yopinyi saki. Aria eik douk yape agundok iri, eik douk yenek uhwin abom um Solomon.”

*Yoweishi Sagabehos Shakutukuk Arpesh Aria Shatanamori Shawishesh Um*

*(Luk 11:24-26)*

<sup>43</sup> Aria Jisas anan kanak nakri namudok, “Aria enen yoweinyi sagab da nyukutukuk enen arpen obi nyutob, aria enyen ko nyunak nyurahe nyunak anagun abar wokagun um nyunak nyupe nyurao uhwin. Aria enyen ta mare nyuparug anabik yapugunum um ta nyurao uhwin. <sup>44</sup> Aria enyen ta nyukri namudok, ‘Eik ko itanam inam eikit urupat nubo rig yapenyat iri.’

“Namudok aria enyen ko ta nyutanam nyunak um atudok urupat ba nyutik atudok urupat tape meyoh. <sup>45</sup> Namudok aria enyen ta nyunak nyurauri 7-poreish kupaishi sagabehos eshesh da shenek uhwin um enyudok nyarik iri sagab um apa shenek yowoyoweishi inahos iri. Aria eshesh ta shuwish shupe atudok urupat. Nubo rig enyudok arpen madae yowen abom uwe, uwok. Aria douk enyen amu nyabo sisih abom. Aria atatahii yoweishi aih ko hutogur um ipak eshudok yoweishi arpesh douk pape abudok doukib nyutob iri.”

*Jisas Ananik Amakek Kwani Ananim Aruhim Shanamori Shutrun  
(Mak 3:31-35; Luk 8:19-21)*

<sup>46</sup> Aria Jisas ta apa neyagwreh nakrip eshudok sabaishi arpesh um baraen, aria ananik amakek kwani ananim owarhim shanaki sheyotu aduk. Eshesh shakana shiyagwreh shuni anan. <sup>47</sup> Aria anan arman nakrip

Jisas, "Nyak nyumnek. Nyakik amakek kwani nyakim owarhim shanaki sheyotu aduk, aria shakana shuni nyak shiyagwreh." <sup>48</sup> Aria Jisas nakrip anudok arman namudok, "Meikwiyah da eikik amakek? Aria meimiyah da eikim owarhim?"

<sup>49</sup> Aria anan naduk wis um ananish disaipel aria nakri namudok, "Nyutik eikiyu amakeniyuu wani eikim owarhim. <sup>50</sup> Umum maresh? Meishi arpesh da apa shagipesh eikin yaken da nape iruhw heven iri um ananim yopumi urkum aria baraen, eshesh douk ta ihwaresh eikin wanin, eikik mohwukwik aria eikik amakek."

## 13

### *Jisas Nakripesh Wobuwobren Baraen Um Anan Arman Nawashak Witip Shuruwep Nubarig Iri (Mak 4:1-9; Luk 8:4-8)*

<sup>1</sup> Ahudok atuh nyumnah Jisas nakutukuk urupat aria natogur aduk. Aria nanak nape anagasigum Galilieg waiyag. <sup>2</sup> Aria sabaishi arpesh shanamori anan. Namudok aria anan naprok nato nakih natem anat bot aria ihishmorim arpesh sheyotu anagasigum waiyag gani jakahasigunum. <sup>3</sup> Aria Jisas nakripesh sabainyi wobuwobrenyi baraen um eshesh. Aria anan nakri namudok, "Pumnek. Anan arman nanak nawashak shuruwepit wit gani nubarig. <sup>4</sup> Anan apa nawashat nanak aria anat tabuh takus yah aria armiguhw hwanaki hwatoh. <sup>5</sup> Aria anat shuruwepit wit tabuh takus utaborigunum, madae sabaibi amnab bukusagunum. Amnab madae budi bubuh atap uwe, uwok, namudok aria atudok wit tatogur arigas atin. <sup>6</sup> Aria aun nakihi wah hatao aria wah habo atudok wit ba tagok. Umum maresh, nukwaruh madae hunu hubuh utaborigunum aria wit amu yarit ba tagok. <sup>7</sup> Aria anat shuruwepit wit tabuh orokohun um segego wape aruhu madururuh. Aria aruhudok segegoiruh madururuh hakitak ba heyawiamukuk wit. <sup>8</sup> Aria anat shuruwepit wit tabuh yapubi amnab, Aria tobuki worigun. Anat tabuki 100-poreit, aria anat tabuki 60-poreit, aria anat tabuki 30-poreit atut. <sup>9</sup> Arpesh arigos sapeyeshi eshesh ko gamo shumnek enyudok baraen."

### *Umum Maresh Ba Jisas Nakripesh Wobuwobrenyi Atin Baraen (Mak 4:10-12; Luk 8:9-10)*

<sup>10</sup> Jisas nakripesh enyudok baraen ba jurug, aria ananim disaipel hanamori anan aria harigan namudok, "Umum maresh ba nyak nyeyagwreh wobuwobrenyi baraen um eshudok arpesh?"

<sup>11</sup> Aria Jisas nakri namudok, "Iruhin neyabik ipak ba padukemesh jurug um baugosinyum um enyudok nyanabeshuk iri baraen um arpesh shuwish aburdok wabur Iruhin nape Debeini um ananish arpesh shapeum heven. Aria anan da madae niyabik enyudok nyanabeshuk iri baraen um eshudok arpesh uwe, uwok. <sup>12</sup> Aria douk meishi arpesh sharao Iruhin ananin baraen shadukemen aria Iruhin ta nukesh enen yopinyi baraen shopunek um eshesh aria eshesh ta shugrem sabainyi yopinyi baraen shopunek. Aria douk meishi arpesh madae shugrem enen yopinyi baraen, aria Iruhin ta neyatakuk aria nutrish ihin banenyi aria shokwinyi baraen eshesh da shagremen iri. <sup>13</sup> Um enyudok baugenyum baraen atin eik da yeayagwreh yakripesh um wobuwobrenyi baraen atin.

Esheshis nabes satrugun, aria madae shutik enesh muguhwos. Eshesh shabuk arigos aria eshesh madae shumnek baraen ba shunyur baragos uwe, uwok.

**14** Um eshudok arpesh, aria enen baraen seiwok profet Aisaia neyagwrehenyuk iri douk nyatogur adur atin. Aria baraen enyudok, 'Ipak ta pumnek baraaen sabaibi nyutob, aria ipak ta mare pudukemesh um baugeneyum baraen. Ipak ta putrugun um sabaibi nyutob, aria ipak ta mare pudukemesh um enen mugu.

**15** Umum maresh? Ipak arpesh ipakish urkum apahw nubo sheshuk, aria ipakigos arigos sanoiwos sumnek baraen, aria ipakis nabes nubo seshuk um ta putik enen mugu. Uwok um, ipakigos arigos ta sumnek baraen, aria ipakish urkum apahw ta shudukemesh um enyudok baugeneyum baraen aria ipak pubukuk yoweishi inahos aria putanam panaki um eik aria eik ta gamo igabeyep ba putogur yopishi arpesh.'

**16** "Aria ipak panadudareh. Ipakis nabes douk satik eneshenesh. Aria ipakigos arigos semnek baraen. **17** Eik yakriep adurin baraen, seiwok sabaimi profet aria sabaishi yopishi arpesh madae shenek yoweishi inahos iri eshesh shakri um shutik eshudok eneshenesh douk ipak patrishi aria eshesh madae shutrish uwe, uwok. Aria eshesh shakri um shumnek enyudok baraen ipak douk pemnekenyi aria eshesh madae shumneken uwe, uwok."

*Jisas Nakripesh Baugeneyum Baraen Um Anudok Arman Nawashak Shuruwepit Wit Nubarig Iri*

(Mak 4:13-20; Luk 8:11-15)

**18** Aria Jisas nakri namudok, "Douk ipak pumnek baugeneyum baraen um anudok arman nawashak shuruwepit wit nubarig iri. **19** Eshudok arpesh shemnek yopinyi baraen um arpesh shuwish agundok Iruhin nape Debeini um ananish arpesh um. Aria madae shudukemesh um baugeneyum enyudok baraen, eshesh kabi da atudok shuruwepit wit tabuh takus yah iri, aria Satan nunamori eshesh aria atub nyutob natrish enyudok baraen Iruhin nawen numun esheshish urkum apahw iri. **20** Aria atudok shuruwepit wit tabuh takus utabor igunum, atudok wit kabi da arpesh da shemnek baraen aria atub nyutob aria shanadudareh umen. **21** Aria nukwaruh uwoken, aria shasuhw baraen banabi nyutob meyoh. Aria ku-paishi shukripesh nyagiyagigi enenyeneyen baraen um Iruhin ananin baraen aria shukesh bugob um eshudok arpesh aria shanunu eshudok arpesh, aria shopunek shanunu enyudok bilip atub nyutob. **22** Aria shuruwepit wit da tabuh orokhun um senego wapeyoruhi mandururuh iri, kabi da arpesh shemnek baraen, aria esheshish urkum apahw aria barag shakri abudok amnabish eneshenesh abom, aria shakana shutorumori sabaibori utabor. Eshudoki eneshenesh shiyawim Iruhin ananin baraen, aria madae yapuguni worigun nutogur uwe, uwok. **23** Aria atudok shuruwepit wit tabuh yopubi amnab iri, atudok kabi da arpesh shemnek baraen aria gamo shadukemesh um baugeneyum baraen iri. Eshesh ko shubuki yopuguni worigun kabi da atudok yaputi wit um, anat 100-poreit teir, anat 60-poreit teir, aria anat 30-poreit teir."

*Jisas Nakripesh Wobuwobren Baraen Um Yoweiruhi Utaruh Hakih Nubarig*

**24** Aria Jisas nakripesh kupainyi wobuwobren baraen namudok, "Arpesh shuwish agundok Iruhin nape Debeini um ananish arpesh shapeum heven, douk kabi da anan arman nawashak yoputi shuruwepit wit um ananig nubarig. **25** Aria eshesh arpesh sheshuh obi nyutob, anudok arman ananin

horin nanaki aria nawashak yoweiruhi utoruhip shuruwep orokohun um wit aria nanak.<sup>26</sup> Arigaha atudok wit tatogur takih tereh tape ba teir, aria shatik aruhudok yoweiruhi utoruh shopunek hatogur.

<sup>27</sup> “Aria amudok henek mour um anan iri hanaki hakripan namudok, ‘Debeini, apak makana nyak nyuwashak yoputi shuruwepit wit atut um nyakig nubarig. Aria yoweiruhi utoruh hatogur mumam nubarig?’

<sup>28</sup> “Aria anan nakripam namudok, ‘Anan horin nanaki aria nenekeh namudok.’

“Aria amam heneman mour iri harigan, ‘Nyak nyakana apak munak muburak aruhudok utoruh mugitaruh aria mubuk aruhudok yoweiruhi utoruh atugun aka?’

<sup>29</sup> “Aria anan nakripam namudok, ‘Namudok uwok. Ta puburak yoweiruhi utoruh aria puburakuk wit shopunek.’<sup>30</sup> Aria eik yakri wosik um wit aria yoweiruhi utoruh shutogur aragarag, arigaha nabudok nyutob ko mudar wit obi nyutob. Aria eik ta ko ikrip amudok henek enyudok mour iri namudok, ‘Ipak putorum yoweiruhi utoruh iyoh aria punotugoruh um unug um pushairuheh nyih. Aria ipak putorum wit ba putubuk gani eikit worigunit urupat.’”

#### *Jisas Nakripesh Wobuwobren Baraen Um Rowog Mastetim Shurkum (Mak 4:30-32; Luk 13:18-19)*

<sup>31</sup> Aria Jisas nakripesh kupaingyi wobuwobrenyi baraen namudok, “Arpesh shuwish agundok Iruhin nape Debeini um ananish arpesh shapeum heven douk kabi da anan arman nohur anam mastetim shurkum aria nawom gani ananig nubarigum.<sup>32</sup> Mastetip shuruwep da shokushok-wip abom um kupaigosi rowosip shuruwep, shurkum makih amnab mato iruhw, aria munahwaram enen debeinyi rowog nyenek uhwinyum kupaigosi rowos. Aria armiguhw hwanaki hwawish enyudok rowog ba hweneke was sotem rowogish nyeiguhw.”

#### *Jisas Nakripesh Wobuwobren Baraen Um Yis (Luk 13:20-21)*

<sup>33</sup> Aria Jisas nakri namudok, “Arpesh shuwish agundok Iruhin nape Debeini um ananish arpesh shapeum heven douk kabi da yis um. Onok armatok kwohur asudok yis aria kwabadigas um sene ushiwish um plaua numun anap debeipi marup. Aria enyudok plaua nyakitak nyanagok nyato nyatogur debeinyi.”

#### *Jisas Neyagwreh Nakwu Wobuwobrenyi Baraen Um Nakripesh Iruhin Ananin Baraen (Mak 4:33-34)*

<sup>34</sup> Jisas neyagwreh nakwu wobuwobrenyi baraen um nakrip ihish arpesh. Anan madae niyagwreh meyoh nukwu kupaingyi baraen uwe, uwok. Anan nakwu wobuwobrenyi baraen atin.<sup>35</sup> Anan douk nakripesh wobuwobrenyi atin um enen baraen seiwok anan profet nenyemokuk iri nyatogur adur atin da nyakri namudok,

“Eik ko iyagwreh nukwat ikri wobuwobren baraen.

Aria ikripesh baraen um nyunabeshuki enenyenen baraen seiwok Iruhin nakwarum agudok nahobig um ba nakriyen nyape arigaha douk atin nyatogur.”

#### *Jisas Nakripesh Baugenyum Baraen Um Aruhudok Yoweiruhi Utaruh*

<sup>36</sup> Aria Jisas nakitak nakutukuk eshudok worobaishi arpesh shapeik aria nanak nawish urupat. Aria ananim disaipel hanaki hatrun aria hakripan

namudok, "Apak makri nyak nyukripap baugenylum baraen um enyudok wobuwobrenyi baraen um yoweiruhi utoruh nubarig iri."

<sup>37</sup> Aria Jisas nakri namudok, "Arman nawashak yoputi wit iri, anudok eik atuwe Eik douk Anudok Arman yatogur adurinyi arpen iri. <sup>38</sup> Aria nubarig douk agudok nahobig. Aria yaputi shuruwepit wit, douk eshudok arpesh da shape shawish agundok Iruhin nape debeini um ananish arpesh um. Aria yoweiruhi utoruh, douk eshudok arpesh shanawasham Satan iri. <sup>39</sup> Aria anudok horin da nawashak yoweiruhi utoruhip shuruwep, anan da Satan. Aria shurim worigun obi nyutob, abudok nyutob kweipon agudok nahobig gunonukuk obi nyutob. Aria hunek mour iri eshudok da enselahos. <sup>40</sup> Aria amudok douk hagit yoweiruhi utoruh ba heshairuhed nyih iri, amudok kweipon henekesh namudok atin um hahi hagiguki nyumnah um agudok nahobig. <sup>41</sup> Eik douk Anudok Arman yatogur adurinyi arpen iri ta ishopok eikish enselahos eshesh ko shunak shutorum ihish arpesh shuni ihish eneshenesh da shanunu bilip um arpesh iri, shuni ihishmorim arpesh shenek yoweishi inahos iri. Eshudok arpesh ta mare shuwish shupe abrudok wabur Iruhin nape Debeini um ananish arpesh um, uwok. <sup>42</sup> Aria ta enselahos shuwashak eshudok yoweishi arpesh shuwish debeihi nyih. Aria ko shupe numun ehudok nyih ba shereh yowiyokuk shurpak naruh shuwegeruh. <sup>43</sup> Um abudok nyutob atub aria eshudok shape yopinyi poe ba madae shenek yoweishi inahos iri ta shutogur anahaeh kabi da nyumnohin aunit lait morim gani numun esheshin Yaken Iruhin napeum douk agundok anan nape Debeini um ananish arpesh um. Ipak arpesh da arigos sapeyepi aria ko pumnek enyudok bareaen."

### *Wobuwobren Baraen Um Anan Arman Nuparug Enen Yopunyi Mugu Shatorin Debeibori Utabor Iri*

<sup>44</sup> Aria Jisas nakri namudok, "Arpesh shuwish agundok Iruhin nape Debeini um ananish arpesh shapeum heven douk kabi da enen yopunyi mugu shatorin debeibori utabor iri um da enesh shebeshuken nyor anag amnabig nubarig. Anan arman natrin aria ta natuken nabeshuken kupaigunum. Aria anan nanadudareh abom aria nanak nekesh ihishmorim ananish eneshenesh um kupaishi arpesh ba shatorish shakon utabor aria anan nasuhw utabor nanak nator agudok nubarig."

### *Wobuwobren Baraen Um Anab Yopiyibi Weiyoub Douk Shatorub Debeibori Utabor Iri*

<sup>45</sup> Aria Jisas ta nakri namudok, "Aria enen kupainyi wobuwobrenyi bareaen nyunak namudok. Aria arpesh shuwish agundok Iruhin nape Debeini um ananish arpesh shapeum heven, douk kabi anan umben um es-hesh shuwashon nabuh waiyag aria sabaiguhi yomoyomogiguw eighuhw hwawish hwatuk anudok umben. <sup>46</sup> Naurimab nanak arigaha nanak naparug anab yopiyopibi weiyoub douk shatorub debeibori utabor iri. Aria nanak nekesh ihishmorim ananish eneshenesh um kupaishi arpesh ba shatorish shakon utabor, aria anan nasuhw utabor nanak ba nator abudok yopiyibi weiyoub."

### *Wobuwobren Baraen Um Umben Douk Shatuk Eighuhw Um*

<sup>47</sup> Aria Jisas ta nakri namudok, "Aria shopuk kupainyi wobuwobrenyi bareaen nyanak namudok. Shopunek arpesh shuwish agundok Iruhin nape Debeini um ananish arpesh shapeum heven, douk kabi anan umben um es-hesh shuwashon nabuh waiyag aria sabaiguhi yomoyomogiguw eighuhw hwawish hwatuk anudok umben. <sup>48</sup> Anudok umben shunukin, aria eshesh shanukan nanaki anagasigum waiyag. Aria shape sheagom yopugwuhi eighuhw shoguhwur yaureruhw. Aria yoweiguhwi ta showashoguhuk.

<sup>49</sup> Kweipon hahi hagiguki nyumnah hutogur agudok nahobigum ta shubirak namudok atin. Eshesh enselahos ko shunaki shurao yoweishi arpesh da shape orokohun um yopishi arpesh shapeum, <sup>50</sup> aria eshesh ta shuwashak eshudok yoweishi arpesh shuwish ehudok debeihi nyih. Gani numun um ehudok nyih eshesh ko shureh yowiyokuk aria shurpak naruh shuwatoruh.”

### *Enyudok Doukin Baraen Nyani Seiwokin*

<sup>51</sup> Aria Jisas narik ananim disaipel namudok, “Ipak douk padukemesh um enyudok baugennum iihn baraen?”

Aria amam hakripan namudok, “Wosik apak madukemesh.” <sup>52</sup> Aria anan nakripam namudok, “Namudok aria amudok ihm henek skulumesh um lo iri douk atin ta hanaki hagipesh eik henek skulumesh um shuwish agundok Iruhin nape Debeini um ananish arpesh shapeum heven, amam hape kabi da anan yaken douk nagrem anat debeiti urupat. Aria nanak nawish numun atudok urupat um anam rum um da sabaishi yomoyomogish yopiyopishi ananish eneshenesh shunukigun ba shakuh omi rum, aria anan nohuri ihishmorim namushi aria jugwaishi eneshenesh aria naraesh natograri aduk.”

### *Eshesh Nasaret Shakonakuk Agab Jisas (Mak 6:1-6; Luk 4:16-30)*

<sup>53</sup> Jisas nakripesh enyudok ihinyumorim wobuwobrenyi bareaen ba jurug, aria nakanitakuk abrudok wabur ba nanak. <sup>54</sup> Aria anan nanak anan kanak ananibur wabur. Aria anan nanak nawish gani numun esheshit urupat douk eshesh Juda shape sheneyagwreh bareaen-ati aria apa nenek skulumesh nakripesh Iruhin anarin yopinyi bareaen um ihishmorim arpesh. Eshesh shemnek enyudok bareaen aria shakitak yowiyokuk aria shakri namudok, “Anudok arman nanak narawi enyudok yopuni saki agunum? Aria anan da wosik neneck enyudok Iruhin atun neneken iri mour ko neneken nyatogur mumam? <sup>55</sup> Apak madukemesh anudok arman anan da kamdain nugarin aria Maria da ananik amakek. Aria Jems, Josep, Saimon aria Judas da ananim owarhim. <sup>56</sup> Aria ananiyu ihiyumorim mohwiyyariyu, owo da wani apak wape. Namudok mumam aria anan ta wosik neneck eshudok eneshenesh?”

<sup>57</sup> Eshesh shakri namudok aria esheshish urkum apahw yoweshum anan aria shakanukuk agab Jisas. Aria Jisas nakripesh namudok, “Profet ananin nyeigur ko nyupe ihirub warub. Aria um anan kanak ananibur wabur aria anan kanak ananip awiropish ko mare shunadudareh um ananin nyeigur uwe, uwok.”

<sup>58</sup> Aria anan ta mare neneck sabainyi enyudoki Iruhin atun neneken iri mour abrudok wabur uwe, uwok. Umum maresh? Eshesh da madae shenek bilip um anan uwe, uwok.

## 14

### *Herot Nakana Jisas Anan Douk Jon Neneck Baptaisumesh Iri (Mak 6:14-29; Luk 3:19-20, 9:7-9)*

<sup>1</sup> Aria abudok nyutob, Herot douk nape debeini um gavman um agudok shokugi nahobig Galili. Aria anan nemnek bareaen um Jisas nape nenekehi eneshenesh. <sup>2</sup> Aria Herot nakrip amudok henek mour um anan iri namudok, “Anudok arman douk Jon neneck baptaisumesh iri atun. Anan atun ta nakanitak wonugwehw. Namudok aria anan douk dodogeshin atun um neneck enyudok Iruhin atun nenekenyi mour.”

<sup>3-4</sup> Seiwok Herot narao Herodias, okwok da Filip ananik irohukwik, aria Filip douk watak nape. Filip da Herot ananin wanin. Aria Jon nubo nakrip Herot namudok, "Nyak nyabrig Iruhin ananin lo um nyatrun ananik armatok. Namudok ta mare nyenekesh uwe, uwok." Namudok aria Herot nasuhw Jon aria napiyakan nakwu senab aria nanur nape shunuweshik-ati urupat. <sup>5</sup> Aria Herot nakana nubo Jon nugok, aria ta nanogugur um eshesh shakana Jon da anan profet.

<sup>6</sup> Anah nyumnah enesh arpesan shanaki shani Herot shape shawok worigun um urkwip purum ahudok nyumnah seiwok nanakwaram ahi. Aria abudok nyutob Herodias okwokwik nugawik kwanaki kwape kweyorub kwatukobur kwanaki kwanak agundok da shantorum shapeum. Aria okwok kwonekesh namudok aria Herot nanadudareh abom um okwok. <sup>7</sup> Namudok aria Herot nakripok adurin atinyi bareaen um okwok namudok, "Adur iruhw nyak ta nyukri nyurik eik um maresh muguhwos aria eik ta ko ikenyesh atish." <sup>8</sup> Aria okwokwik amakek Herodias kwakrip nugawik aria nugawik kwonak kwakrip Herot namudok, "Eik yakri nyak nyuwemi Jon neneb baptaisumesh iri ananig barag iruhw um anohw yaurehw aria nyugusah nyunaki nyukeyog."

<sup>9</sup> Aria King Herot nemnek enyudok bareaen aria ananish urkum apahw amamaenyish atish. Aria anan urkum morum dodogowinyi adurinyi bareaen da nenekenyi aria anan nanoiwos um ta bareaen nyonum eshudok shape shawok worigun shani anan iri um esheshis nabes. Namudok aria nakrip amam soldia um henekesh kabi da armatok kwakri um. <sup>10</sup> Aria anan neshopok anan arman nanak gani shunuweshik-ati urupat um nukrip amam soldia um hurupogesh Jon ananin aruhwigur. <sup>11</sup> Aria eshesh shurawi ananig barag getemi anohw yaurehw aria shako okwudok weroroikwi armatok aria okwok kurao barag konak um okwokwik amakek. <sup>12</sup> Aria Jon ananim disaipel hanaki harao ananit mukut hotusah hanak harumot. Amam harom Jonit mukut jurug, aria hanak hakrip Jisas.

*Jisas Nekesh Worigun Sabaishi Arpesan Shadarehesh Shatogur 5,000-poreish Iri*

*(Mak 6:31-44; Luk 9:10-17; Jon 6:1-13)*

<sup>13</sup> Jisas nemnek bareaen um douk eshesh shabo Jon nagok um, aria anan nakutukuk abrudok wabur aria narao anat bot aria nanak anabik da arpesan wokagunum. Douk anan nani ananish disaipel atin shanak. Aria sabaishi arpesan da shemnek bareaen um Jisas da nanak um, aria eshesh shakutukuk esheshirub warub aria eshesh shagim yah shanak shaurim anan. <sup>14</sup> Nabudok nyutob Jisas nanak natogur anagas-igum waiyag aria natik sabaishi arpesan apa shebeiman. Aria anan nenenmesh giha abom um eshesh aria anan nataurumesh nagabe ihishmorim da arugeh hapeyesh iri.

<sup>15</sup> Aria wabigepl amam disaipel hanamorim anan aria hakripan namudok, "Agnudok da arpesan wokagunum, aria hurukum ta aun nubuh. Nyak wosik ko nyushopok arpesan shunak esheshirub warub aria shutor worigun."

<sup>16</sup> Aria Jisas nakrip ananim disaipel namudok, "Umum maresh ba eshesh ta shunak? Ipak kanak ta pukesh worigun ba shugnoh."

<sup>17</sup> Aria amam disaipel hakrip anan namudok, "Apak da madae mubuk sabaiguni worigun agundok uwe, uwok. Apak da mobuk 5-poreig bretog aria biyoguhw eiguhw atish shakuh."

<sup>18</sup> Aria Jisas nakri namudok, "Haraki agwudok bretog gwani eiguhw um eik."

<sup>19</sup> Aria Jisas nakrip ihishmorim arpesh um shubuh shupe atap utoruh. Aria anan nohur agwudok 5-poreig bretog gwani agwuhwudok biyoguhw eiguhw aria anan nanig natik gani iruhw heven aria nenek beten aria nani Iruhin heyagwreh. Aria anan nawor agwudok bretog aria nakom disaipel. Aria amam disaipel hasia agwudok bretog um eshudok arpesh. <sup>20</sup> Aria ihishmorim shawok worigun ba duguresh. Aria ihigun morim tutukwanigun worigun douk nakuhuk iri, amam disaipel ta hatorumogun haraguni aria hognuruk 12-poreiruh sararuh. <sup>21</sup> Amudok armam douk hawok worigun iri shadarehám hatogur 5,000-poreim. Aria armago wani batowish madae shudarehesh uwe, uwok.

*Jisas Narahaen Iruhigum Waiyag  
(Mak 6:45-52; Jon 6:16-21)*

<sup>22</sup> Aria arigas atin Jisas nakrip ananim disaipel um haprok huto bot aria hurik hunak gani wobrag waiyag. Aria anan kanak ta nupe ba neshopok eshudok arpesh shunak ba iyoh. <sup>23</sup> Anan neshopokesh shanak shatuh aria anan atun nato gani iruhw anohw yoduhw um nikih nenek beten. Aria abudok nyutob aun da nabuh um da anan atun nape gani iruhw yoduhw. <sup>24</sup> Atudok bot iganigadae tanak rougun abom aria uhwin nyaboi gani tarigum bot, aria abar beshiwok bot tanak tanaki.

<sup>25</sup> Aria huruhuruk um gugrukibus aria Jisas narahaen nanaki iruhigum waiyag aria nanaki natogurum amam disaipel. <sup>26</sup> Aria amam hatik anan narahaen nanaki iruhigum waiyag aria amam hanogugur abom aria arugoguhwiar wam yowiyokuk. Aria amam hakri namudok, “Anudok douk enen sagab.”

Aria amam hanogugur abom ba hohwar debeg. <sup>27</sup> Aria arigas atin Jisas nakripam namudok, “Ipak pupe dodog. Enyudok douk eik atuwe. Ipak mare punogugur.”

<sup>28</sup> Aria Pita ta nakripam namudok, “Debeini, enyudok douk nyak atin um, aria nyak nyukrip eik aria eik ta irahaen inakugu iruhigum waiyag aria inamagu nyak nagundok.” <sup>29</sup> Aria Jisas nakripam namudok, “Wosik nyak yowi.” Aria Pita nikitak nakutukuk bot aria narahaen iruhigum waiyag nanam Jisas. <sup>30</sup> Aria anan natik enen uhwin dodegogwin abom aria nanogugur aria pususuwaran nabuh youg. Namudok aria anan nahwar namudok, “Debeini, nyak nyutaurum eik.”

<sup>31</sup> Aria arigas atin Jisas nasuhw Pita ananis wis natukani. Aria Jisas nakrip anan namudok, “Nyak madae gamo nyenek bilip um eik uwe, uwok. Umum maresh ba nyak nyor biyep urkwip?” <sup>32</sup> Aria amam haprok hato bot, aria uhwin nyagok nyabuh. <sup>33</sup> Aria armam hape bot iri, amam henek lotu um Jisas aria hakri namudok, “Adur atin, nyak douk Iruhin Ananin Nuginan.”

*Jisas Nape Genesaret Aria Nagabe Sabaishi Arugeh Henekeshi Shatogur Yopish  
(Mak 6:53-56)*

<sup>34</sup> Aria Jisas nani ananim disaipel habrig waiyag hanak hatogur gani wabrehah anagas um Genesaret. <sup>35</sup> Arpesh shape nagundok iri shatik Jisas aria shadukeman, aria shenek baraen nyunam ihirub warub bape huruhuruk iri, aria eshesh sharawi ihishmorim arugeh henekeshi um anan. <sup>36</sup> Aria eshesh sharig Jisas debeg um ta nukri wosik aria eshudok arugeh henekeshi ta shususuhw anagas um ananih rupah. Aria ihishmorim shenekeshi namudok iri ta shatogur yopish.

## 15

*Iruhin Ananin Lo Nyenek Uhwin Abom Um Eshesh Juda Esheshim Yamehem Amamin Baraen  
(Mak 7:1-13)*

<sup>1</sup> Aria abudok nyutob anam Farisi hani amudok anam henek skulumesh um lo iri hape iri Jerusalem aria hanaki hatik Jisas. Aria harigan namudok,  
<sup>2</sup> “Umum maresh? Aria nyakim disaipel apa habrig lo seiwok apakim yamehem hakapenyi? Hawok worigun um, madae hukrup wis uwe aria ko huwok worigun.”

<sup>3</sup> Aria Jisas nakripam namudok, “Umum maresh aria ipak da apa pagipesh ipak kanak ipakin lo aria ipak pabrig Iruhin ananin lo? <sup>4</sup> Umum maresh, Iruhin nakri namudok, ‘Ipak ta pupe shakamum ipakish amakek yaken aria pigipesh esheshin baraen’ aria ‘arpen da nyabubunim enyeniyish amakek yaken iri enyen ta shen nyugok.’ <sup>5</sup> Aria ipak da apa pakri namudok, ‘Douk enen arpen nyobuk anabor utobor um nyutaurum enyeniyish amakek yaken, aria enyen nyukrip eshesh biyesh namudok, “Eik yagraeh eshudok um iko Iruhin,” <sup>6</sup> aria enyudok arpen ta mare nyere urkum um enyeniyin yaken ba gamo nyutauruman uwe, uwok.’ Um ahudoki aih ipak da pabrig Iruhin ananin baraen aria pohur ipakim yamehem henekeshahi aih hato iruhw. <sup>7</sup> Ipak da apa pape biyaruh aparuh iri! Profet Aisaia seiwok neyagwreh Iruhin ananin baraen, aria nenyemaguk adurinyi um ipak iri enyudok,

<sup>8</sup> ‘Eshudok arpesh eshesh da apa shohur eikin nyeigur nyato gani iruhw um esheshig nukwatog atug um shunek lotu um eik aria esheshish urkum apahw shape rougunum um eik.

<sup>9</sup> Amam hadukemesh um henek skulumesh um arpeshin lo atin aria hakri namudok,  
“Enyudok Iruhin ananin baraen.” Namudok aria amam da henek lotu um eik meyoh.’”

*Jisas Nakripesh Um Eneshenesh Douk Sheneck Arpesh Ba Shabo Sisih  
Nunun Esheshish Urkum Apahw Iri  
(Mak 7:14-23)*

<sup>10</sup> Aria Jisas nahwar ihish arpesh shanamorim anan aria nakripesh namudok, “Ipak pumnek aria gamo pudukemesh. <sup>11</sup> Eneshenesh shawish enen arpen enyeniyit nukwat iri, eshudok madae shenek enyudok arpen ba yowen nyubo sisih uwe, uwok. Aria eneshenesh da nukwat takriyeshi, eshudok atish da shenekesh aria enyudok arpen yowen nyabo sisih.”

<sup>12</sup> Aria anob nyutob banakuk aria amam disaipel hanaki hakrip Jisas namudok, “Nyak da nyadukemesh aka uwok? Amam Farisi hemnek enyudok nyakin baraen aria amamish urkum apahw yowesh.”

<sup>13</sup> Aria Jisas ta nakripam namudok, “Eik Yaken nape heven iri, anan da nagrem anag nubarig. Aria ihish eneshenesh anan kanak madae nuwesh uwe, aria anan ko ta nurim ba nutukeshum aria ta nutuk nukwaruh hunuhapumesh. <sup>14</sup> Ipak mare urkwip aparuh shur um amudok armamin baraen. Amam kabi da nabes seshuhomi um hakana hiyabig yah um kupaishi arpesh. Aria ta nabes seshuhomi hukana hiyabig yah um kupaishi nabes seshuheshi aria ta biobiom hunak hugrukuk nuwag.”

<sup>15</sup> Aria Pita narik Jisas namudok, “Eik yakri wosik um nyak ta nyuwereh baugeniyum enyudok wobuwobrenyi baraen um eshudok shenek arpesh ba shabo sisih aria apak ta mummek?”

<sup>16</sup> Aria Jisas nakri namudok, “Namudok ta mumam? Ipak shopunek madae pudukemesh uwe, aka? <sup>17</sup> Aria ipak da madae pudukemesh uwe, uwok. Ihish eneshenesh shawish nukwat iri, eshudok shanak um numun nyibur wautem aria sharukegeshuk gani deiwog. <sup>18</sup> Aria enenyenbaraen nyatogur apakig nukwatog enyi, enyudok barae da nyatogur apakish urkum apahw aria peyagwreken nyatograri. Aria enyudok barae atin da nyenek apak arpesh amu yowep ba mabo sisih abom. Aria Iruhin natik apak nahwarap yoweishi arpesh. <sup>19</sup> Eik yakripep, eshudoki eneshenesh da shatogur arpeshish urkum apahw um shapeyahi aih, eshudok eneshenesh douk eshudok. Yoweishi urkum apahw aria urkum shorum, shabo arpesh shagok um, shenek wehrur um, shabrig shanaraum um, shakwuaruh um, shegiyagigum kwotog um, shoruk nubug kupaishi um. <sup>20</sup> Eshudoki yoweishi eneshenesh da shenek apak arpesh aria yowep ba amu mabo sisih abom um Iruhin ananis nabes. Aria arpesh da shawok worigun ba madae shukrup wis iri ahudoki aih da madae hunek arpesh ba amu yowesh shubo sisih abom uwe, uwok.”

*Onok Kenanik Armatok Kwonek Bilip Abom Um Jisas Iri  
(Mak 7:24-30)*

<sup>21</sup> Aria Jisas nakutukuk abrudok wabur aria nanak gani warub Tair bani Saidon. <sup>22</sup> Aria onok Kenanik armatok kwape nagundok iri, aria okwok kwanaki kwohwar namudok, “Debeini, nyak Devit Ananin Barhonin,\* nyak ko nyenek gihaum eik. Enen yoweinyi sagab nyanunu eikik nagawik ba amu kwabo sisih abom.”

<sup>23</sup> Aria Jisas madae ta nuwanamok barae da nukripok enen barae uwe, uwok. Aria ananim disaipel hanamori anan aria hakripan namudok, “Okwudok armatok da apa kwohwar, kwohwar aria kwagipeshi apak kwanaki. Aria nyak kitak ba ta nyushopokok ba kunak.”

<sup>24</sup> Aria Jisas natanam nakripok namudok, “Iruhin neshopoki eik yanaki um eshesh Israel atish douk shape kabi da sipsipahos da shanotukuk iri.”

<sup>25</sup> Aria okwudok armatok kwanaki hurukum Jisas kwabuh kwoduk ohrubus aria kwohwido barag gabuh atap amnab aria kwakri namudok, “Debeini, eik yakri nyak nyutaurum eik.”

<sup>26</sup> Aria Jisas natanam nakripok namudok, “Namudok uwok um ta muhur batowishigun worigun aria muwashagun um nubag.”

<sup>27</sup> Aria okwudok armatok kwakri namudok, “Debeini, nyak nyakri adurin barae. Aria nubag shopunek da gwohur tutukwaniguni worigun nagruki shukam um tebol um ogwogwin debeini iri.”

<sup>28</sup> Jisas nemnek enyudok barae da nukripok namudok, “Nya, nyak douk nyenek bilip abom um eik. Namudok aria enyudok mugu nyak nyakri eik ta ineken um nyak iri aria douk eik yakri ta nyutogur um nyak.”

Aria banabi abudok nyutob atub okwokwik nagawik ta kwatogur yopuk.

*Jisas Nagabe Sabaishi Arugeh Henekeshi Arpesh Aria Yopish*

<sup>29</sup> Aria Jisas nakutukuk abrudok wabur aria anan douk nagim anagasigum Galilieg waiyag nanak. Aria nanak nato onohw yoduhw aria nape. <sup>30</sup> Aria sabaishi arpesh shanamori anan. Aria eshesh sharauri eshudok yoweigasi aiyas sapeyeshi, nabes sesuheshi, bishighu shakokutom eshi, nokwatog gweshukeshi aria sabaishi arpesh da arugeh hapeyeshi shopunek, aria sheshubuk hurukum Jisas ananigas aiyas. Aria anan nagabeyesh shatogur yopish. <sup>31</sup> Aria eshudok arpesh shatik nokwatog gweshukeshi sheneyagwreh, bishighu shakokutomeshi shatogur yopish,

\* **15:22:** Putik futnot nyape Matyu 12:23 iri.

yoweigasi aiyas sapeyeshi sharahaen, nabes seshuheshi ta shatrugun, aria esheshish urkum apahw shakitak yowiyokuk. Aria eshesh shohur Iruhin douk eshesh Israel shenek lotuman iri ananin nyeiger nyato gani iruhw.

*Jisas Nekesh Worigun Sabaishi Arpesh Shadarehesh Shatogur 4,000-Poreish Iri*

(Mak 8:1-10)

<sup>32</sup> Jisas nahwari ananim disaipel hanaki um anan, aria nakripam namudok, "Eik yenek gihaum eshudoek arpesh. Eshesh shani eik maþe bihotih nyumnegwih jurug aria eshesh worigun wokes. Eik yanoiwos um eshesh ta nyurub besh ba ishopokesh shunak. Esheshis nabes ta sonatiyanih aria marubigos sesh ba ta shututu gani yah."

<sup>33</sup> Aria amam disaipel hakripan namudok, "Agundok arpesh wokagunum. Apak ta murao sabaiti bret agunum ba ta mukesh atudok bret namudokishi sabaishi arpesh?"

<sup>34</sup> Aria Jisas nakri namudok, "Ipak douk pobuk makunig bretog gwakus?"

Aria amam hakripan namudok, "Apak mabuk 7-poreig bretog gwakus aria atur atur shokuguhwi eiguhw shopunek."

<sup>35</sup> Aria Jisas nakrip eshudoek ihish arpesh um shupe atap amnab. <sup>36</sup> Aria anan nohur agwudok 7-poreig bretog aria eiguhw, aria neneb beten aria nani Iruhin heyagwreh, aria anan nawor agwudok bretog aria nako ananim disaipel aria amam hasiagum eshudoek arpesh. <sup>37</sup> Aria ihishmorim shawok worigun ba dugaresh. Ihish tutukwanishi worigun shakuk iri douk amam ta hatorumesh ba heshuruk 7-poreiruh suraruh. <sup>38</sup> Amudok armam douk hawok worigun iri shadareham hatogur 4,000-poreim. Aria armago wani batowish madae shudarehesh uwe, uwok. <sup>39</sup> Jisas neshopok ihish arpesh shanak iyoh, aria anan naprok nato anat bot aria nanak gani anagum nahobig shahwaragum Magadan.

## 16

*Anam Armam Harig Jisas Um Nene Nenek Enen Iruhin Atun Neneken Iri Mour (Mak 8:11-13; Luk 12:54-56)*

<sup>1</sup> Amam Farisi hani Sadyusi hanamorim Jisas aria amam hakana hukwiraeh anan. Aria amam hakrip anan um neneb enen Iruhin atun neneken iri mour. Umum maresh? Amam hakana hutik aria ta hukri adur atin anan douk Iruhin naganin da nanaki. <sup>2</sup> Aria Jisas nakri namudok, "Wabigegwis ipak pakri, 'Uttag owishiborig atug. Yopubi nyutob ko butogur.' <sup>3</sup> Aria ruwahegwis ipak pakri, 'Eshah ta harari. Umum maresh, uttag iganigadae gatogur owishiborigi aria behrabigi. Namudok aria douk ta uhwin nyahur aria eshah harari.' Adur atin, ipak patik enyudok kak um utag genekesh ahi aih aria gamo padukemesh um yoweibi aka yopubi nyutob ta butogur. Aria ipak douk madae gamo putik énen kak um pudukemesh um eneshenesh shatogur douk abudok nyutob iri. <sup>4</sup> Eshesh arpesh um doukib nyutob ipak da yoweishi arpesh aria ipak madae pukon ipakish urkum apahw adur atin um Iruhin uwe, uwok. Ihib nyutob eshesh shahwar um shakana shutik enen Iruhin atun neneken iri mour. Aria eshesh ta mare shutik enyudok kak uwe, uwok. Aria atin enen kak Iruhin atun neneken iri mour ipak ko putrin iri, enyudok profet Jona ananin." Aria Jisas nakutukuk eshesh aria nanak.

*Jisas Nakrip Ananim Disaipel Um Gamo Hutrugun Um Amam Farisi Hani Anam Sadyusi Amamih Yoweishi Aih Kabi Douk Yis Um (Mak 8:14-21)*

<sup>5</sup> Jisas nani ananim disaipel hanak hatogur gani wobrag waiyag, aria amam disaipel urkwip peshukomuk um hurauri anog bretog shopunek.

<sup>6</sup> Aria Jisas nakripam namudok, “Ipak ko gamo putrugun aria gamo pudukemesh um ámam Farisi hani ámam Sadyusi amamih yoweihí aih kabi douk yis um.”

<sup>7</sup> Aria amam disaipel apa heneyagwreh orokohun um amam kanak namudok, “Anan da neyagwreh enyudok baraen umum maresh? Apak da madae murauri anog bretog uwe, uwok.”

<sup>8</sup> Jisas nadukemesh um enyudok baraen amam hakriyenyi aria anan nakripam namudok, “Ipak madae punek bilip wosik um eik uwe, uwok. Umum maresh ba ipak apa pakri namudok, ‘Apak da bretog uwok?’ <sup>9</sup> Ipak da madae gamo pudukemesh aka? Aria ipak da madae pudukemesh um agwudok 5-poreig bretog da 5,000-poreish arpesh shagwahi, aria makuriruh sararuh da ipak poruk tutukwaniguni worigunaruhi? <sup>10</sup> Aria ipak da madae pudukemesh um agwudok 7-poreig bretog da 4,000-poreish arpesh shagwahi aria makuriruh sararuh da ipak poruk tutukwaniguni worigun aruhi? <sup>11</sup> Umum maresh ba ipak madae pudukemesh namudok, eik madae urkum murum bret aria eik yekep baraen ipak? Eik yakri, ipak ta gamo pudukemesh um amudok Farisi hani Sadyusi amamis yis.”

<sup>12</sup> Amam hemnek enyudok baraen aria amam hadukemesh namudok, anan madae niyagwreh um amam ta gamo hudukemesh um yis shenek bretasi uwe, uwok. Anan da neyagwreh um amam ta gamo hudukemesh um Farisi hani Sadyusi amamih aih aria amamin baraen.

### *Pita Nowereh Baraen Nakri Jisas Anan Douk Krais (Mak 8:27-30; Luk 9:18-21)*

<sup>13</sup> Jisas nanak um wabur gani Sisaria Filipai aria um abudok nyutob aria anan narik ananim disaipel namudok, “Eshesh ihish arpesh eshesh da apa shakriyen shakana Anudok Arman natogur adurinyi arpen iri douk amiapen?”

<sup>14</sup> Aria amam hakri namudok, “Enesh shakana, nyak da Jon nenek baptaisumesh iri. Aria enesh shakana, nyak da Elaija. Aria enesh shakana, nyak da Jeremaia aka, anan profet.”

<sup>15</sup> Aria Jisas narik amam namudok, “Aria ipak kanak pakana eik da amiapen?”

<sup>16</sup> Aria Saimon Pita nawanam baraen namudok, “Nyak douk anudok arman Iruhin nubokadae nagraehenyum nyunaki ta nyurao ihishmorim ananish arpesh shutanamori. Nyak douk anudok arman Iruhin douk madae nugok iri uwe ananin naganin.”

<sup>17</sup> Aria Jisas nakrip anan namudok, “Saimon Jon ananin naganin, nyak ko nyunadudareh. Umum maresh? Madae enen abudok amnabin arpen da nyeyabigen enyudok baraen um nyak uwe, uwok. Eikin Yaken douk nape heven iri anan atun nyeyabigen enyudok um nyak. <sup>18</sup> Aria eik yakrip nyak namudok. Nyak douk Pita, aria eik ta irok eikit arpesh shenek lotuati urupat\* tiyotu dodog iruhw um amudok utom. Aria enyudok gokin dodog

---

\* **16:18:** Enyudok baraen Jisas nakriyenyi douk nyakri arpesh, eshesh arpesh Jisas ananish atish douk shagipesh ananin baraen iri. Tok Inglis douk nyakri “My church.” Sabaishi arpesh shanam lotu iri shakri enyudok baraen Jisas nakriyen iri nyakri, “Eikit haus lotu”, aria uwok. Ipak punak pusorik Pater Don Grant aria anan nukriep. Putik Jerusalem Baibel aria putarih enyudok baraen Inglis putik “My Church.” Aria debeibi behrab um Church (Sios) douk bakriap um enyudok baraen nyakri Jisas Krais ananin Sios o ananish arpesh shagipeshan iri. Aria enyudok baraen madae nyukri “Eikin haus lotu” uwe, amu uwok.

ta mare nyununut uwe, uwok. <sup>19</sup> Aria eik ta douk iken eshudok kihas um nyak um arpesh shuwish aburdok wabur heven Iruhin napé Debeini um ananish arpesh um. Aria maresh nyak nyutapesh um abudok amnab, aria anan Iruhin ta nutapesh gani iruhw heven shopunek. Aria maresh nyak nyukweshihesh abudok amnab, aria anan Iruhin ta nukweshihesh gani iruhw heven shopunek.”

<sup>20</sup> Aria Jisas namumup ananim disaipel dodog abom um amam mare hukrip enen arpen um anan kanak douk anudok arman Iruhin nagraehan aria neshopokan nanaki iri.

*Jisas Nakri Adur Atin Um Anan Ko Shon Nugok Aria Anan Ta Nukitak Nupe*

(Mak 8:31, 9:1; Luk 9:22-27)

<sup>21</sup> Aria abudok nyutob Jisas apa nakrip amam disaipel namudok anan ta nunam Jerusalem aria anan ta nurao sabairi eriger um amam Juda esheshim debeimi huni amam douk henek skulumesh um lo iri aria debeimi pris. Aria ta shon nugok, aria bihotih nyumneh hunak hunakuk aria anan ko ta nukitak nupe. <sup>22</sup> Aria Pita nemnek enyudok bareaen aria narao Jisas nanak anagas aria apa nahan nakri namudok, “Debeini, namudok ta uwok. Eshudok eneshenesh ta mare shutogurum nyak.”

<sup>23</sup> Aria Jisas natanam nakrip Pita namudok, “Satan, nyak yowi kareiguk eikib agab. Nyak nyakana nyutapok eikih yah. Nyak madae nyigipesh Iruhin ananim urkum apahw uwe, uwok. Nyak douk nyagipesh arpesh esheshish urkum apahw atish iri.”

<sup>24</sup> Aria Jisas nakrip ananim disaipel namudok, “Meishi arpesh douk shakana shigipesh eik um, aria eshesh ta shubukuk ihishmorim eneshenesh eshesheish urkum apahw shakriyesi aria shusah esheshin rowogin kruse aria ta shugipesh eik. <sup>25</sup> Umum maresh? Douk meishi arpesh shakana shagabe eshesh kanak aria eshesh ta shunanunu shuwishuk. Aria ta meishi arpesh esheshish urkum apahw shurum eik iri aria eshesh ta mare shugok uwe, uwok. Eshesh ta shupe. <sup>26</sup> Aria douk enesh arpesh shurao ihih abudok amnabish eneshenesh aria eshesh kanak ta shunanunu shuwishuk, aria eshudok ihih eneshenesh ta shutaurum eshesh mumam? Namudok ta uwok. Aria eshudok arpesh ta shuko maresh eshudok ba ta shutor eshesh kanak esheshiruh yegeshiweruh? <sup>27</sup> Aria Eik Anudok Arman yatogur adurinyi arpen iri ko ipeum eikin Yaken ananit debeiti lait tuni ananin dodog aria eik ta inaki ini eikish enselahos. Aria um abudok nyutob eik ta ikesh yopishi eneshenesh ihishmorim atin atin arpesh um kabi da shapeum maresh yoweihi aria yopishi eneshenesh da shenekesh abudok amnab iri. <sup>28</sup> Eik yakri adurin bareaen um ipak, enesh arpesh shetu agundok iri ko mare shugok aria ta shutik Eik Anudok Arman yatogur adurinyi arpen iri inaki kabi da anan king um.”

## 17

*Jisas Ananihw Yegenyihw Hwakabadig Ba Natogur Anahaeh*  
(Mak 9:2-13; Luk 9:28-36)

<sup>1</sup> Aria 6-poreih nyumneh hanak hunakuk, aria Jisas narao Pita, Jems nani waninuman Jon, aria naram hato onohw rouhwí hwato abom iri yoduhw. Aria amam atum hape nagundok. <sup>2</sup> Aria amam hape apa hatik aria Jisas ananihw yegenyihw hwakabadig ba natogur anahaeh. Aria ananig yomag gatogur kabi da nyumnahn aur morim, aria ananih rupeh hatogur mamokihw shigorihw abom kabi da anat debeiti lait morim. <sup>3</sup> Aria Moses nani Elaija amam hatogur aria amam disaipel hatik Jisas nani amam biom

apa heyagwreh. <sup>4</sup> Pita natik enyudok mugu aria nakrip Jisas namudok, “Debeini, enyudok wosik um apak douk mupe agnudok. Nyak nyukri um, aria eik ko irok bisotup ourogewis. Anap nyakip, anap Moses ananip aria anap Elaija ananip.”

<sup>5</sup> Pita wata apa neyagwreh aria anat utogit arut tenek lait abom iri tabuhi teyawiyam. Aria anah mah hatograri atudok arut hakri namudok, “Anudok Eik kanak Eikin Nuganin. Eik yakri yanawasham anan aria yanadudareh um anan abom. Aria ipak ta ko pumnek ananip bareaen.”

<sup>6</sup> Amam disaipel hemnek enyudok bareaen, aria amam habuh atap amnab hoduk ohrubus aria hawido baragos sabuh amnab, aria amam hanogugur abom. <sup>7</sup> Aria Jisas nanak hurukum amam aria nasusuom aria nakri namudok, “Ipak kitak aria ipak mare punogugur.”

<sup>8</sup> Aria amam hanig hatik iruhw, aria amam madae hutik enen kupainityi arpen uwe, uwok. Aria amam hatik Jisas atun.

<sup>9</sup> Aria amam hakutukuk ahwudok yoduhw aria amam apa habuh yah, aria Jisas nakripam dodog namudok, “Eshudok muguhwos ipak da patrishi, ipak ta mare pukrip enen arpen uwe, uwok, arigaha kweipon nohummu nyumnah Eik Anudok Arman douk yatogur adurin arman iri ko ikutukuk wonugwehw ba ta ikitak ipeum agundok shagok um.”

<sup>10</sup> Aria amam disaipel harigan namudok, “Umum maresh ba amudok henek skulumesh um lo iri apa hakri namudok um Elaija ta nurik nunaki?”

<sup>11</sup> Aria Jisas nakri namudok, “Enyudok bareaen douk adurin. Elaija ta natanamori ba nagabe ihishmorim eneshenesh. <sup>12</sup> Aria eik yakrip ipak namudok, Elaija nubokadae nanaki, aria armam armago madae shudukeman uwe, uwok. Eshesh shagipesh eshesh kanak esheship urkwip aria shenekesh yowiyokuk um anan. Aria um ahudok atuh aih eshesh ta shenekesh yowiyokuk um Eik Anudok Arman douk yatogur adurinyi arpen iri.” <sup>13</sup> Jisas nakri namudok, aria amam disaipel hadukemesh namudok, anan douk nakri Jon neneb baptaisumesh iri.

### *Jisas Nagabe Anan Yoweinyi Sagab Nyapeyan Iri Batowinyin (Mak 9:14-29; Luk 9:37-42)*

<sup>14</sup> Jisas nani bimatun disaipel hanak hatogram sabaishi arpesh, aria anan arman nanamorim Jisas aria noduk ohrubus um anan. <sup>15</sup> Aria nakripan namudok, “Debeini, eik yakri nyak nyenek gihauum eikin armanin batowin. Anan nagugak um aria ananlhw yegenyihw hwanak hwatogur hwape yowiyokuk abom. Aria sabaihi anan natu nawish nyih, aria sabaihi anan natu nawish abar. <sup>16</sup> Aria eik yaran morim nyakim disaipel, aria amam madae hugabeyan ba nutogur yopun uwe, uwok.”

<sup>17</sup> Aria Jisas nakripan namudok, “Ipak douk eshudok arpesh da madae penek bilip iri, ipakish urkum aparuh baragos aria ipak penekahi aih douk madae wosik uwe, uwok. Aria makurib nyutob shopunek eik ta ini ipak mupe? Aria makurib nyutob shopunek eik ta isah ipakin amain? Haraki enyudok armanin batowin agnudok um eik.”

<sup>18</sup> Aria Jisas naho enyudok yoweinyi sagab, aria enyudok yoweinyi sagab nyakutukuk anudok batowinyin aria atub nyutob ananlh arugeh hatuh.

<sup>19</sup> Aria bagiguki nyutob disaipel atum hanamori Jisas aria harigan namudok, “Umum maresh ba apak douk madae muhiyahuk enyudok yoweinyi sagab?”

<sup>20</sup> Aria anan nakripan namudok, “Ipakin bilip douk shokwin abom, namudok aria ipak ta mare penekesh namudok uwe, uwok. Eik yakripep adurin bareaen, ipak douk pene bilip kabi da anam shokumi rowogim mastetim shurkum, aria ipak ta wosik pukrip ahwudok yoduhw, ‘Nyak

kitak ba kare ganudok, aria ohwohw ta hwukitak hwunak. Aria adur atin eshudok ihih ipak ta penekesh.’ [ 21] Ipak pukuna penekesh namudok um, aria ipak ta penek beten pushakur um worigun aria ipak ta wosik ko puhiyah eshudok eneshenesh.]”

*Jisas Nakri Ananin Gok Aria Nukitak Nupe Um  
(Mak 9:30-32; Luk 9:43-45)*

22-23 Abudok nyutob Jisas nani ananim disaipel hantorum gani anab debeibi amnab Galili aria Jisas nakripam namudok, “Eshesh ko shuko Eik Anudok Arman douk yatogur adurinyi arpen iri um anam armam amamis wis. Aria amam ko he igok. Aria bihatuh nyumneh hutuh aria eik ta ikitak.”

Amam disaipel hemnek enyudok bareaen aria amamish urkum apahw yowesh abom.

*Jisas Neneh Takis Nobuk Utabor Um Iruhin Ananit Debeiti Urupat*

24 Jisas nani ananim disaipel hanak hatogur wabur Kaperneam, aria armam harao takis um Iruhin ananit debeiti urupat iri hanamori Pita aria harigan namudok, “Ipakin tisa nobuk utabor um Iruhin ananit debeiti urupat aka, uwok?”

25 Aria Pita nakri namudok, “Wosik anan shopunek neneh takis nabuk utabor.”

Aria Pita nawish urupat, aria Pita watak niyagwreh uwe, aria Jisas narigan namudok, “Saimon, nyakim urkum mor mumam? Anam king um agudok nahobig amam da hurao utabor um kupakupaisi takis um amiapen? Amam da harao takis um amam kanak amamish wanaruh, aka um kupaishi armam armago?”

26 Aria Pita nakri namudok, “Um eshesh kupakupaisi arpesh.”

Aria Jisas nakripam namudok, “Namudok aria amam kanak amamish wanaruh ta mare shenek takis. 27 Aria apak mare menek amamirub nyirub yowerub um apak. Nyak kare gani waiyang ba nyuwashak nyumabur. Aria rarig iri eyur nyak nyanukor iri, nyak nyusuab ba nyupok nukwatirum eyur aria nyak ta nyutik anam utom mur numun nukwat. Nyak nyutuk amudok utom aria nyunak nyuko amudok armam um nyutor ohwak biohw ohwakis takis.”

## 18

*Jisas Nakri Um Amiapen Douk Enyenin Nyeigur Nyeupe Debeiniyi Um Agundok Iruhin Nape Debeini Um Ananish Arpesh Um  
(Mak 9:33-37; Luk 9:46-48)*

1 Abudok nyutob amam disaipel hanamorim Jisas aria harigan namudok, “Amiapen ta nyurao debeiniyi nyeigur um agundok Iruhin nape Debeini um ananish arpesh shapeum heven?”

2 Aria Jisas nahwari enen batowin nyanaki aria nyetu orokohun um amam. 3 Aria nakripam namudok, “Eik yakritep adurin bareaen, ipak nubo douk mare pubukuk eshudok ipakish yoweishi urkum apahw shape ba shorahi aih, aria ipak ta mare putogur kabi da enyudok shokwinyi batowin um, aria ipak ta mare puwish agundok Iruhin nape Debeini um ananish arpesh shapeum heven uwe, uwok. 4 Meishi arpesh douk shupe kabi da enyudok batowin um, aria shubukuk esheshish yoweishi urkum apahw shape ba shorahi aih, sheshagrakuk enesh arpesh aria eshesh douk ta shurao debeiniyi nyeigur abom um agundok Iruhin nape Debeini um ananish arpesh shapeum heven. 5 Aria douk meishi arpesh urkwip purum eik aria shataurum enen shokwinyi batowin kabi da enyudok batowin um, aria eshesh da shataurum eik.”

*Eneshenesh Douk Shanuk Arpesh Um Sheneke Yoweishi Inahos  
(Mak 9:42-48; Luk 17:1-2)*

<sup>6</sup> Aria Jisas ta nakri namudok, "Douk meinyi arpen nyenekesh ba enen um eshudok shokwishi batowish da nyenek bilip um eik iri nyugrukmori nyenek yoweishi inahos aria enyudok arpen nyenekesh namudok iri douk enesh arpesh ko shuweshik anam debeimi utom um enyudok arpen enyeneyin aruhwigur aria shuwashen nyubuh gani atapigum youg aria nyugok. <sup>7</sup> Eik yakri debeinyi gihaum agudok nahobigish arpesh, eshesha apa shenekesh um kupaishi arpesh ba shagruk-morim shenek yoweishi inahos. Adur um eshudok yoweishi inahos ta shutogur. Aria eik yenek giha abom um eshudok douk shenek eshudok yoweishi inahos ba shutogur iri. <sup>8</sup> Namudok aria nubo ipakash roguhw aiyas shonukep um penek yoweishi inahos um, aria ipak putupesh ba puwasheshuk. Namudok wosik um ipak da atin rogor aria atug aiyag shupeumep aria puwishesum yopinyi poe aria pupe wosik ihih nyumneh. Aria ta ipak ko biobiyyesh roguhw aiyas shupeyep aria ta shuwashew puwish um ehudok yoweihy nyih madae hugok iri uwe, uwok. <sup>9</sup> Aria douk ipakis nabes seneken um penek yoweishi inahos aria ipak tuk anap nabep ba puwashopuk. Namudok wosik um ipak da atup nabep pupeyep aria puwish um yopinyi poe aria pupe wosik ihih nyumneh. Aria ta ipak ko biyos nabes supeyep aria ta shuwashew puwish um yoweiburi wabur hel ehudok yoweihy nyih madae hugok iri uwe, uwok.

<sup>10</sup> "Ipak ko gamo pudukemesh namudok. Ipak ta mare pukuna enen batowin orokohun um eshudok batowish da yoweishigom uwe, uwok. Eik yakrip ipak um gani heven esheshish enselahos, ihib nyutob ta sheyatuh um eikin Yaken ananig yomag da nape gani heven iri. [ <sup>11</sup> Umum maresh? Eik douk Anudok Arman yatogur adurinya arpesh iri yanamori yataurum eshudok arpesh douk shañak shawishukuk iri.]"

*Jisas Nakripesh Wobuwobren Baraen Um Atin Nyanak Nyawishuk Iri Sipsip*

*(Luk 15:3-7)*

<sup>12</sup> Aria Jisas ta nakri namudok, "Douk ta anan arman nagrem 100-poreish sipsipahos aria atin enen nyunak nyuwishuk, aria ipak pakri anan ta nenenekesh mumam? Anan ta nunak nurimen aka, uwok? Adur atin eik yakripep, anan ta nukutukuk eshudok enesh 99-poreish shiyatukuk anag mihiq aria anan ta nutanam nanak nurim enyudok atin da nyanak nyawishuk iri. <sup>13</sup> Eik yakripep adurin baraen, anan ta nanak ba nuparug enyudok sipsip ba jurug, aria anan ta nunadudareh abom. Anan nanadudareh um eshudok 99-poreish sipsipahos madae shunatukuk iri, aria anan ta naparug enyudok atin arag da nyawishuk iri, aria anan ta amu nunadudareh abom. <sup>14</sup> Aria douk namudok atin um ipakin Yaken nape heven iri anan da nanoiwos um enen um eshudok shokwishi batowish ko shuwishuk uwe, uwok."

*Apak Munek Yopishi Um Apakin Wanin Neneke Yoweishi Inahos Iri*

<sup>15</sup> Aria Jisas nakri namudok, "Aria douk anan nyakin wanin nenenek yoweishi inahos um nyak, aria nyak nyunak ba nyutik anan, aria ta ipak atip pupeum, aria nyak nyukwiraeh um nyugabe baraen nyuni anan. Aria anan ta nemnek nyakin baraen um, aria nyak douk nyagabeyan nyaran natanamori um nyak. <sup>16</sup> Aria anan da madae nemnek nyakin baraen um, aria nyak nyurao enen aka biyesh arpesh shireen shunak. Namudok aria ta biyesh aka bishatin arpesh um ta shenek enyudok baraen nyutogur dodegeshin." <sup>17</sup> Aria anan ta mare nukana nemnek esheshein baraen um, aria nyak nyunak nyukrip esheshe Iruhin ananish arpesh. Aria anan ta

nukuna nunoiwos um nemnek esheshin baraen shopunek, aria nyak ta nyutik anan da kabi eshudok madae shumnek Iruhin ananin baraen iri aria kabi da amudok yoweimi armam harao takis iri.

<sup>18</sup> “Aria eik yakritep adurin baraen, ihishmorim eneshenesh ipak pakri ta patapesh um abudok amnab iri, eshudoki ta Iruhin shopunek natapesh um gani iruhw heven. Aria ihishmorim eneshenesh ipak pakri pukweshihesh um abudok amnab iri, eshudok ta Iruhin shopunek ta nukweshihesh um gani iruhw heven.

<sup>19</sup> “Aria eik yakri dodog um ipak namudok. Douk ipak biyep abudok amnabip putogur atish urkum apahw um enesh muguhwos aria penek beten um eshudok muguhwos, aria eikin Yaken nape gani iruhw heven iri anan ta nokep enyudok mugu um ipak. <sup>20</sup> Aria douk biyesh aka bishatin shuntorum um eikin nyeigur, aria eik kanak ta ipe orokohun um eshesh.”

*Jisas Nakripesh Wobuwobren Baraen Um Apakip Urkwip Mare Purum  
Yoweishi Inahos Kupaishi Shenekeh Um Apak Iri.*

<sup>21</sup> Um abudok nyutob Pita nanamorim Jisas aria narigan namudok, “Debeini, nubokadae eikin wanin ta neneh yoweishi inahos um eik makurib nyutob, aria eik ta ikweshihuk ananish yoweishi inahos makurib nyutob? Eik ta ikweshihesh-ukuk 7-poreib nyutob, aka?”

<sup>22</sup> Aria Jisas nakripan namudok, “Eik douk madae ikrip nyak um ta nyukweshihuk yoweishi inahos 7-poreib nyutob uwe, uwok. Eik yakri nyak ta nyukweshihuk eshudok yoweishi inahos sabaihi um hutogur 490-poreib nyutob.

<sup>23</sup> “Nyak nyumnek. Arpesh shuwish agundok Iruhin nape Debeini um ananish arpesh shapeum heven douk kabi anan king nenekeh um. Anan nakri um ananim heneman mour iri ta hanaki aria hubeiman tukwanibor utabor huni anan. <sup>24</sup> Aria anan douk napeum neneh mour um norig amudok, aria amam harawi anan arman nanaki um king, anan nubokadae rig nurao sabaibori utabor um king batogur um 10 milionibor utabor.

<sup>25</sup> Aria anudok arman utabor uwok um ta noko king. Namudok aria king nakripesh um ta shunak shukrip kupaishi um shutor anudok nini ananish armatok batowish aria ta shutogur kabi da shenek mour meyoh um kupaimi armam. Aria ihish ananish eneshenesh eshesh ko shutorish aria utabor ta bunam king. <sup>26</sup> Aria anudok neneh mour meyoh um king iri nemnek enyudok baraen aria nabuh noduk ohrubus hurukum king ananiruh yeriweruh aria nakripan namudok, ‘Nyak ko nyenek gihaum eik ba nyiyatume. Eik ta ko itanam ibeimen ihibormorim utabor nubo nykeyebor iri.’ <sup>27</sup> Aria anudok arman ananin debeini neneh gihaum anan aria nokweshihuk anan aria nakana utabor bugokuk.

<sup>28</sup> “Aria anudok arman neneh mour meyoh um king iri natogur nanak aria natik anan da henek mour atugun iri. Anudok anan da 10-porein kina atin ta nyape madae nuwanaman abrudok utabor uwe, uwok. Aria anan nasuhw ananin aruhwigur dodog, aria nakripan namudok, ‘Nyak ta nyutanam nyubeime iri ihibor utabor nyak nyarabor um eik iri.’

<sup>29</sup> “Anudok neneh mour atugun iri nemnek enyudok baraen aria nabuh noduk ohrubus aria nakrip anudok arman namudok, ‘Nyak ko ta nyenek gihaum eik aria nyiyatume. Aria eik ta ko itanam ikenyugu ihibor um eik nubo yatrin ba nyukeyebor iri.’

<sup>30</sup> “Aria anudok arman madae numnek baraen uwe, uwok. Amu nanoiwos abom. Aria nanak noweshik anudok neneh mour atugun iri um nupe arigaha nuwanaman utabor aria ta jurug.

<sup>31</sup> “Amam kupaimi da hani anudok henek mour atugun iri hatik anudok nenekeh namudok aria amamish urkum apahw yowesh abom. Aria amam hanak hakrip amamin debeini um ihihmorim ahudok yoweih iah anudok nenek mourum debeini da nenekehsum. <sup>32</sup> Namudok aria anudok debeini nohwari anudok neneman mour iri aria nakripan namudok, ‘Nyak douk yowenyari nyenek mour um eik iri. Iganigadae riguk nyanaki nyereh um eik, aria eik yakweshihuk ihin baraen um eikbor utabor nubo bakus um nyak iri eik yakana ta bugokuk namudok. <sup>33</sup> Eik yenek gishaum nyak. Namudok aria umum maresh ba nyak madae nyunek giha shopunek um anudok nani nyak penek mour atugun iri?’ <sup>34</sup> Aria anudok ananin debeini ananish urkum apahw juwehosish abom aria nakrip amudok soldia hanaki huran hunak gani shunuweshik-ati urupat um nurao debeiri eriger arigaha nutanam nukon ihibor utabor nubo king nukonabor iri arigaha niyatabor aria jurug.

<sup>35</sup> “Namudok atin eikin yaken da nape iruhw heven iri, anan ta nenekeh apunih aih um ipak da madae adur atin pukweshihuk yoweishi inahos um anam owarhim da henekesh um ipak iri uwe, uwok.”

## 19

### *Jisas Nakripesh Um Agundok Douk Shabrig Eshesh Kanak Da Shanaraum Um*

(Mak 10:1-12; Luk 16:18)

<sup>1</sup> Jisas nakripesh enyudok ihin baraen ba nyatuh, aria anan nakutukuk agudok shokugi nahobig Galili aria nani ananim disaipel hanak gani gagadok anag shokugi nahobig Judia um gani wobrab worub Jordan. <sup>2</sup> Aria sabaishi arpesh shagipesh anan. Aria um nagundok anan nagabe esheshih ihih arugeh da hapeyeshi.

<sup>3</sup> Aria anam Farisi hanamori Jisas aria hakana hukwiraeh anan um nukri enen baraen madae yopin uwe iri. Aria amam harigan namudok, “Apakin lo da wosik nyakrium anan arman ta wosik neyatakuk ananik irohukwik um enen hwarohwin baraen meyoh aka, uwok?”

<sup>4</sup> Aria Jisas nabeimam baraen namudok, “Ipak nubo patik baraen nyetem Iruhin ananik buk aka, uwok? Enyudok baraen nyakri namudok, ‘Seiwok seiwok Iruhin nokwarum ihish eneshenesh um aria nenekeh shatogur arman armatok.’ <sup>5</sup> Aria Iruhin nakri namudok, ‘Namudok aria douk arman ta nukutukuk ananish amakenyish aria nunak nunakurop nini ananik armatok shupe aria eshesh biyesh ta shutogur atuhw yegeniyhw. <sup>6</sup> Iruhin nakri namudok aria eshesh biyesh da madae shupe tukwotukwan uwe, uwok. Eshesh douk shatogur atuhw yegeniyhw. Namudok aria eneshenesh Iruhin nadruneshi, eshudoki douk anan arman ko mare nubrigesh uwe. Amu wouwokab abom.’”

<sup>7</sup> Aria amam Farisi hakripan namudok, “Namudok aria umum maresh, ba Moses nakop enen lo apak aria nakri namudok, anan arman ta wosik nenekeh anap shup um nubrig agundok da arman armatok shanaraum um aria niyatok ananik irohukwik ba kunakuk?”

<sup>8</sup> Aria Jisas nakripam nabeimam baraen namudok, “Ipak baragos se-shukep aria madae pumnek baraen iri. Namudok aria Moses nakri wosik um ipak piyatakuk ipakiyu irorihiyeu. Aria seiwok seiwok Iruhin nakwaram eneshenesh obi, namudok madae shenekesh uwe, uwok. <sup>9</sup> Eik yakripep namudok. Douk mein arman ananik irohukwik madae kuni anan kupainari arman shenek wehrur uwe, aria anudok arman neyatokuk

aria nurao kupaikwi armatok, aria douk anudok arman anan kanak nenen yoweishi inahos um nani okwudok armatok shenek wehrur.”

<sup>10</sup> Amam disaipel hemnek enyudok baraen aria hakrip Jisas namudok, “Aria douk armam hugipes ahudoki aih aria ba huni amamiyu irorihiyeu shupe atugun akure, aria enyudok meyoh um amudok armam mare ta hurao armago uwe aka, uwok.”

<sup>11</sup> Aria Jisas nakrip ananim disaipel namudok, “Enyudok baraen ihish-morim ta mare shigipeshen uwe, uwok. Iruhin nukesh dodog um enesh arpesh atish um, ta shugipeshen. <sup>12</sup> Aria ipak gamo pumnek. Sabaimi armam da hape ba madae hurao armago uwe, uwok. Anam, nubo hanakwarum um amamiruh yegeshiweruh yoweruh aria ta mare hubuki batowish uwe, uwok. Aria anam nubo shatupok amamiruh yegeshiweruh aria ta mare hubuki batowish uwe, uwok. Aria anam amanip urkwip aparuh shor um hunek enyudok Iruhin ananin mour um hukrip arpesh shuwish agundok Iruhin nape Debeini um ananish arpesh shapeum heven. Namudok aria amam hakri uwok um hurao armago, hape meyoh. Aria meinii arman douk wosik um nukuna numnek enyudok bāraen, aria anan ta wosik gamo numnek.”

*Jisas Nenebumesh Yopihi Aih Enesh Batowish Aria Neneb Betenumesh  
(Mak 10:13-16; Luk 18:15-17)*

<sup>13</sup> Um abudok nyutob eshesh arpesh sharawi enesh shokwishi batowish shanamori Jisas. Eshesh shakana ta anan nuwem ananis wis iruh-wishum ba nenemesh beten. Aria amam disaipel hahao eshudok arpesh.

<sup>14</sup> Aria Jisas nakrip ananim disaipel namudok, “Ipak kutishuk batowish ba shanamorim eik. Umum maresh? Meishi arpesh douk shutogur kabi da eshudok shokwishi batowishum, aria shigipesh elkin bāraen shenek yopihi aih iri, eshesh wosik ta shuwish agundok Iruhin nape Debeini um ananish arpesh shapeum heven.” <sup>15</sup> Aria anan nowem ananis wis iruhwishum batowish aria nakutukuk agundok ba nanak.

*Anan Worogwiruhin Arman Nagrem Sabaihi Jah Iri Nanaki Nani Jisas Heyagwreh  
(Mak 10:17-31; Luk 18:18-30)*

<sup>16</sup> Aria anan worogwiruhin arman nanamori Jisas aria nakri namudok, “Tisa, eik ta inek maresh yopishi eneshenesh aria yopihi aih aria ta iwish um yopinyi poe aria ipe wosik iih nyumneh?”

<sup>17</sup> Aria Jisas nakripan namudok, “Umum maresh ba nyak nyarige um yopishi eneshenesh shani yopihi aih? Iruhin atun douk anan yopuni. Nyak nyakana nyuwish um yopinyi poe nyupe wosik iih nyumneh, aria nyak douk nyigipesh Iruhin ananin lo da nyetem ananik buk iri.” <sup>18</sup> Aria anudok arman narik Jisas namudok, “Nyak douk nyakri meinyi lo?” Aria Jisas nakri namudok, “Bāraen nyetem um enyudok lo namudok, Ipak mare pubo kupaishi arpesh shugok. Ipak punaraum iri, ipak mare punak puni kupaiwari armago penek wehrur. Ipak mare pukwaruh. Ipak mare pugiyagig ba penek kwot meyoh um kupaishi armam armatok. <sup>19</sup> Ipak pumnek ipakish amakenyish eshesin bāraen pigipeshen. Aria ipak pukri punuwasham ihish arpesh kabi da pakri panawasham ipak kanak morim.”

<sup>20</sup> Aria anudok worogwiruhin arman nakrip Jisas namudok, “Eik douk yagipesh enyudok ihinyumorim lo yeayaten. Aria douk maresh yopishi eneshenesh maroh yopihi aih da ta shape douk eik watak inekesh uwe?”

<sup>21</sup> Aria Jisas nakripan namudok, “Douk nyak nyakana nyutogur yopuy-opunyi arpen um, aria nyak kare ba nyuhur nyakih sabaihi jah aria nyuko

kupaishi shutoruh. Shutoruh jurug shuken utabor aria nyunak nyisiyabor um arpesh douk eneshenesh wokeshi. Nyak nyenekesh namudok, aria nyak ta nyurao yopiyopishi eneshenesh gani iruhw heven. Aria nyak nyunaki ba nyigipesh eik.”

<sup>22</sup> Aria anudok worogwiruhin arman nemnek enyudok baraen aria ananish urkum apahw yowesh abom aria nanak. Umum maresh, anan douk nagrem sabaishi eneshenesh.

<sup>23</sup> Aria Jisas nakrip ananim disaipel namudok, “Eik yakripep adurin baraen amudok douk hagrem sabaibori utabor buni jah iri ta henek debeinyi mour um huwish aburdok wabur Iruhin nape Debeini um ananish arpesh shapeum heven. <sup>24</sup> Aria eik ta ikripep shopunek, enen takweinyi mahin shahwaren um kamel iri nyukuna nyuwish nyilhw umunihw douk shanuk shokuburi nyumabur ba shutape jah ohwi umunihw, enyudok mare debeinyi mour abom uwe, uwok. Aria nubo meishi arpesh shogrem sabaibori utabor bani jah iri shukri shukuna shuwish heven agundok Iruhin nape Debeini um ananish arpesh shapeum, enyudok debeinyi mour abom.”

<sup>25</sup> Aria amam disaipel hemnek enyudok baraen aria hakitak yowiyokum abom. Aria hakri namudok, “Um namudok, aria meishi ta shurao enyudok yopiyopinyi poe aria shupe wosik iih nyumneh?”

<sup>26</sup> Aria Jisas ananis nabes duk atin natrum ddogd aria nakri namudok, “Abudok amnabish arpesh shawkiraeh ba shatik uwok. Aria Iruhin ta wosik dodogowin um neneh ihish eneshenesh.”

<sup>27</sup> Jisas nakri namudok, aria Pita newanananbaraen aria nakripan namudok, “Nyak nyutik. Apak mabukut ihish apakish eneshenesh aria magipesh nyak. Aria apak ta murao maresh eneshenesh?”

<sup>28</sup> Aria Jisas nakripam namudok, “Eik yakripep adurin baraen, um abudok nyutob ko ihish eneshenesh ta shutogur namushi atish shupe wosik um, aria Eik Anudok Arman yatogur adurin arpen iri ta itogur dodoqiwe irao debeinyi nyeigur um heven aria eik ikih ipe eikin kingin wagitur. Abudok nyutob ipak douk pagipesh eik iri ipak shopunek ta pupe iruhw 12-poreish yopishi wagiturahos aria pusuhw merik panuhwaram takwiyem um Israelis 12-poreis awiros. <sup>29</sup> Aria ihishmorim arpesh nubo urkwip aparuh shor um eikin nyeigur iri aria shakutukut eshesig urusag, owarhim, mohwiyariyu, amakek, yaken, nugashish aria nubarig eshesig ta shurao 100-poreish eneshenesh shuni arpesh shopunek um mour eshesig sheneken iri, aria eshesig ta shurao enyudok yopiyopinyi poe aria shupe wosik iih nyumneh. <sup>30</sup> Aria sabaishi douk shape sharigiri debeishi nyeiguw shapeyeshi eshesig shunak shupe shigiguk. Aria sabaishi douk shape shagiguk iri, eshesig shunak shupe shurik.”

## 20

### *Jisas Nakripesh Wobuwobren Baraen Um Aramam Henek Mour Wainig Nubarig Iri*

<sup>1</sup> Aria Jisas ta nakri namudok, “Arpesh shuwish agundok Iruhin nape debeinari um ananish arpesh shapeum heven douk kabi anan arman da nagrem anag nubarig aria nau wain agari. Aria ruwahep wehip anan nanak narawi amudok ta heneman mour um ananig wainig nubarig iri.

<sup>2</sup> Amudok ta henek mour iri hakri wosik um hurao atin atin kina um ahudok atuh nyumnah aria anudok debeini neshopokam hanak henek mour ananig wainig nubarig. <sup>3</sup> Aria ahudok atuh nyumnah ruwahep 9-kilok anudok debeini nanak agundok arpesh apa shantorum um aria natik

anam armam heyotu atugun nagundok aria mour uwok. <sup>4</sup> Aria anudok debeini nakripam namudok, 'Ipak shopunek kare penek mour eikig wainig nubarig aria eik ta ikep utabor bigipesh mour kabi da penekenyi um.'

<sup>5</sup> "Aria amam shopunek hanak henek mour. Aria abudok nyutob um aruh aria wabigep 3-kilok, anudok debeini nanak ba ta nenek apunih aih kabi da iganigadae rig nenekeh um."

<sup>6</sup> "Aria um 5-kilok wabigep anan ta nanak aria natik anam kupaimi armam shopunek heyotu meyoh. Aria narigam namudok, 'Umum maresh ba ipak da peyotu meyoh agundok um ahudok rouhi nyumnah?'

<sup>7</sup> "Aria amam hakripan namudok, 'Douk madae anan arman nukop mour apak uwe, uwok.'

"Aria anudok debeini nakripam namudok, 'Ipak shopunek kare ba penek mour eikig wainig nubarig.'

<sup>8</sup> "Aria wabigep mour nyatuhobi nyutob, anudok debeini nanaki nakrip ananin nasuhw merik um mour iri namudok, 'Nyak hwari amudok henek mour iri ba nyutorum nyukam utabor. Sagomatin nyak nyurig nyukam utabor amudok da hagiguk hatogur um mour iri, aria nyukam utabor atun atun arigaha nyutogur um amudok da harig hanaki hatogur um mour iri.'

<sup>9</sup> "Aria amudok da hanak henek mour 5-kilok wabigep iri hanaki hurao atin atin kina. <sup>10</sup> Aria nyutob batogur um amudok da harik hatogur um mour iri hanaki um hurao amamibor utabor, aria amamip urkwip por namudok amam ta hurao sabaibori utabor. Aria uwok, amam shopunek harao atin atin kina shopunek. <sup>11</sup> Amam hatik utabor amam harabori, aria amam hanitok hani anudok debeini nagrem nubarig iri namudok, <sup>12</sup> 'Amudok armam hagiguk hatograri um mour, amam henek mour um atin arag aua, aria nyak nyokom atatahibor utabor um apak. Aria apak da marik menek debeinyi mour abom ruwahep arigaha douk, aria wah iganigadae hap abom.'

<sup>13</sup> "Anudok debeini nagrem nubarig iri nemnek enyudok baraen aria anan ta nakrip anan um amudok henek mour iri namudok, 'Arpenyin, eik madae igiyagimen ba inek enen yoweinyi ina um nyak uwe, uwok. Iganigadae ohwak wabo baraen nyakus atugun aria nyakri wosik um nyenek mour shuknih nyumnah aria ta itorin atin arag kina. <sup>14</sup> Nyak nyurao nyakibor utabor aria kare nyunak. Amudok yagiguk yarawam iri douk eik kanak yakri wosik meyoh um yokam atatahibor utabor kabi da yako ipak um. <sup>15</sup> Eshudok eikish muguhwos. Aria eik ta mare igipesh eikim urkum aria isiya eikibor utabor, aka? Aria eik ta ikana inekesh yopuhi aih, aria umum maresh ba nyakish urkum apahw shenek nyigiya um eikih yopuhi aih?"

<sup>16</sup> Aria Jisas nakri namudok, "Eshudok douk nyeiguhw wokeshi shape shagiguk iri, eshesh ko shutogur debeishi shupe shurik. Aria eshudok douk shatogur debeishi shape sharik iri, eshesh ko shupe shugiguk."

*Ahudok Bihatuh Um Jisas Nakri Agundok Shon Nugok Um Aria Nukitak Nupe*

(Mak 10:32-34; Luk 18:31-34)

<sup>17</sup> Aria Jisas nani ananim 12-poreim disaipel hagim yah hatoum Jerusalem. Aria anan nakripam um heyotum huni anan atun hunak aria amam apa hagim yah hanak aria Jisas nakripam namudok,

<sup>18</sup> "Ipak pumnek. Douk apak munak Jerusalem. Aria eshesh ko shuko Eik Anudok Arman yatogur adurinyi arpen iri um amam debeimi pris huni amudok anam henek skulumesh um lo iri. Aria amam ko heneme kwot eik aria hubo baraen um ko he igok. <sup>19</sup> Aria amam ko huko eik um

eshesh kupaishi da madae shunahwaram Juda iri, aria eshudok arpesan ko shububunim eik shugukoruhe aria shupruke aria ko she igok rowogin kruse. Aria bihotuh-ahi nyumnah eik ko ta ikitak um shagok iri um aria ipe."

*Jems Nani Jon Harig Jisas Um Hakri Hutogur Debeimi  
(Mak 10:35-45)*

<sup>20</sup> Aria Sebedi ananik irohukwik kwanamori Jisas kwani okwokwim biom nagamim. Aria okwok kwabuh kwoduk ohrubus agundok Jisas napeum aria kwarigan um numnek okwokwin baraen. <sup>21</sup> Aria Jisas Narigok namudok, "Nyak nyakri maren baraen?"

Aria okwok kwakwak Jisas namudok, "Nyak ta nyukripe adurin atin baran namudok. Amudok eikim biom nagamim ta hupe furukum nyak, anan ta nupe wobrehah um nyakin yopunyi rogur aria anan ta nupe wobrehah um nyakin anagagrin rogur, um agundok Iruhin nape debeini um ananish arpesan um."

<sup>22</sup> Jisas nemnek enyudok baraen aria nakripok namudok, "Ipak douk madae gamo pudukemesh um maresh muguhwos ipak da parig eik-umesh iri. Aria ipak ta wosik um ta putaurume pusah eikin debeini amain aria pubroh enyudok koutukwi eik ta ibroh enyi aka, uwok?"

Aria Sebedi nagamim hakri namudok, "Ohwak biohw wosik ko utaurumen um usah enyudok amain aria ubroh enyudok koutukwi."

<sup>23</sup> Aria Jisas nakripam namudok, "Adur atin ipak biom wosik ta ko pubroh enyudok eikin koutukwi um pusah eikin debeini amain. Aria enyudok um amiapen ta nyupe wabrehah um eikin yopunyi rogur aria wabrehah um eikin anagagrin rogur, enyudok douk madae eikish muguhwos um ta iyagwreh ba igrerah ipak um outumeba ikriep uwe, uwok. Eshudok shapeyeshi wagiturahos eikin Yaken nubokadae nagraehesh um armam ta hupeyeshi."

<sup>24</sup> Aria amudok amam 10-poreim disaipel hemnek baraen um Jon nani Jems da henekeshum aria amamirub nyirub juwehosirub aturub um amam biom. <sup>25</sup> Aria Jisas nahwari ihm-morim hanaki um anan aria nakripam namudok, "Ipak padukemesh, eshudok madae shudukemesh um Iruhin iri uwe um esheshih aih apa shenekoh um esheshim debeimi. Aria amudok esheshim debeimi ddogowim atum um ihish arpesan um ta shigipes amamin atin baraen um shenek debeini mour. <sup>26</sup> Aria douk ahudoki aih ta mare hupe orokohunum ipak uwe, uwok. Meini arman nakana nupe debeini orokohun um ipak, aria anan ta nupe kabi da anan nenek mour um ipak iri. <sup>27</sup> Aria meini arman nakana niyotu nirik ba nurao debeini nyeigur um ipak iri, anan ko nupe nubuh atap ba nenek mour meyoh um ipak. <sup>28</sup> Namudok atin kabi da Eik Anudok Arman yatogur adurinyi arpen iri douk madae inaki um arpesan ta shenek mour um shutaurum eik uwe, uwok. Eik yanamori yataurum eshesh, aria ikesh eikihw yegeniyhw um ta igok aria itor sabaishi arpesan ikweshihesh um esheshish yoweishi inahos shenekesh iri."

*Jisas Nagabe Biom Nabes Seshuhomi Armam  
(Mak 10:46-52; Luk 18:35-43)*

<sup>29</sup> Aria Jisas nani ananim disaipel hakutukuk wabur Jeriko ba hunak. Aria sabaishi arpesan shagipeshan shanak. <sup>30</sup> Aria biom nabes seshuhomi hape anagashihum yah. Aria amam hemnek baraen um Jisas douk nagimori yah nanaki aria amam hahwar debeg namudok, "Nyak, Devit ananin barhonin, nyak ko nyenek gihau ohwak biohw."

<sup>31</sup> Eshesh arpesan shemnek amam biom hahwar aria eshesh shakripam debeg um mare hiyagwreh huhwar aria amudok biom amu hahwar debeg abom namudok, “Debeini, nyak Devit Ananin barhonin, nyak ko nyenek gishaum ohwak biohw.”

<sup>32</sup> Aria Jisas neyotu ba nahwari amudok biom aria nakri namudok, “Ipak biom pakana eik ta inek maresh um ipak?”

<sup>33</sup> Aria amam biom hakripan namudok, “Debeini, ohwak biohw wakana nyak ta nyupok ohwakis nabes.” <sup>34</sup> Aria Jisas neneck gishaum amam biom aria nuwem wis amamis nabes arigas atin aria ta sanapok yopus aria ta hatrugun. Aria amam biom hagipesh Jisas hanak.

## 21

### *Jisas Nawish Jerusalem Kabi Douk King Um (Mak 11:1-11; Luk 19:28-40; Jon 12:12-19)*

<sup>1</sup> Jisas nani ananim disaipel hanak huruhuruk um Jerusalem aria amam hanak hatogur wabur Betfage hurukum gani Olivig mihib. Nagundok aria Jisas neshopok biom disaipel harik hanak. <sup>2</sup> Anan nakripam namudok, “Punak nabrudok wabur bape barigiri. Aria nagundok ipak biom ta ko putik enen mahin donki shanatogen nyeir maduhw nyani enen nugaen aria pukweshihesh madururuh aria puraesh punam-morim eik. <sup>3</sup> Enen arpen nyerigep um enen baraen um, aria pukripen namudok, ‘Apakin Debeini nakiyesh,’ aria anan ko nukweshihesh shanaki arigas atin.”

<sup>4</sup> Eshudok eneshenesh shenenek um shuwereh profet ananin baraen nyatogur adurin atin. Aria baraen enyudok.

<sup>5</sup> “Krip Saionibur debeiburi wabur,  
‘Tik, ipakin king nanaki um ipak!’

Anan samokwiyain arpen nanaki netemori enen mahin donki aria enen nugaen donki nyaran nyanaku.”

<sup>6</sup> Aria disaipel hanak henekesh kabi douk Jisas nakripam um. <sup>7</sup> Aria amam harawi donki nyani nugaen. Aria amam hawashak amamih rupeh donkiyeb agab, aria Jisas naprok nato nakih notem agabinyum donki. <sup>8</sup> Sabaishi arpesan shobuk eshesih rupeh gani yah. Aria kupaishi shatupoki shus sapeyeshi rowogosish nyeiguw aria sheshubuk yah. <sup>9</sup> Arpesan sharahaen sharik iri aria shagiguk um Jisas iri, amu apa sheyorub shahwar debeg namudok,

“Apak manadudareh um Devit ananin barhonin  
aria matuk ananin nyeigur nyato iruhw.

Makri Iruhin wosik ta nunekuman yopunyi anudok arman  
douk nanamori Debeini ananin nyeigur iri.

Apak makri eshesh shape iruhw heven iri  
shopunek shunadudareh-uman

aria shutuk Iruhin ananin nyeigur nyuto gani iruhw.”

<sup>10</sup> Jisas nawish Jerusalem aria ihish arpesan mishish shakitak yowiyokuk aria shape shanasasorim, “Anan amiapen?”

<sup>11</sup> Aria eshudok sabaishi arpesan shantorum shagipeshan iri shape shahwar, “Anudok douk profet Jisas Nasaretepumin, nape gani shokugi nahobig Galili iri.”

### *Jisas Nanak Nawish Narub Um Iruhin Ananit Debeiti Urupat (Mak 11:15-19; Luk 19:45-48; Jon 2:13-22)*

<sup>12</sup> Jisas nanak nawish narub um Iruhin ananit debeiti urupat aria nehiyah eshudok arpesan douk apa shator eneshenesh aria shanakam

eneshenesh shakwu utabor iri nagundok. Aria anan nabadiguk tebolhos douk shape shadareh utaboreshi aria wagiturahos shapeyeshi shopunek um eshudok douk shanakam utabor um armiguhw iri.<sup>13</sup> Aria anan nakrip eshes namudok, “Iruhin ananik buk douk baraen nyakri namudok, ‘Eikit urupat douk ko shuhwarat um shenek beten-atи urupat.’ Aria ipak douk penekat tatogur kabi douk amudok hakwuaruh iri hanabeshuk-atи urupat.”

<sup>14</sup> Aria Jisas ta nape numun narub um atudok Iruhin ananit debeiti urupat aria enesh nabes seshukeshi shani aiyas yowegas iri shanaki. Eshesh shanaki aria nagabeyesh yopish. <sup>15</sup> Aria amam debeimi pris hani amudok anam henek skulumesh um Iruhin ananin lo iri hatik enyudok aria amam henek nyigiya um ananin mour aria urkum apahw juwehosish atish. Umum maresh, amam hatik Jisas douk neneb enyudok Iruhin atun neneken iri mour nyari agundok batowish douk shahwar debeg shakri namudok, “Apak manadudareh um Devit ananin barhonin aria mohur ananin nyeigur nyato gani iruhw”

<sup>16</sup> Namudok aria amam hakrip Jisas namudok, “Nyak nyemnek enyudok baraen shokwishi shape shahwarumen iri aka, uwok?”

Aria Jisas nakripam namudok, “Eik douk yemnek. Enyudok Iruhin ananin baraen ipak patarihen aka, uwok? Baraen nyakri namudok, ‘Nyak Iruhin douk nyohur batowish shani eshudok shawok nyumeb iri aria shatuk nyakin nyeigur nyato iruhw.’”

<sup>17</sup> Jisas nakripam enyudok baraen jurug aria nakutukuk amam aria natogurum adukiburum wabur, aria nanak nape nagundok um wabur Betani um nishuh abudok wab.

#### *Jisas Neyagwreh Baraen Meyoh Aria Enyudok Rowog Fik Yarin (Mak 11:12-14, 20-24)*

<sup>18</sup> Aria ruwahep wehip Jisas nikitak aria ta natanam um Jerusalem. Napa nanak yah aria nemnek nyurub ban. <sup>19</sup> Aria natik enen rowog fik nyeyatu anagas um yah aria nanak huruhuruk-umen. Aria natik madae enep shuruwep pir uwe, uwok. Natik shus atus seir. Anan natik namudok aria nakrip enyudok rowog namudok, “Nyak kweipon mare ta enep shuruwep piren uwe, uwok.” Aria ahudok atuh nyumnah enyudok rowog yarin.

<sup>20</sup> Aria amam disaipel hatik namudok aria hakitak yowiyokuk hanaboum roghw aria amam hanasorigum namudok, “Kakuri umum maresh aria enyudok rowog fik douk yarin arigas atin?”

<sup>21</sup> Aria Jisas nakripam namudok, “Eik yakripep adurin baraen, ipak douk gamo penek bilip um eik, aria ipak mare pur biyep urkwip aria ipak ko wosik penekesh namudok douk eik yenekesh um enyudok rowog fik um. Aria ipak ta mare penek enyudok atin uwe, uwok. Ipak ta pukrip agudok mihib, ‘Nyak kitak ba kare nyaprok nyubuh gani youg,’ aria enyudok mugu ko nyutogur kabi da ipak pukri um. <sup>22</sup> Aria ipak ta penek bilip um eik ba penek beten aria ihish eneshenesh ipak penek beten um puraesh iri, eshes ipak wosik ta ko puraesh.”

#### *Amam Debeimi Pris Harig Jisas Um Omi Nyakon Dodogowinyi Debeinyi Nyeigur Aria Neneb Enyudok-morim Mour (Mak 11:27-33; Luk 20:1-8)*

<sup>23</sup> Aria Jisas natanamori nawish narub um Iruhin ananit debeiti urupat aria apa neneb skulum eshes arpesh um Iruhin ananin baraen. Aria amam debeimi pris hani eshes Juda esheshim debeimi hanaki agundok anan napeum aria harigan namudok, “Nyak amiapen nyakripen aria

nyuken enyudok big um nyenek eshudok eneshenesh? Aria douk amiapen nyakripen um wosik aria nyuken enyudok dodog?”

<sup>24</sup> Aria Jisas nakripam namudok, “Eik shopunek eik yakana iyarig ipak um enesh muguhwos. Aria ipak ko puwanamume yopinyi baraen um eik aria eik shopunek ta ikripep um douk amiapen nyakripe ba nyeke big um inek enyudok mour. <sup>25</sup> Nubo Jon neneb baptaisumesh iri neneb baptaisumesh um, anan nubo amiapen nyakripan nyukon big ba neneb enyudok mour? Enyudok mour nyatogur iruhw heven aka, nyatogur abudok amnabish arpesch?”

Amam hemnek namudok aria amam kanak hanitok um baraen hakri namudok, “Apak ta mukana, ‘Enyudok mour nyatogur iruhw heven,’ aria anan ta norigap namudok, ‘Aria umum maresh ba ipak madae penek bilip um anan?’ <sup>26</sup> Aria apak ta mukri namudok, ‘Enyudok mour nyatogur abudok amnabish arpesch eshesin mour,’ aria apak ta munogugur um ihish arpesch. Umum maresh? Ilishmorim douk shadukemesh namudok Jon neneb baptaisumesh iri anan douk nanahwaram profet.”

<sup>27</sup> Aria amudok debeimi pris hani esheshim debeimi hakrip Jisas namudok, “Apak madae mudukemesh uwe, uwok.”

Aria Jisas nakripam namudok, “Eik shopunek eik ta mare ikripep um douk amiapen nyakripe nyuke big ba yenek enyudoki mour uwe, uwok.”

### *Jisas Nakripam Wobuwobren Baraen Um Anan Arman Nani Ananim Biom Nugamim*

<sup>28</sup> Aria Jisas ta nakri namudok, “Aria ipak douk urkwip por mumam um enyudok baraen? Anan arman nabuki biom nugamim. Aria anan nanam ashuken aria nakripan namudok. ‘Nya, kare douk ba nyenek mour wainig nubarig.’ <sup>29</sup> Aria san nugarin nakri namudok, ‘Eik yanoiwos’. Aria nape ba uwok, aria nabo urkum um nakitak nanak nubarig. <sup>30</sup> Aria yaken nanam anudok anan naganin aria nakripan apunin baraen. Aria shokuni nugarin nakri namudok, ‘Wosik eik ta ko inak’. Aria anudok shokuni naganin madae nanak uwe, uwok. <sup>31</sup> Aria um amudok biom nugamim, amiapen da nyagipesh yaken-umam ananin baraen?”

Aria amudok debeimi pris hani esheshim debeimi hakrip namudok, “San nugarin.”

Aria Jisas nakripam namudok, “Eik yakripep adurin baraen, amudok harao takis iri aria oudok weyotu yeh iri armago esheshe ko shurik shuwish um agundok Iruhin nape Debeini um ananish arpesch um. <sup>32</sup> Umum maresh? Jon neneb baptaisumesh iri natogurum ipak aria neyabigep yopihi aih um ipak, aria ipak madae penek bilip um anan. Aria amudok harao takis iri aria oudok weyotu yeh iri armago esheshe shenek bilip um anan. Enyudok ipak patrin, aria ipak madae penek bilip ba pubukuk yoweishi inahos aria putanam pukon aparuh Iruhin uwe, uwok.”

### *Jisas Nakripam Wobuwobren Baraen Um Yoweimi Armam Henek Mour Wainig Nubarig Iri (Mak 12:1-12; Luk 20:9-19)*

<sup>33</sup> Aria Jisas ta nakri namudok, “Ipak ta shopunek pumnek enen wobuwobrenyi baraen. Anan arman nau wain anag nubarig aria naruk narubumog. Aria numun nubarig anan narok anag bariyaigi nuwag um ko sharauri wainip shuruwep. Aria shurakep pubuh agudok nuwag aria shishishep shumawiyep, um shukwunish wainit ihat tutogur. Aria anan narok anap pato potem iruhw iri aurop numun nubarig um arpesch shupeyep um shiyoh nubarig. Aria anan nakrip anam armam um hurao kontrak aria hupe hiyohuman agudok ananig nubarig. Aria anan nanak

napeik anabur rougunibur wabur. <sup>34</sup> Aria huruhurukum wainip shuruwep burep, aria neshopok amudok heneman mour iri hunam amudok harao kontrak iri gani wainig nubarig um hudiman wainip shuruwep. <sup>35</sup> Aria amudok armam harao kontrak um henek mour nubarig iri hasuhw amudok henek mour um debeini iri, aria habo anan hakwu wis aria anan han nagok aria anan hakwuman utabor ba nagok. <sup>36</sup> Aria anudok debeini nagrem nubarig iri ta neshopok kupaimi heneman mour iri hanam amudok harao kontrak ba heyoh nubarig iri. Ahudok nyumnah anan neshopok sabaimi henek uhwinyum nubokadae rig neshopokam hanak iri. Aria amudok armam harao kontrak aria hape heyohoman ananin nubarig iri hakitak henekesh apunih aih um kabi douk nubokadae rig henekeshum. <sup>37</sup> Nape ba uwok aria ta nagiguk neshopok ananin naganin nanam agudok nubarig. Aria ananim urkum mor namudok, ‘Eik ishopok eikin naganin nunak um aria ta wosik amam ta humnekan.’

<sup>38</sup> “Aria amudok henek mour nubarig iri hatigu nunganin nanaki aria hanakripam hakri namudok, ‘Nagrem wainig nubarig iri ananin nunganin anudok kweipon nugrem ihish eneshenesh ananin yaken ananish iri. Ipak yowi mon nugok um agudok ananig nubarig aria apak murag.’

<sup>39</sup> “Namudok aria hanak hasuhan huwashan natogur adukigum nubarig aria han nagok. <sup>40</sup> Aria Jisas narik amudok debeimi Pris hani eshesh Juda esheshim debeimi aria nakri namudok, ‘Aria douk abudok nyutob anudok nagrem nubarig iri nanaki obi nyutob aria ta nene kam mumam amudok henek mour nubarig iri?’”

<sup>41</sup> Aria amudok debeimi hawanam baraen hakri namudok, “Anan ko nubo Amudok yoweimi armam nom nukom debeiri eriger aria hugok. Aria agudok wainig nubarig anan ko noko kupaimi heyohog. Um abudok nyutob wainip shuruwep burep, aria shudiyep shuko ananep.”

<sup>42</sup> Aria Jisas narigam namudok, “Ipak patrin enyudok baraen nyetem Iruhin ananik buk iri aka, uwok? Baraen enyudok nyakri namudok, ‘Amudok utom douk harok urupat iri hakana yoweimi aria huwasham-ukuk iri,

douk matogur yopumi marik iri utom dodogeshim um shurok urupat um, um mushubonim anagositum urupat.

Enyudok douk Debeini atun neneken nyatogur.

Neneken apak matrin aria makitak yowiyokuk

manadudareh makri enyen douk

Debeini atun neneken iri mour.’

<sup>43</sup> “Namudok aria eik yakrip ipak, Iruhin ko ta nupotik ipak aria mare puwish um agundok Irühin nape Debeini um ananish arpesh shapeum aria ta nurao ananish arpesh douk shasuhw ananin baraen dodog aria shenekesh um yopihi aih iri aria eshesh shunak shuwish um agundok Iruhin nape Debeini um ananish arpesh shupeim. [ <sup>44</sup> Aria douk meishi arpesh shugrukuk ba shubuh shetem amudok utom, um ko tukuresh um biyeh aria purukureshuk shokugun shokugun. Aria meishi arpesh douk amudok utom mugruki ba mubi mutemesh iri, aria ko mushorig eshudok arpesh ba shutogur shenenem kabi douk munyabeg um.]”

<sup>45</sup> Aria amam debeimi pris hani Farisi hemnek Jisas ananin wobuwobrenyi baraen aria hadukemesh hakri anan douk nakriyen nenyum amam atum. <sup>46</sup> Namudok aria hakri abom um husuhw Jisas um heneman baraen aria ta hanogugur um arpesh. Umum maresh? Eshesh shakri Jisas douk anan profet.

## 22

*Jisas Nakripam Wobuwobren Baraen Um Anagun Debeiguni Worigun  
Douk Shenezagun Um Biyesh Shanaraum Um  
(Luk 14:16-24)*

<sup>1</sup> Aria Jisas ta nakri enen kupainyi wobuwobren baraen shopunek um amudok debeimi namudok, <sup>2</sup> “Arpesh shuwish agundok Iruhin nape Debeini um ananish arpesh shapeum heven, douk kabi anan king neneke-shahi aih um. Anan naganin nakana nrao armatok aria king nenek debeiguni worigun. <sup>3</sup> Atin anan nakrip arpesh um shunaki um agundok shanaraum-oguni worigun. Douk ahudok nyumuh hatogur um shuwok worigun-ahi aria anan neshopok heneman mour iri um hanak hukripesha shanaki. Aria hanak hakripesha ba shanoiwos um shanaki. <sup>4</sup> Aria anan ta neshopok kupaimi heneman mour iri um hunak aria nakripam namudok, ‘Punak pukrip eshudok nobokuhi yenemesh baraen iri ba shunaki. Pukripesha namudok, ‘Pumnek. Eik yenek eikigun worigun aria yagunubuk ba nakus. Ekish ababish kauhos shani shanagoki shokushi kupaishi kauhos apak iganigadae maesh. Ihish eneshenesh iganigadae shenenek ba shakus. Ipak yowi munam agundok shanaraum-oguni debeiguni worigun.”

<sup>5</sup> “Hanak hakripesha ba madae shumnekam uwe, uwok. Eshesh shakitak shanam esheshin mour. Anan nanam nubarig. Anan nanak neneck mourum ananis bisnis. <sup>6</sup> Aria eshudok enesh shakitak shasuhw amudok heneman mour king iri sham irihwairoh shenekam abraenyim atum aria hagok. <sup>7</sup> Namudok ba king ananibur nyibur juwehosibur atubur, aria neshopok ananim soldia hanak habo eshudok douk shabo ananim hagok iri. Haesh shagok aria howehumesh esheshibur wabur hanubur heyatabur.

<sup>8</sup> “Aria king nahwar amudok anam heneman mour iri hanaki ba nakripam namudok, ‘Agundok eikigun worigun yenekagun um eikin nuganin nrao armatok um douk nenenek nakus. Aria arpesh yenemesh baraen um shunaki iri, eshesh yoweishi arpesh aria madae shunaki uwe, uwok. <sup>9</sup> Namudok aria douk atin ipak punam sabaihi debeihi yeh aria putorumori ihish arpesh ipak putrishi. Aria ipak pukripesha aria puraesh punaki um agundok worigun.’ <sup>10</sup> Anan nakri namudok, aria amudok heneman nour iri hakitak hagim yeh hanak. Amam hanak aria hakrip sabaishi ba haraesh hanaki. Enesh yopishi enesh yoweishi. Haraeshi aria atudok debeiti urupat douk shenek worigun um eshudok biyesh shanaraum iri amu shunukit.

<sup>11</sup> “Douk shape aria king nanak nawishum nutrish. Nawish aria natik anan arman douk madae nurei yopuhi rupah douk shanoginohw-ahi um agnudok douk arpesh shanaraum um uwe, uwok. <sup>12</sup> Aria king narigan namudok, ‘Arpen, umum maresh? Aria nyak madae nyerei yopuhi rupah ba nyanak nyawishi agundok? Anan douk baraen wokan mumukin aria nape.’

<sup>13</sup> “Aria king nakrip amudok heneman mour iri namudok, ‘Ipak puweshik anudok ananish roghuh aiyas aria puwashan nutogur aduk ba nupe arukwutigunum. Nutogur nupe um arukwutigun-ibur wabur arpesh shape shureh ba sharpogur esheshiruh naruh shuwegeruh ba shemnek debeiri eriger um.’”

<sup>14</sup> Aria Jisas nakripam, “Ipak pumnek. Iruhin nadukemesh um nuhwari sabaishi arpesh aria nagraeh atin atin meyoh shupe shuni anan.”

*Anam Armam Harig Jisas Um Shenek Takis Um Eshesh Rom Esheshin  
Debeini Gavman Sisar  
(Mak 2:13-17; Luk 20:20-26)*

<sup>15</sup> Amam Farisi hanak anabik aria heyagwreh habo baraen um hakri hunek rohw husarigan enen baraen, ba hurim yeh um heneman kwot Jisas. Amam hakana hukwirae huyigagim Jisas um niyagwreh enen nyaunyatograri baraen um aria amam Farisi ta heneman baraen Jisas um anan kanak ananin baraen. <sup>16</sup> Amam heshopok amamim disaipel hani Herot ananim armam hanam Jisas aria hakripan namudok, “Tisa, apak madukemesh, nyak nyeyagwreh adurin baraen iri. Um enyudok adurin baraen atin nyak douk apa nyenek skulum arpesh um Iruhin ananish yopihaih. Nyak madae nyunogugur enen arpen uwe, uwok. Nyak nyeyagwreh apunin baraen um ihish arpesh, eshudok debeishi nyeiguuhw shapeyeshi aria nyeiguuhw wokeshi shopunek. <sup>17</sup> Namudok aria nyak kripap. Nyak douk ta nyukri mumam? Enyudok douk wosik um apak ta mukon takis um debeini gavman Sisar aka, uwok?”

<sup>18</sup> Jisas nadukemeshum amamip yoweipi urkwip por ehi aih aria nakri namudok, “Ipak pagiyagigi armam, ipak pakan pugiyagim eik um maresh?

<sup>19</sup> Ipak ta puyabige anam utom ipak pator takis omi.”

Aria amam harawi anam utom um anan. <sup>20</sup> Aria Jisas narigam namudok, “Arudok aborir aria enyudok nyeigur omiapenyish?”

<sup>21</sup> Aria amam hakana, “Debeini gavman Sisar ananish.”

Aria Jisas nakripam namudok, “Eneshenesh Sisar ananish ipak puko ananesh, aria eneshenesh Iruhin ananish ipak puko Iruhinesh.”

<sup>22</sup> Amam hemnek enyudok baraen, hakitak yowiyokuk aria hakutukuk anan ba hanak.

*Amam Sadyusi Harig Jisas Um Agundok Shagok Iri Ta Shukitak Um  
(Mak 12:13-17; Luk 20:27-40)*

<sup>23</sup> Ahudok atuh nyumnah amam Sadyusi douk apa hakri um shagokiri kweipon mare ta shukitak uwe iri, hanaki agundok Jisas napeum. Aria harig Jisas namudok, <sup>24</sup> “Tisa, Iruhin ananin lo seiwok nako Moses iri nyakri namudok, ‘Douk anan arman batowish uwok ba nugok, aria ananin wanin nuwaur ananik irohukwik ba kubuki batowish, um ashuken ananip awirop um ta mare diwarihuk iyoh.’ <sup>25</sup> Seiwok anap awirop amakek yaken shabuki 7-poreim nagamim hape orokohun um apak. Ashuken nurao onok armatok um ananik irohukwik ba madae nubuki enesh batowish uwe, uwok, aria nagok. Namudok aria wanin ta nuwaur ashukekuman. <sup>26</sup> Aria wanin shopunek madae nubuki enesh batowish uwe aria anan shopunek nagok. Aria rabinari um ashukenyim biom shopunek nagok, okwudok ashukek kwaur ihm-morim owarhim arigaha kwaur nagiguki shopunek. <sup>27</sup> Ihim-morim amudok 7-poreim nugamim hagok aria bagiguki nyutob okwok shopunek kwagok. <sup>28</sup> Aria nyak kripap. Kweiponib nyutob arpesh shagok iri ko ta shukitak um, okwudok armatok kweipon kupeim kurao meinari arman um okwokwin raminen um amudok 7-poreim armam? Nyak nyadukemesh, ihm-morim seiwok haraokum amamik irohukwik.”

<sup>29</sup> Aria Jisas nakripam namudok, “Ipak madae pudukemesh um Iruhin ananin baraen douk nyetem ananik buk iri uwe, uwok. Aria ipak shopunek madae pudukemesh um enyudok dodogowinyi dodog Iruhin ananinyi uwe, uwok. Namudok aria ipak peyagwreh nyau-nyatograri yoweinyi baraen.

<sup>30</sup> Kweipon eshudok arpesh shagok iri ta shukitakum, eshudok arpesh kweipon mare ta shanaraum uwe, uwok. Eshesh kweipon shupe kabi da enselahos shape iruhibir wabur heven. <sup>31</sup> Aria um enyudok baraen douk

arpesh shagok ba shakitak um, eik yakana iyorik ipak. Ipak seiwok madae putaruh Iruhin nakripep-enyi baraen um ipak aka, uwok? Anan nakri namudok.<sup>32</sup> ‘Eik Abraham nani Aisak nani Jakob henek lotu um eik iri, eik amamin Iruhin.’ Enyudok baraen nyakri Iruhin anan douk madae shagok iri esheshin Iruhin uwe, uwok. Anan douk arpesh shape iri eshesh shenek lotuman iri.”<sup>33</sup> Eshesh arpesh shemnek enyudok baraen, aria shakitak yowiyokuk um ananin baraen.

*Iruhin Ananin Nyarik Iri Lo  
(Mak 12:28-31; Luk 10:25-28)*

<sup>34</sup> Douk amam Farisi hemnek um Jisas nabeyomuk baraen amam Sadyusi aria amam hantorum hanamori anan. <sup>35</sup> Anan nadukemesh um Iruhin ananin lo nape orokohun um amudok. Anan nakana nukwiraeh nugiyagim Jisas um niyagwreh enen baraen madae yopunyi uwe aria narigan namudok. <sup>36</sup> “Tisa, meinyi lo douk nyarik iri um ihin Iruhin ananin lo aria nyenek uhwin um ihin kupainyi lo?”

<sup>37</sup> Aria Jisas nakripan namudok, “Ipak ko pukri punuwasham Iruhin, apakin Debeini. Ipak ko gamo pukri punuwasham anan adur atin um ipakim shunukim urkum aria ipakin shunukin mishin aria um ipakinyum shunukinyum tinytin um punasuhw dodog pukri anan atun.”<sup>38</sup> Enyudok lo enyen debeinyi aria dodogowin nyarikum ihin lo. <sup>39</sup> Aria enen lo nyagipesh enyudok lo enyen douk atatahin um enyudok nyarik iri lo. Enyudok lo nyakri namudok, ‘Ipak ko pukri punuwasham meishi arpesh douk shape huruk um ipak iri’ kabi da ipak pakri punuwasham ipak kanak morim um.”<sup>40</sup> Enyudok biyen lo douk mamokin aria baugenyum ihin kupainyi baraenym Iruhin ananin lo aria shopunek ihin baraen um amam profet henyemaguk iri.”

*Jisas Narik Amam Farisi Um Anudok Arman Krais  
(Mak 12:35-37; Luk 20:41-44)*

<sup>41</sup> Amam Farisi hantorum hape atugun, aria Jisas narigam namudok, <sup>42</sup> “Ipakip urkwip por mumam um anudok arman Krais Iruhin nagraeuan neshopokan nanaki iri? Anan douk amiapenyin barhonin?”

Aria amam Farisi hakripan, “Anan douk Devit ananin barhonin.”

<sup>43</sup> Aria Jisas narigam namudok, “Namudok aria umum maresh aria Iruhin ananin Mishin seiwok nyakon urkum Devit aria anan nahwar anudok arman ‘Debeini?’ Umum maresh? Devit seiwok nakri,

<sup>44</sup> ‘Debeini nakrip eikin Debeini namudok,

“Nyak hagine agundok ehahum eikin yopunyi rogur  
arigaha eik ko ta ibo nyakim horim  
hubuh atap um nyak ba iyoh.”

<sup>45</sup> Ipak putik. Devit douk nahwar anudok arman Krais nakri, eikin Debeini. Namudok aria umum maresh ba Krais anan da Devit ananin barhonin?”

<sup>46</sup> Aria madae ananum amudok armam ta wosik nuwanam baraen ba nukrip Jisas uwe, uwok. Aria um ahudok nyumnah aria hagiguki nyumneh, amam hanogugurum horik Jisas um enesh muguhwos shopunek uwe, uwok.

<sup>1</sup> Aria Jisas nepe nakrip eshudok worobaishi arpesh shani ananim disapel. <sup>2</sup> Anan nakri namudok, “Amam Farisi hani amudok henek skulumesum um Iruhin ananin lo iri, hape debeimi henek skulumesum kabi seiwok Moses nepe Debeini aria nenekesh um. <sup>3</sup> Namudok aria iihin baraen amam hakripenyi, ipak ko pumnek aria pigipeshen. Aria ehudok yoweihiaih amam apa henekahi, ehudoki aih ipak mare pigipesheh uwe, uwok. Amam hakripesum Iruhin ananin lo aria amam madae ta hugipeshen uwe, uwok. <sup>4</sup> Amam hakrip ipak um pigipesum dodogowinyi lo kabi da amaenyigwi unug hagwem ipakibus agabus, aria ipak penek debeinya mour um apa pusah agwudok unug. Aria amam madae ta hutaurum ipak ba pusah enyudok dodogowinyi lo uwe, uwok.

<sup>5</sup> “Ihish eneshenesh amam henekeshi, amam henekesh um arpesh ta shutrum aria shukam big. Amam douk henek shaginohw-oguni bokisigun\* aria haweshikogun nepe amamigos yomogos aria roguhw. Aria amamih rupeh henekahi apubusih um rouhi hatogur heiruk. <sup>6</sup> Shenekebeiguni worigun um amam hakana hunak hupe wagiturahos shutao yopugunum um gani debeimi atum hapeim. Eshesh Juda shape sheneyagwreh baraeenyogwi urusag shopuk amam hakana hunak hupe yopishi wagiturahos shape sharik iri. <sup>7</sup> Amam hakri abom um arpesh shukripam shenekumam yopishi nyumnegwih, wabigegwis aria ruwahegwis gani shantorum um agegwiruhum, aria amam hakri abom um arpesh shuhwaram ‘Debeini Tisa’.

<sup>8</sup> “Aria arpesh douk mare ta shuhwarep ‘Debeini Tisa’ uwe, uwok. Atun arag arman anan douk ipakin Debeini Tisa aria ipak ihipmorim douk pape ashukun anin. <sup>9</sup> Aria douk atap agudok nahobig ipak ta mare puhwar anan arman ipakin yaken uwe, uwok. Atun arag arman nanahwaram ipakin yaken iri douk nape heven iri. <sup>10</sup> Aria douk mare ta shuhwarep ‘Debeimi’ uwe, uwok. Ipak douk puhwar atun arag Debeini, eik douk Krais anudok arman Iruhin nagraehe aria neshopoke um yanaki iri. <sup>11</sup> Meishi arpesh douk shukri shupe ipakish debeishi, eshesh ta shupe shunek mourum ipak meyoh. <sup>12</sup> Meishi arpesh shakana shuto debeishi abom iri eshesh shubuh atap iri. Meishi arpesh madae shuhur esheshish nyeiguhw shuto iruhw iri, eshesh ta shunahwaram debeishi arpesh.”

*Jisas Nakrip Amam Farisi Hani Amam Henek Skulumesum Iruhin Ananin Lo Iri Um Yoweihiaih Amam Henekesh Iri*

*(Mak 12:40; Luk 11:39-52, 20:47)*

<sup>13-14</sup> Aria Jisas ta shopunek nakri namudok, “Eik yakri giha abom um ipak penek skulumesum um lo iri aria ipak Farisi. Aria ipak ko pupe yoweihiaihum. Umum maresh, ipak peyagwreh biyog nukwatog iri. Umum maresh? Ipk padukemesh um putapok witogum arpesh shakana shuwish aburdok wabur um Iruhin nape Debeini um ananish arpesh shapeum heven. Umum maresh? Ipk kanak shopunek ta mare puwish uwe, uwok. Aria kadak ba arpesh shakana shuwishum aria ipak punak putapumesh yah eshesh kabi da putapok witog um esheshis nabes yomogos um.

<sup>15</sup> “Eik yakri giha abom um ipak penek skulumesum um lo iri aria ipak Farisi. Aria ipak ko pupe yoweihiaihum. Umum maresh? Ipk peyagwreh biyog nukwatog iri. Ipk panak parahaen ihigunum youg aria amnab

---

\* **23:5:** agundok shokuguni shaginohw-oguni bokisigun amam haweshikogun yomogos sani roguhw iri, amam douk hagipesh eshesh Juda esheshih aih aria haweshikogun nape. Agundok morim bokisigun douk howem enen Iruhin ananin baraen numunum bokisigun aria henyur nyorum urkwip porumen aria hugipeshen. Putik Namba 15:37-41.

umum pakana penek atun arman um nutogur ipakin disaipel. Aria abudok nyutob anan ko nutogur disaipel ba jurug, aria ipak kanak pabirak namudok aria anan nenen uhwin um ipak um nenen yoweyowihi aih. Aria ipak penekan aria pushopokan um ta nunam yoweiburi wabur hel kabi da ipak kanakmorim.

**16** “Eik yakri giha abom um ipak Farisi nabes seshuhep iri pakana piyabik yehum kupaishi, aria ipak ko pupe yoweihi aih um. Umum maresh? Ipak pakri namudok, ‘Enen arpen nyukri um Iruhin ananit urupat aria nyukana adur iruhw um nyunek enesh muguhwos, aria ta mare nyunekesh um da enyen nyakrium. Aria douk enen arpen nyukri um gol rakus Iruhin ananit urupat aria nyukri adur iruhw, aria enyudok arpen ta nyenekesh kabi da nyakrium.’ **17** Ipak pagugaki aria nabes seshuhepi, maresh eneshenesh douk yopishi sharikiri um Iruhin ananis nabes? Gol douk yopuri aria rarik iri aka? Iruhin ananit urupat douk yoputi ba tarik iri? Ipak padukemesh, Iruhin ananit urupat atut douk tenek gol ratogur Iruhin ananish muguhwos. **18** Aria shopunek ipak pakri namudok, ‘Douk meinyi arpen nyukri alta aria nyukri adur iruhw um nyunek enesh muguhwos, enyudok douk baraaen meyoh. Aria douk nyukri ofa nyutem iruhw alta iri aria nyukri adur iruhw, aria enyen ta nyenekesh kabi douk nyakrium.’ **19** Ipak nabes seshuhep iri, maresh muguhwos douk yopishi ba sharik iri um Iruhin? Ofa douk yopuni nyarik iri um Iruhin aka? Alta douk yopuni nyarik iri um Iruhin ananis nabes aka? Enyudok alta douk nyenek enyudok ofa nyatogur Iruhin ananish muguhwos. Aria enyudok alta nyeshagrakuk ofa. **20** Namudok aria meinyi arpen nyukri alta aria nyakana adur iruhw, enyen dodogeshinyum enyenyin baraenym alta nyani ihishmorim eneshenesh shetem iruhinyum iri. **21** Aria meinyi arpen nyakri Iruhin ananit urupat iri aria nyukri adur iruhw um nyunek enesh muguhwos, enyen dodogeshinyum enyenyin baraenym Iruhin ananit urupat aria Iruhin anan kanak shopunek, nape atudok urupat iri. **22** Aria meinyi arpen nyukri heven iri aria nyukri adur iruhw um enyen dodogeshinyum enyenyin baraenym Iruhin ananin yopuni wagitur aria anan kanak napeyeni enyudok wagitur iri.

**23** “Eik yakri gihaum ipak douk penek skulumesh um Iruhin ananin lo iri aria ipak Farisi. Aria Ipak ko pupe yoweihi aihum. Umum maresh? Ipak peyagwreh biyog nukwatog iri. Ihig shokugi apig eneshenesh nubarigish ipak pasiyaeshum 10-poreigunum aria pukon anabikum Iruhin. Aria douk urkum moshukep-ukukum ihin debeinyi baraenym Iruhin ananin lo, kabi da yopuhi aih um, urkwip purum arpesh aria punek gihaum arpesh um aria punek bilipum Iruhin ananin baraaen aria pigipeshen. Douk ipak ta dodogeshipum pigipesh enyudok baraenym debeinyi lo, aria ipak mare ta urkwip pukepuk um nyanyudok enen um shokugi apig enesheneshin lo shopunek uwe, uwok. **24** Ipak nabes seshuhep iri pakana piyabik arpesh um yah, ipak kabi da arpen nyushakam shokuri eshur ror enyenik yabik, aria enyen nyatukor nyawashorukuk. Aria enyen madae nyutik debeinyi mahin Iruhin nakri um mare shunyoh iri kamel douk nyor yabikum, aria enyen nyahurig yabik nyakutuguk.

**25** “Eik yakri giha abom um ipak douk penek skulumeshum Iruhin ananin lo iri aria ipak Farisi. Ipak ko pupe yoweihi aihum. Um maresh? Ipak peyagwreh biyog nukwatog iri. Ipak gamo pakrup adukisum kas sani yaureruh, aria ipakih yoweihi aih hape numuniruhum. Ahudok aih douk namudok, ipak penek nyigya um kupaishi esheshish muguhwos aria ipak pakwuaruh-umesh. Umum maresh? Ipakip urkwip douk porum ipak

kanak atin. <sup>26</sup> Ipak Farisi da nabes seshuhep iri. Sagomatin ipak pukrup numunipum kap, aria ta adukipum shopunek ta bogrop.

<sup>27</sup> “Eik yakri giha abom um ipak douk penek skulumeshum Iruhin ananin lo iri aria ipak Farisi. Ipak ko pupe yoweihi aihum. Umum maresh? Ipak peyagwreh biyog nukwatog iri. Ipak douk kabi wonugwegwiruh eshesh showatomoruh shakwu shigorihwiti beit. Adukihwum wonugwehw yopuhwum shutruh, aria numun shagoki esheshish bishiguh aria ihishmorim goutukwishi eneshenesh shor. <sup>28</sup> Ipak shopunek pape namudok atin. Arpesh shatik ipakiruh yegeshiweruh, aria shakana ipak douk yopishi arpesh. Aria amu uwok. Numunum ipak douk shunikipum agundok peyagwreh biyog nukwatog um aria agundok pabrig Iruhin ananin lo um.”

<sup>29</sup> Aria Jisas ta nakri namudok, “Eik yakri giha abom um ipak douk penek skulumeshum lo iri aria ipak Farisi. Ipak ko ta pupe yoweihi aihum. Umum maresh? Ipak peyagwreh biyog nukwatog iri. Ipak penek yopuruhi wonugwegwiruh um amam profet, aria ipak paginohw-oruh um eshesh yopishi shagok iri arpesh. <sup>30</sup> Aria ipak pakri namudok, ‘Nubo seiwokum babenomi hapeyobi nyutob um, aria apak ta mare mutaurum esheshum shubo amam profet hugok uwe, uwok.’ <sup>31</sup> Um enyudok ipakin baraen ipak kanak powereh agundok ipak patoguomi yamehem seiwok habo amam profet hagok iri um. <sup>32</sup> Ipak mare pigiyagig penekesh namudok ipak douk yopishi arpesh uwe, uwok. Ipak kare, ba punekesh ahudoki yoweihi aih kabi da ipakim yamehem seiwok henekeshum aria piyatok ipakim yamehem amamih yoweihi aih! <sup>33</sup> Ipak kabi da yoweiguhwi yuguhw um. Iruhin ko nenemep baraen ipak aria ipak ko punam hel, ehudok yoweihi nyih ta ipak puruwok um yah wokumep.

<sup>34</sup> “Namudok aria ipak pemnek! Eik ko ishopokugu amam profet aria yopumi urkum morom iri anam here yopumi urkum iri aria amam hadukemesh um Iruhin ananin lo iri hunamagu ipak. Namudok aria ipak ta pubo anam hugok, pupruk anam aria penek nyilim anam hir rowogin kruse aria pupruk anam numun ipak Juda pape peyagwreh-ogwi urusag. Aria ipak ta apa puhiyahamum ipakirub warub aria amam ta huruwok hanam kupairubi warub. <sup>35</sup> Namudok aria Iruhin ko ta nunekep pusah debeinyi amain um agundok pabo ihm-morim yopumi armam hagok um. Amam seiwok hape abudok amnab iri, enyudok debeinyi amain kweipon nyupe ipak atin. Enesh arpesh seiwok shabo sabaishi yopishi arpesh shagok iri douk parik pabo Abel nagok arigaha shabo Sakaraia, Berekia ananin batowin, anan douk anudok arman ipak seiwok pan nagok orokohunum Iruhin ananit urupat aria um alta. <sup>36</sup> Eik yakripep adurin baraen ipak, enyudok yoweiniy poe ta nyutogurum ehudok yoweihi aih, ahudok ko hutogrum eshudok arpesh douk shape agudok nahobig abudok nyutob iri.”

### *Jisas Neneh Gihaum Arpesh Shape Jerusalem Iri (Luk 13:34-35, 19:41-44)*

<sup>37</sup> Jisas natik wabur Jerusalem aria nakri namudok, “O ipak arpesh pape Jerusalem iri, seiwok ipak apa pabo amam profet hagok. Armam Iruhin neshopokam haraumeperi ananin baraen iri, ipak douk shopunek pakwumam utabor pam hagok. Worobaihi atih nyumneh eik yakri iraepari aria ishigorip kabi anat mamokit owot tarauri nugag gwanaki atugun aria teshigorug atatish kapraigiyohos um. Aria ipak pakri amu uwok um eik.

<sup>38</sup> Aria douk pumnek! Douk ipakibur wabur ko bunanukuk buniyatatakuk aria mare ta enesh arpesh shupe abrudok wabur uwe, uwok. <sup>39</sup> Eik yakrip ipak adurin baraen namudok, ipak ko mare ta putik eik shopunek, arigaha kweipon abudok nyutob butogrum ba ipak ko pukri, ‘Apak makri Iruhin

nunekuman yopishium anudok arman douk nanakmorim Iruhin ananin nyeigur iri.”

## 24

### *Jisas Nakripesh Um Horim Hanaki Hununu Iruhin Ananit Debeiti Urupat (Mak 13:1-2; Luk 21:5-6)*

<sup>1</sup> Jisas nakutukuk Iruhin ananit debeiti urupat natogur nanak, aria ananit disaipel hanamori anan. Amam hakana hiyabiganum Iruhin ananit debeiti urupat tuni yopugwi urusag gweyotu huruhuruk iri. <sup>2</sup> Aria anan nakripam enyudok bareaen. “Ipak patik agwudok yopugwi urusag? Eik yakritep adurin atinyi bareaen, horim ko hanaki hubrigat aria hununut aria ta mare hukuna huhur anam utom ba humem anam kupaimi utom ba ta utabor butao uwe, uwok. Ihibor utabor ko shruworubor bututu biniyatak tupri tupro bunak atum atum bubuh bukus bunak amnab.”

### *Jisas Nakripesh Um Anab Nyutob Sabainyi Amain Kweipon Nyutogur (Mak 13:3-13; Luk 21:7-19)*

<sup>3</sup> Jisas nakh nape ahwudok yoduhw Oliv, aria amam disaipel atum hanamori anan aria harigan namudok, “Nyak kripap, meibi nyutob es-hudok eneshenesh iganigadae nyakripapeshi ko shutogur? Maren kak ko nyurik nyutogur aria apak ta mudukemesh, nyak ko nyutanamori aria abudok amnab ko butuhukuk?”

<sup>4</sup> Aria Jisas nutanam nakripam namudok, “Ipak ko pudukemesh atin. Ta enesh arpesh shunaki shugiyagimep. <sup>5</sup> Umum maresh? Sabaishi kweipon shunaki shukri eikin nyeigur aria shukana, ‘Eik kanak Eik Krais Anudok Arman Iruhin seiwok nagraehe neshopoke yanaki iri.’ Aria shugiyagim sabaishi arpesh ba shunak shuwishuk. <sup>6</sup> Ipak ko pumnek debeihwi wanohwin gaha huruk atin aria ipak ta pumnek baraenyum debeihwi wanohw ko hwutogur rougunum. Aria ipak ko pudukemesh. Aria ipak mare pukitak yowiyokuk uwe, uwok. Eshudok eneshenesh ko shutogur, aria abudok bagiguki nyutobum amnab ko butuhuk um ta mare butogur arigas uwe, uwok. <sup>7</sup> Aria eshesh anag nahobig ko shukitak shini enesh kupaigi nahobig shurpak. Anan king nini ananishi ko shukitak shuni kupaishi king nini ananishi shupe shurpak. Aria anarub warub ko debeirubi nyurub besh aria enyik ko kwutuk. <sup>8</sup> Enyudok ihinyumorim nyarik iri amain kwo nyutogurum kabi da onok armatok kwonomnek rarig iri erigerum kwubanuh ba kubuki batowin um.

<sup>9</sup> “Abudok nyutob eshesh ko shurao ipakum shukep eriger aria shukep amaenyibi aria shep pugok. Aria ihish arpesh esheshish nyirub aparuh ko yowesh um ipak. Umum maresh? Ipak douk ekipari aria eikin nyeigur nyapeum ipak. <sup>10</sup> Aria um abudok nyutob sabaishi arpesh shenek bilipum eik iri ko shunahua eo eik aria shubukuk esheshin bilip um eik. Aria eshesh ko shunahwaram horik horinum eshesh kanak aria shunarae eshesh kanak um horik horin um shenenem bareaen aria shesh shugok. <sup>11</sup> Worobaimi henek rohw aria hagiayigig iri profet ko hutogur henek rohw hugiyagim worobaishi arpesh aria ko shigipesham. <sup>12</sup> Yoweihai aiish inahos ko shutogur dedebesh atish. Namudok aria sabaishi arpesh ko shukutukuk ahudoki aih um shukri shunuwasham kupaishi arpesh kabi da eshesh shakri shunuwasham eshesh kanakmorim. <sup>13</sup> Umum maresh? Eshudok douk shugipesha eik atish arigaha shugok iri, eshesh Iruhin ko ta nuraesh shutanamori shupe wosik atin. <sup>14</sup> Aria eshesh ta shukripesh Iruhin ananin yopinyi bareaenyum arpesh shuwish agundok anan nape Debeini um ananish arpesh um douk ko shanak shukripesh enyudok bareaenyum

ihirub warub abudok amnab um, ihish arpesh um shemnek ba shutuh iyoh, aria ahudok yoweishi hugiguki nyumnah ta ko hutogur.”

*Jisas Nakripesh Um Anab Yoweibi Nyutob Ko Butogur Iri  
(Mak 13:14-23; Luk 21:20-24)*

<sup>15</sup> Aria Jisas ta nakri namudok, “Ipak ko putik enyudok yoweiniyi mugu abom iri, seiwok profet Daniel nakriyeniyi, enyudok mugu ta nyutogur numun Iruhin ananit debeiti urupat. Aria nyununut ba arpesh mare ta shuntorum shanaki shuwish uwe, uwok. Eshesh ta shukuna yoweishi inahos shapeyoti urupat. Meishi arpesh shutarilh enyudok bareaen iri, eshesh ko gamo shudukemesh atin.”\* <sup>16</sup> Aria Jisas nakripam namudok, “Abudok nyutob arpesh shape agudok Judiaig shokugi nahobig eshesh ko shuruwok shunak gani yodururuh-igunum. <sup>17</sup> Meinyi arpen nyetem iruhw urupat iri, ta nyubuh atap um, enyen ko mare urkum murum nyuhur enyenyish eneshenesh shakus numunum urupat iri uwe, uwok. <sup>18</sup> Aria meinyi arpen nyetu nubarig iri, enyen ko mare nyutanam urupatum nyuhur enyenyish rouhi rupah uwe, uwok. <sup>19</sup> Debeinyi gishaum wanaraahaenyi armago aria armago apa wokes nyumeb shokwishi batowish iri um abudok yoweibi nyutob. <sup>20</sup> Ipak ko penek beten ba ta mare puruwok um nyumanugasibi nyutob aka, um ahudok nyumnah Sabat uwe, uwok. Anah kupaihi akure, ta wosik. <sup>21</sup> Eik yakripepum ta puruwok. Umum maresh, abudok nyutob debeinyi amain abom ko nyutogur. Sagomatin Iruhin nakwaram agudok nahobig um arigaha douk, namudokinyi amain madae nyutogur uwe, uwok. Aria kweipon babi bagiguki nyutob shopunek ko mare enyudoki amain ko ta nyutogur shopunek uwe, uwok. <sup>22</sup> Seiwock Iruhin mare nukri ba nurupok nyutob banob um enyudok debeinyi amain nyutogur akure, ihish arpesh ko shugok shutuh. Aria ba uwok, ananim urkum morum ananishi ihish arpesh anan kanak nagraeheshi. Namudok aria anan ta narupoki abudok yoweibi amaenyib nyutob babuhi banab atub.

<sup>23</sup> “Um abudok nyutob, meishi arpesh ko shukrip ipak, ‘Ipak putik. Anudok arman Krais,’ douk Iruhin nagraehan aria neshopokan nanaki iri douk anudok aka, shukripep shukri, ‘Nani nape ganik,’ aria ipak mare penek bilipumesh uwe, uwok. <sup>24</sup> Umum maresh? Aria anam henek rohw hagiyyagigi iri armam ko hunaki hukri namudok, ‘Eik anudok arman Iruhin nagraehe iri aria neshopoke yanakium iri’ aka, ‘Eik shopunek douk anan profet.’ Aria amam ko henek debeinyi Iruhin atun neneken iri mour aria henek enen kak nyutogur. Eshesh shakana shenek rohw shigiyagim ihish arpesh, aria eshesh ta wosik um aria eshesh shakana shenek rohw shigiyagimum arpesh Iruhin douk nagraeheshum ananish iri. Aria namudok ta uwok. <sup>25</sup> Ipak pumnek. Eik riguk yakripep jurugum eshudok eneshenesh ko shutogur.

<sup>26</sup> “Namudok aria meishi arpesh ko shukripep, ‘Ipak putik, Krais nani nape gani wehigunum arpesh uwok um,’ aria ipak mare pumnekesh ba punak uwe, uwok. Aka meishi arpesh shunaki ba shukri, ‘Anudok nanabeshuk nape numun atudok urupat,’ aria ipak mare punek bilipumesh uwe, uwok. <sup>27</sup> Umum maresh? Ipak padukemesh um utag brereyarogum, aria atudok lait tatogurum aun nakihmorim aria brereyarat tanak gani aun nabuhum. Namudok aria Eik Anudok Arman douk yatogur adurinyi arpen iri ta inekesh namudok atinyum abudok nyutob eik ko inamorim aria ihish arpesh ko shutiwe atin. <sup>28</sup> Agundok arpesh shagok shakusum, kumub ko bunaki bunahweh enyudok arpen nyagoki.”

\* **24:15:** Enyudok atin bareaen da Matyu atun neyagwreh-enyi.

*Enyudok Ihinyumorim Amain Nyutogur Nyuneyatakuk Aria Jisas Ko Nutanamori*

(Mak 13:24-27; Luk 21:25-28)

<sup>29</sup> Aria shopunek Jisas ta nakri namudok, “Abudok yoweibi nyutobum enyudok amain um arpesh shemnek debeiri eriger um nyunak nyutuhuk, aria arigas atin

‘Nyumnahin aun nutogur wabin,  
aria wabin aun ta mare wanyukehin ta arukwutihin  
aria unib weir utagi ta utotobure ugruki,  
aria ihish dodogeshishi eneshenesh sheir utag iri  
ko mare shir atugun uwe, uwok.  
Eshesh ko shunonug shunak shunaki.’

<sup>30</sup> “Um abudok nyutob Eik Anudok Arman yatogur adurinyi arpen iri ko itogur gani iruhw utag aria ihismorim awirosish arpesh shape abudok amnab iri ko shureh. Aria eshesh ko shutik Eik Anudok Arman yatogur adurinyi arpen iri ta item iruhigum hevenig utag aria ibuhi ini eikin dodog aria eikit dodogowiti lait. <sup>31</sup> Aria oruhw ko hwunahwapur debeg abom aria eik ko ishopok ekish enselahos shunak um shutorumori ihish arpesh eik seiwok yagrahaeshum eik kanak iri. Eshesh enselahos ko shutormori arpesh ihigunmori um agudok nahobig aria anagasm agudok nahobig aria sharaesh shanaki um eik.”

*Ipak Ko Purao Saki Um Enyudok Rowog Fik Um Pudukem Nyutob Eik Inamori*

(Mak 13:28-31; Luk 21:29-33)

<sup>32</sup> Aria Jisas ta nakri shopunek namudok, “Ipak ko purao yopinyi saki um enyudok rowog fik aria pudukemeshum. Abudok nyutob butogurum aria rowogish nyeiguhw ko shunareh shurpaki namusi shus, aria ipak pudukemeshum yopubi wahib nyutob bakana ko butogur. <sup>33</sup> Namudok atin, abudok nyutob ipak putik eshudok ihish eneshenesh riguk yakripep-umeshi shutogur ba jurug aria ipak ko pudukemesh um, Eik Anudok Arman yatogur adurinyi arpen iri eikib nyutob banaki huruhuruk jurug aria bapeimori wit. <sup>34</sup> Eik yakripep adurin baraen, eshudok arpesh douk shape abudok nyutob iri, enesh ta mare shurik shugok uwe, aria eshudok ihish eneshenesh ta shutogur. <sup>35</sup> Utag gani agudok nahobig ko ta shutuh, aria eikin baraen ta mare nyutuh uwe, uwok.”

*Madae Enesh Arpesh Shudukem Ahudok Nyumnah Aria Nyutob Eshudok Eneshenesh Ko Shutogur Um*

(Mak 13:32-37; Luk 17:26-30, 34-36)

<sup>36</sup> Aria Jisas ta nakri shopunek namudok, “Madae enesh arpesh shudukem ahudok nyumnah eik ko ta inaki aria eshudok eneshenesh ko shutogurum uwe, uwok. Eshesh enselahos shape heven iri madae shudukemesh uwe, uwok. Aria Eik Iruhin Naganin shopunek madae idukemesh uwe, uwok. Eikin Yaken atun arag nadukemesh. <sup>37</sup> Namudokehi aih eshesh seiwok shenekehi um Noa ananib nyutobum, eshesh ko shenek ahudok atatahii aih atih shupe abudok nyutob aria Eik Anudok Arman yatogur adurinyi arpen iri ko itanamori. <sup>38</sup> Seiwok abudok nyutob douk debeibusi worubus madae sutogurum uwe, eshesh apa shenek irugis worigun shashoh, shawok abar, aria arpesh apa shanaraum, arigaha ahudok nyumnah Noa nawish korohukahi hatogur. <sup>39</sup> Eshesh madae shudukemesh um enyudok amain ko nyutogur-umeshem um, uwok. Aria eshesh shape namudok atin arigaha abusdok debeibusi worubus satogur sabo ihishmorim arpesh shagot shatuh. Aria douk ko atatahii atih aih ko

hutogrum abudok nyutob Eik Anudok Arman yatogur adurinyi arpen iri ko itanamorium. <sup>40</sup> Abudok nyutob biom armam ko hiyotu nubarig aria Iruhin ko nurao anan, aria nukutukuk anan nupeiguk. <sup>41</sup> Bio armago ko apa unek plauain rehinyum unek bret upe, aria Iruhin ko nurao onok aria nukutukuk onok kupeiguk.

<sup>42</sup> “Namudok aria ipak ko pudukemesh atin aria putrugun pupe. Ipak madae pudukemesh um marah nyumnah ipakin Debeini ko nutanamori um. <sup>43</sup> Ipak ko gamo pudukemesh um enyudok baraen namudok. Douk nubo anan urupatinari nudukemesh um marab nyutobum wab nakwuaruhi arman ko nunaki, aria urupatinari anan ko niyoh urupat nupe aria ta mare nukutukuk urupat aria nakwuaruh iri ta nanaki nubrig urupat aria nuwish numunitum uwe, uwok. <sup>44</sup> Aria ipak namudok atin ko pudukemesh atin ba pupe pubeime. Umum maresh, Eik Anudok Arman yatogur adurinyi arpen iri ko inaki anob nyutob ipakip urkwip madae purum eik ta inakiyobi nyutob, aria eik ta inaki.”

### *Wobuwobren Baraen Um Anan Neneck Mour Wosik Iri Aria Anan Arigeh Hanari*

(Luk 12:42-46)

<sup>45</sup> Aria Jisas ta shopunek nakripesh wobuwobren baraen namudok, “Meinyi arpen nyenek mour iri ba nyor yopunyi saki aria wosik madae nyigiyagig aria nyenek yopunyi mour iri? Debeini ta nugraeh anudoki neneck mouri arman um ta nusuhw merik um amam kupaimi ananim henek mour iri, aria nusuyaumam worigunum nyutob amamin debeini nakriyobi. <sup>46</sup> Anudoki arman neneck mour iri anan ko gamo nunadudareh um abudok nyutob ananin debeini ko nutanamori aria nutik anan apa neneck ananin mour. <sup>47</sup> Eik yakritep adurin baraen, debeini ko nugraeh anudoki arman um nusuhw merik aria neyotu nurik um debeini ananish ihish eneshenesh. <sup>48</sup> Aria um anudok neneck mouri arman ta nutogur yoweini arman aria anan urkum murum anan kanak namudok, ‘Elkin Debeini ta mare nunaki arigh uwe, uwok.’ <sup>49</sup> Aria anan niketak um nubo amudok hani anan henek mour atugun iri, aria anan nape apa nawok worigun aria nawok abar nani hawok abar ba hagugak iri. <sup>50</sup> Aria debeini ko nutanamori anah nyumnah anudok neneck mour iri arman madae nudukemesh uwe um ananin debeini ko nanaki uwe, uwok. <sup>51</sup> Aria debeini ko nanaki anah nyumnah aria neneckesh yoweishigom um anudok neneck mour iri, aria ta neshopokan nanak nini eshudok sheneyagwreh biyog nukwatog iri shupe atugun. Um nabrudok wabur eshesh ko shureh yowiyokuk aria shurupogesh esheshiruh naruh shumnek debeiri eriger.”

## 25

### *Wobuwobren Baraen Um 10-Poreiyu Weroroiwi Armago*

<sup>1</sup> Aria Jisas ta shopunek nakri namudok, “Um abudok nyutob arpesh shuwishum aburdok wabur Iruhin nape Debeini um ananish arpesh shapeum heven douk kabi enyudok wobuwobren baraenyum 10-poreiyu weroroiwi armago. Anan arman douk atin nurao onok armatok iri, anan nakana ko nunaki. Aria oudok weroroiwi armago wohur owo wish lamhos, aria wanak um uparugan yah aria uran unaki. <sup>2</sup> Anas wisiyu um oudok wagugaki armago, aria anas wisiyu wosik wadukemesh iri. <sup>3</sup> Oudok wagugaki warauri owo wish lamhos wanaki aria madae usuwi wel unaki shopunek uwe, uwok. <sup>4</sup> Aria oudok wadukemesh iri, woshar kupairi wel owo wish atin atin koutukwhios aria waraesh wanaki shopunek shani

owowish lamhos. <sup>5</sup> Anudok arman nakana nurao armatok douk atin iri madae nanaki arigas uwe, uwok. Namudok aria ihiyu-morim armago nabes seshuho aria weshuh wakuh.

<sup>6</sup> “Arigaha orokohunib um wab aria enen arpen nyuhwar nyakri, ‘Anudok nurao armatok iri anudok nanaki. Ipak arigah yowi ba munak muranari gani yah.’

<sup>7</sup> “Aria oudok ihiyumorim weroroiwori wakitak wasusuhw owowish lamhos weshopohesh. <sup>8</sup> Oudok wagugaki wakrip oudok wadukemesh iri namudok, ‘Ipak shukop anar ipakir wel. Apakish lamhos ko shakana hugokesh.’

<sup>9</sup> “Oudok wadukemesh iri wagugaki namudok, ‘Namudok ta uwok. Arudok wel ta mare musiar uwe, uwok. Wel madae sabairum ipak ta pushar anar ipakish lamhos aria apak ta mushar anar apakish lamhos uwe, uwok. Ipak kare punak gani stua ba putor ipak kanak ipakir wel.’ <sup>10</sup> Aria oudok anas wisiyu wagugaki wanak um unatori anar wel aria anudok nurao armatok iri nanaki natograri. Aria oudok anas wisiyu wadukemesh iri douk wape apa wobeim anudok arman iri wanaman wawish wani anan atudok urupatum shuwok agundok shunaraum-oguni debeiguni worigun. Aria arpesh shawaru wit.

<sup>11</sup> “Aria oudok ono wagugaki shopuk wanak watograri, aria warig namudok, ‘Debeini, Debeini, jikumap wit apak shopunek.’

<sup>12</sup> “Aria anan nakriпови namudok, ‘Eik yakripe adurin baraen, eik madae idukemeshum ipak uwe, uwok.’”

<sup>13</sup> Aria Jisas nakri namudok, “Ipak gamo pupe apa putrugun. Umum maresh abudok nyutob douk eik ko ta itanamori obi nyutob, ipak madae pudukemesh uwe uwok.”

### *Jisas Nakripesh Wobuwobren Baraen Um Biom Atun Harao Utabor Um Henek Mour Iri (Luk 19:11-27)*

<sup>14</sup> Aria Jisas ta nakri namudok, “Arpesh shuwish um abrudok wabur Iruhin nape Debeini um ananish arpesh shapeum heven douk kabi enyudok wobuwobrenyi barauenum anan arman nakana nanak anagun rougunum aria nahwari henek ananin mour iri hanaki. Amam hanaki aria nakom ananibor utabor amamis wisum henek mour. <sup>15</sup> Anan douk nadukemeshum amamin saki nyani agundok amam douk dodegowim um henek mourum aria nakomuk utabor. Anan nakonukuk 5,000 kina.\* Anan 2,000 kina aria anan 1,000 kina. Douk nakomuk utabor aria anan nanakuk ananish yah. <sup>16</sup> Nanakuk atin aria anudok narao 5,000 kina iri nanak nakwu abrudok utabor nenek bisnis. Nenekas arigaha ta nenek uhwinyum 5,000 kina winmoni shopunek. <sup>17</sup> Aria anudok anan narao 2,000 kina iri shopunek namudok atin. Anan nanak nakwu abrudok utabor nenek bisnis aria nenek uhwinyum 2,000 kina winmoni shopunek. <sup>18</sup> Aria anudok anan narao 1,000 kina iri, anan nanak narok anag nuwag aria nabeshuk ananin debeini ananibor utabor bor agudok nuwag.

<sup>19</sup> “Douk arigaha roubi nyutob banak badiguk aria amudok heneman mour iri debeini ta natanamori. Aria narigamum hukripanum utabor riguk nakomabor-ukuk um douk henek mourum-abor iri douk batogram makwunibor? <sup>20</sup> Anudok sagomatin narao 5,000 kina iri nasuhwi 5,000

---

\* **25:15:** Seiwo abudok nyutob Jisas nakripesh enyudok baraen obi eshesha Juda madae shukwu apakibor utabor kina uwe, uwok. Aria esheshibor utabor douk shahwarabor talent iri bape namudok. Atin talent douk kabi 1000-porein kina um.

kina winmoni aria nenek ananibor utabor batogur um 10,000 kina aria nanaki nako ananin debeini. Aria nakripan nakri namudok, 'Debeini, nyak seiwok nyekeik 5,000 kina. Nyak nyutik, eik yaraen yanak yeneb bisnis aria ta yeneb uhwinyum 5,000 kina winmoni shopunek'

<sup>21</sup> "Aria ananin Debeini nakri namudok, 'O wosik. Nyak wosik yopunyi arpen nyenek mourum eik iri. Nyak douk gamo nyagabe nyeyoh nyakin mour iri. Nyak wosik gamo nyagabe nyeyoh shokushi eneshenesh, namudok aria douk eik yakri nyak nyusuhw merik um sabaishi eneshenesh. Aria douk nyak yowi ba nyuni eik unadudareh.'

<sup>22</sup> "Anudok narao 2,000 kina iri anan shopunek nanaki nakri namudok, 'Debeini, nyak seiwok nyekeik 2,000 kina. Aria nyak nyutik, eik yaraen yanak yeneb bisnis aria ta yeneb uhwinyum kupainyi 2,000 kina winmoni shopunek.'

<sup>23</sup> "Aria ananin debeini nakri namudok, 'O wosik. Nyak wosik yopunyi arpen nyenek mourum eik iri. Nyak douk gamo nyagabe nyeyoh nyakin mour iri. Nyak wosik gamo nyagabe nyeyoh shokushi eneshenesh. Namudok aria douk eik yakri nyak nyusuhw merik um minihishi eneshenesh. Aria douk nyak yowi ba nyuni eik unadudareh.'

<sup>24</sup> "Amudok hanakuk aria anudok anan narao 1,000 kina iri shopunek nanaki nakri namudok, 'Debeini, eik yadukemesh jurugum nyak, nyak juwehosinyi arpen. Nyak nyaurim aria nyatuk worigun kupaishi esheshigos nubarigos. Aria um amnab kupaikwi kupainari shuwashak shuruwepigun worigunobi amnab, nyak ihib nyutob nyaurim nyatuk worigun abudok amnab. <sup>25</sup> Namudok aria eik yanogugur ba yanak yobeshuk enyudok 1,000 kina numun amnab. Aria nyakibor utabor abrudok ta suwoborugu.'

<sup>26</sup> "Aria ananin debeini nakripan namudok, 'Nyak yoweini arman arigeh haenyari. Nyak gamo nyadukemesh namudok, eik yaurim aria yatuk worigun kupaishi esheshigos nubarigos shaweshogosi aria eik shopunek yatuk worigun shuruwepigun amnab kupaishi shawashak shuruwep ba natogur iri. <sup>27</sup> Aria umum mares ba nyak madae nyubuk eikibor utabor gani benk? Namudok aria eik ta itanamori-obi nyutob eik ko wosik irao eikibor utabor buni enen winmoni shopunek. <sup>28</sup> Namudok aria ipak ta putrun enyudok 1,000 kina anudok aria ta puko anudok arman douk neneb uhwinyum 10,000 kina iri. <sup>29</sup> Umum mares? Meishi arpesh douk shagrem enesh eneshenesh iri, eik ta ko ikesh enesh sabaishi eneshenesh shopunekum eshesh. Aria meishi arpesh douk eneshenesh wokesh iri aria shokushi eneshenesh eshesh douk shagremesh iri eik ko ta itrishesh-ukukum eshesh. <sup>30</sup> Aria anudok yoweini neneb mourum eik iri, ipak ko puhiyahan nutogur arukwtigun um. Aria um abrudok wabur eshesh ko shureh yowiyokuk aria shunarupok esheshiruh naruh shuwegeruh.'"

### *Jisas Douk Anudok Arman Natogur Adurinyi Arpen Iri Ko Neneb Kwotog Um Ihish Arpesh Shenekehi Aih*

<sup>31</sup> Aria Jisas ta shopunek nakri namudok, "Kweipon nabudok nyutob Eik Anudok Arman yatogur adurinyi arpen iri ko itogur gani iruhw utag aria inaginohw itanamori kabi anan kingum ini ihishmorim enselahos, aria eik ta itemori eikin debeiniyi wagitur aria ibuhi ini eikin dodog aria eikit dodogowiti lait. <sup>32</sup> Aria ihishmorim arpesh ko shuntorum shunaki shiyotu um eikig yomag. Aria eik ko isiyaesh aria shiyotu um biyob lainab, kabi douk anudok neyoh sipsipahos iri nosiya sipsipahos shanak wobrehahum anan lain aria memehos shunak wobrehahum anan lain. <sup>33</sup> Eik ko isop sipsipahos um eikin yopunyi roturehah aria memehos um eikin angagrin rugur. <sup>34</sup> Namudok aria eik king ko ikrip ihishmorim arpesh sheyotu um

eikin yopunyi roturehah iri namudok, 'Ipak douk eikin Yaken nenekeumep yopihi aih iri. Anan nakana nenek yopishi eneshenesh um ipak. Ipak yowi ba puwih agundok pupe abrudok wabur Iruhin nafe Debeini um ananish arpesh shupeum. Seiwock eikin yaken nagraeh-aburum ipak iri um seiwock sagomatin anan nenek agudok nahobig gatogurum.<sup>35</sup> Umum maresh? Seiwock eik yape nyurub bae, aria ipak poke worigun. Eik abar bae, aria ipak poke abar. Eik yanaki kupaigunum iri, aria ipak parao eik panak ipakit urupat.<sup>36</sup> Eik rupah uwok, aria ipak poke rupah eik. Eik arugeh hapeye aria ipak pugabe eik. Eik yape shunuweshik-ati urupat, aria ipak panaki patik eik.'

<sup>37</sup> "Aria eshudok shenek yopihi atih aih iri aria shape yopinyi poe iri ko shukripan namudok, 'Debeini um meibi nyutob apak matik nyak nyurub baen, aria apak meken worigun nyak? Aria um meibi nyutob nyak abar baen aria apak meken abar nyak?<sup>38</sup> Umum meibi nyutob apak matik nyak nyanaki kupaiburi wabur, aria apak marao nyak manak apakit urupat? Aria um meibi nyutob nyak rupah uwok, aria apak meken rupah nyak?<sup>39</sup> Umum meibi nyutob apak matik nyak arugeh hape nyak aka, nyak nyape shunuweshik-ati urupat, aria apak manaku matrin?"

<sup>40</sup> "Aria eik ko ikripes namudok, 'Eik anudok king yakripep adurin baraen, ihishmorim eneshenesh ipak penekeshum enen enyudok arpenyum amudok eikim owarhim nyeiguhw wokam iri, eshudok eneshenesh ipak penekeshum eik.'

<sup>41</sup> "Aria eik king ko ikripes shudok sheyotu um eikin anagagrin um roturehah iri namudok, 'Ipak yoweipari ko punak puwihukuk iri, ipak pruwokukum eik aria ipak kare panak um ehudok yoweihhi nyih madae hugok iri uwe, uwok. Ehudok yoweihhi nyih seiwock shenekeh shagraeheh um Satan nani ananish yoweishi enselahos iri.<sup>42</sup> Umum maresh? Seiwock eik yape nyurub bae, aria ipak madae puke worigun uwe, uwok. Eik abar bae, aria ipak madae puke abar uwe, uwok.<sup>43</sup> Eik yanaki kupaiburi wabur iri, aria ipak madae purae punak ipakit urupat uwe, uwok. Eik rupah uwok, aria ipak madae puke rupah uwe, uwok. Eik arugeh hapeye, aria eik yape shunuweshik-ati urupat aria ipak madae punaki putik eik uwe, uwok.'

<sup>44</sup> "Aria eshesch shopunek ko shukripan namudok, 'Debeini, um meibi nyutob apak matik nyak nyurub baen aka, nyak abar baen aka, nyak nyanaki kupaiburi wabur iri aka, nyak rupah woken aka, nyak arugeh hapeyen aka, nyak nyape shunuweshik-ati urupat, aria apak madae gamo mugabeyen uwe, uwok?'

<sup>45</sup> "Aria eik ko ikripes namudok, 'Eik yakripep adurin baraen, enesh-enesh ipak madae punekeshum enenyum enen enyudok arpenyum amudok eikim owarhim nyeiguhw wokam iri, eshesch eshudoki eneshenesh ipak madae punekeshum eik shopunek uwe, uwok.'

<sup>46</sup> "Aria eshudok arpesh ko shunak shurao yoweinti poe, ko shurao debeiri eriger madae rutuh uwe iri uwe, uwok. Aria yopishi arpesh eshesch ko shuwish um yopinyi poe aria shupe wosik ihih nyumneh."

## 26

*Eshesh Juda Esheshim Debeimi Hantorum Hape Heyagwreh Um Hubo Jisas Nugok  
(Mak 14:1-2; Luk 22:1-2; Jon 11:45-53)*

<sup>1</sup> Jisas nakripes enyudok ihinyumorim baraen nyatuh aria nakrip ananim disaipel namudok, <sup>2</sup> "Ipak padukemesh, nyumneh douk watak hape biyehum ahudok nyumnah agundok debeguni Pasovaigun worigun

nenenekum ko hutogur. Aria eshesh ko shere Eik Anudok Arman yatogur adurinyi arpen iri um horim amamis wis aria hanak henek nyilime rowogin kruse aria igok.”

<sup>3</sup> Umum abudok nyutob amam debeimi pris hani esheshim debeimi hanak hatik esheshin debeini pris Kaiafas aria hantorum hape ananit urupat. <sup>4</sup> Aria hantorum hape heyagwreh habo baraen hakri huparug anah yah aria hugiyagik husuhw Jisas aria hunak hon nugok. <sup>5</sup> Aria hakri namudok, “Apak ta mare mukana munek eshudok enesheneshum abudok nyutobum agudok debeigi nig uwe, uwok. Umum maresh, ta arpesh shutik aria shukri shukitakum debeihwi wanohw.”

*Onok Armatok Kwourak Sanda Iruhw Um Jisas Ananig Barag  
(Mak 14:3-9; Jon 12:1-8)*

<sup>6</sup> Jisas douk nape wabur Betani. Nape anan arman shahwaran um Saimon iri ananit urupat. Nubo riguk anudok Saimon yoweih arugeh lepra hapeyan. <sup>7</sup> Abudok nyutob Jisas nape huruk atinyum tebol aria nape nawok worigun, aria onok armatok kwasuhwi enen yopuni sonda douk shatorin debeibori utabor iri. Nyorori anar yopuri botol douk shenekor anam utom iri aria kwanaki kwouraken nyabuh iruhum Jisas ananig barag. <sup>8</sup> Amudok Jisas ananim disaipel hatik namudok aria akas sanum. Aria hakri namudok, “Umum maresh ba okwok kweyatak enyudok sonda meyoh? <sup>9</sup> Enyudok sonda apak mukri ba munek salimen akure, ta musuhw debeibori utabor aria manak musiyaborum eshudok eneshenesh wokeshi arpesh.”

<sup>10</sup> Jisas nadukemeshum amamin baraen aria nakripam namudok, “Umum maresh ba ipak peyagwreh ponawarukok um okwudok armatok? Okwok douk kwonegesh yopuhi aih um eik. <sup>11</sup> Ihib nyutob eshudok eneshenesh wokeshi arpesh ko shuni ipak pupe. Aria eik ko mare ini ipak mupe roubi nyutob uwe, uwok. <sup>12</sup> Okwudok armatok kwourak sonda eikihw yegenyihw, okwok kwonegesh namudokum kugabe eikihw yegenyihw um nuhut biyen shurme wonugwehw um. <sup>13</sup> Eik yakritep adurin baraenyum ihigunum um agudok nahobig kweipon shunak ba shukripesh enyudok Iruhin ananin yopinyi baraenyum. Eshesh ko shiyagwrehum eshudok eneshenesh douk okwudok armatok kwonegeshi shopunek, aria esheship urkwip ko purum okwok.”

*Judas Neyagwreh Adurin Baraen Nani Eshesh Juda Esheshim Debeimi Um Hunak Hubo Jisas Nugok  
(Mak 14:10-11; Luk 22:3-6)*

<sup>14</sup> Aria abudok nyutob, ananum amudok Jisas ananimum 12-poreim disaipel douk shahwaranum Judas Iskariot iri nanaki natik amam debeimi pris. <sup>15</sup> Nanak aria narigam namudok, “Douk eik irigumep um yah inak iwerehemep Jisas um, ipak douk ko putoruwe puke maresh?” Hemnek namudok aria hatorun hakon 30-poreibor siliwaibor utabor. <sup>16</sup> Namudok aria Judas nape nabo urkum naurim yahum nuwerek aria niyabigam aria nukom Jisas um amudok amamis wis.

*Jisas Nani Ananim Disaipel Hape Hawok Agundok Debeiguni Worigun Pasova  
(Mak 14:12-21; Luk 22:7-14, 21-23; Jon 13:21-30)*

<sup>17</sup> Aria um ahudok harik iri nyumnah um eshesh Juda shenek agundok debeiguni Pasovaigun worigun aria shawok bret douk shoteh ba madae tikitak tunugok tutogur debeiti uwe, uwok. Amam disaipel hanakium anan Jisas aria harigan namudok, “Nya, nyak nyakri apak monak munek

agnudok Pasovaigun\* worigun agnumum nyak nyanak nyugnloh nyini apak?"

<sup>18</sup> Aria nakripam namudok, "Ipak panak puwish debeiburi wabur Jerusalem aria punam anudok armān dōuk yakriep-uman iri. Punak aria pukripam pukri namudok, 'Nya, apakin Tisa nakri ananib nyutob<sup>†</sup> dōuk ko huruk atinyum butogur. Aria nakri anan nini ananim disaipel ko hunaki huwok agundok Pasovaigun worigun nyakit urupat.'"

<sup>19</sup> Namudok aria amam hanak henek eshudok kabi dōuk Jisas nakripamum. Hanak aria henek agundok Pasovaigun worigun.

<sup>20</sup> Dōuk arigaha wabigepl hurukatinyum wab aria Jisas nani ananim 12-poreim disaipel hanaki hape herharih tebol. <sup>21</sup> Amam hape apa hawok worigun, aria nakripam namudok, "Eik yakriep adurin baraen ipak, anan um ipak ko noko eik um eikim horim."

<sup>22</sup> Aria amam disaipel hemnek namudok aria amamish urkum apahw yowesh, aria amam atun atun harig Jisas namudok, "Debeini nyak nyakri eik aka?"

<sup>23</sup> Aria Jisas nakripam namudok, "Anudok arman douk nakana noko eikim eikim horim iri, anan douk ananum ipak kanak douk nani eik ta aragarag ukutu ohwakis wis sani bret shubuh yaurehw iri. <sup>24</sup> Eik Anudok Arman yatogur adurinyi arpen iri ko igok, namudok Iruhin ananik buk kwakri jurugum eik ko igok. Aria ko debeiniyi gishaum anudok arman noko Eik Anudok Arman yatogur adurinyi arpen iri um horim amamis wis iri. Namudok aria seiwok wosik ba amakek mare kwunabuki uwe, uwok."

<sup>25</sup> Judas anan douk anudok arman nakana noko Jisas um horim amamis wis iri anan narik Jisas namudok, "Debeini Tisa nyak douk nyakri eik aka?"

Aria Jisas nakripam namudok, "Namudok nyak nyakrium."

#### *Jisas Nakom Wain Nani Bret Um Ananim Disaipel Hashoh*

(Mak 14:22-26; Luk 22:15-20; 1 Korin 11:23-25)

<sup>26</sup> Amam apa hawok worigun aria Jisas nohur anabik bretigun, nenek tenkyu um Iruhin aria nawor bret, aria noko ananim disaipel. Aria nakri namudok, "Ipak suwot bret aria putoh. Atudok bret douk eikihw yegenyihw."

<sup>27</sup> Aria nohur anap wainip kap, aria nenek tenkyu um Iruhin aria nako ananim disaipel aria nakri namudok, "Ipak suwop kap aria ipak ihipmorim pubroh apudok kap. Anudok wain douk eikibor owishibor.<sup>‡</sup> <sup>28</sup> Anudok wain douk eikibor owishibor douk ko benek enyudok Iruhin ananin adurin atinyi baraen kontrak nyutogur dodogowin abom. Umum maresh? Eik yourak eikibor owishibor um bukweshihuk yoweishi inahos um sabaihi arpesh iri. <sup>29</sup> Eik douk yakrip ipak, eik ko mare ta iwok wain arigaha kweipon eik ta iwok namuni wain ini ipak gani numunum agundok arpesh shuwishum eikin Yaken nape debeinarium ananish arpesh um."

<sup>30</sup> Aria amam heyorub anohw awehw aria hanam Olivihw yoduhw.

\* **26:17:** agundok worigun Pasova, eshes Juda shenekagun atuh atuh um ihishmorim kwarahos shenekagun shagnoh aria urkwip aparuh shorum seiwok Iruhin nataurum esheshish popehesh yamehesh shakutukuk debeiniyi mour gani Isip aria narigumesha shanam Kenan um. † **26:18:**

Enyudok baraen nyakri Jisas ananib nyutob douk nyakri abudok nyutob huruhuruk um eshesh shon nugok rowogin kruse. ‡ **26:27:** Enyudok baraen nyakri, "Atudok bret douk eikihw yegenyihw" nyani "Anudok wain douk eikibor owishibor nyagipesh Grikin baraen. Baugenym enyudok baraen douk biyen baraen. Enesh Kristen shakana bret tani wain sheyabig kak um Jisas ananihw yegenyihw hwani owishibor. Aria enesh shakana bret tani wain douk shatogur adur atin Jisas ananihw yegenyihw hwani owishibor.

*Jisas Nakri Pita Ko Nokonaguk Agab Anan  
(Mak 14:27-31; Luk 22:31-34; Jon 13:36-38)*

<sup>31</sup> Hanak hakih ahwodok Olivihw yoduhw aria Jisas nakripam namudok, “Kwehigib wab, ipak ihipmorim ko puruwokuk um eik punak atun atunuk. Umum maresh? Baraen nyetem Iruhin ananik buk iri douk nyakri namudok,

‘Eik ko ibo neyoh sipsipahos iri,  
aria ihishmorim sipsipahos ko shuruwok  
shunak atin atinyuk.’

<sup>32</sup> “Aria eik ta ko ta ikitakum eshudok shagokum, aria eik ko irik inak um ipak gani shokugi nahobig Galili.”

<sup>33</sup> Aria Pita nakrip Jisas namudok, “Amam kupaimi disaipel ko hutik eneshenesh shutogurum nyak ba ta hukutukuk amamip bilip um nyak aria huruwok aria amam wokim ko huruwok, aria eik ta mare iruwok ba nyukwreny-ukuk uwe, uwok. Aria upe biohw.”

<sup>34</sup> Aria Jisas nakripan namudok, “Eik yakripen adurin baraenyum douk abudok wab. Nyak ko nyukri nyigiyagig-umesh biyeh atih namudok, Nyak madae nyudukem eik uwe, uwok. Aria owot ko tukitak tiyagwreh.” <sup>35</sup> Aria Pita nakripan namudok, “Eik ko mare igiyagig aria ikri eik douk madae idukem nyak uwe, uwok. Eshesh ko shukana shubo nyak nyugokum, aria eik shopunek ko ini nyak ugok ahudok atuh nyumnah.”

Aria amudok ihm-morim ananim disaipel douk hakripan enyudok atin baraen.

*Jisas Nanak Neneke Beten Getsemani  
(Mak 14:32-42; Luk 22:39-46)*

<sup>36</sup> Jisas nani ananim disaipel hanam anabik shuhwar-agunum Getsemani. Aria nakripam namudok, “Ipak hagipe agundok, aria eik ko inak ganudok ba inek beten.”

<sup>37</sup> Aria anan narao Pita nani Sebedi ananim biom nagamim heiran hanak. Aria ananish urkum apahw amaenyish atish ariaamu nemnek yowiyokuk abom. <sup>38</sup> Aria nakrip amam namudok, “Ekish urkum apahw amaenyish atish aria hurukum eik yakana igok. Ipak pupe agundok puni eik aria pupe pyohe.”

<sup>39</sup> Aria anan nanaku rourougunugu shopunek. Aria natu nabuh atap nobuk ananig yomag iruhw amnab aria nenek beten namudok, “Eikin Yain, nyak nyukri wosik um aria nyitiweiguk enyudok debeinyi amain nyakana nyutogurum eik iri. Eik yakri nyak mare nyigipesh eikish urkum apahw shakri um uwe, uwok. Eik yakri nyak wosik ko nyigipesh nyakish urkum apahw shakri um aria ta wosik.”

<sup>40</sup> Aria Jisas ta natanamum amudok bimatun disaipel, aria natik amam heshuh hakuh. Aria narik Pita namudok, “Namudok penekesh mumam? Ipak mare ta dodogeship aria puname pupe piyoh eik um enen aua aka, uwok?” <sup>41</sup> Ipak douk puname pupe piyoh eik aria penek beten ba pupe. Uwok um enesh yoweishi shanaki aria ipak ta pugrukium ipakin bilip. Adur atin, apakish urkum apahw shakana shenek eneshenesh, aria apakihw yegenyihw atuhw douk arigeh hwahw aria dodog uwok um hwonek enesh muguhwos.”

<sup>42</sup> Anan ta natanam biyeh aria nenek beten namudok, “Eikin Yain, douk enyudok amain nyakana nyutogurum eik iri ko mare nyushagrakuk eikum, ba eik ko isah enyudok amain, aria nyak wosik ko nyigipesh nyakish urkum apahw shakri um aria ta wosik”.

**43** Aria anan ta natanamori um amam disaipel aria natik amam watak heshuh. Umum maresh? Amamis nabes amaenys atus um hishuh atin.

**44** Aria anan ta nakutumukuk aria nanak nenen beten bihatuh ahi, aria neneh apunin beten kabi douk nenenek sagomatinyum.

**45** Aria ta natanamori um amam disaipel aria nakripam namudok, "Ipak watak apa peshuh aria purao uhwin aka? Pemnek. Nyutob iganigadae batogur aria eshesh shakana shoko Eik Anudok Arman yatogur adurinya arpen iri um amudok armam henek yoweishi inahos iri um amamis wis.

**46** Ipak kitak, aria apak monak. Putik, arman nakana noko eikum horim amamis wis iri, anudok douk iganigadae nanaki hurukum apak."

*Judas Nakom Jisas Um Horim Amamis Wis  
(Mak 14:43-50; Luk 22:47-53; Jon 18:3-12)*

**47** Jisas watak apa neyagwreh aria Judas, anan douk anan um amudok 12-poreim disaipel nanak natograri. Sabaishi arpesh sheiran aria eshesh sharauri bainatog gwani rowos. Amam debeimi pris hani eshesh Juda esheshim debeimi heshopokesh aria shanaki. **48** Anudok arman nakana nokam Jisas um horim amamis wis iri, watak apa shanaki yah aria nakripamum enen kak namudok, "Eik ko inopuprik anan arman. Aria anudok arman douk anan atun Jisas. Aria ipak gamo pusuwan."

**49** Aria anan arigas atin nanamori Jisas aria nakri namudok, "Yopubi wab, Tisa."

Aria Judas nanapuprik Jisas.

**50** Aria Jisas nakripan namudok, "Arpenyin, eneshenesh nyak nyanaki um nyenekesh iri, nyak arigas ba nyenekesh."

Aria anam armam hanaki howeman wis Jisas aria hasuwan hape dodog.

**51** Aria anan arman neyotu nani Jisas iri, nauruki ananit bainat. Aria anan nabo debeini pris ananin neneman mour meyoh iri aria narpogesh anudok ananah atah takaroh habuhuk atap. **52** Aria Jisas nakripan namudok, "Ta rukwot bainat tubuh tutuk agnudok douk torum. Ihish arpesh sharpak bainatog iri, bainatog ko gununu eshesh. **53** Aria nyak madae nyudukemesh uwe, aka? Eik ko iyorik eikin Yain um aria anan ko neshopoki sabaishi enselahos, shenek uhwinyum 12-poreib amiyebe lainab, aria eshesh ko shunaku shutaurum eik. **54** Aria eik ko ibirak namudok um, aria baraen nyetem Iruhin ananik buk iri ko mare nyutogur adurin baraen uwe um eik, uwok. Iruhin ananik buk kwakri eshudok eneshenesh adur atin ta shutogurum eik."

**55** Umum abudok atub nyutob Jisas ko nakrip eshudok ihishmorim arpesh namudok, "Ipak pasuhwi bainatog aria rowos aria ipak panaki um gamo pusuhw eik, kabi da ipak pakana gamo pusuhw anan arman neneh wanohw aria nakwuaruh iri aka? Ihishmorim nyumneh eik yape gani numun narub um Iruhin ananit debeiti urupat tataoum, aria yape yakripesh Iruhin ananik yopinyi baraen um arpesh. Aria umum maresh ba ipak madae pusuhwe nabudok nyutob uwe? **56** Aria eshudok ihish eneshenesh douk shatogurum shagim amam profet henyemaguk iri baraen nyatogur adur atin."

Aria amudok ihm disaipel hakutukuk Jisas aria haruwok.

*Heneman Kwot Jisas Um Eshesh Juda Esheshit Debeiti Kwot  
(Mak 14:53-65; Luk 22:54-55, 63-71; Jon 18:13-14, 19-24)*

**57** Eshudok arpesh shasuhw Jisas iri eshesh sharan shanak um debeini pris Kaifas ananit urupat. Eshesh Juda esheshim debeimi hani amam henek skulumesh um Iruhin ananin lo iri amam douk hantorum hape

numun urupat. <sup>58</sup> Pita nagipeshuk Jisas nanak, aria madae nanak huruhruk um anan uwe, uwok. Anan nanak nawish numun narub um anudok debeini pris ananit urupat. Aria nani amam henek mour heyoh Iruhin ananit debeiti urupat iri hape. Anan nakana nutik maresh muguhwos ta shutogurum Jisas.

<sup>59</sup> Amam debeimi pris hani sabaimi debeimi Juda douk hape hasuhw kwotog iri hahwar anam armam hanaki. Douk hanaki aria hape hakri humnek enen nyunagiyagigi baraenyum Jisas nenekahi aihum amam debeimi humnek. Aria amam hakana huparug enen yoweinyi ina Jisas nenekenyi aria hon nugok. <sup>60</sup> Sabaimi armam hanaki henek rohwuman um nyunagiyagigi baraenyum anan. Aria amam madae huwereh enen adurin yoweinyi ina anan nubokadae nenekenyi-umum ta shon nugokumenyi baraeen uwe, uwok. Aria biom hanaki <sup>61</sup> hakri namudok, “Anudok arman seiwok nakri namudok, ‘Eik dodogoiwe um ko ibrik Iruhin ananit debeiti urupat aria ta itanam irakotum bihatih nyumneh.’”

<sup>62</sup> Aria debeini pris nakitak neyotu nariq Jisas namudok, “Nyak wosik um ta nyuwanam enen amamin bareaen aka, uwok? Nyak nyakri mumamum enyudok bareaen douk amudok henekenyum nyak iri?” <sup>63</sup> Aria Jisas madae nukri enen bareaen uwe, uwok. Aria anudok debeini pris nakripan namudok, “Eik douk yakana iyorik nyakum Iruhin ananin nyeigur anudok Iruhin madae nugok iri aria nape atun nape iri, aria nyak ta nyukripe adurinya atin bareaen. Nyak kripap, nyak douk anudok arman Iruhin nagrahenyum neshopoken nyanaki iri aka, uwok? Nyak douk Iruhin ananin Nuganin aka, uwok?”

<sup>64</sup> Aria Jisas nakripan namudok, “Nyak kanak douk nyakriyen jurug. Aria eik yakrip ipak, kweipon ipak ko putik Eik Anudok Arman yatogur adurinya arpen iri ipeum anudok Dodogowini Iruhin ananin yopunyi rogurehah. Aria eik ko ipe iruhum hevenig utag aria inaki.”

<sup>65</sup> Aria anudok debeini pris nakitak yowiyokuk um enyudok bareaen aria nabrig ananish rupah aria nakri namudok, “Anan douk nabubunim Iruhin. Apak mare muhwari anam shopunek armam hukripapum anudok armanih yoweishi aih uwe, uwok. Douk atin ipak pemnek anan nabubunim Iruhin jurug. <sup>66</sup> Ipak pakana apak ta munekan mumam anudok arman?”

Aria amam hakni namudok, “Anan douk neneck yoweishi inahos aria anan apak mon nugok.”

<sup>67</sup> Aria eshesh shokuseh Jisas ananig yomag aria shakwu wis shabo anan. Aria enesh shabo ananish popaeshohos <sup>68</sup> aria shakri namudok, “Nyak douk Iruhin nagrahan iri aka, aria nyak douk ta nyukripap kabi da amam profet henekeshum. Eshudok arpesh shabo nyak iri, eshesh douk amiapen?”

### *Pita Nagiyagik Nakri Anan Madae Nudukem Jisas Uwe, Uwok (Mak 14:66-72; Luk 22:56-62; Jon 18:15-18, 25-27)*

<sup>69</sup> Pita nape aduk, aria numunum urupatirub narub um Kaifas ananit urupat. Aria onok weroroikwi kwonek mour iri kwanaki kwaterun aria kwakripan namudok, “Nyak douk anabik nyani anudok Jisas douk nanaki shokugi nahobig Galili iri pape.”

<sup>70</sup> Aria Pita nakri uwok um ihishmorim arpesh esheshis nabes namudok, “Eik madae idukemeshum enyudok bareaen nyak nyakriyen iri uwe, uwok”

<sup>71</sup> Aria anan nanak natogur urupat adukum arbudok narubit wit, aria kupaikwi kwonek mour iri kwaterun aria kwakrip eshudok shape huruhuruki namudok, “Anudok arman nubo rig nape nani Jisas anudok Nasaret-epimin iri.”

<sup>72</sup> Aria Pita ta nakri uwok namudok, “Adur iruhw, eik madae idukemeshum anudok arman uwe, uwok.”

<sup>73</sup> Roubi nyutob shopunek aria armam heyotu huruhuruk iri hanaki hakrip Pita namudok, “Adur atin, nyak douk shopunek ananum eshudok arpesh shape shani Jisas iri, nyakip nanup douk powereh nyak.”

<sup>74</sup> Namudok aria Pita neyagwreh dodog namudok, “Adur iruhw, eik madae idukemeshum anudok arman uwe, uwok. Eik mare iyagwreh adurin bareaen, aria Iruhin ko nununu eik ba igok.”

Anan nakriyen jurug, aria atub nyutob owot takitak tohwar. <sup>75</sup> Aria Pita urkum morum enyudok bareaen Jisas iganigadae nakripanum, “Owot mare tuhwar uwe, nyak ko nyukriyen bihatuh namudok nyak madae nyudukem eik uwe, uwok.”

Aria Pita natogur aduk ba nereh yowiyokuk abom.

## 27

*Eshesh Juda Esheshim Debeimi Harao Jisas Hanak Um Pailat Douk Nape  
Debeini Gavman Um Shokugi Nahobig Judia Iri  
(Mak 15:1; Luk 23:1-2; Jon 18:28-32)*

<sup>1</sup> Gagruk ruwahep wehip, aria ihm-morim debeimi pris hani eshesh Juda esheshim debeimi hape heyagwreh aria habo baraenyum hubo Jisas nugok.

<sup>2</sup> Aria hakitak haweshikan onohw dodogoihwu maduhw aria haran hanam Pailat douk nape debeini gavman iri.

*Judas Nanak Nanobo Aria Nagok  
(Aposel 1:18-19)*

<sup>3</sup> Anudok Judas douk nowereh Jisas aria nako horim um amamis wis, anan natik agundok eshesh shagiyagim Jisas um kwot aria shakon debeineyi amaenyum anan. Namudok aria ananish urkum apahw yoweshum ahudok yoweih iah anan nenekeh Jisas iri. Aria anan ta nenek giha abom numun um ananish urkum apahw. Aria natanam narao abrudok 30-poreibor siliwaibor utabor douk amam debeimi pris hani eshesh Juda esheshim debeimi hakanabor um anan iri. <sup>4</sup> Aria nakripam namudok, “Eik douk yenek yoweishi inahos jurug. Aria anudok arman eik yowerehanum ipakis wis iri, anan douk madae nenek enen yoweinyi ina uwe, uwok. Aria ipak kwehig pon nugok meyoh.”

Aria amam hakripan namudok, “Nyak nyanaki nyakrip apak um maresh? Enyudok nyakin mour.” <sup>5</sup> Aria Judas nawashakuk abrudok siliwaibor utabor numunum Debeini ananit urupatirub narub, aria nanak nanatog onohw maduhw ananin aruhwigur aria naprok ba nataur aria nagok.

<sup>6</sup> Amam debeimi pris hohur abrudok siliwaibor utabor aria hakri namudok, “Abrudok utabor douk maborubukum arman nagokum. Aria apakin lo douk nyakri abrudok utabor apak mare muborubukum abrudok bakus numun Iruhin ananit debeiti urupat iri uwe, uwok.”

<sup>7</sup> Aria habo atin bareaenyum abrudok utabor amam hator anab amnab um arpesh apa shatuk amnab ba shenek amnabis marus iri. Amam hanak hator abudok amnabum butogur wonugwegwiruh hapeim um arpesh shurom eshudok arpesh shagoki shanaki rougunum iri. <sup>8</sup> Namudok aria abudok amnab douk shahwarab um, “Owishiboribi amnab” aria douk arpesh wata apa shohwarab enyudok nyeigur. <sup>9</sup> Namudok aria enen bareaen seiwok Iruhin nohur profet Jeremaia nenyemaguk iri nyatogur adurin atin. Bareaen enyudok nyakri namudok, “Hakitak hohur abrudok 30-poreibor siliwaibor utabor. Abrudok utabor douk eshesh Israel

shaborubuk um shutor anudok arman iri. <sup>10</sup> Aria haboruhur hanak hatik eshesh apa sharok amnab um amnabis marusum aria hator anab amnab. Iruhin douk nakripe dodogowinyi baraen namudok aria yeagywrehen.”

*Pailat Narig Jisas Um Anan Douk Eshesh Juda Esheshin King Aka, Uwok?  
(Mak 15:2-5; Luk 23:3-5; Jon 18:33-38)*

<sup>11</sup> Harao Jisas hanak honusop neyotu natik anudok debeini um gavman iri aria narigan namudok, “Nyak douk eshesh Juda eshesin king aka?”

Aria Jisas nakripan namudok, “Adur atin, eik douk kabi nyak nyakrium.”

<sup>12</sup> Eshesh Juda esheshim debeimi hani debeimi pris hagiyagig haduk sabainyi baraenyum Jisas. Aria anan madae nutanam niyagwreh enen atin baraen uwe, uwok. <sup>13</sup> Namudok aria Pailat ta narigan shopunek namudok, “Nyak douk madae nyemnek enyudok ihinyumorim baraen amam henemen kwot-enyi?”

<sup>14</sup> Aria Jisas madae niyagwreh enen baraenyum Pailat uwe, uwok. Namudok aria Pailat nor urkum manak matuhukuk meyoh.

*Pailat Nakripesh Um Shenek Nyilim Jisas Rowogin Kruse Aria Nugok  
(Mak 15:6-15; Luk 23:13-25; Jon 18:39, 19:16)*

<sup>15</sup> Um ihish kwarahos ahudok nyumlah shenek agundok debeiguni Pasovaigun worigun obi nyutob, anudok nape Debeini gavman iri douk ko nokweshih anan nanaweshik iri um shunuweshik-ati urupat. Eshesh arpesh eshesh kanak ko shukri nyeigurum anan arman nape nanaweshik iri, aria Pailat ko nukweshih anudok arman nanam eshudok arpesh.

<sup>16</sup> Aria um abudok nyutob douk anan yoweini nanaweshik aria nape shunuweshik-ati urupat, ananin nyeigur douk Barabas. <sup>17</sup> Eshesh eshudok arpesh iganigadée shantorum shanaki sheyotu, Aria Pailat narigesh namudok, “Ipak pakana eik ta ikweshih amiapen nyunamogu ipak? Eik ta ikweshih Barabas aka, eik ta ikweshih Jisas eshesh douk shakana Iruhin nagraehan aria neshopokan nanaki iri?” <sup>18</sup> Aria Pailat nakri namudok. Umum maresh anan nadukemeshum eshesh douk esheshish urkum apawh douk yoweshum Jisas meyoh, aria sharan shanamorim kwotog.

<sup>19</sup> Aria shopunek douk Pailat nape ananin debeinyi nenemesh kwotog- enyi wagitur, ananik irohukwik kwoneki baraen nyunakmori anan namudok, “Nyak mare nyenek enesh muguhwos um enyudok yopunyi arpen uwe, uwok. Eik yesuh wab aria yatrun anas yomnis, yemnek debeiri eriger um anan aria madae gamo ishuh wab uwe, uwok. Eik yakri enyudok arpen douk yopunyi.”

<sup>20</sup> Aria amam debeimi pris hani Juda esheshim debeimi hohur eshudok worobaishi arpesh esheshiruh aparuh um shuhwarum Barabas nutograri aria shubo Jisas nugok.

<sup>21</sup> Aria Pailat narigesh namudok, “Ipak pakana eik ta ikweshihumep meinari arman um amudok biom armam nunamogu ipak?”

Aria eshudok arpesh shuhwar namudok, “Barabas.”

<sup>22</sup> Aria Pailat narigesh namudok, “Aria ipak pakana eik ta inekesh mumam um anudok Jisas eshesh shakri Iruhiñ nagraehan ba neshopokan nanaki iri?”

Aria ihishmorim shohwar debeg namudok, “Punek nyilimanum rowogin kruse.”

<sup>23</sup> Aria Pailat ta narigesh namudok, “Umum maresh? Anan douk nenen maren debeinyi ina?”

Aria eshesh shuhwar debeg abom, “Punek nyilimanum rowogin kruse.”

<sup>24</sup> Aria Pailat nadukemesh namudok, eshesh ko mare shumnek ananin baraen uwe, uwok. Aria debeihwi wanohw huruhuruk um hutogur. Aria

anan nohur anabar abar aria nakrup ananis wisum ihishmorim arpesh esheshis nabes. Aria anan nakri namudok, "Eik inahos uwok um anudok arman ananin gok uwe, uwok. Ipak kanak pakri ba eshudok eneshenesh shenenek."

<sup>25</sup> Aria ihishmorim arpesh shakri namudok, "Eshudok inahos ko shupeum apak aria um apakish batowish."

<sup>26</sup> Namudok aria Pailat nakweshih Barabas nanam eshesh. Aria anan nakri ba amam soldia hakwu nyiguw hweirohi maduhw aria habo Jisas yowiyokuk. Aria nakom Jisas um soldia amamis wis um hunak henek nyilimanum rowogin kruse.

*Amam Soldia Henek Enen Habubunim Jisas  
(Mak 15:16-20; Jon 19:2-3)*

<sup>27</sup> Aria Pailat ananim soldia harao Jisas hawish debeini gavman esheshit urupat. Hawish aria ihm-morim soldia hanaki heyotu herharihan. <sup>28</sup> Aria hatrun howaruk ananih rupah aria hereman anah owishiborihi rupah.

<sup>29</sup> Aria harauri onohw maduhw kabi da pruwehwihw um aria hadarohw hohwunug kabi anan king ananit hat um aria hahwemuman ananig barag. Aria horuman anag shokugi akodiwok ananis wis aria habuh hoduk ohrubus hape henekan enenyenen habubuniman hakri namudok, "O wosik ruwahep nyak eshesh Juda esheshin king."

<sup>30</sup> Aria amam hakusehan, aria hatrunari agudok akodiwok iganigadae hagur ananis wis iri aria amam habo ananig barag worobaihi abom.

<sup>31</sup> Douk henekan enenyenen habubuniman ba jurug aria ta hatrun howaruk ahudok owishiborihi rupah aria ta hereman anan kanak ananih rupah. Aria haran hanak um henek nyiliman um rowogin kruse.

*Amam Soldia Henek Nyilim Jisas Neir Rowogin Kruse  
(Mak 15:21-32; Luk 23:26-43; Jon 19:17-27)*

<sup>32</sup> Douk hakutukuk wabur aria hatogur hanak huruk atinyum yah, aria amam soldia hatik anan arman nanaki wabur Sairini ananin nyeigur Saimon. Aria amam hasuwan harani ba grok atin hakripan um nutrun rowog kruse Jisas ntauruman aria nunyusah-uman. <sup>33</sup> Aria eshesh shanak shatogur onok outuk nyeigurikum Golgota. Enyudok nyeigur douk shakri agudok mihig gape kabi da arpenyik barag um. <sup>34</sup> Aria um okwudok outuk armam hakon Jisas anan yoweini wain douk hasharan nani yoweini marasin aria nanagugwi nor ba nubutin atun iri. Aria Jisas nakwiraeh um nubroh aria uwok, madae nubroh anudok wain uwe, uwok. <sup>35</sup> Amam soldia hawaur Jisas jurug iruhum rowogin kruse aria habirak anag baunag kabi da satu um hutik amiapen kadak nyenek uhwinyum aria husia rupah eneshenesh orokohunum amam kanak. <sup>36</sup> Aria amam habuh hape atap um okwudok outuk aria apa heyohan. <sup>37</sup> Aria iruhum ananig barag douk howem enyudok baraaen douk shenyemuman um kwot iri nyape. Aria baraaen nyetem iri nyakri namudok,

ANUDOK DOUK JISAS, ESHESH JUDA ESHESHIN KING.

<sup>38</sup> Aria huruhuruk um Jisas amam howaur biom armam hakwu-orugwih iri aria habo arpesh iri douk shopunek shenek nyilimam heir wobuwobur um Jisas. Anan neir um yopunyi rogur ehah aria anan neirum anagagrin rogur ehah. <sup>39</sup> Aria arpesh sharahaen yah iri shenek yowi kare shatrun aria sheneyagwreh enenyenen shabubunim Jisas. Eshesh shegigiyarig um baragos,

<sup>40</sup> aria shakri namudok, "Nyak anudok arman douk nyakana nyubrig Iruhin ananit debeiti urupat aria ta nyurukat nyutuhur tiyotu um bihotih

nyumneh atih iri aria nyak maresh sheneken ba mare ta nyutaurum nyak kanak. Aria enyudok douk adurin baraenym nyak douk Iruhin Ananin Nuganin um, namudok aria nyak kitak buhi ba kutukuk nenyudok kruse.”

<sup>41</sup> Amam debeimi pris hani amudok henek skulumesh um lo iri aria hani amam eshesh Juda esheshim debeimi, amam douk shopunek heneken enyenenen habubuniman namudok atin. <sup>42</sup> Amam hakri namudok, “Anan nataurum kupaishi arpesh, aria anan ko mare nunugabe anan kanak uwe, uwok. Anan douk Israel esheshin king um, aria anan ko nukutukuk rowogin kruse ba nukitak nubuhi, aria apak ko munek bilipum anan. <sup>43</sup> Anan nenek bilipum Iruhin aria nakri namudok, ‘Eik Iruhin Ananin Nuganin.’ Aria douk Iruhin nukri nunuwasham anan abom um, aria Iruhin ko nutaurum.”

<sup>44</sup> Aria amudok biom hakwu-orugwih iri hataur hurukum Jisas iri, amam shopunek heyagwreh atatahin baraeen habubunim Jisas-enyi.

### *Jisas Nagok*

(Mak 15:33-41; Luk 23:44-49; Jon 19:28-30)

<sup>45</sup> Umum aruh 12 kilok, wab babuh aria beyawiyom ihigunum agudok shokugi Judaig nahobig arigaha 3 kilok. <sup>46</sup> Arigaha nyutob batogurum binyatin aua um 3 kilok aria Jisas nahwar debeg namudok, “Eli, Eli, lema sabaktani?” Enyudok baraeen nyakri namudok, “Eikin Iruhin, Eikin Iruhin, umum maresh ba nyak nyakutukuk eik?”

<sup>47</sup> Enesh arpesh sheyotu huruhuruk, shemnek enyudok baraeen aria shakri namudok, “Anudok arman nahwarum Elaija.”

<sup>48</sup> Aria anan arman arigas atin nanak nohuri enen spans\* nesegwrin anan nubutini wain. Douk spans shuknin, natuken naweshiken anag akodiwok aria nako Jisas um nubroh. <sup>49</sup> Aria kupaishi shakri namudok, “Yotu! apak ko apa mutrugun ba iyoh, um Elaija’ko nanaki natauruman aka, uwok?”

<sup>50</sup> Aria Jisas ta shopunek nahwar anah debeg abom aria ananis yapis sakihuk aria nagok.

<sup>51</sup> Aria um abudok atub nyutob ahudok debeihi rupah heir† numun Iruhin ananit debeiti urupat iri puwaroh um biyeh gani iruhw arigaha babuh atap. Aria enyik kwatukum amnab shopunek aria debeibori utabor pupuwarobor. <sup>52</sup> Aria wonugwegwiruh hanupok aria sabaishi Iruhin ananish yopishi arpesh seiwok shagok ba sharomesh iri ta shakitak shape. <sup>53</sup> Shakutukuk wonugwegwiruh shakitak shape arigaha douk Jisas shopunek nakitaki aria eshesh shanak shawish abrudok Iruhin ananibur wabur Jerusalem. Shanak shawish aria worobaishi arpesh shatrish.

<sup>54</sup> Debeini soldia nani amudok douk hani anan hape heyoh Jisas iri hatik enyik kwatuk um, aria hatik ihishmorim eshudok shatogur iri aria hanogugur abom. Aria hakri namudok, “Adur atin, anudok arman douk Iruhin Ananin Nuganin.”

<sup>55</sup> Sabawiwi armago shopunek weyotu madae rougun abom uwe, uwok. Aria apa watiki eshudok sheyotu hurukum rowog kruse iri. Owo douk wagipesh Jisas gani Galili wanakium unemon garibog um eneshenesh iri.

\* <sup>27:48:</sup> Enyudok spans douk kabi da shemishawin um arpesh shatukesh yous sheshahim wah bagish shokwih um shukrup marus sani yaureruh um. † <sup>27:51:</sup> Numun Iruhin ananit debeiti urupat amudok mape magiguk iri rum douk Iruhin ananum atum rum. Aria wit um amudok rum douk shawaur anah debeihi tetemenyihi rupah meyoh hataurum wit. Aria ahah douk ahudok rupah puwaroh um biyeh gani iruhw arigaha babuh atap. Baraeen nyetem Hibru 9:2-7 iri douk nyakrium amudok Iruhin ananum rum.

56 Oudok sabaiwi armago, bio owo douk atin nyeigur Maria. Onok douk kwanaki wabur Makdala. Aria onok douk Jems nani Josep amamik amakek. Aria okwudok onok douk Sebedi ananim nugamim amamik amakek.

*Sharom Jisas Wonugwehw  
(Mak 15:42-47; Luk 23:50-55; Jon 19:38-42)*

57 Arigaha wabigep aria anan arman douk noruk worobaibori utabor iri nanaki. Ananin nyeigur douk Josep nanaki wabur nyeiguriburum Arimatea. Anan douk nagipesh Jisas iri. 58 Anan nanaki nanam Pailat aria narik ananum nubre Jisas ananit mukut aria nunuk nuruman. Aria Pailat nakri wosik aria nakrip amam soldia um hubreyanari rowog kruse aria hokonan. 59 Aria Josep natrum Jisas aria neshurehan anah namuhi shigorihwihi rupah. 60 Aria Josep narao mukut nanak nawish natemukuk anan kanak ananihw wonugwehw. Ahwodok wonugwehw ohohw onohw umunihw riguk Josep nakrip anam armam harukohw hwawish anabik neirumum utaboriyu burbudu wotaum. Aria Josep nabadigi anam debeimi utom manaki mutapok witegurum ahwudok umunihw. Anan nenekesh namudok jurug aria anan nanak. 61 Aria Maria douk kwanaki Makdala iri kwani okwudok onok Maria wape wobur ehahum wonugwehw aria apa washakamohw.

*Amam Soldia Heyotu Heyoh Wonugwehw agundok Sharom Jisas Um*

62 Ahudok nyumnah douk eshesh Juda shaurim worigun, mahish aria enesheneshum shenek worigun aria ko shupe shubeim Sabat ba shishohahi nyumnah ahudok hatuh. Aria amam debeimi pris hani amam Farisi hanak hatik Pailat. 63 Hanak aria hakripan namudok, "Debeini, apak urkwip porum enen bareaen douk anudok arman napeum nenek rohwumesh aria nape nakripesh nakri namudok, 'Eik ko igok aria hukri bihatuhahi nyumnah aria eik ta ikitakum shagokum aria ipe adur atin.' 64 Namudok aria makri nyak nyukrip amam soldia hunak hupe heyoh gani wonugwehw hwapeim um bihatuh nyumneh. Umum maresh, douk ko ananim disaipel hunaki hukwuman aruh um ananit mukut aria hunek rohwumesh hukri anan douk ta nokitakum shagokum aria nape adur atin. Aria enyudok douk atin shakrienyi bareaen nyanagiyagig iri ta nyenek uhwinyum enyudok narik nagiyagik ba nakrienyi bareaen."

65 Douk Pailat nemek aria nakripam namudok, "Ipak kare purao anam soldia aria punak piyoh wonugwehw um kabi ipak padukemesh um aria ddogowip um punekenyum."

66 Nakripam namudok aria amam hanak henek eneh agushih agundok sharom Jisas um. Heneguk enyudok aria hasopukuk amam soldia heyotu heyoh wonugwehw.

## 28

*Jisas Ta Nakitak Um Shagok Um Aria Nape  
(Mak 16:1-10; Luk 24:1-10; Jon 20:1-18)*

1 Ahudok nyumnah Sabat eshesh Juda douk madae shunek mour shape meyohahi douk hatuh. Aria ruwahep wehip Sandeih nyumnahin aun apa nakihi, aria Maria kwanaki wabur Makdala iri kwani kupaikwi atin nyeigur Maria wanaki ruwahep wehip um utik wonugwehw. 2 Aria atub nyutob debeikwi enyik kwatuk. Umum maresh, enen Debeini ananin ensel nyakitaki heven aria nyabuhi nyagreshuk utom matapok witegur iri aria nyahagi nyape iruhimum. 3 Enyudok enselig yomag genek lait kabi da utag brereyarog um aria enyeniyih rupah douk kabi da armir shigorihw

um henek lait abom. <sup>4</sup> Amam soldia hanogugur um enyudok ensel aria arugoguhwiar wam aria habuh hakuh amnab kabi douk armam hagokum.

<sup>5</sup> Aria enyudok ensel nyakrip oudok armago namudok, "Ipak mare punogugur uwe, uwok. Eik yadukemesh, ipak douk panamori purim anudok Jisas douk shan shenek nyiliman neir rowogin kruse iri. <sup>6</sup> Anan madae ta nukus agundok uwe, uwok. Anan iganigadae ta nakitak um shagok um aria nape, kabi da riguk nakri um. Ipak yowi ba putik outuk agundok shanubuk um. <sup>7</sup> Ipak kare arigas atin punak pukrip ananim disaipel namudok, anan nagok aria iganigadai ta nakitak um shagok um aria nape adur atin. Ipak gamo pumnek. Anan ko nurik um ipak aria nunak um shokugi nahobig Galili aria ipak ko punaku putrun ganudok. Eik douk yanakium ikriep um enyudok baraen."

<sup>8</sup> Oudok bio watik enyudok ensel aria wanogugur abom, aria shopunek owo wanadudareh abom, aria arigas atin wakutukuk wonugwehw aria wahur wonak um ukrip ananim disaipel. <sup>9</sup> Aria Jisas naparago yah, aria nakri namudok, "Ruwahep bio." Aria owo bio wanak huruhuruk um anan watu wabuh amnab aria wowem owowis wis ananiruh yeriweruh aria wonek lotu um anan. <sup>10</sup> Aria Jisas nakripo namudok, "Ipak bio mare punogugur. Ipak kare ba pukrip eikim owarhim um amam disaipel hunaku arigas um shokugi nahobig Galili. Aria amam ta hutik eik ganudok."

### *Amam Soldia Henek Rohw Hakripesh-enyi Baraen*

<sup>11</sup> Oudok bio armago wata apa wonak yahum utik amam disaipel, aria amam soldia heyoh wonugwehw iri hanak hawish abrudok debeiburi wabur Jerusalem. Hawish aria hakrip amam debeimbi pris um ihishmorim eneshenesh amam hatrish shatogur iri. <sup>12</sup> Aria amudok pris hemnek namudok aria hanak hani eshesh Juda esheshim debeimbi hantorum hape habo enen baraen. Aria hakitak hator amudok soldia hakam debeibori utabor. <sup>13</sup> Hakam utabor aria hakripam namudok, "Ipak punak penek rohw pukripesh namudok, 'Apak meshuh wab aria ananim disaipel hanaki hawuman-aruh aria haran hanak.' <sup>14</sup> Aria douk Pailat debeini gavman iri numnek enyudok baraen um, aria apak ko muni anan miyagwreh ba miyatok baraen. Namudok aria baraen ta mare nyupe ipak uwe, uwok."

<sup>15</sup> Namudok aria amudok soldia horao utabor aria hagipesh debeimbi amamin baraen. Aria enyudok baraen soldia henek rohw hagiayig-enyi nyanak nyanaki orokohun um eshesh Judaish arpesh eshesh kanak arigaha nyanaki um abudok doukib nyutob.

### *Jisas Nakomuk Mour Ananim 11-Poreim Disaipel (Mak 16:14-18; Luk 24:36-49; Jon 20:19-23)*

<sup>16</sup> Aria Jisas ananim 11-poreim disaipel hagim yah hanakum agudok shokugi nahobig Galili. Aria hanak hatogur ahwodok yoduhw kabi da Jisas nakripamuk um. <sup>17</sup> Hanak hakih hatik Jisas aria henek lotuman hatuk ananin nyeigur nyato gani iruhw. Aria anam amudok hor biyep urkwip aria hakana anudok douk madae Jisas uwe, uwok. <sup>18</sup> Aria Jisas nanaki huruhuruk um amam aria nakripam namudok, "Eikin yaken Iruhin douk nake debeinyi nyeigur eik yatogur dodogoive aria yape debeini um ihishmorim eshudok shape iruhw atap iri. <sup>19</sup> Namudok aria ipak douk ta punam ihirub warub um ihis awirosish arpesh aria pukripesh eikin baraen. Pukripesh um shumneken shusuhwen aria shugipesh eik shutogur eikish disaipel. Aria punek baptaisumesh um eikin Yaken ananin nyeigur, um eik Nuganin eikin nyeigur aria shopunek um Iruhin ananin Mishin enyenin nyeigur. <sup>20</sup> Aria punek skulumesh um shugipesh ihinyumorim baraen douk

eik riguk yape yakripepen iri. Eik yakripep adurin atin baraen, Eik douk ini ipak mupe ihih nyumneh arigaha hugiguk iri nyumnah hutogurum agudok nahobig.”

# Iruhin Ananin Yopinyi Baraen Mak Nenyem

## Iri Banenyi Baraen Um Mak

1:1-13 Iruhin neshopok Jon neneb baptaisumesh iri nanaki

1:14-13:37 Iruhin neshopok Jisas nakripesch ananin yopinyi baraen iri nanaki

13:38-15:47 Jisas nemnek eriger aria shenek nyiliman rowog kruse aria nagok

16:1-20 Jisas wata nakitak nape aria nekesh mour ananish disaipel

### *Jon Neneb Baptaisumesh Iri Nakripesch Um Jisas Krais Ta Nunaki*

<sup>1</sup> Enyudok douk yopinyi baraen um Jisas Krais, Iruhin ananin Nuganin. Nyarik iri enyudok yopinyi baraan nyakitak nyanak um douk namudok.

<sup>2</sup> Seiwok Iruhin ananin Mishin nyohur anudok profet Aisaia aria nuwem enen Iruhin ananin baraan namudok. Iruhin nakri, “Eik ta ishopok anan arman nurao eikin baraan nyirik nyunak aria nyak ta nyugiman. Anan ta nugabemen yah nirik. <sup>3</sup> Anan ta nunak nupe wehigunum arpesh uwok um aria nupe nuhwar debeg nukri, ‘Gabeiman yah Debeini. Pugabeyoh hupe wosik um anan nugimah nunaki um.’”

<sup>4</sup> Aria Jon douk neneb baptaisumesh iri natogur nape anagun wehigunum arpesh uwok um aria nape nakripesch nakri, “Ipak pukehuk agabus yoweihai aih aria putanam pukon aparuh Iruhin. Ipak punekesh namudok aria eik inek baptaisumep aria Iruhin ta mare nusuhwesh-umep eneshenesh yoweishi inahos ipak pape penekesh iri aria nukweshihesh niyateshuguk.”

<sup>5</sup> Aria ihishmorim shape sabairubi warub bape shokugi nahobig Judia iri shani ihishmorim shape Jerusalem iri shanak um shumnek Jon ananin baraan. Eshesh shanak aria shawereh esheshish yoweishi inahos shakrip Jon aria anan neneb baptaisumesh worub Jordan.

<sup>6</sup> Aria Jon nenekah iri rupah douk shenekah enen mahin shohwaren um kamel iri enyenyerub ehirub.\* Aria nawashot iri let douk shenekat anap mahinyip yegenyihwip. Aria worigun anan nagnoh iri douk napeum nawok gormish shani wanarin hani. <sup>7</sup> Aria anan nakripesch nakri, “Eik yarig yanaki, aria anan ta nigimeiri. Anudok nugigi iri douk dodogowin atun neshagrakuk eik. Aria shopunek, eik douk madae yopuweiri um ikweshihuman madururuh ananiyu su uwe. <sup>8</sup> Aria eik douk yenek baptaisumep abar meyoh, aria anan ta nunek baptaisumep um Iruhin ananin Mishin ta nukepnyu wish nyupenyep numun.”

### *Jon Neneb Baptais Um Jisas*

<sup>9</sup> Aria Jisas nakutukuk wabur Nasaret douk bape shokugi nahobig Galili iri nanaki aria Jon neneb baptaisuman worub Jordan. <sup>10</sup> Douk neneb baptaisuman aria ahudok atuh Jisas nakutukuk worub natowi nakih neyotu anagis aria natik iruhw utag ganupok. Aria natik Iruhin ananin Mishin nyabuhi kabi arudok armir manyun um rabuhi ratem Jisas. <sup>11</sup> Aria anah mah hanaki iruhw heven. Aria enyudok arpen nyeyagwrehi nyakri, “Nyak douk eikin Nuganin. Eik douk urkum manawashamen aria yanadudareh abom.”

\* **1:6:** Tik Matyu 3:4

### *Satan Nakwiraeh Jisas Um Nunek Yoweishi Inahos*

<sup>12</sup> Aria arigas Iruhin ananin Mishin nyohur Jisas aria nikitak nanak anagan wehigunum arpesh uwok um. <sup>13</sup> Anan nanak nape anan aun shuknин aria 10-poreih nyumneh shopunek. Aria Satan nape nakwiraehan um nunek yoweishi inahos. Aria shopunek, Jisas nanak hurukatinyum urahish mahish shapeum. Aria Iruhin ananish enselahos shanaki shatauruman.

### *Jisas Nohur Mour Neneken Shokugi Nahobig Galili*

<sup>14</sup> Douk Jon nonoweshik napeik, aria Jisas nanam shokugi nahobig Galili aria nape nakripesh Iruhin ananin yopinyi bareaen. <sup>15</sup> Anan nakripesh nakri, "Ahudok nyumnah douk Iruhin nakriyoh iri douk ahudok hatogur. Aria abudok nyutob um arpesh shuwish um agundok Iruhin nupe Debeini um ipak um douk banaki hurukatin. Douk namudok aria ipak pukeshuk agabus yoweishi inahos aria putanam pukon aparuh Iruhin aria pusuhw ananin bareaen pugipeshen!"

### *Jisas Nahwar 4-poreim Aramam Aria Hagipeshan*

<sup>16</sup> Douk Jisas nape nanarahaen nanak anagas um debeigi waiyag Galili, aria natik Saimon nani ananin wanin Andru douk hape henek bisnis um hatuk eiguhw iri. Amam hawashak anan umben agudok debeigi waiyag aria hape hatuk eiguhw. <sup>17</sup> Douk anan natrum aria nakripam nakri, "Ipak yowi pugipesh eik aria ikiripep um purao arpesh shunaki shugipesh eik." <sup>18</sup> Douk anan nakripam namudok aria ahudok atuh amam hakutukuk amamib umbenab bakusuk aria hagipesh Jisas hanak.

<sup>19</sup> Douk amam hanaku aria Jisas natigu biom hatem bot hape hagabe umbenab. Amam douk Sebedi ananim nugamim, Jems nani ananin wanin Jon. <sup>20</sup> Aria douk Jisas natrum aria ahudok atuh nahwaram um hunaki hugipeshan. Aria amam biom hakutukuk amamin yaken Sebedi nani amudok henekuman mour iri hatemaguk bot aria amam habuhi hani Jisas hanak.

### *Jisas Nahiyahuk Enen Yoweinyi Sagab Douk Nyape Anan Arman Iri*

<sup>21</sup> Aria amam hanam anabur wabur shohwarabur um Kaperneam iri. Aria ahudok nyumnah Sabat eshesh Juda mour uwok shape meyoh ahi, amam hanak hawish eshesh Juda shape sheyagwreh bareaen-atari urupat aria Jisas nape neneke skulumesh um Iruhin ananin bareaen eshesh armam armago. <sup>22</sup> Aria eshesh shemnek ananin bareaen aria shakitak yowiyokuk abom. Um maresh? Anan douk narao debeinyi big aria neneke skulumesh nakripesh dodogowin atin bareaen. Aria amam henek skulumesh um lo iri douk madae hunek skulumesh namudok uwe, uwok.

<sup>23-24</sup> Aria douk Jisas nape neneke skulumesh aria anan yoweishi sagabehos shapenyan iri nanak nawish atudok urupat aria nahwar debeg nakri, "Jisas, nyananik wabur Nasaret iri. Nyak nyamoroni nyunekap mumam apak sagabehos? Nyak nyamoroni nyop mugok aka? Apak madukemen abom nyak. Nyak douk Iruhin ananin abom nunganin."

<sup>25</sup> Aria Jisas naho eshudok sagabehos nakri, "Ipak mokureg aria pukutukuk anudok arman aria putogur punak." <sup>26</sup> Aria douk Jisas nahesh aria eshesh shour anudok arman debeg. Aria anan krukruk nape aria eshesh shohwar debeg aria shakutukuk anudok shatogur sharuwok.

<sup>27</sup> Aria eshudok sabaishi arpesh shape iri shatik namudok aria eshesh shakitak yowiyokuk abom. Aria shape sheneyagwreh shakri, "Enyudok douk apak memneken iri douk maren bareaen? Seiwoh apak madae mumneken iri enyudokmori bareaen! Anudok arman douk dodogowinari aria eshudok sagabehos shemnek ananin bareaen!"

<sup>28</sup> Aria enyudok baraen um enyudok Jisas neneken iri nyowe nyanak shubairubi warub douk bape agudok shokugi nahobig Galili iri.

### *Jisas Nagabe Pita Ananik Nakwurikwik*

<sup>29</sup> Aria amam hakutukuk eshesh Juda shape sheyagwreh baraen-ati urupat aria amam ihm-morim, Jisas nani Saimon aria Andru, hani Jems aria Jon, hanam Saimon aria Andru amamit urupat. <sup>30</sup> Aria agundok, Saimon ananik nakwurikwik kwaraubor aria kwesuhuh aras. Aria arigas enesh shanak shakrip Jisas um agundok okwok kwaraubor um. <sup>31</sup> Aria Jisas nanak nasuhw okwokwin rogur nakuhur kwakitak kwape aria okwok yopuk. Aria okwok kwakitak kwape kwonek worigum um eshesh shishoh.

### *Jisas Nagabe Sabaishi Arugeh Hapeyeshi*

<sup>32</sup> Douk arigaha wabigep wah hagok aria eshesh armam armago shrauri arugeh hapeyeshi shani yoweishi sagabehos shapeyesh iri shanaki agundok Jisas napeum. <sup>33</sup> Aria ihishmorim arpesh shape abrudok wabur iri shanaki shantorum shape aduk hurukatin um dua. <sup>34</sup> Aria Jisas nagabe sabaishi arpesh anahaeih arugeh henekesh abrudok wabur iri. Aria shopunek, nahiayuk sabaishi sagabehos shatogur sharuwok. Aria sagabehos douk shadukeman Jisas. Aria anan nakripesh um eshesh mare shukurip kupaishi arpesh um anan douk Iruhin ananin nunganin um.

### *Jisas Nanak Nakripesh Yopinyi Baraen Shokugi Nahobig Galili*

<sup>35</sup> Wata wab Jisas nikitak nanak anagun arpesh uwok um aria nanak nape neneke beten. <sup>36</sup> Neneke beten aria Saimon nani amudok anam disaipel hape hauriman hanak. <sup>37</sup> Douk hauriman hanak arigaha hanak hatrun aria hakripan hakri, “Nya, ihishmorim arpesh shape shaurimen.”

<sup>38</sup> Aria Jisas nakripam nakri, “Nyunekeh, apak munam kupairubi warub bape hurukatin iri aria eik ikripesh yopinyi baraen eshesh shopunek. Um maresh, Eik douk yanakmori ikripesh yopinyi baraen sabaishi arpesh.”

<sup>39</sup> Aria anan nanak ihirub warub agudok shokugi nahobig Galili aria nape nakripesh Iruhin ananin yopinyi baraen numun eshesh Juda shape sheyagwreh baraen-ogwi urusag. Aria shopunek, nahiayuk sagabehos douk shape arpesh iri shatogur sharuwok.

### *Jisas Nagabe Anan Arugeh Lepra Hapenyanari*

<sup>40</sup> Aria anan ehudok lepra hapenyanari nanak um Jisas aria nabuh noduk ohrubus. Aria nakrip Jisas nakri, “Douk nyak nyukri wosik um, nyak ta nyugabeye.”

<sup>41</sup> Aria Jisas natrun aria neneke gishauman. Aria nohur rogur nuwem ananis wis anudok arman aria nakripan nakri, “Eik yakri wosik um. Nyak yopin.” <sup>42</sup> Aria ahudok atuh anan yopin.

<sup>43-44</sup> Aria Jisas nakripan dodogowinyi baraen nakri, “Nyak nyunak aria mare nyukrip enesh arpesh um agundok eik yagabeyen um, uwok. Nyak nyunek atin nyunam pris nutritin, aria nyunak nyunek enyudok ofa um agundok nyak yopinyum um maresh douk Iruhin ananin lo douk nakoguk Moses enyi nyakrium. Nyak nyunek namudok aria sabaishi arpesh ta shutrin aria shudukemesh shukri nyak douk iga yopin.”

<sup>45</sup> Aria anan nanak aria nape nakrip sabaishi arpesh um agundok Jisas nagabeyanum. Aria baraen nyowe nyanak sabairubi warub. Douk namudok aria Jisas madae nunak nuwish anarub warub uwe, uwok. Anan napeik aduk abrudok warub agundok wehigunum douk arpesh uwok um. Aria sabaishi arpesh shanaki worobaigunum iri shanak agundok anan nanak napeum.

## 2

*Jisas Nagabe Anan Roguhw Aiyas Shagokanari*

<sup>1</sup> Douk ehudok nyumneh hanak hadiguk, aria Jisas wata shopunek natanam nanam Kaperneam. Aria abudok nyutob eshesh armam armago shopunek shemnek baraen um anan nanak nape urupat um. <sup>2</sup> Douk namudok aria sabaishi arpesh shanak shape numun ananit urupat shuknit aria enesh shape aduk hurukatin um wit. Eshesh shape aria madae onok outuk kwupeik meyoh uwe, uwok. Eshesh shape ba shuknigun aria Jisas nape nakripesh yopinyi baraen. <sup>3</sup> Douk nape nakripesh baraen aria 4-poreim armam howemori anan roguhw aiyas shagokanari anas aras aria haran hanaki um Jisas. <sup>4</sup> Amam haran hanak aria sabaishi arpesh shape aria amam yah uwok um huran hunak agundok Jisas napeum uwe, uwok. Douk namudok aria amam hato hakih modukwitam urupat aria hadar agundok Jisas napeum. Aria anudok roguhw aiyas shagokanari nor aras aria honahur hereyan kwojarahos aria shokubur hakutunuk nabuh nakus Jisas napeum. <sup>5</sup> Aria douk Jisas natik amudok 4-poreim um henek bilip um anan ta nugabeyan aria anan nakrip anudok roguhw aiyas shagokanari nakri, “O nugarin, eik ta ko igabeyen um nyakish yoweishi inahos aria eshudok ta iyateshuk.”

<sup>6-7</sup> Aria douk Jisas nakri namudok aria anam henek skulumesh um lo iri, douk hani eshesh hape agundok iri amamiruh aparuh aturuh heneyagwreh hakri, “Anudok arman neyagwreh namudok um maresh? Anan douk nape nabubunim um Iruhin. Apak madukemesh um Iruhin atun ta wosik nukweshih-esh um arpeshish yoweishi inahos.”

<sup>8</sup> Aria Jisas nadukem amamip urkwip aria nakripam nakri, “Ipak urkwip mare pur namudok, uwok. <sup>9</sup> Um maresh? Enyudok mour douk shopunek atin um eik ikrip anudok roguhw aiyas shagokanari ikri, ‘Eik ta ko ikweshihuk nyakish yoweishi inahos aria iyateshuk’ aka, ikripan ikri, ‘Kitak hur nyakis aras nyusuwos aria nyunak’ aria anan ta nikitat nunak? <sup>10</sup> Douk namudok aria Eik Anudok Arman douk yatogur adurinyi arpen iri ta iyabige um pudukemesh um eik douk dodogoibe iri aria Iruhin neke big ko ikweshihuk um eshudok atapish arpesh esheshish yoweishi inahos aria iyateshuk.” Aria Jisas nakrip anudok roguhw aiyas shagokanari nakri, <sup>11</sup> “Eik yakripen, nyak kitak hur nyakis aras nyusuwos aria nyunam urupat!” <sup>12</sup> Aria ahudok atuh eshudok ihishmorim arpesh douk shape agundok iri shatrunum nikitak nohur ananis aras nasuwos aria nanak. Aria eshesh shatrun namudok aria ihishmorim shakitak yowiyokuk aria shape shatuk Iruhin ananin nyeigur nyato iruhw. Aria shakri, “Seiwo apak madae mutik enen enyudokmori nyutogur uwe, uwok!”

*Jisas Nahwar Livai  
(Matyu 9:9-13; Luk 5:27-32)*

<sup>13</sup> Aria Jisas nikitak natanam narahaen nanak anagas um debeigi waiyag Galili aria sabaishi arpesh shanaki shatogruman. Aria anan nape nenek skulumesh nakripesh yopinyi baraen. <sup>14</sup> Anan nakripesh baraen jurug aria anan nanaku aria natik Alfius ananin nugarin Livai douk apa narao takis iri. Jisas natrun nape urupat douk nape narao takis um. Aria anan nakripan nakri, “Nyak yowi nyugipesh eik ba unak.” Aria Livai nikitak nanaman hanak.

<sup>15</sup> Aria kupaihi nyumnah Jisas nape nawok worigun Livai ananit urupat. Aria sabaimi harao takis iri hani sabaimi kupaimi shopunek henek enesh-enesh yoweishi inahos iri hani Jisas nani ananim disaipel hape hawok worigun. Um maresh? Worobaimi amudokmori armam iih nyumneh apa

hagipesh Jisas. <sup>16</sup> Aria anam henek skulumesh um lo iri, amam douk Farisi omi. Amam hatik um Jisas nani shenek eneshenesh yoweishi inahos iri shani harao takis iri shape shawok worigun atugun um aria amam harig ananim disaipel hakri, “Anan nani eshudok shenek eneshenesh yoweishi inahos iri shawok worigun?” <sup>17</sup> Aria Jisas nemnekam namudok aria nakripam nakri, “Arpeshi douk madae eneh arugeh henekesh iri ta mare shunam dokta um nugabeyesh, uwok. Eshudok douk arugeh henekesh iri atish ta shunak um dokta nugabeyesh. Aria eik shopunek douk namudok atin, kabi dokta um. Eik douk madae inakumori ihwar yopishi arpesh um shatanam shukon aparuh Iruhin uwe, uwok. Eik douk yanakmori ihwar eshudok douk shenek yoweishi inahos iri um shukeshuk agabus yoweishi inahos aria shatanam shukon aparuh Iruhin.”

*Jisas Nakripesh Um Agundok Shushakur Um Worigun Shape Meyoh Um  
(Matyu 9:14-17; Luk 5:33-39)*

<sup>18</sup> Anah nyumnah Jon douk nenen baptaisumesh iri ananim disaipel hani amam Farisi amamim disaipel hashakur um worigun aria hape henek beten atin. Douk namudok aria enesh arpesh shanak gani Jisas napeum aria sharigan shakri, “Jon ananim disaipel hani amam Farisi amamim hashakur um worigun aria hape henek beten atin. Aria nyakim madae henekesh namudok uwe, um maresh?”

<sup>19</sup> Aria Jisas nakripesh enen wobuwobren baraen nakri, “Ipak pakri abudok nyutob anudok douk kadak narao armatok iri wata nini ananishi nupe um, eshesh ta shushakur um worigun aria shupe meyoh aka? Adur atin ta uwok. Eshesh ta shuwok worigun aria ta shupe! <sup>20</sup> Aria nyutob ta bunaki um kupaishi shuran shunak kupaigunum um. Aria ahudok nyumnah, ananishi ta urkwip purum anan aria ta shushakur um worigun shupe meyoh.”

<sup>21-22</sup> “Aria ta mare enen arpen nyukwuhwaesh anap rupahip um anah namuhi rupah aria nyutapeyop um anohw umunihw um anah jugwaihi rupah, uwok. Enyen nyibirak namudok akure, enyen ta nyunek anohw umunihw ahudok namuhi rupah. Aria shopunek ta nyutapeyop aria ta mare pupe wosik um ahudok jugwaihi rupah uwe, uwok. O ta mare enen arpen nyurak anabar namubari wainibar abar bubuh anap jugwaipi memeip munuhwip douk shape sharuk wainibar abar um uwe, uwok. Enyen nyunekesh namudok akure, abrudok namubari wainibar abar ta buprukeshop aria wain ta nutourakuk atap atin. Aria apudok memeip munuhwip ta yowep. Aria namudok uwok, eshesh ta shisharabar namusi munuhwis atus. Aria asas ta mare tutukaras aria wain ta nur wosik!”

*Jisas Anan Douk Debeini Aria Nakripesh Um Shenek Mour Sabat  
(Matyu 12:1-8; Luk 6:1-5)*

<sup>23</sup> Anah nyumnah Sabat, eshesh Juda mour shape meyoh ahi, Jisas nani ananim disaipel hakitak hawish hanak anag debeigi nubarig douk shau wit um. Aria agundok ananim disaipel hadi anat urubit wit aria hape haworishat hatoh. <sup>24</sup> Aria amam Farisi hatrum namudok aria hakrip Jisas hakri, “Tik, nyakim disaipel henekesh mumam namudok? Apakin lo douk nyakri apak mare munek enen mour ahudok nyumnah Sabat!”

<sup>25-26</sup> Aria Jisas nakripam nakri, “Ipak patarihen baraen seiwok Devit menyemaguk iri um abudok nyutob anan nani ananim nyurub bam um aka, uwok? Amam nyurub bam aria Devit nawish Iruhin ananit debeiti urupat nohur bret douk shenek ofamat shako Iruhin iri aria nani ananim hatoh. Enyudok douk nyatogur abudok nyutob Abiatar nape debeini pris obi nyutob. Abiatar nakri wosik aria Devit nani ananim armam hawish

hohur bret hatoh. Aria shopunek, apakin lo douk nyakri mare enesh shape meyoh iri arpesh shuwok atudok bret, uwok. Amam pris atum wosik. Aria Devit nani ananim hotuhur hatoh."

<sup>27</sup> Aria Jisas wata shopunek nakrip amam Farisi nakri, "Iruhin douk madae nunek ahudok nyumnah Sabat um nukri ipak aparuh yoweruh aria mare panadudareh uwe, uwok. Anan nenekah um nakri ipak aparuh ta yopuruh aria panadudareh. <sup>28</sup> Aria Eik Anudok Arman douk yatogur adurinyi arpen iri douk Debeewe um ihishmorim eneshenesh um abudok amnab, aria Debeewe um ikrip arpesh shunek mour ahudok nyumnah Sabat shopunek."

### 3

#### *Jisas Nagabe Anan Rogur Yowenyan Iri Um Ahudok Nyumnah Sabat (Matyu 12:9-14; Luk 6:6-11)*

<sup>1</sup> Kupaihi nyumnah Sabat, Jisas nanak nawish eshesh Juda shape sheneyagwreh baraaen-atи urupat. Aria anan rogur yowenyan iri arman nanaki nawish nanamesh nepe. <sup>2</sup> Aria arpesh shape atudok urupat iri shakri shukon baugos um enen baraaen Jisas shakri shutik anan ta nubrig enen lo aka, uwok. Douk namudok aria eshesh shape shatrun duk um shakri kadaq anan nukri nugabe anudok rogur yowenyan iri ahudok nyumnah Sabat um, aria eshesh shuneman baraaen. <sup>3</sup> Aria Jisas nakrip anudok rogur yowenyan iri nakri, "Kitaki nyeyotu agundok orokohun um sabaishi arpesh shutrin." <sup>4</sup> Aria anan nakitak nanak neyotu aria Jisas narigesh nakri, "Apakin lo douk Iruhin nakoguk Moses enyi nyakri munek maren mour ahudok nyumnah Sabat? Mugamoh arpesh mugabeyesh aka, mukri uwok umesh? Mugamohesh shupe wosik aka, ba mesh shugok?"

Aria eshesh madae shiyagwreh shukripan enen baraaen uwe. <sup>5</sup> Aria anan neyotu natrish aria nyibur juwehosibur. Um maresh? Anan natrish um eshesh showeshik esheshiruh aparuh dodog aria shakri uwok um shumnek Iruhin ananin baraaen shugipeshen. Aria anan nakrip anudok rogur yowenyan iri nakri, "Kwanu nyakin rogur." Aria anan nonu rogur aria enyen yopin abom. <sup>6</sup> Aria amam Farisi hakitak hatogur hanak hani anam Herot ananim armam hape habo baraaen um hakri hurim anah yah um hubo Jisas nugok.

#### *Sabaishi Arpesh Shagipesh Jisas Shanak Shape Hurukatin Um Debeigi Waiyag Galili (Luk 6:17-19)*

<sup>7</sup> Aria Jisas nani ananim disaipel hakutukuk abrudok wabur hakitak hanam debeigi waiyag Galili. Amam hanak aria sabaishi arpesh shagipesham shanak. <sup>8</sup> Eshudok arpesh enesh shanaki shokugi nahobig Galili iri. Aria enesh shanaki shokugi nahobig Judia iri. Aria enesh shanaki debeigi nahobig Idumia, aria enesh shanaki Jerusalem iri. Aria enesh shapeiri gani wobreha um worub Jordan iri shanaki, aria enesh shape iri hurukatinum arbudok biarub warub Taia bani Saidon iri shanaki. Eshesh ihishmorim shemnek um Jisas nepe nagabe ehudok arugeh hapeyeshi aria eshesh shanaki um nugabeyesh. <sup>9</sup> Aria agundok sabaishi arpesh shanaki shape shuknigun. Douk namudok aria Jisas nakrip ananim disaipel um harauri anat shokwuti bot tunaki tukusuman hurukatin um kadak sabaishi arpesh shukri shanaki hurukatin um anan um aria anan ta nuto nutemaguk bot. Ta neyotu atap um, eshesh ta shishiwokan. <sup>10</sup> Um maresh, nubokuhieb nyutob anan nagabe sabaishi ehudok arugeh hapeyeshi. Douk namudok aria eshudok arugeh hapeyeshi shape shatatigas um shunak

shususuhw Jisas meyoh aria eshesh ta yopish. <sup>11</sup> Aria abudok nyutob douk yoweishi sagabehos shapenyesh iri shanaki shatik Jisas aria shabuh shatu shakus hurukatin um anan aria shohwar debeg shakri, "Nyak douk Iruhin ananin Nuganin."

<sup>12</sup> Aria Jisas nakripesh dodogowinyi baraen nakri eshesh mare shukripesh um anan douk Iruhin ananin Nuganin.

*Jisas Nagraeh 12-poreim Aposel Um Hunak Hukrip Arpesh Um Ananin Baraen  
(Matyu 10:1-4; Luk 6:12-16)*

<sup>13</sup> Aria Jisas nato anag mihib aria nahwar sabaimi armam douk anan nakriyam iri hanaki. <sup>14</sup> Aria anan nagraeh 12-poreim armam aria nakom enyudok nyeigur aposel. Aria nakripam um huni anan hupe hurahaen aria neshopokam um hunak hukripesh ananin baraen sabaishi arpesh. <sup>15</sup> Aria shopunek um nukom dodog um huhiyahuk yoweishi sagabehos shutogur shuruwokuk.

<sup>16-17</sup> Amudok 12-poreim aposel Jisas nograeham iri douk amudok. Saimon, douk Jisas nodowon kupaingyi nyeigur Pita iri, nani Sebedi ananim nugamim, Jems nani ananin wanin Jon, douk Jisas nodowon kupaingyi nyeigur Boanerges iri. Baugenyeum enyudok nyeigur douk shakri, "Utag Pogarog." <sup>18</sup> Amam hani Andru, Filip, Bartolomyu, Matyu iri Tomas. Hani Alfius nugarin Jems iri Tadius iri Saimon douk natogur anap awirop shohwaresh um Selot\* iri. <sup>19</sup> Amam hani Judas Iskariot. Anan douk nowereh Jisas um ananim horim iri.

*Enesh Sheneh Rohw Shakri Satan Douk Kupainyi Nyeigur Shohwaren Bielsebul Iri Nyataurum Jisas  
(Matyu 12:24-32; Luk 11:14-23, 12:10)*

<sup>20</sup> Aria Jisas natanam nanam urupat aria sabaishi arpesh shanaki shape anan napeum. Aria Jisas nani ananim disaipel hatrish namudok aria amam nyutob uwok um hupe meyoh ba hunek anagun worigun hugnoph uwe, uwok. <sup>21</sup> Aria ananishi, eshesh atup awirop shemnek um agundok anan madae nupe meyoh um nuwok worigun um, aria eshesh shanaki um shuran shunak. Um maresh? Eshesh shakri anan douk nagugak.

<sup>22</sup> Anam henek skulumesh um lo iri douk hape iri Jerusalem hanaki henek rohw. Amam hakripesh hakri Jisas douk enyudok Bielsebul douk debeinyi um sabaishi sagabehos iri nyenekan dodogowin aria anan douk nohiyahuk eshudok enesh sagabehos shatogur sharuwok. <sup>23</sup> Douk namudok aria Jisas nahwar sabaishi shanaki um anan aria nakripesh enyudok wobuwobren baraen nakri, "Satan anan kanak ta mare nuliyahuk ananishi sagabehos shutogur shuruwok uwe, uwok. <sup>24</sup> Aria douk arpesh shape atug nahobig iri shunadiyogurum shunak shupe sisiguk, aria shunenem horin horik aria shupe shurpak akure, eshesh ta mare dodogowish uwe, uwok. <sup>25</sup> Aria shopunek douk anap awirop shunadiyogur um, aria eshesh kanak shunenem horin horik aria shupe shurpak atin shupe akure, eshesh shopunek ta mare dodogowish uwe, uwok. <sup>26</sup> Aria douk Satan nini ananish shunadiyogur um shunak shupe sisiguk, aria eshesh kanak shunenem horim horik ba shupe shurpak atin shupe aria eshesh shopunek ta mare dodogowish uwe, uwok."

<sup>27</sup> "Aria ta mare anan arman nunak nuwish anan dodogowinari arman ananit urupat aria nutrun nukwumeshi aruh ananish eneshenesh uwe,

\* **3:18:** Putik futnot nyape Matyu 12:4 iri.

uwok. Sagomatin anan ta nuweshikuk anudok arman nupeik ba iyoh, aria anan ta kadaq nunak nutrun ba nukwuaruh um eneshenesh.”

<sup>28-30</sup> Aria douk amam henek skulumesh um lo iri hakri enen sagab nyataurum Jisas um nenek mour um. Douk namudok aria Jisas nakripam nakri, “Adurigom atin eik yakriep, Iruhin ta ko nukweshihuk um eneshenesh yoweishi inahos arpesh shenekesh iri shuni enyudok ihinyumorim yoweinyi baraen douk eshesh shakriyen um anan iri, aria nukweshiheshuk. Aria enyudok enenyenen douk shububunim um Iruhin ananin Mishin iri, Iruhin ta nusuhw enyudok esheshin yoweinyi douk eshesh shakriyen iri aria ta mare nukweshiheshukuk uwe, uwok. Esheshish yoweishi inahos ta shupe um douk arigaha kweipon amnab butuh ahi nyumneh.”

*Jisas Ananik Amakek Kwani Ananim Aruhim  
(Matyu 12:46-50; Luk 8:19-21)*

<sup>31</sup> Aria abudok nyutob Jisas ananik amakek kwani ananim aruhim shanak shatogur. Aria shanak sheyotu aduk urupat aria shenek baraen nyanaman um nutograri aduk. <sup>32</sup> Aria agundok sabaishi arpesh shape shersharih um anan aria eshesh shakripan shakri, “Nya, nyakik amakek kwani aruhim sharimen.”

<sup>33</sup> Aria Jisas nakripesh nakri, “Meishi ekish amakek aruhim?”

<sup>34</sup> Aria anan nushakam eshudok nernarih douk shape iri aria nakripesh nakri, “Ekish amakek aruhim douk eshudok! <sup>35</sup> Meishi douk shape shagipesh Iruhin ananin baraen iri douk Ekish aruhim, mohwuhiyu aria amakeniyu.”

## 4

*Jisas Nakripesh Wobuwobren Baraen Um Anan Nawashak Wit Ananig Nubarig Iri  
(Matyu 13:1-9; Luk 8:4-8)*

<sup>1-2</sup> Aria Jisas wata shopunek nanak nape nenek skulumesh nakripesh yopinyi baraen gani anagas um debeigi waiyag Galili. Aria sabaishi arpesh abom shanaki shape Jisas naopeum. Douk namudok aria anan nikitak nato netem anat bot douk tor waiyag iri. Aria eshesh sheyotu anagas aria anan netemori bot nape nenek skulumesh nakripesh sabainyi yopinyi baraen nakripesh wobuwobren atin. <sup>3</sup> Nakri, “Ipak pumnek! Anan arman nawashak wit ananig nubarig. <sup>4</sup> Anan nawashat aria anat tabuh takus yah, aria armiguhw hwabuhi hwatuhur hwatoh. <sup>5</sup> Aria anat tabuh takus utabor um. Aria douk amnab madae sabaibi uwe aria atat pupuwarat takih arigas. <sup>6</sup> Aria nukwaruh madae hubuh atap uwe. Namudok aria araruh habuh hetemaguk utabor aria wah hatao hat aria yarit. <sup>7</sup> Aria anat tagrukuk segego-iruh madururuh hakih um aria pupuwarat takih. Douk takih, aria aruhudok madururuh hesigarut aria atat madae tukih debet um shurkwip pir uwe. <sup>8</sup> Aria anat tagrukuk yopubi amnab aria pupuwarat takih debet aria sabaiti teir. Anat, 30-poreit teir atin atin apakiwogin. Aria anat 60-poreit, aria anat 100-poreit.”

<sup>9</sup> Douk Jisas nakriyuk namudok aria anan nakripesh nakri, “Aria douk ipak arigos sapenyep iri aria gamo pumnek eikin baraen aria pugipeshen.”

*Jisas Nakripesh Baugen Um Baraen Um Agundok Douk anan Nakripesh Wobuwobren Atin Um  
(Matyu 13:10-17; Luk 8:9-10)*

<sup>10</sup> Douk sabaishi arpesh shakutunukuk shanak, aria Jisas atun nani ananim 12-poreim disaipel hani eshudok enesh shagipesh Jisas iri atish shape. Aria eshesh sharigan um nukripesh um baugenylum um enyudok wobuwobren baraen anan nepe nakripesh-enyi. <sup>11</sup> Aria anan nakripesh nakri, "Iruhin douk nakripep baugenylum um baraen um enyudok wobuwobren baraen um ipak atip um ta puwish agundok Iruhin nepe Debeini um ananish arpesh um. Aria ihishmorim adukishi ta uwok. Eshesh ta shumnek wobuwobren atin. <sup>12</sup> Douk namudok aria, 'Eshesh ta shutrugun aria ta mare shutik enesh eshudok eneshenesh. Aria shopunek ta shumnek baraen, aria ta mare shudukem baugenylum um, uwok. Um maresh, ta shudukem baugenylum um aria wata shutanam shukon aparuh Iruhin aria anan madae nunawasham um esheshish yoweishi inahos aria nukwreyeshuk.'

### *Jisas Nakripesh Baugen Um Baraen Um Anudok Nawashak Wit Nubarig Iri*

*(Matyu 13:18-23; Luk 8:11-15)*

<sup>13</sup> Aria Jisas narigeshe nakri, "Ipak madae pudukem baugenylum enyudok wobuwobren baraen iganigadæ yakripepen iri uwe? Douk namudok aria ipak ta pudukem ihinyumorim wobuwobren baraen douk ta eik ikripen iri mumam? <sup>14</sup> Anudok arman nawashak wit iri douk kabi anan nakripesh Iruhin ananin yopinyi baraen iri. <sup>15</sup> Aria atudok douk tabuh takus yah iri douk kabi eshudok arpesh douk shemnek Iruhin ananin baraen aria Satan nanaki natrish narauguk enyudok yopinyi baraen douk nyape esheshiruh aparuh iri. <sup>16</sup> Aria atudok douk tabuh takus utabor bakus um iri douk kabi eshudok arpesh douk shemnek Iruhin ananin baraen atin aria shanadudareh-umen abom shasuhwen shakri wosik iri. <sup>17</sup> Aria eshesh sharaen aria eshesh madae shusuhwen dodog uwe. Eshesh shasuhwen shagipeshen banab nyutob meyoh. Aria douk arigaha enen amaen nyatogrumesh o shenekesh enenyen um agundok shasuhw enyudok Iruhin ananin baraen um, aria arigas atin shakutukuk esheshin bilip. <sup>18-19</sup> Aria atudok douk tabuh tagrukuk segegoipur madururuh hakih um, douk kabi eshudok arpesh douk shemnek Iruhin ananin baraen, aria eshesh shenek wari um shakri shupe wosik agundok atap iri. Eshesh mishish shakitak um shugrem sabaishi eneshenesh eshudok aria shanadudareh um agundok atapishi eneshenesh atish. Douk namudok aria eshudok eneshenesh showeshik esheship urkwip aria eshesh madae shusuhw Iruhin ananin baraen dodog uwe. Eshesh urkwip pekeshuk abom um enyudok Iruhin ananin yopinyi baraen eshesh shemneken iri. Aria eshesh shakwutinyuk aria madae shunek ehudok yopihi aih douk Iruhin nakri eshesh shunek iri uwe. <sup>20</sup> Aria atudok douk tabuh takusuk yopubi amnab iri douk kabi eshudok arpesh douk shemnek Iruhin ananin baraen aria shasuhwen dodog shagipeshen iri. Aria eshesh shenek sabaihi yopihi aih. Aria eshesh shape kabi douk apakiwogin witin um. Anat, 30-poreit teir atin atin, anat 60-poreit, aria anat 100-poreit."

### *Jisas Nakripesh Wobuwobren Baraen Um Lam Douk Shahemen Shashapumen Anat Baket Iri*

*(Luk 8:16-18)*

<sup>21</sup> Aria Jisas wata shopunek nakripesh nakri, "Ta mare enen arpen nyihem enen lam aria nyukitak nyushapamen anat baket o nyunyigren shakamum anat bet, uwok. Enyen ta nyihem aria nyunyem iruhinyum tebol um enyen ta nyutrugun-umesh. <sup>22</sup> Aria eneshenesh douk shanabeshuk shakus iri ta wata shutogur yopugunum. Aria eneshenesh douk

arpesh shoshigarish shakus iri ta wata shishrekesh shukus yopugunum.  
<sup>23</sup> Aria douk ipak arigos sapenyepi aria pumnek eikin baraen aria pusuwen ddog pugipeshen."

<sup>24</sup> Aria anan nakripesch enen baraen shopunek nakri, "Ipak urkwip gamo purum enyudok baraen douk ipak pamneken iri aria pugipeshen! Um maresh? Ta ipak gamo pumneken pugipeshen um, Iruhin ta nutaurumep pudukem enen yopinyi baraen shopunek. <sup>25</sup> Aria eshudok douk shurao Iruhin ananin baraen shudukemesh wosik iri, Iruhin ta wata gamo nukripesch enen shopunek. Aria eshudok douk madae shudukem ananin baraen iri uwe, enyudok karowinyi eshesh shasuhwen iri ta wata nutrishenyuguk."

*Jisas Nakripesch Wobuwobren Baraen Um Anan Nawashak Shurkwip Patogur Um*

<sup>26</sup> Aria Jisas nakripesch enyudok baraen shopunek nakri, "Arpesh shawish um agundok Iruhin nape Debeini um ananish arpesh shapeum ta kabi enyudok wobuwobren baraen um. Baraen enyudok. Anan arman nanak nawashak shurukwip-igun worigun ananig nubarig. <sup>27</sup> Anan nawashep jurug aria nanak. Aria ihibus weibus anan neshuh, aria nyumneh naktak narahaen. Aria abudok nyutob epudok shurkwip pape pupuwarep pakih. Aria anan douk madae nudukemesh um agundok epep pupuwarep pakih um uwe. <sup>28</sup> Abab annab kanak benekep pupuwarep pakih debeipi aria shurkwip peir. Aria sagomatin pupuwarep pakih aria parik penek shus, aria pakih rowipi penek urub aria sabaipi shurkwip peir. <sup>29</sup> Douk peir arigha pauh, aria anudok arman nasuhw ananip ponodaresh iri nogwotep nanak natupok epudok shurkwip. Um maresh? Epep douk pauh aria abudok nyutob um shurim worigun obi nyutob douk batogur."

*Jisas Nakripesch Wobuwobren Baraen Um Enen Rowog Nyeigurin Um Mastet Iri Enyeniyim Shurkum*

(Matyu 13:31-32; Luk 13:18-19)

<sup>30</sup> Aria Jisas nakripesch nakri, "Arpesh shawish um agundok Iruhin nape Debeini um ananish arpesh um ta kabi maresh um? Eik ta ikripemaren wobuwobren baraen um pudukemesh? <sup>31</sup> Agundok Iruhin nape Debeini um ananish arpesh um ta kabi anam shokumi mastetim shurkum um. Amam douk shokumi abom meshagrakuk sabaipi shuruwep arpesh douk shawep nubarigos iri. <sup>32</sup> Anan arman nau anam mastetim shurkum ananig nubarig. Aria amam puwarom makih munek debeinyi rowog nyesagrakuk kupaigosi shokugosi rowos seyotu nubarig iri aria nyenek debeishi nyeiguhw. Aria armiguhw hwanak hwem was aria hwetem hwanabeshuk um wah."

*Jisas Nakripesch Baraen Aria Nakripeshen Wobuwobren Atin*

(Matyu 13:34-35)

<sup>33</sup> Aria Jisas nepe nakripesch ananin yopinyi baraen aria nakripesch sabainyi wobuwobren baraen kabi douk iganigadae nakripeshen iri. Anan nakripesch sabainyi wobuwobren baraen douk ta wosik shudukemesh um eshesin saki iri. <sup>34</sup> Aria ihinyumorim baraen anan nakripeshen iri, anan nakripesch wobuwobren atin. Aria abudok nyutob anan atun nani ananim disaipel atum hapeum, anan nepe nakripam baugeniyum ihinyumorim baraen.

*Jisas Naho Debeinyi Uhwin Aria Nyagok Nyabuh*

(Matyu 8:23-27; Luk 8:22-25)

<sup>35</sup> Douk wabigun ahudok atuh nyumnah, Jisas nakrip ananim disaipel nakri, "Yaipo, apak munak gani wobrehahig um waiyag." <sup>36</sup> Aria amam hakutukuk eshudok sabaishi armam armago shapeik, aria amam hato atudok bot douk Jisas iganigadae narik nakh netemoti aria haran namam hanak. Aria anog botog shopunek gwagipesh amamit bot gwanak. <sup>37</sup> Aria douk amam hanak aria debeinyi uhwin abom nyahur aria nyenek debeibi morub bikitak. Aria abar bakih baprok bot aria atat hurukatin um shuknitum abar. <sup>38</sup> Aria abudok nyutob Jisas nanak nanahem korukwu aria neshuh gani tagigukum bot. Aria douk ananim disaipel hatik namudok aria hanak henyubarun hakri, "Debeini Tisa, apak hurukatin um mugok wo. Nyak madae urkum murum agundok douk ta apak mugok um uwe?"

<sup>39</sup> Douk amam hakripan namudok aria nikitak naho enyudok uhwin iri morub nakri, "Ipak punak putuhuk abom!"

Aria eshesh shanak shatuhuk abom. Uhwin madae nyahur uwe aria morub shopunek madae bukitak uwe. <sup>40</sup> Aria Jisas natanam nakripam nakri, "Ipak panogugur um maresh? Ipak madae punek bilip uwe um maresh?" <sup>41</sup> Aria amam hanogugur abom aria amam kanak hanakripam hakri, "Anudok manan arman? Uhwin iri abar shopunek douk shem-nekan."

## 5

*Jisas Nahiyahuk Enen Yoweinyi Sagab Douk Nyape Anan Nagugak Iri Arman*

(Matyu 8:28-34; Luk 8:26-39)

<sup>1</sup> Douk uhwin aria eshah shanak shatuhuk, aria Jisas nani ananim disaipel hanak. Amam hanak arigaha hatogur eshesh Gerasa eshesh-mokum um, gani wobrehahig um debeigi waiyag Galili. <sup>2-3</sup> Aria douk Jisas nanatu nabuhi bot atin, aria anan arman urupat wokanari nanaki natogruman. Anan douk nape neshuh wonugwe-gwiruh hapeum nanaki. Anan douk enen yoweinyi sagab nyapenyan aria nanak nape neshuh gani wonugwe-gwiruh um. Aria anan douk madae anan arman dodogowin um nusuwan nuweshikan uwe, uwok. Senab shopunek douk madae dodogowib uwe. Anudok nagugak iri douk dodogowin atun abom aria naprukeshab. <sup>4</sup> Aria sabaihi nyumneh eshesh shasuan shakwu senab showeshik ananish roguhw aiyas aria anan naprukeshab. Anan douk dodogowin atun abom aria arman madae anan dodogowin um nusuwan nuweshikan um nupe wosik uwe. <sup>5</sup> Aria iihih, nyumneh weibus, anan napeum narahaen atin. Anan nanak nape wonugwe-gwiruh um, aria nawish nanak yodururuh um. Aria agundok anan napeum nahwar atin nape. Aria shopunek anan nasuhw eresibori utabor kabi douk nugugwes um aria nape natah ananihw yegenyihw.

<sup>6</sup> Aria anan douk nakutukuk wonugwe-gwiruh hapeum aria wata nape nanaki rougun, aria anan natigi Jisas. Aria anan nanogugur aria nahur nanaki nabuh noduk ohrubus hurukatinyum Jisas. <sup>7</sup> Aria nahwar debeg nakri, "Jisas, Debeini Iruhin abom ananin Nuganin! Nyak nyakri nyuneke mumam eik? Nyak nyukri adurin baraen um gani iruhw um nyak mare nye nyuneke imnek debeiri eriger!" <sup>8</sup> Anan nakri namudok um maresh, Jisas nakrip enyudok yoweinyi sagab douk nyapenyan iri nakri, "Yoweinyi sagab, nyak nyukutukuk anudok arman aria nyutogur nyunak!" <sup>9</sup> Aria Jisas narig anudok nagugak iri nakri, "Nyak nyanahwar mumam?" Aria anan nakri, "Apak sabaipari yoweishi sagabehos mawish mapenyan. Douk namudok aria apak manahwar sagabehos!" <sup>10</sup> Aria anan nape

nahwaran debeg Jisas um nakri Jisas mare nishopok eshudok sagabehos shunak rougun.<sup>11</sup> Aria agundok hurukatin, sabaiguwi burguhw hweyatu hwape hwawok worigun gani wobrehahum anag shokugi mihig.<sup>12</sup> Douk namudok aria eshudok yoweishi sagabehos shakrip Jisas shakri, "Nyak nyishopokap munak muwish gwaguhwi burguhw."<sup>13</sup> Aria Jisas nakri wosik aria eshesh shakutukuk anudok arman shatograri shanak shawish ogwuhwudok burguhw. Aria ogwuhwudok sabaiguwi burguhw douk shadarehoguh hwatogur 2,000-poreiguh iri hwahur hwanak hwagruckuk enen natogur. Aria ogwoguh hwabuh hwagruckuk anag waiyag aria ihiguhmorim hwabarahuukuk aria hwagok hwtuh.<sup>14</sup> Aria amudok armam douk hape hako ogwuhwudok burguhw iri hatik namudok aria hakitak haruwok. Amam hanak aria hakrip eshudok arpesh douk shape warub iri shani eshudok douk shape hurukatinyum nahobigos iri um enyudok mugu douk nyatogur iri. Aria eshesh shakitak shanak um shakri shutrun.<sup>15</sup> Aria eshesh shanak agundok Jisas napeum aria shatik anudok arman riguk sagabehos shapenyani. Douk anan madae nugugak uwe. Anan wata narao yopumi urkum aria nikitak nananek rupeh aria nepe. Aria douk eshesh shatrun namudok aria eshesh shanogugur abom.<sup>16</sup> Aria shopunek, eshesh shanak shatogurum eshudok arpesh douk shape shatik enyudok Jisas neneken iri aria shakripesh um agundok sagabehos shakutukuk anudok arman shatograri shanak shawish burguhw aria shaguhw hwagok um.

<sup>17</sup> Douk namudok aria eshesh shape sheshopok Jisas um nukutukuk eshesh um nunak um kupaigunum.

<sup>18</sup> Aria douk eshesh shakripnamudok aria Jisas nato bot um nakri nunak aria anudok arman douk riguk sagabehos shapenyani narigan nakri, "Jisas, eik yakri inamen unak!"<sup>19</sup> Aria Jisas nakripan nakri, "Uwok, nyak wata nyutanam nyunak um nyakibur wabur aria nyukrip nyakish, ipak atup awirop um agundok Debeini nakri gihauum nyak um. Aria shopunek nyukripesh um enenyenen anan neneken um nyak iri."

<sup>20</sup> Aria douk Jisas nakripan namudok aria anan nanak nawish agudok shokugi nahobig douk 10-poreirub warub bape um aria nakripesh um agundok Jisas nagabeyan um. Aria eshesh shakitak yowiyokum abom.

*Jisas Nohur Jairus Ananik Nugawik Douk Kwagok Iri Kwakitak Kwape,  
Aria Nagabe Onok Kwasusuhw Ananik Rupeh Iri  
(Matyu 9:18-26; Luk 8:40-56)*

<sup>21</sup> Douk Jisas nani ananim harao bot hatanam hanak hatogur gani wobrehahig um waiyag, aria habuh heytu anag. Douk amam heytu aria sabaishi arpesh shanaki shatrum.<sup>22</sup> Aria Jairus, douk debeini um eshesh Juda shape sheneyagwreh baraan-atari urupat iri shopunek nanaki. Anan nanaki natik Jisas aria nanak nabuh nakus atap hurukatinyum Jisas ananiruh yeriweruh.<sup>23</sup> Aria neyawgreh debeg nakri, "Nya, eikik shokukwi nugawik arugeh hapeyok aria okwok hurukatinyum kugok. Douk namudok aria yakri nyak nyunaku nyuwemok wis meyoh um okwok wata yopuk aria kwukitak kwupe."

<sup>24</sup> Douk Jairus nakripan namudok aria Jisas nanaman hanak. Douk amam hanak aria sabaishi arpesh shopunek shanamam shanak. Eshesh shanak wobuwobur aria Jisas naraguk orokohun. Aria shopunek agundok yah eshesh shanak um, eshesh shantoruh um shanak.<sup>25</sup> Aria onok armatok douk owishibor banakok kwape 12-poreish kwarahos iri shopunek kwanamesh shanak.<sup>26</sup> Okwok sabaimi dokta habirak um hakri hugabeyok aria habirak hatik uwok. Okwok kwomnek debeiri eriger um amam dokta hakri hugabeyok um. Aria shopunek, okwokwibor utabor douk kwashabor

batuhmaguk um kwator dokta omi um hugabeyok um. Aria okwok madae yopuk uwe. Owishibor banakok bape namudok aria beshagrakuk riguk barik banakok um. <sup>27</sup> Aria douk okwok kwomnek um agundok Jisas nagabe sabaishi ehdok arugeh henekesh um, aria okwok kwani eshudok sabaishi arpesh shanaki. Aria okwok kwanaki agabehah-inum Jisas aria kwasuhw ananiih rupah. <sup>28</sup> Umum maresh, okwok kwaneyagwreh kwakri, "Douk eik isusuhw ananiih rupeh meyoh um, anan ta wata nugabeye."

<sup>29</sup> Douk namudok aria okwok kwanak kwasuhw ananiih rupah aria ahudok atuh owishibor tukaruboruk. Aria shopunek, okwok kwomnek um numun okwokwihiw yegenyihw owishibor madae anabor bunaki uwe. Aria okwok kwadukemesh um okwok douk yopuk.

<sup>30</sup> Aria ahudok atuh Jisas nadukemesh um enen ananin dodog nyakutukuk anan nyatogur nyanak. Aria anan narigeshe nakri, "Douk omi nyanaki nyasusuhw eikhru rupeh?" <sup>31</sup> Aria ananim disaipel hakripaen hakri, "Nyak nyatris, sabaishi sheyotu shersharih um nyak aria nyak wata nyarigeshe um?"

<sup>32</sup> Aria Jisas neyotu natris um nakri nutik enyudok arpen douk nyasusuhw ananiih rupeh iri. <sup>33</sup> Aria okwudok armatok kwadukemesh um agundok Jisas nagabeyok um. Aria okwok kwanogugur abom, aria krukruk kwanak kwabuh kwakus hurukatinyum Jisas ananiruh yeriweruh, aria kwape kwakripaen um agundok anan nagabeyok um. <sup>34</sup> Aria anan nakripok nakri, "Nugawik, nyak nyenek bilip nyakri eik dodogoiwe iri aria nyak douk yopin. Aria douk nyakih arugeh douk hatuh abom. Aria nyak nyunak aria nyakihw apahw hwurumen wosik."

<sup>35</sup> Aria douk Jisas wata nape neyagwreh atin, aria amam hapei Jairus douk debeini um eshesh Juda shape sheneyagwreh bareaen-atari urupat iri um ananit urupat aria harauri bareaen hanaki hakrip Jairus hakri, "Nyak nugawik adur kwagok. Namudok aria nyak mare nyukon amaen apakin debeini tisa um nunaku nyakit urupat um."

<sup>36</sup> Aria Jisas madae numnek amamin bareaen uwe, uwok. Aria anan nakrip Jairus nakri, "Nyak mare nyunogugur. Nyak nyunek bilip atin."

<sup>37</sup> Aria anan nakri uwok um ihishmorim arpesh shapeik aria Jems nani ananin wanin Jon iri Pita amam hanaman hanak. <sup>38</sup> Amam hanak hatogur Jairus ananit urupat aria Jisas nemnek um eshesh shape shoreh shanaruwor debeg. <sup>39</sup> Aria anan nanak nawish aria narigeshe nakri, "Ipak pape peyagwreh pariguk um maresh? Okwudok madae kwugok uwe. Okwok douk kweshuhw meyoh!"

<sup>40</sup> Douk anan nakripesh namudok aria eshesh shape shenekan enenyen aria shape shagukoruan.

Aria anan neshopok ihishmorim shakitak shatograkuk aria anan nani ananim birom atun disaipel hani okwokwin yaken amakek atish shawish numun urupat okwok kwakus um. <sup>41</sup> Eshesh shawish aria Jisas nasuhw okwokwin rogur aria nakripok eshesin bareaen nakri, "Talita kum!" Talita kum douk shakri, "Shokukwi armatok, kitak!"

<sup>42</sup> Aria ahudok atuh okwok adur kwakitak kwape kwarahaen. Okwudok nugawik okwokwih kwarahos douk 12-poreish. Aria douk eshesh shatruk namudok aria shakitak yowiyokuk abom! <sup>43</sup> Aria Jisas nakripesh dodogowinyi bareaen um eshesh mare shunak shukrip enesh arpesh um agundok anan nakwuhur kwakitak kwape um. Aria anan nakripesh shukok anagun worigun um kwishoh iri.

## 6

*Arpesh Shape Nasaret Iri Shakon Agabus Jisas  
(Matyu 13:53-58; Luk 4:16-30)*

<sup>1</sup> Aria Jisas wata nakutukuk abrudok wabur nikitak natanam nanak um ananibur wabur. Aria ananim disaipel shopunek hanaman hanak. <sup>2</sup> Aria ahudok nyumnah Sabat eshesh Juda mour uwok shape meyohahi iri, Jisas nanak nawish eshesh Juda shape sheneyagwreh baraen-atari urupat aria nape nenek skulumesh nakripesch yopinyi baraen. Aria sabaishi arpesh shape shemnek ananin baraen iri shemnekan aria shakitak yowiyokuk abom shakri, “Enyudok baraen nanak naraenyi meiguni? Omi nyutauruman aria anan douk nadukem enyudokmori yopinyi baraen? Aria shopunek, omi nyutauruman nyenekan dodogowin aria nape nenek enyudok Iruhin atun neneken iri mour? <sup>3</sup> Anan douk nenek mour um narak urusag iri. Aria anan douk Maria okwokwin nunganin. Aria ananiyu mohwiyariyu wani ananim warhim Jems iri Josis, hani Judas iri Saimon douk eshudok shani apak mape agundok.” Eshesh shakri namudok aria shakonuguk agabus.

<sup>4</sup> Aria Jisas nakripesch nakri, “Anan profet ta nunak ihirubmorim warub aria ta shutuk ananin nyeigur nyuto iruhw. Aria ihishmorim shape ananibur wabur iri, shuni ananishi eshesh atup awirop um shuni eshesh anabur wabur ta uwok.” <sup>5</sup> Douk namudok aria Jisas madae nunek enen Iruhin atun neneken iri mour ananibur wabur uwe, uwok. Aria anan nawemesh wis karowish arugeh henekeshi aria nagabeyesh yopish. <sup>6</sup> Aria shopunek, Jisas natik um agundok eshesh madae shunek bilip um uwe aria anan nikitak yowiyokuk abom.

*Jisas Neshopok Ananim 12-poreim Disaipel Um Hunak Hukripesch Iruhin Ananin Baraen  
(Matyu 10:5-15; Luk 9:1-6)*

Aria Jisas nanak anarub warub douk bape hurukatinyum ananibur wabur iri aria nape nenek skulumesh nakripesch yopinyi baraen. <sup>7</sup> Aria anan nahwar ananim 12-poreim disaipel hanaki heyotu atugun, aria nakom gobi um huhiyahuk yoweishi sagabehos. <sup>8</sup> Aria nakripam nakri, “Aria ta punak ahudok yah um, ipak mare punasuhw anagun worigun nini esharuh. Aria mare punaruk anabor utabor, uwok. Ipak punak meyoh, punasuhw butip atip um punakusim um. <sup>9</sup> Aria ipak punare sandelahos, aria mare punasuhw anah rupah, uwok. <sup>10</sup> Aria ta punak putogur anabur wabur aria abrudok waburish arpesh shukri wosik um shukep anat urupat um pishuh um, ipak punak pupe atudok atut urupat. Ipak pupe arigha meihy nyumnah pakri pukutukuk aburdok wabur punak ahi, aria ipak kadak pukutuburuk punak. <sup>11</sup> Aria ta punak anabur wabur, aria arpesh shape aburdok wabur iri mare shunadudareh-umep, aria mare shumnek ipakin baraen um, ipak pukutukuk abrudok wabur aria pugudupeshuk nyupruk ipakiruh yeriweruh kwukusuk aria punak. Ipak punekesh namudok um eshesh shutrip aria ta shudukemesh shukri eshesh douk shenek yoweishi inahos.”

<sup>12</sup> Aria amam hanak biom biom hanak hakripesch Iruhin ananin yopinyi baraen hakri, “Ipak pukeshuk agabus yoweishi inahos aria putanam pukon aparuh Iruhin.” <sup>13</sup> Amam hakripesch Iruhin ananin baraen aria hahiyahuk sabaishi yoweishi sagabehos shopunek douk shape arpesh iri shatogur sharuwok. Aria howayakumesh yopuri wel sabaishi arugeh hapeyesh iri aria hagabeyesh.

*Herot Nakri Um Jisas Douk Jon Nenek Baptaisumesh Iri  
(Matyu 14:1-12; Luk 3:19-20, 9:7-9)*

**14** Aria abudok nyutob, King Herot douk nepe debeini um gavman iri nemnek bareaen um enenyenen douk nyape nyatograri. Um maresh? Jisas ananin nyeigur douk nyaraahaen sabairubi warub. Aria enesh shakri, “Jon douk nenek baptaisumesh iri wata nikitaki nepe. Aria anan douk ddogowin aria nepe nenek enyudokmori mour.”

**15** Aria enesh shakri, “Anan douk profet Ilaija.”

Aria enesh shakri, “Anan douk anan profet kabi douk seiwokimi profet um.” **16** Douk namudok aria anudok debeini um gavman iri Herot nemnek bareaen um enyudok mour Jisas ananim disaipel heneken iri aria nakri, “Jon douk nenek baptaisumesh iri douk seiwok yatupok ananin aruhwigur! Aria douk anan wata nikitak nepe nenek enyudok mour!”

**17-18** Herot nakri namudok um maresh, seiwok anan nanatrun armatok ananin wanin Filip aria Jon nepe nakrip Herot sabaih atih nakri, “Nyak nyabrig Iruhin ananin lo um nyanatrun armatok Herodias nyakin wanin!” Jon nepe nakripan namudok aria Herot neshopok ananim soldia hasuwan haran hanak howeshikan. **19** Aria Herodias okwokwihi apahw juwehosihw abom um kwakri kwubo Jon nugok aria okwok kwabirak kwaitik uwok. **20** Um maresh, Herot nanogugur um Jon aria nepe natauruman. Anan nadukemesh um Jon douk yopuyopuni aria ananah apahw douk yopuhw aria hwanawasham Iruhin. Aria shopunek Herot nakri wosik um numnek Jon ananin bareaen aria anan urkum morum sabaishi eshudok eneshenesh aria anan nenek wari abom.

**21** Douk arigaha aria Herodias kwaparug anah yah um kwubo Jon nugok um. Aria douk Jon wata nonoweshik nepe, aria ahudok nyumnah douk amakek kwabuki Herot ahi iri hatogur. Aria Herot nenek debeiguni worigun um urkum murum ahudok nyumnah amakek kwanabuki um. Anan nenek worigun aria nahwar debeimy douk haturuman henek gavmanin mour iri, hani amam debeimy um ami iri, hani ihim-morim debeimy um shokugi nahobig Galili iri um hunak huni anan huwok worigun. **22** Douk amam hape hawok worigun aria Herodias nugawik kwanaki kwawish kwenek danis. Aria Herot nani amudok douk nahwaram hanaki hani anan hawok worigun iri hatruk aria hanadudareh um okwok abom.

Aria Herot narigok nakri, “Nyak nyakri eik iken maresh? Eshudok nyak nyukriyesh iri, eik ta ikenyesh.” **23** Aria Herot nakri um iruhw nakripok nakri, “Eik yakripen adurin atin bareaen um eik ta iken ihishmorim eshudok nyak nyorigeimesh iri. Aria nyukri isiyamohw eikib amnab buni ihishmorim eikib jah huni utabor, aria iken enesh nyak, aria ohwak unasuwesh shopunek atin um, eik ta ikenyesh!”

**24** Douk anan nakripok namudok aria okwok kwanak kwarig okwokwik amakek kwakri, “Eik ta ikripan um nuke maresh?”

Aria amakek kwakripok kwakri, “Nyukripan nuken Jon douk nenek baptaisumesh iri um ananig barag.”

**25** Aria okwok kwanak arigas kwahur kwanak kwawish aria kwakrip Herot kwakri, “Eik yakri douk atin, nyureme Jon douk nenek baptaisumesh iri ananig barag onohw yaurehw aria nyukeyog!”

**26** Douk okwok kwakripan namudok aria anan nenek wari um Jon. Aria anan ta mare wata nukri uwok. Um maresh? Iganigadae anan nakripok um anan ta nukok ihishmorim eshudok eneshenesh okwok ta kworiganumesh iri. Aria shopunek, amudok douk nahwaram hanaki hani anan hawok worigun iri douk hemnek. **27** Douk namudok aria arigas anan neshopok

anan soldia aria nakripan nakri, "Nyak nyunak shunuweshik-atि urupat nyutupok Jon ananin aruhwigur aria nyiraouri ananig barag."

Aria anudok soldia nemnek namudok aria nanak natupok Jon ananin aruhwigur. <sup>28</sup> Anan natupenyuk aria nereiри barag onohw yaurehw aria nanaki nako Herodias okwokwik nugawik aria okwok wata kwanak kwako amakek. <sup>29</sup> Aria Jon ananim disaipel hemnek namudok aria hanaki hohur tukwanin atun hanak haruman.

*Jisas Nekesh Worigun Sabaishi Arpesh Abom Armam Atum Douk 5,000-poreim*

(Matyu 14:13-21; Luk 9:10-17; Jon 6:1-13)

<sup>30</sup> Douk amam aposel wata hatanamori hani Jisas hape aria hakripan um enyudok mour amam heneken iri nyani bareaen amam hakripesh-enyi. <sup>31</sup> Aria agundok sabaishi arpesh sharahaen shenek yawi kare aria Jisas nani ananim madae anob nyutob hupe um hurao uhwin aria huwok worigun um uwe. Douk namudok aria Jisas nakripan nakri, "Yaipo! Kitak apak atup munak anagun wehigunum arpesh uwok um aria munak mupe murao uhwin."

<sup>32</sup> Aria amam hakitak hato bot aria amam atum hanak anagun wehigun um arpesh uwok um. <sup>33</sup> Aria sabaishi arpesh shatrum hanakum aria eshesh shadukemam. Douk namudok aria arpesh shape ihirub warub iri shakitak shakutukuk esheshirub warub aria shahur sharik shanak shatogur sheyotu agundok douk ta Jisas nini ananim hunak hubuh um. Aria amam douk hagiguk hanak hatogur. <sup>34</sup> Douk hanak hatogur anagas aria amam hetem bot iri hanatu habuh atap, aria hatik eshudok sabaishi armam armago aria Jisas nenek gihau mesh abom. Um maresh, arman madae anan uwe um nutaurumesh nukripesh bareaen iri. Eshesh shape kabi douk sipsip arman madae anan uwe um niyohesh iri uwe. Douk namudok aria anan nape nenek skulumesh abom nakripesh sabainyi Iruhin ananin bareaen. <sup>35</sup> Douk nenek skulumesh arigaha wabigep aun nabuh, aria ananim disaipel hanaki hakripan hakri, "Nya, aun nabuh aria shopunek, agundok apak douk mapeik wehigunum arpesh wakagun um. <sup>36</sup> Douk namudok aria nyak nyishopokesh shunak anarub warub bape hurukatin iri um shunak shunator anagun worigun."

<sup>37</sup> Aria Jisas nakripan nakri, "Ipak kanak pukesh anagun worigun."

Aria amam wata harigan hakri, "Nyak nyakri apak munak mutor bret douk ta wosik mutorut um 200 kina iri aria munaki mubiromesh aka?"

<sup>38</sup> Aria anan narigam nakri, "Ipak pudareh bret ipak pasuhwot iri. Ipak pasuhwi makwunit? Kare putik"

Aria amam hadarehat jurug aria hanaki hakripan hakri, "Apak masuhwi 5-poreit bret tani bias arbus meyoh."

<sup>39</sup> Aria Jisas nakrip ananim disaipel um hukrip ihishmorim armam armago shunosisum um karowish atish aria shunak shupe yopuruhi utoruh hatogram. <sup>40</sup> Aria amam hakripesh shanasiam um. Aria 50-poreish shanak shape sik, aria 100-poreish shape sik, aria eshesh shape namudok atin shanak. <sup>41</sup> Eshesh shape aria Jisas nohur atudok 5-poreit bret tani asudok biyos arbus nasuwesh nanig natik iruhw heven aria nenek beten nenek tenkyu um Iruhin. Anan nenek tenkyuman jurug, aria nawor atudok bret tani arbus nako ananim disaipel aria hape hasiyaesh hanak. <sup>42</sup> Aria amam hasiyaesh aria ihishmorim shashoh aria dugaresh. <sup>43</sup> Aria atudok bret tani eiguuh douk shashoh dugaresh shakusuk iri, amam disaipel hatrishesh heshuruk 12-poreruh sararuh shishukniruh aria heshubuk shakus. <sup>44</sup> Aria

eshudok arpesan douk shawok agundok worigun iri, armam atum douk sabaimi um 5,000-poreim.

*Jisas Narahaen Netem Nanak Iruhw Um Waiyag Galili  
(Matyu 14:22-23; Jon 6:16-21)*

<sup>45</sup> Douk enyudok nyanakuk, aria Jisas neshopok ananim disaipel hanak arigas hato bot aria harik hanakum wabur Betsaida douk bape gani wobrehahig um waiyag iri. Aria anan napeik um arigaha neshopok eshudok armam armago shanakuk aria anan douk nagimam nanak. <sup>46</sup> Anan neshopokesh shanak shatuh, aria anan nato onohw yoduhw um nukih nunek beten.

<sup>47</sup> Aria wab amam disaipel hetem bot hanak hatogur orokohunig um waiyag. Aria abudok nyutob Jisas atun wata nape neneb beten atin gani iruhw yoduhw. <sup>48-49</sup> Anan nape neneb beten, aria natigu ananim disaipel hetem bot. Aria debeiniyi uhwin nyahuri nyawanam tarigum bot aria amam hape henek debeiniyi mour, henek mour debeg abom. Aria douk natrum aria hurukatinym gugruk, anan nakitak nagimam nanak. Anan nabrig agudok waiyag narahaen nanaki iruhw igum. Anan nanak aria nakri nishagrakuk amam nunak, aria amam hatrun um narahaen nanaki iruhw um. Aria amam hakri anan da sagaben. Douk namudok aria amam hanogugur abom, aria hahwar henyugwreh debeg atin. <sup>50</sup> Um maresh? Amam hatrun aria hanogugur abom.

Aria Jisas arigas nakripam nakri, "Ipak mare punogugur, uwok! Ipak ta dodogowip. Enyudok douk eik." <sup>51</sup> Aria debeiniyi uhwin wata nyahur atin. Aria anan nanak natoum nakih nanamam hape bot aria enyudok uhwin nyahur iri nyagok nyabuhuk. Aria ananim disaipel hakitak yowiyokuk. <sup>52</sup> Um maresh? Ruwahepih anan nawor 5-poreit bret tani biyos arbus nako sabaishi arpesan aria amam madae hudukemesh hukri anan douk dodogowini uwe! Amam urkwip pokomuk abom.

*Jisas Nagabe Sabaishi Arugeh Hapeyeshi Shape Shokugi Nahobig Genesaret Iri  
(Matyu 14:34-36)*

<sup>53</sup> Aria habrig waiyag hanak arigaha hanak hatogur anagas gani wobrehahig um waiyag, um agudok shokugi nahobig Genesaret, aria amam habub hanuk bot hanak haweshikot. <sup>54</sup> Douk amam howeshiguk bot hanak aria arpesan iganigadæ shatik Jisas shadukeman. <sup>55</sup> Douk namudok aria eshesh shahur shanak ihirub warub bape shokugi nahobig Genesaret iri. Eshesh shanak aria shakripesh sharauri arugeh hapeyeshi shetem betog aria sharaesh shanaki um Jisas um agundok eshesh shemnek um anan nanak napeum. <sup>56</sup> Aria ihirub debeirubi bani shokurubi warub douk Jisas nanak um, arpesan sharao esheshish arugeh hapeyeshi shanak sheshubuk agundok douk eshesh apa shapeum. Aria eshesh sharig Jisas dodogowish atish um arugeh hapeyeshi shususuhw anagasih um ananih rupah. Aria ihishmorim douk shasusuhw anagasih um ananih rupah iri, wata yopish.

*Babenomi Amamin Baraen  
(Matyu 15:1-9)*

<sup>1</sup> Anah nyumnah amam Farisi hani anam henek skulumesh um lo iri, douk hape iri Jerusalem iri hanaki aria hanak hape agundok Jisas napeum.

<sup>2</sup> Amam hape aria hatik um Jisas ananim disaipel madae hukwurupuguk wis kabi douk amam Farisi hakri um ba iyoh, aria kadak hunosuhw

worigun hugnoph uwe. Douk namudok aria amam Farisi douk hakri Jisas ananim disaipel amamis wis goutukis atus iri.\* <sup>3</sup> Amam Farisi hani ihishmorim Juda esheshin lo douk shagipesh seiwok esheshim babenomi henekenyuguk iri. Aria enen esheshin lo douk namudok. Eshesh madae shukwurupuguk wis ba iyoh um, eshesh ta mare shuwok anagun worigun uwe, uwok. <sup>4</sup> Aria worigun shatorugun maket iri shopunek, douk shanaki shakwurupeshuk ba iyoh aria kadak shugnoph. Eshesh mare shukwurupesh um, eshesh ta mare shishoh. Aria eshesh shagipesh sabainyi lo shopunek douk seiwok esheshim babenomi heneken henyemaguk iri. Aria enen douk enyudok um shukwurup kas suni marus iri yaureruh hani betog um. <sup>5</sup> Douk namudok aria amam Farisi hani amam henek skulumesh um lo iri harig Jisas hakri, “Um maresh? Aria nyakim disaipel douk madae hugipesh enyudok apakim babenomi amamin lo um hukwurupuguk wis ba iyoh aria kadak huwok worigun um uwe?”

<sup>6</sup> Aria Jisas nakripam nakri, “Ipak penek rohw iri. Seiwo profet Aisaia douk neyawrehre Iruhin ananin ‘baraen aria nenyemaguk adurin bareaen nyetemaguk Iruhin ananik Buk nakri um ipak! Ipak douk penek rohw kabi douk bareaen nyetem Iruhin ananik buk iri nyakrium ipak um! Iruhin nakri, ‘Eshudok arpesh esheshig nukwatog otug shatuk eikin nyeigur nyato iruhw. Aria esheship urkwip douk madae purum eik uwe. <sup>7</sup> Eshesh apa shakrip kupaishi arpesh meyoh sheneken iri lo, aria shenek rohwumesh shakri eshesh shakripes eikin. Douk namudok aria eshesh shenek lotume meyoh.’”

<sup>8</sup> Aria Jisas wata nakripam nakri, “Ipak douk pakutukuk Iruhin ananin yopunyi lo aria pasuhw ipakish popehesh yamehesh sheneken iri lo pagipeshen. <sup>9</sup> Aria ipak douk penek yoweishi inahos abom. Um maresh? Ipak pagipesh ipakih aih abom pekenyuk agabus Iruhin ananin yopunyi lo aria paen nyabuhuk. Aria ipak pasuhwen dodog ipakim babukenyim amamin lo pagipeshen. <sup>10</sup> Um maresh? Seiwo Moses nakripep enyudok Iruhin ananin bareaen lo um ipak pumnek ipakish amakeniyish esheshin bareaen aria putaurumesh. Aria ta enen arpen nyukri nyuho enyenyish amakeniyish nyukripes enen yoweiniy bareaen um, enyudok arpen kupaishi arpesh ta shusuhwen shunak shen nyugok. <sup>11</sup> Aria ipak Farisi pani ipak penek skulumesh um lo iri pakripes enen sakin bareaen. Ipak pakri, ta enen arpen nyunobuk enesh eshudok eneshenesh, o anabor utabor douk ta nyuko enyenin yaken o amakek um nyutaurumesh um, aria enyen nyukripes nyukri, ‘Elikbor utabor aria eshudok eneshenesh douk mare ta iko ipak um itaurumep um aria douk yagraehesh um iko Iruhin. Eik yakri eshudok korban.’ Baugenym um enyudok bareaen korban douk shakri, ‘Eshudok douk shagraehesh um shuko Iruhin iri.’ <sup>12</sup> Douk namudok aria enyen madae nyutaurumesh nyukesh eshudok enyenyish amakeniyish uwe. Aria ipak pakri, ‘Enyudok arpen nyunekesh namudok um, enyen wosik douk nyenek yopuhi aih.’ <sup>13</sup> Douk namudok aria ipak pasuhw ipakim babukenyim amamin lo dodog pagipeshen. Aria Iruhin ananin lo douk nyukri apak mumnek apakish amakeniyish esheshin bareaen mutaurumesh um, ipak paen nyabuhuk. Aria shopunek, ipak penek sabainyi shopunek kabi enyudok douk eik yakripepen iri um.”

*Eshudok Douk Shape Numun Aparuh Shatograri Iri Shenek Arpesh  
Shabosusih  
(Matyu 15:10-20)*

\* <sup>7:2:</sup> Putik futnot nyape Matyu 15:26 iri.

<sup>14</sup> Aria Jisas wata shopunek nahwar eshudok sabaishi armam armago shopunek shanaki anan napeum aria nakripesh nakri, “Ipak ihishmorim ta pumnek eikin baraen aria pudukemen wosik abom. <sup>15</sup> Shape aduk iri eshudok shuni worigun douk arpen nyishoh shuwish numun enyenyihw apahw iri ta mare shuneken nyubosusih uwe, uwok. Eshudok douk shape numun enyudok arpen enyenyihw apahw aria shutograri aduk iri, douk ta eshudok shuneken nyubosusih. <sup>16</sup> [Aria douk ipak arigos sapenyepi ta pumnek enyudok baraen aria pusuwen dodog pugipeshen.]” <sup>17</sup> Anan nakripeshuk namudok aria nakutishukuk nanak nawish nani ananim disaipel hape urupat. Aria amam hariganum enyudok wobuwobren baraen iganigadae anan nakripesh-enyi. <sup>18</sup> Aria anan nakripam nakri, “Ipak shopunek douk madae pudukemesh uwe? Worigun nani ihishmorim eshudok shape aduk, aria arpesh shashoh shabuh esheshiruh aparuh iri ta mare shubuh shunekesh shubosusih uwe, uwok. <sup>19</sup> Um maresh? Worigun eshudok douk shashoh aria madae shunak shubuh shur esheship urkwip uwe. Eshesh douk shabuh shor aparuh aria wata shanak sharkegeshuk.” Jisas douk nakri namudok um nakri ihishmorim mahish aria worigun douk yopishi atish iri.

<sup>20</sup> Aria Jisas wata shopunek nakripam nakri, “Eneshenesh yoweishi inahos esheship urkwip porumesh aria eshesh mishish shakitakumesh shenekesh iri atish ta shunekesh shubosusih. <sup>21-22</sup> Um maresh? Eshudok douk gani numun esheship urkwip parik porum eshudok eneshenesh yoweishi inahos aria eshesh douk shenekesh. Eshesh shakwuaruh, urkwip porum yoweishi inahos, shabo arpesh shagok, shenek wehrur aria dodogeshish madae shukesh atin uwe arpesh. Aria shenek rohw um kupaishi, aria shopunek madae shusuhw merikwum eshesh kanak uwe. Aria eshesh shabrig enyudok lo um shanaraum um aria shenek nyigiyu um kupaishi esheship eshudok eneshenesh. Aria shaho kupaishi shakri eshesh atish debeishi, aria shenek rohw um kupaishi shakri eshesh shenek yoweishi inahos. Aria eshesh shakri shutuk esheship atish nyeiguw shuto iruhw aria shenek eneshenesh yoweishi inahos. <sup>23</sup> Ihishmorim eshudok eneshenesh yoweishi inahos douk esheship urkwip porumesh aria shenekesh iri douk shenekesh shabosusih.”

*Onok Armatok Kwanaki Wabur Fonisia Douk Bape Debeigi Nahobig Siria  
Iri Kwenek Bilip Um Jisas  
(Matyu 15:21-28)*

<sup>24</sup> Aria Jisas nakutukuk abrudok wabur nakitak nanak um kupaigunum um, arbudok biarub warub Taia iri Saidon bape um. Anan nanak natogur aria nanak nawish nape anat urupat. Aria anan nakri uwok um enesh arpesh shudukemesh um anan nanak nape agundok um. Aria anan nabirak um nakri nunabeshuk nupe agundok aria uwok. <sup>25</sup> Aria onok armatok douk okwokwik shokukwi nugawik enen yoweinyi sagab nyapenyok iri kwomnek um Jisas nanak napeum, aria okwok kwanak kwatrunk. Okwok kwanak aria kwabuh kwoduk ohrubus kwakus hurukatin um Jisas ananiruh yeriweruh. <sup>26</sup> Okwudok armatok okwok douk kupaiburi waburik, okwok madae Juda uwe. Okwok kwanaki abrudok wabur Fonisia, douk bape shokugi nahobig Siria iri. Aria okwok douk kweyagwreh Grinkin bareaen. Douk okwok kwanak aria kwakrip Jisas abom um nihiyahuk enyudok yoweinyi sagab douk nyape okwokwik nugawik iri nyutogur nyuruwok.

<sup>27</sup> Aria Jisas nakripok enyudok wobuwobren bareaen nakri, “Eik ikesh worigun batowish iyoh. Um maresh, enyen douk madae wosik um apak

muhur batowish-igun worigun muwashagun um nubag gwugnoh uwe, uwok."

<sup>28</sup> Aria okwok kwakripan kwakri, "Debeini! Nyak nyakriyen iri baraen douk adurin abom. Aria nubag douk gwawish gweyatu shakamenyum tebol aria gwape gwawok tutukwanigun worigun douk batowish shashoh shenekesh shanatukuk iri."

<sup>29</sup> Aria Jisas nakripok nakri, "Nyak nyabeime adurin eikin baraen. Douk namudok aria nyak wata nyutanam nyunak. Yoweinyi sagab douk iganigadea nyakutukuk nyakik nugawik nyatogur nyaruwok."

<sup>30</sup> Aria okwok wata kwatanam kwanak um urupat aria kwaitik um sagab nyakutukuk okwokwik nugawik nyatogur nyaruwok aria okwok kweshuhw wosik okwokwis aras.

### *Jisas Nagabe Anan Arigos Seshukani Aria Madae Niyagwreh Atin Iri Uwe*

<sup>31</sup> Aria Jisas nakutukuk abrudok wabur douk bape hurukatin um Tair um iri, aria nanak neshagrakuk Saidon aria nawish nanak agudok shokugi nahobig 10-poreirub warub bape um. Aria nanak nabuhuk debeigi waiyag Galili. <sup>32</sup> Douk anan nanak natogur aria enesh arpesh sharauri anan arigos seshukani, aria shopunek madae niyagwreh atin iri uwe shanaki um Jisas. Aria eshesh sharigan abom um nuweman wis aria nugabeyan.

<sup>33</sup> Aria douk Jisas nemnekesh namudok aria naruman hakutukuk es-hudok sabaihi armam armago shapeik aria amam atum hanak heyotuk sik. Aria menyigur ananah heh hawish wobuwobur um arigos. Aria nokuseh arpiges sape ananah hah aria nagasayak anudok arman ananim yaham. <sup>34</sup> Aria douk Jisas nenekekesh namudok jurug, aria anan nanig natik iruhw heven aria hwosaran. Aria nakripaen eshesh Juda esheshin baraen nakri, "Efata." Baugennum um enyudok baraen Efata douk shakri, "Nyak arigos togaragos nyumnek wosik aria wata nyiyagwreh." <sup>35</sup> Aria ahudok atuh ananigos arigos tagaragos sonukuk aria anan nemnek baraen wosik abom. Aria ananim yaham mumukem abom um ta manupok aria nape neyagwreh.

<sup>36</sup> Aria Jisas nakripesha nakri, "Ipak punak aria mare pukrip enesh arpesh um agundok yagabe anudok arman um." Aria douk anan nakripesha namudok aria eshesh shanak shape shakripesha shanak um agundok Jisas nagabe anudok arigos seshukanari abom um. <sup>37</sup> Eshesh shakripesha shanak, aria eshudok douk shemnek um enyudok iri shakitak yowiyokuk abom aria shakri, "Anan wosik nenekek ihinyumorim yopinyi mour abom. Anan nagabe arigos seshukeshi shemnek, aria shopunek nagabe madae shiyagwreh atin iri uwe aria eshesh wata sheneyagwreh."

## 8

### *Jisas Nekesh Worigun 4,000-poreish Armam Armago (Matyu 15:32-39)*

<sup>1-2</sup> Anah nyumnah, kupaishi sabaihi armam armago shantorum shanak shape Jisas napeum. Eshesh shape arigha 3-poreih nyumneh aria worigun natuh. Aria Jisas nahwar ananim disaipel hanaki aria nakripam nakri, "Eik yakri gihauum eshudok arpesh. Um maresh? Eshesh shanaki shani apak mape 3-poreih nyumneh agundok aria eshesh worigun wokesha aria nyurub baesh. <sup>3</sup> Aria eik mare ikesh anagun worigun shishoh ba iyoh, aria kadak shatanam shunak um esheshirub warub um, eshesh ta shunak yah aria marubigos sesh aria shutu shubuh. Um maresh? Enesh douk shanaki rougunum."

<sup>4</sup> Aria ananim disaipel harigan hakri, “Agundok mapeik wehigunum arpesh uwok um. Douk namudok aria apak ta munuk muparug anagun worigun agunum aria douk ta mubirom eshudok ihishmorim sabaiishi arpesh?” <sup>5</sup> Aria anan narigam nakri, “Aria ipak pasuhwi makwunit bret?”

Aria amam hakripan hakri, “Apak masuhwi 7-poreit atin.”

<sup>6</sup> Aria Jisas nakrip eshudok sabaiishi arpesh shabuh shape atap. Aria anan nohuri atudok 7-poreit bret nasuhwot aria neneke beten neneke tenkyu um Iruhin aria nawarut nako ananim disaipel um hisiyat hubiromesh. Aria amam hatrunat, aria hape habiromesh hanak. <sup>7</sup> Aria amam hasuhwi anas karowis shokusi arbus shopunek. Aria Jisas nasuwos neneke beten neneke tenkyu um Iruhin aria neshopok ananim um hunak husiyasumesh shopunek. <sup>8-9</sup> Aria eshesh shashoh dugaresh aria shakusuk iri, ananim disaipel hatrishesh aria heshurukwi 7-poreiruh sararuh shishukniruh. Aria armam armago shawok eshudok worigun iri douk sabaiishi abom um 4,000-poreish. Aria eshesh dugaresh aria Jisas neshopokesh shanak um esheshirub warub. <sup>10</sup> Aria douk anan neshopokesh shanakuk atin, aria ahudok atuh anan nani ananim disaipel hato bot aria hanakum anarub warub douk bape shokugi nahobig Dalmanuta iri.

*Amam Farisi Harig Jisas Um Nunek Enen Iruhin Atun Neneken Iri Mour  
(Matyu 16:1-4)*

<sup>11</sup> Aria douk anam Farisi hanak Jisas napeum aria hani anan hape hanatutukem. Amam hakri hukwiraehan, douk namudok aria amam hariganum nunek enen Iruhin atun neneken iri mour um hudukemesh um anan douk adur Iruhin neshopokan nanaki iri. <sup>12</sup> Aria Jisas hwosaranaguk abom\* aria nakri, “Ipak doukipari pakri eik inek enen Iruhin atun neneken iri mour aria ipak putrin um maresh? Adur atin eik yakriep, eik ta mare inek enen enyudokmori mour ipak putrin uwe, uwok.”

<sup>13</sup> Anan nakrip amam Farisi namudok aria wata nakutumuk ba hapeik aria nani ananim disaipel hakitak hato bot aria hanak gani wobreahig um debeigi waiyag Galili.

*Jisas Nakripam Wobuwobren Baraen Um Amam Farisi Hani Herot  
Amamis Yis Douk Senek Bret Takitak Debeiti Iri  
(Matyu 16:5-12)*

<sup>14</sup> Amam hanak aria Jisas ananim disaipel urkwip pokomuguk um husuhw anat bret shopunek. Amam douk hasuhw atut bret meyoh tetemumam bot. <sup>15</sup> Aria Jisas nakripam nakri, “Ipak gamo pudukemesh um amam Farisi huni Herot amamis yis.”

<sup>16</sup> Aria douk anan nakripam namudok aria amam kanak hape haneyag-wreh hakri, “Anan nakripap enyudok baraen um yis um maresh, apak douk madae musuhwi anat bret uwe.”

<sup>17</sup> Aria Jisas iganig nadukemesh um amam hape haneyagwreh namudok um. Aria anan nakripam nakri, “Eik yakri uwok um ipak piyawgreh um agundok ipak bret wokep um. Ipak douk padukem baugenylum eikin baraen aka, uwok? <sup>18-19</sup> Ipak douk nabes sapenyep, aria ipak madae putik eshudok uwe? Aria ipak douk argos sapenyep, aria ipak madae gamo pumnek uwe? Ipak douk urkwip wokepuguk um agundok nubokuhi yawor 5-poreit bret yabirom sabaiishi 5,000-poreish arpesh abom um? Eik yabiromesh shashoh dugaresh aria shakusuk iri ipak patrishesh peshurukwi makwuniruh suraruh shishukniruh aria poruhubuk hakus?”

\* **8:12:** Jisas neneke giha abom um agundok amam hakanaguk agabus Iruhin um aria anan nakri nurepam aria douk hwosaranaguk.

Aria amam hakripan hakri, “Apak meshurukwi 12-poreiruh sararu.”

<sup>20</sup> Aria Jisas wata shopunek narigam nakri, “Aria abudok nyutob eik yawor 7-poreit bret yabirom sabaishi 4,000-poreish abom armam armago, eshesh shashoh dugaresh aria shakusuk iri ipak patrishesh peshurukwi makwuniruh sararuh shishukniruh poruhubuk hakus?”

Aria amam hakripan hakri, “Apak meshurukwi 7-poreiruh.”

<sup>21</sup> Aria anan naham aria narigam nakri, “Aria ipak douk madae pudukem enyudok barae uwe um maresh? Eik douk madae ikripep um asudok aduris yis douk senek bret takitak debeiti iri uwe, uwok.”

### *Jisas Nagabe Anan Nabes Seshukan Iri Gani Betsaida*

<sup>22</sup> Aria Jisas nani ananim hanak arigaha hanak hatogur wabur Betsaida. Aria agundok enesh arpesh sharauri anan nabes seshukanari shanakumori Jisas aria shariganum nuweman wis aria nugabeyan. <sup>23</sup> Aria douk eshesh shakripan namudok aria anan narum anudok nabes seshukanari hanakumaguk adukum wabur aria Jisas nakuseh arpiges sape anudok ananis nabes. Douk nakusehas jurug aria nowem wis nabes aria narigan nakri, “Nyak nyatik enesh eshudok aka, uwok?”

<sup>24</sup> Aria anudok nabes seshukanari natrugun aria nakri, “Eik yatik arpesh sharahaen aria eik madae gamo itrish wosik uwe. Eik yatrish ruhur atin kabi douk yatik rowos um.”

<sup>25</sup> Aria Jisas wata shopunek nowem wis ananis nabes aria douk anan natrugun duk abom. Ananis nabes yopus abom aria anan gamo natrugun aria natik ihishmorim eshudok eneshenesh wosik. <sup>26</sup> Aria Jisas neshopokan nanak um ananit urupat aria nakripan nakri, “Nyak kare um nyakit urupat. Nyak mare nyutanam nyunak um wabur uwok.”

### *Pita Nakri Jisas Anan Douk Krais Douk Iruhin Nagraehan Neshopokan Nanakumori Nunaraao Arpesh Iri (Matyu 16:13-20; Luk 9:18-21)*

<sup>27</sup> Aria Jisas nani ananim disaipel hakutukuk Galili aria hikitak hanakum anarub warub douk bape shokugi nahobig Sisaria Filipai iri. Douk amam hanak yah aria Jisas narigam nakri, “Ipak pemnek arpesh shakri eik amiapen?”

<sup>28</sup> Aria amam hakripan hakri, “Enesh shakri nyak douk Jon douk nenek baptaisumesh iri, aria enesh shakri nyak Ilaija, aria enesh shakri nyak anan profet.”

<sup>29</sup> Aria anan narigam nakri, “Douk eshesh shakri namudok aria ipak kanak pakri eik amiapen?”

Aria Pita nakripan nakri, “Nyak Krais douk Iruhin nagraehan neshopoken nyanamori nyunaraao arpesh iri.”

<sup>30</sup> Aria Jisas nakripam dodogowinyi barae nakri, “Douk ipak padukemesh aria ipak mare punak pukrip enesh arpesh um eik douk Krais douk Iruhin nagraehe aria neshopoke yanaki iri um.”

### *Jisas Nakripesh Um Agundok Ta Ananish Horim Shon Nugok Aria Ta Wata Nukitak Nupe Um (Matyu 16:21-28; Luk 9:22-27)*

<sup>31</sup> Aria Jisas apa nakrip ananim disaipel nakri, “Eik Anudok Arman douk yatogur adurinyi arpen iri ta imnek debeiri eriger. Aria eshesh Juda esheshim debeimi huni debeimi pris huni amam henek skulumesh um lo iri, ta huke agabus aria hunike enenyenen. Aria ta she igok shurume wonugwehw biyeh nyumneh, aria hukri um biyeh atih nyumneh um, eik ta wata ikitak ipe.”

<sup>32</sup> Enyudok baraeen anan douk madae nukripam wobuwobren uwe, uwok. Anan nawerehen abom nakripam. Douk namudok aria Pita naran hanak heyotuguk anagas aria nepe nahan nakri, “Nyak mare nyukri enyudok baraeen.”

<sup>33</sup> Aria Jisas natanam natik ananim disaipel aria naho Pita nakri, “Satan, kareik. Nyak douk madae nyugipesh Iruhin ananim urkum uwe. Nyak nyagipesh arpeship urkwip meyoh!”

<sup>34</sup> Aria Jisas nahwar eshudok sabaishi arpesh shani ananim disaipel shanak agundok anan nepeum aria nakripesh nakri, “Arpen douk nyukri nyugipesh eik iri, sagomatin enyen ta nyukri uwok abom um enyen mare nyugipesh enyenyim urkum. Aria enyen mare nyunogugur um shen nyugok um aria nyusah enyenyin rowog kruse um, aria enyen wosik ta nyugipeshe. <sup>35</sup> Aria ta enen arpen enyenyim urkum murum nyukri enyen mare nyugok aria nyupe namudok atin iri, enyen ta nyugok. Aria enyudok arpen douk nyunek eikin mour aria nyusuhw Iruhin ananin yopinyi baraeen dodog iri kupaishi ta shen nyugok. Aria enyen ta wata nyupe wosik iih nyumneh. <sup>36</sup> Aria eshudok arpesh douk shunogrem sabaishi eneshenesh eshudok, aria eshesh shukri eshesh douk shape wosik aria ta mare shugok iri, eshesh ta shugok abom. <sup>37</sup> Ta mare enen arpen nyukwu enyenyish eshudok eneshenesh um nyutor agundok um nyupe wosik iih nyumneh um, uwok. <sup>38</sup> Aria shopunek douk, sabaishi arpesh shape agundok atap iri shape shenek eneshenesh yoweishi inahos. Eshesh shakenyuk agabus Iruhin ananin baraeen shakri enyen madae adurin uwe. Aria ahudok nyumann Eik Anudok Arman douk yatogur adurini arpen iri itanamori iniri Iruhin ananish yopiyopishi enselahos inakmori, Iruhin ta nutaurume itogur dodogoive atuwe abom itrugun abom aria inaki. Aria abudok nyutob eik inaki obi nyutob, eshudok arpesh douk shenenek abraen um eik, aria shakenyuk agabus eikin baraeen iri, eik shopunek ta inekumesh abraen aria ikeshuk agab namudok atin.”

## 9

<sup>1</sup> Aria anan wata shopunek nakripesh nakri, “Adur atin eik yakripep! Enep douk peyotu agundok iri ta mare arigas pugok, uwok. Ipak ta wata pupe aria putik agundok Iruhin dodogowin atun nupe Debeini um ananish arpesh shapeum.”

### *Jisas Ananihw Yegenyihw Hwatogur Anahaeh Aria Natrugun Abom (Matu 17:1-13; Luk 9:28-36)*

<sup>2</sup> Douk 6-poreih nyumneh hanak hadiguk, aria Jisas narao Pita nani Jems aria Jon atum hanaman hato hakih hape onohw rouhw yoduhw. Amam hakih hape aria amam hatik um Jisas neneh senis natrugun nepe anahaeh. <sup>3</sup> Aria ananih rupeh shopunek hatrugun hatogur shigorihwi abom. Arpesh shape agundok atap iri douk madae enesh shukrups eshesih rupeh hutrugun abom hutogur shigorihwi namudok uwe. <sup>4</sup> Aria agundok Pita nani Jems aria Jon hatik Ilaija aria Moses hatogur hani Jisas heyotu hape heyagwreh.

<sup>5</sup> Aria Pita nakrip Jisas nakri, “Tisa, enyen douk wosik um apak mape agundok um. Aria apak muwem 3-poreiyu shomeguhwiyu. Nyak onok aria bio um Moses nini Ilaija.” <sup>6</sup> Pita douk nakripan namudok Jisas um maresh, amam hanogugur abom aria Pita madae nudukemesh um maren baraeen anan ta nukriyen iri uwe.

<sup>7</sup> Aria douk Pita nepe nakripan namudok aria onog orug gwanaki iruhw aria goma nyeshigorum aria amam hemnek anah mah hanaki agwudok

orug. Aria enyudok arpen nyeyagwrehi iri nyakri, “Anudok douk eikin nunganin douk eik urkum manawashaman iri abom. Ipak pumnek ananin baraeen!”

<sup>8</sup> Aria douk amam hemnek namudok aria ahudok atuh amam hatanam hatrugun aria madae hutik enesh arpesh shopunek shuni amam shiyotuguk uwe. Amam hatik Jisas atun nani amam neyotuguk.

<sup>9</sup> Aria douk amam wata hakutukuk yoduhw hape habuhi aria Jisas nakripam nakri, “Ipak punak aria mare pukrip enesh arpesh um enyudok iganigadet patrin iri, uwok. Ipak pupe arigaha shubo Eik Anudok Arman douk yatogur adurinyi arpen iri igok aria wata ikitak ipe aria ipak douk ko pukripesh-umen.” <sup>10</sup> Aria douk anan nakripam namudok aria amam hemnek ananin baraeen hagipeshen. Aria amam kanak hape heneyagwreh hanakripam hakri, “Douk baugenjum bareaen um anan nakri, ‘Eik Anudok Arman douk yatogur adurinyi arpen iri wata ikitaki wonugwehw’, anan douk nakri um maresh?”

<sup>11</sup> Aria amam harigan hakri, “Amudok douk henek skulumesh um lo iri douk hakripesh hakri ta Ilaija nurik nunaki aria Krais, douk Iruhin nagraehan neshopokan nanaki iri ta nugiki um maresh?”

<sup>12</sup> Aria Jisas nakripam nakri, “O enyen adur! Ilaija douk narik nanaki um nугабе eneshenesh eshudok. Aria ipak urkwip purum enyudok bareaen douk nyetem Iruhin ananik Buk iri. Bareaen douk nyakri, ‘Eik Anudok Arman douk yatogur adurinyi arpen iri ta imnek debeiri eriger aria arpesh ta shukri uwok aria shuke agabus.’ Aria enyen douk nyetem namudok um maresh? <sup>13</sup> Aria adur atin eik yakripep! Kupaini Ilaija\* douk nanaki aria arpesh shagipesh esheship urkwip aria shenek eneshenesh yoweishi inahos um anan. Eshesh shenekesh-uman kabi douk bareaen nyetem Iruhin ananik Buk iri nyakrium.”

#### *Jisas Nagabe Anan Shokuni Yoweinyi Sagab Nyapeyan Iri (Matyu 17:14-21; Luk 9:37-43)*

<sup>14</sup> Aria Jisas nani ananim 3-poreim disaipel hatanam habuhi hanak haparug amudok anam disaipel agundok douk amam hapeum. Aria amam hatik um sabaishi arpesh shanak sheyotu shersharih amudok anam disaipel. Aria agundok, anam henek skulumesh um lo iri hani amam Jisas ananim disaipel hape hanatutukem. <sup>15</sup> Aria douk ihishmorin shatigu Jisas aria eshesh shakitak yowiyokuk. Aria eshesh shahur shanak shatogurum anan napeum aria shanadudareh-uman shakri, “O yopuhi nyumnah nyak!” <sup>16</sup> Aria Jisas narig ananim disaipel nakri, “Ipak pani amam panatutukem um maresh?”

<sup>17</sup> Aria anan arman douk nani eshudok sabaishi sheyotu iri nakrip Jisas nakri, “Debeini Tisa, eik yarauri eikin nunganin um nyak. Um maresh? Ènen yoweinyi sagab nyapeyan nyanaur um aria madae niyagwreh atin uwe.

<sup>18</sup> Aria sabaihi nyumneh yoweinyi sagab nyanaur nyatukan nabuhu nakus atap aria arpigas satograri ananit nokwat. Aria shopunek, anan nanatukwesh naruh neneh kruiti krutek aria ananish roguhw aiyas shanadudareh aria dudugeshish abom. Aria eik yarig nyakim disaipel um huhiyahuk enyudok sagab nyutogur nyuruwok aria amam habirak hatik uwok.”

<sup>19</sup> Aria Jisas nemnek namudok aria nakrip eshudok armam armago nakri, “Ipak doukipari, eik yani ipak mape roubum nyutob ipakibur wabur aria ipak madae punek bilip uwe. Aria ipak pakri eik ta wata ipeum itaurumep namudok atin um isah ipakin enenyenem amaen um, aka? Nyarauri

\* <sup>9:13:</sup> Anudok kupaini Ilaija, Jisas douk nakri um Jon douk neneh baptaisumesh iri. Putik Matyu 17:11-13

anudok shokuni!” <sup>20</sup> Aria eshesh sharanari shanak um Jisas. Douk anan nanak aria enyudok sagab nyatigu Jisas aria nyanaur nyatukan nabuh nakus atap aria ohwas sanakan nokwat.

<sup>21</sup> Aria Jisas narig anudok sagab nyanaur iri ananin yaken nakri, “Sagab nyanaur nape makwunih nyumneh?”

Aria anan nakripan nakri, “Seiwok anan wata shokuni um, sagab nyape namudok arigaha douk. <sup>22</sup> Aria shopunek, sabaihi nyumneh enyudok sagab nyakri nyon nugok. Enyen nyanaur nyatukan nabuh argab um nyih hunun nugok. Aria anabik um, nyanaur nyatukan nabuh worub um nubuh sukutan aria nuraguk worub. Aria ta nyak dodogowinyum nyugabeyan, nyak nyukri giha aria nyutaurumohwl!”

<sup>23</sup> Aria Jisas nakripan nakri, “Adur, ta nyak nyukri um! Um maresh? Eshudok arpesh douk shunek bilip um eik iri, eshesh ta dodogowish um shunek ihinyumorim enenyenem mour.” <sup>24</sup> Aria ahudok atuh, anudok sagab nyanaur iri ananin yaken nakrip Jisas nakri, “Eik yenek bilip um nyak aria eikin bilip madae dodogowin abom uwe. Aria eik yakri nyak nyutaurume aria eikin bilip nyutogur dodogowin abom.”

<sup>25</sup> Aria douk Jisas natik um eshudok sabaishi shahur shanaki hrukatinum anan, aria anan naho enyudok sagab nakri, “Nyak yoweini sagab douk nyenek anudok nunganin nagugak aria madae niyagwreh atin iri uwe. Eik yakripenum nyukutunukuk nyutogur nyunak aria mare wata nyutanamori nyuwishan!”

<sup>26</sup> Aria enyudok sagab nyahwar debeg aria nyatuk anudok shokuni arman nyanaur atap aria nyakutunuguk nyatogur nyaruwok. Aria anan krukruk nakus kabi douk shagok iri shakus um. Aria sabaishi arpesh shopunek shatrun aria shakri anan nagok. <sup>27</sup> Aria Jisas nasuhw ananin rogor aria nonohur nakitak neyotu iruhw.

<sup>28</sup> Aria douk Jisas nani ananim disaipel atum hawish hape urupat aria amam harigan hakri, “Apak douk mabirak aria madae dodogowipam muhiyahuk enyudok sagab uwe, um maresh?” <sup>29</sup> Aria anan nakripan nakri, “Douk ipak pushakur um worigun aria punek beten porik Iruhin nutaurumep akure, ipak ta puhiyahan. Aria douk ipak atip madae dodogowip uwe.”

### *Jisas Nakripen Anah Shopunek Um Agundok Ta Anan Nugok Aria Wata Nukitak Nupe Um*

(Matyu 17:22-23; Luk 9:43-45)

<sup>30</sup> Aria amam hakutukuk abrudok wabur aria hawish hanak shokugi nahobig Galili aria hanak. Douk hanak aria Jisas nakri uwok um enesh arpesh shudukemesh um agundok amam hanak hapeum. <sup>31</sup> Um maresh? Anan nape nakripan sabainyi ananin yopinyi baraen ananim disaipel. Anan nakripan nakri, “Arpesh ta shiyabig eikim horim um Eik Anudok Arman douk yatogur adurinyi arpen iri aria ta husuwe hunak he igok. Aria wata hukri um biyeh atih nyumneh um, eik ta wata ikitak ipe.”

<sup>32</sup> Aria amam madae hudukem baugennum enyudok baraen uwe. Aria shopunek, amam hanogugur aria madae horigan uwe.

### *Meishi Ta Shupe Debeishi?*

(Matyu 18:1-5; Luk 9:46-48)

<sup>33</sup> Douk amam hanak hatogur Kaperneam, aria hanak hawish hape anat urupat aria Jisas narig ananim disaipel nakri, “Iganigadae manaki yah um, ipak pape peyagwreh pakri maresh?”

<sup>34</sup> Aria amam madae hukripan enen baraen uwe. Um maresh? Igangadæ amam hanak yah um, amam kanak hape hanatutukem um meineta nupe debeini um amam ihm-morim. <sup>35</sup> Aria Jisas nabuh nape atap, aria nahwar ananim 12-poreim disaipel hanaki aria nakripam nakri, "Eshudok arpesh douk shukri shupe debeishi iri, sagomatin eshesh ta shupe kabi douk shokwishi um. Aria shupe shakatum ihishmorim arpesh shunekumesh mour meyoh aria eshesh ta kadak shupe debeishi."

<sup>36-37</sup> Aria Jisas nahwari enen batowin nyanaki nenyusap nyeyotu amam hapeum hutrin aria anan natuken nasuwen aria nakripam nakri, "Eshudok arpesh douk urkwip purum eik aria shutaurum enen batowin kabi douk enyudok um, eshesh douk shutaurum eik. Aria eshudok douk shutaurum eik iri douk madae shutaurum eik atuwe uwe, uwok. Eshesh douk shutaurum anudok douk neshopok eik yanaki iri shopunek."

*Eshudok Arpesh Douk Madae Shunek Horimum Apak Iri Uwe Douk Shaniguk Apak  
(Luk 9:49-50)*

<sup>38</sup> Aria Jon nakrip Jisas nakri, "Debeini Tisa, apak matik anan arman nape nahiyahuk sagabehos um nyakin nyeigur aria eshesh shatogur sharuwok. Aria apak makripan um anan mare wata nunekesh namuddok uwe, uwok. Um maresh? Anan douk madae nugipesh apak iri uwe."

<sup>39</sup> Aria Jisas nakripam nakri, "Ipak mare pukripan um nukutukuk enyudok mour anan nape neneken iri. Um maresh? Eshudok douk shenek Iruhin atun neneken iri mour um eikin nyeigur iri ta mare shukri enen yoweinyi baraen um eik. <sup>40</sup> Aria eshudok douk shataurumep iri douk shaniguk ipak. <sup>41</sup> Adur atin eik yakripe! Eshudok arpesh douk shukri ipak douk ekip aria eshesh douk shukep anabar abar um eikin nyeigur um, Iruhin ta nubukumesh yopishi eshudok eneshenesh shukusumesh."

*Eneshenesh Yoweishi Inahos Douk Shenek Arpesh Shenek Yoweishi Inahos Shakon Agabus Iruhin Um  
(Matyu 18:6-9; Luk 17:1-2)*

<sup>42</sup> Aria Jisas nakripesh enyudok baraen shopunek nakri, "Aria enen arpen nyunek enen um eshudok shokwishi douk shenek bilip um eik iri nyunek yoweishi inahos um, enyen douk nyenek yoweishi inahos abom. Aria ta shusuhwen shuwaur anam debeimi utom um enyenyin aruhwigur aria shuwashen nyubuhuk youg akure, enyen ta nyupe yoweinyi poe. Aria Iruhin ta neneken nyumnek debeiri eriger abom reshagrakuk agundok nyumnek eriger um shuwashen youg um. <sup>43</sup> Douk namudok aria ta enen nyakin rogur nyuneken nyunek yoweishi inahos um, nyak nyutupen nyunakuk aria atin meyoh nyupeik. Douk atin rogur nyupemenyum, nyak ta nyunak nyupe wosik ihih nyumneh. Ta biyesh roguhw shupe aria shuneken nyunak um abrudok yoweiburi wabur hel, douk nyih hanu hape namudok ihih nyumneh aburi. <sup>44</sup> [Aria abrudok yoweiburi wabur hel douk nyih hanu ihih nyumneh iri hanu um, eheh ta mare hugok atin uwe, uwok. Aria eshudok kabi douk eshuguh um ta shunatuken. Aria shopunek, eshesh ta mare shugok uwe, uwok. Eshesh ta shupe ihih nyumneh.] <sup>45</sup> Aria ta onohw nyakihw yerihw hwuneken nyunek yoweishi inahos nyukanaguk agab Iruhin um, nyutupohw hwunakuk aria atuhw hwupeik. Douk atuhw yerihw hwupeimenyum, nyak ta nyunak nyupe wosik ihih nyumneh. Ta bioruh yeriweruh hupeimen aria huraen nyunak um abrudok yoweiburi wabur hel, douk nyih hanu hape namudok ihih nyumneh aburi. <sup>46</sup> [Aria abrudok yoweiburi wabur douk nyih hanu ihih nyumneh iri hanu um, eheh ta mare hugok atin uwe, uwok. Aria eshudok kabi douk eshuguh um

ta shunatuken. Aria shopunek, eshesh ta mare shugok atin uwe, uwok. Eshesh ta shupe iih nyumneh.] <sup>47</sup> Aria ta anap nabep puneken nyunek yoweishi inahos um, nyak nyutukapuk aria atup meyoh pupeumen. Douk atup pupeumenyum, nyak ta nyunak nyuwish nyupe agundök douk Iruhin nape Debeini um ananish arpesan shapeum. Ta biyos nabes supemen aria suneken nyunak um abrudok yoweiburi wabur hel, douk nyih hanu hape namudok iih nyumneh aburi. <sup>48</sup> Aria abrudok yoweiburi wabur douk ‘nyih hanu iih nyumneh iri hanu um, eheh ta mare hugok atin uwe, uwok. Aria eshudok kabi douk eshuguh um ta shunatuken.

Aria shopunek, eshesh ta mare shugok atin uwe, uwok.  
Eshesh ta shupe iih nyumneh.’

<sup>49</sup> “Ihishmorim arpesan shape agundok atap iri ta nyih hunish aria hunekesh shukutukuk eneshenesh yoweishi inahos. Ehudok nyih ta hunish aria hunekesh shutogur yopish. Eshesh ta shutogur yopish kabi douk showem sol mahish renekesh shatogur yopish. <sup>50</sup> Aria sol arar douk yopuri. Aria ta arar wata jemiyaum, arpesan ta mare enen ta wosik wata nyunekar ekehir, uwok. Aria ipak douk pape namudok atin kabi douk ekeh iri sol um. Douk namudok aria ipakiruh aparuh ta hur wosik aria ipak mare purpak punitok uwe, uwok. Ipak ta punagabe um pupe atugun.”

## 10

### *Jisas Nakripesh Um Agundok Shabrig Enyudok Lo Um Shanaraum Um (Matyu 19:1-12; Luk 16:18)*

<sup>1</sup> Aria Jisas nakitak nakutukuk abrudok wabur nanak um shokugi nahobig Judia. Anan nakitak nabrig worub Jordan aria nanak gani wobrehahibam. Aria sabaishi arpesan shanaki shape anan napeum, aria nape nakripesh yopinyi baraan kabi douk iih nyape nakripesh um. <sup>2</sup> Aria anam Farisi hanaki anan napeum henek rohwuman aria hakri hukwiraehan um enen baraan. Aria amam harigan hakri, “Nyak kripap, apakin lo douk nyakri wosik um anan arman niyatok ananik irohukwik aka, uwok?”

<sup>3</sup> Aria Jisas narigam nakri, “Seiwok Moses nakripel maren dodogowinyi lo?”

<sup>4</sup> Aria amam hakri, “Moses douk nakri wosik um anan arman nukri niyatok ananik irohukwik, anan ta nenebumok anap shup um agundok eshesh sheneyatak um nukok kwunasuop, aria nishopokok kwunak um okwokwumok um.”

<sup>5</sup> Aria Jisas nakripam nakri, “Moses douk nawemumep-oguk enyudok dodogowinyi lo ipak um maresh? Ipak douk baragos seshukep abom. <sup>6</sup> Aria seiwok baugos um Iruhin nenek eneshenesh eshudok um, baraan nyetem Iruhin ananik Buk iri douk nyakri, ‘Iruhin nenekesh arman iri armatok. <sup>7</sup> Douk namudok aria arman ta nukutukuk ananish amakeniyish aria nunak nini ananik irohukwik shupe sik. <sup>8</sup> Aria eshesh biyesh ta shutogur atin arpen.’ Eshesh ta mare wata shupe kabi douk biyesh um uwe, uwok. <sup>9</sup> Douk namudok aria arpesan kanak ta mare shubrig enesh eshudok douk Iruhin nuweshikesh nakri shupe atugun iri uwe, uwok.”

<sup>10</sup> Aria Jisas nani ananim disaipel hanak hawish urupat aria amam hariganum enyudok baraan iganigadae anan nakripesh-enyi. <sup>11</sup> Aria anan nakripam nakri, “Aria anan arman niyatok ananik irohukwik aria wata nurao kupaikwi um, anan douk nabrig enyudok lo um shanaraum um. Aria anan nani okwok douk shenek yoweishi inahos um sheshuh atugun um shenek wehrur. <sup>12</sup> Aria douk namudok atin. Aria onok armatok kwiyatok okwokwin raminen aria wata kwunak kwurao kupaini um, okwok douk

kwabrig enyudok lo um shanaraum um. Aria okwok kwani anan douk shenek yoweishi inahos um sheshuh atugun um shenek wehrur.”

*Jisas Nenekumesh Yopinyi Shokwishi Batowish Um Shupe Wosik  
(Matyu 19:13-15; Luk 18:15-17)*

<sup>13</sup> Aria enesh arpesan sharauri enesh batowish shanaki um Jisas um nuwemesh wis, aria nunekumesh yopuni. Aria Jisas ananim disaipel hahaesh hakri, “Ipak mare puraesh punaki um Jisas, uwok.” <sup>14</sup> Aria Jisas nemnekam namudok aria anan nyibur juwehosibur aria naham nakri, “Ipak kutukuk eshudok batowish shunaki um eik. Um maresh? Eshudok arpesan douk shape kabi eshudok shokwishi batowish ta shuwishi abrudok wabur Iruhin nape Debeini um ananish arpesan um, aria eshesh mare shukon aparuh Iruhin abom kabi douk batowish shakon aparuh um, eshesh ta mare shuwishi.” <sup>15</sup> Aria anan natuk eshudok shokwishi batowish nuwemesh wis atin atin, aria nenekumesh yopuni.

*Anan Debeini Douk Nagrem Sabaishi Eneshenesh Eshudok Iri  
(Matyu 19:16-30; Luk 18:18-30)*

<sup>16</sup> Douk Jisas nakutukuk agundok nikitak nape nanak yah, aria anan arman nahur nanak natogruman. Aria nanak nabuh noduk ohrubus natik atap aria narig Jisas nakri, “Yopuni tisa, eik ta inek maresh aria ta douk ipe wosip abom iih nyumneh?”

<sup>17</sup> Aria Jisas narigan nakri, “Nyak nyahware yopuweiri um maresh? Iruhin atun douk yopuni. <sup>18</sup> Nyak douk nyadukemen enyudok lo douk nyetem Iruhin ananik Buk iri. Enyen douk nyakri, ‘Ipak mare pubo kupaishi arpesan shugok. Mare puni armago punek wehrur um, mare pukwuaruh, aria mare punek rohw um kupaishi pukri eshesh shenek enesh yoweishi inahos. Aria shopunek, mare punek rohw um kupaishi punarukesh esheshish eshudok eneshenesh meyoh, uwok. Aria pumnek ipakish amakenyish esheshin baraen aria putaurumesh.’”

<sup>19</sup> Aria anudok arman nakrip Jisas nakri, “Tisa, seiwok eik wata shakuwe um yape yanaki arigaha douk, eik yasuhw enyudok ihinyumorim lo yagipeshen.”

<sup>20</sup> Aria Jisas natrun aria anan urkum manawashaman aria nakripam nakri, “Nyak douk atin meyoh yopuni mour wata nyape, nyak wata nyuneken uwe. Nyak nyunak nyuhur ihishmorim nyakish eshudok eneshenesh nyuko kupaishi shutorish shuken utabor. Aria nyunak nyisiyabor um eshudok yaruhih arpesan. Nyak nyunekesh namudok aria kweipon nyak ta nyirao yopishi eshudok eneshenesh gani iruhw heven. Aria nyak nyunekesh namudok iyoh, aria douk nyunaki nyugipeshe.”

<sup>21</sup> Aria douk anudok arman nemnek namudok, aria anan apahw amaenyihw aria ananin domaen nyotohiyah abom aria nanak. Um maresh, anan douk nagrem sabaishi eshudok eneshenesh.

<sup>22</sup> Aria Jisas neshakam ananim disaipel nernarikh jurug aria nakripam nakri, “Eshudok arpesan douk shanagrem sabaishi eshudok sheneshubuk iri ta shenek debeini mour um shuwishi abrudok wabur Iruhin nape Debeini um ananish arpesan um.”

<sup>23</sup> Aria ananim disaipel hemnek ananin baraen aria hakitak yowiyokuk. Aria Jisas wata shopunek nakri, “O ipak eikish arpesan! Eshudok arpesan douk shakri eneshenesh eshudok ta shutaurumesh um shuwishi abrudok wabur Iruhin nape Debeini um ananish arpesan um ta shunek debeini mour ba iyoh aria kadaq shuwishi. <sup>24</sup> Aria enen debeini mahin shahwaren

um kamel iri nyukri nyuwishi nyil, agundok nagor um tret tananyigur um rupeh hanatape um, enyen ta nyunen shokwinyi mour meyoh aria nyuwishi. Aria eshudok arpesh douk shanagrem sabaishi eshudok enesh-enesh iri ta shunek debeinyyi mour abom aria kadaak shuwishi.”

<sup>26</sup> Aria douk ananim disaipel hemnek namudok aria hakitak yowiyokuk abom. Aria amam kanak hape hanarig um hakri, “Anan nakri namudok aria Iruhin ta nunarao meishi shutanamori shupe wosik atin?”

<sup>27</sup> Aria Jisas neshakumam duk aria nakripam nakri, “Arpesh eshesh kanak ta mare dodogowish um shuwishi agundok Iruhin nape Debeini um ananish arpesh um. Eshesh atish ta shubirak shutik uwok. Aria Iruhin nutaurumesh um, eshesh wosik ta shuwishi. Um maresh? Iruhin douk ddogowin abom aria nunek ihishmorim eshudok eneshenesh.”

<sup>28</sup> Aria Pita nakripan nakri, “Jisas nyak mnek, apak douk makutukuk ihishmorim apakish eshudok eneshenesh aria manaki memnek nyakinbara masuhwen aria magipesh nyak.”

<sup>29-30</sup> Aria Jisas nakripam nakri, “Adur atin eik yakripep! Eshudok arpesh douk shukutukuk eshesheg urusag, gwuni esheshish ashukenyish owashish, shuni esheshiyu mohwiyariyu, uni esheshiyu amakeniyu, uni esheshim arhim, huni esheshish batowish, shuni esheshigos nubarigos um shugipesh eik aria shukripesh eikin yopinyi baraen iri, abudok nyutob eshesh wata shupe agundok atap um, Iruhin ta nukesh sabaishi eshudok eneshenesh shopunek abom shishagrakuk riguk sharik sharaesh iri. Iruhin ta nukesh urusag gwuni ashukenyish owashish, aria mohwiyariyu uni amakeniyu, uni batowish aria nubarigos. Aria shopunek, kupaishi ta shukesh agabus aria shunekesh shurao amaen shumnek eriger. Aria eshesh ta wata shunak shupe wosik abom ihih nyumneh. <sup>31</sup> Aria eshudok arpesh douk shape debeishi iri ta wata shupe kabi douk shokwishi um. Aria eshudok douk nyeiguhw wokeshi ta wata nyeiguhw shuto iruhw.”

### *Henek Biyeh Atih Um Jisas Nakripesh Um Ta Nugok Aria Wata Nukitak Nupe Um (Matyu 20:17-19; Luk 18:31-34)*

<sup>32</sup> Aria Jisas nikitak nani ananim disaipel hape hagim yah hanak hato um Jerusalem. Jisas nikitak narik aria ananim disaipel hakitak yowiyokuk aria amampi urkwip por yowep aria hagiman hanak. Aria eshudok arpesh douk shagimam shanak iri shopunek shanogugur. Aria Jisas wata shopunek narao ananim atum hanak aria anan nape nakripam um eshudok eneshenesh douk ta shutogur-uman iri. <sup>33</sup> Anan nakripam nakri, “Ipak pumnek! Douk apak munak um Jerusalem. Apak ta munak agundok aria anan arman ta niyabigam Eik Anudok Arman douk yatogur adurin arpen iri um amam debeimi pris huni amam henek skulumesh um lo iri. Aria amam ta husuwe hunak hunek kwotwone aria hurae um amam douk madae Juda iri uwe um hunak he igok. <sup>34</sup> Aria ta huneke enenyen hiyokase aria hukwusehe. Aria ta hupuruke madururuh aria he igok. Aria douk hukri um biyeh atih nyumneh iri, eik ta wata ikitak ipe.”

### *Jems Nani Jon Harig Jisas Um Hakri Amam Hupe Debeimi (Matyu 20:20-28)*

<sup>35</sup> Aria Sebedi ananim biom nugamim Jems iri Jon hanaki um Jisas aria hakripan hakri, “Debeini tisa, ohwak wakri ukripen enen baraen aria nyak nyumnekhw aria nyunek-umohw um eshudok douk ta ohwak warigen-mesh iri.”

<sup>36</sup> Aria Jisas narigam nakri, “Ipak pakri inekumep maresh?”

<sup>37</sup> Aria amam hakripan hakri, “Ohwak wakri abudok nyutob nyak nyurao debeinyi nyeigur, aria ddogowin nyutrugun abom um, ohwak shopunek wakri ohwakish nyeiguuh shuto iruhw aria upe debeihwi. Anan nupe um yopunyi rogor ehah aria anan nupe um anagagrinyum.”

<sup>38</sup> Aria Jisas nakripam nakri, “Ipak douk madae pudukemesh um enyudok ipak parige-umen iri uwe. Ipak wosik ta ddogowip um pumnek arudok debeiri eriger douk hurukatin um ta eik imnekor iri? Kupaishi ta she imnek debeiri eriger aria ta igok. Aria ipak douk wosik ta pakri um shusuwep shunak shep punomnek debeiri eriger ba iyoh, aria kadak pugok kabi douk eik um?”

<sup>39</sup> Aria amam hakripan hakri, “Wosik, ohwak wosik ta unekesh namudok.”

Aria Jisas nakripam nakri, “Wosik, ipak wosik ta pumnek debeiri eriger douk ta eik imnekor iri. Aria shopunek, ta wosik kupaishi shusuwep shunak shep pumnek debeiri eriger aria ipak anan kweipon nugok um.

<sup>40</sup> Aria enyudok um ipak anan nupe um yopunyi rogor ehah, aria anan nupe um anagagrinyum aria ipak nyeiguuh shuto iruhw um, enyen douk Iruhin ananin mour. Eshudok arpesh douk seiwok Iruhin anan kanak nanagraehesh iri eshesh atish ta nyeiguuh shuto iruhw aria enesh shupe um yopunyi rogor ehah, aria enesh shupe anagagrinyum.”

<sup>41</sup> Aria douk amudok anam 10-poreim disaipel hemnek enyudok bareaen Jems aria Jon hakriyen iri aria amam nyirub juwehosirub um Jems nani Jon. <sup>42</sup> Aria Jisas nahwari ihm-morim hanaki hape atugun um anan napeum aria nakripam nakri, “Ipak douk padukemesh um eshudok douk madae shudukem Iruhin iri uwe um esheshih aih um esheshim debeimi. Amudok douk shahwaram um debeimi iri, douk ddogowim atum abom aria ddogowim um kupaishi arpesh um shunek sabainyi enenyenen debeinyi mour. <sup>43</sup> Aria ipak ta mare punekesh namudok uwe, uwok. Aria ipak anan nukri nupe debeini um ipak enep um, sagomatin anan ta nenek-umep mour meyoh ipak ihm-morim ba iyoh, aria anan ta kadak nupe debeini um ipak. <sup>44</sup> Aria shopunek, ta ipak anan nukri nyeigur nyuto iruhw iri, sagomatin anan ta nyeigur uwok meyoh um nupe shakamum ipak ihm-morim aria nunek-umep mour meyoh aria anan ta kadak nyeigur nyuto iruh-uman. <sup>45</sup> Aria Eik Anudok Arman douk yatogur adurinyi arpen iri douk madae inakumori kupaishi arpesh shunekume mour uwe, uwok. Eik yanakmori itaurum arpesh inekumesh mour. Aria um ikesh eik kanak um she igok um itor sabaishi arpesh ikweshihesh um esheshish yoweishi inahos.”

### *Jisas Nagabe Anan Nabes Seshukanari Nanahwaram Bartimeus Iri (Matyu 20:29-34; Luk 18:35-43)*

<sup>46</sup> Aria Jisas nani ananim disaipel hanak hatogur wabur Jeriko aria Jisas nakutubur-ukuk nape nanak. Aria ananim disaipel hani sabaishi arpesh shopunek shanaman shanak. Aria agundok, Timeus ananin nuganin Bartimeus nape. Anan nabes seshukan aria nape anagas um yah. Aria iih nyumneh anan nape nahwar arpesh sharahaen yah iri um shukon anabor utabor. <sup>47</sup> Aria douk anan nemnek um Jisas douk nanaki wabur Nasaret iri nanaki um, aria anan nahwar debeg nakri, “Jisas, Devit ananin barhonin! Nyak nyukri gishaum eik!”

<sup>48</sup> Aria sabaishi armam armago shahan shakripan um mokureg. Aria anan madae numnekesh uwe. Anan nahwar debeg abom nakri, “Devit ananin barhonin, nyak nyukri gishaum eik!”

<sup>49</sup> Aria Jisas nemnekan aria nanaki neyotu. Aria nakripesh nakri, “Ipak hwaran nunaki agundok.” Aria eshesh shahwaran shakri, “Jisas nahwaren, douk namudok aria nyak mare nyunogugur. Kitak yowi agundok.”

<sup>50</sup> Aria anan nikitak neyotu iruhw nawaruk ananit saket natubukuk aria nikitak nanak gani Jisas neyotu um.

<sup>51</sup> Douk nanak aria Jisas narigan nakri, “Nyak nyakri inekumen maresh?” Aria anan nakripian nakri, “Debeini Tisa, eik yakri inatrugun.”

<sup>52</sup> Aria Jisas nakripian nakri, “Nyak kare. Um maresh? Nyak nyenek bilip nyakri eik dodoxoiwe iri aria nyakis nabes douk yopus.”

Aria ahudok atuh anan natrugun aria nanam Jisas hanak.

## 11

### *Jisas Nanak Nawish Jerusalem Kabi Douk King Um (Matyu 21:1-11; Luk 19:28-40; Jon 12:12-19)*

<sup>1</sup> Jisas nani ananim disaipel hanak hatogur hurukatin um Jerusalem. Amam hanak hatogur arbudok biyorub shokurubi warub Betfage iri Betani. Amam hanak agundok hurukatin um ahwudok yoduhw Oliv aria Jisas neshopok biom disaipel um hurik hunak. <sup>2</sup> Aria nakripam nakri, “Ipak purik punak babri wabur douk bape iri gani wobrehah iri. Ipak ta punak putogur atin, aria ta putik enen nugaen donki. Enyen douk showeshiken maduhw aria nyeyotu. Riguk enyen douk watak nyuwaru enen arpen nyurahemen uwe, uwok. Ipak punak putogur putrin aria pukweshihen puraen punaki agundok. <sup>3</sup> Aria ipak pupe pukweshihen, aria enen arpen nyorigep nyukri, ‘Ipak pakweshihen um, enyudok donki?’ Ipak pukripen pukri, ‘Debeini nakri nuraen banab nyutob meyoh um nunek enen mour aria anan ta wata nuraenyi arigas atin.’”

<sup>4-5</sup> Aria amam hanak aria hatik enen nugaen donki showeshiken nyeyotu adukehah um witum anat urupat. Aria amam hanak hape hakweshihen aria enesh arpesh douk sheyotuwi hurukatin iri sharigam shakri, “Ipak pakweshihen um maresh enyudok nugaen donki?” <sup>6</sup> Aria amam hakripesh enyudok atin baraen kabi douk iganigadae Jisas nakripam um. Douk namudok aria eshesh shakri wosik aria amam haraen hanak. <sup>7</sup> Amam haraen hanakum Jisas aria howem amamig saketog agabinyum um enyudok donki aria Jisas nakh netem iruhinyum aria nanak. <sup>8</sup> Aria sabaishi arpesh shawar esheshig saketog aria shape shagadiog shanak yah. Aria enesh shanak shatupoki nyeiguhwigos rowos um nubarigos aria shape shogosubuk yah um shuginohwah. <sup>9</sup> Aria ihishmorim arpesh douk sharik iri, shani eshudok douk shagiman iri shahwar shakri, “Apak manadudareh-uman! Iruhin natauruman nunekuman yopinyi aria nupe wosik. Anan douk nanakumori Debeini ananin nyeigur iri. <sup>10</sup> Apak mutuk Iruhin ananin nyeigur nyuto iruhw. Um maresh? Abudok nyutob um Iruhin nupe debeini um ananish arpesh um kabi douk seiwok Iruhin nutaurum apakin baben Devit um douk banaki hurukatin!”

<sup>11</sup> Aria Jisas nani ananim hani sabaishi arpesh shanak arigaha shanak shatogur Jerusalem. Aria Jisas nanak nawish Iruhin ananit debeiti urupat aria natik ihishmorim eneshenesh eshudok shakus numun iri. Anan natrish aria agagun douk iganigadae wabigep aria nani ananim 12-poreim disaipel hanakum Betani.

*Jisas Nakrip Enen Rowog Fik Um Enyen Mare Wata Nyubuki Worigun Nyiren*  
(Matyu 21:18-19)

<sup>12</sup> Aria ruwahepih amam wata hakutukuk Betani hatanam hape hanaki yah aria Jisas nyurub ban. <sup>13</sup> Aria amam wata hape hanaku rougun aria Jisas natigu enen rowog fik nyeyotu. Anan natrin um nyunareh nyenek sabaisi shus aria nakri enep shurkwip ta pir. Douk namudok aria anan nanak um nakri nudi enep nupah. Aria anan madae nutik enep uwe. Shus atus sape. Um maresh? Enyenyib nyutob um shurkwip pir um douk watak. <sup>14</sup> Aria Jisas nakrip enyudok rowog fik nakri, “Nyak shurkwip ta mare wata enep pir aria arpesh shudiyep shupah uwe, uwok.” Aria ananim disaipel hemnekan-ukuk.

### *Jisas Nahiyyah Arpesh Douk Shawish Shape Shenek Bisnis Iruhin Ananit Debeiti Urupat Iri*

(Matyu 21:12-17; Luk 19:45-48; Jon 2:13-22)

<sup>15</sup> Douk amam hanak arigaha hanak hatogur Jerusalem aria Jisas nawish numun narub um Iruhin ananit debeiti urupat tataoum aria nape nahiyyah eshudok douk shenek salim um eshudok eneshenesh iri shani eshudok douk shatorish iri shatogur sharuwok. Anan nawish nabadigumam tebol-hos amudok douk arpesh shanaki shenek senisim\* um utabor aria hekesh kupaibori iri. Aria nabadigumam wagiturahos amudok douk hape henek salim um mashubiguhw armiguhw um kupaishi shatruguh um shunak shunek ofa moguh shuko Iruhin iri. <sup>16</sup> Aria anan nakripesh um mare watak enesh arpesh shirao enesh eshudok eneshenesh shuwishi numun narub um Iruhin ananit debeiti urupat tataoum kupaishi shutorish uwe, uwok. <sup>17</sup> Aria anan neneh skulumesh nakripesh enyudok baraeen douk nyape Iruhin ananik Buk iri nakri, “Iruhin nakri, ‘Eikit urupat ta tupe um sabaishi arpesh douk shape ihigmorim debeigi nahobig agundok atap iri um shuwishi shupe shunek beten shorige um.’ Aria ipak penekat kabi douk shawuaruh iri esheshit um.”

<sup>18</sup> Aria sabaishi shemnek Jisas ananin baraeen aria eshesh shakitak yowiyokuk abom. Namudok aria amam debeimi pris hani amudok henek skulumesh um lo iri hemnek Jisas ananin baraeen aria hape hatrugun um anah yah um hakri hon nugok. <sup>19</sup> Aria wabigep Jisas nani ananim disaipel hakutukuk Jerusalem hanak.

### *Enyudok Rowog Fik Yarin*

(Matyu 21:20-22)

<sup>20</sup> Ruwahepih ruhur atin, Jisas nani ananim disaipel hakitak hagim yah hanak aria amam hatigu enyudok rowog fik. Enyen yarin agundok nukwaruh aria nyato nyanak iruhw um nyeiguhw shani shus shopunek. <sup>21</sup> Aria Pita urkum mormoguk enyudok baraeen nabatik Jisas nakrip enyudok rowog-enyi aria nakrip Jisas nakri, “Debeini Tisa, nabatik nyak nyaho nyanyi rowog fik nyakrip um yarin aria douk nyanyi yarin abom.”

<sup>22-23</sup> Aria Jisas nakripam nakri, “Ipak ta punek bilip um Iruhin. Adur atin eik yakriep, aria enen arpen madae nyur biyep urkwip um, aria nyunek bilip abom nyukri adur atinyum eshudok enyen nyakriyesh iri ta shutogur abom, aria nyukrip ahwudok yoduhw um hwunatuk hwugrukuk yous um, enyen ta nyutogur kabi douk enyen nyakrium. <sup>24</sup> Douk namudok aria adur atin eik yakriep. Abudok nyutob ipak punek beten um Iruhin um nukep enesh eshudok eneshenesh um, aria ipak punek bilip abom pukri adur atin anan ta nukepesh um, anan ta nukep eshudok ipak parigan-umesh iri. <sup>25</sup> Aria abudok nyutob ipak punek beten aria ipak urkwip purum enesh yoweishi inahos kupaishi shenekesh um ipak iri um, ipak mare

\* 11:15: Tik Matyu 21:12

pusuwesh aria pukwreyeshuguk. Ipak ta punekesh namudok um ipakin Yaken nepe iruhw heven iri shopunek ta mare nusuhwesh um ipakish yoweishi inahos aria nukwreyeshuguk. <sup>26</sup> [Aria ta ipak pusuwesh um yoweishi douk kupaishi shenekesh um ipak iri aria mare pukwreyeshuguk um, ipakin Yaken nepe iruhw heven iri shopunek ta nusuhwesh um ipakish yoweishi inahos aria mare nukwreyeshuguk uwe, uwok.]

*Amam Harig Jisas Um Omi Nyakon Big Aria Anan Douk Nape Debeini  
(Matyu 21:23-27; Luk 20:1-8)*

<sup>27</sup> Aria Jisas nani ananim disaipel wata hanakum Jerusalem. Amam hanak hatogur aria Jisas nanak nawish numun narub um Iruhin ananit debeiti urupat tataoum. Aria amam debeimi pris hani amudok henek skulumesh um lo iri hani amam debeimi Juda hanaki hatarungan. <sup>28</sup> Aria harigan hakri, “Nyak nyarao maren big um nyunek enyudok mour? Aria amiapen nyeken enyudok big?”

<sup>29</sup> Aria Jisas nakripam nakri, “Eik shopunek yakri irikep enen baraen. Aria ta ipak pubeime tukwanin um, eik shopunek ta ikriep um omi nyek big aria douk yenek enyudok mour. <sup>30</sup> Ipak kripe, Jon douk nenek baptaisumesh iri omi nyakon enyudok mour aria douk nenek baptaisumesh? Iruhin nakonen o enesh arpesh meyoh?”

<sup>31</sup> Aria amam kanak haneyagwreh hakri, “Aria apak mukri Iruhin nakonen um, anan ta wata norigap nukri, ‘Douk namudok aria ipak madae punek bilip um Jon ananin baraen uwe um maresh?’ <sup>32</sup> Aria ta apak mukri ‘arpesh meyoh shakonen um aria douk neneken’ um, enyudok baraen shopunek ta mare wosik uwe.”

Aria amam hanogugur um eshesh armam armago. Um maresh? Ihish-morim douk shakri Jon anan douk anan adurin profet.

<sup>33</sup> Aria amam hakrip Jisas hakri amam madae hudukemesh uwe, uwok. Aria Jisas nakripam nakri, “Eik shopunek ta mare ikriep um omi nyek big aria douk yenek enyudok mour.”

## 12

*Jisas Nakripam Wobuwobren Baraen Um Yowemi Armam Henek Mour  
Nubarig Iri*

*(Matyu 21:33-46; Luk 20:9-19)*

<sup>1</sup> Aria Jisas nakripam enyudok wobuwobren baraen nakri, “Anan arman nau wain iyoh aria narok narub ananig nubarig. Aria anan narok anag bariyaigi niuwag um ko sharauri wainip orokwipi shurkwip aria shunak shishishep shumakwiyeshep um ihat tutogurep. Aria shopunek, narak anap ourop potem iruhw iri um anan arman nunaki nupe neyoh nubarig ba nupe um. Aria anudok nagrem nubarig iri nakrip kupaini armam henek kontrak hanaki hape henek mour ananig nubarig aria anan nanak kupaigunum. <sup>2</sup> Douk nanak nepe arigaha aria abudok nyutob um wainip shurkwip orokwip shudiyep um batogur. Aria anan neshopok anan nenekuman mour meyoh iri nanak um nukrip amudok henek mour ananig nubarig iri hukani ananip um wainip shurkwip. <sup>3</sup> Aria anan nanak natogur aria amam han aria heshopokan natanam nanak meyoh. <sup>4</sup> Douk anan nanak nepeik aria nagrem nubarig iri wata shopunek neshopok kupaini nenekuman mour meyoh iri nanak um nukripam hukani enep shurkwip. Douk nanak natogrumam aria amam wata shopunek haworun barag aria han heneken abraenyin atun aria heshopokan natanam nanak meyoh. <sup>5</sup> Aria wata shopunek neshopok kupaini nanak aria amam han nagok.

Aria anan neshopok anam shopunek hanak aria amam henekesh-umam namudok atin. Anam ham henekam abraeniyim atum heyokasam, aria anam ham hagok.

<sup>6</sup> Douk amudok henek mour um anudok nagrem nubarig iri hatuh, aria ananin nugarin douk anan urkum manawash-uman iri atun napeik. Aria anan naneyagwreh nakri, ‘Eikin nugarin nunak um, amam ta humnekan.’ Aria anan neshopokan nanak. <sup>7</sup> Douk nanak natogur aria amam henek mour nubarig iri hatrun aria hanakripam hakri, ‘Anudok nagrem nubarig iri nugokuk um, ananin nugarin ta nügrem ihishmorim ananish eshudok. Douk namudok aria apak mon nugokuk um apak ta murao ananig nubarig!’ <sup>8</sup> Douk namudok aria amam hasawan han nagok aria hawashan natogur nokusuk aduk agudok nubarig.’

<sup>9</sup> Aria Jisas narig amudok debeimi Juda nakri, “Aria anudok nagrem nubarig iri ta nunek maresh? Anan ta nunaki nubo amudok henek mour iri hugok hutuh aria ta wata nurao kupaimi hunek mour ananig nubarig. <sup>10</sup> Aria ipak patrin enyudok baraen nyetem Iruhin ananik Buk iri aka, uwok? Baraen enyudok,

‘Amudok utom\* douk

harok urupat iri hakri wokumam iri douk  
matogur sagomim utom masah wobratum urupat iri.

<sup>11</sup> Amam douk Debeini nenekam matogur namudok  
aria apak manadudareh-umam makri’enyen douk Debeini atun neneken  
iri mour!’

<sup>12</sup> Aria amam debeimi Juda hadukemesh hakri anan nakri enyudok wobuwobren baraan um amam. Douk namudok aria amam juwehosim um anan aria hakri hunek kwotuman aria huweshikan. Aria amam hanogugur um eshesh armam armago aria hakutunukuk ba hanak.

### *Amam Harig Jisas Um Shunek Takis Um Sisar Aka, Uwok (Matyu 22:15-22; Luk 20:20-26)*

<sup>13</sup> Aria anah nyumnah, amam debeimi Juda heshopok anam Farisi hani anam Herot ananim hanak henek rohw um hukwiraeh Jisas horigan enen baraan. Amam henekesh namudok um hakri kadak amam humnekan nukri enen yoweinyi baraan um hunek kwotuman-umen iri. <sup>14</sup> Aria amam hanak agundok Jisas napeum aria harigan hakri, “Debeini Tisa! Apak madukemeshum nyak douk madae nyunogugur enesh arpesh uwe. Aria nyak douk madae nyukrip nyeiguuh shato iruhw-eshi arpesh kupainyi baraan aria nyeiguuh wokeshi nyukripeshuk kupainyi uwe, uwok. Nyak apa nyakripesh atin baraan ihishmorim arpesh. Aria nyak apa nyagipesh adurin atinyi baraan aria nyenek skulumesh wosik um Iruhin ananish aih. Douk namudok aria nyak kripap. Apakin lo douk nyakri mumam? Enyen douk wosik um munek takis um debeini gavman um Sisar aka, uwok?”

<sup>15</sup> Aria Jisas nadukemesh um amam douk henek rohw. Douk namudok aria anan narigam nakri, “Ipak pakri pukwiraehe um maresh? Ipak haroki anam utom douk pape penek takis omi ba itrum.”

<sup>16</sup> Aria amam hanaki hakon anam utom aria Jisas narigam nakri, “Enyudok nyeigur aria aborir shetem amudok utom iri omiyesh?”

Aria amam hakri, “Debeini gavman Sisar ananish.”

<sup>17</sup> Aria Jisas nakripam nakri, “Sisar ananish eshudok eneshenesh ta puko Sisar. Aria Iruhin ananish ta puko Iruhin.”

Aria douk anan nakripam namudok aria amam hakitak yowiyokuk abom.

\* **12:10:** Putik futnot nyape Matyu 21:42 iri.

*Amam Sadyusi Harig Jisas Um Shagok Iri Ta Shukitaki Aka, Uwok?  
(Matyu 22:23-33; Luk 20:27-40)*

<sup>18-19</sup> Aria amam Sadyusi, douk hakri shagok iri ta mare wata shukitaki iri hanaki Jisas napeum aria harigan hakri, “Debeini tisa, seiwok Moses nuwemaguk enyudok Iruhin ananin lo um apak nakri namudok, ‘Aria anan arman ananik irohukwik madae kubuki enesh batowish aria anan nugokuk um, ananin wanin ta nukwaur. Anan ta nukwaur um shubuki batowish um aria ta shubuh ashukenyik nuwag.’”

<sup>20</sup> Aria amam hakripan shopunek hakri, “Anob nyutob, 7-poreim nugamim douk atish amakenyish shamubuki iri hape. Aria ashukan narao onok irohukwik aria anan nagokuk aria okwok madae kubuki enesh batowish uwe. <sup>21</sup> Aria aninuman nakwaur aria anan shopunek nagok aria okwok madae kubuki enesh batowish uwe. Aria douk anan nagokuk aria rabinari iri nakwaur. Douk nakwaur shape aria anan shopunek nagok aria madae kubuki enesh batowish uwe. <sup>22</sup> Aria namudok atin, ihm-morim amudok 7-poreim haraok aria amam ihm-morim hagokuk aria okwok madae kubuki enesh batowish uwe. Aria okwok shopunek kwagiguk kwagok. <sup>23</sup> Aria abudok nyutob shagok iri wata shukitaki um, okwudok armatok ta kwukitaki aria kwupe um mein? Nyak nyadukemesh, sagomatin ihm-morim amudok 7-poreim haraok iri atum.”

<sup>24</sup> Aria Jisas nakripam nakri, “Ipak madae pudukemesh uwe. Um maresh? Ipak madae pudukem baraen nyetem Iruhin ananik Buk iri uwe. Aria shopunek, madae pudukemesh um agundok Iruhin dodogowini abom um uwe. <sup>25</sup> Abudok nyutob shagok iri wata shukitak-umori, armam armago ta mare shunoraum um atin uwe, uwok. Eshesh ta shupe kabi douk Iruhin ananish enselahos douk shape iruhw heven iri um. <sup>26</sup> Aria ipak ta patarihen iri Iruhin nakripen iri baraen um agundok ta shagok iri wata shukitaki um aka, uwok? Aria shopunek, ipak patarihen enyudok baraen douk nyetem okwudok buk Moses nenyemok iri aka, uwok? Moses douk natik nyih hanu enen shokwinyi rowog aria Iruhin nakripam enyudok baraen nakri, ‘Eik douk Abraham nani Aisak aria Jekop amamin Iruhin.’ <sup>27</sup> Namudok aria Iruhin douk madae shagok iri esheshin uwe, uwok. Anan douk shape iri esheshin Iruhin. Aria ipakin baraen madae adurin abom uwe, uwok.”

*Iruhin Ananin Nyarik Iri Lo  
(Matyu 22:34-40; Luk 10:25-28)*

<sup>28</sup> Aria anan nenek skulumesh um lo iri shopunek nanaki nape nem-nekan um hape hanatutukem um. Aria shopunek, anan nemnek Jisas nakripamen iri baraen douk yopunyi atin abom. Douk namudok aria anan narig Jisas nakri, “Meinyi Iruhin ananin lo douk nyape nyarik abom nyeshagrakuk ihinyumorim lo?”

<sup>29</sup> Aria Jisas nakripam nakri, “Nyarik iri lo douk enyudok, ‘Ipak Israel ta pumnek! Apakin Debeini Iruhin abom douk anan atun Iruhin.

<sup>30</sup> Douk namudok aria ipak urkwip ta punawasham abom ipakin Debeini Iruhin.

Aria ipakiruh aparuh, huni ipakish mishish shuni ipakip urkwip ta shunawasham abom ihinmorim um ipakin tinytin aria pukwu ipakin dodog um punek ananin mour.’

<sup>31</sup> Aria nyagimori enyudok iri douk enyudok, ‘Ipak ta urkwip punawasham kupaishi arpesh douk shape hurukatin um ipak iri

kabi ipak urkwip punawasham ipak kanak um.<sup>32</sup>  
 Aria enyen douk madae enen kupainyi lo nyishagrakuk enyudok biyen lo uwe, uwok."

<sup>32</sup> Aria anudok nenek skulumesh um lo iri nakrip Jisas nakri, "Tisa! Nyakin baraen douk yopunyi atin abom. Nyak nyakri adur! Iruhin douk anan atun Debeini abom aria madae anan shopunek nupe debeini kabi douk anan um uwe. <sup>33</sup> Douk namudok aria adur atin, apakip urkwip ta punawasham abom um anan atun. Aria apakiruh aparuh huni apakish mishish shuni apakip urkwip ta shunawasham abom aria muko ihinyumorim um apakin dodog um munek ananin mour. Aria urkwip punawasham kupaishi shape hurukatinum apak iri kabi douk apak urkwip punawasham apak kanak um. Enyudok biyen lo douk nyarik iri yopunyi lo abom. Aria ta apak mugipesh enyudok biyen lo um, ehudok aih douk hushagrakuk agundok apak munek ofa um eneshenesh eshudok mashaisheh nyih hanish hashahuk ba mako Iruhin um shani ihinyumorim ofa shopunek."

<sup>34</sup> Aria Jisas nemnekan um ananin baraen douk yopunyi adurin atin abom aria nakripan nakri, "Abudok nyutob um nyuwishi agundok Iruhin nape Debeini um ananish arpesh um douk banaki hurukatin." Aria ihishmorim arpesh shanogugur aria madae shorigan um enen shopunek baraen Jisas uwe, uwok.

#### *Jisas Nariges Um Krais Douk Iruhin Nagraehan Neshopokan Nanakumori Nunaraao Arpesh Iri*

(Matyu 22:41-46; Luk 20:41-44)

<sup>35</sup> Jisas nape neneck skulumesh numun narub Iruhin ananit debeiti urupat tataoum. Aria nakripesh enyudok baraen nakri, "Amudok henek skulumesh um lo iri hakri Devit ananin barhonin ta nutogur Krais douk Iruhin nagraehan neshopokan nanakumori nunaraao arpesh iri um maresh? <sup>36</sup> Seiwok douk Iruhin ananin Mishin nyohur Devit kanak aria nakri enyudok baraen um Krais nakri, 'Debeini nakrip eikin Debeini nakri, "Nyak poe agundok um eikin yopunyi roturehahum arigaha ibo nyakim horim ba hubuhuk."

<sup>37</sup> "Aria tik, Devit kanak douk nahwar anudok arman Krais ananin Debeini. Douk namudok aria Krais ta wata nutogur Devit ananin barhonin mumam?"

Aria douk Jisas nakripesh namudok aria sabaishi arpesh shanadudareh abom shakri ananin baraen douk yopunyi adurin atin.

#### *Amam Henek Skulumesh Um Lo Iri Amamih Yoweihai Aih*

(Matyu 23:1-36; Luk 11:37-54, 20:45-47)

<sup>38</sup> Aria Jisas nape nakripesh baraen nakri, "Ipak gamo pudukemesh um ipak mare pugipesh amudok henek skulumesh um lo iri um amamih yoweihai aih. Amam hanadudareh abom hore rouhi atih rupeh hurahaen um arpesh shutrum shukri amam da yopumi debeimi armam. Aria shopunek, hakri hurahaen hunak agundok arpesh apa shantorum shapeum, aria shutrum aria shunek-umam yopihi nyumneh. <sup>39</sup> Aria hanak um lotu eshesh Juda shape sheneyagwreh baraen-ogwi urusag um, amam hanadudareh um hunak hupe hurik, hutem yopishi wagiturahos um kadak arpesh shutrum. Aria shenek debeiguni worigun obi nyutob, amam apa hanadudareh um hunak hupe yopugunum douk debeimi atum hapeum.

<sup>40</sup> Aria amam apa hanak hawish armago douk armam hagok howosopukuk iri owoig urusag aria hatru hawumesh-aruw owoiwish eshudok enesh-enesh. Aria amam hanak hape henek beten um, amam henek rourouni

beten meyoh um hakri kupaishi arpesh shutrum. Aria kweipon Iruhin ta nuwananam amamish yoweishi inahos aria ta nunekam humnek debeiri eriger."

*Onok Armatok Arman Nagok Nakwusopukuk Iri Kwenek Ofa Kwakon Utabor Iruhin*

(Luk 21:1-4)

<sup>41</sup> Jisas nape hurukatin um asudok bokis douk shape shakwutu utabor babuh um gani numun Iruhin ananit debeiti urupat. Aria anan nape natik arpesh shanaki shape shakwutu utabor babuh asudok bokis um. Šabaishi shogrem sabaibori utabor iri shanaki shakwutu debeibori utabor babuh bokis. <sup>42</sup> Aria onok armatok douk anan nagok nakwusopuk iri kwanaki kwakwutu biobor shokwubori utabor babuh.

<sup>43</sup> Aria Jisas nahwar ananim disaipel hanaki aria nakripam nakri, "Adur atin, eik yakripep, okwudok arman nagok nakwusopuk iri armatok okwokwibor karowibor biobor utabor, douk kwanaki kwakwutubor bokis iri douk sabaibori abom. Ababor douk beshagrakuk abom abrudok sabaibori utabor douk ihishmorim shanaki shakwutubor iri. <sup>44</sup> Eshudok ihishmorim shanaki shakwutu tukwanibor um esheshibor utabor babuhuk bokis aria tukwanibor debeibori bakwusumeshuk urusag. Aria okwok kwakwutu sabaibori okwokwibor utabor. Aria okwok douk nyaruk armatok iri, madae anabor utabor bukusamokuk urupat um kwunotor worigun um uwe, uwok."

## 13

*Jisas Nakri Kupaishi Arpesh Ta Shununu Iruhin Ananit Debeiti Urupat (Matyu 24:1-2; Luk 21:5-6)*

<sup>1</sup> Douk Jisas nape iri numun Iruhin ananit debeiti urupat naktak nakri nutogur aduk, aria anan ananin disaipel nakripam nakri, "Debeini Tisa! Nyak tik agwudok yopugwi urusag douk sharokog yopubori utabor iri."

<sup>2</sup> Aria Jisas nakripam nakri, "Nyak nyatik agwudok urusag aria nyakri yopugwi. Aria anah nyumnah ta kupaishi ta shunaki shununug aria ta mare shukutukuk anam atum utom mutemaguk iruhw um kupaimi utom uwe, uwok. Ihibor-morim ta shuburunik bubuh bukus atap atin."

*Jisas Nakri Sabainyi Enenyenen Amaen Ta Nyutogur (Matyu 24:3-14; Luk 21:7-19)*

<sup>3</sup> Aria Jisas nato nakih nape agundok iruhw um yoduhw Oliv wobreahah um Iruhin ananit debeiti urupat tataoum. Aria Pita nani Jems aria Jon hani Andru amam atum hanak hatogruman aria harigan hakri, <sup>4</sup> "Apak makri nyukripap um ahudok nyumnah douk ta eshudok iganigadæ nyakripap-umesh iri ta shutogurum. Aria shopunek ta maresh shurik shutogurum apak mutrish aria mudukemesh mukri eshudok douk hurukatin um ta shutogur?"

<sup>5</sup> Aria Jisas nakripam nakri, "Ipak gamo punodukem um ta mare anam armam hunaki hunekep rohwumep aria hunekep pugipesh amamin baraen uwe, uwok! <sup>6</sup> Sabaimi armam ta hunaki aria amam atun atun ta hunekep rohwumep hukripep um eikin nyeigur hukri, 'Eik Krais douk Iruhin nagraehe aria neshopoke yanaki iri.' Aria amam ta hunek rohw um sabaishi arpesh.

<sup>7</sup> Ipak ta pumnek baraen um wanohw hwutogur kupaiburi rougunirub warub um. Aria shopunek ta pumnek shupe shurpak hurukatin um ipak pape um. Aria ipak mare punogugur, uwok. Adur wanohw ta hwutogur, aria hugiguk iri nyumnah ta mare arigas hutogur. <sup>8</sup> Aria anag shokugi

nahobig ta shukitak shuni kupaigi shokugi nahobig shurpak. Anan king nini ananish ta shukitak shuni kupaini king nini ananish shurpak. Aria anagun agundok atap ta enyik kwutuk, aria anagun ta debeirubi nyurub besh aria sabaishi ta shugok um nyurub. Enyudok ihinyumorim nyurik iri amaen ta nyutogur kabi douk arudok rarik iri eriger douk armatok kwarig kwomnek um aria kadak kwabuki batowin um.

<sup>9</sup> “Douk namudok aria ipak kanak ta gamo punadukem. Eshesh ta shunaki shusuwep shuraepum debeimi douk hape hasuhw kwotog iri. Aria shopunek, ta shuwishi shep gani numun eshesh Juda shape sheneyagwreh baraen-ogwi urusag. Eshesh ta shep um agundok pasuhw eikin baraen pagipesh eik um. Aria eshesh ta shusuwep shuraepum amam debeimi gavman iri huni amam king hapeum pukripam Iruhin ananin yopinyi baraen douk nyakrium eik iri. <sup>10</sup> Aria sagomatin ekish arpesha ta shunak ihirubum warub bape agundok atap iri shukripesh Iruhin ananin yopinyi baraen iyoh, aria hugiguk iri nyumnah ta kadak hutogur.

<sup>11</sup> “Aria abudok nyutob eshesh shusuwep shuraep shunak shunek kwtumep um, ipak mare punogugur aria pukri ta punak aria piyagwreh mu-mam, uwok. Ihinyumorim baraen Iruhin ta nukepen abudok atub nyutob ipak pakri piyagwreh um. Douk namudok aria maren baraen ipak urkwip purumen iri, ipak ta pukriyen. Um maresh? Enyen douk madae ipak kanak pukrienyi uwe, uwok. Enyen douk Iruhin ananin Mishin nyepuhur aria douk pakrienyi. <sup>12</sup> Aria enesh arpesha ta nyirub juwehos-irub um esheshish ashukenyish owashish aria ta shunekumesh kwot shuweshikesh aria shunak kupaishi shesh shugok. Aria anam aruhim ta nyirub juwehos-irub um amamish batowish aria ta hunekumesh kwot um huweshikesh aria shunak kupaishi shesh shugok. Aria batowish shopunek ta nyirub juwehos-irub um esheshish amakeniyish aria ta shunekumesh kwot um shuweshikesh aria shunak kupaishi shesh shugok. <sup>13</sup> Aria ihishmorim arpesha ta shukri wokumep aria shukep agabus shukri ipak yoweipi um agundok pagipesh eik um. Aria eshudok douk shugipesh eik ddogowish atish arigaha shugok iri, Iruhin ta nunaraesh shutanamori shupe wosik abom.”

### *Jisas Nakri Debeinyi Amaen Abom Ta Nyutogur (Matyu 24:15-28; Luk 21:20-24)*

<sup>14</sup> Aria Jisas ta nakri namudok, “Aria ipak ta putik kupaishi shuraauri enyudok yoweinyi mugu abom shunaki shuwishi shunyubuk numun Iruhin ananit debeiti urupat aria ta nyunekat tubosusih. Enyudok yoweinyi mugu Iruhin douk nakri uwok um nyukus numun ananit debeiti urupat iri.”

Arpen\* nyutorih enyudok baraen iri ta gamo nyudukemen wosik.

“Aria abudok nyutob arpesha shape ihirubmorim warub bape shokugi nahobig Judia iri ta shuruwok shunak um yodururuh-igun um. <sup>15</sup> Aria shape aduk hurukatin um esheshig urusag iri, ta mare shukitak shuwishi urusag um shunahuri enesh eshudok eneshenesh uwe, uwok. Eshesh ta shuruwok shunak meyoh abom. <sup>16</sup> Aria eshudok douk sheyotu nubarigos iri ta mare wata shatanam shusahur shunak um esheshig urusag um shunahuri esheshig saketog uwe, uwok. <sup>17</sup> Aria gihauoudok aparuhiwari armago uni oudok douk wasuhw batowish douk watak shawok nyumeb iri. Ahudok nyumnah owo ta wanomnek debeiri eriger! <sup>18</sup> Aria ipak ta punek beten um enyudok debeinyi amaen um mare ta nyutogur abudok nyumanugos-ibi nyutob ta butogrum uwe, uwok. <sup>19</sup> Ahudok nyumneh,

\* **13:14:** Enyudok baraen Jisas madae nukrien uwe. Enyen douk Mak kanak nenyem.

enyudok amaen ta nyutogur aria arpesh ta shumnek debeiri eriger. Arudok eriger seiwok Iruhin nenek agundok atap nani eneshenesh shani arpesh shatogur shape shanaki arigaha shatograri douk, aria envyudokmori amaen madaen enen nyutogur aria nyunek arpesh shumnek arudokmori eriger uwe. Aria kweipon shopunek, arpesh ta mare wata shumnek anar arudokmori eriger uwe, uwok. <sup>20</sup> Aria Debeini nugraeh sabaihi nyumneh um enyudok amaen nyutogur akure, ta mare enesh arpesh shupeik, uwok. Ihishmorim ta shugok shutuh. Aria anan urkum morum ananish arpesh anan nanagraehesh iri aria nagraeh karowih meyoh nyumneh um enyudok amaen nyutogur um. <sup>21</sup> Aria ta abudok nyutob enesh arpesh shunaki aria shukriep shukri, 'Ipak tik, Krais douk Iruhin nagraehan neshopokan nanaki iri anudok nape agundok o nani nape ganik um, ipak mare punek bilipumesh uwe, uwok.' <sup>22</sup> Sabaimi armam atun atun ta hunaki hunek rohwumep hukri, 'Eik Krais.' Aria amam ta hunaki hunek rohwumep aria amam atun atun ta hukri, 'Eik anan profet.' Aria amam ta hunek enenyenen Iruhin atun neneken iri mour. Amam ta hunekesh namudok um hukri hunek rohw um Iruhin nanagraehesh iri arpesh um shukri adur amam Iruhin nataurumam iri. Aria ta amam dodogowim akure, amam ta hunek rohwumesh. Aria ta uwok. <sup>23</sup> Namudok aria ipak gamo pudukemesh um abudok nyutob enyudok debeinyi amaen nyutogur um. Eik douk enyudok yarig yakriepuk um ihishmorim eshudok eneshenesh douk ta shutograri."

*Eik Anudok Arman Douk Yatogur Adurinyi Arpen Iri Ta Wata Itanamori  
(Matyu 24:29-31; Luk 21:25-28)*

<sup>24</sup> "Aria ahudok nyumneh um enyudok amaen douk ta nyunek arpesh shumnek debeiri eriger iri ta hunak hutuhuk, aria 'nyumnahin nini wabin aub ta dokotigun-umab.

<sup>25</sup> Aria eneshenesh shape iruhw utag iri shuni aub iri unib ta grurugwresh aria unib ta unatuk ugruki atap."

<sup>26</sup> "Aria abudok nyutob, Eik Anudok Arman douk yatogur adurinyi arpen iri ta wata ikutukuk iruhw heven inaki. Eik ta dodogoiwe itrugun abom aria itemori onog orug inaki. <sup>27</sup> Aria ta ishopok eikish enselahos shunak ihigunmorim um agundok atap aria shuraui ihishmorim eik yanagraehesh iri arpesh shunaki shupe atugun."

*Wobuwobren Baraen Um Rowog Fik  
(Matyu 24:32-35; Luk 21:29-33)*

<sup>28</sup> "Ipak urkwip purum enyudok rowog fik aria pudukemesh. Abudok nyutob enyen nyupe nyunareh obi nyutob, ipak ta putrin aria pudukemesh pukri douk hurukatin um wah atuh hutao. <sup>29</sup> Aria douk ta namudok atin. Ipak ta putik enyudok ihinyumorim amaen douk iganigadae yakriep-umen iri nyutogur nyunakuk, aria ipak ta pudukemesh um eik douk hurukatin um itanamori. <sup>30</sup> Adur atin eik yakriep! Ipak doukipari, enep ta mare arigas pugok uwe, uwok. Ipak ta wata pupé aria envyudok ihinyumorim amaen douk iganigadae yakriep-umen iri ta nyutogur. <sup>31</sup> Ihishmorim eshudok eneshenesh douk shape iruhw utag iri shuni utag atug, shuni ihishmorim shape agundok atap iri shuni atapig nahobig shopunek ta burukworesh shunak shuwishuk. Aria eikin baraen ta nyupe ihih nyumneh."

*Ta Mare Enesh Arpesh Shudukem Ahudok Nyumnah Eshudok Shutogurum  
(Matyu 24:36-44)*

<sup>32</sup> Aria Jisas ta nakri namudok, "Madae enen atin arpen nyudukem ahudok nyumnah o aua uwe. Iruhin ananish enselahos shape iruhw iri shani eik ananin nuganin shopunek madae mudukemah uwe. Yain atun nadukemah. <sup>33</sup> Ipak douk madae pudukem ahudok nyumnah douk ta eshudok eneshenesh shutogurum uwe. Douk namudok aria ipak ta gamo pudukemesh aria pupe putrugun-umoh. Ipak mare pupe ba urkwip pushukepuk uwe, uwok. <sup>34</sup> Ahudok nyumnah eshudok eneshenesh shutogurum ta kabi enyudok wobuwobren barae um. Baraen enyudok. Anan arman nakri nukutukuk ananit urupat aria nunak anabur rougunibur wabur. Anan nakri um nunak aria nakitak nagraeh-aguk mour um kupakupaimi amam atun atun douk henekuman mour meyoh iri. Aria nakrip anudok nape neyoh um wit iri um neyoh wit aria nupe nutrugun um anan wata nutanamori um.

<sup>35</sup> "Douk namudok aria ipak ta gamo pudukemesh aria pupe putrugun. Um maresh? Ipak madae pudukem abudok nyutob douk ta urupatinari nutanamori obi nyutob uwe. Anan ta nunaki wabigun o orokohunib um wab o nunaki owotog gwakitak um o nunaki ruwahep. Ipak madae pudukemesh uwe, uwok. <sup>36</sup> Ta wosik atin anan nunaki ahudok atuh aria nutrip um ipak pishuh. Aria uwok, ipak ta pupe putrugun-uman. <sup>37</sup> Aria enyudok barae eik yakrip ipak enyi, douk eik yakrip ihishmorim arpesh shopunek. Ipak gamo pudukemesh aria pupe putrugun um eshudok eneshenesh douk iganigadae eik yakripep-umesh iri ta shutogurum."

## 14

### *Amam Debeimi Hakri Hubo Jisas Nugok (Matyu 26:15; Luk 22:1-2; Jon 11:45-53)*

<sup>1</sup> Eheh douk biyeh shopunek nyumneh watak hapeum shunek agundok debeiguni Pasovaigun worigun aria shuwok bret douk shushaiteh aria madae tukitak debeiti iri uwe. Aria amam debeimi pris hani amam henek skulumesh um lo iri henek rohw um rihirahaen hanak hape haurim Jisas. Amam hauriman hanakum hakri anan atun nunak nupe anagun um, amam husuwan aria hunak hon nugok. <sup>2</sup> Aria amam wata hakri, "Uwok, apak mare muweshikan abudok nyutob shunek worigun obi nyutob. Um maresh? Ta armam armago shutik namudok aria shuhuri wanohw aria shop."

### *Onok Armatok Kwourak Sanda Nyabuh Jisas Ananig Barag (Matyu 26:6-13; Jon 12:1-8)*

<sup>3</sup> Aria Jisas nakitak nanak Betani aria nani Saimon douk riguk ehudok arugeh lepra hapenyan aria hape ananit urupat. Aria douk Jisas nape tebol, nape nawok worigun numun urupat, aria onok armatok kwasuhwi anar yopuri botol douk shenekor anam utom iri kwanak kwawish. Arar douk shukunir um enen yopunyi sanda nyeigrinyum nad iri. Enyen apa shatorin debeibori utabor. Douk kwawish kwanak agundok Jisas naapeum aria kwawor botol ba kwourak enyudok sanda nyabuh Jisas ananig barag.

<sup>4</sup> Aria enesh arpesh shape agundok iri shatik namudok aria eshesh nyirub juwehos-irub aria shakri, "Okwudok kwanunin um enyudok yopunyi sanda? <sup>5</sup> Douk apak muraen munak kupaishi shutorin aria shukop 300 siliwa-ibor utabor akure, douk ta wosik. Apak ta musuhw abrudok debeibori utabor munaki aria misiyabor um eshudok yaruhih arpesh um mutaurumesh!" Eshesh sheneyagwreh namudok aria shape shahaok.

<sup>6</sup> Aria Jisas nakripesh nakri, "Ipak pahaok um maresh? Ipak kutukuk, okwok douk kwonekume yopunyi mour abom. <sup>7</sup> Eshudok utabor wokeshi

ta shini ipak shupe iih nyumneh. Aria meihi nyumnah ipak pakri putaurumesh pukesh anabor utabor um, ipak ta pukesh-abor. Aria eik ta mare ini ipak mupe iihh uwe, uwok.<sup>8</sup> Aria enyudok mour douk okwok ddogowik um kwuneken iri, douk enyudok kweneken. Okwok kwanaki kwourak sanda kwakwrup eikihw yegenyihw um kwehig nuhut she igok aria shurume um.<sup>9</sup> Adur atin eik yakritep. Arpesh shunak ihirubmorim warub agundok atap um shukripesh Iruhin ananin yopinyi baraen um, eshesh ta shukripesh um okwok kweneken iri shopunek aria eshesh ta urkwip purumok.”

*Judas Nani Debeimi Juda Hape Habo Baraen Um Huweshik Jisas  
(Matyu 26:14-16; Luk 22:3-6)*

<sup>10</sup> Aria abudok nyutob, anan um amudok Jisas ananim disaipel nyeigur-inam Judas Iskariot iri nanak gani amam debeimi pris hapeum. Aria nakripam um anan nakri wosik um niyabigam um agundok Jisas nanak napeum aria amam hunak husuhan huweshikan.<sup>11</sup> Aria amam hemnek Judas ananin baraen aria hanadudareh abom aria habo baraen um amam ta tutorun hukon anabor utabor. Aria Judas nakitak nanak aria nape nenen urkum um anah yah um niyabigom Jisas aria amam hunak husuhan huweshikan um.

*Jisas Nani Ananim Disaipel Henek Pasovaigun Worigun Hagnoh  
(Matyu 26:17-25; Luk 22:7-14, 21-23; Jon 13:21-30)*

<sup>12</sup> Douk shenek agundok Pasovaigun worigun um, eshesh apa shawok bret douk shushaiteh ba madae tutikat debeiti iri uwe. Aria ahudok sagomih nyumnah, eshesh apa shabo sipsipahos um shunek agundok Pasovaigun worigun um. Aria Jisas ananim disaipel harigan hakri, “Nyak nyakri apak munak munekagun agunum agundok Pasovaigun worigun um nyak nyunak nyugnoph?”

<sup>13</sup> Aria Jisas neshopok biom ananim disaipel hanak aria nakripam enyudok baraen nakri, “Ipak punak wabur aria ta puparug anan nusahi anap abar baropi marup. Ipak putrun aria pugipeshan punak.”<sup>14</sup> Aria punak puwish atudok urupat anan nunak nuwishat iri aria pukrip atudok urupatinari pukri, ‘Apakin debeini tisa nakri amudok rum douk arpesh shape sheshuh omi douk ta anan nini apak ananim disaipel mupe munek Pasovaigun worigun mugnoh-ami douk mape agunum?’<sup>15</sup> Ipak porigan aria anan ta niyabigep anam debeimi rum iruhitum urupat. Eshesh douk shagitom aria shagabeyam yopum mape. Aria ipak punak puwish pupe punekumap worigun.”

<sup>16</sup> Aria amudok biom disaipel hakitak hanak wabur aria haparug iihish-morim eshudok kabi douk iganigadæ Jisas nakripam um. Aria amam hanak hape henek worigun um hugnoh um Pasova iri.

<sup>17</sup> Douk arigaha wabigep hurukatin um wab aria Jisas nani ananim 12-poreim disaipel hanak hawish hape hawok worigun.<sup>18</sup> Douk hape hawok worigun tebol aria Jisas nakripam nakri, “Adur atin eik yakritep. Ipak anan douk mape mawok worigun iri ta niyabig eikim horim um eik aria amam ta husuhe huweshike aria hurawe hunak um he igok.”

<sup>19</sup> Aria ananim disaipel hemnek namudok aria amamiruh aparuh yoweruh aria amam atun atun harigan hakri, “Ta eik ikrip nyakim horim aka, ta omi?”

<sup>20</sup> Aria Jisas nakripam nakri, “Ipak 12-poreim anan douk ta nini eik ukutu bret tubuh dis aria utoh iri ta nyabigam um eik.”<sup>21</sup> Aria Eik Anudok Arman douk yatogur adurinyi arpen iri ta she igok kabi douk bareaen nyetem Iruhin ananik Buk iri nyakri ta igok um. Aria anudok douk niyabig eikim

horim um eik iri, yoweishi eshudok eneshenesh abom ta shutogur-uman! Douk namudok aria eik yakri gishauman. Douk seiwok amakek madae kwunabuki akure, ta wosik.”

*Jisas Nakom Bret Aria Wain Ananim Disaipel Hashah  
(Matyu 26:26-30; Luk 22:15-20; 1 Korin 11:23-25)*

<sup>22</sup> Douk amam hape hawok worigun aria Jisas nohur anat bret nasuwat aria nenek beten nenek tenkyu um Iruhin aria naworut nako ananim disaipel. Aria nakripam nakri, “Atudok bret douk eikihw yegenyihw. Ipak suwot aria putoh.”

<sup>23</sup> Nakom bret hatoh jurug aria nohuri anap kap wainibar abar borapi aria nenek beten nenek tenkyu um Iruhin aria nako amam atun atun habaroh. <sup>24</sup> Aria anan nakripam nakri, “Abrudok wainibar abar douk eiki-bor owishibor. Douk butourak um butaurum sabaiishi arpesh aria benek enyudok Iruhin ananin adurin atin abom iri baraen kontrak nyutogur dodogowin. <sup>25</sup> Aria adur atin eik yakriep. Eik ta mare wata iwok anabar wainibar abar, uwok. Eik ta ipe arigaha wata inak abrudok wabur Iruhin nepe Debeini um ananish arpesh shapeum ba iyoh, aria eik ta kadak wata ibaroh.”

<sup>26</sup> Aria amam heyorub onohw awehw jurug aria hatogur hato um yoduhw Oliv.

*Jisas Nakripam Um Pita Ta Nunek Rohw Nukri Anan Madae Nudukem Jisas Uwe.  
(Matyu 26:31-35; Luk 22:31-34; Jon 13:36-38)*

<sup>27</sup> Aria Jisas nakrip ananim disaipel nakri, “Kadak ipak ihipmorim ta pukutukuk eik puruwok punakut atun atun. Um maresh? Iruhin ananin baraen nyetem ananik Buk iri douk nyakri, ‘Eik ta ibouk anudok neyoh sipsipahos iri aria sipsipahos ta shuruwok shunak atin atinyuk.’ <sup>28</sup> Aria eshesh ta she igok aria eik ta wata ikitak aria irik inak um Galili. Aria ipak ta pugime punaku.”

<sup>29</sup> Aria Pita nakripam nakri, “Ta ihm-morim hukutukuk nyak aria huruwok um, eik ta ini nyak upe biohw!”

<sup>30</sup> Aria Jisas nakripam nakri, “Adur atin eik yakripen. Kwehigib wab, nyak ta nyunek rohw biyeh otuh nyukri nyak madae nyudukem eik uwe aria owtu tukitak tiyagwreh biyeh.”

<sup>31</sup> Aria Pita dodogowin atun abom nakrip Jisas nakri, “Adur atin eik yakripen, eik ta mare inek rohw ikri eik madae idukemen uwe, uwok. Ta eshesh shukro nyugok um, eik shopunek ta ini nyak shohw ugok ahudok atuh!” Aria ihm-morim disaipel shopunek hakripan enyudok atin baraen.

*Jisas Nape Nenek Beten Nubarig Getsemani  
(Matyu 26:36-46; Luk 22:39-46)*

<sup>32</sup> Aria Jisas nani ananim disaipel hanak hatogur anagun nyeigur-igunum Getsemani aria anan nakrip ananim disaipel nakri, “Ipak pupe agundok aria eik inak inek beten gani.” <sup>33</sup> Aria anan narao Pita nani Jems aria Jon atum hanaman hanak. Aria agundok anan nemnek yowiyokuk abom aria ananihw apahw yowehw abom.

<sup>34</sup> Aria anan nakripam nakri, “Eikin mishin yowen abom aria eik yemnek um yakana igok atin. Douk namudok aria ipak pupe ba piyohe.” <sup>35</sup> Aria natanam nanak madae rougung abom uwe aria nabuh nakus ananin domaen nyatik atap aria nenek beten narig Iruhin. Anan narigan um nukri kadak mumam um aria Iruhin wosik nukutukuk enyudok amaen um mare

nyutogur-uman. <sup>36</sup> Aria Jisas nenen beten nakri, “O Aba\* eikin Yain nyak douk dodogowini abom iri nyasuhw iruhw atap iri. Eik yakri nyak mare nyukutukuk enyudok amaen ta nyutogrome iri uwe, uwok. Aria nyak mare nyugipesh eikim urkum uwe, uwok. Nyak nyugipesh nyakim atum urkum.”

<sup>37</sup> Douk nenen beten jurug aria anan wata natanam nanak natrugun um ananim biom atun disaipel. Douk anan nanak aria natrum um amam heshuh hagok. Aria anan narig Pita nakri, “Saimon, ipak peshuh pagok aka? Ipak madae dodogowip um pupe punubur um atin aua piyohe uwe aka? <sup>38</sup> Ipak pupe piyohe aria punek beten. Um Satan nunaki nukwiraehep um, ipak ta mare punek yoweinyi ina. Adur ipak mishish shakitak um pupipesh eikim baraen aria ipakiruh yegeshiweruh douk madae dodogowiruh uwe.”

<sup>39</sup> Anan nakripam namudok jurug aria anan wata natanam nanak anah shopunek nanak nenen beten narig Iruhin. Anan nenen anudok atun beten iganigadae narik nenekan iri. <sup>40</sup> Anan nanak nenen beten jurug aria wata natanam nanak narpogun-umam. Aria anan natik um amam yobus sam dodog abom aria amam heshuh hagok. Aria anan nenyubarum hakitak aria amam madae hudukemesh um maren baraen ta amam hukripan um uwe.

<sup>41</sup> Aria Jisas wata shopunek natanam nanak nenen biyeh atih um nanak nenen beten narig Iruhin. Douk anan nenen beten jurug aria wata natanam nanak natogrumam aria nakripam nakri, “Ipak peshuh pape meyoh um douk jurug! Ipak kitak! Nyutob douk banaki, aria douk anan ta niyabig yowemi douk henek yoweishi inahos atin iri um Eik Anudok Arman douk yatogur adurinyi arpen iri. Aria amam ta hunaki husuwe huweshike. <sup>42</sup> Aria kitak munak. Tik anudok douk ta niyabig eikim horim um eik iri anudok nanaki.”

### *Amam Hanaki Howeshik Jisas*

(*Matyu 26:47-56; Luk 22:47-53; Jon 18:3-12*)

<sup>43</sup> Douk Jisas wata nepe nakripam atin, aria Judas, nanak um amudok ananim disaipel nanaki natogur-umam. Anan naniri sabaimi hanaki. Amam douk debeimi pris hani henek skulumesh um lo iri hani amam debeimi Juda hapeik aria heshopokam hasuhwi bainatog gwani rowos aria hanaki. <sup>44</sup> Aria amam hakitak hanak yah aria Judas nakrip Jisas ananim horim nakri, “Anudok douk kadak putik um eik inak isuwan inapuprikan iri, anudok douk Jisas. Aria ipak punak pusuwan puweshikan dodog aria puran punak.”

<sup>45</sup> Aria Judas nanak natogurum Jisas atin aria nakri, “Debeini tisa!” Aria nanak nanopuprikan. <sup>46</sup> Aria amam hanak hasuwan dodog aria howeshikan. <sup>47</sup> Douk amam howeshikan aria anan neyotu hurukatin iri natuki ananit bainat aria natupak anan douk neneckuman mour meyoh abom um debeini pris iri ananit atah tukarah.

<sup>48</sup> Aria Jisas narigam nakri, “Ipak pasuhwi bainatog aria rowos um punaki pusuwe puweshike kabi douk eik yakwuaruh iri, aka? <sup>49</sup> Ihih nyumneh eik yani ipak mape atugun aria yape yakripesh baraen numun narub um Iruhin ananit debeiti urupat tataoum aria ipak madae pusuwe puweshike uwe. Aria douk ipak ta punek enyudok baraen douk nyetem Iruhin ananik Buk iri nyutogur adurin.” <sup>50</sup> Aria ihm-morim ananim disaipel hakutukuk Jisas haruwok. <sup>51-52</sup> Douk amam howeshik Jisas haran harik hanak aria anan weroroini nanawashok shigorihwihi rupah atuh iri nagim Jisas nanak. Anan nagiman nanak aria amam hakri husuwan

\* <sup>14:36:</sup> Enyudok baraen Aba Tokples Hibrus Shakri Yain.

huweshikan aria ananih rupah hatukwesih hakusuk aria anan naruwok nanak meyok.

*Amam Henek Kwotum Jisas Um Amam Kaunsol  
(Matyu 26:57-68; Luk 22:54-55, 63-71; Jon 18:13-14, 19-24)*

<sup>53</sup> Aria amam howeshik Jisas haran hanakum debeini pris ananit urupat. Aria amam ihm-morim debeimi pris hani amudok douk henek skulumesh um lo iri hani amam debeimi Juda shopunek hanak hape atudok urupat.

<sup>54</sup> Aria Pita nagipesh Jisas nanak aria anan nagiguk atin. Douk nanak natogur aria nawish narub um anudok debeini pris ananit urupat aria natik amudok douk heyoh Iruhin ananit debeiti urupat iri hautig nyih aria hapeimeh. Aria Pita shopunek nanak nanamam napeum nyih um hiyakan.

<sup>55</sup> Aria amam debeimi pris hani ihm-morim debeimi Juda douk hape hasuhw kwotog iri hahwar anam armam hanaki hape henekuman enen baraen douk madae adurin iri uwe um hakri amam debeimi hon nugokumen iri. Aria amam habirak hatik uwok. <sup>56</sup> Aria sabaishi arpesh shanaki shenekuman kwot shenek rohw shakri Jisas neneh eneshenesh yoweishi inahos aria eshesin baraen douk madae adurin uwe. Aria shopunek, eshesh douk madae shukri atin baraen uwe. Enesh shakri enen aria enesh shakriyuk enen. <sup>57-58</sup> Aria anam armam henek rohw um Jisas hakri amam hemnekan nakri anan ta nubrig Iruhin ananit debeiti urupat douk armam kanan harukat iri tubuh tukus atap. Aria um biyeh atih nyumneh meyok, anan ta wata nurok kupaiti. Aria atat ta mare nurukat ananis wis, uwok.

<sup>59</sup> Aria amam shopunek douk madae hukri atin baraen uwe. Anam hakri enen aria anam hakriyuk enen. <sup>60</sup> Aria amam ihm-morim hape hemnek aria anudok debeini pris nakitak narig Jisas nakri, “Nyak enen baraen um nyukripam um aka, uwok? Nyak nyakri mumam um enyudok baraen amam heneken um nyak iri?”

<sup>61</sup> Aria Jisas neyotu mumukken. Anan madae nukripan enen baraen uwe. Aria anudok debeini pris abom gamo narigan nakri, “Nyak Krais douk Iruhin nagraehen neshopoken nyanaki iri? Aria nyak douk anudok Iruhin douk apak matuk ananin nyeigur nyato iruhw iri ananin Nuginin?”

<sup>62</sup> Aria Jisas nakripan nakri, “O adur atin douk eik atuwe. Aria ipak ta putik Eik Anudok Arman douk yatogur adurinyi arpen iri inak ipe yopunyi rogur ehahum Dodogowini Iruhin abom. Aria shopunek ta itemi orug inaki gani iruhw heven.”

<sup>63</sup> Aria anudok debeini pris abom nemnek namudok aria anan nyibur juwehosibur abom aria nabrig ananih rupeh. Aria nakripan nakri, “Apak mare wata muhwar enesh shopunek arpesh um shunaki shukripap um enesh yoweishi inahos anan nenekeh iri uwe, uwok. <sup>64</sup> Apak douk iganigadae memnek ananin baraen. Anan douk nabubunim um Iruhin aria ipak pakri mumam?”

Aria amam ihm-morim hakri anan neneh inahos aria amam ta hon nugok. <sup>65</sup> Aria howeshiguk ananis nabes aria anam hakitak hanak hakusehan. Aria hadar wis aria hape han aria harigan hakri, “Nyak kripap kabi amam profet um, douk omi nyaen.” Aria amam heyoh Iruhin ananit debeiti urupat iri habowan popaeshohos aria haran hanak.

*Pita Nakri Anan Madae Nudukem Jisas Uwe  
(Matyu 26:69-75; Luk 22:56-62; Jon 18:15-18, 25-27)*

<sup>66</sup> Aria onok armatok kwonekuman mour anudok debeini pris abom iri kwanaki aria kwtatik Pita nape atap narub um anudok debeini pris ananit urupat. <sup>67</sup> Okwok kwatrunk um napeum nyih. Aria okwok kwatrunk duk

aria kwarigan kwakri, "Nubokuhi eik yattrin nyani Jisas douk nanaki wabur Nasaret iri pape."

<sup>68</sup> Aria Pita nenek rohw nakri, "Uwok, eik madae idukemen uwe enyudok berasa nyak nyakriyen iri." Aria anan nikitak nanak hurukatin um atudok wit douk shenekot tape tatiwig anagas iri aria anat owot takitak teyagwreh.

<sup>69</sup> Aria okwok wata kwatanam kwarun aria kwakrip eshudok sheyotu agundok iri kwakri, "Anudok shopunek douk anan Jisas ananin."

<sup>70</sup> Aria Pita wata shopunek nenek rohw nakri, "Eik uwok."

Aria douk madae roubum uwe aria eshesh sheyotu agundok iri wata shakrip Pita shakri, "Adur atin nyak douk enen um Jisas ananin. Um maresh? Nyak douk nyapei shokugi nahobig Galili iri."

<sup>71</sup> Aria Pita nenek rohw nakri, "Ta eik inek rohwumep um, eik yakri wosik um Iruhin ta ne igok! Eik madae idukeman uwe, anudok arman ipak pape pakriyan iri."

<sup>72</sup> Douk anan nakriyuk namudok aria ahudok atuh owot wata shopunek takitak teyagwreh biyeh. Aria Pita urkum morum enyudok baraen iganig Jisas nakriyen iri. Baraen douk enyudok, "Nyak ta nyunek rohw biyeh otuh nyukri nyak madae nyudukeme uwe, aria owot ta tukitak tiyagwreh biyeh." Aria anan nereh yowiyokuk.

## 15

*Amam Harao Jisas Hanak Um Debeini Gavman Pailat Nape Um Hunek Kwotuman*

(*Matyu 27:1-2, 11-14; Luk 23:1-5; Jon 18:28-38*)

<sup>1</sup> Aria ruhur atin, amam debeimi pris hani debeimi Juda hani amudok henek skulumesh um lo iri hani ihm-morim debeimi Juda hasuhw kwotog iri hantorum hape habo baraen. Aria amam hohur onohw maduhw haweshik Jisas ananish roguhw aria haran um Pailat douk nape debeini gavman iri. <sup>2</sup> Douk hanak hatogur, aria Pailat narigan nakri, "Nyak douk eshesh Juda eshesin king aka?"

Aria Jisas nakripan nakri, "Adur, eik douk kabi nyak nyakrium." <sup>3</sup> Aria amam debeimi pris hape henekumen baraen Jisas hadukuman sabainyi rohwin baraen. <sup>4</sup> Douk namudok aria Pailat narigan shopunek nakri, "Tik, amam henekumen sabainyi baraen. Aria nyak ta nyuwanamam enen baraen aka, uwok?" <sup>5</sup> Aria Jisas madae nukri enen baraen uwe, aria Pailat nikitak yowiyokuk abom.

*Pailat Nakripesh Um Shunak Shubo Jisas Shunek Nyiluman Nir Rowog Kruse*

(*Matyu 27:15-26; Luk 23:13-25; Jon 18:39-19:16*)

<sup>6</sup> Ihish kwarahos ahudok nyumlah shenek agundok debeigini Pasovai-gun worigun obi nyutob, Pailat apa nakweshih anan nonoweshik iri nunak fri. Anan apa nukweshih anudok douk eshesh armam armago shukriyan iri. <sup>7</sup> Aria abudok nyutob, anan arman douk nanahwarum Barabas iri nani anam armam hani gavman sharpak aria habo enesh arpesh shagok aria hanaweshik hape. <sup>8</sup> Aria sabaishi arpesh shanaki shantorum shape aria shape shakrip Pailat um nukweshih anan nape nonoweshik iri douk eshesh shukriyan iri nunak fri kabi douk ihish kwarahos anan apa nenekeum um.

<sup>9</sup> Aria douk eshesh sharigan namudok aria Pailat narigeshe nakri, "Ipak pakri ikweshih eshesh Juda eshesin king nunak fri o pakri mein?"

<sup>10</sup> Pailat douk nakri namudok um maresh, anan douk nadukemesh abom um amam pris amamim debeimi douk henek nyigya um Jisas.

Amam hatik sabaishi arpesh shagipesh anan atun aria amam nyirub juwehosirub aturub aria douk harawan hanak henekuman kwot um Pailat.

<sup>11</sup> Aria amam debeimi pris hohur sabaishi arpesh esheshiruh aparuh aria eshesh nyirub juwehos-irub abom um Jisas. Aria eshesh sharig Pailat um nukwesih Barabas nunak fri.

<sup>12</sup> Aria Pailat wata shopunek narigesch nakri, "Ipak pakri eik ineakan mumam anudok arman douk ipak puhwaran eshesh Juda esheshin king iri?"

<sup>13</sup> Aria eshesh wata shopunek shahwar debeg shakri, "Nyak nyenek nyiluman rowog kruse!" <sup>14</sup> Aria Pailat narigesch nakri, "Anan nenek maresh yoweishi inahos um apak mon nugokumesh?"

Aria eshesh madae shumnekan uwe. Eshesh shahwar debeg atin shakri, "Nek nyiluman rowog kruse."

<sup>15</sup> Aria Pailat nakri nunekesh shunadudareh. Douk namudok aria anan nemnek esheshin baraeen aria nakwesih Barabas nanak fri. Aria nakrip amam soldia um hunak hubo Jisas huprukan onohw maduhw segegoihw aria hunak hunek nyiluman nir rowog kruse.

*Amam Soldia Hape Henekan Enenyenen Jisas  
(Matyu 27:27-31; Jon 19:2-3)*

<sup>16</sup> Aria amam soldia hasuhw Jisas haran hanak hawish debeini gavmman ananit debeiti urupat aria hahwar ihm-morim amudok anam soldia shopunek hanak. <sup>17</sup> Aria amam horuman anat routari owishiboriti saket. Aria harokes onohw segego hwatogrohw iri maduhw hwahwunug kabi douk king ananit hat um, aria hwahwem-uman um ananig barag. <sup>18</sup> Aria amam hape habubuniman hakri, "O ruwahep nyak eshesh Juda esheshin king!"

<sup>19</sup> Aria hohur anah aruh aria hape habo barag sabaih atuh aria hape hkusehan. Aria amam henekan enenyenen hanak habuh hoduk ohrubus hurukatin um anan um hutuk ananin nyeigur nyuto iruhw kabi douk anan king um. <sup>20</sup> Douk amam henekan enenyenen jurug, aria hatrun hawaruk atudok owishiboriti saket. Aria wata hohur ananah rupeh hehuruman aria harawan hanakum hunek nyiluman nir rowog kruse.

*Amam Henek Nyilim Jisas Neir Rowog Kruse  
(Matyu 27:32-44; Luk 23:26-43; Jon 19:17-27)*

<sup>21</sup> Douk hanak orokohunih um yah aria haperug Saimon douk nanaki wabur Sairini iri. Ananim nugamim douk Aleksander nani Rufus. Anan douk nape iri urah nanaki aria nakri nunak nuwish anabur de-beiburi wabur. Aria douk amam haperugan namudok aria amam soldia dodogowim atum hakripan um nosah Jisas ananin rowog kruse. <sup>22</sup> Aria amam harao Jisas hanak anagun douk shahwaragun um Golgota iri. Baugenyum um enyudok baraeen douk nyakri arpenyg barag. <sup>23</sup> Aria agundok amam hakutu anan marasin nyeigurinum mer nabuhum wainibar abar aria hakri huko Jisas nuburoh. Aria anan nakri uwok. <sup>24</sup> Aria amam henek nyiluman neiruk rowog kruse aria hohur ananah rupeh hehubuk aria hape habirak kabi douk satu\* um. Amam habirak um anan nunek uhwin iri nunohur anah rupah. Aria amam henekesh namudok atinyum ihilmorim ananah rupeh.

<sup>25</sup> Aria douk ruhur, arigaha 9 kilok wah hatao aria amam henek nyiluman neir rowog kruse. <sup>26</sup> Aria amudok douk henek-uman baraeen Jisas iri howem enyudok baraeen douk amam henek kwotuman-umen iri hakri,

\* **15:24:** Tik Aposel 1:26.

### ESHESH JUDA ESHESHIN KING.

aria heshopen iruhw um rowog kruse agundok Jisas neir um.

<sup>27</sup> Aria agundok amam henek nyilim Jisas neir orokohun aria biom hakwuaruh iri heir wobuwobur hurukatin um anan. <sup>28</sup> [Amam douk henek nyiluman nani amudok hakwuaruh iri aria henek enyudok baraen nyetem Iruhin ananik Buk iri nyatogur adurin. Baraen douk enyudok, "Eshesh shatrun kabi douk nabrig lo iri um."]

<sup>29</sup> Aria arpesh shenek yowi kare iri shape shabubuniman aria sharigan shakri, "Nubokuhi nyakri nyak ta nyubrig Iruhin ananit debeiti urupat aria hukri um biyeh atih nyumneh um, nyak ta wata nyurukat! <sup>30</sup> Douk namudok aria douk nyak nyukweshih nyak kanak aria nyukutukuk rowog kruse nyubihi atap!"

<sup>31</sup> Aria amam debeimi pris hani amam douk henek skulumesh um lo iri shopunek hanaki hape hahan henekan enyenyen. Aria amam kanak hanakripam hakri, "Anan nutaurum kupaishi, aria anan douk madae nutaurum anan kanak uwe. <sup>32</sup> Aria anan douk Krais eshesh Israel esheshin king douk Iruhin neshopokan nanaki iri akure, douk anan nukutukuk rowog kruse nubihi atap. Aria apak mutrun aria ta munek bilipuman!" Aria amudok biom douk hataur wobuwobur hurukatin um Jisas iri shopunek hahan hakripan enyenyen.

### Jisas Nagok

(Matyu 27:45-56; Luk 23:44-49; Jon 19:28-30)

<sup>33</sup> Douk aun nakihi arigaha 12 kilok aria wab babuhi. Aria ihirub-morim eshesh Juda esheshirub warub betem arukwtigun um atin. Agagun arukwtigun nape namudok arigaha wabigep 3 kilok aria wah wata hatao aria arisigun. <sup>34</sup> Aria wabigep 3 kilok, Jisas nahwar debeg um esheshin baraen nakri, "Eloi, Eloi, lama sabaktani?" Baugenyum um enyudok baraen douk nyakri, "Eikin Iruhin, eikin Iruhin, nyak nyakutukuk eik um maresh?"

<sup>35</sup> Aria enesh arpesh sheyotu agundok iri shemnekan aria shakri, "Ipak pumnek, anan nahwar Ilaija."

<sup>36</sup> Aria anan arman nasahur nanak nohur enen spans<sup>†</sup> nosegurin anabar nubutibari abar. Aria nanyaur anah aruh aria natuken nyato um Jisas ananit nokwat um nubarah. Aria anudok arman nakripesha nakri, "Jurug aria apak mupe mutrugun. Ilaija ta nunaki nukweshihan nubuhi rowog kruse aka, uwok?"

<sup>37</sup> Aria Jisas nahwar debeg aria anan nagok. <sup>38</sup> Aria ahudok rupah<sup>‡</sup> hataur numun Iruhin ananit debeiti urupat iri tukarah um biyeh. Tukarahi gani iruhw arigaha hanak habuh hatao. <sup>39</sup> Aria amam soldia amamin debeini douk neyotu hurukatin um rowog kruse Jisas neir um natik agundok Jisas nagok um aria nakri, "Adur atin anudok arman douk Iruhin ananin nunganin!"

<sup>40</sup> Aria agundok, ono armago weyotuwi madae rougun abom uwe aria wape watrishi. Onok douk Maria douk kwanaki wabur Makdala iri kwani Salome, wani kupaikwi Maria douk kwabuki shokuni Jems nani Josis iri.

<sup>41</sup> Oudok armago riguk Jisas nape shokugi nahobig Galili um, owo apa wagipeshan aria wape wenekuman worigun. Aria sabaiwari kupaiwari armago douk waniri Jisas shatowi gani Jerusalem iri shopunek weyotuwi aria wape watrishi.

<sup>†</sup> 15:36: Putik futnot nyape Matyu 27:48 iri.    <sup>‡</sup> 15:38: Putik futnot nyape Matyu 27:51 iri.

**Habre Jisas Hanak Haruman**  
*(Matyu 27:57-61; Luk 23:50-55; Jon 19:38-42)*

<sup>42-43</sup> Aria ahudok nyumnah shabo Jisas ahi, eshesh shape shenek es-heshigun worigun aria mahish um ruwahepih Sabat shishoh iri. Aria ahudok atuh nyumnah arigaha wabigep, aria Josep douk nanaki wabur Arimatea iri nanaki. Anan douk anan um eshesh Juda esheshin debeini kaunsol douk nyeigur nyato-uman iri. Aria anan shopunek apa nape natrugun um abudok nyutob arpesh shuwish um agundok Iruhin nupe Debeini um ananish arpesh um. Aria Josep madae nunogugur uwe, uwok. Anan nanak um Pailat naopeum aria narigan um anan nunak nubre Jisas nunak nuruman. <sup>44</sup> Aria douk Pailat nemnek namudok aria anan nakitak yowiyokuk abom um agundok Jisas nagok arigas abom um. Aria anan nahwar amam soldia amamin debeini nanaki aria narigan nakri, “Adur, Jisas nagok aka, watak?”

<sup>45</sup> Aria anan nakrip Pailat um Jisas douk adur nagok. Douk namudok aria Pailat nakrip Josep um nubreyan nunak aria nuruman. <sup>46</sup> Aria Josep anak nator anah yopuhi shigorihwihi rupah nasuah aria nanak nabre iri Jisas rowog kruse nabuhi atap neshirehan aria nanak naruman. Anan nanak nawish nanabuk numun onohw wonugwehw douk sharokohw shawish onok burbuduk iri. Douk nawish nanabukuk aria natogur natotigosi anam debeimi utom manaki neshopam ahwudok wonugwehw. <sup>47</sup> Aria Maria douk kwanaki Makdala iri kwani kupaikwi Maria douk kwabuki Josis iri wape watrugged. Aria watiku agundok douk Josep anak nabukuk Jisas um.

## 16

**Jisas Wata Nakitak Nape**  
*(Matyu 28:1-8; Luk 24:1-12; Jon 20:1-10)*

<sup>1</sup> Douk wabigep hurukatin um wab ahudok nyumnah Sabat, eshesh Juda shape meyoh ahi hatuh, biwotuk armago wanak wator anar wel douk reisik wosik iri um wakri unak urayok Jisas ananihw yegenyihw. Oudok armago owowish nyeiguhw douk eshudok. Maria douk kwanaki Makdala iri kwani kupaikwi Maria douk kwabuki Jems iri, wani Salome. <sup>2</sup> Aria ruwahepih sagomatinyih nyumnah um wilk,\* wata ruhur atin, owo wakitak wanak gani wonugwehw hwapeum. Douk owo wanak watogur wonugwehw hwape um aria wah ko hatao. <sup>3</sup> Aria owo wata wape wanak yah aria wanayagwreh wakri, “Ta omi nyutotigasuk utom douk magah wonugwehw iri?”

<sup>4</sup> Aria owo wanak hurukatin aria wakri utrugunu aria watiku amudok takweimi utom douk magah wonugwehw iri douk madae anam mutao uwe. Amam douk matatigos manak makusuk anagas. <sup>5</sup> Aria owo wanak wawish numun ahwudok wonugwehw aria watik anan weroroini arman, nenenek rouhi shigorihwihi rupah iri nape. Anan naopeum yopunyi rogor ehah numun wonugwehw aria owo wakitak yowiyokuk abom.

<sup>6</sup> Aria anan nakriko nakri, “Ipak mare pukitak yowiyokuk uwe, uwok. Eik yadukemesh, ipak douk paurim Jisas douk nanaki wabur Nasaret iri. Anan douk shenek nyiluman neir rowog kruse iri. Aria ipak tik, okwudok outuk douk shanabuk um. Agundok madae anan nukus uwe, uwok. Anan douk nakitak nape. <sup>7</sup> Aria ipak punak pukrip ananim disaipel huni Pita pukri, ‘Jisas iganigadae narik nanak um Galili. Aria ipak pugiman punak putogrumana kabi douk nubokuhi anan nakriko-pep-umaguk um.’”

\* **16:2:** Putik futnot nyape Matyu 28:1 iri.

<sup>8</sup> Aria douk owo womnek namudok aria wakutukuk wonugwehw watograri aria wosahur wanak. Owo wanogugur abom aria owo arugoguhwiar wao atin wanak. Aria shopunek owo madae ukripaguk enesh arpesh um eshudok owo watrish iri uwe.

*Jisas Natogur Um Maria Douk Kwanaki Makdala Iri Kwatrur  
(Matyu 28:9-10; Jon 20:11-18)*

<sup>9</sup> [Douk eshes] Juda shape meyoh ahi nyumnah Sabat iganigadae hatuh. Aria ruwahepih sagomatinyih nyumnah um wik,<sup>†</sup> ruhur atin Jisas wata nikitak nape. Aria sagomatin anan natogur um Maria douk kwanaki Makdala iri. Okwok douk riguk 7-poreish yoweishi sagabehos shapenyok aria anan wata nahiayaheshuk sharuwok iri. <sup>10</sup> Douk kwatrur-uguk aria okwok kwanak kwatogur um ananim disaipel aria kwatrurum um amamiruh aparuh douk yoweruh aria hape hereh. Aria okwok kwakripam um okwok kwatik Jisas wata nikitak napeum. <sup>11</sup> Aria amam hemnegok aria madae hunek bilip uwe. Amam hakri okwok kwenek rohw.

*Jisas Natogur um Ananim Biom Disaipel Gani Yah Aria Hatrun  
(Luk 24:13-35)*

<sup>12</sup> Douk enyudok nyanakuk aria anah nyumnah, biom Jisas ananim disaipel hakitak hakutukuk wabur aria hagim urahih yah hanak. Amam hanak aria Jisas natogur nape anagun sikigun aria nanaki natogur-umam.

<sup>13</sup> Anan natogur-umam hatrun aria amam wata hatanam hanak hakrip amudok anam disaipel um agundok amam hatrun um. Aria douk amam hakripam aria amam shopunek madae hunek bilipumam uwe. Amam hakri amudok biom douk henek rohw.

*Jisas Nakrip Ananim Disaipel Um Mour Amam Ta Huneken Iri  
(Matyu 28:16-20; Luk 24:36-49; Jon 20:19-23)*

<sup>14</sup> Aria hagiguki, ananim 11-poreim disaipel hape hawok worigun aria Jisas nanak natogur-umam. Aria naham nakri, "Ipakigos baragos douk dodogowigos aria seshuek abom. Nubokuhi enesh arpesh douk shatruwe wata yikitak yape aria shanaki shakriep aria ipak madae punek bilip uwe. Ipak pakri eshes] shape shenek rohwumep." <sup>15</sup> Aria anan nakripam nakri, "Ipak punak ihirubmorim warub bape agundok atap iri aria pukripesh Iruhin ananin yopinyi baraen ihishmorim arpesh. <sup>16</sup> Ipak pukripesh aria eshudok douk shumnek enyudok baraen shunek bilipumen aria kupaishi shunek baptaisumesh iri, Iruhin ta wata nunarawesh shutanamori shupe wosik abom. Aria eshudok douk shumneken aria mare shunek bilipumen iri, Iruhin ta nunekumesh debeiti kwot um eneshenesh yoweishi inahos eshes] shape shenekesh iri. <sup>17</sup> Aria eshudok douk shunek bilip iri, Iruhin ta nutaurumesh nunekesh dodogowish aria ta shunek sabainyi mour kabi douk Iruhin atun neneken iri. Eshesh ta shihiyahuk sagabehos douk shape arpesh iri shukripesh um ekin nyeigur aria ta shutogur shuruwok. Aria shopunek, ta shiyagwreh enen kupainyi baraen. <sup>18</sup> Aria ta shuhur yuguuhw douk hwabo arpesh shagok iri shusuwoguh esheshis wis um, ogwoguh ta hunatukesh aria ta mare shugok uwe, uwok. Aria ta shuwok anabar abar douk arpesh apa shabroh ba shagok iri um, eshes] ta mare shugok. Aria eshes] ta shuwemesh wis sharao arugeh iri arpesh aria eshes] ta wata yopish."

*Iruhin Narao Jisas Nato Um Iruhw Heven  
(Luk 24:50-53; Aposel 1:9-11)*

<sup>†</sup> **16:9:** Putik futnot nyape Matyu 28:1 iri.

<sup>19</sup> Aria douk Debeini Jisas nakripenh baraen neyaten aria Iruhin naran nato um iruhw heven. Anan nato aria nanak nape yopunyi rogur ehahum Iruhin. <sup>20</sup> Aria Jisas ananim disaipel hanak sabairubi warub aria hakripenh Iruhin ananin yopinyi baraen sabaishi arpesh. Aria abudok nyutob amam hape hakripenh yopinyi baraen um, Debeini nataurumam neneke amam ddogowim aria henek sabainyi mour Iruhin atun neneken iri. Aria arpesh shatik enyudok mour amam heneken iri aria shakri adur atin, amam douk Iruhin nataurumam. Aria amamin baraen douk adurin atin abom.]

# Iruhin Ananin Yopinyi Baraen Luk Nenyem Iri Banenyi Baraen Um Luk

1:1-4 Nyarik iri baraen

1:5-2:52 Jon neneb baptaisumesh iri natogur aria Maria kwobuki Jisas

3:1-20 Jon neneb baptaisumesh iri nagabeman yah Jisas

3:21-4:12 Jisas neneb baptais aria Satan nanaki nakwiraehan um nunek yoweishi inahos

4:13-9:50 Jisas nanak shokugi nahobig Galili nakripesh Iruhin ananin baraen aria nagabe arugeh haesh iri arpesh

9:51-19:27 Jisas nakutukuk shokugi nahobig Galili aria natanam nanak Jerusalem nakripesh Iruhin ananin baraen

19:28-23:56 Jisas nanak Jerusalem nakripesh yopinyi baraen aria eshesh Juda esheshim debeimi henekuman baraen aria han henek nyiluman rowog kruse nagok

24:1-53 Jisas wata nakitak aria nekesh mour ananish disaipel

## *Luk Nowem Enyudok Baraen Nyanak Um Tiofilus*

<sup>1</sup> O Tiofilus, riguk sabaishi arpesh shakwiraeh showem baraen um ihish-morim eshudok eneshenesh douk Iruhin nohur Jisas nenekech shatogur orokohun um apak iri. <sup>2</sup> Eshesh showem baraen um eshudok eneshenesh douk eshudok arpesh sagomatin shatrish esheshis nabes aria shakripap-umesh iri. Eshudok shakripap iri arpesh douk shenek mour um shakripesh Iruhin ananin baraen iri. <sup>3</sup> Aria shokubur atin eik yape yarigesch yenek surisorik yaurim baugeniyum baraen um gani baugos enyen nyakitak nyanakumori. Namudok aria eik shopunek yakri wosik um inyem wosik atin enyudok baraen kabi douk sagomatin nyakitak nyanaki um aria ishopoken nyunakumagu nyak yopuyopuni arman Tiofilus. <sup>4</sup> Eik yenekesh namudok um nyak ta nyudukemen wosik enyudok baraen douk riguk shenek skulumen-enyi, douk adurin atin abom.

## *Iruhin Ananin Ensel Nyakrip Sekaraia Um Ta Nubuki Anan Nuganin*

<sup>5</sup> Abudok nyutob Herot nape king um shokugi nahobig Judia obi nyutob, anan arman shahwaran um Sekaraia iri shopunek nape. Anan douk anan pris. Aria anan douk nanaki apudok awirop um pris douk shahwaram um Abiya iri. Aria ananik irohukwik douk shahwarok um Elisabet. Okwok shopunek douk kwakitak agundok Aron ananip awirop iri. <sup>6</sup> Aria Iruhin natrish um, eshudok biyesh shagipesh lo atin abom iri biyesh shape. Eshesh shagipeshen sheyaten um Debeini nakripesh-enyi baraen nyan lo seiwok nakoguk Moses enyi. <sup>7</sup> Aria eshesh douk batowish wokesh. Um maresh, Elisabet kupik. Aria eshesh biyesh douk ruwehesh abom.

<sup>8-9</sup> Arigaha aria anah nyumnah douk Sekaraia nani ananip awirop amam pris amamih nyumneh um hunek mour numun Iruhin ananit debeiti urupat um hatogur. Aria amam henek enesh eshudok hagipesh ehudok amamih aih um hudukenmesh um ta meini pris nurik nuwish nunek ofa um eshudok nuko Iruhin. Aria ahudok nyumnah, Sekaraia neneb uhwin um nuwish Debeini ananit debeiti urupat um nuweh eshudok sheisik wosik iri um nunek ofa nuko Iruhin um enyudok alta. Amam henekesh namudok aria anan nawish numun Debeini ananit debeiti urupat. Aria Sekaraia neyotu numun nape nuweh eshudok neneb ofamesh nako Iruhin aria

Iruhin nape natrun. <sup>10</sup> Aria abudok nyutob nawish nuweh eshudok obi nyutob, ihishmorim arpesh shenek lotu um Iruhin iri shantorum shape aduk shape shenek beten.

<sup>11</sup> Aria enen Debeini ananin ensel nyatogruman aria natrin. Enyen nyatogur meyoh nyeyotu um yopunyi rogor ehahum enyudok alta douk amam pris hape howem eshudok sheisik wosik iri henek ofamesh hako Iruhin iri um. <sup>12</sup> Douk Sekaraia natrin aria anan nakitak yowiyokuk aria nanogugur abom. <sup>13</sup> Aria enyudok ensel nyakripan nyakri, "Sekaraia, nyak mare nyunogugur. Iruhin douk nemnek nyakin beten aria nyakik irohuk-wik Elisabet ta kwubukumenyi anan nunganin. Aria nyak ta nyuhwaran nyeigur Jon. <sup>14</sup> Aria nyakihw apahw ta hur wosik aria ta nyunadudareh nyuriguk. Sabaishi arpesh shopunek ta shunadudareh abudok nyutob okwok kwunabuki obi nyutob. <sup>15</sup> Aria agundok Debeini nutrun um, anan ta nupe debeini arman. Anan ta mare nuwok wainibar abar buni anabar ddogowibari, uwok. Anan ta wata nur apahw aria Iruhin ananin Mishin ta nyuwishan aria nyupenyan shuknin abom. <sup>16</sup> Anan ta wata nurauri sabaishi arpesh eshesh Israel shukutukuk eneshenesh yoweishi inahos aria wata shutanamori um Iruhin esheshin Debeini. <sup>17</sup> Anan ta ddogowin atun kabi douk profet Elaija um. Aria shopunek, anan ta nurao Elaija ananiih aih. Aria anan ta nurik aria Debeini ta nwiguk. Anan ta nubadig arhim amamip urkwip aria amam ta wata urkwip punawasham amamish batowish. Aria ta nubadig madae shumnek baraen atin iri esheship urkwip aria ta wata shurao yopishi arpesh esheship urkwip. Aria anan ta nutaurum Debeini ananish arpesh um shukeshuguk agabus yoweishi inahos aria shunek redi shupe shutik um Debeini nunaki nutaurumesh um."

<sup>18</sup> Aria Sekaraia nakrip enyudok ensel nakri, "Eik douk ruwogin aria eikik irohukwik shopunek douk ruwogik. Aria eik ta idukemesh mumam aria douk ikri enyudok baraen douk adurin?"

<sup>19</sup> Aria ensel wata nyakripan nyakri, "Eik Gabriel douk yeypu Iruhin napemori. Anan douk nashopoke yanakumori ini nyak wiyagwreh aria ikripen enyudok yopinyi baraen. <sup>20</sup> Aria nyak douk madae nyunek bilip um eikin baraen uwe. Douk namudok aria nyakit nokwat ta tishuk tupe namudok atin. Nyak ta mare nyiyagwreh atin arigaha ahudok nyummah Iruhin nakriyahum enyudok eik yakripenyumen iri baraen nyutogur adurin atin."

<sup>21</sup> Aria abudok nyutob ensel nyape nyakripan baraen obi nyutob, es-hudok armam armago shape aduk iri shape shabeiman. Eshesh shakri maresh shatogruman aria anan douk nape roubi gani numun urupat.

<sup>22</sup> Arigaha douk natograri aria nabirak um nakri nunamesh niyagwreh aria nabirak natik uwok. Douk namudok aria esheship shadukemesh shakri anan natik enesh eshudok eneshenesh gani numun Iruhin ananit debeiti urupat. Aria nakri nukripesh baraen um, anan naurumesh rogur meyoh.

<sup>23</sup> Arigaha douk ananib nyutob um neneh mour pris numun urupat um batuh aria wata natanamum ananibur wabur. <sup>24</sup> Anan nanak nape anob nyutob banak badiguk aria ananik irohukwik Elisabet kwanarahaen. Aria kwanabeshuk kwape urupat atut um 5-poreib aub. <sup>25</sup> Aria kwakri, "Arigaha douk Debeini nutaurume namudok. Anan nawarukuk abraen um agundok arpesh shatruweim yape kipiwe um."

### *Ensel Nyakrip Maria Um Okwok Ta Kubuki Jisas Um*

<sup>26</sup> Douk Elisabet kwanarahaen kwape arigaha douk bakri um 6-poreib aub um, Iruhin neshopok enen ensel nyeigurinyum Gebril iri nyanak um anabur wabur bape shokugi nahobig Galili iri. Abrudok wabur

douk shahwarbur um Nasaret. <sup>27</sup> Enyudok ensel nyaraumokwi bareaen onok armatok shahwarok um Maria iri. Okwok douk wata kwurao anan arman shupe atugun uwe, uwok. Okwok douk shakriok um anan arman shahwaran um Josep iri. Anan douk nakitak king Devit ananip awirop iri. <sup>28</sup> Enyudok ensel nyanaki nyatogrumbok aria nyakripok nyakri, "Ruwahep Maria, nyakin mishin nyur wosik aria nyanadudareh. Debeini nani nyak nape hurukatin aria nenenkumen yopunyi." <sup>29</sup> Aria Maria kwomnek enyudok bareaen aria okwok urkum yowem. Okwok madae kwudukem baugenyum enyudok bareaen ensel nyakripoken iri uwe. <sup>30</sup> Aria ensel nyakripok nyakri, "Maria, nyak mare nyunogugur uwe, uwok. Iruhin douk nanadudareh-umen aria ta nunekumen yopunyi. <sup>31</sup> Mnek! Nyak arman douk wata nyurao anan uwe, aria nyak ta nyonarahaen aria nyubuki anan nunganin. Aria nyak ta nyudowon nyeigur Jisas. <sup>32</sup> Aria anan ta nutogur debeini arman. Aria ta shuhwaran Debeini Iruhin abom douk nariguk ihish arpesh shani eneshenesh eshudok shabuhuk iri um ananin Nuganin. Debeini Iruhin ta nunekan nutogur king kabi douk ananin babukem Devit um. <sup>33</sup> Aria iih nyumneh anan ta nupe deben um Jekop ananish popehesh yamehesh. Anan ta nupe Debeini um ananish arpesh namudok atin iih nyumneh."

<sup>34</sup> Aria Maria wata kwakrip enyudok ensel kwakri, "Enyudok ta nyutogur mumam? Eik wata irao anan arman uwe."

<sup>35</sup> Aria ensel nyakripok nyakri, "Iruhin ananin Mishin ta nyuwishen aria debeini Iruhin ananin dodog abom ta nyishigorin. Douk namudok aria anudok yopuyopuni nunganin abom nuhut nyunubuk iri ta shuhwaran Iruhin ananin Nuganin. <sup>36</sup> Mnek, okwudok armatok Elisabet douk kwani nyak ipak atup awirop iri douk shakri kwape kupik. Okwok douk ruwigok abom aria okwok douk kwanarahaen. Aria douk 6-poreib aub badiyok. <sup>37</sup> Aria eshesh douk madae enesh eshudok eneshenesh douk Iruhin ta nubirak um mare nunekesh iri uwe, uwok." <sup>38</sup> Aria Maria kwakripan kwakri, "Eik yenekuman mour meyoh Debeini iri. Aria anan wosik nunekume enyudok nyutogur kabi douk nyak nyakrium." Aria enyudok ensel nyakutukuk nyanak.

### *Maria Kwanak Kwatik Elisabet*

<sup>39</sup> Enyudok ensel nyanak nyeyagwrehuk um jurug, aria kwape arigaha douk anah nyumneh hanak hadiguk, aria Maria kwanagabe eshudok aria arigas kwaikitak kwatoum yadururuh kwanak. Okwok kwanak um anabur wabur douk bape shokugi nahobig Judia iri. <sup>40</sup> Okwok kwanak kwatogur kwawish Sekaraia ananit urupat aria kwonekumok yopuhi nyumnah Elisabet. <sup>41</sup> Aria douk Elisabet kwomnek um agundok Maria kwonekumok yopuhi nyumnah um, aria batowin nyor okwokwiwh apahw iri nyanagugwanam. Aria Iruhin ananin Mishin nyawish Elisabet abom aria nyapenyok shukunik. <sup>42</sup> Douk nyawishok aria nyakuhur kweyagwreh debeihi mah kwakri, "Nyak nyeshagrakuk ihiyumorim armago um agundok Iruhin nunekumen yopunyi um. Aria shopunek, enyudok batowin nyak nyunyubuki iri, Iruhin ta nunekumen yopunyi atin. <sup>43</sup> Aria enyudok douk nyatogrume um agundok eikin Debeini ananik amakek kwanaki kwatiwe um? Eik douk madae debeikwi armatok uwe. <sup>44</sup> Aria abudok atub nyutob abom eik yemnek agundok nyak nyenekume yopuhi nyumnah obi nyutob, batowin nyor eikiwh apahw iri nyanadudareh aria nyanagugwanam. <sup>45</sup> Nyak douk nyenek bilip um Debeini ananin bareaen aria nyak douk nyanadudareh. Debeini ta nuneken nyutogur kabi douk riguk anan nyakripenyum!"

*Awehw Maria Kweyorub Kwatuk Debeini Ananin Nyeigur Nyato Iruhw  
Um*

<sup>46</sup> Aria Maria kwakri,

“Eik yanadudareh abom aria yatuk Debeini ananin nyeigur nyato iruhw.

<sup>47</sup> Eikin mishin douk nyanadudareh um Iruhin douk nutaurume naraowe yatanamori yape wosik atin iri.

<sup>48</sup> Um mares? Anan urkum morum eik nyeigur woke iri douk yasuhw ananin mour iri.

Douk arigaha kweipon, ihishmorim arpesh ta shukri eik douk Iruhin nutaurume aria neneke yanadudareh atin iri.

<sup>49</sup> Eshesh ta shukri yanadudareh um enyudok debeinyi yopunyi mour abom douk Debeini Iruhin nenekenyume iri.

Aria ananin nyeigur douk nyenek holi abom aria yopuyopunyi.

<sup>50</sup> Anan douk nenek giha abom um eshudok arpesh douk shape shakamum anan shagipeshan iri.

Anan ta nenek gishaumesh arigaha shugokuk aria esheshish batowish shugiguk shukitaki iri shopunek.

Anan ta nunekesh namudok atin.

<sup>51</sup> Aria anan dodogowin nenek mour um, anan apa nabo eshudok arpesh douk

shanahur esheshish nyeiguhw shato iruhw

aria esheship urkwip porum shunek yoweishi inahos iri nahiayahesh sharuwok shanak atin atinyuk.

<sup>52</sup> Anan neyatakuk amam king nam habuhuk

aria natuk nyeiguhw wokeshi arpesh shato iruhw.

<sup>53</sup> Aria nekesh sabaishi yopishi eneshenesh eshudok yaruhibh arpesh iri.

Aria arpesh douk shatik sabaishi eshudok eneshenesh iri neshopokesh shanak wis wohis.

<sup>54</sup> Ananim urkum douk wata morum enyudok adurin atinyi baraen douk seiwok nakripaguk apakish yamehesh-enyi.

Aria nanaki um nutaurum ananish arpesh eshesh Israel douk shasuhw ananin mour iri.

<sup>55</sup> Aria anan urkum morum nunek yopunyi

um Abraham nini ananish batowish iri popehesh yamehesh douk shugiguk shutograri iri

aria nenek gishaumesh namudok atin iih nyumneh.”

<sup>56</sup> Aria Maria kwani Elisabet wape biyab atun aub batuh aria wata kwatanam kwanak um wabur.

*Elisabet Kwabuki Jon*

<sup>57</sup> Aria nyutob um Elisabet kwubanuh obi nyutob banak batograri aria kwabanuh kwabuki armanin batowin. <sup>58</sup> Aria okwokwishi shani eshudok douk shape hurukatin iri shemnek um agundok Debeini nenekumok yopunyi um aria eshesh shopunek shanak shanadudareh. <sup>59</sup> Aria douk arigaha 8-poreih nyumneh hadiguk anudok nuganin, aria shanakumori shutah ananihw yegenyihw. Aria eshesh shakri shudowan nyeigur Sekaraia douk ananin yain nanahwarom um. <sup>60</sup> Aria ananik amakek kwakri, “Uwok. Ananin nyeigur ta muhwaran Jon.” <sup>61</sup> Aria eshesh shakripok shakri, “Nya, ipak atup awirop um douk madae anan arman nunahwar enyudok nyeigur uwe.” <sup>62</sup> Aria eshesh shauraman wis um ananin yaken shariganum shakri nukripesh um meinyi nyeigur anan nakri shuhwar nuganin-uman. <sup>63</sup> Aria anan naurumesh wis um sharauri anat slet aria

nowem enyudok baraen nakri, "Ananin nyeigur douk Jon." Aria eshesh ihishmorim shakitak yowiyokuk abom shape. <sup>64</sup> Aria abudok atub nyutob, Sekaraia ananit nokwat tani yaham wata shanupok neyagwreh aria nape natuk Iruhin ananin nyeigur nyato iruhw. <sup>65</sup> Aria ihishmorim arpesh shape hurukatinyum eshesh iri shanogugur abom. Aria baraaen nyaraehaen nyanak ihirub warub douk betem yodururuh agudok shokugi nahobig Judia iri. Aria ihishmorim shadukemesh um enyudok douk nyatogurum Sekaraia nani Elisabet iri. <sup>66</sup> Aria ihishmorim arpesh douk shemnek um enyudok iri shape urkwip porumen aria shakri, "Anudok nuganin nukitak yopun um, anan ta nutogur manan arman?" Um maresh? Eshesh shadukemesh um Debeini nani anan nape hurukatin aria ananin dodog douk nyapenyen.

### *Baraen Douk Sekaraia Neyagwrehen Um Debeini Ta Nutogur Nutaurumep Iri*

<sup>67</sup> Aria Iruhin ananin Mishin nyawish Jon ananin yaken Sekaraia nyapenyen shuknnin aria neyagwreh Iruhin ananin baraaen kabi douk amam profet heyagwrehen um. <sup>68</sup> Sekaraia nakri,

"Apak mutuk Debeini apak Israel apakin Iruhin ananin nyeigur nyuto iruhw.

Anan nanaki nataurum apak ananish arpesh aria wata nanarap mape wosik.

<sup>69</sup> Anan nagraehumap anan ddogowin atunari arman um nunarap mutanamori mupe wosik abom iri.

Anudok arman douk nakitak Devit nasuhw Iruhin ananin mour iri ananip awirop.

<sup>70</sup> Kabi douk seiwok ananin Mishin nyawish amam yopumi profet aria hakrienyuguk iri baraaen nyakrium.

<sup>71</sup> Anan nakri adur abom um ta nutaurumap nunarap mukutukuk apakish horim.

Aria shopunek ta nutaurumap um nunarap mukutukuk ihishmorim arpesh douk shakapaguk agabus iri.

<sup>72</sup> Riguk nakripeshuk ananin adurin atinyi baraaen kontrak apakish popehesh yamehesh um ta nutaurumesh.

Aria anan douk wata urkum morum ananin kontrak douk riguk nakriyen um douk ta nugipeshen aria nutaurum apak um.

<sup>73</sup> Anan narik nakri iruhw nakripan enen adurin atinyi baraaen abom um apakin yamenen Abraham.

Aria douk nakri nunekenyumap kabi riguk nakri ta nunekenyumap um.

<sup>74</sup> Anan nakri nutaurumap nunarap mukutukuk apakish horim um musuhw ananin mour aria mare munogugur uwe, uwok.

<sup>75</sup> Anan nataurumap um nakri apak mupe agundok atap um, apak mupe ananishi atish mupe holi aria mugipesh lo atin iri arpesh aria anan nupe nutrupsun munek ananin mour.

<sup>76</sup> Aria nyak eikin batowin,

arpesh ta shuhwaren Debeini abom atunari Iruhin ananin profet.

Nyak ta nyurik nyunak nyukrip arpesh um shukutukuk yoweishi inahos shupe wosik atin

aria shupe shutik um Debeini um ta nunaki um.

<sup>77</sup> Nyak ta nyukrip apak ananish arpesh Israel  
aria mudukemesh um anan ta nukweshihuk eneshenesh yoweishi inahos apak menekesh iri,  
aria wata nunarap mutanamori mupe wosik atin.

**78** Apakin Iruhin ta nunek enyudok um maresh, anan douk yopuyopunum apak abom aria nenen gishaumap.

Aria anan ta nuneke lait douk tabuhi kabi aun nakihumori gani iruhw heven tubuhi tuwishap.

**79** Atat ta tubuhmori eshudok arpesh douk shape arukwutigun aria hurukatin um shugok iri aria eshesh ta wata shunatrugun. Anan ta nutaurumap mugipesh ahudok yopuhi yah um mupe wosik aria aparuh hur wosik um."

**80** Aria douk arigaha Jon nikitak yopun aria dodogowin abom um agundok ananim urkum manawasham Iruhin um. Aria nanak nape wehigun um arpesh uwok um. Anan nape agundok arigaha ahudok nyumnah natogur yopugunum aria eshesh Israel shatrun aria nape nakripes Iruhin ananin bareaen ahi iri.

## 2

### *Maria Kukwarumori Jisas (Matyu 1:25)*

**1** Aria abudok nyutob Maria kwanarahaen obi nyutob, Sisar Ogastas nenen enen lo nyanak um ihirubmorim warub. Anan nakri ihishmorim arpesh shape abudok debeibi amnab Rom esheshib iri ta shunaki shurao esheshish nyeiguhw shushem bumeb. **2** Abudok nyutob douk sagomatinyib nyutob um shurao nyeiguhw um. Aria Kwirinius douk nape debeini um gavman um shokugi nahobig Siria. **3** Namudok aria ihishmorim arpesh shanak um esheshirub debeirubi warub sisiguk atin um shuwem esheshish nyeiguhw. Eshesh shanak um debeirubi warub douk seiwok esheshish popehesh yamehesh shapenyarubi.

**4** Aria abudok nyutob, Josep nape wabur Nasaret douk bape shokugi nahobig Galili iri aria nikitak nanak um Betlehem douk bape shokugi nahobig Judia iri. Naburdok douk seiwok shobuki King Devit aburi. Aria Josep douk nanak um Betlehem um maresh? Anan douk nikitak agundok King Devit ananip awirop. **5** Anan nani ananik irohukwik Maria shanak um shuwem esheshish nyeiguhw. Aria abudok nyutob, Maria douk kwanarahaen. **6** Aria eshesh wata shape Betlehem aria nyutob batogur um okwok kwurbanuh um. **7** Aria okwok kwurbanuh kwabuki sagomin nunganin. Douk kwanabuki aria kwesrehan rupeh kwonor nor anas bokis douk shorumesh worigun bulmakauhos shagnoh um. Um maresh? Urupat arpesh sheshuhati douk shuknit um arpesh aria madae anagun nupeik meyoh um eshesh shishuh um uwe, uwok.

### *Enselahos Shakrip Heyoh Sipsipahos Iri Um Jisas*

**8** Aria abudok wab anam heyoh sipsipahos iri harao amamish sipsipahos hatogur aduk abrudok wabur aria hape heyohesh. **9** Aria enen Debeini ananin ensel nyatogramm aria Debeini nenen agundok amam heyotum bogaragun nakusuk. Namudok aria amam hanogugur abom. **10** Aria enyudok ensel nyakripam nyakri, "Ipak mare punogugur uwe, uwok. Eik yanakumori ikripep yopinyi bareaen douk ta nyunek ihish arpesh shunadudareh abom iri. **11** Ahudok nyumnah onok armatok kwabuki anan armanin batowin. Okwok kwanabuki Devit ananibur wabur Betlehem. Anan douk Debeini arman Krais douk Iruhin nagraehan neshopokan yanakumori nunaraao arpesh iri. **12** Aria ipak ta putrun aria pudukeman namudok. Ipak ta putik enen armanin batowin amakek kwesrehen rupeh aria kwonyor nyor anas bokis douk sheremesh worigun bulmakauhos shagnohasi."

**13-14** Douk enyudok ensel nyakripam namudok aria ahudok atuh sabaishi dodogowishi enselahos abom shape iruhw heven iri shatogur shani enyudok ensel sheyotu. Aria shape shatuk Iruhin ananin nyeigur nyato iruhw. Shakri, “Apak matuk Iruhin ananin nyeigur nyato iruhw. Anan douk nape gani iruhw heven iri.

Ipak arpesan pape atap iri douk apa penek Iruhin nanadudareh-umep iri ipakiruh aparuh hur wosik aria punadudareh.”

### *Heyoh Sipsipahos Iri Hanak Hatik Jisas*

**15** Douk enselahos shakutukuk amudok hape heyoh sipsipahos iri shatanam shatomokuk iruhw heven aria amam hanakripam hakri, “Apak munak um Betlehem um mutik enyudok mugu douk nyatogur iri. Enyudok douk Debeini nakripap-umenyuguk iri.”

**16** Namudok aria arigas amam hakitak hanak aria hapanug Maria kwani Josep aria hatik enyudok batowin shopunek nyor bogis kauhos shawok worigunasi. **17** Douk amam hatrin jurug aria hakripesh bareaen douk enselahos shakripom-enyi um enyudok batowin iri. **18** Aria ihishmorim arpesan shemnek enyudok bareaen amam hakripeshuk um aria shakri, “O, mumam mumam namudok.” **19** Aria Maria madae urkum mukwokuk um enyudok ihinyumorim bareaen uwe. Okwok kanak kwape urkum apa morumen. **20** Aria amam hape heyoh sipsipahos iri wata hatanam hanak. Aria amam hanadudareh um Iruhin hape hatuk ananin nyeigur nyato um enyudok amam hatrin aria hemneken kabi douk ensel nyakripomuk um.

### *Shadowan Nyeigur Jisas*

**21** Aria douk Maria kwabuki Jisas aria douk hakri um 8-poreih nyumneh um, eshesh shatah ananihw yegenyihw aria shadowan nyeigur Jisas. Enyudok nyeigur douk Maria wata kupeiguk uwe aria ensel nyakripokuk um shudowan enyudok nyeigur.

### *Simeon Nani Ana Shatik Jisas Numun Iruhin Ananit Debeiti Urupat*

**22** Aria Josep nani Maria shape eneh nyumneh. Eshesh shape shagipesh enyudok lo seiwok Iruhin nakoguk Moses enyi nyakrium. Eshesh shenekesh namudok um Iruhin nutrish aria nukri eshesh douk yopishi. Aria douk ehudok nyumneh hatuhuk aria Josep nani Maria sharao Jisas shanak um Jerusalem um shuko Debeinian. **23** Eshesh shenekesh namudok kabi douk Debeini ananin lo nyakrium. Lo nyakri, “Thim-morim sagomim nugamim amakeniyu womubuki iri ta puko Debeiniam.” **24** Aria eshesh shopunek douk shanak um shurao eshudok eneshenesh um shuko amam pris hunek ofamesh huko Debeini kabi ananin lo nyakrium. Aria Lo douk nyakri namudok, “Arpesan ta sharauri bioguhw armiguuh kabi douk debeibi maishub um o bioguhw yanporeiguhwi armiguuh kabi douk shokubi maishub um. Eshesh shuraeshi aria shunek ofamesh shisheh shuko eik.”

**25** Aria abudok nyutob, anan arman douk shahwaran um Simeon iri nape Jerusalem. Anan nagipesh lo atin iri arman aria apa nenen lotu um Iruhin. Aria anan apa nape natrugun um arman douk Iruhin nagraeihan neshopokan nunakumori nunarao eshesh Israel shupe wosik iri. Aria Simeon, Iruhin ananin Mishin douk nyawishan aria nyapenyan. **26** Aria enyen nyanohur nyakripan um anan ta mare arigas nugok aria ta nutik anudok arman Krais. Anudok douk Debeini nagraehan neshopokan nunakumori nunarao arpesan iri. **27** Namudok aria Iruhin ananin Mishin nyohur Simeon aria nanak nawish numun narub um Iruhin ananit debeiti urupat tataoum. Aria amakeniyish sharauri nugenin Jisas um shunekuman

enyudok douk Iruhin ananin lo nyakrium eshesh ta shunekenyuman iri.  
<sup>28-29</sup> Aria Simeon natrishan nasuwan ananis wis aria natuk Iruhin ananin nyeigur nyato iruhw nakri,

“Debeini, nyak nyagipesh baraen douk riguk nyakri adurin atin um ta ipe arigaha itrunum.

Aria douk nyak nyukri wosik aria eik yasuhw nyakin mour aria eikihw apahw hwur wosik aria igok.

<sup>30</sup> Um mares? Eik yatrun eikis nabes anudok nyakin arman douk nyagraehan nanakumori nunek enyudok mour um nunarao arpesh shupe wosik um.

<sup>31</sup> Nyak douk nyeneken ihishmorim arpesh shapeum aria shatrin.

<sup>32</sup> Aria anan douk kabi anat lait um tiyabigesh yah eshudok douk madae shuduken Iruhin iri uwe um shugipeshah.

Aria ta nunek nyakish arpesh eshesh Israel shurao debeinyi nyeigur.”

<sup>33</sup> Aria Jisas ananish amakenyish shemnek namudok aria shakitak yowiyokuk um enyudok baraen douk Simeon nakriyen um Jisas iri. <sup>34</sup> Aria Simeon narig Iruhin um nunek yopinyi um Jisas nini ananish amakenyish. Aria nakrip Maria nakri, “Mnek, Iruhin nagraeh enyudok batowin um nyunek sabaishi arpesh eshesh Israel um shukutukuk Iruhin shupeik rougun. Aria shopunek, ta nutaurum sabaishi shutanamori um Iruhin aria wata nunaraesh shutanamori shupe wosik. Anan ta nupe kabi douk anan arman douk Iruhin nakutuni um nunek ananin mour iri. Aria sabaishi arpesh ta shutrun aria shiyagwreh-uman enenyen yoweiniyi. <sup>35</sup> Anan ta nunekesh namudok um nunek sabaishi arpesh esheship urkwip panabeshuk pape esheshiruh aparuh iri punowereh putogur yopugunum. Aria nyak Maria, nyakin mishin ta yowen abom kabi douk shaduken anat bainat tawish tabreiri nyakim urkum aria nyemnek debeiri eriger um.”

<sup>36</sup> Aria agundok onok armatok kwenenem profet iri shopunek kwape. Okwokwin nyeigur Ana, aria okwokwin yaken douk shahwaranum Fanuel. Eshesh douk apudok awiropish douk shahwarop um Asa iri. Aria okwok douk ruwogik abom. Okwok douk kwani anan shanaraum shape 7-poreish kwarahos meyoh. <sup>37</sup> Aria eshesh shape aria anan nagokuk aria okwok kwape meyoh um, okwok kwape 84-poreish kwarahos. Aria okwok madae kukutukuk atin Iruhin ananit debeiti urupat uwe, uwok. Nyumnah wab kwape um kwenek lotu um Iruhin aria kwenek beten atin. Anabik um, okwok kwoshakwur um worigun aria kwape um kwenek beten atin. <sup>38</sup> Aria abudok banab atub nyutob, okwok shopunek kwanaki hurukatin aria kwenek tenkyu um Iruhin. Aria kwape kwakripesh baraen um anudok nunganin Jisas ihishmorim arpesh douk shape shatrugun-uman Iruhin wata nunaki nukweshih arpesh shape Jerusalem iri douk shape shakamum kupaishi iri shutogur wosik atin um.

### *Josep Nani Maria Iri Jisas Shatanam Shanak um Nasaret*

<sup>39</sup> Aria douk Josep iri Maria sheneken sheyaten enyudok mour kabi douk Debeini ananin lo nyakrium shunekeni iri, aria eshesh wata shatanam shanak um shokugi nahobig Galili. Eshesh shanak um esheshibur wabur Nasaret. <sup>40</sup> Aria nunganin yopun nakitak dodogowin aria narao sabainyi yopinyi saki. Aria Iruhin nutauruman meyoh nenekuman yopinyi aria nape wosik abom.

*Jisas Natogur Weroroini Batowinyin Aria Nanak Nawish Numun Iruhin Ananit Debeiti Urupat*

<sup>41</sup> Aria ihish kwarahos Jisas ananish amakenyish apa shanak um Jerusalem um agundok Pasovaigun worigun. <sup>42</sup> Aria douk arigaha Jisas ananish kwarahos shanak shatogur 12-poreish aria eshesh shanak um Jereusalem um agundok Pasovaigun worigun kabi douk seiwok shape shenekesh um. <sup>43</sup> Aria douk arigaha nyumneh shenek agundok worigun um hatuh aria eshesh wata shatanam um wabur. Douk eshesh shanak, aria nunganin Jisas napeik Jerusalem. Ananish amakenyish shopunek madae shudukemesh um agundok anan napemaguk uwe, uwok. <sup>44</sup> Eshesh shakri anan ta nani eshudok enesh arpesh shanak. Namudok aria eshesh shanak anah nyumnah shuknih aria eshesh wata shape shauriman. Eshesh sharig esheshis wanaruh eshudok douk shape atugunum iri. <sup>45</sup> Douk shabirak shatik madae shuparugan uwe aria wata shatanam shanak um Jerusalem um shuriman ganudok. <sup>46</sup> Eshesh shape shauriman arigaha hakri um 3-poreih nyumneh um, eshesh shanak shaparagan nape numun narub um Iruhin ananit debeiti urupat tataoum. Anan nani henek skulumesh um lo iri hape aria nape nemnek amamin baraaen aria nasorigam um hukripanum nudukemesh. <sup>47</sup> Aria amam ihim-morim hemnekan aria hakitak yowiyokuk um ananin saki nyani baraaen anan nebeyeny-umom iri. Aria amam hakri anan douk nadukemesh abom iri. <sup>48</sup> Aria abudok nyutob ananish amakenyish shaparugan obi nyutob, eshesh shakitak yowiyokuk abom. Aria ananik amakek kwakripan kwakri, “Nunganin, nyak nyenekeshumohw mumam namudok? Nyakin yaken nani eik mishish yowesh abom um nyak aria wape waurimen.”

<sup>49</sup> Aria Jisas nawanamesh baraaen nakri, “Ipak pape paurime um maresh? Ipak padukemesh aka, uwok? Eik ta ipe eikin Yain ananit urupat.” <sup>50</sup> Aria eshesh madae shudukem baugenym baraaen anan nakripesh-enyi uwe, uwok.

<sup>51</sup> Aria anan wata nanamesh shatanam shanak um Nasaret. Aria ihih nyumneh anan nemnek esheshin baraaen aria neneh eneshenesh eshesh shakripan um nunekesh iri. Aria ananik amakek kwananyur nyorumok urkum enyudok ihinyumorim baraaen douk anan neyagwrehan iri. <sup>52</sup> Aria Jisas yopun nikitak um yegeniyhw aria shopunek nikitak nadukemum eneheneh yopihi aih haní saki. Aria Iruhin nani arpesh shanadudareh-uman abom.

### 3

*Jon Douk Neneh Baptaisumesh Iri Nakripesh Iruhin Ananin Baraen  
(Matyu 3:1-12; Mak 1:2-8; Jon 1:19-28)*

<sup>1</sup> Abudok nyutob Taiberias Sisar nape debeini gayman um Rom um 15-poreish kwarahos obi, Pontius Pailat nape debeini gavman um shokugi nahobig Judia. Aria Herot nape debeini um shokugi nahobig Galili, aria ananin wanin Filip nape debeini um shokugi nahobig Ituria iri Trakonitis. Aria Lisanias nape debeini um shokugi nahobig Abilene iri. <sup>2</sup> Aria Anas nani Kaifas hape debeimi pris. Aria douk abudok nyutob, Sekaraia ananin nunganin Jon nanak nape wehigunum arpesh uwok um aria Iruhin nakripian ananin baraaen. <sup>3</sup> Namudok Jon narahaen neyatarub warub bape hurukatin um abudok worub Jordan iri. Aria anan nape nakripesh um shukeshuguk agabus yoweishi inahos shutanam shukon aparu Iruhin aria shunek baptais. Aria Iruhin ta nukweshih esheshis yoweishi inahos. <sup>4</sup> Enyudok douk nyatogur nyagipesh enen baraaen seiwok profet Aisaia menyemaguk Iruhin ananik Buk iri nyakrium. Baraaen nyakri, “Enen arpen nyape nyahwar gani wehigunum arpesh uwok um nyakri, ‘Gabeiman yah

Debeini. Pugabeyoh hupe um anan nigmah nunaki um. <sup>5</sup> Pushuragun ihigunum nabuhum atap iri. Aria yoduduruh hani mihigas shopunek ta pukorihogas subuh atap sukuh beriyaigas. Aria pugapesh hakukotomi yeh hupe duratin hupe aria pugapesh ihishmorim yeh ba greg atin hetem. <sup>6</sup> Aria ihishmorim arpesan ta shutik enyudok mour douk Iruhin nuneken um narap matanamori mupe wosik abom um.”

<sup>7</sup> Aria sabaisi awirosish arpesan shanakumori Jon um nunek baptaisumesh. Eshesh shanaki aria anan nakripesh nakri, “Ipak pape kabi wanohwiguhwi yuguuhw um. Omi nyakritep um ta puruwok um um namudok um ta Iruhin ananish urkum apahw ta juwehosish um ipak? Um maresh? Anan ko neneh eshudok yoweishi inahos shutogurum ipak adur atin. <sup>8</sup> Ipak ko penek yopihi aih um puyabig arpesan shutrip aria shukri adur ipak pekeshukuk agabus yoweishi inahos. Aria mare pupe um puneyagwreh pukri Abraham anan douk ipakin yamenen aria Iruhin ta nutrip nukri wosik aka, uwok. Eik yakritep, Iruhin ta neneh abrudok utabor bakus atap iri butogur kabi Abraham ananish batowish um. <sup>9</sup> Arman nabro rowos iri douk nasuhw enen bode nape nawanamen nabro rowos gani atap nukwaruhigos um. Aria ihigos rowos douk yopipi shuruwep madae piragosi uwe ta nubrogos nuwashagos nyih.”

<sup>10</sup> Aria ihishmorim arpesan sharigan shakri, “Aria apak ta munekesh mumam?”

<sup>11</sup> Aria anan wata nawanamesh baraen nakri, “Anudok arman douk nanabuk biyog siotog iri ta nukon anat anudok douk siot uwok iri. Aria eshudok arpesan shobuk worigun iri ta shusuyaesh shibiram eshudok worigun wokeshi.” <sup>12</sup> Aria amam harao takis iri shopunek hanamori anan um nunek baptaisumam. Aria hanaki harig Jon hakri, “Debeini tisa, apak ta munek maresh?”

<sup>13</sup> Aria anan nakripam nakri, “Purao takis um, ipak ta putrish utabor kabi da gavman shakri um. Ipak mare putrish anabor utabor meyoh uwe, uwok.”

<sup>14</sup> Aria amam soldia shopunek hanaki aria harigan hakri, “Apak shopunek ta munek maresh?”

Aria anan nakripam nakri, “Mare pusuhw dodog enesh arpesan aria putrish utabor aka penekumesh enen wehinyi baraen enesh arpesan um putrish anabor utabor meyoh uwe, uwok. Punasuhw abrudok douk shukep um mouribor um atin aria mare ta pukri anabor shopunek uwe, uwok.”

<sup>15</sup> Aria arpesan esheshish mishish shape shor shanak aria shape shere urkum um Jon. Eshesh shakri anan douk Krais douk Iruhin nagraehan ba neshopokan nanaki um nurao arpesan iri. <sup>16</sup> Douk namudok aria Jon nakrip sabaiishi arpesan nakri, “Eik uwok. Eik douk yenek baptaisumep abar meyoh. Aria anan ddogowin atun neshagrakuk eik iri ta nigigi. Aria eik douk madae yopuwe iri um ta ikweshihuman madururuh um ananin su uwe, uwok. Aria anan ta neneh baptaisumep nekep Iruhin ananin Mishin aria ta nyuwish aria nyupeyep. Aria ta nyugabeyep kabi nyih hanuguk eshudok um. <sup>17</sup> Anan ta ko nunaki kabi da anan arman nasuhwi ananip neitip ananis wis um nunaki niyagom nyubuhas shape ananit wit iri ba nushubuk sik. Aria yoputi shuruwepit wit anan ko ta nutubuk sik gani ananit urupat nobuk wit ati. Aria ihish witish nyubuhas anan ko nushaisheh nukwu ehudok yoweishi nyih madae ta hugok iri uwe, uwok.”

<sup>18</sup> Aria Jon nakripesh Iruhin ananin yopinyi baraen obi nyutob, nakripesh sabainyi enyudokmori baraen shopunek um nuhur esheshiruh aparuh.

**19** Aria Jon nahao Herot douk debeini gavman um shokugi nahobig um Galili iri. Jon nahan um agundok natrun ananin wanin ananik irohukwik Herodias um. Aria shopunek um agundok neneb sabaishi yoweishi inahos um. **20** Aria Herot ta shopunek neneb enesh yoweishi inahos um ta nuweshik Jon um.

*Jon Neneb Baptais Um Jisas  
(Matyu 3:13-17; Mak 1:9-11)*

**21** Douk sabaishi arpesh shenek baptais shatuh aria Jisas shopunek neneb baptais. Anan neneb baptais jurug aria neyotu nape neneb beten aria iruhw utag ganupok. **22** Aria Iruhin ananin Mishin nyabuhi kabi da arudok armir manyun um nabuhi netem Jisas. Aria shemnek anah mah gani iruhw heven aria enyudok arpen nyeyagwreh iri nyakri, "Nyak douk adur atin Eikin Nuganin. Eik douk urkum manawasham aria yanadudareh abom um nyak."

*Jisas Ananim Yamehem Popehem Amamish Nyeiguhw  
(Matyu 1:1-17)*

**23** Abudok nyutob Jisas nohur ananin mour nape neneken obi, ananish kwarahos douk shatogur 30-poreish. Aria arpesh shakri Jisas anan douk Josep nanabuki iri nuganin aka, uwok.

Josep ananin yain douk Heli.

**24** Aria Heli ananin yain Matat.

Matat ananin yain Livai.

Livai ananin yain Melki.

Melki ananin yain Janai.

Janai ananin yain Josep.

**25** Aria Josep ananin yain Matatias.

Matatias ananin yain Amos.

Amos ananin yain Nahum.

Nahum ananin yain Esli.

Esli ananin yain Nagai.

**26** Aria Nagai ananin yain Mat.

Mat ananin yain Matatias.

Matatias ananin yain Semen.

Semen ananin yain Josek.

Josek ananin yain Joda.

**27** Aria Joda ananin yain Joanan.

Joanan ananin yain Resa.

Resa ananin yain Serubabel.

Serubabel ananin yain Sealtiel.

Sealtiel ananin yain Neri.

**28** Aria Neri ananin yain Melki.

Melki ananin yain Adi.

Adi ananin yain Kosam.

Kosam ananin yain Elmadam.

Elmadam ananin yain Er.

**29** Aria Er ananin yain Josua.

Josua ananin yain Elieser.

Elieser ananin yain Jorim.

Jorim ananin yain Matat.

Matat ananin yain Livai.

**30** Aria Livai ananin yain Simeon.

Simeon ananin yain Juda.

Juda ananin yain Josep.  
 Josep ananin yain Jonam.  
 Jonam ananin yain Eliakim.

<sup>31</sup> Aria Eliakim ananin yain Melea.  
 Melea ananin yain Mena.  
 Mena ananin yain Matata.  
 Matata ananin yain Natan.  
 Natan ananin yain Devit.

<sup>32</sup> Aria Devit ananin yain Jesi.  
 Jesi ananin yain Obet.  
 Obet ananin yain Boas.  
 Boas ananin yain Salmon.  
 Salmon ananin yain Nason.

<sup>33</sup> Aria Nason ananin yain Aminadap.  
 Aminadap ananin yain Atmin.  
 Atmin ananin yain Arni.  
 Arni ananin yain Hesron.  
 Hesron ananin yain Peres.  
 Peres ananin yain Juda.

<sup>34</sup> Aria Juda ananin yain Jekop.  
 Jekop ananin yain Aisak.  
 Aisak ananin yain Abraham.  
 Abraham ananin yain Tera.  
 Tera ananin yain Nahor.

<sup>35</sup> Aria Nahor ananin yain Seruk.  
 Seruk ananin yain Reu.  
 Reu ananin yain Pelek.  
 Pelek ananin yain Eber.  
 Eber ananin yain Sela.

<sup>36</sup> Aria Sela ananin yain Kainan.  
 Kainan ananin yain Arpaksat.  
 Arpaksat ananin yain Siem.  
 Siem ananin yain Noa.  
 Noa ananin yain Lamek.

<sup>37</sup> Aria Lamek ananin yain Metusela.  
 Metusela ananin yain Enok.  
 Enok ananin yain Jaret.  
 Jaret ananin yain Mahalalel.  
 Mahalalel ananin yain Kenan.

<sup>38</sup> Aria Kenan ananin yain Enos.  
 Enos ananin yain Set.  
 Set ananin yain Adam.  
 Aria Adam douk Iruhin nenehan.

## 4

*Satan Nakwiraeh Jisas Um Neneh Yoweishi Inahos  
 (Matyu 4:1-11; Mak 1:12-13)*

<sup>1</sup> Aria Iruhin ananin Mishin nyawish Jisas nyapenyan abom aria nagipesh um enyeniyim urkum nakutukuk worub Jordan aria nanak. Aria Iruhin ananin Mishin nyaran nyanam wehigunum douk arpesh uwok um. <sup>2</sup> Anan nanak nape agundok um 40-poreih nyumneh shopunek. Aria Satan nape nakwiraehan um nuneh yoweishi inahos. Aria ehudok nyumneh nanak

nape iri, anan madae nuwok anagun worigun uwe, uwok. Aria douk arigaha ehudok nyumneh hanak hatuh aria debeirubi nyurub ban.

<sup>3</sup> Aria Satan nakripan nakri, “Nyak douk Iruhin ananin Naganin um, nyak krip amudok utom mutogur bret.” <sup>4</sup> Aria Jisas nakripan nakri, “Baraen nyetem Iruhin ananik Buk iri douk nyakri, “Worigun atugun ta mare ntauraur arpesh um shupe wosik atin uwe, uwok.”

<sup>5</sup> Aria Satan wata narao Jisas natoum anabik aria ahudok atuh neyabigan ihigos nahobigos sape agundok atap iri. <sup>6</sup> Aria Satan nakripan nakri, “Eik ta iken agusudok ihigos nahobigos suni enesh yopishi eshudok eneshenesh shuni arpesh shape agudok nahobig iri. Aria nyak ta nyurao big um nyak atin nyeyoh ihishmorim shuni eneshenesh eshudok arpesh shape ihigos nahobigos iri. Aria ihish atin um eshudok. Douk seiwok yaraesh yejohesh iri. Aria douk eik ikri iko enen arpen um, eik ta ikenyesh. <sup>7</sup> Aria ta douk nyak nyuduk ohrubus nyunek lotume um, eik ta iken ihishmorim eshudok eneshenesh.”

<sup>8</sup> Aria Jisas wata nakripan nakri, “Baraen nyetem Iruhin ananik Buk iri douk nyakri namudok, ‘Nyak nyunek lotu um Debeini atin nyakin Iruhin aria nyusuhw ananin atin mour.’”

<sup>9</sup> Aria Satan ta naran um Jerusalem. Aria nakih nonem um onok kwato abom iri outuk atudok Iruhin ananit debeiti urupat aria nakripan nakri, “Ta nyak douk Iruhin ananin naganin um, nyak nyaprof nyubuh atap.

<sup>10</sup> Um maresh? Baraen nyetem Iruhin ananik Buk iri douk nyakri, ‘Iruhin ta nukripesh dodogowinyi baraen um ananish enselahos um shunaki shutaurumen. <sup>11</sup> Aria eshesha ta shejemen shusuwenyukuk iruhw esheshis wis aria ta anam utom mare muwor nyakiruh yeriweruh uwe, uwok.’”

<sup>12</sup> Aria Jisas nakripan nakri, “Baraen nyetem Iruhin ananik Buk iri nyakri, ‘Nyak mare nyukwiraeh um nyusuwokuk Debeini, nyakin Iruhin uwe, uwok.’”

<sup>13</sup> Douk Satan nakwiraeh Jisas um sabaihi yeh um nunek yoweishi inahos ba jurug aria nakutunukuk nanak. Anan nakri kupaibi nyutob aria anan ta nukwiraahan.

### *Jisas Nohur Mour Neneken Shokugi Nahobig Galili (Matyu 4:12-17; Mak 1:14-15)*

<sup>14</sup> Aria Iruhin anamin Mishin nyape Jisas nyenek anan dodogowin aria wata natanam nanak um shokugi nahobig Galili. Aria baraen nyanan sabaigun um agudok shokugi nahobig um enyudok Jisas neneken iri. <sup>15</sup> Aria anan nenek skulumesh numun urusag eshesha Juda shape sheneyagwreh baraen-ogwi aria sabaishi shatuk ananin nyeigur nyato iruhw.

### *Arpesh Shape Nasaret Iri Shakon Agabus Jisas (Matyu 13:53-58; Mak 6:1-6)*

<sup>16</sup> Aria Jisas nanam abrudok wabur Nasaret douk anan wata napenyabur arigah arigah ba yopun um. Aria ahudok nyumnah Sabat eshesha Juda mour uwok shape meyoh ahi hatogur. Aria anan nakitak nanak nawish eshesha Juda shape sheneyagwreh baraen-ati iri urupat douk ihih nyumneh Sabat nape nanak um. Aria nakitak neyotu um nutaruh Iruhin ananin baraen.

<sup>17-18</sup> Aria habuk onok buk douk shadareshok aria shaweshigok iri. Okwok douk profet Aisaia nenyemok iri. Aria anan napukok aria naparug enen baraen nyakri namudok, “Debeini ananin Mishin nyawishe aria nyapeny. Um maresh? Anan nagraehe neshopoke yanaki um ikripesh yopinyi baraen um yaruhih arpesh iri. Aria douk neshopoke yanamori ikripesh enyudok baraen, ‘Ipak douk horim howeshikep pape shunuweshik-ati urupat iri wata putogur pupe wosik atin. Ipak nabes seshukepi wata putrugun. Aria

ikripesh um eshudok arpesh douk kupaishi shekeshamaen iri wata shupe wosik ba shunadudareh. <sup>19</sup> Aria shopunek, neshopoke yanamori ikripesh baraan um abudok yopubi nyutob douk Debeini ta wata nutaurum ananish arpesh shupe wosik um.”

<sup>20</sup> Aria Jisas natarih enyudok baraan um jurug aria wata nuwapam buk nakanokuk um anudok neyoh lotu iri. Aria anan wata nanak nabuh nape. Aria eshesh ihishmorim shape numun urupat iri shawanam nabes shape shashakam anan atun. <sup>21</sup> Aria anan nakripesh nakri, “Douk enyudok Iruhin ananin baraan nyetem okwudok Buk iri douk iganigadae pemneken yatarihen iri nyatogur um adurin atin.”

<sup>22</sup> Aria eshesh ihishmorim shanadudareh shatuk ananin nyeigur nyato iruhw. Aria eshesh shape urkwip por panak um enyudok yopinyi baraan anan nakriyenyi. Aria eshesh shakri, “Mumam mumam namudok. Aria anudok arman anan douk Josep ananin nugarin aka, uwok?”

<sup>23</sup> Aria Jisas nakripesh nakri, “Adurigom atin ipak ta pukripe enyudok shadukemen iri baraan pukri, ‘Dokta, nyak nyugabe nyak kanak. Enyudok douk shakripap um nyenekesh shatogur Kaperneam iri shopunek makri nyunekesh shutogur agundok nyakibur wabur.’”

<sup>24</sup> Aria Jisas ta nakri, “Adurigom atin eik yakriep. Ta anan profet nikripesh baraan ananibur wabur aria shumnek ananin baraan shugipeshen uwe aka, uwok. <sup>25</sup> Adur atin eik yakriep. Seiwok abudok nyutob Ilaija nape profet obi, sabaiwari armago douk armam hagok aria howosopuk iri wape Israel. Aria abudok nyutob eshah madae anah hurauri um 3-poreish kwarahos aria 6-poreib aub shopunek. Aria debeirubi nyurub baesh um iherub warub. <sup>26</sup> Aria Iruhin madae neshopok Elaija nunak nutaurum onok Israel douk armam hagok ba hokusapuk iri uwe, uwok. Iruhin douk neshopok anan nanak nutaurum onok armatok douk anan nagok nakusopuk iri douk kwape kupaiburi wabur shahwarabur um Sarefat iri. Abrudok wabur Sarefat douk bape shokugi nahobig Saidon. <sup>27</sup> Aria douk namudok atin. Abudok nyutob profet Elisa nape agudok atapig nahobig obi, sabaimi armam lepraih arugeh hapenyam iri hape Israel. Aria Elisa madae nunak nutaurumam ba nene anan um yopun uwe, uwok. Aria adur atin anan nutaurum Naman atun. Naman douk kupaibi amnabin shahwarab um Siria iri.”

<sup>28</sup> Aria ihishmorim arpesh shape numun urupat iri shemnek enyudok baraan aria mishish juwehosish abom um Jisas. <sup>29</sup> Aria eshesh shakitak sharan shanak shatogur aduk um abrudok wabur. Abrudok esheshibur wabur douk batem iruhw anag mihog. Namudok aria shanak anagasibur um natogur nyape um shakri shuwashan nubuh um nugok. <sup>30</sup> Aria eshesh sheyotu aria nawishesh nanak orokohun aria nanak.

### *Jisas Nagabe Anan Yoweinyi Sagab Nyapeyan Iri Arman (Mak 1:21-28)*

<sup>31</sup> Aria Jisas nanam wabur Kaperneam douk bape shokugi nahobig Galili iri. Anan nanak natogur aria ahudok nyumnah Sabat eshesh Juda mour uwok, shape meyoh ahi, hatogur. Aria anan nape nene skulumesh um Iruhin ananin baraan. <sup>32</sup> Aria eshesh ihishmorim shemnek aria shakitak yowiyokuk. Um maresh? Douk neyagwreh dodogowin atin baraan kabi douk sharao debeinyi big iri sheneyagwreh um. <sup>33-34</sup> Aria numun eshesh Juda shape sheneyagwreh baraan-ati urupat, anan arman enen yoweinyi sagab nyapenyan iri arman nape. Aria anan nakitak nahwar debeg nakri, “A! Jisas douk nyanaki wabur Nasaret iri, nyak nyanamori nyunekap mumam apak? Nyak nyakrium nyop nyununup, aka? Eik douk yadukem

nyak. Nyak douk Iruhin ananin yopuyopunari arman nyarauri ananin bareaen iri.”

<sup>35</sup> Aria Jisas naho enyudok sagab nakri, “Mokureg aria nyukutukuk anudok arman aria nyutograri.” Aria enyen nyour anudok arman nabuh nakus atap agundok shapeum aria nyakutunaguk. Aria madae nyenekan eneb ereb anan uwe, uwok.

<sup>36</sup> Aria douk ihishmorim eshesh shatik namudok aria shanaboum roguhw. Aria eshesh sheneyagwreh shakri, “Enyudok maren bareaen? Anudok arman douk anan dodogowin narao debeiniyi big um. Anan douk naho yoweishi sagabehos aria shemnek ananin bareaen aria shakutukuk arpesh shatogur sharuwok!”

<sup>37</sup> Namudok aria bareaen um enyudok Jisas neneken iri nyanak ihirub warub douk bape hurukatin um Kaperneam iri.

### *Jisas Nagabe Pita Ananik Nakwurikwik Kwani Sabaishi Arpesh (Matyu 8:14-15; Mak 1:29-31)*

<sup>38</sup> Aria Jisas nakutukuk atudok eshesh Juda shape sheneyagwreh bareaen ati urupat aria nanam Saimon ananit urupat. Aria Saimon ananik nakwurikwik kwaraubor abom krukruk kweshuhw aras. Douk Jisas nanak aria eshesh shakripan um nunak nugabeyok. <sup>39</sup> Aria anan nanak neyotu hurukatin um agundok okwok kweshuhw um aria naho ehudok arugeh hanegok iri. Aria okwok yopuk abom aria kwakitak kwape kwonekumam worigun.

<sup>40</sup> Aria abudok nyutob aun nepe nabuh, eneheneh arugeh hapeyesh iri arpesh esheshish worogwiruh sharaesh shanamori Jisas um nugabeyesh. Aria anan nowemesh ananis wis um eshesh atin atin aria ihishmorim shatogur yopish atish. <sup>41</sup> Yoweishi sagabehos shopunek shakutukuk sabaishi arpesh. Aria eshudok sagabehos shopunek shahwar debeg shakri, “Nyak douk Iruhin ananin nunganin.”

Aria Jisas nahaesh aria nakripes um mare shiyagwreh enen bareaen uwe, uwok. Um maresh, eshesh douk shadukemesh shakri anan douk Krais douk Iruhin nagraeahan neshopokan nanamori nurao arpesh iri.

### *Jisas Nanam Anarub Warub Nenek Mour (Matyu 8:16-17; Mak 1:32-34)*

<sup>42</sup> Arigaha ruwahepih ruhur atur um aria Jisas nikitak nakutukuk Kaperneam nanam anagun wehigunum arpesh uwok um. Aria eshesh arpesh shape shaurim anan. Aria douk arigaha shanak shoparug anan aria shakri shusuhweshan um anan mare nukutishuk ba nunak. <sup>43</sup> Aria anan nakripes nakri, “Eik ta ko inak kupairubi warub shopunek aria ikripes yopinyi baraan um arpesh shuwhish um agundok Iruhin nepe Debeini um ananish arpesh um. Um maresh? Iruhin douk neshopoke yanamori inak ikrip kupaishi shopunek.”

<sup>44</sup> Aria anan nanak nepe nakripes Iruhin ananin yopinyi bareaen ihirub warub agudok shokugi nahobig Judia. Anan nepe nakripes Iruhin ananin yopuniyi bareaen numun urusag um eshesh Juda shape sheneyagwreh bareaen-ogwi.

## 5

### *Jisas Nahwar Ananim Sagom-atinyim Disaipel Um Hugipesan (Matyu 4:18-22; Mak 1:16-20)*

<sup>1</sup> Anah nyumnah Jisas nanak neyotu anagas um agudok debeigi waiyag Genesaret aria nepe nakripes Iruhin ananin bareaen. Aria sabaishi arpesh shape shanaki sharukaruban shanaki hurukatin um anan um shumnek

baraen anan nape nakripesh-enyi. <sup>2</sup> Aria agundok, anan natik amudok hape hatuk eiguhw iri amamig biyog botog gwakus. Amam hanukog hakih hagubukuk anagas aria hanak hape hakwrup umberab. <sup>3</sup> Aria Jisas nato naikih netem Saimon ananit bot. Aria nakripan um neheshigat tanak tur abar aria nape nenek skulumesh um Iruhin ananin baraen eshesh armam armago.

<sup>4</sup> Douk nakripesh baraen jurug aria nakrip Saimon nakri, "Nyak nyurao bot tunak orokohunig um debeigi waiyag aria ipak pukutu ipakib umberab aria putuk anaguh eiguhw."

<sup>5</sup> Aria Saimon nakripan nakri, "Debeini, iganigib wab shuknib apak munek debeinyi mour um makutu umberab aria apak madae mutuk anar atur eyur uwe, uwok. Aria douk nyak nyakri aria eik ta ikutu umberab bubuh."

<sup>6</sup> Aria amam hanak hakutu umberab aria hatuk sabaighwi eiguhw aria amamib umberab hurukatin um tutukurab atin. <sup>7</sup> Aria amudok douk hani Pita hape ananit bot iri hatik namudok aria hawaurum kupaimi douk hape kupaiti bot iri um hunaki hutaurumam. Aria amam hanaki hataurumam hatukoguhw haguhur amamig biyog botog shishuknig aria hurukatin um gubuhuk debeigi waiyag atin.

<sup>8-10</sup> Aria Saimon douk kupainyi nyeigur um nanahwar Pita nani anam ananim biom douk Jems aria Jon amudok Sebedi ananim nugamim, hatik ogwuuhwudok sabaighwi eiguhw amam hatukoguhw iri aria amam hikitak yowiyokuk aria hanogugur. Aria Saimon natik namudok aria nabuh noduk ohrubus hurukatin um Jisas aria nakripan nakri, "Debeini, nyak nyukutukuk eik aria nyunak! Um maresh? Eik yenek eneshenesh yoweishi inahos iri!"

Aria Jisas nakripan nakri, "Saimon, nyak mare nyunogugur. Um maresh? Douk arigaha kweipon, nyak ta nyupe nyurao arpesh shunaki shugipes eik." <sup>11</sup> Aria amam hanuk amamig botog hakih hagubukuk anagas, haku-tukuk ihishmorim amamish eshudok eneshenesh aria hani Jisas hanak.

### *Jisas Nagabe Anan Arugeh Lepra Hapenary Iri (Matyu 8:1-4; Mak 1:40-45)*

<sup>12</sup> Anah nyumnah Jisas nanak nape anabur wabur aria anan arugeh lepra hapenyananaki natogruman. Ananihw yegenyihw douk shuknihw abom um ereb. Aria anan nanak nabuh noduk ohrubus nakus atap aria narig Jisas nakri, "Debeini, nyak nyukri wosik um, eik yakri nyak nyugabeye."

<sup>13</sup> Aria Jisas nonu rogor nowem ananis wis anudok arman aria nakri, "Eik yakri wosik um. Nyak yopin abom."

Aria ahudok atuh anan yopun. <sup>14</sup> Aria Jisas nakripan dologowinyi baraen nakri, "Nyak nyunak aria mare nyukrip enesh arpesh um agundok eik yagabeyen um uwe, uwok. Nyak nyunak arigas um pris nutrit aria nyunak nyenek enyudok ofa um agundok nyak yopin um kabi douk Iruhin ananin lo douk nakoguk Moses iri nyakrium. Nyak nyunekesh namudok aria ihishmorim arpesh ta shutrin aria shudukemesh shukri nyak douk yopin."

<sup>15</sup> Aria uwok, enyudok baraen um agundok Jisas nagabe anudok arugeh lepra hapenyan um nyowe nyanak rougung. Aria sabaishi arpesh shanaki um shumnek Jisas ananin baraen. Aria shopunek um nugabemesh eshesih arugeh douk hapenyes iri. <sup>16</sup> Aria ihih anan apa naktak nanak agundok arpesh uwok um aria nanak nape nenek beten.

### *Jisas Nagabe Anan Roguhw Aiyas Shagokan Iri (Matyu 9:1-8; Mak 2:1-12)*

<sup>17</sup> Anah nyumnah Jisas nanak nape nenek skulumesh um Iruhin ananin baraeen. Aria agundok, anam Farisi hani anam henek skulumesh um lo iri shopunek hanaki hape. Amam douk hanaki kupakupairubi warub iri. Anam hanaki Jerusalem iri, aria anam hanaki ihirubmorim warub bape agudok shokugi nahobig Galili iri, aria anam hanaki ihirubmorim warub douk bape Judia iri. Aria abudok nyutob Iruhin nani Jisas napeum nunek Jisas dодogowin um nugabe arpesh arugeh hapeyesh iri. <sup>18</sup> Aria anam armam hasahi anan roguhw aiyas shagokan iri hanaki. Anan neshuh ananis aras aria amam hanasahumori aras hanaki hakri hunak huwish hunabuk agundok Jisas napeum. <sup>19</sup> Aria sabaishi arpesh shape aria amam yah uwok um hishagrakesh huwish um. Aria amam hanasah hato hakih modukwitam urupat aria haniguk enesh eshudok shetem modukwitam iri heshubukuk aria anan norum aras hanotugon hakwu madururuh aria hakutun nabuhukuk um Jisas. Ihishmorim arpesh shani Jisas shape shersharih aria amam hakutun nabuh nakus orokohun hurukatin um Jisas napeum.

<sup>20</sup> Aria douk Jisas natik namudok um amam hakri abom um anan douk dодogowin um nugabeyan, aria anan nakrip anudok roguhw aiyas shagokan iri nakri, “Arpenyin, Iruhin nakweshih nyakish yoweishi inahos.”

<sup>21</sup> Aria amam henek skulumesh um lo iri hani amam Farisi hape hansarigum hakri, “Anan douk maran arman aria douk nape nabubunim Iruhin? Apak madukemesh um Iruhin atun ta nukweshih arpeshish yoweishi inahos.”

<sup>22</sup> Aria Jisas nadukem amampur urkwip aria nakripam, “Ipak urkwip mare pur namudok uwe, uwok. <sup>23</sup> Enyudok mour douk shopunek um kabi douk eik ikrip enen arpen um Iruhin ta nukweshih enyeniyish yoweishi inahos um o, ikripen um nyukitak nyunak aria enyen ta nyukitak nyunak um. <sup>24</sup> Aria douk eik ta iyabigep um eik Anudok Arman douk yatogur adurinyi arpen iri douk dодogoiwe. Aria eik douk nyeigur nyato agundok atap um ikri Iruhin ta nukweshih arpesh shenekesh iri yoweishi inahos.”

Aria anan nakrip anudok roguhw aiyas shagokan iri nakri, “Eik yakripen, nyak kakitak hur nyakis aras nyunoswas aria nyunak um urupat!”

<sup>25</sup> Aria ahudok atuh eshudok ihishmorim arpesh douk shape shersharih iri shatrun um nikitak nohur ananis aras nasuwas aria nape nanadudareh natuk Iruhin ananin nyeigur nyato aria napa nanak um urupat. <sup>26</sup> Aria eshesih ihishmorim shakitak yowiyokuk abom. Aria shopunek, eshesih shanogugur aria shatuk Iruhin ananin nyeigur nyato shakri, “Doukih nyumnah apak matik enesh kupaishi eshudok!”

### *Jisas Nakrip Livai Um Nugipeshan (Matyu 9:9-13; Mak 2:13-17)*

<sup>27</sup> Douk enyudok nyanakuk aria Jisas nikitak nanak aria natik anan arman nyeigurinum Livai douk nape narao takis iri nape. Anan nape urupat anan nape narao takis atari iri. Aria douk Jisas natrun aria nakripan, “Nyak yowi nyugipesh eik unak.” <sup>28</sup> Aria Livai nikitak nakutukuk eneshenesh ananish eshudok aria nani anan hanak.

<sup>29</sup> Aria douk arigaha anob nyutob aria Livai nikitak nenek anagun debeguni worigun ananit urupat um Jisas. Aria sabaimi harao takis iri hani enesh hwarohwish arpesh shopunek shanak shapeum shuni Livai nini Jisas shuwok agundok worigun. <sup>30</sup> Aria anam Farisi hani anam henek skulumesh um lo iri, douk haniguk amudok Farisi iri hanaki hape. Aria amam hape henekam baraeen Jisas ananis disaipel aria harigam hakri, “Ipak pani anam

pawok worigun amudok harao takis iri hani eshudok shenek eneshenesh yoweishi inahos iri?"

<sup>31</sup> Aria Jisas nakri, "Arpesh douk arugeh uwok iri ta mare shunak um dokta um nugabeyesh uwe, uwok. Eshudok douk sharao arugeh iri atish ta shunak um dokta um nugabeyesh. <sup>32</sup> Aria eik douk namudok atin kabi douk dokta um. Eik douk madae inakumori ihwar yopishi arpesh shenek yopipi aih iri shatanam um shukon aparuh Iruhin uwe, uwok. Eik yanakumori ihwar eshudok douk shenek yoweishi inahos iri um shukeshuk agabus yoweishi inahos aria shatanam shukon aparuh Iruhin."

*Jisas Nakripesh Um Agundok Shashakur Um Worigun Um  
(Matyu 9:14-17; Mak 2:18-22)*

<sup>33</sup> Aria enesh arpesh shakrip Jisas shakri, "Sabaihi nyumneh Jon ananim disaipel hape henek beten obi nyutob, amam hashakur um amam mare huwok anagun worigun. Aria amam Farisi amamim disaipel shopunek douk henekesh namudok atin. Aria sabaihi nyumneh nyakim madae hunekesh namudok uwe, uwok."

<sup>34</sup> Aria Jisas nakripesh enyudok wobuwobren baraen nakri, "Ipak pakri abudok nyutob anudok douk kadak narao armatok iri nini ananishi nupe um, eshesh ta shushakur um worigun aria shupe meyoh aka, uwok? Adur atin ta uwok. <sup>35</sup> Douk nyutob ta bunaki um shuran shunak kupaigunum aria abudok nyutob ananishi ta urkwip purum anan aria ta shushakur um worigun shupe meyoh."

<sup>36</sup> Aria Jisas nakripesh enyudok wobuwobren baraen shopunek nakri, "Ta mare enen arpen nyutupok anap rupahip anah namuhi rupah aria nyutapeyop um anah jugwaihi uwe, uwok. Enyen nyunekesh namudok akure, enyen ta nyunek umunihw ahudok namuhi rupah. Aria shopunek, ta nyukwropop um aria ta mare pupe wosik ahudok jugwaihi rupah, uwok."

<sup>37</sup> Aria Jisas nakripesh enyudok wobuwobren baraen shopunek nakri, "Aria shopunek, ta mare enen arpen nyurak anabar namubari wainibar abar bubuh anap jugwaipi memeip munuhwip douk shape shor wainibar abar um uwe, uwok. Enyen nyunekesh namudok akure, abrudok namubari wainibar ta bubrigesh apudok jugwaipi munuhwip aria wain ta nutourakuk atap atin. Aria apudok munuhwip ta yowep. <sup>38</sup> Aria namudok ta uwok. Namubari wainibar abar ta shisharabar namusi atus munuhwis. <sup>39</sup> Aria shopunek, ta mare enen arpen nyukri nyuwok rigibar wainibar abar burik aria wata nyukri nyuwok namubari bugiguk uwe, uwok. Um maresh? Enyen nyakri abrudok jugwaibari abar douk yopubari."

## 6

*Ahudok Nyumnah Sabat Eshesh Juda Mour Uwok Shape Meyoh Ahi  
(Matyu 12:1-8; Mak 2:23-28)*

<sup>1</sup> Anah nyumnah Sabat, Jisas nakitak nawish nanak anag nubarig douk shau wit agari. Aria ananim disaipel hanak hape hopirak anat urubit wit aria hape hamaprut wis um haworishat hatoh. <sup>2</sup> Aria amam Farisi harigani hakri, "Ipak peneken um enyudok? Apakin lo douk nyakri apak mare munek enen mour ahudok nyumnah Sabat!"

<sup>3</sup> Aria Jisas nakripam nakri, "Ipak patarih baraan nyetem Iruhin ananik Buk iri um abudok nyutob Devit nani ananim nyurub bamum aka, uwok?

<sup>4</sup> Devit douk nawish Iruhin ananit debeiti urupat aria nohuri atudok bret douk henek ofa hako Iruhin iri. Aria anan nawok anat aria nakom anat

ananim arman hatoh. Aria shopunek, apakin lo douk nyakri mare enesh meishi arpesh shuwok atudok bret uwе, uwok. Amam pris atum, wosik.”

<sup>5</sup> Aria Jisas wata shopunek nakripam nakri, “Douk eik Anudok Arman douk yatogur adurinyi arpen iri debeiwe iri aria ikrip arpesh um shunek mour ahudok nyumnah Sabat um. Umum maresh? Eik yejoh ahudok nyumnah sabatih.”

*Jisas Nagabe Anan Rogur Yowenyanari Ahudok Nyumnah Sabat  
(Matyu 12:9-14; Mak 3:1-6)*

<sup>6</sup> Kupaihi nyumnah Sabat, Jisas nanak nawish anat eshesh Juda shape sheneyagwreh baraeen-ati urupat aria nape neneke skulumes um Iruhin ananin baraeen. Aria agundok anan arman douk ananin yopunyi rogur douk yowen iri nanaki nanamesh nape. <sup>7</sup> Aria anam henek skulumes um lo iri hani amam Farisi hape duk atin hatik Jisas um hakri kadak nukri nubrig enyudok lo um nugabe anudok rogur yowenyanari ahudok nyumnah Sabat um, aria amam hunek kwotuman. <sup>8</sup> Aria Jisas nadukem amamip urkwip aria nakrip anudok rogur yowenyanari nakri, “Kitak nyiyotu agundok um eshudok ihishmorim shutrin.” Aria anan nakitak nanak neyotu orokohanu.

<sup>9</sup> Aria Jisas nakripam nakri, “Eik yakri isorikep, apakin lo nyakri ta apak munek maresh ahudok nyumnah Sabat? Apak munek yopunyi mugu o munek yoweishi inahos? Mutaurum arpesh shupe wosik aka, uwok o mesh shugok?”

<sup>10</sup> Aria Jisas neyotu natrish atin atin arigaha neyatesh aria nakrip anudok rogur nyenekan iri nakri, “Nu nyakin rogur.” Aria anan nonu rogur aria enyen yopin abom. <sup>11</sup> Aria amudok henek skulumes um lo iri hani amudok Farisi hatik namudok aria amam nyirub juwehosirub abom um Jisas. Aria amam kanak hape haneyagwrah hakri, “Apak ta muneken mumam anudok arman?”

*Jisas Nagraeh Ananim 12-poreim Aposel  
(Matyu 10:1-4; Mak 3:13-19)*

<sup>12</sup> Aria anah nyumnah Jisas nato anag mihig um nunak nunek beten. Aria agundok anan nanak nape neneke beten um Iruhin anab wab shuknib.

<sup>13</sup> Douk neneke beten arigaha gagruk aria nahwar ihm-morim ananim disaipel hanak. Aria anan nagraeh 12-poreim atin um nishopokam hunak hukripesh ananin baraeen iri aria nodowom nyeigur aposel. <sup>14</sup> Anan nagraeh Saimon, douk Jisas nodowon kupainyi nyeigur Pita iri nani ananin wanin Andru, hani Jems iri Jon. Amam hani Filip iri Bartolomyu. <sup>15</sup> Hani Matyu nani Tomas iri kupaini Jems, anan douk Alfius ananin nunganin, hani kupaini Saimon douk neir anap awirop shahwaresh um Selot\* iri. <sup>16</sup> Amam hani Judas douk kupaini Jems ananin nunganin nani kupaini Judas douk shahwaran um Judas Iskariot iri. Anudok Judas douk ta niyabig Jisas ananim horim um Jisas iri.

*Jisas Neneke Skulumes Um Iruhin Ananin Baraeen Aria Nagabe Eshudok Sharao Arugeh Iri Shatogur Yopish  
(Matyu 4:24-25; Mak 3:7-12)*

<sup>17</sup> Douk enyudok nyanakuk aria Jisas nani ananim disaipel habuhi habuh heyotu anabik beriyaigunum aria sabaishi arpesh shanaki. Enesh douk shagipesh anan iri shanai enesh shanaki sabairubi shokurubi warub douk bape shokugi nahobig Judia iri. Enesh shanaki Jerusalem, enesh shanaki

\* **6:15:** Putik futnot nyape Matyu 10:4 iri.

arbudok shokurubi warub douk bape hurukatin um debeigwi youg iri. Anarub douk bape hurukatin um arbudok debeirubi warub Tair aria Saidon. <sup>18</sup> Eshesh shanakumori shumnek ananin baraan aria shopunek um nugabemesh eshudok douk sharao arugeh iri. Enesh douk yoweishi sagabehos shapenyesh iri shopunek shanaki aria Jisas nagabeyesh. <sup>19</sup> Aria ihishmorim arpesh shakri anan douk dodogowini. Douk namudok aria eshesh shakri ta eshesh shunak shususuwan meyoh um, eshesh ta wata yopish. Aria eshesh shanak shasusuwan aria eshesh wata yopish.

*Jisas Nakri Um Arpesh Shunadudareh Iri Shuni Arpesh Shureh Iri  
(Matyu 5:1-12)*

<sup>20</sup> Aria Jisas natanam natik ananim disaipel aria nakripam nakri, "Ipak dour yaruish um eshudok eneshenesh iri douk pawish agundok Iruhin napo Debeini um ananish arpesh um! Douk namudok aria ipak douk panadudareh. <sup>21</sup> Aria ipak douk nyurub baep iri douk panadudareh. Um maresh? Iruhin ta nukep worigun pugnoh aria wata dugurep! Aria ipak douk pape poreh iri douk panadudareh. Um maresh? Anah nyumnah ipak ta wata pugukoruh. <sup>22</sup> Aria ipak douk arpesh shutripum agundok pagipesh eik Anudok Arman douk adurinyi arpen iri aria shunowisep shutripukuk yoweisi nabes um, ipak douk panadudareh. <sup>23</sup> Ipak ta punadudareh pubouk ganiganiguk abom um abudok nyutob eshesh shunekesh-umep namudok um. Um maresh? Ipakish yopishi eshudok douk shakusumep iruhw heven. Seiwok esheshish popehesh yamehesh shopunek douk shenekesh-umam namudok atin amam seiwokimi profet.

<sup>24</sup> "Aria ipak douk pogrem sabaishi eshudok iri eik yakri gihaucep. Um maresh? Yopishi abudok amnabish eshudok ipak panadudareh-umesh ipak paraesh douk. Kweipon ipak ta pumnek debeiri eriger. <sup>25</sup> Eik yakana gihauum ipak douk pawok worigun dugarep iri. Um maresh? Ipak ta wata nyurub bep. Aria kweipon ipak ta pumnek debeiri eriger um debeirubi nyurub bep! Aria eik yakana gihauum ipak douk pape panagukoruh iri. Um maresh? Ipakiruh aparuh ta wata yoweruh aria pureh debeg abom. Aria kweipon ipak ta pumnek debeiri eriger um pureh yowiyokuk. <sup>26</sup> Aria eik yakana gihauum ipak douk ihishmorim arpesh shatuk ipakish nyeiguhw shakri ipak yopipari abom iri. Ipak ta pumnek aria gamo pudukem amaen douk ta nyutogrumepr iri. Kweipon ipak ta pumnek debeiri eriger. Um maresh? Seiwok esheshish popehesh yamehesh douk shenekesh namudok atin abom um shatuk amudok henek rohwumesh iri profet amamish nyeiguhw shato iruhw."

*Apak Ta Urkum Apahw Shunawasham Apakish Horik Horin  
(Matyu 5:38-48)*

<sup>27</sup> Aria Jisas apa nakripesh baraan nakri, "Aria eik yakrip ipak douk permek eikin baraan iri. Ipak urkum apahw ta punawasham abom um ipakim horim aria punek yopihi aih um eshudok douk shutripukuk yoweisi nabes iri. <sup>28</sup> Aria punek beten um Iruhin um nunekumesh yopihi aih um eshudok douk shenek yoweishi aih um ipak aria shukri iruhw um shukri enen amaen nyutogrumepr iri. Aria punek beten um Iruhin um nutaurum eshudok douk shep shanumugep iri. <sup>29</sup> Aria ta enen arpen nyukri nyubo wobresh popaeshohos um, nyak ta nyutanam nyuken wobresh nyesh shopunek. Aria enen arpen nyukri nyunatrin nyakit saket um, nyak nyuken nyakit siot shopunek. <sup>30</sup> Aria ta enesh arpesh shusuwep um pukesh enesh eshudok eneshenesh um, ipak ta pukeshesh. Aria shopunek, ta enen arpen nyutrin nyunohur enesh eshudok um, nyak mare wata nyunak nyusuwen

aria ta nyutrinyesh uwe, uwok. <sup>31</sup> Ehudok aih douk ipak pakri arpesh shunekuh um ipak iri, ipak shopunek ta punek ehudok atih aih um eshesh.

<sup>32</sup> "Aria ipak urkum apahw shunawasham eshudok douk eshesh urkum apahw shunawasham ipak iri atishi um, ipak ta omi nyutuk ipakish nyeiguhw shuto iruhw? Adur atin ta uwok. Shenek eneshenesh yoweishi inahos iri shopunek apa urkum apahw shanawasham eshudok douk eshesh urkum apahw shanawasham eshesh iri atish! <sup>33</sup> Aria ta ipak punek yopihi aih um eshudok douk shenek yopihi aih um ipak iri atish um, ipak ta omi nyutuk ipakish nyeiguhw shuto iruhw? Adur atin ta uwok. Shenek eneshenesh yoweishi inahos iri arpesh shopunek apa shenekesh namudok atin! <sup>35</sup> Aria namudok ta uwok! Ipak ta urkum apahw punawasham ipakish horik horin aria punek yopihi aih um eshesh. Aria pukesh eshudok aria mare punek urkum um eshesh wata shukepeshi eshudok uwe, uwok. Ipak punekesh namudok aria anah nyumnah Iruhin ta nunekumep sabaishi abom eshudok yopishi eneshenesh gani iruhw heven. Aria shopunek, ipak ta putogur Debeini Iruhin nape iruhw iri ananish batowish. Um maresh? Anan douk yopunum eshudok douk mare shunek tenkyuman iri uwe, shani eshudok douk shenek yoweishi inahos iri aria nataurumesh. <sup>36</sup> Ipakin Yaken apa nenek gihaum eshudok douk shenek yoweishi inahos iri aria nataurumesh. Douk namudok aria ipak shopunek ta punekesh namudok atin."

### *Apak Mare Munek Skelim Um Kupaishi (Matyu 7:1-5)*

<sup>37</sup> Aria Jisas apa nakripesh baraen shopunek nakri, "Ipak mare punek skelimum kupaishi, aria Iruhin shopunek ta mare nunek skelimep uwe, uwok. Aria ipak mare pukesh enen baraen kupaishi pukri eshesh shenek yoweishi inahos iri, Iruhin shopunek ta mare nukep enen baraen nukri ipak penek yoweishi inahos iri. Aria ipak mare pubeimesh yoweishi inahos kupaishi shenekesh um ipak iri aria pukweshihesh um eshesh, aria Iruhin ta nukweshihumep ipakish yoweishi inahos shopunek. <sup>38</sup> Aria ipak pukesh eneshenesh kupaishi um, Iruhin ta wata nukep enesh eshudok ipak. Anan ta nutaurumep nukep sabaishi eshudok aria ta shuknigun abom um ipak. Aria makwunish eshudok ipak pukesh kupaishi um, eshudok Iruhin ta wata nubeyeshumep namudok atin."

<sup>39</sup> Aria Jisas nakripesh enyudok wobuwobren baraen nakri, "Anan nabes seshukan iri ta mare niyabig yah um kupaini nabes seshukan iri, uwok. Aria anan ta niyabigan yah um, amam biom ta hunak hutu hugrukuk anag nuwag. <sup>40</sup> Aria shopunek, ta mare enen arpen nyanak um skul iri nyukri nyupe debeini um enyenin tisa uwe, uwok. Aria ihishmorim ta sheyatatak esheshin skul iyoh aria eshesh ta kadak shutogur kabi douk esheshim tisa ami um."

<sup>41</sup> "Nyak douk mare nyutik abudok debeibi bagab douk bor nyakip nabep iri uwe. Douk namudok aria nyak ta nyutrugun um agundok shokuguni nyubuhas-igun douk nor nyakin arpen enyenyip nabep iri mumam? <sup>42</sup> Nyak douk mare nyutik abudok debeibi bugob douk bor nyakip nabep iri uwe. Douk namudok aria nyak ta mare nyukrip nyakin arpen um nyutukuman agundok shokuguni nyubuhas-igun douk nor enyenyip nabep iri uwe, uwok. Nyak nyenek rohw iri! Sagomatin nyak ta nyurik nyutukum abudok debeibi bagab douk bor nyakip nabep iri ba iyoh. Aria nyak

ta gamo nyunatrugun wosik aria kadak nyutukuman agundok shokuguni nyubuhas-igun douk nor nyakin arpen enyenyp nabep iri.”

*Yoweipi Shuruwep Apa Peir Yowegosi Rowos  
(Matyu 7:16-20, 12:33-35)*

<sup>43</sup> Aria Jisas apa nakripesh baraen shopunek nakri, “Yoweipi shuruwep ta mare pir enen yopunyi rowog. Aria yopipi ta mare pir enen yoweiniyi rowog uwe, uwok. <sup>44</sup> Arpesh ta shutik shuruwep atip aria ta shudukemesh um enyen douk yopunyi aka, uwok yoweiniyi. Arpesh ta mare shudi enep shuruwep nyeigurip um fik iri enen segego watogren iri rowog, uwok. Aria shopunek, ta mare enesh arpesh shudi enep wainip shuruwep enen segego watogren iri rowog, uwok. <sup>45</sup> Aria arpesh shopunek douk namudok atin. Yopunyi arpen douk yopumi urkum mape numun iri apa munek yopuhi aih. Aria yoweiniyi arpen douk yowemi urkum mape numun enyenypim urkum iri apa munek yoweihai aih. Um maresh? Arpesh apa sheneyagwreh enyenenen nyape numun esheship urkwip iri.”

*Biom Harok Urusag Iri  
(Matyu 7:24-27)*

<sup>46</sup> Aria Jisas apa nakripesh baraen nakri, “Ipak apa pohware pakri, ‘Debeini’ aria ipak madae pugipesh eikin baraen uwe um maresh? Namudok uwok. <sup>47</sup> Eshudok arpesh douk shunakumori eik aria shumnek eikin baraen shugipeshen iri, eshesh ta kabi douk maresh um? <sup>48</sup> Eshesh douk kabi anan arman douk nikitak narok nuwagos arigaha nabuh nasuhw burbudu aria nikitak nawu uroruh aria narok ananit urupat iri. Douk narokat wosik aria eshah harari worub bau bat aria babirak ba madae butukat uwe, uwok. <sup>49</sup> Aria eshudok douk shumnek eikin baraen aria mare shugipeshen iri douk kabi anudok arman douk narok urupat atap meyoh iri. Anan madae nurok anagos nuwagos ba iyoh, aria nu uroruh aria kadak nurukat uwe, uwok. Aria anan narokat aria eshah harari aria worub bau batukat aria tatu.”

## 7

*Jisas Nagabe Anan Nenekuman Mour Anan Debeini Soldia Iri  
(Matyu 8:5-13)*

<sup>1</sup> Douk Jisas nakripesh enyudok baraen neyaten shemneken aria nikitak nanak um Kaperneam. <sup>2</sup> Aria agundok anan debeini um amam soldia iri nape. Anan douk nanaki abrudok wabur Rom. Aria anudok douk nenekuman mour iri arugeh hapeyan aria anan hurukatin um nugok. Aria anudok debeini soldia douk urkum makriyan abom. <sup>3</sup> Aria anan nemnek um Jisas nanaki nape Kaperneam um, aria neshopok anam eshesh Juda esheshim debeimi um hunak hukripan um nunaki nugabe anudok nenekuman mour iri. <sup>4-5</sup> Douk neshopokam hanak hatogur um Jisas aria harigan debeg abom hakri, “Anudok debeini soldia douk yopuyopuni abom. Douk namudok aria nyak nyunak nyutauruman. Anan douk urkum makri apak ihishmorim Juda abom aria anan kanak nakop utabor aria marok apakit urupat mape meyagwreh baraen-atari.”

<sup>6</sup> Aria Jisas nikitak neiram hanak. Douk hanak hurukatin um urupat aria anudok soldia nikitak neshopok anam ananim arpeshim hanak hakrip Jisas hakri, “Debeini, anudok soldia nakri nyak mare nyunak ananit urupat. Um maresh? Anan douk madae yopuni um nyak nyunak ananit urupat um uwe. <sup>7</sup> Aria shopunek, anan douk madae yopuni um nunaki hurukatin um nyak aria nutrin uwe. Aria anan nakri nyak nyukri baraen atin aria

anudok neneckuman mour iri wata yopun. <sup>8</sup> Anan nadukemesh um nyak nyukri baraeen atin um, anan ta wata yopun. Um maresh? Anan douk nape shakamum ananin debeini soldia. Aria anan shopunek douk nape debeini um kupaimi soldia. Aria ta anan nukrip anan um nunak um, anan ta nunak. Aria nukrip anan um nunakumori, anan ta nunaki. Aria ta nukrip anudok neneckuman mour meyoh iri nukri neneckume enyudok mour, anan ta nuneken.”

<sup>9</sup> Aria Jisas nemnek namudok aria nikitak yowiyokuk aria natanan nakrip eshudok sabaishi arpesh shagiman iri nakri, “Eik yakriep, apak kanak Israel, eik madae itik enen atin arpen nyunek bilip dodogowin atin namudok uwe!” <sup>10</sup> Aria amudok douk neshopokam hanakum hukrip Jisas iri wata hatanam hanak urupat aria hatik um anudok neneckumar um anudok soldia iri wata yopun.

### *Onok Armatok Anan Nagok Nakusopukuk Iri Okwokwin Nuganin Nagok Aria Jisas Wata Nonohur Nakitak Nape*

<sup>11</sup> Douk Jisas napeigu aria nikitak nanak um anabur wabur shahwarabur um Nain iri. Aria ananim disaipel hani sabaishi arpesh shopunek sheiran shanak. <sup>12</sup> Douk nanak natogur Nain aria natik um enesh shasha'i anan nagok iri arman shanaki. Anudok arman ananik amakek douk kwabuki anan atan. Aria okwokwin raminen douk nagokuk aria sabaishi arpesh sheirok shanaki. <sup>13</sup> Aria douk Debeini natik namudok aria anan nakri giha abom aria nakripok nakri, “Nyak mare nyureh.”

<sup>14</sup> Aria anan nanak nasuhw asudok bokis douk shore iri anudok-asi ba shanasahumori aria eshudok shanasahi iri, shatik namudok aria sheyotu. Aria Jisas nakri, “Shokuni! Kakitak, eik yakripen!” <sup>15</sup> Aria anudok nagok abom iri nikitak nape neyagwreh aria Jisas nakrip ananik amakek nakri, “Nyakin nuganin anudok.” <sup>16</sup> Aria douk ihishmorim shatik namudok aria eshesh shanogugur abom aria shatuk Iruhin ananin nyeigur nyato iruhw aria shakri, “Anan debeini profet nanaki nape orokohun um apak.” Aria shopunek shakri, “Iruhin nanaki um nutaurum apak ananish arpesh.”

<sup>17</sup> Aria enyudok baraeen nyowe nyanak sabaigunum agudok shokugi nahobig Judia gani kupairubi warub bape hurukatin iri shopunek um enyudok mour Jisas neneken iri.

### *Jon Neneck Baptaisumesh Iri Neshopok Biom Ananim Disaipel Um Hunak Humnek Jisas*

(Matyu 11:2-19)

<sup>18-19</sup> Douk Jon ananim disaipel hakrip Jon um enyudok Jisas nape neneken iri aria anan nahwar biom hanaki aria neshopokam hanak. Amam hanakum horik Debeini hukri, “Douk Iruhin ta nishopokan nunaki iri douk nyak aka, uwok. Ta mupe mutrugun um kupaini?” <sup>20</sup> Aria amam hanak hatogur um Jisas aria harigan hakri, “Jon douk neneck Baptaisumesh iri neshopokohw-ari aria wanaki um usorigen um, ‘Douk Iruhin nakri um nishopokan nunaki iri arman douk nyak aka, uwok. Ta mupe mutrugun um kupaini?’”

<sup>21</sup> Aria abudok nyutob Jisas nagabe sabaishi arugeh hapeyeshi iri shani sagabehos shapenyesh iri. Aria shopunek nagabe sabaishi nabes seshukeshi aria eshesh wata shatrugun. <sup>22</sup> Aria Jisas nakrip amudok Jon ananim disaipel nakri, “Ipak wata punak pukrip Jon um mour douk ipak patrin iri nyuni baraeen ipak pemneken iri. Nabes seshukeshi iri wata shatrugun, aria eshudok douk shape atap atin iri wata shakitak sharahaen. Aria yagabe arugeh lepra hapenyesh iri wata yopish, aria arigos

seshukesh iri wata shemnek. Aria yohur shagok iri wata shakitak shape, aria yakripesh Iruhin ananin yopinyi baraen eshudok douk yaruuhish iri arpesh shemnekken. <sup>23</sup> Aria eshudok arpesh douk urkwip porum eik aria shasuhw eikin baraen iri, eshesch douk shanadudareh!”

<sup>24</sup> Aria douk Jon ananim hatanam hanak aria Jisas nape nakrip eshudok sabaishi arpesh um Jon nakri, “Riguk ipak panak patik Jon gani wehigunum arpesh uwok um, ipak pakri anan douk maran arman aria ipak douk panak patrun? Pakri anan douk madae dodogowin kabi douk worur douk uhwin nyarar nyanak wobuwobur iri, uwok? <sup>25</sup> O panak um putik maresh? Ipak panak um putik anan arman douk nore yopihi atih rupeh iri? Uwok. Sheneb yopihi atih rupeh aria shawok yopishi atish worigunish aria shape wosik atin iri, eshudok douk shape king-omi amamig otug urusag. <sup>26</sup> Aria eik yakri ipak pukripe um ipak panak um putik maresh? Ipak panak um putik anan profet, uwok? Adur atin abom anan douk anan profet. Aria shopunek, anan douk neshagrakuk amudok anam profet-omi. <sup>27</sup> Baraen douk nyetem Iruhin ananik Buk abom iri douk nyakrium anudok Jon. Aria Iruhin douk nakri, ‘Eik ta ishopok anan nurao eikin baraen iri nurik nunak. Anan ta nurik nunak nugabeimen yah nyak!’”

<sup>28</sup> Aria Jisas nakri, “Eik yakripep, Jon ananin nyeigur douk nyatouk nyeshagrakuk ihishmorim arpesh douk shape agundok atap iri esheshish nyeiguhw. Aria eshudok arpesh douk eshesch nyeiguhw madae shutowesh uwe, aria shawish agundok Iruhin nape Debeini um ananish arpesh um, esheshish nyeiguhw douk shatouk sheshagrakuk Jon ananin nyeigur.”

<sup>29</sup> Aria douk ihishmorim arpesh shani amudok harao takis iri shemnek Jisas neyagwrehen iri baraen aria eshesch shape shanadudareh. Eshesh shanadudareh um agundok riguk eshesch shemnek Iruhin ananin baraan shagipeshen shakri wosik yopinyi baraen aria Jon neneb baptaisumesh um. <sup>30</sup> Aria riguk amam Farisi hani amudok henek skulumesh um lo iri hemnek Iruhin ananin baraan aria hokomukuk agabus Iruhin ananim urkum aria hakri uwok um Jon nuneb baptaisumam um.

<sup>31</sup> Aria Jisas nakri, “Eik ta iyabigep maresh eshudok doukishi arpesh douk shakonaguk agabus Iruhin iri. Eshesh kabi douk omi um? <sup>32</sup> Eshesh kabi douk shokwishi douk shemnek kupaishi esheshin baraen aria madae shugipeshen atin iri uwe. Shokwishi apa shanak shape agundok douk eshesch apa shantorum shapeum aria enesh shape shahwar enesh shakri, ‘Apak manadudareh aria mape mahapur buwaen aria ipak madae putaurumap miyarub uwe! Apak mape mareh meyarub aweruh douk sheyarubaruh um shagok iri um aria ipak madae pureh uwe.’ <sup>33</sup> Um maresh? Douk riguk Jon neneb baptaisumesh iri nanaki aria anan madae nuwok yopishi worigun shuni wainibar abar uwe aria ipak madae pumnek ananin baraan pugipeshen uwe. Aria ipak pakri, ‘Anudok enen yoweini sagab nyapenyan aria nagugak!’ <sup>34</sup> Aria douk shopunek, eik Anudok Arman douk yatogur adurinyi arpen iri yanaki aria yape yawok worigun nani wainibar abar aria ipak pakri, ‘Tik nani nawok sabaigni worigun iri. Anan nawok sabaibari wainibar abar aria nagugak’. Aria shopunek, nani amudok harao takis iri hani eshudok shenek eneshenesh yoweishi inahos iri shape! <sup>35</sup> Aria eshudok arpesh douk shagipesheh Iruhin iri shenekeh iri aih douk heyabigap um Iruhin ananim urkum douk yopumi atum.”

*Onok Kwonek Yoweishi inahos Iri Armatok Kwakwrup Jisas Ananiruh  
Yeriweruh Um Sanda*

<sup>36</sup> Anan Farisi nahwar Jisas um nunak nini anan huwok worigun ananit urupat. Aria Jisas nakitak nanak natogur anudok Farisi ananit urupat aria

nani anan hape tebol hape hawok worigun. <sup>37</sup> Aria abrudok wabur, onok armatok douk kwonek sabaishi yoweishi inahos iri kwape. Aria okwok kwomnek um Jisas nanak nani anudok Farisi hape hawok worigun um. Aria okwok kwakitak kwohur anar yopuri botol douk shenegor utom iri shukunir um yopuni sanda iri kwasuwor aria kwanak. <sup>38</sup> Okwok kwanak kweyotu agabin um Jisas hurukatin um ananiruh yeriweruh aria kwape kworeh. Okwok kworeh aria abih habuh hetem ananiruh yeriweruh aria okwok wata kwakwu okwokwig barag kwape kwagabe-aruh. Aria okwok kwanapuprik-aruh ba iyoh, aria douk kwagabeuman yeriweruh kwakwu enyudok sanda.

<sup>39</sup> Aria anudok Farisi douk nahwar Jisas nanaki iri natik namudok aria anan kanak naneyagwreh nakri, “Aria anudok arman douk adurini profet abom akure, anan ta nudukemesh um okwudok armatok douk kwape kwasusuhw ananiruh yeriweruh iri. Aria shopunek, anan ta nudukemesh um okwok douk kwenek yoweishi inahos iri!”

<sup>40</sup> Aria Jisas nakripan nakri, “Saimon, eik yakri ikripen um enen baraen.”  
Aria Saimon nakri, “Wosik tisa, kripe.”

<sup>41</sup> Aria Jisas nakripan nakri, “Anan arman nukom anabor utabor biom armam. Anan nakon 100 kina, aria anan nakon 10 kina atin. <sup>42</sup> Aria amudok biom utabor uwok um wata hubeabor-bunaman um aria anan nakri nyunekesh. Aria nyak nyakri meini ta urkum munawasham abom um anudok nakom utabor iri?” <sup>43</sup> Aria Saimon nakri, “Eik yakri anudok douk nakon 100 kina iri.”

Aria Jisas nakri, “Nyak nyakri adurin baraen.”

<sup>44</sup> Aria natanam natik okwudok armatok aria nakrip Saimon nakri, “Nyak nyatik okwudok armatok? Eik yanaki nyakit urupat aria nyak madae nyuke anabar abar um inokwrup eikiruh yeriweruh uwe. Aria okwudok kwape kwareh aria okwokwi abih habuh hetem eikiruh yeriweruh aria wata kwakwu okwokwig barag kwape kwagabeume yeriweruh. <sup>45</sup> Aria nyak douk madae nyunapuprike uwe. Aria okwudok, abudok nyutob eik yanaki atinyum arigha douk, okwok kwape kwanapuprik eikiruh yeriweruh. <sup>46</sup> Aria nyak douk madae nyuwanume anar yopuri wel barang uwe, aria okwudok kwakwrupame yeriweruh sanda. <sup>47</sup> Okwok urkum douk manawasham eik abom. Namudok aria eik yakripen, Iruhin douk madae nusuhwesh um eshudok sabaishi yoweishi inahos riguk okwok kwenekesh iri uwe aria nakwreyeshuguk. Eshudok arpesh douk shenek karowishi yoweishi inahos aria Iruhin madae nusuhwesh-umesh uwe aria nakwreyeshuguk iri, esheship urkwip ta punawasham Iruhin shokubur atin.”

<sup>48</sup> Aria Jisas nakrip okwudok armatok nakri, “Iruhin madae nusuhwesh nyakish yoweishi inahos uwe aria nakwreyeshuguk.” <sup>49</sup> Aria eshudok shani anan shape shawok worigun iri eshesh kanak sheneyagwreh shakri, “Anudok anan douk meini arman aria douk nakri Iruhin madae nunasuhwesh um arpesh shenekesh iri yoweishi inahos aria nakwreyeshuguk um?” <sup>50</sup> Aria Jisas nakrip okwudok armatok nakri, “Nyak nyenek bilip um Iruhin aria anan douk nanaraen nyatanamori nyape wosik abom. Namudok aria nyak nyunak aria nyakihw apahw hwur wosik.”

## 8

### *Ono Armago Wagipesh Jisas*

<sup>1</sup> Douk anob nyutob banakuk aria Jisas nikitak nanak anarub debeirubi warub bani anarub shokurubi. Anan nanak nape nakripes yopinyi

baraen um agundok Iruhin nape Debeini um ananish arpesh um. Aria ananim 12-poreim disaipel shopunek hanaman hanak. <sup>2</sup> Amam hani ono armago shopunek douk riguk Jisas nahiyyah-umokuk yoweishi sagabehos shani arugeh douk hapenyio iri shanaman shanak. Oudok armago onok douk Maria douk kwanaki wabur Makdala iri. Okwok douk seiwok Jisas nahiyyah-umokuk eshudok 7-poresh yoweishi sagabehos shapenyok iri shatogur sharuwokuk iri. <sup>3</sup> Aria onok douk Joana douk okwokwin raminen nanahwaram Susa iri. Anan douk neneh mour Herot ananit urupat. Owo wani Susana kwani sabaiwari armago shopunek wagipeshan. Aria owo apa wataurumam nani ananim disaipel um wokam anabor owowibor utabor bani anagun worigun.

*Anan Arman Nawashak Wit Nubarig Iri  
(Matyu 13:1-9; Mak 4:1-9)*

<sup>4-5</sup> Douk eshesh shanak aria sabaishi arpesh abom shanaki sabairubi warub iri shape shanaki um shakri shutik Jisas. Douk arigaha sabaishi shanaki sheyotu aria Jisas nakripesh enyudok wobuwobren baraen nakri, "Anan arman nanak nawashak wit ananig um nubarig. Anan nawashat aria anat tabuh takus yah, aria arpesh sharahaen shoshishat aria armiguhw hwabuh hwatuhur hwatoh. <sup>6</sup> Aria anat tabuh takus utabor um. Aria atat pupuwarat takih aria abar uwok anabar uwe aria yarit. <sup>7</sup> Aria anat tabuh tagrukuk anaruh utoruh iri amnab aria pupuwarat takih aria aruhudok segegoiruhi madaruruh hashapamat. <sup>8</sup> Aria anat tabuh tagrukuk yopubi amnab aria pupuwarat takih aria sabaiti teir. Atat 100-poreib urub beir atin atin apakiwog."

Aria douk Jisas nakriyuk namudok aria anan nakripesh nakri, "Ipak arigos sapenyepari ta gamo pumnek eikin baraen aria pugipeshen!"

*Baugenylum Um Baraen Um Agundok Jisas Nakripesh Wobuwobren Atin  
Baraen Um  
(Matyu 13:10-17; Mak 4:10-12)*

<sup>9</sup> Douk Jisas nakriyuk enyudok baraen aria ananim disaipel hariganum baugenylum baraen um enyudok wobuwobren baraen anan nakriyen iri. <sup>10</sup> Aria Jisas nakripem nakri, "Iruhin douk nakripes baugenylum baraen um enyudok nyanabeshuk iri baraen ipak atip um arpesh shuwish agundok Iruhin nape Debeini um ananish arpesh um. Aria ihishmorim kupaishi ta uwok. Eshesh ta shumnek wobuwobren atin aria ta shutik um baugenylum aria ta mare shudukemen. Eshesh ta shumnek baraen aria ta mare shudukem baugenylum uwe, uwok."

*Jisas Nakripesh Um Baugen Um Baraen Um Enyudok Wobuwobren  
Baraen Um Atudok Urubit Wit  
(Matyu 13:18-23; Mak 4:13-20)*

<sup>11</sup> Aria Jisas ta nakri namudok, "Enyudok wobuwobren baraen um anudok nawashak wit nubarig iri douk nyanak namudok. Atudok wit douk kabi Iruhin ananin baraen um. <sup>12</sup> Aria atudok douk tabuh takus yah iri douk kabi eshudok arpesh douk shemnek Iruhin ananin baraen, aria Satan nanaki natrish narauguk enyudok baraen douk nyape eshesiruh aparuh iri. Anan nenekesh namudok um eshesh mare shusuhw Iruhin ananin baraen dodog shugipeshen aria Iruhin wata nunaraesh shutanamori shupe wosik abom uiwe, uwok. <sup>13</sup> Aria atudok tabuh takus utabor um iri douk kabi eshudok arpesh douk shemnek Iruhin ananin baraen shanadudareh-umen aria eshesh shemneken meyoh iri. Eshesh madae shusuhwen dodog uwe.

Eshesh shenek bilip um enyudok Iruhin ananin baraen shakri adurin banaab nyutob meyoh. Aria Satan nokwiraelesh um shunek yoweishi inahos aria eshesh shakutukuk Iruhin ananin baraen aria wata shatanam shanak shenek yoweishi inahos. <sup>14</sup> Aria atudok douk tabuh tagrukuk utoruh hatogrohi urah iri douk kabi eshudok arpesh douk shemnek Iruhin ananin baraen, aria eshesh shapeum shakri shunogrem sabaishi eneshenesh eshudok iri. Aria eshesh shanadudareh um eshudok eneshenesh abudok amnabishi atish. Eshesh douk shenek wari um enenyenen amaen douk ta nyutogrumeresh iri aria mishish shakitak um shurao sabaishi eneshenesh eshudok aria eshesh shape shagipesh harik hapenyesh iri yoweishi aih. Aria eshesh madae shunek yopihi aih uwe, uwok. <sup>15</sup> Aria atudok douk tabuh takus yopubi amnab iri douk kabi eshudok arpesh douk shemnek Iruhin ananin baraen aria shasuhwen dodog shagipeshen iri. Esheshiruh aparuh douk yopuyopuruh abom hape wosik aria sheyotu dodog abom shagipesh Iruhin ananin baraen. Aria eshesh shenek yopihi aih aria shape kabi atudok wit douk sabaiti urubit teir iri.”

### *Lam Douk Shahemen Shashapomen Anat Baket Iri*

(Mak 4:21-25)

<sup>16</sup> Aria Jisas ta nakri namudok, “Ta mare enen arpen nyahem enen lam aria nyukitak nyushapomen anat baket o nyunyigren shakamum anat bet uwe, uwok. Enyen ta nyuhemen aria nyunyem iruhw um kadak arpesh shuwishamori shutik agundok enyen nyatrugun um. <sup>17</sup> Aria ihishmorim eshudok douk shanabeshuk iri ta wata shutogur yopugunum. Aria ihishmorim eshudok douk arpesh sheshigarish shakus iri ta wata shishurekesh shukus yopugunum. <sup>18</sup> Aria ipak ko gamo pudukemesh aria gamo pumnek. Um maresh, eshudok arpesh douk shurao Iruhin ananin baraen shudukemen wosik iri, Iruhin ta wata gamo nukripesh enen shopunek. Aria eshudok douk madae shudukem ananin baraen iri uwe, enyudok karowin eshesh shasuhwen iri ta wata nutrish-nyuk.”

### *Jisas Ananik Amakek Kwani Ananim Warhim*

(Matyu 12:46-50; Mak 3:31-35)

<sup>19</sup> Douk Jisas nape nakripesh Iruhin ananin yopinyi baraen eshudok sabaishi arpesh, aria ananik amakek kwani ananim warhim shanaki um shakri shutrun. Douk shanaki aria sabaishi arpesh sheyotu shersharihan aria anan neyotuwu orokohun. Aria eshesh shabirak aria madae shunak hurukatin um anan uwe. <sup>20</sup> Douk namudok aria enesh shakripan shakri, “Nyakik amakek kwani nyakim warhim shashi shanaki sheyotu aduk. Aria eshesh shakri nyak nyunak nyutrish.”

<sup>21</sup> Aria Jisas nakripesh nakri, “Eshudok douk shemnek Iruhin ananin baraen shasuhwen shagipeshen iri eshesh douk kabi eikik amakek aria ekim warhim um.”

### *Jisas Naho Debeinyi Uhwin Nyagok Nyabuhuk*

(Matyu 8:23-27; Mak 4:35-41)

<sup>22</sup> Anah nyumnah Jisas nakrip ananim disaipel nakri, “Apak munak gani wobrehahig um waiyag.”

Aria amam hikitak hato bot aria hanak. <sup>23</sup> Douk hanak yah aria Jisas yobusin atun aria nabuh neshuh. Aria debeinyi uhwin nyahur aria abar baprok bawishukuk bot aria atat hurukatin um tubuhukuk atin.

<sup>24</sup> Aria ananim disaipel hatik namudok aria hanak henyubarun um hakri, “Debeini, apak hurukatin um mugok wo!”

Aria anan nikitak naho enyudok uhwin aria morub um shunak shuruk shemshem. Aria uhwin nyanak nyagok nyabuhuk aria morub shopunek

madae butuk uwe, uwok. <sup>25</sup> Aria anan narig ananim disaipel nakri, “Ipak madae punek bilip um eik uwe um maresh?”

Aria amam hanogugur aria hape hanasorik um hakri, “Anudok manan arman? Anan naho uhwin aria abar um shunak shugok shubuhuk aria eshesh shopunek shemnekan aria shanak shagok shabuhuk!”

*Jisas Nagabe Anan Yoweishi Sagabehos Shapenyanari  
(Matyu 8:28-34; Mak 5:1-20)*

<sup>26</sup> Aria Jisas nani ananim disaipel hanak arigaha hanak hatogur eshesh Gerasa eshesheh-umok um. Agagun douk nape gani wobrehahig um waiyag Galili. <sup>27-29</sup> Agundok anan abrudok waburin douk yoweishi sagabehos shapenyan aria shenekan nagugak iri nape. Sabaihi nyumneh eshudok sagabehos shasuwan dodog anudok arman. Aria roubum nyutob anan madae nuwah rupeh uwe, uwok aria urupat madae nupeyat uwe. Aria arpesh apa shatrun iihh nyumneh aria shasuwan shape shakwu senab shaweshik ananish roguhw aiyas. Eshesh shaweshikan aria anan naprukesh abudok senab aria eshudok sagabehos sharan sharuwok shanak wehigunum arpesh uwok um. Anan nanak nape ganik wonugwegwiruh-igunum arpesh wokum.

Douk amam hanak hatogur aria Jisas nabuh nakih neyotu anagas aria anudok sagabehos shapenyanari nanaki natogruman. Aria natik Jisas aria nohwar debeg aria nanak nabuh nakus atap hurukatin um Jisas ananiruh yeriweruh. Aria nahwar debeg nakri, “Jisas, Debeini Iruhin ananin Nuganin! Nyak nyakri nyuneke mumam eik? Eik dodogoie yakripenyum yakri nyak mare nyuneke irao debeiri eriger.”

Anan nakripan namudok Jisas um mares, Jisas douk madae roubi naho eshudok sagabehos um shukutun-ukuk shutogur shuruwok.

<sup>30</sup> Aria Jisas narigan nakri, “Nyak nyahanhwar mumam?”

Aria anan nakri, “Apak sabaishi sagabehos.”

Anan douk nakri namudok um mares, sabaishi yoweishi sagabehos shawish shapenyan. <sup>31</sup> Aria sabaishi atish eshudok sagabehos dodogowish atish um Jisas shape apa shakri, “Nyak mare nyishopokap munak mugrukuk agudok nuwag douk gor gabuhuk aria madae gubuh giyotu anagun iri uwe.”

<sup>32</sup> Aria agundok anaguh burguhw hweyotuwi hurukatin um anag mihib. Aria eshudok yoweishi sagabehos shakrip Jisas um nushopokesh shunak shuwish ogwuhwudok burguhw aria anan neshopokesh shanak. <sup>33</sup> Aria eshesh shatograri anudok nagugak iri arman shanak shawish ogwuhwudok burguhw. Aria ogwoguh hwatanam hwaruwok hwanak hwagrukuk enen natogur aria hwabuh hwabarahu agudok waiyag. Aria ogwoguh hwabarahu aria ihiguhamorim hwagok hwatuh.

<sup>34</sup> Aria amudok armam douk hape hako ogwuhwudok burguhw iri hatik namudok aria hahur hanak hakrip eshudok douk shape debeiburi wabur iri, shani eshudok douk shape hurukatin um nahobigos iri um enyudok mugu douk nyatogur iri. <sup>35</sup> Aria eshudok arpesh shatik shanak um shutik enyudok mugu douk nyatogur iri. Eshesh shanak shatogur um Jisas aria shatik anudok douk sagabehos shakutunukuk shatogur sharuwok iri nape. Anan wata narao yopumi urkum aria nikitak nanug rupah aria nanak nape hurukatin um Jisas ananigas aiyas. Douk eshesh shatrun namudok aria eshesh shanogugur abom. <sup>36</sup> Aria eshudok arpesh douk shatik enyudok mugu Jisas neneken iri um nagabe anudok yoweishi sagabehos shapenyan iri shanakrip eshudok douk shanakumori shutik enyudok mugu douk nyatogur iri. <sup>37</sup> Aria ihishmorim arpesh shape Gerasa iri shanogugur abom aria shakrip Jisas um nukutukuk esheshibur wabur ba nunak. Aria

anan nikitak nato bot aria natanam nanak gani wobrehahig um waiyag.  
 38-39 Aria anudok sagabehos shakutunukuk shatogur sharuwok iri nikitak ddogowin um narig Jisas um nakri nunaman hunak.

Aria Jisas nakripan nakri, "Uwok, nyak wata nyutanam nyunak nyakibur wabur aria nyukrip nyakishi arpesh um enyudok mour Iruhin neneken um nyak iiri."

Aria anudok arman wata natanam nanak um ananibur wabur aria nakrip ihishmorim arpesh um agundok Jisas nagabeyan um.

*Jisas Nohur Jairus Ananik Nugawik Kwakitak Khape Aria Nagabe Onok  
 Kwasusuhw Ananik Rupah Iri  
 (Matyu 9:18-26; Mak 5:21-43)*

40 Aria Jisas natanam nanak arigaha nanak natogur gani wobrehahig um debeigi waiyag aria sabaishi arpesh shanadudareh-uman. Um maresh? Eshesh douk iganigadae shanaki shape shatrugun-uman. 41 Aria Jairus douk nape debeini um eshesh Juda shape sheneyagwreh barea-ati urupat iri shopunek nanaki. Anan nanaki aria nabuh nakuks atap hurukatin um Jisas ananiruh yeriweruh aria narigan dodog atin um nirau nunak ananit urupat. 42 Um maresh? Ananik otuk arag nugawik douk okwokwisch kwarahos amakek kwakwubuki-umeshi douk shatogur 12-poreish aria hurukatin um kugok.

Aria Jisas nikitak nape nanak yah aria sabaishi arpesh shopunek shanaman shanak wobuwobur aria anan nor orokohun. 43 Aria agundok onok armatok douk owishibor banakok kshape 12-poreish kwarahos iri shopunek kwanaki. Okwokwibor utabor douk kweyatabor batuhuk um kwator dokta omi um agundok hape hagabeyok um. Aria amam shopunek habirak madae hugabeyok uwe. Arpen douk madae enen ddogowin um nyugabeyok uwe, uwok. 44 Douk namudok aria okwok kwagimori Jisas kwanaki agabinum aria kwasusuhw apubih um ananik rupah aria owishibor tukarubor-ukuk abom.

45 Aria Jisas narigeshe nakri, "Omi nyanaki nyasusuhw eik?" Aria eshesh ihishmorim shatanam aria eshesh atin atin shakri eshesh uwok. Aria Pita nakri, "Debeini, sabaishi arpesh sheyotu huruhuruk um nyak aria eshesh shanaki shatatoruh-enyuk meyoh."

46 Aria Jisas nakri, "Uwok, eik yadukemesh, enen arpen nyasusuhw eik. Um maresh? Eik yemnek um Iruhin ananin dodog douk nyogabe enen arpen."

47 Aria okwudok armatok kwadukemesh um anan nadukemesh um agundok anan nagabeyok um. Aria okwok kruk-kruk kwanaki kwabuh kwakus hurukatin um Jisas ananiruh yeriweruh. Aria eshudok ihishmorim arpesh sheyotu aria okwok kwakripan um maresh shenegok aria okwok douk kwanaki kwasusuhw ananik rupah aria ahudok atuh wata yopuk abom um. 48 Aria Jisas nakripok nakri, "Nugawik, nyak nyenek bilip nyakri eik ddogoiwe iri aria nyak douk yopin. Douk namudok aria nyak nyunak aria nyakihw apahw hwur wosik."

49 Aria douk Jisas wata nape neyagwreh atin aria anan napei Jairus ananit urupat iri nanaki nakrip Jairus nakri, "Jairus, nyakik nūgawik kwagok. Douk namudok aria nyak mare nyukon mour debeini Tisa um nunaku nyakit urupat um." 50 Aria Jisas nemnek namudok aria nakrip Jairus nakri, "Nyak mare nyunogugur uwe, uwok. Nyak nyunek bilip atin aria nyakik nugawik ta wata kwukitak kwupe."

<sup>51</sup> Aria Jisas nanak arigaha natogur Jairus ananit urupat aria nakrip Pita nani Jon iri Jems atum hani okwudok kwagok iri okwokwisch amakenish atish shanaman shawish numun. Kupaishi shapeik aduk. <sup>52</sup> Aria ihishmorim shape agundok iri shape shorep okwudok kwagok iri armatok. Aria Jisas nakripesch nakri, “Ipak mare pureh, okwudok madae kugok uwe. Okwok kweshuhw meyoh!”

<sup>53</sup> Douk anan nakripesch namudok aria ihishmorim shadukemesh um okwok douk kwagok. Namudok aria eshesh shanagukoruhan. <sup>54</sup> Aria Jisas nani ananim 3-poreim disaipel hani okwokwisch amakenish shanak shawish numun aria anan nasuhw okwokwin rogur nakwuhur aria nakri, “Batuwinyik, nyak kakitak!” <sup>55</sup> Aria mishin nyakih nyawishok aria ahudok atuh okwok kwakitak kwape. Aria Jisas nakripesch um shukok anagun worigun. <sup>56</sup> Aria douk okwok kwakitak kwape aria okwokwisch amakenish shakitak yowiyokuk. Aria Jisas nakripesch dodogowinyi baraen um eshesh mare shunak shukrip enesh arpesh um agundok anan nohur esheshik nugawik kwakitak kwape um.

## 9

*Jisas Nakrip Ananim Disaipel Um Enyudok Mour Douk Ta Amam Hunak Heneken Iri*

(Matyu 10:5-15; Mak 6:7-13)

<sup>1</sup> Aria Jisas nahwar ananim 12-poreim disaipel hanaki heyotu atugun, aria nakom gobi nyani dodog um huhiyahuguk yoweishi sagabehos. Aria shopunek um hugabe arugeh douk hape arpesh iri. <sup>2</sup> Douk anan nakripam jurug aria neshopokam hanakum hukripesch yopinyi baraen um agundok Iruhin nape Debeini um ananish arpesh um aria hugabe eshudok arugeh haesh iri shutogur yopish. <sup>3</sup> Aria anan nakripam shopunek nakri, “Ipak punak ahudok yah um, ipak mare pusuhw enep butip o esharuh huni worigun aria utabor o eneh kupaihi rupeh shopunek uwe, uwok. <sup>4</sup> Aria punak anabur wabur aria abrudok waburish arpesh shukri wosik um shukep anat urupat um pishuh um, ipak punak pupe atudok atut urupat. Ipak pupe arigaha mehi nyumnah pukri pukutukuk abrudok wabur punak um, aria ipak kadak pukutubur-ukuk. <sup>5</sup> Aria douk punak anabur wabur aria madae shumnekek aria madae shukep anat urupat um pishuh um, ipak pukutukuk abrudok wabur aria punak. Ipak pikitak pugudupeshuk nyupruk kwotem ipakiruh yeriweruh iri kwukusuk abrudok wabur aria punak. Ipak punekesh namudok um eshesh shutrip aria ta shudukemesh um eshesh douk shenek yoweishi aih aria Iruhin ta nunekumesh debeiti kwot.”

<sup>6</sup> Aria amam hikitak hape hakripesch Iruhin ananin yopinyi baraen hanak atubur atubur warub. Aria shopunek, hagabe sabaishi arpesh arugeh hapeyesh iri.

*Herot Nemnek Um Enenyenен Jisas Nape Neneken Iri*  
(Matyu 14:1-2; Mak 6:14-16)

<sup>7</sup> Aria king Herot douk nape debeini gavman um agudok shokugi nahobig Galili iri nemnek um ihishmorim eshudok douk shape shatogur iri aria anan nornor nape. Um maresh? Anan nemnek um enesh arpesh shakri, “Jisas douk Jon nenek baptaisumesh iri. Anan douk nagok aria wata nikitak nape!” <sup>8</sup> Aria enesh shakri Elaija douk seiwok nagok iri anan wata nikitak nape. Aria enesh shakri anan kupaini seiwokin profet wata nikitak nape. <sup>9</sup> Eshesh douk shakri namudok, aria Herot nakri, “Eik yatupok Jon

ananin aruhwigur aria anan nagok. Aria douk anudok meinari arman douk eik yemnek um anan nape nenek enenyenen dodogowinyi mour iri?" Douk namudok aria anan nape nabirak um nakri nutik Jisas.

*Jisas Nekesh Worigun Sabaishi Arpesh Aria Armam Atum Douk 5,000-poreim*

(*Matyu 14:13-21; Mak 6:30-44; Jon 6:1-13*)

<sup>10</sup> Aria Jisas ananim aposel wata hatanamori aria hakripan um eshudok amam henekeh iri. Aria anan narao amam aria amam atum hakitak hanam wabur Betsaida. <sup>11</sup> Aria sabaishi arpesh shemnek um Jisas nanak nape abrudok wabur um, aria eshesh shagipeshan shanak. Eshesh shanak shatogurman aria anan nanadudareh-umesh um agundok eshesh shanaki um. Aria anan nape nakripesha baraeum um shuwish um agundok Iruhin nape Debeini um ananish arpesh um. Aria shopunek, nagabe eshudok douk sharao arugeh iri.

<sup>12</sup> Douk eshesh shape arigaha aun nape nabuh aria Jisas ananim 12-poreim disaipel hanaki hakripan, "Nyak nyishopokes ba shunam warub douk bape hurukatin um nahobigos iri um shunak shunourim um worigun um shugnoph iri. Aria shopunek um shunourim um urusag um shishuh um. Um maresh? Agundok apak mape wehigunum, arpesh uwok um."

<sup>13</sup> Aria Jisas nakripam nakri, "Ipak kanak pukesh anagun worigun."

Aria amam hakripan hakri, "Apak masuhw 5-poreit bret tani bias arbus meyoh. Aria nyak nyakri apak um munak mutorumesh anagun worigun um eshudok sabaishi arpesh aka?"

<sup>14</sup> Aria armam douk 5,000 poreim. Aria armago iri batowish madae shudarehesh uwe.

Aria Jisas nakrip ananim disaipel um hukripesha um hurukatin um 50-poreish shunak shupe anabik aria enesh shopunek hurukatin um 50-poreish shupe anabik. Eshesh shupe namudok atin shunak. <sup>15</sup> Aria amam hakripesha aria ihishmorim shabuh shape atap. <sup>16</sup> Douk shabuh shape aria Jisas nohur atudok 5-poreit bret tani asudok bias arbus nasuwesh aria nanig natik iruhw heven. Aria nenek beten nenek tenkyu um Iruhin. Douk nenek tenkyuman jurug aria nawor atudok 5-poreit bret aria arbus nako ananim disaipel aria amam hape hekeshesh hanak. <sup>17</sup> Douk hekeshesh iyoh aria ihishmorim shashoh arigaha dugaresh aria shakusuk iri, amam hatrishesh heshruk 12-poreiruh sararuh shishikniruh aria harhubuk hakus.

*Pita Nakri Um Jisas Anan Krais Douk Iruhin Nagraehan Neshopoken Nanaki Iri*

(*Matyu 16:13-19; Mak 8:27-29*)

<sup>18</sup> Anah nyumnah Jisas atun nape nenek beten. Aria ananim disaipel shopunek hani anan hape aria anan narigam, "Ipak pemnek arpesh shakri eik douk amiapen?"

<sup>19</sup> Aria amam hakripan, "Enesh shakri nyak douk Jon nenek bap-taisumesh iri, aria enesh shakri nyak Elaija. Aria enesh shakri nyak anan kupaini seiwokin profet douk seiwock nagok aria douk wata nikitak nape iri."

<sup>20</sup> Aria anan narig amam nakri, "Aria ipak kanak pakri mumam? Ipak pakri eik douk amiapen?"

Aria Pita nakripam, "Nyak Krais douk Iruhin nagraehan aria neshopoken nyanamori nyurao arpesh iri."

*Jisas Nakripam Anan Ta Nugok Aria Ta Wata Nukitak Nupe Um*  
(*Matyu 16:20-28; Mak 8:30-9:1*)

**21** Aria Jisas nakripam dodogowinyi baraen ananim disaipel um mare hunak hukrip enesh arpesh um anan douk Krais um uwe, uwok. **22** Aria Jisas apa nakripam baraen shopunek nakri, "Eik Anudok Arman douk yatogur adurinyi arpen iri ta irao debeiri eriger. Aria eshesh Juda esheshim debeimi huni amam debeimi pris huni amam henek skulumesh um lo iri ta huke agabus aria huyokuse. Aria ta he igok aria shurume ijur wonugwehw biyeh nyumneh. Aria douk hukri um biyeh atih nyumneh um, Iruhin ta wata niyohur ikitak ipe."

**23** Aria nakrip ihm-morim ananim disaipel nakri, "Douk enen arpen nyukri nyugipesh eik um, enyen ta nyukri uwok abom um enyen mare nyugipesh enyen kanak enyenyim urkum. Aria ihih nyumneh enyen ta nyusah enyenyin rowog kruse aria nyugipeshe.\* **24** Um mares? Eshudok arpesh douk esheship urkwip madae purum eik aria shukri shunagabe esheshiruh aturuh yegeshiweruh aria eshesh shunogugur um shugok um, eshesh ta shugok aria shunak shuwishuk. Aria eshudok douk esheship urkwip purum eik aria mare shunogugur um kupaishi shesh shugok um agundok shagipesh eik um, eshesh ta shupe wosik ihih nyumneh. **25** Douk anan arman nunek mour aria nurao ihishmorim agundok atapish eneshenesh um, aria kweipon nanak nugok aria nunak nuwishuk um, aria ihishmorim eshudok eneshenesh ta shutauruman mumam? Adur atin ta uwok! **26** Aria douk enen arpen nyunogugur um kupaishi arpesh aria nyukri enyen douk madae eikin disaipel uwe, aria shopunek nyukenyuguk agab eikin baraen um, kweipon eik Anudok Arman douk yatogur adurinyi arpen iri ta ikri enyudok arpen douk madae eikin uwe, uwok. Aria abudok nyutob eik dодогоиwe aria itruguni kabi douk eikin Yain nani ananish yopishi enselahos shatrugun um inaki obi nyutob, eik ta ikripen ikri enyen douk madae eikin uwe, uwok. **27** Adur atin eik yakritep, ipak enep douk peyotu agundok iri ta mare arigas pugok aria ta putik abudok nyutob Iruhin nupe Debeini um ananish arpesh um."

*Jisas Ananihw Yegenyihw Hwakabadig Hwatogur Anahaeh Aria Natrungun Abom  
(Matyu 17:1-13; Mak 9:2-13)*

**28** Douk Jisas nakriyuk enyudok baraen aria 8-poreih nyumneh hanak hadiguk, aria anan nani amam Pita nani Jon aria Jems hanak hato anag mihib um anan nunak nunek beten. **29** Aria douk anan nape nenek beten aria ananig yomag gatogur anahaeh abom. Aria ananih rupeh hatogur shigorihwi abom aria hatrugun kabi douk utag brereyarog ba gatrugun um. **30** Aria ahudok atuh biom armam hatogur heyotu hani anan hape heyagwreh. Amam douk Moses nani Elaija. **31** Amam shopunek douk hatrugun abom aria heyotu hani Jisas hape heyagwreh um agundok ta anan niyatok enyudok mour Iruhin neshopokan nanakumori nuneken iri um nugok Jerusalem um. **32** Aria Pita nani amudok anam biom arpeshim hape yobus sam dодог amaenyim atum aria heshuh hagok. Aria aman wata hakitak hatik agundok Jisas dodogowin aria natrugun abom um nani amudok biom douk hani anan heyotu iri. **33** Abudok atub nyutob amudok biom hakri hukwutukuk Jisas ba hunak aria Pita nakrip Jisas, "Debeini, namudok douk wosik um apak mupe agundok um. Aria apak muwem bioguh atur shomeguh. Nyak anar aria Moses anar aria Ilaija anar."

---

\* **9:23:** Baugennum baraen um arpen nyusah enyenyin rowog kruse nyugipesh Jisas um douk nyakri namudok. Enyen ta nyugipesh Jisas aria enyen mare nyukri uwok um nyusah enyenyenamaen aria mare nyunogugur um kupaishi shen nyugok um.

Aria agundok Pita douk madae nudukemesh uwe, um ta nukripan maren barea Jisas. Douk namudok aria anan douk nakripan namudok.

<sup>34</sup> Aria douk Pita wata nepe neyagwreh atin aria onog orug gwanaki iruhw aria goma nyeshigorum. Aria Pita nani amudok biom hanogugur um ogwudok orug gwanaki aria goma nyeshigarum um. <sup>35</sup> Aria anah mah hatograri ogwudok orug aria mah heyagwrehi hakri, “Anudok douk eikin adurin Nuganin douk eik yanagrahan iri. Ipak pumnekan!” <sup>36</sup> Aria douk enyen nyeyagwrehi jurug aria amam hatik um Jisas atun neyotuguk. Aria amam madae hiyawgreh hukri enen bareaen uwe. Aria abudok nyutob shopunek, amam madae hunak hukrip enesh arpes um eshudok amam hatrish iri uwe, uwok.

*Jisas Nagabe Anan Shokuni Yoweinyi Sagab Nyapeyan Iri  
(Matyu 17:14-21; Mak 9:14-29)*

<sup>37</sup> Aria ruwahepih amam hakitak hakutukuk agudok mihibi aria sabaishi arpes shanaki shaparug Jisas yah. <sup>38</sup> Aria anan arman douk nani eshudok arpes sheytu iri nahwar nakri, “Tisa tik, eik yarigen dodog um nyunaki nyutik eikin nugarin. Eik douk adur atin anudok atun nugarin! <sup>39</sup> Anan enen yoweinyi sagab nyapeyan aria ahudok atuh nahwar debeg. Aria enyen nyatukan nyonaur atap aria ohwas saikh sabuh wobuwobur ananit nokwat. Enyen nyape nyanunun aria madae nyukutunuguk nyutogur nyunakuk uwe, uwok. <sup>40</sup> Aria eik yakrip nyakim disaipe um huhiyahen aria amam habirak hatik uwok.”

<sup>41</sup> Aria Jisas nakri, “Ipak doukish arpes, eik yani ipak mape roubi nyutob ipakirub warub aria ipak yoweishi arpes madae punek bilipume uwe. Aria ipak pakri eik ta wata ini ipak mupe eneh shopunek nyumneh um itaurumep namudok atin um isah enenyenen ipakin amaeen aria ta uwok?”

Aria anan nakrip anudok arman nakri, “Nyak haroki nyakin nugarin!”

<sup>42</sup> Aria anudok yoweinyi sagab nyapenyan iri wata napa nanaki atin aria enyen nyatukan nyonur atap. Aria Jisas naahaen aria nyakutunuguk nyatogur nyaruwok. Douk Jisas nagabeyan aria wata nakrip ananin yaken nakri, “Nyakin nugarin anudok.” <sup>43</sup> Aria ihishmorim arpes shatik enyudok dodogowinyi mour Iruhin neneken iri aria eshesh shakitak yowiyokuk abom.

*Jisas Wata Shopunek Nakri Um Agundok Ta Anan Nugok Um  
(Matyu 17:22-23; Mak 9:30-32)*

Aria eshesh urkwip wata pape porum enyudok Jisas neneken iri aria anan nakrip ananim disaipe nakri, <sup>44</sup> “Ipak gamo pumneken wosik enyudok bareaen douk yakri ikripen iri! Arpes ta shukrip eikim horim um eik Anudok Arman douk yatogur adurinyi arpen iri aria ta dodogowim atum husuwe hunak huweshike.” <sup>45</sup> Aria douk nakripam enyudok bareaen aria amam madae hudukem baugenym uwe. Baugenym bareaen douk nyanabeshuk-umam aria amam hanogugur um horiganumen.

*Jisas Ananim Hanatuturak Um Meini Ta Nupe Debeini Um Amam  
(Matyu 18:1-5; Mak 9:33-37)*

<sup>46</sup> Aria amam disaipe hape hanogogonim bareaen um amam meini ta nupe debeini um amam. <sup>47</sup> Aria Jisas douk nadukem amampi urkwip por panak um, aria nasuhwi enen batowin nyanaki nyani anan nyeyotu. <sup>48</sup> Aria anan nakripam, “Douk enen arpen urkum mur um eik aria nyataurum enyudok batowin um, enyen douk nyataurum eik. Aria douk namudok atin, enyudok arpen nyataurum eik iri douk nyataurum anudok douk

neshopok eik yanaki iri shopunek. Aria meini orokohun um ipak douk peyotu agundok iri nyeigur wakan iri ta anudok nupe debeini um ipak.”

*Eshudok Douk Madae Shunek Horik Horin Um Ipak Iri Uwe Douk Shaniguk Ipak Iri  
(Mak 9:38-40)*

<sup>49</sup> Aria Jon nakrip Jisas nakri, “Debeini, apak matik anan arman nape nahiyyahuk yoweishi sagabehos um nyakin nyeigur aria eshesh shatogur sharuwok. Aria apak makripanam anan mare wata nunekesh namudok uwe, uwok. Um maresh? Anan douk madae nugipesh apak iri uwe, uwok.”

<sup>50</sup> Aria Jisas nakripan, “Ipak mare pukripan namudok uwe, uwok. Um maresh? Eshudok douk shataurum apak iri douk shaniguk ipak iri.”

*Enesh Samaria Shakri Uwok Um Jisas Nunak Esheshibur Wabur*

<sup>51</sup> Aria douk iih nyumneh hape hanak hurukatin um Iruhin wata nurao Jisas nunam iruhw heven um. Aria Jisas nakri abom um nunam Jerusalem, aria anan nikitak nanak. <sup>52</sup> Anan wata nape nagiguk aria neshopok enesh arpesh sharae baraen sharik. Eshesh shanak shawish anabur shokuburi wabur douk bape Samaria iri um shugabeman eshudok um anan nunak nishuh um. <sup>53</sup> Aria arpesh shape nagundok iri shadukemesh um anan ta nunak um Jerusalem um nunek lotu um Iruhin. Douk namudok aria eshesh shakri uwok um nunak nini eshesh nishuh um. <sup>54</sup> Aria douk ananim disaipel Jems nani Jon hatik namudok aria hakripan, “Debeinyi, nyak nyakri apak muhwar nyih hubuhi iruhw heven hunish aka, uwok nyakri mumam?” <sup>55-56</sup> Aria Jisas natanam naham aria amam wata hanam kupaiburi wabur.

*Arpesh Douk Shukri Shugipesh Jisas Iri  
(Matyu 8:19-22)*

<sup>57</sup> Douk amam hanak yah aria anan arman nakrip Jisas nakri, “Ihigun nyunak um, eik ta inamen unak.”

<sup>58</sup> Aria Jisas nakripan, “Wanarig nubag apa gweshuh hurusigun. Aria armiguhw hwehwru iruhw iri apa hweshuh was. Aria eik Anudok Arman douk yatogur adurinyi arpen iri urupat uwok um inak ishuh um.” <sup>59</sup> Aria Jisas wata shopunek nakrip kupaini nakri, “Nyak yowi nyugipesh eik.”

Douk anan nakripan namudok aria anudok arman nakri, “Debeini, eik yakri nyukripe inak ba itik eikin yaken anan nagok ba iroman iyoh aria ta inaki inamen unak.”

<sup>60</sup> Aria Jisas nakripan, “Nyak bukeshuk shagok iri, kadak eshudok douk madae shunek bilip um eik iri uwe shunak shurumesh. Aria nyak nyunak nyukripesh yopinyi baraen um agundok Iruhin nape Debeini um ananish arpesh um.”

<sup>61</sup> Aria anan arman shopunek nanaki nakrip Jisas nakri, “Debeini, eik yakri igipeshen aria eik yakri inak ikeshuk rogur apak atup awirop ba iyoh.”

<sup>62</sup> Aria Jisas nakripan, “Douk anan arman nukri nuhur eikin mour nuneken aria anan wata urkum mur um eneshenesh eshudok anan nakutishukuk iri um, anan douk madae wosik dodogowin um nuwish agundok Iruhin nape Debeini um ananish arpesh um uwe, uwok.”

<sup>1</sup> Douk enyudok nyanakuk ba iyoh, aria Debeini wata nagraeh 72-poreim armam shopunek aria neshopokam hanak biom biom. Anan neshopokam harik hanak ihirub warub douk anan nakri nunak-arubi. <sup>2</sup> Aria anan nakripam, "Sabaiguni worigun jurugigun nape, aria arpesh shagummesh iri douk karowish. Douk namudok aria ipak punek beten um Debeini douk nagrem agudok nahobig iri um neshopok sabaishi arpesh um shunak shogunum agundok worigun. <sup>3</sup> Ipak ta punak, aria eik ishopokep punak kabi douk sipsipahos douk madae dodogowish iri uwe, punak orokohun um wanarig nubag. <sup>4</sup> Aria ipak mare punaruk anas paus douk ipak pape apa panaruk utabor um suni esharuh iri su. Aria ipak punak arigas, ipak mare piyotu puni enesh arpesh douk puparugesh yah iri piyagwreh, uwok.

<sup>5</sup> "Aria douk punak puwish anat urupat um, sagomatin ipak ta purik punkri, 'Apak makri ipak pape atudok urupat iri ipakiruh aparuh hur wosik.' <sup>6</sup> Aria ta anan yopuni arman nupe atudok urupat um, enyudok baraeen ipak pakripanen iri ta nyuni anan nyupeik. O uwok um, enyudok yopinyi baraeen ta wata nyutanamori nyupe um ipak kanak atin. <sup>7</sup> Aria ipak pupe atudok atut urupat aria puwok agundok worigun aria abar eshesh shukepesh iri. Um maresh, ipak penek Iruhin ananin mour aria douk shatorip shekep agundok worigun. Aria ipak mare pupe anat urupat aria wata pukitak punam kupaigwi, uwok. Ipak pupe atudok atut urupat. <sup>8</sup> Aria douk punak anabur wabur aria enesh arpesh shuraep punam eshesheg urusag aria shunek anagun worigun shukep um, agundok worigun ipak ta pugnoh. <sup>9</sup> Aria pugabe eshudok arpesh sharao arugeh iri douk shape abrudok wabur iri. Aria pukrip arpesh shape abrudok iri pukri, 'Nyutob douk banaki hurukatin um arpesh shuwish agundok Iruhin nupe Debeini um ipak ananish arpesh um.'

<sup>10-11</sup> "Aria ta punak anabur wabur aria arpesh shape abrudok iri shukepaguk agabus um, ipak punak piyotu yah aria pukri, 'Okwudok nyupruk apak meshishok ipakibur wabur iri okwudok wata magudupeshuk kwakusumep-ukuk. Apak menekesh namudok um ipak putrup aria ipak urkwip purum enyudok. Nyutob douk banaki hurukatin um arpesh shuwish agundok Iruhin nupe Debeini um ananish arpesh shupe um.' <sup>12</sup> Eik yakritep, ahudok nyumnah Iruhin nunaki nunemesh baraeen ihishmorim arpesh ahi, arpesh douk seiwok shape Sodom iri ta shumnek debeiri eriger aria ta madae kabi eshudok shekepuk agabus ipak iri. Aria eshudok douk shekepaguk agabus ipak iri ta shunamnek debeiri eriger abom shenek uhwin um shape Sodom iri!"

### *Anarub Warub Douk Shemnek Iruhin Ananin Baraen Aria Madae Shusuh-wen Iri Uwe (Matyu 11:20-24)*

<sup>13</sup> Aria Jisas apa nakripesh baraeen shopunek nakri, "Eik yakri gihauum ipak arpesh pape Korasin bani Betsaida iri. Ipak ta pumnek debeiri eriger aria ta pupe yowep abom! Um maresh, seiwok um anan arman nuneen enen Iruhin atun neneken iri mour gani Tair bani Saidon kabi douk eik yeneken ipakirub warub um akure, eshesh ta seiwok shukutukuk yoweishi inahos aria shutanam shukon aparuh Iruhin. Aria eshesh ta shukitak shuwashak yoweishi rupeh aria shunawatom argabus um shiyabigesh um eshesh douk shekeshuguk agabus yoweishi inahos! <sup>14</sup> Aria ahudok nyumnah Iruhin nunaki nunemesh baraeen ihishmorim arpesh um, amaen douk ta nyutogur um ipak Korasin puni Betsaida iri ta nyishagrakuk abom enyudok douk ta nyutogur um eshudok douk seiwok shape Tair bani Saidon iri. <sup>15</sup> Aria ipak Kaperneam shopunek, ipak pakri ta Iruhin nukri wosik aria nurawep

puto iruhw heven, aka? Iruhin ta nuwashep pugrukuk shagok iri shanak shapeum!”

<sup>16</sup> Aria Jisas nakrip ananim disaipel nakri, “Eshudok douk shumnek ipak iri douk shemnek eik shopunek. Aria eshudok douk shekep agabus ipak iri douk sheke agabus eik shopunek. Aria shuke agabus eik iri douk shakon agabus anudok douk neshopok eik yanaki iri.”

### *Amudok 72-poreim Armam Wata Hatanamori*

<sup>17</sup> Douk amudok 72-poreim armam wata hatanamori aria amam hanadudareh abom. Aria amam hakri, “Debeini, apak manak maho yoweishi sagabehos douk shawish shape arpesh iri makripesh um nyakin nyeigur aria eshesha shamenkap shatogur sharuwok.”

<sup>18</sup> Aria Jisas nakripam, “Adur, eik yatik Satan madae dodogowin uwe aria nakutukuk iruhw heven nagruki kabi douk utag brereyarog um. <sup>19</sup> Ipak mne. Eik douk yakep dodogowinyi big um pishish yugwuuh hwuni pupiyaumeb shuni ihinyumorim dodog apakin horin Satan ananin. Aria ipak ta mare enesh yoweishi eshudok shunekep uwe, uwok. <sup>20</sup> Aria ipak mare punadudareh um eshudok sagabehos shemnek ipakin baraen um uwe, uwok. Ipak ta punadudareh um agundok Iruhin nowem ipakish nyeiguhw shetem iruhw heven um.”

### *Jisas Nanadudareh Aria Neneh Tenkyu Um Iruhin (Matyu 11:25-27, 13:16-17)*

<sup>21</sup> Aria abudok nyutob, Iruhin ananin Mishin nyenek Jisas nanadudareh abom aria nakri, “Eikin Yain, Debeini um iruhw atap iri! Eik yanadudareh aria yatuk nyakin nyeigur nyato iruhw. Um maresh? Nyak nyabeshuk baugeh um nyakih aih aria baraen um eshudok arpesh douk shakri eshesha shadukemesh abom aria sharao sabainyi saki iri. Aria nyak wata neyabig eshudok kabi douk shokwishi batowish iri um. Adur Yain, nyak douk nyagipesh nyakim atum urkum aria nyanadudareh um nyenekesh namudok.”

<sup>22</sup> Aria anan apa nakripam baraen shopunek nakri, “Eikin Yain douk neke ihishmorim eshudok. Aria madae enesh arpesh shudukem eik ananin nunganin uwe, uwok. Yain atun nadukeme. Aria shopunek, madae enesh arpesh shudukem Yain uwe, uwok. Eik ananin nunganin yani eshudok douk eik yakri iyabiges um anan iri atup madukeman.”

<sup>23</sup> Aria Jisas natanamori natik um ananim disaipel heyotu aria nakripam nakri, “Ipak douk patik enyudok mour douk eik yeneken patrin iri, ipak douk panadudareh! <sup>24</sup> Um maresh? Eik yakripep, sabaimi profet hani sabaimi king hakri hutik enyudok mour ipak patrin iri aria uwok. Amam hakri humnek enyudok baraen ipak pemneken iri aria uwok.”

### *Anan Samaria Nataurum Ananin Horin Nanaki Jerusalem Iri*

<sup>25</sup> Anah nyumnah anan neneh skulumesh um lo douk seiwok Iruhin nakoguk Moses enyi nanak aria nakri nukwiraeh Jisas. Aria narigan nakri, “Debeini tisa, eik ta inek maresh aria ta douk ipe wosik abom ihih nyumneh?”

<sup>26</sup> Aria Jisas nakripan nakri, “Nyak nyatik Iruhin ananin lo nyakripen mumam? Aria shopunek nyak nyatarihen mumam?” <sup>27</sup> Aria anudok neneh skulumesh um lo iri nakri, “Ipak ta urkwip gamo punawasham abom um Iruhin. Aria ipakiruh aparuh huni ipakish mishish shuni ipakip urkwip ta shunawasham Debeini ipakin Iruhin anan atun aria pukwu ihinyumorim ipakin dodog um punek ananin mour’ Aria shopunek, ‘Ipak urkwip ta

punawasham abom um eshudok douk shape hurukatin um ipak iri aria putaurumesh kabi douk ipak urkwip panawasham ipak kanak um.’”

<sup>28</sup> Aria Jisas nakri, “Nyak nyakri wosik. Nyak ta nyunekesh namudok aria nyak ta nyupe wosik iihh nyumneh.”

<sup>29</sup> Aria anudok neneck skulumes um lo iri nakri Jisas nutrun nuhwaran yopunyi arpen. Douk namudok aria anan narig Jisas nakri, “Aria eshudok shape hurukatin um eik iri douk meishi?”

<sup>30</sup> Aria Jisas nakripan enyudok wobuwobren bareaen nakri, “Anan arman nape Jerusalem aria nikitak nabuhum Jeriko. Anan nanak yah aria yowemi armam douk hakwuaruh atuh iri hasuwan aria han heneken atuhig aria anan hurukatin um nugok. Aria amam hanabuknakusuk aria hatrun hanawar ananah rupeh hani eshudok anan nasuwesh iri hanasuwesh aria hanak. <sup>31</sup> Aria abudok nyutob anan pris nagim yah nanak. Anan nanak natrun aria neshagrakan nanakuk wobrahum yah aria nanak. <sup>32</sup> Douk anan nanakuk aria anan Livai douk nataurum amam pris iri shopunek nanaki nanak neyotu natrun aria nanak wobrahum yah aria neshagrakan nanak. <sup>33</sup> Douk anan nanakuk aria anan Samaria nanak natogur agundok anan nakus um. Aria anan natrun aria anan neneman gishaum anudok Juda. <sup>34</sup> Douk namudok aria anan nanak hurukatin um anan aria nourak wel rani wain um ebudok ereb ba iyoh aria naweshigeb. Douk naweshikuman ereb jurug aria nonohur nanem ananin donki aria naran nanak. Anan naran um anat arpesh shanak shape sheshuhati urupat aria nanak nape natauruman. <sup>35</sup> Douk hanak hape arigaha ruwahepih aria anudok Samaria nikitak neyak anabar utabor nako anudok nagrem atudok urupat iri. Aria nakripan, ‘Nyak nyupe nyutauruman aria ta nyak nyukwu anabor nyakibor utabor nyutauruman um enesh eshudok eneshenesh um, eik ta itanamori aria ibeyaborumen.’”

<sup>36</sup> Aria Jisas narig anudok neneck skulumes um lo iri nakri, “Nyak nyakri mumam um amudok biom atun. Meini nagabe anudok douk hakwuaruh atuh iri han hanabukuk iri kabi douk nanagabe eshudok douk shape hurukatin um anan iri um?”

<sup>37</sup> Aria anan nakri, “Anudok douk natrun neneck gishauman iri.”

Aria Jisas nakri, “Nyak nyunak aria nyunekesh namudok atin.”

### *Jisas Nanak Natik Mata iri Maria*

<sup>38</sup> Aria Jisas nani ananim disaipel hanak. Douk hanak hatogur anabur wabur aria onok armatok douk kwonohwar um Mata iri kwani amam shanam okwokwit urupat. <sup>39</sup> Aria Mata okwokwik owawik douk kwonohwar um Maria iri kwanaki kwape hurukatin um Debeini ananiruh yeriweruh aria kwape kwomnek ananin bareaen. <sup>40</sup> Aria Mata otuk kwape kwenek worigun. Aria okwokwim urkum mor manak um eshudok douk ta kwunekesh iri aria okwokwibur nyibur juwehosibur. Aria okwok kwanak kwakrip Jisas kwakri, “Debeini, eikik owawik kwakutukuk eik aria eik atuwe yape yenek worigun. Aria nyak madae urkum mur um enyudok aria nyukripok kwunaku kwutaurume uwe? Nyak kripok kwunaki kwutaurume!”

<sup>41</sup> Aria Debeini nakri, “Mata, nyak urkum morum sabaishi eshudok aria nyakihw apahw yowehw. <sup>42</sup> Aria atuh yopuhi aih nyak wata nyunekah uwe. Aria Maria douk kwakri kurao ahudok yopuhi aih. Douk namudok aria ta mare enesh arpesh shuturukwah-uguk uwe, uwok.”

<sup>1</sup> Anah nyumnah Jisas nanak nape nenek beten anabik. Anan nenek beten jurug, aria anan ananin disaipel nakripan nakri, “Debeini, nyak nyunek skulumap um munek beten um kabi douk Jon nenek baptaisumesh iri nenek skulum ananim disaipel um.” <sup>2</sup> Aria Jisas nakri, “Ipak punek beten um, ipak pukri namudok.

‘Apakin Yain, apak makri ihishmorim arpesh shutuk nyakin yopunyi nyeigur nyuto.

Aria apak makri nyak nyupe Debeinyi um sabaishi arpesh.

<sup>3</sup> Aria nyukop doukgun worigun ahudok nyumnah.

<sup>4</sup> Apak douk mokweshih-umesh um yoweishi inahos kupaishi shenekesh um apak iri.

Douk namudok aria nyak nyukweshih-umap um apakish yoweishi inahos aria nyukwreyeshuk.

Aria nyak mare nyukutukuk Satan um nukwiraeh apak um munek yoweishi inahos uwe, uwok.’

<sup>5</sup> Aria Jisas nakrip ananim disaipel enyudok wobuwobren baraen nakri, “Douk ipak anan nunam ananin arpenyin ananit urupat orokohunib um wab aria nukri, ‘Arpenyin, eik yakri nyuke 3-poreit bret. <sup>6</sup> Um maresh? Anan eikin arpenyin douk atin nanaki natogurum eik aria eik worigun uwok um ibiroman!’

<sup>7</sup> “Aria douk nape numun urupat aria nukri, ‘Nyak mare nyuke mour! Wit iganigadae yataru aria eik yani batowish meshuh. Aria eik ta mare ikitak iken enesh eshudok uwe, uwok!’ <sup>8</sup> Aria ta mumam? Eik yakripep, anudok urupatinari ta mare nukri anan douk ananin arpenyin nanaki narigan aria ta nukitak nukon bret, uwok. Anan ta nukitak nukon ihishmorim eshudok anan nariganumesh iri. Um maresh? Anan ta nunaiwos abom um numnek ananin arpenyin nupe norigon um eneshenesh. <sup>9</sup> Douk namudok aria eik yakripep, ipak ta punek beten purik Iruhin um nukep eshudok aria anan ta nukepesh. Ipak ta pupe purimesh aria ta putrish. Aria ipak ta pupe pubo wit aria Iruhin ta nijikatumep. <sup>10</sup> Um maresh? Eshudok ihishmorim douk shenek beten sharig Iruhin iri, eshesh ta sharao eshudok eneshenesh. Aria eshudok ihishmorim douk shape shaurim eshudok eneshenesh iri ta shutrish. Aria eshudok douk shupe shubo wit iri Iruhin ta nijikatumesh.

<sup>11</sup> “Douk ipak anan ananin nukan norigan um nukon anar eiyur akure, anan ta nukitak nukon anar yur, aka? <sup>12</sup> O ta norigan um nukon anab ihwurub aria nukitak nukon onok pupiyak? Adur atin ta uwok. <sup>13</sup> Aria ipak douk yoweishi arpesh penek yoweishi inahos abom iri, ipak douk padukemesh um pukesh yopishi eshudok eneshenesh um ipakish batowish um. Aria apakin Yain nape iruhw heven iri douk yopuyopunari aria ta nukesh ananin Mishin eshudok douk shunek beten sharigan iri.”

*Enesh Shakri Belsebul Nyataurum Jisas Dodogowin Aria Douk Nahiyahuk  
Eshudok Enesh Yoweishi Sagabehos  
(Matyu 12:22-30; Mak 3:20-27)*

<sup>14</sup> Aria Jisas nape apa nahiyahuk enen yoweinyi sagab douk madae niyyagwreh atin iri uwe. Enyen douk nyape anan arman aria nyenekan madae niyyagwreh atin uwe. Douk enyen nyatogur nyaruwokuk aria anudok arman wata nape neyagwreh. Aria sabaishi arpesh shakitak yowiyokuk aria shape shanasarik um.

<sup>15</sup> Aria enesh shakri, “Enyudok Belsebul douk debeinyi um ihishmorim yoweishi sagabehos iri nyenekan dodogowin aria douk nahiyahuk eshudok enesh yoweishi sagabehos shatogur sharuwokuk.” <sup>16</sup> Aria enesh shakri shukwiraehan. Douk namudok aria eshesh shakripan um nunek enen

Iruhin atun neneken iri mour um shudukemesh um anan douk adur Iruhin neshopokan nanaki iri.

<sup>17</sup> Aria Jisas nadukem esheship urkwip por panak um aria nakripesch nakri, “Enesh arpesh shape atug nahobig iri shunadiyogurum shunek bias awiros aria eshesh kanak shupe shurpak akure, eshesh ta mare dodogowish. Aria anap awirop shukri shunadiyogurum aria eshesh kanak shupe shurpak akure, eshesh shopunek ta mare dodogowish. <sup>18</sup> Aria douk namudok atin, douk Satan ananish shunadiyogurum aria eshesh kanak shupe shurpak akure, eshesh ta mare dodogowish. Eik douk yakriepen eyudok baraen um maresh? Ipak pakri Belsebul nyataurum eik aria eik douk yahiyahuguk eshudok enesh yoweishi sagabehos. <sup>19</sup> Douk Belsebul nyutaurume aria douk ihiyahuk yoweishi sagabehos um, ipak pakri mumam um ipakim douk hagipesh ipak iri? Amam ami nyakam dodog aria douk hahiyahuk yoweishi sagabehos? Ipakim douk heyabigep um eyudok baraen ipak pakriyem um Belsebul nyataurume um douk madae adurin uwe. <sup>20</sup> Eik douk Iruhin neke dodog aria yahiyahuk yoweishi sagabehos. Douk namudok aria ipak douk patik Iruhin ananin dodog um arpesh shuwish agundok anan nape Debeimi um ananish arpesh um.

<sup>21</sup> “Aria douk anan dodogowini arman nusuhw ananigos burawos nupe neyoh ananit urupat um, ananish eshudok eneshenesh ta shukusuman wosik. <sup>22</sup> Aria douk anan dodogowini abom nishagrakuk anan iri nunaki nini anan hurpak aria non akure, anan ta nunatrur ananigos burawos douk anan nasuwogos iri. Aria anan ta nutrun nukumesh aruh eshudok ananish eneshenesh aria nunak nisiyaesh um kupaishi arpesh.

<sup>23</sup> “Eshudok arpesh douk madae eikish iri uwe, eshesh douk eikim horim. Aria eshudok douk madae shutaurume um murauri arpesh shunakumori eik iri, eshesh douk shapeum shenek eikish arpesh shukutukuk eik shanakuk atin atinyuk.”

### *Yoweinyi Sagab Wata Nyatanamori um (Matyu 12:43-45)*

<sup>24</sup> Aria Jisas apa nakripesch baraen shopunek, “Abudok nyutob enen yoweinyi sagab nyukutukuk enen arpen nyutogur nyunak um, enyen ta nyunak nyutik um anabik abar uwok um nyunak nyupe um nyaraeo uhwin. Aria douk enyen mare nyuparug anabik um, enyen ta nyukri, ‘Eik wata itanam inam eikit urupat douk riguk yapeniyat iri.’ <sup>25</sup> Aria enyen wata nyunak aria nyutik um atudok urupat shagitat aria yoput tape. <sup>26</sup> Aria enyen nyunak nyurauri eshudok enesh 7-poreish yoweishi sagabehos douk yowesh abom sheshagrakuk enyen iri. Eshesh shanaki aria shuwish shupe atudok urupat aria riguk eyudok arpen nyape wosiwosik atin iri. Aria douk enyen ta nyape yowen abom nyeshagrakuk riguk nyarik nyape um.”

### *Arpesh Shagipesh Iruhin Ananin Baraen Iri Douk Ta Shanadudareh*

<sup>27</sup> Douk Jisas nape nakripeschuk eyudok baraen jurug aria onok armatok douk kwani eshudok sabaishi arpesh kweyotu’ iri kwakripan kwakri, “Okwudok armatok douk kwukwarumori nyak iri aria kweken nyumeb iri okwok douk wosik ta kwunadudareh!”

<sup>28</sup> Aria Jisas nakri, “Enyen adur, okwok ta kwanadudareh. Aria eshudok arpesh douk shemnek Iruhin ananin baraen shusuhwen shugipeschen iri eshesh douk ta shunadudareh abom.”

### *Enesh Shahwar Jisas Um Nuneck Enen Iruhin Atun Neneken Iri Mour (Matyu 12:38-42; Mak 8:12)*

<sup>29</sup> Douk enesh sabaishi arpesh shopunek shanaki shantorum shape aria Jisas nakripesh nakri, "Ipak doukish arpesh douk yoweishi arpesh! Ipak pakri putik enen mour Iruhin atun neneñan iri, aria eik ta mare iyabigep enen uwe, uwok. Eik ta iyabigep enyudok Jona ananin atin. <sup>30</sup> Seiwo Iruhin neshopok Jona nanak Ninive nakripesh Iruhin ananin baraen aria shape Ninive iri shakeshuk agabus yoweishi inahos aria shatanam shakon aparuh Iruhin. Aria eik shopunek ta ikripep namudok atin. Douk namudok aria eik Anudok Arman douk yatogur adurinyi arpen iri ta ipe kabi douk enen kak um ipak doukipari. <sup>31</sup> Aria ahudok nyumnah Iruhin nunekumesh kwot arpesh ahi, kwin douk kwape saut iri ta kwukitak kunekumep kwot ipak doukish arpesh um yoweishi inahos ipak penekesh iri. Um maresh, okwok kwape rougun aria kwanaki kwomnek king Solomon ananin yopinyi saki. Aria douk eik douk yesagrakuk king Solomon iri douk yape agundok. <sup>32</sup> Aria ahudok nyumnah Iruhin nunekumesh baraen arpesh ahi, eshesh shape Ninive iri ta shukitak shunekumep baraen ipak doukipari um eneshenesh yoweishi inahos ipak pape penekesh iri. Um maresh? Eshesh douk shemnek Iruhin ananin baraen Jona nakripeshen iri aria shekeshuk agabus yoweishi inahos aria wata shakon aparuh Iruhin. Aria douk eik douk yesagrakuk Jona iri douk yape agundok."

*Apakis Nabes Douk Sape Kabi Douk Lam Um Apakiruh Yegeshiweruh  
(Matyu 5:15, 6:22-23)*

<sup>33</sup> Aria Jisas apa nakripesh baraen shopunek, "Ta mare enen arpen nyushupeh enen lam aria nyukitak nyubeshuken nyunyigren shakamet um anat baket uwe, uwok. Enyen ta nyushupehen aria nyunyem iruhw um kadak arpesh shuwish um aria shutik agundok enyenis aris sene-gogun ba bogaragun um. <sup>34</sup> Aria ipakis nabes douk sape kabi lam um ipakiruh yegeshiweruh. Douk ipakis nabes sutik yopishi eshudok aria ipak urkwip purum yopishi um, ipakiruh yegeshiweruh ta henek lait aria hupe wosik. Aria ipakis nabes sutik yoweishi eshudok aria ipak urkwip purum yoweishi um, ipakiruh yegeshiweruh shopunek ta goutukiruh hupe yoweruh. <sup>35</sup> Douk namudok aria ipak ta pupe punodukumesh um ipakis nabes douk sape kabi lam douk nyape numun ipakiruh aparuh iri mare sutik yoweishi inahos aria ipak urkwip purum yoweishi uwe, uwok. <sup>36</sup> Douk ipakiruh shukniruh yegeshiweruh henek lait um, aria mare anagun goutukigun um, ipak ta penek lait abom kabi douk hanu enyudok lam nyatrugun um."

*Ehudok Yoweishi Aih Amam Farisi Hani Amam Henek Skulumesh Um Lo  
Iri Henekeh Iri  
(Matyu 23:1-36; Mak 12:38-40; Luk 20:45-47)*

<sup>37</sup> Douk Jisas neyagwreh jurug aria anan Farisi nahwaran um nunak nini anan huwok worigun ananit urupat. Aria Jisas naktak nanak nape tebol nani anan hapeum huwok worigun. <sup>38</sup> Douk amam hape hawok worigun aria anudok Farisi natik Jisas um madae nugipesh esheshin lo um nunokwrupuguk wis ba iyoh aria kadak nusuhw worigun nughnah um uwe. Aria anan naktak yowiyokuk abom.

<sup>39</sup> Aria Debeini nakripan nakri, "Ipak Farisi douk pakwrup adukiruh um yaureruh hani kas. Aria ipak numunip um douk pabo susih abom aria ipak shuknip um ahudok yoweishi aih um penek nyigya um eshudok kupaishi um shani eneheneh yoweishi aih. <sup>40</sup> Ipak pagagak iri. Iruhin douk neneñan numunish um eshudok shani adukish um shopunek. <sup>41</sup> Ipak pukesh eshudok shor numun ipakiruh yaureruh hani kas iri eshudok

douk yaruhibh iri um putaurumesh. Ipak punekesh namudok aria ipakish ihishmorim eshudok eneshenesh ta yopish aria shupe wosik.

**42** “Eik yakri gihauum ipak Farisi, ipak douk pasia yabro wani lombo shani ihig apig aria pakon anagun um Iruhin. Ehudok aih um pakon anagun um ipakig apig\* Iruhin. Ahudok aih um pakon anagun um ipakig apig Iruhin um douk wosik. Aria ipak madae punek adurih aih um kupaishi uwe. Aria shopunek, ipak urkwip madae punawasham Iruhin uwe. Ènjen douk wosik um pakon eshudok Iruhin um. Aria ipak ta punek adurih aih um kupaishi shopunek aria ipak urkwip ta punawasham Iruhin shopunek.

**43** “O eik yenek giha abom um ipak Farisi, ipak ta pupe yowep abom! Um maresh? Ipak panak apak Juda mape meyagwreh baraen-ogwi urusag um, ipak pakri punak pupe shakus sharik iri wagiturahos. Aria ipak apa pakri punak sabaishi shantorum shapeum eshesh shutrip aria shunemep yopuhi.

**44** “O yenek giha abom um ipak. Ipak ta pupe yowep! Um maresh, arpesh madae shudukem ipakip yoweipi urkwip uwe, uwok. Namudok aria ipak pape kabi douk wonugwegwiruh douk hanabeshuk hape shakam amnab iri um. Aria arpesh madae shudukemesh uwe aria shape sharahaen iruwiruh um.”

**45** Aria anan neneck skulumesh um lo iri nemnek enyudok baraen aria nakrip Jisas nakri, “Debeini, nyak nyakri namudok aria nyakap baugos aria ddogowinyi baraen apak shopunek!”

**46** Aria Jisas nakri, “O eik yakri gihauum ipak penek skulumesh um lo iri shopunek! Ipak ta pupe yowep abom! Um maresh, ipak powemesh debeibusi bugabus sabaishi arpesh shabususah aria ipak madae ta putaurumesh pubususah uwe, uwok. **47** O eik yene gihauum ipak! Ipak ta pupe yowep abom! Um maresh, ipakim babukenyim habo amam profet hagok aria ipak douk pape penek wonugwegwiruh um amam um. **48** Ipak douk penekesh namudok aria payabig arpesh um ipak pakri wosik um ahudok yoweishi aih ipakim babukenyim henekah iri um habo amam profet hagok um. Aria ipak pape penek wonugwegwiruh um amudok profet. **49** Douk namudok aria Iruhin nagipesh ananim yopumi urkum aria saki nakri, ‘Eik ta ishopokugu profet huni aposel hunakumesh aria eshesh ta shubo anam hugok aria anam ta shom aria shunekam enenyen.’ **50-51** Douk namudok aria ipak doukipari aria douk baraan nyapenyep um eshudok yoweishi inahos seiwok ipakim popehem yamehem hape henekesh hanaki iri. Seiwok baugos um Iruhin neneck agundok atap, amam habo ihm morim profet hanaki arigaha hatograri douk. Enyudok douk seiwok ipakin yamenen Ken neneken um nabo ananin wanin Abel nagok um nyankai arigaha abudok nyutob amam habo Sekaraia nagiguk um. Sekaraia neyotu orokohun um alta nyani Iruhin ananit debeiti urupat aria amam han. Aria ipak penekeh iri aih douk heyabig arpesh um ipak douk panadudareh um enyudok ipakim popehem yamehem heneken iri. Aria Iruhin nakri ipak ta pusah ihibusmorim abusdok bugabus ipakim popehem yamehem amamibus.

**52** “O eik yenek gihauum ipak penek skulumesh um lo iri. Ipak ta pupe yowep abom! Um maresh, ipak kanak madae pudukem enyudok adurin baraen uwe. Aria shopunek, ipak madae putaurum eshudok armam armago um shudukem enyudok adurin baraen uwe, uwok. Douk namudok aria ipak kanak madae purao enyudok yopinyi saki uwe aria patapok yah um eshudok douk shape shabirak um shakri shurao yopinyi saki iri!”

\* **11:42:** Tok Pisin douk shakri namba 10 hap.

<sup>53</sup> Aria douk Jisas nakutukuk eshesh nanak aria amam henek skulumesh um lo iri haní amam Farisi amamirub nyirub juwehosirub abom aria hape hanumogan yowiyokuk abom. Aria amam henek rohw um hakri husuwan um enen bareaen aria hape harigan sabainyi enenyen bareaen um sabaishi eshudok eneshenesh. <sup>54</sup> Amam henekesh namudok um hakri humnekan um nukri enen bareaen douk madae adurin iri uwe um amam hunek kwotuman-umen iri.

## 12

### *Apak Mare Munek Rohw Um Kupaishi (Matyu 10:26-27)*

<sup>1</sup> Douk sabaishi arpesh abom shanaki sheyotu ba shuknigun aria shanokunish um abom. Aria Jisas nakrip ananim disaipel nakri, "Ipak ko gamo pudukemesh um amam Farisi amamis yis. Eik douk yakri um eshudok amamih aih um henek rohw um heyagwreh biyen bareaen. <sup>2</sup> Eshudok douk sheshigarish shakus iri, Iruhin ta nuwerehesh shukus yopugunum aria ihishmorim ta shutrish aria shudukemesh. <sup>3</sup> Aria eshudok douk ipak peyagwrehesh weibus iri, Iruhin ta wata nukrip arpesh shumnekesh aria wata shudukemesh. Aria eshudok douk ipak mirimiri panakripam-umesh numun urusag iri, Iruhin ta wata nuwerehesh. Anan ta nuwerehesh aria arpesh douk sheyotu iruhw urusag iri ta shukripesh um ihishmorim shumnek-umesh."

### *Apak Ta Munogugur um Iruhin Atun (Matyu 10:28-31)*

<sup>4</sup> "Ipak eikish arpesh, eik yakripep, ipak mare punogugur um eshudok douk ta shubo yegeshiweruh aturuh hugok aria kweipon mare dodegowish um shunek enesh yoweishi inahos eshudok shopunek iri, uwok. <sup>5</sup> Aria eik yakri iyabigep anudok arman douk ipak ta punoguguran iri. Ipak ta punogugur um Iruhin atun douk ta nep pugok iyoh aria kweipon shopunek anan douk dodegowinam wata neshópokep púnam yoweiburi wabur hel iri. Adur atin eik yakripep, ipak punogugur abom um anan atun!"

<sup>6</sup> "Ipak padukemesh, arpesh apa shator 5-poreiguh shokuguhiwi armiguhiw um 2 toea atin. Aria Iruhin douk madae urkum mukonaguk um anar arudok shokuri armir uwe. <sup>7</sup> Aria ipak Iruhin douk nadareh atubur atubur ehirub douk bakih ipakig barag iri. Aria anan douk nadukemep wosik abom. Douk namudok aria ipak mare punogugur. Iruhin ananum urkum douk morum aguhwudok shokuguhiwi karowiguhiw armiguhiw atin. Aria ipakin Iruhin douk urkum morum ipak um meshagrakuk armiguhiw. Douk namudok aria anan ta nutaurumep wosik abom."

### *Apak Mare Munogugur Um Mukripesh Um Jisas Ananin Nyeigur Um (Matyu 10:19-20, 32-33, 12:32)*

<sup>8</sup> "Eik yakripep, douk enen arpen nyukripesh yopugunum sabaishi arpesh um agundok enyen nyape eikin um eik Anudok Arman douk yatogur adurinyi arpen iri ta ikripesh yopugunum Iruhin ananish enselahos shapeum enyudok arpen enyenyin nyeigur. <sup>9</sup> Aria enyudok arpen douk nyukripesh yopugunum nyukri enyen douk madae eikin iri uwe, eik shopunek ta inekumen namudok atin enyudok arpen gani Iruhin ananish enselahos eshesis nabes. <sup>10</sup> Douk enen arpen nyukri enen yoweiniy bareaen um eik Anudok Arman douk yatogur adurinyi arpen iri, Iruhin wosik ta nukweshih enyudok yoweiniy bareaen enyen nyakriyen um eik iri. Aria enyudok arpen douk nyukri enen yoweiniy bareaen um Iruhin

ananin Mishin iri, Iruhin ta nusuwen aria mare nukweshih enyudok arpen enyeniyin baraan enyen nyakriyen um Ananin Mishin Iri.

<sup>11</sup> “Aria abudok nyutob shukri shusuwep shuraep um apak Juda mape meyagwreh baraaen-ogwi urusag um, o eshesh gavman shuni amudok nyeiguhw shatoumam iri um agundok ipak pagipesh eik um, ipak mare punogugur-umam. Aria shopunek mare pukri, ‘Kadak munak muwanamesh baraan mumam? O kadak munak aria mukri maren baraan?’ Uwok. <sup>12</sup> Um maresh? Abudok atub nyutob ipak pakri piyagwreh um, Iruhin Ananin Mishin ta nyukriep enyudok baraan douk ta ipak pukriyen iri.”

### *Wobuwobren Baraen Um Anan Debeini Nagrem Sabaishi Eshudok Iri*

<sup>13</sup> Anan arman douk nani eshudok sabaishi arpesh sheyotu iri nakrip Jisas nakri, “Debeini tisa, eik yakri nyak nyunak nyukrip eikin ashuken nisiyaumohw eshudok douk ohwakin yaken nagremesh neshubukum um ohwak iri.”

<sup>14</sup> Aria Jisas nakripan nakri, “Uwok. Eik douk ami nyakripe um inek jas um ipak aria isiyaumep eshudok um ipak biyep?” <sup>15</sup> Aria Jisas wata natanam nakrip ihishmorim arpesh nakri, “Ipak pumnek aria gamo pudukmesh um ipak mare penek nyigiyu um eneshenesh eshudok. Um maresh? Eshudok douk shogrem worobaishi eshudok iri, esheshish sabaishi eshudok eshesh shogremesh iri ta mare shutaurumesh um shupe wosik, uwok.”

<sup>16</sup> Aria Jisas nakripeshe enyudok wobuwobren baraan nakri, “Anan debeini ananig nahobig sabaiguni worigun jurugigun nepe. <sup>17</sup> Aria anan urkum mape mor manak aria anan urkum mor, ‘Eik urupat madae anat uwe um inabuk ekish worigun um. Douk namudok aria eik ta inekesh mumam?’ <sup>18</sup> Aria anan naneyagwreh nakri, ‘Eik ta ibrik eikig worigunig urusag aria wata irok debeigwi otug. Aria eik inabuk agundok worigun nini eneshenesh ekish eshudok shopunek. <sup>19</sup> Aria eik kanak ta ineyagwreh ikri, ‘Eik sabaishi eshudok shakusume aria eshesh ta inagremesh um sabaishi kwarahos. Douk namudok aria eik ta ipe meyoh aria inadudareh ipeum ishoh atin.’”

<sup>20</sup> “Aria Iruhin nakripan namudok, ‘Nyak nyagagak iri! Kadak abudok atub wab nyak ta nyugok aria eshudok nyak nyanagremesh nyeshubukum iri ta omi nyugremesh?’”

<sup>21</sup> Aria douk Jisas nakripeshe enyudok baraan jurug aria wata shopuk nakri, “Eshudok arpesh douk esheship urkwip pur abom um shugrem sabaishi eshudok shuneshubuk, aria eshesh urkwip mare purum Iruhin iri, Iruhin natrish ananis nabes um, eshesh kabi douk yaruhih eshudok eneshenesh wokeshi arpesh um. Eshesh douk shagugak kabi douk anudok nagagak iri arman um.”

### *Urkwip Mare Pur Punak Aparuh Mare Yoweruh Um Eshudok (Matyu 6:25-34)*

<sup>22</sup> Aria Jisas nakrip ananim disaipel nakri, “Namudok aria eik yakriep, ipak aparuh mare yoweruh um worigun ipak pugnoh iri nini rupeh ipak punekeh iri, uwok. <sup>23</sup> Um maresh? Enyudok mupe wosik um douk nyeshagrakuk worigun aria yegeshiweruh douk heshagrakuk rupeh. <sup>24</sup> Ipak putik armiguhw. Owgoguhw douk madae hwunou anagun worigun aria hutormoguni, uwok. Aria ogwoguhw madae hwunarak onog sabajwi worigunig urusag uwe. Aria Iruhin anan kanak nape nakoguh worigun! Aria ipak douk peshagrakuk armiguhw abom. Douk namudok aria anan ta nutaurumep wosik abom! <sup>25</sup> Ipak ta meinyi arpen um ipak apahw yowehw

abom um eneshenesh eshudok aria anan wata nunek ananih nyumneh rouhi aria nupe roubi nyutob agundok atap? Uwok. <sup>26</sup> Aria douk ipak mare wasik um punek enyudok shokwinyi mour um, ipak douk urkwip porum eneshenesh eshudok um maresh?

<sup>27</sup> “Ipak putik aruruhih douk shakih urah iri. Eshesh madae shunek enen mour uwe. Madae shunek eneh rupeh um shihur iri uwe, uwok. Aria eik yakriep, seiwok Solomon douk nyeigur nyato abom aria nagrem sabaishi eshudok aria neneneh yopih atih rupeh. Aria ananih rupeh douk madae eneh yopih abom kabi douk eshudok aruruhih um uwe, uwok. <sup>28</sup> Adur atin eshudok aruruhih douk shape aria nuhutih atuh ta shutupesh shunak shishehuk nyih iri douk Iruhin naginohwesh. Aria ipak arpesh douk ipakin bilip madae dodogowin iri uwe, douk peshagrakuk eshudok aruruhih abom. Douk namudok aria ipak ta pudukemesh um Iruhin ta nutaurumep niginohep rupeh. <sup>29</sup> Aria shopunek, ipakiruh aparuh mare yoweruh um eshudok ta ipak pishoh iri. <sup>30</sup> Um maresh, eshudok douk madae shudukem iruhin iri uwe esheship urkwip douk por abom um sabaishi eshudokmori atish iih nyumneh. Aria ipakin Yaken douk nadukemesh um eshudok ipak wokes iri. <sup>31</sup> Aria sagomatin ipak ta urkwip purum purik puwish um agundok Iruhin nape Debeini um ananish arpesh um aria anan ta kadak nukek eshudok ipak wokes iri shopunek.”

### *Ipak Purao Yopishi Eshudok Gani Iruhw Heven Um (Matyu 6:19-21)*

<sup>32</sup> “Ipak arpesh kabi douk karowish sipsipahos iri um ipak mare punogugur, uwok. Um maresh, ipakin Yaken nanadudareh um ipak puwish um agundok Iruhin nape Debeini um ananish arpesh shapeum aria pupe debeipari. <sup>33</sup> Douk namudok aria ipak pukesh ipakish eshudok eneshenesh kupaishi arpesh shutorish shukep utabor aria pusiyabor um yaruhih eshudok eneshenesh wokesi um putaurumesh. Aria agundok ipak pataurum yaruhih arpesh um, agagun kabi douk ponaruk ipakish eshudok apudok munuhwip douk ta mare yowep iri um. Um maresh? Gani heven eshudok ta mare shunak shuwishuk atin. Aria amudok hakwuaruh iri ta mare hunak hurukatin um ipakish eshudok eneshenesh. Aria tutubrugos ta mare sutupesh, uwok. <sup>34</sup> Ipak ta punabuk ipakish yopishi eshudok gani iruhw heven. Aria iih nyumneh ipakip urkwip ta purum abrudok wabur douk ipakish eshudok eneshenesh shakus aburi atubur.”

### *Shenek Mour Iri Shenek Redi Shape (Matyu 24:42-44)*

<sup>35</sup> “Ipak punadaresh rupeh pihunug baneh aria punotug letog um pupe punek redi um punek mour. Aria pishir ipakish lamhos aria punek redi pupe putrugun um punek mour. <sup>36</sup> Ipak pupe putrugun kabi douk eshudok shenek mour iri shenek gibegabe shape shatrugun um esheshin debeini um. Anan douk nanak natrish um anagun worigun douk shenekagun um biyesh douk ta shanaraum um iri aria anan ta wata nutanamori. Eshesh shape shatrugun um kadak anan nukri nunaki nubo wit, aria ahudok atuh eshesh shikitak shijikagun-uman. <sup>37</sup> Aria douk debeini nunaki aria nutik eshudok shenek mouraman iri shupe shunek redi shatrugun-uman um, eshesh ta shunadudareh abom. Aria adur atin eik yakriep, debeini anan kanak ta nudaresh ananih rupah nuhunug nunatugah Iet aria ta nukripesh shunak shupe aria anan kanak ta nukesh worigun. <sup>38</sup> Aria douk nunaki orokohunib um wab um, o nunaki abudok nyutob sagomatin owotog gwakitak um aria nutrish um shunek redi shupe um, eshesh ta shunadudareh abom!

**39** “Aria ipak urkwip purum enyudok! Douk nagrem urupat iri nudukemesh um abudok nyutob nakwuaruh atuh iri ta nunaki nubrig ananit urupat nuwish um akure, anudok nagrem urupat iri ta mare nukutukuk urupat um ta nubrigat nuwish, uwok. **40** Aria ipak shopunek ta punek redi pupe. Um maresh, eik Anudok Arman douk yatogur adurinyi arpen iri ta wata inaki anob nyutob douk ipak ta pukri eik ta mare inaki obi nyutob.”

*Wobuwobren Baraen Um Biom Henek Mour iri, Anan Yopuni Aria Anan Yoweini  
(Matyu 24:45-51)*

**41** Aria Pita narig Jisas nakri, “Debeini, nyak nyakripap um enyudok wobuwobren baraen apak atup aka, eshudok ihishmorim arpesh shopunek?”

**42** Aria Debeini Jisas nakri, “Meini neneck mour iri nunek ananin debeini ananin mour wosik iri, anudok ta ananin debeini nugrahan um nusuhw merik um eshudok enesh shenekuman mour iri abudok nyutob anan nunakuk anabik um. Aria anan ta nukesh esheshigun worigun abudok nyutob eshesh shurao worigun obi nyutob. **43** Aria douk ananin debeini nutanamori aria nutrun um nuneken wosik kabi douk anan nakripanaguk um, anudok neneckuman mour iri ta nanadudareh! **44** Adur atin eik yakripep, ananin debeini ta nutrun namudok aria ta nugrahan um nupe debeini um ihishumori ananish eshudok eneshenesh. **45** Aria douk anudok neneckuman mour iri niyagwreh anan kanak nukri, ‘Ah, eikin debeini ta mare nunaki arigas.’ Aria anan nikitak nupe nubo eshudok enesh shenek mour iri. Aria nupe nuwok worigun nini dodogowibari abar aria nugugak.

**46** Aria ananin debeini ta wata nutanamori anah nyumnah abudok nyutob douk anudok neneckuman mour iri nakri anan ta mare nutanamori ahi. Anan ta nutanamori nutrun namudok aria ta non yowiyokuk nupe yowen abom aria nushopokan nunak nini eshudok douk madae shunek bilip um Iruhin iri uwe shupe. **47** Aria anudok neneckuman mour iri nudukemesh um ananin debeini nakripan um nuneckesh iri, aria anan mare nunek redi um nuneckesh um, ananin debeini ta nunaki aria non debeg abom. **48** Aria nanudok douk madae nudukem ananin debeini nakri um anan nuneckesh iri uwe, aria anan nunek enen yoweiniy mour aria douk nyeneken um ta non um, debeini ta nunaki aria non shokubur. Aria shashudok arpesh douk Iruhin nukesh sabainyi yopinyi saki nyuni dodog um shunek mour iri, anan ta nukripesh dodogowin atun um shunek yopinyi mour aria ta shuneken wosik atin. Aria eshudok douk ta nukesh sabaishi eneshenesh abom eshudok um shunek mour um, anan ta nukripesh um shunek yopinyi mour aria ta shuneken wosik abom.”

*Jisas Nanakumori Ta Nisia Arpesh  
(Matyu 10:34-36)*

**49** “Eik douk yanakumori iyutik nyih um hunu ihishmorim yoweishi inahos eshudok douk shape agundok atap iri. Aria eik yakri douk ta ehudok nyih hunu akure, douk ta wosik. **50** Eik ta imnek debeiri eriger, aria eik douk wata imnekar uwe aria eikihw apahw douk yowehw abom! Um maresh? Eik wata imnekar uwe. **51** Aria ipak pakri eik yanakumori inek agundok atapishi arpesh shupe atugun aka uwok? Eik yakripep, eik yanamori ta isiyaesh. **52** Douk ahudok nyumnah arigaha kweipon, 5-poreis atus awirosish arpesh ta shikitak shunadiyogur um aria 3-poreis ta shutrishuk yoweisi nabes biyos. Aria asudok biyos ta shutrishuk yoweisi asudok 3-poreis. **53** Aria arpesh ta shunadiyogur um. Yakenyim ta hutrum

yoweisi nabes nugamim aria nugamim shopunek ta hutrumuk yoweisi nabes yakenyim. Aria amakenyiuy ta utruwaguk yoweisi nabes owoiyu nugariyu aria nugariyu ta utruwaguk yoweisi nabes amakenyiuy. Aria nakwurihiyeu ta utruwaguk yoweisi nabes mehiyariyu aria mehiyariyu ta utruwaguk yoweisi nabes nakwurihiyeu.”

*Ahudok Aih Um Mudukem Nyutob Um  
(Matyu 16:2-3)*

<sup>54</sup> Aria Jisas nakrip eshudok armam armago nakri, “Douk putik onog orug gwir gwunak gani aun nabuhum, ahudok atuh ipak ta pukri ‘Eshah ta hurauri.’ Aria ta mare roubi nyutob aria ahah ta hurauri, adur.\* <sup>55</sup> Aria ipak patik uhwin nyanaki saut iri nyahuri dodog, Aria ipak apa pakri ‘Wah ta hutao.’ Aria wah hatao. <sup>56</sup> Ipak penek rohw iri! Ipak patik amnab bani utag shenekesh shanak um aria padukemesh um shashudok douk ta shutograri. Aria douk ipak patik eshudok douk shatogur shanak abudok nyutob iri aria ipak madae pudukemesh um shashudok douk ta shutograri uwu um ariges?”

*Ipak Puni Shashudok Douk Shakri Shenekumep Kwot Iri Ta Punagabeum Arigas  
(Matyu 5:25-26)*

<sup>57</sup> “Ipak kanak ta punek skelimum eneheneh aih aria punek yopihi aih. <sup>58</sup> Douk nyak nyuni enen arpen douk nyukri nyunekumen kwot iri pukri punam kwot um, ipak wata pupe punak yah aria ipak ta pugabe ipakin baraeen nyugokumep-aguk yah. Ipak mare pugabeyen um, enyen ta nyuraen nyunam debeini jas douk nasuhw kwotog iri. Aria jas ta nuraen nyunam shusim aria amam ta huweshigen. <sup>59</sup> Aria ganudok eik yakripen, nyak ta mare nyutograri arigas, uwok. Nyak ta nyugabe nyakin dinau niyyatenyuk namudok aria ta nyutograri.”

## 13

*Eshudok Arpesh Douk Madae Shukeshuk Agabus Yoweishi Inahos Iri Ta Shunak Shuwishuk*

<sup>1</sup> Aria abudok nyutob, enesh arpesh shape agundok iri shakrip Jisas um agundok debeini um gavman iri Pailat nabo enesh Galili shagok um. Anan naesh abudok nyutob eshesh shape shenek ofa um eneshenesh eshudok shuko Iruhin eshi. <sup>2</sup> Aria Jisas nakripesh nakri, “Ipak pakri eshesh sheshagrakuk ihishmorim arpesh abom shape Galili iri um shenek eneshenesh yoweishi inahos um aria Pailat douk naesh shagok namudok? <sup>3</sup> Uwok! Eik yakriep, aria ipak mare pukeshuguk agabus yoweishi inahos aria putanam pukon aparuuh Iruhin um, ipak ihishmorim ta pugok namudok atin. <sup>4</sup> Aria ipak pakri mumam um eshudok 18-poreish arpesh douk routi urupat tatao wabur Siloam iri tatu taesh shagok iri? Ipak pakri eshesh sheshagrakuk ihishmorim arpesh abom shape Jerusalem iri um shenek eneshenesh yoweishi inahos um aria eshesh douk shagok? <sup>5</sup> Uwok! Eik yakriep, aria ipak mare pukeshuguk agabus yoweishi inahos um, ipak ta pugok namudok atin kabi douk eshesh shape Siloam iri shagok um.”

*Wobuwobren Baraen Um Enen Rowog Douk Shuruwep Mare Piren Atin Iri Uwe*

\* **12:54:** Eshesh Juda eshesh um, orug apa gweir aun nabuhum aria eshah hor, kupaigunum uwok.

<sup>6</sup> Aria Jisas nakripesh enyudok wobuwobren baraen nakri, “Anan arman nawu enen rowog shahwaren um fik iri numun um ananig nubarig douk nawu wain um. Anan nawen nyakih debeinyi aria nanak nape narupamen aria anan madae nutik enep shuruwep pir uwe. <sup>7</sup> Douk natrin namudok aria nakrip anudok neneck mour nubarig iri nakri, ‘Mnek, bishatin kwarahos eik yanaki yape yarupamen aria madae itik enep shuruwep pir uwe.’ Douk namudok aria eik yakri, ‘Nyubrowenyuguk! Um maresh? Enyen nyataao aria nyape nyeyatakuk gris meyoh um amnab.’

<sup>8</sup> “Aria anudok neneck mour nubarig iri nakripan nakri, ‘Debeini, nyak kutinyuguk nyutao enyudok atin kwar shopunek. Aria eik ta irak amnab ibur baugennum aria ibuk bulmakau-ibas ubas baugennum um enyen nyurao yopusi gris. <sup>9</sup> Aria nyanyi nuhutin kwar shuruwep pir um, enyen wosik nyutao. O ta mare enep pir um, nyak wosik kadak nyubrowenyuguk.’”

### *Anah Nyumnah Sabat Eshesh Juda Mour Uwok Shape Meyoh Ahi Jisas Nagabe Onok Armatok*

<sup>10</sup> Anah nyumnah Sabat, Jisas nanak nawish nape nakripesh Iruhin ananin baraen anat eshesh Juda shape sheneyagwreh baraen-atari urupat.

<sup>11</sup> Aria agundok onok armatok douk enen sagab nyapenyok 18-poreish kwarahos iri kwani eshesh kwape. Okwok douk enyudok yoweiniy sagab nyapenyok aria nyenegok bukaruk atin. Okwok kwabirak aria madae kwukitak kwiyotu iruhw uwe, uwok. <sup>12</sup> Aria Jisas natruk aria nahwarok kwanaki aria nakripok nakri, “Nyak mnek, eik yagabe nyak!”

<sup>13</sup> Aria anan nawemok ananis wis aria ahudok atuh okwok kwakitak kwetyotu iruhw abom. Aria okwok kwanadudareh aria kwape kwatuk Iruhin ananin nyeigur nyato iruhw.

<sup>14</sup> Aria anudok debeini um atudok urupat iri juwehosin abom um Jisas um agundok nagabe okwudok armatok ahudok nyumnah Sabat um. Douk namudok aria anan nikitak nakrip eshudok arpesh shape iri nakri, “Ihih douk 6-poreih atih nyumneh um apak munek mourum. Aria ta ipak pukri punaki um anudok arman nugabeyep um, ipak punaki anah ahudok mourih nyumnah aria anan nugabeyep. Ipak mare punaki ahudok nyumnah Sabat uwe, uwok!”

<sup>15</sup> Aria Debeini nakripan nakri, “Ipak penek rohw iri! Ahudok nyumnah Sabat ipak ihipmorim apa pakweshih ipakish bulmakauhos iri donkihos aria paraesh panak shawok abar. <sup>16</sup> Aria enyen douk wosik um eik yagabe okwudok Abraham ananik nugawik douk Satan noweshigok kwape 18-poreish kwarahos iri ahudok nyumnah Sabat um.”

<sup>17</sup> Aria Jisas ananim horim abraen nyam abom. Aria ihishmorim arpesh shanadudareh um enyudok yopunyi mour Jisas neneken iri.

### *Jisas Nakripesh Wobuwobren Baraen Um Enen Rowog Douk Shahwaren Um Mastet Iri Um Enyenyim Shurkum Iri Yis*

*(Matyu 13:31-32; Mak 4:30-32)*

<sup>18</sup> Aria Jisas narigesh nakri, “Agundok arpesh shuwish um Iruhin nape Debeini um ananish arpesh um ta kabi maresh um? Eik ta ikripep maren wobuwobren baraen um pudukemesh? <sup>19</sup> Agagun ta kabi anam shokumi mastetim shurkum douk anan arman nawom ananig nubarig iri um. Anan nawom aria makih munek debeinyi rowog. Aria enyen nyenek nyeiguuhw aria armiguhw douk hwehwru iruhw iri hwakih hhuwem was nyeiguuhw aria hwotem.”

### *Wobuwobren Baraen Um Yis Douk Senek Bret Takitak Debeiti Iri*

*(Matyu 13:33)*

**20** Aria Jisas wata shopunek nakripesh nakri, “Agundok arpesan shuwish um Iruhin nape Debeini um ananish arpesan um ta kabi maresh um?

**21** Agagun ta kabi yis um. Onok armatok kwakitak kwosuhur kwakutus um enen dram plaua aria kwonek budibodigas arigaha yis suwishes ihinyumorim um plaua aria seneken nyakitak debeinysi.”

*Shokwuti Wit  
(Matyu 7:13-14, 21-23)*

**22** Aria Jisas nape nanak sabairubi debeirubi bani shokurubi warub. Anan nanak nape nene skulumesh um Iruhin ananin baraen aria nape nanak um nakri nunak um Jerusalem. **23-24** Aria agundok enen arpen nyarigan nyakri, “Debeini, Iruhin ta nunarao atin atin arpesan shutanamori shupe wosik abom aka, uwok?”

Aria Jisas nakripesh nakri, “Ipak ta dodogowip atip aria puwishes atudok shokwuti wit. Eik yakripep namudok um maresh, sabaishi arpesan ta shukri shuwishes atudok shokwuti wit aria eshesh ta shubirak shutik uwok. **25** Aria ahudok nyumnah, anudok yaken um urupat iri ta nukitak nuwarukuk wit aria ipak ta punak piyotu aduk aria ta pupe pubo wit aria pukri namudok. ‘Debeini, jikamapogu wit!’ Aria anan ta nukripepi nukri, ‘Eik madae idukemep uwe, ipak meirubi warubip!’

**26** “Aria ipak ta wata pukripan pukri, ‘Apak douk mani nyak mawok worigun iri abar aria shopunek, nyak nyanaki nyenek skulumap nyakripap nyakin baraena apakirub warub!’

**27** “Aria anan ta wata nukitak aria nukri, ‘Eik madae idukem abrudok wabur ipak panaki-aburi uwe. Karemeik ipak penek eneshenesh yoweishi inahos iri!’ **28** Aria ipak ta putik apakin yamenen Abraham nini Aisak iri Jekop huni amudok ihm-morim profet hupe agundok Iruhin nape Debeini um ananish arpesan shapeum. Aria ipak ta neshopokep punak pupeik aduk. Aria ipak ta pureh punokwukri punaruwor aria punatukesh ipakiruh naruh. **29** Aria arpesan shape ihigunmorim agundok atap iri ta shunaki shupe shuwok debeiguni worigun agundok Iruhin nape Debeini um ananish arpesan shapeum. **30** Aria eshudok arpesan douk nyeiguhw wokeshi ta wata shutogur nyeiguhw shapeyesh iri. Aria eshudok douk nyeiguhw shapeyesh iri ta wata shutogur nyeiguhw wokeshi iri.”

*Jisas Nereh Um Jerusalem  
(Matyu 23:37-39)*

**31** Aria abudok atub nyutob amam Farisi hanaki aria hakrip Jisas hakri, “Nyak nyukutukuk agundok aria nyunakumaguk kupaigunum. Um maresh? Herot nakri nen nyugok.”

**32** Aria Jisas nakripam nakri, “Ipak punak pukripat namudok atudok wanarit nubat. Pukri, ‘Mnek, doukhir iri nuhuthi eik ta ihiyahuk yoweishi sagabehos aria shopunek ta igabe arugeh hapeyesh iri arpesan. Aria hukri um biyeh atih nyumneh ahi, eik ta iyatak eikin mour.’ **33** Aria doukhir huni nuhuthi iri biyeh, eik ta inak. Um maresh? Eshesh ta mare shubo anan profet nugok anabur kupaiburi wabur, uwok. Eshesh ta shon nugok Jerusalem atugun.

**34** “O ipak arpesan pape Jerusalem iri, ipak apa pabo amam profet hagok. Aria shopunek, pakwumam utabor amudok douk Iruhin neshopokam haraomepogu ananin baraen ipak iri! Sabaihi nyumneh eik yakri iraep pupe atugun kabi douk mamokit owot toshigar atatig nugag atatish kapraigiyohos um. Aria ipak pakri uwok abom! **35** Aria mnek, Iruhin ta nyukutukuk ipakibur wabur. Aria eik yakripep, ipak ta mare wata putiwe

arigaha abudok nyutob douk ta pukri, ‘Apak makri Iruhin nunekuman yopuni anudok arman douk nanaki um Debeini ananin nyeigur iri!’”

## 14

### *Jisas Nagabe Anan Arugeh Hapeyanari*

<sup>1-2</sup> Anah nyumnah Sabat eshesh Juda mour uwok shape meyoh ahi, Jisas nanak um nuwok worigun anan debeini um amam Farisi iri ananit urupat. Aria agundok anan yegenyihw hwanugokan-ari nape hurukatin um Jisas. Douk namudok aria amam hape hatrun duk um hakri kadak nukri nugabe anudok arman um. <sup>3</sup> Douk namudok aria Jisas naktak narig amudok henek skulumesh um lo iri hani amam Farisi nakri, “Apakin lo nyakri apak mugabe arpesh ahudok nyumnah Sabat aka, uwok?”

<sup>4</sup> Aria amam madae hukri enen baraen. Aria Jisas nasuhwi anudok arman nagabeyan aria neshopokan nanak. <sup>5</sup> Aria narig amudok tisa hani amudok Farisi nakri, “Aria ipak anan enen ananin batowin o enen bulmakau nyunak nyugrukuk anag nuwag abar barag iri ahudok nyumnah Sabat um akure, anan ta nunak nutukenyi aka, uwok? Adur, anan ta nutukenyi ahudok atuh nyumnah.”

<sup>6</sup> Aria amam baraen uwok um hubeyenyuman um.

### *Apak Mare Mutuk Apakish Nyeiguhw Shuto Iruhw*

<sup>7-8</sup> Douk Jisas natik amudok armam douk hanakum agundok worigun iri hanaki, aria amam hakri hupe shakus sharik iri atish wagiturahos. Aria anan nakripesh enyudok wobuwobren baraen nakri, “Aria enen arpen nyuhwarenyum nyunak um anagun worigun douk shenekagun um biyesh shanaraum, um nyak nyunak aria mare nyunak nyupe nyurik uwe, uwok. Um maresh? Ta anudok douk nahwarenyum nyunak um agundok worigun iri nuhwari anan douk ananin nyeigur nyatouman-uguk um nyak iri shopunek.” <sup>9</sup> Aria douk namudok um, anudok douk nahwarep punak um ananigun worigun iri ta nunaki aria nukri, ‘Nyak kakitak aria nani nunaki nupe agundok.’ Aria nyak ta abraen nyen aria nyunak nyupe nyugiguk.

<sup>10</sup> Aria namudok douk uwok. Aria enen arpen nyuhwarenyum nyunak um enyeniyigun worigun um, nyak nyunak aria nyupe nyugiguk. Nyak nyunekesh namudok aria enyudok arpen douk nyahwarenyum nyunak um enyeniyigun worigun iri ta nyunaki nyukripenyum nyukri, ‘Arpen, nyak nyunak nyupe nyurik.’ Enyen ta nyukripen namudok aria eshudok enesh arpesh douk shanakumori agundok worigun iri ta shutrinyum aria shutuk nyakin nyeigur nyuto iruhw. <sup>11</sup> Um maresh? Ihishmorim arpesh douk shutuk esheshish nyeiguhw shuto iruhw shukri eshesh debeishi iri, Iruhin ta wata nunihesh shubuh atap. Eshudok douk madae shutuk esheshish nyeiguhw iri uwe, Iruhin ta wata nutuk esheshish nyeiguhw shuto iruhw.”

### *Apak Ta Munekumesh Yopinyi Um Eshudok Douk Ta Mare Shutanan Shubeimap Eneshenesh Iri*

<sup>12</sup> Aria Jisas nakrip anudok debeini um amam Farisi iri douk nahwaran um nunak um ananigun worigun iri nakri, “Aria nyak ta nyukri nyunek anagun worigun um, nyak mare nyuhwari nyakish arpesh atish shuni nyakish ashukenyish owashish shuni nyakip awirop puni ipak atubur wabur um douk shanabuk sabaishi eshudok eneshenesh iri atish uwe, uwok. Um maresh? Eshesh ta wata shuhwarenyum nyunak nyuwok worigun eshesig urusag. Aria namudok um, eshesh ta shuananum um nyakish worigun. <sup>13</sup> Aria namudok uwok. Aria nyak nyunek debeiguni worigun um, nyak ta nyuhwari eshudok yaruhiish douk eneshenesh

wokeshi um eshudok iri, shuni yegeshiweruh yoweruh-eshi shuni aiyas senekeshi shuni nabes seshukesh iri. <sup>14</sup> Um maresh? Eshudokmori arpesh ta mare shuanamen agundok worigun nyak nyenekagun-umesh iri. Aria Iruhin ta nunekumen yopuhi aih. Aria abudok nyutob eshudok yopishi arpesh douk riguk shagok sharumesh iri wata shukitaki wonugwegwiruh obi nyutob, Iruhin ta nuwanamen eshudok eneshenesh.”

*Jisas Nakripesh Wobuwobren Baraen Um Debeiguni Worigun  
(Matyu 22:1-10)*

<sup>15</sup> Aria anan arman douk nanamam hape hawok worigun iri nemnek namudok aria nakrip Jisas nakri, “Eshudok arpesh douk ta shupe shuwok worigun agundok Iruhin nape Debeini um ananish arpesh shapeum iri, eshesh ta shunadudareh shuriguk.”

<sup>16</sup> Aria Jisas nakripan enyudok wobuwobren baraen nakri, “Anan arman nakri nunek anagun debeiguni worigun. Aria anan nahwari sabaishi arpesh um shunak um agundok worigun. <sup>17</sup> Aria ahudok nyumnah hatogrum nunek agundok worigun um, aria anan neshopok anan nenekuman mour iri um nunak nukripesh shunaki. Aria anan nanak nakripesh nakri, ‘Ipak yowi, worigun monekagun nakus.’

<sup>18</sup> “Aria eshudok ihishmorim atin atin shakitak aria shakri eshesh ta mare shunak. Aria narigiri nakri, ‘Eik yator anag nubarig aria eik yakri inak itrug. Douk namudok aria eik ta mare inaku.’ <sup>19</sup> “Aria anan nakri, ‘Eik douk atin yator 10-poreish bulmakauhos um shunek mour iri, aria eik yakri inak ikwiraelesh um shunek mour. Douk namudok aria eik ta mare inaku.’

<sup>20</sup> “Aria anan nakri, ‘Eik douk atin yarao armatok, douk namudok aria eik ta mare inaku.’

<sup>21</sup> “Douk amam hakripan namudok aria anan wata natanam nanak nakrip ananin debeini um enyudok baraen amam hakripan um. Aria anudok urupatinari juwehosin abom aria nakrip anudok nenekuman mour iri nakri, ‘Douk nyunak arigas um ehudok ihishmorim debeihi yeh huni shokuhi douk hape abrudok wabur iri. Aria nyurauri nabes seshukesh iri shuni eshudok eneshenesh wokesh iri. Eshesh shuni eshudok douk yegeshiweruh yoweruhesh iri, shuni aiyas senekeshi aria nyuhwaresh shunaki eikit urupat.’

<sup>22</sup> “Aria anudok nenekuman mour iri wata nanaki aria nakri, ‘Debeini, eik yagipesh nyakin bareaen aria anabigit um urupat watak tape meyoh.’

<sup>23</sup> “Aria debeini nakripan nakri, ‘Nyak nyunak nyugim debeihi yeh aria shopunek nyugim narub nubarigirub aria nyiraouri arpesh shunaki shuwish eikit urupat. Um maresh? Eik yakri eikit urupat ta shuknit abom. <sup>24</sup> Aria eik yakripen, amudok armam douk nubokuhu yahwaram um hunaki um eikigun worigun iri ta mare wata hunaki huwok anagun eikigun worigun uwe, uwok.’”

*Arpesh Shukri Shugipesh Jisas Iri Ta Shukon Eshesh Kanak Abom Um Iruhin  
(Matyu 10:37-38)*

<sup>25-26</sup> Douk sabaishi arpesh shani Jisas shanak aria anan natanam natrish aria nakripesh nakri, “Aria enen arpen nyukri nyunaki nyugipesh eik, aria enyen urkum munawasham abom um enyen yaken nini amakek, shuni enyen yikenish irohukwik kwuni enyen yaken batowish, shuni enyen yikenish ashukenyish owashish shuni enyen kanak, aria eik enyen urkum munawasham karoewe atuwe um eik iri, enyen ta mare wosik nyugipesh eik uwe, uwok. Enyen nyukri nyugipesh eik um, enyen urkum ta munawashame abom. <sup>27</sup> Aria shopunek, enyudok arpen douk nyukri

nyugipesh eik, aria enyen mare nyunek redim nyusah enyenyin rowog kruse aria nyugok um, enyen ta mare wosik nyupe eikin disaipel uwe, uwok.

<sup>28</sup> “Aria ta ipak enen nyukri nyurok anat rourouti urupat akure, sagomatin enyen ta nyupe aria urkum mupe murum enyenyibor utabor douk enyen nyanabarubuk iri iyoh. Ababar ta wosik um nyurok atudok urupat nyiyatat aka, uwok? <sup>29</sup> Aria douk sagomatin enyen urkum mare mur namudok iyoh aria nyukitak nyunek simen nyishuhurat, aria enyen mare nyurukat nyiyatat um, ihishmorim arpesha ta shutrut aria shiyakasen, shuneken enenyen. <sup>30</sup> Eshesh ta shukri, ‘Enyen nyatuhur nyarukat aria enyen madae nyurukat nyiyatat uwe!’

<sup>31</sup> “Aria ta anan king nini 10,000 poreim soldia aria nukri nunak nini kupaini king douk narauri 20,000 poreim soldia iri um ta hurpak um, sagomatin anan ta nupe aria urkum murum anan nini ananim soldia ta wosik dodogowim um hubo anudok anan king nini ananim huihiyaham aka, uwok. <sup>32</sup> Aria anan nunadukem um anan ta mare dodogowin um, ananish horim shuni esheshin king ta wata shupe shunaki rougun aria anan ta nishopok enen nyurao baraen iri. Enyen ta nyurao baraen nyunak nyukrip anudok anan king um amam hunugabe um hupe atugun aria mare hurpak.

<sup>33</sup> “Aria douk namudok atin, ta enen arpen mare nyukeshuk agab ihishmorim enyenyish eshudok eneshenesh um, enyen ta mare wosik nyugipesh eik uwe, uwok.”

*Sol Douk Madae Ekehir Iri Uwe Ta Shuwasharuk  
(Matyu 5:13; Mak 9:50)*

<sup>34</sup> Aria Jisas nakripesch enyudok wobuwobren baraen nakri, “Sol arar douk yopuri. Aria ta arar wata jemiyair um, apak yah douk madae anah uwe um wata munekar ekehir um uwe, uwok. <sup>35</sup> Arudokmori sol douk madae yopur um runek enen mour uwe. Apak ta muwasharuk meyoh. Aria ipak arigos sapenyepi ta pumnek enyudok baraen!”

## 15

*Jisas Nakripesch Wobuwobren Baraen Um Enen Sipsip Nyanak Nyawishuk  
Um  
(Matyu 18:12-14)*

<sup>1</sup> Anob nyutob amam harao takis iri hani amudok anam henek eneshenesh yoweishi inahos iri hanaki um humnek Jisas ananin baraen. <sup>2</sup> Aria amam Farisi hani amam henek skulumesh um lo iri hape heyagwreh shokubur shokubur um Jisas hakri, “Anudok arman nani eshudok shenek eneshenesh yoweishi inahos iri shape. Aria shopunek, anan nanak um shape shawok worigun!”

<sup>3-4</sup> Aria Jisas nakripesch enyudok wobuwobren baraen nakri “Aria ipak anan nagrem 100-poreish sipsipahos aria enen nyunak nyuwishuk akure, anan ta nuneke maresh? Anan ta nukutukuk eshudok 99-poreish shiyotuguk shupe shuwokuk utoruh anagun aria anan ta nunak nupe nurium enyudok atin sipsip arigaha nunak nuparugen. <sup>5</sup> Douk nuparugen aria anan ta nunadudareh abom aria nutuken nunyusah aria wata nutanam nunak. <sup>6</sup> Douk nunak arigaha nutogur urupat aria anan ta nuhwari ananish arpesha douk shani anan shape atugun iri nukri, ‘Enen eikin sipsip nyanak nyawishuk aria eik yaurimen arigaha yanak yatarugen aria wata yaraenyi. Douk namudok aria yakri ipak punaki puni eik munadudareh!’” <sup>7</sup> Douk Jisas nakriyuk namudok aria wata shopunek nakripesch nakri, “Aria eik

yakritep, douk namudok atin shape iruhw heven iri ta shanadudareh um eshudok 99-poreish arpesh douk shakri eshesh shape wosik aria mour wokesum shukeshuk agabus yoweishi inahos aria wata shukon aparuh Iruhin um. Aria atun arman douk neneh yoweishi inahos iri nukeshuk agab yoweishi inahos aria nutanam nukon apahw Iruhin um, shape iruhw heven iri ta shunadudareh shuriguk abom.”

*Jisas nakripesh Wobuwobren Baraen Um Utabor Bunak Bawishuk Um*

<sup>8</sup> “O ta onok armatok kwunoruk 10-poreibor siliwaibor utabor aria okwok kwunak kwutukuk anam akure, okwok ta kwunek maresh? Okwok ta kwukitak kwushupeh lam aria kugit okwokwit urupat. Aria okwok gamo kwupe kwurimam arigaha wata kwuparugom. <sup>9</sup> Douk kwuparugom aria okwok ta kwuhwari okwokwish arpesh douk shani okwok shape atugun iri kwukri, ‘Anam eikim utom manak mawishuk aria eik wata yaurimom aria yanak yaparugom. Aria eik wata yanadudareh aria yakri ipak punaki puni eik manadudareh!’

<sup>10</sup> “Aria eik yakritep, douk namudok atin, Iruhin nini ananish enselahos ta shunadudareh shuriguk abom um agundok atin arpen meyoh douk nyenek yoweishi inahos iri wata nyukeshuk agab aria nyutanam nyukon apahw Iruhin um.”

*Jisas nakripesh Wobuwobren Baraen Um Anan Nukanin Nakutukuk Ananin Yaken Nanak Rougun Iri*

<sup>11</sup> Aria Jisas ta nakripesh enen wobuwobren baraen shopunek nakri, ‘Anan arman nabuki biom nugamim. <sup>12</sup> Aria shokuni nukanin nakrip yaken nakri, ‘Yain, eik yakri uwok um ipe arigaha nyak nyugokuk aria ohwak douk ta unosia eshudok nyak nyagraehesh um ohwak iri uwe, uwok. Eik yakri nyisiyaesh-umohw douk! Aria yaken nakitak nosiyamam ananish eshudok eneshenesh ananim biom nugamim.

<sup>13</sup> “Aria douk madae roubi uwe aria shokuni nukanin nohur ananish eshudok eneshenesh nanak neneh salimesh um utabor nasuabor aria nanak nape rougun kupaigi nahobig. Anan nanak aria nape nawashokuk ananibor utabor. Anan nawashabor um ehudok yoweihai aih douk anan nape nenehoh iri. <sup>14</sup> Douk nawashak ananibor utabor arigaha neyataboruk, aria debeirubi nyurub baesh agudok nahobig. Aria anan eneshenesh wokan abom nenenem yaruhih. Anan madae nunabukuk anabor karowibor utabor um nunator worigun um uwe, uwok. <sup>15</sup> Douk namudok aria anan nanak nape neneh mour um anan abrudok waburin arman. Aria anudok arman neshopokan nanak nape neneh kuman mour um meyoh ananiguhw burguhw. <sup>16</sup> Aria agundok anan nakri nuwok eshudok worigun douk burguhw hwape hwashoh iri. Aria madae enen arpen nyukri nyukon anagun worigun um nishoh iri uwe, uwok.

<sup>17</sup> “Aria douk nape aria anan urkum wata mor um agundok anan nape yoweishigom um aria nakri, ‘Thishmorim shenek mour um eikin yain iri douk shapeum shawok sabaigni worigun. Aria eik yape agundok aria yagok um nyurub abom! <sup>18</sup> Douk namudok aria nyunekesh, eik wata itanam inak um eikin yain. Aria eik ta ikripan ikri, ‘Yain, eik yenek yoweishi inahos um Iruhin nani nyak. <sup>19</sup> Aria douk eik madae yopuwe iri abom um nyak nyuhware nyakin nukanin um, uwe. Aria nyak nyusap eik ipe shakamum nyak inekumen mour meyoh.’ <sup>20</sup> Douk anan nakri namudok aria anan nakitak nape nanak um ananin yaken.

“Douk anan wata nepe nanak rougun aria ananin yaken natrunogu aria neneman giha abom um ananin nugarin. Aria anan nahur nanak nemetegan aria nanapuprikan.

<sup>21</sup> “Aria anudok nugarin nakrip yaken nakri, ‘Yain, eik yenek yoweishi inahos um Iruhin nani nyak. Aria eik douk madae yopuwe iri um nyuhware nyakin nugarin uwe, uwok.’

<sup>22</sup> “Aria yaken nahwar eshudok shenek mouruman iri nakri, ‘Ipak purauri eikh sagomatinyih yopuhi rouhi rupah punaki puhurstaman aria purman enen ring ananah hah. Aria purman ono su. <sup>23</sup> Aria punak pubo nyanyi sagomatinyin yopunyi bulmakau aria apak munek debeiguni worigun muwok enyudok bulmakau aria munadudareh. <sup>24</sup> Um maresh, eik yakri anudok eikin nugarin seiwok nagok. Aria uwok, anan wata nape. Eik yakri anan ta nanak nawishuk. Aria uwok, eik wata yatarugan.’ Aria anan nakripesh namudok aria eshesh shape shenek worigun aria shanadudareh abom.

<sup>25</sup> “Douk eshesh shape shenekagun aria anudok sanin nugarin napei nubarig nanaki aria nemnek um agundok eshesh shape sheyarub shatuk-abur um. <sup>26</sup> Aria anan nahwar anan neneke mour iri nanaki aria narigan nakri, ‘Ipak pape penek maresh?’ <sup>27</sup> Aria anan nakripan nakri, ‘Nyakin wanin nanaki aria nyakin yaken nabo enyudok sagomatinyin yopunyi bulmakau aria apak munek worigun. Um maresh, anan shokuni nugarin douk madae nugok uwe. Anan wata natanamori.’

<sup>28</sup> “Aria douk ashukem nemnek namudok aria anan juwehosin abom aria nakri uwok abom um nunak nuwish urupat um. Douk namudok aria ananin yaken nanaki aria nenekuman shokwin shokwin um nunak urupat. <sup>29</sup> Aria anan nakrip yaken nakri, ‘Sabaishi kwarahos eik yape yenekumen debeineyi atin mour kabi douk anan neneke mour meyoh um nyak iri um. Aria eik madae iken agab um nyakin baraen atin uwe. Aria nyak madae nyuke enen shokwinyi meme meyoh um eik ini eikish arpesh muneneke anagun worigun mugnoph aria munadudareh uwe, uwok! <sup>30</sup> Aria anudok nyakin nugarin nanak neyatakuk nyakish eshudok eneshenesh um oudok weyotu yeh iri armago. Aria douk anan wata natanamori aria nyak nyaboman enyudok sagomatinyin yopunyi bulmakau.’

<sup>31</sup> “Aria yaken nakripan nakri, ‘Nya, iih nyumneh ohwak wape atugun aria eikish eneshenesh eshudok douk nyakish shopunek. <sup>32</sup> Aria douk apakiruh aparuh ta yopuruh abom aria munadudareh aria munek worigun. Um maresh, anudok nyakin wanin apak makri anan seiwok nagok, aria uwok. Anan wata nepe aria douk anan wata natanamori. Aria apak makri anan ta nanak nawishuk, aria douk apak wata moparugan.’”

## 16

### *Jisas Nakripesh Wobuwobren Baraen Um Nasuhw-umesh Merik Iri Douk Nadukemesh Abom Iri*

<sup>1</sup> Aria Jisas nakripam enyudok wobuwobren baraen ananim disaipel nakri, “Anan debeini douk nagrem sabaishi eneshenesh eshudok iri nepe. Aria anan neneke mour iri shopunek douk natauruman nasuhw merik um eshudok enesh shenek mour iri nepe. Aria enesh shanaki shakrip anudok debeini shakri, ‘Anudok nenekumen mour iri douk nyenekan um nasuhw merik iri nepe nakwuaruh um nyakish eshudok eneshenesh shani nyakibor utabor.’ <sup>2</sup> Aria anudok debeini nahwari anudok nasuhw merik iri aria nakri, ‘Maren enyudok baraen eik yemneken um shakri nyak nyape nyakwuaruh um eikish eshudok eneshenesh um? Douk namudok nyak

nyunak nyudareh ihishmorim eshudok douk nyak nyasuesh iri shuni eshudok douk seiwok nyawasheshuk um nyenek mour um. Nyak nyudarehesh aria nyusume anap shup aria nyunaki nyiyabige. Um maresh? Nyak ta mare wata nyupe nyusuhw merik uwe, uwok.'

<sup>3</sup> "Aria anan neneh mour iri naneyagwreh nakri, 'Eikin debeini nakri niyate um mour. Douk namudok aria eik ta inek maresh? Eik madae dodogoiwe um irok nuwagas um uwe. Aria shopunek, eik douk abraenyiwe um inak ihawar kupaishi arpesh um shuke eshudok eneshenesh um.' <sup>4</sup> Aria douk eik yadukemesh um 'eshudok douk ta eik inekesh iri um abudok nyutob eikin debeini niyate um mour um, arpesh ta wata shurae inak um esheshig urusag.'

<sup>5</sup> "Douk namudok aria anan nahwar ihishmorim arpesh douk shenek dinau um anarin debeini iri shanaki shatrun. Aria anan narik sago-matininy nakri, 'Nyak nyenek dinau um makwunish eshudok eneshenesh eikin debeini ananish?'

<sup>6</sup> "Aria anan nakripan nakri, 'Eik yenek dinau um 100-poreish welish drephahos douk shenegor rowos shahwaragas um oliv iri.'

"Aria anudok nasuhw merik iri nakripan nakri, 'Arigah nyunak nyuhur apudok shup um eshudok eneshenesh nyak nyenek dinaumesh iri shetem um aria wata nyuwem 50-poreish atish.'

<sup>7</sup> "Aria wata shopunek kupaini nanaki natograman aria narigan nakri, 'Nyak nyenek makunin dinau?'

"Aria anan nakripan nakri, 'Eik yenek dinau um 100-poreigas begas um wit douk shenek plaua-agasi.'

"Aria anan nakripan nakri, 'Nyak nyunak nyuhur apudok shup um eshudok eneshenesh nyak nyenek dinaumesh iri shetem-opi aria wata nyuwem 80-poreigas begas atugas.'

<sup>8</sup> "Aria anudok debeini natuk anudok neneh rohw nasuhw merik iri ananin nyeigur nyato iruhw. Um maresh? Anan douk gamo nadukemesh aria nenenek anah yopih yah um nutaurum amudok armam nabouk amamin dinau nyagokuk um neneh hanadudareh aria kweipon amam ta wata hutauruman. Eshudok arpesh shagipesh agundok atapihi aih aria shukonaguk agabus Iruhin iri, eshesh douk ta gamo shudukemesh um shuni kupaishi shakonaguk agabus Iruhin iri shunek enenyenen mour um. Eshesh douk sheshagrakuk Iruhin ananish arpesh douk sharahaen arisigunum iri um shenek mour um."

<sup>9</sup> Aria Jisas ta nakri namudok, "Adur atin eik yakripep, ipak ta pukesh ipakibor utabor kupaishi arpesh um putaurumesh aria punekesh shutogur ipakish arpesh. Ipak punekesh namudok aria kweipon ipakibor utabor butuh um, ipak ta pugok aria punak pupe wosik iih nyumneh gani iruhw heven.

<sup>10</sup> "Eshudok arpesh douk shusuhw karowish eshudok eneshenesh aria shunak shiyoresh wosik iri, eshesh ta shunodukem um eshesh kanak um shusuhw sababi eshudok eneshenesh shiyoresh. Aria eshudok douk shunek shokwinyi mour aria shunek rohw um, eshesh shunek debeini mour um, eshesh ta shunek rohw namudok atin. <sup>11</sup> Aria ta ipak mare gamo piyoh agnudok atapibor utabor wosik um, ipak ta omi nyukep yopishi eshudok eneshenesh douk shakus iruhw heven iri um piyohesh? Adur atin ta uwok. <sup>12</sup> Aria ta ipak mare gamo pubuk kupaishi esheshish eshudok eneshenesh um, ipak ta wata omi nyukep ipakish eshudok eneshenesh? Adur atin ta uwok.

<sup>13</sup> "Ta mare enen arpen nyenek mour iri ta nyunek mour um biom debeimi. Douk enyen nyunek mour um biom um, enyen ta nyukri uwok um anan, aria ta urkum munawasham anan. Aria enyen ta nyumnek

anan ananin baraen aria anan ta mare nyumnekan. Aria ipak douk gamo punadukemesh um ipak kanak um mare punek mour um Iruhin nini utabor shopunek uwe, uwok.”

### *Enen Shopunek Jisas Ananin Baraen*

<sup>14</sup> Douk amam Farisi hemnek namudok aria hape henekan enenyenen um Jisas. Um maresh, amamip urkwip douk panakri utabor abom.

<sup>15</sup> Aria Jisas nakripam nakri, “Ipak pakri punek ipakihi yopihi aih agundok kupaishi arpesh shapeum shutrip aria shuhwarep yopishi arpesh. Aria Iruhin douk nadukem ipakip urkwip por panak um. Eshudok douk arpesh shatrish aria mishish shakitakumesh abom iri, eshudok douk Iruhin natrish aria nakri yoweishi abom.

<sup>16</sup> “Aria enyudok lo seiwok Iruhin nakoguk Moses-enyi nyani amam profet hakripesh-enyi baraen nyape dodogowin arigaha nyanak nyatogurum abudok nyutob Jon douk neneb baptaisumesh iri natogur napeum. Aria abudok nyutob banaki arigaha douk, eshesh shape shakripesh Iruhin ananin yopinyi baraen um arpesh shuwish um agundok Iruhin nape Debeini um ananish arpesh um ihirub warub. Aria ihishmorim arpesh shape sheneb debeiniy Mour dodogowish atish um shakri shuwish.

<sup>17</sup> “Iruhw atap ta shunak shuwishuk. Aria enyudok lo douk seiwok Iruhin nakoguk Moses enyi ta mare anabik shokugun meyoh nunak nuwishuk uwe, uwok.”

### *Jisas Nakri Um Arman Armago Shanabrig Shanaraum Um (Matyu 5:31-32, 19:9; Mak 10:11-12)*

<sup>18</sup> “Aria anan arman nubrig shanaraum um ananik armatok aria wata nukri nurao kupaikwi um, anan douk nabrig enyudok lo um shanaraum um. Aria ta anan arman nurao onok armatok douk seiwok okwokwin arman neyatok kwape iri um, anan douk nabrig enyudok lo um shanaraum um.”

### *Anan Debeini Arman Nagrem Sabaishi Eshudok Eneshenesh Iri Nani Lasarus*

<sup>19</sup> Aria Jisas nakripesh enen baraen nakri, “Anan debeini douk nagrem sabaishi eshudok eneshenesh iri nape. Aria iihih nyumneh anan neneb yopihi atih rupeh douk shatorih debeibori utabor iri. Aria anan nape wosik aria napeum nawok yopuguni atugun worigun. <sup>20</sup> Aria agundok anan nanahwaram Lasarus iri douk eneshenesh wokan iri um shopunek nape. Anan sabaibi ereb bapenyan aria sharanum nanak nape adukitum wit um anudok debeini ananirub narub. <sup>21</sup> Anan nape agundok um nakri nunatorum tutukwanigun worigun anudok debeini nunekesh shagrukuk iri. Aria shopunek, nubag gwanaki gwape gwabiayk ananib erek.

<sup>22</sup> “Douk Lasarus nape arigaha anan nagok aria Iruhin ananish enselahos sharanum nanak nani Abraham hape agundok douk Iruhin ananish arpesh shagok shanak shapenyaburi wabur. Aria anudok debeini shopunek nagok aria sharuman. <sup>23</sup> Aria anan nanak nape agundok shagok iri shanak shapeum. Aria agundok, anan nanomnek debeiri eriger aria natrugunu aria natik Abraham nani Lasarus hapeiri rougun. <sup>24</sup> Douk namudok aria nahwar Abraham nakri, ‘O yamenen Abraham, nyak nyukri gihau eik aria nyishopok Lasarus nuseguri ananah hah abar aria nunaki nubuwehume yaham. Um maresh, ehudok debeihi nyih hanuwe abom aria yanamnek debeiri eriger!’

<sup>25</sup> “Aria Abraham nakripam nakri, ‘O baruhon, douk nyak urkum mormoguk seiwok. Seiwok nyak nyape nyarahae amnab um, nyak nyarao

ihishmorim yopishi eshudok eneshenesh. Aria Lasarus narao ihishmorim yoweishi. Aria douk abrudok wabur ananihw apahw hwape wosik aria nanadudareh. Aria nyak nyape um nyenemnek debeiri eriger. <sup>26</sup> Aria shopunek, orokohun um apak mani ipak, Iruhin nenek anat debeiti baret tabuhuk gani atap. Douk namudok aria arpesh shupe agundok iri shukri shubi-shuwis shunaku nagundok ipak pape um, eshesha ta shubirak shutik uwok. Aria arpesh shupe nagundok iri ta mare shubi-shuwishi aria shunaki agundok apak mape um uwe, uwok.’

<sup>27</sup> “Aria anudok debeini nakri, ‘Douk namudok aria Abraham, eik yakripen, nyak nyishopok Lazarus nunak um eikin yaken ananit urupat. <sup>28</sup> Anan nunak nukripugu eikim 5-poreim owarhim dodogowinyi baraen. Um maresh, ta wosik atin aria amam shopunek mare hunaki abrudok wabur douk shenemnek debeiri eriger um.’

<sup>29</sup> “Aria Abraham nakripan nakri, ‘Amam douk harao okwudok Buk douk seiwok Moses nani amam profet howem Iruhin ananin baraen nyetemok iri. Aria amam ta hutrin hugipeshen aria enyen ta nyutaurumam.’

<sup>30</sup> “Aria anan nakri, ‘Uwok, yamenen Abraham! Enyudok baraen atin ta mare nyutaurumam. Douk enen nyagok iri wata nyukitaki wonugwehw nyunak nyukripam akure, amam ta hukeshuk agabus yoweishi inahos aria hutanam hukon aparuh Iruhin.’

<sup>31</sup> “Aria Abraham nakripan nakri, ‘Douk amam mare humnek Moses nini amam profet amamin baraen husuwen hugipeshen um, enen nyagok iri arpen wata nyukitaki wonugwehw aria nyunak nyukripam-umen iri baraen shopunek ta mare humneken aria hukenyuk agabus yoweinyi uwe, uwok!’”

## 17

### *Yoweishi Aih Ta Henek Arpesh Shukutukuk Bilip Iri (Matyu 18:6-7, 21-22; Mak 9:42)*

<sup>1</sup> Aria Jisas nakrip ananim disaipel nakri, “Eshudok eneshenesh douk ta shunek arpesh shunek yoweishi inahos iri ta shutogur. Aria enyudok arpen douk nyunek kupainyi nyunek yoweishi inahos iri, enyen douk ta gishaumen. <sup>2</sup> Aria enen arpen nyunek enen um eshudok shokwishi batowish um nyunek yoweishi inahos um, enyen douk nyenek yoweishi inahos abom. Aria ta shusuhwen shuwaur anam debeimi utom enyenin aruhwigur aria shuwashed nyubuhuk youg akure, enyen ta nyupe yoweinyi poe. Aria Iruhin ta neneken nyumnek debeiri eriger abom reshagrakuk agundok nyumnek eriger um shuwashed nyubuh youg um. <sup>3</sup> Aria ipak gamo pudukemesh. Aria enen Kristen nyukri nyunek enesh yoweishi inahos um, ipak ko puhen. Aria enyen wata nyukeshuguk agab yoweishi inahos aria nyutanam nyukon apahw Iruhin um, pukweshiheshuk eshudok yoweishi inahos enyen nyenekesh iri. <sup>4</sup> Aria ta enyen nyunekumen enesh yoweishi inahos arigaha nyudareheh hunak hutogur 7-poreih um anah nyumnah, aria enyen wata nyunaki 7-poreih um nyukripen um nyukri enyen nyakutukuk eshudok yoweishi inahos enyen nyenekesh um nyak iri um, nyak mare nyusuhwesh nyupe eshudok enyenish yoweishi inahos aria nyutoriheshuk um enyen.”

### *Jisas Nakri Um Shunek Bilip Um*

<sup>5</sup> Aria amam aposel hakrip Debeini hakri, “Nyak nyunek apakin bilip nyutogur dodogowin.”

<sup>6</sup> Aria Debeini wata nakripam nakri, “Ipak pugipesh Iruhin wosik aria ipakin bilip ta nyutogur shokwin abom aria kabi douk anam shokumi

mastetim shurkum um akure, ipak ta pukrip epudok shuruwep peirenyi rowog pukri, 'Nyunatuk um nukwaruh nyunak nyubuh youg aria wata nyukih.' Aria adur atin, enyen ta nyugipesh ipakin baraen."

### *Shenek Mour Meyoh Iri Shenekoh Iri Aih*

<sup>7</sup> "Aria ipak anan nenekumen mour meyoh iri nunak nupe nuwor amnab nubarig o niyoh sipsipahos. Aria douk nuneguk mour jurug aria wata nutanamori atin aria ta wosik nyukripan um arigas nunaki nupe nuwok worigun aka mumam? <sup>8</sup> Adur atin ta uwok. Nyak ta nyukripan namudok, 'Kare nyuwashak yopuhi rupah aria nyunak nyunek redimeim eikigun worigun aria nyunaki nyuke-agun ba ignah. Aria nyak nyupe nyubeime ba iwok eikigun iyatagun aria nyak kadak nyuwok nyakigun.' <sup>9</sup> Aria nyak ta nyunek tenkyu um anudok nenekumen mour meyoh iri um agundok nagipesh nyakin baraen um o ta uwok? Aria ta uwok. <sup>10</sup> Douk namudok aria ipak shopunek ta punekesh namudok atin. Aria ipak punek enyudok mour douk Iruhin nakripep um puneken iri piyaten um, ipak ta pukri, 'Apak douk nyeigu hw wokap mape shakamum Iruhin munek mour meyoh iri. Apak douk menek anan nakripap um muneken iri atin.'

### *Jisas Nagabe 10-poreim Arugeh Lepra Hapenyam Iri*

<sup>11</sup> Aria Jisas nape nanak um Jerusalem. Anan nagim yah nawish nanak orokohun-igum agudok biyog shokugi nahobig Samaria aria Galili.

<sup>12-13</sup> Aria douk nanak arigas um nunak nuwish anabur wabur aria 10-poreim armam arugeh lepra hapenyam iri hanaki hatarungan. Aria amam wata heyoturi rougun aria hawharari debeg hakri, "Jisas, Debeini, nyak nyukri nyenek gishaum apak!"

<sup>14</sup> Aria douk Jisas natrumori aria nakripam nakri, "Ipak kare punak puyabigom ipakiruh yegeshiweruh amam pris." Aria amam hafanan hanak atin, aria arugeh lepra hanakuk abom aria amamiruh yegeshiweruh wata yopuruh.

<sup>15</sup> Aria anan natik um anan wata yopun aria anan wata natanam nanak aria nahawar debeg atin nape natuk Iruhin ananin nyeigur nyato iruhw.

<sup>16</sup> Aria nanak nabuh noduk yomag nakus atap hurukatin um Jisas neyotu um aria neneke tenkyuman. Anudok arman, anan douk anan um eshes Samaria.

<sup>17</sup> Aria Jisas natik namudok aria nakri, "Iganigadae yagabe 10-poreim. Aria amudok anam 9-poreim hapeik agnum? <sup>18</sup> Maresh namudok um anudok kupaibi amnabin atun natanamori nanaki neneke tenkyu um Iruhin um?" <sup>19</sup> Aria Jisas nakripan nakri, "Kitak kare. Nyak nyenek bilip nyakri eik dodoxoiwe iri aria douk yopin."

### *Jisas Nakri Um Abudok Yopubi Nyutob Douk Ta Iruhin Nutogur Yopungunum Aria Nutaurumap Um (Matyu 24:23-28, 37-41)*

<sup>20</sup> Aria anah nyumnah amam Farisi harig Jisas um ta meibi nyutob um arpesh shuwish agundok Iruhin nape Debeini um ananish arpesh um ta butogur. Aria anan nuwanamam baraen nakri, "Agagun ta mare enesh arpesh shutrugun shadukem-agun kabi douk shatik enesh eshudok shadukemesh um uwe, uwok. <sup>21</sup> Ta mare shukri, 'Tik, natogur agundok o natogur ganik.' Um maresh? Iruhin nape Debeini um arpesh shuwish agundok anan nape Debeini um ananish arpesh um douk iganigadae nape mununipum."

<sup>22</sup> Aria anan nakrip ananim disaipel nakri, "Nyutob butogram, ipak ta mishish shukitak um pakri putik anah nyumnah eik Anudok Arman douk

yatogur adurinyi arpen iri itanamori ipe debeiwe iri aria itrugun abom ahi. Aria ipak ta mare putruh. <sup>23</sup> Aria arpesh ta shukriep shukri, 'Krais natanamori. Wata tiku, nani nape gani.' O ta shukri, 'Anudok nape agundok!' Aria eik yakriep. Ipak mare punak pugipeshesh uwe, uwok. <sup>24</sup> Ipak padukemesh um agundok utag gatrugun obi nyutob. Agag gatrugun abom kabi aun nakihumori arigaha ganak gabuh aun nabuhum. Aria eik Anudok Arman douk yatogur adurinyi arpen iri ta inekesh namudok atin abudok nyutob eik ta itanamori um. Ihishmorim arpesh ta shitiwe. <sup>25</sup> Aria sagomatin eik ta imnek debeiri eriger aria doukish arpesh ta shukeik agabus iyoh.

<sup>26</sup> "Eneheneh aih douk shenekeh abudok nyutob seiwok Noa nape obi nyutob, ehudokmori atin ta shenekeh abudok nyutob hurukatin um eik Anudok Arman douk yatogur adurinyi arpen iri ta itanamori obi nyutob. <sup>27</sup> Ihishmorim arpesh shapeum shawok worigun aria abar iri, aria armam armago shanaraum. Eshesh shape shenekesh namudok arigaha ahudok nyumnah Noa nawish korohuk aria abar babo ihishmorim arpesh beyateshuk.

<sup>28</sup> "Aria shopunek, abudok nyutob seiwok Lot nape obi nyutob douk shenekesh namudok atin. Shapeum shawok worigun, shawok abar, shator eshudok eneshenesh, shenek salim um eshudok eneshenesh, shau eneshenesh nubarig, aria shanarok urusag. <sup>29</sup> Aria douk arigaha ahudok nyumnah Lot nakutukuk wabur Sodom nanakuk aria Iruhin nenen nyih iri juwehosibori utabor salfa shagruki iri iruhw utag. Eshesh shagruki kabi douk eshah hormori aria shabuhi shabo ihishmorim arpesh shagok shatuh.

<sup>30</sup> "Aria abudok nyutob eik Anudok Arman douk yatogur adurinyi arpen iri itanamori yopugunum obi nyutob, arpesh shopunek ta shenekesh namudok atin. <sup>31</sup> Ahudok nyumnah, arpen nyupe aduk urupat iri ta mare wata nyuwish um nyunohuri enyenyish eshudok eneshenesh. Aria enyudok douk nyeyotu nubarig iri ta mare wata nyutanam nyunak um urupat um nyunohuri eshudok eneshenesh uwe, uwok. <sup>32</sup> Ipak urkwip puramaguk Lot ananik irohukwik. <sup>33</sup> Eshudok arpesh douk urkwip purum shukri eshesh kanak shupe wosik um, aria mare shusuhw eikin baraen shugipeshen iri ta shunak shuwishuk. Aria eshudok douk madae urkwip purum eshesh kanak uwe aria shugipesh eik iri ta shupe wosik."

<sup>34</sup> Aria Jisas nakri, "Eik yakriep, abudok wab, biom armam ta hishuh atus aras. Anan ta inaran aria anan ta nishuhuk. <sup>35</sup> Aria bio armago ta upe unek plaua um uweh bret um. Aria onok ta inaraok aria onok ta kwupeik. <sup>36</sup> [Aria biom armam ta hiyotu nubarig. Aria anan ta inaran, aria anan ta niyotuguk.]"

<sup>37</sup> Aria Jisas anim disaipel hemnek namudok aria harigan hakri, "Debeini, enyudok ta nyutogur agnum?"

Aria Jisas neyagwreh nakripam wobuwobren baraen nakri, "Agnudok douk mahish shagok shakus um, armiguhw ta apa hwanaki hwanatorumori um."

## 18

### *Wobuwobren Baraen Um Onok Armatok Kworep Jas Nasuhw kwotog Iri Um Nutaurumok Iri*

<sup>1</sup> Aria Jisas nakrip anim disaipel enyudok wobuwobren baraen um nunek skulumam um hunek beten ihih nyumneh aria mare hukutunuk atin. <sup>2</sup> Aria nakripam nakri, "Anabur wabur, anan jas douk nasuhw kwotog iri nape. Anudok jas madae nunogugur Iruhin atun uwe, uwok. Aria

anan madae nukri gishaumesh atin uwe arpesh o nunoguguresh uwe, uwok.

<sup>3</sup> Aria abrudok atubur wabur onok armatok anan nagok nokusopuk iri kwape. Ihih nyumneh okwok kwape um kwanak um anudok jas aria kwakripan kwakri, ‘Anan eikin horin nenek rohwume aria nenek kwotume moyeh. Aria eik yakri nyak nyutaurume um kwot.’

<sup>4</sup> “Aria roubum nyutob anudok jas nemnek okwokwin baraen aria nakri uwok um nutaurumok. Aria arigaha anan nenek urkum aria nakri, ‘Adur, eik douk madae inogugur Iruhin uwe, o madae inogugur arpesh aria ikri gishaumesh atin uwe. <sup>5</sup> Aria okwudok armatok kwanaki kowemume abudok bugob aria nyunekesh. Eik ta itaurumok um kwot. Uwok um, okwok ta kwupe um ta kwunaki atin kwunaki aria eik ta arigeh heimok abom!’”

<sup>6</sup> Aria Debeini nakripam nakri, “Ipak ta pumnek enyudok baraen anudok yoweini jas nakriyen iri. <sup>7</sup> Aria ipak pakri mumam? Eshudok arpesh douk Iruhin nanagraelesh um shupe ananish iri shukri shureh shubeiman nyumnah wab um nutaurumesh um, anan ta mare nutaurumesh arigas uwok? <sup>8</sup> Adur atin eik yakripep, anan ta nutaurumesh arigas um enyudok rohwinyi baraen. Aria abudok nyutob eik Anudok Arman douk yátogur adurinyi arpen iri itanamori abudok amnab obi nyutob, ipak pakri eik ta itik um arpesh douk shenek bilip um eik iri o uwok?”

### *Wobuwobren Baraen Um Anan Farisi Nani Anan Narao Takis Iri*

<sup>9-10</sup> Enesh arpesh douk shakri eshesh atish douk shugipesh lo atin iri arpesh shapecum shenek yopihi aih atih iri aria shakri ihishmorim kupaishi douk yoweishi. Douk namudok aria Jisas nakripes enyudok wobuwobren baraen nakri, “Biom armam hato um Iruhin ananit debeiti urupat um hunek beten. Anan Farisi aria anan narao takis iri. <sup>11</sup> Aria Farisi nakitak neyotu aria numun ananin urkum atin nenek beten nakri, ‘Iruhin, eik yenek tenkyumen. Um maresh? Eik douk madae kabi ihishmorim kupaishi arpesh douk shenek yoweishi inahos iri uwe. Enesh shakwu orugwih iri. Enesh shenek wehrur iri, aria enesh madae shugipesh lo atin iri uwe. Aria shopunek, eik douk madae kabi nani yoweini arman narao takis iri uwe. <sup>12</sup> Ihig wik, biyeh nyumneh eik apa yeshakur um worigun aria yape yenek beten atin. Aria ihishmorim eshudok eik yaparugesh iri, eik apa yosiyaesh aria yeken anabigish\* um nyak!’”

<sup>13</sup> “Aria anudok narao takis iri neyotukuk rougun aria madae karowih atin nupuhur nutik iruhw heven uwe, uwok. Anan neyotu aria napé naguduk mishin aria nakri, ‘Iruhin, eik yenek eneshenesh yoweishi inahos iri. Nyak gishaume!’”

<sup>14</sup> Aria Jisas nakri, “Eik yakripep. Iruhin douk natik anudok narao takis iri aria nahwaran nagipesh lo atun iri arman aria anan wata natanam nanak um ananit urupat. Aria anudok Farisi uwok. Um maresh? Arpesh douk shutuk esheshish nyeiguhw shuto iruhw iri, Iruhin ta nesh shubuhuk. Eshudok douk madae shutuk esheshish nyeiguhw shuto iruhw iri uwe, Iruhin ta nutuk esheshish nyeiguhw shuto iruhw.”

### *Jisas Nenekumesh Yopihi Aih Shokwishi Batowish Um Shupe Wosik (Matyu 19:13-15; Mak 10:13-16)*

<sup>15</sup> Aria enesh arpesh sharauri esheshish shokwishi batowish um Jisas um nuwemesh wis aria nunekumesh yopihi aih. Aria douk ananim disaipel hatik namudok aria hahaesh. <sup>16</sup> Aria Jisas nahwari eshudok shokwishi batowish shanaki hurukatin um anan aria nakri, “Ipak kutukuk shokwishi

\* **18:12:** Putik futnot nyape Luk 11:42 iri.

batowish shunakumori eik. Um maresh? Eshesh ta shuwish agundok Iruhin napē Debeini um ananish arpesh um. <sup>17</sup> Eshudok arpesh douk shakri uwok um Iruhin nupe esheshin debeini kabi douk batowish shakri wosik um, eshesh ta mare shuwish agundok Iruhin nupe Debeini um ananish arpesh shapeum uwe, uwok.”

*Jisas Nani Anan Nagrem Sabaishi Eshudok Eneshenesh Iri Heyagwreh  
(Matyu 19:16-30; Mak 10:17-31)*

<sup>18</sup> Aria anan eshesh Juda esheshin debeini narig Jisas nakri, “Yopuni Tisa! Eik ta inek maresh aria ta douk ipe wosik abom ihih nyumneh?”

<sup>19</sup> Aria Jisas nakripan nakri, “Nyak nyahware yopuweiri um maresh? Iruhin atun douk yopuni. <sup>20</sup> Nyak douk nyadukemen enyudok lo douk nyetem. Iruhin ananik Buk iri. Enyen douk nyakri, ‘Ipak mare punek wehrur, mare pubo kupaishi arpesh shugok, mare pukwuuaruh, aria mare punek rohw atin. Aria ipak pumnek ipakish amakeniyish esheshin bareaen aria putaurumesh.’”

<sup>21</sup> Aria anudok arman wata nakrip Jisas nakri, “Seiwok eik wata shokuwe um, arigaha douk, eik yasuwen dodog enyudok ihinyumorim lo aria yangipeshen.”

<sup>22</sup> Aria douk Jisas nemnek namudok aria wata nakripan nakri, “Nyak douk atuh aih wata hape, nyak wata nyunekah uwe. Nyak nyunak nyuhur ihishmorim nyakish eshudok eneshenesh nyuko kupaishi shutorish shuken utabor. Aria nyak wata nyisiyabor um yaruuhish arpesh. Nyak nyunekesh namudok aria sabaishi yopishi eshudok eneshenesh ta shukusumen iruhw heven. Aria douk nyunekeshuk namudok ba iyoh, aria nyak douk nyunaki nyugipeshe.”

<sup>23</sup> Aria anudok arman nemnek namudok aria anan apahw amaenyihw abom. Um maresh? Anan douk nanabuk sabaishi eshudok eneshenesh abom. <sup>24</sup> Aria Jisas natik um anan apahw yowehw abom um aria nakri, “Eshudok arpesh douk shagrem sabaishi eneshenesh eshudok iri shukri shuwish abrudok wabur Iruhin napē Debeini um ananish arpesh um, eshesh ta shunek debeinyi mour iyoh, aria ta kadaq shuwish. Uwok um, ta uwok. <sup>25</sup> Aria enen debeinyi mahin nyeigurinyum kamel iri nyukri nyuwish nyil douk umunihw um tret tananyigur um, enyen ta nyunek debeinyi mour aria douk ta nyuwish. Aria eshudok arpesh douk shanabuk sabaishi eshudok eneshenesh iri shukri shuwish abrudok wabur Iruhin napē Debeini um ananish arpesh um, eshesh ta shunek debeinyi mour abom shishagrakuk kamel aria kadaq shuwish. Uwok um, ta uwok.”

<sup>26</sup> Aria eshudok arpesh douk shape shemnekan neyagwreh iri sharigan shakri, “Douk namudok aria Iruhin ta wata nunarao meishi arpesh shutanamori shupe wosik abom?”

<sup>27</sup> Aria Jisas wata nakripesh nakri, “Eshudok douk arpesh shubirak um shunekesh aria shubirak um shutik uwok iri, Iruhin anan atun ta nunekesh.”

<sup>28</sup> Aria Pita nakri, “Tik, apak douk makutukuk apakirub warub bani ihishmorim eshudok eneshenesh aria enyudok manaki magipeshen.”

<sup>29-30</sup> Aria Jisas nakripam nakri, “Adur atin eik yakripep amudok armam douk amamip urkwip porum hukri Iruhin nupe debeini um amam um abrudok wabur arpesh shuwish um Iruhin nupe Debeini um aria douk hukutukuk amamirub warub o amamiyu armago o ashukenyish owashish o amakeniyish o batowish iri, Iruhin ta nunekumam enyudok. Douk abudok amnab Iruhin ta nukom sabaishi eshudok shishagrakuk eshudok douk amam hakutishukuk iri. Aria kweipon shopunek, amam ta hupe wosik abom ihih nyumneh.”

*Henek Biyeh Atih Um Jisas Nakripesh Um Anan Ta Nugok Aria Wata Nukitak Um  
(Matyu 20:17-19; Mak 10:32-34)*

<sup>31</sup> Aria Jisas naraao ananim 12-poreim disaipel hanak anagas aria nakripam nakri, "Mnek! Douk apak ta muto munak um Jerusalem. Aria ihinyumorim baraeen douk seiwok amam profet henyemaguk um eik Anudok Arman douk yatogur adurinya arpen iri ta nyutogur adurin. <sup>32-33</sup> Eshesh ta shukam eik amudok douk madae hudukem Iruhin iri uwe. Aria amam ta hurae hububunime, hukwusehe aria ta huneke enenyenen. Aria amam ta hureye madururuh aria he igok. Aria douk hukri um biyeh atih nyumneh um, eik ta wata ikitaki ipe."

<sup>34</sup> Aria douk amam disaipel hemnek ananin baraeen aria amam madae hudukemen uwe. Baugenyum baraeen nyanabeshuk um amam. Douk namudok aria eshudok douk Jisas nakripam-umesh iri amam madae hudukemesh uwe.

*Jisas Nagabe Anan Nabes Seshukanari Aria Wata Natrugun  
(Matyu 20:29-34; Mak 10:46-52)*

<sup>35</sup> Aria Jisas nanak natogur hurukatin um wabur Jeriko aria anan nabes seshukanan nape anagasih um yah. Anan apa nape nahwar arpesh um shukon utabor. <sup>36</sup> Aria douk nemnek um eshudok sabaishi arpesh shanaki um shishagrakan shunak aria anan narig nakri, "Yaipo shenek maresh?"

<sup>37</sup> Aria eshesh shakripan shakri, "Jisas napeiri wabur Nasaret iri nanaki."

<sup>38</sup> Aria anan nemnek namudok aria nahwar nakri, "Jisas, Devit ananin barhonin! Nyak nyukri nyenek gihauem eik!"

<sup>39</sup> Aria eshudok sharig iri shahan shakripan um mokureg. Aria anan nuhwar debeg abom nakri, "Devit ananin barhonin! Nyak nyukri nyenek gihauem eik!"

<sup>40-41</sup> Aria Jisas nemnek namudok aria neyotu aria nakripesh nakri, "Arieg harokanari punaki agundok."

Aria douk sharani aria Jisas narigan nakri, "Nyak nyukri ineikumen maresh?"

Aria Anan nakrip Jisas nakri, "Debeini, eik yakri um ta inatrugun."

<sup>42</sup> Aria Jisas nakripan nakri, "Trugun, nyak nyenek bilip nyakri eik ddogogiwe iri aria nyakis nabes douk ta yopus."

<sup>43</sup> Aria ahudok atuh nabes yopus natrugun aria nani Jisas hanak. Aria anan nape nanadudareh um Iruhin natuk ananin nyeigur nyato iruhw. Aria eshudok sabaishi arpesh shopunek shatik namudok aria eshesh ihishmorim shatuk Iruhin ananin nyeigur nyato iruhw.

## 19

*Jisas Nanak um Sakias Ananit Urupat*

<sup>1</sup> Aria Jisas nawish nanak abrudok wabur Jeriko aria anan nanak um nakri nukutuburuk nugim yah nunak. <sup>2</sup> Aria anan arman shahwaran um Sakias iri nape abrudok wabur. Anan douk debeini um amam harao takis iri. Aria anan douk nanabuk sabaibori utabor iri. <sup>3</sup> Aria Sakias nakri nutik Jisas um nudukemesh um anan douk mein. Aria sabaishi arpesh shatapanganuguk aria anan madae nutrun uwe. Um maresh? Sakias shopunek douk banani arman abom. Namudok aria anan nabirak um nutik Jisas aria nabirak natik uwok. <sup>4</sup> Douk namudok aria anan nahur narik atin nanak nato enen rowog nyeigurinyum fik iri um nakri nutik Jisas. Um maresh? Anan nadukemesh um Jisas ta nunak ahudok yah.

<sup>5</sup> Aria douk arigaha Jisas nanak natograri okwudok outuk aria napuhur natik iruhw aria nakri, "Sakias, buhi arigas. Doukih nyumnah, eik ta inak ipe nyakit urupat."

<sup>6</sup> Aria Sakias arigas atin nabuhi atap aria nanak nanadudareh um Jisas. Aria amam hanakum Sakias ananit urupat. <sup>7</sup> Aria douk ihishmorim arpesh shatik namudok aria shape sheneyagwreh shoku shokwin bareaen um Jisas shakri, "Anudok arman nanak neshuh anudok nenen yoweishi inahos atish iri ananit urupat."

<sup>8</sup> Douk amam hanak urupat aria Sakias nakitak neyotu nakrip Debeini nakri, "Debeini, nyak muneke. Douk eneshenesh eikish eshudok ta isiyaesh um biyeh. Wobresh ta iko yaruhibh arpesh iri. Aria nubokuhi ikri inek rohw um enen arpen inarukaen enesh enyenyish eshudok eneshenesh meyoh um, douk ta wata ibeyeshamen aria ta wata iken enesh shopunek arigaha idarehuh um 4-poreih."

<sup>9</sup> Aria Jisas nakripan nakri, "Doukih nyumnah, Iruhin wata nanaraep ipak ihipmorim pape atudok urupat iri patanamori pape wosik. Um maresh? Nyak shopunek douk nyakitak apudok atup awirop Abraham ananip. <sup>10</sup> Umum maresh? Eik Anudok Arman douk yatogur adurin arpen iri douk yanakumori itik um eshudok arpesh douk shanak shawishuk iri um itaurumesh inaraesh shutanamori shupe wosik."

*Jisas Nakripesh Enen Wobuwobren Bareaen Um 10-poreim Henek Mour Iri Harao Utabor Um  
(Matyu 25:14-30)*

<sup>11</sup> Aria abudok nyutob eshesh shape shemnek enyudok bareaen Jisas nakrip Sakias um, aria Jisas shopunek nakripesh enen wobren bareaen. Um maresh? Anan douk nanaki hurukatin um Jerusalem. Aria eshesh shakri ta abudok nyutob um arpesh shuwish agundok Iruhin nupe Debeini um ananish arpesh um ta butogur douk atin aria Jisas ta nupe esheshin debeini.

<sup>12</sup> Aria anan nakripesh nakri, "Anan debeini arman nakri nunak um anabur rougunibur wabur um shunekan king aria ta wata nutanamori um ananibur wabur. <sup>13</sup> Aria hurukatin um nunak obi nyutob, anan nahwari ananim 10-poreim armam douk henekuman mour iri hanaki aria nokomuk 20 kina 20 kina amam atun atun. Aria nakripamuk nakri, 'Ipak punak punek bisnis kupakupai-gunum atin um abrudok utabor eik yekepabor iri aria punek winmoni-ibor. Ipak punak pupe punekesh namudok arigaha eik wata itanamori.'

<sup>14</sup> "Aria eshudok arpesh douk shani anan shape atub amnab iri shakri uwok um anan. Douk namudok aria anan narik aria eshesh sheshopok anam harao bareaen hagipesan. Amam hanak aria hakri, 'Apak makri uwok um anan nupe apakin king um.' <sup>15</sup> Aria eshesh madae shumnekam uwe aria shenekan king aria wata natanamori. Anan natanamori atin aria nenebum baraan amudok henekuman mour iri douk nukomuk utabor iri um hunaki hutrun. Aria nakri norigam um amam atun atun henek makwunibor winmoni-ibor utabor.

<sup>16</sup> "Aria narik iri natograri aria nakri, 'Debeini, eik meyoh enyudok 20 kina nyak nyekeyenyuk iri yenek bisnis aria profetin douk nyatogur 200 kina!'

<sup>17</sup> "Aria anudok king nakri, 'Nyak yopuni arman nyenekume mour iri. Nyak nyeneken wosik abom. Eshudok eshesh douk karowish meyoh, aria nyak apa nyekeyohesh wosik atin. Namudok aria nyak ta ineken um nyupe debeiniyi aria nyiyoh 10-poreirub debeirubi warub.'

<sup>18</sup> "Aria douk narik iri nanakuk aria anudok anan nanaki nakri, 'Debeini, eik meyoh enyudok 20 kina nyak nyekeyenyuk iri yenek bisnis aria profetin

douk nyatogur 100 kina.’ <sup>19</sup> Aria king nakripan nakri, ‘Nyak ineken um nyupe debeiniyi nyiyoh 5-poreirub debeirubi warub.’

<sup>20</sup> “Aria anudok anan neneukuman mour iri nanaki nakri, ‘Debeini, nyakibor utabor 20 kina abrudok. Eik yetapeyen rupahip aria yenubuk nyakus. <sup>21</sup> Um maresh? Nyak douk juwehosinyi atin iri, aria eik yanogugur abom. Yanogugur abom um eneshenesh kupaishi sheneshubuk iri, nyak apa nyanashuhur. Nyak madae nyorig atin uwe. Aria worigun kupaishi shanuwesh iri, nyak apa nyanaurimesh.’

<sup>22</sup> “Aria king nakripan nakri, ‘Nyak yoweini arman abom nyenekume mour iri. Eik ta ikwu nyak kanak nyakin baraeen douk nyak nyakriyen um eik iri aria inekumen kwot. Nyak douk nyadukemesh um agundok eik juwehosowi atuwe abom um. Aria yatrish yonahur eshudok kupaishi sheshubuk iri um. Aria yatrish yanaurim worigun kupaishi shanuwesh iri um. <sup>23</sup> Douk namudok aria nyak madae nyunak nyuborur-ume um benk uwe? Um eik wata itanamori aria inak inaboruhur um, eik irao anabor profetibor shopunek.’

<sup>24</sup> “Douk namudok aria king nakrip eshudok arpesh sheyotu agundok iri nakri, ‘Putrun enyudok 20 kina aria puko anudok anan douk nasuhw 200 kina iri.’

<sup>25</sup> “Aria eshesh shakrip anudok king shakri, ‘Debeini, anan douk wosik nasuhw sabaibori um 200 kina.’

<sup>26</sup> “Aria anan nakri, ‘Eik yakripep, ihish arpesh douk shusuhw sabaishi eshudok iri ta wata shukesh enesh shopunek. Aria eshudok douk eshudok wokeshi, eshudok karowish eshesh sheneshubuk iri, eshesh ta wata shutr-ishesh aria shupeik meyoh abom. <sup>27</sup> Aria douk ipak purauri eshudok eikish horim douk shakri uwok um eik ipe esheshin king iri punaki agundok eik yape um itrish aria pesh shugok.’”

*Jisas Nawish Jerusalem Kabi Douk Anan King Um  
(Matyu 21:1-11; Mak 11:1-11; Jon 12:12-19)*

<sup>28</sup> Aria douk Jisas nakripeshuk enyudok wobuwobren baraeen um jurug, aria nikitak narik nape nagim yah nanak um Jerusalem. <sup>29</sup> Douk nanak arigaha hurukatin um abrudok biarub warub Betfage aria Betani, douk bape hurukatin um yoduhw Oliv iri aria nakrip biom disaipel harik hanak.

<sup>30</sup> Aria nakripam enyudok baraeen nakri, “Ipak purik punak babri wabur bape gani yah iri. Ipak ta punak puwish atin aria ta putik enen nugaen donki douk shoreyen maduhw aria shenyuseh nyeyotu. Enyudok donki douk watak enen arpen nyuraheyen uwe. Ipak putrin aria pukweshihen puraen punaki. <sup>31</sup> Aria ta enen arpen nyukri nyorigep nyukri, ‘Ipak pakweshihen um donki?’ ipak pakripesh pukri, ‘Debeini nakriyen.’”

<sup>32</sup> Aria amam hanak aria hatik um eshudok anan nakripam-umesh iri shatogur kabi douk anan nakri um. <sup>33</sup> Aria douk amam hape hokweshihen enyudok donki aria shagremen iri sharigam shakri, “Ipak pakweshihen um mare enyudok nugaen donki?”

<sup>34</sup> Aria amam hakripesh hakri, “Debeini nakriyen.”

<sup>35</sup> Amam hakripeshuk namudok aria haraeen hanakum Jisas. Douk hanak hatogur aria howem amamig saketog agabainyum enyudok nugaen donki aria hataurum Jisas nato nakih netem. <sup>36</sup> Douk nakih netem aria enyen nyape nyanak. Aria arpesh shape showaruk esheshig saketog shogubuk yah um shakri shuginhwah. <sup>37</sup> Aria anan nanak natogur agundok yah hanakum yoduhw Oliv iri, hurukatin um Jerusalem. Aria sabaishi arpesh douk shape shagipeshan shasuhw ananin baraeen iri shanadudareh aria shape sheneh tenkyu um Iruhin. Aria shahwar debeg atin shape shatuk

ananin nyeigur nyato iruhw um ihinyumori Iruhin atun neneken iri mour douk Jisas neneken shatrin iri.

<sup>38</sup> Eshesh shahwar shakri, "Iruhin nunek yopuni um anudok King douk nanakumori Debeini anarin nyeigur iri. Iruhin ananihw apahw douk yopuhw abom um apak arpesh! Apak mutuk Iruhin ananin nyeigur nyuto iruhw."

<sup>39</sup> Aria anam Farisi douk heir eshudok sabaishi arpesh iri hakrip Jisas hakri, "Tisa, kwakripesh eshudok shasuhw nyakin baraen shagipeshen iri um mare shenekesh namudok uwe, uwok."

<sup>40</sup> Aria Jisas nakripam nakri, "Eik yakripep, eshudok shukri mare shenekesh namudok um akure, utabor ababor kanak ta bupe buhwar butuk eikin nyeigur nyuto iruhw."

### *Jisas Nerep Jerusalem*

<sup>41</sup> Douk Jisas nanaki hurukatin um Jerusalem natruber aria nape nere-pobur. <sup>42</sup> Anan nerepobur aria nakri, "Aria doukih nyumnah ipak arpesh pape Jerusalem iri pakri pudukem ehudok aih douk ta puraeh aria hunekip pupe wosik iri akure, enyen ta wosik. Aria douk ehudok aih hanobeshuk-umep aria ipak madae pudukemesh uwe. <sup>43</sup> Aria mnek, nyumneh ta huto-grum ipakish horik horin shunaki shiyotu shiyar shurihep aria shini ipak purpak um. Eshesh ta shurok dodogoiburi nabur abom shiyar shurihep. <sup>44</sup> Aria eshesh ta shubrigen shununin abom nyani nyakish batowish douk shape numun narub iri. Aria eshesh ta mare shukutukuk anam utom mutemaguk kupaimi kabi douk sharik sharok narub shabremum uwe, uwok. Um maresh? Abudok nyutob Iruhin nanakumori nakri nutaurumep um, ipak madae puturub pudukemab nyutob uwe."

### *Jisas Nehiyah Arpesh Douk Sheneb Bisnis Numun Narub Iruhin Ananit Debeiti Urupat Tatao Um Iri*

(Matyu 21:12-17; Mak 11:15-19; Jon 2:13-22)

<sup>45</sup> Aria Jisas nanak nawish numun narub Iruhin ananit debeiti urupat tataoum aria nape nehiyah arpesh douk shape sheneb salim um eshudok eneshenesh gani numun iri. <sup>46</sup> Aria anan nakripesh nakri, "Baraen nyetem Iruhin ananik Buk iri douk nyakri namudok. Iruhin nakri, 'Eikit urupat douk tape um shunek beten um.' Aria ipak penekesh-umat kabi douk shakwuāruh iri shanaki shape shanabeshuk um."

<sup>47</sup> Aria iih nyumneh anan nape nenek skulumesh um ananin baraen numun narub Iruhin ananit debeiti urupat tataoum. Aria amam debeimi pris hani amam douk henek skulumesh um Iruhin ananin lo iri hani amudok anam eshesh Juda esheshim debeimi hakri hubo Jisas nugok.

<sup>48</sup> Aria amam habirak madae huparug anah yah um hon nugok um uwe, uwok. Um maresh, ihishmorim arpesh shakri shumnek ihinyumorim ananin baraen abom aria eshesh shakri uwok um shukut-unaguk.

## 20

### *Debeimi Harig Jisas Um Omi Nyakon Big Aria Douk Nenek Enyudok Mour (Matyu 21:23-27; Mak 11:27-33)*

<sup>1</sup> Anah nyumnah Jisas nape numun narub Iruhin ananit debeiti urupat tataoum aria nape nenek skulumesh um yopihi aih aria nape nakripesh Iruhin ananin yopinyi baraen. Aria abudok nyutob, amam debeimi pris hani amudok henek skulumesh um lo iri hani amudok anam eshesh Juda esheshim debeimi hanaki hatrun. <sup>2</sup> Aria amam harigan hakri, "Nyak

nyarao maren big um nyunek enyudok mour? Aria omi nyeken enyudok big?”

<sup>3</sup> Aria Jisas nawanamam baraen nakri, “Eik shopunek yakri iyorige um enen baraen. <sup>4</sup> Ipak kripe, Jon douk neneb baptaisumesh iri omi nyakon enyudok mour aria anan douk neneb baptaisumesh? Iruhin nakripan aria douk neneb baptaisumesh o, enesh arpesh meyoh?”

<sup>5</sup> Aria amam hemnek aria amam kanak hape haneyagwreh hakri, “Ta mukripan maren baraen? Ta mukri Iruhin nakonen um, anan ta wata norigap nukri, ‘Douk namudok aria ipak madae punek bilip um Jon ananin baraen uwe um maresh?’ <sup>6</sup> Aria shopunek, ta mukri arpesh meyoh shakonen um, eshudok sabaishi arpesh ta shop shukwumap utabor. Um maresh? Eshesh shakri Jon anan douk anan adurin profet abom.”

<sup>7</sup> Douk namudok aria amam hakripan hakri amam madae hudukemesh uwe.

<sup>8</sup> Aria Jisas wata nakripam nakri, “Eik shopunek douk namudok atin. Eik ta mare ikripep um omi nyutaurume nyeke big aria eik douk yenek enyudok mour um.”

*Jisas Nakripesh Wobuwobren Baraen Um Yoweimi Armam Henek Mour  
Nubarig Douk Shau Wain Agari  
(Matyu 21:33-46; Mak 12:1-12)*

<sup>9</sup> Aria Jisas nakripesh enyudok wobuwobren baraen nakri, “Anan arman narib anag nubarig aria nawu wain. Douk nawon neyatagun aria nakrip kupaimi armam hanaki henek kontrak heyohog. Aria shuruwep wainip pukri burep obi nyutob, amam hunadi anabigipum aria anan hudiman anabigipum. Aria anan nakomaguk nubarig aria nanak um anabur rougunibur wabur nanak nahe roubum nyutob. <sup>10</sup> Douk nape arigaha abudok nyutob um wainip shuruwep burep aria ta shudiyep um butogur. Aria anan neshopok anan arman douk nenekuman mour iri nanak um nukripam hudi iri enep shuruwep huko anan nusuwepamani. Douk nanak natogur aria amudok henek mour nubarig iri hakitak han aria wata heshopokan nanak wis wohis. <sup>11</sup> Douk namudok aria anan wata neshopok kupaini nenekuman mour iri nanak. Anan nanak natogur aria namudok atin. Amam han henekuman yoweihai aih aria wata heshopokan nanak wis wohis. <sup>12</sup> Aria douk anan natik namudok aria anan wata neshopok anan shopunek nanak. Douk nanak natogur aria namudok atin. Amam han henekan enenyenen aria honahur hawashan natogur adukigam nubarig.

<sup>13</sup> “Aria nagrem nubarig iri nakri, ‘Douk, namudok aria eik ta inak inek maresh? Aria ishopok eikin nugarin meyoh douk eik urkum manawashaman abom iri nunak. Aria anan douk wosik, amam ta humnek ananin baraen.’ <sup>14</sup> Aria henek mour nubarig iri hatrun nanaki aria amam hanakripam hakri, ‘Anudok arman douk nagrem nubarig iri ananin nugarin. Kweipon anan ta nurao ananish eneshenesh eshudok iri. Douk namudok aria apak mon nugokum um apak munarao agudok nubarig.’

<sup>15</sup> “Aria amam hanak hasuwan, hawashan natogur aduk um agudok nubarig aria han nagok.

“Aria nagrem agudok nubarig iri ta nunaki nune kam mumam amudok henek mour ananig nubarig iri? <sup>16</sup> Eik yakripep, anan ta nunaki nom hugok aria nukrip kupaimi hunaki hunek mour anañig nubarig.”

Aria douk eshesh arpesh shemnek namudok aria shakri, “Apak makri uwok um nune kesh namudok uwe, uwok.”

<sup>17</sup> Aria Jisas natrish duk aria narigesh nakri, “Baugenylum um enyudok baraen nyetem Iruhin ananik Buk iri douk nyakri mumam? Baraen douk

enyudok. ‘Amudok sagomatinyim utom\* douk harok urupat iri hakri uwok-umom aria hakwreyomuk iri, amam douk matogur sagomatinyim yopumi utom abom.’<sup>18</sup> Aria ihishmorim arpesh douk shutu shuto amudok utom iri ta shubuh prurakeresh shunek-umaguk shokugun atugun. Aria ta amam mubuh mubo enen arpen um, enyudok arpen ta misharigen abom nyunenekum minyabeg.”

<sup>19</sup> Jisas nakripesh enyudok wobuwobren baraen aria amam henek skulumesh um lo iri hani amam debeimi pris hadukemesh hakri enyudok wobuwobren baraen douk nakriyen nenyém amam. Namudok aria abudok nyutob amam hakitak hakri hutik anah yah um husuwan douk aria amam hanogugur um eshesh armam armago.

*Harig Jisas Um Shunek Takis Um Sisar Aka Uwok  
(Matyu 22:15-22; Mak 12:13-17)*

<sup>20</sup> Aria amam hape hatrugun um anab yopubi nyutob um amam huparug anagun aria kadak husuwan. Aria amam heshopok anam armam hanaki hape hatrun. Amudok armam douk debeimi heshopokam hanaki iri, amam douk henek rohw hakri amam adur hagipesh lo atin iri armam henek yopinyi atin iri. Amam hanaki hatik Jisas um huni anan hiyagwreh um hakri humnekan nukri niyagwreh enen baraen douk madae yopinyi uwe aria amam husuwan huranam debeini gavman um shokugi nahobig Judia iri aria hunekuman kwot.

<sup>21</sup> Aria amudok henek rohw iri hanaki aria hakrip Jisas hakri, “Debeini, apak madukemesh um nyak douk madae nyunogugur um enesh arpesh uwe. Aria nyak douk madae nyukrip debeishi nyeiguuh-ishii arpesh kupainyi baraen, aria nyeiguuh wokeshi nyukripeshuk kupainyi uwe, uwok. Nyak apa nyakripesh atin baraan ihishmorim arpesh. Aria nyak apa nyagipesh adurin atin baraan aria nyenek skulumesh wosik um Iruhin ananih aih. <sup>22</sup> Douk namudok aria nyak kripap. Apakin lo douk nyakri mumam? Enyen douk wosik um munek takis um debeini gavman Sisar aka, uwok?”

<sup>23-24</sup> Aria Jisas douk nadukemesh um agundok amam hakri hunek rohwuman um. Douk namudok aria anan nakripam nakri, “Ipak puyabige anam utom ba itrum. Enyudok nyeigur nyani aborir shetem amudok utom iri douk omiajenyish?”

Aria amam hakri, “Sisar ananish wo.”

<sup>25</sup> Aria anan nakripam nakri, “Douk namudok aria Sisar ananish eshudok eneshenesh ta puko Sisar. Aria Iruhin ananish puko Iruhin.”

<sup>26</sup> Aria amam habirak um humnekan niyagwreh enen yoweinyi baraan agundok sabaiishi arpesh shapeum hakri hunek kwotuman umen iri aria habirak hatik uwok. Namudok aria amam hakitak yowiyokuk um enyudok baraan anan nebeyenyi-umam iri. Aria amam mukareg baraan wokam.

*Amam Sadyusi Harig Jisas Um Shagok Iri Ta Wata Shakitak Um  
(Matyu 22:23-33; Mak 12:18-27)*

<sup>27-28</sup> Amam Sadyusi apa hakri shagok iri ta mare wata shukitaki uwok. Aria anam amudok Sadyusi hanaki Jisas naopeum aria harigan hakri, ‘Debeini tisa, seiwok Moses nawem-mopuk enen baraan. Aria baraan douk nyakri namudok, ‘Aria anan arman nurao onok armatok aria okwok mare kwubuki enesh batowish, aria anan nugokuk um, ananin wanin ta nukwaur. Anan nukwaur um wata shubuki batowish um shubuh ashuken-umanig nuwag.’<sup>29</sup> Aria anob nyutob, 7-poreim nugamim douk atish amakenyish shomubuki iri hape. Aria ashuken narao onok armatok

\* **20:17:** Putik futnot nyape Matyu 21:42 iri.

aria batowish madae nubuki enesh uwe aria nagok. <sup>30</sup> Aria douk ashukem nagokuk aria netemoni agab iri nukwaur. Anan nakwaur aria namudok atin. Batowish madae nubuki enesh uwe aria nagok. <sup>31</sup> Douk anan nagokuk aria netemoni agab anudok iri nakwaur. Aria namudok atin. Batowish madae nubuki enesh uwe aria shopunek nagok. Douk namudok aria amudok 7-poreim nugamim ihm-morim harao okwudok armatok aria batowish madae anan nubuki enen uwe. Aria amam shopunek hagok hatuh. <sup>32</sup> Aria okwok shopunek kwagok kwagiguk. <sup>33</sup> Douk namudok aria abudok nyutob shagok iri wata shukitak um, okwudok armatok ta kwukitaki aria kwupe um mein? Nyak nyadukemesh, sagomatin ihm-morim amudok 7-poreim douk haraok iri atum.”

<sup>34</sup> Aria Jisas nakripam nakri, “Douk abudok nyutob, armam armago apa shanaraum. <sup>35</sup> Aria eshudok arpesh douk Iruhin nakri wosik um wata shukitak iri wonugwegwiruh aria shunak shupe iruhw heven abom iri ta mare shunaraum atin uwe, uwok. <sup>36</sup> Eshesh ta shupe kabi douk ananish enselahos um aria ta mare shugok uwe, uwok. Eshesh shape Iruhin ananish batowish. Um maresh? Anan douk wata neshuhur shakitak iri. <sup>37</sup> Aria Moses douk neyabigap adur atin um shagok iri ta wata shukitak um. Enyudok baraei seiwok Moses nenyem Iruhin ananik Buk iri um agundok nyih hanuwi enen shokwinyi rowog iri um douk nahwar Debeini nakri, ‘Debeini anan douk Abraham nani Aisak iri Jekop amamin Iruhin.’ <sup>38</sup> Douk namudok aria enyudok baraei douk nyakri anudok Iruhin anan douk madae shagok iri eshesin Iruhin uwe, uwok. Anan douk shape iri eshesin Iruhin. Anan natrish um, anan douk nakri eshes ihishmorim douk shape iri atish.”

<sup>39</sup> Aria amudok anam douk henek skulumesh um Iruhin ananin lo hawanaman baraei Jisas hakri, “Tisa, nyak nyabeimom baraei wosik abom.” <sup>40</sup> Aria amam hanogugur um horigan um enen shopunek baraei.

*Jisas Nariges Um Krais Douk Omi Anan Barhonin  
(Matyu 22:41-46; Mak 12:35-37)*

<sup>41</sup> Arigaha aria Jisas nakripam nakri, “Aria arpesh apa shakri Devit ananin barhonin ta nutogur Krais, douk Iruhin nagraehan neshopokan nanakumori nunarao arpesh iri um maresh? <sup>42-43</sup> Iruhin ananik Buk douk shahwarok um Sam iri, Devit kanak douk nowem baraei nyetem namudok nakri, ‘Debeini nakrip eikin Debeini nakri, “Nyak nyupe agundok eiken yopuni rogor ehah arigaha ibo nyakim horim hubuhuk.”’ <sup>44</sup> Aria tik. Devit kanak douk nahwar anudok arman Krais ananin Debeini. Douk namudok aria Krais ta wata nutogur Devit ananin barhonin mumam?”

*Heneb Skulumesh Um Lo Iri Henekeh Iri Yoweihai Aih  
(Matyu 23:1-36; Mak 12:38-40; Luk 11:37-54)*

<sup>45</sup> Aria ihishmorim arpesh wata shape shemnek Jisas um agundok neyagwreh um. Aria anan nakrip ananum disaipel nakri, <sup>46</sup> “Ipak gamo pudukemesh um ipak mare pugipesh amudok henek skulumesh um lo iri amamih yoweihai aih. Amam hanadudareh abom um hakri hupe um hure rouhi atih rupeh aria hupe hurahaen um arpesh shutrum aria shukri amam yopumi debeimi armam. Aria shopunek, hakri hurahaen hunak agundok arpesh apa shantorum shapeum, um shutrum aria shunekumam yopihu nyumnah. Aria hanak eshesin Juda shape sheneyagwreh baraei-ogwi urusag um, amam hakri hunak hupe shakus sharik iri wagiturahos abudok nyutob shenek lotu obi nyutob. Aria shenek debeguni worigun um, amam hakri hunak hupe shakus sharik iri wagiturahos. <sup>47</sup> Aria amam

apa hanak hawish armam hagok hawosopuk iri armago owowig urusag aria hatru honahur owowish eshudok eneshenesh. Aria henek beten harig Iruhin um, amam henek rourouni rohwin beten um arpesan shutrum. Aria kweipon Iruhin ta nuwanamam amamish yoweishi inahos aria ta nunekam humnek debeiri eriger.”

## 21

### *Nyaruk Armatok Kwonek Ofa Utabor Kwoko Iruhin*

<sup>1</sup> Douk Jisas napuhur natrish aria natik arpesan douk shanabuk sabaishi eshudok iri shape shenek ofa. Eshesh shakwutu utabor babuh bogis sakus numun Iruhin ananit debeiti urupat iri. <sup>2</sup> Aria anan natik onok utabor wokok iri armatok douk anan nagok nakusopuk iri. Okwok um kwanaki aria kwenek ofa kwakwutu biyabor shokubori utabor babuh asudok bokis. <sup>3</sup> Aria Jisas natruk namudok aria nakri, “Adur atin, eik yakriep. Okwudok anan nagok nakusopuk iri douk utabor wokok abom. Aria okwok kwanaki kwakwutu sabaibori utabor kweshagrakuk eshudok ihishmorim. <sup>4</sup> Eshudok ihishmorim arpesan, douk sabaibori utabor bakusumeshuk aria sharauri karowibor meyoh shanaki shenek ofa. Aria okwudok armatok utabor wokok abom. Aria karowibor okwok kwaborabuk um kunator eshudok um douk kwanaki kwonek ofa kweyatabor kwoko Iruhin.”

*Jisas Nakri um Ta Kupaishi Shunaki Shununu Iruhin Ananit Debeiti Urupat Um*

*(Matyu 24:1-2; Mak 13:1-2)*

<sup>5</sup> Abudok atub nyutob anam Jisas ananim disaipel hatik Iruhin ananit debeiti urupat aria hape heneyagwreh hakri, “Atudok urupat douk yoputi abom. Atat douk shakwu yopubori atubor utabor sharukat. Aria shopunek, shaginohwat shakwu yopiyopishi eshudok douk arpesan shanaki shape shako Iruhin um.”

Aria Jisas nemnekam aria nakri, <sup>6</sup> “Ihishmorim eshudok douk ipak patrish iri, anob nyutob ta mare wata anam utom mutem dodog kupaimi kabi douk patrubor um, uwok. Ihibormorim ta bututu bubuh bukus amnab atugun.”

*Jisas Nakri Enyenyen Amaen Ta Nyutogur*  
*(Matyu 24:3-14; Mak 13:3-13)*

<sup>7</sup> Aria amam harigan hakri, “Tisa, ta meibi nyutob enyudok nyak nyakriyen iri nyutogur? Aria ta maresh shurik shutogurum mutrish aria mudukemesh um enyudok amaen douk ta hurukatin um nyutogur?”

<sup>8</sup> Aria Jisas nakri, “Ipak gamo pudukemesh um. Mare anam armam hunaki hunek rohwumep aria hunekep pugipes amamin baraen uwe, uwok. Sabaimi armam ta hunaki kupakupaibí nyutob hukriep um eikin nyeigur hukri namudok. Anan ta nunaki nukriep um eikin nyeigur nukri, ‘Eik Krais douk Iruhin nagraehe aria neshopoke yanaki iri.’ Aria anam ta hukriep hukri nyutob douk hurukatin um butogur. Aria ipak mare pumnek amamin baraen aria punak pugipesham uwe, uwok. <sup>9</sup> Ipak ta pumnek baraen um wanohw hwutogur kupairubi rougunirub warub um, o shupe shunotutukam shurpak um agundok shukri uwok um debeimi hupe esheshim debeimi um, ipak pumnek aria mare punogugur uwe, uwok. Eshudok ta shurik shutogur. Aria hugiguk iri nyumnah ta mare arigas hutogur.”

<sup>10</sup> Aria Jisas apa nakri, “Anag nahobig ta shukitak shuni kupaigi nahobig shurpak. Anan king nini ananish arpesan ta shukitak shuni kupaini king

nini ananishi shurpak. <sup>11</sup> Debeikwi enyik ta kwutuk. Aria ta eshesh nyurub besh abom. Aria yoweishi eshudok ta shutogur shunek eneshenesh yoweishi eshudok shubo arpesh. Eshesh ta shutogur kupakupairubi warub. Aria ipak ta putik enesh kupaishi abom eshudok shutogur iruhw utag aria ta punogugur.

<sup>12</sup> “Aria abudok nyutob eshudok mare arigas shutogur obi nyutob, kupaishi arpesh ta shurik shunaki shusuwep shunekep enenyen. Eshesh ta shuraep piyotum kwotog numun eshesh Juda shape sheneyagwreh baraoengwi urusag aria ta shuweshikep punak pupe shunuweshik-atii urupat. Aria eshesh ta shishapokep punak piyotu agundok amam king huni debeimi gavman iri hapeum. Eshesh ta shunekep namudok um maresh, ipak douk pagipesh eik aria pakripes eikin baraen. <sup>13</sup> Aria abudok nyutob eshesh shunekep namudok um, abudok douk yopubi nyutob um pukripes eikin yopinyi baraen um. <sup>14</sup> Douk namudok aria ipak mare punogugur pukri ta pubeimesh maren esheshin baraen uwe, uwok. <sup>15</sup> Um maresh, eik kanak ta itaurumep ikep baraen douk ta ipak piyagwrehen iri nyuni yopunyi saki. Aria ipakim horim ta shubirak um mare shukenyuk agabus enyudok eikin baraen douk yakripepen iri nyubuhuk uwe, uwok. <sup>16</sup> Ipakish amakenyish o ashukenyish iri owashish atus awiros um o enesh ipakishi arpesh ta shiyabig ipakish horik horin um agundok ipak pape um aria ta shunak shusuwep shuraep shunak shunek kwotumep. Aria anep ta shep abom pugok. <sup>17</sup> Ihishmorim arpesh ta shukri wokumep abom aria shukepuk agabus. Um maresh, ipak douk eikish abom arpesh douk pagipesh eik iri. <sup>18</sup> Aria Iruhin ta nutaurumep pupe wosik aria ta mare anabur atubur ehibur batogur ipakigos baragos iri ta bunak buwishuk uwe, uwok. <sup>19</sup> Aria douk ipak pugipes eikin baraen aria piyotu dodog um, ipak ta pupe wosik ihih nyumneh.”

### *Jisas Nakri um Ta Shuwor Debeiburi Wabur Jerusalem Um (Matyu 24:15-21; Mak 13:14-19)*

<sup>20</sup> Aria Jisas apa nakripam baraen, “Aria abudok nyutob putik amam ami hunaki hiyotu hiyorhurih abrudok wabur Jerusalem obi nyutob, ipak ta pudukemesh pukri nyutob douk hurukatin um butogur. <sup>21</sup> Umum maresh? Abudok nyutob arpesh shape shokugi nahobig Judia iri ta shuruwok shunak yadururuh shunak shupeik. Aria eshudok douk shape numun Jerusalem iri ta shukutuburuk. Aria eshudok douk shapeiri kupairubi warub bape hurukatin um Jerusalem iri mare wata shunaki shuwish Jerusalem uwe, uwok. <sup>22</sup> Abudok douk Iruhin ananib nyutob um nuwanamesh yoweishi inahos eshudok arpesh douk shapeum shenek eneshenesh yoweishi inahos iri. Enyudok ta nyutogrum nyunek ihinyumorim baraeen nyetem Iruhin ananik Buk iri douk nyakrium enyudok ta nyutogur um Jerusalem iri nyutogur adurin atin. <sup>23</sup> Aria gihauwanarahaen iri armago uni oudok douk wasuhw batowish douk watak shawok nyumeb um ehudok nyumeh iri. Debeinyi abom amaen ta nyutogur abudok amnab. Iruhin ta juwehosin abom aria ta nunekumesh debeiti kwot abom eshesh Israel. <sup>24</sup> Enesh ta shutupokesh bainatog aria enesh ta shuweshikesh shunak um ihigosmorim nahobigos. Aria eshudok arpesh douk madae Juda iri uwe ta shishishobur shupe debeishi um abrudok wabur Jerusalem. Eshesh ta shupe um arigaha esheshib nyutob Iruhin nagrahab-umesh um shupe debeishi bunak butuh.”

*Debeinyi Amaen Nyutogur Nyunakuk Aria Eik Anudok Arman Douk Yatogur Adurinyi Arpen Iri Ta Kadak Itogur  
(Matyu 24:29-31; Mak 13:24-27)*

<sup>25</sup> Aria Jisas apa nakripesh bareaen nakri, “Enenyenen ta nyutogur um wabin nini nyumnahin aub aria unib. Ihishmorim arpesh shape abudok amnab iri ta shumnek um agundok youg aria debeibi morub batu um. Aria eshesh ta shunogugur abom aria esheshiruh aparuh ta yoweruh.

<sup>26</sup> Sabaishi arpesh ta shutik enyudok douk nyakri nyutogur um abudok amnab iri aria eshesh ta shunogugur abom. Aria eshesh ta marubigos sesh aria shutu shubuh shukus atap kabi douk shagok iri shabuh shakus um. Um maresh? Eneshenesh shape iruhw utag iri shuni aub aria unib ta grurugwresh aria shunatuk shubuhi.

<sup>27</sup> “Aria abudok nyutob ta douk kadak shutik eik Anudok Arman douk yatogur adurinyi arpen iri irari onog orug inaki. Eik ta itrugun abom aria dodogoiwe atuwe inaki.

<sup>28</sup> “Aria eshudok shupe shutogur obi, ipak pikitak piyotu aria pupuhur putrugun. Um maresh? Abudok nyutob Iruhin nakri wata nutrip aria nukwashihewum yoweishi inahos ipak pape penekesh iri aria nuraep putanamori pupe wosik um douk banaki hurukatin.”

*Jisas Nakripesh Wobuwobren Baraen Um Rowog Nyeigurin Um Fik Iri Um Shutrin Aria Shudukem Nyutob  
(Matyu 24:32-35; Mak 13:28-31)*

<sup>29</sup> Aria Jisas nakripesh enyudok wobuwobren bareaen nakri, “Ipak punek urkum um enyudok rowog nyeigurinyum fik nyuni kupaigosi rowos.

<sup>30</sup> Abudok nyutob putik um agagas supe sunareh obi, ipak ta pudukemesh pukri wah hutao obi nyutob douk hurukatinyum butogur. <sup>31</sup> Aria douk ta namudok atin. Abudok nyutob ipak putik enyudok ihinyumorim amaen douk iganigadae yakripepumen iri nyupe nyutogur um, ipak ta pudukemesh um abudok yopubi nyutob arpesh shuwish agundok Iruhin ta nupe Debeini um ipak ananish arpesh um douk hurukatin um butogur.

<sup>32</sup> “Aria adur atin eik yakripep. Doukishi arpesh ta mare arigas shugok shutuh aria enyudok ihinyumorim amaen douk eik yakripepumen iri ta nyutogur. <sup>33</sup> Ihishmorim eshudok shape iruhw utag iri shuni ihishmorim shape abudok amnab iri shuni amnab shopunek ta brukwuresh shunak shuwishuk abom. Aria eikin bareaen ta nyupe abom ihih nyumneh.”

*Jisas Nakrip Ananim Disaipel Um Hupe Hutrugun Abom Um Ahudok Nyumnah Hutogram*

<sup>34</sup> Aria Jisas apa nakripam bareaen nakri, “Ipak ta gamo pudukemesh. Ta wosik atin ipak pupe um puwok sabaiguni atugun worigun o puwok dodogowibar abar pugugak aria pupe um punek nyigiya um eneshenesh agundok atapishi afish um. Aria ipak pupe um punek enyudokmori atin um, ahudok eik itanamori ahi nyumnah ta hutogramep ahudok atuh kabi enen mahin madae nyudukemesh uwe aria ahudok atuh nyeir maduhw aria roguhw shakitak yowiyokuk um. <sup>35</sup> Umum maresh? Ahudok nyumnah ta hutogram ihishmorim arpesh shape abudok amnab iri. <sup>36</sup> Namudok aria ihih ipak ta gamo punatrugun aria pupe. Ipak punek beten porik Iruhin ihih nyumneh um nutaurumep aria abudok yoweibi nyutob bukri butogur um, ipak wosik ta piyotu dodogowip arigaha punak putogur piyotu agundok eik Anudok Arman douk yatogur adurinyi arpen iri itogur ipeum.”

<sup>37</sup> Aria ehudok nyumneh Jisas nape numun narub Iruhin ananit debeiti urupat tataoum aria nape neneb skulumesh ananit bareaen. Aria weibus

obi, anan apa natoum Olivihw yaduhw aria nanak neshuh agundok. <sup>38</sup> Aria ihishmorim arpesh apa shakitak ruwahegwis atus shanak um Iruhin ananit debeiti urupat tataoum um shumnek ananin baraen.

## 22

*Judas Nani Debeimi Habo Baraen Um Niyabigam Jisas Hunak Husuwan  
 Um (Matyu 26:1-5, 14-16; Mak 14:1-2, 10-11; Jon 11:45-53)*

<sup>1</sup> Ahudok nyumnah eshesh Juda shenek agundok debeiguni Pasovaigun\* worigun douk shawok bret shashaiteh madae tukitak debeiti iri uwe douk hanaki hurukatin. <sup>2</sup> Aria amam debeimi pris hani amam douk henek skulumesh um lo iri hape haurim anah yah um hakri hubo Jisas nugok um. Um maresh? Amam hanogugur um hakri ta huneken yopugunum aria armam armago ta shom.

<sup>3</sup> Aria Satan nawish Judas Iskariot. Anan douk anan um amudok Jisas ananim 12-poreim disaipel. <sup>4</sup> Douk Satan nawishan aria nanak nani amam debeimi pris hani amam heyoh Iruhin ananit debeiti urupat iri amamim debeimi heyagwreh um huweshik Jisas um. Aria anan nakripam nakri wosik um niyabigam um Jisas nanak naapeum aria amam hunak husuwan.

<sup>5</sup> Aria douk hemnek namudok aria amam hanadudareh hariguk abom. Aria amam habo baraen um hakri ta hukon anabor utabor. <sup>6</sup> Aria Judas nakri wosik um hukon anabor utabor um aria anan nape natrugun um anab yopubi nyutob um niyabigam Jisas hunak husuwan um. Anan nape natrugun um nakri nutik mare enesh arpesh shuni anan shupe aria anan nunak nakripam hunaki husuwan huran hunak.

*Biom Jisas Ananin Disaipel Henek Redium Pasovaigun Worigun  
 (Matyu 26:17-25; Mak 14:12-21; Jon 13:21-30)*

<sup>7</sup> Arigaha aria ahudok nyumnah hanak hatograri um shuwok bret douk shushaiteh madae tukitak debeiti iri uwe. Aria ahudok nyumnah, eshesh apa shabo nugaesh sipsipahos um shishoh abudok nyutob shunek agundok debeiguni Pasovaigun worigun um. <sup>8</sup> Aria Jisas nakrip Pita aria Jon um enyudok bareaen aria neshopokam hanak. Nakri, "Ipak punak aria punek redium agundok Pasovaigun worigun um apak mugnoh iri."

<sup>9</sup> Aria amam wata harigan hakri, "Nyak nyakri unak uneke redimagun agnum?"

<sup>10</sup> Aria anan nakripam nakri, "Ipak mnek! Ipak ta punak puwish atin wabur aria anan arman nasahi anap abar barop iri marup iri ta nuparugep. Aria pugipesan punak puwish atudok urupat anan nunak nuwishat iri. <sup>11</sup> Ipak puwish aria pukrip atudok urupatin yaken pukri, 'Apakin Debeini Tisa nakri amudok rum douk arpesh shape shashoh omi douk ta anan nini apak ananim disaipel muwok Pasovaigun worigun um douk agunum?' <sup>12</sup> Aria anan ta niyabigep anam debeimi iruhim rum douk eshudok shape shawok woriguneshi shakusomi. Aria ipak puto pukih pupe punek redimap um worigun."

<sup>13</sup> Aria douk hanak aria hatik um enyudok nyatogur kabi douk iganigadea Jisas nakripam um. Aria amam henek redium Pasovaigun worigun.

*Jisas Nakom Bret Aria Wainibar Abar Ananim Disaipel Hashoh  
 (Matyu 26:26-30; Mak 14:22-26; 1 Korin 11:23-25)*

\* <sup>22:1:</sup> Putik futnot nyape Matyu 26:17 iri.

**14** Douk arigaha abudok nyutob um huwok worigun obi nyutob batogur, aria Jisas nani ananim aposel hanaki hape heyorharih tebol.

**15** Amam hape aria anan nakripam nakri, "Eik oub bakitak abom um ini ipak muwok agundok Pasovaigun worigun iyoh, aria kadak irao debeiri eriger. **16** Adur atin eik yakritep. Eik ta mare wata iwok anagun agundokmori Pasovaigun worigun, uwok. Eik ta ipe namudok arigaha wata ini ipak muwok adurigun Pasovaigun worigun abrudok wabur Iruhin nape Debeini um ananish arpesh shapeum."

**17** Aria Jisas nohuri anap kap wain abar borap iri nenek beten nenek tenkyu um Iruhin aria nakripam nakri, "Suwap kap aria ipak ihpmorim punosiyabor. **18** Eik yakritep, douk arigaha kweipon, eik ta mare iwok anabar abrudokmori wainibar abar, uwok. Eik ta ipe namudok arigaha abudok nyutob um arpesh shuwish um agundok Iruhin nupe Debeini um ananish arpesh um butogur."

**19** Aria wata nohuri bret nenek beten nenek tenkyu um Iruhin aria naworut nako amam. Aria nakripam nakri, "Atudok bret douk eikihw yegenyihw. Eik yekepohw um ifaurumep. Aria ipak pupe punekesh namudok um ipak urkwip wata purum eik."

**20** Aria douk amam hawok bret heyatat aria wata nenekesh namudok atin. Anan nohuri kap wainibar abar boropi nako amam aria nakripam nakri, "Abrudok wainibar abar douk eikibor owishibor douk ta butourak butaurum ipak arpesh iri. Abrudok owishibor douk benek enyudok Iruhin ananin namunyi adurin atinyi bareaen kontrak nyutogur dodogowin. **21** Aria anudok arman douk ta niyabig eikim horim aria shusuhwe shurao eik iri douk anudok nani eik wape wawok worigun enyudok tebol. **22** Eik Anudok Arman douk yatogur adurinyi arpen iri ta she igok kabi douk seiwok Iruhin nakri um ta shenekesh um. Aria anudok douk niyabig eikim horim um eik iri, anan douk yakri giha abom um anan. Um maresh? Anan ta debeiniy amaen abom ta nyutogur-uman."

**23** Aria douk Jisas nakripam namudok aria amam hape harigan um ta amiapen nyunek enyudok.

### *Amam Disaipel Hanagaganim Baraen Um Amiapen Ta Nyupe Debeini Um Amam*

**24** Aria amam disaipel hohur enen baraen aria hape hanagaganim um hakri amam kanak ta meini abom nupe amamin debeini. **25** Aria Jisas nakripam nakri, "Amam king hape abudok amnab iri douk dodogowim atum abom hapeum arpesh shunek enesh eshudok eneshenesh aria eshes apa shemnek amamim bareaen aria shenekesh. Aria amudok douk hape esheshim debeimi iri, arpesh apa shahwaram shakri yopumi hataurumesh iri. **26** Aria ipak mare punekesh namudok, uwok. Ipak meinari arman nukri niyotu nurikumep iri, anan ta nupe abom kabi douk anan nyeigur wokan iri nenek mour meyoh um kupaishi iri um. **27** Ipak pakri meinari arman douk nape debeini um ipak ihpmorim? Anudok douk nape tebol nawok worigun iri o, anudok douk noruhuman worigun iri? Adur, debeini douk anudok nape tebol nawok worigun iri. Aria eik douk yani ipak mape aria yenekesh kabi douk anudok noruhuman worigun iri aria yenek mour um yataurum ipak. **28** Aria abudok nyutob amaen nyutogur nyukwiraehe obi, ipak douk pani eik pape aria madae pukutukuk eik uwe. **29** Aria eikin Yain douk neke big um ipe debeiwe iri um arpesh. Aria douk namudok atin. Eik douk ikep big um ipak pupe debeipi pusuhw merik um enesh arpesh. **30** Eik douk yenekep namudok um puni eik mupe eikin tebol muwok worigun iri abar agundok ekish arpesh shapeum. Aria ipak ta putem yopishi wagiturahos

douk amam king atum hapenyesh iri. Aria ipak ta pupe debeipari pusuhw kwotog um asudok 12-poreis awiros um eshesh Israel.”

*Jisas Nakri Pita Ta Nukri Anan Madae Nudukem Jisas Uwe, Uwok  
(Matyu 26:31-35; Mak 14:27-31; Jon 13:36-38)*

<sup>31</sup> Aria Jisas nakri, “Saimon, Saimon! Nyak mnek! Iruhin nakripan wosik Satan um nukwiraeh ipak ihishmorim um punosiam um pukutukuk bilip kabi douk sheyogomuk ouguhit wit um. <sup>32</sup> Aria Saimon, eik yenek beten yarig Iruhin um nataurumen um mare nyukutukuk nyakin bilip um eik, uwok. Aria abudok nyutob nyutanam nyugipesh eik obi, nyak wata nyutaurum nyakim ashukenyim owarhim douk hagipesh eik iri um hiyotu dodog.”

<sup>33</sup> Aria Pita wata nakrip Jisas nakri, “Debeini, eik yenek redi um ini nyak unuweshik aria shopunek yakri um ini nyak ugok atin.”

<sup>34</sup> Aria Jisas nakripam nakri, “Pita, kwehibib wab, owot ta madae arigas tiyagwreh aria nyak ta nyunekuk rohw biyeh atih nyukri nyak madae nyudukem eik uwe.”

*Jisas Nakrip Ananim Um Husuhw Banagos Suni Bainatog Aria Paus Um  
Ta Hanaruk Utabor Um*

<sup>35</sup> Aria Jisas wata nakripam nakri, “Riguk eik yeshopokep panak penek mour um, ipak madae punasuhw banagos aria su uni paus panaruk utabor um uwe. Aria abudok nyutob ipak panak meyoh um, ipak eneshenesh woked aka, uwok?”

Aria amam hakripan hakri, “Uwok, apak madae eneshenesh wokap uwe, uwok.”

<sup>36</sup> Aria anan nakripam nakri, “Aria douk, anudok douk nanoruk anabor utabor anas paus iri o nanabuk anag banag iri ta nunasuwen. Aria meinyi arpen douk bainat wokeni ta nyenek salim enyenyit saket aria nyutor anat bainat.

<sup>37</sup> “Um maresh? Baraen douk shenyem nyakrium eik iri nyetem Iruhin ananik Buk iri ta nyutogur adurin. Baraen enyudok, ‘Anan douk shakwru-pan morim yowemi henek yoweishi inahos iri.’ Adur, enyudok baraen douk nyakrium eik um douk nyape nyatogur adurin.”

<sup>38</sup> Aria amam disaipel hakripan hakri, “Debeini, tik. Apak douk masuhw biyog bainatog.”

Aria anan nakripam nakri, “Jurug.”

*Jisas Nakih Neneh Beten Olivihw Yoduhw  
(Matyu 26:36-46; Mak 14:32-42)*

<sup>39</sup> Aria Jisas nakutukuk Jerusalem natogur natoum yoduhw Oliv kabi douk iih nyumneh anan nepe nanak um. Aria ananim disaipel hagipesan hanak. <sup>40</sup> Aria douk anan nanak natogur aria nakripam, “Ipak ta punek beten um abudok nyutob kwirah nyutogur-umep um, ipak mare punek yoweishi inahos.”

<sup>41</sup> Douk nakripamuk namudok aria nanaku rougun shopunek. Rougun um douk kabi arpesh shawashak anam utom manak mabuh um. Douk nanak aria nabuh noduk ohrubus nepe nenek beten nakri, <sup>42</sup> “Yain, ta nyukri wosik um, nyak nyukutuk enyudok amaen ta nyutogrome iri. Aria eik yakri uwok um nyugipesh eikim urkum, uwok. Nyak nyugipesh nyakin atum urkum.” <sup>43</sup> [Aria enen ensel nyape iri iruhw heven nyabuhi nyatogrum anaria nyatauruman nyenekan dodogowin. <sup>44</sup> Aria ananin mishin yowen abom aria natogur dodogowin nepe nenek beten kabi iganigadae narik

nenekan um. Aria kihakwuh nyatogur kabi douk owishibor bakih babuh bagruk atap um.]

<sup>45</sup> Douk nenek beten jurug aria nakitak nanak um nutik ananim disaipel. Aria nanaku, aria anan natrum um amam heshuh hagok. Amarish mishish yowesh abom um enyudok douk ta nyutogur iri aria amam madae ddogowim uwe aria heshuh. <sup>46</sup> Aria anan nanak narigam nakri, “Ipak peshuh um maresh? Kakitak aria punek beten um abudok nyutob kwiraeh nyutogurumep um, aria ipak mare punek yoweishi inahos.”

*Judas Nariki Um Jisas Ananim Horim Hanaki Hasuhw Jisas Haran Hanak  
(Matyu 26:47-56; Mak 14:43-50; Jon 18:3-11)*

<sup>47</sup> Aria douk Jisas wata nape neyagwreh atin aria Judas anan um amudok 12-poreim disaipel nariki um sabaimi armam hanak hatograri. Aria Judas nanaki hurukatin um Jisas um nakri nunopuprikan. <sup>48</sup> Aria Jisas nakripan, “Judas, douk nyak nyiyabigesh eik Anudok Arman douk yatogur adurinyi arpen iri um eikish horim um agundok nyanaki nyanaprike um, aka?”

<sup>49</sup> Aria Jisas ananim disaipel douk hani anan heyotu iri hatik um enyudok douk Jisas ananim horim hakri hunekenyuman iri aria amam harigan hakri, “Debeini, nyak nyakri maresh? Apak mukwumam apakig bainatog aka?”

<sup>50</sup> Aria anan um amam disaipel natupak anan nenek mour um debeini pris iri ananiih anagagrih atah abom aria tukarah.

<sup>51</sup> Aria Jisas nakri, “Jurugih ehudokmori aih.”

Aria nasuhw anudok arman ananiih atah neshopoh hape agundok hatakum aria ahah wata yopuh.

<sup>52</sup> Aria Jisas narig amam debeimi pris hani amam heyoh Iruhin ananit debeiti urupat iri um amamim debeimi hani eshesh Juda esheshim debeimi douk hanakumori husuwan huran hunak iri. Anan narigam nakri, “Ipak pakri eik anan yoweini arman douk yenek onohw wanohw iri o, yak-wuaruh iri um pasuhwi bainatog aria rowos um punaki purae um? <sup>53</sup> Ihih nyumneh eik yani ipak mape numun narub Iruhin ananit debeiti urupat tataoum aria ipak madae pukri um puweme ipakis wis ba pusuve uwe. Aria abudok nyutob douk ipakib nyutob abom um Satan nape arukwutigun atin aria dodogowin atun um nubo eik ibuhuk um.”

*Pita Nakri, “Eik Madae Idukem Jisas Uwe”  
(Matyu 26:57-58, 69-75; Mak 14:53-54, 66-72; Jon 18:12-18, 25-27)*

<sup>54</sup> Douk Jisas neyagwreh um jurug aria hasuwan haran hanak hawish debeini abom pris ananit urupat. Aria Pita nagiguk atin nape nagipesham nanak. <sup>55</sup> Aria agundok iganigadae armam hautig nyih orokohunirub um narub douk shenekarub sheyorsharib abom debeini pris ananit urupat tataoum. Aria amam hanak hapeum nyih hape atugun aria Pita shopunek nanak napeimeh.

<sup>56</sup> Aria onok kwenek mour agundok iri kwanaki kwartrun napeum nyih aria kwartrun wosik aria kwakri, “Anudok arman shopunek douk nani Jisas iri.”

<sup>57</sup> Aria Pita nenek rohw nakri, “Eik madae idukeman uwe Jisas.”

<sup>58</sup> Aria douk shapeigu madae roubi uwe aria anan arman wata natrun aria nakri, “Nyak shopunek douk nyeir Jisas ananim iri.” Aria Pita nakripan, “Adur, eik uwok!”

<sup>59</sup> Aria shape arigaha roubi nyutob hurukatin um atin aua nyanakuk, aria kupaini neyagwrehi debeg nakri, “Adur atin. Anudok arman douk nani Jisas iri. Um maresh? Anan shopunek douk nape iri shokugi nahobig Galili iri.”

<sup>60</sup> Aria Pita nakri, “Nya, baraen nyak nyeyagwrehen iri, eik madae idukemen uwe.”

Aria Pita wata nape neyagwreh atin aria owot teyagwreh. <sup>61</sup> Aria douk owot teyagwreh aria Debeini natananam natruni wosik Pita. Aria Pita wata urkum morum enyudok baraaen nabatik Debeini nakripan-enyi. Baraaen enyudok, “Owot ta madae arigas tiyagwreh aria nyak ta nyunek rohw biyeh atih nyukri, nyak madae nyudukem eik uwe.” <sup>62</sup> Aria Pita urkum morum enyudok baraaen aria natogur aduk aria nareh yowiyokuk abom.

*Amam Soldia Henekan Enenyenen Jisas Aria Han  
(Matyu 26:67-68; Mak 14:65)*

<sup>63</sup> Aria amudok douk heyotu heyoh Jisas iri henekan enenyenen heyokasan aria han. <sup>64</sup> Aria amam howeshik ananis nabes anap rupahip aria harigan hakri, “Nyak kripap kabi amam profet um, douk amiapan nyaen?” <sup>65</sup> Aria amam habubuniman aria hape heyokasan um sabainyi enenyenen yoweinyi baraaen shopunek.

*Amam Harao Jisas Um Eshesh Juda Esheshim Debeimi Kansol Um Humnek Ananin Baraen  
(Matyu 26:59-66; Mak 14:55-64; Jon 18:19-24)*

<sup>66</sup> Douk gagruk aria eshesh Juda esheshim debeimi hani debeimi pris hani amudok henek skulumesh um lo iri hanaki hape atugun. Aria amam haraauri Jisas hanaki agundok amam hapeum. <sup>67</sup> Aria amam harigan hakri, “Nyak kripap anudok arman Krais douk. Iruhin nakri um nugraahan neshopokan nunakumori nunarao arpesh iri douk nyak?”

Aria anan nakripam, “Aria ta ikripep um, ipak ta mare punek bilip um eikin baraaen. <sup>68</sup> Aria ta eik iyorigep enen baraaen akure, ipak ta mare pubeyenyume. <sup>69</sup> Aria douk arigaha kweipon, eik Anudok Arman douk yatogur adurinyi arpen iri ta ipe yopunyi rogur ehahum dodogowin atun abom iri Iruhin”

<sup>70</sup> Aria ihm-morim harigan hakri, “Namudok aria nyak douk Iruhin ananin adurini Nuganin?”

Aria anan nakripam nakri, “Ipak pakri adur. Eik douk kabi ipak pakri um.”

<sup>71</sup> Aria amam hakri, “Apak mare wata murim enen shopunek baraaen. Baraaen douk enyudok memneken anan kanak nakriyen.”

## 23

*Debeimi Henek Kwot Um Jisas Um Pailat Douk Nape Debeini Gavman Um Judia Iri  
(Matyu 27:1-2, 11-14; Mak 15:1-5; Jon 18:28-38)*

<sup>1</sup> Douk amam hemnek Jisas ananin baraaen um jurug aria amam ihm-morim hikitak haran hanakum Pailat douk nape debeini gavman iri. <sup>2</sup> Aria hanak hape henek rohw henekuman baraaen hakri anan nohur arpesh um shuni gavman shurpak. Aria shopunek hakri, anan nakri eshesh mare shunek takis uwe um debeini gavman iri Sisar. Aria shopunek hakri, anan nakri anan douk Krais, anan king douk Iruhin nagraehan neshopokan nanakumori nunarao arpesh iri.

<sup>3</sup> Aria Pailat narigan nakri, “Nyak douk eshesh Juda esheshin king?”

Aria Jisas nakripan nakri, “Adur, eik douk kabi nyak nyakrium.”

<sup>4</sup> Aria Pailat wata nakrip amam debeimi pris hani eshudok sabaishi arpesh nakri, “Eik madae iparug enesh yoweishi inahos anan nenekesh iri uwe.”

<sup>5</sup> Aria amam dodogowim atum hakri, “Anan neneck skulumesh um enen baraan eshesh armam armago aria nohur esheshiruh aparuh um shuni gavman shurpak. Enyudok douk nenyuhuri shokugi nahobig Galili aria nanak ihirub warub apak Israel apakirub. Aria douk enyudok nyanak nyatograri agundok.”

<sup>6</sup> Aria Pailat nemnek enyudok baraaen aria narigesh nakri, “Anudok arman Jisas anan douk anan um eshesh Galili?”

<sup>7</sup> Aria douk Pailat nemnek um shakri Jisas anan douk nape iri shokugi nahobig Galili douk Herot nape debeini um, aria anan neshopokan nanak um Herot. Abudok nyutob Herot shopunek douk nanak nape Jerusalem.

### *Herot Douk Nape Debeini Um Shokugi Nahobig Galili Iri Nemnek Jisas Ananit Kwot*

<sup>8</sup> Aria Herot douk nanadudareh abom um abudok nyutob anan natik Jisas um. Um mares? Anan nemnek baraaen um agundok shape shakriyan um aria roubum nyutob anan nape natrugun um nakri nutrun. Anan nakri nutrun um nunek enen Iruhin atun neneken iri mour. <sup>9</sup> Douk namudok aria Herot narigan sabainyi baraaen Jisas. Aria Jisas madae nunogugur um nuwanaman enen baraaen uwe, uwok. <sup>10</sup> Aria amam debeimi pris hani amam henek skulumesh um lo iri hanak heytou hurukatin aria dodogowim atum hape henekuman dodogowin atin baraaen. <sup>11</sup> Aria Herot nani ananim soldia hape henekan enenyener Jisas. Amam habubuniman aria hanak hohuri anah dudukeh-ahi rupah douk debeimi atum hanawashoh iri aria hanaki haweshigah-uman. Aria wata heshopokan nanak um Pailat. <sup>12</sup> Aria riguk Herot nani Pailat apa hananem horim. Aria ahudok nyumnah Pailat neshopok Jisas nanak um Herot ahi, amam wata hanagabe um aria hape atugun.

### *Pailat Nakri Hunek Nyilim Jisas Nir Rowog Kruse (Matyu 27:15-26; Mak 15:6-15; Jon 18:39-19:16)*

<sup>13</sup> Aria Pailat nahwar debeimi pris hani amam debeimi um eshesh Juda iri hani eshudok sabaishi armam armago shanaki. <sup>14</sup> Aria anan nakripesch nakri, “Ipak parauri anudok arman um eik aria pakri nohur arpesh um shuni gavman shurpak. Aria douk ipak douk pape aria eik yape yarigan um enyudok baraaen. Aria eik douk madae iparug yoweishi inahos anan nenekeh iri uwe. Eik yatik um enyudok ipak penek kwotuman-enyi anan douk madae nuneken uwe. <sup>15</sup> Aria Herot shopunek douk madae nuparug enesh yoweishi inahos Jisas nenekeh iri uwe. Aria anan wata neshopokan natanamori um apak. Aria mnek. Anudok arman douk madae nunek enesh yoweishi inahos um ta mon nugokumesh iri uwe, uwok. <sup>16</sup> Douk namudok aria eik ta ikripam huprukan hukwu enesh eshudok meyoh aria wata ikweshihan nunak fri.”

<sup>17</sup> [Abudok nyutob eshesh douk shagipesh ahudok aih. Ihish kwarahos ahudok nyumnah hutogrum shunek Pasovaigun worigun um, Pailat ta nukweshih-umesh anan nonoweshik iri nutogrumeshi nupe fri.]

<sup>18</sup> Aria ihishmorim arpesh shani atuh shahwar shakri, “Buwon nugok! Aria nyukweshih-umapari Barabas!”

<sup>19</sup> Anudok arman Barabas douk nonoweshik neapeum agundok nohur onohw wanohw Jerusalem nani gavman aria nabo enesh arpesh shagok um.

<sup>20</sup> Aria Pailat nakri nukweshih Jisas nunak fri aria anan wata gamo narigesh. <sup>21</sup> Aria eshesh shahwar shakri, “Nek nyiliman rowog kruse! Nek nyiliman rowog kruse!”

<sup>22</sup> Aria Pailat wata shopunek nakripesh anah shopunek henekeh biyeh atih um nakri, “Anan neneh maresh yoweishi inahos um apak mon nugokumesh? Eik madae iparug enesh yoweishi inahos um ta mon nugokumesh iri uwe. Douk namudok aria eik ta ikripam huprukan enesh eshudok shabo arpesh-eshi meyoh aria ikweshihan nunak.”

<sup>23</sup> Aria eshesh shape shahwar debeg abom um shakri shunek nyilim Jisas um rowog kruse aria shon nugok. Eshesh shahwar arigaha aria esheshin baraen nyabouk Pailat ananin nyabuhuk. <sup>24</sup> Namudok aria Pailat nakri wosik um shubo Jisas nugok kabi douk eshesh shakri um. <sup>25</sup> Aria nakweshih-umesh Barabas nanak fri. Anan douk nonoweshik um agundok nani gavman sharpak, aria nabo enesh arpesh shagok um. Aria douk Pailat nakweshih-umesh anudok eshesh shakri-anari nanak aria nekesh Jisas um shenekesh-uman kabi douk eshesh shakri um.

*Harao Jisas Hanak Um Hunek Nyiluman Rowog Kruse  
(Matyu 27:32-44; Mak 15:21-32; Jon 19:17-27)*

<sup>26</sup> Douk Pailat nekesh Jisas nor esheshis wis aria amam soldia haran hanak. Amam hanak yah aria haparug Saimon douk nanaki wabur Sairini iri nanakumori nuwish Jerusalem. Aria amam hasuwan howem rowog kruse ananah ereh aria henekan menyusah nagim Jisas.

<sup>27</sup> Aria sabaishi arpesh shagipesh Jisas shanak. Ono armago shopunek wanamesh shanak aria owo wape warepan. Owo woreh wanakukuri wanaruwar abom.

<sup>28</sup> Aria Jisas natanam nakripo nakri, “Ipak armago pape Jerusalem iri, ipak mare purep eik uwe, uwok. Ipak purep ipakish batowish shuni ipak kanak. <sup>29</sup> Um maresh, nyutob ta butogur aria abudok nyutob arpesh ta shukri, ‘Kupaiwari armago wani oudok douk wata ubuki enesh batowish iri uwe wani oudok douk madae usuhw enesh batowish wukesh nyumeb iri uwe owo ihiyumorim douk wanadudareh.’

<sup>30</sup> “Aria abudok nyutob, arpesh ta shukrip yodururuuh shukri, ‘Kitak putukwarihi putu pushapumap.’ Aria ta shukrip mihib shukri, ‘Putukwarihi pubuhi pushapumap aria pubeshukap.’

<sup>31</sup> Eik douk madae inek enesh yoweishi inahos uwe, aria douk eshesh shakri shubo eik douk yape kabi naminyi rowog iri um. Aria ipak douk pape kabi yarinyi rowog iri um agundok penek yoweishi inahos um ta shenekesh-umep mumam mumam? Eshesh ta shunekumep yoweishi inahos abom.”

<sup>32</sup> Aria amam soldia harao Jisas nani biom henek yoweishi inahos iri hanakum hom hugok.

<sup>33</sup> Aria eshesh shanak shatogur agundok douk nape kabi arpenyig barag um. Aria agagun douk shahwaragun, “Arpenyig Barag.” Aria agundok, amam henek nyilim Jisas um rowog kruse. Aria amudok biom henek yoweishi inahos iri, anan shenek nyiluman neir wobur ehahum Jisas aria anan neir wobur ehah-uman. <sup>34</sup> Aria Jisas nakri, “Yain! Nyak mare nyusuwesh uwe eshudok yoweishi inahos eshesh shenekesh um eik iri aria nyukweshihesh-ukuk. Eshudok shenekesh um eik iri douk madae shudukemesh uwe.”

Aria amam soldia habirak satu\* um hanasia ananah rupeh.

---

\* <sup>23:34:</sup> Agudok baunag satu, agog douk eshesh Rom esheshih aih um shubirak shunek uhwin um eshudok eneshenesh um. Tlk Aposel 1:26

<sup>35</sup> Aria arpesh sheyotu shape shatrun aria eshesh Juda esheshim debeimi hape habubuniman. Aria hakri, "Anan douk nataurum kupaishi. Aria ta anan douk Krais douk Iruhin nagraehan nanakumori nunarao arpesh iri um, anan wata nataurum anan kanak."

<sup>36</sup> Aria amam soldia shopunek hanak hurukatin aria habubuniman aria hakon anabar nubutibari abar. <sup>37</sup> Aria hakripan hakri, "Aria adur nyak douk Juda esheshin king um, douk nyutaurum nyak kanak."

<sup>38</sup> Aria amam howem enen baraen aria hakih heshopen iruhw um rowog kruse Jisas neir um. Baraen enyudok,

#### ANUDOK ARMAN DOUK ESHESH JUDA ESHESHIN KING.

<sup>39</sup> Aria anan um amudok biom yoweimi armam douk heir wobuwobur iri, nabubunim Jisas nakri, "Nyak douk Krais, douk Iruhin nagraehan neshopoken nyanakumori nyunarao arpesh iri? Namudok um nyak nyutaurum nyak kanak aria nyutaurum ohwak shopunek!"

<sup>40</sup> Aria anudok anan neir wobur iri nahan nakri, "Apak ihishmorim douk meir otuhw maduhw. Apak douk shap um ta mugok iri atup. Aria nyak nyanogugur um Iruhin aka, uwok? <sup>41</sup> Ohwak douk wosik shaohw um ohwakish yoweishi inahos ohwak wenekeh iri. Aria anudok arman madae nunek enesh yoweishi inahos uwe, uwok."

<sup>42</sup> Aria anan nakrip Jisas nakri, "Jisas, nyak urkum mur um eik abudok nyutob nyak nyupe debeini um nyakish arpesh um."

<sup>43</sup> Aria Jisas nakripan nakri, "Adur eik yakripen. Doukih nyumnah nyak ta nyuni eik upe yopuburi wabur heven."

#### *Jisas Nagok*

(Matyu 27:45-56; Mak 15:33-41; Jon 19:28-30)

<sup>44</sup> Douk aun nakihi arigaha 12 kilok wah madae hutao uwe aria wab babuhi. Aria ihigunmorim um eshesh Juda esheshirub warub arukwtigun tituguk. Agagun arukwtigun nape namudok arigaha wabigep 3-kilok aria wah madae hatao aria arisigun. <sup>45</sup> Aria rupah<sup>†</sup> douk shahaur numun Iruhin ananit debeiti urupat iri puwaroh um biyeh. <sup>46</sup> Douk enyudok nyanakuk aria Jisas nahwar debeg nakri, "Yain, eik yeken ekin mishin nyor nyakis wis."

Douk nakriyuk namudok aria anan adur nagok.

<sup>47</sup> Aria anudok debeini soldia douk nasuhw merik um 100-poreim soldia iri natik namudok aria natuk Iruhin ananin nyeigur nyato iruhw. Aria nakri, "Adur atin. Anudok arman douk yopuni."

<sup>48</sup> Aria ihishmorim arpesh douk shanaki um shutik enyudok iri shatik namudok aria esheshiruh aparuh yoweruh abom um shabo Jisas nagok um. Aria eshesh shohrido shanak atin atin aria shanak um esheshirub warub.

<sup>49</sup> Aria sabaishi Jisas ananish um shani ono armago douk wagipeshi Jisas gani shokugi nahobig Galili wanaki iri, sheyotu madae rougun aria shape shatik enyudok douk shape sheneken um Jisas iri.

#### *Sharom Jisas Um*

(Matyu 27:57-61; Mak 15:42-47; Jon 19:38-42)

<sup>50</sup> Aria anan arman douk shahwaran um Josep iri nape. Anan douk yopini arman. Anan douk nanaki eshesh Juda esheshirub wabur shahwarabur um Arimatea iri. Aria anan douk anan kansol douk neir eshesh Juda esheshim debeimi iri. <sup>51</sup> Aria enyudok baraen amudok debeimi heyagwrehen um hakri hubo Jisas nugok um, anan douk madae nini amam nusuwen uwe. Anan nakri uwok. Aria anan apa nape natrugun um abudok nyutob um

<sup>†</sup> 23:45: Putik futnot nyape Matyu 27:51 iri.

arpesh shuwish um agundok Iruhin nupe Debeini um ananish arpesh um.  
**52** Aria anudok arman Josep nanak Pailat napeum aria narigan um nunak nabrei Jisas nunak nuruman.

**53** Aria douk Pailat nakri wosik aria anan nanak nabrei Jisas nabuhi atap aria neshrehan anah yopuhi shigorihwihi rupah. Aria nonohur nanak nawish onohw wonugwehw douk shenekoh onok borbuduk iri aria nawish nanabukuk agundok. Ahwudok wonugwehw douk madae shurom enen nyagok iri arpen uwe, uwok. **54** Aria ahudok nyumnah eshesh douk shape shenek gwinygwaen um eshudok. Ahudok nyumnah Sabat hurukatin um hutogur aria eshesh mour ta uwok, shupe meyoh.

**55** Aria armago douk wani Jisas shape iri Galili shanaki wagipesh Josep wanak aria watiguk ahwudok wonugwehw anan nanak nabukuk Jisas um. Aria shopunek watik agundok Jisas ananig barag aria aiyas shakus um.

**56** Aria owo watanam wanak um wabur wanak wagabe anan marasin nani yopuri wel reisik yopuri unar iri. Owo wenek redimar um wakri unak urayok Jisas ananihw yegenyihw. Douk wenek redi um eshudok um jurug aria ahudok nyumnah Sabat hatogur. Aria owo warao uhwin kabi douk Iruhin ananin lo nyakrium.

## 24

### *Jisas Wata Nakitak Nape (Matyu 28:1-10; Mak 16:1-8; Jon 20:1-10)*

**1** Aria sagomih nyumnah\* um wik, madae gamo gugruk uwe, oudok armago wasuhw arudok wel reisik yopuri unar iri douk nubokuhi weneke redimar iri wanak um ahwudok wonugwehw douk Josep narom Jisas um.

**2** Douk owo wanak watogur aria watik um amudok utom douk shagah wonugwehw Jisas nakus um douk matatigas manak makusuk anagas.

**3** Douk namudok aria owo wanak wawish. Douk wawish aria owo madae utik Debeini Jisas nukus numun uwe, uwok. **4** Aria owo weyotu namudok wape weneke urkwip. Aria ahudok atuh biom armam heneki hatrung abom iri rupeh iri hanaki heyotu agundok owo weyotu um. **5** Aria owo watik namudok aria owo wanogugur abom aria wourem watik atap. Aria amudok biom armam harigo hakri, “Ipak panaki paurim anudok douk wata nikitak nape iri agundok sharom shagok iri um maresh? **6** Agundok madae anan nukus uwe. Anan douk nikitak nape. Ipak punek urkwip um enyudok baraen douk nubokuhi wata nape Gafili aria nakripep-aguk um.

**7** Baraen douk enyudok, ‘Eik Anudok Arman douk yatogur adurin arpen iri ta shiyabige um henek yoweishi inahos iri armam husuwe hunek nyilume rowog kruse aria igok. Aria hukri um biyeh atih nyumneh um, eik ta wata ikitaki ipe.’”

**8** Douk amam hakripo namudok aria owo wata urkwip poramoguk enyudok baraen nubokuhi Jisas nakripeshuk um. **9** Aria owo wakutukuk wonugwehw hwape um aria wanak wakripuk ananim 11-poreim disaipel hani ihishmorim shapeik iri um enyudok ihinyumorim owo watrin iri.

**10** Aria armago douk wanak wakripuk amam aposel um enyudok owo watrin iri douk oudok. Maria, douk kwanaki wabur Makdala iri kwani Joana iri Jems ananik amakek douk shopunek kwonahwaram Maria iri. Oudok biwotuk wani ono armago shopunek. **11** Aria amam aposel hemnek aria hakri enyudok owo wakripam-enyi baraen douk rohwin shagugak iri sheyagwrehen iri. Namudok aria amam madae hunek bilipumo

\* **24:1:** Putik futnot nyape Matyu 28:1 iri.

uwe. <sup>12</sup> [Aria Pita nikitak nahur nanak um wonugwehw-igunum agundok wonugwehw hwape um. Anan nanak natogur aria nepebig natigu numun aria natigu ehudok shigorihwihi rupeh hakusuk. Aria anan wata natanan nanak um urupat aria nape nenek urkum nanak um enyudok nyatogur iri mugu.]

*Biom Armam Hatik Jisas Yah Douk Hanak Um Wabur Emeus Iri  
(Mak 16:12-13)*

<sup>13</sup> Aria ahudok atuh nyumnah, biom hanakum anabur wabur nyeiguriburu rum Emeus. Rougun um agundok shupe Jerusalem shunak um Emeus um douk hurukatin um 11 kilomita. <sup>14</sup> Douk amam hanak aria hape haneyagwreh hanakum enyudok ihinyumorim mugu douk nyatogur iri. <sup>15</sup> Amam haneyagwreh aria shopunek henek urkum hape hanarigum hanak. Aria Jisas anan kanak nanaki hurukatin aria nani amam hanak atin. <sup>16</sup> Aria amam hatrun aria amam madae hudukeman hukri anan douk Jisas uwe, uwok.

<sup>17</sup> Aria anan narigam nakri, “Ipak pape panaki aria pape peyagwreh um maresh?”

Douk anan narigam namudok aria amam heytu abom. Aria amamiruh aparuh yoweruh abom aria amamigos yamagos sotohiyah.

<sup>18</sup> Aria anan shahwaran um Kliopas iri narigan nakri, “Sabaishi ku-pairubi warubish douk shanaki shape Jerusalem iri shadukemesh um enyudok douk nubokuhiyeh nyumnah nyatogur Jerusalem iri. Aria douk ta nyak atin nyape Jerusalem iri madae nyudukem enyudok mugu douk nubokuhiyehi nyatogur iri uwe?”

<sup>19</sup> Aria Jisas narigan nakri, “Maresh shatogur?”

Aria amam hakripan hakri, “Enyudok sheneken um Jisas douk nanaki wabur Nasaret iri. Anudok Jisas anan douk anan profet. Aria ihishmorim arpesh shani Iruhin shatrun um, anan douk dodogowin atunari arman abom. Anan apa nenek Iruhin atun neneken iri mour. Aria anan dodogowin atun nakripesh yopinyi atin baraen. <sup>20</sup> Aria apakim debeimi pris hani amudok anam apakin debeimi um apakin kansol iri hekeshan nor gavman esheshis wis aria amam debeimi um gavman iri habo baraen um hon nugok. Aria anan douk henek nyiluman rowog kruse aria han nagok. <sup>21</sup> Aria apak douk munek bilip makri arman douk Iruhin nagrahehan neshopokan nanakumori nukweshih apak Israel um mupe wosik iri douk ta anan. Aria baraen douk madae enyudok atin uwe, uwok. Enyudok douk nyatogur nubokuhiyeh nyumnah. Aria doukih douk henek biyeh atih um. <sup>22-23</sup> Aria iganigadae ono armago douk wani apak masuhw ananin baraen magipeshen iri wenekop makitak yowiyokuk agundok ruhur atin wanak um wonugwehw hwape um aria madae utrun nukus numun wonugwehw um uwe. Aria owo wata watanamori aria wakripap wakri owo adur watik enesh enselahos aria shakripo iri shakri Jisas ta nikitak nape.

<sup>24</sup> “Aria anam apakim armam hakitak hanakum wonugwehw hwape um aria hatik um oudok armago wakrienyi baraen douk adurin. Aria namudok atin, amam shopunek madae hutrun nukus uwe, uwok.”

<sup>25</sup> Aria Jisas nakripam nakri, “Ipak atin urkwip madae enep pupenyep uwe. Ipak baragos seshuk aria ipakip urkwip madae arigas purum enyudok ihinyumorim baraen douk seiwok amam profet hakriyenuk iri aria punek bilipumen pukri adurin uwe. <sup>26</sup> Ipak ta padukemesh aka, uwok? Krais douk Iruhin nagrahehan neshopokan nanakumori nunarao arpesh iri ta shon nurao debeiri eriger nugok iyoh aria Iruhin douk ta nutuk ananin nyeigur nyuto iruhw.”

**27** Aria Jisas nananubur neyagwreh Moses nyenyemaguk nyetem Iruhin ananik Buk iri baraen nape nakripam arigaha neyaten aria nakripam um ihim-morim profet henyemaguk iri. Anan nape naworumom baugos um hidukemesh um enyudok ihinyumorim baraen nyetem Iruhin ananik buk iri douk nyakrium anan kanak.

**28** Aria douk nakripam nanak aria hurukatin um hunak hutogur abrudok wabur douk amam hakri hunakbur iri, aria anan neneh rohw abom aria nagim yah nanak. **29** Aria amam dodogowim hasuweshan um nini amam hupe aria hakripam hakri, “Nyak yowi nyuni apak mupe agundok. Aun douk hurukatin um nubuhuk aria hurukatin um wab.”

Aria anan nanak nawish nani amam hape.

**30** Douk hape aria amam hapeum hakri huwok worigun aria anan nikitak nani amam hape herharih tebol. Aria nohur bret neneh beten neneh tenkyu um Iruhin aria naworut nako amam. **31** Aria abudok nyutob amam hatrun aria wata hadukeman. Aria anan brukwaranuk aria amam madae hutrun uwe.

**32** Aria amam hanakripam hakri, “Iganigadae magim yah manakumori anan douk nakripohw iri baraen nyetem Iruhin ananik buk iri. Aria anan douk naworamohw baugenjum baraen abom. Aria abudok nyutob ohwakish mishish douk sheytuooh abom aria ohwak wanadudareh.”

**33** Douk amam haneyagwreh namudok abom um jurug aria abudok nyutob amam wata hakitak hatanam hanakum Jerusalem. Amam hanak hatogur aria haperug amudok 11-poreim disaipel hani eshudok enesh shagipesh Jisas iri shantorum shape. **34** Aria eshesh shakripam shakri, “Adur atin. Debeini wata nikitak. Anan douk natogurum Saimon aria natrun.”

**35** Aria amam biom shopunek, hakripesh um enyudok nyatogur-umam yah iri nyani agundok anan nawor bret nakomat aria amam douk hatrun yamag hadukeman um.

### *Jisas Natogurum Ananim Disaipel Hatrun (Matyu 28:16-20; Mak 16:14-18; Jon 20:19-23)*

**36** [Aria douk amam wata hape hakripesh enyudok baraen atin aria ahudok atuh Jisas anan kanak natogur meyoh aria neyotu agundok eshesh shapeum. Aria nakripesh nakri, “Eik yakri Iruhin nunekep ipakiruh aparuh hur wosik.”]

**37** Aria eshesh shakitak yowiyokuk aria shanogugur abom. Um maresh? Eshesh shenek urkwip shakri eshesh ta shatik anan yoweini sagaben.

**38** Aria anan narigesh nakri, “Ipak panogugur aria pakitak yowiyokuk um maresh? Aria ipak por biyep urkwip um maresh? **39** Tiki eikigas aiyas aria roguh. Enyudok douk eik kanak Jisas. Ipak punaki pusuwe ipakis wis aria pishakome aria ipak ta pudukemesh. Sagabehos busiguh aria eibug madae enesh shupenyesh uwe. Aria eik douk patrue eibug aria busiguh shapeye.”

**40** Douk anan nakri enyudok aria neyabig ananis wis aria aiyas. **41** Aria eshesh shatrun aria shanadudareh aria shopunek, eshesh shakitak yowiyokuk. Aria eshesh madae shunek bilip abom shukri anan douk Jisas uwe, uwok.

Douk namudok aria anan narigesh nakri, “Ipak pabuk anagun worigun agundok aka, uwok?” **42** Aria eshesh shohuri anap wobrap iri arbup shakonap. **43** Aria anan natrishop aria napoh esheshis nabes.

**44** Aria anan nakripesh nakri, “Riguk eik wata yani ipak mape aria yakripepuh yakri, ihinyumorim baraen douk henyem Iruhin ananik Buk nyakrium eik iri ta nyutogur adurin atin. Enyudok baraen enen douk nyape

Moses nenyemaguk iri Iruhin ananin lo. Aria enen nyape amam profet nenyemaguk iri, aria enen nyape buk shahwarok um Sam iri.”

<sup>45</sup> Aria anan nutaurumesh nohur esheship urkwip um shudukemesh wosik baugenymu baraen nyetem Iruhin ananik Buk iri. <sup>46</sup> Aria nakripesch, nakri, “Baraen nyetem Iruhin ananik Buk iri douk nyakri Krais douk Iruhin nagraehan neshopokan nanakumori nunarao arpesh iri ta numnek debeiri eriger aria shon nugok. Aria douk hukri um biyeh atih nyumneh um, anan ta wata nukitak nupe. <sup>47</sup> Aria um Jisas ananin nyeigur, eshesh ta shukitak um mour Jerusalem shupe shukripesch yopinyi baraen ihih arpesh arigaha shiyatak ihis awirosish arpesh shape agundok atap iri. Eshesh ta shukripesch um Jisas ananin nyeigur um shukeshuk agabus yoweishi inahos aria shatanam shukon aparuh Iruhin aria anan ta nukwesih esheskish yoweishi inahos. <sup>48</sup> Aria ipak ta pukripesch baraen um eshudok douk patrish shatogur iri. <sup>49</sup> Aria ipak mnek. Enyudok douk seiwok eikin Yain nakri adurin atin baraan um ta nukepen iri douk enyudok ta douk ishopoken nyubuhi nyuwishep. Aria ipak pupe agundok Jerusalem arigaha purau enyudok dodog nyanaki iruhw heven iri nyubuhi nyuwishep dodogowip iyoh.”

*Iruhin Wata Narao Jisas Natoum Iruhw Heven  
(Mak 16:19-20; Aposel 1:9-12)*

<sup>50</sup> Aria anan naraesh shakutukuk Jerusalem shanak arigaha shatogur wabur Betani. Douk shanak shatogur aria anan nohur roguhw nakripesch yopinyi baraen um Iruhin nunekumesh yopinyi. <sup>51</sup> Aria douk anan wata nape nakripesch atin aria Iruhin wata naran nakutishuk natoum iruhw heven. <sup>52</sup> Aria eshesh sheyotu shenek lotuman agundok um jurug aria wata shatanam shanak um Jerusalem. Aria eshesh shanadudareh shariguk. <sup>53</sup> Aria shapeum shatuk Iruhin ananin nyeigur nyato iruhw namudok atin gani numun Iruhin ananit debeiti urupat.

## Iruhin Ananin Yopinyi Baraen Jon Nenyem Iri Banenyi Baraen um Jon

- 1:1-18 Jisas Krais kupainyi nyeigur Baraen nyatogur arpen  
 1:19-51 Jon neneb baptaisumesh iri nakripesch baraen um Jisas nanakumori. Aria Jisas narik nanak nahwar ananim 4-poreim disaipel  
 2:1-12:50 Jisas nakripesch Iruhin ananin baraen aria neneb 7-porein Iruhin atun neneken iri mour sabaishi shatrin  
 13:1-19:42 Jisas nanak Jerusalem nakripesch Iruhin ananin baraen aria esheshe shenek kwotuman aria shenek nyiliman rowog kruse aria nagok  
 20:1-31 Jisas ta nakitak um shagok um aria natogurum ananish disaipel shatrun  
 21:1-25 Jisas nanak shokugi nahobig Galili aria natogurum ananim 7-poreim disaipel hatrun

*Jisas Krais Anan Douk Amu Baugos Abom Um Agundok Shupe Aria Mare Ta Shugok Um*

<sup>1</sup> Seiwoh Iruhin watak neneb agudok nahobig uwe aria anudok arman shahwaran um Baraen iri douk nape. Nani Iruhin hape. Aria anan douk adur atin Iruhin. <sup>2</sup> Seiwoh baugos um shanarubur shanakwaram um, anan nani Iruhin hape. <sup>3</sup> Iruhin madae neneb enen enyudok anan atun uwe, uwok meyoh. Iruhin nakwu anudok arman Baraen neneb eshudok ihishmorim eneshenesh. <sup>4</sup> Anan douk adur atin baugos um agundok arpesh shupe abom aria mare shugok um. Shopunek anan douk kabi anat lait tagruk iri tadukogun aria ihishmorim arpesh shanotrugun um. <sup>5</sup> Atudok lait douk tadukemesh um tagruki tudukogun agundok arukwtigun um. Aria arukwtigun ko nubirak um nubuwehat aria ta amu uwok.

<sup>6</sup> Iruhin neshopok anan narauri ananin baraen iri arman nanaki. Aria ananin nyeigur douk Jon. <sup>7</sup> Anan douk nanamori nukrip arpesh um atudok lait. Umum ihishmorim shumnek nakripesch-enyi baraen aria shusuhw anudok arman nape kabi lait morim um ananin baraen dodog aria shugipeshen. <sup>8</sup> Anan Jon douk madae atudok lait uwe, uwok. Aria Jon douk nanamori nukripesch baraen um anudok arman nape kabi lait morim um. <sup>9</sup> Anudok arman douk nape kabi adur atin tagruk iri lait morim douk nanamorim atap agudok nahobig um nutaurum ihish arpesh ta shudukem Iruhin iri.

<sup>10</sup> Seiwoh Iruhin nakwu anudok arman Baraen neneb atap agudok nahobig aria douk napenyog. Aria eshudok atapishi arpesh um agudok nahobig douk madae shutrun aria shudukem anan uwe, uwok. <sup>11</sup> Aria anan adur atin nanamorim ananibur shokuburi wabur. Aria ananish arpesh douk shakonaguk agabus aria shakri uwok um anan. <sup>12</sup> Aria enesh douk shemnekan aria shasuhw ananin baraen dodog shagipeshen. Namudok aria esheshe douk nekesh debeishi nyeiguhw um shubuh ananig nuwag aria nagraehesh um shutogur Iruhin ananish batowish. <sup>13</sup> Aria esheshe madae shutogur Iruhin ananish batowish meyoh um amakenyish esheshis nyomas uwe, uwok. Aka um esheshe kanak shutogur shupe meyoh aka, enesh shukripesch aria anob nyutob ko shutogur Iruhin ananish batowish uwe, uwok. Iruhin anan kanak nagraehesh aria shatogur ananish batowish.

<sup>14</sup> Anudok arman shahwaranum Baraen iri douk narao arpenyihw yegenyihw aria nanaki nani apak mape. Apak douk matik um agundok anan dodogowin atun abom um, aria ananin nyeigur nyato gani iruhw um. Iruhin anan douk atun arag nuganin meyoh aria douk natauruman nenekan natogur dodogowin, aria nyeigur nyato iruhw aria neshopokan nanaki. Ahudoki aih um shenek gihauum arpesh shutaurumesh meyoh abom um hani sheyagwreh adurin atin baraen um douk nyape um anan.

<sup>15</sup> Aria Jon douk nakripesh um anudok arman iri. Nakripesh namudok nakri, "Arman nubo riguk yakripepuman iri douk anudok. Douk yakripep namudok. Yakri, 'Anudok arman nugimori eik iri anan douk debeini abom um eik. Aria eik shokuwe iri meyoh. Umum maresh? Eik watak shiyubuki uwe aria anan douk seiwok nape.' "

<sup>16</sup> Anan douk apa nataurum apak meyoh ihih nyumneh abom iri. Aria ihih nyumneh anan douk napeum nenebumop yophi aih um apak sabaihi arpesh. <sup>17</sup> Seiwoh Iruhin douk nakonari lo Moses nanaki nakripeshen. Aria Iruhin neshopok Jisas Krais nanaki narauri Iruhin ananin gih aria nataurumap meyoh aria nakripap adurin atinyi baraen. <sup>18</sup> Aria seiwoh madae enen atin arpen nyutik Iruhin uwe amu uwok meyoh. Aria anudok ananin Nuganin douk adur atin nape huruk um ananin Yaken iri, anan atun douk natik Iruhin. Natrun aria douk nakripapuman. Namudok aria apak madukeman.

*Jon Neneh Baptaisumesh Iri Nakripesh Yopinyi Baraen  
(Matyu 3:1-12; Mak 1:7-8; Luk 3:15-17)*

<sup>19</sup> Eshesh Juda esheshim debeimi heshopok anam pris hani anam um apudok awirop Livai hakutukuk Jerusalem aria hanak hatik Jon. Hanak aria harigan hakri, "Nyak amiapen?" <sup>20</sup> Jon nemnek aria madae nukrium nubeshuk-umam bareaen aria ta mare nukripam uwe, uwok. Aria adur atin nowereh-umam bareaen. Aria anan nakripam-enyi bareaen douk enyudok. Anan nakri namudok, "Eik madae Krais uwe, uwok, anudok douk Iruhin nakri um ba nagraehan aria neshopokan nanamori nurao arpesh iri uwe, uwok."

<sup>21</sup> Aria harigan hakri, "Namudok aria nyak douk meinyari? Nyak Ilaija aka?" Aria nakripam nakri, "Eik douk madae Ilaija uwe, uwok." Aria ta harigan hakri, "Nyak douk atin anudok profet douk mape matrugun-umen um ta nyutograri iri aka, uwok?" Aria anan nakripam nakri, "Uwok".

<sup>22</sup> Namudok aria harigan hakri, "Namudok aria kripap. Nyak douk amiapen? Umum maresh? Apak ta musuhw enen bareaen mutanam um mukrip amudok debeimi douk heshopokap ba manamori marigen iri. Kripap, nyak nyakri nyak douk adur atin meinari arman?" <sup>23</sup> Aria Jon nakripam nakri, "Eik anudok arman douk seiwoh profet Aisaia nenyemaguk iri bareaen nakriyanari. Aria bareaen enyudok,

'Enen arpen nyape nyohwar gani wehigunum arpesh uwok um iri nyakri, "Gapesh yah hupe yopuh um Debeini nigimah nanaki um." '

<sup>24</sup> Amudok armam douk hanaki harig Jon enyudok bareaen iri douk amam Farisi heshopokam hanaki harigan. <sup>25</sup> Aria harigan hakri, "Nyak douk nyakri nyak madae Krais uwe uwok aka, Ilaija aka, anudok debeini profet uwe, uwok. Namudok aria amiapen nyakripen ba nyenek baptaisum arpesh?"

<sup>26</sup> Aria Jon ta nakripam nakri, "Eik yenek baptaisumesh abar meyoh. Aria agundok douk atin anan arman douk nani ipak peyotu. Aria ipak madae pudukeman uwe, uwok. <sup>27</sup> Anan douk nagimori eik iri. Aria eik douk madae yopuwe iri um ikweshihuman madururuh um ananiyu

su uwe, uwok.” <sup>28</sup> Jon douk neyagwreh enyudok baraen wabur Betani. Ababur douk bape gani wobrehahibum worub Jodan douk anan nepe nenek baptaisumesh um.

### *Jisas Anan Douk Kabi Iruhin Ananin Nugaen Sipsip Um*

<sup>29</sup> Gagruk ruwahepih aria Jon natik Jisas nanaki um nutrun. Aria Jon nakripesh nakri, “Putik anudok arman. Anan douk kabi Iruhin ananin Nagaen Sipsip um. Anan douk nanamori nukweshih yoweishi inahos um apak ihishmorim mape menekesh agudok atapig nahobig iri aria Iruhin nukweshihesh. <sup>30</sup> Arman anudok douk yakripepuman iri. Douk yakripepuman yakri, ‘Anan nagimori eik iri arman douk adur atin debeini. Eik uwok, shokuwe iri meyoh. Umum maresh, eik douk watak shiyobuki uwe aria anan douk seiwok narik nape. <sup>31</sup> Eik kanak douk madae idukemesh um anan adur atin douk anudok Iruhin nagraehan iri meinari arman um uwe, uwok. Aria eik douk yanaki yenek baptaisumesh um abar aria natogur yopugunum aria ipak Israel ta ko putrun pudukeman.’”

<sup>32</sup> Aria Jon nakripesh enyudok baraaen um shuduken Jisas um. Nakripesh nakri, “Eik yatik Iruhin ananin Mishin nyabuhi iruhw heven kabi arudok armir manyun um nyabuhi nyape Jisas. <sup>33</sup> Eik kanak douk madae idukemesh um arman douk Iruhin nagraehan aria neshopokan nanaki iri douk anan um uwe, uwok. Aria Iruhin douk neshopok eik yanamori inek baptaisumesh aria nakripe nakri, ‘Ko nyutik eikin Mishin nyabuhi nyupe anan arman aria nyuwishan. Aria anudok arman douk ko nekesh eikin Mishin nyuwish sabaishi arpesh aria nyupeyesh.’ <sup>34</sup> Eik douk yatik enyudok mugu nyatogur aria douk yakripep. Anan douk adur atin abom um Iruhin ananin nuganin.”

### *Jisas Narao 4-Poreim Harik Iri Disaipel*

<sup>35</sup> Gagruk ruwahepih aria Jon nani biom ananim disaipel heyotu worub Jodan. <sup>36</sup> Heyotu aria Jon natik um Jisas nanakmorim neshagrakuk amam nanak. Aria nakri, “Ipak putik anudok arman. Anan douk Iruhin ananin Nagaen Sipsip.”

<sup>37</sup> Douk ananim biom disaipel hemnekan nakri namudok aria heir Jisas hanak. <sup>38</sup> Jisas natanan natrum um hagiman hanak aria narigam nakri, “Ipak paurim maresh?” Aria amam harig anan hakri, “Rabai, nyak nyape agnum?” Muwanam enyudok baraaen Rabai um, douk nyakri Debeini Tisa. <sup>39</sup> Aria nakripam nakri, “Yowi puname munak aria putik agundok eik yapeum.” Aria hanaman hanak hatik agundok napeum. Hatrugen aria hani anan hape agundok ahudok nyumnah. Umum maresh? Nyumnah douk hatogur 4-klok wabigep.

<sup>40</sup> Amudok biom douk hemnek Jon aria hagipesh Jisas hanak iri, anan douk Andru. Anan douk Saimon Pita ananin wanin. <sup>41</sup> Aria Andru nanak arigas atin naurim ananin ashuken Saimon. Nanak naparugan natrun aria nakripam nakri, “Apak iganigade maparug aria matik Mesaia.” Muwanam enyudok baraaen um, douk nyakri Krais anudok douk Iruhin nagraehan aria neshopokan nanamori nunaraao arpesh iri.

<sup>42</sup> Aria Andru narao Saimon um Jisas aria nakri, “Nyak Saimon. Nyak douk Jon ananin nuganin. Kweipon aria douk ko ta shuhwarenyum Sifas.” Baugenyum baraeiyum eshudok nyeiguhw Sifas aria Pita douk shakri atin baraaen. Shakri utom.

### *Jisas Nahwar Filip Nani Nataniel*

<sup>43</sup> Aria gagruk ruwahepih Jisas nakri um nanam agudok shokugi nahobig Galili. Nanak aria naparug Filip aria nakripam nakri, “Yowi nyugipesh eik.”

<sup>44</sup> Filip nani Andru aria Pita douk hanaki atubur wabur Betsaida. <sup>45</sup> Douk Filip nanak naparug Nataniel aria nakripan nakri, “Anudok arman douk Moses nowem Iruhin ananin bareaen okwudok lo nyetemok iri buk nyani enyudok enen amam profet henyemoguk aria hakriyuk um ko nunaki iri douk maparugon. Anan douk Josep ananin nugarin shahwaran um Jisas iri. Anan douk nanaki wabur Nasaret iri.”

<sup>46</sup> Aria Nataniel narig Filip nakri, “Nyak douk adur atin nyakri wosik um enesh yopishi eshudok ko shutogur aburdok wabur Nasaret aka uwok?” Aria Filip nakripan nakri, “Namudok aria, yowi unak aria ba nyutrun.”

<sup>47</sup> Douk Jisas natik Nataniel nanaki um nutrung, aria neyagwreh enen bareaen um anan nakri, “Anudok arman nape Israel iri, anan douk anan um yopunari arman. Nyunogiagigi bareaen douk madae niyagwrehen iri uwe, uwok.” <sup>48</sup> Aria Nataniel narig Jisas nakri, “Nyak nyadukeme mumam?”

Aria Jisas nakripan nakri, “Filip watak nunaku nuhwaren uwe, aria eik douk yatrin nyape shukamenyum rowog fik.” <sup>49</sup> Aria Nataniel nakri, “Debeini Tisa, nyak douk Iruhin ananin Nuganin. Aria adur atin apak Israel apakin king.” <sup>50</sup> Aria Jisas watak apa nakrip Nataniel nakri, “Nyak nyenek bilip um eik, um maresh douk agundok douk yakripenyum yatrin nyape shukamenyum rowog um, aka? Yakripen, eneh nyumneh ta nyutik enenyenen Iruhin atun neneken iri mour. Eik ta ineken nyenek uhwinyum enyudoki iri mour.” <sup>51</sup> Aria Jisas ta nakripam nakri, “Adur atin yakripep. Eneh nyumneh ipak ta putik utag tukurog gunak giyotukuk tukwotukwan aria ta putik iruhw heven. Aria ta putik Iruhin ananish enselahos shenek to buh shunamorim Eik douk Anudok Arman yatogur adurinti arpen iri.”

## 2

### *Biyesh Shanaraum Aria Sheneke Worigun Wabur Shuhwarabur Um Kana*

<sup>1</sup> Biyeh nyumneh hanak hatuhuk aria hakri biyeh atuh um, aria biyesh arpesh shunaraum abrudok wabur Kana. Abrudok wabur Kana douk bape agudok shokugi nahobig Galili. Aria Jisas ananik amakek douk shopunek kwanak kwatrish. <sup>2</sup> Aria Jisas nani apak ananik disaipel douk shopunek shohwarop aria monak matrish um agundok eshudok biyesh arpesh shunaraumoguni worigun. <sup>3</sup> Douk arigaha shawok wainibar abar sheyatabar aria Jisas ananik amakek kwakrip Jisas namudok, “Wainibar abar douk shabroh sheyatabar” <sup>4</sup> Aria Jisas nakripok namudok, “Nya, nyak yopukwi armatok mare nyukrip eik um inek enesh eshudok uwe, uwok. Eikib nyutob um inek enyudokmorim mour um douk watak bunaki uwe, uwok.”

<sup>5</sup> Aria ananik amakek kwakrip eshudok douk shenek mour um worigun iri namudok, “Anan nukripep um penek maresh um, aria ipak ko penekesh.”

<sup>6</sup> Atudok urupat douk shobuk 6-poreis debeisi utaboris marus sakus. Shosubuk sakus um shereiri abar bor aria eshesha Juda shugipes eneh eshesihil aih aria shishrokoh um. Asudok marus atup atup eshesha ta shushar sabaibari abar um 100 lita bubuh buros.

<sup>7</sup> Aria Jisas nakrip eshudok douk shenek mour iri namudok, “Pishar abar asudok marus.” Nakripesha aria shereiri abar shourakabar babuh marus arigaha shunukis atus.

<sup>8</sup> Aria nakripesha namudok, “Arigah pugi anabar purabar punak um debeini um agundok worigun iri.” Namudok aria shagi anabar sharabar shanaman. <sup>9</sup> Sharabar aria nokwiraehabar aria abrudok abar douk Jisas nenekebar batogor wainibar jurug. Aria anan douk madae nudukemesh

uwe um abrudok wainibar abar banaki meigunum iri uwe, uwok. Aria eshudok douk shenek mour iri sharao anabar shanak shokonabar iri douk shadukemesh. Namudok aria debeini um agundok worigun iri nohwari anudok narao armatok iri nanaki. <sup>10</sup> Aria nakripan namudok, "Ihim armam henek worigun um henekesh namudok, sagomatin amam hurik hurauri yopuni wain aria shunoh ba iyoh. Aria anudok anan madae yopuni iri uwe amam ko hugiguk hurani aria shunoh. Aria nyak douk nyobukuk adurini yopuni wain nakusuk arigaha namukadae atin nyonuhuri aria shanoh."

<sup>11</sup> Aria enyudok douk dodogowinyi nyarik iri Iruhin atun neneken iri mour douk Jisas neneken iri. Neneken um niyabig Iruhin ananin debeinyi dodogowinyi dodog. Anan neneken abrudok wabur Kana bape um agudok shokugi nahobig Galili iri. Aria apak ananim disaipel matrin menek bilip makri anan douk adur atin Iruhin ananin nunganir.

<sup>12</sup> Douk shenek enyudok um jurug aria Jisas nabuhum Kaperneam. Nani ananik amakek kwani ananim owarhim aria apak ananim disaipel. Mabuh aria mape eneh nyumneh nagundok.

*Jisas Nawish Iruhin Ananit Debeiti Urupat Aria Nehiyah Shenek Bisnis Iri (Matyu 21:12-13; Mak 11:15-17; Luk 19:45-46)*

<sup>13</sup> Nyutob hurukatin um eshesha Juda ko shenek agundok debeiguni Pasovaigun worigun um nutogur. Aria Jisas natoum Jerusalem. <sup>14</sup> Nato aria nanak nawish numun aburdok nabur Iruhin ananit debeiti urupat tataoum aria natik armam hape henek bisnis hanokom um kauhos shan sipsipahos aria armiguhw douk hwape kabi douk maishub um. Aria shopunek natik armam hape herharih tebolhos aria henek bisnis harao kupairubi worubish esheshibor utabor aria hekesh kupairobi utabor. <sup>15</sup> Natik namudok aria nohur anaruh madururuh neréharuh hatogur kabi douk anat margit um aria nakwu atudok margit nape nehiyah sabaimi armam hani sipsipahos aria kauhos shatogrrukuk aduk um agundok Iruhin ananit debeiti urupat tataoum. Nabadig-umam tebolhos amudok henek bisnis harao kupairubi warubish esheshibor utabor aria hekesh kupairobi utabor iri aria utabor prakarubor banakuk atum atumuk. <sup>16</sup> Aria nakrip amudok henek bisnis um armiguhw iri namudok, "Puhur ipakiguh armiguhw ba kare punak! Ipak douk mare penek eikin Yain ananit urupat tutogur um kabi douk anat maketit urupat um uwe, uwok."

<sup>17</sup> Aria apak ananim disaipel urkwip ta porum enen baraen nyetem Iruhin ananik Buk iri. Aria baraen douk nyakri namudok, "Eikim urkum adur atin makri munawasham um nyakit urupat, kabi nyih hanuwe um. Namudok aria eik yenek mour dodog yagapesh atudok urupat tupe wosik atin."

<sup>18</sup> Eshesh Juda esheshim debeimi hatik enyudok aria hakripan debeg hakri namudok, "Nyak ta nyenek enen maren kak um Iruhin atun neneken iri mour ba apak mutrin aria mudukemesh mukri nyak douk adur atin Iruhin neken big aria nyanaki nyenek enyudok agundok numun ananit urupat."

<sup>19</sup> Jisas nemnek aria ta nakripam nakri namudok, "Ipak pudigur atudok Iruhin ananit debeiti urupat tubuh tukus atap, aria um bihatuh nyumneh aria eik ta ituhur tiyotu iruhw."

<sup>20</sup> Aria amam ta hakri namudok, "Um 40-poreish kwarahos apakishi sharok atudok Iruhin ananit debeiti urupat, aria nyak nyakana ta nyurukat um bihatuh nyumneh atih aka?"

<sup>21</sup> Aria douk Iruhin ananit debeiti urupat anan nakriyat iri, anan douk makri anan kanak ananihw yegenyihw. <sup>22</sup> Namudok aria abudok nyutob

shan nagok aria Iruhin ta nonuhuri wonugwehw um batogur, aria apak ananim disaipel urkwip ko porum enyudok bараen nubokadae riguk anan nakriyenek iri. Aria douk, menek bilip makri Jisas neyagwrehen iri bараen nyani enyudok nyetem Iruhin ananik Buk iri douk adurin atin.

### *Jisas Douk Nadukemesh Um Ihish Arpesh Esheshih Aih*

<sup>23</sup> Ehudok nyumneh douk shenek agundok Pasovaigun worigun ehi, Jisas douk nape Jerusalem. Nape aria nenek sabainyi Iruhin atun neneken iri mour douk arpesh шатрин aria sabaishi шасуhw ananin bараen shagipeshen. <sup>24</sup> Douk Jisas natrish namudok um agundok шасуhw ananin bараen dodog um aria madae nubo urkum nenek bilip um eshesh douk shenek bilip aria шасуhw ananin bараen um uwe, uwok. Umum maresh? Anan douk nadukemesh um ihish arpesh esheship urkwip por ahi aih.

<sup>25</sup> Douk madae enen arpen ta nyukuna nyukrip Jisas um arpesh shape shenek ahi aih uwe, uwok. Anan nadukemesh um ihish arpesh esheshish urkum apahw shape ahi aih.

## 3

### *Jisas Nani Nikodemus Heyagwreh Bараen*

<sup>1</sup> Anan arman shahwaran um Nikodemus iri douk nape. Anan douk anan Farisi aria anan debeini um Juda esheshin kaunsol. <sup>2</sup> Anab wab, anudok arman Nikodemus nanak natik Jisas aria nakripan nakri namudok, “Debeini Tisa, apak madukemesh um nyak douk anan tisa douk Iruhin nakripen um nyanaki nyenek skulum apak um ananin bараen iri. Aria enyudok Iruhin atun neneken iri mour douk nyak nyape nyeneken iri, apak madae enen arpen ta wosik nyeneken uwe, uwok. Umum maresh? Iruhin douk nini enen arpen shupe um, aria enyudok arpen ko nyenek enyudoki mour.”

<sup>3</sup> Aria Jisas ta nakripan nakri namudok, “Adur atin yakripen, douk enen arpen mare ta nyutogur namunyi um, enyen ko mare nyuwish abrudok wabur Iruhin nape Debeini um ananish arpesh shapeum uwe, uwok.” <sup>4</sup> Aria Nikodemus ta narigan nakri namudok, “Enen ruwehenyi arpen douk ta nyutogur enen moduhwuraen batowin mumam? Aria enyen wosik douk ko ta nyuwish enyenyik amakekwibur nyibur aria ta kunyubuki anah shopunek aria nyutogur kabi douk enen moduhwuraen batowin um, aka uwok?”

<sup>5</sup> Aria Jisas ta nakri namudok, “Adur atin yakripen. Douk arpesh ta mare shutogur namushi um agundok shenek baptaisum abar iri aria shurao Iruhin ananin Mishin nyunekesh shutogur namushi um, aria eshesh ta mare shuwish abrudok wabur Iruhin nape Debeini um ananish arpesh shapeum uwe, uwok. <sup>6</sup> Arpesh douk shabuki batowish iri eshudok douk adur shatogur arpesh. Aria arpesh douk Iruhin ananin Mishin nyuwish nyapeyesh iri, eshesh douk adur atin shatogur Iruhin ananish batowish. <sup>7</sup> Aria ipak mare pukitak yowiyokuk um enyudok bараen eik yakrienyi um, ‘Douk ipak ta putogur namushi um.’ <sup>8</sup> Aria uhwin nyahur um enyen kanak enyenyih yah aria nyanam kupa-kupaignum. Nyak nyumnek enyenyin sirisoro nyunak um, aria nyak madae nyudukemesh um enyen nyanaki agunum aria enyen nyunak agunum. Aria ihish arpesh douk Iruhin anin Mishin nyunekesh shatogur namushi iri douk namudok atin.”

<sup>9</sup> Aria Nikodemus ta narig Jisas namudok, “Enyudok mugu nyak nyakrienyi ta nyutogur mumam?” <sup>10</sup> Aria Jisas nakripan nakri namudok, “Umum maresh ba nyak nyarig eik namudok? Nyak douk anan um eshesh Israel esheshin tisa, aria enyudok eik yakrienyi bараen nyak madae

nyudukemen uwe aka? <sup>11</sup> Adur atin yakripen. Apak douk meyagwreh um eshudok madukemesh iri aria makritep baraan um eshudok matrish iri. Aria ipak douk pakenyuk agabus enyudok apakin baraan. <sup>12</sup> Eik yakripen baraan um eshudok shatogur agudok atapig nahobig iri aria ipak douk madae penek bilip um eikin baraan uwe, uwok. Namudok aria ta ikri um ikitep um iruhw hevenish eshudok akure, ipak douk ta mare pusuhw eikin baraan pukri adurin uwe, uwok. <sup>13</sup> Aria douk madae enen arpen nyuto um iruhw heven uwe, uwok. Aria douk Eik Anudok Arman yatogur adurinyi arpen iri eik atuwe yakutukuk iruhw heven aria yabuhi agudok nahobig. <sup>14</sup> Seiwok Moses nahao enen rowog agundok wehigunum douk arpesh uwok um. Aria nowaur anar yur douk nenekor brasin ain iri rataur. Aria douk ta namudok atin. Eik Anudok Arman douk yatogur adurin arpen iri ko shutuke shiyaur itaur enen rowog. <sup>15</sup> Umum ihishmorim arpesh douk shusuhw eikin baraan shigipeshen iri, eshesh douk ko shupe wosik abom iihih nyumneh. <sup>16</sup> Iruhin anan douk atun arag Nuganin moyoh nape. Aria Iruhin nakri nanawasham abom ihish arpesh um agudok nahobig, namudok aria anan neshopoki anudok atun nuganin um eshesh. Aria eshesh shusuhw ananin baraan dodog aria eshesh ta mare shunak shuwishuk uwe, uwok. Aria ko shupe wosik abom iihih nyumneh. <sup>17</sup> Iruhin madae neshopok ananin Nuganin nunamori agudok atapig nahobig um nunemesh baraan arpesh kabi douk anan jas um uwe, uwok. Aria anan douk neshopokan nanamori nurao ihish arpesh shutanamori shupe wosik atin. <sup>18</sup> Eshudok douk shusuhw ananin baraan shugipeshen iri, Iruhin ko mare nunekumesh baraan aria nukri um eshesh ko shunak um debeihi nyih, uwok. Aria eshudok douk madae shusuhw ananin baraan shugipeshen iri uwe, Iruhin douk nenekumesh baraan aria riguk anan adur nakri eshesh yoweishi ta shunam debeihi nyih. Umum maresh? Eshesh douk madae shunek bilip um anudok Iruhin ananin atun Nuganin uwe, uwok. <sup>19</sup> Baugenym baraan um agundok Iruhin ko nunemesh baraan um douk namudok. Arman nape kabi laitmori douk nanaki nabuhi agudok atapig nahobig, aria arpesh esheship urkwip panasuhw yoweishi inahos pape kabi douk arukwutigun um. Aria lait shanoiwasat. Umum maresh? Eshesh douk shapeum shenek yoweishi inahos atin iri. <sup>20</sup> Ihish arpesh douk shapeum shenek yoweishi inahos iri, eshesh douk shenek horin horik um anudok arman douk nape kabi lait um iri. Eshesh douk shakri uwok um esheshish yoweshi inahos shutogur yopugunum aria ihishmorim shanoiwas um shanaki um lait. <sup>21</sup> Aria eshudok douk shenek adurih yopihi atih aih iri, eshesh douk shanamori anudok arman kabi douk lait um. Arpesh shanaki um shutik enyudok yopunyi mour douk Iruhin nakri um eshesh shuneken iri douk sheneken um Iruhin ananin dodog.”

*Jon Neneb Baptaisumesh Iri Nowereh Adurin Baraan Um Jisas Douk Amiapan*

<sup>22</sup> Douk enyudok nyanakuk aria Jisas nani anan anim disaipel hanam agudok shokugi nahobig Judia. Hanak hape agundok aria hape henek baptaisumesh. <sup>23</sup> Jon douk shopunek nape neneb baptaisumesh aburdok wabur Ainon. Aburdok wabur douk bape hurukatin um Salim aria sabaibari abar bor nagundok. Namudok aria arpesh shanaki aria nape neneb baptaisumesh. <sup>24</sup> Aria abudok nyutob, Herot douk watak nuweshik Jon nupe shunuweshik-ati urupat uwe, uwok.

<sup>25</sup> Aria anam Jon anan anim disaipel hani anan arman Juda um eshesh hape hanitok baraan um agundok eshesh Juda shagipesh esheshin lo aria sheshrokuh abar um shakri Iruhin nutrish aria nuhwaresh yopishi um.

<sup>26</sup> Aria amam disaipel hanamori Jon aria hakripan hakri namudok, “Debeini Tisa, anudok arman nubokuhi riguk nani nyak pape gani wobrehahibam worub Jodan aria douk nyakripapaman iri anan douk nape neneb baptaisumesh. Aria ihish arpesh douk shanam anan atun aria shakutukuk apak.”

<sup>27</sup> Jon nemnek baraen aria nakripam namudok, “Douk Iruhin nape heven iri nukri uwok um nuken mour enen arpen um, enyen meyoh ta mare nyuhur enyudok mour nyuneken uwe, uwok. <sup>28</sup> Ipak douk pemneken enyudok bāraen riguk yakriyen iri. Douk yakri, ‘Eik’ douk madae anudok arman douk Iruhin nakri um nagraehan aria neshopokan nanamori nurao arpesh iri uwe, uwok. Aria eik douk Iruhin nagraehe aria neshopoke yarigi. Anudok arman douk ta nigigi.’ <sup>29</sup> Aria douk arman nakana nurao onok armatok um, namudok aria okwudok armatok ta kutogur ananik irohukwik. Aria ananin arpenyi ta niyoto apa nubuk arigos nunadudareh um numnek anudok nurao armatok iri ananik mah. Namudok aria douk eik yanadudareh abom um eikish urkum apahw. <sup>30</sup> Umum maresh? Ananin nyeigur ta nyuto iruhw aria eikin nyeigur ta nyubuk atap.”

### *Anudok Nanaki Heven Iri Neneb Uwhirinyum Ihishmorim*

<sup>31</sup> “Aria anudok anan nape gani iruhw heven aria nabuhi iri, anan douk debeini um ihishmorim um eshudok eneshenesh. Aria anudok douk natogur agudok nahobig iri, anan douk nadukem agudok nahobig ah aria neyagwreh agudok nahobigin baraen. Aria anan nape iruhw heven ba nanaki iri, douk debeini neshagrakuk ihish arpesh shubuh atap aria anan nukih netemuk iruhw. <sup>32</sup> Anan nakripap um eshudok anan natrishi aria nemenekenyi baraen. Anan nakripap, aria madae enesh arpesh shumnek ananin baraen aria shusuhwen shugipeshen uwe, uwok. <sup>33</sup> Eshudok douk shemnek ananin baraen shasuhwen shagipeshen iri, eshesh showerehen shakri Iruhin nakriyen iri baraen douk adurin atin abom. <sup>34</sup> Anudok arman Iruhin neshopokan nanaki iri anan douk nakrip arpesh um Iruhin ananin baraen. Umum maresh? Iruhin nakoni ananin Mishin nyawish nyape shuknun um anudok arman aria nyatauruman neneb enyudok mour. <sup>35</sup> Aria, Yaken douk urkum manawasham abom um ananin Nuganin aria nakon ihishumori eshudok aria anan nape debeinarimesh. <sup>36</sup> Aria eshudok douk shumnek anudok Nuganin ananin baraen shusuhwen shigipeshen iri, eshesh ta shupe wosik abom iih nyumneh. Aria eshudok douk shukonaguk agabus Nuganin iri aria mare shugipesh ananin baraen iri, eshesh ta mare shupe iih nyumneh uwe, uwok. Aria Iruhin ananish urkum apahw juwehosish atish um eshesh aria ko shunam debeihi nyih shumnek eriger iih nyumneh.”

## 4

### *Jisas Neyagwreh Nani Onok Armatok Um Eshesh Samaria*

<sup>1</sup> Arigha aria amam Farisi hemnek um shakri “Jisas neshagrakuk Jon neneb baptaisum sabaishi arpesh aria nanukesh shagipesh anan.” <sup>2</sup> Aria Jisas anan kanak douk madae nunek baptaisum enesh arpesh uwe, uwok. Aria apak ananik disaipel atup menek baptaisumesh. <sup>3</sup> Douk Jisas nemnek um amam Farisi hemnek enyudok aria ta shopunek nakutukuk Judia aria natanam nanam agudok anag shokugi nahobig Galili.

<sup>4</sup> Aria ahudok yah hanam Galili iri douk hawish hanak agudok anag shokugi nahobig Samaria. Aria anan douk nagimah nanak. <sup>5</sup> Nanak arigha nanak natogur anabur wabur shohwarabur um Sikar. Ababur

douk bape agudok shokugi nahobig Samaria iri aria bape hurukatin um abudok shokubi amnab seiwok Jekop nako ananin nuganin Josep obi.

<sup>6</sup> Anag abar bakihogi nuwag seiwok Jekop narukogi, gape noburudok wabur. Jisas nagim rouhi yah nanaki abom aria nakana nupé nurao uhwin. Namudok aria anan nahagi nape anagasmus abarig nuwag.

<sup>7</sup> Nape aria douk onok um eshesh Samaria kwanaki um kwure abar aria nakripok namudok, “Shuke anabar abar ba ibroh.” <sup>8</sup> Aria apak ananim disaipel douk manak mawish aburdok wabur Sikar um mutori anagun mugnoh iri worigun.

<sup>9</sup> Aria okwudok armatok kwakripan kwakri namudok, “Nyak douk Juda-ipimin aria eik douk Samaria-ipiyarik. Nyak ko mare nyorige um iken abar nyubroh uwe, uwok.” Okwok kwakri namudok umum maresh? Eshesh Juda shani eshesh Samaria douk madae shuni kupaishi aka shuwok worigun aturuh yaureruh uwe, uwok. <sup>10</sup> Aria Jisas nakripok baraen nakri namudok, “Nyak douk nyudukemesh um yopishi eshudok Iruhin nakri um nukenyesh meyoh iri, namudok aria nyak douk nyudukemesh um amiapen douk nyarigen um nyuken abar, aria douk ko nyorige um iken yopubari abar douk arpesh shabroh aria benekesh shupe wosik abom iih nyumneh iri.” <sup>11</sup> Kwomnek namudok aria kwakripan kwakri namudok, “Debeini, nyak douk baket woken um ta nyereiri abar um. Aria shopunek agudok abarig nuwag douk gabuh abom gani atap. Aria abrudok abar douk arpesh shubroh aria shupe wosik abom iih nyumneh um ko nyubaruri agunum?

<sup>12</sup> Apakin yamenen Jekop nenemapukuk agudok abarig nuwag apak. Anan nani ananim nugamim shabrohag. Shabarur um ananish kauhos aria sisipahos shopunek shabroh. Aria nyak douk nyakri nyak debeini nyenek uhwin um Jekop, aka?”

<sup>13</sup> Aria Jisas nakripok namudok, “Eshudok arpesh douk shuwok agudok nuwagibar abar iri, eshesh ko ta abar besh. <sup>14</sup> Aria meishi eshudok douk shurao abar eik ikeshabar iri, eshesh ko mare ta abar besh shopunek uwe, uwok. Abrudok abar eik ikeshabar iri, ababar ko butogur bukoh buwish bupe numun um eshesh aria ko bunekesh shupe wosik abom iih nyumneh.”

<sup>15</sup> Okwudok armatok kwomnek aria kwakripan namudok, “Debeini, nyak nyuke abrudok nyakriyabar iri abar. Nyuke um aria abar ko mare ta be aria ipuem ta mare apa inaki agundok ba ire abar uwe, uwok.”

<sup>16</sup> Aria Jisas nakripok nakri namudok, “Kare ba hwari nyakin raminen aria ta punaki agundok.”

<sup>17</sup> Kwomnek aria kwakripan, “Eik raminen madae anan uwe, uwok.” Aria Jisas nakripok, “Enyudok douk adur atin, um nyak raminen uwok um. <sup>18</sup> Umum maresh? Nubokadae riguk nyak douk nyurao 5-poreim armam. Aria anudok douk atin nyanaman pape iri, anan douk madae nyakin adurin raminen uwe, uwok. Nyakin baraen douk adurin atin.”

<sup>19</sup> Aria okwudok armatok kwakripan, “Debeini arman, eik yadukemesh um nyak douk anan profet. <sup>20</sup> Apakash popehesh yamehesh eshesh Samaria douk shenek lotu um Iruhin ahwudok yoduhw. Aria ipak Juda douk pakri agundok arpesh ta shunak shunek lotu um Iruhin um douk nape gani Jerusalem atugun.”

<sup>21</sup> Aria Jisas nakripok namudok, “Nya, nyusuhw eikin baraen aria nyunek bilipumen. Nyutob ta butogur, aria ipak ta mare punek lotu um Yain um ahwodok yoduhw aka, um Jerusalem. Ipak wosik ta punek lotu um ihigun morim. <sup>22</sup> Ipak Samaria douk madae pudukem anudok douk penek lotumanari uwe, uwok. Apak Juda douk madukeman anudok monek

lotumanari. Umum maresh? Mour douk Iruhin neneken um nurao arpesh shutanamori shupe wosik atin um douk neneken iri nyakitak um apak Juda.

<sup>23</sup> Aria nyutob ta butogur iri douk abudok batogur jurug um arpesh douk shenek lotu um Yain iri ta shukri adurin atin aria shurao ananin Mishin enyenyin dodog aria shenek lotuman. Eshesh ta shenek lotuman um adurih yopuhi atuh aih kabi douk anan napeum. Aria Yain nakri nunawasham namudokishi arpesh um shenek lotuman. <sup>24</sup> Iruhin anan douk yegeniyiw uwok. Anan douk Mishin atin. Namudok aria arpesh shukri shunek lotu um anan iri, esheshish mishish ta shurao Iruhin ananin Mishin enyenyin dodog aria shugipesh adurin atinyi baraen aria shenek lotuman.”

<sup>25</sup> Okwudok armatok kwomnek aria kwakripa kwakri namudok, “Yadukemesh um Mesea ko nunaki. Anudok arman Krais douk Iruhin nagraehan aria ko neshopokan nunamori nurao arpesh iri. Abudok nyutob anan nutogur um, anan ta nukripap um ihishmorim eshudok.”

<sup>26</sup> Aria Jisas ta nakripok nakri namudok, “Eik atuwe eik adur atin anudok arman, douk yape yanamen weyagwreh iri.”

<sup>27</sup> Douk nawerehumok baraen aria apak ananim disaipel watak manak matograri. Aria apak munihap meyoh makitak yowiyokuk um agundok matrun nani onok armatok shape sheneyagwreh baraen um. Matrun, aria madae anan norig okwudok armatok nukri, “Nyanaki agundok um maresh?” aka norig Jisas nukri, “Nyani okwudok armatok pape peyagwreh baraen um maresh?” Madae morigesh uwe, uwok.

<sup>28</sup> Aria okwudok armatok kwobukuk baket douk kwakri kure abar um aria ta kwatanam um wabur. Kwanak aria kwakrip armam armago kwakri namudok, <sup>29</sup> “Ipak yowi munak ba putik anudok arman douk nakripe um ihishumori eshudok riguk yape yenekesh iri eshudok. Aria anan douk adur atin Krais aka, meinari?” <sup>30</sup> Namudok aria shakutukuk wabur shanak um shutik Jisas.

<sup>31</sup> Aria nabudok nyutob apak ananim disaipel meyagwreh dodog um Jisas makri namudok, “Debeini Tisa, suh anagun worigun ba kukwesh.”

<sup>32</sup> Nemnek aria nakripap nakri namudok, “Eik yagnoh iri worigun douk madae pudukem-ogun uwe, uwok.” <sup>33</sup> Namudok aria apak ananim disaipel mape manasorim makri namudok, “Iganigadae enen arpen nyaraumanari anagun worigun nagnoh aka, uwok?”

<sup>34</sup> Aria Jisas nakripap nakri namudok, “Ekish worigun douk eshudok. Igipesh anudok douk neshopoke yanaki iri um ananim urkum aria iyatak enyudok mour douk nekeyen um ineken iri. <sup>35</sup> ‘Ipak apa panakripam namudok, ‘Nubatib aub bape um, aria mutuk worigun nubarigos.’ Eik yakripep, ipak pupok ipakis nabes ba putik nubarigos! Worigun douk nauhogos um apak mutukagun. <sup>36</sup> Armam hatuk worigun iri ko hurao yopibori utabor. Umum maresh? Amam ta hutorumori worigun iri um eshudok shabadiq nyirub iri arpeshish mishish shutanamori um shupe wosik abom iihh nyumneh! Anudok nau worigun nubarigos iri aria anudok natuk worigun nubarigos iri biobiom ko hunadudareh abom. <sup>37</sup> Enyudok enen baraen apa sheyagwrehan iri douk adurin baraen. Baraen enyudok, ‘Anan arman nau worigun aria kupainari nanaki natukesh! <sup>38</sup> Eik yeshopokep panak um purimori worigun nubarig douk riguk ipak madae punek mour um uwe, uwok. Kupaimi heneguk mour aria ipak puwish purimori worigun douk haweshag iri aria harik heneguk debeinyi mour um. Amam henek debeinyi mour aria ipak parao yopuguni worigun.”

<sup>39</sup> Sabaishi Samaria shape Sikar iri douk shasuhw Jisas ananin baraen aria shagipeshen. Umum maresh? Eshesh douk shemnek okwudok

armatok kwakri, "Anan nakripe um ihishmori riguk yape yenekesh iri eshudok." <sup>40</sup> Douk namudok aria eshesh Samaria shanaki agundok Jisas napeum aria dodogowish shakripan um nini eshesh shupe. Namudok aria nani eshesh nape biyeh nyumneh aburdok wabur. <sup>41</sup> Sabaishi arpesh shemnek ananin bараen shakri adurin aria shasuhwen shagipeshen.

<sup>42</sup> Aria shakrip okwudok armatok shakri, "Apak douk madae mumnek nyakin bараen atin aria munek bilipumen uwe, uwok. Apak kanak memnek ananin bараen aria madukemesh makri anan douk anudok arman douk ko nutaurum ihip mape agudok nahobig iri aria ta nurap mutanamori mupe wosik atin."

### *Jisas Nagapesh Anan Neneh Um Gavman Iri Ananin Nuganin Aria Yapun*

<sup>43</sup> Jisas nape abrudok wabur biyeh nyumneh um jurug aria nakutukuk agundok aria nanam shokugi nahobig Galili. <sup>44</sup> Riguk Jisas anan kanak nakri enyudok bараen namudok, "Anan profet, ananibur wabur douk madae shumneken uwe um ananin bараen aria shukri anan douk debeini uwe, uwok."

<sup>45</sup> Namudok aria abudok nyutob nanak natogur agudok shokugi nahobig Galili obi nyutob, eshesh Galili shanadudareh abom um agundok anan nanak um. Umum maresh? Abudok nyutob riguk shenek agundok debeiguni worigun Pasova obi nyutob, eshesh douk shanak aria shatik ihinyumori anan neneken iri debeinyi Iruhin atun neneken iri mour.

<sup>46</sup> Aria nanak natogur natik aburdok wabur Kana. Ababur douk bape agudok shokugi nahobig Galili. Abrudok wabur douk nubokuhi nabadig abar meyoh batogur wainibar abar iri. Aria abudok nyutob anan neneh mour um gavman iri ananin nuganin douk eneh arugeh hapeyan aria anan douk nape wabur Kaperneam. <sup>47</sup> Douk anudok arman nemnek um Jisas nakutukuk agudok shokugi nahobig Judia aria nanamori shokugi nahobig Galili aria nanak narigan abom um nanaman hunam Kaperneam aria nugapesh ananin nuganin um yapun. Anan douk ehudok arugeh henekan aria hurukatinyum nakana nugok. <sup>48</sup> Aria Jisas nakripan nakri, "Aria ipak putiwe um mare inek enenyen Iruhin atun neneken iri mour um, ipak ta mare punek bilipume, uwok." <sup>49</sup> Anudok neneh mour um gavman iri nemnek aria nakrip Jisas nakri, "Debeini arman, yowi unak arigah. Ta eikin nuganin nugok."

<sup>50</sup> Aria Jisas nakripan nakri, "Kare. Nyakin nuganin ta yopun, ta mare nugok uwe, uwok." Anudok arman nasuhw Jisas ananin bараen nakri adurin aria nanak. <sup>51</sup> Nape nanak yah aria ananim henekuman mour iri hanaki hatarungan. Aria hakripan hakri, "Nyakin nuganin iga yopun. Ta mare nugok uwe, uwok."

<sup>52</sup> Aria narigam abom um meibi nyutob douk ananin nuganin watak yopun um. Aria hakripan hakri, "Arugeh hatuh nabatik 1 kilok wabigep."

<sup>53</sup> Namudok aria yaken watak nadukemesh um nabatik douk abudok hakri obi nyutob abom Jisas nakripan nakri, "Kare, nyakin nuganin ta mare nugok uwe, uwok." Namudok aria anan nani ihishmori shape ananit urupat iri shasuhw Jisas ananin bараen shagipeshen. <sup>54</sup> Jisas douk nakutukuk shokugi nahobig Judia aria nanaki nape Galili. Aria enyudokmori Iruhin atun neneken iri mour douk neneh enyudok aria nyatoguk biyen.

## 5

*Jisas Nagabe Anan Arugeh Han Iri Gani Waiyag Betesda*

<sup>1</sup> Enyudok nyanakuk aria anah debeihi nyumnah douk eshesh Juda shape shenek lotu aria shenek debeguni worigun um hutogun. Aria Jisas nikitak nanak um Jerusalem um nutrish um agundok worigun. <sup>2</sup> Aria agundok Jerusalem, anat debeiti wit shahwarat um Sipsip Esheshit Debeiti Wit iri douk tape arbudok narub douk shenekarub berbarih Jerusalem iri. Aria hurukatin um atudok wit, anag waiyag gor. Enyudok bareaen Hibru shahwarogum douk shakri Betesda. Aria hurukatin um agudok waiyag douk anat debeiti urupat tatao aria sharok 5-poreish womagahos. <sup>3</sup> Aria sabaishi arugeh haesh iri arpesh shanaki shape sheshuh eshudok womagahos. Enesh nabes seshukesh iri, enesh aiyas senekesh aria sharahaen yowiyokuk iri shani eshudok douk roguhw aiyas shagokesh iri shanaki shape. [Eshesh shape shatrugunum abar bunagwugwi um. <sup>4</sup> Um maresh? Anob nyutob Debeini ananin ensel apa nyabuh abar aria nyenek abar banagwugwi. Aria douk abar bunagwugwi aria meinyi arugeh hen iri arpen nyurik nyukitak nyubuh agudok waiyag iri, enyen douk ta yopin.]

<sup>5</sup> Aria agundok, anan aiyas sagokan iri nape namudok um 38-poreish kwarahos iri douk nape enen womaga douk nyatao hurukatin um agudok waiyag iri. <sup>6</sup> Douk Jisas natik anudok aiyas sagokan iri neshuh aria nadukemesh um anan douk aiyas sagok nape roubum nyutob. Aria Jisas narigan nakri, "Nyak nyakrium ta yopin aka?"

<sup>7</sup> Aria anan nakripan nakri, "Debeini, abudok nyutob abar banagwugwi obi nyutob, eik douk arpen woke um nyiyohur nyunak nyukutuwé waiyag iri. Eik kanak yakri inak ibuh aria kupaishi shanak arigas sheshagrak eik sharik shanak shabuh."

<sup>8</sup> Aria Jisas nakripan nakri, "Nyak kakitak nyuhur nyakish reish nyunasuwesh aria nyunak." <sup>9</sup> Aria ahudok atuh anudok arman yopun aria nikitak nohur ananish reish nasuwesh aria nanak.

Aria ahudok nyumnah Jisas nagabe anudok aiyas sagokanari um douk Sabat. <sup>10</sup> Douk namudok aria eshesh Juda esheshim debeimi hakrip anudok douk Jisas nagabeyan iri hakri, "Apakin lo seiwok Iruhin nakoguk Moses um douk nyakri, ahudok nyumnah Sabat douk mare munek enen mour uwok, mupe meyoh. Aria nyak douk mare nyusuhw nyakish reish nyurahaen uwe, uwok."

<sup>11</sup> Aria anan nakripan nakri, "Anudok neneke yopuwe iri douk nakripe um ikitak iher eikish reish inasuwesh aria inak."

<sup>12</sup> Aria amam harigan hakri, "Meini arman nakripenyum nyunohur nyakish reish nyunasuwesh aria nyunak?"

<sup>13</sup> Aria anudok arman douk Jisas nagabeyan yopun iri douk madae nudukem Jisas uwe, uwok. Um maresh? Sabaishi arpesh shape agundok aria Jisas douk nanakuk. <sup>14</sup> Arigaha douk anob nyutob banakuk aria Jisas watak naparugan numun narub agundok Iruhin ananit debeiti urupat tataoum aria nakripan nakri, "Tik, nyak douk yopun jurug. Nyunak aria mare watak nyukri nyunek enesh yoweishi inahos shopunek, uwok. Ta enen adur debeinya amaan nyutogrumen." <sup>15</sup> Aria anudok arman nanak nakrip eshesh Juda esheshim debeimi um anudok nagabeyan iri douk Jisas. <sup>16</sup> Douk namudok aria amam hape heyokas Jisas. Um maresh? Anan douk nagabe anudok arman ahudok nyumnah Sabat. <sup>17</sup> Aria Jisas nakripan nakri, "Eikin Yain douk nenek ananin mour nape namudok ihihmorim nyumneh. Namudok aria eik shopunek yape yeneken namudok atin."

<sup>18</sup> Douk Jisas nakri namudok aria amam debeimi Juda adur hakri hon nugok. Um maresh? Anan douk madae nubrig enyudok lo um mare shunek enen mour ahudok nyumnah Sabat um atin uwe, uwok. Anan nakri Iruhin douk adur ananin Yain. Aria douk namudok um, anan nakri nunek anan kanak adur nutogur atatahin atun um Iruhin.

### *Iruhin Ananin Naganin Anan Adur Dodogowin Atun Um Nunek Mour*

<sup>19</sup> Aria Jisas nawanaamesh bараен nakri, "Adur atin yakriep. Eik Iruhin ananin Naganin, eik kanak ta mare inek enesh eshudok, uwok. Eik ta inek eshudok douk eik yatik eikin Yain nenekeh iri atish. Eshudok douk Yain nenekeh iri, eik shopunek ta inekesh. <sup>20</sup> Yain ananim urkum douk adur manawasham um eik aria anan neyabige ihishmorim eshudok anan nape nenekeh iri. Anan ta niyabige inek enesh douk nyeshagrakuk enyudok douk Yain narik neyabige yeneken iri. Ineken aria ipak ta putrin aria pikitak yowiyokuk. <sup>21</sup> Yain apa nohur shagok iri norukesh yapis aria watak shakitak shape. Aria douk namudok atin. Eik ananin naganin shopunek ta iur eshudok eik ikri ishuhur iri. Ishuhur irukesh yapis aria watak shukitak shupe. <sup>22</sup> Aria Yain anan kanak ta mare nusuhw enen arpen enyeniyit kwot, uwok. Enyudok mour um nusuhw kwotog um douk nako eiken. <sup>23</sup> Anan douk nenekeh namudok um ihishmorim arpesh ta shutuk eikin nyeigur nyuto iruhw kabi shatuk eikin Yain ananin nyeigur um. Aria enyudok arpen douk madae nyutuk eik ananin naganin eikin nyeigur iri uwe, enyen douk madae nyutuk eikin Yain ananin nyeigur uwe, douk neshopoki eik yanaki, uwok.

<sup>24</sup> "Adur atin yakriep. Eshudok arpesh douk shumnek eikin bараен aria shugipesh anudok douk neshopoke yanaki iri um, eshesh ta shupe wosik abom iih nyumneh. Aria eshesh ta shiyotum atudok kwot Iruhin ananit aria ta shenek uhwinyum atudok debeiti kwot. Eshesh douk shakutukuk agundok shagok um aria ta shupe wosik abom iih nyumneh. <sup>25</sup> Adur atin yakriep. Nyutob douk ta butogur, aria douk batogur jurug, um shagok iri ta shumneki eik Iruhin ananin Naganin eikh mah. Aria eshudok douk shumneke aria shugipeshe iri, eshesh ta shukitak shupe wosik abom aria mare ta shugok uwe, uwok. <sup>26</sup> Yain douk adur baugos um agundok arpesh shupe wosik abom aria mare watak shugok um. Aria douk namudok atin. Anan nenekeh eik yatogur baugos um agundok arpesh shupe wosik abom aria mare watak shugok atin um. <sup>27</sup> Aria Iruhin douk nekeyen jurug enyudok big um isuhw arpesh eshesig kwotog um. Um maresh? Eik douk Anudok Arman douk yatogur adurinyi arpen iri.

<sup>28</sup> "Aria ipak mare pikitak yowiyokuk um shagok iri ta watak shutanamori. Nyutob douk bape banaki, um arpesh douk seiwok shagok aria sharumesh shor wonugwegwiruh iri ta shumneki eikh mah aria ta watak shukitak eshesiruh wonugwegwiruh um. <sup>29</sup> Aria eshudok douk shenek yopuhi aih iri ta shukitak shupe wosik abom aria mare watak shugok, uwok. Eshudok douk shenek eneshenesh yoweishi inahos iri ta shukitaki shunak shiyotum debeiti kwot aria shirao debeiri eriger."

### *Baugenyum Baraen Nyatogur Yopugun Um Jisas*

<sup>30</sup> Aria Jisas nakri, "Eik kanak ta mare inek enesh eshudok um eikim urkum, uwok. Eik yagipesh eikin Yain nakripeyen iri bараен aria yenek skelum arpesh. Namudok aria yasuhw kwotog um, eik douk adur yenek skelum esheshin bараен um yopihi adurih aih. Um maresh? Eik madae igipesh eikim urkum aria inek enyudok mour uwe, uwok. Eik yagipesh anudok douk neshopoke yanaki ananin bараен aria yenek enyudok mour anan nakri um eik ineken iri.

<sup>31</sup> “Douk eik kanak ikri ikripesh um eik kanak akure, enyudok eikin yeyagwrehan iri bараen ta mare shusuhwen shukri adurin uwe, uwok.  
<sup>32</sup> Aria douk anan nataurume nape nakripesh um eik. Aria eik yadukemesh um enyudok bараen anan nakriyen um eik iri douk adurin atin.

<sup>33</sup> “Seiwok ipak peshopok anam harao bараen iri hanak harig Jon nenek baptaisumesh iri. Aria anan nakriep adurin atinyi bараen um eik. <sup>34</sup> Aria eik douk madae ikri um enesh arpesh shukripesh eikin bараen kupaishi um shdukemesh um eik amiapen uwe, uwok. Eik yakri enyudok bараen um yakri Iruhin watak nuraep putanam pupe wosik abom iih nyumneh.  
<sup>35</sup> Jon anan nape kabi lam douk hanin aria bogaragun um arpesh um. Aria ipakiruh aparuh douk yopuruh aria panadudareh um ananit lait douk tatrugun abudok banobi adurib nyutob iri.

<sup>36</sup> “Aria enyudok mour eik yeneken iri douk adur nyeshagrakuk enyudok bараen douk Jon nakriyen um eik iri. Enyudok mour douk Iruhin nekeyen um ineken iyaten aria douk enyudok yape yeneken iri, enyen meyoh ta nyiyabig arpesh aria shdukemesh um eik douk Yain neshopoke iri aria douk yanaki. <sup>37</sup> Aria eikin Yain douk neshopoki eik yanaki, anan kanak douk nakriep baugenyum bараen um eik. Ipak douk madae punmek ananit nokwat tiyagwreh anabik uwe, uwok. Aria shopunek ipak douk madae putrun uwe. <sup>38</sup> Ananin bараen shopunek douk madae nyupe ipakiruh aparuh uwe, uwok. Um maresh? Ipak douk madae punek bilip um eik douk anan neshopoke yanaki uwe, uwok.

<sup>39</sup> “Ipak pakri enyudok bараen nyetem Iruhin ananik Buk iri ta nyunekep pupe wosik abom iih nyumneh! Douk namudok aria ipak pape patarih sabainyi bараen nyetem okwudok Buk iri, aria penek urkwip um pakri pudukemen. Enyudok nyetem Buk iri bараen douk nyakrium eik! <sup>40</sup> Aria ipak adur pakri uwok um punamori eik um pupe wosik abom iih nyumneh.

<sup>41</sup> “Aria eik yakri uwok um arpesh shutuk eikin nyeigur, uwok. <sup>42</sup> Aria eik yadukemep um ipakip urkwip douk madae punawasham Iruhin uwe, uwok. <sup>43</sup> Eik douk yanaki um eikin Yain ananin nyeigur, aria ipak douk madae pupe aparuh pukri punmek eikin bараen uwe, uwok. Aria douk anan arman meyoh nunaki nukriep um anan kanak ananin nyeigur akure, ipakiruh aparuh ta yopuruh aria ta kweipon punmek ananin bараen. <sup>44</sup> Ipak urkwip porum pakri ipak kanak punatuk ipakish nyeighw shuto iruhw. Madae karowih ium pukwiraeh punek eneh aih um pukri anudok adur atun iri Iruhin meyoh nutuk ipakish nyeighw shuto iruhw uwe, uwok. Douk namudok aria ipak ta pusuhw eikin bараen pugipeshen mumam? Adur atin ta uwok. <sup>45</sup> Aria ipak douk mare pure urkum pukri eik ta inekumep kwotog um eikin Yain, uwok. Arman nунекумеп kwotog iri douk anudok ipak pakri ta nataurumep iri. Anan douk Moses. <sup>46</sup> Aria douk ipak punek bilip um Moses ananin bараen akure, ipak ta punek bilip um eikin shopunek. Um maresh? Moses nenyemaguk iri bараen douk nyakrium eik. <sup>47</sup> Ipak douk madae punek bilip um enyudok bараen seiwok Moses nenyemaguk iri uwe, uwok. Namudok aria ipak ta punek bilip um eikin bараen mumam? Ta uwok.”

## 6

*Jisas Nekesh Worigun Sabaishi Arpesh Armam Atum Shadareham  
 Hatogur 5,000-poreim  
 (Matyu 14:13-21; Mak 6:30-44; Luk 9:10-17)*

<sup>1</sup> Aria anob nyutob banakuk, aria Jisas nabinawish nanam gani wobrehum um agudok debeigi waiyag Galili. Enyudok enen nyeigur douk shahwarog um Taiberias. <sup>2</sup> Aria sabaishi arpesh abom shagipeshan. Um mares? Eshesh douk shatik enyudok Iruhin atun neneken iri mour douk anan neneken um nagabe eshudok arugeh henekeshi arpesh yopish um. <sup>3</sup> Jisas nanak nato anag mihib aria nakih nani ananim disaipel hape nagundok. <sup>4</sup> Aria abudok nyutob um eshesh Juda shenek agundok debeiguni worigun Pasova um douk hurukatinyum ta butogur.

<sup>5</sup> Jisas natrugun neyatagan aria natik um sabaishi arpesh abom shape shamananari. Aria narig Filip nakri, “Filip, ta munak mutor anat bret agnum, um eshudok sabaishi arpesh ta shutoh iri?” <sup>6</sup> Jisas narigan enyudok baraen um nakri nukwiraehan. Anan douk nadukemesh um enyudok mugu douk ta nuneken iri.

<sup>7</sup> Aria Filip nawanaman baraen nakri, “Douk apak ta muwashak 200-poreibor silwai-bor utabor um aria ta mutor anat bret akure, atudok bret ta mare sabaiti um eshudok sabaishi arpesh um ta shuwok anabik mudukigun meyoh uwe, uwok.”

<sup>8</sup> Aria anudok anan Jisas ananin disaipel Andru douk Saimon Pita ananin wanin nakri, <sup>9</sup> “Anan shokuni neyotu agundok iri douk noruk bias shokusi arbus sani 5-poreig shokugwi bretog. Aria eshudok douk shopunek ta shunek mares um shutaurum eshudok sabaishi arpesh?”

<sup>10</sup> Aria Jisas nakripap nakri, “Kripesh shupe atap.” Agundok douk sabairuhi utoruh hatogur aria sabaishi arpesh shabuh shape. Sabaishi arpesh aria armam atum sabaimi atum abom hatogur 5,000-poreim.

<sup>11</sup> Douk shabuh shape jurug, aria Jisas nohur bret nasuwat neneke tenkyu um Iruhin aria nepe nasiyat um arpesh. Nasiyatunmesh jurug, aria asudok biyos arbus douk nosuhur nenekeh namudok atin. Aria eshesh sabaishi shashoh arigaha dugaresh atish. <sup>12</sup> Douk sabaishi dugaresh aria nakrip apak ananim disaipel nakri, “Putrish putorum bret douk shatoh aria takusuk iri. Um mares? Ta mununu anat aria ta tukusuguk meyoh uwe, uwok.” <sup>13</sup> Memnek namudok aria matorumat matruk 12-poreiruh suraruh aria shunukiruh aturuh um tutukwanit um agudok 5-poreig bretog douk eshudok sabaishi arpesh shani batowish shagwoh aria gwakusuk iri.

<sup>14</sup> Douk eshudok arpesh shatik enyudok Iruhin atun neneken iri mour douk anan Jisas neneken iri aria shakri, “Adur atin, anudok arman douk anudok profet Iruhin nakri um ta neshopokan nanamori agundok atap iri.”

<sup>15</sup> Jisas natrish aria nadukemesh um eshesh hurukatinyum ta shunaki shusuhwan shupe aria shunegan nutogur esheshin king. Namudok aria nakutukuk eshesh aria anan atun nanak nato yoduhw.

### *Jisas Narahaen Nanak Iruhw Um Agudok Debeigi Waiyag (Matyu 14:22-23; Mak 6:45-52)*

<sup>16</sup> Douk arigaha wabigep aria apak ananim disaipel makitak mabuh um agudok debeigi waiyag. <sup>17</sup> Apak mapeum Jisas aria anan madae nanaki aria mabuh mato anat bot aria mabimawish manak um wabur Kaperneam. Abudok nyutob douk iganigadee wab, aria Jisas douk watak nunaki nutogrump uwe, watak. <sup>18</sup> Aria abudok nyutob, debeinya uhwin douk nyahur aria nyohur waiyag ba debeibi morub bakitak aria waiyag yoweg. <sup>19</sup> Apak ta menek pul manak 5 o 6 kilomita rougum um anagas aria douk Jisas narahaen iruhw um waiyag nanaki hurukatinyum bot. Douk matik namudok aria manogugur abom. <sup>20</sup> Aria Jisas nakripapari nakri, “Mare punogugur uwe, uwok. Enyudok douk eik Jisas.” <sup>21</sup> Douk memnek

aria manadudareh um mutukan nutowi bot. Aria ahudok atuh matik um bot tanak tatogur gani wobrehah um agudok waiyag douk apak mape menek pul manak um.

### *Armam Armago Shape Shaurim Jisas*

<sup>22</sup> Ruwahepih aria eshudok sabaishi arpesh douk watak shape gani wobrehah um agudok waiyag. Shadukemesh um nabatik madae anat atut bot tur nagundok uwe, uwok. Atut meyoh tor aria douk apak ananim disaipel iganigadae mato menek pul manak. Jisas madae nunamap munak uwe, uwok. <sup>23</sup> Aria abudok nyutob, onog botog gworari wabur Taiberias iri douk gwanak gwatograri. Gwatograri hurukatin um agundok douk Jisas neneh tenkyu um Iruhin um bret aria nako eshudok arpesh shatoh um. <sup>24</sup> Douk eshudok arpesh shatik um Jisas nani apak ananim disaipel madae mupe agundok uwe, aria shabuh shato agwudok botog shanam Kaperneam um shurim Jisas nagundok.

### *Jisas Anan Douk Adur Atin Kabi Atudok Bret Tabuhi Iruhw Heven Iri Um*

<sup>25</sup> Douk arigaha shanak shaparugan gani wobrehah um agudok waiyag aria shakripan shakri, “Debeini Tisa, meibi nyutob nyanaki agundok?”

<sup>26</sup> Aria Jisas nawanamesh baraen nakri, “Adur atin yakritep, ipakip urkwip douk madae purum enyudok yeneken iri debeinyi mour kabi enen kak eik yeayabigepum aria douk panaki paurime uwe, uwok. Ipak douk pawok bret ba dugarep atip namudok aria douk ipak apa paurim eik. <sup>27</sup> Mare pupe punek mour um agundokmori worigun douk ta pishoh aria shunak shuwishuk iri uwe, uwok. Aria ipak douk punek mour um purim agundok anagun worigun douk ta puragun aria ta nunekep pupe wosik abom iihh nyumneh iri. Agundok worigun douk Eik Anudok Arman douk yatogur adurinya arpen iri ta ikepagun. Um mares? Yain Iruhin douk neke big aria nakripe wosik um inek enyudokmori mour.”

<sup>28</sup> Namudok aria sharigan shakri, “Aria apak ta munek mares, um apak ta munek Iruhin ananin yopinyi mour?” <sup>29</sup> Aria nakripesnakri, “Mour douk Iruhin nakri um puneken iri douk enyudok. Anan douk neshopeki eik yanaki, aria nakri ipak ta pusuhw eikin baraen dodog pugipeshen.” <sup>30</sup> Namudok aria eshesh watak sharigan shakri, “Ta nyumek maren Iruhin atun neneken iri mour um apak mutrin aria munek bilip um nyakin baraen? <sup>31</sup> Apakish yamehesh douk shawok atudok bret mana gani wehigunum arpesh uwok um. Shatoh kabi douk Iruhin ananin baraen nyetem ananik Buk iri nyakrium. Nyakri namudok. ‘Anan nekesh bret tabuhi iruhw heven iri shatoh.’”

<sup>32</sup> Jisas nemnek aria nakripesnakri, “Adur atin yakritep, atudok bret tabuhi iruhw heven iri douk madae Moses nukepat iri uwe, uwok. Eikin Yain nekpat atudok adurit bret douk tabuhi iruhw heven iri. <sup>33</sup> Bret douk Iruhin nekpat iri douk takutukuk iruhw heven aria tabuhumori tutaurum eshudok atapishi arpesh um shupe wosik abom iihh nyumneh.”

<sup>34</sup> Aria eshesh shakripan shakri, “Debeini, apak makri nyak nyuueum ta nyukop atudok bret iihh nyumneh.” <sup>35</sup> Aria Jisas nakripesnakri, “Eik douk atudok bret douk ta shurat aria shupe wosik abom iihh nyumneh um. Eshudok douk shunakmori eik aria shusuhw eikin baraen shugipeshan iri, eshesh mare ta nyurub besh shopunek uwe, uwok. Aria eshesh mare ta abar besh shopunek uwe, uwok. <sup>36</sup> Aria ta douk yakritep, ipak douk patik eik aria madae pusuhw eikin baraen penek dodog pukri adurin uwe, uwok. <sup>37</sup> Iihh arpesh douk eikin Yain nagraehesh um shunakmori eik iri ta shunakmori eik. Eshudok douk shunakmori eik iri, eik ta mare inowisesh

ikeshuk agab uwe, uwok. <sup>38</sup> Eik douk madae ikutukuk iruhw heven aria ibuhmori igipesh eik kanak eikim urkum um inek enenyenen mour um eikim urkum morumen iri uwe, uwok. Aria douk yanamori igipesh eikin Yain douk neshopoke yanaki iri um ananum urkum. <sup>39</sup> Aria anan neshopoke yanaki iri nakri um ineken iri douk enyudok. Nakri mare ikutukuk enen um eshudok ihishmorim arpesh douk anan nagraehesh um shunamori eik iri shunak shuwishuk uwe, uwok. Aria nakri eik ta irukesh yapis eshesh aria watak ishuhur shukitak shupe abudok nyutob ko hugiguk iri nyumnah hutogurum. <sup>40</sup> Adur, eikin Yain nakriyeni douk enyudok atin. Nakri ihishmorim arpesh douk shutik eik ananin Nuganin aria shusuhw eikin baraen shugipeshan iri, eshesh douk ta adur shupe wosik abom iih nyumneh. Aria douk ta watak irukesh yapis ishuhur shukitak shupe ahudok hugiguk iri nyumnah hutogram.

<sup>41</sup> Eshesh Juda shemnek aria urkwip juwehosip abom aria shape sheneyagwreh shokwin atin baraen um enyudok Jisas nakri anan douk atudok bret tabuhi gani iruhw heven iri um. <sup>42</sup> Namudok aria shakri, "Anudok arman anan douk Josep ananin nuganin shahwaranum Jisas iri. Ananish amakenyish douk madukemesh. Aria douk mumam namudok, um iganigadee nakri anan douk nape gani iruhw heven aria nabuhi?"

<sup>43</sup> Jisas nemnek aria nawanamesh baraen nakri, "Ipak um maresh ba urkwip juwehosip aria ipak pape peyagwreh panaboum baraen orokohun um ipak kanak meyoh? <sup>44</sup> Madae enen arpen ta nyukana nyunakmori eik uwe, uwok. Aria douk Yain neshopok eik yanaki aria nuhur enyudok arpen akure, enyen wosik ta nyunakmori eik aria nyusuhw eikin baraen nyugipeshen. Aria enyudok arpen, eik douk ta watak inyuhur nyukitaki wanugwehw ahudok hugiguk iri nyumnah hutogurum. <sup>45</sup> Baraen douk profet henjem nyetem Iruhin ananik Buk iri douk nyakri, 'Iruhin ta nunek skulum iihish arpesh um ananih aih.' Namudok aria sabaishi arpesh douk shumnek eikin Yaken ananin baraen aria shudukemen wosik iri, eshesh ta shunakmori eik. <sup>46</sup> Madae enen arpen nyutik Yain uwe, uwok. Eik douk yani Iruhin wape iri aria yakitak yanaki iri atuwe yatrun."

<sup>47</sup> "Adur atin yakripep, ihishmorim arpesh douk shusuhw eikin baraen shugipeshen iri, eshesh douk ta shupe wosik abom iih nyumneh. <sup>48</sup> Eik Jisas douk atudok bret douk arpesh ta shurat aria tunekesh shupe wosik abom iih nyumneh iri. <sup>49</sup> Seiwok ipakish popehesh yamehesh douk shawok atudok bret mana gani wehigunum, aria eshesh douk shagok. <sup>50</sup> Aria arpesh douk shuwok atudok adurit bret douk takutukuk iruhw heven tabuhi iri, eshesh douk ta mare shugok, uwok. <sup>51</sup> Eik kanak douk atudok adurit bret douk tabuhi gani iruhw heven um ta tunek arpesh shupe wosik abom iih nyumneh iri. Arpesh douk shuwok atudok bret iri ta shupe wosik abom iih nyumneh. Atudok bret douk eikihw yegenyihw. Ta ikesh eikihw yegenyihw um itaurum ihishmorim eshudok atapishi arpesh um shupe wosik abom iih nyumneh."

<sup>52</sup> Douk eshesh Juda shemnek namudok aria juwehosish abom. Aria eshesh kanak apa shanogogonim shakri, "Anudok arman nakri ta nukop ananihw yegenyihw muhwoh mumam?"

<sup>53</sup> Aria Jisas nakripesh nakri, "Adur atin yakripep, douk ipak mare puwok Eik Anudok Arman douk yatogur adurinyi arpén iri eikihw yegenyihw o puwok eikibor owishibor um, ipak ta mare pupe wosik abom iih nyumneh, uwok. <sup>54</sup> Aria eshudok arpesh douk shuwok eikihw yegenyihw hwuni eikibor owishibor iri, eshesh ta shupe wosik abom iih nyumneh. Aria ahudok hugiguk iri nyumnah hukri hutogur obi nyutob, eik douk ta

watak ishuhur shukitak shupe. <sup>55</sup> Um maresh? Eikihw yegenyihw ohwohw douk kabi adurigun worigun abom um. Eikibor owishibor douk shopunek kobi aduribar abar abom um. <sup>56</sup> Eshudok arpesh douk shuwok eikihw yegenyihw hwuni eikibor owishibor iri, eshesh douk shape eik aria eik yape eshesh. <sup>57</sup> Eikin Yain douk baugos abom um agundok shupe wosik abom iih nyumneh iri um douk neshopoki eik yanaki. Aria eik douk yape dodogoiwe um anan aria ta ipe wosik abom iih nyumneh. Aria douk namudok atin. Eik douk dodogoiwe iri aria eshudok arpesh shuwok eikihw yegenyihw iri, eik douk ta inekesh shupe wosik abom iih nyumneh abom. <sup>58</sup> Eik douk atudok bret douk tabuhi gani iruhw heven iri. Atudok bret douk madae kabi atudok seiwok ipakish yamehesh shatoh aria eshesh ta shagok um uwe, uwok. Arpesh douk shuwok atudok bret iri, eshesh ta shupe wosik abom iih nyumneh."

<sup>59</sup> Jisas nakripesh enyudok baraen aburdok wabur Kaperneam. Nakripeshen abudok nyutob nape nene skulumesh yopinyi baraen gani numun eshesh Juda shape sheneyagwreh baraen-ati urupat obi nyutob.

### *Baraen Jisas Neyagwrehan Iri Douk Ta Nyutaurum Arpesh Um Shupe Wosik Abom Iih Nyumneh*

<sup>60</sup> Sabaishi arpesh douk shapeum shemnek ananin baraen aria shagipeshen iri douk shemnek enyudok baraen aria sheneyagwreh shakri, "Enyudok baraen douk juwehosin abom um apak mugipeshen um. Ta omi nyupe nyumneken aria nyugipeshen?"

<sup>61</sup> Jisas douk madae enesh arpesh shukripan uwe, aria nadukemesh um eshesh douk juwehosish aria shape sheneyagwreh shokubur atin um enyudok baraen douk nakripeshen iri. Namudok aria nakripesh nakri, "Ipak douk pemnek enyudok baraen nyenek ipakip urkwip yowep aria juwehosip, aka?" <sup>62</sup> Aria douk ta mumam, douk ipak putik Eik Anudok Arman douk yatogur adurin arpen iri ito iruhw douk riguk yapeum? <sup>63</sup> Arpesh meyoh ta mare dodogowish um shugok um eshesh kanak um shupe wosik iih nyumneh, uwok. Iruhin ananin Mishin atin wosik dodogowin atin abom um nyunekesh shupe wosik abom iih nyumneh. Enyudok eik yakriep eny baraen douk ta nyutaurum ipakish mishish aria ta nyunekepu wosik abom iih nyumneh. <sup>64</sup> Yakriep baraen aria anep madae punek bilipume uwe, uwok." Jisas anan douk sagomatirriguk nohur ananin mour nape neneken um aria nadukemesh um eshudok arpesh douk ta mare shunek bilipuman iri, shani anudok arman douk ta niyabig ananim horim um anan Jisas aria husuwan hunak hon nugok iri. <sup>65</sup> Aria Jisas watak shopunek nakri, "Douk namudok aria yakriep yakri, 'Douk Iruhin ta mare nuken dodog enen arpen um, enyen meyoh ta mare dodogowin um nyunaki nyunek bilip um eik, uwok.'"

<sup>66</sup> Jisas nakripesh enyudok baraen um jurug, aria sabaishi arpesh douk shapeum shagipeshen shemnek ananin baraen iri watak shakutunukuk aria shatanam. Madae shukri um shugipeshan uwe, uwok.

<sup>67</sup> Jisas natik namudok aria narig apak ananim 12-poreim disaipel nakri, "Aria ipak douk shopunek pakri pukutukuk eik punak, aka?" <sup>68</sup> Aria Saimon Pita nawanaman baraen nakri, "Debeini, apak mukutukuk nyak aria ta watak manam amiapen? Aria uwok. Baraen douk ta nyutaurum um mupe wosik abom iih nyumneh um douk nyape um nyak atin. <sup>69</sup> Douk apak menek bilip abom aria madukemesh um, nyak douk yopuyopuni arman douk Iruhin nagraehn aria nashopoken nyanaki iri." <sup>70</sup> Aria Jisas nabeimam baraen nakri, "Eik kanak yagraeh ipak 12-poreim armam. Aria ipak 12-poreim, ipak anan douk Satan ananin nugarin." <sup>71</sup> Enyudok baraen

douk nakriyen nenyem Judas, anudok Saimon Iskariot ananin nunganin. Anan douk anan um amudok 12-poreim disaipel, aria anan ta niyabig Jisas um ananim horim aria amam hunaki husuwan hunak hon nugok.

## 7

### *Jisas Ananim Warhim Madae Hunek Bilipuman Uwe*

<sup>1</sup> Enyudok nyanakuk aria Jisas nape agudok shokugi nahobig Galili nape narahaen nanak warub. Amam debeimi Juda hakri hon nugok. Namudok aria madae nunak nurahaen nunak agudok shokugi nahobig Judia uwe, uwok. <sup>2</sup> Aria ahudok nyumnah um eshesh Juda shunek lotu um Iruhin aria shurak auros aria shuwish shupe shunek worigun um douk hurukatin um hutogur. <sup>3</sup> Aria Jisas ananim warhim hakripan hakri, “Nyukutukuk agundok aria nyunak um Judia. Nyunak um nyakishi arpesh shagipesh nyak iri shutik enyudok Iruhin atun neneken iri mour douk nyak nyape nyeneken iri. <sup>4</sup> Aria enen arpen nyukri um ihishmorim shumnek enyen um, enyen douk mare nyunabeshuk nyunek enyenyin mour atin uwe, uwok. Aria douk nyak nyenek enyudok aria ta nyeneken yopugunum, um ihishmorim ta shutrin atin.” <sup>5</sup> Ananim baugem warhim heyagwreh enyudok. Um maresh? Amam shopunek madae hunek bilipuman uwe, uwok.

<sup>6</sup> Jisas nemnek aria nakripam nakri, “Eikib yopubi nyutob um inak um douk watak butogur uwe, uwok. Iih nyumneh eheh douk ipakih. Ipak pakri punak um, aria ipak douk wosik ta punak meibi nyutob ipak pakri punak um. Eik uwok. <sup>7</sup> Eshudok atapishi arpesh ta mare shutripuk yoweisi nabes aria shukepuk agabus ipak uwe, uwok. Eik douk wosik ta shutiwe yoweisi nabes aria ta shukeik agabus. Um maresh? Eik douk yape um yakripesh um eshudok yoweishi inahos douk eshesh shapeum shenekesh iri. <sup>8</sup> Ipak atip wosik punam agundok debeiguni worigun. Eik ta mare arigas inaku uwok. Um maresh? Eikib yopubi nyutob um inak um douk watak butogur uwe, uwok.” <sup>9</sup> Nakripam namudok aria watak napeik Galili.

### *Jisas Nagiguk Nanak um Agundok Debeiguni Worigun Shurak Auros Shupe Um*

<sup>10</sup> Douk ananim warhim hanam agundok debeiguni worigun aria Jisas shopunek nakitak nagiguk nanak. Nanak aria madae nunak yopugunum uwe, uwok. Nanabeshuk atin nanak. <sup>11</sup> Eshesh Juda esheshim debeimi douk hape hauriman agundok shenek worigun um. Hape harigesh hanak hakri, “Patrun anudok arman nape agunum?”

<sup>12</sup> Sabaishi arpesh douk shanaki shantorum um shunek agundok debeiguni worigun. Aria shape shanaboum shokwin baraan sheneyagwreh shokubur atin um Jisas. Enesh shakri anan yopuni arman. Aria enesh shakri anan yoweini arman douk nenek rohw um arpesh meyoh. <sup>13</sup> Aria yopugunum douk madae enesh arpesh shupe shiyagwreh-uman enen baraan uwe, uwok. Um maresh? Eshesh douk shanogugur um Juda esheshim debeimi.

<sup>14</sup> Shenek agundok debeiguni worigun arigha shanak sheyotu orokohun aria Jisas nañak nawish nárub um fruhin ananit debeiti urupat tataoum aria nape nenek skulumesh um Iruhin ananin baraaen. <sup>15</sup> Douk eshesh Juda esheshim debeimi hatrun aria hikitak yowiyokuk. Aria hakri, “Anudok arman douk madae nuneck skul enen apakin skul uwe, uwok. Aria mumam namudok um anan nadukemesh abom nariguk um?”

**16** Namudok aria Jisas nawanamam baraen nakri, “Enyudok baraen eik yenek skulumep-enyi douk madae inek skulumep um eikin baraen uwe, uwok. Yenek skulumep-enyi douk Iruhin neshopoke yanaki iri ananin baraen. **17** Aria enen arpen nyukri abom um nyugipesh Iruhin ananin urkum um, enyen douk ta nyudukem baugenylum enyudok baraen eik yenek skulumep-enyi. Enyen ta nyudukemesh um enyudok baraen douk Iruhin nakripe iri um inaki ikripepen o eik meyoh yananyuhur yakripepen. **18** Arpen douk enyen kanak urkum mur um enen baraen aria nyiyagwrehen iri, enyudok arpen douk nyeyagwreh um nyutuk enyen kanak enyenyin nyeigur nyuto iruhw. Aria eik douk yakri ituk anudok douk neshopoke yanaki iri ananin nyeigur nyuto iruhw. Aria eik, rohwinyi baraen douk madae iyagwrehen atin uwe, uwok. Yeyagwreh adurin atin baraen. **19** Seiwok Moses nekep lo douk Iruhin nakonenyuk iri. Aria douk madae karowin um enen arpen nyusuwen nyugipeshen wosik uwe, uwok. Aria douk ipak douk pakri pubo eik igok um maresh?”

**20** Aria eshudok sabaishi arpesh shawanaman baraen shakri, “Nyak enen yoweiniyi sagab nyapenyen. Omi nyakrium nyen nyugok?” **21** Aria Jisas nawanamesh baraen nakri, “Eik yenek atin Iruhin atun neneken iri mour um sabatih nyumnah gani abarig waiyag aria ipak ihpmorim patrin pakitak yowiyokuk. **22** Aria Moses douk nekepaguk ehudok aih um putah nugamimiruh yegeshiweruh um. Aria ehudok madae punek mour ahi iri uwe nyumnah Sabat, ipak douk shopunek patah nugamimiruh yegeshiweruh. Adur, ehudok aih douk madae Moses nuhuhur nukepehuk uwe, uwok. Iihh douk ipakim popehem yamehem meyoh hehuhur hekepehuk. **23** Ipak apa pagipeseh kabu enyudok lo douk Iruhin nakoguk Moses um enyudok patah nugamimiruh yegeshiweruh um. Aria ahudok nyumnah Sabat douk madae punek mour um uwe, ipak ta penek mour um patah nugamimiruh yegeshiweruh. Aria nubokuhi eik yagabe anan arugeh han iri arman yopun abom ahudok nyumnah Sabat um, ipak douk patiwe aria juwehosip abom um maresh? **24** Mare putik enenyenen nabes meyoh aria pukri enyudok yopunyi o yoweiniyi, namudok uwok. Aria enenyenen ipak ta pudukemen wosik aria douk punek adurih atih aih abom aria punek skelumen.”

### *Eshesh Shakana Shudukemesh Jisas Anan Douk Krais O Uwok*

**25** Enesh armam armago shape Jerusalem iri shatik enyudok Jisas neneken iri mour aria sheneyagwreh shakri, “Arman atun ta anudok, douk apakim debeimi hape apa hauriman um hon nugok iri aka? **26** Aria douk tik. Anan douk nape neyagwreh agundok sabaishi shantorum shapeum, aria amam douk madae hukri uwok um niyagwreh uwe, uwok. Aria amam douk hadukemesh hakri anan Krais douk Iruhin nagrahan aria neshopokan nanakmori nunarao arpesh iri aka? **27** Aria ananibur wabur douk madukemabur. Aria abudok nyutob Krais nutogram, apak ta mare enen arpen nyudukem um abrudok wabur douk anan nunaki abur iri, uwok.”

**28** Jisas douk watak nape apa nenek skulumesh baraen gani numun narub atudok Iruhin ananit debeiti urupat tataoum. Aria anan watak neyagwreh debeiniyi baraen nakri, “Adur, ipak douk pakri ipak padukem eik wosik. Wabur yanaki abur iri shopunek pakri padukemabur wosik. Aria eik douk madae inakumori eikim urkum uwe, uwok. Anudok neshopok eik yanaki iri douk adurin abom. Aria ipak douk madae pudukem anan uwe, uwok. **29** Aria eik douk yadukeman. Um maresh? Eik douk yani anan wape aria neshopoke yanaki.”

<sup>30</sup> Douk nakri enyudok baraen aria amam debeimi Juda hakri husuhan hunak huweshikan nupe shunuweshik-ati urupat. Aria madae anan atun nuweman wis uwe, uwok. Um maresh? Abudok nyutob douk ta shon nugok um douk watak butogur uwe. <sup>31</sup> Aria sabaishi arpesh shenek bilip um Jisas aria shakri, “Abudok nyutob Krais nutogur obi nyutob, aria anan douk ta nutogur nunek sabainyi Iruhin atun neneken iri mour nyishagrakuk enyudok anudok arman neneken iri aka? Aria ta uwok.”

### *Debeimi Heshopok Anam Heyoh Iruhin Ananit Debeiti Urupat Iri Um Hunak Husuhwi Jisas*

<sup>32</sup> Arigaha aria amam Farisi hemnek um eshudok sabaishi arpesh shape sheneyagwreh shanak shokubur atin um enyudok Jisas neneken iri. Namudok aria amam hani amam debeimi pris heshopok anam armam heyoh Iruhin ananit debeiti urupat iri um hunak husuhw Jisas hurani.

<sup>33</sup> Aria Jisas nakripam nakri, “Eik ta ini ipak mupe banab nyutob meyoh. Aria ta watak itanam inak um anudok douk neshopoke yanaki iri. <sup>34</sup> Aria ipak douk ta pupe purime, aria ta mare putiwe uwe, uwok. Agundok eik inak ipeum, ipak ta mare punaku.”

<sup>35</sup> Aria eshesh Juda esheshim debeimi heneyagwreh hakri, “Nakri ta nunak agnum, um apak ta mubirak mare mutrun um? Aria nakri ta nunam eshesh Grik esheshirub debeirubi warub douk enesh apak Juda shanak shapenyarub iri aka? Um nakri nunak nunek skulumesh Iruhin ananin baraen eshesh Grik aka? <sup>36</sup> Anan douk nakri, ‘Ipak ta pupe purime, aria ta mare putiwe uwe, uwok.’ Aria shopunek douk nakri, ‘Ipak ta mare punaku agundok douk eik inak ipeum, uwok.’ Baugenyum enyudok baraen douk nyakri mumam?”

### *Jisas Nakri Um Iruhin ananin Mishin Douk Ta Nyunek Arpesh Shupe Wosik Abom Ihih Nyumneh Iri*

<sup>37</sup> Ahudok hagiguk iri nyumnah um agundok debeiguni worigun nutuh um douk debeihi nyumnah abom. Aria Jisas nikitak neyotu neyagwreh debeg atin aria nakri, “Eshudok arpesh douk abar baesh iri, eshesh douk ta shunakmori eik aria ta ikesh anabar abar shubroh. <sup>38</sup> Eshudok arpesh douk shusuhw eikin baraen shugipesen iri, abar douk ta bunekesh shupe wosik abom ihih nyumneh kabi douk madae bugeru iri worub iri ta bur bupe namudok gani numun esheshiruh aparuh aria butoguri aduk.” Enyudok ta nyutogur kabi baraen nyetem Iruhin ananik Buk iri nyakrium. <sup>39</sup> Jisas douk nakri enyudok baraen um Iruhin ananin Mishin. Nakripesh um agundok douk shenek bilip um anan iri anah nyumnah ta shuraen nyupenyesh um. Aria seiwok arigaha douk Iruhin Ananin Mishin douk madae nyunaki nyuwishesh uwe, uwok. Um maresh? Jisas douk watak shon nugok aria nikitaki nuto um iruhw heven nukih nurao debeinyi nyeigur uwe.

### *Eshudok Sabaishi Arpesh Douk Enesh Shakri Jisas Anan Krais Aria Enesh Shakri Uwok*

<sup>40</sup> Douk shemnek enyudok baraen aria enesh shakri, “Adur atin anudok arman douk anudok profet douk Iruhin nakri abom um ta neshopokan nunakmori agundok atap iri.” <sup>41</sup> Aria enesh shakri, “Uwok. Anan Krais douk Iruhin nagraehan aria neshopokan nanakumori nurao arpesh iri.” Aria enesh shakri, “Krais ta mare nukitak agundok shokugi nahobig Galili, uwok. <sup>42</sup> Um maresh? Baraen nyetem Iruhin ananik Buk iri nyakri Krais ta nukitak apudok Devit ananip awirop, aria amakek ta kwunabuki aburdok wabur Betlehem douk seiwok King Devit napeum.” <sup>43</sup> Namudok aria shanadi-yogurum. Enesh shakri Jisas anan adur anan Krais. Aria enesh

shakri uwok, shenek rohw. <sup>44</sup> Anam armam douk hakri husuwan hunak huweshikan nupe, aria madae enen karowin arpen nyukri um nyuweman wis uwe, uwok.

### *Eshesh Juda Esheshim Debeimi Madae Hunek Bilip Um Jisas Uwe*

<sup>45</sup> Namudok aria amudok heyoh Iruhin ananit debeiti urupat iri watak hatanam hanak um amam debeimi pris hani amam Farisi. Hatanam aria amudok debeimi harigam hakri, “Ipak madae pusuwan purani uwe um maresh?” <sup>46</sup> Aria amam hawanamam baraen hakri, “Riguk douk madae enen karowin arpen gamo nyiyagwreh kabi douk anudok arman neyagwreh um uwe, uwok.”

<sup>47</sup> Amam Farisi hemnek aria hawanamam baraen hakri, “Aria ipak douk shopunek neneh rohwumep um ananin baraen aka? <sup>48</sup> Ipak douk da patik um apak anan debeini o anan Farisi neneh bilip um Jisas aka? Aria uwok meyoh. <sup>49</sup> Aria eshudok sabashi arpesh douk shenek bilipuman iri, eshes douk madae shudukem Iruhin ananin lo uwe, uwok. Namudok aria Iruhin ta nunekumesh debeinyi baraen aria ta shupe yowesh abom.”

<sup>50</sup> Anan arman shahwaran um Nikodemus iri douk anan um amudok debeimi armam Farisi. Anan douk riguk nanak natik Jisas iri. Anan nikitak aria nakrip amudok debeimi nakri, <sup>51</sup> “Yaipo, kabi douk apakin lo seiwok Iruhin nakoguk Moses enyi nyakrium, apak ta mare arigas mukri enen arpen enyen douk nyenek yoweishi inahos, uwok. Apak ta mumnek enyenyin baraen douk mudukemesh um eshudok enyen nyenekesh iri iyoh, aria ta mukri.”

<sup>52</sup> Aria hawanaman baraen hakri, “Aria nyak douk shopunek enen um eshes Galili aka? Nyak gamo nyutarih baraen nyetem Iruhin ananik Buk iri um, ta nyudukemesh um anan profet ta mare anan nikitak shokugi nahobig Galili, uwok.”

<sup>53</sup> [Douk arigaha ihishmorim arpesh shanak sisig-ikuk um eshesig urusag.

## 8

### *Harauri Onok Armatok Douk Kwonek Wehrur Kwani Kupainari Arman Iri Um Jisas*

<sup>1</sup> Aria Jisas natoum yoduhw shahwarohwum Oliv iri. <sup>2</sup> Ruwahepih ruhur atur wata shopunek nikitak nanak nawish numun um aburdok nabur Iruhin ananit debeiti urupat tataoum. Aria ihishmorim arpesh shanaki shantorum aria nabuh naope neneh skulumesh um Iruhin ananin baraen.

<sup>3</sup> Aria amam douk henek skulumesh um lo iri hani amam Farisi harauri onok armatok douk shaparugok kwonek wehrur kwani kupaini arman iri. Harakwi aria hakripok kweyotu agundok douk ihishmorim shantorum shapeum. <sup>4</sup> Aria harig Jisas hakri, “Debeini Tisa, okwudok kworao arman iri armatok douk shaparugok kwonek yoweishi inahos um kwonek wehrur kwani kupaini arman. <sup>5</sup> Enen apakin lo seiwok Iruhin nakoguk Moses enyi douk nyakri, armatok kwunek enyudokmori iri douk shukwumok utabor arigaha kwugok. Aria nyak douk nyakri mumam?” <sup>6</sup> Harigan namudok um hakri hukwiraehan um ta nukri mare shubo okwudok armatok aria ta hukri anan douk nabrig enyudok lo aria ta hunekuman kwot.

Aria baraen douk madae nukripam enen aria nabuh natao meyoh nakwu ananah hah naope nowem enen baraen atap. <sup>7</sup> Amam watak heyotu hape harigan aria nikitak neyotu iruhw aria nakripam nakri, “Ipak mein arman

douk madae nunek enesh yoweishi inahos iri uwe, anan douk wosik ko nurik nukwumok marik iri utom.”

<sup>8</sup> Nakripamuk namudok aria watak nabuh natao atap nape nowem enen baraen amnab. <sup>9</sup> Douk hemnek enyudok baraen aria ihim-morim atun atun hape hakutukuk agundok aria hanak. Amam takwiym harik aria eshudok enesh douk shape shakutukuk agundok shanak. Shanak arigaha arigaha aria shakutukuk Jisas atun napeik. Okwudok armatok otuk douk wata kweyotu agundok Jisas nataoum.

<sup>10</sup> Jisas nakitak neyotu aria narigok nakri, “Nya, amudok armam amum? Douk madae anan niyotuguk um nunekumen baraen um eshudok yoweishi inahos nyak nyenekesh iri aka?” <sup>11</sup> Aria kwakripan kwakri, “Debeini, madae anan niyotuguk uwe, uwok.”

Aria nakripok nakri, “Eik shopunek namudok atin. Eik ta mare inemen baraen um yoweishi inahos nyak nyenekesh iri, uwok. Nyak wosik kare nyunak aria mare ta nyunek enesh yoweishi inahos shopunek uwe, uwok.”]

### *Jisas Anan Douk Lait Douk Tabuhi Um Ihish Eshudok Atapishi Arpesh Shrugun Um*

<sup>12</sup> Jisas ta nakripesh enyudok baraen shopunek nakri, “Eik kanak kabi douk lait um. Eik douk yanaki yabuhi agundok atap um ihish arpesh wosik shunatrugun. Aria eshudok arpesh douk shusuhw eikin baraen shugipeshen iri, eshesh ta mare shurahaen arukwutigun um eshudok shunek yoweishi inahos iri uwe, uwok. Aria eshesh ta shupe shurahaen lait tabuhi um atugun, um eshudok shunek yopishi atin um. Aria eshesh douk ta shupe wosik abom iih nyumneh.”

<sup>13</sup> Douk amam Farisi hemnek namudok aria hakripan hakri, “Nyak nyenek rohw. Nyak douk nyak atin nyape nyakripap baraen um nyak kanak. Namudok aria nyakin baraen ta mare mukri adurin uwe, uwok.”

<sup>14</sup> Aria Jisas watak nawanamam baraen nakri, “Enyen douk adur um eik atuwe yape yakripep baraen um eik kanak, aria eikin baraen douk adurin atin. Umum maresh? Eik douk yadukem agundok douk yape aria yikitak yanamori gani agundok ta watak ikitak inak um. Aria ipak douk madae pudukem agundok eik yape aria yikitak yanamori gani agundok ta watak inak um uwe, uwok. <sup>15</sup> Ipak shopunek pagipesh agundok atapih aih aria penek skelim arpesh. Aria eik madae inek skelim enen arpen enyenyih aih uwe, uwok. <sup>16</sup> Aria douk ikri inek skelim enen arpen enyenyih aih akure, eik ta inek skelumen adur atin. Um maresh? Enyen douk madae eik atuwe inek skelumen uwe, uwok. Aria Yain douk neshopoki eik yanaki aria douk shopunek nani eik wonek mour. <sup>17</sup> Enen baraen nyetem ipak kanak ipakin lo iri douk nyakri namudok. Nyakri, ‘Douk biom armam hiyawreh hukri atin baraen um, aria amamin baraen douk adurin.’ <sup>18</sup> Eik yani eik Yain douk wonekesh namudok. Eik douk yeyawreh yakripepum eik kanak. Aria eikin Yain douk neshopok eik yanaki aria douk shopunek nani eik weyagwreh enyudok atin baraen um eik.”

<sup>19</sup> Aria harigan hakri, “Nyakin Yaken douk nape agnum?”

Aria Jisas nawanamam baraen nakri, “Ipak douk madae pudukem eik o pudukem eikin Yain uwe, uwok. Douk pudukem eik akure, eikin Yain shopunek ta pudukeman.”

<sup>20</sup> Jisas nakripesh enyudok baraen abudok nyutob nape nenek skulumesh um Iruhin ananin baraen obi nyutob. Nakripeshen numun um aburdok nabur Iruhin ananit debeiti urupat tataoum hurukatinyum amudok rum douk shobuk ofaibor utabor bakus um. Nape nakripesh aria madae anam

armam hukitak husuwan hunak hunekuman baraen uwe, uwok. Um maresh? Ananib nyutob um shon nugok um douk watak bunaki uwe, uwok.

*Jisas Nakri, "Ipak Ta Mare Punak Agundok Douk Eik Inak Um"*

<sup>21</sup> Aria Jisas watak nakripesh nakri, "Eik douk ta inakuk aria ipak ta pupe purime. Ta pupe purime aria ipakish yoweishi inahos ta watak shupe aria shep pugok. Pugok aria ta mare punaku agundok eik inak ipeum uwe, uwok."

<sup>22</sup> Namudok aria eshesh Juda esheshim debeimi heneyagwreh hakri, "Namudok mumam, um nakri, 'Ipak ta mare punaku agundok douk eik inak ipeum?' Aria nakri um ta anan kanak nunobo nugok aka, uwok?"

<sup>23</sup> Aria Jisas watak nakripam nakri, "Ipak douk agundokish arpesh aria eik douk yape iri gani iruhw iri. Ipak douk agundok atapishi, aria eik douk madae agundok atapin arman uwe, uwok. <sup>24</sup> Douk namudok aria eik douk yakritep yakri ipakish yoweishi inahos ta watak shupe aria ta pugok. Namudok aria douk ipak mare punek bilip pukri Eik Douk Seiwock Yape Namudok Atin Iri Um,\* namudok aria ipakish yoweishi inahos douk ta watak shupe aria ipak ta pugok."

<sup>25</sup> Douk shemnek namudok aria sharigan shakri, "Nyak meinyi arpen?" Aria nawanamesh baraen nakri, "Eik douk anudok arman douk nubokuhi watak sagomatin yakripepum. <sup>26</sup> Eik sabainyi baraen douk yakri ikripepum yoweishi inahos ipak penekesh iri aria inemep kwotogum. Aria abudok nyutob douk ta uwok. Douk ta ikrip ipak eshudok atapish arpesh enyudok baraen douk yemnek anudok neshopoke yanaki iri nakriyen iri. Anan douk adurini aria inahos wokan iri arman."

<sup>27</sup> Aria eshesh douk madae shudukemesh um anan nepe nakripesh um ananin Yaken um uwe, uwok. <sup>28</sup> Namudok aria watak nakripesh nakri, "Abudok nyutob putuk Eik Anudok Arman douk yatogur adurin arpen iri piyaur rowog kruse obi, abudok nyutob ta douk pudukeme wosik pukri Eik Douk Seiwock Yape Namudok Atin Iri. Aria abudok nyutob ta douk pudukeme um ihinyumori yeneken iri douk madae iyagwreh eik atuwe ineken uwe, uwok. Aria ta pudukemesh pukri baraen yakripepen iri douk Yain neyabigeyen aria douk yakripepen. <sup>29</sup> Anudok neshopok eik yanaki iri douk nani eik wape iihh nyumneh madae nukutukuk eik atuwe ipeik uwe, uwok. Um maresh, iihh nyumneh eik yape um yenek enyudok douk anan nakriyen iri." <sup>30</sup> Jisas watak nepe nakripesh enyudok baraen atin, aria sabaishi arpesh adur shasuhwen dodog shagipeshen.

*Adurinyi Baraen Ta Nyukweshih Arpesh Um Esheshish Yoweishi Inahos Aria Shupe Wosik*

<sup>31</sup> Namudok aria Jisas watak nakrip eshudok Juda douk shasuhw ananin baraen shakri adurin iri nakri, "Douk ipak pusuhw eikin baraen dodog pugipeshen um, ipak adur ta putogur eikir iri douk pugipesher eik iri.

<sup>32</sup> Putogur eikipari aria ta pudukem adurinyi baraen. Aria enyudok adurinyi baraen ta nyukweshih um ipakish yoweishi inahos aria pupe wosik atin."

<sup>33</sup> Aria eshesh watak shawanaman baraen shakri, "Apak douk Abraham ananish barheshish. Aria douk madae anesh arpesh shuweshikap mupe munemesh mour moyoh uwe, uwok. Aria namudok nyakri um, um nyakri apak ta mutukweshih mupe wosik atin um ta mumam?"

---

\* **8:24:** Baugenym enyudok baraen um Jisas nakri anan douk Seiwock Nape Namudok Atin Iri Um, anan nakri um anan douk adurin Iruihin. Aria douk baraen nyetem Kisim Bek 3:14 iri nyani enen nyetem Ais 43:10 iri nyakrium. Tik enyudok atin baraen shopunek nyetem Jon 8:28, 58 aria Jon 13:19

<sup>34</sup> Aria Jisas watak nawanamesh baraen nakri, “Adur atin yakritep. Ihishmorim arpesh douk shape shenek yoweishi inahos iri, eshesh douk yoweishi inahos showeshikesh dodog aria shenekesh shape shenemen mour meyoh. <sup>35</sup> Arpen douk nyape shakamum kupainyi nyape nyenek mour meyoh anat urupat iri, enyen douk nyenek mour meyoh. Ta mare nyupe opudok awirop uwe, uwok. Awiropinari ananin nunganin wosik ta nupe iih nyumneh. <sup>36</sup> Namudok aria eik Iruhin ananin Nunganin ikweshihep-aguk um yoweishi inahos um, aria ipak adur ta putukweshih pupe wosik abom. <sup>37</sup> Eik yadukemesh um ipak douk adur Abraham ananish barheshish. Aria douk pakri pubo eik igok. Um maresh? Eik yakritep-enyi baraen douk madae pusuwen uwe, uwok. <sup>38</sup> Eik douk yakritep baraen um eshudok eikin Yain neyabige um. Aria ipak penek ehudok aih douk paraeh um ipakin yaken iri.”

<sup>39</sup> Aria eshesh watak shabeiman baraen shakri, “Apakin yaken douk Abraham.”

Jisas nemnek aria nebeimesh baraen nakri, “Douk ipakin yaken Abraham akure, aria enenyener peneken iri ta nyudukem enyudok yopinyi seiwok Abraham neneken iri atin. <sup>40</sup> Eik douk yakritep sabainyi adurinyi baraen douk yemnek Iruhin nakripe enyi. Aria ipak douk pakri abom um pe igok. Abraham douk madae nunekesh eshudokmori yoweishi inahos uwe, uwok. <sup>41</sup> Eneshenesh yoweishi inahos penekesh iri douk penek enyudok ipakin yaken neneken iri.” Aria eshesh watak shakripan shakri, “Apakiyu amakeniyu madae wiyotu yeh upubuki uwe, uwok. Apak douk atun Yain meyoh. Anan douk Iruhin atun. Apak douk ananish batowish.”

<sup>42</sup> Aria watak nakripesh nakri, “Aria adur Iruhin ipakin Akure, ipakip urkwip ta punawasham eik. Um maresh? Eik douk yani Iruhin wape iri aria yanaki aria douk enyudok yape. Madae ikitak inamori eikim urkum uwe, uwok. Anan neshopoke aria douk yanaki. <sup>43</sup> Ipakip urkwip madae purum eikin baraen wosik aria pudukemen uwe um maresh? Ipak madae pudukemen uwe, ipak douk pakri uwok um pumnek eikin baraen aria pogah ipakigos arigos. <sup>44</sup> Ipak douk adur atin ipakin yaken Satan ananish batowish. Aria douk adur dodogowip atip um punek yoweishi inahos douk anan mishin nyakitak-umesh iri. Seiwok sagomatin wata baugos um nabo arpesh shagok arigaha douk. Enenyener adurinyi baraen douk madae nugipeson o niyagwrehen uwe, uwok. Um maresh, ehudok adurihi aih douk madae eneh hupenyan uwe, uwok meyoh. Abudok nyutob niyagwreh enen rohwin baraen atin, enyudok douk adur nagipesh ananah aih atih. Um maresh? Anan douk napeum nenek rohw aria adur atin baugos um agundok shagiyagig um. <sup>45</sup> Eik douk yakritep adurinyi baraen. Aria douk namudok, aria madae punek bilipume uwe, uwok. <sup>46</sup> Ipak ta wosik enen arpen nyukripe um enesh yoweishi inahos douk yenekesh iri aka, uwok? Aria uwok meyoh. Eik douk yakritep adurinyi baraen, aria ipak douk madae pusuhw eikin baraen pukri adurin uwe um maresh? <sup>47</sup> Ihish Iruhin ananish arpesh douk shemnek ananin baraen aria shasuhwen dodog shagipeshen. Aria ipak douk adur madae Iruhin ananish arpesh uwe, uwok meyoh. Namudok aria douk madae pumneken atin uwe ananin baraen.”

### *Jisas Narik Nape Aria Abraham Douk Shanabuki*

<sup>48</sup> Aria eshesh Juda esheshim debeimi hawanaman baraen hakri, “Riguk apak douk makripen adurin baraen. Nyak douk anan yowen meyoh iri arman douk nyanaki Samaria iri. Aria douk enen yoweinyi sagab nyapeyen.”

<sup>49</sup> Aria nawanamam baraen nakri, “Eik madae enen yoweinyi sagab nyupeye, uwok. Aria eik douk yatuk eikin Yain ananin nyeigur nyato iruhw aria ipak douk pabo eikin nyabuh. <sup>50</sup> Eik douk madae ipeum ituk eikin nyeigur nyuto iruhw uwe, uwok. Aria anan douk nohur arpesh aria eshesh shatuk eikin nyeigur nyato iruhw. Aria anan douk ta nunemesh debeimy baraen eshudok douk sheke agabus eik iri. <sup>51</sup> Adur atin yakriep. Eshudok arpesh douk shusuhw eikin baraen dodog shugipeshen iri, eshesh ta mare shugok, uwok. Ta adur shupe iih nyumneh.”

<sup>52</sup> Aria eshesh Juda esheshim debeimi watak hakripan hakri, “Douk apak adur madukemesh um nyak adur enen yoweinyi sagab nyapeyen. Abraham nani amam profet douk seiwok hagok. Aria nyak nyakri, ‘Enyudok arpen douk nyusuhw nyakin baraen dodog nyugipeshen iri ta mare nyugok uwe, uwok. Ta adur nyupe iih nyumneh.’ <sup>53</sup> Nyak nyakri nyak anan debeini nyariguk apakin yamenen Abraham aria anan nabuhuk atap, aria uwok? Anan douk seiwok nagok aria amam profet douk shopunek seiwok hagokuk. Aria nyak nyakri nyak douk adur mein arman?”

<sup>54</sup> Aria Jisas watak nakri, “Douk eik ipeum ituk eikin nyeigur nyuto iruhw akure, eik ta itogur nyeigur wokan iri arman meyoh. Aria anudok natuk eikin nyeigur nyato iruhw iri douk eikin Yain. Aria douk adur anudok douk ipak pakri puhwaran um ipakin Iruhin iri. <sup>55</sup> Ipak douk madae pudukeman uwe, uwok. Eik wosik adur yadukeman. Namudok aria douk eik ikri eik madae idukeman uwe, eik douk ta shuhware yenek rohw iri kabi douk ipak um. Aria eik douk adur yadukeman wosik aria yagipesh ananin baraen. <sup>56</sup> Ipakin yamenen Abraham douk adur nanadudareh um nakri nutik eikih nyumnah um inaki agundok atap um. Anan douk natik eik agundok yanakumori um aria douk adur nanadudareh.”

<sup>57</sup> Aria eshesh Juda esheshim debeimi watak hakripan hakri, “Abraham seiwok nagok aria nyak, nyakish kwarahos douk wata sabaishi shunak shutogur 50-poreish uwe, watak. Aria nyak douk nyakri nyatik Abraham aka? Nyak nyenek rohw.” <sup>58</sup> Aria Jisas nebeimam baraen nakri, “Adur atin yakriep. Abraham anan douk wata shunabuki uwe aria Eik Douk Seiowk Yape Namudok iri.”<sup>†</sup> <sup>59</sup> Douk nakri enyudok baraen aria hohuri utabor um hakri hon nugok. Aria nanabeshuk aria nakutukuk agundok Iruhin ananit debeiti urupat tataoum aria natogur nanak.

## 9

### *Jisas Nagabe Anan Nabes Seshukanari*

<sup>1</sup> Jisas nepe nanak aria natik anan nabes seshukanari arman. Anan douk seiwok amakek kwanabuki atun um nabes seshukan nepe namudok atin.

<sup>2</sup> Aria apak Jisas ananim disaipel marig Jisas makri, “Tisa, omi nyenekan aria yoweishi shenekan aria anan douk nabes seshukan nor ananish amakek okwokwihiw apahw aria kwanabuki? Ananish yoweishi inahos meyoh shenekan aka, ananish amakenyish esheshish yoweishi inahos shenekan?”

<sup>3</sup> Douk amam harigan namudok aria Jisas nakri, “Anan nabes madae sishukan um yoweishi inahos anan nani ananish amakenyish esheshish uwe, uwok. Anan douk nabes seshukan um eik iyabig arpesh um enyudok douk Iruhin ta watak nugabeyan um. <sup>4</sup> Aria douk abudok nyutob douk kabi nyumnah um, aria apak ta mupe munek Iruhin douk neshopok eik yanaki iri um ananin mour. Aria anab ta bunaki iri nyutob ta kabi douk wab um. Aria abudok nyutob ta mare enesh arpesh shupe shunek Iruhin ananin

<sup>†</sup> **8:58:** Putik futnot Jon 8:24

mour uwe, uwok. <sup>5</sup> Douk abudok nyutob eik yape agundok atap um, eik yape kabi douk lait um. Aria eik yenek sabainyi yopinyi mour yopugunum atugun um sabaishi shutiwe aria ta shugipeshe munek enyudokmori atin yopinyi mour.”

<sup>6</sup> Douk Jisas nakriyuk namudok aria nokuseh amnab nakwu arpigas nenegab batogur kabi masir um. Aria noruhur naraeyok anudok nabes se-shukanari ananis nabes. <sup>7</sup> Douk naraeyokuman aria nakripan nakri, “Nyak nyunak waiyag shahwaragum Siloam iri aria nyishrokuh.” Baugennum enyudok nyeigur Siloam douk shakri “Neshopokan nanak.” Douk nanak neshrokuh aria anan nabes watak satrugun aria natanamori um urupat.

<sup>8</sup> Aria eshudok douk shani anan shape atugun iri shani eshudok riguk shatik nape nanakrep arpesh um shukon eshudok eneshenesh iri douk shatrun um watak natrugun um aria shakri, “Nani douk nabes seshukan riguk nape nanakrep arpesh um shukon eshudok eneshenesh iri o nani kupaini?”

<sup>9</sup> Aria enesh shakri, “Douk anan atun.” Aria enesh shakri, “Anan uwok. Anan douk kabi anudok nabes seshukanari um.” Aria anan kanak adur nakri, “Douk eik atuwe, nabes seshuke iri.”

<sup>10</sup> Nakripesh namudok aria eshesh sharigan shakri, “Nyak nyenekas mumam nyakis nabes um douk watak nyatrugun um?” <sup>11</sup> Nemnek aria nebeimesh baraan nakri, “Anan arman shahwaran um Jisas iri nanaki nohur amnab nokusehab neneke masir aria naraeyokume nabes. Anan naraeyokume aria neshopoke yanak yeshrokuh agudok waiyag Siloam. Aria eik yikitak yanak yeshrokuh aria eikis nabes watak satrugun. Aria douk eik yatrugun.” <sup>12</sup> Aria eshesh sharigan shakri, “Anudok Jisas douk nape agunum?” Aria anan nakri, “Eik madae idukeman uwe, uwok.”

### *Amam Farisi Hatik Anudok Douk Riguk Nabes Seshukanari*

<sup>13</sup> Aria eshesh sharao anudok riguk nabes seshukanari shanak um amam Farisi. <sup>14</sup> Aria ahudok nyumnah Jisas nokuseh amnab nagabe anudok nabes seshukanari ananis nabes um douk Sabat, ahudok nyumnah douk lo nyakri mare shunek enen mour um uwe, uwok. <sup>15</sup> Douk sharan shanak shatogur um gani amam Farisi hapeum aria amam hariganum agundok anan nenekeh mumam aria douk watak natrugun um. Aria anan nakripam nakri, “Anan nokuseh amnab neneke batogur masir aria naraeyokume eikis nabes. Naraeyokume douk yanak yakruparuk aria watak yatrugun.” <sup>16</sup> Nakri namudok aria anam amam Farisi hakri, “Anudok nagabeiman nabes anudok arman iri, anan douk madae Iruhin nishopokan nunaki iri uwe, uwok. Um maresh? Anan douk madae nugipesh enyudok lo um mare enesh shunek enen mour ahudok nyumnah Sabat um uwe, uwok.”

Aria anam hakri, “Aria anan douk anan napeum neneke yoweishi inahos iri, anan douk ta mare nuneke enyudokmori Iruhin atun neneken iri mour uwe, uwok.” Douk heyagwreh namudok aria anam hore enep urkwip aria anam hasuhw enep.

<sup>17</sup> Aria amam Farisi watak shopunek gamo harig anudok riguk nabes seshukanari hakri, “Nyak nyakriyan mumam anudok nagabeimen nabes iri? Anan douk anan yopini arman aka, anan yoweini?”

Aria anan nawanamam baraan nakri, “Anan douk anan profet.” <sup>18</sup> Anan nakri namudok, aria amudok debeimi Juda douk madae hukrium hunek bilip um agundok riguk anan douk nabes seshukan aria douk watak natrugun um uwe, uwok. Aria amam henekumesh baraan ananish amakenyish shanaki. <sup>19</sup> Douk shanaki aria harigesh hakri, “Anudok douk

ipakin nunganin? Aria shopunek anan douk seiwok amakek kwanabuki aria nabes seshukan nepe namudok atin? Aria anan douk nenek maresh, um douk watak natrugun um?”

<sup>20</sup> Aria ananish amakenish shakri, “Adur, anudok douk ohwakin nunganin. Aria abudok nyutob amakek kwanabuki atinyum anan madae nutrugun uwe, uwok.” <sup>21</sup> “Aria ohwak douk madae udukemesh uwe um anan nenekeh mumam aria douk watak natrugun um. Shopunek ohwak douk madae udukem anudok nagapesh-uman nabes iri uwe, uwok. Anan douk nubokadae yopun. Porig anan kanak ba nukriep!” <sup>22</sup> Eshesh Juda esheshim debeimi douk riguk habo baraen, um hakri meishi arpesh shukri Jisas anan douk Iruhin nagraehan aria neshopokan nanakmori nunarao arpesh um, amam ta mare hukutishuk shuwish atudok eshesh Juda shape sheneyagwreh baraen-ati urupat uwe, uwok. <sup>23</sup> Douk namudok aria anudok nabes seshukanari ananish amakenish shanogugur aria shakri, “Anan douk nubokadae yopun. Porig anan kanak ba nukriep.”

<sup>24</sup> Aria amam hahwar anudok nabes seshukanari anah shopunek aria harigan hakri, “Nyak nyuhur Iruhin ananin nyeigur um kadak nyak ta nyukri adurin atin bareaen! Apak madukemesh um anudok arman nagabeimen nabes iri douk anan neneke eneshenesh yoweishi inahos iri.”

<sup>25</sup> Aria anan nawanamam bareaen nakri, “Eik madae idukemesh uwe. Anan douk anan yopini aka, anan douk nenek yoweishi inahos iri. Aria adur eik yadukemen iri douk anudok. Seiwok nabes seshuke, aria douk watak yatrugun.” <sup>26</sup> Aria amam debeimi Juda harigan hakri, “Anan neneken mumam aria douk nagabeimen nabes nyatrugun?”

<sup>27</sup> Aria anan nawanamam bareaen nakri, “Eik douk iganigadae yakriep, aria ipak douk pakri uwok um pumnek. Ipak pakri pumnek sabaih atih um maresh? Aria ipak douk shopunek pakri pugipes anan putogur ananish disaipel aka?”

<sup>28</sup> Aria amam heyokasan hakri, “Nyak douk anudok nagabeimen nabes iri ananin disaipel. Apak uwok. Apak douk Moses ananis disaipel. <sup>29</sup> Apak madukemesh um seiwok Iruhin douk nani Moses heyagwreh. Aria douk anudok Jisas, apak douk madae mudukemesh um agundok anan nanamori uwe, uwok.”

<sup>30</sup> Aria anudok seiwok nabes seshukan iri nakri, “Enyudok douk adur enen anahaehin dodogowinyi mour aria eik yakitak yowiyokuk um ipak madae pudukem anan uwe, uwok! Anan nagabeime eikis nabes aria ipak douk madae pudukemesh um anudok anan napeum aria nakitak nanamori uwe aka. <sup>31</sup> Apak madukemesh um Iruhin ta mare numnek enyudok douk shenek eneshenesh yoweishi inahos iri sharigan umen iri, uwok. Anan ta numnek eshudok douk shenek lotuman iri aria shagipes ananish aih aria urkum iri atish. <sup>32</sup> Seiwok arigah arigaha douk, apak douk madae mutik mumnek um enen arpen nyagabeimen nabes kupainyi, douk amakek kwenyubuki atinyum seshuken sape namudok aria enyen ta nyutrugun uwe, uwok. <sup>33</sup> Aria anudok arman nagabe eikis nabes aria eik yadukemesh namudok arman douk madae nini Iruhin hupe iri aria nushopokan nunaki iri, anan ta mare nunek enen enyudokmori mour, uwok.”

<sup>34</sup> Aria amam Farisi nyirub juwehosirub aria hakripan hakri, “Riguk watak amakek kwenyubuki atin um nyenek eneshenesh yoweishi inahos arigaha douk aria nyakri nyupe nyunek skulumap um baugeneyum bareaen um Iruhin ananin bareaen apak?” Aria amam hasuwan hawashan natogur aduk atudok eshesh Juda shantorum shape sheneyagwreh bareaen-ati urupat.

*Eshudok Douk Madae Shunek Bilip Iri Uwe, Eshesh Douk Shape Kabi Nabes Seshukesh Iri Um*

<sup>35</sup> Jisas nape aria nemnek um enyudok eshesh Juda esheshim debeimi hasuhw anudok riguk nabes seshukan iri aria hawashan natogur aduk um. Nemnek aria nakitak nauriman nanak. Douk nanak naparugan aria narigan nakri, “Nyak nyenek bilip um Anudok Arman douk natogur adurinyi arpen iri aka, uwok?” <sup>36</sup> Aria anan nawananaman baraen nakri, “Debeini, Anudok Arman natogur adurinyi arpen iri douk mein? Yakri nyukripeiman aria eik ta inek bilipuman.”

<sup>37</sup> Aria Jisas nakripan nakri, “Nyak douk nyatrun. Anudok arman, anan douk nani nyak pape peyagwreh.” <sup>38</sup> Douk Jisas nakri namudok aria anudok arman nakri, “Debeini, eik yenek bilip um nyak.” Aria nabuh noduk ohrubus natao hurukatin um Jisas natuk ananin nyeigur nyato iruhw.

<sup>39</sup> Aria Jisas nakripan nakri, “Eik yanaki agundok atap um inek skelim arpesh aria isiyaesh. Yanakmori eshudok douk nabes seshukesh madae shudukem Iruhin iri uwe um ta shutrugun, aria eshudok douk wosik shakana shutrugun shudukem Iruhin iri watak nabes sishukesh.”

<sup>40</sup> Jisas nakri namudok aria anam Farisi douk hani anan heyotu agundok iri harigan hakri, “Nyak nyakri apak douk shopunek nabes seshukap aka?”

<sup>41</sup> Aria Jisas nakripam nakri, “Aria ipak nabes sishukep akure, Iruhin ta watak nugabeyep aria ipak ta mare enesh yoweishi inahos shupenyep, uwok. Aria ipak douk pakri ipak patrugun. Douk namudok aria baraen um ipakash yoweishi inahos douk watak shapenyep.”

## 10

*Wobuwobren Baraen Um Narub Douk Sipsipahos Sheyotu Arub Iri*

<sup>1</sup> Jisas nakripesh nakri, “Adur atin yakripep, arman douk madae nuwishi wit arbudok sipsipahos sheyotu arub iri narub, aria naproki nubi nuwishi iri douk madae yopini arman uwe, uwok. Anan douk nakwuaruh atuh iri. <sup>2</sup> Aria arman douk nuwish wit um arbudok narub meyoh um arbudok sipsipirub narub iri, anan douk adur nape neyoh eshudok sipsipahos iri.

<sup>3</sup> Abudok nyutob neyoh sipsipahos iri nukri nunaki obi nyutob, aria anan nape neyoh wit um arbudok narub iri ta nukitak nijikuman wit. Nijikuman aria ta nuwish norig eshesh atin atin sipsipahos um eshesheish nyeiguhw. Norigesh douk shumnek ananah mah aria ta nurikumesh nuraesh nutogur aduk. <sup>4</sup> Douk narao ihishmorim ananish sipsipahos shutogur adukirub um narub iyoh, nurikumesh aria eshesh ta shugiman shanak. Um maresh? Eshesh douk shadukem ananah mah. <sup>5</sup> Kupaini arman ta mare shugipeshan uwe, uwok. Um maresh, eshesh douk madae shudukem ananah mah uwe, uwok. Namudok aria douk ta shunogugur aria ta shuruwok-umanuguk.”

<sup>6</sup> Jisas nakripesh enyudok wobuwobrenyi baraen, aria eshesh douk madae shudukem baugenylum uwe, uwok.

*Jisas Anan Douk Yopini Arman Neyoh Iruhin Ananish Arpesh Kabi Sipsipahos Um*

<sup>7</sup> Eshesh douk madae shudukem baugenylum uwe, enyudok wobuwobren baraen aria Jisas watak nakripesh nakri, “Adur atin yakripep. Eik kanak douk adur atudok wit douk sipsipahos shunak shuwishat aria shuwish shupe numun narub. <sup>8</sup> Ihim-morim armam douk riguk harik hanaki aria eik douk atin yanaki iri, amudok armam douk hakwuaruh atuh iri. Aria sipsipahos douk madae shumnek amamin baraen aria shugipesham atin

uwe, uwok. <sup>9</sup> Eik douk adur atudok wit. Enyudok arpen douk nyuwish atudok wit aria nyuwish numun narub iri, enyen ta nyuwish Iruhin nuraen aria ta watak nyutanamori nyupe wosik atin. Aria ta nyunek witogur arbudok narub nyunak nyurim worigun um nyishoh iri. <sup>10</sup> Hakwuaruh iri douk hanakmori hukwumesh aruh, hesh aria hununish. Aria eik douk yanakmori itaurumesh shurao eikin dodog abom shupe wosik aria shunadudareh shupe wosik abom iih nyumneh.

<sup>11</sup> “Eik douk adur yopunari arman douk yape yeoh sipsipahos iri. Aria eik douk yakri wosik um igok um itaurum eshudok sipsipahos shupe wosik. <sup>12</sup> Arman douk shatorun um nupe niyoh sipsipahos iri, anudok armam douk madae adur nunogrem eshudok sipsipahos iri uwe, uwok. Anan douk neneh mour um nupe niyohesh meyoh. Aria abudok nyutob nukri nutik anat wanarit nubat tunakmori, anan ta nukutish shiyotuguk aria nuruwok. Aria atudok nubat ta tunaki tihiyahesh arigaha tusuh enen aria enesh ta shuruwok shunak atin atinyuk. <sup>13</sup> Anudok arman naruwok um maresh? Anan douk neneh mourum utabor atubor iri. Ananim urkum madae adur murum nukri nutaurum eshudok sipsipahos uwe, uwok.

<sup>14</sup> “Eik douk adur yopunari arman yeoh sipsipahos iri. Eik douk yadukemesh wosik um eikishi sipsipahos aria eshesh shopunek shadukem eik. <sup>15</sup> Aria kabi douk Yain nadukem eik aria eik yadukem anan um. Aria eik douk yakri wosik um igok um itaurum eikish sipsipahos shupe wosik. <sup>16</sup> Eshudok enesh arpesh kabi eikish sipsipahos um douk eikishi. Aria eshesh douk shapeik rougun madae shuni eshudok sipsipahos douk sheyotu arbudok eikirub narub iri shiyotu um uwe, uwok. Aria eik douk shopunek yakri ta iraesh shunaki aria ta shumnek eikin baraan. Aria douk ta shuni eshudok enesh sharik iri shutogur atish shiyotu atubur nabur aria eik atuwe ipe iyohesh. <sup>17</sup> Eikin Yain douk adur urkum makri munawasham eik abom. Um maresh? Eik douk yakri wosik um she igok itaurum arpesh aria ta watak shopunek ikitaki ipe. <sup>18</sup> Ta mare enen arpen nyubo eik igok um enyenyim urkum uwe, uwok. Eik ta igok um eik kanak eikim urkum. Iruhin neke big um inek enyudok aria douk ta ineken. Neke big um igok um aria shopunek neke big um ta watak nutaurume ikitaki ipeum.” <sup>19</sup> Douk Jisas nakripesh enyudok baraan aria eshesh Juda esheshim debeimi watak shopunek hanadiyogur um henek biyab lainab. <sup>20</sup> Sabaimi hakri namudok. Hakri, “Enen yoweiniyi sagab nyapeyan aria nagugak abom. Ipak pemnek ananin baraan um maresh?”

<sup>21</sup> Aria anam hakri, “Enen yoweiniyi sagab nyapenyanari ta mare niyag-wreh namudok uwe, uwok. Aria yoweiniyi sagab ta nyuhur anan nabes seshukanari ananis nabes watak nutrugun mumam? Namudok ta uwok.”

### *Eshesh Juda Esheshim Debeimi Henenem Horim Um Jisas*

<sup>22</sup> Abudok nyutob um eshesh Juda shantorum shape Jerusalem aria shenek worigun um urkwip purum seiwok esheshish popehesh yamehesh watak shopunek shagabe Iruhin ananit debeiti urupat shawish shenek lotu um Iruhin um douk banak batoguri. Aria abudok nyutob shantorum obi nyutob douk nyumanugos-ibi nyutob. <sup>23</sup> Aria Jisas nanak nawish numun narub Iruhin ananit debeiti urupat tataoum aria nape narahaen nanak enyudok debeiniyi womaga douk shahwaren um Solomon ananin womaga iri. <sup>24</sup> Aria eshesh Juda esheshim debeimi hanaki hantorum herharihan aria harigan hakri, “Banob um meibi nyutob aria nyak ta nyukripap um nyak adur mein arman? Aria nyak Krais douk Iruhin nagrahen aria neshopoken nyanakmori nyurao arpesh um, aria douk apak makri adur nyukripap um apak ta mudukemesh.”

<sup>25</sup> Aria Jisas nabeimam baraen nakri, "Eik douk yakripep, aria ipak douk madae pusuhw eikin baraen pukri adur uwe, uwok. Ihin mour douk yohur eikin Yain ananin nyeigur aria yeneken nyatogur patrin iri, enyen douk adur nyeyabigep agundok eik douk meinii arman um. <sup>26</sup> Aria ipak douk madae pusuhw eikin baraen pukri adur uwe, uwok. Um maresh? Ipak douk madae eikish sipsipahos uwe. <sup>27</sup> Eikish sipsipahos douk shadukem eikih mah. Eik douk shopunek yadukem eshesh wosik aria douk shagipesh eik. <sup>28</sup> Shagipeshe aria ta yataurumesh um mare shunak shuwishuk uwe, uwok. Eik ta itaurumesh um adur shupe wosik abom iihih nyumneh. Aria ta mare enen arpen nyunaki nyutiweyesh eikis wis uwe, uwok meyoh. <sup>29</sup> Eikin Yain douk nekeyesh iri, anan douk debeini neneh uhwin um ihishmori arpesh shape shakam. Aria douk ta mare enen arpen nyunaki nyutrunesh ananis wis uwe, uwok meyoh. <sup>30</sup> Eik yani Yain douk adur atin watogur atun meyoh."

<sup>31</sup> Douk amam Juda hemnek namudok aria watak shopunek hohuri utabor um hakri hon nugok. <sup>32</sup> Aria Jisas watak nakripam nakri, "Eikin Yain nakripe um inek sabainyi anan atun neneken iri mour aria douk yeneken nyatogur ipak patrin. Aria ipak urkwip porum meinyi debeinyi mour douk eik yeneken aria ipak douk pakri pukwume utabor?"

<sup>33</sup> Aria amam watak hawanaman baraen hakri, "Apak douk madae mukri um mukwumen utabor um agundok nyenek enyudok Iruhin atun neneken iri mour nyatogur um uwe, uwok. Aria makri menyum agundok nyenek enenyenen nyabubunim Iruhin um. Nyak douk arpen meyoh, aria nyakri nyak Iruhin."

<sup>34</sup> Aria Jisas watak nebeimam baraen nakri, "Enen baraen nyetem ipakin lo iri douk nyakri namudok. Iruhin nakri, 'Ipak douk god omi.'\* <sup>35</sup> Eshudok arpesh seiwok Iruhin nekeshi ananin baraen iri, anan douk nahwaresh god omi. Aria apak madukemesh um Iruhin ananin baraen nyetem ananik Buk iri douk adurin atinyi. Madae nyukri kupainyi atin uwe, uwok.

<sup>36</sup> Aria eik douk Yain meyoh nagraehe yape ananiwe atuwe aria neshopoke yanakmori agundok atap. Eik yabuhi aria yakripep yakri eik douk Iruhin ananin nuganin. Namudok aria ipak pakri eik yape yeneh enenyenen yabubunim Iruhin um maresh? Um agundok yakri, 'Eik douk ananin nuganin' um aka? <sup>37</sup> Aria eik mare inek eikin Yain Iruhin ananin mour um, aria ipak douk wosik mare pusuhw eikin baraen pukri adur uwe, uwok. <sup>38</sup> Aria eik douk adur yeneh ananin mour. Aria douk ipak pakri uwok um punek bilip um eik um agundok yakri eik douk Iruhin neshopoke yanakmori. Aria ipak douk patiwe yeneh sabainyi Iruhin atun neneken iri mour nyatogur aria douk ta punek bilipume. Punekesh namudok um ipak ta adur pudukemesh abom um Yain nape eik aria eik yape anan."

<sup>39</sup> Douk nakri namudok aria amam watak hakri huswan hunak huweshigan nupe shunuweshik-ati urupat. Aria nakutumukuk ba nanak.

<sup>40</sup> Nakutum-ukuk nanak aria nabinawish worub Jodan nanak um agundok douk riguk Jon neneh baptaisumesh iri nape neneh baptaisumesh um. Nanak aria nape nagundok. <sup>41</sup> Aria sabaishi arpesh shanaki agundok anan napeum aria shakri, "Adur atin, Jon anan douk madae nuneh enen Iruhin atun neneken iri mour uwe, uwok. Aria ihinyumori baraen anan neyagwrehan abom um anudok arman iri douk nyatogur adurin atin

---

\* **10:34:** Enyudok baraen 'Ipak douk god omi' douk nyetem Sam 82:6. Baugennum baraen nyakri Iruhin ananish arpesh sheneh ananin mour iri shape debeishi um ihishmorim eneshenesh eshudok shakus agundok atap um.

abom.” <sup>42</sup> Aria sabaishi arpesh shape agundok iri shenek bilip um Jisas shakri anan douk adur Krais.

## 11

### *Lasarus Nagok*

<sup>1</sup> Anan arman shahwaran um Lasarus iri douk arugeh hapeyan. Anan nani ananiyu bio mohwiyariyu, Maria kwani okwokwik awik Mata douk wape abrudok wabur Betani. <sup>2</sup> Aria Maria douk okwudok armatok riguk kwourak sanda Jisas ananiruh yeriweruh aria watak kwakwu okwokwig barag kwubatiguman yeriweruh iri. Aria douk okwokwin mohunin Lasarus arugeh hapeyan. <sup>3</sup> Aria ananiyu mohwiyariyu wonek baraen nyanak um Jisas wakri, “Debeini, nyakin arpen douk nyak urkum manawashaman iri douk arugeh hapeyan.”

<sup>4</sup> Douk Jisas nemnek namudok aria nakri, “Baugos um ehudok arugeh han um douk madae hon um adur nugok uwe, uwok. Eheh douk han um arpesh shutik Iruhin ananin dodog aria shutuk anan nini eik ananin Nughan ohwakish nyeiguhw shuto iruhw.” <sup>5</sup> Jisas anan douk adur urkum manawasham Mata kwani okwokwik awik Maria wani Lasarus. <sup>6</sup> Anan douk nemnek um agundok Lasarus arugeh hapeyan um, aria nepe biyeh nyumneh shopunek nagundok douk anan napeum.

<sup>7</sup> Douk nepe biyeh nyumneh hanak hadiguk aria nakrip apak ananim disaipel nakri, “Apak watak mutanam munak um Judia.” <sup>8</sup> Douk apak memnek aria makri, “Debeini Tisa, nubokuhi atin amam Juda hakri hukwumen utabor. Aria douk watak shopunek nyakri nyunak ganudok aka?”

<sup>9</sup> Aria Jisas nawanamap baraen nakri, “Anah nyumnah douk 12-porein aua um wah hutaoum. Aria douk enen arpen nyukri nyurahaen nyumnah wah hatao obi nyutob um, enyen ta ko nyutrugun wosik aria ta mare nyutu uwe, uwok. <sup>10</sup> Aria enyen nyukri nyurahaen wab um, enyen douk ta nyunotutuk aria nyutu nyubuh. Um maresh? Agagun douk arukwtigun aria enyen ta mare nyunatrugun wosik uwe, uwok.” <sup>11</sup> Douk Jisas nakriyuk namudok aria nakri, “Apakin arpen Lasarus douk neshuh. Aria eik ta watak inak inyubaran.”

<sup>12</sup> Aria apak ananim disaipel makri, “Debeini, anan douk eneh arugeh hapeyan ba neshuh um, anan douk ta watak yopun.” <sup>13</sup> Jisas douk nakri um agundok Lasarus adur nagok um. Aria apak ananim disaipel memnek aria makri anan nakri um aduribus yobus san aria neshuh.

<sup>14</sup> Namudok aria Jisas nowerehamap baraen nakri, “Lasarus douk nagok. <sup>15</sup> Aria eik urkum morum ipak aria yanadudareh. Um maresh? Anan nagok um, eik douk madae inak itogramesh uwe, uwok. Yanadudareh um maresh, apak ta munak mutrish aria ipak ta putik enen mour ta eik inek yowii ba munak.”

<sup>16</sup> Eshesh Juda douk shakri shubo Jisas nugok. Namudok aria Tomas douk shahwaran um Didimas iri nakrip apak ananim disaipel nakri, “Kitak munam Debeini munak. Munak um kada shukri shubo anan nugok um, aria eshesh douk shopunek shubo apak muni anan mugok ahudok atuh.”

*Jisas Anan Douk Debeini Aria Dodogowin Um Nukrip Shagok Iri Watak Shukitak Shupe*

<sup>17</sup> Douk Jisas nanak natogur hurukatinyum Betani aria anan nemnek um Lasarus douk sharuman nor wonugwehw 4-poreih nyumneh. <sup>18</sup> Abrudok

wabur Betani douk madae bupeik rougun um Jerusalem uwe, uwok. Bape iri hurukatin, kabi douk biyen atin kilomita um. <sup>19</sup> Aria sabaishi Juda shanaki shani Maria aria Mata shapeum shugabemo owowiruh aparuh um agundok owowin mohunin nagok um. <sup>20</sup> Douk Mata kwomnek um agundok Jisas nape nanakumori aria kwakitak kwanak um kuperugan yah. Aria Maria douk kwapeik urupat.

<sup>21</sup> Douk Mata kwanak aria kwakrip Jisas kwakri, “Debeini, douk nyak nyupe agundok akure, eikin mohunin ta mare nugok uwe, uwok! <sup>22</sup> Aria douk shopunek yadukemesh um, maresh eshudok douk nyak nyunek beten nyorig Iruhin um nunekesh iri, anan ta nunekesh.”

<sup>23</sup> Aria Jisas nakripok nakri, “Nyakin mohunin ta watak nukitaki.”

<sup>24</sup> Mata kwomnek aria kwakripak kwakri, “Eik yadukemesh, ahudok hugiguk iri nyumnah ihishmorim shagok iri watak shukitakumori shagokum, aria anan douk ta watak nukitaki.” <sup>25</sup> Aria Jisas nakripok nakri, “Douk eik atuwe debeiwe iri aria dodogoiwe um ihur shagok iri watak shukitak shupe wosik um. Aria eshudok douk shasuhw eikin bareaen shagipeshen aria shagok iri, eshesh douk ta watak shukitak aria adur shupe wosik atin. <sup>26</sup> Aria eshudok douk watak shape aria shusuhw eikin bareaen shugipeshen iri, eshesh ta mare shugok uwe, uwok.” Aria anan narig nakri, “Nyak nyenek bilip nyakri enyudok bareaen douk adur atin aka, uwok?”

<sup>27</sup> Aria Mata kwakri, “Adur, Debeini. Eik douk yenek bilip yakri nyak douk Iruhin ananin Nuganin. Yakri nyak Krais, douk Iruhin nagraeheen aria neshopoken nyanakmori nyurao arpesh iri.”

### *Jisas Nereh Um Lasarus*

<sup>28</sup> Douk Mata kwakriyuk enyudok bareaen aria watak kwatanamum kwanan kwhawhar okwokwik awik Maria. Douk kwanaki aria kwakripok shokubur kwakri, “Apakin Debeini Tisa douk nanaki aria nakri nyak nyunak nyutrun.”

<sup>29</sup> Douk Maria kwomnek namudok aria arigas kwaikitak kwanak um kutik Jisas. <sup>30</sup> Anan Jisas douk watak nunak nutogur wabur uwe, uwok. Watac neyotu yah agundok douk Mata kwarik kwanak kwaparugan um. <sup>31</sup> Enesh Juda douk shani Maria shape okwokwit urupat um shugabeimok apahw. Douk shatik um okwok arigas kwaikitak kwanak um aria shakri okwok ta kwanakum wonugwehw um kuwe kureh. Namudok aria shakitak shagipesok shanak.

<sup>32</sup> Douk Maria kwanak khatogur agundok Jisas natogur nepeum aria khatrun. Khatrun aria kwanak kwabuh kwoduk ohrubus hurukatinyum anan aria kwakri, “Debeini, douk nyak nyupe agundok akure, elkin mohunin ta mare nugok uwe, uwok.”

<sup>33</sup> Jisas natruk um kworeh aria eshesh shanamok iri Juda douk shopunek shataurumok shereh. Natik namudok aria ananihw apahw yowehw abom aria neneh giha. Aria anan shopunek nakri nunamesh shureh. <sup>34</sup> Aria douk narigesek nakri, “Ipak panak paruman agnum?”

Aria eshesh shakri, “Debeini, nyak yowi ba nyutik.” <sup>35</sup> Douk shanak aria Jisas nereh. <sup>36</sup> Eshudok Juda shatik um agundok Jisas nereh um aria shakri, “Ipak putik, ananim urkum douk yowem abom um manawasham Lasarus.”

<sup>37</sup> Aria enesh shakri, “Anan douk nagabe anan nabes sessukanari aria anan watak natrugun. Aria namudok mumam, um anan madae nutaurum Lasarus um mare nugok um uwe?”

### *Jisas Nohur Lasarus Nakitak Nape*

<sup>38</sup> Jisas ananihw apahw watak shopunek yoweh abom aria neneh gi-haum eshudok arpesh aria nanak arigah nanak natogurum wonugwehw. Ahwudok wonugwehw douk shatukohw shawish onok burbuduk shenek hurupihw. Aria agundok umunihw um douk shabodigi utom shanak shashapomuk wonugwehw. <sup>39</sup> Aria Jisas nakri, “Bodiguk amudok utom douk matao umunihw um wonugwehw iri.”

Aria anudok nagok iri ananik mohwukwik Mata kwakri, “Debeini, apak maruman noruk nubatih nyumneh aria anan douk ta nisig.”

<sup>40</sup> Aria Jisas nakripok nakri, “Eik douk iganigadae yakripen. Douk nyak nyusuhw eikin baraen nyukri adurin um, nyak douk ta nyutik agundok Iruhin adur dodogowin atun um.” <sup>41</sup> Namudok aria eshesh shanak shabodiguk amudok utom. Aria Jisas nanig natik iruhw aria nakri, “Yain, eik douk yenek tenkyumen. Um maresh? Nyak douk nyemnek eikin beten. <sup>42</sup> Eik yadukemesh um ihih nyak wosik nyemneke um agundok yenek beten yahwarenyum. Aria eik urkum morum eshudok sheyotu agundok iri, aria douk yakri namudok. Um yakri eshesh shutik enyudok mour douk eik ta ineken iri aria shunek bilip shukri eik douk nyak nyeshopoke aria douk yanaki.” <sup>43</sup> Douk nakriyuk enyudok aria nahwar debeg nakri, “Lasarus, arigah kitak tograri!”

<sup>44</sup> Aria anudok nagok iri adur nakitak natograri. Ananish roguhw aria aiyas douk sheshrehesh rupeh. Ananig yomag shopunek shesherehog anah rupah. Aria Jisas nakripesh nakri, “Ipak pukweshihuk rupeh aria anan nunak.”

### *Eshesh Juda Esheshim Debeimi Hape Habo Baraen Um Hubo Jisas Nugok (Matyu 26:1-5; Mak 14:1-2; Luk 22:1-2)*

<sup>45</sup> Sabaishi Juda douk shanaki shani Maria shapeum shugabeimok apahw. Eshesh douk shatik enyudok Jisas neneken iri mour aria adur shenek bilipman. <sup>46</sup> Aria enesh shatanam shanak shakrip amam Farisi um enyudok Jisas neneken iri. <sup>47</sup> Shakripam aria amam hani debeimi pris hahwar amudok anam debeimi Juda douk hape hasuhw kwotog iri hanaki. Hanaki hape atugun aria hakri, “Anudok arman douk nenek sabainyi Iruhin atun neneken iri mour. Aria apak douk ta munekan mumam? <sup>48</sup> Apak mukri mukutunuguk ba nupe nunek enyudokmori atin um, ihishmorim arpesh ta shunek bilip um anan atun. Namudok aria eshesh Rom esheshim debeimi ta hunaki hununu atudok Iruhin ananit debeiti urupat aria ta hubo eshudok ihishmorim apakishi arpesh shugok.”

<sup>49</sup> Aria anudok arman shahwaran um Kaias iri douk nani amam hape. Anan douk debeini pris um enyudok kwar. Anan nemnek aria nakripam nakri, “Ipak douk madae pudukem enesh eshudok uwe, uwok. <sup>50</sup> Ta pudukemesh aka, uwok? Enyen douk wosik um mubo atun arman nugok aria mutaurum eshudok ihishmorim Judaish arpesh um shupe wosik. Aria ta douk uwok um, apak ihipmorim Juda ta mugok mutuh.”

<sup>51</sup> Enyudok baraen douk madae anan meyoh nukriyen uwe, uwok. Anan douk debeini pris um enyudok kwar. Namudok aria Iruhin nohur anan nakri enyudok baraen kabi amam profet heyagwreh um. Nakriyen um Jisas douk ta nugok um nutaurum ihishmorim eshesh Juda. <sup>52</sup> Aria shopunek anan ta mare nugok um nutaurum eshesh Juda atish um shupe wosik, uwok. Anan ta nugok um nurao ihishmorim Iruhin ananishi batowish douk shanak shape kupakupa irubi warub iri um shutogur atish arpesh.

<sup>53</sup> Aria ahudok nyumnah arigaha douk eshesh Juda esheshim debeimi hape habo baraen um hurim anah yah um hubo Jisas nugok.

<sup>54</sup> Douk namudok aria agundok eshesh Juda shapeum, Jisas douk madae nurahaen yopugunum atin uwe, uwok. Aria nikitak nakutukuk abrudok wabur nanak um anagun douk nape hurukatinum wehigunum arpesh uwok um. Nanak um anabur wabur shahwarabur um Efraim iri aria nani apak ananim disaipel mape agundok.

<sup>55</sup> Aria ahudok nyumnah um eshesh Juda shunek esheshigun debeiguni worigun Pasova um douk hanaki hurukatin. Aria sabaishi arpesh shape sabairubi warub iri shakitak shato um Jerusalem. Shanak um shugipesh esheshin lo shunagapesh eshesh kanak um Iruhin nutrish nukri wosik yopishi aria nuhut biyen shunak shuwok agundok worigun. <sup>56</sup> Douk sabaishi arpesh shanaki aria shape shaurim Jisas. Eshesh sheyotu numun narub Iruhin ananit debeiti urupat tataoum aria eshesh kanak shape sheneyagwreh shakri, "Ipak pakri mumam? Anan ta nunaki um agundok worigun aka, uwok?" <sup>57</sup> Aria amam debeimi pris hani amam Farisi douk hakripesum douk enen arpen nyudukemesh um agundok Jisas nanak napeum, aria ta enyen nyunaki nyukripam um amam hunak husuwan huweshikan.

## 12

### *Maria Kwourak Sanda Kwakwrup Jisas Ananiruh Yeriweruh (Matyu 26:6-13; Mak 14:3-9)*

<sup>1</sup> Douk 6-poreih nyumneh watak hapeum shunek agundok debeiguni worigun Pasova, aria Jisas nikitak nanak um Betani. Betani douk Lasarus ananibur wabur. Anudok douk riguk nagok aria Jisas watak nonohur nikitak nape iri. <sup>2</sup> Jisas nanak nape agundok aria eshesh shenekuman anagun worigun. Mata kwaape kwowah worigun aria Lasarus iri Jisas douk hani eshudok shanaki um shuni Jisas shuwok worigun iri shape shersharih tebol. <sup>3</sup> Aria Maria kwakitak kwohur enen yopinyi sanda nyeigurinyum nad douk shatorin debeibori utabor iri aria kwananak kwouraken kwaape kwenyayok Jisas ananiruh yeriweruh. Kwouraken iyoh aria watak kwakwu okwokwig barag kwaape kwogabe yeriweruh. Aria arpesh shape numun urupat iri shemnek enyudok sanda nyeisik yopuri unar.

<sup>4</sup> Aria anan Jisas ananin disaipel shahwaran um Judas Iskariot iri douk nanamesh shape agundok. Aria anan douk ta niyabig Jisas um ananim horim aria amam husuwan hunak hon nugok iri. Douk anudok Judas natik namudok aria nakri, <sup>5</sup> "Um maresh aria ipak madae pukri um enesh arpesh shutor enyudok sanda aria shukop 300 siliwaibor utabor uwe? Shukop aria misiyabor um eshudok yaruhib arpesh." <sup>6</sup> Anan douk madae urkum murum yaruhib arpesh aria douk nukri namudok uwe, uwok. Anan douk nakwuaruh atin iri. Shopunek asudok amamis bokis douk hape hakutu utabor borasi douk anan neyohos aria apa nakwumobor aruh abrudok utabor.

<sup>7</sup> Jisas nemnek namudok aria nakri, "Ipak ruwokuk um okwok douk kwonek enyudok aria kwogapesh eik um afhudok nyumnah ta she igok aria shunak shurume um. <sup>8</sup> Yaruhib arpesh um eshudok iri ta shini ipak pupe ihih nyumneh. Aria eik ta mare ini ipak mupe roubium uwe, uwok."

### *Debeimi Pris Habo Baraen Um Hubo Lasarus Nugok*

<sup>9</sup> Sabaishi Juda douk shemnek baraen um Jisas nanak nape Lasarus ananit urupat gani Betani. Namudok aria eshesh shanak um shutrun. Aria eshesh douk madae shunak um shutik Jisas atun uwe, uwok. Eshesh shopunek shanak um shutik Lasarus douk nagok aria Jisas watak nonohur nikitak nape iri. <sup>10</sup> Douk namudok aria amam debeimi pris habo baraen

um hakri hubo Lasarus nugok shopunek. <sup>11</sup> Um maresh? Sabaishi Juda douk shatik um agundok Jisas nonohur nakitak nepeum, aria eshesh shakutukuk esheshim debeimi Juda shanak shasuhw Jisas ananin bareaen shagipeshen.

*Jisas Nanak Nawish Jerusalem Kabi Anan King Um  
(Matyu 21:1-11; Mak 11:1-11; Luk 19:28-40)*

<sup>12</sup> Sabaishi arpesh douk shanaki shape Jerusalem um shunek agundok debeiguni worigun Pasova. Douk ruwahepih aria eshudok sabaishi arpesh shemnek bareaen um shanak Jisas douk neyotuwi yah nape nanakmori Jerusalem. <sup>13</sup> Douk namudok aria eshesh shanak shatupoki palmenigas aragas shanak arigaha shaparugan aria shahwar shakri,  
“Apak manadudareh um Iruhin!

Apak makri Iruhin nunekuman yopinyi anudok arman douk nanakumori  
Debeini ananin nyeigur iri.

Makri anan nunekuman yopinyi apak Israel apakin King!”

<sup>14</sup> Jisas naparug enen nugaen donki douk nakih netem aria nanak kabi douk enyudok bareaen nyetem Iruhin ananik Buk iri nyakrium. Bareaen enyudok <sup>15</sup> nyakri,  
“O ipak arpesh pape abrudok debeiburi wabur Saion iri,  
ipak mare punogugur.

Tik, ipakin King anudok apa nanaki.

Anan netemori enen nugaen donki aria nape nanaki.”

<sup>16</sup> Aria abudok nyutob, apak ananim disaipel douk madae mudukem baugenym enyudok bareaen uwe, uwok. Aria arigaha douk Jisas watak natanam natoum iruhw heven, aria abudok nyutob apak douk madukemen. Urkum morum aria madukemesh makri enyudok bareaen nyetem Iruhin ananik Buk iri douk nyakrium anan. Eshesh douk shopunek urkum morum enyudok douk eshesh kanak shenekesh um anan iri.

<sup>17</sup> Aria abudok nyutob Jisas nahwar Lasarus nakitak natograri wonug-wehw aria watak napeum, sabaishi arpesh douk sheyotu shatrun. Douk namudok aria eshesh shanak shanakripam um enyudok anan neneken iri.

<sup>18</sup> Aria sabaishi arpesh shemnek um enyudok Jisas neneken iri, um nohur Lasarus um. Douk namudok aria eshesh shanak shaparugan yah. <sup>19</sup> Amam Faris hatik namudok aria hanakripam hakri, “Tik, apak meneken iri mour douk madae dodogowin uwe, uwok. Ihishmorim armam armago douk shashi shanak shagipesher Jisas atun.”

*Enesh Grik Shakri Shutik Jisas*

<sup>20</sup> Enesh eshesh Grik douk shanak um Jerusalem shani eshudok arpesh douk shanak um shunek lotu um Iruhin ahudok debeihi nyumnah douk shenek agundok debeiguni worigun ahi. <sup>21</sup> Aria eshudok Grik shanak shatogurum Filip. Anan douk nanaki abrudok wabur Betsaida douk bape agudok shokugi nahobig Galili iri. Shanaki aria shakripan shakri, “Debeini, apak makri mutik Jisas.” <sup>22</sup> Filip nemnek aria nanak nakrip Andru. Aria amam biom hanak hakrip Jisas. <sup>23</sup> Hakripan aria anan nawanamam bareaen nakri, “Abudok nyutob um Iruhin nunek Eik Anudok Arman douk yatogur adurinyi arpen iri um irao debeinyi nyeigur um douk abudok batogur. <sup>24</sup> Adurin atin yakritep. Douk urubit wit tukri mare tugruki tubuh tukus amnab aria yarit um, atat douk ta atudok atut ta tugok jurug. Aria douk atat mamokit tugruki ba tubuh tukus yopubi amnab aria tugok um, atat douk ta watak pupurot arah tukih aria ta sabaiti urubit tir. Kabi ta eik igok aria shurume um. <sup>25</sup> Enyudok arpen douk enyen urkum murum enyen

atin um nyukri nyupe wosik nyupe roubi nyutob agundok atap iri, enyen ta mare nyupe roubi uwe, uwok ta nyunununukuk. Aria enyudok arpen douk watak nyupe agundok atap aria enyen mare urkum murum enyen atin aria nyunek eikin mour iri, enyen douk ta nyupe wosik abom iih nyumneh.<sup>26</sup> Aria enyudok arpen douk nyunek eikin mour iri, enyen ta adurin nyugipesh eik. Aria agundok eik inak ipeum, enyen shopunek ta nyunaku nyuni eik upe. Aria eikin Yain ta nutuk enyenyin nyeigur nyuto iruhw."

### *Jisas Nakri um Agundok Ta Shon Nugok Um*

<sup>27</sup> Aria Jisas watak shopunek nakri, "Douk eikihw apahw douk adur yowehw abom aria baraen uwok um ta ikri um. Eik ta mare iyorig Yain um nukweshihuk yah um enyudok amaen ta mare nyutogurume um uwe, uwok. Baugos um agundok eik yanakmori agundok atap um, douk yanakmori iwish um enyudok amaen atin.<sup>28</sup> Yain, nyak nyunek enyudok ihinyumori mour kabi nyak nyakrium. Nyuneken um nyunatuk nyakin nyeigur nyuto iruhw."

Douk Jisas nakri namudok aria anah mah hanaki gani iruhw heven. Aria ahudok mah hakri, "Eik iga yatuk eikin nyeigur nyato iruhw. Aria douk ta watak shopunek gamo ituken nyuto iruhw um anah shopunek."<sup>29</sup> Aria eshudok sabaishi arpesh douk sheyotu hurukatin iri shemnek ahudok mah aria shakri utag pogarog. Enesh shakri enen ensel nyani Jisas heyagwreh.

<sup>30</sup> Aria Jisas nakripesh nakri, "Ahudok mah hanaki iruhw utag iri douk madae hunaki um hutaurum eik uwe, uwok. Ahah douk hanaki um hutaurum ipak.<sup>31</sup> Aria douk, Iruhin ta nunekumesh kwot eshudok douk shukon agabus iri. Aria shopunek anan ta nubo Satan nubuhuk. Anan douk nape debeini um agundok atap iri.<sup>32</sup> Aria eik ta shutute shiyaour iruh\* aria ta iyonuki ihishmorim arpesh shunakmori eik."<sup>33</sup> Anan douk nakri namudok um eshesh shumnek aria shudukem ahudok yah douk ta anan nugok um.

<sup>34</sup> Douk namudok aria eshudok sabaishi arpesh shakrip Jisas shakri, "Apak madukemesh um, apakin lo nyakri abudok nyutob Krais nutogurum, anan ta mare nugok uwe, uwok. Aria ta nupe adur iih nyumneh. Aria namudok nyakrium, um nyakri 'Ta shusuhw Anudok Arman douk natogur adurinya arpen iri aria shon nugok nir rowog kruse um?' 'Anudok Arman natogur adurinya arpen iri' douk adur meini?"

<sup>35</sup> Aria Jisas nakripesh nakri, "Eik douk ta ini ipak mupe banab nyutob meyoh kabi hanu anat lait tabuhumepum. Douk namudok aria ipak pupe punek yopihi atih aih abudok nyutob atudok lait hanut tabuhumepum. Um ipak mare pupe arukwtigunum uwe, uwok. Meinyi arpen nyarahaen arukwtigunum iri, enyen douk ta mare nyudukem agundok enyen nyanak um uwe, uwok.<sup>36</sup> Douk abudok nyutob eik atudok lait watak yani ipak mape um, ipak adur pusuhw eikin baraen dodog pugipeshen. Punekesh namudok um, ipak ta putogur arpesh douk sharahaen laitigun um iri."

### *Sabaishi Juda Madae Shunek Bilip Shukri Jisas Ananin Baraen Douk Adurin Uwe, Uwok*

Douk Jisas nakriyuk namudok aria nakutishukuk nanak nanabeshuk nape anagun.<sup>37</sup> Anan watak nanamesh shape obi nyutob, anan douk nenek sabainyi Iruhin atun neneken iri mour shatrin. Shatrin aria eshesh

\* **12:32:** Jisas nakri ta shon shunaur rowog kruse aria nugok. Namudok aria Iruhin ta nunohur nuto iruhw heven nukih nurao Debeinyi nyeigur kabi douk baraen nyetem Filipai 2:9-11 iri nyakrium.

madae shunek bilip um anan uwe, uwok. <sup>38</sup> Eshesh shenekesh namudok um enyudok baraen seiwok profet Aisaia neyagwrehan aria nyetem Iruhin ananik Buk iri nyutogur adurin atin. Baraen enyudok. Nyakri, "Debeini, apak douk makripesh nyakin baraen, aria eshesh madae shusuhwen shukri adurin uwe, uwok. Eshesh shatik enyudok dodogowinyi mour nyak Debeini nyeneken iri aria eshesh madae shukri nyak douk Debeini uwe, uwok."

<sup>39</sup> Eshesh douk madae shukuna wosik shunek bilip um Jisas uwe, uwok. Um maresh? Enyudok enen Aisaia nenyemori baraen douk nyetem namudok, <sup>40</sup> Iruhin nakri,

"Eik yatapok esheship urkwip pani esheshis nabes.

Namudok aria mare ta shutrugun wosik shutik eshudok urkwip purumesh aria shudukem baugeniyum baraen.

Namudok aria ta shukri um shatanam shuke aparuh eik um igabeyesh shupe wosik. Aria shakri uwok."

<sup>41</sup> Seiwok Aisaia douk natik agundok Jisas adurin dodogowin atun nyeigur nyato-uman um aria nowemaguk enyudok baraen um anan.

<sup>42</sup> Enyen douk adur. Aria abudok nyutob sabaimi eshesh Juda esheshim debeimi henek bilip um Jisas. Aria amam douk hanogugur um amam Farisi aria madae huwerek amamin bilip yopugunum uwe, uwok. Um maresh? Hakri ta amam Farisi hukri uwok um ta mare huwish hunamesh hunek lotu agudok urusag douk eshesh Juda douk shape sheneyagwreh baraen-ogwi uwe, uwok. <sup>43</sup> Umum maresh? Amam henek bilip iri douk mishish shakitak abom um arpesan ta meyoh shutuk amamishi nyeiguhw shuto iruhw. Aria hakri karowin atin um Iruhin kanak ta nutuk amamish nyeiguhw shuto iruhw uwe, uwok.

### *Jisas Nakripesh Um Ananin Baraen Ta Nyunekumesh Kwotog Arpesh*

<sup>44</sup> Aria Jisas nakripesh debeg nakri, "Eshudok arpesh douk shunek bilip um eik iri, eshesh douk madae shunek bilip um eik atuwe uwe, uwok. Eshesh douk shenek bilip um anudok douk neshopok eik yanaki iri shopunek. <sup>45</sup> Aria abudok nyutob eshudok douk shatik eik obi nyutob, eshesh douk shatik anudok douk neshopok eik yanaki iri. <sup>46</sup> Eik douk yanaki agundok atap kabi lait um. Yanakmori eshudok douk shusuhw eikin baraen shugipeshen iri ta mare watak shupe arukwutigun atin uwe, uwok.

<sup>47</sup> "Aria arpesan douk shemnek eikin baraen aria mare shusuhwen dodog shugipeshen iri, eik douk ta mare inek skelumesh um kwot kabi douk jas um uwe, uwok. Eik douk madae inaki agundok atap um inek skelum arpesan uwe, uwok. Eik douk yanakmori inarao arpesan shutanamori shupe wosik. <sup>48</sup> Aria eshudok douk shuke agabus eik shukri uwok um shusuhw eikin baraen iri, esheshin jas douk kweipon ta nunekumesh kwotog iri douk nape. Enyudok atin baraen douk eik yakripeshen aria eshesh madae shigipeshen iri uwe, enyen kanak ta nyunek skelumesh aria nyunekumesh kwotog kabi jas um ahudok hugiguk iri nyumnah hutogram. <sup>49</sup> Um maresh? Enyudok baraen douk madae eik meyoh urkum murumen aria ipe ikripeshen uwe, uwok. Enyen douk eikin Yain nakripeyen abom aria neshopoke yanaki um ikripesh. Aria anan douk neyabige um ikripesh mumam. <sup>50</sup> Aria eik yadukemesh um Iruhin ananin baraen ta nyunek arpesan um shusuhwen shugipeshen aria shupe wosik abom iih nyumneh. Namudok aria ihinyumori enyudok eik yakriyen iri baraen, enyen douk eikin Yain meyoh nakripeyen aria douk yanaki yakripen."

## 13

### *Jisas Nakwrupumam Yeriweruh Ananim Disaipel*

<sup>1</sup> Ahudok nyumnah um shunek agundok debeiguni worigun Pasova um douk hanaki hurukatin. Aria Jisas douk nadukemesh um abudok nyutob ta nukutukuk agundok atap nunak nini Yain hupeum douk banaki. Aria abudok nyutob anan napeum, ananim urkum douk adur manawasham ihishmorim ananishi arpesh douk mape agundok atap iri arigaha ta nugok um. Aria douk shopunek anan watak neyabigap um anan urkum manawasham apak abom um. <sup>2</sup> Satan douk iga nawish Saimon ananin nuganin Judas Iskariot. Nawishan aria nako yoweimi urkum um anan ta nuwereh Jisas um ananim horim aria amam husuhan hunak hon nugok. Douk arigaha wabigep aria amam hape hawok worigun.

<sup>3</sup> Jisas nadukemesh um Iruhin douk nakri wosik aria neshopoki anan um nupe Debeini um ihishmorim eshudok eneshenesh. Aria shopunek nadukemesh um anan douk nani Iruhin hape iri nikitak nanaki aria ta watak nutanam nunak nini anan hupe. <sup>4</sup> Aria nikitak nowar ahudok rouhi rupah douk nohunug aduk iri nahubukuk aria nohuri enen tawor naweshiken nyape apahwinum. <sup>5</sup> Naweshiken nyape aria nohuri abar nourakabar anohw yaurehw aria nape nakwrupumap yeriweruh apak ananim disaipel. Nakwruporuh-umap iyoh aria watak nabatik abar enyudok tawor douk naweshiken nyape apahwinum iri. <sup>6</sup> Nakwruporuh-umap nanak natogurum Saimon Pita aria Saimon nakripan nakri, "Nyak douk Debeini. Namudok aria eik douk yakri uwok um nyak nyukwrup eikiruh yeriweruh uwe, uwok."

<sup>7</sup> Aria Jisas nakripan nakri, "Douk, nyak madae nyudukem baugennum uwe, enyudok mour douk eik yeneken iri. Aria nuhut biyen nyak wosik ta nyudukemesh."

<sup>8</sup> Aria Pita nakripan nakri, "Uwok, eik yakri uwok abom um nyak nyukwrup eikiruh yeriweruh!"

Aria Jisas watak shopunek nakripan nakri, "Douk eik mare ikwrup nyakiruh yeriweruh um, nyak douk ta mare nyupe eikin disaipel uwe, uwok." <sup>9</sup> Saimon Pita nemnek namudok aria nakri, "Debeini, namudok um, nyak douk ta mare nyukwrup eikiruh yeriweruh aturuh uwe, uwok. Yakri nyukwrup roguhw aria barag shopunek."

<sup>10</sup> Aria Jisas nakri, "Enyudok arpen douk nyeshrokuh jurug iri, enyen douk yopin aria mare ta nyukri um nyishrokuh shopunek uwe, uwok. Enyen ta nyunokwrup yeriweruh aturuh. Enyenyihw yegenyihw shuknihw wosik yopuhw. Ipak sabaipi douk yopipi. Aria atun meyoh douk madae yopun uwe, uwok." <sup>11</sup> Jisas douk nadukeman anudok disaipel douk ta nuwereh anan um ananim horim aria husuhan hunak hon nugok. Namudok aria anan douk nakri namudok. Nakri, "Ipak ihipmorim douk yopipari, aria atun arman meyoh douk madae yopun uwe, uwok."

<sup>12</sup> Douk nakwrupumap yeriweruh iyoh aria watak nohur ahudok rouhi nahunug aduk iri rupah nohahw. Aria nanak nabuh nape agundok iganigadae napeum. Nape aria narigap nakri, "Ipak padukem baugennum mour um enyudok iganigadae yenekenyumep iri aka, uwok?" <sup>13</sup> Ipak pani eik meyagwreh um, ipak douk padukemesh pohware Debeini Tisa aria Debeini. Aria pohware namudok um, enyen douk adur. Um maresh? Eik douk ipakin Debeini Tisa aria Debeini. <sup>14</sup> Eik douk ipakin Debeini aria ipakin Debeini Tisa shopunek, aria eik douk iga yakwrup ipakiruh yeriweruh. Aria yakri ipak atin atin douk shopunek punak punataurum punakwrup ipakiruh yeriweruh. <sup>15</sup> Eik yenek ahudok aih yeayabigep aria ipak shopunek

punak punekah namudok atin kabi douk yenekah um ipak um. <sup>16</sup> Adur atin yakriep. Enen nyape shukamum anan debeini nyenekuman mour meyoh iri, enyen douk madae debeinyi nyishagrakuk enyenin debeini uwe, uwok. Aria douk namudok atin. Enen nyarao bareaen iri douk madae debeinyi nyishagrakuk enyudok enen douk nyeshopoken nyanak iri uwe, uwok. <sup>17</sup> Aria douk ipak douk padukem baugeniyum bareaen um ahudok aih eik yenekah iri. Aria douk ipak pugipesah um, Iruhin ta nutaurumep nunekumep yopihi aih aria nuriekep punadudareh!

<sup>18</sup> “Aria eik douk madae ikriyen um ipak ihipmorim uwe, uwok. Eik yadukemep ipak douk eik nubokadae yagraehep iri. Aria enyudok Iruhin ananin bareaen douk nyetem ananik Buk iri douk ta adurin nyutogur adurin atin abom. Bareaen douk enyudok. ‘Anudok arman douk nani eik wape wawok worigun atugunmorim iri watak natanam natogur horin um eik.’ <sup>19</sup> Enyudok douk eik yakriyen iri douk watak nyutogur uwe, aria douk yakriep. Yarik yakriep um abudok nyutob nyukri nyutogurum, ipak douk ta punek bilip pukri Eik Douk Seiwok Yape Namudok Iri.\* <sup>20</sup> Adur atin yakriep. Arpen douk nyumnek enyudok arpen douk eik ishopoken nyanak iri enyenin bareaen aria nyuraen iri, enyen douk nyemnek eikin bareaen aria nyarao eik shopunek. Aria enyen douk nyemnek eikin bareaen nyarao eik iri, enyen douk nyemnek anudok douk neshopoki eik yanaki iri ananin bareaen aria nyarao anan shopunek.”

*Judas Ta Nuwerah Jisas Um Ananim Horim Aria Huran Hunak Hon Nugok (Matyu 26:20-25; Mak 14:17-21; Luk 22:21-23)*

<sup>21</sup> Douk Jisas nakriyuk namudok iyoh aria ananihw apahw amu yowehw abom. Aria douk amu nawerehen nakripam nakri, “Adur atin yakriep. Ipak sabaipi pape agundok iri, ipak anan douk ta nuwereh eik um horim aria ta husuwe hurae hunak he igok.”

<sup>22</sup> Douk Jisas nakri namudok aria apak ananim disaipel matanam manashakamum. Makri anan douk nakri mein. <sup>23</sup> Aria anudok disaipel douk Jisas anan urkum makri munawashaman iri douk nape hurukatinyum anan Jisas iri. <sup>24</sup> Douk namudok aria Saimon Pita nouramanagu barang aria nakri, “Nyak kwasorigan. Anan douk nakri um amiapen?”

<sup>25</sup> Aria anudok disaipel natotigos nanak harokatinyum Jisas aria narigan nakri, “Debeini, nyak nyakrium amiapen?”

<sup>26</sup> Aria Jisas nakri, “Anudok douk eik isegur bret abrudok ekehbari abar ikonot iri, arman douk ta anudok atun.” Aria nohuri anagun bretigun naseguragun nako Saimon ananin nugarin Judas Iskariot. <sup>27</sup> Douk Judas natrun bret natoh neyatat aria Satan adur nawishan. Aria Jisas nakripaen nakri, “Arighah kare neken arigas enyudok douk nyakri nyuneken iri!” <sup>28</sup> Nakripaen namudok, aria apak ihipmorim mape agnudok mape mawok worigun iri douk madae mudukem baugeniyum enyudok bareaen uwe, uwok. <sup>29</sup> Judas anan douk neyoh apakibor utabor. Douk namudok aria apak ananipari makri Jisas ta neshopokan um nunak nutori anagun worigun um agundok debeiguni worigun Pasova nuneneh um, aka neshopokan um nunak nukeshuk anabor utabor eshudok yaruhih iri. <sup>30</sup> Douk Judas nawok atudok bret iyoh, nakitak aria natogur nanakuk aria iganigadee wab.

*Jisas Nakripam Enen Namunyi Lo Ananim Disaipel*

<sup>31</sup> Douk Judas natogur nanakuk aria Jisas nakripaen nakri, “Douk Eik Anudok Arman douk yatogur adurinyi arpen iri, Iruhin douk neke

\* <sup>13:19:</sup> Putik futnot nyape Jon 8:24 iri.

yaraao Debeinyi nyeigur. Aria eik ta inek arpesh shutik agundok Iruhin ddogowin atun natrugun abom um aria ta shutuk ananin nyeigur nyuto iruhw. <sup>32</sup> Aria douk eik ta ituk Iruhin ananin nyeigur nyuto iruhw um Iruhin anan kanak shopunek ahudok atuh ta nutuk Eik Anudok Arman douk yatogur adurinyi arpen iri eikin nyeigur nyuto iruhw. <sup>33</sup> O ipak douk adurip kabi eikish batowish-umori, eik douk ta ini ipak mupe banab nyutob meyoh aria ta watak ikwutipokuk inak. Inakuk aria ipak douk ta pupe purime. Riguk douk yakrip eshesh Juda esheshim debeimi aria douk shópunek yakrip ipak ényudok atin baraen. Ipak douk ta mare punak agundok eik inak ipeum uwe, uwok. <sup>34</sup> Aria eik yakri ikripep enen namunyi lo douk ta pusuwen pugipeshen iri. Enyudok lo douk namudok. Ipak atin atin, ipakip urkwip douk adur pukri punawasham um ipak aria kupaishi arpesh shopunek. Um maresh? Kabi douk eik yangirkum makri munawasham um ipak morim, aria ipak shopunek douk punekesh namudok atin. <sup>35</sup> Aria douk ipak atin atin ipakip urkwip adur pukri punawasham um, ihishmorim arpesh ta shutrip aria ta shudukemesh shukri ipak douk pagipesh eik iri.”

*Jisas Nakri um Pita Ta Nukon Agab Um  
(Matyu 26:31-35; Mak 14:27-31; Luk 22:31-34)*

<sup>36</sup> Douk Jisas nakripap namudok jurug aria Saimon Pita narigan nakri, “Debeini, nyak nyakri nyunak meiguni?”

Aria Jisas nakri, “Douk nyak ta mare nyuname unak agundok douk ta eik inak um. Aria anob nyutob nyak wosik ta nyugipeshe nyunaku.” <sup>37</sup> Aria Pita narigan nakri, “Debeini, aria nyak nyakri douk eik ta mare inamen unak um maresh? Eik douk madae inogugur um igok um agundok yagipesh nyak um uwe, uwok!”

<sup>38</sup> Aria Jisas nawanaman baraen nakri, “Pita, douk adur nyakri nyak ta nyugok um agundok nyagipesh eik um, aria ta uwok? Adur atin yakripen. Kwehigib ruwahepib wab, nyak ta nyunek rohwumesh biyeh atuh nyukri nyak madae nyudukem eik uwe, uwok, aria owot ta kadak tukitak tiyagwreh.”

## 14

*Jisas Anan Atun Douk Ahudok Atuh Yah Um Arpesh Shunak Shutogurum  
Iruhin Um.*

<sup>1</sup> Aria Jisas nakrip apak ananim disaipel nakri, “Ipakish mishish ta mare yowesh uwe, uwok. Ipak ko punek bilip um Iruhin aria eik shopunek ta punek bilipume. <sup>2</sup> Gani numunitum atudok eikin Yain ananit urupat douk sabaipi abom rip pape. Aria eik douk ta inak igabeimep anabik nupeimep. Douk madae anam rum mukus akure, eik ta mare igiyagimep ikripen namudok uwe, uwok. <sup>3</sup> Adur ta inak igapeshumep-aguk ipakiyu outumeb upemepaguk aria watak itanamori irumep. Aria abrudok wabur eik inak ipeum, ipak shopunek ta puni eik mupe. <sup>4</sup> Aria yah douk hanak um agundok eik yakri inak um, ipak douk wosik padukemah.” <sup>5</sup> Aria Tomas nakripan nakri, “Debeini, apak douk madae mudukem agundok nyak nyakri nyunak um uwe, uwok. Yah ta mudukemah mumam, um munamagu?” <sup>6</sup> Aria Jisas nawanaman baraen namudok. Nakri, “Eik kanak douk adur ahudok yah um arpesh shunak shutik Iruhin um, adur eik douk baugos um enyudok shiyagwreh adurin atin baraen um, aria douk shopunek adur baugos um enyudok shupe wosik abom iih nyumneh um. Uwok um enen arpen ta nyugipeshe kupaihi yah aria nyunak nyutik eikin Yain uwe, uwok. Yah douk adur eik kanak. <sup>7</sup> Douk ipak padukem eik aria

ta wosik abom um, eikin Yain douk shopunek ta pudukeman. Aria douk arigaha kweipon ipak wosik pape padukeman aria patrun jurug.”

<sup>8</sup> Aria Filip nakripan nakri, “Debeini, apak douk madae mukrium enesh eshudok kupaishi uwe, uwok. Aria makri nyiyabigap Yain atun aria jurug.” <sup>9</sup> Aria Jisas nebeiman baraen nakri, “Filip, eik douk yani ipak mape roubi nyutob aria nyak douk watak nyudukem eik uwe? Yakripen, eshudok arpesh shatik eik iri douk iga shatik Yain. Aria nyak douk nyarige um watak iyabigep Yain um maresh? <sup>10</sup> Nyak douk atin nyunek bilip um enyudok eik yakri Yain nape eik aria eik yape anan aka? Baraen yakripenen iri douk madae eik meyoh urkum murumen aria ipe ikripenen uwe, uwok. Aria Yain douk napenye iri nenek ananin mour aria nohur eik yakripen enyudok baraen. <sup>11</sup> Ipak douk punek bilip um eik um enyudok yakri eik yape um Yain aria Yain nape eik um. Uwok um, ipakip urkwip watak purmaguk enyudok Iruhin atun neneken iri mour douk eik yape yeneken iri aria ipak punek bilip um eik. <sup>12</sup> Adur atin yakripen. Enyudok arpen douk nyusuhw eikin baraan nyugipeshen iri, ihinyumori mour eik yeneken iri, enyen douk shopunek ta nyuneken. Adur, enyen ta nyunek debeinyi atin abom mour nyishagrakuk enyudok eik yeneken iri. Um maresh? Eik douk ta inak itik eikin Yain. <sup>13</sup> Maresh eshudok douk ipak punek betenumesh um eikin nyeigur iri, eik douk ta inekeshumep. Eik ananin nunganin inekesh namudok aria Yain ananin nyeigur ta shutuken nyuto iruhw. <sup>14</sup> Aria maresh eshudok douk ipak punek beten porige um eikin nyeigur iri, eik douk ta inekeshumep.”

### *Jisas Nakri Ta Nushopoki Iruhin ananin Mishin Nyunaki*

<sup>15</sup> “Douk ipak urkwip pakri punawasham eik um, eikin baraen douk adur ta pusuwen pugipeschen wosik atin. <sup>16</sup> Aria ta inek beten iyorik Yain aria ta watak nukepari Enyudok Enen douk ta Nyutaurumep um Dodogowip iri. Nukepen aria ta nyuni ipak pupe iih nyumneh. <sup>17</sup> Enyudok Nyutaurumep iri douk Iruhin ananin Mishin douk nyape um nyeyagwreh adurin atin baraen iri. Aria arpesh douk shapeum shenek yoweih amnabih aih iri ta mare shuraen nyupenyesh uwe, uwok. Um maresh? Eshesh douk madae shutrin aria shudukemen uwe, uwok. Aria ipak douk padukemen. Enyen douk nyani ipak pape aria ta nyuwish nyupenyep. <sup>18</sup> Eik douk ta ikwutipokuk inak aria ta mare ikutipuk pupeik kabi douk yaruhi batowish um uwe, uwok. Ta wata itanam-umepari. <sup>19</sup> Mare roubi um uwe aria arpesh douk shapeum shenek yoweih amnabih aih atin iri ta mare wata shutik eik uwe, uwok. Aria ipak wosik ta putiwe. Eik douk ta yikitak yape wosik abom iih nyumneh aria ipak shopunek ta adur pupe iih nyumneh. <sup>20</sup> Aria ahudok nyumnah hutogurum, um she igok aria watak ikitakumori, shagok um, ipak ta pudukemesh pukri eik douk yape eikin Yain, ipak pape eik aria eik yape ipak. <sup>21</sup> Eshudok arpesh douk shusuhw eikin dodogowinyi baraan shugipeshen wosik iri, eshudok arpesh douk adur urkwip pakri punawasham eik. Aria eikin Yain ta adur urkum mukri munawasham eshudok arpesh. Aria eik shopunek ta urkum mukri munawasham eshudok arpesh aria ta itogur iyabigesh eik kanak um adur shudukeme.”

<sup>22</sup> Jisas nakri namudok aria Judas nakri, “Debeini, namudok mumam namudok um nyakri nyutogurum apak atapish arpesh aria shapeum shenek ehudok amnabih yoweih aih iri nyakri uwok um nyiyabig nyak um eshesh?” Anudok Judas douk madae anudok douk Judas Iskariot uwe, uwok.

<sup>23</sup> Aria Jisas nawanaman bараen nakri, “Eshudok arpesh douk eshesh urkwip adur pakri punawasham eik iri, eshesh douk ta shusuhw eikin bараen aria shugipeshen wosik. Aria eikin Yain anan douk ta urkum mukri munawasham eshesh. Aria eik ini Yain ta unaki uni eshesh mupe ihih nyumneh. <sup>24</sup> Eshudok madae urkwip pakri punawasham eik iri douk madae shusuhw eikin bараen shugipeshen uwe. Aria enyudok bараen douk pemneke yeyagwrehen iri douk madae iyagwreh enen eikin bараen uwe, uwok. Eik douk yeyagwreh eikin Yain douk neshopoke yanaki iri ananin bараen.

<sup>25</sup> “Enyudok ihinyumorim bараen douk watak yani ipak mape aria yakripepen. <sup>26</sup> Aria enyudok Iruhin ananin Mishin douk enyudok douk ta nyutaurumep dodogowip iri. Eikin Yain ta nishopoken nyunakmori eikin nyeigur. Enyen nyunak aria ta nyiyabigep ihinyumorim enyenenyen pudukemen. Enyen ta watak nyuhur ipakip urkwip aria ipak ta watak urkwip purum enyudok ihinyumorim bараen douk eik yakripep um. <sup>27</sup> Eik ta ikwutipokuk inak, aria ehudok aih um shape wosik aparuh hor wosik um douk ehudok ikepehuk. Ehudok aih adur eikh aria douk ehudok yekepehuk. Eik madae ikep ehudok aih kabi arpesh shapeum shenek amnabih atih aih iri ta shukepē um uwe, uwok. Namudok aria ipakash mishish douk mare yowesh pukri punogugur uwe, uwok. <sup>28</sup> Ipak douk pemneke yakripep yakri, ‘Eik ta ikwutipokuk inak aria ta watak itanam-umepari.’ Douk ipakip urkwip adur pakri punawasham eik akure, ipak ta punadudareh um enyudok eik inak itik Yain. Um maresh? Anan douk debeini neshagrakuk eik. <sup>29</sup> Enyudok ihinyumorim bараen watak nyutogur uwe aria douk yakripepumen. Namudok aria nuhut abudok nyutob enyen nyukri nyutogur obi nyutob, ipak douk ta punek bilip um eik pukri eik yakripepuguk adurinyi bараen. <sup>30</sup> Eik ta mare watak ini ipak mupe roubi um miyagwreh sabainyi bараen shopunek uwe, uwok. Um maresh? Debeini um agundok atap iri douk hurukatin um nunaki. Anan nunaki, aria ta mare dodogowin um nunek enesh eshudok um eik uwe, uwok. <sup>31</sup> Aria eik yakri agundok atapish arpesh ta shudukemesh um agundok eik douk adur urkum manawasham eikin Yain. Aria shopunek yakri shudukemesh um enyudok yeneken iri douk Yain nakripe ananin dodogowinyi bараen aria douk yeneken. Aria ipak douk kitak mukutukuk agundok ba munak.”

## 15

### *Jisas Nakri Anan Douk Adurinyi Rowog Wain*

<sup>1</sup> Jisas watak shopunek nakri, “Eik douk enyudok adurinyi rowog wain. Aria eikin Yain douk anudok neneke mour numun agudok wainig nubarig iri. <sup>2</sup> Ihish nyeiguw douk shato iruhw eik enyudok rowog wain aria madae enep shuruwep piresh iri uwe, anan douk natupeshuk. Eshudok douk shuruwep peiresh iri, anan douk nagamohesh nagapeshesh neshuru banesh um wata sabaiapi shuruwep pir. <sup>3</sup> Aria douk namudok atin. Enyudok bараen eik yakripepen iri douk nyape ipakiruh aparuh aria nyenekep patogur yopipari. <sup>4</sup> Ipak ta adur putogur punasusuhw pupe eik aria eik shopunek ta adur itogur inosusuhw ipak. Enen nyeigur enyen kanak ta mare shuruwep pir uwe, uwok. Aria douk enyudok nyeigur nyanasuhw enyudok rowog wain um, aria enyen douk wosik shuruwep ta pir. Aria douk namudok atin. Aria ipak mare putogur punasusuhw eik aria pusuhw eikin bараen dodog pugipeshen um, ipak kanak ta mare dodogowip um punek yopih iah uwe, uwok.

<sup>5</sup> “Eik douk enyudok rowog wain aria ipak douk nyeiguhw. Namudok aria arpen douk nyutogur nyunasusuhw eik aria eik itogur inasusuhw enyen iri, enyen douk ta nyunek sabaihi yopihi aih aria yopuguni worigun. Aria douk ipak mare putogur punasusuhw eik um, aria ipak douk ta mare dodogowip um punek enen yopunyi mugu uwe, uwok. <sup>6</sup> Enyudok arpen douk madae nyutogur nyunasusuhw eik aria madae nyusuhw eikin baraen dodog nyugipeshen iri uwe, eikin Yain ta nenekebumen kabi douk natupok enen nyeigur enyudok rowog wain aria nunyubukuk ba yarin um. Aria enyudokmori nyeigur douk ta shutorumen shunyubukuk atugun aria shuwashen nyubuhuk nyih hanu um. <sup>7</sup> Aria ipak patogur panasusuhw eik aria eikin baraen nyupe ipak um, aria abudok nyutob ipak punek beten porige um eneshenesh eshudok ipak pakripe-umesh iri, aria adur atin, eshudok ta shutogur-umep kabi douk ipak penek beten porige um. <sup>8</sup> Aria douk ipak punek sabaihi yopihi aih um, aria namudok arpesh ta shutrip aria ta shutuk eikin Yain ananin nyeigur nyuto iruhw. Punekesh namudok aria arpesh ta shutrip shukri ipak douk adur pagipesh eik iri.

<sup>9</sup> “Eik douk urkum makri munawasham ipak kabi douk eikin Yain anan urkum makri eik um. Eikim urkum makri munawasham ipak aria iih ipak urkwip ta adur purum enyudok. <sup>10</sup> Aria douk ipak pugipesh eikin baraen adur atin um, aria eikim urkum ta mukri munawasham ipak. Aria iih ipak ta urkwip purum enyudok aria ta pupe wosik. Kabi douk eik yagipesh eikin Yain ananin dodogowinyi baraen aria ananum urkum mukri manawasham eik aria eik urkum mukri murum enyudok yape wosik um. <sup>11</sup> Eik douk yakripep enyudok baraen. Um maresh? Eik adur yakri ipak ta purao ehudok eikih aih um yanadudareh um hupeyep. Namudok aria ipak ta pupe um punadudareh puriguk. <sup>12</sup> Eikin dodogowinyi baraen douk enyudok. Ipak atin atin ipakip urkwip douk pakri punawasham ipak pini kupaishi arpesh kabi douk eik urkum makri munawasham ipak um. <sup>13</sup> Ehudok aih um enen arpen urkum adur mukri munawasham enyenyish arpesh aria nyugok um nyutaurumesh um, enyudok douk nyishagrakuk ihilmorim aih um urkwip pakri punawasham kupaishi um. <sup>14</sup> Aria douk ipak adur pusuhw eikin baraen dodog pugipeshen um, aria ipak douk eikish arpesh. <sup>15</sup> Douk eik ta mare wata ihwarep peneme mour meyoh iri uwe, uwok. Um maresh? Arpen nyenek mour um enyenyin debeini, enyen douk madae nyudukemen atin uwe enenyen enyenyin debeini nakri um nuneken iri uwe, uwok. Aria douk, eik ta wata ihwarep eik kanak eikish arpeshim meyoh. Um maresh? Ihinyumori eikin Yain nakripe-yenyi baraen douk yakripepen yeyaten. <sup>16</sup> Ipak douk madae punagraeh eik uwe, uwok. Eik yanagraeh ipak um adur punek sabaihi yopihi aih aria yopuguni worigun. Aria ehudok yopihi aih ta adur hupe namudok atin. Namudok aria eikin Yain ta nukep ihishmori douk ipak puhur eikin nyeigur nyuto iruhw aria poriganum nukepesh iri. <sup>17</sup> Dodogowinyi baraen eik yakripep um pugipeshen iri douk enyudok. Ipak atin atin urkwip douk pakri adur punawasham ipak pini ihish arpesh.”

### *Eshudok Atapishi Arpesh Ta Shunenem Horik Horin Um Eshesh Douk Shagipesh Jisas Iri*

<sup>18</sup> “Aria arpesh douk shapeum shagipesh ehudok amnabih yoweihiai iri shukep agabus aria shenenem horik horin um, ipak aria pudukemesh um eshesh douk sharik sheke agabus eik aria shenenem horik horin um eik shopunek. <sup>19</sup> Aria ipak pakri pugipesh enyudok douk eshesh shapeum sheneken iri um, aria esheship urkwip douk ta shukri shunawasham shukri ipak douk esheship iri. Aria eik douk yanagraehepum pupe eikish arpesh

aria ipak douk mare pugipesh ehudok amnabih aih uwe, uwok. Namudok aria eshesh douk shakri uwok um ipak aria shape shenek horik horin um ipak. <sup>20</sup> Ipakip urkwip douk ta purum enyudok baraan douk nubokadae yakripen iri. Baraen enyudok. ‘Arman neneh mour meyoh um kupaini arman iri, anan douk madae nishagrakuk ananin debeini uwe, uwok.’ Aria douk namudok atin. Eshesh douk shenek enenyenen um eik ipakin Debeini aria ipak shopunek ta shunekep enenyenen. Aria shopunek ta eshesh shumnek eikin baraen akure, ipakin shopunek ta shumneken aria shugipeshen. <sup>21</sup> Enyudok yakriep um douk ta shunekenyumep. Um maresh? Ipk douk ekip pagipesh eik aria eshesh douk madae shudukem anudok neshopoki eik yanaki iri uwe, uwok. <sup>22</sup> Aria eik douk madae ibuhi agundok atap aria ikripes Iruhin ananin baraaen shumneken akure, Iruhin ta mare nukri baraaen nyupenyesh um shenek eneshenesh yoweishi inahos uwe, uwok. Aria eik douk yabuhi yakripes hemnek aria yah douk wokesh um shukri shunabeshuk um eneshenesh shenekesh iri yoweishi um. <sup>23</sup> Eshudok arpesh douk shakri uwok um eik aria shenek horik horin um eik iri, eshesh douk shopunek shakri uwok um eikin Yain aria shenek horik horin um anan shopunek. <sup>24</sup> Eik yenek enenyenen Iruhin atun neneken iri mour douk riguk madae enen arpen nyuneken iri uwe nyatogur aria shatrin. Aria eshesh douk shatik eik yenek nyatogur aria shakri uwok aria shenenem horik horin um eik yani eikin Yain shopunek. Aria douk adur, um eik mare inek enyudok mour shutrin akure, aria Iruhin ta mare nukri eshesh douk shenek yoweishi inahos aria ta mare adur nunemesh debeinyi baraaen uwe, uwok. <sup>25</sup> Enyudok douk shenek nyatogur um enen baraaen nyetem Iruhin ananik Buk iri nyatogur adurin atin. Baraen enyudok. ‘Baugenyum baraaen uwok enen uwe, aria shakri uwok um eik. Sheneme horik horin eik meyoh.’

<sup>26</sup> “Aria nuhut biyen enyudok Nyutaurumep um Putogur Dodogowip iri ta nyunaki. Enyen douk Iruhin ananin Mishin douk nyeyagwreh adurin atin baraaen iri. Enyen douk nyani Yain shape aria ta nyunaki. Enyen douk nyani Yain nyape aria ta ishopoken nyukutun-uguk nyunaki. Ta nyunaki aria nyukripes sabainyi eikin baraaen. <sup>27</sup> Aria ipak douk shopunek ta pukripes eikin baraaen. Um maresh? Riguk watak sagomatin yohur enyudok mour obi nyutob arigaha douk, ipak douk pagipesh eik aria patiwe aria padukemesh.”

## 16

<sup>1</sup> Jisas watak apa nakripes baraaen nakri, “Eik douk yakriep enyudok sabainyi baraaen um yakri ipak mare pukutukuk eik uwe, uwok. <sup>2</sup> Aria ta shukrip ipak um pukutukuk eshesh Juda shanotorum shape sheneyagwreh baraaen-ogwi urusag putograkuk aduk um mare punamesh punek lotu. Aria nyutob ta butogur um enesh arpesh ta shep pugok iri ta shunek urkum shukri eshesh wosik shenek Iruhin ananin yopunyi mour. Aria uwok. <sup>3</sup> Ta shunemep enyudok um maresh? Eshesh douk madae shudukem eik aka, shudukem eikin Yain uwe, uwok. <sup>4</sup> Eik douk yakriep enyudok um abudok nyutob shukri shunemep enyudok obi nyutob, aria ipak ta urkwip purum pukri eik douk yarik yakriep debeinyi baraaen um enyudok.

### *Mour Douk Iruhin ananin Mishin Ta Nyuneken Iri*

“Riguk watak sagomatin um yikitak um inek mour um douk madae ikripes enyudok baraaen uwe, uwok. Um maresh? Eik douk watak yani ipak mape. <sup>5</sup> Aria douk, eik ta inak itik anudok douk neshopoki eik yanaki iri. Aria ipak douk madae anan norige um agundok ta eik inak um uwe, uwok.

**6** Aria eik yakritep enyudok baraen um ta inak um. Namudok aria ipakish mishish douk yowesh abom. **7** Aria adur atin yakritep. Eik ikutukuk ipak pupeik inak um, enyudok douk wosik um itaurum ipak. Aria douk eik ikri mare inak um, aria enyudok Nyutaurumep iri ta mare nyunak-umepari uwe, uwok. Aria douk eik inak um, eik douk ta ishopokenyi nyunaki nyuni ipak pupe aria nyutaurumep. **8** Aria abudok nyutob Enyen nyunaki obi nyutob, Enyen douk ta nyiyabigesh agundok atapishi arpesum yoweishi inahos douk eshesh madae shudukemesh uwe aria shape shenekesh um. Shopunek ta nyuwormesh baugos nyiyabigesh yopuhi aih huni agundok Iruhin ta nunekemesh debeinyi baraen um shenek yoweishi inahos um. **9** Enyen douk ta nyiyabig arpesum aria shudukemesh um eshesh douk shenek yoweishi inahos. Um maresh? Eshesh madae shunek bilip um eik um uwe. **10** Aria Enyen nyuwormesh baugos nyiyabigesh yopuhi aih. Umum maresh? Eik ta inak itik eikin Yain aria ipak ta mare watak putive uwe, uwok. **11** Aria Enyen ta nyunaki nyiyabigesh um agundok Iruhin ta nunekumesh debeinyi baraen um esheshish yoweishi inahos. Aria shudukemesh um eshesh yoweishi arpesum. Um maresh? Iruhin douk nenekuman debeiti kwot Satan douk debeini um enenyenen um ahudok atapih aih iri.

**12** “Eik sabainyi baraen douk yakri ikritepumen iri. Aria douk ta ikritep aria ta mare pudukemen uwe, uwok. Namudok aria ta mare ikritep. **13** Aria abudok nyutob enyudok Iruhin ananin Mishin douk nyeyagwreh adurin atin iri nyunaki obi nyutob, Enyen ta nyiyabigep aria pudukem ihinyumori adurinyi baraen. Enyen ta nyunaki aria ta mare nyuwerah enyen atin aria nyiyagwreh enen baraen um enyen kanak uwe, uwok. Aria ta nyukritep enyudok baraen douk nyemnek Iruhin nakriyen iri. Aria ta nyukritep um eshudok ta kweipon shutogur iri. **14** Enyen douk ta adur nyutuk eikin nyeigur nyuto iruhw um agundok nyiraouri eikin baraen nyunaki nyukritep um. **15** Eneshenesh eikin Yain nagremesh iri douk eikishi atish. Namudok aria douk yakritep yakri Iruhin ananin Mishin ta nyukritep baraen douk nyemnek eik yakripen um.

### *Amam Disaipel Amamiruh Aparuh Ta Yoweruh Aria Ta Watak Hunadudareh*

**16** “Banab nyutob meyoh aria ipak ta mare watak putrue uwe, uwok. Inakuk aria ta mare roubi um aria ta watak itanamori putive.” **17** Namudok aria anam ananim um disaipel hatanam hanasorim um hakri, “Baugeniyum enyudok baraen um nakri banab nyutob meyoh apak ta mare watak mutrun aria mare roubi um ta watak nutanamori mutrun um douk nyakri maresh? Aria shopunek nakri apak ta mare mutrun. Um maresh? Anan douk ta nunak nutik ananin Yaken.” **18** Amam hape hanasorim hakri, “Baugeniyum enyudok baraen um nakri banab nyutob meyoh um douk adur nyakri maresh? Apak madae mudukemen uwe, uwok.”

**19** Jisas natrum aria nadukemesh um amam douk hakri horigan. Namudok aria nakripam nakri, “Eik douk yakri, ‘Banab nyutob meyoh ipak ta mare watak putive, uwok. Aria ta mare roubum aria ta watak itanamori putive.’ Ipak douk pape panasorim um pakri pudukem baugeniyum enyudok baraen eik yakriyen iri aka, uwok?” **20** Adur atin yakritep. Ipak ta aparuh yoweruh pureh punokwukri atin um ehudok yoweishi aih shenekeh um eik. Aria arpesum shapeum shagipesum atapih yoweishi aih iri ta shunadudareh. Ipak ta aparuh yoweruh, aria agundok aparuh yoweruh um ta wata hunuk huwishuk aria ta watak punadudareh puriguk abom. **21** Abudok nyutob onok armatok kwupe kwabirak um kwubahan kubuki batowin obi nyutob, okwokwiwh apahw douk yowehw. Um maresh?

Owkokwib nyutob um kumnek eriger um douk batogur. Aria abudok nyutob okwok kwubanuhuk kubuki batowin um jurug, aria okwokwim urkum ta mare watak mur um arudok eriger uwe, uwok. Um maresh? Okwok douk kwabanuh kwobuki batowin nyatogur nyape agundok atap aria kwanadudareh. <sup>22</sup> Aria ipak douk namudok atin. Douk abudok nyutob ipakib um ipakish mishish yowesh um. Aria eik ta watak itanamori itrip aria ipakiruh aparuh ta wata adur um hupe wosik aria punadudareh abom. Aria ta mare enesh arpesh shunak shukri uwok um agundok ipak ta punadudareh puriguk um uwe, uwok. <sup>23</sup> Abudok nyutob bukri butogur obi nyutob, ipak ta mare porige enen baraen uwe, uwok. Adur atin yakritep. Eikin Yain ta nukep maresh eneshenesh eshudok ipak porigan um nukepesh um eikin nyeigur iri. <sup>24</sup> Riguk arigaha douk, ipak douk madae porig Iruhin um nukep enesh eshudok um eikin nyeigur uwe, watak. Ipak douk porigan um, aria ta nukepesh. Namudok aria ipak ta punadudareh puriguk abom.”

### *Jisas Neneh Uhwin Um Eneheneh Um Ehudok Yoweihai Aih Arpesh Shape Agundok Atap Iri Shenekeh Iri*

<sup>25</sup> “Douk enyudok sabainyi baraen douk eik yape yakritep wobu-wobren atin. Aria nyutob ta butogur um eik ta mare watak ikritep wobuwobren um uwe, uwok. Aria ta watak adur iwerehenyume p aria ikritep um eikin Yain um pudukeman wosik. <sup>26</sup> Aria abudok nyutob bukri butogurum, ipak kanak ta punek beten porig eikin Yain um eikin nyeigur. Eik douk mare ikritep um eik kanak ta iyorik Yain um ta nutaurumep uwe, uwok. <sup>27</sup> Um maresh? Eikin Yain anan kanak douk urkum manawasham abom um ipak. Anan douk urkum manawasham ipak um maresh? Ipak douk nubokadae urkwip panawasham eik aria shopunek penek bilip pakri adur eik douk yani Iruhin wape iri aria yanaki. <sup>28</sup> Adur, eik douk yani Yain wape iri aria seiwok yakutunuguk yanakmori agundok atap. Aria douk, eik ta watak ikutukuk agundok atap aria watak itanam inak itrur.”

<sup>29</sup> Aria apak ananim disaipel memnek namudok aria makripan makri, “Adur, douk nyak nyowerehumap baraan yopugunum abom aria madae nyukripap wobuwobren atin uwe, uwok. <sup>30</sup> Douk apak madukemesh um nyak douk adur nyadukem ihishmorim eshudok. Aria enen arpen nyukri nyorigen enen baraen obi nyutob, enyen douk watak nyorigen uwe, aria nyak douk iganigadae nyadukem enyudok baraen enyen nyakri nyorigenyumen iri. Apak douk matik namudok aria menek bilip makri nyak douk nyani Iruhin pape iri aria nyanaki.”

<sup>31</sup> Jisas watak nabaimam baraan aria nakri, “Aria riguk arigaha douk ipak penek bilip um eik aka, uwok? <sup>32</sup> Ipak pumnek. Nyutob ta butogur aria douk abudok batogur jurug. Um ipak ihishmorim ta shihiyahep aria pukutukuk eik atuwe ipeik. Aria ipak ta puruwoek punak atun atunuk, punak um ipakirub warub sisiguk atin. Aria douk ta mare eik atuwe ipeik uwe, uwok. Um maresh? Eikin Yain douk nani eik wape. <sup>33</sup> Eik douk yakritep enyudok baraan um yakri ipak adur pupe putogur putoruh eik aria aparuh hupe wosik abom. Eshudok atapishi arpesh ta shunekep enen yenken aria ta purao debeiri eriger. Aria ipak mare punogugur uwe, uwok. Ipak adur ta piyotu dodogowip atip. Eik douk yenek uhwinyum eshudok atapih yoweihai aih jurug.”

<sup>1</sup> Douk Jisas nakriyuk enyudok jurug aria napuhur natik iruhw heven aria nenen beten nakri, "Eikin Yain, abudok nyutob um eik igok um abudok batogur. Aria nyak nyutuk eikin nyeigur nyuto iruhw um eik nyakin Nunganin shopunek ta ituk nyakin nyeigur nyuto iruhw. <sup>2</sup> Um maresh? Nyak douk nyeke enyudok big um ipe debeiwe iri um ihishmorim arpesh um itaurum eshudok arpesh douk nyak nyekeyesh iri um shupe wosik abom ihih nyumneh. <sup>3</sup> Aria baugos um agundok shupe wosik abom ihih nyumneh um douk namudok. Eshesh shudukem nyak atin douk adurin atun Iruhin aria shudukem eik Jisas Krais douk nyak nyeshopoke yanaki iri. <sup>4</sup> Eik yenek enyudok mour yeyaten, douk nyak nyeshopokei um inaki ineken iri. Yeneken douk agundok atapishi arpesh shatiwe aria shatuk nyakin nyeigur nyato iruhw. <sup>5</sup> Yain, nyak douk watak nyunek agundok atap uwe, aria eik douk yani nyak wape aria nyeke debeinyi nyeigur nyeneke adur yatogur dodo goiwe um lait abom. Aria douk eik yakri nyak wata nyuke enyudok atin debeinyi nyeigur nyuneke adur itogur um lait abom kabi riguk aria sagomatin nyekeyen um.

<sup>6</sup> "Aria eik yowereh nyak um amudok armam douk nyak nyekeyam iri um agundok atap. Amudok amam agundok atapim. Amam douk nyakim armam aria douk nyako eikam. Nyekeyam aria nyakin baraen douk hasuwen hagipeshen wosik. <sup>7</sup> Aria douk amam hadukemesh um ihishmori eshudok nyak nyekeyesh iri douk nyakish atish. <sup>8</sup> Baraen nyak nyakri poyen iri douk yakripam aria hasuwen hadukemesh hakri adurin. Hakri riguk eik adur yani nyak wape iri aria nyeshopoke yanaki. <sup>9</sup> Aria eik douk yenek beten yarigenyum nyutaurumam. Madae inek beten iyorigenyum nyutaurum arpesh douk shapeum sheneh ahudok atapihi yoweihai aih iri uwe, uwok. Eik yenek beten um nyutaurumam amudok armam douk nyak nyekeyam iri. Um maresh? Amam douk nyakim. <sup>10</sup> Ihishmorim nyakishi arpesh douk eikishi. Aria ihishmorim eikishi arpesh douk nyakishi. Aria kupaishi shatik eshudok ohwakishi arpesh aria shadukemesh um agundok eik adur dodo goiwe atuwe aria shatuk eikin nyeigur nyato iruhw um. <sup>11</sup> Aria douk eik hurukatinyum ikutukuk agundok atap inaku ini nyak up. Aria amam ta hupeik agundok atap. Aria eikin adurin yopuyopuni Yain, eik yakri nyak nyutaurumam abom aria amam hupe dodo goiwim um nyakin dodo goinyi nyeigur douk nyak nyekeyen iri. Nyutaurumam um amam adur hupe atun arman meyoh kabi ohwak wanaboum wape atun arag um. <sup>12</sup> Abudok nyutob eik yani amam mape um, eik douk yape yeyoham yataurumam hape wosik um nyakin dodo goinyi nyeigur douk riguk nyak nyekeyen iri. Yape yata tapam aria madae anan nunakrebe-iguk uwe. Aria anudok atun douk ta nunak um yoweiburi wabur hel iri atun ta nunakrebe-iguk. Anan douk nunakrebe-iguk um enyudok baraen nyetem nyakik Buk iri nyutogur adurin atin.

<sup>13</sup> "Aria douk eik ta watak inaku ini nyak up. Douk namudok aria douk watak yape agundok atap aria yakripam enyudok baraen. Yakripam um amam humnek aria amamiruh aparuh hupe wosik abom hunadudareh huriguk kabi douk eikihw apahw hwape wosik hwanadudareh um. <sup>14</sup> Eik yakripam nyakin baraen aria agundok atapishi yoweishi arpesh douk adur shatogur horik horin um amam. Um maresh? Amam madae hugipeshesh um hunek ehudok atapih yoweishi aih uwe, uwok. Hagimeh kabi eik madae igipesheh munek um uwe, uwok. <sup>15</sup> Aria eik madae iyorigen um nyurao amudok armam hukutukuk agundok atap uwe, uwok. Aria eik yarigen um nyatata pam um yoweini arman um mare nununum. <sup>16</sup> Aria eik madae igipesheh agundok atapish arpesh um munek eneshenesh agundok yoweishi inahos um ehudok atapih yoweishi aih uwe, uwok. Aria amudok

shopunek douk namudok atin. Amam douk madae hugipesesh uwe, uwok. <sup>17</sup> Enyudok nyakin baraen douk adurin atin abom. Aria eik douk yakri nyak nyuweshik nyakin baraen nyupe numun amamiruh aparuh um amam ta hupe nyakim yopumi armam atum. <sup>18</sup> Aria eik douk yeshopokam um hunak agundok atap hunek eikin mour. Yeshopokam um hunak huneken kabi riguk eik yani nyak wape iruhw aria nyak nyeshopoki eik yanaki agundok atap aria yenek nyakin mour um. <sup>19</sup> Eik douk yakri itaurum amam aria iken eik kanak um adur itogur nyakiwe atuwe abom. Yenekesh namudok um amam shopunek adur um hutogur nyakim atum abom.

*Jisas Neneb Beten Narig Iruhin Um Nutaurum Ihishmorim Arpesh  
Shagipesh Anan Iri*

<sup>20</sup> “Aria eik douk madae inek beten iyorigenyum nyutaurum amudok eikim disaipel atum uwe, uwok. Eik shopunek yenek beten yarigenyum nyutaurum eshudok arpesh douk ta anah nyumnah shumnek nyakin baraen amam hukripeshen iri aria shunek bilip um eik iri. <sup>21</sup> Eik yarigenyum eshesh ta adur shupe atish arpesh. Yain, yakri shupe kabi nyak nyape eik, eik yape nyak aria wanaboum watogur atun arag um. Yakri adur um shunakrop um shupe kabi ohwak um agundok atapishi arpesh shutrish aria shunek bilip shukri eik douk nyak nyeshopokei aria douk yanaki. <sup>22</sup> Aria eik douk yekesh enyudok atin dodog nyani debeinyl nyelgur douk nyak nyako eik um. Yekeshen um eshesh adur shupe atish arpesh kabi ohwak wanaboum wape atun arman um. <sup>23</sup> Nyak nyape eik aria eik douk yape eshesh um eshesh adur shutogur atish arpesh abom. Shunekesh namudok um agundok atapishi arpesh ta shudukemesh shukri eik douk nyak nyeshopoke yanaki. Aria shopunek ta shudukemesh um nyak douk urkum manawasham eshesh kabi nyak urkum manawasham eik um.

<sup>24</sup> “Yain! Seiwok nyak watak nyunek agundok atap uwe aria nyak douk adur urkum makri manawasham eik. Namudok aria nyeneke yatogur lait abom aria yatogur dodoxgoiwe atuwe. Douk namudok aria douk yakri eshudok arpesh nyak nyekeyesh iri douk shunaku shuni eik mupe agundok eik yapeum. Yakri mupe aria shutik agundok douk eik adur yatogur lait abom um aria dodoxgoiwe atuwe um. <sup>25</sup> Ekin yopuni adurin Yain, agundok atapishi arpesh douk madae shudukem nyak uwe, uwok. Aria eik douk yadukemen. Aria eshudok eikishi arpesh shopunek shadukemesh um eik douk nyak nyeshopoke yanaki. <sup>26</sup> Eik douk yowereh nyak um eshesh aria shadukemen. Aria douk ta watak ipe ikripesh um esheship urkwip adur pakri punawasham kupaishi shini ohwak kabi nyak urkum makri manawasham eik um. Aria ikripesh shopunek um eik kanak ta ipe eshesh um.”

## 18

*Judas Narauri Jisas Ananim Horim Nanaki Neyabigam Um Jisas Aria  
Hasuwan Haran Hanak  
(Matyu 26:47-56; Mak 14:43-50; Luk 22:47-53)*

<sup>1</sup> Douk Jisas neneb beten narig Iruhin um jurug aria nani apak ananim disaipel makitak mabimawish anat shokwuti banot shahwarat um Kidron iri aria manak gani wobrehah. Gani wobrehah um banot douk anagos rowos shahwaragos um oliv iri seyotu. Manak mawish aria mape agnudok.

<sup>2</sup> Riguk Jisas nani apak ananim disaipel manak mawish sabaihi agundok agusudok rowos oliv sataoum. Douk namudok aria anudok Judas douk ta nuwereh Jisas um ananim horim aria hasuwan hunak hon nugok iri

douk nadukemagun. <sup>3</sup> Aria abudok wab amam debeimi pris hani Farisi heshopok anam soldia hani amudok anam heyoh Iruhin ananit debeiti urupat iri hanak. Hakitak hehem nyihish lamhos hasuwesh, hasuhw bainatog gwani burawos aria Judas narikumam hanak. <sup>4</sup> Jisas douk nadukemum sabainyi enyudok douk ta nyutogur-uman iri. Douk hanak aria anan nanak huruhuruk aria narigam nakri, “Ipak paurim amiapen?”

<sup>5</sup> Aria amam hakri, “Apak maurim Jisas douk nanaki wabur Nasaret iri.”  
Aria Jisas nakri, “Eik douk enyudok wo.”

Anudok Judas douk nuwerek Jisas um husuwan hunak hon nugok iri douk nanamam heyotu. <sup>6</sup> Douk hemnek um Jisas nakri, “Eik douk enyudok wo” aria wata hatatigos hanak um agabus aria hanak hatu habuh hakus atap.

<sup>7</sup> Aria Jisas watak shopunek narigam nakri, “Ipak panaki paurim amiapen?”

Aria amam hakri, “Apak maurim Jisas douk nanaki wabur Nasaret iri.”

<sup>8</sup> Aria Jisas nawanamam baraeen nakri, “Iganigadae yakriep wo. Arman pape pauriman iri douk eik atuwe. Aria douk ipak paurim eik panaki um, ipak douk pusuhw eik atuwe. Amudok pukutumuk hunak.” <sup>9</sup> Anan douk nakri enyudok baraeen um enen baraeen riguk anan kanak nakriyen iri nyutogur adurin atin. Baraeen enyudok. “Yain, eik madae idiguk anan um amudok armam douk nyak nyekeyam iri nunak nuwishuk uwe, uwok.”

<sup>10</sup> Saimon Pita douk noruki anat bainat neyotu agundok. Douk natukoti atin natupok Markus ananin yopunyi rogor ehahih atah tukarah. Anudok Markus douk neneck mourum debeini pris iri. <sup>11</sup> Jisas natik namudok aria nakrip Pita nakri, “Rukuk bainat agundok iganigadae nyatukatmori. Nyak nyakri eik ta mare isah enyudok amaeen douk eikin Yain nakri um ta inyusah iri aka, uwok?”

### *Amam Soldia Harao Jisas Hanak Um Anas*

<sup>12</sup> Aria amudok soldia hani amamin debeini soldia hani amudok iganigadae heyoh Iruhin ananit debeiti urupat iri hasuhw Jisas howeshikan. <sup>13</sup> Howeshikan aria harik haranum Anas. Anas ananin nugawinen Kaiafas douk nape debeini pris abom um enyudok kwar. <sup>14</sup> Anudok Kaiafas, riguk douk nakrip eshesh Juda esheshim debeimi nakri enyen douk wosik um atun arman meyoh nugok um nutaurum ihishmorim arpesh.

### *Pita Nakri Anan Madae Nudukem Jisas Uwe (Matyu 26:69-70; Mak 14:66-68; Luk 22:55-57)*

<sup>15</sup> Douk hasuhw Jisas haran hanak aria Pita nani anudok anan disaipel hagipeshan hanak. Anudok anan disaipel, douk adur debeini pris nadukeman wosik. Douk nadukeman namudok aria anan adur neirum Jisas hawish numun anudok debeini pris ananig ahwog. <sup>16</sup> Amam hawish aria Pita neyotukuk aduk wit. Aria anudok disaipel douk adur debeini pris nadukeman wosik iri watak natanam nakrip okwudok armatok kweyoh wit iri, aria narao Pita hawish.

<sup>17</sup> Hawish aria okwudok armatok kwarig Pita kwakri, “Aria nyak douk shopunek enenyum Jisas ananin disaipel?”

Aria Pita nakri, “Uwok, eik uwok.” <sup>18</sup> Agagun douk nyumanugos-igun aria eshesh shenek mour agnudok iri shani amam heyoh Iruhin ananit debeiti urupat iri shautig eneh nyih aria sheyotu shersharih um hiyokesh. Aria Pita douk shopunek nanamesh sheyotum nyih hiyokan.

### *Debeini Pris Nemnek Jisas Ananit Kwot (Matyu 26:59-66; Mak 14:55-64; Luk 22:66-71)*

<sup>19</sup> Aria abudok nyutob, anudok debeini pris nape narig Jisas. Narigan um apak ananim disaipel mani enyudok baraan douk nape neneh skulum arpesan um. <sup>20</sup> Aria Jisas nakripan nakri, “Eik yakripesh eikin baraan ihish arpesan yopugunum atugun. Eik adur yenek skulumes gani numun um narub agundok Iruhin ananit debeiti urupat tataoum. Yakripeshen agundok ihishmorim Juda douk manaki mantorum um. Eik douk madae ibeshuk enen baraan ikripesh shokubur anabik uwe, uwok. <sup>21</sup> Nyak nyarig eik um maresh? Nyorik éshudok douk shemnek eikin baraan iri shukripen. Eshesh douk adur shadukemen um eik yakripeshen iri baraan.”

<sup>22</sup> Douk Jisas nakri namudok aria anan neyoh Iruhin ananit debeiti urupat iri nabowan popaeshohos. Aria nakri, “Nyak mare nyukripan baraan debeg atin um anudok debeini pris uwe, uwok.”

<sup>23</sup> Aria Jisas nebeiman baraan nakri, “Douk eik ikri enen madae adurin iri uwe baraan um, nyak nyukrip ihishmorim sheyotu agundok iri um enyudok baraan douk eik yakriyen iri. Aria douk eik madae ikri enen adurin iri baraan uwe um, aria nyak douk nyae meyoh um maresh?” <sup>24</sup> Aria abudok nyutob Anas neshopok Jisas nanak um debeini pris Kaifas obi nyutob, ahwudok maduhw douk haweshik Jisas ananish roguhw um douk watak hwor.

*Pita Wata Shopunek Nakri Anan Madae Nudukem Jisas Uwe  
(Matyu 26:71-75; Mak 14:69-72; Luk 22:58-62)*

<sup>25</sup> Salimon Pita douk watak neyotu um nyih aria eshesh shani anan sheyotu iri sharigan shakri, “Aria nyak douk shopunek enenyum Jisas ananin disaipel aka, uwok?”

Aria Pita nagiyagig nakri, “Uwok, eik uwok.” <sup>26</sup> Anan neneh mour meyoh um debeini pris iri douk nani anudok iganig Pita natupokan atah iri amam atup awirop. Douk anudok arman natik Pita aria narigan nakri, “Iganigadee douk yatrin nyani Jisas peyotu nubarig douk rowos oliv sataoum?” <sup>27</sup> Pita watak shopunek nagiyagig anah shopunek aria ahudok atuh owot adur takitak tape teyagwreh.

*Sharao Jisas Um Pailat Douk Nape Debeini um Gavman Um Judia Iri  
(Matyu 27:1-2, 11-14; Mak 15:1-5; Luk 23:1-5)*

<sup>28</sup> Aria ruhur atin eshesh Juda shakitak shakutukuk Kaifas ananit urupat sharao Jisas shanak. Sharan shanak um Pailat douk nape debeini um gavman um Judia iri ananit urupat. Agagun douk watak ruhur aria shakri uwok um shuwishi numun urupat uwe, uwok. Shakri ta shuwishi aria Iruhin nutrish nukri shanabosusih aria eshesh ta mare shuwok agundok worigun Pasova uwe, uwok. Namudok aria douk sheyotuguk aduk.\*

<sup>29</sup> Douk namudok aria Pailat nakitak natograri aduk aria nariges nakri, “Ipak douk pakri punekuman maren baraan anudok arman?”

<sup>30</sup> Aria eshesh Juda shakri, “Anan madae nuneh yoweishi inahos akure, apak ta mare muranium nyak uwe, uwok.”

<sup>31</sup> Eshesh shakri namudok aria Pailat nakripesh nakri, “Ipak meyoh pusawan aria punak punekuman baraan. Punekenyuman baraan kabi

\* **18:28:** Pailat douk nape debeini um gavman iri nani ananishi, eshesh douk Rom. Aria eshesh Rom douk madae shugipesheh atih uwe ehudok aih douk eshesh Juda shagipesheh aria Iruhin ta nutrish aria nahwaresh yopishi um uwe, uwok. Douk namudok aria eshesh Juda shakri uwok um shuwishi anudok kupaibi amnabin ananit urupat aria Iruhin nutrish ba nukri shanabosusih iri uwe, uwok.

douk ipakin lo nyakrium puneken um eshudok douk shenek yoweishi inahos iri um."

Aria eshesh Juda shakri, "Ipak Rom pakri apak mare mubo enen arpen nyugok uwe, uwok." <sup>32</sup> Eshesh douk shakri namudok um enen baraan riguk Jisas nakriyen um shon nugok nir rowog kruse um nyutogur adurin atin.

<sup>33</sup> Aria Pailat wata natanam nanak nawish ananit urupat nepe nasuhw kwotog um aria nahwar Jisas nawish. Nawish aria narigan nakri, "Nyak douk eshesh Juda esheshin king?"

<sup>34</sup> Aria Jisas narigan nakri, "Enyudok baraan douk nyak meyoh nyarige aka, uwok enesh shakripenyum eik aria douk nyarige?"

<sup>35</sup> Aria Pailat nebeiman baraan nakri, "Eik douk madae anan Juda uwe, uwok. Aria nyak nyenek maresh aria nyakishi shani amam debeimi pris douk shasuhwen sharaenyumori eik um imnek nyakit kwot?"

<sup>36</sup> Aria Jisas nebeiman baraan nakri, "Agundok eik yape debeiwe-irium eikish arpesh um douk madae agundok atapishi arpesh apa shagime um uwe, uwok. Aria eik ipe debeiweirium eshesh namudok akure, eshudok shenekume mour iri ta shenek wanohw aria ta mare shusuhwe iri shunuki shiyubuk eshesh Juda esheshis wis uwe, uwok. Aria agundok eik yape debeiwe iri um eikishi arpesh um douk madae kabi agundok atapishi arpesh apa shenekesh um uwe, uwok."

<sup>37</sup> Aria Pailat narigan nakri, "Namudok aria nyak douk anan king aka, uwok?"

Aria Jisas nakri, "Nyak nyakri wo, eik douk king. Eikik amakek douk kweyubuki aria yanaki agundok atap um inek enyudok mour ikripesch adurin atin baraan. Ikripesch aria sabaishi arpesh douk apa shagipesch adurinyi baraan aria ta shugipesch eikin baraan."

<sup>38</sup> Aria Pailat narigan nakri, "Enyudok adurin atin baraan douk maresh?" Pailat nakriyuk namudok aria nikitak natogur nakrip eshesh Juda nakri, "Eik madae iparug enesh anan nenekehi iri yoweishi inahos uwe, uwok.

<sup>39</sup> Aria anah ipak padukemoh iri aih douk namudok. Ihish kwarahos ipak penek agundok debeiguni worigun Pasova um, eik apa yakweshih anan nonoweshik nepe shunuweshik-ati urupat iri natogur nanak meyoh. Douk namudok aria ipak pakri wosik um eik ikweshih anudok ipak Juda ipakin king nunak meyoh aka, uwok?" <sup>40</sup> Aria eshesh shahwar debeg shakri, "Uwok, anudok uwok. Apak makri nyukweshihi Barabas nutogrumapari." Anudok Barabas anan douk apa nenekehi wanohw aria nakwuaruh atuh iri.

## 19

### *Pailat Nakri Ta Shunek Nyilim Jisas Rowog Kruse (Matyu 27:15-31; Mak 15:6-20; Luk 23:13-25)*

<sup>1</sup> Douk eshesh shakri namudok aria Pailat nakrip amam soldia habo Jisas haprukan onohw maduhw kabi margit um. <sup>2</sup> Haprukan maduhw um jurug, aria hadaresh anah pruwehwihiw maduhw hadareshohw henekohw kabi anan king ananit hat um aria hahwemuman barag. Aria shopunek hanuguman anah owishiborihi rupah. <sup>3</sup> Douk henekuman eshudok iyoh aria hanak hurukatin hakri, "Ruwahep, nyak eshesh Juda esheshin king" Hakripan namudok aria habowan popaeshohos.

<sup>4</sup> Douk amam hanum jurug aria Pailat watak shopunek nikitak natograri anah shopunek aria nakripesch nakri, "Ipak tiki, eik douk ta iran nutograri aduk. Nutograri aria ipak kanak ta pudukemesh um eik douk madae iparug enesh yoweishi inahos anan nenekehi iri uwe, uwok." <sup>5</sup> Aria Jisas nikitak

natograri. Natograri aria ahudok owishiborihi rupah douk hohurumanari. Pruwehwihw maduhw shopunek hwotemori ananig barag aria natograri. Douk natograri aria Pailat nakrip eshesh Juda nakri, "Ipak tiki! Arman douk anudok."

<sup>6</sup> Douk natograri aria amam debeimi pris hani amudok heyoh Iruhin ananit debeiti urupat iri hatrun aria hahwar debeg hakri, "Nek nyiliman rowog kruse! Nek nyiliman rowog kruse!"

Aria Pailat nakripam nakri, "Ipak kanak puran punak punek nyiliman rowog kruse. Eik douk madae iparug enesh yoweishi inahos douk pakri anan nenekeh iri uwe, uwok."

<sup>7</sup> Aria eshesh Juda shawanaman bareaen shakri, "Enen apakin lo seiwok Iruhin nakoguk Moses um douk nyakri, arpen nyububunim um Iruhin iri douk shen nyugok. Aria lo douk nyakri apak douk mon nugok. Um maresh, anan nakri anan douk Iruhin ananin nunganin." <sup>8</sup> Douk Pailat nemnek enyudok bareaen aria adur nanogugur abom neshagrakuk agundok douk narik nanogugur um. <sup>9</sup> Aria anan wata narao Jisas hawish urupat aria narigan nakri, "Nyak meiburi waburin?" Narigan aria Jisas madae nuwanaman bareaen uwe, uwok.

<sup>10</sup> Aria Pailat nakripam nakri, "Nyak nyakri uwok um nyuni eik wiyyag-wreh um maresh? Nyak douk nyadukemesh. Eik douk yarao big um wosik ikweshihen nyunak meyoh aka, ikripesh shunek nyilimen rowog kruse." <sup>11</sup> Jisas nemnek aria nawananaman bareaen nakri, "Nyak douk Iruhin meyoh nakri wosik aria douk nyaraao enyudok big um nyasuwokuk eik. Aria anudok douk narauri eik um nyak iri, anan douk adur nenekeh debeishi yoweishi inahos sheshagrakuk eshudok douk ta nyak nyunekesh iri."

<sup>12</sup> Douk Pailat nemnek enyudok bareaen aria nape natrugun um anah yah um nukweshih Jisas nunak meyoh. Aria eshesh Juda shahwar debeg shakri, "Douk nyak nyukweshih anudok arman nunak meyoh um, aria nyak douk madae anudok debeini um gavman um Rom iri Sisar ananin arpenyin uwe, uwok. Meini arman douk nukri anan nape king iri, anudok arman douk Sisar ananin horin."

<sup>13</sup> Douk Pailat nemnek enyudok bareaen aria narauri Jisas hatograri aduk. Hatograri aria nanak netem enyudok wagitur douk jas notem um aria nape nasuhw kwotog um. Netem enyudok wagitur agundok douk shahwaragun um "Utabor Bakus Um." Hibruin bareaen douk shakri, "Gabata." <sup>14</sup> Aria ahudok nyumnah, eshesh Juda douk shape shenek redi um worigun um ruwahepil shunek agundok debeiguni worigun Pasova. Aria douk nyumnah hatogur oruhw, aun netem orokohun aria Pailat nakrip eshesh Juda nakri, "Ipak tiki ipakin king!"

<sup>15</sup> Aria eshesh wata shahwar debeg shakri, "Bukanaguk! Bukanaguk! Punak punek nyiliman rowog kruse!"

Aria Pailat narigesel nakri, "Ipak pakri eik inek nyiliman ipakin king nir rowog kruse aka, uwok?"

Aria amam debeimi pris hebeiman bareaen hakri, "Anudok douk madae apakin king uwe, uwok. Apakin king douk debeini gavman Sisar atun!"

<sup>16</sup> Douk shakri namudok aria Pailat nekesh Jisas um eshesis wis um shunak shenek nyiliman rowog kruse.

### *Amam Soldia Henek Nyilim Jisas Neir Rowog Kruse (Matyu 27:32-44; Mak 15:21-32; Luk 23:26-43)*

Aria amam soldia harao Jisas hakutukuk wabur hanak. <sup>17</sup> Hanak aria Jisas anan kanak nasah ananin rowog kruse nanak um anag mihib. Agudok mihib douk gape kabi enen nyagok iri enyeniyig barag um. Hibruin bareaen douk shahwarag Golgota. <sup>18</sup> Douk hanak hakih aria amam soldia henek

nyilim Jisas neir rowog kruse. Shopunek henek nyilim biom armam heir wobuwobur aria Jisas neir orokohun.

**19** Aria Pailat douk nowemori enen bараен aria amam heshopen nyape kruse douk Jisas neir um. Baraen douk nyakri namudok. Nyakri,

**JISAS DOUK NANAKI WABUR NASARET IRI, ESHESH JUDA ESHESHIN KING.**

**20** Aria sabaishi Juda shanaki shape shatarih enyudok bараен. Um maresh? Agundok amam soldia henek nyilim Jisas neir kruse um douk nape iri hurukatin meyoh um abrudok debeiburi wabur. Aria enyudok bараен, Pailat douk nenyem binyatin bараен. Nenyem eshesh Juda esheshin, Rom esheshin nyani eshesh Grik esheshin. **21** Aria eshesh Juda esheshim debeими pris hatrin aria hakrip Pailat hakri, "Nyak mare nyunyem nyukri, 'Eshesh Juda esheshin king' uwе, uwok. Nyak nyunyem nyukri, 'Anudok arman nakri anan douk eshesh Juda esheshin king.' "

**22** Aria Pailat nakri, "Nyeneken, bараен eik yenjem iri douk nyupe namudok atin."

**23** Amam soldia henek nyiliman-aguk um kruse ba iyoh, aria hanak hohur ananik rupeh hasiyaeh hehubuk um nubatigunum. Hasiyah aria amam atun atun honohur sisiguk atin. Aria amam honohur ananit routi siot shopunek. Atudok siot douk madae shutapeyat aria shukwrop anabus apubus supe uwе, uwok. Atat douk shenekat iruhw aria tabuh tape namudok tabuh tatao amnab. **24** Namudok aria amam soldia heneyagwreh hakri, "Apak mare ta muworut uwе, uwok. Mubirak meyoh kabi shabirak satu um aria anudok nenek uhwinyumat iri douk ta anan nunosuwat."

Amam douk henekesh namudok um enyudok bараен nyetem Iruhin ananik Buk iri nyutogur adurin atin. Baraen enyudok.

"Eshesh shenesiyao eikh rupeh shanosuweh  
aria shabirak kabi shabirak satu  
um shenek uhwinyum eikit siot."

Aria amam soldia douk adur henekesh kabi enyudok bараен nyakrium.

**25** Ono armago douk wanak weyotu harokatin um enyudok kruse Jisas nataur um. Owo douk Jisas ananik amakek kwani okwokwik wawik wani Maria douk kworao Klopas iri. Aria onok douk kupaikwi Maria shopunek douk kwanaki Makdala iri. **26** Jisas natruguni natigi ananik amakek kwani anudok disaipel douk anan adur urkum makri manawashaman iri sheyotu hurukatin. Aria nakripi amakek nakri, "Nanudok douk nyakin nuganin."

**27** Aria watak nakrip anudok disaipel nakri, "Nokwudok douk nyakik amakek." Aria banab abudok nyutob anudok disaipel nemnek namudok aria narao Maria shanak aria kwape ananit urupat.

***Jisas Adur Nagok***  
*(Matyu 27:45-56; Mak 15:33-41; Luk 23:44-49)*

**28** Aria Jisas douk nadukemesh um ananin mour douk nyatuh. Aria nakri, "Eik abar bae." Anan douk nakri namudok um nunek enen bараен nyetem Iruhin ananik Buk iri nyutogur adurin. **29** Aria agundok, anap marup shukunip um nubutibari abar douk pakus. Douk amam soldia hemnek namudok aria hanak hohur enen spans\* hesegwurin abrudok abar arigaha shuknin. Aria hatukem henyak anag shokugi akodiwok um hisop aria hatukem nyato um Jisas ananit nokwatum nuwok abrudok abar.

**30** Douk Jisas nawok abrudok abar um jurug aria nakri, "Mour enyudok nyatuh." Douk nakriyuk namudok aria barag gabuh aria mishin nyakihuk aria nagok.

\* **19:29:** Putik futnot nyape Matyu 27:48 iri.

### *Anan Soldia Nakwuman Burawog Agundok Rabusinum Jisas*

<sup>31</sup> Aria ahudok nyumnah habo Jisas nani amudok anam biom armam um, eshesh Juda douk shape shaurim worigun um ruwahepih shunek agundok debeiguni worigun um ahudok anah debeihì nyumnah Sabat. Aria eshesh Juda douk shakri uwok um amam hir kruse ahudok debeihì nyumnah uwe, uwok. Namudok aria shanak sharig Pailat um shunak shushubur amamigas aiyas. Shakri shushuburagas um hugok arigas aria shubreami shunak shurumam. <sup>32</sup> Douk shakrip Pailat nakri wosik aria amam soldia hanak heshubur amudok biom armam amamigas aiyas. Harik heshubur sagomin ananigas aria hanak heshubur anudok anan ananigas shopunek. Amudok douk henek nyilimam hataur wobuwobur um Jisas iri. <sup>33</sup> Douk heshuburuk amamigas aiyas iyoh aria hanakum hushubur Jisas ananigas. Hanak aria hatik um anan douk nagok. Namudok aria amam madae hushubur ananigas aiyas uwe, uwok. <sup>34</sup> Aria anan soldia nohur ananig burawog aria nador agundok rabusinum Jisas. Nadron aria ahudok atuh owishibor bani abar shau shabuhi. <sup>35</sup> Aria anudok arman natik enyudok iri douk nakrip ipak. Anan douk adur nadukemesh um baraeen anan nakripepenyi douk adurin atin. Enyudok madae rohwin uwe, uwok. Anan douk nakripep um punek bilip um Jisas. <sup>36</sup> Aria enyudok douk nyatogur namudok um enyudok baraeen nyetem Iruhin ananik Buk iri nyutogur adurin atin. Baraeen enyudok. “Eshesh ta mare shushubur enen bripigur uwe, uwok.” <sup>37</sup> Aria enen shopunek baraeen douk nyakri, “Arpesh ta shutik anudok arman douk shawkuman burawog iri.”

### *Shanak Sharum Jisas Onohw Wonugwehw Douk Shatupak Ono Burbudu Um Aria Sharokohw Iri*

(Matyu 27:57-61; Mak 15:42-47; Luk 23:50-56)

<sup>38</sup> Douk enyudok nyanakuk, aria Josep douk nanaki wabur Arimatea iri nanak narig Pailat um nubrei Jisas kruse aria nunak nuruman. Josep anan douk shopunek anan nagipesh Jisas iri, aria nanogugur um eshesh Juda esheshim debeimi aria nabeshuk ananin bilip. Douk nanak narig Pailat nakripan iri um wosik aria nanaki nabreyan um enyudok kruse um nunak nuruman. <sup>39</sup> Anudok Nikodemus douk riguk anab wab nanak natik Jisas iri shopunek nani Josep hanakum hurum Jisas. Nikodemus nikitaki nasuhwi anas seisik yopuri unar wosik iri gris nanaki. Asudok yomagis gris douk shahwaras um mer iri alos. Shenek budibodigas aria shabadigas atugun aria amaenyis um douk 30-porein kilogram. <sup>40</sup> Aria amam hagipesh eshesh Juda eshesih aih um shurom arpesh um. Douk hanahur hanak howanaman asudok gris ananikh yegenyihw iyoh aria heshurehan anah shigorihwihi rupah. <sup>41</sup> Aria hurukatin um agundok amam soldia henek nyilim Jisas kruse um, anab amnab douk bape. Aria agundok, onohw namuhwi wonugwehw douk hwape. Eshesh douk watak shurom enen arpen uwe, uwok. <sup>42</sup> Aria ahudok nyumnah eshesh Juda douk shape shenek gibegabe eneshenesh eshudok um ruwahepih ta shunek debeigunì worigun um ahudok anah debeihì nyumnah Sabat. Aria ahwudok namuhwi wonugwehw douk shopunek hwape iri hurukatin meyoh. Namudok aria hawish harom Jisas ahwudok wonugwehw.

<sup>1</sup> Aria ruwahepih ruhur ahudok sagom atinyih nyumnah\* um wik, watak arukwutigun aria Maria douk kwanaki Makdala iri kwakitak kwanak um kutik wonugwehw agundok harom Jisas um. Douk kwanak aria kwatik um amudok utom douk hatotigasam um hogah umunihw um nuwag iri douk madae mutao umunihw-igum uwe, uwok. Manak makusuk anagas. <sup>2</sup> Douk kwatiguk namudok aria kwatanam kwahur kwanak kwakrip Saimon Pita nani anudok anan disaipel douk Jisas anan urkum makri munawashaman iri aria kwakri, “Enesh shanaki shawish wonugwehw aria shohur apakin Debeini sharan shanak. Aria apak douk madae mudukem agundok shanak shanabuk um uwe, uwok!”

<sup>3</sup> Douk okwok kwakripam namudok aria Pita nani anudok anan disaipel hikitak hahur hanak gani douk wonugwehw hwape um. <sup>4</sup> Hahur hanak, aria anudok anan disaipel neshagrakuk Pita aria anan narik nanak natogur agundok wonugwehw hwape um. <sup>5</sup> Narik nanak natogur aria madae nuwish uwe. Neyotu aduk meyoh nape nushakamagun natigu numunihum wonugwehw. Natrugun aria natigu ahudok shigorihwihi rupah atuh hakusuk. <sup>6</sup> Saimon Pita douk nagiman nanak aria nanaki adur nawish wonugwehw. Nawish aria natik rupah atuh hakus. <sup>7</sup> Aria ahudok rupah douk heshureh barag um douk madae huni ahudok anah hukus atugun uwe, uwok. Ahah douk kabi enesh shadareshah aria hanak hakusuk sik. <sup>8</sup> Aria anudok disaipel douk narik nanak natogurum wonugwehw iri shopunek nagipesh Pita nawish natik ahudok rupah. Natruh aria nenek bilip nakri adur atin Jisas douk nakitak nape. <sup>9</sup> Aria abudok nyutob, amudok biom disaipel douk shopunek watak gamo hudukem bareaen nyetem Iruhin ananik Buk iri uwe, um Jisas douk ta nugok aria ta watak nukitak nupeum uwe, uwok. <sup>10</sup> Douk amudok biom disaipel hakutukuk wonugwehw aria watak hatanam wabur.

*Jisas Natogur Um Maria Douk Kwanaki Makdala Iri  
(Matyu 28:9-10; Mak 16:9-11)*

<sup>11</sup> Douk amam hanak aria Maria kweyotuguk adukihw um wonugwehw kwareh. Kwareh aria kwohwido kware kwatigu numunihum wonugwehw. <sup>12</sup> Kwatrugun aria kwatigu biyesh enselahos douk sheneki shigorihwihi atih rupeh iri shape. Kwatrish shape okwudok outuk douk sagomatin Jisas nakus um. Enen nyape barag gakus um aria enen agundok aiyas um.

<sup>13</sup> Aria sharigok shakri, “Nyak nyape nyereh um maresh?”

Aria okwok kwakri, “Enesh shanaki shohur ekin Debeini sharan shanak. Sharan aria eik douk madae idukem agundok shanak shanabuk um uwe, uwok.”

<sup>14</sup> Douk kwakriyuk namudok kwakri kutanam kutrugunukuk aria kwatik Jisas neyotu. Kwatrun aria madae kwudukemesh um anan douk Jisas uwe, uwok.

<sup>15</sup> Aria Jisas narigok nakri, “Nya, nyak nyape nyereh um maresh? Aria shopunek douk nyape nyaurim amiapen?”

Douk narigok namudok aria okwok kwakri anan douk nenek mour agundok nubarig iri. Namudok aria kwakripaen kwakri, “Debeini, douk nyak nyunohur nyunak nyunabukuk anagun um, nyak watak nyukripenmagun aria inak inohuri.”

<sup>16</sup> Aria Jisas adur nahwarok um okwokwin nyeigur nakri, “Maria.” Aria okwok kwatanam kwatrun aria kweyagwreh bareaen Hibru kwakri, “Rabonai.” Enyudok bareaen Rabonai douk nyakri, “Debeini Tisa.”

\* **20:1:** Putik futnot nyape Matyu 28:1 iri.

<sup>17</sup> Aria Jisas nakripok nakri, “Nyak mare nyususuhwe uwe, uwok. Um maresh? Eik douk watak itanam ito ikih itik eikin Yain uwe, watak. Aria nyak douk nyunak nyukrip eikim warhim amam disaipel, um eik ta itanam ito ikih itik eikin Yain. Anan douk shopunek ipakin Yaken. Anan douk eikin Iruhin aria ipakin Iruhin shopunek.”

<sup>18</sup> Aria okwudok Maria kwanaki Makdala iri kwatanam kwanak. Kwanak aria kwakrip apak Jisas ananim disaipel um agundok kwakutukuk Debeini aria nakripokum kwunaki kwukripap enyudok baraen douk kwakripap um.

*Jisas Natogurum Ananim Disaipel  
(Matyu 28:16-20; Mak 16:14-18; Luk 24:36-49)*

<sup>19</sup> Aria wabigun um ahudok sagomatinyih nyummah um wikk<sup>†</sup> huruk atin um wab aria apak Jisas ananim disaipel manak mawish mantorum mape anat urupat. Apak douk manogugur um eshesh Juda esheshim debeimi aria manak mawish mawaruguk witog numun aria mape. Douk mape aria Jisas nanaki neyotu agundok apak mape um aria nakri, “Ipakiruh aparuh hur wosik.” <sup>20</sup> Douk nakriyuk namudok aria neyabigap wis agundok amam soldia henek nyiliman kruse um aria agundok rabusinum douk soldia nakwuman burawog um. Douk anan neyabigap nyubrug matrug aria adur manadudareh mariguk abom um agundok matik apakin Debeini um.

<sup>21</sup> Aria Jisas watak shopunek nakripap nakri, “Ipakiruh aparuh hur wosik. Eik ta ishopokep punak punek elkin mour kabi riguk eikin Yain neshopoki eik yanamori agundok atap um.” <sup>22</sup> Douk nakri namudok aria nahapur ananip yap panakmori apak aria nakri, “Ipak purao Iruhin ananin Mishin. <sup>23</sup> Douk ipak ta pusuhw enesh arpesh esheshish yoweishi inahos pupe aria pukwreyeshuk um, aria esheshish yoweishi inahos ta mare watak shupenyesh uwe, uwok. Aria douk ipak pusuhw esheshish yoweishi pupe aria mare pukri pukwreyeshuk um, aria esheshish yoweishi inahos ta watak shupenyesh.”

*Tomas Natik Jisas*

<sup>24</sup> Tomas enyudok enen nyeigur shahwaran um Didimas iri douk nanaki um apak Jisas ananim 12-poreim disaipel mapeum. Aria abudok nyutob riguk Jisas nanaki natogrumap obi nyutob, anan douk madae nini apak mupe uwe, uwok. <sup>25</sup> Aria apak anap disaipel makrip Tomas makri, “Apak matrun apakin Debeini.”

Aria Tomas nakri, “Douk eik itik nyubrug wis douk nyiguhw hwawish um aria iwem hah-umog, eik ta inek bilip ikri adur. Aria shopunek um douk iwem wis agundok rabusinum douk soldia nakwuman burawog um, eik ta inek bilip ikri adur. Uwok um, ta uwok.”

<sup>26</sup> Douk arigaha anag wikk<sup>†</sup> gatuhuk aria apak Jisas ananim disaipel watak manak mantorum mape atugun atudok urupat. Aria abudok nyutob Tomas douk shopunek nani apak mape. Mawish mawaru ihigwumorim witog aria mape numun. Mape aria Jisas nanaki neyotu agundok apak mapeum aria nakri, “Ipakiruh aparuh hur wosik.” <sup>27</sup> Aria nakrip Tomas nakri, “Nyak yowi wem nyakih hah agundok eikis wis douk nyiguhw hwawish um. Aria shopunek nyuwem wis agundok rabusum. Nyak mare nyusuhw biyep urkwip uwe, uwok. Eik yakri nyak douk adur nyunek bilip um eik.”

<sup>28</sup> Aria Tomas nebeiman baraen nakri, “Nyak douk eikin Debeini aria eikin Iruhin!”

<sup>†</sup> **20:19:** Putik futnot nyape Matyu 28:1 iri.

<sup>29</sup> Aria Jisas nakripan nakri, “Nyak douk nyatiwe aria douk nyenek bilipume. Aria eshudok arpesh douk madae shutik eik aria shusuhw eikin bareaen shukri adurin iri, eshesh wosik ta adur shunadudareh.”

### *Baugenyum Baraen Um Jon Nenyem Okwudok Buk Um*

<sup>30</sup> Jisas douk neneke sabainyi Iruhin atun neneken iri mour shopunek aria apak ananip disaipel matrin. Neneken aria eik douk madae inyem um sabainyi anan neneken iri mour okwudok buk uwe, uwok. <sup>31</sup> Aria bareaen um Jisas neneken iri mour nyetem okwudok buk iri, eik douk yenjem um yakri ipak putarihen aria punek bilip pukri Jisas anan douk Krais, anudok douk Iruhin nagraehan aria neshopokan nanakmori nunaraao arpesh iri. Aria shopunek um punek bilip pukri Jisas anan douk adur Iruhin ananin abom Nugarin. Aria shopunek um punek bilipuman namudok aria ipak ta adur pupe wosik abom ihih nyumneh.

## 21

### *Jisas Natogur Um Ananim 7-poreim Disaipel*

<sup>1</sup> Douk enyudok nyanakuk aria Jisas watak shopunek natogurum apak ananim disaipel anah shopunek. Natogrumpa gani debeigi waiyag nyeigurug um Taiberias. Anan douk natogrumpa namudok. <sup>2</sup> Saimon Pita nani Tomas douk ananin enyudok kupainyi nyeigur douk Didimas, nani Nataniel douk nanaki wabur Kana agudok shokugi nahobig Galili, nani anam douk ohwak Sebedi ananim biom nugamim. Apak sabaiapi mani amudok anam biom Jisas ananim disaipel manak aria mape atugun. <sup>3</sup> Mape aria Saimon Pita nakripap nakri, “Eik douk ta inak ituk anaguhw eiguhw.”

Aria apak makripan makri, “Apak shopuk ta munamen.” Aria manak mato bot aria abudok wab shuknib apak manak aria madae mutuk anap atup arbup uwe, uwok.

<sup>4</sup> Ruwahep wehip aria Jisas nanak neyotu anagas um agudok waiyag. Apak ananim disaipel douk matruni, aria madae mudukemesh mukri anan douk Jisas uwe, uwok.

<sup>5</sup> Aria anan narigap-agu nakri, “Yaipo, ipak patuk anaguhw eiguhw aka, uwok?”

Aria apak mebeimanari bareaen makri, “Uwok.” <sup>6</sup> Aria anan nakripap-agu nakri, “Ipak puwashak ipakin umben nubuhuk yopunyi rogur ehahum bot aria ipak ta putuk anaguhw.” Apak memnek douk mawashak umben nabuh aria mabirak umben um monukan aria madae monukanari uwe, uwok. Um maresh, sabaighwi eiguhw hwatuk aria umben adur amaenyin atin.

<sup>7</sup> Aria anudok disaipel douk Jisas urkum makri adur manawashaman iri nakrip Pita nakri, “Nanudok douk apakin Debeini.” Douk Pita nemnek namudok aria nikitak nohur ahudok rouhi rupah douk nape nahunug aduk iri nohur. Um maresh? Iganigadae anan noharukuk um hatuk eiguhw um. Aria nabuh waiyag napaur nanak um anagas. <sup>8</sup> Aria apak mapeik bot iri disaipel mape manuk anudok umben douk shuknininum eiguhw iri manak um bot. Apak douk madae muruguk rougun um anagas uwe, uwok. Morari hurukatin meyoh kabi douk 100 mita um. <sup>9</sup> Douk arigaha manak matogur anagas aria matik eneh nyih hanu hakus. Anap arbup douk poteh ehudok nyih aria matik anat bret shopunek takus agundok.

<sup>10</sup> Aria Jisas nakripap nakri, “Ipak huraki anaguhw eiguhw iganigadae patukoguh iri.”

<sup>11</sup> Douk anan nakri namudok aria Saimon Pita nato bot nanuki anudok umben eiguhw hwatuk um natomori anagas. Anudok umben adur shukuninum 153-poreiguh debeiguhwi atuguh eiguhw. Adur sabaighwi, aria umben douk madae tukeren uwe, uwok.

<sup>12</sup> Aria Jisas nakripap nakri, "Yowi puwok anagun worigun." Aria apak disaipel douk madae anan nukrium norigan nukri, "Nyak amiapen?" uwe, uwok. Um maresh? Apak madukemesh um anan douk apakin Debeini.

<sup>13</sup> Aria Jisas nanaki nohur atudok bret nokopat. Nokop bret aria watak shopunek nohur eiguhw nenekesh namudok atin nape nakopaguh.

<sup>14</sup> Aria ahudok douk henek biyeh atih um agundok Jisas nagok aria watak nikitak nape aria natogurum apak ananim disaipel um.

### *Jisas Nakrip Pita Nakri, "Nyak Nyukesh Worigun Eikish Sipsipahos"*

<sup>15</sup> Douk apak mawok eiguhw aria bret meyatesh aria Jisas narig Saimon Pita nakri, "Saimon, Jon ananin nunganin, nyak douk adur urkum makri munawasham eik abom nyeshagrakuk amudok anam disaipel aka, uwok?"

Aria Pita nakri, "Debeini, adur wo. Nyak douk nyadukemesh. Eik douk adur urkum makri munawasham nyak."

Douk nakri namudok aria Jisas nakripan nakri, "Nyak nyukesh worigun eikish nugaesh sipsipahos."

<sup>16</sup> Aria Jisas watak shopunek narig Saimon Pita anah shopunek nakri, "Saimon, Jon ananin nunganin, nyak douk urkum makri munawasham eik abom aka, uwok?"

Aria Pita nakri, "Debeini, adur wo. Nyak douk nyadukemesh. Eik douk adur urkum makri munawasham nyak."

Aria Jisas nakripan nakri, "Nyak nyiyoh eikish sipsipahos."

<sup>17</sup> Aria Jisas watak narigan anah shopunek aria hatogur biyeh atih. Nakri, "Saimon, Jon ananin nunganin, nyak douk urkum makri munawasham eik aka, uwok?"

Douk narigan biyeh atuh enyudok atin baraen aria Pita ananihw apahw adur youewhw abom. Aria nakrip Jisas nakri, "Debeini, nyak douk adur nyadukem ihishumori eshudok, aria nyadukemesh um eik douk urkum makri munawashamen abom."

Aria Jisas nakripan nakri, "Nyak nyiyoh eikish sipsipahos. <sup>18</sup> Aria adur atin yakripen, abudok nyutob nyak watak werorowinyum, nyak kanak nyanawashak let aria nyanak agundok douk nyakri nyunak um. Aria abudok nyutob nyunak ruwoginum, nyak douk ta nyuhur roguhw nyusuh-weshaguk iruhw aria ta kupainyi arpen nyunatugat-umen. Aria shopunek enyen ta nyusuhw nyakish roguhw aria nyuraen nyunak agundok douk nyak nyukri uwok um nyunak um." <sup>19</sup> Jisas douk nakri enyudok baraen um nuyabigam um ahudok yah douk kweipon ta shubo Pita nugok aria arpesh shutrun shutuk Iruhin ananin nyeigur nyuto iruhw um. Aria Jisas nakripan nakri, "Nyak ta nyugipesh eik."

### *Jisas Nani Ananin Disaipel Douk Anan Urkum Makri Munawashaman Iri*

<sup>20</sup> Pita natanam natrugunuguk aria natik anudok disaipel douk Jisas adur urkum makri munawashaman iri nagipesham nanaki. Anan douk anudok disaipel douk riguk hape hawok worigun aria natotigos nanak huruk atinyum Jisas aria narigan um ta meinii niyabig Jisas ananim horim um anan iri. <sup>21</sup> Douk Pita natrun aria narig Jisas nakri, "Debeini, nyak nyakriyan mumam anudok?"

<sup>22</sup> Aria Jisas nebeiman baraen nakri, "Douk eik ikri anan mare nugok aria nupe arigaha eik watak itanamori akure, enyudok douk madae nyakin mour uwe, uwok. Eikin mour atin. Nyak ta nyugipesh eik atuwe."

<sup>23</sup> Enyudok baraen douk shakriyen nyanak aria eshesh shagipes Jisas iri shanakripam shanak. Shakri Jisas nakri anudok disaipel ta mare nugok uwe, uwok. Aria Jisas douk madae nukri namudok uwe, uwok. Anan douk nakri, "Douk eik ikri anan mare nugok, aria nupe arigaha eik watak itanamori um, enyudok douk madae nyakin mour uwe, uwok. Eikin mour."

<sup>24</sup> Aria anudok disaipel douk adur eik Jon douk yowem baraen okwudok buk iri. Aria apak douk madukemesh um enyudok baraen douk yakriyen aria yenyebari douk adurin atin.

<sup>25</sup> Aria Jisas shopunek douk nenek sabainyi enyenenen mour. Aria douk shukri shuwem baraen um enyudok sabainyi mour Jisas neneken iri ono bumeb akure, agudok atapig nahobig douk ta mare gusuhw oudok sabaiwari bumeb ukus um uwe, uwok.

## Douk Amam Aposel Heneken Iri Mour Banenyi Baraen Um Aposel

1:1-26 Jisas nakomuk mour ananim disaipel aria nato iruhw heven.

2:1-8:3 Jisas ananish disaipel sharao Iruhin ananin Mishin enyenyin dodog um shunek mour shukripesh Iruhin ananin yopinyi baraen hurukatin um Jerusalem.

8:4-12:25 Jisas ananish disaipel shanak shakripesh baraen agusudok biagos shokugosi nahobigos Judia iri Samaria.

13:1-21:16 Pol nanak sabairubi warub nakripesh Jisas ananin baraen sabaisi arpesh.

21:17-28:31 Pol nanak Jerusalem nakripesh baraen um anan neneken iri mour um sabaiishi Kristen aria eshesh Juda shenek kwotuman aria nanak nonoweshik Rom.

<sup>1</sup> Tiofilus, okwudok eikik yarik yenyemok iri buk, eik douk yawem baraen um ihishmori eshudok eneshenesh douk Jisas narik nenekeh iri shani enyudok douk nenek skulumesh um <sup>2</sup> arigaha ahudok nyumnah Iruhin naran nato iruhw heven um. Abudok nyutob Iruhin watak nuran nuto obi nyutob uwe, Iruhin ananin Mishin nyenekan dodogowin aria nakripamuk dodogowinyi baraen ananim aposel douk nagraeham um hunak hukripesh ananin baraen iri. Nakripamuk um ihinyumori mour douk amam ta huneken iri. <sup>3</sup> Sagomatin douk shan nemnek debeiri eriger nagok aria wata shopunek nikitak nape. Nikitak nape aria natogramam sabaihi nyumneh ananim aposel. Aria douk nenek sabaiishi eshudok eneshenesh hatrun aria henek bilip hakri anan adur douk nikitak nape. Aria 40-poreih nyumneh douk nagok aria wata nikitak nape narahaen, amam douk hatrun aria nakripam um arpesh shuwish um agundok Iruhin nape debeinium ananish arpesh um. <sup>4</sup> Wata hapeyobi nyutob, anan douk nakripamuk enyudok dodogowinyi baraen nakri, "Ipak mare pukutukuk Jerusalem, uwok. Aria pupe putrügenum enyudok yopinyi presen douk eikin Yain nakri um ta nukepen iri. Enyudok douk riguk eik yakripepumen iri. <sup>5</sup> Jon douk nenek baptaisumesh abar iri douk nenek baptaisumesh abar meyoh. Aria karowih nyumneh hunak hudiguk aria Iruhin ta nishopok ananin Mishin nyuwishep aria adur nyupenyep wosik."

<sup>6</sup> Aria abudok nyutob amam aposel hani Jisas hanaki hantorum hape atugun obi nyutob, amam douk harig Jisas hakri, "Debeini, nyutob douk ta abudok, um nyak ta wata nyutaurum apak Israel mutogur dodogowip aria anan apakin arman nutogur king aria nusuwh merikwumap aka, uwok?"

<sup>7</sup> Aria Jisas nawanamam baraen namudok. Nakri, "Iruhin nakri uwok um ipak pudukemesh. Ahudok nyumnah ta hutogur iri, eikin Yain ananin mour. Anan dodogowin um nukri meibi nyutob, o meihi nyumnah huto-grum apak Israel mupe debeipi um, enyudok douk anan atun dodogowin um nuneken. <sup>8</sup> Aria ipak douk ta purao dodog abudok nyutob Iruhin ananin Mishin nyubuhi nyuwishep obi nyutob. Purao dodog aria ta pukripesh eikin baraen abrudok wabur Jerusalem buni ihirubmorim warub bape agusudok biagos shokugosi nahobigos Judia iri Samaria. Pukripeshen agundok um jurug aria ta punak pukripeshen ihirubmorim rougunirub warub douk bape agundok atap iri."

<sup>9</sup> Douk Jisas nakripamuk enyudok baraen um jurug, amam heyotu hatrun aria Iruhin naran natoum iruhw heven. Nato douk onog orug gwanaki gwabeshukan-ukuk aria amam madae hutrun uwe. <sup>10</sup> Anan nanakuk aria amam watak heyotu hape hatrugen duk iruhw um utag. Aria ahudok atuh biom armam heneki shigorihiwi atih rupeh iri hanaki hani amam heyotu. <sup>11</sup> Hanaki heyotu aria hakri, "Ipak armam douk panaki agudok shokugi nahobig Galili iri, ipak mare piyotu agundok pupe putiku iruhw utag, uwok. Anudok Jisas douk Iruhin natripan naran nato iruhw heven iri, anah nyumnah ta wata shopunek putrun nunaki kabi douk patrun nato iruhw heven um."

### *Shagraeh Anan Arman Um Nurao Judas Ananin Mour*

<sup>12</sup> Douk Jisas natoumoguk iruhw heven aria amam aposel wata haku-tukuk ahwudok yoduhw Oliv aria hatanam hanak um Jerusalem. Ahwudok yoduhw Oliv douk hwape iri hurukatin meyoh um Jerusalem. Rougunum douk hurukatin um atin kilomita. <sup>13</sup> Douk hanaki hawish wabur Jerusalem aria hato anam rum anat iruhit urupat douk amam hapenyam iri. Amam aposel amamish nyeiguhw eshudok: Pita, Jon, Jems, Andru, Filip, Tomas, Bartolomyu, Matyu, kupaini Jems anudok Alfius ananin nuganin, anan Judas kupaini Jems ananin nuganin. Amudok ihm-morim hani Saimon. Anudok Saimon douk anan Selot.\*

<sup>14</sup> Amudok ihm-morim armam hantorum hape aria iih nyumneh hape henek beten harig Iruhin. Ono armago wani Jisas ananik amakek Maria kwani ananim warhim eshesh shopunek shanaki sheir amam aposel adur shape atugun aria shape shenek beten um Iruhin.

<sup>15</sup> Aria abudok nyutob, arpesh shagipesh Jisas iri douk shatogur 120-poreish. Aria anah nyumnah, eshesh douk shape aria Pita naktak neyotu nakripesh nakri, <sup>16</sup> "Eikish ashukenyish owashish, seiwok Iruhin ananin Mishin douk nyohur Devit aria neyagwrehuk enen baraen douk nyetem Iruhin ananik Buk iri. Enyen douk nyakrium anudok Judas douk narikum Jisas ananim horim hanaku hasuhw Jisas hanak han iri. Aria douk enyudok baraen douk nyatogur adurin kabi seiwok Devit nakrimaguk um. <sup>17</sup> Riguk anudok Judas douk neir apak Jisas ananip mape marahaen atugun. Douk nani apak menek enyudok atin mour iri."

<sup>18</sup> Abrudok utabor douk hako Judas um yoweishi inahos anan nenekeh iri um anan douk nasuhwabor nanak nator anab amnab. Natorub aria nabuh netu nagok nakus abudok amnab, ananihw yegeniyihw puwarohw aria nyibur batogur bakus atap. <sup>19</sup> Aria ihishmorim shape Jerusalem iri shemnek um enyudok nyatogurum Judas iri. Abudok amnab douk Judas nagok nakusab iri, esheshin baraen douk shahwarab, "Akeldama." Enyudok baraen douk nyakri, "Owishibor bakusab iri amnab."

<sup>20</sup> Pita gamo nakripesh nakri, "Baraen nyakrium enyudok nyatogurum Judas iri douk nyetem Buk Song. Baraen douk enyudok. 'Ananit urupat ta tupe wohit aria mare enen arpen nyunak nyupe, uwok.' Enen shopunek baraen nyetem iri nyakri namudok. Nyakri, 'Ananik outuk douk ta kupeik meyoh. Kupainyi arpen wosik nyirao ananin mour.'

<sup>21</sup> "Namudok aria douk apak mugraeh anan arman um nurao Judas ananik mour. Mugraeh anan um amudok douk hani apak mape marahaen atugun atin iih nyumneh mani Debeini Jisas nani apak marahaen-ehi. <sup>22</sup> Mugraeh anan arman douk nani apak mape marahaen abudok nyutob Jon nenek baptaisumesh iri nape nakripesh baraen obi nyutob arigaha

\* <sup>1:13:</sup> Putik futnot nyape Matyu 10:4 iri.

abudok nyutob Iruhin narao Debeini Jisas nakutupukuk nato iruhw heven obi nyutob. Aria anudok mugraehan iri arman, anan ta nirap mukripesh bareaen um Debeini Jisas douk nagok aria wata shopunek nakitak nape.”

<sup>23</sup> Pita nakripesch namudok aria shagraeh biom armam. Anan Josep. Josep douk nanahwar biyesh nyeiguhw shopunek. Enen Barsabas aria enen Jastus. Anudok nani anan douk shahwaran um Matias iri.

<sup>24</sup> Shagraeham hape aria henek beten harig Iruhin namudok. Hakri, “Debeini, nyak douk nyadukem ihishmorim arpesh esheship urkwip. Aria amudok biom armam, apak douk makri nyiyabigap anudok douk nyak nyagraehan iri. <sup>25</sup> Nyiyabigap um nurao enyudok mour aposel douk Judas nakutinyuk nanak um ananibur yoweiburi wabur iri.”

<sup>26</sup> Namudok aria hakitak howem amamish nyeiguhw shetem biobor utabor aria shakutubor enesh eshudok muguhwos. Shakutubor douk sheyakabor aria Matias ananin nyetemom iri manatuk matowi aria anan neneh uhwin. Aria douk hakutun natanamum amudok anam 11-poreim aposel.

## 2

### *Iruhin ananin Mishin Nyabuhi Nyawish Jisas Ananish Arpesh*

<sup>1</sup> Ahudok debeihi nyumnah Pentikos douk hatogri, aria ihishmorim shasuhw Jisas ananin bareaen shagipeshen iri douk shantorum shape atugun. <sup>2</sup> Aria ahudok atuh enen guha nyanaki iruhw utag. Enyudok guha douk kabi enen dodogowinyi uhwin nyahur um. Namudok aria atudok shape atari urupat douk shukunit abom meyoh. <sup>3</sup> Aria shatik nyih. Ehudok nyih douk hape kabi yehepitog um tutukareh hanak sisiguk. Aria arpesh shape iri ehudok nyih habuhi hetemesh atin atin ihishmorim shatuh. <sup>4</sup> Aria eshesih ihishmorim douk Iruhin ananin Mishin nyawish nyapenyesh aria shape sheneyagwreh sabainyi sisigin kupainyi bareaen. Sheneyagwreh kabi Iruhin ananin Mishin nyeshuhur ba shiyagwreh um.

<sup>5</sup> Enesh Juda douk apa shenek lotu um Iruhin aria shanak shape ihigos-morim nahobigos agundok atap iri douk shanaki shape Jerusalem abudok nyutob. <sup>6</sup> Douk shemnek enyudok guha aria sabaishi shanaki shantorum shape. Shanaki shantorum shape aria shakitak yowiyokuk um eshesih atin atin shemnek eshudok shagipes Jisas iri sheneyagwreh Iruhin ananin bareaen eshesih ihirub warub esheshin kupainyi bareaen. <sup>7</sup> Adur shakitak yowiyokuk shorshor shape aria shakri, “Eshudok arpesh sheneyagwreh namudok iri, eshesih ihishmorim douk shanaki agudok shokugi nahobig Galili iri atish. <sup>8</sup> Aria namudok mumam um apak ihishmorim memnekesh sheneyagwreh apakin sisigin ganiganigin bareaen um? <sup>9</sup> Apak ihishmorim, anap douk manaki agudok shokugi nahobig Partia, Midia aria Elam. Anap manaki abudok debeibi amnab Mesopotemia. Anap manaki agudok shokugi nahobig Judia, Kapadosia, Pontus aria Esia. <sup>10</sup> Anap manaki abudok amnab Frigia aria Pamfilia. Anap manaki agudok nahobig Isip. Anap manaki warub bape abudok debeibi amnab Libia hurukatin um debeiburi wabur Sairini iri. Aria anap douk shopunek manaki Rom. <sup>11</sup> Anap Juda aria anap kupairubi warub douk magipes eshesih Juda eshesih aih um shenek lotu um Iruhin iri. Anap manaki agudok nahobig Arebia. Aria anap douk manaki enyudok unai Krit. Aria apak ihishmorim douk memnekesh sheneyagwreh apakin kupainyi bareaen um yopinyi mour douk Iruhin neneken iri.”

<sup>12</sup> Eshesh ihishmorim shakitak yowiyokuk aria shorshor shapeum enyudok mugu iganigadae nyatograri. Aria shape shanasorim shakri, "Enyudok mugu iganigadae nyatograri douk adur maresh?"

<sup>13</sup> Aria enesh shanumogesh aria shakri, "Eshudok arpesh douk shawok sabaini namuni wain ba shagugak aria douk shape sheneyagwreh namudok."

### *Pita Nakripesh Iruhin Ananin Baraen Sabaishi Arpesh*

<sup>14</sup> Douk eshesh sheneyagwreh namudok aria Pita nani amudok amam 11-poreim aposel hakitak heyotu. Heyotu aria Pita neyagwreh debeg atin nakripesh baraen eshudok sabaishi arpesh nakri, "Ipak Juda paní ipak ihipmorim douk panaki pape Jerusalem iri, ipak gamo pumnek eik aria ta ikriep baugenym baraen um enyudok mugu iganigadae nyatogrur patrin iri. <sup>15</sup> Douk watak 9 kilok ruhur wata reir aria eshudok arpesh douk madae shuwok abar shugugak kabi douk ipak pakri um uwe, uwok. <sup>16</sup> Enyudok mugu douk nyatogrur nyagipesh enen baraen seiwok profet Joel menyemaguk iri nyakrium. Baraen enyudok. <sup>17</sup> Iruhin nakri, 'Ahudok hugiguk iri nyumneh hutogurum, eik douk ta inek enyudok mugu.

Ta ikeshi eikin Mishin nyubuhi nyuwish ihishmorim arpesh.

Aria ipakim nugamim aria nugariyu ta shukripesh

eikin baraen kabi amam profet hakripeshen um.

Ipakim weroroimi armam ta hutik eshudok

kabi habo yomnis hatrish iri um.

Aria ipakim ruwehemi ta hishuh hubo yomnis.

<sup>18</sup> Ehudok nyumneh armam armago shenekume mour iri, eik ta ishopoki eikin Mishin nyubuhi nyuwishesh.

Nyuwishesh aria ta shukripesh eikin baraen

kabi amam profet hakripeshen um.

<sup>19</sup> Ta inek enenyen eik atuwe yeneken iri mour nyutogur iruhw utag aria ta inekan nyutogur agundok atap shopunek.

Owishesh nyih aria debeigusi nyugus ta shutogur.

<sup>20</sup> Nyumnahin aun ta inekan nutogur arukwtigunin.

Wabin ta inekan nutogur kabi owisheshori um.

Eshudok shutogur shunakuk

aria ahudok Debeini ananah debeihi nyumnah ta hugikuk hutogur.

Hutogur aria ihishmorim arpesh ta shutik

agundok anan adur dodogowin atun aria natrugun abom um.

<sup>21</sup> Aria eshudok arpesh douk shape shahwar Debeini

um nuraesh iri, anan ta nuraesh shutanamori shupe wosik abom.' "

<sup>22</sup> Pita apa neyagwreh aria nakripesh nakri, "Ipak Israel, ipak pumnek enyudok eikin baraen. Anudok Jisas nanaki wabur Nasaret iri, Iruhin douk nenekan dodogowin aria neneke nyutogur agundok atap shopunek. Anan douk neneke nyutogur um ipak pudukemesh pukri Jisas anan douk Iruhin meyoh neshopokan nanaki iri. <sup>23</sup> Nubokuhi Iruhin douk nekep anudok arman ipakis wis aria poko henek yoweishi inahos iri armam henek nyiluman rowog kruse aria pan nagok. Iruhin douk nekepan penekesh-uman namudok kabi seiwok anan kanak urkum moromen aria nadukemesh um ta nuneken um. <sup>24</sup> Douk pan nagok aria Iruhin nonohur nikitak nape. Madae nukutunukuk nupemoguk arudok eriger douk shagok iri shemnekor iri uwe, uwok. Um maresh? Gok douk madae dodogowinyi

um nyuweshiguk anudok arman uwe, uwok. <sup>25</sup> Seiwok king Devit douk nakriyuk enyudok baraen um Jisas. Nakri,

‘Eik yatik Debeini nani eik nepe hurukatin iihih nyumneh.

Neyotu nagime agundok hurukatin aria ta mare inogugur ikri inehikesum um enesh eshudok eneshenes, uwok.

<sup>26</sup> Namudok aria eikiw apahw adur hwor wosik aria yanadudareh yeyagwreh yopunyi atin baraen.

Eik yape yatrugun um Iruhin

aria adur yadukemesh um anan ta nutaurume.

<sup>27</sup> Um maresh? Nyak ta mare nyukutukuk eikin mishin nyupeik abrudok wabur douk yoweishi shagok shanak-aburi, uwok.

Ta mare nyukutukuk anudok nyakin yopuyopuni naganin nagok aria adur nutarukuk uwe, uwok.

<sup>28</sup> Ahudok yah um adur shupe ihih nyumneh um douk nyeyabigesh.

Nyak ta nyuni eik upe huruk

aria ta nyuni eik unadudareh uriguk.’

<sup>29</sup> Pita apa neyagwreh nakripesh nakri, ‘Eikish ashukenyish washish, eik yadukemesh aria yakri ikripepum adur pudukem apakini baben Devit. Anan douk seiwok nagok sharuman. Sharuman aria ananihw wonugwehw douk hwor agundok apak mape um arigha douk. <sup>30</sup> Anudok Devit anan douk anan profet. Namudok aria nadukem enyudok Iruhin ananin baraen, douk nakri um iruhw nakri adur atinyum ta nunek anan Devit ananin barhonin nutogur king kabi anan Devit um. <sup>31</sup> Seiwok Devit nadukemesh um enyudok Iruhin nakri um ta nuneken iri. Aria douk nakriyuk enyudok baraen um Krais ta wata nukitaki wonugwehw um. Nakri, ‘Ta nugok aria ta mare adur nupeik agundok shagok iri shanak shapeum, uwok. Ananihw yegeniyihw ta mare hwutar.’ <sup>32</sup> Anudok Jisas nagok um, Iruhin douk nonohur nikitak nepe. Apak ihishmorim douk matrun aria makri adur. <sup>33</sup> Nonohuri agundok nagok um aria naran nato iruhw heven nakih nyeigur nyato iruhw nepe agundok yopunyi rogur ehah um Iruhin. Aria Iruhin nakon ananin Mishin kabi seiwok nakri adur atinyi baraen um ta nukonen um. Aria enyudok douk ipak patrin aria pemneken iri, enyudok douk nekepari ananin Mishin nyabuhi nyawishap. <sup>34</sup> Devit douk madae nuto um iruhw heven uwe, uwok. Aria seiwok anan douk nakriyuk enyudok baraen, nakri,

‘Debeini nakrip eikin Debeini nakri,

‘Nyak nyupe agundok yopunyi rogur ehah

<sup>35</sup> arigha itaurumen ibo nyakish horim shubuhuk.’

<sup>36</sup> Namudok aria ipak ihishmorim Israel ta gamo pudukemesh um anudok Jisas douk pan penek nyil-uman rowog kruse iri. Iruhin douk neneken natogur debeini iri Krais, douk anan Iruhin nagrahan aria neshopokan nanakumori nurao arpesh iri.”

### *Sabaishi Arpesh Shatanam Shakon Aparuh Iruhin Aria Shenek Baptais*

<sup>37</sup> Douk eshudok armam armago shemnek enyudok Pita nakripeshen iri baraen aria adur nyabadig eshesiruh aparuh numun. Aria sharig Pita nani amudok anam aposel shakri, ‘Apakim warhim, aria apak douk ta munek maresh?’

<sup>38</sup> Aria Pita nakripesh nakri, ‘Ipak ihishmorim pukesuguk agabus yoweishi inahos aria putanam pukon aparuh Iruhin. Punekesh namudok aria punek baptaisum Jisas Krais ananin nyeigur. Namudok aria ipakish penekesh iri yowesh inahos, Iruhin ta mare wata nusuhwesh nupe, uwok. Ta nukwreyeshukuk. Namudok aria ta nukep meyoh ananin Mishin.

<sup>39</sup> Seiwok Iruhin douk nakri enen adurin atinyi baraen um ta nukep ananin Mishin. Nuko ipak puni ipakish batowish aria ihishmorim arpesh douk shape rougung-irub warub iri. Eshudok douk Iruhin apakin Debeini nahwaresh um shunakumori anan iri.”

<sup>40</sup> Aria Pita nakripesch sabainyi kupainyi baraen shopunek. Dodogowin atun nakripesch nakri, “Ipak ta gamo punodukemesh um mare purao arudok debeiri eriger douk shenek yoweishi inahos iri arpesh kweipon ta shemnégor iri.” <sup>41</sup> Sabaishi arpesh douk shemnek Pita ananin baraen shasuhwen shakri adurin aria shenek baptais. Ahudok nyumnah douk adur sabaishi 3,000 armam armago douk Iruhin neshuhur shawish um eshesh shagipesch Jisas iri.

### *Eshesh Shagipesch Jisas Iri Shape Atugun Aria Sheneh Eneheneh Yopihi Aih*

<sup>42</sup> Eshudok namushi shanaki shagipesch Jisas iri douk shanapeum shemnek amam aposel henek skulumesum um Iruhin ananin baraen aria sharaebaraen um shudukemesh. Aria shanak shani eshesh sharik shenek bilip iri shape atugun shanagapesh shawok worigun aria shenek beten shanak atugun atin. <sup>43</sup> Iruhin nataurum ananum aposel henek enyenener anan Iruhin atun neneken iri mour nyatogur aria ihishmorim arpesh shatrin. Shatrin shakitak yowiyokuk aria adur shanogugur. <sup>44</sup> Aria ihishmorim shagipesch Jisas iri douk adur shape atugun atin aria shanasia eneshenesh esheshish eshudok shanakam um. Madae shukri enesh eshudok douk esheshish atish uwe, uwok. <sup>45</sup> Apa shenek salim um esheshish eshudok eneshenesh douk sheneshubuk urusag iri o shogremesh iri. Aria utabor sharabor um eshudok iri douk apa shanaki shosiyabor shako eshudok douk yaruhih iri. <sup>46</sup> Ihih nyumneh apa shanak shantorum numun narub Iruhin ananit debeiti urupat tataoum. Eshesiruh aparuh yopuyopuruh shanadudareh abom aria eshesigun worigun apa shanasiyagun shagnoh shanak atugun atin eshesig urusag. <sup>47</sup> Ihih nyumneh apa shatuk Iruhin ananin nyeigur nyato iruhw aria kupaishi arpesh shatrish shanadudareh shakri wosik. Aria ihih nyumneh Debeini napeum narao enesh arpesh shatanamori shape wosik abom aria shawish um eshudok shagipesch Jisas iri.

## 3

### *Anan Arman Douk Aiyas Yowegas Iri Natogur Yopun*

<sup>1</sup> Anah nyumnah 3 kilok wabigep, Pita nani Jon hikitak aria hanak um atudok Iruhin ananit debeiti urupat. Abudok nyutob douk apa shape shenek beten um. <sup>2</sup> Wit douk shawishat aria shawish numun agundok Iruhin ananit urupat tataoum iri douk shahwarat yoputi wit. Aria shanaki shasap anan armān nape atudok wit. Shanasap napeum meishi arpesh shukri shunaki shuwish numun narub atudok debeiti urupat tataoum aria anan nahwaresh um shukonaguk utabor. <sup>3</sup> Douk natik Pita nani Jon hanakum huwish aria nahwaram um hukonaguk enesh eshudok eneshenesh. <sup>4</sup> Pita nani Jon hatrun duk aria Pita nakri, “Nyak truhwari!”

<sup>5</sup> Aria natanam natrum duk um nakri ta hukonaguk enesh eshudok eneshenesh.

<sup>6</sup> Aria Pita nakripan nakri, “Eik utabor woke. Aria ta iken eshudok enesh eik yasuhwesi um eshudok. Um Jisas Krais nanaki wabur Nasaret aria ananin nyeigur, eik yakripenyum nyukitak nyurahaen!”

<sup>7</sup> Nakripan namudok aria nasuhw ananin yopunyi rogur nonohur nikitak neyotu. Aria ahudok atuh anudok arman ananiruh yeriweruh aria nuhuraohwiruh shatogur dodogowish. <sup>8</sup> Aria nikitak naprok nato

iruhw nabuh neyotu aria nape narahaen. Aria neir Pita aria Jon hawish numun narub atudok Iruhin ananit debeiti urupat tataoum. Nanadudareh um Iruhin aria narahaen natukobur natuk ananin nyeigur nyato iruhw. <sup>9</sup> Ihishmorim arpesh shatrun um nape narahaen aria natuk Iruhin ananin nyeigur nyato iruhw. <sup>10</sup> Aria shadukemesh shakri anudok arman douk apa nape atudok wit Iruhin ananit debeiti urupat douk shahwrat um yoputi wit iri. Apa nape nahwaresh um eshudok eneshenesh iri. Shatrun shadukeman aria shakitak yowiyokuk. Aria baraen wokesh shapeum shakri maresh shenekan aria douk nakitak narahaen um.

### *Pita Nakripesh Iruhin Ananin Baraen Gani Numun Iruhin Ananit Debeiti Urupat*

<sup>11</sup> Ihishmorim armam armago shemnek um enyudok iri douk shakitak yowiyokuk aria shahur shanaki um shutik anudok arman. Shanaki aria shatrun um nanasuhw Pita nani Jon aria heytu enyudok womaga um atudok Iruhin ananit urupat douk shahwaren um Solomon ananin womaga iri. <sup>12</sup> Douk arigaha Pita natrish aria nakripesh nakri, "Ipak Israel, ipak pakitak yowiyokuk um enyudok um maresh? Ipak pakri iganigadae ohwak wagapesh anudok arman um ohwakin dodog o pakri wasuhw Iruhin ananin baraaen watogur yopuyopuh abom aria douk wagapeshan narahaen aka? Adur atin, ohwak uwok! <sup>13</sup> Apakim yamehem Abraham nani Aisak aria Jekop amamin Iruhin nagapeshan yopun aria douk narahaen. Iruhin nenen enyudok aria natuk ananin nunganin Jisas douk neneckuman mour iri ananin nyeigur nyato iruhw. Aria douk anudok Jisas douk pasuhwan pako amam horim um hunak hon nugok abom um. Pailat anudok debeini um gavman iri douk nakri nukweshihan nunak fri, aria uwok. Aria pakonaguk agabus pakri uwok-umen abom. <sup>14</sup> Anan douk Iruhin ananin yopuni nagipesh lo atin iri arman, aria ipak pakri wok-uman. Pahwar Pailat um nukweshihi anudok anan arman douk nabo arpesh shagok iri nanakumepari. <sup>15</sup> Aria anudok yopuni arman douk nape Debeini um ahudok yah douk mugipesah aria mupe wosik abom ihih nyumneh um douk pan nagok. Aria Iruhin wata nonohur nakitak nape. Aria ohwak douk watrun wakri adur aria wakripesh-uman. <sup>16</sup> Ohwak douk wasuhw Jisas ananin baraaen dodog wakri adurin. Aria anudok arman douk patrun aria padukeman iri douk natogur yopunum Jisas ananin nyeigur atin. Wenek bilip abom um Jisas ananin nyeigur aria douk Jisas anan meyoh nagapeshan dodogowin agundok ipak ihpmorim ipakis nabes.

<sup>17</sup> Eikishi ashukenyish owashish, eik douk yadukemesh um enyudok ipak pani ipakim debeimi peneken um Jisas iri. Ipak douk madae pudukemesh wosik uwe aria douk peneken um pan nagok um. <sup>18</sup> Seiwok Iruhin nonohur amam profet aria ihm-morim hakriyuk um anudok Krais douk Iruhin nagraehan aria neshopokan nanakumori nurao arpesh iri. Hakri anan ta numnek debeiri eriger. Namudok aria douk enyudok Iruhin nakriyenyi baraaen douk nyatogur adurin atin abom. Douk pabo Jisas nagok.

<sup>19</sup> Namudok aria douk ipak pubukuk yoweishi inahos aria putanam pukon aparuh Iruhin. Punekesh namudok aria anan ta mare wata nusuhw ipak penekesh iri yoweishi inahos nupe, uwok. Ta nukwreyesh-uguk. <sup>20</sup> Punekesh namudok um, Debeini ta nunek yopubi nyutob butogrumeip putogur dodogowip aria ipakish mishish shur wosik punadudareh. Aria ta nishopoki Krais anudok douk nagraehan um nurao arpesh iri nunakumori ipak. Anudok arman douk Iruhin nagraehan um nurao ipak iri douk Jisas. <sup>21</sup> Douk, anan ta nupe iruhw heven arigaha abudok nyutob Iruhin nagraehab um nunek eneshenesh eshudok shutogur namushi obi nyutob,

aria anan ta kweipon nunaki. Kabi douk seiwok amam Iruhin ananim profet hakriyenyukuk iri ananin adurin atinyi baraen nyakrium. <sup>22</sup> Umum maresh? Seiwok Moses douk nakriyuk enyudok baraen nakri, ‘Debeini ipakin Iruhin ta nukep anan profet kabi eik um. Anudok nukepan iri profet douk ta anan um ipak kanak.

Aria ipak ta pusuhw ihinyumorim anan nukriyep-enyi baraen pugipeshen. <sup>23</sup> Eshudok arpesh douk mare shumnek ananin baraen shusuhwen shugipeshen iri, eshesh ta shupeik sik abom. Ta mare shuni Iruhin ananish arpesh shupe atugun, uwok. Aria Iruhin ta nesh shugok.’”

<sup>24</sup> “Adur, profet Samuel nani ihm-morim profet douk hagimori anan iri heyagwreh Iruhin ananin baraen obi nyutob, amam douk shopunek hakriyehuk ehudok douk hatograri iri nyumneh. <sup>25</sup> Iruhin nohur amam profet heyagwrehan iri baraen nyani enyudok enen adurin atin abom iri baraen kontrak seiwok Iruhin nakripaguk ipakim yamehem um, enyudok douk ipakin. Ipak ta pugrem yopishi eneshenesh eshudok douk enyudok baraen kontrak nyakrium ta puraesh iri. Kabi douk nakripaguk Abraham um. Nakri, ‘Um nyakish batowish aria yamehesh, eik ta inekumesh yopinyi ihishmorim agundok atapishi arpesh.’ <sup>26</sup> Aria Iruhin nagraeh anudok ananin nasuhw ananin mour iri aria neshopokan narik nanakumori ipak um nutaurumep nunekumep yopinyi. Nunekumep yopinyi um agundok nutaurumep pukutukuk ihishmorim yoweishi inahos um pape penekesh iri.”

## 4

### *Howeshik Pita Nani Jon Hape Shunuweshik-atı Urupat*

<sup>1</sup> Pita nani Jon wata hape hakripesh baraen armam armago aria amam pris hani iri debeini um amam heyoh Iruhin ananit debeiti urupat iri hanak hatograri agundok Pita nani Jon hapeum. Hani amam Sadyusi hanaki. <sup>2</sup> Hanaki aria juwehosim um hakri Pita nani Jon hape henek skulum arpesh um Jisas nagok aria wata shopunek nakitak. Hakri namudok aria kweipon shagok iri ta wata shopunek shikitaki. Amudok debeimi hakri Pita nani Jon mare hukripesh namudok, uwok. <sup>3</sup> Namudok aria hasuwam henyigram heshuh shunuweshik-atı urupat. Hakri ruwahepih kadak hunek baraen. Um maresh? Douk wabigep hurukatin um wab um. <sup>4</sup> Aria sabaishi douk shemnek amam hakripesken iri baraen aria shenek bilip um Jisas. Aria shadarehesh um, eshudok sharik shenek bilip iri shopunek um douk shatogur sabaishi abom um 5,000-poreish arpesh.

### *Harao Pita Nani Jon Um Eshesh Juda Esheshin Debeini Kaunsol Aria Henekumam Baraen*

<sup>5</sup> Ruwahepih aria amam debeimi Juda douk hape hasuhw kwotog iri hani amudok amam eshesh Juda esheshim debeimi hanaki hantorum hape Jerusalem. Hani amudok anam douk henek skulumesh um lo iri.

<sup>6</sup> Amam hani debeini abom pris Anas nani Kaifas hani Jon aria Aleksander. Amudok anam hani anam amam atup awirop um douk shopunek hanaki hanak hantorum hape. <sup>7</sup> Aria heshopok Pita nani Jon hakitak heyotu hatik amudok debeimi aria hape harigam hakri, “Ipak douk omi nyekep big ba dodogowip aria douk peneken enyudok? Um pogapesh anudok arman yopunum? Pohur meinyi nyeigur penyem aria douk peneken?”

<sup>8-9</sup> Iruhin ananin Mishin douk nyawish Pita abom nyapenyan wosik aria nakripam nakri, “Ipak Israel esheship debeipari pani ipakim takwiym, doukih atin ipak pakri porik ohwak um wenek yopuhi aih um wagapesh

anan aiyas yowegasini um aka? Pakri pudukemesh um agundok nenekehsh mumam aria douk yopunum? <sup>10</sup> Aria namudok um ipak ihishmorim puni ihishmorim Israel douk gamo pudukemesh. Anudok arman douk yopuni abom aria douk neyotu agundok ipakis nabes patrun iri, anan douk yopun abom um Jisas Krais nanaki wabur Nasaret iri ananin nyeigur. Anudok Jisas douk penek nyilimam rowog kruse nagok paruman aria Iruhin wata nonohur nikitak nape iri.

<sup>11</sup> Jisas anan douk anudok arman douk enen baraen nyetem Iruhin ananik Buk iri nyakrianari. Baraen enyudok.

‘Amudok utom douk ipak parok urupatam iri  
pakri wokumam iri aria pamabukuk iri,

Iruhin douk namanam matogur anam yopumi marik iri utom aria mosah wobratum urupat aria tatao dogod.

<sup>12</sup> Madae enen agundok atapinyi arpen ta nyurap mutanamori mupe wosik abom uwe, uwok meyoh. Iruhin madae nuken big kupainyi arpen um nyutaurumap uwe, uwok. Jisas atun abom.”

<sup>13</sup> Amudok debeimi hemnek Pita aria Jon amamin baraen aria hakitak yowiyokuk. Um maresh? Amam hadukemesh um Pita nani Jon douk madae hunek skul uwe. Aria hatik um amam madae hunogugur uwe, aria dodogowim atum hape heyagwreh baraen. Aria debeimi hadukemesh um riguk Jon aria Pita douk hani Jisas hape harahe hanak atugun.

<sup>14</sup> Hatik anudok arman douk ananigas aiyas yopugas iri nanamam heytotu atugun, aria amudok debeimi baraen wokam um hubeyenyumam iri. <sup>15</sup> Namudok aria hakrip Pita nani Jon um hukutukuk amudok rum debeimi hapenyomi hutograguk aduk. Douk hatograguk aria amam heytogwreh habo baraen namudok. <sup>16</sup> Hakri, “Ta munegam mumam amudok biom armam? Ihishmorim arpesh shape agundok Jerusalem iri douk shadukemesh um enyudok amam heneken iri debeinyi mour Iruhin atun neneken iri. Aria apak douk ta mukri mubeshukun mumam, ta uwok.

<sup>17</sup> Aria mukri enyudok baraen mare wata shiyagwrehen nyunak um enesh arpesh shopunek shumneken um, apak ta mukrip amudok biom armam dodogowinyi baraen um amam mare hukripesh Iruhin ananin baraen shopunek um enyudok Jisas ananin nyeigur, uwok.”

<sup>18</sup> Douk habo baraen namudok aria wata hahwaram hawish. Hawish aria hakripam dodogowinyi baraen um amam mare wata hupe hunek skulum enesh arpesh um enyudok Jisas ananin nyeigur o hupe hukripesh Iruhin ananin baraen um enyudok nyeigur, uwok.

<sup>19</sup> Aria Pita nani Jon hakripam hakri, “Ohwak ukutukuk Iruhin ananin baraen nyupeik aria ugipesip ipakin um, ta ipak pukri Iruhin ta nutruhw nukri wosik o maresh? Ipak kanak ta punek skelum enyudok baraen.

<sup>20</sup> Ohwakig nokwatog ta mare gwishuk um wemneken iri baraen o eshudok watrish shatograri iri uwe, uwok.”

<sup>21</sup> Aria amudok debeimi hakripam enen dodogowinyi baraen shopunek aria heshopokam hanak. Ihishmorim arpesh douk shatuk Iruhin ananin nyeigur nyato iruhw um nagapesh anudok aiyas yowegasini um. Namudok aria amudok debeimi douk hanogugur aria yah wakom um hom o huweshikom um. <sup>22</sup> Anudok arman douk Pita aria Jon henek enyudok Iruhin atun neneken iri mour aria hagapeshan yopun iri, anan douk neshagrakuk 40-poreish kwarahos.

*Eshesh Shagipesh Jisas Iri Shenek Beten Um Shurao Dodog Aria  
Shukripesh Iruhin Ananin Baraen*

<sup>23</sup> Douk amudok debeimi hakweshih Pita nani Jon aria wata hatanam hanak um amamishi. Hanak aria hakripesh ihinyumorim baraen douk debeimi pris hani eshesh Juda esheshim debeimi hakripam-enyi. <sup>24</sup> Douk shemnek enyudok baraen aria ihishmorim shantorum shape atugun aria shenek beten um Iruhin. Shenek beten namudok, shakri, “Debeini, nyak ddogowin atinyi abom. Nyak douk nyenek iruhw, nyenek atap shani youg iri eneshenesh douk shapenyagun iri. <sup>25</sup> Seiwock nyakin Mishin nyohur apakin yamenen Devit douk neneck nyakin mour iri aria nakriyuk enyudok bāraen. Nakri,

‘Kupaishi arpesan douk eshesh madae Juda iri uwe douk juwehosish atish abom um maresh?

Eshudok arpesan douk shabo bāraen nyape atugun meyoh um shukitak um wanohw um maresh?

<sup>26</sup> Esheshim king hape agundok atap iri douk  
hape hugapesh wanohwish eneshenesh um hukitak um wanohw.  
Esheshim debeimi douk hantorum hape atugun  
um hakri huni Debeini nini anudok douk anan nagraehan  
um nurao arpesan iri hurpak!

<sup>27</sup> Aria adur atin, nubokuhi amudok biom debeimi um gavman iri, Pontius Pilat nani Herot douk hanaki hantorum hape atugun. Hani eshesh Israel shani enesh arpesan douk eshesh madae Juda iri uwe shopunek. Shantorum shape abrudok wabur Jerusalem aria shabo bāraen um shunumogesh Jisas. Anudok yopini arman douk seiwock nyagraehan aria nasuhw nyakin mour iri. <sup>28</sup> Shanaki shantorum shapeum shunek ihinyumorim mour douk seiwock nyak kanak ddogowin atin aria nyakrium douk ta shuneken iri. <sup>29</sup> Aria douk Debeini, nyutiki apak aria urkum murum enyudok ddogowinyi wanohwin bāraen douk sheyagwrehen um apak munek nyakin mour iri. Namudok aria nyutaurumap um mare munogugur, aria ddogowip atup abom mukripesh nyakin bāraen. <sup>30</sup> Nyishopoki nyakin ddog um nyugapesh arugeh hapeyeshi yopish. Aria makri nyunek enyenjenen nyak atin nyeneken iri mour nyutogur um Jisas ananin nyeigur, anudok yopuyopuni abom arman douk nasuhw nyakin mour iri.”

<sup>31</sup> Douk shenek beten um jurug aria atudok shantorum atari urupat kututukarot tunatunaki. Aria Iruhin ananin Mishin nyabuhi nyawishesh nyapenyesh nyeyatesh aria shanak ddogowish atish shape shakripesh Iruhin ananin bāraen. Sheyagwrehen debeg atin aria madae shunogugur uwe, uwok.

### *Eshesh Shagipesh Jisas Iri Shasuhw Atin Baraen Aria Shanagapesh Um Eneshenesh*

<sup>32</sup> Ihishmorim shasuhw Jisas ananin bāraen iri douk shape atugun abom aria shasuhw atum urkum. Madae enen arpen nyukri enesh enyeniyish eshudok eneshenesh douk enyeniyish atish uwe, uwok. Aria shanosiya ihishmorim eneshenesh esheshish eshudok atugun atin. <sup>33</sup> Amam aposel douk harao Iruhin ananin ddog aria ddogowim atum apa hakripesh bāraen um Debeini Jisas nagok aria wata nakitak um. Namudok aria Iruhin nataurumesh meyoh eshesh ihishmorim shagipesh Jisas iri. <sup>34-35</sup> Namudok aria eshesh shenek bilip iri madae enen arpen eneshenesh woken um enesh eshudok uwe. Ihishmorim shape wosik iri atish. Eshudok douk shogrem anab amnab o urusag iri ta shekeshesh shatorish sharaq utabor. Aria abrudok utabor douk sharabor shanaki shako amam aposel. Shako amam aria hosiyabor um eshudok yaruhih iri. <sup>36</sup> Aria anan arman shahwaran Josep iri douk nape. Anan douk shanabuki enyudok unai Saiprus aria nakitak opudok awirop Livai. Amam aposel douk hodowan enyudok

nyeigur Barnabas. Baugenyum enyudok nyeigur douk shakri, "Nakripesh yopinyi baraen um shupe dodogowish iri." <sup>37</sup> Anudok Josep douk nokesh anab ananib amnab aria kupaishi shatorub shakon utabor. Shakonabor aria narabor nanak nako amam aposel.

## 5

### *Ananaias Nani Ananik Irohukwik Sheneck Rohwum Amam Aposel Um Esheshibor Utabor*

<sup>1</sup> Shenekech namudok atin aria anan arman shahwaran um Ananaias iri nani ananik irohukwik Safaira douk shape. Aria eshesh shekesh anab um esheshib amnab kupaishi shatorub aria shukesh utabor. <sup>2</sup> Aria ananik irohukwik kwadukemesh aria tukwanibor nasuaboruk aria narauri tukwanibor atubor nanak nako amam aposel. Neneck rohw nakri narauri shuknibor nanaki nakomabor.

<sup>3</sup> Aria Pita narigan nakri, "Ananaias, nyenekesh mumam aria Satan douk nawishen aria nenenken nyogiyagim Iruhin ananin Mishin um? Nyagiagimen um agundok nyanabuk tukwanibor utabor douk nyarabor um nyakib amnab iri um?" <sup>4</sup> Nubokuhi watak nyukesh amnab shatorub ahi uwe, abudok amnab douk nyakib atub. Arigaha douk nyekeshab shatorub iyoh aria utabor shopunek wosik nyakibor. Nyukri nyunekabor mumam, enyudok nyakin mour. Aria maresh sheneken, um nyarao amudok yoweimi urkum aria nyanaki nyenek rohw nyakri nyasuhw iri shuknibor utabor um? Arpen douk madae nyugiyagim enen arpen uwe, uwok. Nyagiagim Iruhin."

<sup>5</sup> Douk nemek Pita ananin baraen aria natu nabuh nakus abom aria nagok. Aria ihishmorim shemnek um Ananaias nagok um aria shanogugur abom. <sup>6</sup> Aria anam weroroimi hanaki hashapoman anah rupah haran hatogur aria hanak haruman.

<sup>7</sup> Arigaha biyen atin aua nyanak nyadiyuk aria Ananaias ananik irohukwik Safaira shopunek kwanak kwawishi agundok atugun Pita neapeum. Agundok raminen nagok um douk madae kwadukemesh uwe, uwok. <sup>8</sup> Kwawishi aria Pita nakripok nakri, "Kripe, utabor nyak nyani raminen parabor um amnab iri douk abrudok atubor, aka?"

Aria okwok kwakri, "Adur wo, abrudok atubor."

<sup>9</sup> Aria Pita nakripok nakri, "Mumam namudok um nyak nyani nyakin raminen pabo baraan um pakri pukwiraeh Debeini ananin Mishin um? Hanak haromuk nyakin raminen iri amudok hawishi wit douk. Ta husah nyak hotogur shopunek."

<sup>10</sup> Douk Pita nakripok namudok atin kwabuh kwatu kwakus agundok ananigas aiyas abom um aria kwagok. Aria amudok weroroimi armam hawishumori douk hatik um kwagok kwakus. Aria hokuhur hakusah hatogur hanak harumok hurukatin um agundok harom raminen um.

<sup>11</sup> Namudok aria ihishmorim Iruhin ananish arpesh shani ihish arpesh shemnek um enyudok aria shanogugur abom.

### *Amam Aposel Henek Enenyenken Iruhin Atun Neneken Iri Mour*

<sup>12</sup> Amam aposel henek enenyenken Iruhin atun nenenken iri mour nyatogur aria arpesh shatrin. Aria ihishmorim shasuhw Jisas ananin baraen shagipeshen aria iih nyumneh shanaki shantorum shape enyudok debeiniy Solomon ananin womaga um atudok Iruhin ananit debeiti urupat.

<sup>13</sup> Adukishi kupaishi arpesh douk shanogugur aria madae shunak shuni eshesh shunatorum uwe, uwok. Aria eshudok adukishi arpesh shatuk amam aposel hani eshesh douk shasuhw Jisas ananin baraen shagipeshen

iri esheshish nyeiguhw shato iruhw. <sup>14</sup> Aria sabaishi arpesh abom shenek bilip um Debeini aria shape shawish um eshudok douk sharik shenek bilip iri.

<sup>15</sup> Douk shatik enyudok amam aposel heneken iri mour aria douk um shosahi arugeh haesh iri shanaki sheshubuk anagasih um yeh. Sharabikumesh reish shabomesh betog aria sheshubuk shakus um shakri kadak Pita nurahaen nunaki aria nunek betenumesh o uwok um, shakri ananir aborir meyoh ruwetesh aria yopish. <sup>16</sup> Sabaishi arpesh shape iri shakurubi warub hurukatin um Jerusalem iri shopunek shanaki. Sharawari arugeh haesh iri shani eshudok douk sagabehos shapenyesh iri shanaki um hugabeyesh. Aria ihishmorim sharaeshi iri douk nagabeyesh aria yopish atish.

### *Ensel Nyataurum Amam Aposel Hakutukuk Shunuweshik-atı Urupat Aria Hatograri*

<sup>17</sup> Namudok aria debeini pris abom nani ihm-morim ananim arpeshim amam Sadyusi henek nyigiya abom um amam aposel um enyudok amam hape heneken iri. Aria juwehosim abom. <sup>18</sup> Juwehosim namudok aria hakitak hasuwam henyigram hawish hape shunuweshik-atı urupat iri douk shenek eneshenesh yoweishi inahos shapenyat iri. <sup>19</sup> Aria abudok wab, enen Debeini ananin ensel nyanaki nyejik witog atudok shunuweshik-atı urupat. Nyejikog douk nyarao amam nyatogur aduk aria nyakripam nyakri, <sup>20</sup> “Punak puwish numun Iruhin ananit debeiti urupat tataoum aria pupe pukripesh ihishmorim baraen um ehudok namuhi aih um Iruhin nurao arpesh shutanamori shupe wosik abom um.”

<sup>21</sup> Amam aposel hemnek enyenyin baraen aria gagruk atin hanak hawish hape henek skulum armam armago um Iruhin ananin baraen.

Aria anudok debeini pris nani ananim armam henekumam baraen ihm-morim eshesh Juda esheshim debeimi um esheshit debeiti kwot iri hanaki aria hantorum um hiyagwreh baraen. Hanaki hantorum aria henek baraen nyanam shunuweshik-atı urupat um hurauri amam aposel hunaki agundok amam debeimi hapeum. <sup>22</sup> Douk amam heyoh Iruhin ananit urupat iri hanak hatogur, aria madae hutik anam aposel hupe uwe, uwok. Namudok aria watak hatanam hanak hakripam namudok debeimi hakri, <sup>23</sup> “Manak matogur shunuweshik-atı urupat um, witog douk matik shugwaru abom gwape dodog. Heyoh urupat iri polis heyotu heyohat. Aria manak mejikog mawish aria madae mutik anan atun nupeik uwe, uwok.”

<sup>24</sup> Douk debeini um amam apa heyoh Iruhin ananit debeiti urupat iri nani amam debeimi pris hemnek namudok aria hakri, “O, amudok aposel ta hanak hawishuk mumam?”

<sup>25</sup> Aria anan arman nawishi nakripam nakri, “Mnek! Amudok armam douk penyigram hape shunuweshik-atı urupat iri douk heyotu numun narub um Iruhin ananit debeiti urupat tataoum aria hape henek skulumesh um Iruhin ananin yopinyi baraen.”

<sup>26</sup> Douk hemnek namudok aria debeini nani ananim heyoh Iruhin ananit urupat iri hanak harawari amam aposel hanaki. Madae hom o hushuwokam uwe, uwok. Hanogugur um hakri ta arpesh shunaki shom shukwumam utabor.

### *Amam Aposel Douk Madae Hunogugur Um Hukripom Baraen Debeimi Uwe*

<sup>27</sup> Douk amam haram hanaki hawish aria homusop heyotu hatik amudok debeimi um eshesh Juda esheshit debeiti kwot iri. Aria debeini pris abom nakripam nakri, <sup>28</sup> “Apak makriipep dodogowinyi baraen um makri mare

puhur Jisas ananin nyeigur punyem aria punek skulumesh Iruhin ananin baraen, uwok. Aria tik, douk ihishmorim arpesh shape Jerusalem iri douk shemnekne sheyaten ipakin baraen. Aria ipak pakri pukop baraen apak um pakri apak mabo Jisas nagok.”

<sup>29</sup> Aria Pita nani amudok anam aposel hawanamam baraen namudok. Hakri, “Apak ta mugipesh Iruhin ananin baraen atin. Arpeshin mare mugipeshen, uwok. <sup>30</sup> Ipak pabo Jisas penek nyiliman neir rowog kruse aria nagok. Aria apakish popehesh yamehesh esheshin Iruhin watak nonohur nikitak nepe. <sup>31</sup> Nikitaki aria Iruhin naran natoum iruhw nakih nanasap nape debeini agundok yopunyi rogur ehahum anan Iruhin. Aria douk napeum nuyabigap yah aria nunarap nutanam um Iruhin mupe wosik. Iruhin nenekeh namudok um nutaurum apak Israel um mukeshuk agabus yoweishi inahos, mutanam mukon aparuh aria anan mare watak nusuwen nupe um apakish yoweishi inahos, uwok. Ta nukwreyeshuk. <sup>32</sup> Aria apak mani enyudok Iruhin ananin Mishin douk makrip arpesh um enyudok apak matrin nyatogur um Jisas iri. Enyudok Mishin douk Iruhin nako eshudok douk shasuhw ananin baraen shagipeshen iri.”

### *Debeimi Hakri Hubo Aposel Hugok Aria Gamaliel Natupokumam Baraen*

<sup>33</sup> Douk amudok debeimi hemnek enyudok baraen aria juwehosim abom. Aria hakri hubo amam aposel hugok. <sup>34</sup> Aria amudok debeimi, anan shahwaran um Gamaliel iri nikitak neyotu. Anan douk anan Farisi aria shopunek douk nenen skulumesh um lo iri. Ihish arpesh apa shatuk ananin nyeigur nyato iruhw. Douk anan nikitak neyotu aria nakripes um shurauguk amudok aposel hutograuguk aduk um banab nyutob meyoh.

<sup>35</sup> Douk hatograuguk aria nakrip amam debeimi hasuhw kwotog iri nakri, “Ipak Israel, ta ipak pukri punek maresh um amudok armam um, ipak douk gamo punek urkwip aria douk punekenyumam. <sup>36</sup> Riguk anob nyutob, anan arman shahwaran um Teudas iri douk nikitak aria nakri anan douk debeini dodogowini arman. Aria narao sabaimi armam hurukatin um 400-poreim hagipeshan. Aria shanuguk aria ananish hagipeshan iri hanogugur hanak atun atunuk. Aria enyudok hakri huneken iri nyanak nyabuhuk.

<sup>37</sup> Enyudok nyanak arigaha anob nyutob aria Judas douk nanaki agudok shokugi nahobig Galili iri nikitak nanuk enesh arpesh shagipeshan. Abudok nyutob gavman shape sharao nyeiguhiwsh um arpesh shadarehesh obi nyutob, anan nikitak um enyudok aria nohur wanohw um hiyatok gavman. Aria shanuguk aria ananishi shagipeshan iri shanogugur shanak atun atunuk. <sup>38</sup> Namudok aria douk yakripep. Ipak mare pukwiraeh um punekam maresh um amudok armam, uwok. Pukweshiham hupe meyoh. Enyudok heneken iri, ta amam meyoh henyuhur heneken um amamip urkwip um, enyen ta nyunak nyubuhuk. <sup>39</sup> Aria ta Iruhin meyoh nomuhur heneken um, ipak ta pubirak um putapam aria ta pubirak putik uwok. Punekesh namudok aria ta putik um pani Iruhin parpok.

<sup>40</sup> Amudok debeimi hemnek Gamaliel ananin baraen hakri wosik aria hahwar amam aposel hawishi. Hawishi douk haprukam hakwu enesh eshudok aria hakripam dodogowinyi baraen hakri um hunak aria mare watak hahur enyudok nyeigur Jisas hunyem aria hupe hukripesh Iruhin ananin baraen, uwok. Douk hakripam um jurug aria heshopokam hanak.

<sup>41</sup> Aria abudok nyutob hakutukuk amam debeimi hanak obi nyutob, amam douk hanadudareh abom. Um maresh? Amam douk hadukemesh hakri Iruhin douk natrum aria nakri wosik um shom aria harao abraen um agundok hakripesh baraen abom um Jisas um. <sup>42</sup> Ihih nyumneh amam hape hakripesh Iruhin ananin baraen abom um Jisas Krais aria gamo

henek skulumesh um shudukemesh wosik. Hakripesh hakri Jisas anan douk Krais, anudok douk Iruhin nagraehan aria neshopokan nanakumori nunarao arpesh iri. Hape hakripesher numun narub Iruhin ananit debeiti urupat tataoum. Anabik um hakripesher esheshig urusag.”

## 6

### *Shagraeh 7-Poreim Armam Um Hutaurum Amam Aposel Iri*

<sup>1</sup> Aria abudok nyutob, arpesh shagipesher Jisas iri douk shatogur sabaishi abom. Aria eshudok Juda douk sheneyagwreh enyudok baraeen Grik aria shagipesher Jisas iri shani eshesh wobresh Juda sheneyagwreh enyudok enen baraeen Hibru iri shanatutukem. Eshesh sheneyagwreh Grik iri shakri abudok nyutob shasiya eshudok shako eshesh yaruuhish iri obi nyutob, shakri esheshiyu amam hagok hawosopukuk iri armago douk madae shuko atin uwe, uwok.

<sup>2</sup> Namudok aria amam 12-poreim aposel hahwar ihishmorim shagipesher Jisas iri shanaki atugun aria hakripesh hakri, “Namudok madae wosik um apak mukutukuk enyudok mour um mukripesh Iruhin ananin baraeen um nyupeik aria mupe um misiya worigun um. <sup>3</sup> Namudok aria ashukenyish owashish, douk ipak ta pugraeh 7-poreim anam ipakimi armam aria hiyotu um enyudok mour. Pugraeh amudok douk harao Iruhin ananin Mishin nyapenyam wosik abom aria harao yopinyi saki iri. <sup>4</sup> Aria iihih nyumneh apak ta mupe um munek beten musorik Iruhin aria mukripesh ananin yopinyi baraeen.”

<sup>5</sup> Ihishmorim shemnek namudok aria shanadudareh shakri wosik um amamin baraeen. Aria shagraeh Stiven. Anudok Stiven douk narao Iruhin ananin Mishin nyapenyam wosik abom aria dodogowin atun abom um bilip. Aria anam douk amudok. Filip, Prokorus, Nikanor, Timon, Parmenas aria Nikolas. Anudok Nikolas douk madae anan Juda uwe. Anan douk nanaki wabur Antiok aria riguk naapeum nagipesher eshesh Juda esheshih aih um shenek lotu um. <sup>6</sup> Douk shagraeham aria sharam um amam aposel. Sharam um amam douk henek betenumam aria howemam wis um hurao Iruhin ananin dodog aria hunek enyudok mour.

<sup>7</sup> Namudok aria Iruhin ananin baraeen nyanak sabaigunum shemneken. Aria sabaishi arpesh abom shape Jerusalem iri douk shagipesher Jisas. Sabaimi pris abom shopunek hakri wosik aria henek bilip um Jisas.

### *Juda Esheshim Debeimi Henekuman Kwot Stiven*

<sup>8</sup> Iruhin douk nenekuman yopinyi abom Stiven aria natauruman meyoh nakon ananin dodog. Namudok aria nenek enenyenen Iruhin atun neneken iri mour nyatogur arpesh shatrin. <sup>9</sup> Aria anam armam hakitak aria hani anan harpak baraeen. Amudok armam apa hani eshesh henek lotu anat eshesh Juda shape sheneyagwreh baraeen-atari urupat shasuhw lotu um Friman iri.\* Amudok armam amam douk anam Juda aria hanaki debeirubi warub Sairini bani Aleksandria. Amam hani amudok anam hanaki agusudok biagos shokugosi nahobigos Silisia aria Esia hakitak hani Stiven harpak baraeen. <sup>10</sup> Iruhin ananin Mishin nyakon debeinyi saki aria neyagwreh obi nyutob, amam douk madae huni anan hunogogonim arag atin um baraeen uwe, uwok.

---

\* **6:9:** Eshudok Juda apa shenek lotu atudok urupat shahwarat um Friman iri, riguk anob nyutob douk shape shukam um kupaishi arpesh shape shenekumesh mour meyoh iri. Aria douk shape fri.

<sup>11</sup> Namudok aria amudok armam hanabeshuk hakripaguk kupaimi um hunek rohw aria hukrip arpesh hukri, “Apak memnek Stiven neyagwreh enyenyen yoweinyi baraen um Moses aria Iruhin.”

<sup>12</sup> Douk henek rohwumesh namudok shani esheshim debeimi hani amudok henek skulumesh um lo iri aria heshuhur juwehosish abom um eshesh Juda. Namudok aria shanak shasuhw Stiven sharan shanak um agundok debeimi um eshesh Juda esheshit debeiti kwot iri hapeum. <sup>13</sup> Aria sharauri anam armam um hunek rohw hukripaen enen rohwinyi baraen. Sharam hanaki aria hakri, “Ihih nyumneh anudok arman apa neyagwreh enyenyen yoweinyi baraen um Iruhin ananit debeiti yoputi abom urupat tani ananin lo. <sup>14</sup> Apak douk shopunek memnekan nakri anudok Jisas nanaki wabur Nasaret iri ta nubrig atudok Iruhin ananit debeiti urupat aria ta nunek kupaihi aih um ehudok aih seiwok Moses nakoguk apakish popehesh yamehesh iri um.”

<sup>15</sup> Aria ihm-morim amudok hape iri debeimi, amamis nabes douk satak sape Stiven. Hatrun aria hatik um ananig yamag douk gatogur kabi enen ensel enyenyg yamag abom um.

## 7

### *Stiven Nakripam Ananin Baraen Debeimi*

<sup>1</sup> Douk henekuman enyudok rohwin baraen um jurug aria debeini pris abom narig Stiven nakri, “Enyudok baraen douk adur nyakriyen aka, uwok?”

<sup>2</sup> Aria Stiven nakripam nakri, “Eikim ashukenyim owarhim aria yak-enyim, ipak pumnek eik. Seiwok anudok dodogowin atun abom aria natrugun um iri Iruhin douk natogurum apakin yamenen Abraham. Natogruman obi nyutob, abrudok wabur Haran douk watak nunak nupe uwe, uwok. Watak nape agudok nahobig Mesopotemia. <sup>3</sup> Natogruman aria nakripaen nakri, ‘Nyukutukuk nyakip awirop puni nyakib amnab aria nyunak nyupe anab amnab douk ta iyabigenyab iri.’

<sup>4</sup> Namudok aria Abraham nakutukuk eshesh Kaldia esheshib amnab nanak nape abrudok wabur Haran. Nanak nape agundok arigaha douk ananin yaken nagok aria Iruhin neshopokan nanakumori abudok amnab douk ipak papenyab iri. <sup>5</sup> Iruhin madae nukon anab amnab um ananib abom uwe, uwok. Uwok madae nukon anagun mudukigun uwe, uwok meyoh. Aria nakripaen enen adurin atinyi baraen um kweipon ta nukonab aria ananib abom. Anan nini ananish batowish aria barheshish douk shugimori anan iri. Aria abudok nyutob Iruhin nakripaen enyudok baraen obi nyutob, Abraham anan batowish douk madae enesh uwe, uwok. <sup>6</sup> Iruhin nakripaen namudok. Nakri, ‘Nyakish barheshish ta shunak shupe kupaishi arpesh esheshig nahobig. Aria agudok nahobigish arpesh ta dodegeshishumesh shupe shunekumesh mour meyoh. Ta shupe shunekesh enyenyen um 400-poreish kwarahos. <sup>7</sup> Aria eik ta iyesh inekumesh baraen eshudok douk nyakish barheshish shupe shunekumesh mour meyoh iri.’ Aria Iruhin nakripaen. ‘Ta iyesh inemeshuk baraen abudok amnabishi aria eikish arpesh ta wata shukutukuk babudok amnab shutanamori um abudok. Shunaki aria ta shupe shunek lotume agundok.’

<sup>8</sup> Aria Iruhin nakripaen Abraham enen adurin atinyi baraen kontrak abom um anan ta nutah nugamimiruh yegeshiweruh. Namudok aria abudok nyutob Abraham ananik irohukwik kwabuki Aisak aria watak 8-poreih nyumneh meyoh hudiyan aria Abraham natah ananih yegeniyihw. Arigaha Aisak nabuki Jekop aria natah ananih yegeniyihw. Aria Jekop

nabuki amudok apakim 12-poreim yamehem aria shopunek nenekehsumam namudok atin.

<sup>9</sup> Aria amudok yamehem henek nyigiyau amamin wanin Josep hako kupaishi shatorun shakomaguk utabor aria sharan um agudok nahobig Isip. Sharan um nunak nupe nunekumesh mour meyoh. Aria Iruhin douk nani anan hape. <sup>10</sup> Namudok aria natauruman um enenyen nyatogruman iri amaen aria nape wosik. Aria abudok nyutob nanak natogurum anudok debeini um Isip iri king Fero aria nani anan heyagwreh obi nyutob, Iruhin douk nakon yopuni saki anan Josep. Namudok aria nenecking Fero ananim urkum manawashaman abom. Aria nenekan nape debeini abom um agudok nahobig Isip. Aria shopunek nenekan nasuhw merik um eneshenesh shakus anan Fero ananit urupat iri.

<sup>11</sup> Arigaha anob nyutob aria yoweih nyumnah hatogram ihirub warub agudok nahobig Isip aria Kenañ sharao debeinyi amaen abom. Namudok aria apakish yamehes worigun uwok um shishoh iri. <sup>12</sup> Douk arigaha Jekop nemnek um shakri shape shator worigun Isip aria sagomatin nakrip ananim nugamim douk apak mahwaram um yamehem iri hanak um Isip. <sup>13</sup> Hatorish hanaki aria hagiguk iri hakri hunak aria amamin wanin Josep nawerehen nakripam um anan kanak. Namudok aria anudok debeini arman Fero nadukem Josep ananip awirop.

<sup>14</sup> Enyudok nyanakuk, aria Josep nenekuman bareaen ananin yaken Jekop um nini ananip awirop ihishmorim shunakumori Isip. Shadarehesh um douk shanak shatogur 75-poreish arpesh. <sup>15</sup> Aria Jekop nanak um Isip. Nabuh nape agundok aria nagok. Nani ananim nugamim douk apak mahwaram um yamehem iri. <sup>16</sup> Hagok aria amamiruh yegeshiweruh douk shararuh shanak um abrudok wabur nyeigur-ibur um Sekem. Shanak aria sharumam onohw wonugwehw seiwok Abraham natik Hamor ananim nugamim natoruhw anabor utabor iri.

<sup>17</sup> Arigaha aria abudok nyutob seiwok Iruhin nakripanuk enen adurin atinyi bareaen promis Abraham um nukweshih ananish yameheshe shape Isip iri shunak shupe fri um douk hurukatin um butogur. Aria abudok nyutob eshesh Israel douk shatogur sabaishi abom gani Isip. <sup>18</sup> Douk arigaha anob nyutob aria kupaini arman natogur king nape debeini um Isip. Aria anudok king douk madae nudukem Josep uwe, uwok. <sup>19</sup> Nakitak nagiyagim apakish yameheshe eshesh Israel aria nenekumesh yoweih aih abom. Aria nenekeh shawashakuk esheshish weshubuk iri batowish um shugok.

<sup>20</sup> Aria abudok nyutob shobuki Moses. Anan douk anan yopuni nunganin aria Iruhin ananim urkum manawashaman. Kwanabuki aria amakeniyish shasuhwan shabirakan bibatun aub meyoh ananit urupat. <sup>21</sup> Douk bibatun aub batuh aria shanak shanyukwronuk aduk. Aria anudok king Fero ananik nugawik kwanak kwoparugan. Kwoparugan kwonahur kwanak kwabirakan aria natogur kabi okwokwin nunganin abom um. <sup>22</sup> Douk yopun aria heyabigan um ihinyumorim eshesh Isip esheshin debeinyi saki. Aria neyagwreh um douk apa dodogeshin atun neyagwreh dodogowinyi bareaen. Mour shopunek dodogowin atun um neneck sabainyi debeinyi mour.

<sup>23</sup> Douk arigaha ananish kwarahos shanak shatogur 40-poreish aria anan urkum morum nakri nunak nutik ananish ashakeniyish owashish eshesh Israel. <sup>24</sup> Nanak aria natik anan arman um eshesh Isip nabo anan Israel nenekan yowiyokuk. Aria Moses nanak natauruman anudok Israel aria nabo anudok Isip abom ba nagok. <sup>25</sup> Moses douk neneck urkum nakri ananishi arpesh eshesh Israel douk ta shudukemesh um Iruhin douk nakri nukwu

anan Moses um nuraesh nutaurumesh shupe wosik, aria uwok. Madae shudukemesh uwe. <sup>26</sup> Douk ruwahepih aria Moses wata natik biom Israel harpok. Natik namudok aria nakri nusuhwesham um hupe atugun. Aria nakripam nakri, 'Yaipo! Ipak douk saniwan. Namudok parpok panareim yogap um maresh?'

<sup>27</sup> Aria anudok douk nabo anudok anan nenekan enenyen iri neshiwokuk Moses. Aria narigan nakri, 'Omi nyenekenyum nyupe debeini um apak? Shopunek douk omi nyenekenyum nyupe jas aria nyusuhw apakin barea?' <sup>28</sup> Nyak atin nyakri nyubo eik kabi nubatik nyabo anudok arman eshesh um Isip nagok um aka?' <sup>29</sup> Douk Moses nemnek enyudok bareaen aria nakutukuk Isip naruwok nanak um eshesh Midian eshesib amnab. Nanak nepe agundok nurao irohukwik aria nabuki biom nugamim.

<sup>30</sup> Nape agundok arigaha 40-poreish kwarahos shanak shadiguk, aria anah nyummah enen Iruhin ananin ensel nyatogruman. Nyatogruman anagun wehigunum arpesh uwok um, hurukatin um yoduhw nyeigurihwum Sainai. Natrin nyor nyih douk hanu hakih nyeiguhwishum enen shokwinyi rowog. <sup>31</sup> Moses natik enyudok aria nape nere urkum ba nakitak yowiyokuk. Douk gamo nanak hurukatin um nakri gamo nutik ehudok nyih aria nemnek Debeini nakri, <sup>32</sup> 'Eik douk nyakim yamehem Abraham nani Aisak aria Jekop amamin Iruhin.' Douk Moses nemnek namudok aria shayaruban. Aria nanogugur aria madae nukri um nutrugun uwe.

<sup>33</sup> Aria Debeini wata nakripam nakri, 'Warouguk su bukouguk. Um maresh? Agundok nyeyatu um douk shuknigun abom um eik.' <sup>34</sup> Aria nakripam nakri, 'Eik yatrin enenyen yoweirinyi amaen douk eshesh Isip sheneken um eikish arpesh shape Isip iri. Eik yemnek um agundok shore shahware um, aria douk enyudok yabuhmori ikweshihesh um shupe wosik atin. Namudok aria douk kitak aria ta ishopoken nyutanam nyunak um Isip.'

<sup>35</sup> Sagomatin, eshesh Israel douk shanumogan Moses aria sharigan shakri, 'Omi nyenekenyum nyupe apakin debeini aria nyupe kabi jas nyusuhw apakit kwot?' Aria douk anudok arman Moses Iruhin neshopokan nanak um Isip natogur esheshin debeini aria nutaurumesh nakweshihesh naraesh shape wosik. Iruhin neshopok enyudok ensel douk nyatogruman um enyudok shokwinyi rowog iri aria nyataturuman ddogowin um nunek enyudok mour. <sup>36</sup> Moses narikumesh aria naraesh shakutukuk Isip shanak. Shanak obi nyutob, anan douk neneb enenyen Iruhin atun neneken iri mour shatrin. Neneken Isip, neneken agwudok youg shahwarog um Owishibor-igwi Youg iri gwagweru. Neneken agundok wehigunum arpesh uwok um. Nape neneb enyudok um 40-poreish kwarahos. <sup>37</sup> Aria douk anudok Moses douk nakrip eshesh Israel abom nakri, 'Iruhin ta nugaeh anan ipak kanak aria nunekan nutogur anan profet kabi eik um.'

<sup>38</sup> Arigaha aria apakish yamehesh shanak shantorum shape agundok wehigunum arpesh uwok um. Shape agundok aria douk anudok Moses nani eshesh shape abom. Anan nanak nato ahwudok yoduhw Sainai aria enen ensel nyakripam Iruhin ananin bareaen um nunaki nukrip apak. Enyudok nyakripa-nyi bareaen douk ta nyunek arpesh shupe wosik abom ihih nyumneh.

<sup>39</sup> Aria apakish yamehesh shakri uwok um shumnek Moses ananin bareaen. Shenek dehik shanumogan aria esheship urkwip porum shakri shutanam um Isip. <sup>40</sup> Namudok aria shakitak shakrip Eron shakri, 'Nekumep anam godomi um ta hurikumap huyabigap yah iri. Anudok

Moses douk narikumap iri makutukuk Isip manaki iri douk madae mudukeman uwe. Nanak aria maresh shenekan.'

<sup>41</sup> Aria abudok nyutob shenek enen nugaen bulmakau aria shahwaren esheshin god. Shenenken aria shenek ofa sheken eshudok enyudok madae adurini uwe god. Aria shanadudareh um enyudok eshesh shakwu esheshis wis shenekan iri. <sup>42</sup> Douk Iruhin natik namudok aria nekeshuk agab. Nakutishukuk um shunek lotu um unib o nyumnahin nani wabin aub douk shape iruhw iri. Kabi douk enen baraen seiwok anam profet henyemaguk Iruhin ananik Buk iri nyakrium. Baraen nyakri, 'Ipak Israel! Ipak douk papenyesh 40-poreish kwarahos agundok wehigunum douk arpesh uwok um.

Pape aria mahish douk paesh patahesh iri, douk madae punek ofamesh puko eik uwe, uwok.

<sup>43</sup> Atudok patasah iri selit lotuit urupat douk madae pusah eikit uwe, uwok. Atudok douk pasah anudok rohwin god shahwaran um Molek iri ananit. Pasah selit lotuit urupat tani anudok rohwin god shahwaran um Refan iri ananik penegok iri unuk.

Pasah eshudok douk penekesh shadukem rohwim god omi iri um punek lotumam.

Douk namudok aria eik ta ishopokep punak rougun pupe pugimori debeiburi wabur Babilon.'

<sup>44</sup> "Apakuk yamehesh watak shape agundok wehigunum arpesh uwok um obi nyutob, atudok selit lotuit urupat douk sharokat um shutrut shukri Iruhin nani eshesh napeum douk shogremat tatao. Sharokat shagipesh anar aborir douk ensel nyeyabig Moses natrur iri. Aria Iruhin nakripan um shurukat shugipesh arudok aborir. <sup>45</sup> Arigha apakish yamehesh shagokuk aria esheshish batowish shagremat. Arigha Josua nakitak aria narao ihishmorim Israel shosah atudok selit lotuit urupat shanak. Iruhin nahiayuk kupaibi amnabishi arpesh narik aria eshesh Israel shanarae esheshib amnab shagiguk. Aria atudok urupat douk shanaki sharokat tatao agundok apakib amnab arigha king Devit ananib nyutob. <sup>46</sup> Iruhin natik Devit aria napeum nenekuman yopinyi atin. Namudok aria Devit nenek beten narig Iruhin um nukripan wosik aria Devit ta nurokuman anat urupat. Nurukat um anudok atun Iruhin douk seiwok Jekop nenek lotuman iri. <sup>47</sup> Aria Devit uwok aria ananin nungan Solomon narokuman atudok urupat.

<sup>48</sup> Aria anudok dodogowin abom atun iri Iruhin, arpesh sharokog iri urusag douk madae nupenyog atin uwe, uwok. Kabi douk seiwok anan profet nakri um. Baraen enyudok. Debeini nakri,

<sup>49</sup> 'Iruhw heven, agundok douk eikin kingin wagitur eik yetem um, aria agundok atap douk yeshapak eikiruh yeriweruh hetem um.

Ta purokume tape mumam iri urupat?

Eik douk ta inak ipeum irao uhwin agnum? UWOK.

<sup>50</sup> Ihishmorim eshudok eneshenesh douk eik kanak yenekesh.' "

<sup>51</sup> Aria Stiven gamo naham nakri, "Ipak douk pukenyuk agabus baraen atin iri! Ipak padukem eshesh haiden abom. Baragos aria arigos sheshuk abom aria madae pukri um pumnek Iruhin ananin baraen uwe. Pakri uwok um pumnek Iruhin ananin Mishin enyenyenin baraen. Ipak padukem ipakish yamehesh abom. <sup>52</sup> Wata kripe! Meini profet douk ipakish yamehesh shape shatrun meyoh madae shon shunekan enyenyenin iri uwe? Adur madae anan uwe. Amudok douk hakripesch um Anudok Nenek Yopihi Athi Aih Iri ta nunakumori iri douk sham hagok. Aria anan douk natogur

jurug aria ipak poneyabigam um anan aria pasuwan panak pan nagok.  
<sup>53</sup> Iruhin ananin lo douk nyakripi eshesh ensel shanaki shekepen. Ipak paraen aria madae abom uwe, uwok.”

### *Debeimi Habo Stiven Nagok*

<sup>54</sup> Douk amudok debeimi hemnek enyudok Stiven ananin bareaen aria juwehosim abom hawok naruh hawegaruh aria hatrun. <sup>55</sup> Aria Stiven douk shuknin abom um Iruhin ananin Mishin iri, aria napuhur natrugun duk iruhw heven. Natrugun aria natik um agundok Iruhin napeum douk yopugun abom natrugun abom nape anabik um sik. Aria natik Jisas neyotu agundok Iruhin ananin yopunyi rogur ehahum. <sup>56</sup> Natik namudok aria nakri, “Yaipo mnek! Eik yatik iruhw heven nanupok aria yatigu Anudok Arman natogur adurinyi arpen iri neyotu agundok Iruhin ananin yopunyi rogur ehahum.”

<sup>57</sup> Douk hemnek namudok aria hahwar debeg abom aria hogah amamigos arigos. Aria aragarag hikitak arigas hanak hamutegan. <sup>58</sup> Douk hasuwen haran hatogur aduk abrudok wabur aria hape hakwuman utabor. Aria amudok douk henek rohw henekuman rohwin bareaen iri douk hawaruk amamih rouhi rupeh hehuruk aduk iri aria hehubukuk um anan weroroini arman shahwaran um Sol iri.

<sup>59</sup> Abudok nyutob amam wata hape hakwuman utabor Stiven obi nyutob, anan douk nene beten nakri, “Debeini Jisas, nyak nyurao eikin mishin!”

<sup>60</sup> Aria nabuh noduk ohrubus natao atap aria nahwaroguk debeihi mah nakri, “Debeini, nyak mare nyusuhwesh nyupe um eshudok henekeshume iri yoweishi inahos uwe, uwok. Nyukwreyeshuk.” Douk nahwaroguk namudok aria nagok.

## 8

<sup>1</sup> Aria Sol douk nakri wosik um agundok habo Stiven nagok um.

### *Sol Nape Neneke Nenyen Enyenen Eshesh Iruhin Ananish Arpesh*

Ahudok atuh nyumnah habo Stiven nagok ahi, amam debeimi hape henekesh enenyen ihishmorim Iruhin ananish arpesh shape Jerusalem iri. Aria ihishmorim sharuwok shanak ihirub warub um agusudok biagos shokugosi nahobigos Judia iri Samaria. Shanak aria ihm-morim amam aposel atum hapeik Jerusalem. <sup>2</sup> Aria anam armam douk hagipesh Iruhin ananah aih wosik abom iri hanak harom Stiven aria herepan hariguk abom.

<sup>3</sup> Aria Sol nape neneke nenyen ihishmorim Iruhin ananish arpesh nakri nesh aria nakwiraeh um nununish. Nanak um ihig urusag nasuhw armam armago aria naraesh nanak naweshikesh shape shunuweshik-ati urupat.

### *Filip Nakripesh Debeini Ananin Baraen Gani Shokugi Nahobig Samaria*

<sup>4</sup> Eshesh Iruhin ananish arpesh sharuwok shanak sabairubi warub sisigirub atin, aria agundok shanak shapeum douk shape aria shakripesh Iruhin ananin bareaen. <sup>5</sup> Aria Filip nanak um anabur debeiburi wabur agudok shokugi nahobig Samaria aria nape nakripesh Krais ananin yopunyi bareaen agundok. Nakri Jisas douk anudok arman Krais douk Iruhin nagrahan aria neshopokan nanakumori nurao arpesh iri. <sup>6</sup> Sabaishi arpesh abom shemnek ananin bareaen aria shatik enyudok Iruhin atun neneken iri mour douk anan Filip neneken nyatogur iri. Namudok aria gamo shabuk arigos huruk um bareaen neyagwrehan iri. <sup>7</sup> Nagapesh sabaishi arpesh douk yoweishi sagabehos shapenyesh iri. Nagapeshesh

aria eshudok yoweishi sagabehos shahwar debeg atin abom aria shakutuk eshudok arpesh. Shopunek nagapesh sabaishi douk roguhw aiyas shagokesh madae' shurahaen iri uwe shani eshudok douk aiyas yowegas shurahaen yowiyokuk iri aria ihishmorim yopish atish iri.<sup>8</sup> Namudok aria abrudok waburish arpesh douk shanadudareh shariguk abom.

<sup>9</sup> Aria abrudok debeiburi wabur, anan arman shahwaran um Saimon iri douk nape. Roubi nyutob nape nenek ouruh hani sabagwiruh eshesh Samaria shatrin aria shakitak yowiyokuk. Aria nanagunukuk nakripesch nakri anan douk debeini arman abom. <sup>10</sup> Aria ihishmorim nyeiguhw shatoweshi arpesh shani nyeiguhw-wokeshi douk dodogowish atish um shumnek ananin baraaen. Aria shakri namudok, shakri, "Enyudok Iruhin ananin dодог шахваренум додоговини додог абомирі douk nyape anudok arman." <sup>11</sup> Roubi nyutob nape nenek ouruh hani sabagwiruh shatrish aria shakitak yowiyokuk abom. Namudok aria eshesh douk dodogowish atish um shumnek ananin baraaen. <sup>12</sup> Aria Filip nanak nakripesch yopinyi baraaen um agundok arpesh shuwish um agundok Iruhin nape debeini um ananish arpesh um. Aria shopunek douk nakripesch baraaen um enyudok nyeigur Jisas Krais. Aria abudok nyutob eshesh shenek bilip um Jisas aria armam hani armago shopunek shenek baptais. <sup>13</sup> Aria Saimon douk shopunek nenek bilip um Jisas aria nenek baptais. Douk shanakrup jurug aria Filip nanak meiguni um, anan shopunek neiran. Filip nenek enyeneneh Iruhin atun nenenken iri mour Saimon natrin aria naktak yowiyokuk abom.

<sup>14</sup> Amam aposel hape Jerusalem iri douk hape aria hemnek um eshesh Samaria douk sharao Iruhin ananin baraaen aria shenek bilip. Namudok aria heshopok Pita nani Jon hanakum hutaurumesh. <sup>15</sup> Douk hanak habuh aria henek beten um eshudok shenek bilip iri um shurao Iruhin ananin Mishin. <sup>16</sup> Um maresh? Iruhin ananin Mishin douk watak nyubihi nyuwish enesh uwe, uwok. Watak apa shenek baptais abar atubar um agundok shenek bilip shakri shugipesh Debeini Jisas ananin nyeigur um. <sup>17</sup> Namudok aria Pita nani Jon howemesh wis aria douk sharao Iruhin ananin Mishin.

<sup>18</sup> Saimon natik um amam aposel howemesh wis eshudok arpesh sharao Iruhin ananin Mishin aria narawi anabor utabor nanaki um nukomabor. <sup>19</sup> Aria nakripam nakri, "Yaipo, ipak puko eik enyudok dодог shopunek. Puke um eshudok eik iwemesh eikis wis iri, eshesh douk shopunek shurao Iruhin ananin Mishin."

<sup>20</sup> Aria Pita nakripam nakri, "Nyak nyakri ta nyutor enyudok presen douk Iruhin apa nakopen meyoh iri um aka? Eik yakri nyak nyuni nyakibor utabor punak um yoweiburi wabur aria nyih hunin!" <sup>21</sup> Nyak mare nyunaki nyuni apak mupe um nyukri nyutaurum-apum enyudok Iruhin ananin mour, uwok. Um maresh? Iruhin natrinyum, nyor yoweimi urkum abom aria goutukim atum. <sup>22</sup> Namudok aria nyak ta nyukomuk agab amudok nyakim yowemi urkum aria nyutanam nyukon apahw Iruhin. Aria ta nyunek beten nyorik Debeini um nutaurumen. Namudok aria anan wosik ta mare nusuhwesh nupe um eshudok yoweishi inahos nyak urkum morumesh iri nupe, uwok. Ta nukwreyeshuk. <sup>23</sup> Um maresh? Eik yatrin aria yadukemesh um nyak nyenek nyigiya aria oub baktak abom um nyakri nyurao enyudok presen douk Iruhin nakopen meyoh iri um. Aria eneshenesh yoweishi douk showeshiken dodog abom." <sup>24</sup> Saimon nemnek namudok aria nabeimam baraaen nakri, "Ipak punek beten porik Debeini um nutaurume, aria enyudok ipak pakriyen iri ta mare enen nyutogrume uwe, uwok."

**25** Aria Pita nani Jon hape agundok hape hakripesh Debeini ananin bareaen. Aria shopunek hakripesh um enenyenen anan nenekeyumam iri. Douk hakripesh um jurug aria hatanam hanak um Jerusalem. Hatanam hape hanak aria hakripeshuk Iruhin ananin bareaen sabairubi warub bape agudok shokugi nahobig Samaria iri.

### *Filip Nakripan Iruhin Ananin Bareaen Anan Debeini Arman Um Eshesh Itiopia*

**26** Enen Debeini ananin ensel nyanaki nyakrip Filip nyakri, "Nyukitak nyunak saut aria nyunak nyutogur ahudok yah douk hikitak Jerusalem hanakukum wabur Gasa iri. Ahudok yah douk hawish hanak agundok wehigunum arpesh uwok um." **27** Douk nemnek namudok aria nakitak nanak. Nanak natogur yah aria naparug anan arman um eshesh Itiopia nubo sheyakuman outoguh iri douk nasuhw merik iri. Anudok arman douk nasuhw enen debeineyi mour um gavman um agudok nahobig Itiopia. Onok armatok shahwarok um Kandesir iri douk kwape debeikwi armatok kwin um gavman. Aria anudok arman douk kwonegan nape debeini um neyoh ihibormorim gavmanibor utabor. Anudok arman douk nanakumori Jerusalem um nunek lotu um Iruhin **28** aria douk natanamori um nunak wabur. Netem ananin wilkar nyape nyanyak aria nape natik enen bareaen nyetem Iruhin ananik Buk seiwok profet Aisaia menyemaguk iri. **29** Aria Iruhin ananin Mishin nyakrip Filip nyakri, "Nyak nyunak hurukatin um nyanyi wilkar enyen nyape nyunak aria nyak nyunak nyuni enyen punak hurukatin." **30** Namudok aria Filip nasahur nanak hurukatin. Nanak aria nemnek anudok netem wilkar iri nape natarih enen bareaen seiwok profet Aisaia menyemaguk iri. Nemnek aria narigan nakri, "Nyak wosik nyadukem baugeniyum enyudok nyape nyatarihen iri bareaen o uwok?" **31** Aria debeini nebeiman-ari bareaen Filip nakri, "Ta idukemesh mumam baugeniyum enyudok bareaen. Enesh shiyabige akure, wosik ta iduke-men." Aria nakrip Filip nato iruhw wilkar nakih nani anan hape atugun. **32** Agundok anudok arman nape natarihen um Iruhin ananin bareaen douk nyakri namudok. Nyakri,

"Anan mukareg kabi enen sipsip douk sharaen shanak um shen nyugok shutahen iri.

Nadukem enen nugaen sipsip abom douk abudok nyutob sharupok enyenyirub ehirub obi nyutob ta nyeyotu mokureg um. Namudok atin madae karowih nyukri enen bareaen uwe, uwok.

**33** Shenekan abranyin atun abom shanabukuk atap aria madae shunekuman yopunyi adurin bareaen uwe.

Anan batowish aria barheshish uwok, um kupaishi shupe shukripesh um anan um.

Um maresh? Eshesh shan nagok aria madae nupe agundok atap uwe, uwok."

**34** Natarih enyudok bareaen neyaten aria narig Filip nakri, "Nyak kripe. Anudok profet douk nawemaguk bareaen nyakrium omi? Nakri um anan kanak o nakri um kupaini?" **35** Aria Filip nape nakripan um nudukem enyudok bareaen iganigadae nape natarihen iri. Nakripan neyaten aria nakripan kupainyi um Jisas ananin yopunyi bareaen shopunek.

**36** Douk hape heyagwreh hanak aria hanak hatogur anabik abar borum. Aria anudok debeineyi arman nakrip Filip nakri, "Tik, abar abrudok bor agundok. Ikri inek baptais akure, ta mare enen arpen nyunaki nyukripe um uwok?" **37** [Namudok aria Filip nakripan nakri, "Ta nyakigun numun abom nyukri adur nyunek bilip um Jisas um, aria nyak wosik ta nyunek baptais."]

Aria nakri, "Adur, yenek bilip abom yakri adur abom um Jisas Krais anan douk Iruhin ananin nunganin."] <sup>38</sup> Namudok aria anudok debeini nakri aria wilkar nyeyotu. Nyeyotu douk hakitak habuh atap aria hanak habuh abar. Habuh aria Filip neneck baptaisuman. <sup>39</sup> Douk hakutukuk abar hatoumori anagis aria ahudok atuh Debeini ananin Mishin nyarauguk Filip aria anudok debeini madae nutrun uwe. Natik namudok aria wata shopunek nape nanak aria nanadudareh abom. <sup>40</sup> Aria Filip wata natik um anan douk wata neyotu anabur wabur nyeiguribur um Asdot. Aria nawish ihirubmorim warub nakripesh Iruhin ananin baraen nanak arigaha nanak natogur Sisaria.

## 9

### *Sol Nekeshuguk Agab Yoweishi Inahos Aria Nenek Bilip Um Jisas*

<sup>1</sup> Aria abudok nyutob Sol wata apa dodogowin atun um nakri nubo Debeini ananish arpesh shugok. Namudok aria nanak um anudok debeini pris abom <sup>2</sup> aria narigan um neneckuman sabaisi shus um amam debeimi um eshesh Juda shape sheneyagwreh baraeen-ogwi urusag gani Damaskus aria nakonas nasuwos nanak. Baraen nyetem asudok shus iri douk nyakri wosik um Sol nuwish Damaskus aria nukri nuparug enesh armam o armago douk shagipesh ahudok yah Jisas ananah shupe agundok um, anan wosik nusuhwesh nuweshikesh aria wata nuraesh um Jerusalem.

<sup>3</sup> Douk neneckuman shus nakonas nasuwos aria nanak. Nanak arigaha nanak natogur hurukatin um Damaskus aria ahudok atuh anat lait tabuhi gani iruhw heven aria agundok anan nape nanak um natrugun abom. <sup>4</sup> Namudok aria nabuh natu nakus abom atap. Aria nemnek anah mah aria enyudok arpen nyakri, "Sol! Sol! Nyak nyape nyenek enenyenen namudok aria nyeneke yemnek debeiri eriger um maresh?"

<sup>5</sup> Aria Sol narigan nakri, "Debeini, nyak omi?" Aria enyudok arpen nyakri, "Eik Jisas douk nyak nyape nyenek enenyenen-ume um yemnek debeiri eriger iri. <sup>6</sup> Douk nyukitak nyuwish abrudok wabur Damaskus aria enen arpen ta nyukripenuum enesh eshudok nyak ta nyunekesh iri." <sup>7</sup> Amudok heiran hanak iri baraan wokam aria heyotu. Hemnek mah atin aria arpen madae hutik enen uwe, uwok. <sup>8</sup> Douk nikitak neyotu iruhw nakri nutrugun aria madae nutik enesh eshudok eneshenesh uwe, uwok. Ruhur raweshiguk ananis nabes. Namudok aria hasuhw ananin rogur aria haran hawish Damaskus. <sup>9</sup> Biyeh atih nyumneh madae nutrugun uwe, uwok. Aria abudok nyutob, worigun iri abar madae nishoh uwe, uwok. Nape meyoh.

<sup>10</sup> Aria abrudok wabur Damaskus, anan arman nagipesh Krais iri douk nape. Anan douk shahwaran um Ananaias iri. Anan nape aria kabi nanebek yomnis um aria Debeini nakripesh nakri, "Ananaias!"

<sup>11</sup> Aria Debeini nakripesh nakri, "Nyukitak aria nyunak um ahudok yah shahwarah um Dudurih Yah iri. Nyunak nyutogur aria anan arman shahwaran um Judas iri ananit urupat tataoum, aria nyorigesh um anan arman nyeigurinum Sol. Ananibur wabur Tarsus. Douk nape neneck beten. <sup>12</sup> Neneck beten aria kabi nabo yomnis um aria natik anan arman shahwaran um Ananaias iri nawish urupat. Nawish aria naweman ananis wis um wata shopunek nutrugun."

<sup>13</sup> Aria Ananaias nawanaman baraan nakri, "Debeini, eik douk yemnek sabaishi arpesh shanogugur um anudok arman. Shanogugur um ihihmorim yoweihai anan nenekeh um nyakish arpesh shape Jerusalem iri. <sup>14</sup> Aria douk anudok nanakumori agundok. Nanakumori nusuhw ihishmorim

arpesh shenek lotu o shenek beten um nyakin nyeigur iri aria nuweshikesh. Amam debeimi pris hakripani aria narawi big um nunaki nunek enyudok."

<sup>15</sup> Aria Debeini nakripan nakri, "Nyak kare. Anudok arman douk yagraahan um nunek eikin mour iri. Yagraahan um nunak nukrip arpesh madae shudukem eik iri aria eikin baraen uwe shuni esheshim king-omi aria shuni eshesh Israel um shudukem eikin nyeigur aria eikin baraen.

<sup>16</sup> Aria eik kanak ta iyabigan enenyenen amaen douk ta nyutogruman aria numnek debeiri eriger abom um ta nurar um eik iri."

<sup>17</sup> Douk Ananaias nemnek namudok nanak nawish atudok urupat aria naweman wis Sol. Aria nakripan nakri, "Eikin ashuken Sol, Debeini Jisas douk natogrumen yah abudok nyutob nyape nyanakumori agundok aria neshopoke yanaki. Yanakumori nyak wata nyutrugun aria nyurao ananin Mishin nyuwishen aria nyupenjen wosik abom." <sup>18</sup> Aria ahudok atuh enen enyudok kabi eiguhwih parukekeh iri um hanatuki Sol ananis nabes aria wata shopunek natrugun. Natrugun abom aria nakitak nanak nenen baptais. <sup>19</sup> Douk nenen baptais jurug, nawok anagun worigun aria wata shopunek ddogowin.

### *Sol Nakripesh Iruhin Ananin Yopinyi Baraen Damaskus*

Sol nape eneh nyumneh aburdok wabur Damaskus. Nani eshesh shagipesh Jisas iri shape. <sup>20</sup> Nape aria nanak um urusag douk eshesh Juda shape sheneyagwreh baraen-ogwi aria nakripesh baraen. Nakripesh nakri Jisas anan douk Iruhin ananin nuganin. <sup>21</sup> Aria ihishmorim shemnek ananin baraen iri douk shakitak yowiyokuk. Aria shape sheneyagwreh shakri, "Arman apa nabo eshudok arpesh douk shenek lotu o shenek beten um Jisas ananin nyeigur iri douk anudok. Nenekesh namudok Jerusalem aria anudok nanakumori agundok um nuweshik agundokishi aria wata nuraesh um amam debeimi pris."

<sup>22</sup> Aria Sol nape natogur ddogowin atun abom neshagrakuk agundok narik nape nakripesh baraen um Jisas um. Aria eshesh Juda shape Damaskus iri douk shemnek ananin baraen aria shakitak yowiyokuk. Aria madae shukri um shuananam enen baraen uwe, uwok. Nakripesh wosik abom um Jisas anan douk Krais, anudok arman douk Iruhin nagraahan neshopokan nanakumori nurao arpesh iri.

<sup>23</sup> Douk sabaihi nyumneh hanak hadiguk aria amam Juda hanak hantorum hape habo baraen um hubo Sol nugok. <sup>24</sup> Aria enesh shakripan enyudok amam hakri huneken-uman iri. Nyumnah wab amam hape hatrugun-uman abrudok debeiburi wabur Damaskusig witog um hakri hutrun nukri um nunak nutogur aria hon nugok. <sup>25</sup> Aria anab wab aria enesh shagipesh anan iri arpesh sharan shatoum aburdok debeiburi utaboribur nabur douk sharokabur shersharih abrudok wabur iri. Shakih iruhw shadoron madururuuh enen kubin nabuh nape aria shasuhw madururuuh shape aria skakutun nabuhuk adukehah-ibur um abrudok wabur.

### *Sol Natanam Nanam Jerusalem*

<sup>26</sup> Douk shakutuni aduk aria nanak um Jerusalem. Nanak aria nakri nini eshesh shagipesh Jisas iri shupe atugun. Aria eshesh shanoguguran aria shakri anan douk madae nugipesh Jisas uwe, uwok. <sup>27</sup> Aria Baranabas nanaki naraeo Sol um amam aposel. Naran aria nakripesh um agundok Sol natik Debeini yah aria Debeini nakripan baraen um. Aria gamo nakripesh um agundok anan Sol ddogowin atun nakripesh baraen um Jisas gani Damaskus um. <sup>28</sup> Namudok aria Sol nani eshesh shape. Shape aria nape narahaen nanak abrudok debeiburi wabur Jerusalem aria ddogowin

atun nepe nakripesh yopinyi baraen um Debeini ananin nyeigur. <sup>29</sup> Aria nani enesh Juda douk apa sheneyagwreh enyudok baraen Grik iri eshesh shape sheneyagwreh bâraen aria shanogogonim-umen. Namudok aria shape shaurim anah yah um shon nugok. <sup>30</sup> Douk amam hagipesh Jisas iri hemnek namudok aria haran habuhuk um Sisaria. Habuh agundok aria heshopokan nanak um Tarsus. <sup>31</sup> Namudok aria ihirubmorim warub agusudok biyogos atin shokugosi nahobigos, Judia, Galili aria Samaria, ihishmorim Jisas ananish arpesh douk shape wosik aria aparuh hor wosik. Shatogur dôdogowish aria shagipesh Debeini ananin bâraen abom aria wosik shape shakamum anan. Iruhin ananin Mishin nyenekesh shatogur dôdogowish abom aria sabaishi arpesh shawishmori Jisas ananish arpesh.

### *Pita Nagapesh Ainias Yopun*

<sup>32</sup> Pita narahaen nanak sabairubi warub aria anah nyumnah nanak um anabur wabur nyeiguribum Lida. Nanak natik Iruhin ananish arpesh aria nani eshesh shape agundok. <sup>33</sup> Nape abrudok wabur aria natik anan arman shahwaran um Ainias iri. Ananihw yegeniyihw aria bishighu douk shagok abom aria neshuh aras atus um 8-poreish kwarahos. <sup>34</sup> Pita natrun namudok aria nakripan nakri, “Ainias, douk Jisas Krais nagapeshen aria yopin. Arigah kakitak nyogapesh nyakis aras.” Pita nakripan namudok aria ahudok atuh Ainias nakitak. <sup>35</sup> Aria ihishmorim arpesh douk shape arbudok warub Lida bani Saron iri shatik anudok arman Ainias aria shekeshuk agabus yoweishi inahos. Aria shatanam shakon aparuh Debeini.

### *Tabita Kwagok Aria Pita Wata Nokuhur Kwakitak Kwape*

<sup>36</sup> Abrudok wabur Jopa, onok armatok shahwarok um Tabita iri kwape. Okwok douk kwagipesh Jisas iri. Eshesh Grik eshesin baraen shakri shuananem enyudok nyeigur Tabita um douk shahwarok Dorkas. Ihih nyumneh okwok kwape um kweneuk yopihu atih aih aria kwekesh eshudok eneshenesh um yaruhih arpesh iri. <sup>37</sup> Aria abudok nyutob arugeh hapeyok aria kwagok. Kwagok aria okwokwihih yegeniyihw douk shakwrupohw aria shahwubuk wakus anam iruhwim rum. <sup>38</sup> Abrudok wabur Lida douk bape hurukatin um Jopa. Aria eshesh shagipesh Debeini aria shape Jopa iri douk shemnek um agundok Pita nanaki nepe Lida um. Namudok aria sheshopok biom armam um hunak hurani. Hanak aria hakripan dodog hakri, “Nya, yowi nyuni ohwak munak arigas!”

<sup>39</sup> Douk Pita nemnek namudok aria neiram hanak. Hanak hatogur aria sharan shato um amudok iruhwim rum. Nakih iruhw aria ihiyumorim armago douk amam hagok howosopukuk iri wanaki weyotu weyor warih Pita aria wape woreh. Woreh aria weyabigan eneh rupeh shehuruk aduk iri rupeh hani ehudok eneh douk Dorkas watak kwani owo kwape aria kwokwosheh iri. <sup>40</sup> Aria Pita neshopok ihishmorim shatograkuk aduk. Shatograkuk aria nabuh noduk ohrubus natao nenek beten um Iruhin. Neneck beten um jurug, natanamum okwok aria nakri, “Tabita, arigah kakitak!” Aria kwaterugun abom. Douk kwaterugun kwatik Pita aria kwakitak kwape abom. <sup>41</sup> Kwakitak kwape aria nasuhw okwokwin rogur nakuhur kwaikitak kweyotu iruhw. Aria wata nahwar oudok armago douk amam hagok howosopuk iri wani Iruhin ananish arpesh shawish numun. Shawish neyabigesok aria shatruk um yopuk. <sup>42</sup> Namudok aria bâraen nyanak ihigun abrudok wabur Jopa aria shemenek um enyudok Pita neneken iri. Aria sabaishi arpesh shenek bilip um Debeini. <sup>43</sup> Aria Pita nani anan arman shahwaran um Saimon iri hape Jopa sabaihi nyumneh.

Anudok Saimon douk napeum nagapesh mahishis um shunek eneshenesh eshudok um.

## 10

### *Enen Ensel Nyatogram Kornilius Nyakripan Baraen*

<sup>1</sup> Anan arman shahwaran um Kornilius iri nape abrudok wabur Sisaria. Anan douk nape debeini um 100-poreim soldia. Anan nani ananim soldia douk anam um enyudok debeinyi ami shahwaren um eshesh Itali iri esheshin ami. <sup>2</sup> Anan nani ihishmorim shape ananit urupat iri apa shenek lotu um Iruhin shape shukamum anan aria shagipesh ananin baraen wosik abom. Aria anan apa nataurum eshesh yaruhih arpesh aria nekesh sabaishi eneshenesh eshudok. Aria iih nyumneh apa neneb beten um Iruhin. <sup>3</sup> Aria anah nyumnah wabigep hurukatin um 3 kilok anan nape aria natik enesh eshudok kabi nabo yomnis natrish um. Aria natik abom enen Iruhin ananin ensel nyanaki nyawish-uman urupat aria nyakripan nyakir, "Kornilius!"

<sup>4</sup> Kornilius napuhur natrin abom aria nanogugur. Aria nakri, "Debeini, maresh?"

Aria enyudok ensel nyakri, "Iruhin anan urkum morumenyum agundok nyak nyape nyenek beten nyarigan um. Enyudok nyeneken iri yopinyi um nyekesh yaruhih um eshudok eneshenesh iri um douk shopunek natrin aria urkum morumen. <sup>5</sup> Aria douk nyak ta nyishopok anam armam hunak um wabur Jopa aria horaumen iri anan arman shahwaran um Pita iri. Enyudok enen nyeigur shahwaran Saimon. <sup>6</sup> Anan douk kupaini arman amam atish nyeiguuh um Saimon hape. Anudok Saimon anan douk nagapesh mahishis yegenyihwis um shunek eneshenesh eshudok iri. Ananit urupat tatao hurukatin um youg."

<sup>7</sup> Enyudok ensel nyakripanuk namudok Kornilius aria wata nyanakuk. Aria Kornilius nahwar biom armam henekuman mour ananit urupat iri hani anan soldia apa nataurum Kornilius iri hanaki. Anudok soldia apa neneb lotu um Iruhin aria nagipesh anan nakriyehi aih. <sup>8</sup> Douk hanaki nakripam um ihinyumorim enyudok nyatograman iri aria neshopokam hanakum Jopa.

### *Pita Natik Enesh Eshudok Kabi Nanabek Yomnis Natrish Um*

<sup>9</sup> Ruwahepih aria amudok biom atun hape hanak atin arigaha aria hurukatin um hunak hutogur Jopa. Aria abudok nyutob douk nyumnah oruhw aria Pita nakitak nato iruhwitam urupat um nunek beten. <sup>10</sup> Nyirub shopunek ban aria nakri nuwok enesh eshudok. Aria abudok nyutob watak shape shenek worigun obi nyutob, enesh eshudok douk shatogrumana aria natrish kabi nanabek yomnis natrish um. <sup>11</sup> Aria natik um utag ganupok aria natik enen enyudok kabi anah debeihir rupah um. Shasukuk nubatibus apubus sisiguk aria shape shakutuh habuhumori atap. <sup>12</sup> Aria natigu eneshenesh mahish sharari ahudok kabi rupahmori. Natik ihiguuhwmori yuguuhw aria armiguuhw hwani ihishmorim eneshenesh mahish sharari. <sup>13</sup> Natrish aria nemnek anah mah. Aria enyudok arpen nyakri, "Pita, nyukitak nyubo eshudok mahish nyishoh!"

<sup>14</sup> Aria Pita nakri, "Debeini, adur atin uwok! Seiwoh arigaha douk, eik douk madae iwok enesh uwe eshudokmori mahish. Eshudok douk apak Juda mahwaresh shanabosusih iri aria nyakin lo nyakrium mare mishoh iri." <sup>15</sup> Anah shopunek enyudok arpen wata nyakripani nyakri, "Eshudok Iruhin neneb beten yopish iri, nyak mare nyuhwaresh shanabosusih iri, uwok."

**16** Enyudok natrin nyatogur biyeh atih aria ahudok atuh wata shopunek sharaen nyatouk iruhw heven.

**17** Pita natik enyudok aria wata nape nenek urkum um nakri nudukem baugenyum.

Aria abudok atub nyutob, amudok armam douk Kornilius neshopokam hanak iri douk harigesh shakripam um Saimon ananit urupat aria hanaki heyotu wit. **18** Aria hahwar harigesh hakri, “Anudok arman Saimon douk nanahwar kupainyi nyeigur Pita iri douk nanaki nape agundok o uwok?”

**19** Aria abudok nyutob, Pita douk watak nape nabirak um nakri nudukem baugenyum baraen um eshudok iganigadae natrish iri. Aria Iruhin ananin Mishin nyakripan nyakri, “Mnek! Biom atun armam douk hanaki haurimen. **20** Kakitak nyubuh aria nyunamam punak. Mare nyukri nyupe nyunek urkum uwe, uwok. Um maresh? Amam douk eik meyoh yeshopokam hanaki.”

**21** Aria Pita nikitak nabuh atap aria nakripam nakri, “Arman ipak pape pauriman iri douk eik. Aria douk panakumori maresh?”

**22** Aria hakripan hakri, “Kornilius nakripap aria douk manaki. Anan douk nape debeini um 100-poreim soldia aria yopuni arman. Anan apa neneh lotu um Iruhin aria nape shukamum anan. Ihishmorim Juda shopunek shatrun shakri yopuni arman. Aria enen Iruhin ananin ensel nyakripan um nunekumenyi baraen nyak nyunaku ananit urupat. Nyunaku um numnek maren baraen nyak nyiyagwrehan iri.”

**23** Douk hakripanum jurug aria naram hawish numun urupat. Hawish nabiromam worigun aria abudok wab douk hani anan heshuh atudok urupat.

### *Pita Nanak Natogur Kornilius Ananit Urupat*

Ruwahepih aria nanamam hanak. Anam eshesh Jopa douk hagipesh Krais iri shopunek heiran hanak. **24** Pita nani amudok hanak arigaha ruwahepih aria hanak hatogur Sisaria. Hanak hatogur obi nyutob, Kornilius douk nape natrugun-umam. Nani ananip awirop aria enesh ananishi arpesh douk nahwaresh shanaki.

**25** Douk Pita nanak nawish urupat aria Kornilius natrun aria nabuh noduk ohrubus abom agundok Pita neyotu um aria natuk ananin nyeigur nyato iruhw. **26** Aria Pita nonohur nikitak aria nakri, “Kitak! Eik douk arpen meyoh kabi nyak um.”

**27** Pita wata nani Kornilius heyagwreh atin aria nawish numun. Nawish aria natik sabaishi arpesh shantorum shape.

**28** Aria nakripesh nakri, “Ipak kanak padukemesh abom. Apak Juda apakih aih, apak ta mare enen arpen nyunak nyutik enen kupainyi arpen douk enyen madae Juda iri uwe, uwok. Mare nyunak nyuni enyen nyupe o nyunak harokatin-umen, uwok meyoh. Aria eik douk Iruhin neyabige um nakri mare ihwar enen kupainyi arpen nyanabosusih aria yoweyni agundok ananis nabes um, uwok. **29** Namudok aria douk peshopok amudok armam hanameigu aria madae ikri uwok uwe. Yemnek atin aria yanaki. Aria douk yakri iyorigep. Ipak douk penekume baraen um maresh?”

**30** Aria Kornilius nakri, “Nubokuhi, douk biyeh atih nyumneh hanak hadiguk, eik yape eikit urupat yape yenek beten douk abudok atub nyutob 3 kilok. Aria ahudok atuh yatik anan arman neneh hatrugun-abom iri rupah aria neyotu agundok eik yape yenek beten um. **31** Aria nakripe nakri, ‘Kornilius, Iruhin nemnek nyakin beten aria urkum morum enyudok yopinyi mour um nyako yaruhibh iri um.’ **32** Aria nakripe nakri, ‘Arigah nyishopok anam armam hunak um Jopa hurumori anan arman shahwaran

um Pita iri. Kupainyi nyeigur shahwaran Saimon. Anan douk anan arpenyi nanaki nani kupaini Saimon hape. Anudok kupaini Saimon douk nagapesh mahishis yegenyihwis um shunek eneshenesh eshudok um. Anan douk nape hurukatin um youg.’

<sup>33</sup> Douk namudok aria yeshopoku amudok armam hanaku harumenyi. Aria douk nyenek yopihi aih abom um nyanakumori. Douk apak ihishmorim enyudok manaki mape agundok Iruhin nape natrup aria makri mumnek ihinyumorim baraen douk Debeini nakripes ddogowinyi baraen, aria neshopoken nyanakumori nyukripap-enyi.”

### *Pita Nakripes Baraen Kornilius Ananit Urupat*

<sup>34</sup> Pita nemnek aria nape nakripes nakri, “Adur atin, douk eik douk yadukemesh abom. Iruhin anan douk madae nutik enesh arpesh nukri eshes wosik yopishi aria enesh nutrish nuhwaresh yoweishi uwe, uwok.

<sup>35</sup> Aria ihismorim awirosish arpesh, anan apa nanadudareh um eshudok douk shape shakamum anan aria shenek yopihi atih aih iri. <sup>36</sup> Enyudok baraen Iruhin neneken nyanakumori apak Israel iri, ipak douk padukemen. Nakripap yopinyi baraen um Jisas Krais anan douk Debeini abom um ihishmorim arpesh aria anan nenekap mani Iruhin mape atugun aparuh hor wosik. <sup>37</sup> Padukemen enyudok baraen um Jisas douk nyakitaki agudok shokugi nahobig Galili aria nyanak ihirubmorim warub agudok shokugi nahobig Judia iri. Jon neneb baptaisumesh iri nakripes baraen um shunek baptaisum jurug aria enyudok nyutogur. <sup>38</sup> Ipak padukeman anudok Jisas douk nanaki wabur Nasaret iri. Um agundok Iruhin nakon ananin Mishin nyawishan aria nenekan dodogowin abom um Iruhin nani anan hape huruk aria narahaen nanak warub neneb yopinyi mour nagabe ihishmorim arpesh douk Satan nubokadae nanunish abom iri.

<sup>39</sup> Aria apak matik ihinyumorim mour anan neneken nyatogur Jerusalem bani ihirub warub apak Juda apakirub iri aria douk makripeshumen. Yah shan nagok um douk shenek nyiliman enen rowog kruse aria douk nagok.

<sup>40</sup> Aria hakri biyeh atih nyumneh um, Iruhin wata shopunek nonohur nikitak. Nakitaki aria nenekan nanaki yopugunum matrun. <sup>41</sup> Aria anan madae nutogurum ihishmorim arpesh uwe, uwok. Natogurum apak atup, douk riguk Iruhin nanagraehapum mukripes ananin yopinyi baraen iri. Douk nakitaki wonugwehw aria mani anan mawok worigun. <sup>42</sup> Aria nakripapuk dodogowinyi baraan um nakri mukripes ananin baraaen. Nakri gamo mukripes um anan douk Iruhin nagraehanum ta nusuhwumesh kwotog eshudok watak shape iri arpesh shuni eshudok shagok iri. <sup>43</sup> Seiok ihm-morim profet douk hakriyan-ukuk iri um anudok Jisas. Hakri ihishmorim arpesh shusuhw ananin baraaen dodog shugipeshen iri, Iruhin ta nukweshih esheshish yoweishi inahos um enyudok Jisas ananin nyeigur atin.”

### *Kupaishi Arpesh Douk Eshesh Madae Juda Iri Sharao Iruhin ananin Mishin*

<sup>44</sup> Abudok nyutob Pita apa nakripes enyudok baraaen obi nyutob, Iruhin ananin Mishin nyabuhi nyawish ihishmorim arpesh douk shape shemnek enyudok Iruhin ananin baraaen iri. <sup>45</sup> Amam Juda henek bilip um Jisas aria hapei Jopa heir Pita hanaki iri, amam douk hakitak yowiyokuk abom um agundok Iruhin nekesh meyoh um ananin Mishin nyawish eshudok douk eshes madae Juda iri uwe shopunek um. <sup>46</sup> Hakitak yowiyokuk um agundok hemnekesh sheneyagwreh kupakupainyi baraaen aria shatuk Iruhin ananin nyeigur nyato iruhw um. Aria Pita neyagwreh nakri,

<sup>47</sup> “Eshudok arpesh douk shopunek sharao Iruhin ananin Mishin kabi apak Juda maren um. Namudok aria arpen ta mare enen nyunaki aria nyukripesh um mare shunek baptais uwe, uwok.”

<sup>48</sup> Namudok aria Pita nakripesh dodogowinyi baraen um eshesh ta shunek baptaisum Jisas Krais ananin nyeigur. Douk shenek baptais iyoh aria shariganum nini eshesh shupe eneh karowih nyumneh shopunek.

## 11

### *Pita Natanam Jerusalem Aria Nakripesh Um Anan Neneken Iri Mour*

<sup>1</sup> Amam aposel hani eshesh Jisas ananish arpesh shape agudok shokugi nahobig Judia iri shemnek um agundok kupaishi arpesh douk eshesh madae Juda iri uwe shemnek Iruhin ananin yopinyi baraen aria shasuhwen shagipeshen um. <sup>2</sup> Namudok aria abudok nyutob Pita nanak natograri Jerusalem obi nyutob, eshesh Juda shenek bilip aria dodogowish atish um agundok shatah yegeoshiweruh um aria shahan shakri, <sup>3</sup> ‘Nyak nyanak nyawish kupaishi arpesh douk madae shutah esheshiruh yegeoshiweruh iri uwe esheshit urupat aria nyani eshesh pawok worigun.’

<sup>4</sup> Namudok aria Pita nakripesh baraen um ihishmorim shatograri iri eshudok eneshenesh. Aria nakripesh namudok. <sup>5</sup> Nakri, ‘Eik yape yenek beten abrudok debeiburi wabur Jopa aria yatik um kabi yabo anas yomnis um. Urkum mape aria yatik enen enyudok kabi anah debeihi rupahmori hape habuhi iruhw utag. Shasuhuguk nubatibus apibus sisiguk aria shape shakutuh habuhi agundok eik yapeum. <sup>6</sup> Gamo yatrugh hurukatin aria yatik eneshenesh agundok atapishi mahish sharari ahudok rupah. Yatik enesh yabis, enesh wanarish madae shishoh iri uwe. Yatik anaguh yuguuhw hwani armiguuhw. <sup>7</sup> Yatrish aria yemnek anah mah. Aria enyudok arpen nyakri, ‘Pita, arigah nyukitak nyubo eshudok mahish nyishoh.’ <sup>8</sup> Aria eik yakri, ‘Debeini, adur atin uwok. Eik madae ishoh uwe eshudokmori mahish, douk shanabosusih madae yopish iri uwe.’ Eik yakri namudok. <sup>9</sup> Aria enyudok arpen nyeyagwrehi gani iruhw heven iri nyakri shopunek, ‘Eshudok douk Iruhin nenekeh yopish iri, nyak mare nyuhwaresh shanabosusih iri uwe, uwok.’ <sup>10</sup> Enyudok yatrin nyatogur biyeh atih aria wata shopunek sharaen nyatomoguk iruhw utag.

<sup>11</sup> Aria abudok nyutob abom biom atun armam douk sheshopokam Sisaria hanakumogu humrori eik aria douk hanak hatogur atudok eik yapenyat iri urupat. <sup>12</sup> Iruhin ananin Mishin nyakripe um mare ikana uwok. Nyakripe um ta ini amam muni atuh munak. Amam 6-poreim douk hagipesh Jisas aria hape Jopa iri shopunek haname manak um Sisaria. Manak matogur aria ihm-morim manak mawish Kornilius ananit urupat. Anudok douk neshopokugu amudok hanaku harauri eik iri. <sup>13</sup> Mawish aria nakripe agundok natik enen ensel nyawish nyeyotu numun ananit urupat um. Natrin aria nyakripan namudok. Nyakri, ‘Nyishopok anam armam hunak um Jopa aria humrori anan arman shahwaran um Pita iri. Kupainyi nyeigur douk shahwaran Saimon. <sup>14</sup> Puruman punaki aria nukripep baraen um nyak nyuni ihishmorim shape nyakit urupat iri pumneken aria Iruhin ta wata nuraep putanam aria pupe wosik abom.’

<sup>15</sup> Douk arigah yanaki yahur baraen yape yakripesh, aria Iruhin ananin Mishin nyabuhi nyawishesh kabi riguk wata sagomatim nyabuhi nyawish apak um. <sup>16</sup> Aria eik urkum morum enyudok baraen riguk Debeini Jisas nakriyen iri. Nakri, ‘Jon nenek baptais-umesh abar, aria ipak ta punek baptais Iruhin ananin Mishin nyubuhi nyuwishep aria nyupenye.’ <sup>17</sup> Eik

yadukemesh abom um Iruhin douk nekesh meyoh enyudok atin Mishin kupaishi arpesh. Nekesh kabi riguk nako apak meyoh abudok nyutob munek bilip um Debeini Jisas Krais obi nyutob. Namudok aria eik douk madae debeini arman um iweshikuman yah Iruhin um nuneck ananin mour um uwe, uwok."

<sup>18</sup> Douk shemnek enyudok baraen aria madae shukri um shuhon shukripaen enenyenen uwe, uwok. Aria shatuk Iruhin ananin nyeigur nyato iruhw aria shakri, "Namudok aria Iruhin douk nakri wosik um nubadig kupaishi arpesh esheshiruh aparuh um shukeshuk agabus yoweishi inahos shatanam shukon aparuh anan aria nutaurumesh shupe wosik abom iihh nyumneh."

### *Sagomatin Eshesh Iruhin Ananish Arpesh Shape Antiock Iri Sharao Nyeigur Kristen Um*

<sup>19</sup> Riguk abudok nyutob shabo Stiven nagok obi nyutob, eshesh shenekelesh enenyen eshesh shagipesh Jisas iri aria sharuwok shanak atin atinyuk. Enesh sharuwok shanak arigaha shanak shatogur shape Fonisia. Enesh shatogur shape enen unai nyeigurinyum Saiprus. Aria enesh douk shanak shape Antiock. Shanak shape aria shape shakripesh baraen eshesh Juda atish um Debeini Jisas. <sup>20</sup> Aria anam douk hagipesh Jisas aria hape enyudok unai Saiprus iri hani anam hape anabur wabur Sairini iri hanakum Antiock aria hakripesh baraen eshesh kupaishi shopunek. Hakrip eshesh Grik yopinyi baraen um Debeini Jisas. <sup>21</sup> Debeini nanakumam huruk nataurumam dodogowim atum hakripeshen aria sabaishi arpesh shenek bilip. Shakutukuk eneshenesh yoweishi inahos aria shatanam um Debeini.

<sup>22</sup> Eshesh Iruhin ananish arpesh shapeik Jerusalem iri douk shemnek um enyudok aria sheshopok Barnabas nanak um Antiock um nutaurumesh. <sup>23</sup> Douk Barnabas nanak natogur aria natik um Iruhin nataurumesh meyoh aria shape wosik abom. Natik namudok aria nanadudareh abom. Aria gamo nakripesh baraen eshesh ihishmorim. Nakripesh um eshesh purkwiip purum dodogowish atish abom shugipesh Debeini ananin baraen namudok atin iihh nyumneh. <sup>24</sup> Barnabas anan douk yopuni arman. Iruhin ananin Mishin nyawishan abom nyapenyan wosik aria dodogowin atun abom um bilip. Namudok aria sabaishi arpesh shawish abom um eshudok Debeini ananish arpesh.

<sup>25</sup> Aria Barnabas wata nanak um Tarsus um nurim Sol. <sup>26</sup> Nanak douk naparugan aria naranum Antiock. Aria shuknun kwar amam biom hani Iruhin ananish arpesh shape aria hape henek skulumesh abom sabaishi arpesh Iruhin ananin baraen. Aria douk abrudok wabur Antiock douk sagomatin arpesh shodowesh enyudok nyeigur Kristen eshesh shagipesh Jisas iri.

<sup>27</sup> Aria abudok nyutob anam profet douk hapei Jerusalem habuhmori Antiock. <sup>28</sup> Aria Iruhin ananin Mishin dodogowin atin nyahur anan um amudok profet shahwaran um Agabus iri nakitak neyotu aria nakripesh enen baraen. Nakripesh um ta nyurub besh abom ihirub warub douk bape shukamum eshesh Rom iri. Abudok nyutob Klodius nape king obi nyutob, um nyurub besh obi um douk nuhut butogur. <sup>29</sup> Namudok aria eshesh shagipesh Jisas iri shabo baraen um shutorum utabor aria shunak shushopok-abor bunak um esheshishi arpesh douk shape Judia iri. Eshesh ihishmorim atin atin shanaborubuk iri utabor douk shasiyabor um biyeh kabi shanaborubuk um aria wabrabor shaborubuk um enyudok mour. <sup>30</sup> Douk shatorum-abor aria shanak sheshopokabor um eshesh Iruhin

ananish arpesh esheshim debeimi gani Jerusalem. Shako Barnabas aria Sol harabor hanak.

## 12

### *Herot Nabo Jems Nagok Aria Noweshik Pita Nape Shunuweshik-atı Urupat*

<sup>1</sup> Aria abudok nyutob anudok king Herot nape nenekeh enenyenen enesh Iruhin ananish arpesh. <sup>2</sup> Anan nakri aria habo Jon ananin wanin Jems harpogishan hakwu bainat aria nagok. <sup>3</sup> Douk natik um eshesh Juda shanadudareh um agundok nakri aria habo Jems nagok um, aria wata nakripesht shasuhw Pita showeshikan shopunek. Anan douk nenek enyudok abudok nyutob eshesh Juda shenek debeguni worigun aria shawok bret douk shashaiteh aria madae tukitak debeiti iri uwe. <sup>4</sup> Douk nasuwān jurug aria naweshikan nape shunuweshik-atı urupat. Aria nubatib lainab um amam soldia hape heyohan. Abudok nubatib lainab heyotu heyohan iri douk heyotu um nubatim nubatim. Herot nakri agundok debeguni Pasovaigun worigun nunak nubuhuk aria nuhut ta nurauri Pita agundok ihishmorim arpesh shapeum aria nuneckuman baraaen aria non nugok.

<sup>5</sup> Namudok aria Pita nape shunuweshik-atı iri urupat aria amam soldia hape heyohan. Aria eshesh Iruhin ananish arpesh douk shape aria dodogowish atish shape shenek beten sharig Iruhin um natauruman.

### *Ensel Nyataurum Pita Nakutukuk Shunuweshik-atı Iri Urupat*

<sup>6</sup> Herot nakri ruwahepih aria kadak nuran nutograri aduk um nuneckuman baraaen. Aria abudok wab, biom soldia heyotu wobuwobur aria Pita douk huweshikan biyob senab neshuh orokohun. Anam kupaimi soldia douk heyohan heyotu wit um atudok shunuweshik iri sheshuh-atı urupat. <sup>7</sup> Aria ahudok atuh enen Debeini ananin ensel nyanaki nyeyotu agundok Pita neshuh um aria numunitum atudok shunuweshik-atı iri urupat gor atin nokusuk meyoh. Enyudok ensel nyeshudukesh Pita nikitak aria nyakri, "Kitak arigas." Aria ahudok atuh senab batokweshihuk Pita ananis wis.

<sup>8</sup> Aria enyudok ensel nyakripan nyakri, "Gamo washok let tupe dodog aria hur nyakish sandelahos ba reyesh."

Pita neshuhur neshur aria ensel wata nyakripan nyakri, "Hur nyakit saket reyot aria yowi nyugipeshe ba unak." <sup>9</sup> Aria Pita nakutukuk shunuweshik-atı iri urupat nagipeshe enyudok ensel nanak. Anan Pita douk madae nudukemesh um enyudok ensel nyeneken iri douk abom adurin atin abom um uwe, uwok. Anan nakri douk natik enesh eshudok meyoh kabi nabo yomnis natrish um. <sup>10</sup> Douk hanak heshagrakuk amudok heyohan heyotu harik iri soldia arigaha hanak heshagrakuk amudok anam heyotu hagiguk iri. Heshagrakuk amam aria hanak hatogurum atudok debeiti ainabit wit douk shejikat atin shawish abom um wabur Jerusalem um. Atudok wit atat meyoh tanajik-umam meyoh aria hatogur aduk. Hatogur hape hagim anah yah hanak aria ahudok atuh enyudok ensel nyakutukuk Pita.

<sup>11</sup> Aria Pita douk nadukemesh um enyudok nyatogruman iri aria nakri, "Adur wo! Douk abom yadukemesh. Debeini neshopoki ananin ensel nyanaki nyataurume aria yaruwok um Herot ananis wis. Shopunek nyataurume yaruwok-umaguk enenyenen amaen douk eshesh Juda shakri shunekenyume iri."

<sup>12</sup> Douk nadukemesh um enyudok nyatogruman iri douk adurin aria nanak um Jon ananik amakek Maria okwokwit urupat. Anudok Jon

kupainyi nyeigur douk Mak. Sabaishi arpesh shanaki shantorum shape atudok urupat aria shape shenek beten sharig Iruhin um nutaurum Pita.

<sup>13</sup> Pita nanak nabo wit adukitum urupat aria Roda douk kwenek mour meyoh um enesh iri kwakitak kwanakumori kutik omi nyeyotu aduk.

<sup>14</sup> Douk kwomnek Pita ananah mah kwadukemah aria kwanadudareh abom. Wit madae kwijikatuk uwe aria wata kwahur kwawish numun. Kwawish kwakripesh kwakri, "Pita nanudok neyotu aduk!"

<sup>15</sup> Aria shakripok shakri, "Nyak nyenek rohw." Aria okwok dodogowik otuk kwakri, "Adur wo! Nani neyotu aduk." Aria eshesh wata shakripok shakri, "Nyanyudok ananin ensel."

<sup>16</sup> Aria Pita nape apa naguduk atudok wit. Douk shejikat shatrun aria shakitak yowiyokuk abom. <sup>17</sup> Aria naurumesh wis atus um nakri mare shiyagwreh, uwok. Aria nanak nakripesh um agundok Debeini natauruman nakutukuk shunuweshik-ati iri urupat natogrumbori. Aria nakripeshuk nakri, "Pukrip Jems nini amudok anam ashukenyim warhim um enyudok nyatogram eik iri." Douk nakripeshuk namudok aria naku-tukuk eshesh nanak kupaigunum.

<sup>18</sup> Douk arigha ruhur atin ruwahep aria amudok soldia madae hudukemesh abom um agundok Pita nanak mumam aria douk madae anan nupe um uwe. <sup>19</sup> Namudok aria Herot nakripesh shape shauriman abom. Shauriman aria madae shuparugan uwok. Namudok aria nenekumam kwotog amam soldia nakri um ta nom hugok. Douk enyudok nyanakuk aria Herot nakutukuk agudok shokugi nahobig Judia nanak nabuh nape anob nyutob abrudok wabur Sisaria.

### *Herot Nagok*

<sup>20</sup> Herot nabuh nape Sisaria aria juwehosin um arpesh douk shape arbudok warub shahwarorub-um Taia aria Saidon iri. Namudok aria arbudok biarub warubish shanak shantorum atugun aria shanaki shatrun. Sagomatin sharik shani Blastus douk debeini um anan king neshuhom iri rum aria shabo baraen nyape atugun. Douk nakri wosik um nutaurumesh aria kadak shanaki shutik king Herot. Aria shakripanum shupe atugun, wanogwiruh uwok. Um maresh? Arpesh shape abudok amnab nahobig iri, esheshigun worigun douk apa shanak shape shanatorgun king Herot ananig nahobig.

<sup>21</sup> Aria anan king Herot nagraeh anah nyumlah. Arigha douk ahudok nyumlah hanak hatograri aria nikitak nor eneh rupeh amam king atum hehur iri rupeh. Nenekeh douk aria nakh netem ananin debeinyi wagitur aria nape nakripesh enen barae. <sup>22</sup> Douk armam armago shatik namudok aria shahwar shakri, "Anudok douk madae anan meyohin arman niyagwreh uwe, uwok. Anudok anan douk anan god!" <sup>23</sup> Aria ahudok atuh enen Debeini ananin ensel nyabo king Herot aria arugeh hapeyan. Um maresh? Anan Herot madae nukrip eshudok armam armago um shutuk Iruhin ananin nyeigur nyuto iruhw uwe, uwok. Aria nape nanatrish shape shatuk ananin nyeigur atin nyato iruhw. Namudok aria eshuguh hwatograri gani numuninum aria nagok.

<sup>24</sup> Aria Iruhin ananin barae dodogowin atin nyanak sabaigunum, sabaishi arpesh shemnek aria shenek bilip um Jisas.

<sup>25</sup> Barnabas nani Sol heyatok amamin mour Jerusalem aria wata haku-tukuk agundok hanakum Antiock. Jon kupainyi nyeigur shahwaran um Mak iri shopunek haran nanamam hanak.

## 13

*Iruhin Ananish Arpesh Sheshopok Barnabas Nani Sol Hanak Sabaigunum  
Henek Iruhin Ananin Mour*

<sup>1</sup> Anam profet hani tisa omi douk hani eshesh Iruhin ananish arpesh shape abrudok wabur Antiok. Amamish nyeigu hw eshudok, Barnabas iri Simeon. Simeon ananin enyudok enen nyeigur douk Niger. Anan Lusius douk nanaki debeiburi wabur Sairin iri. Anan Manain. Anan douk anudok debeini um gavman iri Herot ananish amakenyish sharan nani eshesh nape iri. Aria anan douk Sol. <sup>2</sup> Anob nyutob aria eshesh shashakur um worigun aria shape shenek beten atin. Shenekek namudok aria Iruhin ananin Mishin nyakripesh nyakri, "Pukwiraeh Barnabas nini Sol um hunak hunek enyudok mour douk yahwaram um huneken iri." <sup>3</sup> Namudok aria shashakur um worigun shape meyoh aria shape shenek beten sharig Iruhin um nutaurumam. Showemam wis aria sheshopokam hanak.

*Barnabas Nani Sol Hatogur Hakripesh Iruhin Ananin Bareaen Enyudok  
Unai Nyegurinyum Saiprus*

<sup>4</sup> Iruhin ananin Mishin nyohur Barnabas nani Sol aria nyeshopokam hanakum Selusia. Habuh agundok aria harao korohuk hanakum enyudok unai nyegurinyum Saiprus. <sup>5</sup> Arigha douk hanak hatogur Salamis aria hape hakripesh Iruhin ananin bareaen gani numun eshesh Juda eshesig shape sheneyagwreh bareaen-ogwi urusag. Jon Mak douk neiram um nutaurumam um mour.

<sup>6</sup> Hakitak hawish hanak ihirub warub enyudok unai aria hanak hatogur Pafos. Hatogur Pafos aria haparrug anan arman shahwaran um Barjisas iri. Anan douk anan eshesh Juda eshesin neneck rohwumesh iri profet. Aria anan napeum neneck ouruh hani sabagwiruh iri. <sup>7</sup> Anudok arman Barjisas douk nani anan debeini um gavman um enyudok unai iri hape. Ananin nyeigur Sergius Paulus. Anan douk nadukem enyenyen iri. Aria narig Barnabas iri Sol um hunaki hutrun. Um maresh? Anan nakri numnek Iruhin ananin bareaen. <sup>8</sup> Aria anudok arman Elimas nape natupok bareaen. Anan douk anudok arman douk napeum neneck ouruh hani sabagwiruh iri. Aria shawanam ananin nyeigur um eshesh Grik eshesin bareaen aria shahwaran Elimas. Elimas nakwiraeh um nakri nuwanamaguk Sergius Paulus um anan mare nusuhw Debeini ananin bareaen nugipeshen, uwok. <sup>9</sup> Aria Sol, enyudok enen nyeigur shahwaran um Pol iri narao Iruhin ananin Mishin nyapenyan wosik abom aria natrun duk Elimas. <sup>10</sup> Aria nakripan nakri, "Satan ananin nugarin! Nyak nyenek horim abom um ihihumori yopihi aih. Aria shukninyum ihinyumori shenek rohwumesh-umeh iri aih hani ihihumori yoweishi aih. Nyak nyape nyabirak um nyuwanam Iruhin ananin adurin bareaen um nyutogur rohwotuhw-nyi. Aria nyak ta nyakri uwok um nyukutihukuk ehudok aih, uwok?" <sup>11</sup> Aria mnek! Douk Debeini ta nen aria nyakis nabes ta sishuk. Nyumneh ta mare nyutrih aria ta nyupe namudok atin um eneh nyumneh."

Pol nakripan namudok aria ahudok atuh enen enyudok kabi onog behra-bigwi orug um gwabuhi goweshiguk ananis nabes. Aria nape narahaen nanak um nakri nuparug enen arpen um nyusuhw ananik rogur aria nyiyabigan yah. <sup>12</sup> Douk nape debeini um gavman um enyudok unai iri natik enyudok aria neneck bilip um Debeini. Anan nakitak yowiyokuk abom um Debeini ananin bareaen douk Pol nani Barnabas heyagwrehen iri.

*Sol Nani Barnabas Hanak Henek Mour Wabur Antiok Douk Bape Agudok  
Shokugi Nahobig Shahwarag Um Pisidia*

<sup>13</sup> Pol nani amam heiran iri hakutukuk Pefos harao korohuk hanak hatogur wabur nyeiguriburum Perga. Abrudok wabur douk bape agudok shokugi nahobig Pamfilia. Aria Jon wata nakwutumuk natanatum Jerusalem. <sup>14</sup> Amam hakutukuk Perga aria hanak hatogur Antiok. Antiok douk bape agudok shokugi nahobig nyeigurigum Pisidia. Arigaha ahudok nyumnah Sabat douk eshesh Juda madae shunek mour ahi uwe hanak hatograri, aria hanak hawish hape atudok urupat douk eshesh Juda shape sheneyagwreh baraen-atari. <sup>15</sup> Hawish hape aria debeimori um atudok urupat iri hatarih Iruhin ananin lo seiwok nakoguk Moses enyi um jurug aria hatarih enen baraen shopunek douk seiwok amam profet henyemaguk iri. Douk hakripesh baraen um jurug aria henekumam baraen Pol nani Barnabas. Baraen enyudok. Hakri, "Ashukenyim, ipak enen baraen um pakri pukripesh um shupe dodogowish um, apak wosik makri punaki pukripeshen douk."

<sup>16</sup> Hemnek namudok aria Pol nikitak neyotu naurumesh wis aria nape nakripesh. Nakri, "Ipak Israel pani ipak ihipmorim kupaipari douk penek lotu um Iruhin iri, ipak pumnek eikin baraen. <sup>17</sup> Eshesh Israel shenek lotuman iri Iruhin nagraeh apakash yamehesh aria abudok nyutob shanak shape kupaishi esheshib amnab Isip obi nyutob, anan douk nenekech shatogur sabaishi meyoh abom. Shape agundok arigaha anan douk dodogowin atun abom, aria naraesh shakutukuk Isip shanaki. <sup>18</sup> Shanaki shanak shape wehigunum arpesh uwok um aria anan nape nataurumesh. Eshesh shakana uwok um anan madae shumnek ananin baraen, aria anan nani eshesh nape nataurumesh um 40-poreish kwarahos. <sup>19</sup> Nanunu 7-poreis debeisi awiros um arpesh abudok amnab Kenan aria nekesh amnab ananish arpesh eshesh Israel shagremab. <sup>20</sup> Enyudok ihinyumorim douk nyatogur atin hurukatin um sabaishi 450-poreish kwarahos. Enyudok nyanakuk aria nenekech debeimi armam jas um heyohesh iri. Debeimi heyohesh arigaha anudok profet Samuel natogur.

<sup>21</sup> Aria abudok nyutob shakrip Samuel um nunekumesh anan obi nyutob, Iruhin nagraehumesh Kis ananin nunganin shahwaran um Sol iri natogur esheshin king. Nape king um 40-poreish kwarahos. Anudok arman king Sol douk nikitak opudok Benjamin ananip awirop. <sup>22</sup> Aria Iruhin neyatakuk Sol aria nenekech Devit nape esheshin king. Baraen Iruhin nakrip arpesh um shudukem Devit um douk enyudok. Nakri, 'Eik yaparug Jesi ananin nunganin Devit. Eik urkum manawashaman aria anan ta nunekech ihinyumori mour douk eik ikripanum nuneken iri.' <sup>23</sup> Aria Iruhin nenekech enyudok mour nyatogur kabi seiwok nakri adurin atinyi baraen um ta nuneken nyutogur iri. Agundok atap Devit ananip awirop panak arigaha Iruhin nagraeh Jisas um nurao apak arpesh mutanamum Iruhin aria mupe wosik. Nagrahan aria neshopokan nanakumori Israel.

<sup>24</sup> Jisas wata nutogur uwe aria Jon nenekech baptaisumesh iri nape nakripesh baraen ihishmorim eshesh Israel. Nakripesh um shukeshuguk agabus yoweishi inahos, shatanam shukon aparu Iruhin aria shunek baptais. <sup>25</sup> Jon hurukatin um niyatok ananin mour aria nakripesh nakri, 'Ipak pakana eik amiapan? Eik madae anudok arman douk pape patrugun uman ta nutograri iri uwe, uwok. Aria mnek! Arman pape patrugun-uman iri ta eik iyatok eikin mour um jurug, aria anan ta kadak nutogur. Aria eik douk madae debeiwe iri um ikweshih madururuhan ananiyu su uwe, uwok. Anan douk debeini arman abom.'

<sup>26</sup> Pol baraen apa nape nakripesh nakri, "Ipak Israel eikip ashukenyim owarhim douk Abraham nahwarepum yamehem iri pani kupaipari penek lotu um Iruhin iri, enyudok baraen um Iruhin nurap mutanamori mupe

wosik um douk nenenken nyanakumori apak ihipmorim. <sup>27</sup> Shape Jerusalem iri armam armago shani esheshim debeimi madae shudukemesh um anan douk nunakumori nutaurumesh aria wata nuraesh iri uwe, uwok. Esheship urkwip madae gamo purumen wosik uwe enyudok bareaen seiwok amam profet henyemaguk aria shape shatarihen ihih nyumneh Sabat douk eshesh Juda mour uwok shape meyoh ehi. Aria shenek amamin bareaen nyatogur adurin um shabo Jisas nagok um. <sup>28</sup> Madae shuparug enesh yoweishi inahos uwe douk nenenken um ta shon nugokumesh, uwok. Aria sharig Pailat um non nugok. <sup>29</sup> Douk shenek enenyenken mour riguk amam profet henyemaguk Iruhin ananik Buk iri bareaen nyakrium ta shuneken-uman iri um jurug, aria shabrean-ari rowog kruse shanak sharuman onohw wonugwehw. <sup>30</sup> Aria Iruhin wata norukwan yapis aria wata nikitaki. <sup>31</sup> Aria sabaihi nyumneh natogurum amam armam douk hapei Galili heiran hanakum Jerusalem iri. Natogrumam aria hatrun. Aria douk amudok armam douk hape hakripap ananin bareaen apak Israel.

<sup>32</sup> Aria ohwak douk enyudok wanakumori wakripep enyudok yopinyi bareaen. Bareaen enyudok. Enyudok mour seiwok Iruhin nakripesh enen adurin atinyi bareaen apakish yamehesh um ta nuneken-umesh iri douk enyudok <sup>33</sup> nenenken um nutaurum apak esheshish batowish. Um agundok Jisas nagok aria wata nonohur nikitaki um. Bareaen nyetem Iruhin ananik Buk Song iri douk nyetem namba 2 Song. Bareaen enyudok, 'Nyak eikin Nuganin. Doukih eik yatogur jurug nyakin Yain.'

<sup>34</sup> "Bareaen douk Iruhin nakriyen um ta nuhur Jisas nikitaki aria mare nutar abom um douk enyudok. Nakri,  
'Eik ta ikep enesh yopiyopishi abom eshudok kabi riguk yakripan adurin atinyi bareaen Devit um ta ikenyesh iri.

Aria eshudok adur ta shutogur kabi eik yakri adurin atinyi bareaen um.'

<sup>35</sup> Namudok aria enen bareaen shopunek nyetem Buk Song iri nyakri namudok. Nyakri,

'Nyak ta mare nyunek nyakin yopuni arman nasuhw nyakin mour iri nugok nutaraguk abom uwe, uwok.'

<sup>36</sup> "Apak ihishmorim douk madukemesh. King Devit napayehi nyumneh, anan douk nagipesh Iruhin nakri-enyi atin aria nagok. Nagok douk sharuman hurukatin um sharom ananim yamehem um aria natar. <sup>37</sup> Aria anudok arman douk nagok aria Iruhin wata nonohur nikitaki douk madae nutar uwe. <sup>38</sup> Namudok aria ashukenyim owarhim, ohwak wakri ipak ihishmorim gamo pudukemesh. Ohwak wakripep bareaen namudok. Wakri anudok arman Jisas ta wosik nutaurumep nuneguk ipakish debeishi shokwish penekesh iri yoweishi inahos. <sup>39</sup> Lo seiwok Iruhin nakoguk Moses enyi ta mare nyuneguk ipakish yoweishi aria Iruhin nutrit nuhwarep yopishi arpesh, uwok. Aria ihishmorim arpesh shenek bilip um anudok arman Jisas iri, Iruhin douk nahwaresh yopishi arpesh. <sup>40</sup> Aria ipak gamo pudukemesh um enyudok seiwok amam profet hakriyenyuk iri um mare nyutogrume, uwok. Bareaen enyudok. Hakri,

<sup>41</sup> 'Ipak peyagwreh enenyenken yoweini um Iruhin ananin bareaen iri, ipak putrugun pugugak pupe aria pugok!

Eik yenek enen mour ahudok nyumneh um ipak papeyeh iri.

Aria enen arpen nyukri nyukripep um enyudok mour douk eik ta ineken iri, aria ipak ta mare pukri adurin, uwok.'

<sup>42</sup> Pol nani Barnabas hakutukuk atudok urupat hape hatogur aduk aria eshesh armam armago shakripam um wata hunaki ahudok anah nyumnah Sabat douk eshesh Juda shape meyoh ahi aria gamo hukripesh enyudok

atin baraen. <sup>43</sup> Douk shakutukuk urupat shatogur aduk aria sabaishi Juda shani kupaishi iri armam armago douk shagipesh eshesh Juda shenek lotu iri, shani Pol nani Barnabas shanak. Shanak aria amam gamo hakripesch baraen um hakri huhur esheshiruh aparuh aria shupe dodogowish atish um agundok Iruhin nape nataurumap meyoh um.

<sup>44</sup> Douk arigaha ahudok anah nyumnah eshesh Juda mour uwok shupe meyoh ahi hanak hatograri, aria hurukatin um ihishmorim arpesh shape abrudok wabur iri shanakumori shumnek Debeini ananin baraen. <sup>45</sup> Aria eshesh Juda shatik sabaishi armam armago shanaki shantorum aria shenek nyigiya. Esheshiruh aparuh yoweruh abom aria shape shakri uwok um Pol nakripesch-enyi baraen shenekan enenyenen.

<sup>46</sup> Shenekek namudok, aria Pol nani Barnabas dodogowim atum heyag-wreh baraen aria hakripesch hakri, "Douk adur. Enyudok Iruhin ananin baraen ta urik ukrip ipak Juda purik. Aria pekenyuk agabus aria namudok douk ipak meyoh pakri ipak madae yopipari um pupe wosik abom iih nyumneh uwe, uwok. Namudok aria douk ta ukutipukuk unak um kupaishi douk eshesh madae Juda iri uwe aria ukripeshen. <sup>47</sup> Um maresh? Debeini douk nakripap dodogowinyi baraen namudok, nakri, 'Eik yenek ipak jurug pape kabi enen lam um, um kupaishi arpesh ta shunatrugun um.'

Um putaurum ihirub warubishi arpesh shape agundok atap iri, aria Iruhin wata nuraesh shutanamori shupe wosik abom.'"

<sup>48</sup> Kupaishi arpesh douk eshesh madae Juda iri uwe shemnek enyudok baraen aria shanadudareh. Shakri Debeini ananin baraen yopinyi abom. Aria eshudok ihishmorim douk Iruhin nagraehesh jurug um shupe wosik abom iih nyumneh iri douk shasuhw ananin baraan ddog shagipeshen.

<sup>49</sup> Aria Debeini ananin baraen nyanak ihirub warub bape agudok shokugi nahobig Pisidia iri. <sup>50</sup> Aria eshesh Juda shahur ono nyeguhw shato iruhw iri owi armago douk wenek lotu um Iruhin iri wani debeimi um abrudok wabur iri aria juwehosish um Pol nani Barnabas. Shape shenekam enenyenen aria sheneyagwreh ddog um hukutukuk esheshib amnab ba hanak. <sup>51</sup> Hikitak um hunak aria hagudupeshuk nyupruk amamiruh yeriweruh kwakusuk abrudok wabur Antiok aria hanak um Aikoniam. Hagudupeshuk nyupruk um eshesh shutik aria shudukemesh um eshesh douk baraan nyapenyesh um ehudok eshesh shenekeh iri aih. <sup>52</sup> Amam hanakuk, aria eshesh Antiok shagipesh Jisas iri douk sharao Iruhin ananin Mishin nyapenyesh wosik abom aria shanadudareh shariguk.

## 14

### *Pol Nani Barnabas Henek Mour Aikoniam*

<sup>1</sup> Hanak hatogur Aikoniam aria henekek namudok atin kabi hanak kupaiburi warub um. Hanak hawish eshesh Juda shape sheneyag-wreh baraen-atari urupat aria hape hakripesch Debeini ananin baraen. Hakripesch baraen wosik douk sabaishi Juda shani eshesh Grik shemneken aria shenek bilip um Jisas. <sup>2</sup> Aria eshesh Juda douk shakri uwok um shunek bilip iri juwehosish um eshesh Kristen aria sheshuhuri shenekesh juwehosish um kupaishi douk eshesh madae Juda iri uwe. Aria esheshiruh aparuh douk madae hur wosik um eshesh shugipesh Jisas iri uwe, uwok.

<sup>3</sup> Aria Pol nani Barnabas hape roubi nyutob abrudok wabur Aikoniam. Hape aria dodogowim atum hakripesch Debeini ananin baraen. Aria Debeini nomuhur henek enenyenen Iruhin atun neneken iri mour. Heneken namudok aria Debeini neyabig arpesh aria shadukemesh shakri baraen

hakripesh-enyi um agundok Iruhin nutaurumesh meyoh um douk adurin atin. <sup>4</sup> Aria eshudok sabaishi arpesh shape abrudok wabur iri shakitak shanosiyam. Wobresh shaniguk amam aposel aria wobresh shaniguk eshesh Juda sik. <sup>5</sup> Namudok aria kupaishi arpesh shani eshesh Juda shani ihm-morim esheshim debeimi shakitak shakri shunekam enenyen amam biom aposel. Shakri shukwumam utabor shom hugok. <sup>6</sup> Douk hemnek um enyudok aria hakitak haruwok hanak. Hanak um biarub debeirubi warub shahwararub um Listra aria Derbe bani anarub bape iri hurukatin iri douk bape agundok shokugi nahobig Likonia iri. <sup>7</sup> Hanak aria hape hakripesh Iruhin ananin yopinyi baraen agundok.

#### *Pol Nani Barnabas Henek Mour Listra*

<sup>8</sup> Anan arman aiyas yowegas aria madae nurahaen atin iri uwe douk nape abrudok wabur Listra. Watak nor apahw obi nyutob aiyas yowegas aria amakek douk kwanabuki. Anan madae nurahaen atin uwe, uwok. <sup>9</sup> Aria anan douk nape nemnek Pol um nape nakripesh baraen um. Pol natrun duk anudok arman aria natik um anan nene bilip nakri Jisas ta nugabeyan. <sup>10</sup> Aria nakripan debeg nakri, “Kakitak yetu iruhw!” Aria anudok arman naprok nato nikitak neyotu iruhw aria nape nanarahaen nanak.

<sup>11</sup> Douk sabaishi armam armago shatik enyudok Pol neneken iri aria shape shahwar um esheshin ganiganigin baraen douk sheyagwrehan agudok shokugi nahobig Likonia iri aria shahwar shakri, “Amam godomi douk hanakumori armam aria amudok habuhumap iri!” <sup>12</sup> Barnabas douk shahwaran anudok god Sus. Aria Pol douk neyagwreh baraen iri, namudok aria shahwaran Hermes.\* <sup>13</sup> Atudok debeiti urupat shenek lotu um anudok god Sus atari douk tatao adukehah um abrudok wabur. Aria anan pris douk apa nene ofa um eshudok nako Sus iri nanak narauri enesh ababish bulmakauhos shani aruruhih douk shagrugeshi madururuh iri. Naraesh nanakumori atudok debeiti wit douk shawish abrudok wabur um. Um maresh? Anudok pris nani eshudok sabaishi arpesh shakri shunek ofa um eshudok bulmakauhos shuko Pol nani Barnabas.

<sup>14</sup> Douk Pol nani Barnabas hemnek um enyudok shakri shuneken-umam iri aria hakri uwok abom aria hawor amamih rupeh. Aria hahur hanak hawish agundok eshudok sabaishi arpesh sheyotum aria hahwar hakri, <sup>15</sup> “Ohwakishi arpesh, ipak peneken um enyudok mugu? Ohwak douk armam meyoh kabi ipak um! Ohwak wanakumori ukriep Iruhin ananin yopinyi baraen um pukutukuk ehudokmori rohwih aih. Um agundok penek lotu um madae adurimi godomi um aria putanamum anudok adurin Iruhin douk nape iih nyumneh iri. Anan douk nene iruhw heven bani agundok atap aria young aria nene ihishmorim eneshenesh shape-nyogun iri. <sup>16</sup> Adur seiwokib nyutob, anan douk nape nanatrish meyoh ihishmorim awirosish arpesh aria shagipesi enenyenen eshesh kanak shakri shuneken iri. <sup>17</sup> Aria anan douk madae nunobeshuk-umep uwe, uwok. Anan apa nenekumep yopihi aih. Napei iruhw heven aria nene eshah horumepari. Nene worigun natogrumeep sabaiguni um yopubi nyutob. Nekep worigun natogrumeep aria nenekep panadudareh pariguk.” <sup>18</sup> Hakripesh enyudok baraen eshudok sabaishi arpesh aria madae shumneken uwe. Aria henek debeiniy mour um hakri mare shunek ofa um eshudok bulmakauhos shuko amam, uwok.

\* **14:12:** Eshesh Grik apa shakri sabaimi godomi hape. Shakri anudok god Sus, shakri anan douk debeini abom um ihm-morim esheshim godomi. Aria anudok anan god Hermes, ananin mour douk shakri narahem baraen.

### *Shakwuman Utabor Pol*

<sup>19</sup> Aria eshesh Juda douk shapei arbudok biarub warub Antiok bani Aikoniam iri shanakumori Listra. Shanaki shagiyagiman meyoh um esheship urkwip um enen rohwin baraen um sabaishi abrudok waburishi arpesh aria shemneken shakri adur. Namudok aria shakwuman utabor Pol shanukan shatogur adukehahum abrudok wabur. Eshesh shakri nagok jurug. <sup>20</sup> Aria abudok nyutob eshesh shagipes Jisas iri shanaki sheyotu sheyar-sharihan obi nyutob, anan wata nikitak aria nawish abrudok wabur. Ruwahepih aria nani Barnabas hanak um Derbe.

### *Pol Nani Barnabas Harahe Hanak Hakripeshuk Baraen Eshesh Shagipes Jisas Iri Um Shupe Dodog Um Bilip*

<sup>21</sup> Hanak hatogur Derbe aria hape hakripesh Iruhin ananin yopinyi baraen agundok. Aria henek sabaishi arpesh shagipes Jisas. Aria wata hatanamum Listra. Hatogur Listra aria hanak um Aikoniam. Hanak hatogur Aikoniam aria wata hatanamum Antiok douk bape agudok shokugi nahobig Pisidia iri. <sup>22</sup> Hanaki arbudok warub aria dodogowim atum hape hakripeshuk baraen eshesh shagipes Jisas iri um agundok shunek bilip dodogowish atish um. Hakripeshuk hakri, "Apak makri muwih agundok Iruhin nafe Debeini um ananish arpesh um, aria sagomatin apak ta muwih um sabainyi amaen." <sup>23</sup> Hatanam hanaki obi nyutob, ihirub warub Iruhin ananish arpesh shapenyarub iri douk hagraeh-umeshuk armam sisigum atin um heyoh eshesh Kristen iri. Hakri uwok um worigun aria henek betenumeshuk. Henek beten hakrip Debeini shenek bilipman iri um nutaurumesh aria shur ananis atus wis.

<sup>24</sup> Hawish hanak heyatuk warub agudok anag shokugi nahobig Pisidia um jurug, aria hanak hatogur agudok anag shokugi nahobig nyeigurigum Pampilia. <sup>25</sup> Aria hakripesh baraen anabur wabur nyeiguriburum Perga. Hakripeshuk agundok aria habuhum Atalia.

<sup>26</sup> Hanak habuh abrudok wabur aria harao onok korohuk hatanamum Antiok. Hatanamum abrudok wabur douk riguk eshesh Iruhin ananishi arpesh shenek beten sharig Iruhin um nutaurumam meyoh, hur ananis wis atus aria hunek enyudok mour um. Aria douk enyudok heneken heyaten aria wata hatanamori. <sup>27</sup> Hanak hatograri Antiok aria henekumesh baraen ihishmorim Iruhin ananish arpesh shanaki shantorum aria hakripesh um ihinyumori mour douk Iruhin nataurumam aria nohur amamish roguhw neneken iri. Aria shopunek hakripesh um agundok Iruhin neyabigesyah kupaishi douk eshesh madae Juda iri uwe um shunek bilip um Jisas um.

<sup>28</sup> Aria hani eshesh shagipes Jisas iri hape roubi nyutob agundok.

## 15

### *Debeimi Hantorum Hape Jerusalem Heyagwreh Baraen*

<sup>1</sup> Anam armam hape agudok shokugi nahobig Judia aria hanakumori Antiok. Hanaki aria hape hakrip eshesh Kristen hakri, "Aria ipak mare putah yegeshiweruh kabi Moses nakripeshuk-enyi lo nyakri um, Iruhin ta mare nuraep putanamori pupe wosik abom, uwok." <sup>2</sup> Hakripesh namudok aria Pol nani Barnabas hani amam hanatutukem aria hani amam hanitok debeinya baraen. Namudok aria eshesh Iruhin ananish arpesh shagraeh Barnabas aria Pol hani anam abrudok waburimi Kristen shopunek um hunak um Jerusalem. Hunak um huni amam aposel aria eshesh Kristen esheshim debeimi hiyagwreh um enyudok baraen.

<sup>3</sup> Shagraeham aria sheshopokam hanak. Aria abudok nyutob hawish hanak agusudok shokugosi nahobigos Fonisia iri Samaria obi nyutob,

amam douk hape hakripaguk eshesh Kristen um agundok kupaishi douk eshesh madae Juda iri uwe shatanam shakon aparuh Iruhin um. Ihishmorim Kristen shemhem enyudok baraen aria shanadudareh shariguk.

<sup>4</sup> Hanak arigaha hanak hatogur Jerusalem aria Iruhin ananish arpesh shani esheshim debeimi shani amam aposel shanaki shakam roghuh shanadudarepam. Aria hakripesh um enenyenen mour douk Iruhin nohur amamis wis neneken nyatogur iri.

<sup>5</sup> Aria enesh shenek bilip aria douk shaniguk amam Farisi sik iri shakitak sheyotu aria shakri, “Eshudok kupaishi arpesh douk eshesh madae Juda iri uwe, ipak ta putah esheshiruh yegeshiweruh aria pukripesh um shugipes lo seiwok Iruhin nakoguk Moses enyi.”

<sup>6</sup> Namudok aria amam aposel hani eshesh Kristen esheshim debeimi hantorum hape aria hape heyagwreh um hugapes enyudok baraen.

<sup>7</sup> Douk heyagwreh rounyi baraen um jurug aria Pita nakitak neyotu nakri, “Eikim ashukenyim owarhim, ipak douk padukemesh. Riguk sagomatin douk mape aria Iruhin nakop mour. Aria eik douk neke enyudok mour um ikrip kupaishi ananin yopinyi baraen um shumneken aria shunek bilip um anan. <sup>8</sup> Aria Iruhin douk nadukem ihishmorim arpesh um apakip urkwip iri douk neyabig apak Juda abom um agundok anan urkum manawasham kupaishi arpesh um. Neyabigap um agundok nekesh ananin Mishin kabi riguk nako apak um. <sup>9</sup> Kupaishi douk madae nukesh anah yah aria apak Juda nukop anah kupaishi uwe, uwok. Eshesh shenek bilipuman. Douk namudok aria nagabeyeshuk um eneshenesh shapenyesh iri yoweishi nenekeh abom shatogur yopish. <sup>10</sup> Namudok aria douk ipak pakri pukwiraeh Iruhin um maresh? Um agundok pakri puwemesh amaen eshesh shagipes Jisas iri um. Enyudok amaen um mugipes lo um, apakish yamehesh shani apak douk mabirak um munusah mabirak matik uwok. <sup>11</sup> Aria apak menek bilip makri Jisas nataurumop meyoh aria Iruhin ta wata nurap mutanamori mupe wosik. Nurap kabi narik narao eshesh kupaishi arpesh um.”

<sup>12</sup> Pita neyagwreh um jurug aria ihishmorim sheneyagwreh. Sheneyagwreh aria shape shemnek Barnabas nani Pol heyagwreh baraen. Hakripesh um enenyenen debeiniy mour douk Iruhin nataurumam nohur amamis wis neneken nyatogur aria kupaishi shatrin iri.

<sup>13</sup> Douk heyagwreh um jurug aria Jems nakitak neyagwreh nakri, “Eikishi arpesh, ipak pumnek eikin baraen! <sup>14</sup> Saimon douk nakripesh um agundok sagomatin Iruhin urkum manawasham kupaishi douk eshesh madae Juda iri uwe, aria nagraeh enesh um shupe ananish abom um. <sup>15</sup> Amam profet amamin baraen douk nyatogur adurin nyagipes enyudok baraen douk Pita nakripap-enyi. Baraen enyudok. Iruhin nakri,

<sup>16</sup> ‘Kweipon eik ta wata itanamori,  
aria atudok Devit ananit tetu iri urupat

ta wata itahur irokat.\*

Eneshenesh sharok urupat um douk yowesh  
aria ta wata itahur irokat.

<sup>17</sup> Eik inekesh namudok um ihishmorim arpesh douk eshesh madae Juda iri uwe ta shupe shurim Debeini. Ihishmorim douk eik yanagraehesh um shupe eikish iri.’

\* <sup>15:16:</sup> Enyudok baraen madae nyukri um adurit urupat uwe, uwok. Enyen douk nyakrium Devit ananip awirop. Eshesh douk shakutukuk Iruhin ananin baraen aria nyeigur nyabuhuk um shupe debeishi um.

<sup>18</sup> Seiwok Debeini nakriyuk enyudok baraen aria douk shopunek douk nakriyen."

<sup>19</sup> Jems wata nakri, "Eik yakri namudok. Yakri eshudok kupaishi douk shemnek Iruhin ananin baraen aria shape shatanam shakon aparuh anan iri, yakri apak Juda mare mukesh debeinyi mour um shugipesh apakin lo, uwok. <sup>20</sup> Aria munek anap shup punakumesh aria mukripesh um mare shuwok worigun mahish douk shenek ofamesh shako rohwimi godomi iri. Mukripesh um mare shonukesh armam armago shenek wehrur meyoh um. Mukripesh um mare shuwok mahish douk arpesh shukwunishesh aruhwiguhw meyoh shugok shutahesh iri. Aria shopunek mukripesh um mare shuwok owishibor, uwok. <sup>21</sup> Apak douk madukemesh. Seiwok arigaha douk enyudok lo seiwok Iruhin nakoguk Moses enyi douk shape shatarihen urusag apak Juda mape meyagwreh baraen-ogwi um ihih nyumneh Sabat. Aria enyudok baraen douk shakripesken ihirub debeirubi warub."

### *Shenek Shup Panak um Kupaishi Kristen Douk Eshesh Madae Juda Iri Uwe*

<sup>22</sup> Namudok aria amam aposel hani ihishmorim Iruhin ananish arpesh shani esheshim debeimi shabo baraen aria shakri shugraeh anam armam um eshesch kanak um hunak huni Pol iri Barnabas hunam Antiok. Aria shagraeh Judas douk nanahwar enyudok enen nyeigur Barsabas iri nani Sailas. Amudok biom armam, amam douk heyotu harik um eshesch Kristen iri. <sup>23</sup> Shagraeham aria shakam opudok shup hasuwop hanak. Baraen nyetem shup iri nyakri namudok. Nyakri,

Apak aposel mani eshesch Kristen esheshim debeimi douk ipak po-hwarapum ashukenyim iri menekumep-ogu opudok shup ipak apakim ashukenyim douk ipak madae Juda iri uwe.

Apak makri yopuhi nyumnah um ipak ihipmorim pape abrudok wabur Antiok iri pani ipak douk pape agusudok biogos shokugosi nahobigos Siria iri Silisia.

<sup>24</sup> Apak memnek um agundok anam apakim hagipesh Krais iri hanaku hakripep enen rohwin baraen henekep pakitak yowiyokuk aria aparuh yoweruh um. Apak madae mukripam um hunaku hunek enyudok uwe, uwok. <sup>25</sup> Memnek namudok aria mantorum mape atugun aria ihishmorim mabo baraen makri wosik um mugraeh anam armam um huraumep-ogu baraen iri. Hunigu apakim arpeshim Barnabas iri Pol hunaku. Apak douk urkwip panawashamam abom iri. <sup>26</sup> Amudok biom douk madae hunogugur atin um agundok henek apakin Debeini Jisas Krais ananin mour aria arpesh shom hugok um uwe, uwok.

<sup>27</sup> Namudok aria moshopoku Sailas iri Judas hanaku. Amam ta wata hukripep nukwatog meyoh enyudok atin baraen douk menyemagu shup iri. <sup>28</sup> Iruhin ananin Mishin nyani apak mape aria mabo baraen makri wosik um mare wata muwemep anab bugob, uwok. Aria apak makri enyudokmori mare wata puneken, uwok. Enyudokmori. <sup>29</sup> Mare puwok worigunish mahish douk shenek ofamesh shako rohwimi god omi um, mare puwok owishibor, mare puwok mahish douk shakwunishesh aruhwiguhw meyoh shagok shatahesh iri, mare shenek wehrur meyoh um. Ipak pugipesh ehudokmori aih um douk ta punek yopinyi. Baraen enyudok atin.

Yopuhi nyumnah ipak.

<sup>30</sup> Shenek shup shakomap hasuop aria sheshopokam hanakum Antiok. Hanak hatogur aria hahwar ihishmorim Iruhin ananish arpesh shanaki shantorum aria hekesh shup. <sup>31</sup> Douk shatarih baraan sheyaten aria shanadudareh abom. Um maresh? Enyen douk yopinyi um nyutaurumesh shupe dodogowish um bilip aria esheshiruh aparuh yopuruh. <sup>32</sup> Judas nani Sailas amam kanak douk hatogur profet. Aria roubum nyutob hape hakripesh sabainyi yopinyi baraan eshesh shagipesh Krais iri aria shatogur dodogowish um bilip. <sup>33</sup> Douk hape anob nyutob Antiok um jurug aria eshesh Kristen shenekumam yopihu nyumneh aria wata sheshopokam hatanam hanak um eshudok douk sheshopokam hanaki iri. <sup>34</sup> [Aria Sailas wata shopunek nakri nupeik Antiok.] <sup>35</sup> Aria Barnabas iri Pol douk hape Antiok. Hani sabaishi shape shenek mour um shakrip eshesh shape Antiok iri Kristen um Iruhin ananin baraan shakripesh aria shenek skulumesh um shudukemen wosik.

### *Pol Nani Barnabas Hanadi-yogurum*

<sup>36</sup> Anah nyumneh hanak hadiguk aria Pol nakrip Barnabas nakri, "Wata utanam um iherubmorim debeirubi warub douk riguk wanak wakripeshuk Debeini ananin baraan arub iri. Unak aria utik ohwakish arpesh eshesh Kristen, um eshesh ta shape wosik um esheshin bilip aka, mumam."

<sup>37</sup> Barnabas nemnek namudok aria nakri Jon Mak shopunek nini amam hunak. <sup>38</sup> Aria Pol nakri uwok um huran hunak um. Um maresh, riguk haran hanak aria madae nini amam hupe arigha mour nyutuh aria hutanamori uwe, uwok. Aria nakutumuk agudok shokugi nahobig Pamfilia aria natanamori. <sup>39</sup> Douk hanitok arigha aria hanasiyam. Barnabas narao Mak harao korohuk hanak um enyudok unai Saiprus. <sup>40</sup> Aria Pol nagraeh Sailas nani anan hanak. Hanak aria eshesh Kristen shakripam shakri, "Wosik, Iruhin ta nupe um nutaurumep meyoh." <sup>41</sup> Hawish hanak agusudok shokugosi nahobigos Siria aria Silisia aria Pol nape nakripaguk Iruhin ananish arpesh anan Iruhin ananin baraan um shupe dodogowish um bilip.

## 16

### *Timoti Nani Sailas Aria Pol Hanak Henek Mour*

<sup>1</sup> Pol nani Sailas hanak arigha hanak hatogur Derbe aria hakutukuk Derbe hanak hatogur Listra. Hatogur aria haparug anan nagipesh Krais iri arman shahwaran um Timoti iri nape agundok. Ananik amakek douk onok Juda aria shopunek kwonek bilip um Krais. Aria ananin yaken douk anan um eshesh Grik. <sup>2</sup> Aria eshesh Kristen shape Listra bani Aikoniam iri shakri Timoti anan douk yopuni arman abom. <sup>3</sup> Anan Pol nakri nuran nini anan hunak. Namudok aria natah ananihw yegenyihw. Natah ananihw yegenyihw um maresh, ihishmorim Juda shape arbudok warub iri shadukemesh um ananin yaken douk anan um eshesh Grik. <sup>4</sup> Aria hawish hanak warub hape hakripaguk Iruhin ananish arpesh um enyudok baraan douk amam aposel hani eshesh Kristen esheshim debeimi heneken Jerusalem iri. Aria hakripeshuk um shugipeshen. <sup>5</sup> Namudok aria Iruhin ananish arpesh shape iherub warub iri shatogur dodogowish atish um bilip. Ihih nyumneh sabaishi arpesh shawishum eshesh Iruhin ananish arpesh aria shatogur sabaishi abom.

### *Pol Nape Troas Aria Natik Enesh Eshudok Kabi Nabo Yomnis Natrish Um*

<sup>6</sup> Hanak aria Iruhin ananin Mishin madae nyukri wosik um hukripesh baraan um agudok shokugi nahobig Esia uwe, uwok. Namudok aria hawish hanak agusudok biogos shokugosi nahobigos, Frigia iri Galesia. <sup>7</sup> Hanak arigaha hanak hatogur Misia aria hakri um huwish agudok anag shokugi nahobig Bitinia. Aria Jisas ananin Mishin madae nyukri wosik um hunak huwish uwe, uwok. <sup>8</sup> Namudok aria hawish hanak orokohunig um agudok shokugi nahobig Misia arigaha hanak habuh anabur wabur nyeiguriburum Troas. <sup>9</sup> Aria abudok wab Pol natik enesh eshudok kabi nabo anas yomnis natrish um. Aria natik anan arman nape agudok shokugi nahobig Masedonia iri neyotu aria nahwar dodog napeum Pol nakri, "Yowi nyutaurumap agundok Masedonia." <sup>10</sup> Douk Pol natik enyudok jurug, aria arigas apak maurim yah um munak um Masedonia.\* Munak um maresh, madukemesh makri Iruhin neyabigap um munak mukripesh ananin yopinyi baraan ganudok.

### *Lidia Kwatogur Kristen*

<sup>11</sup> Namudok aria mato korohuk kwakutukuk Troas kwahur kwabrig youg kwanakum enen unai nyeigurinyum Samotres. Aria ruwahepih kwahur kwanakum Neapolis. <sup>12</sup> Korohuk kwopunik aria manak atapih arigaha manak matogur Filipai. Abrudok wabur Filipai douk sagom-atinyum debeiburi wabur um agudok shokugi nahobig Masedonia. Ababur douk eshesh Rom shanaki sharkogwabur shapenyabur iri. Matogur abrudok wabur aria mape eneh nyumneh.

<sup>13</sup> Aria ahudok nyumnah Sabat douk eshesh Juda mour uwok shape meyoh ahi hanak hatograri, aria manak matogur adukehah-iburum abrudok wabur. Matogur manak um anab worub. Apak makri anagasis um abudok worub, makri onok outuk ta kwape douk enesh Juda shanak shape shenek beten um. Manak matogur matik ono armago wanaki wantorum wape aria mani owo mape meyagwreh baraan. <sup>14</sup> Onok armatok kwani owo wape wemnekap um meyagwreh iri douk Lidia. Okwok kwanaki debeiburi wabur Taiataira aria kwape um kwenek enen mour bisnis um owishiborihi rupeh iri. Okwok douk shopunek kwenek lotu um Iruhin iri aria Debeini nabadig okwokwihi apahw gamo kwabuk arigos um Pol neyagwrehen iri baraan. <sup>15</sup> Douk kwomnek baraan aria kwani ihishmorim shape okwokwit urupat iri shenek baptais. Douk kwenek baptais worub jurug aria kwakripap kwakri, "Ipak pakri eik yenek bilip um Debeini abom um, yowi puname mupe eikit urupat." Okwok dodogowik otuk aria magipesh okwokwin baraan.

### *Showeshik Pol Iri Sailas Hape Filipai*

<sup>16</sup> Aria anah nyumnah manak um okwudok outuk um munek beten aria onok armatok kwaparugap yah. Okwok douk anam hatoruk um kwunekum mam mour meyoh iri. Enen sagab nyapenyok aria nyape nyakuhur kwakrip arpesan um enenyenen ta nyutogrumesh iri. Namudok aria kwape kwatorumesh debeibori utabor eshesh douk shanatoruk iri. Um agundok kwakrip arpesan um enenyenen ta nyutogrumesh iri um. <sup>17</sup> Okwudok armatok kwagipesh Pol nani apak aria kwape khawhar debeg kwakri namudok kwakri, "Amudok armam douk henek mour um dodogowini Iruhin abom nabouk ihishmorim yoweishi eshudok eneshenesh shabuhuk iri. Amam douk hape hakripep um ahudok yah um Iruhin wata nuraep

\* **16:10:** Enyudok baraan nyakri Luk menyem okwudok Buk iri douk shopunek nani Pol omi hanak. Douk namudok aria douk menyem nakri, "Apak maurim yah aria munak um Masedonia."

putanamori pupe wosik abom um!” <sup>18</sup> Kwenekesh namudok um sabaihi nyumneh arigaha kwenek Pol arigehin umok. Arigaha anah nyumnah natanam nakrip enyudok nyapenyok iri sagab nakri, “Eik yakripen um Jisas Krais ananin nyeigur um nyukutukuk okwudok armatok abom aria nyutograri.” Aria abudok atub nyutob enyudok sagab nyukutukuk abom okwudok armatok.

<sup>19</sup> Arigaha hanatoruk iri hatik um agundok kwukripesh bareaen arpesh aria kwutorumam utabor um douk uwok. Aria hikitak hasuhw Pol nani Sailas hanukam haram um agundok sabaishi apa shanaki shantorum shapeum. Haram um debeimi um abrudok wabur iri. <sup>20</sup> Haram um amam mejistret aria hakripam hakri, “Amudok armam douk anam Juda. Anam hape henek enenyenen abrudok apakibur wabur aria henek arpesh juwehosish aria debeiniy bareaen nyakitak.

<sup>21</sup> Hape hakripesh bareaen um enyudok douk apak Rom apakin lo nyakrium mare mumneken aria mugipeshen iri.” <sup>22</sup> Aria eshudok sabaishi armam armago shopunek shape shanumogesh rohwin bareaen shenekam enenyenen. Namudok aria amam mejistret hatrum hawarukuk amamik rupeh aria hakri um shom shukwumam wagun. <sup>23</sup> Douk shakwumam wagun sabaihi atih sham shenekam enenyenen um jurug aria shenyigram hawish hape shunuweshik-ati urupat. Aria amudok mejistret hakrip anudok neyoh shunuweshik-ati urupat iri um gamo niyohom wosik Pol nani Sailas. <sup>24</sup> Douk mejistret nakripan enyudok dodogowinyi bareaen namudok aria narao amam hawish abom um numunim rum atudok shunuweshik-ati urupat. Hawish aria howem amamigas aiyas anag amaenyigari gagor iri plag, aria nowem kupaigari iruhw aria naweshikag.

<sup>25</sup> Arigaha orokohunib um wab aria Pol nani Sailas hape henek beten aria heyorub aweruh um Iruhin. Eshudok enesh shanak shunuweshik-ati urupat iri douk shape shemnekam. <sup>26</sup> Aria ahudok atuh onok debeikiwi enyik kwatuk kwogwagworish uroruh douk shawaruh um atudok shunuweshik-ati urupat iri. Aria ahudok atuh ihigwumorim witog gwanejik gwanakuk aria senab batokweshihuk ihishmorim shonoweshik iri esheshis wis. <sup>27</sup> Anudok neyoh shunuweshik-ati urupat iri nakitak aria natik um ihigwumorim witog gwanejik gwape. Natik namudok aria nakri ihishmorim shonoweshik iri douk sharuwok aria natuki ananit bainat um nunobo. <sup>28</sup> Aria Pol nahwaragu debeg nakri, “Mare nyunobo! Apak ihipmorim enyudok mape atin!”

<sup>29</sup> Aria anudok neyoh shunuweshik-ati urupat iri nahwaram shurauri eneh nyih. Nahwaragu aria nahur nawish um agundok Pol nani Sailas hapeum. Sheyarubarun aria nanogugur abom nabuh natu agundok Pol iri Sailas hapeum. <sup>30</sup> Douk nikitak naram hatogur aduk aria narigam nakri, “Debeimi armam, eik ta inek mare, um Iruhin ta wata nurae itanamori ipe wosik abom?”

<sup>31</sup> Aria hakripan namudok hakri, “Nyune bilip um Debeini Jisas aria Iruhin ta wata nuraen nyutanamori nyupe wosik abom. Nyak nyuni ihishmorim shape nyakit urupat iri.” <sup>32</sup> Aria hape hakripan Debeini ananin bareaen. Nani eshudok ihishmorim douk shape ananit urupat iri. <sup>33</sup> Namudok aria abudok wab, abudok atub nyutob anan naram nanak nakrup-umam ereb. Aria wab atub anan nani ananish ihishmorim shenek baptais. <sup>34</sup> Aria naram hawish numun ananit urupat nakom anagun worigun ba hagnoh. Anan nani armatok aria batowish shani ihishmorim shani eshes shape esheshit urupat iri shanadudareh abom. Um maresh? Douk eshes shape esheshit urupat iri shanadudareh abom. Um maresh? Douk eshes shape esheshit urupat iri shanadudareh abom. Um maresh?

<sup>35</sup> Ruwahepih ruhur atin aria amam debeimi mejistret heshopoki anam howem shus iri um hanak hakrip anudok neyoh shunuweshik-ati urupat iri hakri, "Nyukweshih amudok biom armam hunak." <sup>36</sup> Hakripan aria anan nanak nakrip Pol nakri, "Amam mejistret heneki baraaen nyanaiki um ikweshihep punak. Namudok aria douk wosik ta pukutukuk atudok shunuweshik-ati urupat punak aria ipakiruh aparuh hur wosik."

<sup>37</sup> Aria Pol nakrip amam howem shus iri nakri, "Ohwak douk onohw um Rom kabi ipak um. Henekumohw rohwin baraaen aria madae huparug enesh yoweishi inahos uwe douk hakri ohwak wenekesh iri, uwok. Aria sabaishi arpesh shape shatruhw aria howeshikohw um eshudok aria henyigrohw wawish wape shunuweshik-ati urupat. Aria douk hakri hushopokohw unabeshuk atin unak aka? Adur atin uwok. Amam mejistret kanak ta hunaki agundok huraohw ukutukuk shunuweshik-ati urupat aria utogur unak."

<sup>38</sup> Aria amam howem shus iri hanak hakrip amam mejistret enyudok baraaen. Douk hemnek um Pol nani Sailas amam douk shopunek anam um eshesh Rom aria hanogugur abom. <sup>39</sup> Hanogugur aria hanak shunuweshik-ati urupat hakrip Pol iri Sailas hakri, "Apak makri gihaucep um enyudok menekeny-umep iri." Douk haram hatograri aduk aria hakripam um hukutukuk abrudok debeiburi wabur hunak kupaigunum. <sup>40</sup> Douk hakutukuk atudok urupat aria hanak um Lidia okwokwit urupat. Hanak hatogur hatik eshesh Kristen aria hakripeshuk enen baraaen um shupe dodogowish um bilip. Hakripeshuk aria hakutish-ukuk aria hanak.

## 17

### *Eshesh Tesalonaika Shakri Shubo Pol Nini Sailas*

<sup>1</sup> Hanak arigaga hanak hatogur Amfipolis aria hatogur Apolonia. Shopunek hakutukuk abrudok wabur aria hanak hatogur Tesalonaika. Anat eshesh Juda shape sheneyagwreh baraaen-atari urupat douk tatao ganudok.

<sup>2</sup> Aria Pol nagipesh ananiih aih, bihatih sisigh nyumneh Sabatih douk madae shunek mour ehi uwe, anan douk nanak nawish atudok urupat shape sheneyagwreh baraaen-atari. Nawish aria nani eshesh Juda shape sheneyagwreh um Iruhin ananin baraaen nyetem ananik Buk iri. <sup>3</sup> Aria gamo nakripesh baugennum Iruhin ananin baraaen. Nakripesh um agundok Iruhin nagraeh Krais um shan nemnek debeiri eriger nagok aria wata shopunek nikitak napeum. Nakripesh namudok nakri, "Anudok Jisas eik apa yakripepuman iri anan douk Krais, douk Iruhin nagraeuan aria neshopokan nanakumori nurao arpesh iri." <sup>4</sup> Enesh Juda shemneken shenek bilip um Debeini Jisas aria shagipesh Pol nani Sailas. Enesh sabaishi Grik shenek lotu um Iruhin iri shani sabaiwari nyeiguhw shato-umo iri armago shopunek wagipesham.

<sup>5</sup> Aria eshesh Juda shenek nyigiya um agundok sabaishi arpesh shagipesh Pol omi um. Aria shanak sharauri sabaishi yoweishi arpesh. Eshudok arpesh douk shapeum shenek yoweishi inahos aria iih shapeum shanaki shape agundok abrudok waburishi apa shanak shantorum shapeum. Abudok nyutob sharauri sabaishi armam armago shanaki shantorum aria abrudok wabur shabruhur shasuabur shenekabur um shenek arpesh um juwehosish sheneyagwreh iri o shahwar um wanohwin baraaen iri. Aria shanak shersharieh Jeson ananit urupat shaurim Pol nani Sailas. Shaurimam um shakri shuparugam aria shuram shutograri um eshudok sabaishi arpesh. <sup>6</sup> Shaurimam aria madae shuparugam uwe aria shasuhw Jeson nani' anam Kristen sharam um debeimi um abrudok wabur iri. Aria shahwar shakri, "Amudok armam douk henek eneshenesh yoweishi

inahos sabairubi warub agundok atap iri. Aria douk amudok hanakumori abrudok apakibur wabur. <sup>7</sup> Hanaki aria Jeson naram hanak hape ananit urupat. Amam douk habrig Sisar ananin lo um hakri anan kupaini king shopunek nape. Hakri ananin nyeigur douk Jisas.” <sup>8</sup> Eshudok sabaishi arpesh shani debeimi abrudok wabur iri shemnek enyudok bараen aria shakitak yowiyokuk aria shape shahwar debeg sheneyagwreh debeiniy bараen. <sup>9</sup> Namudok aria amudok debeimi henek Jeson nani amudok anam hator kwot jurug aria hakweshiham hanak.

### *Pol Nani Sailas Henek Mour Beria*

<sup>10</sup> Aria abudok wab abom eshesh Kristen sheshopok Pol nani Sailas hakutukuk Tesalonaika hanak um Beria. Hanak hatogur aria hanak hawish anat eshesh Juda shape sheneyagwreh bараen-atari urupat. <sup>11</sup> Eshesh Juda shape Tesalonaika iri douk madae shumnek bараen namudok uwe, uwok. Eshudok shape Beria iri douk shakri shumnek amamin shuriguk. Aria iih nyumneh shape shatarih Iruhin ananin bараen um shakri shudukemesh um bараen Pol nakripesh-enyi douk nakripesken adurin o rohwinyi. <sup>12</sup> Shenekeh namudok aria sabaishi Juda shenek bilip um Debeini. Sabaishi nyeiguw shato-umo iri armago wani anam armam eshesh Grik shopunek shenek bilip.

<sup>13</sup> Arigha aria eshesh Juda shape Tesalonaika iri shemnek um agundok Pol nakripesh Iruhin ananin bараen Beria um. Namudok aria shanaki shagiagim armam armago shape Beria iri shohur esheshiruh aparuh aria juwehosish um Pol. <sup>14</sup> Namudok aria arigas atin eshesh Kristen sheshopok Pol nabuhum yous um. Aria Sailas nani Timoti wata hapeik Beria. <sup>15</sup> Amudok armam harao Pol iri douk heiran hanak arigha hanak hatogur debeiburi wabur Atens. Douk wata hakri hutanam um Beria aria Pol nakripam um hukrip Sailas iri Timoti um wata hugipesan anan arigas atin.

### *Pol Nape Nakripesh Iruhin Ananin Baraen Atens*

<sup>16</sup> Aria abudok nyutob nape apa natrugun-umam Atens obi nyutob, ananihw apahw douk yowehw abom um agundok natik abrudok wabur shukunibur um sabaimi madae adurim uwe god omi douk eshesh meyoh shenekom iri. <sup>17</sup> Namudok aria nanak um urupat douk eshesh Juda shape sheneyagwreh bараen-atari aria nani eshesh Juda shani enesh Grik douk shenek lotu um Iruhin iri shape shanogogonim bараen um Iruhin nape iruhw iri. Aria iih nyumneh nanak nani arpesh shanaki shantorum maket iri shape sheneyagwreh. <sup>18</sup> Aria anam tisa omi douk hadukem enenyenen iri hanaki hani Pol harpak bараen. Anam douk shahwaram um Epikurian aria anam shahwaram Stoik iri.\* Anam hakri namudok. Hakri, “Anudok neyagwreh rohwinyi bараen iri douk nakri niyagwreh maren rohwinyi bараen?” Anam hakri, “Aria nakri nukripap bараen um anam kupairubi warubim god omi aka?”

Hakri enyudok bараen um maresh, hemnek Pol nakripesh um Jisas ananin yopinyi bараen aria nakripesh um agundok nagok wata naktakumori. <sup>19</sup> Namudok aria harao Pol hatoum anag mihib nyeigurigum Ariopagus. Agag douk anam debeimi kaunsolomi hantorum hapeum. Hanak hakih aria hakripan hakri, “Apak makri gamo mudukemesh um enyudok namunyi bараen nyak nyape nyakripesh-enyi. <sup>20</sup> Enen bараen memneken nyakriyen iri, riguk apak douk mадae mumneken atin uwe,

\* **17:18:** Abudok biyab lainabim armam douk shahwaram um Epikurian iri Stoik, amudok armam apa hagipesh seiwokimi hadukem enenyenen iri amampi urkwip.

uwok. Namudok aria apak makri mudukem baugenyum enyudok baraen.”  
**21** Ihishmorim eshesh Atens shani kupairubi warubish shanaki shani eshesh shape abrudok wabur Atens iri, eshesih nyumneh douk shakri shupe meyoh aria shunupe um shunakripesh um namunyi baraen aria shumneken.

**22** Namudok aria Pol nakitak neyotu natik amudok hadukem enenyenen iri um agudok mihib Areopagus aria nakri, “Ipak pape abrudok wabur Atens iri, eik yatrip um ipak dodogowip atip abom um agundok penek eneheneh aih um penek lotu um. **23** Sagomatin yarahaen yanak abrudok ipakibur wabur yatik eneshenesh penek lotumesh iri. Yarahaen yanak aria yanak yaparug enen alta shopunek douk powem eshudok penek ofamesh iri. Aria enyudok alta showem enen baraen nyakri,

**ENYUDOK ALTA DOUK ANAN GOD MADAÉ MUDUKEMAN IRI UWE ANANIN.**

Aria anudok Iruhin douk penek lotuman meyoh aria madae pudukeman iri uwe, anan douk anudok eik yape yakripep-uman.

**24** “Anudok Iruhin douk neneb agundok atap nari eneshenesh shapenya-gun iri, anan douk debeini abom um iruhw heven aria agundok atap. Aria lotuig urusag arpesh sharukog-uman iri douk madae nupenyog atin uwe, uwok. **25** Anan douk madae eneshenesh wokan um enesh eshudok eneshenesh aria nukri um enesh arpesh shukon roguhw shutauruman um enesh eshudok eneshenesh uwe, uwok. Anan kanak norukwop yapis apak ihismorim. Aria nataurumop dodogowip mape marahaen aria nakop ihismorim eneshenesh um ihismorim arpesh. **26** Iruhin neneb atun arman aria ihismorim awirosish arpesh sisigiruh yegeshiweruh nenebesh shakitak anudok atur arman ananip awirop. Aria anan kanak nohur asudok awirosish arpesh shanak ihigunum agundok atap sisigun atin shanak shape. Watak nukwarum asudok awirosish arpesh sisigiruh yegeshiweruh uwe aria nagraeh esheshish kwarahos douk ta shunak shupe abudok amnab anan nakri um shunak shupeum. Neyabigesh amnab sisig atin um agundok banak batuh um aria sharab batogur eshesib. **27** Nenebesh namudok um shupe shutrugun-uman shunak arigah arigaha wosik um ta shuparugan abom um. Aria anan douk madae nupeik rougun um apak ihismorim atin atin uwe, uwok. **28** Kabi enen arpen nyakrium. Nyakri, ‘Anan norukwop yapis neneb mape marahaen kabi douk mape um.’ Kabi anam ipakimi douk hadukemesh aria heyagwreh enenyenen baraen iri hakri um. Hakri, ‘Apak shopunek ananish batowish.’” **29** Aria Pol baraen apa nakri, “Apak mape Iruhin ananish batowish aria mare wata mukri anan douk nape kabi gol o siliwa o nape kabi anam utom um, uwok. Mare mukri enesh shadukemesh iri arpesh meyoh urkwip por aria douk shenekan esheshis wis, uwok.

**30** “Seiwock arpesh watak shudukemesh obi nyutob uwe, Iruhin douk madae niyangwreh nuriguk um enenyenen eshesh shape shenekan abudok nyutob iri uwe, uwok. Aria douk nakripap dodogowinyi baraen ihismorim arpesh mape ihirub warub iri. Nakri mukeshuk agabus yoweishi inahos aria mutanam mukon aparuh anan. **31** Umum maresh? Anan douk nagraeh anah nyumnah hapeum ta debeiti kwot tunenek um. Atudok kwot ta nunek kwot um ihismorim arpesh um eneshenesh menekesh iri. Atat douk adurit abom kwot. Aria Iruhin nagraeh anan arman um ta nupe debeini nusuwh atudok kwot iri. Anudok arman douk nagok aria Iruhin wata nonohur nakitak nape. Namudok aria apak ihismorim douk madukemesh makri adur abom um kweipon anan ta nusuwh atudok debeiti kwot.”

<sup>32</sup> Douk shemnek um agundok Pol nakri anan arman nagok aria wata nikitak um aria enesh shanumogesh abom anan. Aria enesh shakri, “Apak makri mumneken um gamo nyukripap enyudok atin baraen.” <sup>33</sup> Namudok aria Pol nakutishukuk natogur nanak. <sup>34</sup> Aria anam armam hagipes Pol hanak aria henek bilip um Jisas. Amudok armam, anan Dionisius. Anan douk nani amudok debeimi armam amam hantorum hape agudok mihib Areopagus iri atin mour. Anan nani onok armatok shahwarok um Damaris iri kwani enesh arpesh shopunek. Eshesh shenek bilip um Krais aria shagipes Pol.

## 18

### *Pol Nanak Neneh Mour Korin*

<sup>1</sup> Enyudok nyanakuk aria Pol nakutukuk Atens nanak um Korin. <sup>2</sup> Nanak natogur aria naparug anan arman um eshesh Juda. Ananin nyeigur Akwila aria douk shanabuki agudok shokugi nahobig Pontus. Madae roubi uwe nani ananik irohukwik Prisila shakutukuk agudok nahobig Itali shanakumori Korin. Um maresh? Klodius douk nape debeimi gavman um eshesh Rom iri neshopok ihishmorim Juda um shukutukuk Rom shunakuk. Pol nanak natrish <sup>3</sup> aria nani eshesh shape abom. Shape aria nani eshesh shape shenek mour. Um maresh? Anan shopunek natape urupatish selahos kabi eshesh um. Shatapeyesh um kupaishi shutorish shukesh utabor aria shunak shukwisch um shurok urusag. <sup>4</sup> Iih nyumneh douk eshesh Juda mour uwok shape meyoh ehi, anan douk nanak nawish um eshesh Juda shape sheneyagwreh baraen-atari urupat. Nawish aria dodogowin atun nani eshesh shape sheneyagwreh. Um nakri nuhur eshesh Juda shuni eshesh Grik esheship urkwip aria shunek bilip um Jisas.

<sup>5</sup> Abudok nyutob Sailas nani Timoti hakutukuk agudok shokugi nahobig Masedonia hanaki obi nyutob, Pol iih nyumneh napeum nakripesh Iruhin ananin yopinyi baraen. Dodogowin atun nakrip eshesh Juda nakri, “Jisas anan Krais, douk Iruhin nagrahan aria neshopokan nanakumori nurao arpesh iri.” <sup>6</sup> Aria shanabukan arigos um ananin baraen aria shakripan enyeneten. Namudok aria nekeshuk agab nikitak nenegeuk ehudok aih um agundok madae shumnek Iruhin ananin baraen um uwe. Nakitak nagudupeshuk nyupruk ananii rupeh kwakusuk aria nakripeshuk dodogowinyi baraen nakri, “Ipak pakri punak puwishuk um, enyudok douk madae eik inekep um douk punak puwishuk uwe, uwok. Ipak meyoh peneken um ipak kanak. Aria douk eik ta inak um kupaishi douk eshesh madae Juda iri uwe aria ta ikripeshen.”

<sup>7</sup> Aria nakutukuk atudok urupat eshesh Juda shape sheneyagwreh baraen-atari aria nanak um Titius Jastus ananit urupat. Titius Jastus douk neneh lotu um Iruhin iri. Ananit urupat douk tatao hurukatin um atudok urupat. <sup>8</sup> Anan arman shahwaran um Krispus iri douk debeini um atudok eshesh Juda shape sheneyagwreh baraen-atari urupat. Krispus nani ihishmorim shape ananit urupat iri douk shenek bilip um Debeini. Sabaishi Korin shopunek shemnek Pol nakripesh-enyi baraen shenek bilip aria shenek baptais.

<sup>9</sup> Aria anab wab Pol natik enesh eshudok kabi nabo yomnis natrish um. Natrish aria Debeini nakripesch nakri, “Mare nyunogugur nyukri nokwat tishuk, uwok. Nyukripesch baraen aria mare nyukri nyubukuk enyudok nyeneken iri mour, uwok. <sup>10</sup> Um maresh? Eik yani nyak yape huruk aria ta mare enesh arpesh shukri shuneken enyeneten, uwok. Um maresh? Sabaishi abrudok waburishi watak shunek bilip iri uwe douk eikish.”

**11** Aria Pol nepe nani eshesh um enen shuknin enen tukwanin kwarahos abrudok wabur Korin. Nape nakripesh Iruhin ananin bareaen.

**12** Arigaha anob nyutob aria Galio nepe debeini gavman um abudok debeibi amnab douk shahwarab Akaia iri. Aria abudok nyutob eshesh Juda shantorum shape shabo bareaen aria shakitak shasuhw Pol sharanum kwot.

**13** Shanak aria shakri, "Anudok arman nepe nohur arpesh um shubrig lo aria shugipesh eneh sikh aih um shunek lotu um Iruhin um."

**14** Pol nakri um nuwanam bareaen aria Galio nakrip eshesh Juda nakri, "Anudok arman nuneke enen shokwinyi o debeinyi ina um, eik ta ikri wosik um imnekat ipak Juda ipakit kwot. **15** Aria enyudok douk panatutukem um bareaen nyani eneh nyeiguuhw iri um enen ipakin lo. Aria eik ta mare imnek ipakig kwotog um enyudokmori, uwok. Ipak kanak punak punagabeyen."

**16** Aria neyagwreh dodog um shutogur shunak aria apa shakutukuk urupat shasuhw kwotog-atari aria shatogur shanak. **17** Namudok aria shakitak shasuhw Sostenes douk debeini um eshesh Juda shape sheneyagwreh bareaen-atari urupat iri aria shan agundok adukitum kwotogit urupat tataoum. Shan aria Galio nepe nanatrish meyoh. Madae nukri enen bareaen uwe, uwok.

### *Pol Natanam Um Abrudok Wabur Antiock Douk Bape Agudok Debeigi Nahobig Siria Iri*

**18** Pol wata nani eshesh Kristen nepe sabaihi nyumneh abrudok wabur Korin. Aria wata nakutishukuk nani Prisila kwani Akwila sharao korohuk shanak um debeigi nahobig Siria. Watak shurao korohuk uwe aria Pol nakitak natupok ananig barag banog um abrudok wabur Senkria. Nenekeksh namudok um maresh, anan douk nakripan enen adurin atinya bareaen Iruhin abom um nunek eneh eshudok eneshenesh. **19** Shanak arigaha shanak shatogur Efesus aria Pol nakutukuk Prisila kwani Akwila agundok. Anan nanak nawish eshesh Juda shape sheneyagwreh bareaen atari urupat aria nani eshesh Juda shape shanogogonim um bareaen um nakri nishuhur um shunek bilip um Jisas. **20** Aria eshesh douk shariganum nini eshesh nupe eneh nyumneh shopunek. Aria anan nakripesh um uwok. **21** Aria abudok nyutob nakri nakutishukuk nunak obi nyutob, anan douk nakripeshuk namudok. Nakri, "Aria Iruhin nukri wosik um, eik ta wata itanamori itrip." Nakripeshuk aria nanak nato korohuk kwakutukuk Efesus kwanak. **22** Arigaha kwatogur kweir Sisaria aria nabuh nanak um Jerusalem. Nanak natik eshesh Iruhin ananish arpesh shani esheshim debeimi nenemeshuk yopuhi nyumannah aria wata nabuh-ukuk um Antiock. **23** Pol nabuh nepe roubi nyutob Antiock um jurug aria wata nakutuburuk nanak. Nanak nawish nanak sabairubi warub abudok debeibi amnab Galesia iri Frigia aria nepe nakripaguk eshesh shagipesh Jisas iri um shupe dodogowish um bilip.

### *Apolos Nakripesh Iruhin Ananin Bareaen Efesus*

**24** Aria anan arman um eshesh Juda douk shahwaran um Apolos iri nanakumori Efesus. Anan douk shanabuki wabur Aleksandria. Nadukem enenyenen abom aria neyagwreh nakripesh bareaen wosik. Bareaen nyetem Iruhin ananik Buk iri douk nadukemen wosik. **25** Riguk eneh shenek skuluman um Debeini ananah yah aria douk anan dodogowin atun abom nakripesh wosik um Jisas nenekeksh iri. Aria anan madae gamo nudukemen uwe Jisas ananin bareaen uwe, uwok. Nadukem enyudok wosik, douk Jon nenekek baptaisumesh iri nakripesh-enyi atin. **26** Nanak nawish eshesh Juda shape sheneyagwreh bareaen-atari urupat aria dodogowin atun nepe

nakripesh baraen. Madae nunogugur um eshesh armam armago uwe, uwok. Arigaha Prisila kwani Akwila shemnekan aria sharan shanak um esheshit urupat. Shanak aria gamo shakripan wosik um ahudok yah douk Iruhin nakri um arpesh shugipesiah iri. <sup>27</sup> Arigaha aria Apolos nakri nunak um agudok shokugi nahobig shohwarag Akaia um. Aria eshesh Efesus douk shagipesiah Jisas iri shatauruman shenekumesh anap shup eshesh Kristen shape Akaia iri. Shenekap um shakri nunak nutogur aria mare shukonuguk agabus, aria shutauruman. Douk nanak natogur aria nataurumesh wosik abom eshesh Kristen douk Iruhin nataurumesh meyoh aria shasuhw ananin baraen dodog shagipesien iri. <sup>28</sup> Baraen eshesh Juda shariganum agundok sabaishi arpesh shantorum shapeum douk ddogowin atun nagapeshen-umesh. Ddogowin atun nabukuk esheshin rihirahaemin baraen aria gamo neyabigen wosik baraen nyetem Iruhin ananik Buk iri um Jisas. Nakri Jisas anan Krais, douk Iruhin nagraehan aria neshopokan nanakumori nurao arpesh iri.

## 19

### *Pol Neneck Mour Wabur Efesus*

<sup>1</sup> Abudok nyutob Apolos wata nape Korin obi nyutob, Pol douk narpogun nanaki orokohunig um agudok shokugi nahobig Galesia arigaha nanak natograri Efesus. Natograri Efesus aria naparug enesh shagipesiah Jisas iri shape agundok. <sup>2</sup> Aria narigesh nakri, “Abudok nyutob penek bilip um Debeini obi nyutob, ipak ta paraen aka, uwok enyudok Iruhin ananin Mishin?”

Aria shakripan shakri, “Uwok. Apak madae karowih mumnek um enen Iruhin ananin Mishin douk nyape uwe, uwok.” <sup>3</sup> Aria Pol narigesh nakri, “Aria abudok nyutob penek baptais obi nyutob, ipak douk penek baptais mumam?”

Aria shakripan shakri, “Monek baptais kabi Jon nakrupesh abar aria neneck baptaisumesh um.”

<sup>4</sup> Aria Pol nakripesh nakri, “Riguk Jon neneck baptaisumesh abar aria nakripesh nakri, ‘Ipak pukeshuk agabus yoweishi inahos putanam pukon aparuhan Iruhin aria punek baptais abar. Aria punek bilip um anudok Debeini douk ta nugimori eik iri.’ Anudok arman douk Jisas.” <sup>5</sup> Douk shemnek enyudok baraen aria shenek baptais abar um Debeini Jisas ananin nyeigur. <sup>6</sup> Pol nowemesh wis aria enyudok Iruhin ananin Mishin nyabuhi nyawishesh aria shape shakripesh kupakupainyi baraen. Aria shape sheneyagwreh Iruhin ananin baraen kabi amam profet hakripeshen um. <sup>7</sup> Amudok harao Iruhin ananin Mishin iri douk hurukatin um 12-poreim armam.

<sup>8</sup> Pol nanak nawish eshesh Juda shape sheneyagwreh baraen-atari urupat aria ddogowin atun nape nakripesh Iruhin ananin baraen. Neneck enyudok um biyab atun aub. Nakripesh aria nabirak um nakri nuhur esheshiruh aparuhan um shunek bilip um Jisas aria shuwish agundok Iruhin nape Debeini um ananish arpesh um. <sup>9</sup> Nakripesh aria enesh douk baragos seshuk abom aria madae shunek bilip uwe, uwok. Namudok aria shape sheneyagwreh enenyenen yoweini baraen um Debeini ananish Yah. Sheneyagwreh yopugunum atugun aria sabaishi arpesh shape shemnek. Namudok aria Pol nakwutish-ukuk narao eshesh shagipesiah Krais iri atish shanaman shanak. Shanaman aria iihh nyumneh nape nakripesh Debeini ananin baraen numun anat urupat douk Tiranus nape neneck skulum

arpesh atari. <sup>10</sup> Nenekesh namudok um biyesh kwarahos arigaha ihishmorim Juda shani eshesh Grik douk shape agudok shokugi nahobig Esia iri shemnek Debeini ananin baraen.

### *Skeva Ananim 7-poreim Nugamim Hakri Hugapesh Anan Sagab Nyapenyan Iri Arman*

<sup>11</sup> Iruhin nataurum Pol dodogowin atun aria nenek enen sik Iruhin atun neneken iri mour. <sup>12</sup> Namudok aria sharauri anas hankisis o rupehis shanaki shasem Pol aria shanak shasem eshudok arugeh haesh iri aria wata yopish. Sagabehos shapenyesh iri shakutishukuk aria wata yopish.

<sup>13</sup> Aria enesh Juda douk sharahaen shanak shagabe sagabehos shapenyesh iri douk shopunek shawkiraeh um shugabeyesh um Debeini Jisas ananin nyeigur. Shakripesh namudok sagabehos. Shakri, "Apak makripep dodog um Pol nakripesh-uman iri Jisas ananin nyeigur um pukutukuk eshudok arpesh putogur punakuk." <sup>14</sup> Aria anan eshesh Juda esheshin debeini pris shahwaran um Skeva iri douk nabuki 7-poreim nugamim. Aria ananim nugamim douk hape henek enyudok. <sup>15</sup> Anah nyumnah hanak hape hagapesh anan arman aria sagab nyape anudok arman iri nyakripam namudok. Nyakri, "Eik yadukem Jisas nani Pol atum. Aria ipak meipari?" <sup>16</sup> Aria enyudok sagab nyapenyan iri arman nakitaki nam yowem. Nam henenem ereb aria amamiruh yegeshiweruh hape yoweruh abom. Nam nakweshih-umam rupeh aria hagor hape hakutukuk ananit urupat haruwok hanak.

<sup>17</sup> Aria ihishmorim Juda shani eshesh Grik shape Efesus iri shemnek um enyudok aria shanogugur abom. Aria shatuk Debeini Jisas ananin nyeigur nyato iruhw abom. <sup>18</sup> Sabaishi arpesh douk shenek bilip iri shanaki agundok sabaishi arpesh shantorum shapeum aria shawereh eneshenesh yoweishi inahos riguk shape shenekesh iri. <sup>19</sup> Sabaishi arpesh douk shapeum shenek ouruh hani sabagwiruh iri sharauri esheshiyu bumeb douk baraen nyakrium enyudokmori nyetemo iri. Sharao shanaki aria shashaiweh agundok ihishmorim arpesh shapeum. Shadareh utabor shukri shutor oudok bumeb akure, douk butogur debeibori abom um 50,000 kina. <sup>20</sup> Namudok aria Debeini ananin baraen nyatogur dodogowin atin abom nyenek mour arpesh shatogur dodogowish um bilip aria shanak shakripeshaen sabaigunum.

### *Eshesh Efesus Juwehosish Aria Shahwar Shakripan Enenyen Pol*

<sup>21</sup> Enyudok nyatogur nyanakuk aria Pol anan urkum morum nakri nunak um agusudok biogos shokugosi nahobigos Masedonia iri Akaia. Nakri nunak um agundok jurug aria douk nunak um Jerusalem. Aria Pol nakri namudok nakri, "Douk inak itogur Jerusalem um jurug aria eik ta inak itik debeiburi wabur Rom shopunek." <sup>22</sup> Aria Pol neshopok Timoti nani Erastus hanak um Masedonia. Amudok biom armam douk hataurum Iruhin ananin mour iri. Aria anan wata napeik agudok shokugi nahobig Esia.

<sup>23</sup> Aria abudok nyutob abom dedebeinyi atinyi baraen nyakitak Efesus um ahudok Debeini ananah Yah. <sup>24</sup> Anan arman shahwaran um Demitrius iri apa nakwu siliwa nenek aboriguh aria eshudok eneshenesh. Aria anan douk nenek enen bisnis um shakwu siliwa shenek aboriguh um shokushokugwi urusag tempel. Shenekog gwape kabi debeiti urupat douk shenek lotu um rohwikwi armatok kwonohwaram god iri shahwarok um Artemis iri. Anan nakom sabainyi mour henek mour um siliwa iri aria harao debeibori utabor abom. <sup>25</sup> Aria Demitrius nahwar amudok armam

hani enesh arpesh shenek enyudokmori mour iri shanaki shantorum atugun aria nakripesch nakri, “Ipak douk munek enyudok atin mour iri, ipak padukemesh. Apak maparug debeibori utabor um douk maparugabor um enyudok mour meneken iri. <sup>26</sup> Ipak kanak wosik patrin jurug aria pemneken enyudok anudok arman Pol nenenken iri. Nakri amam debeimi god omi douk arpesh shenekam esheshis wis iri madae adurimi uwe, uwok. Nakripesch namudok douk nyabuh sabashi arpesh eshesiruh aparuh aria shakri ananin baraen douk adurin. Nakripeshen abrudok wabur Efesus aria shopunek hurukatin um ihishmorim arpesh shape agudok shokugi nahobig Esia iri shemneken shatuh. <sup>27</sup> Enyudok Pol ananin baraen ta nyunek apakin bisnis nyurao yoweinyi nyeigur. Aria douk madae enyudok atin uwe, uwok. Aria arpesh ta shukri atudok urupat munek lotu um okwudok armatok god Artemis um douk nyeigur uwokat. Aria okwudok armatok god Artemis douk ihishmorim arpesh shape Esia iri shani ihishmorim shape ihirub warub agundok atap iri shenek lotumok. Aria Pol ananin baraen ta nyunek okwokwin debeiniyi nyeigur mare wata nyuto iruhw, uwok.”

<sup>28</sup> Douk eshudok sabaishi arpesh shemnek enyudok baraen juwehosish abom aria shakitak shahwar debeg shakri, “Apak Efesus apakik armatok god Artemis douk debeikwi abom!” <sup>29</sup> Namudok aria ihishmorim abrudok waburish arpesh shape shahwar debeg atin. Aria shasuhw Gaius nani Aristarkus shanukam sharam shanak um agundok eshesh apa shanak shantorum shapeum. Amudok armam douk hanaki Masedonia aria hani Pol hape harahaen iri. <sup>30</sup> Pol nakri nunak agundok shantorum um aria nukripesch enen baraen, aria eshesh shagipesh Jisas iri shakri uwok aria shasuhweshan nape. <sup>31</sup> Anam armam douk debeimi um gavman um agudok shokugi nahobig Esia iri douk Pol ananim arpeshim. Amudok armam shopunek henekumani baraen um mare nunak agundok shantorum shape sheneyagwreh baraen um, uwok.

<sup>32</sup> Aria eshudok sabaishi arpesh shape shahwar debeg atin. Enesh shahwar enen baraen aria enesh shahwar enen sik. Shenekeh namudok um maresh, sabaishi madae shudukem baugeniyum baraen um agundok shanaki shantorum um, uwok. <sup>33</sup> Eshesh Juda shenyigur Aleksander nawish orokohunish um eshudok sabaishi arpesh aria enesh shakripan um baugeniyum baraen. Aria nawaurumesh rogur um nakri eshesh mokureg aria nawanamesh baraen. <sup>34</sup> Neyotu aria eshesh shemnek um anan douk anan Juda aria ihishmorim shenek atut nokwat shahwar debeg shakri, “Apak Efesus apakik armatok god Artemis douk debeikwi abom!” Shape apa shahwar namudok roubi nyutob um biyen aua.

<sup>35</sup> Arigah aria anan debeini um gavman um abrudok debeiburi wabur iri nenekeh mukareg. Aria nakripesch nakri, “Ipak armam armago pape Efesus iri, ihishmorim arpesh douk shadukemesh shakri ipak abrudok waburip pogrem atudok debeikwi godik okwokwit urupat douk penek lotuat iri. Amudok okwokwim utom magruki iruhw utag aria penek lotumam iri douk shopunek ipak pogremam. <sup>36</sup> Ta mare enen arpen nyukri nyununu enyudok baraen, uwok. Aria douk mokureg mare pukri punek enen enyudok arigas, uwok. <sup>37</sup> Amudok biom armam douk madae hukwumesh-aruh enesh eshudok gani numunig um lotuig urusag o hiyagwreh enenyen yoweinyi baraen um apakik debeikwi godik Artemis uwe, uwok. Aria amudok douk param hanaki meyoh. <sup>38</sup> Aria Demitrius nini ananim henekuman mour iri hukri hunekuman kwot enen arpen um, aria nyumneh kwotog gwunenek ehi douk hape. Amam debeimi um gavman

iri douk hape, um Demitrius nini ananish shunak shugapesha bareaen um. <sup>39</sup> Ipak enen bareaen shopunek um, aria abudok nyutob abrudok waburish shunak shunatorum shupe shiyagwreh bareaen obi nyutob, aria ipak douk punak pugabeyen. <sup>40</sup> Doukiah apak ta enen bareaen nyupenyap um mohur enyudok aria juwehosip mahwar mariguk um. Amam debeimi um gavman um Rom iri hukri horigap hunekumap bareaen akure, apak ta mare muwanamam enen baugenyum bareaen um enyudok apak meneken iri, ta uwok.” <sup>41</sup> Douk nakripesh enyudok bareaen um jurug aria nakripesh shanosiyam.

## 20

### *Pol Nanak Um Masedonia Gani Agudok Nahobig Grik*

<sup>1</sup> Douk enyudok bareaen nyanak nyawishuk, um arpesh juwehosish shahwarum, aria Pol nahwar eshesh Kristen um shunaki shutrun. Shanaki douk nakripeshuk enen bareaen um shupe dodogowish um Debeini aria nenemeshuk yopuhi nyumnah. Aria nakutishukuk nanak um shokugi nahobig Masedonia. <sup>2</sup> Nawish nanak agudok shokugi nahobig aria nape nakripeshuk sabainyi bareaen eshesh Kristen um shupe dodogowish um Debeini. Arigaha aria douk nanak natogur agudok nahobig Grik. <sup>3</sup> Natogur nape biyab atun aub. Aria abudok nyutob nape nagabe eneshenes um nakri nurao korohuk nunak um agudok nahobig Siria obi nyutob, enen bareaen nyanaki nyadukan. Um agundok amam Juda hakri hon nugok um. Namudok aria Pol wata urkum morum nutanam um Masedonia. <sup>4</sup> Pirus ananin nugarin shahwaran um Sopater iri douk nanaman hanak. Anan douk nanaki wabur nyeigur-iburum Beria. Amudok anam shopunek heiran. Amamish nyeigu hw eshudok. Aristarkus nani Sekundus. Amam biom douk hanaki wabur Tesalonaika. Anan Gaius. Anan nanaki wabur nyeigur-iburum Derbe. Anan Timoti aria amudok anam biom hanaki agudok shokugi nahobig Esia iri shopunek heiran. Amam douk Trofimus nani Tikikus. <sup>5</sup> Amudok armam harik aria hatogur hape heyotumap Troas. <sup>6</sup> Ahudok nyumneh douk eshesh Juda shenek worigun shawok bret douk shashaiteh madae tukitak debeiti iri uwe habuh hanakuk. Aria apak marao korohuk makutukuk Filipai manak.\* Hakri um 5-poreih nyumneh hanak hadiguk um, aria manak matogur maparug amudok harik iri abrudok wabur Troas. Maparugam aria mape atug wik agundok.

### *Yutikus Nagok Aria Pol Nonohur Nakitak Nape Abrudok Wabur Troas*

<sup>7</sup> Mape aria Sarere wab manak mani eshesh Jisas ananish arpesh mantorum mape um muwok worigun aria murao Komunio. Pol nape nakripesh rounyi bareaen arigah orokohunib um wab. Um maresh, anan nakri nukutishukuk nunak ruwahepih iri. <sup>8</sup> Amudok mantorum mapenyomi iruhwim rum douk sabaishi lamhos hanish shataur. <sup>9</sup> Aria anan weroroini arman shahwaran um Yutikus iri douk natem windua. Abudok nyutob Pol wata nape neyagwreh obi nyutob, Yutikus yobus sape san aria nabes sape seshuk arigah arigaha neshuh nagok abom. Neshuh nagok aria biyep rip uwok, nagruki iruhwim abom natu nagruki nabuh nakus atap. Douk shabuhi shonohur aria shatik iganigadea nagok. <sup>10</sup> Namudok aria Pol nabuh neshuh netem iruhin um hakus aria nakripesh nakri, “Ipakish mishish mare yowesh, uwok. Mishin wosik wata nyaran!” <sup>11</sup> Aria Pol wata

\* **20:6:** Sabaishi shadukemesh iri shakri Pol nanak natogur Filipai aria narao amudok anam hani Luk douk nenyem okwudok Buk iri aria hanak. Namudok aria douk nowem enyudok bareaen “Apak”. Putik Aposel 16:10.

naraesh shato iruhw urupat shakih nawor bret shatoh. Douk shatoh jurug aria nani eshesh shape sheneyagwreh roubi nyutob arigaha gagruk aria nakutish-ukuk nanak.<sup>12</sup> Anudok weroroini arman douk nape wosik aria ruwahep sharan shanak um gani eshesh shapeum. Aria esheshiruh aparuh wata hanadudareh abom.

### *Pol Nakutukuk Troas Nanak um Miletus*

<sup>13</sup> Aria apak marik manak marao korohuk aria manak um anabur wabur nyeigur-iburum Asos. Pol nanaki atapih aria nakripap um mutogur mupe mutrugun um nutograri aria muran munak.<sup>14</sup> Douk nanaki naparugap Asos aria matukan korohuk manak um Mitilini.<sup>15</sup> Makutukuk Mitilini aria ruwahepih manak matogur hurukatin um enen unai nyeigurinyum Kios. Douk anah nyumnah hanak hadiguk aria manak matogur Samos. Matogur Samos aria ruwahepih wata manak matogur Miletus.<sup>16</sup> Pol anan urkum morum nakri mare nunak nutogur Efesus, uwok. Nakri uwok um nupe eneh nyumneh agudok shokugi nahobig Esia hunakuk meyoh. Um maresh? Nakri ta dodogowin um, nakri nunak nutogur Jerusalem aria ahudok debeihi nyumnah shahwarah um Pentikos iri ta hutogur.

### *Pol Nakomaguk Roguhw Aria Nakripamuk Baraen Amam Iruhin Ananish Arpesh Esheshim Debeimi Hape Efesus Iri*

<sup>17</sup> Manak matogur mape Miletus aria Pol neneb baraen nyanak um amam Iruhin ananish arpesh esheshim debeimi hape Efesus iri um hunaki hutrun.<sup>18</sup> Hanak hatograri aria nakripam nakri, "Sagomatin yanak yatograri agudok shokugi nahobig Esia aria iih nyumneh yani ipak mape yenekeh iri aih douk padukemeh.<sup>19</sup> Ipak padukemeh. Ehudok sabaihi nyumneh yape yenek Debeini ananin mour ahi, eshesh Juda douk shabo baraen um she. Aria yaunih eik kanak, aria yereh abih atih abom yenek ananin mour.<sup>20</sup> Aria douk padukemeh. Madae inogugur uwe, um agundok yakritep ihinyumorim yopinyi baraen um ta nyutaurumep iri um uwe, uwok. Abudok nyutob yakripen agundok sabaihi shantorum um aria ipakig urusag um, eik douk madae kutukure uwe, uwok.<sup>21</sup> Dodogoiwe atuwe yakripesh dodogowinyi baraen eshesh Juda shani eshesh madae Juda iri uwe. Yakripesh um shukenyuk agabus yoweiniyi shatanam shukon aparuh Iruhin aria shunek bilip um apakin Debeini Jisas.

<sup>22</sup> Aria douk ta igipesh Iruhin ananin Mishin nyakripeny iri baraen aria ta inak um Jerusalem. Inak aria madae idukemeh uwe um ta maresh shutogrume.<sup>23</sup> Yadukemeh um ihirub debeirubi warub inak arub iri, Iruhin ananin Mishin douk nyakripe um ta shuweshike inoweshik ipe aria ta shuke sabainyi amaen.

<sup>24</sup> Aria eik madae inogugur igok um uwe, uwok. Yanahwar hwarohiwe meyoh. Yakri arigaha iyatak ahudok yah um inek enyudok Debeini Jisas nekeyen um ineken iri mour arigah ineken iyaten. Enyudok mour um ikripesh Iruhin ananin yopinyi baraen um agundok nutaurumap meyoh um.

<sup>25</sup> Aria douk pumnek. Riguk yarahaen yape yakritep baraen ipak ihipmorim um arpesh shuwish agundok Iruhin nape Debeini um ananish arpesh um. Aria douk, eik yadukemeh abom um ipak ta mare wata enen arpen nyutiwe shopunek, uwok.<sup>26</sup> Namudok aria douk yakri ikritep enyudok dodogowinyi baraen ahudok nyumnah. Baraen enyudok. Aria ipak enep pakri pukonaguk agabus Iruhin aria pakri punak puwishuk um, baugeniyum baraen madae nyupe um eik uwe, uwok.<sup>27</sup> Um maresh? Eik madae inogugur aria ibeshukuk enen baraen nyurmek um ihinyumorim

baugenyum baraen um mour douk Iruhin nakri um nuneken iri. <sup>28</sup> Ipak gamo pudukemesh aria ipak kanak puni ihishmorim Iruhin ananish arpesh douk ananin Mishin nyekepesh um putaurumesh iri. Gamo putaurumesh aria putaurumesh wosik ananish arpesh douk ananin Nuganin nagok natorish ananibor owichibor iri. <sup>29</sup> Eik yadukemesh. Ta eik inakuk aria henek rohwumesh iri armam ta hunaki um ipak aria hunek rohwum Iruhin ananish arpesh kabi wanarig nubag um. <sup>30</sup> Nyutob ta bunaki, um anam armam ipak kanak ta hukripesh enen rohwin baraen eshesh shagipesh Jisas iri um hunukesh shukitak shugipesham um. <sup>31</sup> Namudok aria gamo pudukemesh. Aria ipakip urkwip purum eshudok biyesh atin kwarahos, nyumnah wab yape yakriep baraen um ipak ihipmorim. Yareh abih atih aria yape yenek skulumep.

<sup>32</sup> Namudok aria douk yepuraguk Iruhin ananis wis um nutaur-umep. Shopunek ananin baraen um agundok anan yopun um ipak aria nutaur-umep meyoh um ta nyutaur-umep pupe dodogowip. Enyen ta nyutaur-umep nyunekip pugrem yopishi eshudok eneshenesh douk Iruhin nakri um nuko eshudok arpesh douk nenekeh shape ananish atish iri.

<sup>33</sup> Eik madae inek nyigiya um kupaishieh rupeh o esheshibor utabor kabi siliwa iri gol um uwe, uwok. <sup>34</sup> Ipak kanak padukemesh. Yakwu asudok eikis wis yenek mour yakwaram eshudok douk eik yani eikim henek mour hani eik mashoh iri. <sup>35</sup> Sabaihi aih aria mour eik yeneken iri, eik douk yeayabige um munek mour dodogowip atup namudok um mutaurum eshudok madae dodogowish um shunek mour aria yaruhih iri. Aria apak ta urkwip purum enyudok baraen douk Debeini Jisas anan meyoh nakriyenyuk iri. Baraen enyudok, nakri, 'Meinyi arpen nyukri nyukesh enesh eshudok kupaishi, enyudok arpen douk nyanadudareh abom nyariguk nyeshagrakuk agundok kupaishi arpesh sheken enesh eshudok aria nyanadudareh um.'

<sup>36</sup> Douk Pol nakripam enyudok baraen um jurug, nabuh noduk ohrubus aria nani amudok ihm-morim armam henek beten um Iruhin. <sup>37</sup> Aria ihm-morim hereh, hanasupam aria hanoprikan. <sup>38</sup> Amamip urkwip yowep abom aria hereh um enyudok baraen douk Pol nakri um ta mare wata hutrun um. Aria haran hanak um korohuk.

## 21

### *Pol Narao Korohuk Nanak um Jerusalem*

<sup>1</sup> Douk makutukuk amudok debeimi manak mato korohuk aria manak. Mahur mabrig youg manak wosik atin aria manak matogur enen unai nyeigur-inyum Kos. Arigaha ruwahepih manak matogur enyudok enen unai shahwaren um Rodes. Wata shopunek makutukuk Rodes aria mahur manak matogur wabur Patara. <sup>2</sup> Matogur agundok aria maparug onok korohuk douk kwakri kwunak um Fonisia iri. Namudok aria manak mato okwudok aria kworap manak. <sup>3</sup> Manak arigaha matigu unai Saiprus, aria makutin nyapeik anagagur eveh moshagraken manak matogur agudok shokugi nahobig Siria. Manak matogur agundok aria korohuk kwanak kweir wabur nyeigur-iburum Tair. Kweir um shuniguk anah jah. <sup>4</sup> Maparug enesh shagipesh Jisas iri shape agundok aria mani eshesh mape atug wk. Iruhin ananin Mishin nyawish enesh Kristen aria nyeshuhur dodogowish atish shakrip Pol um mare nunak um Jerusalem, uwok. <sup>5</sup> Aria apakih nyumneh makri muni eshesh mupe ehi hatuh aria wata makutishukuk manak. Ihim-morim hagipesh Krais iri hani batowish aria amamiyu armago shanamap makutukuk abrudok wabur matogur

adukibur um aria manak um yout agundok korohuk kweir um. Manak matogur aria ihipmorim moduk ohrubus anagasis um yout aria munek beten. <sup>6</sup> Douk munek beten jurug aria mani eshesh monokom roguhw. Apak wata manak mato korohuk aria eshesh shatanamum esheshig urusag.

### *Matogur Sisaria Aria Anan Profet Shahwaran Um Agabus Iri Nakripan Enen Baraen Pol*

<sup>7</sup> Manak mato korohuk kwakutukuk Tair aria manak matogur wabur nyeigur-iburum Tolemes. Manak matogur menekumesi yopuhi eshesh Kristen aria mani eshesh mape atuh nyumnah abrudok wabur.

<sup>8</sup> Ruwahepih aria makutukuk Tolemes manak matogur Sisaria. Aria makutukuk korohuk manak mani eshesh mape Filip ananit urupat. Aria anan douk nakripesih Iruhin ananin baraen eshudok douk wata shutogur Kristen iri uwe um shukon aparuh Iruhin. Anan douk anan um amudok 7-poreim armam douk riguk shagraeham Jerusalem um hutaorum amam aposel iri. <sup>9</sup> Anan nabuki nubatiyu nugariyu aria owo madae urao anam armam uwe, uwok. Owo douk apa wakripesih Iruhin ananin baraen kabi douk amam profet hakripeshen um.

<sup>10</sup> Mape Sisaria eneh nyumneh shopunek aria anan profet shahwaran um Agabus iri nape iri agudok shokugi nahobig Judia aria nabuhi Sisaria. <sup>11</sup> Nanaki agundok apak mapeum nohur Pol ananit let noweshik ananigas aiyas iri roghw aria nakri, "Iruhin ananin Mishin nyakri namudok. Nyakri, "Eshesh Juda shape Jerusalem iri ta shenekesh namudok um anudok nagrem atudok let iri. Shuweshikan aria ta shunaur um kupaishi douk eshesh madae Juda iri uwe esheshis wis."

<sup>12</sup> Douk memnek enyudok baraen aria mani enesh arpesh shape Sisaria iri mape makripan dodog Pol um mare nunak um Jerusalem, uwok. <sup>13</sup> Aria Pol nakri, "Peyagwreh baraen dodogowip atip poreh namudok pakri punek eikihw apahw yowehw um mares? Eik madae ikri um inak um Jerusalem aria shuweshike atuwe um uwe, uwok. Aria yakri shukri she igok um, douk wosik she igok. She um ituk Debeini Jisas ananin nyeigur nyuto iruhw." <sup>14</sup> Makripan dodog um mare nunak um douk mabirak matik uwok, aria madae mukri um mukripan dodog shopunek uwe, uwok. Aria makri, "Wosik Debeini ananin mour. Anan nukri nuneken mumam aria wosik nunekesh kabi anan nakri um."

### *Pol Nanak Natogur Jerusalem Aria Nakrip Debeimi Um Mour Anan Neneken Iri*

<sup>15</sup> Douk mape Sisaria eneh nyumneh um jurug aria magapesh eshudok manak um Jerusalem. <sup>16</sup> Enesh shagipesh Jisas aria shape Sisaria iri douk sheirap manak. Manak aria sharap um anan arman douk ta munak muni anan mupe ananit urupat iri. Ananin nyeigur Nason aria shanabuki enyudok unai Saiprus. Anan kanak douk riguk nagipesh Jisas iri. <sup>17</sup> Douk manak matogur Jerusalem aria eshesh Kristen shanadudareh abom shanaki shenekumap yopuhi nyumnah.

<sup>18</sup> Ruwahepih aria mani Pol manak um mutik Jems. Ihim-morim eshesh Kristen esheshim debeimi douk shopunek hanaki hani Jems hantorum hape. <sup>19</sup> Pol natrum nenekeum yopuhi nyumnah um jurug, aria nakripesih um ihinyumorim mour douk Iruhin neneken nyatogur anan Pol ananin mour aria kupaishi douk eshesh madae Juda iri uwe shatrun aria shenek bilip um Debeini um.

### *Pol Nemnek Debeimi Amamin Baraen Aria Nanak Nawish Iruhin Ananit Debeiti Urupat*

<sup>20</sup> Douk hemnek Pol ananin baraen aria hatuk Iruhin ananin nyeigur nyato iruhw. Aria hakripan hakri, "Apakin ashuken, nyak douk nyadukemesh. Sabaibi tausenab um Juda douk shenek bilip um Jisas. Aria eshesh ihishmorim douk dodogowish atish abom shagipesh enyudok lo seiwok Iruhin nakoguk Moses enyi. <sup>21</sup> Aria enesh shakripes um shakri nyak nyakrip ihishmorim Juda douk shanak shani kupaishi shape iri um shukutukuk enyudok lo. Shakri nyakripes um mare shutah esheshim nugamimiruh yegeshiweruh, mare shugipesh apak Juda apakih aih. <sup>22</sup> Adur apak madukemesh. Eshesh ta shumnek um agundok nyak nyanakumori. Namudok aria ta munek maresh? <sup>23</sup> Aria ta nyunekesh kabi douk apak mukripenyum. Apak agundok douk nubatim anam apakimi armam hakri enen adurin atinyi baraen abom um Iruhin um hunek enesh eshudok eneshenesh. <sup>24</sup> Karemam aria nyunak um nyugipesh ihishmorim aih. Puneken um Iruhin nutrip nukri ipak wosik abom yopipari. Aria nyak wosik nyubuk-umam utabor nyutor-umam ofa um amam shopunek huhwar amamigos baragos. Nyunekesh namudok aria ihishmorim arpesh ta shudukemesh shukri ihinyumorim baraen shakripes um nyak iri douk madae adurin uwe. Aria eshesh wosik ta shudukemesh um nyak wosik nyagipesh enyudok Iruhin ananin lo. <sup>25</sup> Aria arpesh douk eshesh madae Juda aria shenek bilip iri douk menekumesh anap shup makripesh enyudok baraen riguk maweshiken nyakus atugun iri. Baraen enyudok. Mare shuwok worigun mahish douk shenek ofamesh um madae adurimi god omi iri uwe, mare shuwok owishibor, mare shuwok mahish douk shakwunishesh meyoh shagok shatahesh iri, armam armago mare shunek wehrur meyoh uwe, uwok."

<sup>26</sup> Pol nemnek debeimi amamin baraen aria ruwahepih narao amudok nubatim armam hanak henek ehudok aih um Iruhin nutrum nukri wosik amam douk yopum. Aria Pol nanak nawish Iruhin ananit debeiti urupat nakripaguk amam pris um ahudok nyumnah douk ta hunek enyudok nyunak nyutuh aria hutogur yopum abom ahi, aria um agundok amam sisig atin hurauri eshudok aria amam pris hunek ofamesh um huko Iruhin.

### *Eshesh Juda Shawish Shasuhw Pol Numun Iruhin Ananit Debeiti Urupat*

<sup>27</sup> Douk ahudok 7-poreih nyumneh henek enyudok um hurukatin um hutuh aria enesh Juda douk shape iri agudok shokugi nahobig Esia iri shatik Pol nawish nape numun Iruhin ananit debeiti urupat. Namudok aria shakripes enen rohwin baraen sabaishi arpesh sheshuhuri juwehosish um aria shanak shasuhw Pol. <sup>28</sup> Shasuwan aria shahwar shakri, "Ipak Israel, arigah yowi taurumap! Arman anudok douk nanak ihirub warub nakrip ihish arpesh um shukri uwok um apak Israel um atudok Iruhin ananit debeiti urupat shukri yowetari tabo susih iri. Aria shopunek nakripes um nununu Iruhin ananin lo seiwok nakoguk Moses enyi. Aria madae nunek enyudok atin uwe, uwok. Aria shopunek narauri anam kupaimi armam douk amam madae Juda iri uwe hanaki hanak hawish numun narub atudok Iruhin ananit urupat tataoum. Hawish aria henek Iruhin ananit urupat goutukwit." <sup>29</sup> Shakri namudok um maresh, anob nyutob douk shatik Trofimus nape iri Efesus iri nani Pol hape Jerusalem aria shakri Pol naran hawish narub numun atudok Iruhin ananit urupat tataoum.

<sup>30</sup> Namudok aria ihishmorim arpesh shape Jerusalem iri shakitak yowiyokuk aria shape shahwar shanaki shanak aria shahur shanaki shantorum. Shanaki shasuhw Pol shanukan shatogur aduk Iruhin ananit debeiti urupat aria arigas shawaruguk witog.

### *Debeini Soldia Narawi Ananim Soldia Hanaki Haraoguk Pol*

<sup>31</sup> Eshudok sabaishi arpesh shakri shubo Pol nugok aria ahudok atuh baraen nyanak nyatogramm debeini um sabaimi soldia iri, eshesh Rom esheshim. Shakripan namudok shakri, "Ihishmorim shape Jerusalem iri juwehosish aria shape shahwar shanaki shanak." <sup>32</sup> Namudok aria ahudok atuh narao anam debeimi hagimaguk anan iri hani anam soldia aria hahur habuhukuk um eshudok sabaishi arpesh. Douk eshesh Juda shatik anudok debeini um amam soldia nani iri ananim soldia hanaki aria wata shakutun-ukuk um agundok shanum. <sup>33</sup> Anudok debeini soldia nanak um Pol nasuhwan aria dodogeshin um ananim soldia huweshikan biyab senab. Aria narigesh nakri, "Anudok mein arman aria neneh maresh?" <sup>34</sup> Aria eshudok sabaishi arpesh, enesh shahwarari shakripani enen baraen. Enesh shahwarari shakripani kupainyi. Shahwar shakripani namudok aria anudok debeini soldia nabirak um numnek baugenyum baraen nabirak natik uwok. Namudok aria neshopak amam soldia um huran huwih anat amam soldia amamit urupat. <sup>35</sup> Amam soldia haran hanak hatogur hurukatin um atudok urupatig beiwog aria hatukag hagauruk iruhw meyoh. Um maresh? Eshesh arpesh juwehosih abom aria dodogowish atish um shakri shon nugok. <sup>36</sup> Ihishmorim shanaki aria shahwar shakri, "Buwon nugok!"

### *Pol Naworumesh Baugos Um Agundok Anan Neneh Bilip Um Krais Um*

<sup>37</sup> Amam soldia hurukatin um hurao Pol huwih amamit urupat aria nakrip debeini soldia nakri, "Ta wosik ikripen enen baraen aka, uwok?"

Aria anudok debeini soldia narig Pol nakri, "Nyak nyadukemen enyudok kupainyi baraen Grik aka?" <sup>38</sup> Eik yakri nyak ta anudok arman douk napeiri Isip iri. Anob nyutob riguk nanaki nohur wanohw nani gavman aria neyotu narik um 4,000 poreim armam hasuhw wanohwishi eshudok aria hanak um wehigunum arpesh uwok um."

<sup>39</sup> Aria Pol wata nakripan nakri, "Eik anan um Juda. Sheyubuki debeiburi wabur Tarsus douk bape agudok shokugi nahobig Silisia iri. Eik douk yani eshesh abrudok wabur nyeigur nyato iruhmobur iri atish arpesh. Aria yakri nyukripe wosik um ikripesh eikin baraen eshudok arpesh." <sup>40</sup> Anudok debeini soldia nakripan wosik aria Pol nikitak neyotu nowrumesh rogor arigaha mukareg aria nape neyagwreh enyudok kupainyi baraen Hibru aria nape nakripesh ananin baraen.

## 22

<sup>1</sup> Nakripesh namudok, nakri, "Eikim ashukenyim owarhim aria yak-enyim, ipak pumnek eik. Douk yakri ibeimep ipakin baraen aria ikripes adurin baraen um eik." <sup>2</sup> Douk shemnek um neyagwreh um eshesh kanak Juda esheshin kupainyi baraen Hibru aria sheyotu mukareg abom.

Douk mokureg aria Pol nakri, <sup>3</sup> "Eik douk anan um Juda aria sheyubuki debeiburi wabur Tarsus agudok shokugi nahobig Silisia. Aria yakitak yopuwe abrudok wabur Jerusalem. Arman shahwaran um Gamaliel iri gamo neneh skulume wosik um ihinyumorim apakash yamehesh esheshin lo douk seiwok Iruhin nakoguk Moses enyi. Namudok aria riguk, eik douk dodogoiwe atuwe abom yagipesh Iruhin kabi ipak ihipmorim douk pape iri um. <sup>4</sup> Aria yenekesh enenyenen armam armago douk shagipesh ahudok Yah um bilip um Jisas iri. Yakri um shugok abom. Yasuhw armam armago shopunek yoweshikesh senab aria yenyigresh shape shunuweshik-ati urupat. <sup>5</sup> Debeini pris abom nani ihm-morim eshesh Juda esheshim debeimi hape hasuhw kwotog iri douk hadukemesh. Aria amam ta hukripes um

enyudok yakripep-enyi baraen douk adurin. Amam henek shus hekeyas yasuhwas um ashukenyim owarhim amam Juda hape Damaskus iri aria yanak. Yanak um iweshiki arpesh shagipesh ahudok Yah iri ariaираeshi um Jerusalem. Iraeshi aria debeimi hunekesh shurao eriger um enyudok sheneken iri.

### *Pol Nakripesh Um Agundok Natogur Kristen Um*

<sup>6</sup> Douk yanak arigaha hurukatin um nyumnah aun nawaruruh aria huruk atin um inak itogur Damaskus. Aria ahudok atuh anat tatrugun abom iri lait tabuhi gani iruhw utag tabuhi agundok eik yeyotu um, aria bogaragun abom. <sup>7</sup> Namudok aria yabuh yatu yakus atap aria yemnek anah mah aria enyudok arpen nyakripe nyakri, ‘Sol Sol, nyak nyape nyae nyenek enenyenen um eik um maresh?’ <sup>8</sup> Aria eik yarig yakri, ‘Debeini, nyak meinyi?’

Aria nakri, ‘Eik Jisas douk yanaki wabur Nasaret iri. Douk nyak nyape nyae nyeneke enenyenen iri.’ <sup>9</sup> Amudok heire iri armam, lait wosik hatrut. Aria anudok nani eik wape weyagwreh iri, ananah mah douk madae humnekah uwe, uwok.

<sup>10</sup> Aria eik yarig yakri, ‘Debeini, douk ta inek maresh?’

Aria debeini nakripe nakri, ‘Kakitak nyunak nyuwish abrudok wabur Damaskus. Nyuwish aria ta shukripen um ihinyumori mour douk eik yagraehen yeshopoken um nyak nyuneken iri.’ <sup>11</sup> Yatik atudok tatrugun abom iri lait aria nabes seshuke madae itrugun uwe. Namudok aria amudok eikim heire iri hasuhw eikin rogur aria manak mawish wabur Damaskus.

<sup>12</sup> Aria abrudok wabur Damaskus anan arman shahwaran um Ananaias iri douk nape. Anan nagipeshen wosik Iruhin ananin lo. Nenek lotu um douk nakri adurin atin neneke lotu. Aria ihish Juda shape Damaskus iri shatrun shakri anan yoponyi arpen. <sup>13</sup> Anan Ananaias nanaki neyotu hurukatin um eik aria nakri, ‘Eikin ashuken Sol, wata trugun.’ Aria abudok nyutob abom wata shopunek yatrugun aria yatrunk. <sup>14</sup> Aria nakripe nakri, ‘Ohwakim yamehem amamin Iruhin nagrahenyum nyudukem enyudok mour douk anan nakri um nyak nyuneken iri. Shopunek anan nagrahenyum nyutik ananin arman douk apa neneke yopuhi atih aih iri aria nyumnek anan kanak nini nyak piyagwreh.’ <sup>15</sup> Nyak ta nyukripesh ananin baraen. Nyukrip ihishmorim arpesh um enyudok douk nyatrin aria nyemneken iri. <sup>16</sup> Aria douk wata nyupe nyutrugun um maresh? Kakitak nyunek baptais. Nyusuhw ananin nyeigur um neneke baptaisumen abar aria ta nukweshih nyakish yoweishi inahos.’

### *Pol Nakripeshum Agundok Iruhin Neshopokan Nanak Nakripesh Baraen Kupaishi Arpesh Um*

<sup>17</sup> “Aria wata yatanamori um Jerusalem. Yanaki yape aria abudok nyutob yawish numun narub agundok Iruhin ananit debeiti urupat tataoum aria yape yenek beten obi nyutob, eik douk yatik enen enyudok kabi yabo yomnis yatrin um.” <sup>18</sup> Yatrin yatik Debeini aria nakripe nakri, ‘Arigas ahudok atuh nyukutukuk Jerusalem nyunakuk. Um maresh? Arpesh shape agundok iri ta mare shumnek nyakin baraen douk nyukripeshen um eik iri.’

<sup>19</sup> “Aria eik wata yakri, ‘Debeini, eshesh kanak shadukemesh abom um nubokadae eik douk yanak um eshesh Juda shape sheneyagwreh baraen-ogwi urusag yasuhw eshudok shenek bilip um nyak iri yoweshikesh aria yaesh.’ <sup>20</sup> Aria riguk abudok nyutob habo Stiven douk nakripesh nyakin baraen iri nagok obi nyutob, eik shopunek yeyotu hurukatin yatrunk aria

yakri wosik. Aria abudok nyutob hape han nagok obi nyutob, eik douk yeyotu yape yeyohumam rupeh.'

<sup>21</sup> "Aria Debeini nakripe nakri, 'Kare, ta ishopoken nyunak um rougun um eshudok arpesan douk eshesh madae Juda iri uwe.' "

### *Pol Nakrip Amam Soldia Um Anan Douk Anan Eshesh Rom*

<sup>22</sup> Eshudok armam armago shape shemnek Pol arigaha nanak nakri enyudok bareaen um nakri um nunak um kupaishi douk eshesh madae Juda iri uwe shapeum, aria eshesh shohur nokwatag shape shahwar debeg shakri, "Buwon, buwon nugok nunakuk. Eshudokmori arpesan douk madae shukri wosik um shupe agundok atap uwe, uwok." <sup>23</sup> Eshesh shape shahwar sheyarik rupeh, shohur nyupruk shawashak kwato iruhw. <sup>24</sup> Aria debeini soldia ddogeshtum amam soldia haran hawish amamit urupat. Anan nakri nudukemesh aria nakrip amam soldia um huprukan enesh eshudok aria horigan arigas um nudimam baugos um agundok eshesh Juda shape shahwar shagipeshan namudok um. <sup>25</sup> Aria howeshikan neyotu um hakri hureyan enesh eshudok aria nohur nokwat nakrip anan debeini um 100-poreim soldia aria nakri, "Aria ipak pakri lo wosik nyakripepum pubo enen arpen um eshesh Rom aka? Ipak douk watak punekume kwot uwe aria parik poreye eshudok. Ehudok aih douk pakri penek yopihi aka?"

<sup>26</sup> Douk anudok soldia nemnek enyudok aria nanak abom um debeini soldia aria narigan nakri, "Nyak nyakri nyunek maresh? Anudok arman douk nani eshesh Rom atish arpesan meyoh abom." <sup>27</sup> Aria anudok debeini soldia nanak narig Pol nakri, "Nyak douk nyani eshesh Rom atish arpesan o mumam?"

Aria Pol nakripan nakri, "Adur wo." <sup>28</sup> Aria anudok debeini soldia nakri, "Eik yawashok debeibori utabor yatorin aria douk yatogur anan um Rom."

Aria Pol nakripan nakri, "Eik uwok. Eikish amakeniyish riguk shani eshesh Rom shatogur atish arpesan aria douk eik wata yagipeshesh namudok atin." <sup>29</sup> Aria ahudok atuh amudok soldia hakri um hubo Pol aria wata hakutunukuk. Debeini soldia natik um Pol douk iganigadae nakripan howeshikan neyotu. Shopunek nemnek um Pol nakri anan douk anan eshesh Rom aria anan nanogugur abom.

<sup>30</sup> Anudok debeini soldia douk nakri abom um nudukem baugeniyum bareaen um eshesh Juda shakri shunekuman kwot Pol um. Namudok aria ruwahepih nakweshihanuk um senab douk haweshik Pol obi. Aria neneukum bareaen debeimi pris hani ihm-morim debeimi Juda douk apa hape hasuhw kwot iri hanaki hantorum. Douk hantorum iyoh, aria naraauri Pol nanaki nakripan neyotu agundok debeimi hantorum hapeum.

## 23

### *Pol Nakripam Baraen Amam Debeimi Um Eshesh Juda Esheshim Hasuhw Kwotog Iri*

<sup>1</sup> Pol neyotu natrum duk amudok debeimi Juda apa hape hasuhw kwotog iri aria nakripan nakri, "Eikim bahenomi, eikh nyumneh yape yenek mareh aih o mour arigaha doukaria Iruihin natik eik um, eikim urkum douk mor yopum abom." <sup>2</sup> Pol nakri namudok aria debeini pris abom Ananaiaas neshopok anam armam heyotu hurukatin um Pol iri um habowan nokwat. <sup>3</sup> Aria Pol nakripan nakri, "Nyak atin nyape kabi onok arbaok nadukehok douk shawatomok shigorihwiti beit aria shatruk shakri onok namukwi iri. Nyemnek, Iruihin ta nen. Nyak douk nyape agundok um nyugipesh lo aria nyunekume kwot. Aria wata nyabrig lo um nyakripan um hubo eik."

<sup>4</sup> Aria anam heyotu hurukatin um Pol iri hakripan hakri, "Nyak nyape nyeyagwreh yoweinyi baraen um Iruhin ananin debeini pris." <sup>5</sup> Aria Pol wata nakri, "Bahanomi, eik madae idukemesh um anan douk debeini pris abom uwe, uwok. Yadukemesh um baraaen nyetem Iruhin ananik Buk iri nyakri namudok. Nyakri, 'Mare piyagwreh yoweinyi baraen um anudok arman douk nape debeini aria nataurum ipakish arpesh iri, uwok.'

<sup>6</sup> Pol natrum aria nadukemam amudok debeimi douk hantorum hape iri. Anam Farisi aria anam Sadyusi. Namudok aria neyagwreh debeihi mah nakripam namudok debeimi hape hasuhw kwotog iri. Nakri, "Eikim bahanomi, eik douk anan Farisi aria eikin yain shopunek anan Farisi. Eik yadukemesh aria yakri adur abom um shagok iri ta wata shikitak. Aria douk yakrip arpesh enyudok baraaen. Aria baugos um agundok shenekume atudok kwot um douk namudok."

<sup>7</sup> Pol nakri enyudok baraaen aria amam Farisi hani Sadyusi hape hanitok. Namudok aria ihm-morim amudok hanaki hantorum iri debeimi hakitak hanadiyogurum. Anam hani amam Farisi aria anam hani amam Sadyusi.

<sup>8</sup> Um maresh? Amam Sadyusi apa hakri shagok iri ta mare wata shikitaki, uwok. Shopunek hakri sagabehos aria Iruhin ananish enselahos douk hakri madae enesh uwe. Aria amam Farisi apa hakri shagok iri ta wata shikitak aria enselahos aria sagabehos adur shape.

<sup>9</sup> Namudok aria hape hahwar hanariguk atin. Anam henek skulumesh um lo iri douk shopunek anam Farisi. Amudok armam hakitak heyotu heyyagwreh debeg atin aria hakri, "Apak madae muparagh enesh yoweishi inahos uwe, douk anudok arman nenekeh iri, uwok. Enen sagab o enen Iruhin ananin ensel nyukri nyuni anan nyiyagwreh aria anan douk nukri enyudok baraaen um, wosik ananin baraaen douk adurin."

<sup>10</sup> Hanatutukem aria baraaen nyatogur dedeben atin. Namudok aria debeini soldia nanogugur abom. Nakri ta husuhw Pol honukan tukwotukwan aria huprukeshan um biyeh. Namudok aria neshopok ananim soldia um hubuh hurauri Pol nukutukuk amudok debeimi aria huran huwish amam soldia amamit urupat.

<sup>11</sup> Aria abudok wab, Debeini nanaki neyotu nagim Pol aria nakri, "Nyiyotu dodogowin atin aria mare nyukri nyunogugur, uwok. Dodogowin atin nyukripesh um eikin baraaen agundok Jerusalem aria debeiburi wabur Rom shopunek nyak ta nyunekesh namudok atin."

### *Amam Juda Habo Baraen Um Hubo Pol Nugok*

<sup>12</sup> Ruwahepih ruhur watak reir amam Juda hanaki hantorum hape atugun aria hakri iruhw hakri adur atin um mare huwok worigun o abar arigaha hubo Pol nugokuk. <sup>13</sup> Shadareham um amudok habo baraaen namudok iri douk sabaimi abom heshagrakuk 40-poreim. <sup>14</sup> Aria hanak hatik debeimi pris hani eshesh Juda esheshim debeimi aria hakripam hakri, "Apak mabo enen adurin atinyi baraaen um makri mare muwok anagun worigun arigaha mubo Pol nugok. <sup>15</sup> Namudok aria ipak puni amudok anam debeimi hape hasuhw kwotog iri punekuman baraaen debeini soldia abom um nurauri Pol nubuhi agundok ipak pape um. Pukripan pukri ipak pakri gamo porigan um nukripep baugeniyum ananin baraaen. Aria apak ta apa mutrugun mupe yah. Ta mare arigas nunak nutogragu um ipak aria ta mon nugok yah meyoh."

<sup>16</sup> Aria Pol ananik mohwukwik okwokwin nugarin iganigadae nemneguk um agundok hakri hubo Pol nugok um. Namudok aria nanak nawish amam soldia amamit urupat aria nakrip Pol. <sup>17</sup> Aria Pol nahwar anan debeini um 100-poreim soldia iri nanaki aria nakripan nakri, "Nyaraao anudok

weroroini arman um debeini abom soldia. Anan nakri nukripa enen baraen.” <sup>18</sup> Aria anudok soldia naran um debeini soldia abom aria nakripa nakri, “Anudok Pol douk nonoweshik iri nahware yanak aria nakripe um iraouri anudok weroroini arman um nyak. Um maresh? Anan douk enen baraen nakri nukripen um.”

<sup>19</sup> Aria anudok soldia nasuhw ananin rogur naranuk um anagis amam atum aria narigan nakri, “Nyak maren baraen douk nyakri nyukripe-umen?” <sup>20</sup> Aria anudok weroroini arman nakri, “Amam Juda habo baraen um hakri nuhut horik nyak um nyurao Pol nyubuh um amam debeimi Juda hape hasuhw kwotog iri. Amam henek rohw um hakri gamo horigan shopunek um nukri baugenylum ananin baraen.” <sup>21</sup> Aria nyak mare nyumnekam. Um maresh? Sabaimi armam heshagraguk 40-poreim ta hunabeshuk hupe hutrugun yah. Amam habo enen adurin atinyi baraen um mare huwok worigun o abar arigaha hubo Pol nugok aria douk ta huwok worigun. Douk amam hape henek eneshenesh hape hatrugun um nyak nyukripam wosik aria douk huneken.” <sup>22</sup> Aria anudok debeini soldia nakripa enanin nakri, “Mare nyukrip enesh arpesh um agundok nyakripe enyudok baraen um, uwok.” Aria neshopokan nanak.

### *Debeini Soldia Narao Pol Nanak um Debeini Um Gavman Nyeigurinum Feliks*

<sup>23</sup> Aria anudok debeini soldia abom nahwar biom debeimi um 100-poreim soldia iri hanaki aria nakripa enanin nakri, “Punak purao 200-poreim soldia, purao 70-poreim amudok anam soldia douk hahur hwosahos iri, purao 200-poreim soldia hasuhw burawos iri aria pukutukuk agundok kwehigib wab atub punak um Sisaria.” <sup>24</sup> Punek redim enesh hwosahos um Pol nahuresh iri. Aria puran wosik mare enesh yoweishi inahos shutogruman arigaha nunak nutogurum Feliks douk debeini um gavman iri.” <sup>25</sup> Aria anudok debeini soldia abom nenek anap shup. Baraen nyetem shupe iri nyakri namudok. Nyakri,

<sup>26</sup> Eik Klodius Lisias yenekumenyugu apudok shup nyak debeini arman Feliks douk nyape debeini um gavman iri. Yopuhi nyumnah nyak.

<sup>27</sup> Eshesh Juda shasuhw anudok arman aria hurukatin um shakri shon nugok. Aria eik yemnek um anan douk anan um eshesh Rom aria eik yani eikim soldia manak maranukuk aria nape wosik. <sup>28</sup> Yakri idukem baugenylum baraen douk shako anudok arman um aria yaran yabuh um esheshim debeimi douk hape hasuhw kwotog iri. <sup>29</sup> Mabuh aria madae iparug enesh nenekeh iri yoweishi inahos uwe, uwok. Um ta mon nugok-umeshi o muweshikan nupe shunuweshik-ati urupat um. Yarigesh aria shakripe sheneman bareaen um shakri nabrig enen esheshin lo. <sup>30</sup> Douk arigaha bareaen nyatogrume um agundok amam Juda habo bareaen um hakri hon nugok um aria douk anudok arigas yeshopokan nanakumogu nyak. Aria yakrip amudok douk hunekuman bareaen iri um nyak nyupe nyumnek nyakigos arigos aria douk hunekuman bareaen. Um nyak nyumnek aria nyudukem enyudok douk hakri hunekuman bareaenyenyi.

<sup>31</sup> Namudok aria amam soldia hagipesh amamin debeini ananin bareaen aria abudok wab harao Pol hanak arigaha hanak hatogur wabur shah-warabur um Antipatris. <sup>32</sup> Gagruk ruwahepih aria amudok hanak atapih iri soldia wata hatanam um amamig urusag gani Jerusalem. Aria amam hahur hwosahos iri atum haran habuh um Sisaria. <sup>33</sup> Douk haran hanak hatogur hakon shup debeini um gavman iri aria horaguk Pol um ananis

wis. <sup>34</sup> Anudok debeini um gavman iri natik shup aria narig Pol um agudok shokugi nahobig douk anan nanaki agi. Aria Pol nakripan nakri anan douk nanaki agudok shokugi nahobig Silisia. <sup>35</sup> Douk nemnek namudok aria nakrip Pol nakri, "Amudok henekumen baraen iri hunak hutograri aria ta kadak imnek nyakin baraen." Aria anudok debeini um gavman iri nakrip amam soldia um huweshik Pol nupe Herot ananit debeiti gavmanit urupat.

## 24

### *Eshesh Juda Esheshim Debeimi Henekuman Kwot Pol*

<sup>1</sup> Aria 5-poreih nyumneh hanak hadiguk aria debeini pris abom Ananaias nanak um Sisaria. Nani anam eshesh Juda esheshim debeimi hani anan arman nyeigurinum Tertulus. Anan douk nadukem eshesh Rom esheshin lo aria ta nutaurum amam Juda niyagwreh-umam baraen. Habuhi aria hakrip debeini gavman um enyudok baraen douk hakri huneken um Pol iri.

<sup>2</sup> Feliks nahwar Pol nanaki aria Tertulus nape nene-k-uman baraen. Nakri namudok. "Debeini gavman Feliks, nyak yopuni arman aria apak douk mape wosik roubi nyutob abom wanogwiruh madae anaruh uwe. Nyak nyataurum apakish arpesh nyagapesh eneshenesh eshudok shape wosik ihirub warub. Aria apak douk mape wosik abom meshagrakuk kabi riguk marik mape um. <sup>3</sup> Namudok aria apak manadudareh um enyudok aria menek tenkyumen.

<sup>4</sup> Yakri uwok um iraoumen roubi nyutob um iyagwreh um, aria douk yarig-enyum nyukri wosik nyataurumap aria nyumnek apakinyi banenyi baraen.

<sup>5</sup> Matik anudok arman douk nape nene sabaihi yoweishi inahos. Napeum nene eshesh Juda shape ihirub warub bape agundok atap iri shohur wanogwiruh aria shakri shuni gavman shurpak. Aria anan douk debeini um anap awiropish arpesh douk shahwaresh um Nasaret iri.

<sup>6</sup> Shopunek anan douk nakri um nunek atudok Iruhin ananit debeiti urupat tunabosusih, aria apak manak masuhwan. [Aria douk makri munekuman kwot um enen apakin lo. <sup>7</sup> Aria Lisias douk debeini um amam soldia iri nanaku dodogowin atun aria natrulanari. <sup>8</sup> Namudok aria Lisias nakri douk shakri um shunekuman baraen aria douk shunaki agundok nyak nyape um aria shuneken-uman.] Douk nyukri nyorigan um, nyak kanak aria douk ta nyumnekan aria ta nyudukem ihinyumori douk apak makonenyi baraen douk adurin." <sup>9</sup> Amam Juda shopunek hataurum Tertulus hape hakwiraeh henekuman sabainyi baraen Pol. Aria hakri enyudok ihinyumorim baraen douk adurin atin.

### *Pol Nakripan Ananin Baraen Feliks*

<sup>10</sup> Aria Feliks douk debeini um gavman iri nauraman rogur Pol um niyagwreh. Aria Pol nakripan nakri, "Eik yadukemesh um nyak douk nyape nyutaurum eshudok sabaihi arpesh shape agudok shokugi nahobig iri um sabaihi kwarahos aria nyasuhw esheshig kwotog. Aria douk eik yanadudareh abom um iwanamam amamin baraen aria nyak nyumneken.

<sup>11</sup> Douk nyukri nyorigesh akure, nyak kanak ta nyumnek baraen namudok. Nabokadai, douk 12-poreih nyumneh hanak hadiguk, eik douk yanak um Jerusalem um inek lotu um Iruhin. <sup>12</sup> Aria amam Juda henekume kwot iri douk madae hutruel ini enen arpen upe unotutukam aria unitok baraen gani numun Iruhin ananit debeiti urupat uwe, uwok. Madae shutrue isonuk sabaihi arpesh inekesh juwehosish gani numun eshesh Juda shape sheneyagwreh baraen-ogwi urusag uwe o anabik um abrudok wabur Jerusalem, uwok. <sup>13</sup> Aria enyudok baraen iganigadae henekume kwot um

ta mare huparug enen baugennum, um nyak nyudukemesh nyukri amam hakriyen iri bараen douk adurin um, ta uwok.

<sup>14</sup> Aria enyudok douk eik yakri ikripenyum bараen douk adurin. Bараen enyudok. Eik yagipesh anah sikih Yah aria yenek lotu um apakish yamehesh esheshin Iruhin. Aria ahudok yagipeshah iri Yah, eshesh Juda shakri ahah douk madae wosik yopuhi uwe, uwok. Eik yenek bilip um enyudok ihinyumorim bараen douk nyetem Iruhin ananin lo iri. Enyudok bараen douk seiwok Moses nakripeshenyuk iri nyani enyudok enen douk amam profet henyemaguk iri. Madae inabuken arigos uwe. <sup>15</sup> Eik yenek bilip yakri adur kabi amudok armam um. Eik yadukemesh abom um Iruhin ta nuhur ihihsmorim shagok iri yopishi arpesh shuni yoweishi aria ta wata shukitaki shupe. <sup>16</sup> Namudok aria iihh nyumneh eik dodoqoibe atuwe yenek yopuhi aih aria urkum mor madae ikri eik yenek enesh yoweishi inahos uwe, uwok. Yakri uwok um inek eneh aih aria Iruhin nini arpesh shuttrue shukri yenek yoweishi inahos, uwok.

<sup>17</sup> Yanak anarub kupairubi warub yapeik enesh kwarahos aria wata yatanamori um Jerusalem. Yaraumeshi anabor utabor enesh eikish arpesh eshesh Juda douk yaruhash iri. Aria shopunek yanakmori inek ofa um enesh eshudok um Iruhin. <sup>18</sup> Yenek enyudok aria yagipesh eneh apakih aih shopunek um Iruhin nutruwe abom itogur yopue iri agundok ananis nabes um. Yawish yeneken numun narub agundok Iruhin ananit debeiti urupat tataoum aria shatru. Madae sabaishi arpesh shuni eik mupe gani numun uwe. Madae enesh shuni eik mupe miyagwreh munitok muhwar uwe, uwok meyoh. <sup>19</sup> Aria anam Juda hapei agudok shoguh nahobig Esia iri hawishi aria hametege. Douk amudok armam enen bараen um, douk hunaki agundok nyakis nabes um aria hunekume bараen. <sup>20</sup> Madae anam amudok armam wosik hukripenyum hemneke yakri yenek maresh yoweishi inahos nobokuhieb nyutob douk yeyotu yape yeyagwreh agundok amam debeimi Juda hantorum hape hasuhw kwotog um. <sup>21</sup> Aria atin bараen meyoh douk yeyotu agundok amam hapeum aria yahwar yakri namudok. Yakri, ‘Baugennum bараen um doukih nyumnah penekume kwot um douk penek kwotume um agundok yakri adur um shagok iri ta wata shukitak-umori.’”

<sup>22</sup> Feliks anan douk nadukemesh jurug um Debeini ananah Yah, um agundok shunek bilip um Jisas aria shunekeh iri aih. Namudok aria nakrip amam Juda um hupe hutrugun. Nakripam nakri, “Debeini soldia abom Lisias nunaki aria kadak igapesh enyudok ipakin bараen.” <sup>23</sup> Aria nakrip anan debeini um 100-poreim soldia iri um nunyigur Pol nuwish nupe shunuweshik-ati urupat. Aria nakripan um mare niyohan abom hurukatin, uwok. Nakripan um abudok nyutob Pol ananishi shukri shunaki shukon enesh eshudok douk anan Pol nukriyesh iri obi nyutob, anan soldia douk mare nukripesh um uwok.

### *Feliks Noweshik Pol Nape Shunuweshik-atı Urupat Um Biyesh Kwarahos*

<sup>24</sup> Eneh nyumneh hanak hadiguk aria Feliks nani iri ananik irohukwik Drusila shanaki. Okwok douk onok Juda. Shanaki aria Filiks nenekuman bараen Pol nanaki aria nemnek enen bараen um agundok shenek bilip um Krais Jisas um. <sup>25</sup> Aria Pol nape nakripan um shunek yopihi aih um. Nakripan um agundok sheyoh eshesh kanak um. Aria shopunek nakripan um agundok kweipon Iruhin ta nunekumap bараen um yoweishi inahos iri um. Douk Feliks nemnek namudok aria nanogugur. Aria nakrip Pol nakri, “Doukih jurug aria nyunak douk. Nuhutibum anob nyutob ikri imnekenyum obi nyutob, eik ta wata inekumen bараen nyunaki.”

<sup>26</sup> Aria abudok nyutob Feliks douk nape natrugun um Pol um nakri Pol ta nunek grisuman nukon anabor utabor aria nukweshihan nunak meyoh. Namudok aria sabaihi nyumneh nahwar Pol nanaki nani anan hape heyagwreh baraan.

<sup>27</sup> Douk arigaha biyesh kwarahos shanak shadiguk aria Porsius Festus naraao Feliks ananin mour nape debeini um gavman. Feliks nakri nunek es-hesh Juda shunadudareh-uman, namudok aria nakutukuk Pol nonoweshik napeik.

## 25

### *Pol Nakri Sisar Douk Nape Debeini Gavman Um Rom Iri Numnek Ananit Kwot*

<sup>1</sup> Festus nanaki aria naraao mour nape debeini um gavman um agudok shokugi nahobig Judia. Douk nape biyeh atih nyumneh um jurug aria nakutukuk Sisaria aria natoum Jerusalem. <sup>2</sup> Nakih Jerusalem aria amam debeimi pris hani eshesh Juda esheshim debeimi hanaki henekuman baraaen Pol hape hakrip Festus. Aria hakripan dodogowim atum hakri namudok. <sup>3</sup> “Nyutaurum apak aria nyurauri Pol nunaki agundok Jerusalem.” Um maresh? Amam habo baraaen um hakri nunaki aria hon nugokuk yah. <sup>4</sup> Aria Festus nakripam nakri, “Pol nonoweshik nape Sisaria aria eik kanak hurukatin um ta wata itanam inak. <sup>5</sup> Namudok aria ipakim debeimi huni eik munak. Nukri nenek enen yoweinyi um, amam wosik hunekuman kwot.”

<sup>6</sup> Festus nani eshesh shape Jerusalem 8-poreih o 10-poreih nyumneh hadiguk aria wata nabuhum Sisaria. Ruwahepih nanak nape urupat nasuhw kwotog um aria nakripam um hurauri Pol nunaki. <sup>7</sup> Douk Pol nanak natograri aria amudok Juda hapeiri Jerusalem habuhi hakitak hey-otu herharhan aria hape hakri, “Anudok arman nenek sabaishi yoweishi inahos.” Hadukuman sabaindyi baraaen aria habirak um hiyabig Festus um amamin baraaen douk adurin aria habirak hatik uwok.

<sup>8</sup> Aria Pol nabeimam baraaen nakri, “Eik madae inek enen yoweinyi um eshesh Juda esheshin lo o atudok Iruhin ananit debeiti urupat o anudok arman Sisar douk nape Debeini gavman um Rom iri uwe, uwok.”

<sup>9</sup> Aria Festus douk nakri nunek amam Juda hunadudareh-uman, namudok aria narig Pol nakri, “Nyak nyakri wosik um nyunak um Jerusalem aria eik imnek enyudok nyakin baraaen agundok o mumam?”

<sup>10</sup> Aria Pol nakri, “Atudok urupat douk yeoyutawat iri douk Sisar ananit abom. Eik ta inek kwot atudok atut urupat. Nyak kanak nyadukemesh abom. Eik douk madae inek enesh yoweishi inahos um eshesh Juda uwe, uwok. <sup>11</sup> Aria eik yabrig enen lo aria yenek enesh yoweishi inahos douk shukrium eik ta igokumesh iri um, enyudok douk wosik ta igok. Aria enyudok baraaen amam Juda henekume kwot um douk madae adurin uwe, uwok. Namudok aria douk madae wosik um nyak nyuko eik um amam Juda amamis wis uwe, uwok. Eik yakri pukripe inak um Rom um Sisar numnek eikit kwot.”

<sup>12</sup> Namudok aria Festus natanam nani ananim armam douk hadukemesh iri heyagwreh um jurug aria nakrip Pol nakri, “Nyak nyakri Sisar numnek nyakit kwot. Namudok aria wosik ta mishopoken nyunak um Sisar!”

### *Festus Nakrip Agripa Um Pol Ananit Kwot*

<sup>13</sup> Eneh nyumneh hanak hadiguk aria anudok king shahwaran um Agripa iri nani ananik mohwukwik Bernaisi shanakumori Sisaria. Shanakumori shutik Festus aria shunekuman yopuhi nyumnah. <sup>14</sup> Shape Sisaria eneh

nyumneh hanakuk aria Festus nakrip anudok king um Pol ananin baraen. Nakripan nakri, "Anan arman nepe shunuweshik-ati urupat douk riguk Feliks noweshikan napeik iri. <sup>15</sup> Aria nubokuhieg wik yanak um Jerusalem um eshesh Juda esheshim debeimi pris hani anam esheshim debeimi hape heneman baraen aria harigum eik ibeiman ananish yoweishi inahos.

<sup>16</sup> Aria yakripam yakri, 'Apak Rom apakih aih, um showemesh sabaibusi bugabus kupaishi um, apak douk madae mudukemesh uwe, uwok. Arpen kwotog gupenyen iri, sagomatin nyiyotu agundok shenekumen baraen iri shapeum aria mishukabar-umen um nyuwanamesh baraen um eshudok shenemen kwotogumesh iri ba iyoh.'

<sup>17</sup> Namudok aria hani eik manaki aria madae anob nyutob banakuk meyoh uwe. Ruwahepih yanak yape kwotogit urupat aria yakripam um huran nuwishi. <sup>18</sup> Aria amudok henekuman baraen iri hakitak heyotu, aria baraen heneken-uman iri douk madae enen adurin uwe, um yoweishi inahos douk hakir nenekeh iri, uwok. Eik yakri amam ta hukri anan neneh enesh yoweishi inahos, aria uwok. <sup>19</sup> Amam atin juwehosim um anan um ahudok Yah shenek lotu um Iruhin um hani anan arman shahwaran um Jisas iri. Anan nagok aria Pol nakri anan wata nakitak nape. <sup>20</sup> Enyudokmori baraen, eik douk madae idukemesh uwe um agundok imneken aria iparug baugenyum baraen um uwe, uwok. Namudok aria yarig Pol um yakri nukri wosik um nunak um Jerusalem aria eik imnek ananit kwot agundok. <sup>21</sup> Aria Pol nakri nunak um Sisar douk Debeini um apak Rom iri um numnek ananit kwot nugapeshen. Aria anan nakri nupe shunuweshik-ati urupat. Namudok aria eik yakri anan nupe shunuweshik-ati urupat arigaha meibi nyutob aria ishopokan nunak um Sisar." <sup>22</sup> Aria Agripa nakrip Festus nakri, "Eik kanak yakri imnek anudok arman."

Aria Festus nakripan nakri, "Wosik nuhut ta nyumnekan."

### *Amam Soldia Harauri Pol Um Agripa Numnek Ananin Baraen*

<sup>23</sup> Ruwahepih aria Agripa nani Bernaisi sheneki yopuhi atih rupeh aria shanaki. Shanaki aria ehudok aih eshesh armam armago shenekesh um shatuk esheshish nyeiguuh shato iruhw um douk shenek yopihi. Shanaki aria shawish debeiti shantorum atari urupat, shani anam debeimi ami hani debeimi um abrudok wabur iri. Shawish iyoh aria Festus nakrip amam soldia harauri Pol hawishi. <sup>24</sup> Aria Festus nakri, "King Agripa nyani ipak ihipmorim pani ipak pape iri, ipak tiki anudok arman. Ihishmorim Juda armam armago shape agundok iri shani eshudok douk shape Jerusalem iri shanaki agundok eik yapeum aria shenekuman baraen shahwar debeg shakri, 'Buwon nugok. Mare nupe, uwok.' <sup>25</sup> Aria eik yatik um anan madae nunek enesh yoweishi inahos uwe um shenekan ta nugokumesh, uwok. Aria anan kanak nakri Sisar douk debeini um gavman iri numnek ananin baraen. Namudok aria eik yakri ta ishopokon nunak Rom. <sup>26</sup> Aria eik madae iparug enen ananin baraen gamo nyutogur uwe, um inekuman anap shup apakin debeini um gavman iri uwe, uwok. Namudok aria eik yarauri anudok arman um nyak King Agripa nyani ipak ihipmorim shopunek um mumneken ananin baraen. Um mumneken wosik aria eik iparug enen baraen um inyem shup iri. <sup>27</sup> Um maresh? Namudok douk madae wosik um ishopok enen nyonoweshik iri nyunak aria mare ishopok baraen um eshudok douk shenekumen baraen umesh iri um."

<sup>1</sup> Douk Festus neyagwreh um jurug aria Agripa nakrip Pol nakri, “Nyak wosik douk nyiyagwreh nyakin bareaen.”

Aria Pol nohur rogor nepe nakripan ananin bareaen namudok. <sup>2</sup> Nakri, “King Agripa, doukih eik yanadudareh um iwanamam bareaen amam Juda douk henekenyume iri. Ibeyenyumam aria yakri nyak nyupe nyumnekken um ihishmorim eshudok amam Juda henekume bareaenyumesh iri. <sup>3</sup> Eik yanadudareh abom. Um mares? Nyak nyadukemesh abom um ihihmori apak Juda apakih aih hani ihinyumori douk apa manitok bareaen um mugipeshen sisigin atin um. Namudok aria yakri nyumnek eikin bareaen aria mare nyukri arigehin arigas, uwok.

<sup>4</sup> Riguk wata shokuwe yape eikig nahobig obi nyutob, arigaha yanak yape Jerusalem arigaha douk, ihishmorim Juda douk shadukemesh, um agundok yape um o yarahaen um. <sup>5</sup> Roubi nyutob shadukemesh aria amudok Juda hukri, amam wosik hukripesheh-umen. Shadukemesh um eik douk anan Farisi aria yagipesheh wosik amamih aih. Ehudok aih douk dodogowih atih abom heshagraguk ihihmori aih douk amam Farisi hagipesheh henek lotu um Iruhin um. <sup>6</sup> Aria douk yeayotu agundok henekume kwot. Baugenyeum bareaen um agundok henekume kwot um douk namudok. Eik yakri adur yape yatrugun um Iruhin nunek enyudok nyutogur kabi seiwok nakripamuk adurin atinyi bareaen apakim yamehem um ta nuneken nyutogram. <sup>7</sup> Asudok apakis 12-poreis awiros shenek lotu um Iruhin nyumnah wab aria shakri adur shape shatrugun um enyudok bareaen nyutogur adurin. Aria debeini king, eik yakri nyumnek. Eik douk shopunek yenek bilip yape yatrugun um eshudok. Aria baugenyeum bareaen um amam Juda henek kwot-ume um enyudok bareaen um douk namudok atin. <sup>8</sup> Namudok mumam, um ipak enep Juda pakri mare munek bilip um agundok Iruhin ta wata nohur shagok iri wata shukitaki?

<sup>9</sup> Riguk eik kanak yakri inek sabaishi eshudok um yakri ikwiraeh isuwokuk Jisas douk nanaki wabur Nasaret iri ananin nyeigur nyubuhuk. <sup>10</sup> Enyudok douk yeneken Jerusalem. Amam debeimi pris hoke big dodoigoiwe um amam aria yoweshik sabaishi Iruhin ananish arpesh shonoweshik shape. Aria abudok nyutob amam hakri hubo enesh Jisas ananish arpesh shugok obi nyutob, eik douk shopunek yakri wosik um hesh shugok. <sup>11</sup> Sabaihi nyumneh yenekesh sharao debeiri eriger gani numunig um ihigwumorim eshesh Juda shape sheneyagwreh bareaen-ogwi urusag. Yenekesh namudok um yakri shukonaguk agabus Debeini Jisas aria shiyagwreh enenyen um anan. Juwehosewe-umesh abom aria shopunek yanak um kupairubi rougunirub debeirubi warub um iyesh inekesh enenyen.

### *Pol Nakripesh Um Agundok Natogur Kristen Um*

<sup>12</sup> “Yaesh namudok eshesh Kristen aria anah nyumnah amam debeimi pris heke big dodoigoiwe um amam aria henek anap shup hekeyap yasuop yanak um Damaskus. Opudok shup pakri wosik um inekesh enenyen eshesh Jisas ananish arpesh. <sup>13</sup> Aria debeini King, yakripen adurin atin. Orokohunih um nyumnah yape yanak yah aria anat lait douk tabuhi tenek uhwinyumaguk wah abom iri tabuhi gani iruhw utag tabuhi tasuhw eik yani amudok heire mape manak iri. <sup>14</sup> Namudok aria apak ihipmorim mabuh matu makus atap, aria yemnek anah mah. Aria enyudok arpen nyeyagwrehi enen bareaen Hibru iri nyakripe nyakri, ‘Sol! Sol! Nyak nyape nyeneke enenyen namudok um mares? Nyak apa nyeneneke debeiri eriger um nyak kanak kabi enen bulmakau nyape nyaduken aiyas

enyenying debeini nasuwen iri wanohwinyi rowog um.’ <sup>15</sup> Aria eik yarig yakri, ‘Debeini, nyak amiapen?’

Aria Debeini nakri, ‘Eik Jisas douk nyak nyape nyeneke enyenyingen iri.’ <sup>16</sup> Aria nakripe nakri, ‘Kakitak yotu iruhw. Douk yatogrumen agundok um igaehen aria nyusuhw eikin mour. Um nyunak nyukripesh um enyudok douk nyatogrumen nyatrin iri nyuni enen douk nuhut um ta iyabigen iri.’ <sup>17</sup> Ta ishopoken nyunak um nyakish arpesan eshesh Juda shuni kupaishi aria enyenying nyutogur-umenyum, eik ta itaurumen nyupe wosik. <sup>18</sup> Ta ishopoken nyunak um nyuhur esheshis nabes nyunekesh shukutukuk arukwutigunum um aria shutogur-umori agundok lait tabuh um. Um Satan mare wata dodogowin um nuweshikesh, aria wata shutanamori um Iruhin shusuhw eikin baraen dodog shugipeshen. Aria anan ta mare wata nusuhwesh nupe um esheshish yoweishi inahos, uwok. Ta nukwreyeshuguk. Aria eshesh ta shurao yopishi eshudok douk Iruhin neshubuk um eshudok arpesan douk shenek bilip um eik aria nenekehshutogur ananish atish iri.’”

### *Pol Nakrip King Agripa Um Anan Nenekeh Iri Debeini Ananin Mour*

<sup>19</sup> “Namudok aria debeini King Agripa, eik douk yatik enyudok nyabuhi iruhw heven aria yatrin kabi yabo yomnis yatrin iri um jurug aria madae ikrium isuwokuk baraen uwe, uwok. <sup>20</sup> Sagomatim yakripeshen abrudok wabur Damaskus um jurug aria yanak yakripeshen Jerusalem. Arigaha aria yanak yakripeshen ihirub warub agudok shokugi nahobig Judaism ba iyoh aria yanak um kupairubi warubish arpesan douk eshesh madae Juda iri uwe, uwok. Yakripesh um shukeshuk agabus yoweishi inahos, shatanam shukon aparuh Iruhin aria shunek yopihai shiyabiges um agundok eshesh shakutukuk yoweishi inahos um. <sup>21</sup> Douk namudok aria amam Juda hanaku hasuwe numun narub agundok Iruhin ananit debeiti urupat tataoum aria hakri he igok. <sup>22</sup> Aria riguk Iruhin kanak nataurume arigah arigaha doukih enyudok yeoytu agundok yakripsep adurin atin baraen ipak douk nyeiguhw shatoumep iri pani ipak nyeiguhw wokepari. Aria yeyagwrehan iri baraen douk enyudok atin seiwok amam profet hani Moses hakriyenyuk iri um enen enyudok ta nyutogram. <sup>23</sup> Baraen hakriyenyuk iri enyudok. Hakri, ‘Anudok arman Krais, anudok douk Iruhin nagraehan aria ta nishopokan nunaki iri, anan douk adur ta nunaki numnek debeiri eriger. Aria anan ta sagomatinyin arman abom um nugok aria wata nukitakumori. Aria ta nukrip ananish arpesan eshesh Juda shuni kupaishi yopinyi baraen um Iruhin ta wata nuraesh shutanamori shupe wosik kabi douk lait tabuhumesh um.’”

### *Pol Nakri King Agripa Nunek Bilip Um Krais*

<sup>24</sup> Douk Pol neyagwreh ananin baraen namudok aria Festus narpokuman baraen aria nahwar debeg atin nakri, “Pol, nyak nyogugak. Nyenek skul nyariguk aria nyakin sabainyi saki nyeneken nyogugak.”

<sup>25</sup> Aria Pol nawanaman baraen nakri, “Debeini Festus, eik madae igugak uwe, uwok. Enyudok yeyagwrehan iri baraen douk adurin. Urkum morumen douk yeyagwrehan. <sup>26</sup> King Agripa douk nadukemesh um enyudok ihinyumorim nyatograri iri. Namudok aria eik madae inogugur uwe aria douk yakripesh-umen. Yadukemesh um enyudok ihinyumorim eik yeyagwrehan iri, enyen douk natrin aria nadukemen. Um maresh? Enyen madae nyunabeshuk nyutograguk anabik um anagas uwe, uwok. <sup>27</sup> King Agripa, nyak nyenek bilip nyakri amam profet amamin baraen adurin o uwok? Eik yadukemesh um nyak douk nyenek bilipumen.”

<sup>28</sup> Aria Agripa narig Pol nakri, "Mumam namudok? Nyak nyakri ta abudok banab nyutob meyoh nyunek eik itogur Kristen aka?" <sup>29</sup> Aria Pol nawanaman baraen nakri, "O banab nyutob o roubi. Meibi nyutob ta ineken nyutogur Kristen. Aria eik douk yenek beten yarig Iruhin um yakri nyak nyuni ipak ihipmorim doukih pape pemnekeum yeyagwreh iri, yakri ipak pudukem eik. Yakri ipak putogur Kristen. Aria abudokmori senab douk yakri uwok um shureyep anab, uwok."

<sup>30</sup> Douk Pol nakri namudok aria King Agripa nani Bernaisi iri Festus shani ihish arpesh shanaki shantorum iri shakitak sheyotu iruhw. <sup>31</sup> Douk shatogur aduk aria eshesh biyesh atin sheneyagwreh shakri, "Anudok arman madae nunek enesh yoweishi inahos uwe, um ta mon nugok o muweshikan-umen iri, uwok." <sup>32</sup> Aria Agripa nakrip Festus nakri, "Anudok arman mare nukri um nunak Sisar numnek ananin baraen akure, anan ta mukweshihan nunak meyoh. Aria uwok."

## 27

### *Amam Soldia Harao Pol Hanak Um Debeiburi Wabur Rom*

<sup>1</sup> Douk shabo baraen um apak ta murao korohuk munak um agudok debeigi nahobig Itali,\* aria sharo Pol nani amudok anam honoweshik iri um Julius ananis wis um nuram hunak. Anudok arman Julius douk nape debeini um 100-poreim soldia. Anan nani ananim soldia douk anam um anudok debeini gavman Sisar ananin debeinyi ami. <sup>2</sup> Aria mato onok korohuk douk kworari Adramitium kwanak iri. Okwudok korohuk shakri kwunak shuweshikok shunak anarub warub douk bape agudok shokugi nahobig Esia iri. Mato aria kworap manak. Aristarkus douk napeiri Tesalonaika iri douk nanamap manak. Abrudok wabur Tesalonaika douk bape agudok shokugi nahobig Masedonia. <sup>3</sup> Manak arigaha ruwahepih manak matogur Saidon. Julius nenek yopuhi aih um Polaria wosik nakripan nanak natik ananish arpesh um shukon worigun o eshudok anan nakriyesh iri. <sup>4</sup> Arigah makutukuk Saidon manak. Manak uhwin dodogowin atin aria korohuk kwatanam kwanak wobrehahin um unai shahwaren um Saiprus iri. Manak agundok uhwin madae nyanak um uwe. <sup>5</sup> Mabrigog manak hurukatin um agusudok biyagos shokugosi nahobigos shahwaragos um Pamfilia aria Silisia arigaha manak matogur wabur nyeigur-iburum Maira. Abrudok wabur douk bape agudok shokugi nahobig Lisia.

<sup>6</sup> Korohuk kwatogur kweir agundok aria debeini um amam soldia iri naparug kupaikwi douk kworari Aleksandria kwanaki um kwakri kwunak um agudok nahobig Itali iri. Aria narap manak mato okwudok. <sup>7</sup> Mato aria kwakutukuk Maira kwape kwanak shokubur atin um eneh nyumneh. Amam boskru henek debeinyi mour arigaha manak matogur hurukatin um anabur wabur Nidas. Uhwin dodogowin atin aria apak mabirk um munak aria uwok. Namudok aria mahur manak wobrehah-inyum unai Krit agundok uhwin madae enen uwe. Manak hurukatin um anap borup shahwarapum Salmone iri. <sup>8</sup> Henek debeinyi mour um korohuk aria mahur manak hurukatin um anagasin um enyudok unai. Arigaha manak matogur anagun douk shakri yopugunum kroruhiyor unak ur wosik abudok nyutob uhwin nyahur um. Agagun douk nape hurukatin um anabur debeiburi wabur nyeigur-iburum Lasea.

\* **27:1:** Abudok nyutob Pol nanakumori Jerusalem aria wata nanak um Rom obi nyutob, Luk ta namanan hanak. Putik Aposel 16:10 iri Aposel 21:17.

<sup>9</sup> Mape agundok sabaihi nyumneh arigaha aria ahudok debeihi nyumnah um eshesh Juda shashakur worigun um hanak heshagrakuk.<sup>†</sup> Aria abudok nyutob youg douk shopunek yoweg abom um munak um. Aria Pol nakripam um hudukemesh nakri, <sup>10</sup> “Yaipo, eik yadukemeshum douk mukri munak abom um, yoweibi nyutob ta butogrumop. Sabaihi jah huni korohuk ta shunak shuwishuk. Aria mare jah huni korohuk atish uwe. Arpesh shopunek ta shugok.” <sup>11</sup> Aria debeini soldia nasuwokuk henek móur korohuk iri amamin debeini nani korohukinari amamin bараen. Pol nakripam enyi madae nusuwen uwe. <sup>12</sup> Asudok basis korohuk kwanak kweir um douk madae yopus uwe, um korohuk kwur abudok nyutob debeinyi uhwin nyahur um, uwok. Namudok aria sabaimi armam habo bараen um hakri hukutukuk agundok hunak. Hakri hukwiraeh um hunak hutogur Finiks aria douk hupe agundok abudok nyutob debeinyi uhwin nyahur obi nyutob. Finiks douk shohwar anas basis sape enyudok unai Krit. Asas douk sape satik agundok aun nabuhum.

### *Debeinyi Uhwin Nyahur Aria Youg Yoweg*

<sup>13</sup> Enen shokwinyi uhwin nyahur nyanaki saut iri nyape nyahur aria amam hakri korohuk ta kwahur wosik arigaha kwunak kutogur asudok basis Finiks. Namudok aria hanuk anka henyen iruhw aria kwahe kwahur kwanak huruhuruk um anagasinyum enyudok unai Krit. <sup>14</sup> Aria madae roubi uwe enen takweinyi uhwin abom shahwarenyum Not Is iri nyahur nyakih nyabrigi enyudok unai. <sup>15</sup> Nyahur nyabuhi nyabo korohuk aria mabirakok um kwwishen kwunak mabirak mati uwok. Namudok aria uhwin nyape nyaraok nyanak. <sup>16</sup> Nyarap manak arigaha manak wobrehahin um enen shokwinyi unai shahwaren um Kauda iri. Manak agundok aria menek debeinyi mour um mabirak um mutuki anat shokwuti bot korohuk kwahe kwanukat iri um tutem iruhw. <sup>17</sup> Hatuk bot hutem iruhw aria horeyok anaruh madururuh korohuk um korohuk dodogowik. Hanogugur um hakri ta uhwin nyuraok nyunak nyishopok kuto kwupe anat arukot douk takih orokohuning um youg hurukatin um agudok nahobig Afrika. Namudok aria haunih selahos shabuhi habreyeshuk aria uhwin nyape nyaraok nyanak. <sup>18</sup> Uhwin nyape namudok nyahur dedeben atin youg yoweg aria korohuk madae kwahur wosik uwe, uwok. Ruwahepih aria hape honik jah howashah habuhukuk youg. <sup>19</sup> Wata shopunek ruwahepih douk hakri biyeh atih um amamis wis hape hohur madururuh, enesh selahos, anag parag douk shawaur selahos um hawashesh shabuhukuk youg. <sup>20</sup> Sabaihi nyumneh nyumnahin aun aria unib madae mutrish uwe, uwok. Uhwin nyape nyahur dodogowin atin. Namudok aria madae mukrium ta mupe uwe, uwok. Makri ta mugok um atin.

<sup>21</sup> Namudok aria sabaihi nyumneh madae haurao worigun uwe. Aria Pol nakitak neyotu natrum aria nakripam nakri, “Ipak pukri pumnek eik aria mupeik Krit mare arigas munaki um, ta wosik. Ta mare munek debeinyi mour namudok o munak muwashakuk anah jah namudok, uwok. <sup>22</sup> Aria douk yakripep, mishish mare yowesh aria dodogowip pupe. Ta mare anan nugok, uwok. Ta korohuk otuk kwunak kuwishuk. <sup>23</sup> Eik Iruhin ananiwe aria douk yenek lotu um anan. Aria nabotikib wab enen ananin ensel nyanaki nyeyotu hurukatin um eik aria nyakripe namudok. <sup>24</sup> Nyakri, Pol, mare nyunogugur. Nyunak arigaha nyunak nyutogram debeini um gavman iri Sisar nutrin. Iruhin nataurumen meyoh nenekumen yopunyi

<sup>†</sup> **27:9:** Ahudok nyumnah um eshesh Juda shashakur worigun ahi abudok nyutob ihish kwarahos douk shopunek apa dedeben atinyi uhwin abom nyahur ogwudok youg nyeigurigum Mediterenian.

aria amudok ihm-morim hani nyak pape korohuk iri ta hupe wosik.'  
 25 Namudok aria ipak dodogowip pupe. Eik yakri adur abom um Iruhin ta nuneken nyutogur kabi nakripe um. 26 Aria apak uhwin ta nyurap aria munak mutogur anabik um enen unai."

27 Arigaha sakri 14-poreibus weibus um, uhwin nyarap mahur an-abigum youg nyeigurigum Mediterenian. Aria hurukatin orokohunib um wab amam boskru hakri korohuk kwanak huruk um anab amnab.  
 28 Namudok aria hado enesh amaenyishi eshudok eneshenesh onohw maduhw aria hakutuhw youg um hakri hunek meta um youg aria hudem barukog um. Douk hatukohwi aria hatik um barukogum youg douk 40 mita. Douk kwayom kwanaku henekesh namudok atin aria hatik um barukog 30 mita meyoh. 29 Hatik namudok aria hanogugur hakri ta munak mutao onok burbuduk namudok aria honik nubatish ankahos agundok kwagiguk um korohuk hakutish youg um shusuhw korohuk kwur meyoh. Aria hape henek beten um gugruk arigas. 30 Aria amam boskru hape haurim yah um huruwok hukutukuk korohuk. Namudok aria hakutu shakuti bot tabuh tor youg aria henek rohw um hakri wata hunik enesh ankahos gani kwarik um korohuk hukutishuk youg. 31 Aria Pol nakrip amam soldia hani amamin debeini nakri, "Amudok boskru hukri mare hupe korohuk um, ipak ta mare pupe, uwok. Ta pugok." 32 Namudok aria amam soldia hatupak madururuuh hasuhw atudok shokwuti bot iri aria tagrukuk youg.

33 Hurukatin gugrukuk aria Pol dodogeshin um amam ihm-morim um huwok anagun worigun. Nakripam nakri, "Roubum nyutob ipak urkwip yowep aria madae puwok anagun worigun uwe, uwok. Pape meyoh arigaha 14-poreih nyumneh. 34 Namudok aria douk dodogeshiwe um puwok enesh eshudok um dodogowip. Ipak ihpmorim ta pupe wosik aria ta mare enesh eshudok shunekep, uwok." 35 Nakripam jurug aria nohur anat bret nanaki agundok amam hapeum nenek tenkyu um Iruhin iyoh, aria naworut nape natoh. 36 Ihm-morim hatik namudok amamish mishish shor wosik aria shopunek hawok anagun worigun. 37 Ihishmorim motem korohuk iri douk sabaipari um 276-poreip. 38 Douk hawok worigun um jurug aria honik wit hawashat tagrukuk youg um korohuk hworhworik.

### *Korohuk Yowek*

39 Arigaha gagruk aria amam boskru hatigu anagas um anab amnab. Aria amam madae hudemesh uwe um agagun douk meiguni um uwe, uwok. Aria hatigu anas basis douk sawish abom aria yoputi arukot takus. Namudok aria hukri wosik um, hukri hukwiraeh horaok kuwih asudok basis arigaha kwonak kwusuhw arukot. 40 Namudok aria hatupak madururuuh douk ankahos sheiraruhi shagrrukuk sharaouguk youg. Aria abudok atub nyutob hakweshihuk madururuuh douk hasuhw stia iri. Aria hohur sel hunyaur gani kwarik um, um uhwin nyuraok kwunak wosik um anagas. 41 Aria korohuk kwanak kwato anag shokugi mihib arukotig shukam youg aria kwotao. Gani kwarik um douk kotak kwape dodog abom madae kunogugwanam uwe, uwok. Agundok kwagiguk um youg dodogowig otug gwape gwadudar muduk atin.

42 Aria amam soldia hakri hubo shonoweshik iri shugok um hakri ta hupaur hunak hukih anagas aria huruwok. 43 Aria anudok debeini um 100-poreim soldia iri nakri uwok um nubo Pol nugok aria nakripam uwok. Aria dodogeshin um amudok hapaur wosik iri um hutem haprok hubuh hurik atin arigaha hunak hukih hiyotu anagas. 44 Aria ihm-morim hapeik iri douk hanasuhw palag iri o tutukwanigasi um korohuk iri hugiguk hupaur hunak. Memnek namudok aria ihishmorim manak matogur anagas wosik.

## 28

### *Pol Nape Unai Nyeigurinyum Malta*

<sup>1</sup> Manak arigaha manak matogur wosik anagas enyudok unai aria memnek um enyudok unai douk shahwaren um Malta. <sup>2</sup> Arpesh shape enyudok unai iri douk shenek yopinyi abom um apak. Eshah hape hor aria nyumanugas. Namudok aria shautik eneh nyih aria sharap manak meyotumeh. <sup>3</sup> Aria Pol nape natarmori anat unut nyigasit um nunaki nugosem nyih. Nogosem aria anar renek wanohw iri yur remneguk nyih ratograri atin ronuh naruh um Pol ananin rogur aria reir namudok. <sup>4</sup> Abrudok waburishi shatik um arudok yur ronuh naruh um rogur reir uriyarik um aria shanakripam shakri, “Adur atin, anudok arman nubo nabo enen arpen nyagok iri. Anan madae nugokuk yout uwe, aria douk anudok god douk apa neneke yopuhi aih iri nakri uwok um wata natauruman um wata nupe, uwok.” <sup>5</sup> Aria Pol neyariguk arudok yur rabuhuk nyih aria rogur madae erigerishin o nyukri nyunek maresh uwe, uwok. <sup>6</sup> Aria eshesh shape shatrugun um shakri kadak rogur nyunugok o ahudok atuh nubuh nutu nugok um. Aria shape shatrugun um roubi aria madae shutik enen yoweinyi enyudok nyutogruman uwe. Aria wata shakri uwok um esheshish mishish aria shakri, “Anan douk anan god!”

<sup>7</sup> Anan debeini um enyudok unai iri ananib amnab douk baperi hurukatin agundok sheyotu um. Ananin nyeigur Publius. Publius nanaki narap um ananit urupat aria biyeh atih nyumneh neyohap nepe nenekekumap yopihu atih aih. <sup>8</sup> Aria ananin yaken douk arugeh hapeyan neshuh aras. Ananihw yegenyihw juwehosihw aria neshishrak. Pol nanak nawish neshuhw-omi rum neneke betenuman arigaha naweman wis aria nagabeyan wata yopun. <sup>9</sup> Douk Pol neneke enyudok aria ihishmorim eshudok enesh shape enyudok unai aria arugeh haesh iri shanaki aria nagabeyesh yopish. <sup>10</sup> Namudok aria shenekumap yopihu aih shakop sabaishi yopiyopishi eshudok. Abudok nyutob makri munak obi nyutob, shakitak sharauri sabaishi eshudok douk apak wokes iri shanakumori korohuk.

### *Makutukuk Malta Manak Um Rom*

<sup>11</sup> Abudok nyutob mape enyudok unai obi nyutob, apak douk mape biyah atun aub. Aria abudok nyutob debei nyuhwin nyahur obi nyutob, onok korohuk kworari Aleksandria iri kwanaki kwor enyudok unai. Kwarik um okwudok korohuk douk shenek bioguhw aboriguh hwape. Ogwuhwudok aboriguh douk hwadukem um biom nugamim anudok madae adurini god shahwaran um Sus iri ananim hape. Mato okwudok korohuk aria manak. <sup>12</sup> Manak arigaha manak matogur debeiburi wabur Sirakyus aria mape biyeh atih nyumneh agundok. <sup>13</sup> Aria wata makutukuk Sirakyus manak matogur kupaiburi nyeigur-ibirum Regium. Ruwahepih aria enen uhwin nyakitaki saut iri nyape nyahur nyatowi. Hakri biyeh nyumneh um munak mutogur Puteoli. <sup>14</sup> Matogur agundok aria maparug enesh Kristen. Aria sharigapum muni eshesh mupe anag wikk agundok. Mape anag wikk um jurug aria douk makitak manak atapih manak um Rom. <sup>15</sup> Aria Kristen shape Rom iri shemnek um apak hurukatin munak mutogurum, aria shanakumori shutrup. Enesh shanaki arigaha shaparugap anat debeiti maket abrudok wabur shahwarburum Apius iri. Enesh shaparugap kupaiburi douk biyog atut urusag gwape kupaishi shapenyog iri urusag gwataum. Douk Pol natrish aria ananin mishin nyor wosik ddogowin aria neneke tenkyu um Iruhin.

**16** Manak arigaha manak matogur douk mawish abrudok debeiburi wabur Rom aria debeimi um gavman iri hakripan wosik Pol um anan atun nupe anat sikit urupat aria anan soldia nupe niyohan.

### *Pol Nakripesh Iruhin Ananin Yopinyi Baraen Abrudok Debeiburi Wabur Rom*

**17** Biyeh atih nyumneh hanak hadiguk aria Pol neneukumam baraen es-hesh Juda esheshim debeimi um hunaki huni anan hiyagwreh enen baraen. Douk hanaki hantorum aria nakripam nakri, "Eikim bahanomi owarhim, eik madae inek enen yoweiniyi um apakish arpesh uwe. Madae inek enen yoweiniyi aria inunu ehudok aih douk apakish yamehesh shagimeh um uwe, uwok. Aria shasuhwe showeshike Jerusalem aria sheyor yor amam Rom douk debeimi um gavman iri amamis wis. **18** Hemnek eikit kwot aria madae huparug enen yoweiniyi uwe um ta he igokumenyi. Namudok aria hakri hukweshihe inak. **19** Aria eshesh Juda shakom agabus amamin baraen shakri uwok. Douk madae anah shopunek yah uwe aria yakri wosik um inakumori Sisar meyoh numnek eikit kwot. Aria eik kanak douk baraen uwok um inekumesh kwot eikish arpesh eshesh Juda iri. **20** Douk namudok aria yenemepogu baraen um punaki itrip aria ikripep baraen. Eik yenek bilip aria yape yatrugun um anudok arman douk apak ihishmorim Israel madukemeshum ta nutogur aria mape matrugun-uman iri. Aria baugenylum um baraen um anudok sen nor eikis wis um douk namudok."

**21** Aria hakripan hakri, "Madae anam armam huneki anap shup gani Judia aria hukripapum nyak uwe, uwok. O shopunek madae anam Kristen douk hunaki agundok aria hukripap enen baraen um nyak o hiyagwrehumen enen yoweiniyi baraen uwe, uwok. **22** Aria douk apak makri mumnek nyak urkum morumen iri baraen. Um maresh? Apak madukemesh um ihirub warub douk shape sheneyagwreh enenyenen um apudok parigiri awiropish arpesh douk shakitak eshesh Juda aria nyak nyawishesh iri."

**23** Namudok aria hagraeh anah nyumnah. Douk ahudok nyumnah hanak hatograri aria sabaishi arpesh abom sheshagrakuk sharik shanak iri shanaki shantorum atudok Pol napenyat iri urupat. Ruwahep arigaha wab anan nape nakripesh baraen um arpesh shuwish agundok Iruhin nape Debeini um ananish arpesh um. Aria nakripesh enen lo seiwok Iruhin nakoguk Moses enyi nyani enen baraen douk amam profet henyemaguk iri. Dodogowin atun nakripesh enyudok baraen um nakri nuhur eshesiruh aparuh um shunek bilip um Jisas. **24** Enesh shemnek Pol ananin baraen aria shenek bilip um Jisas. Aria enesh madae shusuhw ananin baraen uwe, uwok. **25** Namudok aria abudok nyutob Pol nakri niyatok ananin baraen obi nyutob, eshesh kanak shakitak aria enesh shakri adurin, enesh shakri madae adurin uwe. Aria shakitak shanak. Nakriyen iri baraen douk enyudok. Nakri, "Iruhin ananin Mishin nyawish profet Aisaia aria nyonohur nakripeshuk enyudok adurinyi baraen apakish yamehesh. Aisaia nakri,

**26** 'Kare um eshudok arpesh aria pukripesh namudok. Pukri, "Baraen ipak ta pupeum pumneken, aria baugenylum ta mare pudukemen, uwok.

Putrugun um ta pupe um putrugun,  
aria eshudok ta putrish aria mare pudukemesh.

**27** Um maresh? Eshudok armam armago  
esheshigos baragos douk seshuk,  
shogah esheshigos arigos aria showeshik esheshis nabes.

Uwok um, esheshis nabes ta sutrugun aria shutik eshudok, arigos seshuk sunakuk um shumnek baraen shdukemen, baragos sugar aria shdukem baugenyum baraen esheship urkwip purumen wosik aria ta wata shutanamori eik igabeyesh um shupe wosik.”’

<sup>28</sup> “Namudok aria ipak ta pudukemesh. Eshudok arpesh douk shakripesh baraen um enyudok yopinyi mour Iruhin neneken um nutaurum apak aria wata nurap mutanam mupe wosik abom um, eshesh douk shanak shakrip kupaishi douk eshesh madae Juda iri uwe. Eshudok kupaishi ta shumneken aria shusuhwen dodog abom shugipeshen.” <sup>29</sup> [Douk Pol nakri enyudok baraen um jurug aria eshesh Juda shakitak shanak. Shape shanak yah aria eshesh kanak shape shanitok debein yi baraen shanak um enyudok Pol nakripesh-enyi baraen.]

<sup>30</sup> Biyesh kwarahos Pol nape anat urupat douk anan kanak nape natorut iri. Aria nakri wosik nanadudareh um ihishmorim arpesh douk shanakumori shutrun iri. <sup>31</sup> Nape nakripesh baraen um arpesh shuwish agundok Iruhin nape Debeini um ananish arpesh um. Shopunek nape nenek skulumesh um Debeini Jisas Krais ananin baraen. Madae nunogugur uwe aria dodogowin atun nape nakripeshen. Shopunek madae enen arpen nyunaki aria nyukripian um mare nukripeshen uwe, uwok.

# Apudok Shup Douk Pol Nenekap Panam

## Eshesh Rom Iri

### Enyudok Banenyi Baraen Pol Nenyem

### Nyanam Eshesh Rom Iri

- 1:1-17 Nyarik iri baraen um Pol nenek tenkyu um Iruhin um eshesh Rom shenek bilip um Krais iri
- 1:18-3:20 Iruhin douk nyibur juwehosibur um ihishmorim arpesh, eshesh Juda shani eshesh madae Juda iri uwe shopunek
- 3:21-4:25 Arpesh shenek bilip um Jisas Krais iri Iruhin douk nahwaresh yopishi
- 5:1-8:39 Apak ihipmorim monek bilip um Jisas Krais iri douk mani Iruhin mape atug barag aria manadudareh. Apak douk mani Krais magok aria wata shopunek mani anan makitak aria mape wosik um Iruhin ananin Mishin atin
- 9:1-11:36 Iruhin nagipesh ananim urkum aria nagraeh arpesh douk anan kanak nakriyeshi. Aria nakripap enen baraen um kweipon eshesh Juda shupe mumam mumam um
- 12:1-15:13 Apak Kristen munekah iri aih
- 15:14-16:27 Pol neyagwreh nyatuh iri baraen aria nenemesh ruwahep eshesh Kristen shape Rom iri

#### *Pol Nakripesh Um Enyudok Mour Aposel Douk Anan Neneken Iri*

<sup>1</sup> Eik Pol, douk yenek Krais Jisas ananin mour iri yenemepogu apudok shup. Yenekap panamagu ipak Iruhin ananish arpesh douk pape Rom iri. Eik anan douk Iruhin nahware um yatogur aposel aria neshopoke inak ikripesh ananin yopinyi baraen.

<sup>2</sup> Enyudok yopinyi baraen douk seiwok Iruhin neyabig ananim profet um nakri adur atin um kweipon enyudok baraen ta nyutogur. Neyabigam aria amam henyem nyetemaguk ananik Buk. <sup>3</sup> Enyudok baraen douk nyakrium Iruhin ananin nugarin, apakin Debeini Jisas Krais. Anan douk narao arpeniyhw yegenyihw natogur arpen aria nikitak king Devit ananip awirop. <sup>4</sup> Aria douk Iruhin nowerehan um ananin dodog. Yaken ananin Mishin nyowerehan nyeyabigap um anan douk Iruhin ananin Nuganin. Enyen nyowerehan abudok nyutob eshesh shan nagok aria Iruhin wata nonohur nikitak napeum. <sup>5</sup> Iruhin nakri wosik aria Krais nagraehe meyoh um inek mour aposel ituk ananin nyeigur nyuto iruhw. Ituk ananin nyeigur um inak ihirub warub bape abudok annab iri aria iwar eshudok ihish arpesh madae Juda iri uwe ikripesh um shumnek Krais ananin baraen aria shunek bilipuman. <sup>6</sup> Aria ipak arpesh pape Rom iri, ipak douk shopunek pani eshudok arpesh douk Iruhin nahwarep um pupe Jisas Krais ananishi iri.

<sup>7</sup> Eik yenek apudok shup panamagu ipak ihipmorim pape Rom iri. Ipak douk Iruhin anan urkum manawashamep aria nahwarep um pupe ananish atishi. Eik yakri apakin Yaken Iruhin nini Debeini Jisas Krais hutaurumep meyoh aria ipakiruh aparuh hur wosik.

#### *Pol Nakri Nunak Nutik Rom*

<sup>8</sup> Sagomatin, um Jisas Krais ananin nyeigur, eik douk yenek tenkyu um yenek lotuman iri Iruhin um ipak ihipmorim. Um maresh, ihishmorim arpesh shape ihirub warub iri douk shemnek baraen um ipak pasuhw Krais

ananin baraen dodog pagipeshen abom um. <sup>9</sup> Aria Iruhin douk eik yakon eik kanak um yenek ananin mour abom. Yenekesh namudok yakripesch enyudok yopinyi baraen um ananin nunganin. Iruhin douk natrue aria nadukemesh um eik apa urkum morum ipak um beten. <sup>10</sup> Nakri adur um ihih nyumneh yenek beten obi nyutob, eik douk yenek beten um ipak. Aria douk yarigan um Iruhin nugipesh ananim atum urkum aria nukri wosik um douk anah hagiguk iri nyumnah nuneme anah yah aria eik inaku itrip. <sup>11</sup> Eik yakri abom um inaku itrip um itaurumep aria purao enen yopinyi um putogur dodogowip aria púrao enyudok yopinyi douk Iruhin ananin Mishin nyukepen meyo iri. <sup>12</sup> Eik yakri namudok. Ipak puni eik ihipmorim munataurum ahudok atuh. Ipak putik eikin bilip nyutogur dodogowin aria eik shopunek ta itik ipakin bilip aria itogur dodogoiwe. <sup>13</sup> Ekish ashukenyish owashish douk pagipesh Krais iri, eik yakri ipak ta pudukemesh um enyudok. Sabaihi nyumneh arigaha douk eik yakri um inaku itrip, aria enesh eshudok shapeum shatupokume yah um inakugu. Riguk eik yataurum eshudok enesh douk eshesh madae Juda iri uwe, aria shatogur Kristen. Douk yakri inak um itaurum ipak shopunek kabi riguk yataurum eshesh madae Juda iri uwe shopunek um. <sup>14</sup> Eik douk enen tuwehin nyapenye um agundok Debeini narao eik um. Namudok aria eik ta inak ikripesch ananin yopinyi baraen sabaishi arpesh. Eshesh Grik shuni eshesh douk madae Grik iri uwe, shuni eshudok sharao debeiniyi saki iri shuni eshudok madae shudukemesh iri uwe. <sup>15</sup> Namudok aria eik douk mishin nyakitak abom um inaku ikriep Iruhin ananin yopinyi baraen ipak pape Rom iri shopunek.

### *Iruhin Ananin Baraen Douk Dodogowin Atin Abom*

<sup>16</sup> Eik douk madae inek abraen um agundok ikripesch um enyudok Iruhin ananin yopinyi baraen um uwe, uwok. Um maresh, enyen douk Iruhin ananin dodog abom um anan nunarao ihishmorim arpesh douk shunek bilip iri aria shupe wosik abom ihih nyumneh. Narik nárao Iruhin ananin baraen yem eshesh madae Juda iri uwe nagiguk naraenyumesh. <sup>17</sup> Umum maresh? Enyudok Iruhin ananin yopinyi baraen adur apa nyowereh ananih yopihi aih. Nyowerehah um agundok anan narao arpesh shasuhw ananin baraen dodog shagipeshen, um douk nahwaresh yopishi arpesh. Eshesh shenek bilip atin aria Iruhin natrish nahwaresh yopishi arpesh. Kabi douk baraen nyetem Iruhin ananik Buk iri nyakrium. Nyakri namudok,

“Arpen nyusuhw Iruhin ananin baraen dodog nyugipeshen iri, anan ta nuhwaren yopunyi arpen aria enyen ta nyupe wosik ihih nyumneh.”

### *Ihipmorim Mape Agundok Atap Iri Douk Makon Agabus Iruhin*

<sup>18</sup> Iruhin douk nape gani iruhw heven aria douk nape neyabigap madukemesh um agundok anan nyibur juwehosibur um. Aria ta nebeimesh yoweinypoe ihish arpesh douk shakon agabus aria shenek ihishmorim eneheneh yoweihiai iri. Eshesh douk shabeshuk adurinyi baraen nyabuhuk aria kupaishi ta mare shudukemen uwe, uwok. <sup>19</sup> Anan ta nebeimesh yoweinypoe. Um maresh? Eneh Iruhin ananih aih douk madae hunabeshuk uwe, uwok. Anan kanak neyabigesheh hatogur yopugnum shadukemeh. Aria eshesh apa shenek yoweishi inahos atin shape. <sup>20</sup> Seiwok baugos um Iruhin nakwaram agudok nahobig obi nyutob arigaha douk, eshesh douk shatik eneshenesh anan nenekesh iri eshudok. Shatik eshudok aria eshesh douk shanodukem um eshesh kanak ta shudukem ehudok Iruhin ananih biyeh aih douk arpesh madae shunodukemum

eshesh kanak shutrih esheshis nabes iri uwe, uwok. Ehudok biyeh aih douk ehudok. Sagomatin ananim dodogowimi abom urkum aria dodog, amam douk mape iih nyumneh iri. Aria anan nape sik aria deben um ihishmorim eshudok neshagrakuk iihish debeishi arpesh. Iihish arpesh shatik eneshenesh Iruhin nenekeh iri aria shadukemesh um ananih aih. <sup>21</sup> Eshesh douk adur shadukemesh um Iruhin anan nape, aria madae shukri anan douk debeini Iruhin aria shukri shutuk ananin nyeigur nyuto shunek tenkyuman uwe, uwok. Shenekeh namudok aria esheship urkwip pagugak abom um Iruhin aria baragos sesshukesh madae shur urkum adur atin uwe, uwok. <sup>22</sup> Eshesh douk shakri eshesh wosik shadukem enenyen iri arpesh, aria uwok. Eshesh douk shagugak abom. <sup>23</sup> Aria madae shunek lotu um anudok Iruhin douk madae nugok atin iri uwe. Ihishmorim shatanam um shenek lotu um anam rohwomi god douk eshesh meyoh shabarum iri. Eshudok douk shabarish shape kabi da arpesh ta mare shupe abom iih nyumneh iri uwe, shani armiguhw hwani mahish aria yuguhw.

### *Enyenener Arpesh Shenekeh Iri Yoweinyi Ina*

<sup>24</sup> Douk shenekeh namudok aria Iruhin nakutishukuk shawish um enyenener yoweinyi ina abom douk eshesh mishish shakitakumen iri shani kupaishi shenenem um yoweihhi abraenyih aih um esheshiruh yegeshiweruh. <sup>25</sup> Eshesh shakri uwok um anudok Iruhin ananin adurin atin baraen aria shatanam um shemnek rohwin baraen shagipeshen. Madae shenek lotu um Iruhin douk neneh eneshenesh iri uwe, o shuneman mour anan uwe, uwok. Eshesh wata shakutunaguk aria shatanam shenek lotu um eshudok douk anan kanak nakwarmesh iri, aria shenek lotu um eshudok atish. Iruhin anan douk nanodukem um anan kanak um apak arpesh mutuk ananin nyeigur nyukih iih nyumneh. Adur atin.

<sup>26</sup> Shenekeh namudok aria Iruhin nakutishukuk shawish um yoweihhi abom abraenyih aih. Esheshiyu armago shopunek wakutukuk yopihi aih um wuni owowim rahaem sheshuh um aria wani kupaiwari armago wanadem yoweihhi aih. <sup>27</sup> Armam shopunek henekesh namudok atin. Hakutukuk yopihi aih um huni amamiyu irorihiyeu sheshuh um aria amam mishish shakitak um huni kupaimi hunenem yoweihhi aih. Henekesh namudok aria harao yoweinyi poe douk nyenek wosik um amam kanak um enyudok heneken iri yoweinyi ina. <sup>28</sup> Eshesh douk shakri uwok um urkwip porum Iruhin abom um. Namudok aria nakutishukuk shakonuguk agabus abom, shorshor um shagipeshe esheship yoweipi urkwip aria shenek enyenener yoweinyi abom. Shenek ehudok aih douk madae yopihi um arpesh shunekeh iri uwe. <sup>29</sup> Eshesh douk shapeum shenek ihishmori yoweishi inahos. Shenek yoweihhi abom, shakri eneshenesh eshudok esheshish atish, shatrishuk yoweisi nabes kupaishi, shenek nyigiya um kupaishiyes eshudok eneshenesh, shabo kupaishi shagok, sharpak shanitok, shagiagim kupaishi shanaruken eneshenesh eshudok meyoh, urkwip madae pur punak yopip aria shenekumesh yoweishi inahos kupaishi, shanumogesh um kupaishi, <sup>30</sup> sheneyagwreh-umesh yoweinyi rohwin baraen um kupaishi aria shunekesh shurao yoweishi nyeiguhw, shenek horim horik um Iruhin, shanakripam um shabo mishish shariguk shatuk esheshish nyeiguhw shato, shape urkwip porum sabaihi yeh um shunek yoweinyi ina um, madae shemnek amakenyish esheshin baraen. <sup>31</sup> Madae shudukemesh um meihii aih yoweihhi aria meihii yopihi aih uwe, uwok. Madae shunek eshudok douk shenek promis adurinyi atin baraen um shakri shunekesh iri uwe. Esheship urkwip madae pukri kupaishi o shukri gigaumesh atin uwe, uwok. <sup>32</sup> Eshesh douk shadukem enyudok Iruhin

ananin yopinyi lo. Enyen douk nyakri, "Arpesh shugim ahudok iri ta shugok." Aria shapeum shenek yoweinyi ina atin. Aria douk madae shunek enyudok yoweinyi atin uwe, uwok. Eshesh shopunek shape shanadudareh um arpesh douk shapeum shenek enyudok atin yoweinyi ina iri.

## 2

### *Kwot Kweipon Iruhin Nunekatum Nunek Kwot Um Ihish Arpesh Iri Douk Yoputi Abom*

<sup>1</sup> Enyudok iganigadae yenyem iri baraen douk adurin atin. Namudok aria ipak meipari douk ta padukemesh baraen kupaishi pakri eshesh shenek yoweinyi ina iri, eik yakana ikrip ipak atin atin. Ipak madae wosik um ta punabeshuk um yoweishi inahos ipak penekeš iri uwe, uwok meyo. Ipak mne. <sup>2</sup> Ipak ta paduk baraen um kupaishi pakri eshesh shenek yoweishi inahos. Namudok douk ipak panadukum baraen nyatanamori um ipak kanak. Um maresh? Ipak douk padukemesh baraen kupaishi iri, ipak douk shopunek ta penek enyudokmori atin. <sup>3</sup> Apak douk madukemesh. Iruhin ta nene yopih aih um nenemesh kwotog eshudok arpesh shagipesh ehudokmori iri. <sup>4</sup> Aria ipak ta padukemesh baraen kupaishi iri, ipak shopunek ta penek enyudokmori atin. Namudok aria ipak pakri wosik ta puruwok punak punabeshukuk aria Iruhin ta mare nunemep kwotog uwe, uwok? Namudok ta uwok meyo. <sup>5</sup> Ipak douk patruh aria patik ahudok Iruhin ananin yopih aih? Anan douk nape noborubukep um roubi nyutob aria madae nubeimep yoweinyi ina arigas uwe, uwok. Ipak ta urkwip porum o uwok, ehudok Iruhin ananih yopih aih? Anan douk nape noborubukep um roubi nyutob um nakri pukeshuk agabus yoweishi inahos aria putanamori pukon aparuh anan. <sup>6</sup> Aria uwok. Ipakigos baragos seshuk abom aria madae punogugur abom pukri um pukeshuk agabus yoweishi inahos uwe, uwok. Penekesh namudok aria ipak meyo pape panasonuki enesh yoweishi inahos shape shatowep shatogur dedebesh atish. Pape penekesh namudok arigaha ahudok nyumnah douk Iruhin ta nugipesh adurih atih aih ba nyibur juwehosibur um aria nunemesh debeigwi kwotog ihish arpesh ahi iri hutogram, anan douk ta nukep ipakin yoweinyi poe. <sup>7</sup> Ahudok nyumnah hutogram, anan ta nuwanamesh poe ihishmorim arpesh kabi douk eshesh kanak shenekeh iri aih um eshesh kanak. <sup>8</sup> Eshudok arpesh douk shapeum shenek yopinyi shaurim yah um Iruhin nutuk esheshish nyeiguhw shuto aria nutaurumesh shupe wosik ihih nyumneh iri, eshesh Iruhin ta nutaurumesh aria shupe wosik atin ihih nyumneh. <sup>9</sup> Aria enesh arpesh douk urkwip porum eshesh atish aria shakenyuk agabus enyudok Iruhin ananin adurin baraen nyapeik aria shagipesh yoweinyi ina. Eshudokmori arpesh, Iruhin ta nyibur juwehosibur meyo abom aria ta nuwanamesh yoweinyi atin poe. <sup>10</sup> Ihish shenek yoweinyi iri arpesh ta shupe yowesh abom aria shurao debeirina amae nyuni debeiri eriger. Ta nyurik nyutogur um eshesh Juda aria eshesh madae Juda iri uwe shopunek ta nyutogrumesh. <sup>11</sup> Aria ihishmorim arpesh shenek yopishi iri, Iruhin ta nenekeleshumesh namudok. Ta wata nuraesh nuhwaresh yopishi arpesh aria nutuk esheshish nyeiguhw shuto aria aparuh hur wosik shupe wosik atin. Ta nurik nenekelesh um eshesh Juda shurik aria kupaishi shopunek ta namudok atin. Um maresh, Iruhin douk madae nutik agundok nyeiguhw shato um o nyeiguhw wokes um aria douk nune skelumesh uwe, uwok. Nagipesh atuh yopih adurih aih meyo aria nene skelumesh.

<sup>12</sup> Iihih arpesh douk madae shudukem enyudok lo seiwok Iruhin nakoguk Moses enyi aria shenek yoweinyi iri, Iruhin ta mare nugipesh enyudok lo aria nuneck skelumesh. Aria eshesh ta shunak shuwishuk atin. Aria ihishmorim Juda douk wosik shadukemesh um enyudok lo aria shenek yoweinyi iri, Iruhin ta nugipesh enyudok lo atin aria nuneck debeiti kwot. <sup>13</sup> Arpesh douk shemneken meyoh enyudok lo iri, Iruhin douk madae nutrish aria nuhwaresh yopishi uwe, uwok. Aria eshudok shagipesh lo iri atish douk nuhwaresh yopishi arpesh. <sup>14</sup> Eshesh kupaishi douk eshesh madae Juda iri uwe, eshesh douk madae shudukem enyudok lo uwe, uwok. Adur, eshesh madae shudukemen uwe, aria abudok nyutob eshesh urkwip porum shunek eneh yopishi aih kabi lo nyakrium, aria agundok shadukemesh um enyudok lo nubokadae nyor esheshigos baragos. <sup>15</sup> Um mares? Ehudok shenekeh iri aih douk howereh enyudok lo abom um nyakri enyi baraen douk adur Iruhin nenyem jurug numun eshesiruh aparuh. Aria eshesh douk wata urkwip porumen aria shadukemesh abom um anob nyutob douk shenek yopishi aih aria anob nyutob shenek yoweih aih. <sup>16</sup> Iruhin ta urkum morum enyudok yarik yakripep-nyi baraen aria ta nuneck skelum arpesh. Enyudok ta nyutogur namudok kabi enyudok Iruhin ananin yopinyi baraen eik yakripep-nyi nyakrium. Ahudok nuneck skelimesh ahi nyumnah, anan ta nukrip Jisas Krais um nusuhw kwotog nuneck skelum ihipmori panabeshuk iri arpeship urkwip puni ihihmori eneheneh yoweih aih.

### *Eshesh Juda Shakri Enyudok Lo Ta Wosik Nyutaurumesh Um Shutogur Yopishi Arpesh*

<sup>17</sup> Aria mumam um ipak douk shahwarep Juda iri? Ipak panahwar ipak wosik Juda aria panadudareh pakri ipak douk Iruhin ananish arpesh. Aria shopunek pakri enyudok lo douk enyen wosik ta nyutaurumepum kwotog aria pagipeshen pakri Iruhin nutrip nuhwarep yopishi arpesh. <sup>18</sup> Ihihmori aih Iruhin nakri um punekeh iri douk wosik padukemeh. Umum mares, ipak douk penek skul um enyudok ananin lo aria wosik padukem yopishi adurih aih um punekehum. <sup>19</sup> Ipak wosik padukemesh, aria pakri wosik ta piyabiges yah eshudok nabes seshukesh iri o pupe kabi lait aria piyabig arpesh shape wab iri um eshesh ta shunatrugun. <sup>20</sup> Ipak pakri enyudok lo douk baugos abom um ihinyumori saki nyani adurin baraen. Namudok aria pakri ipak wosik ta punek skul um shorshor um yopishi aih iri shuni eshudok douk madae gamo shudukemesh iri uwe, uwok. <sup>21</sup> Ipak douk penek skul um kupaishi, aria ipak kanak douk madae punek skul um ipak kanak uwe, uwok. Ipak douk pakrip kupaishi um mare shukwuaruh, aria ipak kanak apa pakwuaruh. <sup>22</sup> Ipak apa pakri arpesh mare shunek wehrur um, uwok. Aria ipak kanak apa penek wehrur um. Oggwuuhwudok aboriguh shabarguhu douk kupaishi shenekoguh um shunek lotumaguh iri, ipak Juda douk pakri uwokmoguh abom. Aria agwudok urusag shawish shenek lotumaguh um, ipak douk apa pawish pakwuaruh um enesh eshudok. <sup>23</sup> Ipak apa patuk ipakish nyeiguhw shakih pakri ipak wosik parao Iruhin ananin lo padukemen. Aria uwok. Ipak pabrig enyudok lo aria penek Iruhin ananin nyeigur nyabuhuk abom. <sup>24</sup> Ipak douk peneksh kabi da baraen nyetem Iruhin ananik Buk iri nyakrium. Nyakri,  
“Ipak meyoh penek yoweinyi ina aria eshesh douk madae Juda iri uwe shatrip aria douk shabubunim Iruhin ananin nyeigur.”

### *Ehudok Aih Um Amam Juda Hatah Yegeshiweruh Um Ta Mare Hutaum Uwe, Uwok*

<sup>25</sup> Aria douk ipak ta pugipesh enyudok lo abom piyaten um, wosik ehudok aih um patah ipakiruh yegeshiweruh um wosik ta hutaurumep. Aria ipak madae pugipesen piyaten abom um, namudok aria ipak douk patogur kabi da arpesh douk madae shudukem Iruhin aria madae shutah yegeshiweruh iri uwe. <sup>26</sup> Ipak urkwip purum eshesh kupaishi douk madae shutah esheshiruh yegeshiweruh iri uwe. Aria eshesh ta shunek enenyen enyudok lo nyakriyen iri um, Iruhin douk natrish nakri eshesh shape ananish adurish arpesh shatah yegeshiweruh iri um. <sup>27</sup> Eshesh madae Juda iri uwe douk adur madae shutah esheshiruh yegeshiweruh uwe, uwok. Aria ta eshesh shugipesen enyudok lo um, eshesh ta shunek bareaen nyuto ipak Juda shiyabigep ipakih penekih iri yoweihai aih. Um maresh, ipak Juda douk patah ipakiruh yegeshiweruh aria bareaen um enyudok lo henjem ipakik buk um ipak padukemen, aria uwok. Ipak pabrigem. <sup>28</sup> Aria eshudok adurishi Juda douk meishi? Adurishi abom Juda douk madae eshudok arpesh shatah adukiruh um esheshiruh yegeshiweruh meyoh iri uwe, uwok. <sup>29</sup> Eshudok adurishi Juda douk shagipesen enyudok lo abom numun esheship urkwip. Eshesh shagipesen baugeneyum bareaen aria ehudok aih douk amu kabi shatah esheshiruh yegeshiweruh abom um. Enyudok nyetem Buk iri lo douk madae nyutaurumesh um gamo shugipesen wosik uwe, uwok. Iruhin ananin mishin meyoh nyenekesh gamo shagipesen wosik. Eshudokmori arpesh, agundok atapishi arpesh ta mare shutuk esheshish nyeiguhw shuto uwe, uwok. Ta Iruhin atun nutukesh shuto iruhw.

### 3

#### *Yoweihai Aih Douk Ta Mare Henek Uhwinyum Yopihai Aih*

<sup>1</sup> Namudok aria eshesh Juda douk sheneh uhwinyumaguk eshesh madae Juda iri uwe mumam? Aka ehudok aih um shatah esheshiruh yegeshiweruh um douk henekumesh maresh yopishi eneshenesh? <sup>2</sup> Adur Iruhin nenekumesh sabaishi yopishi eneshenesh. Sagomatinyish douk eshudok. Iruhin nekesh ananin bareaen eshesh Juda um shiyohen. <sup>3</sup> Nekeshenyi aria enesh madae gamo shugipesen wosik uwe uwok. Shenekehs namudok aria ipak ta pukriyen mumam? Shenekehs namudok aria ipak pakri ta Iruhin mare gamo nugipesen enen nako Moses enyi adurinyi bareaen wosik uwe aka? <sup>4</sup> Adur atin ta uwok. Ihish arpesh apa sheneh rohw, aria Iruhin uwok. Anan douk napeum neyagwreh adurin atin bareaen kabi ananik Buk kwakrium. Kwakri namudok, "Ihish arpesh ta shutik nyak aria shukri nyakin bareaen douk adurin atin. Aria enesh arpesh shunemen kwot obi nyutob, nyak ta nyunek uhwinyumat."

<sup>5</sup> Douk atin eik yakri igipesh apak arpeshim urkum meyoh aria ikri enen bareaen. Aria bareaen enyudok. Aria douk atin apak munek enesh yoweishi inahos um aria arpesh shutrish ba gamo shudukem Iruhin aria shukri anan adur atin yopunari um, namudok aria douk ta mukri mumam? Abudok nyutob anan Iruhin ta nyibur juwehosibur um nuwanamap yoweishi inahos um eshudok yoweishi inahos apak monekesh iri um, aria ta mukri anan neneh yoweishi um apak aka, uwok? <sup>6</sup> Adurigom atin ta uwok. Aria anan ta mare nupe um nunek adurih atih aih akure, anan ta mare gamo nunek skelum ihishmorim agundok atapishi arpesh um kwotog uwe, uwok. <sup>7</sup> Aria douk atin enen arpen nyukri, "Eik ikitak iyagwreh enen rohwin bareaen aria enyudok nyunek Iruhin ananin adurin atin bareaen nyunowerh nyutogur yopugunum aria eshesh ihishmorim shumneken aria shutuk Iruhin ananin nyeigur nyuto um, aria namudok douk ta mumam, um ta nahwaresh

shenek yoweishi inahos iri aria ta wata nuwaname yoweinyi poe?" <sup>8</sup> Aria enen kupainyi arpen ta nyunek rohw nyukri, "Yaipo! Apak munek enesh yoweishi inahos um yopihi aih ta hutogur." Aria apak wosik ta mukri namudok aka, uwok? Adur atin, enesh arpesh douk shenek rohw shenek enyenenen um eik Pol shaduk baraen shakri eik yakri namudok. Aria uwok. Arpesh shakri namudok iri, kweipon Iruhin ta adur nuwanamesh yoweinyi poe kabi douk eshesh shenekehi yoweishi aih um.

### *Madae Enen Arpen Nyenek Yopuhi Adurih Aih Atuh Iri Uwe, Uwok*

<sup>9</sup> Eshudok yoweishi douk showeshik ihipmorim. Namudok aria um mumam? Apak Juda adur munek uhwinyum meshagrakuk eshesh madae Juda iri uwe um munek yopihi aih um aka, uwok? Aria adur atin namudok ta uwok. <sup>10</sup> Kabi baraen nyetem Iruhin ananik Buk iri nyakrium. Douk nyakri namudok,

"Madae enen arpen nyenek yopuhi adurih aih atuh iri uwe, uwok.  
Atin arpen meyoh nyenek yopuhi aih iri douk madae enen uwe.

<sup>11</sup> Nyadukem yopuhi aih iri arpen douk shopunek madae enen uwe, uwok.  
Aria enen arpen nyupe nyunek mour um nyurim Iruhin uwe, uwok.

<sup>12</sup> Ihishmorim arpesh douk shatanam shakonaguk agabus.  
Aria ihishmorim shatogur yoweishi arpesh.

Madae enen arpen nyunek yopuhi aih uwe, uwok.  
Amu wouwokuk abom.

<sup>13</sup> Esheshin baraen douk kabi anaruh wonugwegwiruh douk  
enesh shatarari arpesh shor aria paworuruh  
aria ba yoweiri unar rakihumori.

Eshesh douk shapeum shenek rohw um kupaishi aria esheshin baraen  
douk wanohwin atin  
kabi yowenari marasin nor yoweiguuhwi yuguhw-mori.

<sup>14</sup> Eshesh douk shapeum sheneyagwreh sabainyi yoweinyi baraen douk apa  
nyanunu kupaishi nyenekesh  
madae shupe wosik uwe, uwok.

<sup>15</sup> Eshesh douk apa shanak arigh atin ba shabo kupaishi shagok.

<sup>16</sup> Ihigun agundok douk eshesh shunak um, eshesh douk apa shenekesh  
enyenenen eshesh kupaishi  
shenekesh sharao debeiri eriger.

<sup>17</sup> Ehudok aih um shuni kupaishi shupe atugun  
shukesh aparuh hur wosik um kupaishi douk  
madae shudukemeh uwe, uwok.

<sup>18</sup> Eshesh douk madae ta shunogugur um Iruhin uwe, uwok."

<sup>19</sup> Namudok aria apak douk madukemesh. Enyudok baraen nyetem lo Iruhin nakoguk Moses enyi iri, enyen douk nyakrium eshesh Juda douk shape shakamum enyudok lo iri. Amam henyem um apak ihipmorim mutarihen aria mudukemen um mare enen arpen ta nyiyagwreh nyukri enyen douk adur nyape yopunyi arpen, aria ta uwok. Aria apak ihipmorim mape agundok atap iri douk baraen nyapeyap iri kweipon Iruhin ta nunemap kwotog. <sup>20</sup> Aria ta putik. Ahudok yah um shagipesh lo um Iruhin ta mare nutrish nuhwaresh yopishi arpesh uwe, uwok. Enyudok lo enyenin adurin mour douk nyenekap madukumesh um apak menek yoweishi inahos iri.

*Arpen Nyusuhw Krais Ananin Baraen Dodog Nyugipeschen Iri Douk Adur  
Nyatogur Yopunyi Arpen*

<sup>21</sup> Aria douk, Iruhin neyabigesh ananih adurih yopihi yah um nuhwar arpesh um yopishi arpesh. Aria adur um bilip atin apak douk maparug ahudok yopuhi yah. Ahudok yah douk madae mugipesh enyudok lo um uwe, uwok. Adur sabainyi baraen nyetem Iruhin ananik Buk iri douk nyakrium ahudok yopuhi yah. <sup>22-23</sup> Ahudok yah douk namudok. Ihishmorim arpesh shusuhw Jisas Krais ananin baraen dodog ba shigipeshen iri, Iruhin apa nahwaresh yopishi arpesh. Anan nenekeksh namudok um ihishmorim agundok atapishi arpesh shopunek ta shenek bilip um Krais atin aria shugim ahudok atuh yah. Umum maresh? Anan nenekeksh namudok atin um ihishmorim arpesh. Apak ihipmorim douk monek yoweishi inahos iri aria adur atin mapeik rougn um Iruhin aria madae murao ananih yopihi aih uwe, uwok. <sup>24</sup> Anan adur nataurum apak meyoh aria nahwarap um yopishi arpesh. Nahwarap um yopishi arpesh um enyudok mour douk Krais Jisas neneken um natorup aria nakweshihap mape wosik atin um. Apak madae munekuman enesh yopishi eneshenesh aria nohwarap yopishi arpesh uwe, uwok. Nohwarap yopishi arpesh meyoh um enyudok mour douk Jisas Krais neneken iri atin. <sup>25</sup> Iruhin neshopoki Krais Jisas nanaki shan nagok aria ananibor owishibor batourak bakrup ihish arpesh. Bakrup eshudok arpesh douk shasuhw anan Krais ananin baraen dodog shagipeshen iri. Namudok aria Iruhin madae nyibur juwehosibur nukri urkum murum yoweinyi eshesh sheneken iri uwe, uwok. Umum maresh? Anan nakweshiheshuk um niyabig ananih yopihi adurih aih um nohwarap yopishi arpesh um. Seiwock arigaha douk anan nape meyoh madae nukri um nuwanamesh yoweinyi poe um eshudok eshesh shenekesh iri yoweishi inahos uwe, uwok. <sup>26</sup> Iruhin nenek enyudok um douk niyabigap ananih yopihi adurih aih ba matrih. Nenekeksh namudok um niyabigap anan douk yopini abom nenek yopihi atih aih iri. Aria shopunek nenekeksh namudok ba neyabigap um ihishmorim shasuhw Jisas ananin baraen dodog shagipeshen iri douk anan apa nahwaresh nakri yopishi arpesh. <sup>27</sup> Namudok aria douk apak yah wakap um mubo mishish mutuk apak kanak apakish nyeiguhw shuto iruhw aria mukri apak douk yopipari abom iri. Umum maresh? Ahudok yah douk heshuk. Ahah douk heshuk um maresh? Apak ta mare mugipesh lo aria mutogur yopishi arpesh uwe, uwok. Apak ta monek bilip meyoh um Jisas aria Iruhin ta nohwarap yopishi arpesh. <sup>28</sup> Umum maresh? Apak makri namudok. Iruhin madae nuhwar arpesh yopishi um agundok shugipesh lo um uwe, uwok. Anan douk nahwaresh yopishi um agundok shasuhw Krais ananin baraen dodog aria shagipeshen um. <sup>29</sup> Aria pakri mumam? Aria Iruhin ta eshesh Juda esheshin atun aria eshesh madae Juda iri uwe ta uwok aka? Adur atun uwok. Anan douk eshesh madae Juda iri uwe esheshin shopunek. <sup>30</sup> Umum maresh? Iruhin anan douk adur atin meyoh. Ihishmorim arpesh douk shasuhw Krais ananin baraen dodog shagipeshen iri, anan apa natrish nahwaresh yopishi arpesh. Eshudok Juda shatah yegeshiweruh iri shenek bilip um Krais iri shani eshesh madae shutah yegeshiweruh iri uwe shenek bilip um Krais iri douk nahwaresh yopishi arpesh arag atin. <sup>31</sup> Apak monek bilip um Krais aria Iruhin nahwarap yopishi arpesh. Aria douk ta enyudok bilip nyenekap makenyuk agabus enyudok lo mare dodogowin uwe aka? Adur atin ta uwok. Apak monek bilip um Krais aria ta adur abom munek enyudok lo nyutogur dodogowin.

## 4

<sup>1</sup> Aria apak ta mukri mumam, um anudok apak Juda apakin yamenen Abraham? Anan douk arpen meyoh kabi apak um. Anan neneh meihai aih aria douk neneh bilip um Krais um? <sup>2</sup> Aria douk adur um anan nuneh enen yopunyi mour aria um enyudok ba nutogur yopuni arman akure, namudok aria anan ta wosik ko nunadudareh um enyudok mour aria nutuk ananin nyeigur nyuto iruhw. Aria uwok. <sup>3</sup> Baraen nyetem Iruhin ananik Buk iri nyakri namudok. “Abraham nasuhw Iruhin ananin baraen dodog nagipeshen. Namudok aria Iruhin nahwaran um yopuni arman.”

<sup>4</sup> Apak douk madukemesh. Arpesh shenek mour iri apa sharao utabor. Aria abrudok utabor douk madae shtrubor um shurabor meyoh kabi sharao enen mugu douk shekesh-umen meyoh um iri uwe, uwok. Abrudok utabor douk shatorish um shenek mour um. <sup>5</sup> Aria enyudok arpen douk madae nyunek mour um nyutogur yopunyi, aria nyusuhw Iruhin ananin baraen dodog nyugipeshen meyoh iri, anan douk natik enyenyin bilip aria nahwaren yopunyi arpen. Anudok Iruhin apa nahwar shenek yoweishi inahos iri arpesh shatogur yopishi arpesh.

<sup>6</sup> Seiwoh David douk nakriyuk enyudok atin baraen um agundok arpesh shunadudareh um. Eshudok arpesh, Iruhin douk madae nutik enen sheneken iri mour aria kweipon ta nuhwaresh yopishi arpesh uwe, uwok. Anan nuhwaresh yopishi arpesh meyoh. <sup>7</sup> Seiwoh Devit douk nakriyuk namudok.

“Eshudok arpesh douk Iruhin  
madae nunasuhw esheshish yoweishi inahos nupe uwe  
aria nakwreyeshuk iri, eshesh wosik ta shunadudareh.

<sup>8</sup> Arpesh douk Iruhin ta mare wata urkum murum  
esheshin yoweinyi iri, eshesh wosik ta shunadudareh.”

<sup>9</sup> Devit douk nakriyuk um agundok arpesh shunadudareh um. Aria douk mumam? Aria douk nakri um eshesh Juda shatah yegeshiweruh iri atish um shunadudareh aka? Namudok uwok. Eshesh madae shutah yegeshiweruh iri uwe shopunek shanadudareh. Ipak urkwip porum nubo riguk yakriyeni baraen um apudok shup douk petem Iruhin ananik Buk iri. Enyen douk nyakri, “Abraham nasuhw Iruhin ananin baraen dodog nagipeshen. Aria douk Iruhin natik ananin bilip namudok aria nahwaran yopuni arman.”

<sup>10</sup> Abudok nyutob Iruhin nahwar Abraham douk yopuni arman obi nyutob, anan Abraham douk natah ananihw yegeniyihw aka, watak? Adur, abudok nyutob anan douk wata nutahohw uwe, uwok. Aria Iruhin anan narik nahwaranaguk um yopuni arman. <sup>11</sup> Anan narik nasuhw Iruhin ananin baraen dodog nagipeshen aria yegeniyihw nagiguk natahohw. Aria agundok natah yegeniyihw um, douk natahohw um neneh kak meyoh. Neneh kak meyoh um anan urkum murum abudok nyutob anan madae nutah yegeniyihw obi nyutob uwe, aria Iruhin natik ananin bilip aria narik nahwaran yopuni arman. Namudok aria Abraham anan douk natogur ihishmorim shasuhw Iruhin ananin baraen dodog shagipeshen aria anan Iruhin nuhwaresh yopishi esheshin yamenen. Eshesh douk shenek bilip atin iri. Aria madae shutah yegeshiweruh iri uwe, uwok. <sup>12</sup> Abraham anan douk shopunek nape shatah yegeshiweruh iri esheshin yamenen. Eshesh douk madae shuhwaran yamenen agundok shatah yegeshiweruh atugun um uwe, uwok. Shopunek shahwaran yamenen mumam, eshesh douk shape numun um shagipesen apakin yamenen Abraham ananiruh yeriweruh. Umum agundok shasuhw Iruhin ananin baraen dodog shagipeshen kabi anan madae nutah ananihw yegeniyihw uwe aria narik nasuhw Iruhin ananin baraen nagipeshen um.

*Iruhin Ananin Adurin Atin Baraen Douk Nakriyen Nyanam Ihish Arpesh  
Shasuhw Ananin Baraen Dodog Shagipeshen Iri*

<sup>13</sup> Seiwock Iruhin nakripan enen adurin atinyi baraen Abraham. Nakripan um ta nukon ihib amnab anan Abraham nini ananish barheshish douk kweipon shugiguk shutogur iri um shunagremab. Aria putik, Abraham douk madae nugipesh enyudok lo aria seiwock Iruhin natrun nakripan enyudok ananin adurin atinyi baraen uwe, uwok. Anan douk nasuhw Iruhin ananin baraen dodog nagipeshen aria Iruhin natrun aria nahwaran yopuni arman. Aria douk neneck enyudok aria Iruhin seiwock nakripan enyudok adurin atinyi baraen. <sup>14</sup> Namudok aria ta eshudok shagipesh enyudok lo iri atish shunarao eshudok douk Iruhin nakripesha adurin atin baraen um nukepesh iri aria shunagremesh um, aria ehudok aih um pusuhw ananin baraen dodog pugipeshen um ta mare nyutaurumap uwe, uwok. Enyudok Iruhin nakripep-enyi adurin atin baraen shopunek ta mare nyutaurumap nyunekumap enen yopinyi uwe, uwok. <sup>15</sup> Umum maresh? Enyudok lo Iruhin nakoguk Moses enyi douk nyeayabigap um Iruhin ta nyibur juwehosibur aria nuwanamesh yoweinyi poe eshudok arpesh douk shabrig lo iri. Aria ta enyudok lo mare enen akure, Iruhin ta mare nukri arpesh shabrig lo aria shenek yoweishi inahos uwe, uwok. <sup>16</sup> Namudok aria Iruhin nakri neneck yopuhi aih um apak um enyudok adurin atin baraen douk nyanamori apak um bilip atin. Anan nakri namudok um atun nutaurumesh meyoh nuraesh shutanamori aria enyudok baraen nyutogur adurin atin um ihish Abraham ananish barheshish. Eshesh douk shagipesh lo iri atish aka, uwok. Eshesh shenek bilip um Iruhin kabi Abraham seiwock neneck bilip um Iruhin um, eshesh shopunek. Anan douk apak ihipmorim apakin yamenen. <sup>17</sup> Enyudok yakri enyi baraen douk kabi Iruhin ananik Buk kwakri um. Kwakri Iruhin nakrip Abraham nakri, "Eik yeneken nyatogur arpesh douk shape sabairubi warub nahobig iri esheshin yamenen." Iruhin natik Abraham um, anan douk adur nape apakin yamenen. Abraham apa neneck bilip um anudok Iruhin douk apa nohur shagok iri aria shakitak shape. Shopunek anudok Iruhin apa nakri baraen atin aria eneshenesh wata shutograri uwe aria douk shatogur arpesh shatirish.

<sup>18</sup> Aria abudok seiwock nyutob, Abraham anan douk wata nutrish uwe eshudok douk Iruhin nakripan um ta nunekesh iri. Aria anan douk adur nasuhw Iruhin ananin baraen dodog nagipeshen nakri anan adur ta nunekesh kabi nakripan baraen um. Abraham neneck namudok aria douk "Natogur arpesh douk shape sabairubi warub nahobig iri esheshin yamenen." Enyudok douk kabi Iruhin nakripan um. Nakripan namudok, nakri, "Nyakish yamehesh ta adur shutogur sabaishi." <sup>19</sup> Abraham rowogin ananish kwarahos hurukatin um shunak shutogur 100-poreish aria ananihw yegeniyihw douk hwatogur kabi hwagok iri um. Ananik irohukwik Sara shopunek kwape kupik aria adur rowogik. Anan natik namudok aria uwok. Aria adur nasuhw Iruhin ananin baraen dodog. <sup>20</sup> Iruhin nakripan ananin adurin atinyi baraen namudok aria anan madae nukri um nunek biyep urkwip um nukutukuk bilip uwe, uwok. Adur nasuhw Iruhin ananin baraen dodog aria enyudok bilip atin nyenekan dodogowin. Aria nape nanadudareh natuk Iruhin ananin nyeigur nyato iruhw. <sup>21</sup> Anan adur nadukemesh abom um Iruhin anan dodogowin atun um ta nunek enyudok douk nakripan adurin atinyi baraen um ta nunekesh iri. <sup>22</sup> Namudok aria Abraham "Nasuhw Iruhin ananin baraen dodog nagipeshen aria Iruhin nahwaran yopuni arman." <sup>23</sup> Enyudok baraen, "Iruhin nahwaran yopuni arman" um, enyey douk henyem nyetem

Iruhin ananik Buk. Enyen douk madae hinyem nyukri um Abraham atun uwe, uwok. <sup>24</sup> Aria amam henyemaguk nyakrium apak shopunek. Apak douk monek bilip um Iruhin douk nohuri Jisas apakin Debeini nakitak wonugwehw iri. Namudok aria apak shopunek Iruhin ta nuhwarap yopishi arpesh. <sup>25</sup> Iruhin neshopok Jisas aria nanaki nagok. Um maresh? Apak monek yoweishi inahos. Nagok aria Iruhin ta nonohur nakitak naapeum Iruhin nunek apak nutrup nuhwarap yopishi arpesh.

## 5

### *Iruhin Nohwarap Yopishi Arpesh*

<sup>1</sup> Apak douk masuhw Iruhin ananin baraeen dodog magipeshen aria anan natrup nahwarap yopishi arpesh. Namudok aria douk apakin Debeini Jisas Krais nenekap apakiruh aparuh hor wosik aria mani Iruhin mape atugun. <sup>2</sup> Apak douk monek bilip um Jisas. Namudok aria anan meyoh narapari manaki mawish agundok Iruhin nataurumap meyoh um. Aria douk manadudareh abom. Umum maresh? Apak douk adur madukemesh um kweipon apak ta munak iruhw heven murao debeishi nyeighuhw aria muni Iruhin mupe. <sup>3</sup> Aria apak mare munadudareh um enyudok atin uwe, uwok. Abudok nyutob amaen nyutogrumpum, apak shopunek manadudareh. Umum maresh? Amaen douk nyatogrumpum mutogur dodogowip aria miyotu musah enenyenen amaen. <sup>4</sup> Aria ehudok aih um apak dodogowip um miyotu musah enenyenen nyutogrumpum iri amaen um, ehudok aih ta hunekap mutogur yopishi arpesh aria miyotu dodog. Aria ehudok aih um miyotu dodog um ta hunekap adur mudukemesh um Krais ta nunaki aria nunekumap yopihi aih. <sup>5</sup> Apak douk mape matrugum um enyudok aria douk madae mupe mutrugum meyoh uwe, uwok. Umum maresh? Iruhin douk nakop ananin Mishin nyapeyap aria nyataurumap ba madukemesh um enyudok adur ta nyutogur. Enyudok ananin Mishin douk nyenekap madukemesh um agundok Iruhin anan adur urkum manawasham apak um.

<sup>6</sup> Abudok nyutob Iruhin nakriyobi apak wata dodogowip um aria wata mape monek yoweiniyi obi nyutob, Krais nanaki nagok. Nagok um wata nunarao apak douk mokon agbus Iruhin iri aria wata mutanam um anan Iruhin. <sup>7</sup> Adur atin. Apak ta mare enen arpen nyukri wosik um nyugok ba nyutaurum enen yopunyi arpen uwe, uwok. Aria wosik um ta enen yopunyi atin arpen adur ta wosik nyukri nyugok um nyutaurum enen adur yopunyi arpen. <sup>8</sup> Aria wosik um ta Iruhin anan douk adur neyabigap um agundok anan urkum adur munawasham apak abom um niyabigap namudok. Abudok nyutob apak douk wata mape monek yoweiniyi atin aria Krais nanaki nagok um apak. <sup>9</sup> Nagok aria ananibor owishibor botourak bakrup apak aria Iruhin natrup ba nahwarap um yopishi arpesh. Namudok aria apak adur madukemesh um Krais ta nurap mutanam aria mupe wosik atin. Aria agundok Iruhin nyibur juwehosibur atubur um yoweiniyi apak moneken iri um, anan ta mare nenekap murao eriger uwe, uwok. <sup>10</sup> Riguk apak douk mape Iruhin ananish horik horin. Aria ananin Nuganin wata nanaki nagok um apak, Iruhin wata nahwarap ananish arpesh aria nenekap mani anan mape atugun. Krais douk nagok aria wata nakitak nape aria apak adur madukemesh abom um anan ta wata nurap mutanam um adur mupe wosik atin. <sup>11</sup> Aria douk madae namudok atin uwe, uwok. Douk apakin Debeini Jisas Krais douk shopunek nenekap matogur Iruhin ananish arpesh. Anan nenekap namudok aria adur manadudareh um Iruhin.

### *Adam Nakwarum Gok Aria Jisas Nakwarum Agundok Mape Wosik Um*

<sup>12</sup> Apak douk madukemesh. Atun arman neneh yoweishi inahos aria ahudok yoweishi aih hatogur agundok atap. Ahudok aih hatogur aria hakwaromori gok. Namudok aria gok nyatogurum ihishmorim arpesh. Um maresh? Ihishmorim arpesh shenek yoweishi inahos atish. <sup>13</sup> Lo seiwok Iruhin nakoguk Moses enyi douk wata nyutogur uwe, aria ehudok aih um shenek yoweishi inahos um shatogur shape agundok atap. Aria Iruhin madae nukop lo uwe uwok aria Iruhin ta mare urkum murum ihishmori atin atin yoweishi inahos douk arpesh shenekesh iri uwe, uwok. <sup>14</sup> Namudok aria abudok nyutob Adam natogur napenyobi arigaha banak batogrumori abudok nyutob Moses natogur napenyobi, ihishmorim arpesh douk shagok. Enesh shenekesh iri yoweishi inahos douk madae shubrig Iruhin ananin dodogowinyi lo kabi enyudok Adam nenenken iri um uwe namudok, aria eshesh shopunek shagok.

Namudok aria Adam anan douk natogur kabi enen kak meyoh um anudok arman kweipon ta nutogur iri. Umum maresh? Adam nokwarum gok aria Jisas nokwarum agundok mape wosik abom um. <sup>15</sup> Ehudok aih um Iruhin nataurumap meyoh um hani eshudok Adam nenenken iri yoweishi inahos douk madae hanaki shopunek arag atin uwe, uwok meyoh. Adur, atun arman meyoh neneh yoweishi inahos aria sabaishi arpesh namudok shagok. Aria ehudok aih um Iruhin nataurumap meyoh um douk adur hatogur dedebeh um anudok atun arman Jisas Krais. Iruhin nataurumap namudok aria douk apak sabaihari douk marao Iruhin ananin yopinyi shuraen meyoh iri mugu. Enyudok shuraen meyoh iri mugu douk adur nyeshagrakuk abom um agundok shagok um. <sup>16</sup> Aria enyudok Iruhin ananin shuraen meyoh iri mugu douk madae nyenekeshumap namudok atin kabi enyudok yoweini ina Adam nenenken iri nyenekeshumap um uwe, uwok. Adam nenenken iri yoweini ina aria Iruhin nenenken kwotumap nakri apak ihipmorim ta munak muwishuk. Apak ihishmorim arpesh wata monek yoweishi inahos aria Iruhin adur nataurumap nenenken giha abom nakop meyoh ananin yopinyi shuraen meyoh iri mugu um agundok aria nahwarap yopishi arpesh. <sup>17</sup> Adur atin atun arman madae numnek Iruhin ananin baraen. Aria anan nenenken iri yoweishi inahos shakwarumori gok. Aria enyudok gok nyape debenym ihish arpesh kabi debeimi king-omi hape debeimi um. Aria ehudok aih um Iruhin nenemep giha aria nataurumap meyoh abom um douk adur dedebeh atih heshagrakuk enyudok gok. Aria apak adur madukemesh um apak douk marao ehudok Iruhin ananin yopishi aih um agundok nataurumap meyoh aria nahwarap yopishi arpesh um. Aria apak ta mupe debeipari ihih nyumneh kabi amam debeimi king um. Iruhin nataurumap namudok um anudok atun arman Jisas Krais nenenken iri aih atuh.

<sup>18</sup> Namudok aria apak madukemesh namudok. Atun arman nenenken atin yoweini ina aria apak ihipmorim mape yoweini poe aria ta munak muwishuk. Aria wata namudok atin. Atun arman nenenken atin yopunyi mour aria Iruhin natik namudok aria wata nahwar ihishmorim yopishi arpesh. Aria douk nenenkapmu wosik aria mare mugok uwe, uwok. <sup>19</sup> Atun arman madae numnek Iruhin ananin baraen. Namudok aria sabaishi arpesh shatogur shenek yoweishi inahos atish iri. Aria namudok atin. Atun arman wata nasuhw Iruhin ananin baraen nagipeshen namudok aria sabaishi arpesh ta shutogur yopishi arpesh. <sup>20</sup> Enyudok lo nyatogur um ihish arpesh shudukemesh abom um mareh aih douk yopih, aria mareh aih douk yoweh. Aria enyudok lo nyohur arpesh um shunek yoweishi inahos. Eshesh shenek sabaishi atish yoweishi inahos, aria agundok

Iruhin nataurumesh meyoh um neshagrakuk agundok shenek yoweishi inahos abom um. <sup>21</sup> Riguk eshudok yoweishi inahos shape dedebesh abom namudok aria shakwarumori gok. Aria um douk namudok atin. Enyudok Iruhin nataurumap meyoh um douk nyatogur nyanawashak debegun aria nape debegun. Anan nenekehsumap namudok aria nahwarap yopishi arpesan ta mupe wosik iih nyumneh. Anan atun nenekap matogur namudok um enyudok apakin Debeini Jisas Krais nenenken iri mour.

## 6

### *Apak Douk Mani Krais Magok Atugun*

<sup>1</sup> Namudok aria apak ta mukri maren baraen? Aria mukri apak mupe um munek yoweishi inahos namudok atin um Iruhin nupe um nataurumap meyoh namudok atin, aka? <sup>2</sup> Adur atin ta uwok. Apak douk kabi magok iri um. Aria ehudok aih shenek yoweishi inahos um douk makutuhukuk. Aria namudok ta mumam, um douk wata mupe munek yoweishi inahos namudok atin um? Namudok uwok. <sup>3</sup> Ipak douk padukemesh aka, uwok? Apak ihipmorim douk menek baptaisum agundok manak matukur Krais Jisas um. Aria shopunek mani anan magok um agundok manak matukur anan um. <sup>4</sup> Namudok aria agundok apak menek baptaisum douk mani Krais magok shopunek aria Iruhin naromap atugun. Nenekeh namudok um apak shopunek um ta mugipesh namuhi yopihai kabi apakin Yaken nakwu ananin dodogowinyi aria debeinyi dodog abom ba nohuri Krais nikitak um.

### *Apak Douk Ta Muni Krais Mupe Iih Nyumneh*

<sup>5</sup> Apak adur manak matukur Krais aria mani anan magok kabi anan nagok um. Aria namudok atin, apak douk manak matukur anan aria adur ta muni anan mukitak wonugwehw kabi anan seiwok nikitak wonugwehw um. <sup>6</sup> Apak madukemesh. Ahudok harik hapeyapi iri yoweishi aih douk hani Krais hagokuk rowog kruse um Iruhin niyatok enyudok dodog douk nyape nyenek yoweishi aih ba nyapeyap iri. Iruhin nenekeh namudok aria ehudok yoweishi aih um shenek yoweishi inahos um douk mare wata shopunek shuweshikap uwe, uwok. <sup>7</sup> Umum maresh? Shagok iri arpesan douk enyudok dodog um shenek yoweishi inahos um douk wata nyuweshikesh atin uwe, uwok.

<sup>8</sup> Apak douk manak matukur Krais aria kabi mani anan magok um. Namudok aria adur monek bilip mudukemesh um apak shopunek ta wata muni anan mupe wosik. <sup>9</sup> Umum maresh? Apak madukemesh adur. Krais nagok aria shopunek nikitak um, anan ta mare wata nugok shopunek uwe, uwok. Gok douk madae dodogowin um wata nyuweshik anan uwe, uwok. <sup>10</sup> Anan douk nagok atuh arag aria nohudok atuh arag nagok um douk nanunu enyudok um shenek yoweishi inahos um. Kweipon ta mare wata nugok shopunek uwe, uwok. Aria douk naopeum nape kabi Iruhin nakri um, um natuk anan Iruhin ananin nyeigur nyato iruhw um. <sup>11</sup> Aria ipak douk namudok atin. Ipak punubo urkwip pukri ipak adur pagok aria pabouk enyudok dodog um penek yoweishi inahos um shatuhuk. Pakri ipak douk panak pantoruhw Krais Jisas aria pape kabi Iruhin nakri um. <sup>12</sup> Ipak mare purauri yoweishi inahos um shiyoh-umep aruhudok ipakiruh yegeshiweruh douk adur apa hagok hatar iri uwe, uwok. Punekesh namudok um kadak yoweishi inahos shenekep um aria pugipeshuk ehudok ipak mishish shakitakumeh iri yoweishi aih. <sup>13</sup> Aria mare wata shopunek purauri yoweishi inahos um tukwaniruh um ipakiruh yegeshiweruh hunamaguk um punek enesh yoweishi inahos uwe,

uwok. Aria ipak ta pukon ipak kanak um Iruhin aria pupe kabi arpesan douk shagok iri aria wata shopunek shakitak shape iri um. Aria ipak shopunek ta pukon ihigunum um ipakiruh yegeshiweruh um Iruhin um neneh mourum-aruh um hugipesh um yopihi aih atih. <sup>14</sup> Namudok aria yoweishi inahos mare wata shiyohep uwe, uwok. Umum maresh, ipak douk awom ta pupe shakamum lo pugipeshen aka, uwok. Umum maresh? Ipak douk pape shakamum agundok Iruhin nataurumap meyoh um.

### *Apak Ta Mupe Munek Mour Um Yopihi Atih Aih*

<sup>15</sup> Douk apak wata mupe shakamum enyudok lo Iruhin nakoguk Moses enyi aria mugipeshen uwe, uwok. Douk mape shakamum agundok Iruhin nape nenemap giha aria nataurumap meyoh um. Aria douk ta mumam? Mape namudok aria ta wosik um wata mupe munek yoweishi inahos aka, uwok? Adur atin ta uwok. <sup>16</sup> Ipak douk padukemesh. Abudok nyutob ta ipak pukon ipak kanak um anan debeini aria pupe shakamum anan pupe punek ananin mour um, namudok aria ipak douk pagipesher ananin baraen kabi douk naweshikep um pape peneman garibog um. Aria douk namudok atin. Pakri pugipesher yowelihi aih um, ba kweipon eheh ta hunekep pugok. Aria pakri pugipesher Iruhin ananin baraen um, kweipon anan ta nuhwarep yopishi arpesan. <sup>17</sup> Namudok aria apak douk manadudareh um Iruhin um enyudok. Adur, riguk ipak douk pape shakamum yoweishi inahos aria pape penemesh garibog. Aria Iruhin wata nataurumep pemnek ananin shakriep-enyi baraen aria adur pakri adurin atin pasuhwen aria pagipesher abom. Namudok aria apak douk monek tenkyu um Iruhin um enyudok. <sup>18</sup> Iruhin nakweshih-epaguk um yoweishi inahos pape wosik atin aria nenekep pape shakamum anan aria pape pagipesher ananih yopihi atih aih. <sup>19</sup> Ipackip urkwip douk wata dodogowip um gamo pudukemesh uwe, watak. Namudok aria yakri ikwu apak arpesan urkwip meyoh aria ikriep um enyudok baraen. Riguk ipak douk pape shakamum yoweishi inahos penemesh garibog aria pakwu anabigiruh um ipakiruh yegeshiweruh penek yoweishi inahos shanabo susih iri shani eneshenesh yoweishi inahos shopunek. Penek yoweishi namudok aria adur showeshikep dodog meyoh. Ariā douk ipak ta pukon ipak kanak um Iruhin, pupe shakamum anan aria punek garibog um punek ananih yopihi aih aria adur pupe ananip atip.

<sup>20</sup> Riguk abudok nyutob yoweishi inahos showeshikep dodog pape penemesh garibog obi nyutob, ehudok yopishi aih douk madae huweshikep uwe, uwok. <sup>21</sup> Riguk ipak penek yoweishi aih aria douk parao abraen um ehudoki aih. Aria ipak douk parao maresh yopishi eshudok um eshudok riguk penekesh iri yoweishi inahos? Aria uwok. Ehudok aih douk hokwarum gok atin. <sup>22</sup> Aria douk Iruhin nakweshih-epaguk um eshudok yoweishi inahos aria pape wosik atin. Nakweshihep aria nepusop pape shakamum anan pape penek ananin mour. Aria ta purao yopishi eshudok namudok. Aria ta adur pupe ananip atip punek yopihi aih aria kweipon ta adur pupe wosik ihih nyumneh. <sup>23</sup> Umum maresh? Yoweishi inahos ta shekesh shashudok arpesan douk shape shakamum shenekesh iri. Enyudok pœ douk shugok atin um. Aria enyudok Iruhin nakopen meyoh iri yopunyi mugu douk enyudok. Aria ta adur mupe wosik ihih nyumneh. Apak douk monak matoruhw Krais Jisas apakin Debeini aria ta nunekap mupe namudok.

<sup>1</sup> O eikish ashukenyish owashish, enyudok agundok atapinyi lo douk padukemen. Namudok aria douk enyudok yakri ikriep um bareaen douk padukemen wosik abom iri. Arpen wata nyupe obi nyutob, enyudok lo douk dodogowin atin aria nyoweshiken. <sup>2</sup> Namudok aria onok armatok kwurao anan arman aria anan wata nupe obi nyutob, enyudok lo douk wata nyaweshikesh dodog eshesh biyesh shopunek atin. Aria douk anan nugokuk um, okwok enyudok lo douk madae nyuweshigok uwe, uwok. Kwape meyoh atin. <sup>3</sup> Namudok aria douk okwokwin wata nupe aria okwok kwunak kwuwaur kupaini um, okwok douk ta shuhwarok kwabrig shanaraum um iri. Aria douk okwokwin nugokuk um, enyudok lo douk madae nyuweshigok uwe, uwok. Kwape meyoh atin. Namudok aria kwukri kwurao kupaini um, namudok okwok douk madae kubrig shanaraum uwe, uwok.

<sup>4</sup> Namudok aria eikish arpesh, ipak patukur Krais aria namudok douk pagok pani anan. Namudok aria enyudok lo Iruhin nakoguk Moses enyi douk shopunek madae nyuweshikep uwe, uwok. Douk apak mape anudok arman douk Iruhin nonohur nakitak wonugwehw iri ananipari. Mape ananip um munek Iruhin ananih yopili atih aih. <sup>5</sup> Um maresh? Riguk abudok nyutob apak wata mape magipesh ehudok harik hapenyap iri yoweihai aih obi nyutob, enyudok lo douk nyohuri eneshenesh yoweishi numun apakiruh yegeshiweruh aria nyenekap mape menek yoweishi inahos. Namudok aria ehudok yoweihai aih douk hakwaramori gok. <sup>6</sup> Aria douk enyudok lo douk madae nyuweshikap uwe, uwok. Um mare, apak douk mani Krais magok aria makutukuk ihishmori eshudok douk showeshikap iri. Aria douk madae mupe um munek mour mugipesh enyudok lo seiwok henyemaguk iri nyakrium uwe, uwok. Apak menek Iruhin ananin mour um ahudok ananih namuhi yah douk ananin Mishin nyokwarumah iri.

### *Apak Makri Um Munek Yopishi Inahos Aria Yoweishi Inahos Shanunu Apak*

<sup>7</sup> Aria ta mukri mumam? Mukri enyudok lo enyen kanak douk yoweinya aka, uwok? O adur atin uwok. Aria ta enyudok lo mare nyiyabige mareh aih yoweishi akure, eik ta mare idukem yoweishi inahos uwe, uwok. Enyudok lo atin nyeneke aria yadukem yoweishi inahos. Douk namudok. Lo nyakri, "Nyak mare nyunek nyigya um kupaishi esheshish eshudok eneshenesh." Douk lo mare nyukri namudok akure, aria ehudok aih um shene nyigya um ta mare idukemeh uwe, uwok. <sup>8</sup> Enyudok lo nyeyabige yah um yoweishi inahos aria yoweishi inahos shawishi shohur eneheneh aih um shenek nyigya numun eikihw yegenyihw. Douk enyudok lo uwok akure, yoweishi inahos ta mare dodogowish uwe, uwok. <sup>9</sup> Riguk wata idukem enyudok lo obi nyutob uwe, eik douk yape aria enyen madae nye igok uwe, uwok. Aria arigaha enyudok lo nyatogur nyeyabige yoweishi inahos aria yoweishi inahos shakitaki dodogowish atish um <sup>10</sup> eik kanak yadukemesh um yape rougun um Iruhin aria shabo eik yagok. Enyudok lo seiwok Iruhin nakoguk Moses enyi, enyen douk nakonaguk um nyutaurum apak mupe wosik. Aria eik wata yatik um, enyudok lo nyae yagok. <sup>11</sup> Um maresh? Enyudok lo meyoh nyeyabiges yah yoweishi inahos, aria yoweishi inahos shaparugah shagimahi aria shagiyagim eik ba shae yagok. Um maresh? Eik yape rougun abom um Iruhin. <sup>12</sup> Namudok aria apak douk madukemesh. Enyudok lo, enyen kanak douk Iruhin ananin atin. Ihinyumori bareaen douk enyudok lo nyakriyenyi, enyen shopunek Iruhin ananin nyenek holi iri aria yopinyi atin.

<sup>13</sup> Aria douk mumam? Aria ta ikri enyudok yopinyi lo nyae yagok aka? O adur atin uwok. Yoweishi inahos meyoh shae yagok. Yoweishi inahos

meyoh shakwu enyudok yopinyi lo aria nyae yagok um apak mutik eshudok yoweishi inahos aria mukri o adur atin, eshudok douk yoweishi inahos. Namudok aria enyudok lo nyeyabigap yoweishi inahos aria madukemesh um eshesh douk yoweishi abom.

### *Debeiruhi Wanogwiruh Hakitak Numunipam Apak*

<sup>14</sup> Apak madukemesh. Enyudok lo, enyen douk Iruhin ananin Mishin nyakwarumen. Aria eik douk yoweiniy arpen meyoh yenek yoweishi inahos iri. Yoweishi inahos showeshike aria sheyohur yape yagipesh esheship atip urkwip. <sup>15</sup> Ehudok yape yenekeh iri aih douk madae idukemeh uwe, uwok. Um maresh? Aih yakri um inekeh iri douk madae inekeh atin uwe, uwok. Aria aih yakri uwok um inekeh iri, ehudok apa yenekeh. <sup>16</sup> Eik apa yenek ehudok aih douk yakri uwok um inekeh iri. Yenekesh namudok aria yadukemesh um enyudok lo enyen douk yopinyi atin. <sup>17</sup> Namudok aria eshudok yoweishi inahos douk madae eik meyoh inekesh uwe, uwok. Yoweishi inahos shape numun eik iri atish sheneke. <sup>18</sup> Eik douk yape um yagipesh harik hapeyen iri yoweih aih. Aria yadukemesh um numuniwe um eik douk madae eneh yopihi aih hupeye uwe, uwok. Um maresh? Yabirak yakri um inek yopihi aih yabirak yatik uwok. <sup>19</sup> Yopishi inahos yakri um inekesh iri douk madae inekesh atish uwe, uwok. Aria yape um yenek yoweishi inahos douk yakri uwok um inekesh iri. <sup>20</sup> Aria douk yape um yenek yoweishi inahos douk yakri wokumesh iri, eshudok douk madae eik meyoh inekesh uwe, uwok. Yoweishi shape numun eik iri meyoh shenekesh.

<sup>21</sup> Namudok aria douk yatik ahudok dodogowihi aih hapenyne iri um inek yoweishi inahos. Ahudok. Yakri um inek yopuhi obi nyutob, ahudok hapenyne iri yoweih hakitaki hatupokume yah. <sup>22</sup> Adur, numun eikim urkum douk yanadudareh um Iruhin ananin lo yakri igipeshen. <sup>23</sup> Aria wata yatik kupainyi dodogowinyi lo nyenek mour nyape numun um eik um inek yoweishi inahos. Enyudok dodogowinyi lo apa nyani enyudok Iruhin ananin lo douk eik urkum makriyen iri nyarpok. Aria enyudok dodogowinyi lo nyape nyenek mour numun um eik iri nyoweshike dodog yape yenek mour um enyen atin. <sup>24</sup> O gihauum eik yape yowewe abom. Omi ta nyutaurume nyukweshihe um ahwudok yegenyihw douk apa hwagok iri? <sup>25</sup> Eik yenek tenkyu abom um Iruhin. Anan meyoh nakri aria Jisas Krais apakin Debeini ta nukweshihe ipe wosik atin.

Aria douk eik yape namudok. Eik kanak yape yagipesh Iruhin ananin lo um douk yagipeshen um eikim urkum atin. Aria numun um eik uwok. Ehudok harik hape iri atin yoweih aih hape howeshike dodog aria yape yenek yoweishi inahos atin.

## 8

### *Krais Nakop Iruhin ananin Mishin Aria Nyapeyap*

<sup>1</sup> Namudok aria apak armam armago douk matukur Krais Jisas iri, baraen douk madae enen nyupeyap um kweipon Iruhin nunemap baraen aria nuwanamap yoweiniy poe um, uwok. <sup>2</sup> Um maresh? Iruhin ananin Mishin enyenyih dodogowihi aih hataurumap aria nyakweshihap um yoweih aih hani enyudok shagok um. Iruhin ananin Mishin nyenekap mape wosik atin namudok um enyudok Krais ananin mour atin. <sup>3</sup> Enyudok lo seiwok Iruhin nakoguk Moses um douk madae dodogowip um nyutaurumap uwe, uwok. Um maresh? Apak madae dodogowip um mugipeshen uwe. Namudok aria enyudok mour douk lo madae dodogowin um nyuneken

iri uwe, Iruhin anan meyoh neneken. Neshopoki ananin nugarin nabuhi natogur arpen kabi apak monek yoweishi inahos iri, aria shan nagok nenek ofa nator apakish yoweishi inahos. Namudok aria Iruhin nenek skelum ehudok harik hapenyap iri yoweih aih nakri eshesh douk yoweishi inahos aria naesh shabuhuk. <sup>4</sup> Iruhin nataurumap namudok um douk apak mugipesheh miyateh ehudok yopihi arpeshih aih douk lo nyakrium apak munekeh iri. Iruhin nanemap enyudok apak douk mare mupe um mugipesh ehudok harik hapenyap iri yoweih aih iri uwe. Anan douk neneken um apak douk mape um magipesh enyudok Iruhin ananin Mishin nyakripapen iri. <sup>5</sup> Eshudok arpesh douk shapeum shugipesh ehudok harik hapenyesh iri yoweih aih iri, esheship urkwip douk porum eshudok shakwarumesh iri yoweishi inahos atish. Aria eshudok arpesh douk shugipesh Iruhin ananin Mishin iri, esheship urkwip douk porum Iruhin ananin Mishin nyakripesh-enyi atin. <sup>6</sup> Eshudok arpesh douk urkwip porum shakri shugipesh sharik shapenyesh iri yoweishi inahos atish iri, eshesh ta shugok shunak shuwishuk. Aria eshudok douk urkwip porum shakri shugipesh Iruhin ananin Mishin nyakripesh-enyi atin iri, eshesh ta shupe wosik iih nyumneh aria aparuh hur wosik. <sup>7</sup> Eshudok arpesh douk urkwip porum shakri shugipesh sharik shapenyesh iri yoweishi inahos atish iri, eshesh douk Iruhin ananish horik horin. Um maresh? Eshesh douk madae shugipesh Iruhin ananin lo uwe, uwok. Aria eshesh ta mare dodogowish um shugipeshen uwe, uwok. <sup>8</sup> Eshudok arpesh douk shupe um shugipesh harik hapenyesh iri yoweih aih atin iri, eshesh ta mare shugipesh Iruhin ananim urkum aria shunadudareh uwe, uwok.

<sup>9</sup> Ipak douk Iruhin ananin Mishin nyapenyep aria madae pupeum um pugipesh harik hapenyep iri yoweih aih uwe. Pape um pugipesh enyudok douk Iruhin ananin Mishin nyakripen iri atin. Arpesh douk madae Krais ananin Mishin nyupenyesh iri uwe, eshesh douk madae ananishi uwe, uwok. <sup>10</sup> Ipakiruh yegeshiweruh douk yoweishi inahos sharuh aria ta hugok. Um maresh? Apak munek yoweishi inahos. Aria ta Krais nyupenyep um, ipakish mishish ta shupe iih nyumneh. Um maresh, ipak Iruhin douk nahwarep yopishi arpesh. <sup>11</sup> Iruhin douk nohur Krais nikitaki wonugwehw. Aria douk anan Iruhin ananin Mishin nyupenyep um, aria kweipon anan shopunek ta nunek arhudok ipakiruh hugok iri yegeshiweruh wata dodogowiruh hupe wosik iih nyumneh. Iruhin ta nukri aria ananin nyapenyep iri Mishin ta nyunekep namudok.

### *Iruhin ananin Mishin Nyenekap Matogur Ananish Batowish*

<sup>12</sup> Namudok aria ekish ashukenyish owashish, apak douk enen tuwehin nyapenyap um mubeyen. Enyudok tuwehin douk mare mubeyen um enyudok mugipesh ehudok harik hapenyap iri yoweih aih um uwe, uwok. Apak ta mugipesh Iruhin ananin Mishin nyakriyen iri baraen. <sup>13</sup> Aria ipak pupe um pugipesh ehudok harik hapenyap iri yoweih aih um, namudok adur ta pugok. Aria ta ipak purao dodog um Iruhin ananin Mishin aria pubouguk harik hapenyep iri yoweih aih hugokum, ipak ta pupe wosik iih nyumneh.

<sup>14</sup> Eshudok arpesh douk Iruhin ananin Mishin nyarikumesh um enenyen iri, eshesh douk Iruhin ananish batowish. <sup>15</sup> Um maresh? Ipak douk madae purao enen mishin douk wata nyuweshikep dodog aria nyenekep punogugur shopunek iri uwe, uwok. Parao enyudok Mishin douk nyenekep patogur Iruhin ananish batowish iri. Aria douk enyudok ananin Mishin atin nyopuhur aria mahwar Iruhin makri, "Yain! Yain!" <sup>16</sup> Iruhin ananin Mishin meyoh nyanaki nyanatukur apakish mishish aria

makri apak Iruhin ananish batowish. <sup>17</sup> Apak douk adur mape Iruhin ananishi batowish. Namudok aria kweipon ta mugrem eshudok douk Iruhin neshubuk shakusumap iri. Ta mugrem eshudok kabi Krais naraesh iri um. Aria douk apak murao debeiri eriger kabi riguk Krais narar iri um, kweipon apak shopunek ta murao debeishi nyeiguhw aria mupe wosik abom kabi anan um.

### *Kweipon Ta Murao Debeishi Nyeiguhw Aria Mupe Wosik Iruhw Heven*

<sup>18</sup> Eik yadukemesh um abudok yopubi abom nyutob kweipon ta butogur um mupe wosik um douk yopubi abom beshagrakuk arudok eriger douk mape memnekar iri. <sup>19</sup> Ihishmori eneshenesh Iruhin nenekech iri eshudok douk shape shatrugun aria shatrugun abom um abudok nyutob Iruhin nuwerah apak ananish batowish nunekap mutogur yopugunum obi nyutob. <sup>20</sup> Douk ihishmorim eshudok Iruhin nenekech iri douk madae shupe wosik uwe aria ta yowesh. Aria douk madae eshesh meyoh shunekesh namudok uwe, uwok. Iruhin meyoh nagipesh ananim atum urkum aria nenekech shape namudok. Nenekech shape namudok shape shatrugun um yopishi eshudok douk adur atin anob nyutob Iruhin ta nunekehsumesh iri. <sup>21</sup> Douk ihishmori Iruhin nenekech iri eshudok douk shonoweshik shape dodog aria ta yowesh. Aria kweipon anah nyumnah, Iruhin ta wata nukweshih eshudok anan nenekech iri. Nukweshihesh aria ta wata shutogur yopish abom shupe wosik kabi apak Iruhin ananish batowish mupe wosik atinyum.

<sup>22</sup> Apak douk madukemesh. Ihishmori eneshenesh Iruhin nenekech iri eshudok douk shemnek debeiri eriger kabi armago wonohur kweiguh iri womnegor um. Aria seiwok baugos um douk shape shoreh yowiyokuk arigaha douk abudok nyutob. <sup>23</sup> Aria douk madae eshudok eneshenesh atish uwe, uwok. Apak douk marao Iruhin ananin Mishin. Enyudok mishin douk nyarik iri yopinyi muraen meyoh iri mugu Iruhin narik nakopen aria sabaishi yopishi eneshenesh ta shugiguk shanaki. Aria apak douk shopunek memnek debeiri eriger mareh gani numun apakiruh aparuh. Mape namudok aria mape matrugun um ahudok nyumnah douk Iruhin ta nutogur nuwerekh baraan yopugunum apak douk ananish batowish aria nukop namuruhi yegeshiweruh um. <sup>24</sup> Apak makri adur Iruhin ta nutaurumap namudok. Anan narap matanamori mape wosik. Aria douk mape matrugun um. Madukemesh um anan adur ta nutogur nunekap murao arhudok namuruhi yegeshiweruh. Aria enyudok yopinyi apak mape matrugun-umen iri, apak ta mupe shokubur mutrugun-umen arigaha kweipon ta nyutogur um apak. Um maresh? Eshudok matrish apakis nabes iri douk wata mupe mutrugun-umesh atin uwe, uwok. <sup>25</sup> Aria ta apak mupe mutrugun um enesh eshudok douk wata mutrish iri uwe aria mukri adur um eshesh ta muraesh um, apakip urkwip douk por dodogowip um eshudok aria mape matrugun-umesh.

<sup>26</sup> Aria douk namudok atin. Iruhin ananin Mishin nyutaurum apak arpesh douk madae dodogowip iri uwe. Apak douk madae mudukemesh uwe um ta munek beten mumam mumam musorik Iruhin um uwe, uwok. Aria ananin Mishin meyoh nyereh gani numuninyum nyenekumap beten apak. Enyudok baraan enyen nyakrip Iruhin um nutaurum apak um, apak arpesh douk madae dodogowip um miyagwrehen atin uwe, uwok. <sup>27</sup> Anan Iruhin douk natik numun apakiruh aparuh iri aria anan shopunek nadukem ananin Mishin enyeniyum urkum. Umum maresh? Ananin Mishin douk nyagipesh ananim urkum atin aria nyenek beten um apak ananish arpesh.

### *Iruhin Ananim Urkum Manawasham Abom Apak Ananish Arpesh*

<sup>28</sup> Ihinyumori enenyen enyatogurum arpesh douk eshesh urkwip panawasham Iruhin iri um, enyudok enyen douk Iruhin neneken nyatogrumesh um nunekesh shupe wosik. Eshudok arpesh douk anan nagipesh ananim atum urkum aria nahwaresh shagipesh anan iri. <sup>29</sup> Um maresh, eshudok arpesh seiwok wata sagomatin anan narik nadukmesh iri aria nanagraehesh shape sik um shudukem ananin nuganin shugipesh ananah aih. Iruhin nenekeh namudok um Krais ta nupe esheshin ashuken aria eshudok sabaishi arpesh shupe ananish owashish. <sup>30</sup> Eshudok arpesh douk riguk anan nagraehesh iri douk shopunek nahwaresh shanakmori anan. Aria eshudok nahwaresh iri arpesh douk nahwaresh yopishi arpesh. Namudok aria eshudok nahwaresh yopishi arpesh, anan douk nekesh ananah yopipi aih um shupe wosik kabi ananin nuganin napeum shurao debeishi nyeiguhw.

### *Iruhin Anan Urkum Manawasham Apak Abom Nenek Giha Aria Ta Mare Nukutupuguk Uwe, Uwok*

<sup>31</sup> Namudok aria apak ta mukri mumam, um ehudok yopipi aih Iruhin nenekeh-umap iri? Aria Iruhin nutaurum apak um, omi ta wosik ddogowin um nyunek horik horin um apak? Uwok meyoh. <sup>32</sup> Anan douk madae nusuhuk ananin Nuganin nupeik uwe, uwok. Anan douk neshopokan nanaki aria nagok um apak ihipmorim. Namudok aria adur atin. Kweipon anan ta wata nuwanumep-ari ihishmori eshudok nukopeshari meyoh. <sup>33</sup> Apak douk Iruhin nagraehap iri ta omi nyunek kwotumap nyukri apak munek enesh yoweishi inahos? Adur atin ta madae enen uwe. Apak douk Iruhin meyoh natrup aria nahwarap yopishi arpesh. <sup>34</sup> Aria ta omi nyukri apak munek yoweishi inahos aria ta neshopokap munak muwishuk? Adur atin, ta uwok. Riguk Krais Jisas douk nagok aria nikitak nape shopunek. Aria douk nape enyudok nunak um Iruhin nape neneke beten narigan um nutaurumap. <sup>35</sup> Namudok aria ta meinyi arpen nyunaki nyurapuk um agundok Krais anan urkum manawashamap abom um? Aria enenyen o amae o arpesh shunekap enenyen o nyurub bep um o eneshenesh uwok um o enesh yoweishi eshudok shunekap um o shopunek mugok um? Adur atin ta uwok. <sup>36</sup> Adur, enyudokmori enyen ta nyatogrumap kabi Iruhin ananik Buk kwakri um. Kwakri namudok.

“Apak mape nyakipari. Namudok aria ihih nyumneh douk shakri shopunek mugok um atugun.

Apak douk shagimap kabi shagipesh um sipsip douk sharaesh shanak um shesh shutahesh iri.”

<sup>37</sup> Aria nyeneken enyudokmori amae. Krais anan urkum manawasham apak abom aria ihih nyumneh nenekap ddogowip abom menek uhwinyum enyudok ihinyumori amae. <sup>38</sup> Adur, eik douk yadukmesh abom. Ta mare enesh eshudok shurapakuk um enyudok Iruhin urkum manawashamap abom um, uwok meyoh. Namudok aria mugok um o mupe um, eshesh enselahos o eneshenesh shape debeishi shasuhw agudok nahobig iri yoweishi sagabehos o eshudok shatogur doukib nyutob o kweiponibi o eneshenesh ddogowish atishi yoweishi douk madae mutrish iri uwe, <sup>39</sup> o eshudok enesh ddogowishi shape iruhw atap iri o enesh Iruhin nenekeh iri, eshudok eneshenesh ta mare shurapakuk um enyudok anan urkum manawasham apak abom uwe, uwok meyoh. Enyudok anan urkum manawasham apak abom douk Jisas Krais apakin Debeini neyabigap.

## 9

*Pol Apahw Yowehw Abom Um Enesh Israel Um Eshesh Shakon Agabus Krais*

<sup>1</sup> Douk eik yakri ikripep enen adurin atinyi baraen. Eik douk Krais ananiwe aria madae inek rohw uwe, uwok. Eikish urkum apahw shor um yopihi aih aria Iruhin ananin Mishin nyeyabige yadukemesh um eikin baraen douk adurin atin. <sup>2</sup> Enyudok baraen douk namudok. Eikihw apahw douk yowehw abom aria iihih nyumneh douk yape yenek gihā aria apahw yowehw abom um eikish arpesh eshesh Israel. <sup>3</sup> Eikish arpesh eshesh Israel douk shani eik apak atubor owishibor. Aria douk yakri abom um Iruhin wata nuraesh shutanamori. Eik douk yenek urkum meyoh yakri ta anah yah akure, yakri ta Iruhin nunek eik itogur yowewe iri madae inek bilip um Krais aria irao esheshik outuk inak iwishuk. Yakri eik inak iwishuk aria eshesh wosik Iruhin nuraesh shupe wosik. <sup>4</sup> Eshesh Israel douk Iruhin nanagraehesh iri arpesh. Anan nenekesh shatogur ananish batowish. Aria douk neyabigesh shatik agundok douk anan narao debeini nyeigur aria natrugun abom um. Shopunek nakripes adurin atinyi dodogowinyi baraen douk nani eshesh shape atugun sheyagwrehan iri. Nekeshi enyudok lo um Moses ananis wis um. Neyabigesh adurih yah um shunek lotuman numun ananit debeiti urupat um. Sharao baraen douk Iruhin nakri enyen adurin atin abom iri. <sup>5</sup> Eshesh douk shakitak amudok nyeigu hwakiham iri debeimi popehem yamehem amamis awiros. Krais anudok arman Iruhin neshopokan nanaki iri, anan douk nanaki natogur arpen aria nakitak eshesh Israel. Anan nape debeini um ihishmori eshudok. Anan douk adurin Iruhin abom aria yakri iihih nyumneh apak ta mutuk ananin nyeigur nyuto iruhw. Adur atin.

*Iruhin Nagraeh Arpesh Um Ananim Urkum Meyoh Um.*

<sup>6</sup> Iruhin ananin baraen douk mare nyunak nyushukuk atap meyoh uwe, uwok. Arpesh shakitak Israel iri douk madae ihishmorim douk adurishi Israel douk Iruhin nagraehesh iri uwe, uwok. <sup>7</sup> Namudok aria apak mare mukri, “Eshesh douk Abraham ananibor owishibor aria ihishmorim adur ananish atishi batowish,” uwok. Seiwok Iruhin douk nakrip Abraham namudok, nakri, “Eshudok Aisak ananibor owishibor atishi ta shurao nyakip awiropin nyeigur.” <sup>8</sup> Baugenym baraen douk nyape namudok. Abraham ananish batowish eshudok ananibor owishibor, eshesh ihishmorim douk madae Iruhin ananish batowish uwe, uwok. Arpesh shape Iruhin ananish adurish batowish iri, eshesh douk eshudok um Iruhin nagipesh ananin adurin atinyi baraen aria neshubuki. <sup>9</sup> Umum maresh? Enyudok baraen douk nyakri namudok. Nyakri, “Abudok yakri obi nyutob butogur aria eik ta wata itanamori aria Sara ta kubuki enen armanin batowin.”

<sup>10</sup> Aria douk madae enyudok atin uwe, uwok. Rebeka okwokwim biom nugamim douk atun yaken Aisak. Anan douk apakin yamenen um apak Juda. <sup>11</sup> Aria Iruhin douk nagipesh ananim atum urkum um agundok nagraeh arpesh um. Anan madae urkum murum mour aria aih henekiri aria kadak nugaeraham uwe, uwok. Anan nagraraham meyoh. Namudok aria Iso nani Jekop amamik amakek douk madae kwumubuki um hunek yoweishi inahos o yopishi uwe, <sup>12</sup> aria Iruhin nakrip amamik amakek nakri, “Ashuken ta nupe shakamum wanin.” Iruhin nakripok namudok um apak mudukem ehudok Iruhin ananiih aih. Mudukemesh um agundok nagipesh ananim atum urkum aria nagraeh arpesh um. Anan douk madae nurik nutik eshesih aih aria douk nagraehesh uwe, uwok. <sup>13</sup> Enyudok douk nyatogur kabi ananik Buk kwakri um. Kwakri,

“Eik urkum manawasham Jekop, aria Iso uwok.”

<sup>14</sup> Namudok aria ta mukri mumam? Aria ta mukri Iruhin nenek yoweishi aih aka? Adur atin uwok. <sup>15</sup> Um maresh? Anan douk seiwok nakrip Moses namudok nakri,

“Aria ta ikri gishaum enen arpen meyoh um,  
enyen ta inemen gisha meyoh.

Aria ikri gisha abom um enen arpen meyoh um,  
eik ta inek gishaumen.”

<sup>16</sup> Namudok aria agundok Iruhin nagraeh arpesh um douk madae nutik esheshin yopinyi mour o nugipesh esheship urkwip um douk nugraehesh uwé, uwok. Anan nenek gishaumesh meyoh aria nagraehesh.

<sup>17</sup> Um maresh? Iruhin ananik Buk kwakri Iruhin nakrip king Fero namudok. Nakri, “Eik yeneken nyutogur king um iyabigesh eikin gobi um ihishmorim arpesh. Iyabigesh um eshesh ta shukripesh um elkin nyeigur ihirub warub agundok atap. Douk namudok aria eik douk yeneken nyatogur debeini king aria yenek eshudok yoweishi inahos shatogrumen.”

<sup>18</sup> Namudok aria douk madukemesh. Aria ta Iruhin nukri nenek gishaum enen arpen um, anan ta nenek gishaumen. Nukri nuweshik enen enyenyim urkum um mare nyusuhw bareaen um, anan douk ta nigipeshen kabi douk nakrium.

### *Ehudok Biye Aih Um Iruhin Juwehosin Nukesh Yoweinyi Poe Enesh Arpesh Aria Nenek Gishaum Enesh Um*

<sup>19</sup> Namudok aria douk ipak enen arpen ta wata nyukripe nyukri, “Aria nyakri namudok um, aria namudok ta natrupum munek yoweishi inahos aria wata nohwarap yoweipari? Amiapan ta wosik nyigipesh enyenyim urkum aria nyakri uwok mumam Iruhin?” <sup>20</sup> Aria nyak arpen, nyak nyakri nyak meinyi arpen, um wata nyakri nyuwanam-uman bareaen Iruhin um? “Anap marup anan arman nape nenekap iri, apap douk madae putanan pukripan pukri, ‘Nyak nyenekesh namudok um maresh?’ Uwok.”

<sup>21</sup> Arman narok marus iri ta nunak nutuki amnab aria nukwu abudok amnab nurok bias marus. Anap ta nenegap dodogowip um nukwup um enen yopiyopinyi mour abom. Aria anap marup ta nenekap mare yopup abom iri um enen meyohin mour. Aria wosik, enyudok mour douk neneken adurin.

<sup>22</sup> Iruhin shopunek nenek mour namudok atin. Anan nakri niyabig agundok anan nyibur juwehosibur abom, um ihishmorim arpesh wosik shudukem ananin dodog. Aria arpesh douk nenekeh um ta shurao yoweinyi poe iri douk shenek redi shapeum shutrun. Aria anan douk wata nape natrishi meyoh roubi nyutob um kweipon aria nununish. <sup>23</sup> Anan douk nenekeh namudok um nakri niyabig apak ihipmorim anan nenek gisha iri um apak mutik agundok anan dodogowin atun abom um aria natrugun um. Nakri niyabig apak arpesh douk seiwok anan narik nenekeh shupe wosik um ta shurao debeishi nyeiguhw aria shuni anan shupe wosik iri. <sup>24</sup> Umum maresh? Eshudok anan nahwaresh iri arpesh douk apak. Anap Juda aria anap madae Juda iri uwe. <sup>25</sup> Enyudok nyatogur kabi bareaen profet Hosea menyemaguk iri nyakrium. Iruhin nakri namudok, “Arpesh douk eshesh madae eikish iri uwe,  
eik ta ihwaresh eikish arpesh.

Eshudok eik madae urkum mukriyeshi munawashamesh iri uwe, eik ta wata urkum munawashamesh.”

<sup>26</sup> Aria shopunek nakri,

“Abrudok atubur wabur douk eik yakripesh yakri, ‘Ipak madae eikish arpesh um uwe’,  
abrudok atubur wabur kweipon ta wata ihwaresh,  
‘Nape iihih nyumneh abom iri Iruhin ananish batowish.’”

<sup>27</sup> Profet Aisaia douk urkum morum eshesh Israel aria nakriyuk debeg namudok. Nakri,  
“Adur, ta eshesh Israel shutogur sabaishi abom kabi sabaiti arukwut um, o uwok.

Iruhin ta wata nunarao enesh karowish shutanamori shupe wosik.

<sup>28</sup> Umum maresh? Anan ta dodogowin atun nunek sabaigwi kwotog niyatok aria arigas ihih shape atap iri arpesh ta nunekesh shurao debeiri eriger abom.”

<sup>29</sup> Enyudok douk kabi seiwok Aisaia nakriyenyuk um. Nakri,  
“Aria ta dodogowin abom atun Debeini iri  
mare nukutuk enesh apakishi arpesh shupeik akure, douk  
apak ta mutogur kabi arbudok biyorub warub um,  
Sodom iri Gomora.”

### *Eshesh Israel Douk Madae Shusuhw Krais Ananin Baraen Shugipeshen Uwe, UWOK*

<sup>30</sup> Namudok aria ta mukri mumam? Aria ta mukri namudok. Eshesh madae Juda iri uwe douk madae shupe um shunek debeinyi mour um shurao agundok Iruhin nahwaresh yopishi arpesh um uwe, eshesh douk sharaen. Eshesh douk shasuhw Iruhin ananin baraen dodog shagipeshen meyoh aria anan natrish nahwaresh yopishi arpesh. <sup>31</sup> Aria eshesh Israel uwok. Eshesh douk shape shenek debeinyi mour um shagipeshen lo seiwok Iruhin nakoguk Moses enyi um Iruhin nutrish nuhwaresh yopishi arpesh. Aria uwok. Eshesh madae shutogur yopishi arpesh uwe, uwok. <sup>32</sup> Um maresh? Eshesh douk madae shukri um shunek bilip meyoh aria Iruhin nuhwaresh yopishi arpesh uwe, uwok. Eshesh douk shakri shunek debeinyi mour abom um shugipeshen enyudok lo aria douk nuhwaresh yopishi arpesh. Eshesh madae shenek bilip um Krais aria eshesh douk shanatutuk amudok shanatutukom iri utom. Namudok aria eshesh douk shatu. <sup>33</sup> Baraen nyetem Iruhin ananik Buk aria nyakri wobren baraen um Krais amudok utom iri enyudok. Iruhin nakri,

“Mnek! Eik yosop anam utom matao abrudok wabur Saion, um arpesh shunatutukom shutu um.

Yosop onok burbuduk kwataoum kwunek arpesh shunotutukok.

Aria ihih arpesh shunek bilip um anudok arman iri ta mare shurao abraen uwe, uwok.”

## 10

### *Eshesh Israel Douk Madae Shurao Iruhin Ananih Yopihi Aih Uwe, UWOK*

<sup>1</sup> Ekish ashukenyish owashish, numun um eik douk nakri um Iruhin wata nurao eshesh Israel shutanamori shupe wosik. Aria ihih nyumneh apa yenek beten yarigan um enyudok. <sup>2</sup> Eshesh douk yatrish yadukemesh wosik abom. Aria douk yakri enyudok baraen. Yakri eshesh dodogowish atish abom um agundok shagipesher Iruhin ananish aih um. Aria eshesh douk madae shudukemeh wosik aria douk shugipesheh uwe, uwok. <sup>3</sup> Um maresh? Eshesh douk shakri uwok um shudukem ahudok yah douk Iruhin natik arpesh nahwaresh yopishi arpesh um. Aria shape sheshakomogun um shugipesher anah eshesh kanak esheshih yah um Iruhin nutrish nuhwaresh yopishi arpesh um. Namudok aria shakri uwok um shupe

shakamum anan shugipesh ananah yah aria nutrish nuhwaresh yopishi arpesh, shakri uwok. <sup>4</sup> Apak douk madukemesh. Apak Israel douk mape magipesh lo arigaha Krais natogur aria menekesh jurug um mugipesh enyudok lo um. Namudok aria ihish arpesh douk shasuhw Krais ananin baraaen dodog shagipeshen iri, Iruhin ta nahwaresh yopishi arpesh.

<sup>5</sup> Moses douk seiwok nowemaguk enyudok baraaen um agundok shugipesh lo aria Iruhin nutrish nuhwaresh yopishi arpesh um. Nenyemaguk nakri, "Enyudok arpen douk nyugipesh ihismori aih abom douk lo nyakriyeh iri um, enyen ta nyupe wosik abom douk aria kweipon shopunek. <sup>6</sup> Aria ta baraaen douk nyakrium arpesh shunek bilip um Krais meyoh aria Iruhin nuhwaresh yopishi arpesh um douk nyakri namudok. Nyakri, "Nyak mare nyunobo urkum nyukri, 'Omi ta nyuto um iruhw heven?' " Namudok ta wata nyiraouri Krais nubuhi. <sup>7</sup> "Shopunek mare nyukri, 'Omi ta nyugrukukum shagok iri esheshig nahobig?'" Namudok ta wata nyiraouri Krais nukitaki um agundok nagok um. <sup>8</sup> Aria enyudok baraaen nyakri, "Baraen douk nyape hurukatin abom um nyak. Nyape nyakit nokwat tani numun nyakim urkum." Enyudok baraaen, enyen douk masuhwen dodog magipeshen aria apa meyagwreh mape makripeshen iri. Enyen douk enyudok. <sup>9</sup> Aria nyak nyuhur nokwat nyukripesh nyukri, "Jisas anan douk Debeini" aria numun nyakim urkum nyunek bilip nyukri Iruhin adur wata nonohur nikitaki wonugwehw naapeum, namudok Iruhin ta wata nuraen nyutanamori nyupe wosik. <sup>10</sup> Um maresh? Apak urkwip pakri adur munek bilip abom um Krais douk nagok wata nikitaki aria Iruhin natrup nohwarap yopishi arpesh. Aria nokwatog apa moguhur makripesh makri apak menek bilip um Krais. Douk namudok aria Iruhin wata narap matanamori mape wosik. <sup>11</sup> Enyudok douk kabi Iruhin ananik Buk kwakri um. Kwakri, "Arpesh shusuhw ananin baraaen dodog shugipeshen iri ta mare esheshirub nyirub yoweirub, uwok." <sup>12</sup> Um maresh? Enyudok baraaen nyakri eshesh Juda shani eshesh madae Juda iri uwe douk atugunish arpesh meyoh abom. Debeini douk anan atun nape Debeini um apak ihismorim abom. Ihish arpesh douk apa shahwaran um nutaurumesh iri, anan apa nenek blesimesh naraesh shatanamori shape wosik. <sup>13</sup> Umum maresh? Enyudok douk kabi Iruhin ananik Buk kwakri um. Kwakri, "Ihishmorim arpesh douk shuhware Debeini um nutaurumesh iri, anan ta wata nuraesh shutanamori shupe wosik."

<sup>14</sup> Aria ta eshesh madae shunek bilipuman um, eshesh ta shuhwaran mumam? O ta madae shumnek ananin baraaen um, eshesh ta shusuhw ananin baraaen dodog shugipeshen mumam? O ta madae enesh shukripesh ananin baraaen um, eshesh ta shumneken mumam? Aria uwok. <sup>15</sup> Aria ta Iruhin madae neshopok arpesh shunak shukripesh ananin yopinyi baraaen um, eshesh ta shukripeshen mumam? Uwok. Iruhin ananik Buk kwakri namudok. Kwakri, "Arpesh sharauri yopinyi baraaen iri douk shenek yopinyi mour abom."

*Eshesh Israel Madae Shugipesh Iruhin Ananin Yopinyi Baraaen Abom Uwe, Uwok*

<sup>16</sup> Aria douk madae ihismorim Israel shusuhw enyudok Iruhin ananin yopinyi baraaen dodog shugipeshen uwe, uwok. Seiwo profet Aisaia nakriyuk enyudok. Nakri, "Debeini, omi nyasuhw enyudok ohwak wakri-ensi baraaen dodog nyagipeshen? Aria uwok." <sup>17</sup> Namudok aria douk madukemesh. Apak douk memnek Iruhin ananin baraaen aria enyudok baraaen nyopohur masuhwen dodog magipeshen. Enyudok baraaen douk memnek eshesh shakripesh Krais ananin baraaen iri shakripapen.

**18** Aria douk yarig. Aria eshesh madae shumnek enyudok yopinyi baraen uwe, uwok? Eshesh Israel douk shemneken. Apak douk madukemesh. “Ihishmorim arpesh shape ihirub warub agundok atap iri douk shemneken jurug.

Enyudok baraen douk nyanak nyeyatokuk ihirub warub.”

**19** Aria shopunek yakri irig. Aria eshesh Israel madae shudukemen uwe enyudok baraen? Sagomatin yakri ikripep enyudok Iruhin ananin baraen douk Moses nakriyenyuk iri. Nakri, “Eik ta iraouri enesh meyohish nyeiguw wokeshi arpesh douk shorshor um eikin baraen iri.

Ta iraeshi itaurumesh aria ipak ta putik namudok aria punek nyigiya.

Aria ta juwehosip um yopihi aih ta inekehumes iri.”

**20** Profet Aisaia douk ddogowin atun nakriyuk enyudok Iruhin ananin baraen. Nakri, “Arpesh douk madae shupe um shurime iri uwe douk shaparage. Eik douk yanowereh yatogur abom um arpesh douk madae shisorik enesh um eik iri uwe.”

**21** Aria ta eshesh Israel, anan Aisaia douk nakriyuk enyudok. Iruhin nakri, “Roubum nyutob eik yape yawauramesh, yahwaresh aria uwok meyoh. Eshudok arpesh apa shonogogonim eikin baraen abom aria shenyubuk.”

## 11

### *Iruhin Nene Gihau Enesh Israel*

**1** Namudok eik douk yakri. Aria Iruhin douk ta nekeshuk agab abom um ananish arpesh aka? O uwok meyoh! Eik Pol douk shopunek anan um Israel iri. Eik Pol anan um Abraham ananin barhonin. Eik douk yikitak opudok Benjamin ananip debeipi awirop iri. **2** Iruhin madae nukeshuk agab ananish arpesh uwe, uwok. Seiwok wata sagomatin anan nadukemesh aria nagraehesh. Enyudok baraen douk nyakrium Ilaija aria nyetem Iruhin ananik Buk iri aria douk padukemesh. Ilaija nakrip Iruhin nene kwot um eshesh Israel namudok. Nakri, **3** “Debeini, eshesh shabo nyakim profet douk apa hakripesh nyakin baraen iri hagok, aria shawor nyakish altahas.

Aria douk enyudok eik atuwe yapeik aria shape shaurime um she igok.”

**4** Aria Iruhin wata nawanaman maren baraen Ilaija? Iruhin douk nakripan nakri,

“Uwok. Eik yarao sabaishi 7,000-poreish Israeliish arpesh.

Aria eshesh douk madae shunek lotu um anudok rohwin god Bal uwe, uwok.”

**5** Aria douk namudok atin. Douk enesh karowishi Israel douk Iruhin nataurumesh meyoh aria nagraehesh shape ananish iri douk shape. **6** Anan douk madae nutik esheshin yopinyi mour douk aria naraesh uwe, uwok. Iruhin nataurumesh meyoh aria douk naraesh shape ananish arpesh. Aria Iruhin natik esheshin mour meyoh aria douk naraesh akure, aria namudok douk madae nutaurumesh meyoh abom aria douk naraesh uwe, uwok. **7** Namudok aria ta mukri mumam? Eshudok douk eshesh Israel ddogowishi atish shape shaurimesh iri douk madae shuparugesh uwe, uwok. Aria karowish Israel meyoh douk Iruhin nagraehesh iri atish wosik shparugesh. Eshudok enesh kupaishi uwok. Esheshigos baragos sheshuk abom. **8** Enyudok douk nyatogur kabi Iruhin ananik Buk kwakri um. Kwakri,

"Iruhin nenekekesh yobus saesh abom aria shakri uwok um shumnek ananin baraan. Aria nenekekesh nabes madae sutrugun uwe, arigos madae sumnek uwe.

Shape namudok atin seiwok arigaha douk."

<sup>9</sup> Seiwok Devit douk shopunek nakriyuk enyudok. Nakri,  
 "Eik yakri abudok nyutob eshesh shupe shuwok debeiguni worigun obi nyutob,  
 yakri abudok atub nyutob nyunek yoweishi inahos shutogrume sh kabi  
 sheir nyumarub shape dodog um  
 o kabi mahish shagruck nuwagas um.  
 Yakri eshudok yoweishi inahos shutogrume sh abom shuwanamesh es-  
 heshih yoweih iaih.

<sup>10</sup> Yakri nyunek esheshis nabes sishuk um mare shutrugun.

Aria shopunek yakri nyunekesh shusah esheshin amae nyunihesh  
 shukutom atish shupe namudok ihih nyumnegwih."

### *Iruhin Shopunek Nape Narao Eshesh Madae Juda Iri Uwe*

<sup>11</sup> Namudok aria yakri iyorigep shopunek. Agundok eshesh Juda shatu um madae shenek bilip um Krais aria douk ta shanak shawishuk aka? Adur atin uwok. Eshesh douk madae shenek bilip um Krais aria shakutukuk yah shenek yoweishi inahos. Namudok aria Iruhin douk wata nataurum eshesh madae Juda iri uwe wata naraesh shatanamori shape wosik atin. Iruhin nenekekesh namudok um nakri eshesh Israel shutrun nataurum um eshesh madae Juda iri uwe namudok aria shunek nyigyaumesh aria eshesh shakana shenek bilip um Krais shopunek. <sup>12</sup> Eshesh Israel douk shakonaguk agabus Iruhin. Douk namudok aria anan nataurumesh wosik abom um ihish agundok atapishi eshesh madae Juda iri uwe nenekumesh yopinyi. Eshesh Israel douk shakutukuk ananih iaih. Namudok aria anan douk naraeo eshesh madae Juda iri uwe nenekumesh yopinyi abom. Aria kweipon anob nyutob, ihishmorim Israel ta shutanamori um Iruhin. Aria abudok nyutob, Iruhin ta nunekumesh yopinyi abom um ihishmorim eshesh madae Juda iri uwe nishagrakuk enyudok kabi riguk narik neneken-umesh yopinyi iri um. <sup>13</sup> Douk yakri ikriep enen baraan ipak madae Juda iri uwe. Eik douk Iruhin nagraehe um inaki ikriep ananin baraan ipak. Namudok aria douk yanadudareh um enyudok yeneken iri mour. <sup>14</sup> Yakri inek enyudok mour namudok um ihur eikish arpesh eshesh Israel esheshiruh aparuh aria shunek nyigyaum ipak douk Iruhin nenekumep yopinyi pape wosik iri. Yakri inek enyudok um Iruhin wata nutaurum enesh aria nunaraesh shutanamori shupe wosik atin. <sup>15</sup> Adur, abudok nyutob Iruhin nekeshuk agab eshesh Israel obi nyutob, anan douk apa narauri sabaishi agundok atapishi arpesh um ihirub warub shanaki shani anan shape atugun. Namudok aria abudok nyutob Iruhin wata shopunek nukri nurao eshesh Israel shuwish ananip awirop obi nyutob, namudok ta nunekumesh yopinyi abom sabaishi arpesh aria ta shupe kabi shagok aria wata shakitak-umori.\*

<sup>16</sup> Kabi douk enyudok wobuwobren baraan um. Enyudok. Sagomatinyit bret douk shenekat plaua aria shuteh shako Iruhin um, atat douk Iruhin ananit. Namudok aria atudok sabaiti bret shagiguk shuteh iri, atat douk shopunek Iruhin ananit atut. Shopunek ta shuko Iruhin anaruh rowogiruh

\* <sup>11:15:</sup> Enesh shakri baraan nyetem nyagiguk um Rom 11:15 iri, shakri baugeniyum douk nyakri Iruhin ta nunek shagok iri arpesh wata shukitaki.

nukwaruh ananiruh um, aria nyeiguhwish um douk shopunek ananish atish.<sup>†</sup>

<sup>17</sup> Iruhin douk natupakuk anabik um nyeiguhw enyudok shawen iri rowog oliv aria nawashenyukuk. Aria natupaki nyeigur kupainyi wanarin rowog oliv nanaki nadrunen um enyudok shawen iri rowog oliv. Ipak madae Juda iri uwe, ipak douk kabi enyudok wanarin rowog oliv um. Namudok aria douk ipak pani enesh Israel douk pape parao eneshenesh yopishi abom um eshudok douk shatogurum eshesheh Juda iri. Paraesh kabi wanarin rowog oliv nyape nyarao ihat douk tanaki nukwaruh enyudok shawen iri rowog oliv um. <sup>18</sup> Namudok aria ipak madae Juda iri uwe mare punagunukuk pukri pishagrakuk eshesheh enesh Israel douk shadukem eshudok shanabirak iri nyeiguhw uwe, uwok. Pakri punadudareh um, sago-matin ta pur urkum ba iyoh. Ipak douk atin nyeigur meyoh. Ipak madae putaurum nukwaruh uwe, uwok. Arhudok nukwaruh apa hataurum ipak dodogowip. <sup>19</sup> Aria ipak madae Juda iri uwe atin ta pukri namudok, pukri, "Iruhin douk natupok eshudok nyeiguhw nawasheshukuk aria wata nadron apak eshesheh Israel esheshehik outuk." <sup>20</sup> O namudok wosik. Eshesh douk madae shunek bilip um Krais uwe aria Iruhin douk nadiyeshuk. Aria ipak douk pasuhw Krais ananin baraen dodog pagipeshen aria douk pape wosik. Aria gamo pudukemesh. Ta mare pukri pubo mishish aria putuk ipak kanak puto. Ipak ta punogugur aria pupe dodogowip um Iruhin.

<sup>21</sup> Umum maresh? Iruhin douk madae nukuna wosik um eshesheh Juda uwe, douk shape kabi eshudok adurish nyeiguhw iri uwe, uwok. Ipak douk namudok atin. Douk ipak mare pumnek baraen pugipeshen um, anan ta mare nukuna wosik um ipak uwe, uwok. <sup>22</sup> Douk putik enyudok aria gamo pudukemesh um ehudok Iruhin ananih biyeh aih. Ehudok aih um nenek gishaum arpesh um hani ehudok eneh um juwehosin um aria nekesh yoweinyi poe um. Anan apa juwehosinum arpesh douk shakutukuk ananih aih iri. Aria ipak, ta pugipesh ananin baraen um, anan ta nenek gishaumep. Wokumum, ipak shopunek ta nutupepukuk namudok atin.

<sup>23</sup> Aria eshesheh Israel douk shadukem eshudok enesh nyeiguhw, aria eshesheh wata shukri shusuhw Krais ananin baraen dodog shugipeshen um, Iruhin ta wata nurawi enyudok rowog douk riguk sheir shatak um. Um maresh? Iruhin anan douk dodogowin um nunek enyudok. <sup>24</sup> Ipak madae Juda iri uwe douk padukem enyudok wanarin rowog oliv enyeniyish nyeiguhw um. Iruhin madae nugipesh arpeshih aih<sup>‡</sup> aria nukweshrige-ari nunaki nudrunep enyudok enen shawen iri rowog oliv douk madae ipakin abom iri uwe. Namudok aria adur atin. Anan ta wata narauri enyudok shawen iri rowogish nyeiguhw aria nanaki nadrunesh eshesheh kanak eshesheh rowog douk riguk sharik sheir um.

### Iruhin Nenek Gishaum Ihishmorim Arpesh Aria Nutaurumesh Meyoh

<sup>25</sup> O ekish ashukenyish owashish, eik yakri uwok um ipak pugugakum enyudok seiwok nyanabeshuk iri baraen. Ta ipak urkwip pur aria pakri ipak wosik abom padukemesh iri arpesh aria namudok ta uwok. Namudok aria douk yakri ikripep-umen. Enyen enyudok. Eshesh enesh Israel, esheship urkwip douk peshuk abom. Eshesh ta shupe namudok atin arigha abudok nyutob eshesheh madae Juda iri uwe shutogur sabaish kabi

---

<sup>†</sup> **11:16:** Baugenym enyudok wobuwobren baraen douk nyakrium bret tani rowog iri nyanak namudok. Seiwokishi Juda eshesheh douk Iruhin ananishi arpesh. Aria doukeshi shagiguk shatograri iri douk shopunek ananish atish. <sup>‡</sup> **11:24:** Arpeshih aih um shatupoki nyeiguhw um anagos yopugosi rowos shanaki shadrunesh agusudok anagos yopugosi rowos um yopipi shuruwep pir.

Iruhin nakri um aria ta shutanamori um anan. <sup>26</sup> Eshesh madae Juda iri uwe shuwishi iyoh, aria Iruhin ta wata nutaurum ihishmorim Israel. Ta wata nuraesh shutanamori shupe wosik kabi ananik Buk kwakri um. Kwakri,

“Arman nunaraesh shutanamori shupe wosik iri ta nukitaki Saion nunaki. Anan ta nutogur nukweshih eshudok Jekop ananish popehesh yamehesh douk ta shugiguk shutograri.

Nukweshiheshuk um eshudok aih um shape shubor-bukon um Iruhin ananin baraen.

<sup>27</sup> Aria eik ta ipe ini eshesh mupe atugun muweshik enyudok adurin abom atin iri baraen kontrak.

Abudok nyutob ineuk ihishumori debeishi shokwishi shenekesh iri yoweishi inahos.”

<sup>28</sup> Namudok aria eshesh Israel douk shekenyuguk agabus Iruhin ananin yopinyi baraen. Namudok aria eshesh shatogur Iruhin ananish horim. Shenekesh namudok um maresh? Um Iruhin nurauri ipak madae Juda iri uwe wata puwishi pusuhw enyudok baraen pugipeshen. Aria eshesh Israel, Iruhin douk seiwok ananim urkum manawashamesh abom. Umum maresh? Anan douk urkum morum enyudok adurin atinyi baraen kontrak abom seiwok nakrip esheshim yamehem-enyi. <sup>29</sup> Um maresh? Iruhin nakri nahwar enesh arpesh um shugipeshan aria nukri um nunekumesh enesh yopishi eshudok meyoh um, anan douk wata nukri um nubadig urkum atin uwe, uwok. <sup>30</sup> Seiwok ipak madae Juda iri uwe madae pigipesh Iruhin ananin baraen. Aria douk eshesh Israel shakenyuk agabus. Namudok aria Iruhin wata neneck gishaum ipak madae Juda iri uwe aria nataurumep meyoh. <sup>31</sup> Namudok aria eshesh Israel douk namudok atin. Iruhin neneck gishaum ipak madae Juda iri uwe nataurumep meyoh namudok aria eshesh Israel douk shakenyuk agabus abom ananin baraen. Shenekesh namudok um maresh? Um anan ta wata neneck gishaumesh nataurumesh meyoh. <sup>32</sup> Iruhin douk noweshik ihish arpesh shape shakon agabus anan. Neneckeshumesh namudok um wata nakri nuneck gishaumesh meyoh eshesh ihishmorim.

<sup>33</sup> O yaipo! Iruhin anan douk nadukemesh abom iri. Ananim urkum douk dedebem abom atin! Anan nadukem eneshenesh aria urkum morum apak arpesh neneck gishaumap nataurumap meyoh. Apak arpesh douk madae mudukem baugeniyum um ananim urkum muni ananik aih uwe, uwok.

<sup>34</sup> Enyudok douk kabi Iruhin ananik Buk kwakri um. Kwakri,

“Omi nyadukem Debeini ananim urkum? O omi nyakon enen baraen um nudukemesh? Uwok meyoh.”

<sup>35</sup> “Omi nyarik nyakon enesh eshudok um anan ta wata nubeyeshumen? UWOK.”

<sup>36</sup> Anan kanak abom baugos um ihishmori eshudok eneshenesh. Anan douk nagrem ihishmori abom eshudok aria neyohesh shape wosik atin. Anan neneck ihishmori eshudok shatogur eneshenesh shapeum shutuk ananin nyeigur nyuto. Eik yakri apak ihishmorim ta mutuk ananin nyeigur nyuto iruhw ihih nyumneh. Adur atin.

## 12

### *Apak Ta Mukon Apak Kanak Um Iruhin Kabi Enen Ofa Shoko Anan Um*

<sup>1</sup> Ekish ashukenyish owashish, enyudok sabainyi rigukinyi baraen yenek opudok shup iri douk adurin atin. Namudok aria douk dodoxgoiwe um yakri ikriep enyudok baraen. Iruhin neneck gishaumap aria nataurumap meyoh atin. Namudok aria eik yakri ipak ta pokon ipak kanak abom um

Iruhin kabi shakon enen ofa um. Ipak douk patogur namushi arpesh aria pakon ipak kanak abom um Iruhin pupe wosik atin aria pupe ananishi atish. Penekesh namudok um ta pugipesh anan nakriyehi aih. Punek enyudok aria namudok douk adur abom um penek lotu um Iruhin adur atin.<sup>2</sup> Aria ipak mare wata pupe purahaen kabi agundok atapishi arpesh shape sharahaen um uwe, uwok. Ipak ta pukri wosik um Iruhin nunek ipakip urkwip putogur namipi. Namudok aria ipak ta dodogowip abom um pudukemesh wosik um ehudok Iruhin nakriyehi aih. Ehudok aih douk yopiyopihi abom, adur atin aria anan mishin nyakitak-umeh abom iri.

### *Apak Ta Mugipesh Apakin Presen Iruhin Nokopen Iri Aria Munek Ananin Mour*

<sup>3</sup> Iruhin nataurume meyoh aria douk yakri ikrip ipak ihilmorim. Ipak padukem ipakih aih iri apa hanak hatogur heyotu mumam, aria ipak mare wata punabuk urkwip pukri ipak debeipi abom peshagrakuk kupaishi uwe, uwok. Iruhin nataurumep pasuhw ananin baraen dolog pagipeshen panak patogur peyotu mumam, aria ipakip urkwip ta pur wosik atin aria pukri ipak douk namudok namudok.<sup>4</sup> Apak douk madukemesh. Apak ihishmorim douk aturuh yegeshiweruh. Arhudok yegeshiweruh aturuh douk sabaigunum. Agundok sabaigunum um douk nenek sisigin mour.<sup>5</sup> Aria apak douk namudok atin. Apak douk ihilmorim, aria matukur Krais aria matogur kabi atuhw yegenyihw um. Namudok aria apak ihishmorim atin atin douk manadudareh.<sup>6</sup> Iruhin nagipesh ananih yopih aih aria nataurumap meyoh nakop sisigin yopinyi presen. Namudok aria ta Iruhin neken presen enen arpen um nyukripesh ananin baraen um, enyen ta nyukripeshen um nyutaurum enyenyin bilip.<sup>7</sup> Aria enen arpen nyarao presen um nyutaurum kupaishi Iruhin ananish arpesh um, aria enyen ta nyutaurumesh. Aria enen arpen nyarao presen um nyunek skulum kupaishi um Iruhin ananin baraen um, enyen ta nyunek skulumesh wosik atin.<sup>8</sup> Aria enen arpen nyarao presen um nyuhur kupaishium shiyotu dodogowish um bilip um, aria enyen ta nyunek enyudok mour abom. Arpen douk nyarao presen um nyukesh eshudok kupaishi iri, enyen douk nyukesh nyuriguk abom. Arpen nyarao presen um nyupe debeinyi um Iruhin ananish arpesh iri, enyen ta mishin nyikitak abom um nyunekesh um nyiyohesh wosik. Arpen nyarao presen um nyenek gihadum kupaishi arpesh aria nyutaurumesh iri um, enyen ta nyunadudareh abom aria nyutaurumesh wosik atin.

### *Adurihi Aih Abom Um Urkwip Panawasham Um Kupaishi*

<sup>9</sup> Agundok ipak urkwip panawasham um, ipak mare pukri punek rohw uwe, uwok. Ipak ta adur urkwip punawashamesh. Aria pukeshuk agabus eneshenesh yoweishi inahos aria punawasham yopinyi dodog.<sup>10</sup> Ipakip urkwip ta punawasham Iruhin abom um ananish arpesh aria pukesh aparuh abom kabi ipak atup awirop abom um. Ipak ihishmorim atin atin mare putuk ipakish nyeiguuh shuto iruhw uwe, uwok. Ipak ta putuk kupaishi esheshish atish nyeiguuh shuto iruhw.<sup>11</sup> Ihih nyumneh ipak ta punek mour dodogowip atip abom um punek Iruhin ananin Mishin nyupuhur punek Krais ananin mour. Aria mare arigeh hep uwe, uwok.<sup>12</sup> Ipak ta punadudareh abom um agundok padukemesh um Krais ta nutanamori ba putrun um. Amaen nyukri nyutogur-umep um, ipak ta piyotu dodogowip atip. Beten ta puneken ihih nyumneh.<sup>13</sup> Enesh Iruhin ananish arpesh shukri eneshenesh wokes um enesh eshudok eneshenesh um, ipak ta putaurumesh. Kupaishi arpesh shukri shunaki shutogrumeup um, ipak wosik putaurumesh wosik atin.

<sup>14</sup> Arpesh shunekep enenyenen um, aria ipak wosik porig Iruhin um nunekumesh yopihi aih. Mare porigan um nununish uwe, uwok. Porigan um nunekumesh yopinyi. <sup>15</sup> Punadudareh um, puni eshesh punadudareh. Shureh iri, puni eshesh pureh. <sup>16</sup> Agundok pupeum, ipak douk pupe atin arpen abom um. Mare urkwip purum pukri ipak pape debeipari abom uwe, uwok. Ipak ta puni nyeiguhw wokeshi purahaen atugun. Mare punek urkum pukri ipak douk padukemesh abom iri uwe, namudok uwok. <sup>17</sup> Enesh shukri shunekumep yoweishi aih um, ipak mare wata pubeimesh yoweishi inahos uwe, uwok. Ipak ta punek yopihi aih. Ipakip urkwip ta purum punek ehudok aih douk um ihishmorim arpesh shatrih shakri eheh yopihi iri. <sup>18</sup> Mare pukri urkwip purum wanogwiruh uwe, uwok. Aria ipak ta purim yah um puni ihish arpesh pupe atugun aria aparuh hur wosik atin. <sup>19</sup> Ekish arpesh, ipak kanak mare puwanamesh yoweishi inahos douk shenekeh umep iri uwe, uwok. Pukwariheshuk um Iruhin aria kadak anan meyoh juwehosin um aria douk ta nutrish aria nuwanamen-umesh. Ipak padukemesh. Iruhin ananik Buk, Debeini douk nakri, “Shawanamesh yoweishi aih um, enyudok ekin mour. Kadak eik meyoh ta iwanamesh yoweishi inahos.”

<sup>20</sup> Aria namudok.

“Ta enesh ipakash horik horin nyurub besh um, ipak pubiromesh. Abar besh um, pukesh abar shubaroh.

Ipak penekesh namudok aria eshesh ta abraen nyesh abom um ehudok eshesh shenekeh iri aih.”

<sup>21</sup> Mare purauri yoweishi aih hunek uhwinyumep uwe, uwok. Ipak ta punek yopihi aih aria pubo yoweishi aih hubuhuk.

## 13

### *Apak Ta Mupe Shakamum Debeini Gavman*

<sup>1</sup> Ihishmorim arpesh ta shupe shakamum amudok debeimi gavman. Apak madukemesh. Madae anan gavman nutogur nupe meyoh uwe, uwok. Ihinyumorim gavmanin mour douk Iruhin nakriyen aria douk nyakitak. Ihin nape iri gavman douk Iruhin meyoh nonusap nape. <sup>2</sup> Namudok aria arpesh shubrig baraen um gavman iri, eshesh douk shabrig Iruhin neneken iri mour. Aria arpesh shunekesh namudok iri ta shurao yoweinyi poe um ahudok shenekeh iri yoweishi aih. <sup>3</sup> Debeini gavman douk madae nupeum nunek eshudok shenek yopihi aih iri shunogugur uwe, uwok. Anan douk napeum nunek eshudok shenek yoweishi inahos iri shunogugur. Ta ipak mare pukri punogugur gavman um, aria ipak douk ta punek yopinyi atin. Namudok aria amam ta hutuk ipakash nyeiguhw shuto. <sup>4</sup> Um maresh? Amam gavman douk hasuhw Iruhin ananin mour um hutaurumep pupe wosik. Aria ta punek yoweishi aih um, ipak wosik ta punogugur. Ipak padukemesh. Amam douk hasuhw debeinya big aria madae huraen meyoh uwe, uwok. Amam douk hasuhw Iruhin ananin mour um hubeimesh yoweinyi poe eshudok arpesh shenek yoweishi inahos iri. <sup>5</sup> Namudok aria apak ta mupe shakamum gavman. Apak mare mukri amam agundok ta hubeimap yoweishi inahos um aria douk mugipesh amamin baraen, namudok uwok. Apakip urkwip ta pur yopihi aih aria mukri ehudok aih douk adurihi. Namudok aria apak douk mugipesheh.

<sup>6</sup> Douk namudok, aria ipak douk penek tagis. Um maresh? Debeimi gavman douk hasuhw Iruhin ananin mour iri. Ihih amam douk dodogowim atum aria hanape um hasuhw enyudok atin mour um gavman. <sup>7</sup> Maresh eshudok douk ipak ta puko gavman um, ipak ta pukesh. Harao tagis iri, ipak

punek tagis pukom. Hagipesh enenyenen lo harao utabor um gavman iri, ipak ta punek tagis pukom. Meimi debeimi, ipak wosik pupe shakamum amam. Namudok douk nyeiguw shato-umam iri, ipak ta pukri amam douk yopumi.

### *Iruhin Nakri Apak Ta Urkwip Punawasham Kupaishi Arpesh Abom*

<sup>8</sup> Ipak mare pubuk enen tuwehin nyupe uwe, uwok. Umum maresh? Ta mare ta nyutuk enyudok tuwehin. Ipak douk mour nyapenyepum urkwip punawasham kupaishi arpesh aria ipak shopunek. Um maresh? Arpen urkum manawasham kupaishi iri douk nyagipesh lo adur atin.

<sup>9</sup> Enyudok lo douk nyakri, "Mare punek wehrur um. Mare pukwu orugwih. Mare punek nyigya um kupaishi eshudok eneshenesh." Enyudok lo nyani sabainyi enyudok enen nyape iri lo douk sabainyi nyetem enyudok atin lo. Enyudok. Ipakip urkwip ta punawasham kupaishi arpesh kabi ipak urkwip punawasham ipak kanak um. <sup>10</sup> Arpen douk enyeniyim urkum manawasham kupaishi arpesh iri, enyen douk madae nyunekumesh enesh yoweishi inahos uwe, uwok. Namudok aria eshudok arpesh douk urkwip panawasham kupaishi iri, eshesh douk shagipeshen adur atin enyudok lo.

### *Apak Ta Mupe Yopinyi Poe Abom*

<sup>11</sup> Eik douk yakri ipak punek enyudok um urkwip punawasham kupaishi. Um maresh? Douk mapenyobi nyutob douk padukemob. Nyutob douk batogrum pukutukuk yobus aria pikitak. Um maresh? Seiwok wata sagomatin menek bilip um Krais um, abudok nyutob um Iruhin nutogur nurap mutanam mupe wosik um douk watak roubi. Aria douk banob nyutob banaki hurukatin meyoh. <sup>12</sup> Wab douk hurukatin um butuh aria hurukatin um nyumnah hakri hotogur. Namudok aria apak mukutukuk ihihmori shenekeh weibus iri yoweishi aih. Mukutihukuk aria marao sabaihi yophi aih douk shenekeh nyumnegwih iri. Musuhwheh hupenayp aria kabi munek wanohwiw suruhw hwapenyap um. <sup>13</sup> Apak ta mupe murahaen wosik atin kabi arpesh shape sharahaen nyumnegwih iri um. Apak mare muwok dodogowibari abar aria munek dehík muwish mutogur, uwok. Mare munek wehrur um. Mare mupe munabirak hanabosusih iri eneheneh abraenyihi yoweishi aih. Mare juwehosip murpuk munitok o munek nyigya um kupaishi eshudok eneshenesh, uwok. <sup>14</sup> Aria ipak ta parao Debeini Jisas Krais nupe ipakiruh aparuh aria urkwip. Putukur anan um pugipesh ananah atih aih. Ipak douk mare urkwip purum pukri pugipesh harik hapeiri-numunih yoweishi aih, uwok.

## 14

### *Apak Mare Mupe Munumogesh Enesh Apakishi Arpesh*

<sup>1</sup> Arpen douk nyasuhw Krais ananin baraen aria madae nyugipeshen wosik abom iri uwe, enyudok arpen ipak wata puraen nyuwish-umepari. Ipak mare puni enyen punogogonim baraen um eneheneh aih enyen ta nyunekeh iri uwe, uwok. <sup>2</sup> Enen arpen douk dodogowiyi um nyasuhw Krais ananin baraen aria apa nyawok ihishmori eshudok eneshenesh. Aria kupainyi arpen enyenyin bilip douk madae dodogowin uwe, uwok. Namudok aria mahish madae nyishoh uwe. <sup>3</sup> Enen arpen apa nyawok ihishmori eshudok eneshenesh iri, enyen mare nyupe nyunek skelim enyudok enen douk madae nyuwok ihishmori eshudok eneshenesh iri uwe, uwok. Namudok atin, enyudok arpen madae nyuwok ihishmori eshudok iri uwe, enyen mare nyukrip enyudok enen douk nyawok ihishmori eshudok iri. Aria mare nyukri enyen douk yoweiniyi uwe, uwok. Um

maresh? Enyudok arpen douk Iruhin shopunek nanaraen iri. <sup>4</sup> Nyak douk meinyi arpen, um nyukripen enemyenen yoweinyi enyudok arpen douk nyenekuman mour um kupaini arman iri? Nyak nyukreny-uguk. Kadak enemyenin debeini meyoh nukrium enyen nyusuhw ananin mour nyeyotu dodog o madae nyiyotu dodog uwe. Aria enyen ta nyiyotu dodog. Um maresh? Ta Debeini meyoh nutaurumen nyiyotu dodog.

<sup>5</sup> Enen arpen nyatik anah nyumnah um douk nyakri anah debeihi um shunek lotu um Iruhin heshagrakuk ehudok eneh nyumneh. Aria kupainyi nyutrih um, enyen douk nyakri ihihlorim nyumneh eheh douk shopunek atih um munek lotu um. Ihish atin atin arpesh ta shudukemesh aria wosik, um ihihlorim esheship urkwip poramohi iri douk adurihi. <sup>6</sup> Arpen nyukri anah anahaehi nyumnah douk debeihi heshagrakuk ahudok anah nyumnah um, enyen douk urkum morum nyutuk Debeini ananin nyeigur aria douk nyakri namudok. Aria arpen apa nyawok ihihlorim eshudok eneshenesh iri, enyen douk urkum morum nyutuk Debeini ananin nyeigur aria douk nyashoh. Enyen apa nyenek tenkyu um Iruhin aria nyashoh. Aria arpen nyukri uwok um nyuwok enesh eshudok eneshenesh iri, enyen shopunek urkum morum nyutuk Debeini ananin nyeigur aria douk nyakri wokumesh. Enyen shopunek apa nyenek tenkyu um Iruhin. <sup>7</sup> Apak douk madae enen arpen nyupe um enyen kanak atin uwe, uwok. Mugok um shopunek. Madae enen arpen nyugok um enyen kanak atin uwe, uwok. <sup>8</sup> Aria apak mupe um, apak douk mape um Debeini atun. O ta mugok um, namudok douk magok um anan atun. Namudok aria mugok um o mupem, apak douk Debeini ananip atup. <sup>9</sup> Aria douk namudok atin, aria Krais douk nagok aria wata shopunek nakitak nape. Nakitak napeum nupe Debeini um shagok iri shani eshudok douk wata shape iri. <sup>10</sup> Aria nyak nyape nyanomogesh enen ipak kanak um maresh? Nyakri enyen douk nyenek yoweishi inahos um? Ipak padukemesh. Kweipon apak ihihlorim ta miyotum Iruhin ananit kwot iri atup. <sup>11</sup> Apak ta munekesh kabi Iruhin ananik Buk kwakri um. Kwakri namudok.

“Debeini nakri, ‘Adur atin yakri. Kweipon ihihlorim arpesh ta shunaki shubuh shuduk ohrubus aria shunek  
lotu um eik. Ihihlorim ta shuhur nokwatog shuhwar shukri eik douk adurin Iruhin.’”

<sup>12</sup> Namudok aria apak douk madukemesh. Apak ihihlorim atin atin ta mukrip Iruhin um baugehum ihihlori apak menekeh iri aih.

### *Apak Mare Munek Enesh Inahos Um Apak Iruhin Ananish Arpesh Aria Nyutu Nyunek Yoweishi Inahos Uwe, UWOK*

<sup>13</sup> Namudok aria apak mare wata mupe munumogesh apak atin atin um esheshih aih, uwok. Aria apakip urkwip ta pur namudok. Mare pukri punek eneh aih um hunek enen um ipak Iruhin ananin arpen nyutu nyunek yoweishi inahos, uwok. <sup>14</sup> Eik douk yatukur Debeini Jisas. Namudok aria yadukemen wosik abom enyudok baraen. Baraen enyudok. Iruhin mare nutik enesh shashoh iri eshudok aria nuhwaresh yoweishi uwe, uwok. Aria arpen nyutik enesh eshudok aria urkum murum nyukri eshesh douk yowesh um, aria eshesh douk yowesh abom um enyudok arpen. Namudok aria enyen kanak mare nyishoh uwe, uwok. <sup>15</sup> Namudok aria ta nyak nyuwok enesh eshudok aria enen um ipak Iruhin ananip um nyatrin um nyawok enesh eshudok aria douk enyenyihw apahw yowehw aria nyatu um, aria nyak douk nyakutukuk ehudok yopihi aih um urkum manaiwah kupaishi um. Namudok aria nyak mare nyunek enen Iruhin ananin arpen nyutu um nyak nyashoh iri eshudok eneshenesh uwe, uwok. Enyudok

arpen douk shopunek Krais nagok um wata nuraen um ananin iri. <sup>16</sup> Aria ipak pakri enesh eshudok eneshenesh eshesh douk yopishi um, aria ipak ta gamo pudukemesh. Ta ipakihi aih hunekesh aria kupaishi shukri nyak douk yoweinji um eshudok eneshenesh eshesh douk yoweishi. <sup>17</sup> Agundok shawok worigun abar um, agagun douk madae baugos um agundok arpesh shuwish um agundok Iruhin nape Debeini um ananish arpesh um uwe, uwok. Aria arpesh shuwish agundok um douk mugipesh yopishi aih, aparuh hur wosik aria munadudareh um. Eshudokmori aih douk Iruhin ananin Mishin nyakwarumeh iri. <sup>18</sup> Um maresh? Meinyi arpen nyugipesh ehudok aih aria nyunekuman mour Krais iri, Iruhin ta nutrin aria nunadudareh-umen. Arpesh shopunek ta shukri enyen douk yopunyi arpen.

<sup>19</sup> Namudok aria apak ta dodogowip atup mugipesh ihihmori aih douk apa haturumap atin atin arpesh henekap aparuh hur wosik aria mape wosik um. Shopunek apak ta mugipesh ihihmori aih douk apa henek kupaishi Iruhin ananish arpesh shatogur dodogowish um bilip iri. <sup>20</sup> Ipak mare urkwip purum pushoh iri worigun mahish atish aria pununu Iruhin ananin mour uwe, uwok. Adur, ihishmori worigun mahish douk mishoh wosik. Aria ta ipak puwok enesh eshudok aria enesh arpesh shutrip um pawok eshudok aria douk eshesiruh aparuh yoweruh ba shutu um, ipak douk penek yoweishi inahos namudok. <sup>21</sup> Aria ipak apa pawok mahish o wainibar abar o penek kupaishi eshudok aria penek kupaishi Iruhin ananish arpesh shatu um, aria wosik um mare wata penekesh namudok uwe, uwok. Namudok douk wosik.

<sup>22</sup> Nyak nyukri urkum mur um enesh eshudok eneshenesh um nyukri nyugipesh marom urkum um, enyudok nyakin mour, nyuni Iruhin. Mare nyukrip enesh. Arpen douk urkum mur um enesh nyushoh iri eshudok nyukri eshesh wosik yopishi aria mare urkum mur um nyukri enyen nyenek yoweishi inahos um, enyudok arpen wosik ta nyunadudareh. <sup>23</sup> Aria arpen nyur biyep urkwip aria nyuwok enesh eshudok eneshenesh um, Iruhin nakri enyudok arpen douk baraen nyapenyen. Um maresh? Enyen nyawok eshudok douk enyen madae nyudukemesh abom um Iruhin nakri wosik o uwok um enyen nyishoh iri. Ihishmori eshudok douk arpesh madae gamo shudukem Iruhin ananik urkum aria shunekesh iri, eshudok douk shenek yoweishi inahos.

## 15

### *Apak Ta Mugipesh Krais Ananim Urkum Aria Mutaurum Kupaishi*

<sup>1</sup> Apak anap douk dodogowip um munek bilip um Krais iri, apak douk mour nyapeyapum mutaurum eshudok wata dodogowish um bilip iri uwe aria musah esheshin amaen um agundok shawok worigun um aria apak mare urkum mugipesh apakim atum uwe, uwok. <sup>2</sup> Apak ihishmorim atin atin ta mutaurum eshudok douk shape hurukatin um apak iri. Mutaurumesh um shupe wosik aria shusuhw Krais ananin baraen dodog abom aria shugipeshen. <sup>3</sup> Apak madukemesh. Krais anan shopunek douk nakri uwok um nugipesh ananik atum urkum uwe, uwok. Anan douk nagipesh enyudok kabi Iruhin ananik Buk kwakri um. Kwakri, "Krais nakrip Iruhin um enyudok baraen douk shoruk nubut shenek enenyenen um, enyudok baraen douk nyanaki nyato eik shopunek." <sup>4</sup> Ihinyumori baraen seiwok henyem Iruhin ananik Buk iri douk henyemaguk um apak mutrin aria murao saki. Henyemaguk um abudok nyutob amaen nyutogrumap-obi nyutob, apak ta miyotu dodogowip um bilip. Murao Iruhin ananin baraen aria nyunekap mutogur dodogowip atup aria madukemesh abom um Krais ta wata nutanamori mutrun um.

<sup>5</sup> Apak apa morao dodog um Iruhin atun. Anan atun apa nenekap meyotu dodogowip um bilip. Aria eik yakri anan wosik ta nataurum ipak um pugipesh Krais ananah aih aria pupe atugun aparuh hur wosik atin. <sup>6</sup> Yakri punekesh namudok um ipak sabashi ta pupe atin arpen meyoh pupe putuk Iruhin, apakini Debeini Jisas Krais ananin Yakenin nyeigur nyuto iruhw.

### *Krais Nagok Um Eshesh Juda Shani Eshesh Madae Juda Iri Uwe Shopunek*

<sup>7</sup> Ipak ihipmorim ta purao kupaishi shuwish-umepari kabi Krais nanarao ipak um. Arpesh ta shutrip punekesh namudok aria ta shutuk Iruhin ananin nyeigur nyuto iruhw. <sup>8</sup> Eik yakriep um Krais douk nanaki natogur anan nataurumesh um mour iri um agundok nataurum eshesh Juda um. Anan nenek enyudok neyabigesh um Iruhin nagipes abom ihinyumorim ananin baraan neneken nyatogur adurin atin. Krais nenek enyudok um Iruhin ananin adurin atinyi baraan seiwok nakripuk eshesh Juda esheshim yamehem um nyutogur adurin atin. <sup>9</sup> Krais shopunek nataurum eshesh Juda namudok um nakri eshesh madae Juda iri uwe shutik enyudok aria shutuk Iruhin ananin nyeigur nyuto iruhw. Shutuken um agundok anan apa nenek gihauum arpesh um. Krais nenek enyudok kabi Iruhin ananik Buk kwakri um. Kwakri,

“Namudok aria eik ta inak ini eshesh madae Juda iri uwe mupe aria ini eshesh mutuk nyakin nyeigur nyuto iruhw.

Aria ta iyarub aweruh ituk nyakin nyeigur nyuto iruhw.”

<sup>10</sup> Shopunek Iruhin ananik Buk douk kwakri,

“Ipak madae Juda iri uwe, ipak wosik ta puni Iruhin ananish arpesh punadudareh.”

<sup>11</sup> Aria shopunek kwakri,

“Ihipmorim ipak madae Juda iri uwe, ipak putuk Debeini ananin nyeigur nyuto iruhw.

Ipak ihipmorim ta piyarub aweruh putuk ananin nyeigur nyuto iruhw.”

<sup>12</sup> Aisaia shopunek nakri,

“Anan arman ta nukitak Jesi ananip awirop.

Anan ta nukitak nupe debeini king um ihishmorim arpesh douk eshesh madae Juda iri uwe.

Aria eshesh ta shudukemesh um anan ta nutogur nunekumesh yopihi aih.”

<sup>13</sup> Eik douk Pol yakrip ipak um Iruhin anan douk baugos um agundok apak madukemesh abom um Krais ta nutogur nunekumep yopinyi um. Ipak douk pape pasuhw enyudok Iruhin ananin baraan dodog. Namudok aria eik yakri anan wosik nunekep punadudareh abom aria ipakash mishish shur wosik. Yakri nunekehsumep namudok. Ananin Mishin dodogowin atin nyunekep punadudareh abom. Yakri punadudareh um agundok ipak padukemesh abom um Krais ta nutogur nunekumep yopinyi um.

### *Pol Nanadudareh Um Anan Neneken Iri Iruhin Ananin Mour*

<sup>14</sup> Ipak eikish ashukenyish owashish, eik yadukemesh abom um ipak kanak adur penek yopihi atih abom iri. Shopunek ipak parao ihinyumori yopinyi saki abom aria panodukem um panagapesh um Iruhin ananah aih. <sup>15</sup> Enen baraan yenyemuk um apudok shup iri douk dodogowinyi aria eik madae inogugur uwe. Yenyemagu yakri ihur ipakash urkum apahw um pugipeshen. Um maresh? Eik douk Iruhin nataurume meyoh

<sup>16</sup> aria neneke um inek Krais Jisas ananin mour. Neneke um inak itaurum kupaishi douk eshesh madae Juda iri uwe. Eik douk yenek mour kabi anan pris um yakripesh Iruhin ananin yopinyi baraan. Yenekesh namudok um eshesh shunakumori Iruhin aria ananin Mishin nyunekesh shupe yopish

shupe ananish atish. Yenekesh namudok aria Iruhin ta nutrish mishin nyakitak kabi anan mishin nyakitak um enesh yopishi eshudok douk shenek ofa-umesh shako anan iri um.

<sup>17</sup> Eik yatukur um Krais Jisas aria yanadudareh um enyudok mour yeneken um Iruhin iri. <sup>18</sup> Eik ta mare ikripesh kupainyi baraen uwe, uwok. Ta ikripesh baraen um enyudok mour atin douk Krais neyohur yeneken iri. Neyohur yeneken um itaurum eshesh madae Juda iri uwe irigumesh um shumnek baraen o shutik aih yenekeh iri aria shugipesh Iruhin ananin baraen. <sup>19</sup> Iruhin ananin Mishin enyenyin dodog nyenek sabainyi Iruhin atun nenenken iri mour. Aria shopunek enyenyin dodog nyataurume yenek enenyenen Iruhin atun nenenken iri mour. Namudok aria yarik yikitak um mour Jerusalem yape yakripesh enyudok yopinyi baraen um Jisas Krais arigaha yanak yatogur agudok shokugi nahobig nyeigurig um Ilirikum. Yakripeshen aria ihishmorim arpesh shemnek. <sup>20</sup> Riguk arigaha douk, eik douk urkum makri abom um yakri inak ikripesh Iruhin ananin yopinyi baraen. Yakri inak ikripeshen agundok douk wata shumnek um Krais ananin nyeigur um uwe. Agundok kupaimi hanak hakripesh shemneken um douk yakri uwok um wata inak ikripesh Iruhin ananin baraen uwe, uwok. Yakri uwok um kupaimi hurumaguk uroruh aria eik kadak inak iwem urupat, namudok yakri uwok. <sup>21</sup> Yakri inek mour kabi Iruhin ananik Buk kwakrium. Kwakri namudok,

“Eshudok arpesh douk wata enesh shukripesh baraen um anan iri uwe, eshesh ta shutrun.

Aria eshesh douk madae shumnek baraen um anan iri uwe, eshesh ta shudukemen.”

### *Pol Nakri Nunak Nutik Iruhin Ananish Arpesh Shape Rom Iri Um Jurug Aria Nunak Um Nahobig Spen*

<sup>22</sup> Sabaihi nyumneh yakri inaku itrip, aria enyudok mour um yakripesh Iruhin ananin baraen um nyatape um yah aria madae inaku uwe. <sup>23</sup> Aria douk enyudok mour douk yape yeneken agudok shokugi nahobig iri douk yeneken yeayaten. Aria eik douk sabaishi kwarahos yape yabirak um yakri inaku itripum, yabirak yatik uwok. <sup>24</sup> Aria douk adur yakrium ta itripum atugun. Yakri inaku itrip ini ipak mupe munadudareh anob nyutob. Ini ipak mupe jurug, douk putaurume um eshudok um yah aria kadak inak um agudok nahobig Spen. <sup>25</sup> Aria douk abudok nyutob ta inak um Jerusalem. Iraomesh utabor eshesh Iruhin ananish arpesh shape Jerusalem iri. <sup>26</sup> Um maresh? Iruhin ananish arpesh shape Masedonia iri shani eshudok shape Akaia iri douk shabo baraen aria shakri wosik um shutorum utabor aria shurabor bunak um Jerusalem. Aria eshesh ta sharabor aria shisiyabor um eshudok Iruhin ananish arpesh douk eneshenesh wokesh um eshudok iri. <sup>27</sup> Enyudok douk eshesh meyoh mishish shakitak aria sheneken. Adur, eshesh douk mour nyapenyesh um shutaurum Iruhin ananish arpesh shape Jerusalem iri. Um maresh? Eshesh Juda douk sharik shakripesh Iruhin ananin yopinyi baraen eshesh madae Juda iri uwe shadukem Iruhin aria esheshish mishish shape wosik. Namudok aria douk eshesh madae Juda iri uwe douk tuwehin nyapenyesh um wata shukesh yopishi eshudok eneshenesh um shutaurumesh um aruhudok yegeshiweruh iri. <sup>28</sup> Abudok nyutob eik inak um Jerusalem ikeshuk utabor douk shatorumabor iri ba iyoh, aria ta inaku inak um nahobig Spen. Ikri inaku inak obi nyutob, sagomatim ta irik itogurmagu ipak agundok Rom. <sup>29</sup> Eik yadukemesh. Abudok nyutob ikri inak itogurmagu ipak obi nyutob, Krais ta nunekumep yopinyi abom aria ta munadudareh muriguk meyoh abom.

<sup>30</sup> Eik yakri ipak urkwip purum apakin Debeini Jisas Krais nini agundok Iruhin ananin Mishin nyapuhur aria apak urkwip panawasham kupaishi Iruhin ananishi arpesh um. Namudok aria eik dodogoisi atuwe yakri ikrip ipak ekish ashukenyish owashish um puni eik munasupam munek wanohw um mubo yoweihai aih hubuhuk um. Aria douk yakri punek beten pusorik Iruhin um nutaurume. <sup>31</sup> Yakri putaurume namudok aria eshudok shape Judia aria madae shunek bilip um Jisas Krais iri uwe, yakri shubirak um mare shunekume enen yoweyni uwe, uwok. Utabor eshesh shekeabor iri shopunek yakri punek beten porigan um nuhur ananish arpesh shape Jerusalem iri, um eshesh shunadudareh um enyudok mour douk eik yeneken um itaurumesh iri. <sup>32</sup> Ipak punek betenume namudok aria ta Iruhin nukri wosik um inak-umagu, eik ta inadudareh iriguk abom. Aria ta inaku ini ipak mupe irao uhwin mare inogugur aria ini ipak munadudareh. <sup>33</sup> Iruhin anan douk baugos um agundok apak mupe wosik aria aparuh hor wosik um. Aria eik yakri anan wosik ta nini ipak ihipmorim pupe. Adur atin.

## 16

### *Pol Nenekumesh Yopuhi Nyumnah Sabaishi Iruhin Ananish Arpesh Shape Rom Iri*

<sup>1</sup> Eik yakri ikriep um punek yopinyi um apakik mohwukwik Fibi. Okwok apa kwenek mour meyoh aria kwataurum Iruhin ananish arpesh shape Senkria iri. <sup>2</sup> Yakri ipakip urkwip purum Debeini pakri okwok douk ananik arpenyik aria puraok kwuni ipak pupe. Puraok punak kwuni ipak pupe kabi Iruhin ananish arpesh ta shenekesh um. Aria maresh eshudok douk kwukri putaurumok um, ipak wosik putaurumok. Um maresh? Riguk okwok douk kwataurum sabaishi arpesh shani eik. <sup>3</sup> Eik yakri ipak punekume yopuhi nyumnah um Prisila kwani Akwila. Eshesh douk shani eik manasupam menekuman mour Krais Jisas. <sup>4</sup> Eshesh biyesh douk madae shunogugur um kupaishi shesh shugok um shtaurum eik uwe, uwok. Aria douk madae eik atuwe inek tenkyumesh uwe, uwok. Ihishmorim Iruhin ananish arpesh douk eshesh madae Juda iri uwe shopunek shenek tenkyumesh. <sup>5</sup> Shopunek yakri punekume yopuhi nyumnah um eshudok Iruhin ananish arpesh douk apa shantorum esheshit urupat iri. Punekume yopuhi nyumnah um eikin arpen Epainetus. Agudok shokugi nahobig Esia douk anan narik nasuhw Krais ananin baraen nagipeshen. <sup>6</sup> Punekume yopuhi nyumnah um Maria. Okwok douk kwenek debeinyi mour um kwataurum ipak. <sup>7</sup> Punekume yopuhi nyumnah um Andronikus nani Junias. Amam biom hani eik, apak douk Juda atup awirop aria douk riguk hani eik monoweshik shunuweshik-ati urupat. Amam aposel douk hadukemam wosik abom amudok biom armam aria hatuk amamish nyeiguw shato iruhw. Amam biom douk harik hasuhw Krais ananin baraen hagipeshen aria eik yagiguk. <sup>8</sup> Punekume yopuhi nyumnah um Ampliatus. Anan douk eikin arpen aria eik urkum manawashaman abom douk nanatukur abom um Debeini. <sup>9</sup> Punekume yopuhi nyumnah um Urbanus. Anan douk nani apak manawapam um Krais ananin mour atin iri. Punekume yopuhi nyumnah um Stakis shopunek. Anan douk eikin arpen. <sup>10</sup> Punekume yopuhi nyumnah um Apeles. Anan douk nasah eneyenen amaen aria neyotu dodog abom adur nyeigur nyakihan um agundok nagipesh Krais adur atin um. Punekume yopuhi nyumnah um eshudok douk shani Aristobulus nani ananishi shape ananit urupat iri. <sup>11</sup> Punekume yopuhi nyumnah um Herodion. Anan douk nani eik ohwak Juda atup awirop

iri. Punekume yopuhi nyumnah um eshudok douk shanatukur Debeini aria shani Narsisus nani ananish shape ananit urupat iri. <sup>12</sup> Punekume yopuhi nyumnah um Trifina kwani Trifosa. Owo apa wonek debeinyl mour um Debeini. Punekume yopuhi nyumnah abom um eikikwi arpenyik Persis. Okwok douk shopunek apa kwenek debeinyl mour um Debeini. <sup>13</sup> Punekume yopuhi nyumnah um Rufus. Anan yopini arman douk apa nagipesh Debeini wosik iri. Punekume yopuhi nyumnah um ananik amakek shopunek. Okwok douk apa kwataurume kabi okwokwin nugarin um. <sup>14</sup> Punekume yopuhi nyumnah um Asinkritus nani Flegon, Hermes, Patrobas iri Hermas hani amudok anam ashukenyim warhim Kristen douk hanaman hape iri. <sup>15</sup> Punekume yopuhi nyumnah um Filologus aria Julia, Nereus nani ananik mohwukwik shani Olimpas aria ihishmorim Iruhin ananish arpesh apa shani eshesh shape iri. <sup>16</sup> Apak Iruhin ananish arpesh apa magipesh um munek yopuhi nyumnah um kupaishi, eik yakri ipak ihismorim ta urkwip punawasham ipak atin atin aria punapuprik um. Ihishmorim Iruhin ananish arpesh douk shape sisigirub warub aria shanatukur Krais iri douk shenemepogu yopuhi nyumnah ipak.

### *Pol Nakripesh Um Gamo Shudukemesh Um Eshudok Arpesh Douk Apa Shadiyogur Iruhin Ananish Arpesh Iri*

<sup>17</sup> Eikish ashukenyish owashish, douk yakri ikripep enen dodogowinyi baraen. Eik yakri ipak ta gamo pudukemesh um eshudok arpesh apa shadiyogur kupaishi aria shenekesh shakutukuk bilip iri. Eshudokmori arpesh apa shakenyuk agabus baraen douk riguk ipak paraen iri. Ipak ta piyotumeshuk rougung. <sup>18</sup> Um maresh? Eshudokmori arpesh douk madae shunek apakin Debeini Krais ananin mour uwe, uwok. Eshesh douk apa shape shagipesh harik hapenyesh iri yoweihai aih atih. Shapeum sheneyag-wreh ekehinyi baraen nyani enyudok douk shenek rohw shagiyagig um arpesh um baraen aria apa shagiyagim eshudok douk madae shudukem yoweishi inahos uwe, uwok. <sup>19</sup> Ihishmorim arpesh douk shemnek baraen um agundok ipak pagipesh Iruhin ananin baraen um. Namudok aria eik douk yanadudareh-umep. Yanadudareh aria douk yakri ipak pudukem yopihi aih abom um pugipesheh wosik atin. Aria yoweihai aih yakri ipak mare pudukemeh um pukri pugipesheh uwe, uwok. <sup>20</sup> Iruhin anan douk baugos um agundok apak aparuh hur wosik. Aria anan douk hurukatin um ta nubo Satan nubuh aria nutuk ipak putem iruhw. Eik yakri apakin Debeini Jisas nutaurumep meyoh um.

### *Enesh Iruhin Ananish Arpesh Shenek Yopuhi Nyumnah Um Eshesh Rom*

<sup>21</sup> Timoti douk nani eik wanasupam um Iruhin ananin mour iri douk neshopokugu yopuhi nyumnah um ipak. Amudok anam hani eik apak Juda atup iri shopunek henemepogu yopuhi nyumnah. Amamish nyeighuw eshudok. Lusius, Jeson iri Sosipater. <sup>22</sup> Eik Tertius, Debeini ananin arpen douk yeshopokugu yopuhi nyumnah um ipak. Eik douk yowem Pol nakri enyi baraen apudok shup. <sup>23</sup> Gaius neshopokugu yopuhi nyumnah. Eik Pol apa yape ananit urupat aria apa neyohe wosik atin. Eshesh Iruhin ananish arpesh apa shanaki shantorum shenek lotu ananit urupat iri shopunek apa nenekumesh yopinyi atin.

Erastus, anudok neyoh gavmanin mani aburdok debeiburi wabur iri, anan shopunek neshopokugu yopuhi nyumnah um ipak. Apakin ashuken Kwartus shopunek neshopokugu yopuhi nyumnah um ipak.

<sup>24</sup> [Eik yakri apakin Debeini Jisas Krais nutaurumep meyoh ipak ihishmorim.]

*Apak Mutuk Iruhin Ananin Nyeigur Nyuto Iruhw*

<sup>25</sup> Apak mutuk Iruhin ananin nyeigur nyuto iruhw. Anan atun wosik atin um nunekep piyotu dodogowip um pusuhw ananin yopinyi baraen dodog pugipeshen. Kabi douk yakriep Iruhin ananin yopinyi baraen um Jisas Krais um. Anan ta nunekumep namudok atin kabi douk enyudok baraen seiwok nyanabeshuk nyape arigaha roubi nyutob abom <sup>26</sup> douk Iruhin nowerehen nyatogur yopugunum iri nyakrium. Anan nape iih nyumneh iri douk dodogowin atun nakripap aria apak makrip ihib um debeibi amnabish arpesh um enyudok añanin baraén. Enyudok baraen douk seiwok amam profet henyemaguk iri. Namudok aria ihishmorim arpesh douk shadukem enyudok nyanabeshuk iri baraen. Iruhin nenekesh namudok um eshesh kupaishi ta shusuhw ananin baraen dodog shugipeshen aria shugipesh ananah aih.

<sup>27</sup> Iruhin douk anan atun nadukem enenyenen abom iri. Namudok aria eik yakri apak ta mutuk ananin nyeigur nyuto iruhw iih nyumneh. Jisas Krais atun ta nutaurumap aria mutuk Iruhin ananin nyeigur namudok. Adur atin.

# Parik Iri Shup Douk Pol Nenekap Panam

## Eshesh Korin Iri

### Banenyi Baraen Pol Narik Neneken Nyanak

### Um Eshesh Korin Iri

1:1-9 Pol nenek tenkyu um Iruhin um eshesh Kristen shape Korin iri  
1:10-4:21 Eshesh Kristen shanadiyogurum shape biyehigun, aria Pol  
nakripesch baraen um Kristen shunekeh iri aih hani ehudok amam  
aposel hunekeh iri.

5:1-7:40 Eshesh Kristen shenek enesh yoweishi inahos aria Pol nakripesch  
um yopihi aih douk eshesh shanaraum iri ta shunekeh iri

8:1-11:1 Pol nakripesch baraen um mahish douk shaesh shenek ofamesh  
um madae adurimi god omi iri uwe. Aria nakripesch um gamo  
shudukemesh aria mare shugipesch eshesh Israel esheshish yoweishi  
inahos douk riguk shape shenekesh iri.

11:2-14:40 Ehudok aih um murao kumunio um hani enen baraen um  
yopinyi presen douk Iruhin ananin Mishin apa nyakopen iri.

15:1-58 Baugenylum baraen um Krais wata nakitak naapeum

16:1-4 Utabor eshesh Korin shaborubuk um bunam enesh Kristen douk  
shanahwaram yaruhih iri

16:5-24 Pol nakripesch ananin baraen nyatuh aria nenemesh yopuhi  
nyumnah eshesh Korin

<sup>1-2</sup> Eik Pol douk Iruhin kanak anan urkum mor aria nahware um itogur  
aposel um neshopoke inak inek Jisas Krais ananin mour aria yenekumep-  
ogu apudok shup ipak. Eik yani apakin wanin Sostenes wape aria  
wenekumep-ogu apudok shup ipak Iruhin ananish arpesh pape Korin  
iri. Ipak douk panak punatukur Krais Jisas aria Iruhin nenekep putogur  
ananish yopishi arpesh. Aria nahwarep um pupe ananip atip abom. Ohwak  
wonekap-umagu ipak pani ihishmorim arpesh shape iherubmorim warub  
iri. Eshudok douk shahwar apakin Debeini Jisas Krais ananin nyeigur iri.  
Anan douk apak mani eshesh apakin atun Debeini.

<sup>3</sup> Ohwak wakri apakin Yain Iruhin nini apakin Debeini Jisas Krais  
hutaurumep meyoh aria hunek ipakiruh aparuh hur wosik.

#### *Pol Nenek Tenkyu Um Iruhin*

<sup>4</sup> Ihih nyumneh eik yape um yenek tenkyu um Iruhin um agundok  
anan nenekep panatukur Krais Jisas aria nataurumep meyoh um. <sup>5</sup> Ipak  
douk panatukur Krais aria parao ihishmorim yopishi eshudok eneshenesh.  
Eshesh douk eshudok. Ipak parao ihinyumorim yopinyi saki, aria parao  
Iruhin ananin debeinyi dodog um piyawgreh enenyenen yopinyi baraen,  
aria um pukripesch ananin yopinyi baraen abom. <sup>6</sup> Um mares? Enyudok  
yopinyi baraen um Krais apak makripen iri douk nyape dologowin  
abom numun ipakiruh aparuh. <sup>7</sup> Douk namudok aria abudok nyutob  
ipak panadudareh aria pape patrugun um apakin Debeini Jisas Krais  
um nutogur yopugunum obi nyutob, ipak douk madae tutukwanip um  
enenyenen yopinyi presen douk Iruhin ananin Mishin nyekepen iri uwe,  
uwok. <sup>8</sup> Aria Jisas Krais ta nataurumep nunekep piyotu dologowip arigaha  
punak putogram ahudok hugiguk iri nyumnah. Anan ta nataurumep  
namudok um hahudok nyumnah anan nutanamori um, ipak ta mare enen  
baraen nyupenyep, uwok. <sup>9</sup> Aria Iruhin douk nagipesch ananin baraen

abom nenen ananin mour wosik iri nahwarep aria panaki pantoruh ananin nuganin Jisas Krais apakin Debeini. Aria ipak pani anan pasuhw atum urkum.

### *Iruhin Ananish Arpesh Shanadiyogurum*

<sup>10</sup> Aria ipak Kristen! Eik douk Debeini Jisas Krais neke big um inek ananin mour. Douk namudok aria eik douk yakri ikripep dodogoive atuwe um pupipesh enyudok eikin bareaen. Bareaen enyudok. Eik yakri ipak ihishmorim ta pusuhw atum urkum abom. Aria ipak punekesh namudok um, ipak ta mare punadiyogurum, uwok. <sup>11</sup> O ipak Kristen, enesh shaniguk Kloe iri shakripe shakri ipak kanak pape panatutukem panitok um bareaen. <sup>12</sup> Eik yakri um enyudok. Ipak enep pakri, "Apak magipesh Pol iri." Aria enep pakri, "Apak magipesh Apolos iri." Aria enep pakri, "Apak magipesh Pita iri." Aria enep pakri, "Apak magipesh Krais iri."

<sup>13</sup> Ipak penegesh um namudok. Ipak pakri Krais nanagwuduk shokushokugun atin aka? Uwok, eik Pol yagok rowog kruse um itaurumep? Adur atin uwok. Aria ipak douk madae shunek baptaisumepum eik Pol eikin nyeigur uwe. <sup>14</sup> Eik douk yenek baptaisum Krispus nani Gaius atum. Aria eik yenek tenkyu um Iruhin um agundok eik madae inek baptaisum enep shopunek um uwe. <sup>15</sup> Douk namudok aria douk ta mare enesh arpesh shukripep shukri eshesh sharao baptaisum eikin nyeigur, uwok. <sup>16</sup> Adur, eik yenek baptaisum Stefanas nani ananip awirop shopunek. Aria eik ta yenek baptaisum enesh shopunek aka, uwok. Enyudok eik madae idukemesh uwe. <sup>17</sup> Krais douk madae nukripe um inak inek baptaisum arpesh uwe, uwok. Anan nakripe um inak ikripesh Iruhin ananin yopinyi bareaen. Aria ikripesh enyudok bareaen um, eik mare iyagwreh bareaen kabi douk shadukemesh abom iri arpesh sheyagwrehan iri bareaen, uwok. Um maresh? Ta arpesh urkwip purum eik atuwe shukri eik yadukemesh abom iri aria yakripesh bareaen yopinyi abom um wosik. Aria eshesh urkwip mare purum enyudok dodogowinyi bareaen abom um Krais nagok rowog kruse um.

### *Iruhin Ananin Saki Iri Dodog Douk Krais Atun*

<sup>18</sup> Eshudok arpesh douk shagim ahudok yah douk ta arpesh shunak shuwishuk iri shagimah iri douk shakri enyudok bareaen um Jisas nagok rowog kruse um douk rohwin wehinyi bareaen. Aria apak douk Iruhin nape narap matanamori mape wosik iri makri enyudok bareaen douk Iruhin ananin debeinyi dodog abom.

<sup>19</sup> Bareaen nyetem Iruhin ananik Buk iri douk nyakri namudok. Iruhin nakri, "Eik ta ibo eshudok douk shadukemesh abom iri esheshin saki aria nyeigur iyatenyuk."

Aria shopunek ta ibouk esheship gamo shadukemesh-umep abom iri urkwip iyatepuk."

<sup>20</sup> Douk namudok aria douk amudok hadukemesh abom iri armam amamin saki ta nyutaurumam mumam? Aria amudok douk hanak um debeinyi skul harao debeinyi saki iri amamin saki ta nyutaurumam mumam? Aria shadukemesh iri arpesh douk shani kupaishi shapeum shanitok bareaen atin iri esheshin bareaen ta nyutaurumesh mumam? Uwok meyoh. Iruhin douk nenen agundok atapish arpesh douk shadukemesh abom iri esheshin saki nyatogur kabi douk rohwinyi um.

<sup>21</sup> Iruhin douk nadukemesh abom iri nagipesh ananim urkum aria nenen eshudok arpesh um eshesh kanak shugipesh esheshin debeinyi saki aria shubirak mare shudukem anan, uwok. Aria anan nakri nurao arpesh

shatanam shupe wosik um douk namudok. Anan nakri wosik um apak mukripesh ananin yopinyi baraen sabaishi arpesh. Aria eshudok douk shukri enyudok baraen douk adurin aria shusuhwen shugipeshen iri, anan ta nuraesh shutanamori shupe wosik. Enyudok baraen apak makripesher iri, agundok atapishi arpesh douk shahwaren rohwinyi. <sup>22</sup> Um maresh? Eshesh Juda douk dodogowish atish um shakri shutik enyudok Iruhin atun neneken iri mour. Aria eshesh Grik shagipesher ahudok yah abom douk eshudok douk shaurim sabainyi saki iri shagipesher iri. <sup>23</sup> Aria apak douk makripesher baraen um shenek nyilim um Krais rowog kruse aria shan nagok um. Apak makripesher aria eshesh Juda shemneken aria nyenekesh shakri uwok abom umen. Aria eshesh Grik shakri enyudok baraen douk rohwinyi. <sup>24</sup> Aria apak Juda mani ipak Grik shopunek douk Iruhin nahwarap iri makri enyudok baraen douk nyakrium Iruhin ananin dodog nyani saki douk Krais atun abom. <sup>25</sup> Um maresh? Enyudok Iruhin ananin baraen douk arpesh shahwaren um rohwin iri, enyen douk nyeshagrakuk abom arpeshin saki. Aria mour douk Iruhin neneken aria arpesh shatrin shakri madae dodogowin iri uwe douk dodogowin atin abom nyeshagrakuk arpeshin dodog.

<sup>26</sup> O ipak eikish arpesh, ipak wata urkwip purmaguk riguk sagomatin Iruhin nahwarep patogur Kristen obi nyutob. Abudok nyutob, ipak ihipmorim douk enep karowip meyoh parao sabainyi agundok atapin saki. Aria shopunek, enep karowip meyoh parao debeishi nyeiguuh, aria enep karowip meyoh patogur dodogowipari nyeiguuh shatoumepi. <sup>27</sup> Aria eshudok arpesh douk agundok atapishi arpesh shahwaresh rohwishi iri, eshesh douk Iruhin nanagraehesh um shupe ananish atish. Anan nenekesh namudok um nunekesh abraen eshudok shadukemesh abom iri arpesh. Aria eshudok arpesh douk agundok atapishi arpesh shatrish shakri eshesh madae dodogowishi iri uwe, eshesh douk Iruhin nanagraehesh um nunekesh abraen dodogowishi arpesh. <sup>28</sup> Aria eshudok arpesh douk arpesh shahwaresh yoweishi rohwishi nyeiguuh wokeshi iri, eshesh douk Iruhin nanagraehesh um nunek eneshenesh dodogowishi eshudok shuni nyeiguuh shatoumeshi arpesh mare dodogowish aria shutogur rohwish nyeiguuh wokeshi. <sup>29</sup> Anan douk nenekep namudok um mare enen atin arpen enyen kanak nyutuk enyenin nyeigur nyuto um nyukri Iruhin nutritin uwe, uwok. <sup>30</sup> Iruhin douk nenekep patukur Krais Jisas aria Iruhin nenekep Krais natogur baugos um apakin saki. Apak douk matukur Krais aria Iruhin douk natrup nakri apak adurishi arpesh. Aria Krais atun nenekap mape Iruhin ananip atup. Aria natorup nakweshihap um yoweishi inahos douk showeshikap iri aria nenekap mape wosik. <sup>31</sup> Douk namudok aria Iruhin nakri apak mugipesher enyudok baraen nyetem ananik Buk iri. Baraen douk enyudok, "Eshudok arpesh douk shukri shutuk eshesheish nyeiguuh shuto iruhw iri, eshesh ta shutuk Debeini ananin atin nyeigur nyuto iruhw."

## 2

### *Enyudok Baraen Um Krais Nagok Neir Rowog Kruse Um*

<sup>1</sup> O ipak Kristen. Riguk eik yanamagu ipak yakripep Iruhin ananin baraen obi nyutob, eik douk madae ikripep ikuw eikin debeineyi saki abom o yopiyopinyi baraen kabi hadukemesh iri hakripepum uwe, uwok. <sup>2</sup> Um maresh? Abudok nyutob eik yanaku yani ipak mapeum, eik yakri uwok abom um eikim urkum muramaguk enesh kupaishi eshudok eneshenesh, uwok. Eik yakri urkum murum Jisas Krais atun abom nini agundok nagok

rowog kruse um. <sup>3</sup> Aria yanaku yani ipak mape um, eik douk madae dodogoive uwe, uwok. Eik apa yanogugur aria sheyarube yowiyokuk.

<sup>4</sup> Aria yape yakritep Krais ananin yopinyi baraen um, eik douk madae ikrripep kabi douk shadukemesh iri arpesh um aria ihur ipakip urkwip uwe, uwok. Eik yakritep baraen um, eik douk yeayabigep Iruhin ananin Mishin enyenyin dodog atin. <sup>5</sup> Eik yenekeš namudok um maresh, eik yakri uwok abom um arpeshin saki nyunekep douk punek bilip um Krais. Eik yakri Iruhin ananin dodog atin nyunekep douk punek bilip uman.

### *Iruhin ananin Mishin Nyokap Saki*

<sup>6</sup> Adur, eshudok douk dodogowish um shagipesh Iruhin ananih aih iri, apak makripen saki nyape-enyi baraen. Aria enyudok saki douk madae agundok atapish arpesh esheshin uwe, uwok. Enyen douk madae eshudok debeishi douk shape shasuhw merik agundok atap iri douk shape shabirak shanak abom um shunak shuwishuk iri esheshin uwe, uwok.

<sup>7</sup> Enyudok saki apak makripen saki nyape-enyi baraen. Seiwok enyen nyanyabeshuk aria arpesh madae shudukemen uwe. Aria seiwok baugos um, Iruhin wata nunek iruhw atap uwe aria anan nagraeh enyudok saki um apak um murao ananin dodog nyuni yopihi aih douk hape kabi lait iri um. <sup>8</sup> Aria douk madae hudukemesh atin um anan um amam debeimi armam douk nasuhw merik agundok atap iri madae hudukem baugeneyum enyudok saki uwe, uwok. Douk amam hudukemen akure, amam ta mare husuhw Debeini douk nyeigur nyatoumanari hunek nyiluman rowog kruse aria hon nugok, uwok. Anan douk Debeini abom nyeigur nyatouman iri.

<sup>9</sup> Aria amam madae hudukem enyudok Iruhin ananin saki uwe kabi douk ananik Buk kwakri um. Buk douk kwakri namudok,  
“Eshudok douk madae enesh arpesh shutrish

o shumnekumesh o urkwip purumesh shukri ta shutograri iri,  
eshudok douk Iruhin nagabeyesh shakus um eshudok  
arpesh douk esheship urkwip panawasham anan iri.”

<sup>10</sup> Eshudok arpesh douk madae shudukemesh uwe, uwok. Aria Iruhin nenek ananin Mishin nyowerehesh um apak aria madukemesh. Ananin Mishin atin douk nyatik ihishmorim um Iruhin ananish urkum aria aih douk shanabeshuk um apak iri aria nyadukemesh. <sup>11</sup> Aria douk ipak omi nyadukem kupainyi arpen enyenyim urkum atin nyadukem enyenyim urkum. Aria douk namudok atin. Aria uwok abom um enen atin arpen nyudukem Iruhin ananik urkum uwe, uwok. Ananin Mishin atin nyadukemam.

<sup>12</sup> Aria apak douk madae murao agundok atapim urkum uwe, uwok. Apak douk marao enyudok Mishin douk Iruhin nakopen um nyutaurumap mudukem eshudok douk anan nekepeshi meyoh iri. <sup>13</sup> Aria abudok nyutob apak makripen saki aria mukripen baraen obi nyutob, apak douk madae mukwu arpeshin saki aria mukripen baraen uwe, uwok. Apak makripen enyudok baraen douk Iruhin ananin Mishin nyakripap-enyi. Aria mawereh baugeneyum enyudok baraen makrip eshudok arpesh douk sharao Iruhin ananin Mishin nyapenyesh iri. <sup>14</sup> Aria eshudok douk Iruhin ananin Mishin madae nyupenyesh iri uwe ta mare shurao eneshenesh yopishi eshudok douk ananin Mishin nyekepesh iri. Um maresh? Eshesh shakri eshudok Iruhin ananin Mishin nyekepesh iri douk rohwishi meyoh. Aria eshesh madae shudukemesh uwe. Um maresh? Enyen douk Iruhin ananin Mishin atin abom apa nyutaurum arpesh nyeyabigesh um baugeneyum um baraen um eshudok yopishi. <sup>15</sup> Aria eshudok arpesh douk Iruhin ananin Mishin nyapenyesh iri ta shunek skelimum ihishmorim eneshenesh eshudok. Aria ta mare enen arpen wosik um nyunek skelimum eshudok

arpesh douk Iruhin ananin Mishin nyapenyesh nyasuhw merikw-umesh iri, uwok. <sup>16</sup> Um maresh? Iruhin ananik Buk douk kwakri namudok, "Madae enen arpen nyudukem Debeini ananim urkum mor manak um uwe. Aria ta mare enen arpen nyukripan um enesh eshudok eneshenesh uwe, uwok."

Aria apak douk marao Krais ananim um urkum mapenyap.

### 3

#### *Heneh Mour Sios Iri Douk Henek Iruhin Ananin Mour Iri*

<sup>1</sup> O ipak Kristen! Riguk eik yakriep Iruhin ananin baraan obi nyutob, eik douk madae ikriep kabi yakrip eshudok douk sharaen Iruhin ananin Mishin nyapenyesh nyasuhw merikw-umesh iri um uwe, uwok. Eik yakriepen kabi yakrip eshudok douk shagipesh agundok atapih aih iri um. Aria shopunek, yakriepen kabi yakrip shokwishi batowish um. Um maresh? Eik yatrupum ipak wata dodogowip um agundok pagipesh Krais ananah aih um. <sup>2</sup> Aria eik madae ikriep dodogowinyi baraaen uwe, uwok. Um maresh? Riguk ipak douk wata dodogowip um puwok dodogo-wiguni worigun uwe. Aria douk shopunek, ipak wata dodogowip uwe. Douk namudok aria eik yekep nyumaguuh atin. <sup>3</sup> Um maresh? Ipak wata pape pagipesh ehudok harik hapenyep iri yoweih iah. Ehudok aih penenek nyigiya um, hani ehudok um panatutukem atin um. Ipak douk penekesh namudok aria ehudok aih ipak penekesh iri douk heyabigap um ipak douk wata pape pagipesh harik hapenyepi aih. Ehudok ipakih aih douk kabi agundok atapish arpesh meyoh shenekeh iri um. <sup>4</sup> Enen arpen nyakri, "Eik yagipesh Pol iri." Aria enen nyakri, "Eik yagipesh Apolos iri." Aria enyudok ipakin baraaen douk nyeyabigap um ipak douk watak pape kabi agundok atapish arpesh um. <sup>5</sup> Ipak urkwip purum enyudok. Apolos douk meinia aria eik Pol amiapen? Ohwak douk weneh Debeini ananin mour iri otuhw. Aria enyudok mour riguk ohwak wanaku weneken iri nyataurumep pasuhw Krais ananin baraaen pagipeshen. Aria Debeini nakohw sisigin mour. <sup>6</sup> Eik yau shurkwip-igun worigun yarig aria Apolos nakrupesh abar um mare ta yarish. Aria Iruhin atun nenekeh shatogur. <sup>7</sup> Douk namudok aria enyudok nyau worigun iri nyani enyudok douk nyakrupesh abar iri eshesh biyesh douk nyeiguuh wokes. Aria Iruhin atun douk nenekeh shatogur iri anan atun douk debeini aria nyeigur nyato iruhw iri. <sup>8</sup> Enyudok arpen douk nyau worigun iri nyani enyudok douk nyakrupesh abar iri eshesh biyesh douk shasuhw atum urkum aria shenek atin mour iri. Aria eshesh biyesh, atin atin ta shurao esheshibor utabor atatahibor um enyudok mour eshesh sheneken iri. <sup>9</sup> Um maresh? Ohwak biyohw douk wani Iruhin manoprom munek ananin mour. Aria ipak kabi douk Iruhin ananig nubarig um.

#### *Heneh Mour Sios Iri Amam Kabi Douk Amudok Harok Urusag Iri*

Aria ipak shopunek douk pape kabi Iruhin ananit urupat um. <sup>10</sup> Eik Pol douk Iruhin nataurume meyoh aria neke enyudok saki um itogur kabi anan nadukemesh abom um narok urusag iri arman. Eik douk yabuk sagomatinyim utom douk apa mosah wabrat um urupat iri. Aria kupaishi shape sharok urupat tetem amudok utom. Aria eshesh atin atin shupe shurok atudok urupat um, eshesh ta gamo shunadukemesh wosik aria shupe shurokat. <sup>11</sup> Um maresh? Ipak padukemesh, Iruhin douk nosap Jisas Krais nape narik kabi douk amudok sagomatinyim utom douk mosah wobrat urupat iri. Douk namudok aria ta mare enen arpen dodogowin um nyubuk anam kupaimi utom shopunek um musah urupat

um uwe, uwok. <sup>12-13</sup> Aria ta enen arpen nyukwu gol o siliwa o yopubori utabor douk shatorubor debeibori utabor iri o rowos o worur um nyurok atudok urupat um, ahudok nyumnah Krais nutanamori ahi, eshesh atin atin eshesin mour ta nyutogur yopugunum. Aria eshesh ta shutrin aria shudukemesh um enyen douk yopinyi aka yoweinyi. Aria hahudok nyumnah Krais nutanamori ahi, ta huni nyih hunaki. Ehudok nyih ta hunuwi mour ihishmorim arpesh atin atin sheneken um hukwiraheen iri um huwerehen-umesh. Aria eshesh shudukemesh um esheshin mour douk yopinyi aka yoweinyi. <sup>14</sup> Arpesh sheneken iri mour, enyen douk kabi ogwudok urusag eshesh sharokog iri um. Aria ta enen arpen enyenyit urupat nyih madae hunut huwarut um, enyen ta nyurao yopishi eshudok eneshenesh um enyenyin mour enyen nyeneken iri. <sup>15</sup> Aria ta enen arpen enyenyit urupat nyih hunut huworut um, enyen ta mare nyurao enesh yopishi eshudok eneshenesh uwe, uwok. Aria enyen kanak Iruhin ta watak nuraen nyutanamori nyupe wosik kabi douk matukenyi nyih um.

### *Iruhin Ananish Arpesh Douk Shape Kabi Ananit Debeiti Urupat Um*

<sup>16</sup> Ipak ihipmorim douk pape kabi Iruhin ananit debeiti urupat um. Aria ananin Mishin douk nyape numun ipakiruh aparuh. Ipak padukem enyudok aka, uwok? <sup>17</sup> Douk namudok aria ta enen arpen nyununu Iruhin ananit debeiti urupat um, Iruhin ta nen nununin aria neshopoken nyunak um yoweiburi wabur hel. Um maresh? Atudok urupat yoputi abom aria ananit atut. Aria ipak kanak douk pape kabi atudok urupat um.

### *Apak Mare Mutuk Arpesh Esheshish Nyeiguhw Shuto Iruhw*

<sup>18</sup> Ipak mare punek rohw um ipak kanak, uwok. Aria ipak enen arpen nyukri enyen douk nyadukemesh abom iri arpen kabi douk agundok atapishi arpesh shakri um, enyen ta nyunekesh namudok. Sagomatin enyen ta nyutanam nyutogur enyudokmori arpen douk agundok atapishi arpesh shahwaren hwarohwin iri ba iyoh. Aria enyen ta kadak nyutogur nyadukemesh abom iri arpen. <sup>19</sup> Um maresh? Iruhin natik agundok atapin saki, anan nakri enyen douk hwarohwin saki. Enyen douk kabi enen bareaen nyetem Iruhin ananik Buk iri nyakrium. Enyen nyakri namudok, "Iruhin nasuhw shadukemesh abom iri arpesh um douk namudok. Anan nakwu eshesh kanak esheshih rohwih aih hani saki aria neneke shape yoweishi kabi douk arpesh shore madururuh um mahish shanak sheir um." <sup>20</sup> Aria enen shopunek bareaen nyetem Iruhin ananik Buk iri shopunek nyakri namudok, "Debeini nadukemesh um eshudok shadukemesh iri arpesh esheship urkwip ta mare pukwarum eneh yopihi aih uwe, uwok."

<sup>21</sup> Douk namudok aria douk ipak mare enen arpen nyutogur enen arpen enyenyin nyeigur nyuto iruhw uwe, uwok. Ihishmorim eshudok eneshenesh shani arpesh shopunek douk ipakish atish. <sup>22</sup> Eik Pol yani Apolos aria Pita mani ihipmorim agundok atap, pani agundok arpesh shupe aria madae shugok um, nani gok, nyani eshudok ihishmorim shani arpesh douk shape iri, shuni eshudok douk ta kweipon shutogur iri, eshudok ihishmorim douk ipakish atish. <sup>23</sup> Aria ipak ihipmorim douk Krais Jisas ananip atip. Aria Krais douk Iruhin ananin.

## 4

### *Debeini Atun Ta Nunek Skelim Um Eshudok Douk Shenek Mouruman Iri*

<sup>1</sup> Ipak ta urkwip purum apak aria pakri apak douk mape shakamum Krais aria munek ananin mour iri. Apak douk Iruhin nenekap um mupe debeipi um enyudok mour um mukripesh ananin adurin atin bareaen douk seiwok nyanabeshuk nyape iri. Aria douk enyen nyatogur yopugunum. <sup>2</sup> Aria

enyudok arpen douk enyenyin debeini neken mour um nyuneken iri, enyen ta nyuneken wosik abom. <sup>3</sup> Aria ta ipak o kupaishi arpesh shukri shunek skelimum eikh aih um, o shunek skelim eik um kwot, enyudok eik madae idarehen uwe, uwok. Aria eik kanak shopunek, eik yakri uwok um inek skelum eikh aih, uwok. <sup>4</sup> Adur atin, eik urkum mor wosik atin aria madae murum ikri eik yenek enesh yoweishi inahos um uwe. Aria enyudok ta madae nyunekesh aria ikri eik yopuwe iri uwe, uwok. Debeini anan atun wosik ta nunek skelime. <sup>5</sup> Aria douk abudok nyutob douk Debeini nakriyab um nunek skelimum arpesh obi nyutob douk wata butogur uwe. Douk namudok aria ipak mare arigas punek skelim um enen arpen uwe, uwok. Ipak ta putrugun um arigaha ahudok nyumnah Debeini nutanamori ahi aria anan kadak nunek skelimesh. Anan ta nurauria eneshenesh eshudok douk shanabeshuk shakus arukwut-igunum shutogur yopugunum. Aria ta nuwerek ihishmorim arpesh esheship panabeshuk iri urkwip putogur yopugunum. Aria abudok nyutob Iruhin ta nukrip apak ihishmorim atin atin um apak meneken iri mour. Anan ta nunadudareh-umep aria nutuk apakish nyeiguhw nukripap atatahin baraen um apak atin atin mour apak moneken iri.

### *Eshesh Kanak Korin Shape Shatuk Esheshish Nyeiguhw Shato Iruhw*

<sup>6</sup> O ipak Kristen, eik douk yenek urkum um yakri itaurumep. Douk namudok aria eik yakripep baraen um eshudok douk shenek Iruhin ananin mour iri, eik yohur baraen yenyem ohwak eik yani Apolos. Eik yenekesh namudok um yakri ipak pudukem baugennum baraen um enyudok baraen douk nyakri, "Ipak mare pishagrakuk enyudok baraen douk amam henyemaguk Iruhin ananik Buk iri, uwok." Eik yakripep namudok um ipak mare punadudareh um putuk enen arpen enyenyin nyeigur nyuto iruhw aria punih kupainyi enyenyin nyubuh, uwok. <sup>7</sup> Ipak douk omi nyenekep um pupe debep um kupaishi arpesh? Ihishmorim yopishi eshudok eneshenesh ipak paraesh iri douk Iruhin atun nekepesh. Douk namudok aria ipak mare punogunukuk pakri ipak atip ddogowipari, uwok. Um maresh? Ihishmorim yopishi eshudok eneshenesh ipak paraesh iri douk Iruhin atun nekepesh.

<sup>8</sup> O adur, douk ipakiruh aparuh shukniruh. Ipak parao ihishmorim eneshenesh yopishi eshudok aria patogur debeipari. Apak douk madae mutaurumep uwe, uwok. Enyudok douk ipak kanak patogur king-omi. Aria eik yakri ipak pupe debeimi king-omi abom um apak shopunek muni ipak mupe debeimi king-omi atup. <sup>9</sup> Um maresh? Eik urkum morum yakri Iruhin douk nenek apak aposel mape magiguk abom kabi douk nyeiguhw wokeshi arpesh douk shape shagiguk abom iri. Apak douk mape kabi amudok armam douk henek kwot aria nasuhw amamit kwot aria nakri amam ta hugok iri. Anan nakri ihishmorim arpesh shape iruhw atap iri shuni Iruhin ananish enselahos shiyotu shutrum eshesis nabes aria shom hugok iri. <sup>10</sup> Apak douk makripesh Krais ananin baraen aria agundok atapishi arpesh douk shahwarap hwarohwipari. Aria ipak douk patukur Krais aria parao sabainyi saki peshagrakuk apak hwarohwipari. Apak douk madae ddogowip uwe, aria ipak douk ddogowip abom. Aria apak nyeiguhw wokap, aria ipak douk nyeiguhw shato iruhumep. <sup>11</sup> Seiwo manaki arigaha douk, apak nyurub bap, abar bap aria monare yoweishi rupeh. Aria arpesh shap, aria apak penyigun uwok um munak mupeum uwe. <sup>12</sup> Aria apak kanak menek debeiniy Mour aria magrem apakish eshudok eneshenesh. Aria arpesh shahapum, apak apa marig Iruhin um nunekumesh yopinyi. Eshesh shenek enenyenen yoweiniy um apak aria apak ddogowip mape manatrish meyoh. <sup>13</sup> Eshesh sharukap nubut

aria apak makripesh yopinyi atin baraen. Seiwock manaki arigaha douk, apak mape magiguk abom nyeiguuh wokap kabi douk agundok atapish nyubuhas douk shawashesh-uguk anagas iri um.

### *Pol Nakrip Eshesh Korin Um Shugipesh Ananah Aih Abom*

<sup>14</sup> Eik douk madae iwemagu enyudok baraen um inekep abraen ipak uwe, uwok. Eik douk urkum manawashamep kabi douk eikish batowish um aria eik douk yowemagu enyudok baraen um yakri iyabigep yopuhi yah um mare punek yoweishi inahos. <sup>15</sup> Adur, ta 10,000-poreim armam hupe hiyoh ipak douk patukur Krais iri. Aria ipak douk madae sabaimi yakenyim uwe. Eik douk yakritep Iruhin ananin yopinyi baraen pasuhwen pagipeshen aria douk eik atuwé abom yape ipakin yaken. Ipak douk patogur eikish batowish um Iruhin ananin yopinyi baraen douk eik yakripen aria pemneken pagipeshen iri. <sup>16</sup> Douk namudok aria eik yakri ipuhur um pupe um pugipesh eikih atih aih. <sup>17</sup> Aria shopunek, eik yeshopok Timoti nanak-umogu ipak. Anan douk eikin nunganin douk eik urkum manawashaman abom iri. Eik yahwaran nunganinum ipak pumnekan, anan douk nataurume wenek Debeini ananin mour iri. Aria anan apa neneken wosik. Eik douk yeshopokan nanakumogu nukritep um nuhur ipakip urkwip um ipak wata urkwip purum eikih aih douk yape yenekeh um yagipesh Krais Jisas um. Aria ihirub warub, ihish Iruhin ananish arpesh shantorum shape aria yanak yakripesh baraen um, eik yakripesh um shugipesh ehudok atih aih huni baraen.

<sup>18</sup> Ipak enep pakri eik ta mare inaku aria ipak pape patuk ipakish nyeiguuh shato iruhw aria pakri ipak padukemesh abom iri. <sup>19</sup> Aria eik ta Debeini nukri wosik um eik inakumagu, eik ta inaku arigas. Aria eik ta inaku aria ta mare igiyagim eshudok douk shape shanagunukuk iri um esheshin baraen atin uwe, uwok. Eik yakri idukem esheshin dodog aria aih douk eshesh sharah aria shenek mour um shopunek. <sup>20</sup> Um maresh? Arpesh madae shiyagwreh baraen atin aria shuwish um agundok Iruhin nepe Debeini um ananish arpesh um uwe, uwok. Eshesh douk Iruhin nutaurumesh sharao ananin dodog aria douk shawish. <sup>21</sup> Ipak pakri mumam? Pakri eik isuhw gargit inaku iyep igabeyep o pakri eik urkum munawashamep aria inaku ikritep shokubur?

## 5

### *Ehudok Aih Um Shenek Wehrur Um Hape Um Eshesh Korin*

<sup>1</sup> Eik yemnek enen baraen um ehudok yoweishi aih um shenek wehrur um hapeum ipak. Ehudok douk yoweishi aih abom. Eshesh haiden douk madae shudukem Iruhin iri uwe douk madae shenekeh atih uwe ehudokmori aih. Ehudok aih douk ehudok. Anan arman nepe nanasonuk ananik kwakabarun iri amakek douk ananin yakenik irohukwik. <sup>2</sup> Aria douk ipak pape patuk ipakish nyeiguuh shato iruhw aria pakri ipak yopipari abom padukemesh iri um maresh? Namudok uwok! Enyen douk wosik um ipak aparuh yoweruh aria pureh um anudok nenek ehudok yoweishi aih um. Aria ipak pukripan um anan mare wata nunaki nini ipak pupe abudok nyutob ipak punak puntorum pupe um. <sup>3</sup> Adur eik arpen yapeik rougun um ipak, aria eikin mishin douk nyani ipak pape. Aria eik douk yenek skelimum anudok arman douk nenek ehudok aih iri kabi douk yani ipak mape atugun abom um aria yakri anan douk nenek yoweishi aih abom. <sup>4</sup> Douk namudok aria eik yakri namudok. Ahudok nyumnah ipak puntorum pupe um Debeini Jisas ananin nyeigur um, eikim urkum ta mupe kabi douk yani ipak mape um. Aria ananin dodog ta nyuni ipak nyupe. <sup>5</sup> Aria ipak

ta punemoguk anudok arman um nukutipukuk nunak nur Satan ananis wis. Ipak punekan namudok um Satan nubo ananihw yegenyihw aria nubo ananah yoweih iah abom nununuh wouwokuk. Aria shopunek, ipak punekan namudok um Iruhin ta wata nunarao anudok arman ananin mishin nyutanam nyupe wosik ahudok nyumnah Debeini nutanamori ahi.

### *Eshesh Korin Ta Shishopok Anudok Neneh Yoweih Aih Iri Nupeik Aduk*

<sup>6</sup> Ipak pakri ipak atip yopipari abom padukemesh iri aria pape patuk ipakish nyeiguhw shato iruhw. Aria ehudok aih douk madae yopih uwe. Ipak douk padukemesh enyudok wobuwobren baraen douk nyakrium yis douk senek bret takitak debet um. Baraen enyudok, “Anagun shokugun um yisigun apa senek ihitmoris bret takitak debeiti.” <sup>7</sup> Aria ipak ta puwashakuk asudok yarisi yis um ipak putogur yopishi arpesh abom kabi douk namuti bret yis wokat iri um. Adur, eik douk yadukemesh, ipak douk pape yopishi arpesh kabi douk yis wokat iri bret um. Um maresh? Apakin sipsip douk shenek agundok debeiguni Pasovaigun worigun aria shaen shenek ofa umen shako Iruhin iri, enyen douk Krais. Eshesh douk shan nagok kabi douk shenek ofa um enen yopunyi sipsip shako Iruhin um. <sup>8</sup> Douk namudok aria apak ta munegabe apak kanak aria mupe munek garibog um muwok agundok debeiguni Pasovaigun worigun. Apak ta mukahuk agabus eneheneh apakih yoweih aih kabi douk arpesh apa shawashakuk yarisi yis aria shape shenek garibog um agundok debeiguni worigun um shuwok bret yis wokati um. Aria apak ta mugipesh yopih aih huni adurin atinyi baraen.

<sup>9</sup> Eik yarik yenekap-umepagu iri shup, eik yakripep yakri, “Ipak mare punadudareh atin um eshudok douk shenek wehrur iri.” <sup>10</sup> Eik douk madae ikri um pukutukuk eshudok abom um douk madae shusuhw Iruhin ananin baraen dodog shugipeshen iri uwe, aria douk shenek wehrur iri. O eshudok douk shenek nyigiyau kupaishi esheshish eshudok eneshenesh iri. O eshudok douk shawuaruh atih iri o eshudok douk shenek lotu um madae adurimi god omi iri uwe, uwok. Aria pakri pukutishukuk um, ipak ta pukutishuk agundok atap. <sup>11</sup> Aria baugenyum enyudok baraen eik yenyemagu iri douk namudok. Aria anan arman douk nakri ipak pahwaran wanin iri nunek ehudok yoweih iah um shenek wehrur um o nunek nyigiyau nurao kupaishi esheshish eshudok eneshenesh o nunek lotu um madae adurimi god omi uwe o nabubunim kupaishi o nuwok abar nugugak o nukwuaruh um, ipak mare puni anan punadudareh aria puni anan puwok worigun uwe, uwok.

<sup>12-13</sup> Enyudok mour um shunek skelimum eshudok arpesh douk shapeik aduk um Iruhin ananish arpesh iri, enyen douk madae eikin mour uwe, uwok. Iruhin atun ta nunek skelimesh. Aria enyudok mour um shunek skelimum Iruhin ananish arpesh um douk ipakin. Namudok aria ipak ta punek skelimesh. “Aria ipak punak puntorum pupe um, ipak ta pukrip anudok yoweini arman um nukutipuk ba nunak.”

## 6

### *Ipak Kristen Mare Punek Kwot Um Kupaishi Kristen*

<sup>1</sup> Aria ipak Kristen atip enen nyuni kupainyi punitok um enen baraen um, enyen ta nyenekesh mumam? Aria ta nyeshagrakuk Iruhin ananish arpesh douk ta wosik um shugabe ipakin baraen aria nyanak nyenek kwotumen um amudok debeimi haiden douk hasuhw kwotog iri aka? Aria enyen ta abraen mare nyen um agundok nyanak nyahwar amudok haiden um husuhw enyenyit kwot um uwe. <sup>2</sup> Adur atin ipak padukemesh um kweipon

apak Iruhin ananish arpesan ta munek skelimum ihishmorim atapishi arpesan eshesih aih. Aria ta apak ta munekesh namudok um, douk ipak kanak douk mare ta wosik punek skelimum enyudok shokwinyi baraen uwe um maresh? <sup>3</sup> Ipak padukemesh aka, uwok? Kweipon apak ta munek skelimum enselahos eshesih aih shopunek. Douk namudok aria apak douk ta wosik munek skelimum baraen um enenyenen nyatogur abom agundok atap iri. <sup>4</sup> Douk namudok aria ipak pakri punek skelimum baraen um enesh eshudok um, ipak apa pugraeh eshesih douk Iruhin ananish arpesan douk madae shurao enen big iri uwe um shunek skelimeny-umep. <sup>5</sup> Eik douk yowemagu enyudok baraen um yakri inekep abraen ipak. Ipak kanak ta madae anan nudukemesh abom um nupe orokohun um ipak Iruhin ananish arpesan aria nunek skelimum kupaishi Kristen esheshin baraen uwe? <sup>6</sup> Aria douk enen Kristen douk nyarao kupainyi Kristen um kwot um amudok debeimi haiden douk hasuhw kwotog iri um hunek skelimum esheshin baraen!

<sup>7</sup> Adur, ipak apa penek kwot um kupaishi Kristen. Douk namudok aria ehudok ipakih aih douk heyabigap um ipak douk madae dodogowip um pugipesh Iruhin ananish aih uwe, uwok. Ipak pekehuguk agabus abom. Ipak douk madae pupe putrish meyoh aria shunek yoweishi inahos um ipak wobur atin uwe um maresh? Aria ipak douk madae pupe putrish meyoh aria pukutishuk shutrip shukumesh-aruh ipakish eshudok eneshenesh uwe um maresh? <sup>8</sup> Aria ipak madae punekesh namudok uwe, uwok. Ipak kanak wata pakitak penek yoweishi inahos um kupaishi ipakishi Kristen. Ipak penek rohwumesh panarukesh esheshish eshudok eneshenesh meyoh.

<sup>9-10</sup> Ipak padukemesh um enyudok aka, uwok? Eshudok arpesan douk shenek eneshenesh yoweishi inahos iri ta mare shuwish agundok Iruhin nape Debeini um ananish arpesan um, uwok. Douk namudok aria ipak mare punek rohw um ipak kanak, uwok. Um maresh? Eshudok douk shenek ehudokmori yoweishi aih um shani kupaishi arpesan shenek wehrur um, aria shenek lotu um madae adurimi god omi iri uwe, shuni amudok armam douk hanukesh kupaими amariyu armago iri, huni amudok douk hanukesh kupaими armam um henek yoweishi inahos iri, huni eshudok douk shakwuaruh iri, shuni eshudok douk shenek nyigya um shakri shurao kupaishi esheshish eshudok eneshenesh iri, shuni eshudok douk apa shawok abar shagugak iri, shuni eshudok douk apa sheneyagwreh agabusin um kupaishi iri, shuni eshudok douk apa shabo kupaishi shanatrish eshudok eneshenesh iri, ihishmorim eshudokmori arpesan ta mare shuwish agundok Iruhin nape Debeini um ananish arpesan um, uwok. <sup>11</sup> Riguk ipak enep douk pape penek ehudokmori yoweishi aih. Aria Iruhin nakrup ipakiruh aparuh aria nenekep patogur ananip atip aria nahwarep yopishi arpesan. Anan douk nenekep namudok um agundok ipak patukur Debeini Jisas Krais aria nataurumep um. Aria Iruhin douk nako ananin Mishin atin aria nenekep patogur namudok.

### *Apakiruh Yegeshiweruh Ta Hupe Yopuruhi Um Mutuk Iruhin Ananin Atin Nyeigur Nyuto Iruhw*

<sup>12</sup> Adur, enen arpen douk nyakri namudok, "Ihishmorim eshudok douk wosik um eik inelesh." Aria eshudok ihishmorim eik inelesh iri ta mare shutaurume, uwok. Enyudok baraen douk nyakri, "Ihishmorim eshudok douk wosik um eik inelesh iri" douk shape, aria eik ta mare ikutuk enesh eshudok shupe debeishi-umari eik, uwok. <sup>13</sup> Aria enen arpen ta nyukri, "Aparuh douk worigun-iruh. Aria araruh douk hapeum worigun nubuh nur um." Enyudok enyen douk adur, aria anah nyumnah Iruhin ta neyatokuk aparuh aria worigun. Iruhin douk madae nunek apakiruh

yegeshiweruh um munek ehudok yoweih iah um muni kupaishi munek wehrur um uwe, uwok. Anan douk nenekep um punek ananin mour. Aria anan douk Debeini um apakiruh yegeshiweruh aria apa neyostraruh.

<sup>14</sup> Iruhin douk nakwu ananin dodog aria wata nohur Debeini nakitak nape. Aria kweipon anan ta nuhur apak shopunek mukitak mupe. <sup>15</sup> Aria ipak madae pudukemesh uwe? Ipak douk pape anabik um Krais ananihw yegenyihw. Douk namudok aria ta eik irao anabik um Krais ananihw yegenyihw inak iko okwudok douk kweyotu yah iri okwokwihiw yegenyihw um, enyen douk wosik aka, uwok? Adur atin, namudok douk uwok. <sup>16</sup> Aria ipak douk padukem enyudok aka, uwok? Ta anan arman nunak um onok armatok douk kweyotu yeh iri um, eshesh biyesh douk shatogur atin arpen. Um maresh? Iruhin ananik Buk douk kwakri, "Eshesh biyesh ta shutogur atin arpen." <sup>17</sup> Aria enyudok arpen douk nyunak nyatukur Debeini iri douk nyani anan esheshish mishish shatogur atin mishin meyoh.

<sup>18</sup> Aria ipak ta puruwok-umaguk ehudok yoweih iah um shenek wehrur um. Ihihmorim eneheneh yoweih iah arpesh shenekeh iri, eshesh douk shenekehuk adukiruh um esheshiruh yegeshiweruh. Aria enyudok arpen nyunek ehudok yoweih iah iri, enyen douk nyenek yoweishi inahos um enyenyihw yegenyihw. <sup>19</sup> Aria ipak padukem enyudok aka, uwok? Ipak kanak douk pape kabi Iruhin ananin Mishin enyenyit debeiti urupat um. Enyen douk Iruhin nekepen aria nyape numun ipak. Aria ipak douk madae pugrem ipak kanak uwe, uwok. Ipak douk Iruhin ananip atip. <sup>20</sup> Douk Iruhin natorip, anan nenek debeinyi mour. Douk namudok aria ipakiruh yegeshiweruh ta hupe um putuk Iruhin ananin atin nyeigur nyuto iruhw.

## 7

### *Armam Armago Shanaraum Um*

<sup>1</sup> Douk eik yakri iwanam enyudok baraen douk ipak peneki shup porige iri um. Baraen enyudok. Aria anan arman mare nurao onok armatok nupe meyoh um, enyen douk wosik. <sup>2</sup> Aria sabaihi eneheneh yoweih iah um shenek wehrur um hape. Douk namudok aria enyen douk wosik um ihm-morim armam ta hunarao amamiyu armago sisiguk. Aria ihiyumorim armago ta unarao owoiw armam sisiguk. <sup>3</sup> Aria arman ananihw yegenyihw douk ananik irohukwik kwasuhw merikw-umohw. Aria anan mare nunokrimohw, uwok. Aria armatok okwokwihiw yegenyihw douk okwokwin raminen nasuhw merik-umohw. Aria okwok mare kwunokrimohw, uwok. <sup>4</sup> Irohukwik mare kwukri okwok kwasuhw merik um okwokwihiw yegenyihw, uwok. Okwokwin raminen nasuhw merik-umohw. Aria raminen shopunek mare nukri anan nasuhw merik um ananihw yegenyihw, uwok. Ananihw yegenyihw douk ananik irohukwik kwasuhw merik-umohw. <sup>5</sup> Aria eshudok douk shanaraum iri, eshesh mare enen nyukri uwok um nyuni enen shishuh um. Aria ta eshesh shubo baraen aria shukri wosik um shupe meyoh anob nyutob um shupe shunek beten atin um, namudok douk wosik. Aria abudok nyutob butuh aria eshesh wata shopunek shunak shishuh attugun. Um maresh? Ta wosik atin eshesh mare shusuhw merik um eshesh kanak aria Satan nukwiraehesh um shunek yoweishi inahos aria eshesh shuneksh. <sup>6</sup> Enyudok baraen douk yakriyen um arpesh shanaraum, enyen douk madae dodogowinyi lo douk ipak ta pugipeshen iri uwe, uwok. Enyen douk yakriep meyoh um yakri itaurumep. <sup>7</sup> Eik kanak yakri ipak ihipmorim mare ta panaraum. Eik yakri pupe meyoh kabi douk eik um. Aria Iruhin nekesh sisigin yopinyi presen

ihishmorim arpesan. Enesh arpesan Iruhin nekesh enyudok presen um shupe meyoh. Aria enesh nekesh presen um shanaraum.

<sup>8</sup> Aria eshudok douk madae shanaraum iri uwe shani oudok armago douk armam hagok hawosopukuk iri, eik yakri namudok. Ta eshesh shupe meyoh kabi douk eik um, enyen douk wosik. <sup>9</sup> Aria ta eshesh mare ddogowish um shusuhw merik um eshesh kanak um, enyen douk wosik um eshesh ta shanaraum. Ta shupe meyoh um aria esheshiruh aparuh hukitak abom aria eshesh shenek wehrur um.

<sup>10</sup> Aria eshudok douk shanaraum iri, eik yekesh enyudok lo. Enyudok lo douk Debeini ananin, madae eikin uwe. Enyen douk nyakri namudok. Mare onok armatok kwukitak kwunak kwukutukuk okwokwin raminen, uwok. <sup>11</sup> Aria okwok kwukwutunuk um, okwok ta kwunak kwupe meyoh. Okwok mare kwurao kupaini arman, uwok. Uwok um, okwok ta wata kutanan kwunak um okwokwin raminen. Aria anan raminen shopunek mare niyatokuk ananik irohukwik, uwok.

<sup>12</sup> Aria ipak kupaipari, eik kanak yakri ikripep namudok. Enyudok baraen enyen douk madae Debeini ananin uwe, uwok. Eik yakri namudok. Aria anan arman natogur Kristen iri, douk narao onok armatok mare kutogur Kristen iri uwe, aria okwok kwukri wosik um kupeuman um, anan mare niyatok, uwok. <sup>13</sup> Aria ta onok armatok kwutogur Kristen iri, douk kwarao anan arman mare nutogur Kristen iri uwe, aria anan nukri wosik um nini okwok shupe um, okwok mare kwiyatok anan, uwok. <sup>14</sup> Um maresh? Raminen douk madae nutogur Kristen iri uwe douk natukur ananik irohukwik douk kwatogur Kristen iri aria namudok anan natogur yopuni raminen kabi douk Iruhin nanagraehan iri um. Aria irohukwik douk madae kutogur Kristen iri uwe shopunek douk namudok atin. Okwok kwutukur okwokwin raminen douk natogur Kristen iri aria okwok k watogur yopukwi irohukwik kabi douk Iruhin nanagraehok iri um. Uwok um, ipakish batowish ta mare shutogur Iruhin ananish, uwok. Aria uwok, douk eshesh douk shatogur Iruhin ananish atish arpesan kabi douk anan nanagraehesh iri um.

<sup>15</sup> Aria ta enyudok arpen douk madae nyutogur Kristen iri uwe nyukri nyukutukuk enyenyik armatok o enyenyin arman um, enyen wosik ta ko nyukutiny-ukuk. Aria ta ehudokmori aih hutogram enyudok nyenek bilip iri arman o armatok um, enyen douk madae enen baraen nyutapesh uwe, uwok. Um maresh? Iruhin douk nahwarap um mugipesh ehudok aih um aparuh hur wosik um. <sup>16</sup> Armatok, nyak wosik ta nyutaurum nyakin raminen um Iruhin nuran nutanamori aka, uwok? Enyudok nyak madae nyudukemesh uwe. Aria nyak arman shopunek, nyak wosik ta nyutaurum nyakik irohukwik um Iruhin nuraok kwutanamori aka, uwok? Enyudok nyak madae nyudukemesh uwe.

### *Apak Ta Mape Kabi Douk Riguk Marik Mape Aria Iruhin Nahwarap Abom Um*

<sup>17</sup> Aria eik yakri ikripep enen shopunek baraen. Eik yakri ipak ta pupe ipakiyu outumeb sisiguk kabi douk riguk Debeini nekepo iri. Aria pupe namudok atin kabi douk seiwok sagomatin ipak pape aria Iruhin nahwarep um. Eik apa yakripes yekesh enyudok atin lo ihishmorim Iruhin ananish arpesan douk shape ihinyumorim sios um iherub warub iri. <sup>18</sup> Eik yakri namudok, anudok arman douk kupaini arman natahuk ananihw yegenyihw aria Iruhin kadak nahwaranari, anan mare wata nugabe ananig nyubrusug um nunabeshukog, uwok. Aria anudok arman douk madae nutah ananihw yegenyihw uwe, aria Iruhin nahwaran iri, anan mare ta nutah ananihw yegenyihw, uwok. <sup>19</sup> Ehudok aih um hatah

yegeshiweruh um hani ehudok um madae hutah yegeshiweruh um uwe ta mare hunek enesh yoweishi inahos, uwok. Aria ehudok aih um mugipesh Iruhin ananin lo um douk yopihi abom heshagrakuk ehudok aih um hatah yegeshiweruh um hani agundok madae hutah yegeshiweruh um uwe. <sup>20</sup> Seiwok sagomatin ipak pape panakumo iri outumeb aria Iruhin nahwarep patogur Kristen um, ipak ta pupe namudok atin abom. <sup>21</sup> O aria ipak pape shakamum kupaishi penekumesh mour meyoh aria Iruhin nahwarep um, ipak aparuh mare yoweruh um enyudok, uwok. Aria ta ipak pupārug anāh yaḥ um putukweshih pupe wosik abom um, ipak wosik ta pugipeshah. <sup>22</sup> Um maresh? Enyudok arpen douk nyape shakamum kupaishi nyenekumesh mour meyoh aria Debeini nahwaren iri, enyen douk anan nakweshihen nyape wosik. Aria enyen douk Debeini ananin atin abom. Aria douk namudok atin, enyudok arpen nyape wosik aria Debeini nahwaren iri, enyen douk nyape shakamum Krais nyenekumem mour meyoh. <sup>23</sup> Iruhin douk neneh yopinyi dedeben atinyi mour um nator ipak nakweshihep um ipakish yoweishi inahos douk showeshikep iri. Douk namudok aria ipak mare pugipesh agundok atapihi aih aria pukutihuk huweshikep pupe shakamum eheh, uwok. <sup>24</sup> O ipak Kristen. Ipak ta puni Iruhin pupe abom aria pupe ipakiyu outumeb sisiguk kabi douk sagomatin ipak pape aria Iruhin nahwarep um.

### *Madae Shunaraum Uwe Iri Armam Armago Esheshin Baraen*

<sup>25</sup> Debeini douk madae nuke enen lo um eshudok arpesh douk wata shunaraum iri uwe, uwok. Aria eik douk Debeini nenek gishaume aria yenek ananin mour wosik aria yakri ikritep enen eik kanak eikim urkum. Eik ta ikritep adurin atin baraen. Douk namudok aria ipak gamo pumnek eikin baraen. <sup>26</sup> Douk abudok nyutob enenyenen amaeen nyape nyatogur. Douk namudok aria eik yakri enyen douk wosik um ipak pupe namudok atin kabi douk papeum. <sup>27</sup> Aria anan arman narao onok armatok jurug um, anan mare wata niyatok, uwok. O ta anan watak nurao onok armatok um uwe, anan mare urkum murum nukri nurao onok shopunek, uwok. <sup>28</sup> Aria ta anan nurao onok armatok nusuwok um, anan douk madae nunek yoweishi inahos uwe, uwok. Aria ta onok armatok douk wata kwape meyoh iri kwukri kwurao anan arman um, okwok douk madae kwunek yoweishi inahos uwe. Aria shanaraum iri arpesh ta shurao sabainyi amaeen agundok atap. Douk namudok aria eik yakri uwok um enyudokmori amaeen nyutogur um ipak, uwok.

<sup>29</sup> O ipak Kristen, baugenyum baraen eik yakriyen iri douk enyudok. Douk nyutob douk banab. Douk namudok aria ipak armam douk pasuhw armago iri ta pupe kabi douk armago wokepari um. <sup>30</sup> Aria shoreh iri ta shupe kabi douk eshesh madae shureh um uwe. Aria shanadudareh iri ta shupe kabi douk eshesh madae shunadudareh um uwe. Aria eshudok douk shanator eshudok eneshenesh iri ta shupe kabi douk eshudok eneshenesh wokesh douk madae esheshish iri uwe. <sup>31</sup> Aria eshudok douk shakwu agundok atapishi eshudok shenek mour iri ta shupe kabi douk esheship urkwip madae pur abom um agundok atapishi eshudok eneshenesh um uwe. Um maresh? Apak madukemesh, agundok atap nani eneshenesh eshudok douk shanaki hurukatin abom um shunak shuwishuk.

<sup>32</sup> Eik yakri uwok um eneshenesh eshudok shunek ipakiruh aparuh yoweruh, uwok. Arman douk madae nurao onok armatok iri uwe, anan urkum apa morum nugipesh Debeini anan urkum aria nunek ananin atin mour. <sup>33</sup> Aria arman douk narao armatok iri, anan urkum apa morum agundok atapishi eshudok eneshenesh. Aria anan nakri nunek

eshudok douk ananik irohukwik kwakriyesh iri um nunegok kwunadudareh. <sup>34</sup> Douk namudok aria ananim urkum puwarom um biyeh. Aria onok armatok douk wata kwurao anan arman iri uwe, okwokwim urkum douk morum kwunek Debeini ananin atin mour. Okwokwim urkum morum kwakri kwukon okwok kanak um Debeini aria kwupe ananik atuk. Aria okwudok douk kworao arman iri, okwokwim urkum apa morum agundok atapishi eshudok eneshenesh. Okwok kwakri kwunek eshudok douk okwokwin raminen nakriyesh iri. <sup>35</sup> Eik douk yowemagu enyudok baraen um yakri itaurumep pupe wosik atin. Eik madae ikriyen um ifupokumep yah uwe, uwok. Eik yakriep enyudok baraen um ipak pupe wosik aria ipakip urkwip mare wata purum enesh kupaishi eshudok eneshenesh. Eik yakri ipak pukon ipak kanak abom um Debeini aria punek ananin atin mour.

<sup>36</sup> Aria shagraeh-uman onok armatok anan arman, aria eshesh biyesh shukri eshesh ta mare shunaraum aria shupe arigaha ruwehesh um, enyen douk wosik. Aria ta anan nunek urkum nukri anan douk nene yoweishi inahos um okwok, aria ta anan mare dodogowin um nusuhw merikwum ananim urkum, aria anan nukri eshesh ta shunaraum, eshesh douk madae shunek yoweishi inahos uwe. Anan ta nugipesh ananim urkum aria eshesh shunaraum. <sup>37</sup> Aria ta anan arman anan kanak nukri uwok abom um nurao shagraehok-uman iri armatok, aria mare enesh arpesh shuraok umanari um nuraok, aria anan nasuhw merik wosik shopunek um ananim urkum um, enyen douk wosik. Anan mare nuraok. <sup>38</sup> Douk namudok aria anudok arman douk nurao ananik armatok douk shagraehok-uman iri um, anan douk nene yopuhi aih. Aria anudok douk madae nurao ananik armatok iri uwe, douk nene yopuhi aih neshagrakuk anudok nrao armatok iri.\*

<sup>39</sup> Aria anan arman nrao onok armatok aria anan wata nupe um, okwudok armatok ta kwupe um anudok atun arman. Aria ta anan nugokuk um, okwok douk madae enesh eshudok shutapok uwe, uwok. Aria kwukri kwurao kupaini um, okwok wosik ta kuran. Aria okwok ta kwurao anan nasuhw Debeini ananin baraen iri. <sup>40</sup> Aria eik kanak yakri namudok. Aria okwok kwupe meyoh akure, okwok ta kwunadudareh kwuriguk kwishagrakuk oudok douk warao arman iri. Aria enyudok baraen douk eik kanak yakriyen. Eik yadukmesh um eik yarao Iruhin ananin Mishin nyapenye aria nyeyabige enyudok baraen.

## 8

### *Warehosish Mahish Douk Shenek Ofamesh Shako Rohwimi Godomi Iri Kristen Mare Shushoh Uwe, Uwok.*

<sup>1</sup> Douk eik yakri ikriep um eshudok mahish douk shashoh shenek ofamesh shako rohwimi godomi douk madae adurimi iri uwe. Ipak pakri, "Apak ihishmorim douk madukemesh iri." Enyudok enyen douk adur, aria enyudokmori saki apa nyakwaram ehudok aih um arpesh shatuk esheshish nyeiguw shato iruhw um. Aria ta apak urkwip punawasham kupaishi arpesh um, ehudok aih ta hutaurum apak muni eshesh hunekap mutogur dodogowip um musuhw Krais ananin baraen mugipeshen um. <sup>2</sup> Enyudok arpen douk nyakri enyen nyadukem eneshenesh eshudok iri, enyen douk madae gamo nyudukemesh uwe. <sup>3</sup> Aria enyudok arpen douk enyenyim urkum manawasham Iruhin iri, enyen douk Iruhin nadukemen wosik um enyen douk ananin.

\* <sup>7:38:</sup> Baraen Grik um lain 36-38 douk madae gamo nyutogur wosik uwe.

<sup>4</sup> Aria enyudok baraen um shawok mahish douk shaesh shenek ofamesh um amudok rohwimi douk madae adurimi godomi iri uwe, eik yakri ikriep namudok. Apak madukemesh, amudok rohwimi douk madae adurimi godomi iri uwe, uwok. Anam douk wehiguhi aboriguh meyoh. Aria anam douk madae sabaimi godomi hupe uwe, uwok. Anan douk atun adurini Iruhin abom nepe. <sup>5-6</sup> Adur, sabaishi eshudok douk arpesh shahwaresh shakri, “god” iri o shakri, “debeimi” iri. Aria ta adur sabaimi amudokmori “godomi” o sabaimi “debeimi” hupe iruhw heven o agundok atap akure, amudokmori bukomuk. Apak douk atun meyoh Iruhin abom nepe. Anan douk apak mahwaran makri Yain iri. Anan douk baugos um ihishmorim eneshenesh eshudok. Aria apak douk mape um mutuk ananin atin nyeigur abom nyuto iruhw. Aria anan atun douk Debeini. Anan douk Jisas Krais. Aria um Jisas ananin nyeigur atin, Iruhin neneh ihishmorim eneshenesh eshudok shani arpesh. Aria um Jisas atun Iruhin norukap yapis aria mape.

<sup>7</sup> Aria enesh arpesh madae shudukemesh uwe. Riguk enesh shape shagipesh amudok madae adurimi godomi iri uwe. Douk namudok aria douk eshesh shawok eshudok mahish douk shenek ofamesh shako rohwimi godomi iri um, eshesh shakri eshudok mahish douk warehosish abom aria eshesh shashoh. Aria numun esheship urkwip por shakri eshesh douk madae shudukemesh aria shenek yoweishi inahos um agundok shawok eshudok mahish um. <sup>8</sup> Aria eshudok worigun ta mare shurap punak hurukatin um Iruhin, uwok. Aria ta apak mukri uwok um muwok eshudokmori worigun um shopunek, Iruhin nutrup um ta mare nukri apak yoweipari, uwok. O aria mishakur um shopunek, Iruhin ta nutrip aria mare nukri apak ta mutogur yopipari mishagrakuk seiwok marik mape um, uwok.

<sup>9</sup> Aria ipak ta gamo wosik pudukemesh. Um maresh? Ta wosik atin ehudok aih um puwok warehosish eshudok worigun um douk ipak pakri wosik um punekeh iri hunek eshudok douk shagipesh Krais aria madae dodogowish iri uwe shunek yoweishi inahos. <sup>10</sup> Nyak nyadukemesh um amudok rohwim douk madae adurimi uwe. Aria nyak nyunak agehw aria nyuwok eshudok warehosish. Aria ta enen arpen douk madae dodogowin um bilip iri uwe nyutrin um, enyen ta nyunekesh mumam? Nyak ta nyuhur enyeniyhw apahw um nyuwok eshudok douk shako warehos iri aka, uwok? Adur atin, enyen ta nyushoh. <sup>11</sup> Douk namudok aria nyak douk nyadukemesh um amudok rohwim douk madae adurimi uwe. Aria nyakin saki ta nyununu enyudok arpen douk madae nyusuhw Krais ananin baraen dodog iri uwe um enyeniybilip. Enyen douk Krais nataurumen iri. <sup>12</sup> Aria abudok nyutob ipak pawok eshudok warehosish obi nyutob, ipak penekesh shenek yoweishi inahos aria pununu esheshin bilip um Krais. Aria ipak penek yoweishi inahos um Krais shopunek. Um maresh? Enesh ipakish ashukenyish owashish esheship urkwip douk madae dodogowip uwe. Aria abudok nyutob eshesh shutik ipak aria shuwok eshudok warehosish um, eshesh douk shenek urkwip shukri eshesh shenek yoweishi inahos um. <sup>13</sup> Douk namudok aria ta worigun aria mahish eik yashoh iri shunek kupainyi Kristen nyunek yoweishi inahos um, kweipon kweipon eik ta mare wata ishoh atin mahish. Ta wosik atin inek enyudok Kristen douk mare dodogowin um bilip iri uwe nyunek yoweishi inahos.

<sup>1</sup> Eik ta enesh eshudok eneshenesh showweshike aka, yape meyoh? Uwok, eik yape meyoh. Aria eik douk anan aposel douk Iruhin nagraehe um inak ikripesh ananin baraeen iri aka, uwok? Eik yatik Jisas douk nape apakin Debeini iri aka, uwok? Eik yenek Debeini ananin mour aria ipak douk patogur Kristen aka, uwok? <sup>2</sup> Aria enesh arpesh shukri eik madae anan aposel um uwe, adur atin ipak ta pukri eik douk anan aposel. Eik douk yanaku yakriep Debeini ananin baraeen aria ipak pasuhwen dodog pagipeshen aria patukur anan. Aria douk um enyudok atin, ihishmorim arpesh shatrip aria shadukemesh shakri eik douk anan aposel.

<sup>3</sup> Aria arpesh sheneke um, eik apa yawanamesh baraeen yakripesh namudok. <sup>4</sup> Yakri, enyen douk wosik um apak aposel murao worigun um mour apak moneken iri aka, uwok? <sup>5</sup> Enyen douk wosik um apak aposel murao Kristeniyu armago aria wuni apak murahaen kabi douk amudok anam aposel hani Debeini ananim owarhim hani Pita sharahaen um aka, uwok? <sup>6</sup> Aria enyen douk wosik um eik ini Barnabas ohwak otuhw upe unek mour um urim utabor, aria kupaimi aposel ipak kanak pupe putaurumam pukom utabor um aka?

<sup>7</sup> Meini arman apa neneck mour soldia aria anan kanak nanator ananish eneshenesh eshudok? Aria omi apa nyau worigun nubarig aria enyen kanak madae nyuwok enesh eshudok worigun uwe? O omi apa nyanak nyeyoh bulmakauhos aria enyen kanak madae nyuwok anaguhw esheshiguhw nyumaghw uwe?

<sup>8</sup> Enyudok eik yagipesh arpeship urkwip atip aria yakri namudok aka? Uwok. Enyudok lo douk seiwok Iruhin nakoguk Moses enyi douk nyakri enyudok atin. <sup>9</sup> Iruhin douk nakrip Moses nowem enyudok lo namudok. Iruhin nakri, “Ipak mare puweshik eshudok bulmakauhos douk shape sheshish shuruwepit wit um shuworish oureh aria esheshig nokwatog, uwok.” Aria Iruhin douk madae urkum murum bulmakauhos atish aria anan nukri namudok uwe, uwok. <sup>10</sup> Anan douk urkum morum apak shopunek aria nakri namudok. Adur baugenyum enyudok baraeen douk nyakrium apak. Enyudok baraeen nyakri namudok. Enyudok arpen nyunek mour um nyuwor amnab iri, nyuni enyudok douk nyaworuk oureh um worigun iri, esheshto shudukemesh um esheshto shurao anagun worigun um douk esheshto shenek mourumagun iri. <sup>11</sup> Aria apak aposel douk namudok atin. Apak maumep yopishi eshudok douk Iruhin ananin Mishin nyekepesh iri um ipakiruh aparuh. Douk namudok aria ta ipak pukop eshudok um putaurum apakiruh yegeshiweruh um, enyen douk wosik aka, uwok? <sup>12</sup> Aria ta ipak pekesh eshudok kupaishi arpesh douk shakriep Iruhin ananin yopinyi baraeen iri um, adur atin, enyen douk wosik abom um pukop ipakish eshudok eneshenesh apak shopunek.

Aria eshudok douk apak wosik ta munatripesh iri, apak mare munatripesh uwe. Seiwok sagomatin apak manaku matogrumpum, aria manaki arigaha douk, apak makri uwok um mutapok yah um Krais ananin yopinyi baraeen nyutogur dodogowin um, uwok. Douk namudok aria apak masah ihinyumorim enenyenen amaen. <sup>13</sup> Ipak padukemesh, amudok armam douk henek mour numun Iruhin ananit debeiti urupat iri apa harao tukwanigun worigun douk sharaesh um shenek ofamesh shako Iruhin iri. Aria amudok henek mour enyudok alta douk shape showem eneshenesh eshudok shenek ofamesh shako Iruhin iri, amam apa harao tukwanish um eshudok. <sup>14</sup> Aria douk namudok atin. Debeini douk neneck enyudok lo nakri namudok. Amudok armam douk hape henek mour um hakripesh ananin yopinyi baraeen iri, eshudok douk shemneken shasuhwen iri ta shukom eneshenesh eshudok um shutaurum amamiruh yegeshiweruh.

<sup>15</sup> Eik douk Iruhin neke big um irao enesh eshudok aria madae irao enesh eshudok eneshenesh uwe. Aria douk shopunek, eik douk madae iwem enyudok baraen um ikri ipak puke enesh eshudok eneshenesh eik uwe, uwok. Eik douk yanadadareh um agundok yenek Iruhin ananin mour yataurumep meyoh aria madae irao enesh eshudok eneshenesh um uwe. Douk namudok aria eik yakri uwok um enen arpen nyutriweik agundok eik yanadudareh aria yatuk eikin nyeigur um enyudok mour eik yeneken meyoh iri um, uwok. Aria enen arpen nyukri nyutriweik agundok yatuk eikin nyeigur um, eik yakri uwok abom. Enyen douk wosik um eik igokuk aria ta meyoh. <sup>16</sup> Aria eik douk madae ituk eikin nyeigur nyuto iruhw um agundok yakripesh Iruhin ananin yopinyi baraen um uwe, uwok. Eik douk yah uwok um iwhesik eikit nokwat um mare inak ikripesh um. Enyen douk Iruhin neshopoke um inak ikripesh ananin yopinyi baraen. Douk namudok aria eik ta inak ikripesh. Aria ta eik mare ikripesh um, anan ta nuke debeinyi amaan. <sup>17</sup> Aria ta eik kanak inek enyudok Iruhin ananin mour akure, eik ta irao enesh yopishi eshudok eneshenesh um enyudok mour. Aria uwok. Enyen douk Iruhin kanak nekeyen aria yeneken. <sup>18</sup> Douk namudok aria eik ta irao maresh um enyudok mour eik yeneken iri? Yopishi eshudok eik iraesh iri douk eshudok. Eik yakripesh Iruhin ananin yopinyi baraen um, eik yakripeshen meyoh. Eik madae ikripesh um shuke eneshenesh eshudok uwe, uwok. Eshudok douk Iruhin nakri wosik um eik iraesh um enyudok mour eik yeneken iri douk madae iraesh uwe.

### *Pol Nape Shakamum Ihishmorim Arpesh Um Nutaurumesh*

<sup>19</sup> Eik douk madae ipe shakamum enen arpen inekumen mour meyoh uwe, uwok. Eik yape wosik. Aria eik kanak yape shakamum ihishmorim arpesh yenekumesh mour um yakri ikwiraeh um irao sabaishi arpesh abom shutanamori shunak um Iruhin. <sup>20</sup> Douk namudok aria eik yani eshesh Juda mape um, eik yatogur kabi anan Juda um. Eik yenekesh namudok um yakri iraouri enesh Juda shutanamori shunak um Iruhin. Aria yani eshudok douk shape shakamum Iruhin ananin lo shagipeshen iri mape um, eik yape kabi douk yape shakamum enyudok lo iri um yakri irao enesh eshudok arpesh shagipeshen enyudok lo iri shutanamori shunakum Iruhin. <sup>21</sup> Aria yani eshudok douk madae shuduken Iruhin iri uwe mape um, eik madae igipesh enyudok lo kabi douk eshesh um uwe. Eik yenekesh namudok um yakri irao enesh eshudok arpesh shutanamori shunak um Iruhin. Aria eik yenekesh namudok um, eik douk madae ikenyuk agab enyudok lo inek yoweishi inahos uwe, uwok. Eik douk yape shakamum Krais ananin lo yagipeshen. <sup>22</sup> Aria yani eshudok douk madae dodogowish um shusuhw Krais ananin baraen dodog shugipeshen iri uwe mape um, eik yape kabi eshesh um yakri inekesh shusuhw Krais ananin baraen dodog shugipeshen. Eik yagipesh ihishmorim arpesh esheshih aih um yakri ikwiraeh ihilmorim yeh um irao enesh shatanam shunak um Iruhin. <sup>23</sup> Eik yenek enyudok ihinyumori mour um yakri sabaishi arpesh shumnek Iruhin ananin yopinyi baraen aria shugipeshen. Aria kweipon, eik ini eshudok arpesh douk shasuhw enyudok yopinyi baraen shagipeshen iri murao yopishi eneshenesh eshudok douk ananin yopinyi baraen nyakriyesh iri.

### *Apak Mahur Dodogowip Atup Um Murao Yopishi Eshudok Eneshenesh*

<sup>24</sup> Ipak padukem enyudok aka, uwok? Arpesh shahur iri douk ihishmorim shahur, aria atin meyoh nyaraao prais. Douk namudok aria ipak ta pahur dodogowip atip um purao enyudok prais. <sup>25</sup> Eshudok ihishmorim arpesh douk shukri shahur shishagrakuk kupaishi iri, ihih nyumneh

eshesh apa shenek debeinyi mour abom um shenek lainum esheshiruh yegeshiweruh. Eshesh douk shenekesh namudok um shurao asudok prais douk ta yowes aria supeimesh banab nyutob meyoh iri. Aria apak douk mahur um murao yopinyi prais douk ta nyupemap um ihih nyumneh iri. <sup>26</sup> Douk namudok aria eik yahur, aria eik madae iyahur meyoh um inak itogur anagun um rohwih yah uwe, uwok. Eikis nabes satak sapeigu mak abom aria yahur dodoxgoiwe atuwe um yakri ishagrakuk ihishmorim arpesh. Aria eik yape kabi anan arman douk neneb boksen iri um. Eik madae iwashak eikish roguhw shanak meyoh uwe, uwok. <sup>27</sup> Eik yabo eikihw yegengiyihw debeg atin um inekohw hwugipesh eikim urkum. Um maresh? Ta wosik atin um eik ikripesh Iruhin ananin yopinyi baraen kupaishi arpesh aria eik kanak ta Debeini nukri uwokume um aria mare irao yopinyi prais.

## 10

### *Ta Yoweishi Aih Hutogrumap Aria Mutu Munek Yoweishi Inahos*

<sup>1</sup> O ipak eikish arpesh, eik yakri ipak ta pudukem enyudok. Seiwoh ihishmorim apakish popehesh yamehesh eshesh Israel shape shakamum ogwudok orug douk gwape gwarik-umesh um yah iri. Aria eshesh shagim amnab shanak shabrig ogwudok debeigwi youg nyeigurig um Owishiborigwi Youg. <sup>2</sup> Eshesh shagipesh Moses aria shawish shanak ogwudok orug gwoshigarish gwani youg aria shagipesh ananin baraen shani anan shasuhw atum urkum. Aria enyen kabi douk shenek baptaisum. <sup>3-4</sup> Aria ihishmorim shawok agundok worigun iri abrudok abar douk Iruhin nekeshesh iri. Abrudok abar douk batograri amudok debeimi utom burbuduk douk Iruhin nekesham aria manamesh shanak iri. Okwudok burbuduk douk Krais. <sup>5</sup> Aria sabaishi eshudok arpesh, Iruhin nakri uwok um esheshih aih aria juwehosin abom nekesh agab aria naesh shagok. Anan naesh shagok aria esheshiruh yegeshiweruh hakus hanakuk agundok wehigunum arpesh uwok um.

<sup>6</sup> Aria eshudok ihishmorim douk shatogurum shakripap yopinyi dodogowinyi baraen apak doukipari um apak mishish mare shikitak um munek yoweishi inahos kabi douk seiwoh eshesh shenekesh um, uwok. <sup>7</sup> Aria eshudok douk shakripap um apak mare munek lotu um amudok madae adurimi god omi uwe kabi douk seiwoh eshesh enesh shagipeshum. Iruhin ananik Buk douk kwakri um eshesh kwakri namudok,

“Eshesh shape shawok worigun abar aria shakitak shape sheyarub aria shenek eneshenesh yoweishi inahos shenek wehrur um.” <sup>8</sup> Aria apak shopunek mare munek yoweishi inahos monek wehrur um kabi douk seiwoh eshesh enesh shenekesh um. Aria atuh nyumnah, sabaishi 23, 000-poreish shagok aria shanak shawishuk abom. <sup>9</sup> Aria apak mare mukwiraeh Debeini kabi douk seiwoh enesh shawkiraahan aria yuguuh hwaesh shagok um. <sup>10</sup> Aria apak mare munumogesh aria munek prukpan um Iruhin kabi douk seiwoh enesh shenekesh um aria enyudok ensel douk nyaboy arpesh shagok iri nyaesh shagok aria shanak shawishuk abom um.

<sup>11</sup> Enyudok ihinyumorim nyatogur um eshesh iri douk nyape kabi enen kak um kupaishi arpesh shutrin aria mare shunek yoweishi inahos. Aria enyudok baraen douk nyakrium ehudok aih aria shopunek douk shenyem nyetem Iruhin ananik Buk. Enyudok baraen shopunek douk shenyem um nyukripap dodogowinyi baraen apak doukipari um gamo mumnek um apak mare mugipesh esheshih yoweishi aih. Apak douk manaki jurug hurukatin um abudok nyutob um ahudok hugiguk iri nyumnah hutogur.

<sup>12</sup> Douk namudok aria enyudok arpen douk nyukri enyen nyeyotu dodog iri, enyen ta gamo nyudukemesh um ta wosik atin enyen nyutu nyunek yoweishi inahos. <sup>13</sup> Ihinyumorim kwiraeh douk nyatogur um ipak iri douk madae enen kupainyi uwe, uwok. Enyudokmori atin kwiraeh shopunek apa nyatogur um ihishmorim arpesh. Aria Iruhin apa nagipeshen wosik ananin adurin atinyi baraen um nakri ta nutaurumep aria ta mare nukutupukuk um enen kwiraeh nyunek uhwin um ipakin dodog, uwok. Abudok nyutob kwiraeh nyutogur-umep obi nyutob, Iruhin ta nutaurumep nunekumep anah yah um pishagrakuk enyudok kwiraeh. Ahudok yah douk namudok. Anan ta nutaurumep nunekep piyotu dodogowip.

### *Apak Munek Lotu Um Yain Iruhin Atun Aria Mare Mugipesher Warehos Shuni Madae Adurimi god Omi Uwe Shopunek*

<sup>14</sup> Douk namudok aria ipak eikish Iruhin ananish arpesh douk eik urkum manawashamep iri. Ipak ta pukomuk agabus aria mare pugipesher amudok madae adurimi god omi uwe. <sup>15</sup> Ipak douk padukemesh iri arpesh. Douk namudok aria ipak putik enyudok eik yenyemagu iri baraen punek skelumen. Aria ipak kanak ta pudukemesh um eikin baraen douk adurin atin. <sup>16</sup> Apak manadudareh um Iruhin um abrudok wainibar abar borap iri kap aria mabarah um, ababar douk benekap mani Krais douk ananibor owhishbor batorumap iri mape atugun aria masuhw atum urkum. Aria apak mawor atudok bret matoh um, atat douk tenekap mani Krais ananihw yegenyihw aria anan douk nagok um nataurumap aria mape atug barag. <sup>17</sup> Aria douk atut bret apak sabaipari matogur atin arpen. Um mares? Apak ihishmorim douk mawok atudok atut bret.

<sup>18</sup> Aria ipak urkwip purum eshesh Israel shenekeh iri aih. Eshudok arpesh douk shawok eshudok mahish aria worigun douk sheshem tebol shenek ofamesh shako Iruhin iri douk shani Iruhin shasuhw atum urkum aria shenek lotuman. <sup>19</sup> Aria eik yakri mumam? Eshudok mahish aria worigun douk shenek ofamesh shako madae adurimi god omi iri uwe iri douk arpesh meyoh shenekam iri douk adurigun worigun o eshudok warehos douk adurishi? Eik yakri namudok aka, uwok? <sup>20</sup> Uwok. Eik douk yakri namudok. Eshudok douk arpesh madae shudukem Iruhin iri uwe shenek ofamesh shako rohwomi god iri, eshudok douk madae shunek ofamesh shuko Iruhin uwe, uwok. Aria eik yakri uwok um ipak puni amudok henek rohw iri pusuhw atum urkum. <sup>21</sup> Ipak madae wosik um punek lotu um Debeini puwok wainibar abar ananin koutukwi iri, aria wata shopunek puwok papudok douk shenek ofamabor shako rohwomi god iri shopunek uwe, uwok. Ipak madae wosik um puni Debeini pupe atug barag atum urkum aria puwok ananigun worigun, aria wata shopunek punak puwok eshudok douk shenek ofamesh shako rohwim iri god omi uwe, uwok. <sup>22</sup> Apak makri munek Debeini juwehosin um apak aka, uwok? O apak douk dodogowip abom meshagrakuk anan aka, uwok?

### *Apak Ta Mupe um Mutuk Iruhin Ananin Atin Nyeigur Nyuto Iruhw*

<sup>23</sup> Enesh shakri namudok, "Enyen douk wosik um munek ihishmorim eneshenesh eshudok." Enyudok enyen douk adur, aria ihishmorim eshudok ta mare shutaur-umap. Aria eshesh shakri, "Enyen douk wosik um munek ihishmorim eneshenesh eshudok." Aria eshudok ta mare shutaurumap shunekap mutogur dodogowip um musuhw Krais ananin baraen dodog mugipeshen um. <sup>24</sup> Aria ipak mare urkwip purum pakri punagabe ipak atip um ipak pupe wosik, uwok. Ipak ta urkwip purum putaurum kupaishi shopunek.

<sup>25</sup> Mahish douk shatorish maket iri, eshudok wosik putorish aria pishoh. Ipak mare punek urkwip aria punasorik um, uwok. <sup>26</sup> Um maresh? Iruhin ananik Buk kwakri, "Agundok atap pani ihishmorim eshudok shani amnab, eshesh douk Debeini ananish atish."

<sup>27</sup> Aria ta enen arpen douk madae nyusuhw Krais ananin bараен iri uwe nyukri nyuhwar-umep um punak puni enen puwok worigun iri mahish, aria ipak mishish shikitak punak um, ipak ta punak. Punak aria eshudok worigun eshesh shunekeshumep iri, eshudok ipak ta pishoh. Ipak mare punek urkwip aria porig, uwok. <sup>28</sup> Aria ta enen arpen nyukripep nyukri, "Eshudok mahish douk shaesh shenek ofamesh um henek rohw iri god omi" iri um, ipak mare pishoh, uwok. Ipak punek urkum um enyudok arpen douk nyakripep iri nyuni eshudok enesh arpesh esheship urkwip. Ta ipak pishoh aria eshesh shugipeshep shishoh aria esheship urkwip pur shukri eshesh shenek yoweishi inahos. <sup>29</sup> Eik douk madae ikri um ipakip urkwip uwe. Eik yakri um enyudok arpen douk nyakripep um eshudok mahish shani worigun iri enyenyim urkum. Aria enen arpen ta nyukri, "Eik yape meyoh. Douk namudok aria enyudok arpen douk enyenyim urkum madae dodogowim iri uwe ta nyuneke aria mare iwok eshudok worigun aria mahish um maresh? Eik ta ishoh. <sup>30</sup> Aria eik inadudareh inek tenkyu um Iruhin um eshudok worigun iri mahish aria ishoh um, kupaishi arpesh douk shenek prukpanume um maresh? Ehudokmori aih eik yakri uwok-umeh."

<sup>31</sup> Douk namudok aria baugeniyum enyudok bараен douk namudok. Aria ipak puwok worigun aria mahish o abar o punek maresh um, ipak ta punekesh um putuk Iruhin ananin atin nyeigur nyuto iruhw. <sup>32</sup> Ipak ta punek urkum um ihishmorim arpesh. Eshesh Juda shuni eshudok douk madae shudukem Iruhin iri uwе, shuni Iruhin ananish arpesh douk shasuhw ananin bараен shagipeshen iri. Eshudok ihishmorim arpesh ipak madae punek anah aih um punek enen um eshesh shunek yoweishi inahos, uwok. <sup>33</sup> Aria eik shopunek douk namudok atin. Eneshenesh eik yenekesh iri, eik apa yenekesh um yakri itaurum ihishmorim arpesh. Eik madae inek urkum um ikri itaurum eik atuwe uwe, uwok. Eik yeneken um yataurum ihishmorim arpesh um Iruhin wata nuraesh shutanamori shupe wosik abom.

## 11

<sup>1</sup> Ipak ta pugipesh eikh aih kabi douk eik yagipesh Krais ananish um.

### *Sheshigor Baragos Shenek Lotu Um*

<sup>2</sup> Ihih nyumneh ipak urkwip porum eik aria pasuhwen dodog pagipesh eikin bараен douk yakripepen iri. Douk namudok aria douk eik yanadudareh-umep aria yatuk ipakish nyeiguhw shato iruhw.

<sup>3</sup> Aria douk eik yakri ipak ta pudukem enyudok bараен um abudok nyutob ipak punak pupe punek lotu obi nyutob. Bараен enyudok. Krais ananin Debeini douk Iruhin. Aria ihm-morim armam amamin Debeini douk Krais, aria armatok okwokwin debeini douk okwokwin arman.

<sup>4</sup> Douk namudok aria ta mein arman nishigor ananig barag aria nunek beten o nukripesh enen bараен douk Iruhin ananin Mishin nyakripan-nyi um, anan douk naunih Krais ananin nyeigur nyabuh. <sup>5</sup> Aria ta meikwi armatok madae kwishigor okwokwig barag aria kwunek beten o kwukripesh enen bараен douk Iruhin ananin Mishin nyakripok-nyi um, okwok douk kwaunih okwokwin arman ananin nyeigur nyabuh. Okwok kwenekesh namudok aria okwok abraen nyapeyok kabi douk kwowhar okwokwig barag um. <sup>6</sup> Aria ta armatok madae kwishigor barag um, okwok

ta kwurupog banag. Aria armago apa abraen nyao um urpok baragos banagos o wohwaragos um. Douk namudok aria owo ta wishigorgos. <sup>7</sup> Aria armam mare hishigor amamigos baragos, uwok. Um maresh? Amam douk heyabigesh um agundok Iruhin dodogowin natrugun abom um. Aria armago douk weyabigesh agundok armam dodogowim hatrugun abom um. <sup>8</sup> Um maresh? Seiwok Iruhin madae nurao anagun um armatokihw yegenyihw aria nunek arman uwe, uwok. Anan narao anagun um armanihw yegenyihw aria nenek armatok. <sup>9</sup> Aria shopunek, Iruhin douk madae urkum murum armatok aria nunek arman um nutaurumok uwe, uwok. Anan urkum morum arman aria nenek armatok um kwutauruman. <sup>10</sup> Douk namudok aria ipak pupe punek lotu obi nyutob, armago ta wishigor baragos. Owo wishigorgos um eshudok Iruhin ananish yopishi enselahos douk shani ipak shape iri shutik aria shukri wosik, owo douk wape shakamum owowim armam.

<sup>11</sup> Apak douk manokrop-umum apakin Debeini aria mape shakamum anan. Aria armatok okwok otuk ta mare kwupe okwok otuk. Aria arman atun um, anan shopunek ta mare nupe anan atun, uwok. Eshesh biyesh arman nutaurum okwok aria armatok kwutaurum anan aria douk shape. <sup>12</sup> Iruhin douk narao anagun um arman ananish yegenyihw aria nenek armatok. Aria douk namudok atin, anan nenek armam aria armago aria armago wobuki armam. Aria Iruhin douk baugos um arpesh shani ihishmorim eneshenesh.

<sup>13</sup> Ipak kanak punenek skelimum enyudok bareaen um ipak kanak. Ahudok aih um armago madae wishigor owowigos baragos aria unek beten um Iruhin um, enyen douk madae yopihi aih uwe. <sup>14</sup> Aria apak arpesh apakin saki douk nyeyabigep namudok. Enyen douk madae wosik um armam amamigos baragos sutogur debegos um uwe, uwok. <sup>15</sup> Aria ta armago owowigos baragos sutogur rougos um, agagos douk seneko watogur watrugun yopuhi. Um maresh? Iruhin anan kanak nako rougos baragos um wishigor owowigos baragos. <sup>16</sup> Aria ta enen arpen nyukri uwok um nyugipesh enyudok bareaen um, enyen ta nyudukemesh um apak douk madae mugipeshuk enen kupaahi aihin uwe, uwok. Apak douk magipesh ehdok atih aih douk ihishmorim Iruhin ananish arpesh shape ihirub sisigirub ihirubmorim warub shagipeshen iri.

### *Eshesh Korin Shawok Debeini Ananigun Worigun Komunio Aria Sh-nunugun*

<sup>17</sup> Douk eik yakri ikritep enen dodogowinyi bareaen. Aria eik ta mare ituk ipakish nyeiguhw shuto iruhw, uwok. Um maresh? Abudok nyutob ipak panak pape penek lotu aria penekiri aih douk madae hataurumep atin uwe, uwok. Eheh apa henekip pape yowep. <sup>18</sup> Sagomatip eik yakri ikriyen iri um enyudok. Abudok nyutob ipak Iruhin ananish arpesh panak pape penek lotu obi nyutob, ipak apa pape um pakri punasiyam atin. Aria eik yemnek bareaen um ipak penekesh namudok um aria yakri douk adur. <sup>19</sup> Adur, ipak ta punasiyam um eshudok arpesh douk shagipesh adurih aih iri ta hunowereh hutogur yopugunum. <sup>20</sup> Douk namudok aria worigun ipak pasuwogun panak abudok nyutob panak penek lotu obi nyutob douk madae Debeini ananigun uwe. <sup>21</sup> Umum maresh? Ipak ihipmorim atin atin apa penekesh arigas pohur ipakigun worigun pagnoh. Ipak madae pishukabar um kupaishi arpesh ba pukesh anagun worigun uwe. Douk namudok aria enesh nyurub baesh shape, aria kupaishi shawok sabaibari wainibar abar aria shagugak. <sup>22</sup> Aria ipak urusag wokek um pupe puwok worigun aria abar um aka? O ipak panabukeshuk arigos Iruhin ananish

arpesh pakri eshesh yoweishi aria ipak madae pukesh anagun worigun eshudok worigun wokeshi uwe aria penekesh abraen? Eik ikripep maren baraan? Aka pakri eik ta ituk ipakash nyeiguhw um ehudok aih ipak penekesh iri? Adur atin enyudok ta uwok.

*Debeini Jisas Nakom Bret Aria Wainibar Abar Ananim Disaipel  
(Matyu 26:26-29; Mak 14:22-25; Luk 22:14-20)*

<sup>23</sup> Enyudok baraan eik yakripenen iri, enyen douk Debeini anan kanak nekeyen iri. Baraen douk enyudok. Abudok wab Judas neyabig Jisas ananim horim um Jisas obi nyutob, Debeini Jisas nohur bret <sup>24</sup> neneh tenkyu um Iruhin aria naworut nakrip ananim disaipel nakri, "Atudok bret douk eikihw yegeniyihw, eik douk yekopohw um itaurumep. Aria meibi nyutob ipak puwok abrudok abar um, ipak ta punekesh um urkwip purum eik. Ipak ta pupe punekesh namudok um urkwip purum eik." <sup>25</sup> Douk amam hatoh heyatat aria anan nohur kap wainibar abar barop iri aria neneh namudok atin aria nakri, "Abrudok abar douk eikin namunyi ddogowinyi baraan kontrak. Eikibor owichibor douk ta butourak um butor ipak aria ta bunek enyudok kontrak nyutogur ddogowin. Aria abudok nyutob ipak puwok abrudok abar um, ipak ta punekesh um urkwip purum eik."

<sup>26</sup> Aria abudok nyutob ipak puwok atudok bret aria puwok abar bor apudok kap iri um, ipak punekesh um piyabiges um agundok Debeini nagok um. Aria ipak pupe punekesh namudok atin arigha punak putogram ahudok nyumnah anan nutanamori ahi.

*Apak Ta Munek Skelium Um Apakip Urkwip Iyoh Aria Kadak Murao  
Debeini Ananigun Worigun*

<sup>27</sup> Douk namudok aria enen arpen enyenyim urkum madae mur wosik uwe aria nyuwok Debeini ananigun worigun, atudok bret tuni abar meyoh um, enyen douk nyenek yoweishi inahos um Debeini ananihw yegeniyihw hwani ananibor owichibor. Aria enyen douk baraan nyapeney um nyenek eshudok yoweishi inahos um. <sup>28</sup> Aria sagomatin, arpen ta nyunek skelimum enyenyim urkum ba iyoh aria kadak nyuwok atudok bret tuni abrudok abar. <sup>29</sup> Um maresh? Enyen ta mare nyudukem baugeneyum baraan um Debeini ananihw yegeniyihw abudok nyutob enyen nyuwok atudok bret tuni abrudok abar obi nyutob um, agundok douk enyen kanak nyenek yoweishi aih aria nyenek kwot um enyen kanak. <sup>30</sup> Aria ipak douk penekesh namudok aria sabaipari madae ddogowipari uwe. Aria sabaipari arugeh hapeyep aria enesh shagok. <sup>31</sup> Aria sagomatin apak munek skelimum apak kanak wosik akure, Debeini ta nunek skelimap aria mare nutik enen baraan nyupenyap, uwok. <sup>32</sup> Aria Debeini nunek skelimum apakih aih aria nugabeyap um, anan douk nenekap namudok um nunekap mutogur yopishi arpesh um kweipon apak mare muni agundok atapishi arpesh munak muwishuk, uwok.

<sup>33</sup> Douk namudok aria ipak eikish arpesh, abudok nyutob ipak punak pupe um puwok Debeini ananigun worigun obi nyutob, ipak ta pishukabar um kupaishi shopunek. <sup>34</sup> Aria enen arpen nyurub ben um, enyen ta nyishoh enyenyit urupat. Aria abudok nyutob ipak punak pupe punek lotu um ipak ta mare punek enesh yoweishi inahos. Aria Debeini nunek skelimep um, anan ta mare nutik enen baraan nyupenyap, uwok.

Aria enen baraan eik douk wata ikripenen iri uwe, eik ta ikripep abudok nyutob eik inaku itogrume obi nyutob.

## 12

### *Yopinyi Presen Iruhin ananin Mishin Nyakopen Iri*

<sup>1</sup> O ipak eikish arpesan. Eik yakri uwok um ipak purpur um enyudok sabainyi yopinyi presen douk Iruhin ananin Mishin nyekopen iri. <sup>2</sup> Ipak padukemesh, seiwok ipak madae pudukem Iruhin obi nyutob uwe, ipakip urkwip douk panadudareh um eshudok warehos douk madae shiyagwreh atin iri uwe. Aria eshesh shenekep panak pagipeshesh. <sup>3</sup> Douk namudok aria eik yakri um ikripep enyudok bareaen. Enyudok arpen douk Iruhin ananin Mishin nyupenyen aria nyunyuhur nyukripen bareaen iri, enyen ta mare nyukri, "Jisas anan douk yoweini," uwok. Aria enyudok arpen douk madae Iruhin ananin Mishin nyupenyen iri uwe ta mare nyukri, "Jisas anan douk Debeini," uwok.

<sup>4</sup> Adur, enyen douk sabainyi sisigin yopinyi presen douk Iruhin ananin Mishin apa nyakopen iri. Aria enyudok ihinyumorim presen douk enyudok atin Iruhin ananin Mishin nyakopen. <sup>5</sup> Aria sabainyi sisigin mour Debeini ananin nyape. Aria ananish arpesan douk shenekep um anan atun. <sup>6</sup> Aria eheh douk sabaihi yeh um apak munek mour um. Aria atun Iruhin meyoh nakop ananin dodog apak ihishmorim ananish arpesan um nunekop dologowip um munek enyudok mour.

<sup>7</sup> Iruhin ananin Mishin apa nyeyabigap enyenyin dodog nyatogur ihishmorim arpesan atin atin um nyutaurum ihishmorim Iruhin ananish arpesan. <sup>8</sup> Enen arpen, Iruhin ananin Mishin nyeken dodog um nyukrip kupaishi arpesan um Iruhin ananin bareaen um nyiyabigesh yopipi urkwip aria shugipeshep. Aria kupainyi arpen, enyudok atin Iruhin ananin Mishin nyeken dodog aria saki um nyukripesha baugennum um Iruhin ananin bareaen um sabaishi arpesan shudukem Iruhin wosik. <sup>9</sup> Aria enen arpen, enyudok atin Iruhin ananin Mishin nyataurumen abom um nyunek bilip um nyunek Iruhin atun neneken iri mour. Aria kupainyi arpen, enyudok atin Iruhin ananin Mishin nyeken dodog um nyunek beten um arugeh haesh iri arpesan aria Iruhin wata nugabeyesh. <sup>10</sup> Aria enen arpen, Iruhin ananin Mishin nyataurumen nyeken dodog um nyunek Iruhin atun neneken iri mour. Aria kupainyi arpen, Iruhin ananin Mishin nyeken dodog um nyutogur profet um nyukripesha Iruhin ananin bareaen douk Iruhin neyabiganen iri. Aria enen arpen, enyen nyeken dodog um nyunek skelimum sabainyi kupainyi bareaen douk arpesan shakripesha iri um eshesh shudukemesh um enyen douk Iruhin ananin bareaen o yoweini Satan ananin. Aria enen arpen, enyen nyeken dodog um nyiyagwreh sabainyi kupainyi bareaen. Aria kupainyi arpen, enyudok atin Iruhin ananin Mishin nyeken dodog um nyuwanam enyudok kupainyi bareaen nyukripesha baugennum um. <sup>11</sup> Aria enyen douk enyudok atin Iruhin ananin Mishin nyenek enyudok ihinyumori mour abom. Enyen nyagipesha enyenyim urkum atum aria nyekesh sisigin yopinyi presen ihishmorim arpesan atin atin. Enesh nyekeshuk enen sik, aria enesh nyekeshuk sik.

### *Apak Ihishmorim Douk Mape Anabik Um Ahwudok Otuhw Yegenyihw Um*

<sup>12</sup> Arpenyihw yegenyihw douk otuhw meyoh. Aria sabaigunum shokushoku-gunum um yegenyihw hwanadran um atugun aria hwonek atin arpen. Aria Krais douk namudok atin. <sup>13</sup> Um maresh? Apak ihishmorim atin Iruhin ananin Mishin nyenek baptaisumap aria nyenekop matogur kabi atin arpen um. Apak Juda mani ipak douk riguk madae pudukem Iruhin iri uwe. Apak mani eshudok douk shape shakamum kupaishi arpesan shenek-umesh mour meyoh iri, mani eshudok douk shape meyoh iri, marao atin Iruhin ananin Mishin nyapenyap.

<sup>14</sup> Apak madukemesh, arpenyihw yegenyihw douk madae anabik atugun nunekohw uwe, uwok. Ohohw douk sabaigunum shoku-shokugun nanadran um atugun aria neneh enen arpen. <sup>15</sup> Aria ta yeriwh hwukri, "Eik douk madae wis uwe, douk namudok aria eik madae ipe anabikihwum um ahwudok yegenyihw uwe." Douk yeriwh ta hwukri namudok, aria ohohw douk madae hwupe anabikihwum um ahwudok yegenyihw. <sup>16</sup> Aria ta arigos sukri, "Eik douk madae nabep uwe, douk namudok aria eik madae ipe anabikihwum um ahwudok yegenyihw uwe." Douk arigos ta sukri namudok, aria agagos douk madae supe anabikihwum um ahwudok yegenyihw. <sup>17</sup> Aria ta ihihwumorim shuknihw yegenyihw hwutogur nabep atup akure, ohohw ta hwumnek baraen mumam? Aria ta ihihwumorim shuknihw yegenyihw hwutogur arigos atugos akure, ohohw ta hwumnih eshudok eneshenesh mumam? <sup>18</sup> Aria arpenyihw yegenyihw douk madae ohohw kanah hwupe namudok uwe, uwok. Ohohw douk seiwok Iruhin nagipesh ananim ürkum aria neneh ihigunmorim shokushokugun um ahwudok yegenyihw naape ahwudok shuknihw yegenyihw. <sup>19</sup> Aria ta ihihwumorim shuknihw yegenyihw douk barag atug o aiyas atugas akure, ahwudok yegenyihw ta hwupe mumam? <sup>20</sup> Aria yegenyihw douk madae hwupe namudok uwe. Ohwohw douk sabaigunum shokushokugun um nape aria neneh otuhw yegenyihw.

<sup>21</sup> Aria nabes ta mare sukrip wis sukri, "Apak makri uwok um ipak. Aria ipak uwok akure, apak atup wosik ta mupe wosik!" Aria bárag ta mare gukip yeriweruh gukri, "Eik yakri uwok um ipak. Aria ipak uwok akure, eik atuwe wosik ta ipe wosik!" Adur atin enyudok ta uwok. <sup>22</sup> Aria agundokiruh um yegeshiweruh douk apak makri araruh madae dodogowiruh iri uwe aria madae hupe akure, yegenyihw ta mare hwupe wosik uwe, uwok. <sup>23</sup> Aria agundokiruh um douk apak makri araruh nyeiguhw wokaruh iri, apak apa meyoharuh wosik atin. Aria agundokiruh um apak apa abraenyip-umaruh iri, apak apa mobeshukaruh aria mushapomaruh. <sup>24</sup> Aria agundokiruh um douk apak madae abraenyip-umaruh iri uwe, apak madae mugabeyaruh aria muyoharuh namudok uwe. Aria Iruhin douk neneh ihigunmorim sabaigunum sisigun um yegenyihw hwanak hwanadran atugun aria hwenek otuhw debeihwi yegenyihw. Aria anabig-iruh um douk nyeiguhw wokaruh, aria anan nakoruh nyeiguhw shato iruh-umoruh. <sup>25</sup> Anan nenehesh namudok um ahwudok shuknihw yegenyihw mare hwunabrig aria hwunasiya um uwe, uwok. Aria agundok sabaiguni sisigun um ahwudok yegenyihw ta hwunagapesh aria hwunagabe um. <sup>26</sup> Douk namudok aria ta anabigihw um yegenyihw hwumnek eriger, ihihwumorim yegenyihw shopunek ta hwumnek eriger. Aria ta anabigihw um hwurao debeinyi nyeigur um, ihihwumorim yegenyihw shopunek ta hwunadudareh.

<sup>27</sup> Douk namudok aria ipak ihipmorim atin atin douk pape kabi anabikihw um Krais ananihw yegenyihw um. <sup>28</sup> Aria Iruhin douk nagraeh ihishmorim ananish arpesh um shunek ananin mour. Sagomatin um douk aposel, Iruhin nagraeham um hanak hukripesh ananish baraen iri. Aria eshesh profet, douk Iruhin neyabigesh baraen shanak shakrip arpesh iri. Aria eshudok douk shenek skulumesh um Iruhin ananish baraen iri. Aria eshudok douk shenek Iruhin atun nape neneken iri mour. Aria eshudok douk shenek beten um arugeh hapeyesh iri aria Iruhin wata nagabeyesh iri. Aria eshudok douk shataurum kupaishi Iruhin ananish arpesh iri. Aria eshudok douk shenek sisigin enenyenem mour um sios iri. Aria eshudok douk sheneyagwreh sabainyi kupainyi baraen iri. <sup>29</sup> Aria ipak

pakri mumam? Ipak pakri amam ihm-morim hutogur aposel omi atum? Aka pakri ihishmorim shutogur profet iri atish? Aka pakri ihishmorim shutogur tisa omi aria shunek skulumesh um Iruhin ananin baraen um shumneken shugipeshen wosik iri atish? Aka ipak pakri ta ihishmorim shunek Iruhin atun nape neneken iri mour? <sup>30</sup> O ipak pakri ta ihishmorim arpesh shurao dodog um shugabe arugeh hapeyesh iri arpesh? O pakri ta ihishmorim arpesh shurao dodog um shiyagwreh sabainyi kupainyi baraen aka? Aka pakri ta ihishmorim shudukemesh um shuanam baugenylum um enyudok sabainyi kupainyi baraen? Adur atin ta uwok. Ihishmorim douk shenek esheshin sisigin mour douk Iruhin nekeshen iri. <sup>31</sup> Aria ipak ihishmorim oub ta bikitak abom um purao sagomatinyin presen douk Iruhin ananin Mishin nyako arpesh-enyi.

### *Apakip Urkwip Ta Punawasham Abom Um Kupaishi Arpesh*

Aria douk eik yakri ikripep um eneh yopihi aih abom douk heshagrakuk ihinyumorim enyudok yopinyi presen iri.

## 13

<sup>1</sup> Aria eik idukemesh um iyagwreh sabainyi kupainyi baraen nyuni enselahos esheshin shopunek, aria eik urkum mare munawasham arpesh um, eikin baraen douk wehinyi. Enyen kabi douk wiruh o nyubrap douk sheneyagwreh meyoh iri um. <sup>2</sup> Aria ta Iruhin ananin Mishin nyuke yopinyi presen um ikripesh Iruhin ananin baraen, kabi amam profet hakripesh um, aria ta eik idukem baugenylum um ihinyumorim Iruhin ananin nyanabeshuk iri baraen, aria irao ihinyumorim Iruhin ananin yopinyi saki shopunek, aria isuhw Iruhin ananin baraen dodog abom igipeshen um inek beten ishopok yodururuh um hutotigos hunak hupe kupaigunum, aria eik urkum madae munawasham kupaishi arpesh um, eik douk madae yopuwe iri uwe inek enesh eshudok um yoweishi eneshenesh, uwok. <sup>3</sup> Aria eik ikesh ihishmorim eikish eneshenesh um eshudok douk yaruhih arpesh iri, aria ikri wosik um kupaishi shusuhwe shishaiweh eik um nyih aria she igok, aria eik urkum madae munawasham kupaishi arpesh um, ihihmorim ehudok eik yenekeh iri aih ta mare hutaurume uwe, uwok.

<sup>4</sup> Enyudok arpen douk enyenyim urkum manawasham kupaishi arpesh iri douk mare juwehosim arigas atin uwe. Aria enyen mare nyuwanamesh atin uwe yoweishi inahos eshesh shenekesh um enyen iri. Enyen apa nyenek yopihi aih um ihishmorim arpesh nyutaurumesh. Aria madae nyunek nyigya atinyum eshudok douk shanagrem sabaishi eshudok eneshenesh iri uwe. Aria madae nyutuk enyenyim nyeigur nyuto iruhw atin uwe. <sup>5</sup> Enyen madae nyubo mishin atin um uwe, aria madae urkum murum enyen atin uwe, uwok. Enyen apa nyape shakammur kupaishi arpesh aria madae juwehosin arigas atin uwe. Aria mare nyusuhw yoweishi aih uwe um kupaishi shenekesh-umen iri uwe, uwok. <sup>6</sup> Aria enyen madae nyunadudareh um yopihi durdurih atih uwe yoweishi aih, uwok. Enyen apa nyanadudareh um yopihi durdurih atih aih. <sup>7</sup> Ihih nyumneh enyen apa nyape um nyenek enyudokmori atin. Enyen yiwah apa hwor wosik aria nyeyotu dodog abudok nyutob amaan nyatogur-umen nyeneken nyemnek eriger obi nyutob. Enyen madae nyiyagwreh rohwin baraen um kupaishi nyukri eshesh shenek yoweishi inahos uwe. Enyen nyakri Iruhin anan kanak ta nutaurumesh aria shunek yopihi aih. Enyen apa nyasuhw Iruhin ananin baraen dodog nyagipeshen aria nyape nyatrugun-umen um nutaurumen nyuni eshudok shenek yoweishi inahos iri shopunek. Aria

enyen apa nyeyotu dodogowin aria nyakri wosik um nyusah ihinyumorim amaen douk ta nyutogur-umen iri.

<sup>8</sup> Aria ehudok yopih iah um urkwip punawasham kupaishi arpesh um ta mare hutuh hunak huwishuk uwe, uwok. Ehudok aih um Iruhin ananin Mishin nyuhur ananish arpesh shunek mourum shukripesch ananin baraeen kabi amam profet hakripesch um ta nyutuh. Enyudok sabainyi yopinyi presen um sheneyagwreh kupakupainyi baraeen um ta nyutuh. Aria ehudok aih um sharao saki um shudukem Iruhin um shopunek ta hutuh.

<sup>9</sup> Um maresh? Douk apak madae gamo mudukem ihinyumorim saki uwe. Apak madukem tukwanin atin. Aria shopunek, abudok nyutob Iruhin ananin Mishin nyohur arpesh shakripesch Iruhin ananin baraeen um, eshesh shakripesch tukwanin atin. <sup>10</sup> Aria kweipon Jisas Krais nutanamori obi nyutob, eshudok douk madukem tukwanish atish iri ta shunak shuwishuk.

<sup>11</sup> Seiwoh eik wata yape kabi shokwinyi batowin um, eik yeyagwreh kabi batowin um. Aria yemnek baraeen o yatik eshudok um, eik yenek urkum-umesh kabi douk shokwinyi batowin um. Aria douk eik yakitak yopuwe aria yakutukuk ehudok shokwisiyeh aih. <sup>12</sup> Douk apak matik eshudok um, apak matrish ruhur atin kabi douk matik aboriguh wenyr um. Aria kweipon ahudok adurih nyumnah hutogur aria apak ta mutrish wosik abom. Aria douk abudok nyutob eik madae idukem ihishmorim eshudok uwe. Aria kweipon ahudok nyumnah, eik ta idukem ihishmorim eneshenesh eshudok abom kabi douk Iruhin nadukem eik wosik abom um.

<sup>13</sup> Aria douk ehudok bihotih aih douk wata hape. Ehudok aih um munek bilip um, hani ehudok um mape matrugun um Jisas Krais nutanamorium, hani ehudok um urkwip punawasham kupaishi arpesh um. Ehudok bihotih aih douk hape. Aria sagomih yopih iah abom douk heshagrakuk ihihmorim iri douk ehudok yopih iah um urkwip punawasham kupaishi um.

## 14

### *Sabainyi Yopinyi Presen Iruhin ananin Mishin Nyakopen Iri*

<sup>1</sup> Ipak ta punek mour dodogowip atip um ipakip urkwip punawasham kupaishi arpesh. Ipak mishish ta shikitak abom um purao ihinyumorim yopinyi presen douk Iruhin ananin Mishin apa nyakopen iri. Aria nyarik iri abom nyeshagrakuk ihinyumorim presen douk ipak ta mishish shikitak abom um puraen iri douk enyudok um Iruhin ananin Mishin nyupuhur nyutaurumep pukripesch ananin baraeen um kabi amam profet hakripesch um. <sup>2</sup> Apak madukemesh, enyudok arpen douk nyeyagwreh kupainyi baraeen douk arpesh madae shudukemen iri uwe, enyen douk madae nyukripesch baraeen enesh arpesh uwe, uwok. Enyen douk nyakrip Iruhin atun. Um maresh? Madae enen arpen nyudukem enyudok baraeen enyen nyeyagwrehan iri uwe. Enyen douk Iruhin ananin Mishin nyenyuhur nyekener ddog aria nyeyagwreh enyudok baraeen douk seiwoh nyanabeshuk nyape iri. <sup>3</sup> Aria enyudok arpen douk Iruhin ananin Mishin nyenyuhur aria nyeyagwreh ipakin baraeen nyakripesch Iruhin ananin baraeen iri, enyen nyakripeschir iri baraeen douk nyutaurum arpesh nyenekesh shasuhw Krais ananin baraeen ddog aria nyogabeimesh esheshiruh aparuh hur wosik aria shenek yopih iah. <sup>4</sup> Enyudok arpen douk nyeyagwreh kupainyi baraeen iri douk nyataurum enyen kanak nyatogur dodogowin. Aria enyudok douk Iruhin ananin Mishin nyenyuhur aria nyeyagwreh ipakin baraeen nyakripesch Iruhin ananin baraeen iri douk nyataurum ihishmorim Iruhin ananish arpesh nyenekesh shatogur dodogowish shasuhw Krais ananin baraeen ddog. <sup>5</sup> Eik yakri wosik um ipak ihishmorim piyagwreh sabainyi

kupainyi bараen. Aria eik yakri abom um ipak purao enyudok yopinyi presen um Iruhin ananin Mishin nyupuhur piyagwreh ipakin bараen aria pukripes Iruhin ananin bараen um. Um maresh? Ta enyudok arpen douk nyeyagwreh kupainyi bараen iri nyiyagwreh um, enen kupainyi arpen ta nyuwanam enyudok bараen nyukripesh um Iruhin ananish arpesh shumneken aria nyutaurumesh shutogur dologowish. Aria ta märe enen arpen nyuwanam enyenyin bараen um, enyenyin bараen ta mare nyutaurum enesh arpesh, uwok. Douk namudok aria enyudok arpen douk Iruhin nenyuhur aria nyeyagwreh ipakin bараen nyakripesh ananin bараen iri nyeneken iri mour douk nyeshagrakuk abom enyudok nyeyagwreh kupainyi bараen iri.

<sup>6</sup> O ipak eikish arpesh, ipak urkwip purum enyudok bараen. Aria eik inaku mи ipak mupe aria iyagwreh kupainyi bараen ikripep Iruhin ananin bараen um, eik ta itaurumep um pusuhw Iruhin ananin bараen dolog putogur dologowip mumam? Aria ta eik inyanam-umep um, enyen douk wosik. Aria ta eik ikri itaurumep um, eik ta ikripep um enen bараen douk Iruhin neyabigeyen iri, o ikripep um enen bараen um purao yopinyi saki o ikripep enen bараen douk Iruhin ananin Mishin nyeyohur nyakripeyenyi o inek skulumepp um enesh namushi eshudok eneshenesh um, eshudok eneshenesh douk wosik.

### *Mukripesh Iruhin Ananin Bараen Um, Apak Ta Mukripesh Apakin Bараen*

<sup>7</sup> Eneshenesh eshudok kabi douk buwaen o gita douk madae gamo shupe shiyagwreh shenek yopinyi gaha abom iri uwe douk namudok atin. Aria arpesh ta mare shubirakesh wosik um, eshesh ta mare shiyagwreh wosik. Aria apak ta mumnekesh aria ta mudukem yopinyi gaha mumam? <sup>8</sup> Aria ta arpen nyihapur oruhw iri mare nyihapuruhw hwiyyagwreh wosik um, amudok henek wanohw iri ta hunek garibog aria hupe hutrugun um hunek wanohw mumam? <sup>9</sup> Aria ipak shopunek douk namudok atin. Ipak pukripes Iruhin ananin bараen um, ipak ta piyagwreh pukripes esheshin bараen douk eshesh shadukemen iri. Aria ipak pukripesh bараen kupainyi um, eshesh ta shadukem baugeniyum ipakin bараen mumam? Ipakin bараen ta nyunakuk atap meyoh. <sup>10</sup> Adur, sabainyi kupainyi bараen nyape agudok atapig nahobig. Aria madae enen rohwin wehinyi bараen nyupe uwe. Ihinyumorim bараen douk baugeniyum bараen nyape. <sup>11</sup> Aria ta eik mare idukem baugeniyum bараen douk kupainyi arpen nyakriyen iri um, enyen ta nyukri eik kupaiburi waburiwe iri. Aria eik shopunek ta ikri enyen douk kupaiburi waburin. <sup>12</sup> Ipak douk oub baktik um pakri purao sabainyi yopinyi presen douk Iruhin ananin Mishin apa nyekopen iri. Douk namudok aria ipak ta punek mour dologowip um purao enyudok presen um putaurum Iruhin ananish arpesh shusuhw ananin bараen dolog shutogur dologowish um.

<sup>13</sup> Douk namudok aria enyudok arpen douk nyeyagwreh kupainyi bараen douk arpesh madae shadukemen iri uwe, enyen ta nyunek beten nyurig Iruhin um nuken saki um nyuwanam enyudok bараen um arpesh shadukemen. <sup>14</sup> Um maresh? Ta eik iyagwreh inek beten kupainyi bараen eik madae idukemen iri uwe um, agundok douk eikin mishin atin nyenek beten. Aria eikim urkum douk mapeik meyoh. <sup>15</sup> Douk namudok aria douk eik ta inekesh mumam? Eik ta inek beten ini eikin mishin nyuni eikim urkum shopunek. Aria eik ta iyarub ini eikin mishin nyuni eikim urkum shopunek. <sup>16-17</sup> Aria ta ipak puni ipakish mishish atish putuk Iruhin ananin nyeigur punek tenkyu uman, aria enen arpen douk madae nyurao enyudok

presen\* um nyudukem enyudok baraen ipak peyagwrehen iri nyuni ipak nyupe um, enyen ta nyumnek ipakin beten aria nyukri adur mumam? Adur, ipak ta punek yopini beten punek tenkyu um Iruhin, aria ipak ta mare putaurum nyuduk arpen douk nyani ipak nyape iri uwe, uwok. Um maresh? Enyen douk madae nyudukem enyudok baraen ipak penek beten peyagwreh-nyyi uwe, uwok.

<sup>18</sup> Eik yenek tenkyu um Iruhin. Um maresh? Eik yeshagrakuk ipak abom um agundok yeyagwreh sabainyi kupainyi baraen um. <sup>19</sup> Aria abudok nyutob yani Iruhin ananish arpesh mape menek lotu obi nyutob, eik yakri ikripesh banenyi<sup>†</sup> baraen douk ta shudukemen iri um itaurumesh. Eik yakri uwok um ikripesh sabainyi 10,000-porein baraen um ikripesh kupainyi baraen uwe, uwok.

<sup>20</sup> O ipak eikish arpesh, ipakip urkwip douk wata pape kabi shokwishi esheship um. Aria douk jurug. Shunek yoweihai aih um, ipak ta pupe kabi shokwishi douk madae dodogowish um shunek yoweishi inahos iri uwe. Aria ipakip urkwip ta putogur kabi yopishi esheshipi um. <sup>21</sup> Enen Iruhin ananir lo douk nyetem ananik Buk iri douk nyakri namudok. Debeini nakri,

“Eik ta iher kupairubi warubish arpesh douk sheneyagwreh kupainyi baraen iri  
um shukripesh eikin baraen eshudok eikish arpesh aria eshesh ta mare shugipeshen uwe, uwok.”

<sup>22</sup> Douk namudok aria apak madukemesh, enyudok presen um piyagwreh sabainyi kupainyi baraen um, enyen douk Iruhin madae nukepen um niyabigep ananin dodog ipak douk pasuhw Krais ananin baraen pagipeshen iri uwe, uwok. Anan douk nekep enyudok presen um nakri niyabigesh ananin dodog eshudok douk madae shunek bilip-uman iri uwe. Aria enyudok presen douk Iruhin ananin Mishin nyekepen um nyupuhur um pukripesh Iruhin ananin baraen um, enyudok Iruhin douk madae nuko eshudok madae shunek bilip-uman iri uwe, uwok. Anan douk nekesh enyudok presen um putaurum eshudok douk shenek bilip um anan iri.

<sup>23</sup> Douk namudok aria ta ihishmorim Iruhin ananish arpesh punak pupe atugun aria ihishmorim pupe piyagwreh sabainyi kupainyi baraen, aria enesh douk madae shusuhw Krais ananin baraen iri uwe shini ipak shupe um, eshesh ta shumnekep aria shukri ipak pogugak iri. <sup>24</sup> Aria ta Iruhin ananin Mishin nyupuhur aria pukripesh Iruhin ananin baraen ipakin baraen, aria ta enen arpen douk madae nyunek bilip iri uwe o enen douk madae gamo nyudukem Iruhin ananin baraen iri uwe nyuni ipak nyupe um, ipak ihishmorim ipakin baraen ta nyiyabigen aria enyen ta nyudukemesh um enyen douk nyenek yoweishi inahos iri. Aria ipakin baraen enyen nyumneken aria ta nyunek kwot-umen. <sup>25</sup> Aria ihinyumorim enyeniyim manabeshuk iri urkum ta munawereh mutogur yopugunum. Aria enyen ta nyubuh nyuduk ohrubus aria enyenig yomag gutik atap aria ta nyutuk Iruhin ananin nyeigur nyuto iruhw. Aria enyen ta nyukripesh yopugunum nyukri, “Adur atin Iruhin nani ipak nape.”

### *Ihinyumorim Mour Apak Munek Lotu Muneken Iri Ta Muneken Wosik*

---

\* **14:16-17:** Baugenym enyudok baraen Grik douk biyen. Enen nyakri arpen madae nyurao enyudok presen um nyudukem enyudok baraen eshesh sheyagwrehen iri uwe. Aria enen nyakri arpen douk wata nyutogur Kristen iri uwe. † **14:19:** Enyudok baraen um Grik douk nyakri 5-porein baraen o 5-porein wod. Aria ta Inglis nyakri 5 words. Aria baugenym enyudok baraen douk nyakri banenyi baraen meyoh.

<sup>26</sup> O ipak eikish arpesh, baugenyum eikin baraen nyakri mumam? Abudok nyutob ipak panak pape penek lotu um ipak apa penek maresh? Ipak douk Iruhin ananin Mishin nyepuhur aria apa penek sisigin mour. Enen nyeyarub, enen nyenek skulumep um Iruhin ananin baraen um pudukemen pugipeshen wosik. Aria enen nyakritep um Iruhin neyabigen iri baraen. Aria enen nyeyagwreh kupainyi baraen, aria enen nyawanam enyudok kupainyi baraen. Aria ipak ta punek enyudok ihinyumorim mour um putaurum Iruhin ananish arpesh shutogur dodogowish um agundok shasuhw Krais ananin baraen shagipeshen um. <sup>27</sup> Aria ta enesh shukri shiyagwreh kupainyi baraen um, biyesh o biyesh atin meyoh ta shiyagwreh. Aria eshesh ta shiyagwreh atin atin. Aria shopunek, kupainyi arpen ta nyuwanam eshesin baraen. <sup>28</sup> Aria ta mare enen arpen nyuwanam-uman baraen iri nyupe agundok um, enyudok arpen douk nyukri nyiyagwreh kupainyi baraen iri ta nyuweshik enyenyit nokwat aria nyupe meyoh. Enyen mare nyiyagwreh abudok nyutob Iruhin ananish arpesh shunatorum shupe um, uwok. Enyen atin ta wosik nyuni Iruhin atun nyiyagwreh. <sup>29</sup> Aria biom o biom atun meyoh armam douk Iruhin ananin Mishin nyumhur um hukripesha ananin baraen iri hukritep baraen. Aria ipak enep pape iri ta pupe punek skelimum enyudok baraen. <sup>30</sup> Aria ta abudok atub nyutob enen arpen nyupe um lotu aria enyen nyumnek Iruhin nukripesha ananin baraen um, enyudok douk nyeyot nyape nyeyagwreh iri ta mokureg aria pumnek enyudok enen nyikitak nyiyagwreh iri. <sup>31</sup> Um maresh? Ipak ihipmorim douk Iruhin ananin Mishin nyepuhur um pukripesha ananin baraen iri ta piyagwreh atin atin. Ipak punekesh namudok um ihishmorim shumneken shudukemen wosik aria shutogur dodogowish. <sup>32</sup> Aria eshudok arpesh douk sharao enyudok yopinyi presen um Iruhin ananin Mishin nyishuhur shukripesha ananin baraen iri ta shiyohen wosik enyudok presen. <sup>33-34</sup> Um maresh? Iruhin douk nakri uwok um apak muneken hwaroh enyudok mour um munek lotu um uwe, uwok. Anan nakri apak muneken wosik aria apakiruh aparuh hur wosik.

Aria ihirub warub, ihishmorim Iruhin ananish arpesh shuntorum shupe um, armago mare ukitak wiyagwreh enen baraen uwe, uwok. Owo ta upe wehigun. Owo mare upe iruhw um armam kabi douk Iruhin nakoguk Moses enyi lo nyakrium. Owo ta upe shakamum amam. <sup>35</sup> Aria ta owo ukri udukem baugenyum enen baraen um, owo ta unak urusag aria kadak uworig owowim armam. Aria ta Iruhin ananish arpesh shuntorum shupe aria onok armatok kwukitak kwiyotu kwiyagwreh um, ehudokmori aih douk abraenhi aih.

<sup>36</sup> Ipak pakri ipak kanak douk baugos abom um Iruhin ananin baraen nyikitak nyanki um aka? O ipak atip parao Iruhin ananin baraen abom aria kupaishi uwok?

<sup>37</sup> Aria enen arpen nyukri enyen Iruhin ananin Mishin nyenyuhur um nyukripesha Iruhin ananin baraen um, o nyukri enyen nyarao enen yopinyi presen douk Iruhin ananin Mishin nyekopen iri um, enyen ta nyudukemesh um enyudok baraen douk eik yenemagu um ipak iri douk Debeini ananin lo. <sup>38</sup> Aria ta enyen nyukri uwok um nyumnek enyudok baraen um, ipak shopunek pukenyuguk agabus enyudok arpen.

<sup>39</sup> Douk namudok aria ipak eikishi arpesh. Ipakish mishish ta shikitak abom um Iruhin ananin Mishin nyupuhur pukripesha ananin baraen. Aria ipak mare punek enen lo um pakri mare piyagwreh kupainyi baraen um uwe, uwok. <sup>40</sup> Aria ipak Iruhin ananish arpesh punak pupe punek lotu um, ipak ta puneken wosik ihinyumorim enyudok lotuin mour um nyutogur yopinyi adurin lotu.

## 15

### *Seiwok Krais Nagok Aria Douk Wata Nakitak Nape*

<sup>1</sup> O ipak eikish arpesh. Eik wata yakri iur ipakip urkwip um enyudok Iruhin ananin yopinyi baraen douk eik yakripepen iri. Ipak douk pasuhwen dodog pagipeshen aria douk peyotu dodogowip um enyudok baraen. <sup>2</sup> Aria enyen douk um enyudok baraen atin, ta ipak pusuwen dodog um, Iruhin douk naraep patanamori pape wosik. Aria ta uwok um, ipak douk penek bilipumen meyoh.

<sup>3</sup> Nyarik iri baraen douk nyeshagrakuk ihinyumorim baraen douk riguk eik yarik yaraen iri, enyudok eik douk yakripepen. Enyen douk enyudok. Krais nagok um nukweshihap um apakish yoweishi inahos kabi douk baraen nyetem. Iruhin ananik Buk iri nyakrium. <sup>4</sup> Aria sharuman nor wonugwehw biyeh nyumneh aria hakri um biyeh atih nyumneh um, anan wata nikitak nape kabi douk Iruhin ananin baraen nyakrium. <sup>5</sup> Aria anan narik natogurum Pita, aria kadak nagiguk natogurum ananim 12-poreim aposel. <sup>6</sup> Aria enyudok nyanakuk aria atub nyutob meyoh, anan natogurum sabaishi shagipesh anan iri. Eshesh douk sabaishi abom sheshagrakuk 500-poreish. Eshudok shatrun iri, sabaishi douk wata shape, aria enesh douk shagok. <sup>7</sup> Aria enyudok nyanakuk aria anan wata natogurum Jems, aria wata shopunek natogurum ihm-morim aposel hatrun. <sup>8</sup> Douk natogurmash neyatesh aria eik natogrume aria yagiguk yatrur. Eik douk kabi enen batowin douk amakek kweyobuki yowewe iri.\*

<sup>9</sup> Eik douk nyeigur woke yape shakamum ihm-morim aposel. Aria eik douk madae wosik um arpesh shuhware aposel uwe. Um maresh? Seiwok eik yape yabo Iruhin ananish arpesh yanunish. <sup>10</sup> Aria Iruhin kanak nataurume meyoh aria neneke yatogur yopuni iri arman kabi douk yapeum. Aria agundok um anan nataurume meyoh um douk madae nunakuk atap meyoh uwe, uwok. Eik yenek mour dodogoive atuwe yeshagrakuk ihm-morim amudok anam aposel. Aria enyudok mour enyen douk madae eik kanak ineken uwe, uwok. Enyen douk Iruhin neneke gihaume aria neke ananin dodog aria yeneken. <sup>11</sup> Douk namudok aria enyudokmori baraen um apak makri eik yeneken o amam heneken um, enyudokmori bukencyuk. Apak ihm-morim aposel douk makripesh enyudok atin baraen um shabo Krais nagok sharuman aria wata nikitak napeum. Aria eshesh shemneken aria ipak shopunek pemneken aria pasuhwen dodog pagipeshen.

### *Shagok Iri Arpesh Ta Wata Shukitaki*

<sup>12</sup> Ihih nyumneh apak mape um makripesh baraen um Krais nagok aria Iruhin wata nonohur nikitak napeum. Aria ipak enep apa pakri shagok iri ta mare wata shukitaki? Adur atin eshesh ta wata shukitaki. <sup>13</sup> Aria ta adur shagok iri ta mare wata shukitaki um, Krais shopunek douk Iruhin mare nunohur nikitak nupe uwe. <sup>14</sup> Aria ta adur Iruhin madae nuhur Krais nikitak nupeum uwe, enyudok baraen douk apak mape makripeshen iri douk rohwin baraen meyoh. Aria ipakin bilip um Krais shopunek douk rohwin. <sup>15</sup> Aria douk namudok um, douk apak matogur kabi armam douk henek rohw hakripesh Iruhin ananin baraen iri um. Um maresh? Apak makri Iruhin wata nohur Krais nikitak nape. Aria ta adur kweipon Iruhin ta mare nuhur shagok iri shukitak shupe um, Iruhin douk madae nuhur

---

\* **15:8:** Pol neneke urkum um ananish yoweishi aih douk anan narik nenekeh iri aria douk nikitak nape. Aria enyen douk madae nikitak nape. Aria ta adur kweipon Iruhin ta mare nuhur shagok iri shukitak shupe um, Iruhin douk madae nuhur

Krais nukitak nupe uwe. <sup>16</sup> Adur, ipak enep pakri Iruhin ta mare nuhur shagok iri shukitak shupe, uwok. Aria ta enyudok ipakin baraen douk adurin um, Krais shopunek, Iruhin douk madae nunohur nukitak nupe uwe. <sup>17</sup> Aria ta adur Iruhin madae nuhur Krais nukitak nupe um uwe, ipakin bilip um Krais nukitak naapeum douk madae adurin uwe. Aria enyen ta mare nyutaurumep, uwok. Aria douk ipak douk wata pape um penek yoweishi inahos atin douk showeshikep dodog iri. <sup>18</sup> Aria eshudok arpesh douk shasuhw Krais ananin baraen shagipeshen aria shagok iri, esheshe shopunek douk shagok shanak shawishuk abom. <sup>19</sup> Aria apak douk madukemesh abom um Krais nape iruhw heven aria mape matrugun manak um nutaurumap. Aria mukri ta nutaurumap douk abudok atub nyutob douk mape agundok atap um, apak douk shunek giga-umap abom. Enyen douk wosik um shenek gigaumesh atin ihishmorim eshudok enesh arpesh. Aria apak, esheshe ta shenek gigaumap abom shuriguk.

<sup>20</sup> Aria enyen douk madae namudok uwe, uwok. Krais douk nagok aria adur atin Iruhin wata nonohur nukitak nape. Aria anan douk riguk narik abom nukitak nape kabi douk narik iri worigun jurugigun nape nubarigos iri um. Douk namudok aria apak madukemesh um shagok iri ta wata shukitak shupeum. <sup>21</sup> Atun arag arman meyoh nakwarmori gok. Aria wata namudok atin, atun arag meyoh kupaini arman nakwarmori ehudok aih um shagok iri watak shukitaki shupe um. <sup>22</sup> Enyudok douk namudok. Ihishmorim arpesh douk shakitak Adam ananip awirop iri apa shagok. Aria namudok atin, ihishmorim arpesh douk shantoruh Krais iri, kweipon Iruhin ta wata nishuhur shukitak shupe aria mare wata shugok atin. <sup>23</sup> Aria apak ihishmorim atin atin mape matrugun um apakib nyutob sisiguk. Sagomatinyin narik iri arman douk Krais. Anan douk nape kabi narik iri worigun jurugigun nape nubarig iri um. Aria kweipon ahudok nyumnah anan nutanamori ahi, apak ihishmorim ananish arpesh ta wata mukitaki aria mupe. <sup>24</sup> Douk enyudok nyunakuk aria hugiguk iri abom nyumneh ta hutogur. Aria abudok nyutob Krais ta nubouk ihinyumorim enenyenen gavman douk nyasuhw merik um iruhw atap iri nyubuhuk. Aria anan atun ta nurao debeini nyeigur. Aria anan ta dodogowin abom aria nupe debeini king um ihishmorim dodogowishi eshudok sagabehos aria nuraesh shuni ananin debeini nyeigur shunak um ananin Yain Iruhin. <sup>25</sup> Um maresh? Krais ta nupe debeini king arigaha Iruhin nugaeh ihishmorim ananish horim shubuh shupe shakamum Krais atun. <sup>26</sup> Aria Iruhin ta niyatukuk ihishmorim eshudok enesh horim iyoh aria nugguk iri horin ta anan niyattonuk iri douk gok. <sup>27</sup> Um maresh? Seiwoh Iruhin nakri namudok, "Kweipon eik ta inek ihishmorim eshudok eneshenesh shuni arpesh shopunek shupe shakamum anan atun." Aria enyudok baraen douk nyakri Iruhin nenek "ihishmorim eshudok eneshenesh" shape shakamum Krais. Aria baugeneyun enyudok baraen douk madae nyukri Iruhin douk nenek ihishmorim eshudok eneshenesh shape shakamum Krais iri, aria Iruhin shopunek nape shakamum Krais uwe, uwok. <sup>28</sup> Aria Iruhin ta nunekesh shupe shakamum Krais ba iyoh aria ananin Nuganin anan kanak ta wata nupe shakamum Iruhin douk sagomatian narik nenek ihishmorim eshudok eneshenesh shape shakamum Krais iri. Iruhin douk nunekesh namudok um anan atun nupe debeini um ihishmorim eshudok eneshenesh shuni arpesh.

<sup>29</sup> Aria ta adur shagok iri ta mare wata shukitak um, kupaishi arpesh douk shape sharao shagok iri esheshiyu outumeb aria shenek baptaisumesh um maresh? Aria adur shagok iri ta mare wata shukitaki um, arpesh douk shenek baptaisumesh um shutaurum shagok iri um maresh? <sup>30</sup> Aria

mumam mumam um apak? Sabaishi arpesh shahap aria shakri shop um enyudok Krais ananin mour. Aria douk ta shagok iri ta mare wata shukitaki um, apak douk mape munek enyudok mour um maresh? <sup>31</sup> O ipak eikish arpesh. Eik yanadudareh-umep abom um agundok apak matukur apakin Debeini Krais Jisas um. Douk namudok aria eik yakri ikripep enyudok baraen namudok. Adur atin, iih nyumneh eik yape kabi douk yagok iri um. <sup>32</sup> Aria ipak pakri eik yagipesh arpeshim urkum atin aria douk yenek enyudok mour um, eik yakri ipak pukripe. Eik yape Efesus um, eik urkum morum irao maresh eshudok yopishi eneshenesh aria douk yani wanohwishi arpesh abom kabi douk wanarish mahish um marpak? Aria adur shagok iri ta mare wata shukitaki um, “Apak muwok debeguni worigun nini abar. Um maresh? Nuhut apak ta mugok munak muwishuk” kabi douk enesh arpesh shakri um.

<sup>33</sup> Ipak mare pugipesh enesh arpesh shunek rohwumep iri, uwok. Enen baraen douk nyakri namudok,

“Aria apak muni shenek yoweishi inahos iri arpesh munoprom um, eshesh ta shubouk apakah yopihi aih hubuhuk.”

<sup>34</sup> Ipak ta pukutukuk rohwih aih aria ipakip urkwip pur wosik atin. Aria pukutukuk yoweihai aih ipak pape penekih iri. Eik yakri inekep abraen nyuopeyep um enyudok baraen. Baraen douk enyudok. Ipak enep douk madae pudukem Iruhin uwe.

### *Hagok Iri Yegeshiweruh Hukitakumori Ta Hupe Anahaeh*

<sup>35</sup> Enen arpen ta nyirig nyukri, “Kweipon shagok iri arpesh ta shukitaki mumam? Eshesh ta shukitaki aria shurao maroruh yegeshiweruh?”

<sup>36</sup> Enyudok nyarig namudok iri douk nyogugak iri. Apak madukemesh, ta shuruwepit wit o marep kupaipi shurkwip ta mare pugok aria putar aria epep ta mare pupurep pukih. <sup>37</sup> Eshudok douk apak mawesh iri douk madae mu eshudok douk ta nuhutih ta shutogur iri uwe, kabi douk shus aria nyeiguhw um, uwok. Apak mau shurkwip meyoh. Anep witip shurkwip o kupaipi worigunip. <sup>38</sup> Aria Iruhin anan kanak nenekep patogur aria nekep shus aria nyeiguhw kabi anan nakri um. Ihipmorim sabaipari sisigip yomogip shurkwip Iruhin douk nekep sisigis yomogis shus sani nyeiguhw. <sup>39</sup> Ihihmrorm yegeshiweruh douk madae hupe atug yomag uwe, uwok. Arpesh anaruh sikiruh yegeshiweruh, burguhw anaruh sikiruh, armighuh anaruh sikiruh, aria eiguhw anaruh sikiruh. <sup>40</sup> Aria shape iruhw heven iri eshudok douk shape iruhw, aria shape agundok atap iri douk shape atap. Aria shape iruhw iri esheshiruh hatrugun-ruhi yegeshiweruh douk anaruh sikiruh. Aria shape atap iri esheshiruh anaruh sikiruh. <sup>41</sup> Nyumnahin aun douk natruguni anahaeh, aria wabin natruguni anahaeh. Aria unib watruguni anahaeh. Aria owo atuk atin shopunek douk watruguni anahaeh.

<sup>42</sup> Aria shagok iri arpesh shukitaki um douk ta namudok atin. Arhudok yegeshiweruh douk marumoruh iri arhudok ta hutarukuk. Aria arhudok douk ta wata hukitaki iri ta mare wata yoweruh aria hutar uwe, uwok. Araruh ta yopuruh aria hupe um hupe iih nyumneh. <sup>43</sup> Arhudok yegeshiweruh apak marumoruh iri apa yoweruh aria hatar. Aria arpesh madae shanadudareh-umoruh uwe. Aria yegeshiweruh douk ta wata hukitaki iri, araruh ta yopuruh aria hutrugun abom. Aria yegeshiweruh apak marumoruh iri douk madae dodogowiruh uwe. Aria yegeshiweruh douk ta wata hukitaki iri ta dodogowiruh abom. <sup>44</sup> Ahwudok yegeniyihw apak marumohw iri, oholw douk agundok atapihw. Aria ahwudok douk ta wata hwukitaki iri, oholw douk Iruhin ananin Mishin nyapenyohw iri. Araruh

douk bioruh yegeshiweruh hape. Onohw agundok atapihw, aria onohw Iruhin ananin Mishin nyapenyohw iri. <sup>45</sup> Aria baraen nyetem Iruhin ananik Buk iri shopunek douk nyakri namudok, "Sagomatinyin narik iri arman Adam douk natogur arpen mishin nyapenyen iri." Aria nagiguk natograri iri Adam douk nikitaki wonugwehw aria natogur yopunyi Mishin douk arpesh sharaen aria nyenekesh shape wosik iihh nyumneh iri. <sup>46</sup> Aria araruh douk madae hunaki iruhw heven iri yegeshiweruh hurik hutogur uwe, uwok. Araruh douk agundok atapiruh harik hatogur hape. Aria arhudok hanaki iruhw heven iri douk hagiguk hatogur. <sup>47</sup> Narik iri arman, Iruhin douk nohur amnab nakwnishab nenekan natogur arpen aria nape. Aria nagiguk iri arman douk nanaki iruhw heven iri. <sup>48</sup> Agundok atapish iri arpesh douk shape kabi nanudok arman douk Iruhin nakwu amnab nenekan iri. Aria shanaki iruhw heven iri, eshesh shape kabi anudok arman douk nanaki iruhw heven iri. <sup>49</sup> Douk apak mape kabi douk agundok atapini arman um. Aria kweipon shopunek ta namudok atin, apak ta mupe kabi douk anudok douk nunaki iruhw heven iri um.

<sup>50</sup> O ipak ekish arpesh, eik yakri abom um ikripep enyudok baraen goruren um ipak. Agundok atapishi arpesh ta mare shunak shupe agundok douk Iruhin ta nupe Debeini um ananish arpesh shupeum uwe, uwok. Agundok atapishi arpesh douk ta shugok aria shutar aria ta mare shugrem yopishi eshudok eneshenesh douk ta shupe um shupe aria mare yowesh atish iri. <sup>51</sup> Ipak mnek, eik yakri iwerehen ikripep enen baraen douk seiwok nyanabeshuk nyape iri. Baraen enyudok. Apak ihishmorim Iruhin ananish arpesh douk wata mape iri ta mare mugok uwe, uwok. Aria Iruhin ta nunekap mutogur anahaeh. <sup>52</sup> Enyudok ta nyutogur ahudok atuh kabi douk nabes senek brebre um. Enyen ta nyutogur abudok nyutob douk ta hwugiguk iri oruhw hwiaygwreh um. Oruhw ta hwiaygwreh aria shagok iri arpesh ta wata shukitaki aria ta mare wata shugok atin. Aria apak douk wata mape agundok atap iri, Iruhin ta nunekop mutogur anahaeh. <sup>53</sup> Um maresh? Aruhudok apakiruh yegeshiweruh douk apa yoweruh hatar iri ta hutanam hutogur anahaeh um hupe wosik iihh nyumneh. Aria apak arpesh apa magok iri ta mutanam mutogur anahaeh um mare wata mugok atin uwe, uwok. Apak ta mupe wosik abom iihh nyumneh. <sup>54</sup> Aria abudok nyutob apak ta mutogur anahaeh. Aria enyudok ta nyunek enyudok baraen nyetem Iruhin ananik Buk iri nyutogur adurin atin. Baraen douk nyakri namudok,

"Iruhin nabouk agundok arpesh shagok abom um nyabuhuk aria nenek uhwinyum gok."

<sup>55</sup> "Gok, nyakin dodog aria burawog um nyubo arpesh shugok um douk enyum?"

<sup>56</sup> Nyakig burawog douk eneshenesh yoweishi inahos. Aria Iruhin ananin lo douk nyeken dodog eneshenesh yoweishi inahos. <sup>57</sup> Aria apak ta munek tenkyu um Iruhin. Um maresh? Anan nenekap matogur dodegowlip aria mabo yoweishi inahos shabuhuk um apakin Debeini Jisas Krais ananin debeiniyi dodog atin.

<sup>58</sup> Douk namudok aria ipak ekish arpesh douk eik urkum manawashamep iri. Ipak ta piyotu dodogowlip. Ipak mare punogugur aria punehigos putanam uwe, uwok. Ipak ta piyotu dodogowlip aria pupe um punek Debeini ananin atin mour. Um maresh, ipak padukemesh, enyudok mour ipak peneken um putuk Debeini ananin nyeigur nyuto iruhw um ta mare punek nyunakuk meyoh. Enyen ta nyukwarmori sabaishi yopishi eshudok eneshenesh iri.

## 16

### *Utabor Um Shutaurum Iruhin Ananish Arpesh Um*

<sup>1</sup> Douk eik yakri ikripep um abrudok utabor douk ipak pape patarumabor um pakri puko Iruhin ananish arpesh shape Jerusalem iri um. Eik yarik yeaybig ahudok yah um ihishmorim Iruhin ananish arpesh shape ihirubmorim warub um shokugi nahobig Galesia iri. Aria douk eik yakri ipak shopunek ta pugipesh eshesh. <sup>2</sup> Eik yakrip eshesh shape Galesia iri enyudok atin baraen douk ta ikrip ipak um. Baraen douk enyudok. Ihihmorim Sandeih nyumneh, ipak ihishmorim atin atin ta pusiya abrudok utabor ipak parabor agudok ganakuk iri wik aria pubukuk anabor bukusuk sik um ipakig urusag. Aria purao debeibori um, ipak pubukuk debeibori, o purao karowibor um, pubukuk karowibor. Ipak punekesh namudok um abudok nyutob eik inakmagu, ipak ta mour uwok um purim utabor um pukesh-abor um. <sup>3</sup> Aria eik yakri ipak pugraeh anam armam um hurao ipakibor utabor hunak um Jerusalem iri shopunek hupe. Aria meihi nyumnah eik itogragu, aria ta inek anap shup um eshesh shape Jerusalem iri um ikripes um amam aria ikomap husuwap hunak. <sup>4</sup> Aria ta wosik um eik shopunek inakumagu, amam ta huni eik munakugu.

### *Pol Nakri Nunak Nutik Iruhin Ananish Arpesh Shape Korin Iri*

<sup>5</sup> Eik ta inaku itrip, aria sagomatin eik ta irik inaku itiguk eshesh shape shokugi nahobig Masedonia iri ba iyoh, aria ta kadak inaku itik ipak. Um maresh? Eik ta iwish inaku namudok Masedonia um. <sup>6</sup> Aria eik madae idukemesh uwe. Eik ta inaku ini ipak mupe roubum o eneh karowih nyumneh, o ini ipak mupe arigaha abudok yoweibi nyutob douk ta eshah atuh hur obi nyutob bunak butuhuk. Aria eik wata ikri inak meiburi kupaiburi wabur um, ipak wosik putaurume um eshudok eneshenesh aria eik inak. <sup>7</sup> Eik yakri uwok um itripukuk meyoh aria inak uwe, uwok. Eik yakri ta Debeini nukri wosik um, eik yakri ini ipak mupe karowihi um roubi nyutob shopunek. <sup>8</sup> Aria eik yakri ipe agundok Efesus arigaha ahudok nyumnah shunek agundok debeguni worigun shahwarogun um Pentikos iri hotogur. <sup>9</sup> Um maresh? Iruhin nenekume yopihi yah hapeime um inek yopinyi mour um itaurum sabaishi arpesh ikripes ananin baraen aria shatanam shukon aparuh anan. Aria sabaishi shopunek shakwiraeh eik um shakri sheneke um eik mare inek enyudok mour.

<sup>10</sup> Aria ta Timoti nunaku nutogur-umep nukripep um, ipak ta punek ananihw apahw hwur wosik. Um maresh? Anan douk nenen Debeini ananin mour kabi douk eik yape yeneken um. <sup>11</sup> Mare putrun aria pukri anan douk anan rohwini arman aria pukanaguk agabus uwe, uwok. Ipak punekan ananihw apahw hwur wosik aria putauruman pukon enesh eshudok eneshenesh aria peshopokan nutanam nunaki um eik. Eik douk yape yatrugun um anan nani anam Iruhin ananim armam shopunek.

<sup>12</sup> Douk eik yakri ikripep um apakin ashuken Apolos. Eik yeshopokan um nunigu amudok Iruhin ananim armam douk hanaku hatrip iri um hunaku. Aria anan nakri uwok um nunaku ahudok nyumnah. Aria meihi nyumnah anan kanak nutik anah yopihi yah um nunakumagu, anan ta nunaku.

### *Enen Shopunek Nyagiguk Iri Baraen*

<sup>13</sup> Ipak ta gamo putaurum ipakish horik horin aria gamo pusuhw Krais ananin baraen dodog pugipeshen wosik. Ipak mare pupe urkum mushukepuk uwe, uwok. Ipak ta piyotu dodogowip aria mare punogugur um enesh eshudok eneshenesh. <sup>14</sup> Ipak punek eneshenesh eshudok um, ipakip urkwip ta punawasham Iruhin ninì arpesh aria punekesh.

<sup>15-16</sup> Aria ipak padukemesh um Stefanas nani ananip awirop douk shape shokugi nahobig Akaia iri. Eshesh douk sagomatin um shatogur Kristen iri. Aria kupaishi arpesh shape shokugi nahobig Akaia iri shagiguk shatogur Kristen. Ihih nyumneh Stefanas nani ananish shapeum shenek enyudok mour um shutaurum Iruhin ananish arpesh. Aria ipak eikishi arpesh, eik yakri ikripep dodogoowe atuwe um ipak pupe shakamum amudokmori armam huni ihishmorim arpesh douk shataurumam shape shenek enyudok mour iri. <sup>17</sup> Eik douk yanadudareh um agundok Stefanas nani Fortunatus iri Akaikus hanaki um. Um mares? Ipak douk madae punaki putiwe uwe. Aria douk madae punaki putiwe um, aria douk amam hanaki hatiwe aria hutaurume. <sup>18</sup> Aria amam hanaki aria henek eik yani ipak manadudareh aria apakiruh aparuh hor wosik. Douk namudok aria ipak ta punadudareh um amudokmori armam aria putuk amamish nyeiguhw shuto iruhw.

<sup>19</sup> Iruhin ananish arpesh shape sabairubi shokurubi warub douk bape shokugi nahobig Esia iri shenek-umep yopihi nyumneh ipak. Aria Akwila aria Prisila shani Iruhin ananish arpesh douk apa shape shenek lotu esheshit urupat iri shopunek shenekumep yopihi nyumneh Debeini ananin nyeigur. <sup>20</sup> Ihishmorim Kristen shape agundok iri shenekumep yopihi nyumneh ipak. Aria ipak ta pugipesh apak Iruhin ananish arpesh apakih aih aria punapuprik ipakish Iruhin ananish arpesh.

<sup>21</sup> Douk eik kanak Pol eikis wis yowemagu enyudok atin banenyi baraen namudok. “Eik yenekumep yopuhi nyumnah ipak.”

<sup>22</sup> Aria enen arpen nyukri uwok um urkum munawasham Debeini um, eik yakri Iruhin nen nyugok.

Aria eik yakri Debeini, nyak nyunaki. <sup>23</sup> Eik yakri Debeini Jisas nutaurumep meyoh.

<sup>24</sup> Eik urkum manawasham ipak ihipmorim douk pani eik matukur Krais Jisas iri.

# Pagiguk Iri Shup Douk Pol Nenekap Panam

## Eshesh Korin Iri

### Banenyi Baraen Pol Nagiguk Neneken Nyanak

### Um Eshesh Korin Iri

1:1-11 Pol neneke beten um eshesh Korin aria neneke tenkyu um Iruhin um eshesh

1:12-7:16 Pol nakripesha baraen um apak Kristen munekeh iri aih hani sabainyi amaen apak ta minyusah iri

8:1-9:15 Baraen um utabor eshesh shaborubuk um shuko eshudok yaruhih Kristen iri um

10:1-12:21 Pol nakripesha baraen um ananah aih hani amaen douk naraen um neneke Krais ananin mour um. Nakri Krais atun natauruman meyoh nenekan ddogowin.

13:1-10 Eshesh Korin ta shunek skelum eshesh kanak um eshesh shenek bilip wosik atin um Krais o uwok.

13:11-14 Pol nakripesha ananin nyatuh iri baraen aria neneke yopuhi nyumnah

<sup>1</sup> Eik Pol, anan Krais Jisas ananin aposel. Iruhin anan meyoh nakri aria nagraehe um enyudok mour aposel um inak ikripesha ananin baraen. Eik yani apakin wanin Timoti weneku apudok shup um ipak Iruhin ananishi arpesha douk pape wabur Korin iri. Wenekap-umogu ipak pani ihish Iruhin ananish arpesha douk shape ihirub warub um agudok shokugi nahobig Akaia iri. <sup>2</sup> Ohwak wakri apakin Yain Iruhin nini Debeini Jisas Krais hutaurumep meyoh aria hunek ipakiruh aparuh hur wosik.

#### *Pol Neneke Tenkyu Um Iruhin Um Agundok Natauruman Nagabe Ananin Mishin Um*

<sup>3</sup> Apak ta mutuk apakin Yain Iruhin ananin nyeigur nyuto iruhw. Anan douk apakin Debeini Jisas Krais ananin Iruhin aria ananin Yain shopunek. Aria anan douk baugos abom um agundok shenek gihaum kupaishi aria shataurumesh meyoh um. Anudok Iruhin apa nagabe eshudok arpesha douk amaen nyatogrumesh aria esheshiruh aparuh apa hor wosik.

<sup>4</sup> Ihinyumori amaen nyatogur um apak iri, anan apa nataurumap nagabe apakish mishish aria apakiruh aparuh hor wosik. Nataurumap namudok um apak wosik abom um mutaurum eshudok arpesha douk enenyenemamaen nyatogrumesh iri aria esheshiruh aparuh hur wosik. Apak mutaurumesh kabi Iruhin narik nataurum apak um. <sup>5</sup> Debeiri eriger riguk Krais nemnekar iri, apak shopunek ta memnekar. Aria namudok atin. Krais douk nataurumap nagabe apakish mishish aria neneke apakiruh aparuh abom hor wosik. <sup>6</sup> Abudok nyutob amaen nyatogrum apak menyusah obi nyutob, enyudok douk nyatogrum Iruhin wata narao ipak patanamori aria ipakiruh aparuh hor wosik. Iruhin neneke apakiruh aparuh hor wosik aria anan shopunek nataurumep aria ipakiruh aparuh hor wosik. Amaen douk nyatogrumep um Iruhin nuneke piyotu dodog. Ipak douk pasah enyudok amaen kabi apak menyusah iri um, aria peyotu dodogowip. <sup>7</sup> Aria apak madukemesh abom um abudok nyutob amaen nyatogrumep obi nyutob, ipak ta piyotu dodog. Madukemesh um ipak pani apak marao eriger namudok aria ta wata punaki punoprom pani apak um agundok Debeini nuneke apakiruh aparuh hor wosik um.

<sup>8</sup> O apakish ashukenyish owashish, apak makri ipak padukemesh um enyudok amaen douk nyatogrumap agudok shokugi nahobig Esia iri. Debeiniamaen abom nyopubuk atap aria nyabouk apakin dodog nyabuhuk. Namudok aria apak mor urkwip makri apak ta mugok um atin. <sup>9</sup> Adur atin, apakigun um numun douk abom memnek yowegun kabi jas nakri um enen arpen ta nyugok aria enyen nyemnek yowen um. Enyudok douk nyatogrumap apak kabi madae urkwip porum apakin dodog, uwok. Enyudok nyatagrumpum apak ta urkwip porum Iruhin ananin atin dodog douk nohuri shagok iri arpesh shakitak shape iri. <sup>10</sup> Enyudok abom debeiniamaen ta nyop mugok, aria uwok. Iruhin anan wata narap mape wosik. Kweipon anan shopunek ta wata nurap mupe wosik abom. Enenyenenamaen nyukri nyutogrumap obi nyutob, apak douk madukemesh abom um anan adur ta nupe um nutaurumap namudok atin. <sup>11</sup> Aria ipak ta putaurumap puhwar Iruhin um anan nutaurumap. Iruhin ta numnek ipakin beten aria ta nutaurumap. Aria sabaishi ta shutik namudok aria shunek tenkyu um Iruhin um enyudok anan neneken nataurumap apak meyoh um.

### *Sagomatin Pol Nakri Nunak Um Korin Aria Ta Nakri Uwok Um Nanan*

<sup>12</sup> Eik apa yanagunukuk um enyudok atin. Enyudok. Eikim urkum mor wosik aria yadukemesh abom um eik apa yenek adurihi hani yopi ah. Yani ipak mape obi nyutob douk yenekeh yariguk. Ehudok ah, eik douk madae igipesh agundok atapishi arpeshin saki aria douk inekeh uwe, uwok. Eheh douk hanakumori Iruhin atun. Anan douk nataurume meyoh aria neyohur yenekeh. <sup>13-14</sup> Abudok nyutob yenekumep-ugu parik iri shup pani apudok doukip obi nyutob, eik apa yowemagu baraen douk wosik putarihen aria pudukem baugeniyum iri atin. Adur, douk abudok nyutob, ipak douk madae pudukem wosik uwe um ihih yenyem iri baraen, uwok. Aria eik yadukemesh um anob nyutob, ipak ta pudukemesh abom um baugeniyum iheniyumori eikin baraen. Pudukemesh aria ahudok nyumnah Jisas apakin Debeini nutanamori ahi hutogram, ipak ta putuk eikin nyeigur punadudareh kabi eik ta ituk ipakish nyeiguhw inadudareh um ipak um. <sup>15-16</sup> Eik douk yadukemesh abom um abudok nyutob eik inaku itrip obi nyutob, ipak ta punadudareh um eik. Douk namudok aria yakri um inaku itiguk ipak purik aria wata ikutup pupeik aria inak um agudok anag shokugi nahobig Masedonia. Aria abudok nyutob ikutukuk Masedonia obi nyutob, eik douk yakri um wata inaku itripuk. Yakri inekesh namudok um itaurumep aria Iruhin nunekep punadudareh biyeh. Aria shopunek yakri inaku itrip um ipak ta putaurume um inak um agudok shokugi nahobig Judia. <sup>17</sup> Aria douk ta mumam? Ipak pakri eik yakri enyudok baraen um inakumagu ipak pakri eik yenek rohwumep, aka? Ipak pakri eik atin yeaygwreh adurin atinyi baraen meyoh aria wata yakri uwok um inakugu, aka? Kabi agundok atapishi arpesh apa shenekesh um, um agundok pakri eik apa yakri wosik aria uwok shopunek atin um? Adur, namudok eik madae inekesh atin uwe um, uwok. <sup>18</sup> Iruhin apa nagipesh iheniyumori ananin baraen wosik. Aria douk namudok atin. Eik apa yakripep adurin atin baraen. Madae ipeum ikripep wosik aria wata inabadiq ikripep um uwok shopunek atin uwe, uwok. <sup>19</sup> Eik yani Sailas aria Timoti douk makripep baraen um Iruhin ananin Nuganin Jisas Krais. Aria padukemesh. Krais douk madae nunekep nukri wosik aria wata nukri uwok shopunek atin uwe, uwok. Krais anan douk naopeum nakri wosik atin. <sup>20</sup> Iheniyumorim Iruhin nakripep-enyi adurin atinyi baraen promis douk nyape. Aria Krais douk nagipesh enyudok iheniyumorim baraen aria neneken nyatogur adurin atin. Namudok aria abudok nyutob

apak memnek enyudok Iruhin ananin adurin atinyi baraen obi nyutob, apak apa makri um Krais ananin nyeigur makri, "Adur" aria matuk Iruhin ananin nyeigur nyato iruhw. <sup>21</sup> Iruhin meyoh apa nenen ipak pani apak menek bilip um Krais meyotu dodog. Aria douk nanagraehap nakop ananin Mishin aria mape ananishi arpes. <sup>22</sup> Anan douk nenen ananin kak nanagraehap mape ananipari atup. Aria nakop ananin Mishin nyawish nyape apakiruh aparuh. Enyudok ananin Mishin douk nyarik iri yopinyi enyudok um ihishmorim yopishi eshudok douk Iruhin nakri um kweipon ta nukopesh iri. Enyudok Mishin douk maraen nyapenyap. Namudok aria apak madukemesh abom um ihishmori eshudok enesh douk adur ta muraesh um atin.

### *Pol Madae Nunak Arigas Um Korin Uwe*

<sup>23</sup> Douk eik yakri um Iruhin ananin nyeigur um inek enyudok eikin baraen nyutogur adurin. Adur atin, eik madae inaku Korin arigas uwe, uwok. Um maresh? Eik yakri uwok um inaku ikripep enen dodogowinyi baraen aria inek ipakip urkwip yowep. Yakri uwok um inakumagu douk namudok. <sup>24</sup> Eik douk madae ikri apak mupe debeipari um mugapesh um ipakin bilip um Krais uwe, uwok. Agundok penek bilip um Krais um douk peyotu dodog. Apak apa mani ipak manoprom um mour ipak ta pugipesh Krais wosik aria punadudareh abom puriguk.

## 2

<sup>1</sup> Eik yenek urkum namudok aria yakri uwok um inaku, uwok. Um maresh? Yakri ta inaku aria inekep ipakiruh aparuh yoweruh kabi riguk um. <sup>2</sup> Aria ta eik inaku inek ipakiruh aparuh yoweruh akure, aria ta wata omi nyupe um nyunek eik inadudareh? Douk ipak enyudok yenekep aparuh yoweruh iri atip. <sup>3</sup> Ipak douk penek eik yanadudareh iri. Namudok aria yakri uwok um inaku itrip itik ipakih aih aria eikihw apahw yowehw, uwok. Douk namudok aria eik yeneku shup douk riguk yenekapugu iri. Eik yadukem ipak. Aria eik inadudareh um enesh eshudok um, ipak ihipmorim shopunek apa panadudareh-umesh. <sup>4</sup> Adur, abudok nyutob yeneku shup obi nyutob, eik douk apahw yowehw abom aria urkum yowem yareh yariguk. Aria eik madae inekapumagu inek ipakiruh aparuh yoweruh uwe, uwok. Yenekap-umagu ipak pudukemesh um agundok eik urkum manawashamep abom um.

### *Eshesh Korin Madae Shusuhwesh Shupe Eshudok Douk Eshesh Shenekesh Iri Yoweishi Inahos Um Kupaishi, Uwok*

<sup>5</sup> Aria anan arman nenen enesh arpes um ipak aparuh yoweruh um, anan douk madae nunek eik apahw yowehw uwe, uwok. Eik yakri uwok um iyagwreh sabainyi dodogowinyi baraen um enyudok, uwok. Aria yakri ikri anudok arman douk nenen ipak ihipmorim um ipakiruh aparuh yoweruh. <sup>6</sup> Aria amaen douk ipak sabaipari pako anudok arman um pugapeshan um douk jurug. <sup>7</sup> Douk ipak mare wata punasuhwen pupe, uwok. Pukwrenyuguk. Ipak ta pugapesh ananihw apahw um wata hwur wosik. Uwok um, ta ananihw apahw yowehw aria nupe yowen abom. <sup>8</sup> Namudok aria douk yeagyreh dodog um piyabigan aria nudukemesh um ipakip urkwip wata panawashaman atin. <sup>9</sup> Apudok riguk yenekap iri shup douk yenekapugu um ikwiraeh ipak meyoh. Yakri idukem ipakih aih um ipak apa pagipesh eikin baraen um ihishmorim eshudok eneshenesh aka, uwok. <sup>10</sup> Aria ipak madae pusuwen pupe um yoweishi inahos um anudok arman nenekehsumep iri um, eik douk shopunek madae isuwen

ipe, yakri nyeneken. Aria ta anudok arman neneh enesh yoweishi inahos um eik aria eik ta ikwreyeshuk mare isuwesh um, aria eik douk yakri nyeneken. Krais douk natwie aria nadukeme. Eik yenekesh namudok um yakri ipak pupe wosik. <sup>11</sup> Eik apa yenekesh namudok um maresh? Yakri ta Satan nunek uhwinyumap aria nop mubuhuk. Aria apak wosik madukem ehudok ananiah aih um nenen rohwumesh um.

### *Pol Nakri Nutik Taitus Abom*

<sup>12</sup> Abudok nyutob yanak yatogragu wabur Troas um ikripes yopinyi barera um Krais obi nyutob, eik douk yatik um Debeini neneke um yah um inek enyudok ananin mour. <sup>13</sup> Aria eikihw apahw douk madae hwur wosik uwe, uwok. Um maresh? Eik madae iparug eikin wanin Taitus agundok uwe, uwok. Namudok aria yenekumeshuk yopuhi nyumnah eshesh Troas aria yakutishukuk yanak yatogur agudok anag shokugi nahobig Masedonia.

### *Iruhin Atun Apa Nataurum Ananim Aposel Dodogowim Aria Henek Ananin Mour*

<sup>14</sup> Aria douk yenek tenkyu um Iruhin. Um maresh? Iih nyumneh anan apa nataurum apak mantoruh Krais aria mani anan manoprom aria mabo yoweih aih habuhuk.\* Iruhin nohur apak makripes ananin yopinyi baraen aria arpesh shape ihirub warub iri shemneken shadukem Krais wosik. Agundok shadukem Krais um douk kabi shemnek anar yopuri unar douk rowe ranak ihirub warub aria shemnekar shanadudareh um. <sup>15</sup> Um maresh? Apak douk kabi enen sanda nyeisik yopuri unar iri um. Enyudok sanda douk Krais neneh ofamen nako Iruhin iri. Enyen douk nyeisik nyanak um eshudok douk Iruhin nape naraesh shatanamori shape wosik iri shani eshudok douk shape shagipes ahudok yah hanak um yoweiburi wabur iri shopunek. <sup>16</sup> Eshudok douk shape shagipes ahudok yah hanakum yoweiburi wabur iri, enyudok yopinyi sanda douk nyeisig kabi unar um. Aria arudok unar ta runekesh shugok shunak shuwishuk. Aria eshudok douk Iruhin nape naraesh iri, eshesh douk shemnek enyudok sanda nyeisig yopuri unar aria ta runekesh shupe wosik abom iih nyumneh. Aria enyudokmori mour ta omi dodogowin um nyuneken? Uwok meyoh. <sup>17</sup> Anam sabaimi armam apa harahaen hanak aria hanator utabor um agundok hakripes Iruhin ananin barea um. Aria apak madae muneken kabi amam heneken um uwe, uwok. Apak mantoruh Krais iri, apak douk Iruhin nakop enyudok mour aria neshopokap manak meneken wosik. Anan natrup um douk madae munek rohw uwe, uwok. Makripes ananin bareaen wosik abom.

## 3

### *Amam Aposel Douk Henek Mourum Iruhin Ananin Namunyi Kontrak Iri*

<sup>1</sup> Barea iganigadae makripep um, ipak apa pakri apak wata mape matuk apakish nyeiguhw shato iruhw, aka? Ipak apa pakri apak madae dodogowipari uwe, aria morig ipak o kupaishi um punek anap shup aria putuk apakish nyeiguhw shuto iruhw aka, uwok? Kabi anam hape henekesh um? Adur atin uwok. <sup>2</sup> Ipak kanak douk kabi apakip shup abom um arpesh shutrip aria shudukem apakih aih. Barea nyape apudok shup iri douk nyape numun apakip urkwip um ihishmorim arpesh shutrin aria shutarihen shudukem apakih aih. <sup>3</sup> Ipak kanak douk adur abom

\* **2:14:** Baugenym enyudok bareaen nyetem Grik iri douk madae nyutogur wosik uwe, uwok.

pape kabi anap shup douk Krais nenekap iri um. Nenekap apudok shup um agundok munek enyudok ananin mour aria mataurumep patogur Kristen um. Anan douk madae nukwu ink nunekap uwe, uwok. Nakwu Iruhin douk nape iih nyumneh iri ananin Mishin nenekap. Aria douk madae nunekap nuwem baraen nyutem utabor uwe, uwok. Nenekap nenyem nyape numun arpeship urkwip. <sup>4</sup> Apak douk makri enyudok baraen um maresh? Apak makri Iruhin anan dodogowin atun abom. Krais nataurumap aria madukemesh um Iruhin ta nuneck ananin mour nyutogur yopin abom. <sup>5</sup> Adur, apak kanak ta mare wosik um munek enyudok mour, uwok. Iruhin atun nutaurumap dodogowip aria douk wosik meneken. <sup>6</sup> Iruhin anan kanak nutaurumap aria wosik munek enyudok ananin mour um manak makripesh baraen um enyudok ananin namunyi kontrak. Enyudok namunyi kontrak douk madae hunyem nyutem um shus meyoh uwe, uwok. Enyen douk Iruhin ananin Mishin meyoh nyakwarumen. Aria enyudok enen baraen lo henyem shus meyoh iri, enyen douk nyenek arpeship shagok shanak shawishuk. Aria Iruhin ananin Mishin douk nyenekesh shape wosik abom. <sup>7</sup> Ipak urkwip purum enyudok. Enyudok mour douk amam hakripesh Iruhin ananin lo seiwok nakoguk Moses enyi heneken iri, enyen douk nyenek arpeship shagok. Abudok nyutob Iruhin nowemori enyudok lo beriyaibori utabor aria nekeshenyi obi nyutob, anan Iruhin douk natruguni abom aria bogaragun. Namudok aria sagomatim, Moses ananin domaen douk nyatrugun abom aria eshesh Israel madae wosik um shutik ananin domaen uwe, uwok. Aria madae roubi uwe aria ananin domaen wata nyape nyatrugun wosik atin arigah arigaha aria hagokenyuk. <sup>8</sup> Aria enyudok namunyi mour um Iruhin nohur apak manak makripesh ananin baraen aria sharao ananin Mishin um, enyen douk dedeben atin abom. Enyen douk nyeshagrakuk seiwokin mour abom um lo. Douk apak meneck enyudok namunyi mour aria matik um Iruhin neneken nyape um nyatogur dodogowin atin aria bogaragun abom. Enyen douk nyeshagrakuk agundok enyudok seiwok Moses neneken iri mour ba bogaragun um. <sup>9</sup> Enyudok seiwokin mour douk nyagipesh lo nyenekesh iri, enyen douk apa nyenekumap baraen aria nyakrium apak yoweipari atup aria ta mugok munak muwishuk. Enyudok seiwokin mour douk nyani iri Iruhin ananit debeiti lait nyanaki. Aria enyudok namunyi mour um makrip arpeship um shutogur yopish um, enyen douk nyarauri debeiti abom Iruhin ananit lait teshagrakuk atudok seiwokin mour nyarati iri. <sup>10</sup> Enyudok namunyi mour douk Iruhin napuhur meneken iri, enyen douk dedeben atin abom nyatrugun nyeshagrakuk agundok seiwok harik heneken iri mour nyatrugun um. Namudok aria douk, enyudok seiwokin mour nyatrugun um douk madae nyutrugun uwe, uwok. <sup>11</sup> Enyudok seiwokin nyarik iri mour douk nyape banab nyutob meyoh aria nyatuh. Enyen douk nyani atudok debeiti Iruhin ananit lait nyanaki. Namudok aria douk madukemesh. Enyudok namunyi mour douk ta nyupe iih nyumneh abom iri, enyen douk nyarauri debeiti abom Iruhin ananit lait. Atat douk tatrugun abom teshagrakuk seiwokin mour nyarati iri.

<sup>12</sup> Apak douk madukemesh abom makri adur um atudok lait ta tutrugun abom tupe namudok atin. Namudok aria apak douk mare munogugur atin uwe, uwok. Apa meyotu dodog aria makripesh Iruhin ananin baraen yopugunum. <sup>13</sup> Apak douk madae munekesh kabi Moses nenekep um uwe, uwok. Abudok nyutob ananin domaen wata nyape nyatrugun obi nyutob, anan douk nohuri anap rupahip aria nashapomuk domaen. Nenekep namudok um eshesh Israel mare shutik ananin domaen douk nyape nyatrugun atin arigah arigaha aria ta hagokenyuk iri. <sup>14</sup> Aria

eshesh Israel douk baragos seshukesh abom. Seiwok arigaha douk, eshesh shatarih Iruhin ananin bareaen um seiwokin kontrak obi nyutob, eshesh douk madae shudukemen atin uwe baugenym, uwok. Agundok atup rupahip wata pape aria poweshiguk esheship urkwip. Madae enen arpen nyupniguk uwe, uwok. Opudok rupahip punaniguk obi nyutob, apap Iruhin ta nupniguk abudok atub nyutob arpesh shunotukur Krais obi nyutob.<sup>15</sup> Seiwok arigaha douk, abudok nyutob shatarih Iruhin ananin bareaen seiwok nakoguk Moses enyi um, apudok rupahip douk watak poweshik esheship urkwip.<sup>16</sup> Aria eshudok arpesh douk shatanam shukon aparuh Debeini iri, eshudok Iruhin apa nakweshih-umeshuk apudok rupahip.<sup>17</sup> Aria enyudok bareaen um yakri Debeini um, enyen douk nyakri Iruhin ananin Mishin. Meinyi arpen douk Debeini ananin Mishin nyapenyen iri, enyen douk madae enesh eshudok shuweshiken uwe, uwok. Enyudok arpen douk kabi riguk nyonweshik aria douk wata shakweshihen um.<sup>18</sup> Aria apak ihishmorim douk madae enesh eshudok shubeshuk apakigos yamagos uwe, uwok. Namudok aria Debeini ananit debeiti lait tatrugun tanaki tasuhw apak matrugun aria tatanam tatrugun tasuhw kupaihi arpesh. Iih nyümneh apak mape um marao atudok lait namudok atin aria tenekap matogur anahaeh abom madukem Debeini-eh aih. Debeini anan douk Mishin. Anan kanak napeum nenekap matogur namudok aria meshagrakuk kabi riguk marik mape um.

## 4

### *Amam Aposel Douk Hape Kabi Amnabis Marus Um*

<sup>1</sup> Iruhin anan neneh gishaumap aria nakop enyudok mour. Namudok aria apak douk mare arigehop mukri mukutinyuk uwe, uwok. <sup>2</sup> Apak douk mekehuk agabus ihihmorim ehudok abraenyihi shanabeshuk shenekeh iri yoweihai aih. Mare munek rohw mutogur anahaeh um Iruhin ananin bareaen mukripesh kupainyi uwe, uwok. Apak apa makripesh ananin adurinyi bareaen yopugunum atugun. Um makri ihishmorim arpesh shutrip shudukem apakih aih, aria esheship urkwip pukri apak douk menek Iruhin ananin mour wosik aria anan natrup nakri wosik. <sup>3</sup> Aria ta enesh arpesh baragos seshukesh mare shudukem baugenym enyudok makripeshenyi Iruhin ananin yopinyi bareaen um, eshudok arpesh douk shape shagipes ahudok yah douk hanakum yoweiburi wabur iri. <sup>4</sup> Eshesh douk madae shunek bilip um Krais uwe, uwok. Um maresh? Satan agundok atapin rohwin god noweshiguk esheship urkwip abom aria madae shutik atudok lait douk tatrugun-umesh iri uwe, uwok. Atudok lait douk takitak enyudok Iruhin ananin yopinyi bareaen. Enyen douk nyeyabigap um agundok Krais natrugun abom aria nadukemum Iruhin um. <sup>5</sup> Mnek, apak douk madae mupe um mukripesh bareaen um apak kanak aria mupe mutuk apakish nyeiguhw shuto iruhw uwe, uwok. Apak apa makripesh namudok. Makri, "Jisas Krais anan douk Debeini. Aria apak apa magipesh ananah aih aria mape shakamum ipak mape menekumep mour meyoh." <sup>6</sup> Seiwok wata sagomatin Iruhin nakri, "Lait tutogur tuhiyahuk arukwutigun um." Aria douk anudok atun Iruhin nenehi ananit lait tanaki tatrugun numun apakip urkwip. Atudok lait tatrugunumap matik Krais ananin domaen aria madukemesh um agundok Iruhin dodogowin atun abom aria natrugun raniguk um.

<sup>7</sup> Apak aposel douk madukem amnabis marus madae dodogowimi armam uwe, uwok. Aria apak douk enesh yopishi eshudok eneshenesh shapenyap kabi debeibori abom utabor bor numun amnabis marus um.

Yopishi eshudok eneshenesh douk shapenyap um ihish arpesh shutrish aria shudukemesh um enyudok dodogowinyi gobi apak masuhwen munek ananin mour um douk nyeshagrakuk ihishmori eneshenesh eshudok. Enyudok gobi douk nyanakumori Iruhin atun. Apak aposel uwok.<sup>8</sup> Adur, ihigun manak um douk enenyenenamaen nyatogrumpa, aria enyen madae nyupabuk atap abom uwe, uwok. Sabaishi eshudok apa shenekap enenyenen shanumogap, aria madae mugugak abom mupe namudok uwe.<sup>9</sup> Anabik um shenekap enenyenen, aria Iruhin madae nukutupaguk atin uwe, uwok. Nani apak mape. Apa shap matu, aria madae mugok abom uwe, uwok.<sup>10</sup> Ihih nyumneh apak douk shap shakri apak mugok abom um atugun, kabi shabo Jisas nagok um. Aria agundok shap aria apak wata dodogowip mape um douk mape um arpesh shutrup aria shudukemesh shukri Jisas anan douk adur abom nape apak.<sup>11</sup> Ihih nyumneh apak mape o marahaen um, arpesh apa shokwiraeh um shop mugok. Enyudok douk nyatogrumpa um arpesh shutik apak apa magok aria shudukemesh shukri Jisas anan adur nape abom apak.<sup>12</sup> Enenyenenamaen nyatogram apak aposel aria makri um mugok um atugun. Apak mape namudok aria ipak ta pupe wosik abom namudok atin.

<sup>13</sup> Baraen nyetem Iruhin ananik Buk iri nyakri namudok. "Eik douk yenek bilip um Iruhin, namudok aria douk yakripesh-uman." Apak aposel douk shopunek munek bilip um Jisas aria magipesh ehudok atih aih makripesh um Iruhin ananin baraen.<sup>14</sup> Apak menekesh namudok um maresh? Apak madukemesh namudok. Jisas douk nagok aria Iruhin wata nonohur nakitak nape. Namudok aria kabi nohur Jisas nakitak napeum, anan ta wata shopunek nuhur apak munotukur Krais aria mukitaki aria nurauri ipak puni apak munak miyotu abom agundok Iruhin napeum.<sup>15</sup> Eik yakri namudok um maresh? Eik yadukemesh um ihinyumorim enyudok douk nyatogram apak um nyutaurum ipak punek bilip um Krais aria pupe wosik. Aria ehudok aih um Iruhin nataurumap meyoh um douk hape hatogrum sabaishi arpesh abom aria shenek bilipuman. Namudok aria eshudok arpesh ta shunadudareh aria shunek tenkyu um Iruhin shuriguk. Aria ta shutuk ananin nyeigur nyuto iruhw.

### *Amam Aposel Douk Hasuhw Krais Ananin Baraen Aria Heyotu Dodogowim Atum Um Ananin Mour*

<sup>16</sup> Douk namudok aria apak madae aparuh yoweruh mukri mukutukuk ananin mour uwe, uwok. Adur, apakiruh yegeshiweruh douk hape hagok aria madae dodogo-wiruh uwe, aria numun apakiruh aparuh apa harao namunyi dodog aria ihih nyumneh hapeum hatogur namuruhi.<sup>17</sup> Um maresh? Apak madukemesh um enyudok amaen nyatogrumpa marao eriger aria douk madae debeiniy uwe, uwok. Ta muraen banab nyutob meyoh. Enyudok douk nyatogrumpa um kweipon apak ta mutrugun abom mupe wosik ihih nyumneh agundok Iruhin napeum. Agundok kweipon mupe wosik um douk neshagrakuk abom ihinyumorim amaen douk nyape nyatogrumpa.<sup>18</sup> Apak douk madae mupe um mutik enyudok enenyenenamaen douk nyatogrumpa iri uwe, uwok. Apak mape aria urkwip por abom um eshudok douk apak madae mutrish apakis nabes iri uwe. Um maresh? Eshudok douk apa matrish iri, eshesh ta shupe banab nyutob meyoh. Aria yopishi eshudok douk apak madae wosik um mutrish iri uwe, eshesh ta shupe ihih nyumneh abom.

yegehiweruh hukri hunak yoweruhuk, aria arhudok anaruh Iruhin nakri nukoparuh iri douk hakusumap gani iruhw heven. Arhudok yegehiweruh douk madae arpesh shunekaruh wis uwe, uwok. Aria araruh ta hupe abom namudok atin iihih nyumneh. <sup>2</sup> Aria douk apak mape agundok atap obi nyutob, apak douk mape moreh makri murao arhudok anaruh apakiruh yegehiweruh douk hakus iruhw heven iri. Makri muraruh um muruhur hishigarup kabi rupeh um. <sup>3</sup> Um maresh? Abudok nyutob murao arhudok yegehiweruh muruhur obi nyutob, apak ta mare wata mupe kabi magor mape meyoh um, uwok. <sup>4</sup> Abudok nyutob wata mape agundok atapiruh yegehiweruh\* obi nyutob, apakiruh aparuh apa yoweruh aria mape moreh. Aria apak douk madae mukri uwok um agundok atapiruh yegehiweruh uwe, uwok. Aria makri um murao namuruhi iruhwiruh yegehiweruh muruhur. Arhudok doukiruh yegehiweruh douk ta hutogur anahaeh abom hutogur yopuruh hupe namudok atin. <sup>5</sup> Aria enyudok arpen douk nyataurumap um ehudok aih iri douk Iruhin. Anan douk narik adur nakop ananin Mishin. Enyudok Mishin douk sagomatinyin abom um eshudok enesh yopishi douk Iruhin nakri adur um ta nukopesh iri. Apak douk marao enyudok ananin Mishin. Douk namudok aria madukemesh um ihishmorim yopishi eshudok adur ta muraesh abom um atugun. <sup>6</sup> Apak apa urkwip porum enyudok aria iihih nyumneh mape dodogowip madae urkwip yowep uwe. Apak douk madukemesh. Abudok nyutob apak wata mape um arhudok yegehiweruh obi nyutob, apak madae muni Debeini mupe agundok anan napecum uwe, uwok. <sup>7</sup> Douk mape agundok atap obi nyutob, apak madae mutrun uwe, uwok. Apak douk masuhw ananin bareaen dodog aria mape magipesen atin. <sup>8</sup> Aria douk yakri. Apak douk dodogowip mape aria makri abom um mukutukuk arhudok yegehiweruh munak muni Debeini mupe atugun. <sup>9</sup> Aria apak wata mupe agundok atap, o mupe gani iruhw um, sagomatini apak ta dodogowip atup urkwip pur abom um mugipesh anan nakri ahi aih um munekan nanadudareh-umap. <sup>10</sup> Um maresh? Apak madukemesh um apak ihishmorim ta munak mutogur miyotu um Krais ananit kwot. Aria ta apak munek yopishi o yoweishi inahos abudok nyutob mape arhudok yegehiweruh obi nyutob, apak ihishmorim atin atin ta murao yopinyi o yoweinyi poe wosik um aih apak menekeh iri.

### *Apak Aposel Douk Mour Nyapenyap Um Mutaurum Arpesh Shuni Iruhin Shupe Atugun*

<sup>11</sup> Apak douk madukemesh um agundok manogugur um Iruhin aria mape shakamum anan. Namudok aria douk mape mohur arpesh esheship urkwip um shunek bilipuman. Iruhin douk nadukemesh um apakip urkwip aria aih. Eheh douk yopihu atih. Aria eik Pol yakri ipakip urkwip shopunek pakri apak adur munek yopinyi mour. <sup>12</sup> Enyudok bareaen douk madae mukriyen um munek ipak putuk apakish nyeiguhw shuto iruhw uwe, uwok. Apak douk mowem-umepagu enyudok bareaen um makri ipak putarihen aria punadudareh um apakih aih. Makri punadudareh aria wosik dodogowip um puwanamesh bareaen eshudok douk apa shanadudareh meyoh um arpeshish nyeiguhw iri. Eshudokmori arpesh douk madae shunududareh um aih hape numun esheship urkwip iri uwe, uwok. <sup>13</sup> Aria ta adur apakin bareaen o aih hatogur kabi shagugak iri eshesih um, o nyenekesh. Enyudok douk munek Iruhin ananin mour atin. Aria ta apak urkwip pur wosik um, aria apak douk menekesh namudok um

\* **5:4:** Baraen nyetem Grik um douk nyakri selig urusag. Baugennumum douk nyakri apakiruh yegehiweruh.

mutaurum ipak. <sup>14</sup> Krais anan douk urkum manawasham apak abom. Aria enyudok apa nyapuhur um munek enyudok apakin mour. Um maresh? Apak douk madukemesh um, atun arman meyoh narao apak ihishmorim apakiyu outumeb aria nagok. Namudok aria apak ihishmorim douk magok iri atup. <sup>15</sup> Anudok arman douk nagok um ihishmorim arpesh. Nagok um apak wata mape iri um apak mare wata urkwip purum mugipesh apakip atip urkwip, uwok. Apak ta urkwip purum anudok douk narao apakiyu outumeb nagok wata nikitaki aria mugipesh ananim atum urkum. <sup>16</sup> Namudok aria apak douk madae mupe um mugipesh shapeum shagipesh ahudok atapihi aih iri esheship urkwip aria munek skelum enesh arpesh esheshih aih uwe, uwok. Adur, riguk apak douk magipesh epudokmori urkwip aria mape mograeh um mudukemesh um Krais ananih aih, aria douk madae munekesh namudok atin uwe, uwok. <sup>17</sup> Namudok aria ta enen arpen nyutukur Krais um, aria Iruhin douk neneken nyatogur naminyi iri. Gamo pumnek! Douk, seiwokihi yoweishi aih douk hanak hawishuk aria namihi hatogur hape. <sup>18</sup> Ehudok ihihmorim namihi aih douk Iruhin meyoh nenekehuma. Seiwok douk mape ananishi horim. Aria anan wata nenekap mani anan mape atugun um enyudok Krais ananin mour atin. Aria ahudok nyumnah douk nakop enyudok mour um mutaurum ananish horim shutanamori shuni anan shupe atugun. <sup>19</sup> Apakin baraen douk namudok. Iruhin nape narauri ihishmorim arpesh shatanamori shani anan shape atugun um enyudok Krais ananin mour atin. Anan douk madae nukri um urkum mur um eshesh shenekesh iri yoweishi inahos uwe, uwok. Aria douk nakop mour apak um mukripes enyudok baraen um nyuhur ananish horim wata shatanam shuni anan shupe atugun. <sup>20</sup> Namudok aria apak douk enyudok morao Krais ananit nokwat aria makritep ananin baraen. Enyudok douk kabi Iruhin anan meyoh nakwu apakig nokwatog nahwarari ihishmorim arpesh um. Apak douk morao Krais ananit nokwat aria makrip ihishmorim arpesh namudok. Makri, "Yaipo, ipak pukutukuk agundok penek horim um Iruhin um aria wata putanam puni anan pupe atugun." <sup>21</sup> Krais anan douk yopuni. Madae nunekehi atish uwe yoweishi inahos. Aria Iruhin douk nakri nataurumapa, namudok aria ihishmori apak menekehi iri yoweishi inahos douk nenekehi shato Krais atun abom aria natogur kabi nenekehi yoweishi inahos atin iri um. Iruhin nenekehi namudok um apak munatukur Krais aria mutogur Iruhin ananishi yopishi arpesh.

## 6

### *Amam Aposel Hanak Hakripes Iruhin Ananin Baraen Aria Harao Sabainyi Amaen*

<sup>1</sup> Apak douk apa mani Iruhin manoprom menek mour. Aria douk dogowip atup makri mukritep namudok. "Iruhin douk nataurumep meyoh. Aria ipak mare pukri enyudok douk enen rohwin mour, uwok. Apak ta punek yopih aih." <sup>2</sup> Iruhin douk nakri namudok, "Eik kanak yagraeh nyutob um wata iraep aria putanamori pupe wosik abom.

Arigha douk abom abudok nyutob eik yemnekep aria yataurumep meyoh."

Aria douk pumnek! Iruhin nenekehi gishaumapa aria nataurumapa meyoh um douk abom abudok nyutob. Narap matanamori mape wosik atin um douk arigha kweipon.

<sup>3</sup> Apak douk madae munek eneh aih douk hunek enesh arpesh shutu shunek yoweishi inahos aria kupaishi shutrish shuhwar apakin mour

yoweishi inahos shapeyenyi uwe, uwok. <sup>4</sup> Aria apak meneken iri mour, apak meyabig ihish arpesh aria shadukemesh um apak douk masuhw Iruhin ananin mour iri. Apak douk meyabigesh namudok. Apak meyotu dodogowip atup um enenyen nyatogrumpa iri amaen, agundok shenekap enenyen um, shenekap aparuh yoweruh morao debeiri eriger um, apak douk meyotu dodog. <sup>5</sup> Shap showeshikap, horim sher sharihap aria shahwar shakripap yoweinyi baraen apak apa menek debeinya mour, madae mishuh wosik atin uwe, aria nyurub bap mape, <sup>6</sup> apa menek yopihi aih, madukemesh um Iruhin wosik, madae juwehosip arigas atin uwe, apa menek yopuni atin um arpesh mataurumesh, morao dodog Iruhin ananin Mishin, madae munek rohw atin uwe. Aria apak douk meyabig ehudok aih abom um urkwip panawasham kupaishi um. <sup>7</sup> Apa makripes adurin atinyi baraen aria munek mour um Iruhin ananin dodog, apa masuhw yopihi atih aih kabi masuhw wanohwish eshudok um yopinyi rogur ehah um anugagrish roguhw aria manak um wanohw mabo yoweishi inahos shabuhuk um. <sup>8</sup> Enesh apa shatuk apakish nyeiguhw, enesh shanumogesh apak, enesh shenekap dehik, enesh apa shakrip kupaishi shakri apak munek yopinyi mour, enesh shakri menek rohw iri. Aria eshesin baraen douk madae adurin uwe, uwok. Apak apa meyagwreh adurin atin baraen. <sup>9</sup> Apak douk mape kabi madae enesh arpesh shudukemap um uwe, aria uwok. Sabaishi shadukemap abom. Mape kabi arpesh shakri shugok iri um, aria uwok. Wata mape atin. Shap shakumap eshudok eneshenesh, aria madae shop abom ba mugok uwe, uwok. <sup>10</sup> Anabik um aparuh yoweruh abom, aria manadudareh um douk manadudareh mape namudok atin. Apak douk mape kabi eshudok yaruhih um, aria apak apa mataurum sabaishi arpesh shanaparug sabaishi yopishi eshudok eneshenesh. Anabik um eshudok eneshenesh wokap abom, aria apak douk magrem ihishmori Iruhin ananish yopiyopishi eshudok eneshenesh.

<sup>11</sup> O ipak Iruhin ananish arpesh pape Korin iri, apakip urkwip douk panawasham abom ipak. Namudok aria apak douk makripes ihinyumorim baraen douk nyape numun apakiruh aparuh iri. Madae mubeshukuk enen uwe, uwok. <sup>12</sup> Apak madae muweshiguk apakip urkwip um ipak uwe, uwok. Apak douk urkwip panawashamep. Aria ipak douk poweshiguk ipakip urkwip um apak. <sup>13</sup> Ahudok nyumnah douk ikripep kabi anan yain nakrip ananish batowish um. Apak douk urkwip panawasham ipak. Namudok aria ipak ta punek ehudok atih aih kabi apak menekeh um ipak um. Ipakip urkwip shopunek ta punawasham abom apak.

### *Apak Douk Kabi Iruhin Ananit Urupat Um*

<sup>14</sup> Ipk mare puni eshesh madae shunek bilip um Iruhin iri uwe punoprom o punek mour atugun atin, uwok. Um maresh? Eshesh douk enesh kupaishi aria anahaehish. Nyumneh iri weibus douk madae shunorirum shutogur uwe, uwok. Namudok atin, yopihi aih douk madae huni yoweishi inahos shunorirum uwe, uwok. <sup>15</sup> Krais douk madae nini Satan hupe atugun husuhw atin uwe, uwok. Aria ipak pakri shenek bilip um Krais iri ta shuni eshudok madae shunek bilipman iri uwe shupe atugun shusuhw atin aka? O uwok meyoh. <sup>16</sup> Atudok shenek lotu um Iruhin atari urupat douk madae tuni ogwudok onog shenek lotu um rohwimi godomi um gunorirum uwe, uwok. Ipak douk padukemesh. Apak atin atin douk anudok abom naope iih nyumneh iri Iruhin napenyogwi urusag. Kabi riguk anan kanak nakriyuk um. Nakri,

“Eik ta ini eshesh mupe aria ipe inek yowi kare um eshesh.  
Eik ta ipe eshesin Iruhin aria eshesh shupe eikish arpesh.”

<sup>17</sup> Namudok aria Debeini wata nakri,  
“Ipak pukutishukuk punak pupeik sik.  
Mare pupe pusuhw eshudok douk  
eik yatrish yakri shanabosusih iri,  
aria eik ta iraep pupe eikish arpes.

<sup>18</sup> Eik ta ipe ipakin Yain aria ipak pupe eikish batowish. Eik Dodogoiwe  
abom atuwe Debewei iri yakri namudok.”

## 7

<sup>1</sup> O ipak abom eikish arpes, Iruhin douk nowem um enyudok igani-gadae yakriep-enyi adurin atinyi bareaen um apak. Namudok aria apak munagapesh um apak kanak mukwreik ihishumori eneshenesh yoweishi inahos. Eshudok yoweishi inahos douk apa shenek apakiruh yegeshiweruh aria mishish shanabosusih shape yowesh iri. Apak ta munogugur mupe shakamum Iruhin aria dodogowip atup um munek yopihu abom aih agundok Iruhin nutrup um.

### *Pol Nanadudareh Um Eshesh Korin Shatanam Shakon Aparuh Iruhin*

<sup>2</sup> Apak douk madae munek enesh yoweishi inahos um enen ipak Korin uwe, uwok. Madae mununu enen uwe. Madae munek rohw um enen munaruken enesh eshudok eneshenesh meyoh abom uwe, uwok. Namudok aria apak makri ipakip urkwip ta punawasham apak. <sup>3</sup> Mnek, eik douk madae ikri enyudok bareaen um ikep agab ipak uwe, uwok. Douk yakri, apakip urkwip douk panasuhw ipak abom. Mugok o watak mupe um, apakip urkwip ta panawashamep abom namudok atin. <sup>4</sup> Eik apa yanadudareh yariguk um ipak. Yadukemesh um ipak ta punek yopinyi atin. Aria douk yatuk ipakish nyeiguhw shato iruhw. Enyudok ihinyumorim amaen nyatogrumpa, aria eikihw apahw douk madae yowehw uwe, uwok. Yanadudareh abom yariguk.

<sup>5</sup> Abudok nyutob matogur mape agudok shokugi nahobig Masedonia obi nyutob, apak douk madae mupe um murao uhwin aria aparuh hur wosik uwe, uwok. Mape agundok aria enenyenen amaen nyape um nyatogrumpa sabaih atih. Shanaki shani ipak panitok bareaen. Apakish mishish yowesh abom aria manogugur. <sup>6</sup> Aria meishi arpes douk aparuh apa yoweruh iri, Iruhin apa nenekeh shape wosik shanadudareh. Douk anan neshopok Taitus nanaku aria namudok anan Iruhin douk nenek apakiruh aparuh wata hor wosik manadudareh. <sup>7</sup> Apak douk madae aparuh hur wosik um agundok Taitus nanak um atin uwe, uwok. Anan douk nakripesh um agundok ipak penek ananihw apahw hor wosik um. Apak mennekesh namudok aria aparuh hor wosik. Nakripap um agundok ipak pakri abom um putik eik um. Um agundok ipak aparuh yoweruh um riguk ipak penekume anah aih aria eikihw apahw yowehw um. Nakripesh-umep um agundok sheneyagwreh enenyenen um eik aria ipak panawasham eik um. Nakripesh um ipak namudok aria eik douk yanadudareh abom yariguk.

<sup>8</sup> Eik yadukemesh. Yarik yenekap iri shup douk penekep ipakiruh aparuh yoweruh. Aria eik madae urkum yowem um agundok ipak aparuh yoweruh um uwe, uwok. Adur, riguk douk wosik eikim urkum yowem, aria douk uwok. Yadukemesh um, apudok shup penekep aparuh yoweruh aria parao braeaen. Aria ipak douk aparuh yoweruh banab nyutob meyoh. <sup>9</sup> Aria douk yanadudareh. Yanadudareh um douk madae inanadudareh um agundok ipakiruh aparuh yoweruh um uwe, uwok. Eik douk yanadudareh um maresh? Ipak douk aparuh yoweruh parao braeaen. Douk namudok aria ipak pekeshuk agabus abom penekep iri yoweishi inahos aria pakon aparuh Iruhin. Enyudok douk Iruhin meyoh nakriyem um nutaurumep

aria douk nyatogrume. Apak kanak douk madae munekumep enesh yoweishi inahos uwe, uwok. <sup>10</sup> Agundok Iruhin nunekap aparuh yoweruh murao abraa um douk nenekekumap um mukutishuk abom apak menekesh iri yoweishi inahos. Makutishuk aria anan wata narap matanamori mape wosik abom. Namudok aria enyudokmori nyukri nyutogrumap um, apak mare mukri aparuh yoweruh, uwok. Aria agundok eshesh haiden aparuh yoweruh shurao abraen um douk apa nyenekesh shagok. <sup>11</sup> Ipak gamo urkwip purum agundok Iruhin nenekep aparuh yoweruh um. Enyudok douk nyatogur nyakwarum-umep sabaihi yopihi aih. Enyen douk enyudokmori. Iruhin nenek gigaumep aria pakitak pagapesh enyudok ipakin bareaen. Nepuhur pakitak pasuhw anudok douk nenek yoweishi inahos iri aria nenekep panogugur um Iruhin iri. Douk ipak pakri abom um puni apak mupe aturuh aparuh. Dodogowip atip pagapesh anudok douk nenek yoweishi inahos iri ananah aih. Ihilmorim aih penekeh um pugapesh eshudok yoweishi inahos iri douk nyeyabigap wosik abom um ipak adur madae enesh yoweishi shupenyap uwe, uwok. <sup>12</sup> Riguk yeneku apudok shup um, eik douk madae inekapumagu itaurum um anudok nenek yoweishi inahos iri o anudok douk anan nenekuman yoweishi inahos iri uwe, uwok. Eik douk yenekapumagu yakri ipakih aih hutogur yopugunum Iruhin nutrip aria ipak gamo pudukemesh um ipak douk urkwip panawasham apak abom. <sup>13</sup> Douk namudok aria apak aparuh hor wosik manadudareh mape dodog.

Aria shopunek apak douk manadudareh mariguk abom um agundok ipak ihishmorim pagapesh-uman apahw Taitus aria penekan nanadudareh nariguk um. <sup>14</sup> Aria Taitus, eik douk yakripan um agundok eik yanagunukuk um ipak um ipakih yopihi aih. Aria ipak douk madae punek iao abraen um agundok yanagunukuk um uwe, uwok. Ihinyumorim bareaen yakripan um ipak um douk adurin atin. Aria douk namudok atin. Douk Taitus nadukemesh um, enyudok bareaen apak managunukuk um ipak um douk adurin atin. <sup>15</sup> Abudok nyutob anan nanak natogrumagu ipak obi nyutob, ipak douk paran aria pemnek ananin bareaen pagipeshen wosik abom. Abudok nyutob, ipak douk panogugur abom um pakri ta putauruman ba yowen um aria Debeini nutrip nukri ipak penek yoweishi inahos. Douk anan wata urkum mor namudok aria ananim urkum manawashamep abom neshagrakuk kabi riguk um. <sup>16</sup> Douk eik Pol yanadudareh abom. Um maresh? Eik yadukemesh abom um ipak ta punek yopihi atih aih abom.

## 8

### *Eshesh Korin Shatorum Utabor Um Shutaurum Iruhin Ananish Arpesh Shape Judia Iri*

<sup>1</sup> O ipak eikishi arpesh, apak douk makri mukripep aria pudukemesh um agundok Iruhin nenekumesh yopinyi abom eshesh ananish arpesh douk shape ihirub warub agudok shokugi nahobig Masedonia iri. Anan douk nataurumesh meyoh. <sup>2</sup> Debeinya amaan nyatogrumesh, aria enyudok douk nyataurum eshesih aih abom um bilip. Aria eshesh douk shapeum shanadudareh shariguk. Adur, eshesh douk eshudok yaruhih abom, aria shanadudareh namudok aria shatorum debeibori utabor um shutaurum eshudok enesh Iruhin ananish arpesh. <sup>3</sup> Adur atin yakripep. Eshesh douk sheyakabor shaborubuk sheshagrakuk abom mak douk eshesh ta shukesh um. Apak douk madae dodogeshiph-umesh um shiyakabor namudok uwe, uwok. Eshesh meyoh sheneken. <sup>4</sup> Eshesh douk shakri abom um shutaurum eshesh Iruhin ananish arpesh shape agudok shokugi nahobig Judia iri.

Namudok aria shabuk utabor iyoh aria dodogeshish um apak muraborumesh. <sup>5</sup> Eshesh douk shaborubuk abom beshagrakuk kabi apak makri ta butogur um. Aria eshesh douk madae shubuk utabor atubor uwe, uwok. Sagomatin eshesh sharik shakon eshesh kanak Debeini shor ananis wis. Douk shenek enyudok iyoh, aria shagipesh kabi Iruhin nakri um shanaki shemnek apakin bareaen shasuhwen shagipeshen. <sup>6</sup> Riguk douk Taitus nanaku narik nohur enyudok mour um patorum utabor pataurum kupaishi um. Aria douk wata dodogeship-uman um nunaku nutaurumep piyatok enyudok mour um putaurum kupaishi meyoh um. <sup>7</sup> Ipak douk peshagrakuk kupaishi Iruhin ananish arpesh um ihihmorim yopihi aih. Peshagrakuk um agundok pasuhwen Krais ananin bareaen dodog um, um agundok pakripesh Debeini ananin bareaen um, padukemesh um Iruhin ananin bareaen wosik um, mishish shakitak um punek Iruhin ananin mour um. Aria shopunek peshagrakuk um agundok ipak urkwip panawasham apak abom um. Aria douk, apak makri ipak ta pishagrakuk abom shopunek um agundok putorum utabor aria putaurum Iruhin ananish arpesh meyoh um.

<sup>8</sup> Enyudok douk madae ikripep enen dodogowinyi bareaen um ipak pugipesen uwe, uwok. Eik atin yakri ikripep um pudukemesh um agundok kupairubi warubish Iruhin ananish arpesh mishish shakitak abom um shutaurum kupaishi um. Um yakri ikwiraehep aria idukemesh um ipak urkwip panawasham eshesh shape Judia iri pekesh peshagrakuk kupaishi shekesh um o eshesh sheshagrakuk ipak. <sup>9</sup> Ipak douk padukemesh um agundok apakini Debeini Jisas Krais urkum manawasham apak abom aria nataurumap meyoh um. Anan douk nagrem sabaishi yopishi eshudok eneshenesh abom iri, aria wata nakutukuk ihishmorim eshudok natogur anan yaruhih um eshudok iri, um nutaurum ipak purao sabaishi Iruhin ananish yopishi eshudok eneshenesh aria pupe wosik.

<sup>10</sup> Douk yakri ikripep eikin bareaen um agundok utabor bunotorum um. Nyanyik enen kwar, sagomatin ipak parik mishish shakitak um punek enyudok mour aria douk parik peneken. <sup>11</sup> Namudok aria douk yakri wosik ipak dodogowip atip um punek enyudok mour piyaten. Enyudok mour douk sagomatin ipak mishish shakitak um puneken aria douk penyuthur nyape iri. Ipak paborubuk mumam, utabor aria pusiyabor namudok kabi panaborubuk um. <sup>12</sup> Arpesh douk enesh eshudok eneshenesh shakus aria mishish shakitak abom um shuko Iruhin um, Iruhin apa nanadudareh um nunatrish eshudokmori eneshenesh. Anan madae nirik atin um shukon eshudok douk eshesh wokes um uwe, uwok. <sup>13</sup> Eik douk madae ikri um ipak piyak ihibormorim ipakibor utabor puko eshudok yaruhih arpesh, um eshesh shupe wosik aria ipak wata eshudok eneshenesh wokep, namudok uwok. Eik yakri um mutaur-umesh um eshesh apak mupe arag atin. <sup>14</sup> Douk, ipak patik eshudok aria ipak wosik putaurum eshudok yaruhih arpesh. Namudok douk nuhut biyen ipak pakri punak pubuhuk eshudok wokep aria eshesh shutik eshudok um, eshesh douk ta wata shuwanamep ipakish. Douk punabiram namudok aria ta pupe arag atin. <sup>15</sup> Enyudok douk kabi bareaen nyetem Iruhin ananik Buk iri nyakrium. Nyakri namudok. "Arpen nyanatorum sabaishi eshudok eneshenesh iri douk ta wosik-umen abom. Mare enesh shukusuk meyoh uwe, uwok. Enyudok enen arpen douk nyanatorum karowish iri, eshesh douk wosik-umen. Mare ta shutuh uwe."

<sup>16</sup> Eik Pol douk yanadudareh abom um Iruhin. Yenek tenkyuman um agundok nohur Taitus aria anan mishin nyakitak abom um nakri nutaurum ipak Korin. Nakri nutaurumep kabi eik yakri itaurumep um. <sup>17</sup> Apak marigan um nunaku nutik ipak obi nyutob, anan douk nakri wosik. Um maresh? Anan mishin nyakitak abom um nutaurumep. Aria douk anan meyoh nanagraeh um nunaku nutrip. <sup>18</sup> Apak douk meshopok anan um apak Iruhin ananip um nanamanugu. Anudok arman douk nyeigur nyato iruhuman um nakripesh Iruhin ananin yopinyi baraen wosik. Ihishmorim Iruhin ananish arpesh ihirub warub douk shatuk ananin nyeigur nyato iruhw. <sup>19</sup> Aria douk madae namudok atin uwe, uwok. Anarub warubish Iruhin ananish arpesh douk shograhan um nini ipak purahaen aria nutaurumap um enyudok mour um mutorum utabor munak mutaurum yaruhih um. Apak douk munek enyudok mour um Debeini anan kanak nurao debeiniyi nyeigur. Aria shopunek um miyabig arpesh um agundok apak mishish shakitak abom um mutaurum Iruhin ananish arpesh douk yaruhih iri. <sup>20</sup> Apak douk gamo mudukemesh abom um agundok masuhw abrudok debeibori utabor douk ipak pani kupaishi paborubuk um putaurum kupaishi um. Makri ta enesh shunekap baraeñym-abor. Namudok aria meshopok anudok arman nani Taitus hanamepogu. <sup>21</sup> Apak douk makri abom um munek yopihi atih aih. Aria makri uwok um munekah agundok Iruhin ananis nabes atus um, uwok. Makri munekah wosik atin um yopihi atih aih um arpesh shopunek shutrih.

<sup>22</sup> Apak douk moshopok anudok anan apakin ashuken um neiram shopunek. Sabaihi apak mograehan um enenyenen mour aria matik um anan wosik dodogowin aria mishin nyakitak neneken. Anan douk nadukemesh um ipak ta punek yopihi atih aih. Namudok aria douk anudok mishin nyakitak abom um nunek enyudok mour nishagrakuk agundok riguk anan mishin nyakitak neneken um. <sup>23</sup> Taitus ipak douk padukeman. Anan douk nani eik wanoprom wenek Iruhin ananin mour wataurum ipak iri. Amudok anam apakimi heiranogu iri armam, amam douk hanagraeh harao nukwatog um sabaishi Iruhin ananish arpesh douk shape anarub warub iri. Amamih aih douk apa henekeh aria arpesh shatuk Krais ananin nyeigur nyato iruhw. <sup>24</sup> Namudok aria eik yakri ipak Korin ta punekumam yopihi aih amudok biom atun armam. Um yakri kupairubi warubishi Iruhin ananish arpesh shutik namudok aria shudukemesh abom um ipak douk urkwip panawasham amam. Namudok aria eshesh ta shudukemesh um agundok apak manadudareh um ipak um douk madae munek rohw uwe, uwok.

## 9

*Iruhin Ananish Arpesh Shape Korin Iri Ta Shubuk Utabor Um Shutaurum  
Eshudok Enesh Iruhin Ananish Arpesh*

<sup>1</sup> Ipak douk padukemesh um agundok utabor banatorum um, um putaurum Iruhin ananish arpesh shape agudok shokugi nahobig Judia iri um. Namudok aria eik ta mare iwemagu rounyi baraen um enyudok, uwok. <sup>2</sup> Um maresh? Eik yadukemesh. Ipak douk mishish shakitak um putaurum kupaishi Iruhin ananish arpesh. Yani eshesh Masedonia mape obi nyutob, eik apa yanadudareh um ipak Korin yakripesh yakri, "Yaipo, eshesh agudok shokugi nahobig Akaia douk nubokuhiyen kwar meyoh shenek garibog shapeum enyudok mour." Douk eshesh Masedonia shemnek namudok um ipak Korin oub bakitak um putorum utabor putaurum eshudok yaruhih um, aria enyudok nyahuresh mishish sabaishi shopunek um shakri shubuk

utabor shutaurum kupaishi. <sup>3</sup> Aria eik douk yakri uwok um enyudok apak meyagwreh-enyi baraen um manadudareh um ipak um nyunak nyubouk atap meyoh, uwok. Yakri ipak punek garibog püpe um amudok apakimi hunak hutog aria pukomi eshudok kabi yakripamugu um. Namudok aria douk enyudok yeshopokam hanaku. <sup>4</sup> Apak douk madukemesh um ipak douk penek garibog pape um pukesh utabor eshudok yaruhibh. Yakri namudok douk ta enesh Masedonia shukri shiramugu aria shutrip um mare punek garibog uwe, aria apak ta muraoumep abraen. Aria ipak shopunek ta purao abraen. <sup>5</sup> Namudok aria yakri wosik um ishopokugu amudok biom atun apakimi hurik hunaku. Yakri hurikumogu hutaurumep punek garibog um yopishi eshudok eneshenesh douk riguk ipak parik pakri adurin atinyi baraen um peshopokesh shunak um eshesh Judia iri. Yakri eik ikri inak itogragu aria eshudok douk pugapeshesh shukus. Um yakri arpesh shutik namudok aria shukri apak madae dodogowip um ipak putorum utabor uwe, uwok. Ipak panadudareh meyoh aria paborubuk.

<sup>6</sup> Ipak urkwip gamo purum enyudok baraen. Arpen nyu karowigun wori-gun iri ta wata nyunarok karowigun. Arpen nyu sabaiguni iri ta nyunarok sabaiguni. <sup>7</sup> Namudok aria yakri ipak atin atin ta gamo punek urkum aria ipak kanak mishish shukitak um pakri pukesh mumam mumam. Ipak mare aparuh yoweruh o kupaishi dodogowish aria douk pukesh, namudok uwok. Um maresh? Iruhin apa urkum manawasham arpesh douk eshesh meyoh mishish shakitat aria shanadudareh um shukon eshudok iri. <sup>8</sup> Aria Iruhin anan douk wosik um ta nukep ihishmorim abom yopishi eshudok aria ipak ta pusuhw sabaishi abom. Namudok aria iih nyumneh ipak ta pugrem ihishmorim eshudok eneshenesh. Aria enesh ta shutourak shukus meyoh um punek ihinyumori enenyen yopinyi mour. <sup>9</sup> Kabi Iruhin ananin baraen nyetem ananik Buk iri nyakrium. Nyakri namudok.

“Arpen douk nyukesh sabaishi yopishi eneshenesh  
eshudok yaruhibh arpesh iri,  
enyudok arpen enyenyih yopihu aih  
ta mare hunak huwishuk, uwok. Ta hupe iih nyumneh.”

<sup>10</sup> Iruhin apa nakop mawagun iri worigun mawagun. Wata nakop mashoh iri mashoh. Aria anan ta nukop ihishmorim shunuwesh iri worigun ipak puweshe aria ta nunekesh shutogrume. Aria namudok atin. Anan ta nukep eshudok ipak ta pugremesh aria putaurum sabaishi kupaishi arpesh. <sup>11</sup> Anan ta nupe um nutaurumep putik sabaishi eshudok um ipak wata pupe um sabaibi nyutob putaurum eshudok yaruhibh arpesh. Namudok aria sabaishi arpesh ta shunek tenkyu um Iruhin um ipakish yopishi eshudok douk pukop masuhwesh manak makeshesh iri.

<sup>12</sup> Enyudok peneken iri mour douk madae puneken um putaurum Iruhin ananish yaruhibh arpesh atish uwe, uwok. Enyen douk shopunek peneken um sabaishi arpesh shutuk Iruhin ananin nyeigur abom aria shunek tenkyuman shuriguk. <sup>13</sup> Enyudok ipak peneken iri mour um putaurum yaruhibh um, enyen douk ta nyuwereh ipakih yopihu aih. Aria eshesh ta shudukemesh shukri enyudok ipak pasuhwen pagipeshen iri Krais ananin yopinyi baraen douk pagipeshen wosik abom. Ta wata shutik sabaishi eshudok ipak poko eshesh shani ihish arpesh um, aria eshesh ta shutuk Iruhin ananin nyeigur nyuto iruhw. <sup>14</sup> Aria ta shudukemesh shukri Iruhin nutaurumep meyoh abom nenekumep yopinyi. Namudok aria eshesh ta urkwip punawashamep aria shorik Iruhin um nunekumep yopinyi. <sup>15</sup> Apak ta munek tenkyu um Iruhin. Um maresh? Anan douk nakopari ananin sagomatinyin yopinyi abom presen. Enyen douk ananin

Nuganin. Aria apakin baraen douk madae wosik um munakripesh um enyudok yopinyi presen uwe, uwok.

## 10

### *Pol Nawanamesh Baraen Eshudok Shakri Shunumogesh Ananin Mour Iri*

<sup>1</sup> Enesh ipak Korin apa shakri abudok nyutob eik yani ipak mape obi nyutob, shakri eik apa yaunih eik kanak. Aria shakri abudok nyutob yanak yapeik kupaigunum obi nyutob, shakri eik apa yenekumepogu shup yakriep dодоговини atinyi baraen. Aria douk yakri ipak urkwip purum ehudok Krais ananih yopih iah um nunih anan kanak aria neyagwreh shokwin baraen um. Eik douk yakri igipesh ehudok atih aih aria douk yarigep um pumnek eikin baraen. <sup>2</sup> Aria douk yakri ikriep um gamo pudukemesh. Ikri inak itogramogu, eik yakri ipak mare punike dodogeshiwe atuwe ikriep dodogowinyi baraen, uwok. Eshudok enesh douk shakri apak mape um magipesh eshudok arpesh douk madae shudukem um Iruhin iri uwe esheshih aih iri, eik adur yakri um ta dodogeshiwe atuwe ikriepes dodogowinyi baraen. <sup>3</sup> Adur, apak douk mape agundok atap. Aria ahwudok wanohw douk marpokohw um mubouk eneshenesh yoweishi inahos, apak douk madae murpokohw kabi eshudok madae shudukemesh um Iruhin iri um uwe, uwok. <sup>4</sup> Eshudok douk masuhwesh marpak ahwudok wanohw iri douk mare mukwu enesh agundok atapishi wanohwishi eshudok eneshenesh uwe, uwok. Makwu Iruhin ananish dodogowish abom atishi eshudok eneshenesh aria menekohw. Eshesh douk dodogowish atish abom wosik um shubo Satan ananih dodogowih atih yoweih iah hubuhuk. <sup>5</sup> Enesh Satan ananish arpesh shani anan apa shatapok-umesh yah eshudok armam armago douk shakri shurao saki um Iruhin iri. Aria apak dodogowip marpokuk yah um mubouk ihishumori esheshin baraen nyani esheshih aih. Apak apa motapok ihipmori arpeship urkwip aria apa mataurumesh mohur esheship urkwip um urkwip pur wosik abom aria shugipesh Krais atun. <sup>6</sup> Apak wata mape meshukabar um ipak pusuhw ihinyumorim Iruhin ananin baraen pugipeshen iyoh. Douk ipak pugipeshen iyoh aria abudok nyutob ihishmorim eshudok douk shaken agabus baraen iri, apak ta mare mukri wosik umesh uwe, uwok. Ta mukripesh dodogowinyi baraen um mare shuwish shupe shuni Iruhin ananish arpesh shunek lotu atugun uwe, uwok.

<sup>7</sup> Ipak patik aduk eikihw yegeniyihw aria pakri eik douk madae dodogowini arman uwe. Aria douk yakri. Ta ipak enen arpen nyukri enyen douk adur nyenek Krais ananin mour iri um, aria eik yakri enyen nyigim eik nyunek urkum. Apak douk shopunek munek enyudok Krais ananin mour atin kabi enyen um. <sup>8</sup> Debeini Jisas Krais douk nakop big aria natrup um mupe debeipi um ipak mutaurumep. Nakri uwok um mukwu enyudok big aria munekep pubuhuk, uwok. Nakri mutaurumep piyotu dodogowip atip um bilip. Namudok aria ta eik ikri inadudareh iriguk um namudok akure, eik ta mare abraen nyupeye, uwok. <sup>9</sup> Aria eik yakri ipak mare punek urkum pukri shup eik yape yenekap iri douk yenekapumagu inek ipak punogugur, uwok. Mare punaruk urkwip namudok. <sup>10</sup> Ipak enep apa pakri namudok. Pakri, "Anudok Pol nenenkap iri shup douk nowemori enenyenen dodogowin atinyi baraen nyetem iri. Aria abudok nyutob nani apak mape matrun um, anan douk madae dodogowin abom uwe, uwok. Neyagwreh enyi baraen shopunek ta mare nyutaurumap uwe." <sup>11</sup> Peyagwrehume enyudok iri douk yakri pudukemesh. Enenyen baraen mape rougun menyemagu shup iri douk padukemen. Meibi nyutob mukri munaku muni

ipak mupe obi nyutob, aria aih apak munekeh iri ta wosik abom um bareaen douk marik menyemumep-ogu shup iri.

<sup>12</sup> Apak makri uwok abom um mukri apakih aih douk kabi eshudok arpesih douk apa shatuk esheshish nyeiguhw shato iruhw iri, makri uwok. Eshesh apa shanatutik um aria shenek skelim eshesih aih um shadukmesh eshesh shape mumam. Shagipesi esheship urkwip atin aria shenek skelimum eshesh kanak. Eshudokmori arpesh douk shenek dehik abom iri. <sup>13</sup> Apak ta mare munagunukuk mishagrakuk enyudok kak douk Iruhin nako apak munek enyudok ananin nakopen iri mour munak miyotu um, uwok. Apak ta muneken munak miyotu agundok Iruhin nakripap-enyi kak atin. Aria apak ta munagunukuk um enyudok atin mour douk meneken arigaha manak matogromagu ipak agundok Korin iri atin. <sup>14</sup> Riguk apak manaku nagundok Korin aria makritep Jisas Krais ananin yopinyi bareaen. Aria abudok nyutob manakumagu ipak um, apak douk madae mishagrakuk Iruhin ananin kak uwe, uwok. Ipak Korin douk parik iri um abudok amnab douk Iruhin nako apak um munek mour munak mutogur um. <sup>15</sup> Aria apak madae munagunukuk um enyudok mour douk kupaihi sheneken aria sheshagrakuk enyudok kak douk Iruhin nakop um apak iri uwe, uwok. Apak apa munek Iruhin ananin mour wosik atin. Um makri ipak ta pusuhw Krais ananin bareaen dodog pishagrakuk agundok riguk parik pasuhwen pagipeshen um. Namudok aria apakin mour ta nyutogur deben agundok. <sup>16</sup> Aria abudok nyutob, apak ta kadak munak mukripesh Iruhin ananin yopinyi bareaen arbudok rougunirub warub douk bape bagigukmori ipak iri. Apak ta mare munak arbudok anarub warub douk kupaimi hanak henek mour arub iri, uwok. Um maresh? Apak douk makri uwok um munagunukuk um enyudok mour douk amam harik hanak henekenyuk iri. <sup>17</sup> Kabi enen bareaen nyetem Iruhin ananik Buk iri nyakrium. Nyakri, "Arpen nyukri nyunagunukuk um enesh eshudok eneshenesh iri, enyen ta nyunagunukuk um Debeini atun." <sup>18</sup> Umm maresh? Apak madukemesh. Debeini natik arpesh douk shatuk esheshish nyeiguhw shato iruhw iri um, anan nakri eshudok arpesh douk nyeiguhw wokes. Aria arpesh douk Debeini nutrish nuhwaresh yopishi iri, eshesh adur nyeiguhw shato iruhumesh abom.

## 11

*Pol Nenekehi Aih Douk Madae Atatahii Um Ehudok Aih Amudok Henek Rohw Iri Aposel Henekeh Iri Uwe.*

<sup>1</sup> Eik Pol yakri ipak gamo pumnek enen shopunek enyudokmori bareaen. Eik ta iyagwreh kabi rohwishi sheneyagwreh um. Enyen douk rohwinyi, aria yarigep um pubuk arigos. <sup>2</sup> Eik douk urkum mor abom um ipak kabi Iruhin anan urkum morumep um. Eik yakri ipak punatukur Krais aria pupe ananip atip. Ipak douk eik meyoh yakritep bareaen um Krais aria yataurumep yaraepuman. Yaraepuman kabi yaraao onok kwape wosik abom iri weroroikwi armatok kwanak um rammen um nuraok iri um. Anan douk Krais. <sup>3</sup> Arudok yur Satan douk radukemesh atin abom um agundok shenek rohw um kupaishi um. Seiwok sagomatim renek rohw um Eva aria eik douk yanogugur um ipak. Yakri ta runekeshumep namudok atin aria urkwip pushukepuk. Yakri ta mare pukutukuk agundok pape wosik abom aria urkwip purum Krais atun um. <sup>4</sup> Apak douk manaku makritep adurinyi bareaen atin um Jisas. Aria anam wafa hanaku hakritepuk enen kupainyi bareaen um Jisas. Douk pemneguk amamin bareaen pasuhwen aria parao enen kupainyi mishin. Enyudok mishin douk madae nyudukem enyudok Iruhin ananin Mishin riguk parik paraen

iri um uwe, uwok. Iruhin ananin yopinyi baraen douk pape um parao enen kupainyi. Madae nyudukem enyudok apak marik makripepen iri um uwe, uwok. Aria douk yadukemesh. Abudok nyutob amam hanaku hakripep amamin baraen obi nyutob, ipak douk panadudareh pape um pumnekam. <sup>5</sup> Ipak mnek. Eik yadukemesh um, amudok anam aposel douk ipak pahwaram debeimi abom iri, amamin saki nyani aih douk madae shishagrakuk eikish uwe, uwok. <sup>6</sup> Aria eik madae gamo iyagwreh wosik um uwe, nyenekesh. Aria eikin saki douk deben. Ihih nyumneh ihishmori menekeh iri aih, apak douk mayabigep patrih aria padukemesh wosik. Padukemesh um agundok apak madukemesh mariguk um.

<sup>7</sup> Ipak douk padukemesh. Eik yakripep Iruhin ananin yopinyi baraen aria madae iwarep um irao utabor um enyudok mour uwe, uwok. Eik yenekeh namudok yaunih eik kanak um ituk ipak puto iruhw. Aria douk mumam? Ipak pakri eik yenekeh namudok aria yenek yoweishi inahos aka? Adur atin uwok. <sup>8</sup> Abudok nyutob yanaku yani ipak mape aria yenek mour yataurum ipak obi nyutob, eik douk kupairubi warubish Iruhin ananish arpesh shataurume sheke utabor. Aria namudok douk kabi yakwumabor aruh esheshibor utabor um itaurum ipak um. <sup>9</sup> Abudok nyutob yani ipak mape aria utabor uwok um enesh eshudok eneshenesh obi nyutob, eik douk madae dodogoiwe ipeum enen ipak um nyukeyesh uwe, uwok. Eik douk amudok anam apakimi armam hapei agudok shokugi nahobig Masedonia aria hanaki iri atum apa hataurume um ihishmori eshudok eik urkum makriyesh iri. Kabi riguk um, douk arigaha kweipon eik ta mare iwemep enen enyudokmori amaen, uwok. <sup>10</sup> Eik douk enyudok Krais ananin adurin atin baraen nyapenye aria douk yakri adurin atin. Ihirub warub agudok shokugi nahobig Akaia, ta mare enesh arpesh shunek eikit nokwat tishuk um agundok iyagwreh um, uwok. Yape um yakrip ipak pani sabaishi arpesh enyudok Iruhin ananin yopinyi baraen meyoh. Eik madae irikep um puke enesh eshudok eneshenesh uwe, uwok. <sup>11</sup> Ipak pakri eik yeayagwreh enyudok um maresh? Aria pakri eik urkum madae munawasham ipak uwe? Adur atin uwok. Iruhin nadukemesh um eik urkum manawashamep abom.

<sup>12</sup> Aria ehudok yenekeh aih um agundok yakripep Iruhin ananin baraen aria madae inatrisp anabor utabor um uwe, eik douk ta ipeum igipesheh. Yakri inekesh namudok um amudok anam aposel hutik aria yah wokam um hunagunukuk hukri amam douk henek mour kabi apak meneken um.

<sup>13</sup> Amudokmori armam douk henek rohw iri aposel. Amam madae husuhw Debeini ananin mour wosik iri uwe, uwok. Apa habeshuk amamih yoweishi aih aria henek rohw um arpesh hakri amam adur Krais nahwaram aria hanak hakripeh ananin baraen iri. <sup>14</sup> Aria ipak mare pikitak yowiyokuk um amamih aih, uwok. Ipak douk padukemesh. Satan anan kanak apa nabeshuk ananish yoweishi aih aria nawishi enen Iruhin ananin nyatrugun abom iri ensel. <sup>15</sup> Aria henek mour um Satan iri hunabeshuk amamih yoweishi aih aria hunek rohw hukri amam adur henek mour um yopihi aih iri um, apak douk mare mukitak yowiyokuk um amam, uwok. Kweipon amam ta hurao yoweini poe wosik um ehudok amam henekeh iri aih.

### *Pol Nanagunukuk Um Nasuhw Debeini Ananin Mour Aria Sabainyi Amaen Nyatogruman Um*

<sup>16</sup> Wata gamo ikripep. Eik douk yakri uwok um enen arpen nyumnek enyudok eikin baraen aria nyukri eik douk um yenek rohw iri arpen, uwok. Aria ta ipak pakri eik douk yenek rohw iri um, enyudok wosik. Aria yakri ipak ta pukutukuk eik ba gamo inagunukuk um eik kanak. <sup>17</sup> Adur, enyudok

douk iyagwrehan iri bараen um inagunukuk um eikin mour um, eik douk madae iyagwrehan igipesi Debeini ananum urkum uwe, uwok. Yeyagwreh kabi anan neneh rohw iri. <sup>18</sup> Sabaishi arpesh douk shagipesi enyudok um madae shudukem Iruhin iri uwe eshesihì aih aria shanagunukuk shatuk eshesihì nyeiguhw shato iruhw. Douk eik shopunek ta igipesi ehudok atih aih aria inagunukuk. <sup>19</sup> Ipak douk wosik gamo padukemesh iri armam armago. Namudok aria ipak pakri wosik abom um pumnek rohwishi eshesihì bараen. <sup>20</sup> Arpesh shunekumep enyudokmori um, ipak apa pakri wosik. Enyudokmori. Shunekumep enyudok kabi shonoweshik iri arpesh um, shiyatokumep enesh ipakish eshudok eneshenesh um, shunek rohwumep um enesh eshudok eneshenesh um, shuhwarep shokwipari eshesihì debeishi um, shuboumep ipakigos yamagos um. Shunekumep enyudok-morim um, ipak apa pakri wosik pape panatrish meyoh. <sup>21</sup> Eik Pol douk abraenyiwe um yeyagwreh namudok um. Um agundok yakri apak madae dodogowip um munekumep kabi bараen iganigadai yakriyen iri um. Kabi douk amudok henek rohw iri aposel henekenyumep iri um.

Aria ta amam hupe um hunagunukuk um enesh eshudok um, eik douk shopunek ta inagunukuk kabi amam um. Douk enyudok yeyagwrehenyuk kabi rohwimi iri um. <sup>22</sup> Amudok aposel hakri amam douk Hibru? Eik shopunek anan arpenyi um Hibru. Aria amam douk Israel um, eik shopunek anan arpenyi um Israel. Aria amam hakitak Abraham ananip awirop um, eik douk shopunek yikitak apudok atup awirop. <sup>23</sup> Amam douk hasuhw Krais ananin mour iri aka? Douk yakri iyagwreh kabi shagugak iri abom um. Eik douk yeshagrakuk amam um agundok yenek Krais ananin mour um. Adur abom yeshagrakuk amam yenek debeinyi mour. Yeshagrakamuk um agundok showeshike yeshuh shunuweshik-ati urupat sabaih atih um. Yeshagrakuk amam um agundok shae shoreye eshudok sabaih atih um. Yeshagrakuk amam um agundok shae sabaih atih hurukatin um igok um. <sup>24</sup> Eshesh Juda douk shoreye enesh wanohwishi eshudok um 39-poreih. Enyudok douk nyatogrume 5-poreih sisigh nyumneh. <sup>25</sup> Biyeh atih sisigh nyumneh eshesh Rom shakwume rowos. Anah eshesh Juda shakwume utabor. Bioh atih sisigh nyumneh yarahaen owi kroruhiyor yoweu wagrukuk youg. Aria anah um ahudok nyumneh douk yeyom yor youg um anah nyumnah shuknih wab arigaha gagruk ruwahepih. <sup>26</sup> Sabaihi nyumneh yarahaen atin. Yarahaen worubus sau hurukatin um se igok. Armam hanabeshuk yeh hanatrish eshudok eneshenesh iri hakri um he hunatiwe eshudok eneshenesh. Eikishi baugesi eshesh Juda shopunek shakri um she igok. Kupairubi warubishi eshesh madae Juda uwe namudok atin shakri she igok. Yawish debeirubi warub shakri um she igok. Yarahaeik wehigunum arpesh uwok um anam hakri he hunatriwe eshudok eneshenesh. Youg yoweg hurukatin um inak iwishuk. Anam eik kanak eikim heyagwreh rohwina bараen hurukatinum he igok. <sup>27</sup> Yenek dedeben atinyi mour um inaparug eshudok eneshenesh. Yape um yenekech namudok aria sabaibusi weibus madae ishuh atin uwe. Nyurub bae yape. Abar bae. Sabaihi madae iwok worigun uwe. Sabaihi nyumneh nyumanugas sae yape. Inekeh iri rupeh madae eneh uwe. <sup>28</sup> Sabainyi kupainyi enyudokmori amaen douk nyatogrume. Aria iih nyumneh eik douk shopunek yenere urkum um ihishmorim Iruhin ananish arpesh shape ihirub warub iri. Yakri eshesh ta shupe wosik o mumam? <sup>29</sup> Eik douk urkum mor abom um eshudok douk madae dodogowish um bilip iri uwe. Apa yemnek um amaen nyatogur um eshesh iri douk kabi nyatogur um eik um. Aria abudok nyutob eneh aih hotogur hunek enen Iruhin ananish arpen nyunek enesh yoweishi inahos obi nyutob, eik douk juwehosiwé um

ehudokmori aih abom yakri wokumeh.

<sup>30</sup> Aria eik ikri inagunukuk akure, aria eik ta inagunukuk um eshudok atish, douk shatogrume aria sheyabigap um agundok eik madae dodogoiwe um uwe. <sup>31</sup> Anudok Iruhin apakin Debeini Jisas Krais ananin Yain, apak ta mutuk ananin nyeigur nyuto iruhw ihih nyumneh. Anan douk nadukemesh um enyudok eik yeayagwreh-enyi baraen douk adurin atin. <sup>32</sup> Riguk yape numun debeiburi wabur Damaskus obi nyutob, anudok arman douk king Aretas nenenken um nape debeini um abrudok wabur iri nape naurime um nusuwe nuweshike. Namudok aria douk nene amam soldia heyotu hape haurime agundok shawish abrudok wabur um. <sup>33</sup> Aria enesh Iruhin ananish arpesh shakutuwé enen raba aria shokubur shape shakutuwé enen windua iruhw yape yabuhuk adukehah um arbudok rourubi dodogowirubi narub douk sharukorub shersharih abrudok wabur iri. Namudok aria yaruwokuk um anudok debeini um abrudok wabur iri.

## 12

### *Iruhin Neyabigan Sabaishi Eshudok Pol Kabi Neshuh Nanabek Yomnis Natrish Um*

<sup>1</sup> Ehudok aih um yanagunukuk um douk adur madae nyunek eneh yopihi aih hotugur uwe, uwok. Aria eik ta inagunukuk, um mare uwok. Aria douk ta ikripeshumep um eshudok douk yape kabi yabo yomnis aria Debeini neyabige um. Enesh eshudok, riguk douk madae itrish idukemesh iri uwe. <sup>2</sup> Riguk anob nyutob, Iruhin douk narao eik yato yakih gani iruhw nape nagiguk um binyatin iri heven. Enyudok nyatogur um, douk 14-poreish kwarahos shanak shadiguk. Aria douk madae idukemesh abom uwe. Narae um ahwudok yegeniyhw aka, uwok mishin meyoh nyato. Iruhin atun nadukemesh. <sup>3-4</sup> Aria agundok yato um yopuburi abom wabur heven um, enyen douk adur yato. Aria douk madae idukemesh abom uwe. Yato um yegeniyhw aka, mishin meyoh nyato. Iruhin atun nadukemesh. Yakih iruhw aria yemnek enen baraen douk Iruhin nakripe um mare ikrip enesh arpesh um. Enyudok enen kupainyi baraen, apak arpesh douk madae wosik um mukwu apakin baraen mupe mukripesh-umen uwe, uwok. <sup>5</sup> Eik douk ta inagunukuk um enyudok Iruhin neyabige um, aria ta mare inagunukuk um eik kanak, uwok. Ta inagunukuk um agundok eik madae dodogoiwe um atin. <sup>6</sup> Adur, ikri inagunukuk akure, eik ta mare inagunukuk kabi anan nene rohw iri um, uwok. Um maresh? Enyudok ikri inagunukuk-umen, enyen douk adurin atin abom. Aria ta mare inagunukuk namudok, uwok. Um maresh? Yakri ta arpesh shumneke um agundok inagunukuk um eshudok yatrish iri um aria shutuk eikin nyeigur um namudok. Yakri ta shutuken meyoh shishagrakuk ehudok adurih yenekeh iri aih.

### *Iruhin Nene Pol Narao Debeiri Eriger Um Mare Nukri Nunagunukuk Nuriguk, Uwok*

<sup>7</sup> Eik douk yape kabi yabo yomnis um aria Iruhin neyabige sabaishi yopiyopishi abom eshudok eneshenesh. Aria anan douk nakri uwok um eik inagunukuk iriguk. Namudok aria neneke yarao debeiri eriger um eikihw yegeniyhw. Aria arudok eriger um douk rape namudok. Ihih nyumneh douk yemnekor kabi enen arpen nyasuhw Satan ananin mour iri nyae um imnek eriger aria mare inagunukuk iriguk, uwok. <sup>8</sup> Biyeh atih dodogoiwe atuwe yahwar Debeini um nukweshihuk arudok eriger. <sup>9</sup> Yahwaran aria nuwaname baraen namudok. Nakri, "Eik douk urkum morumen abom aria yape yataurumen meyoh. Aria enyudok douk jurug wosikumen.

Um maresh? Abudok nyutob eikish arpesh madae dodogowish abom obi nyutob uwe, abudok nyutob eik douk dodogoiwe atuwe abom aria ta itaurumesh." Debeini nakripe namudok aria eik douk yanadudareh abom um agundok eik madae dodogoiwe um uwe. Yakri wosik ipe namudok um itik agundok Jisas Krais dodogowin atun abom aria nataurume um. <sup>10</sup> Eik douk yasuhw Krais ananin mour. Namudok aria yanadudareh um agundok arugeh heneke madae dodogoiwe um, o shukripe shunek enenyenen um o shunek enenyenen um ipe yoweive um, o agundok eshudok woke um. Enenyenen amaen nyutogrumé um, eik douk yanadudareh abom. Um maresh? Abudok nyutob madae dodogoiwe abom obi nyutob, Krais douk nataurume aria dodogoiwe abom.

### *Pol Urkum Morum Nakri Nutaurum Eshesh Korin*

<sup>11</sup> Enyudok iganigadae yeaygwreh-enyi rohwin baraen douk ipak Korin meyoh peneken ba douk yeaygwrehen. Douk ta ipak Korin meyoh pupe punakripam um eikh yopihi aih, aria uwok. Adur, eik douk nyeigur woke iri, aria eik madae ipe shakam abom um amam aposel douk ipak panahwaram um nyeiguhw hwato-umam iri uwe, uwok. <sup>12</sup> Abudok nyutob yani ipak mape aria enenyenen amaen nyatogrumé obi nyutob, eik douk yeyotu dodog abom. Namudok aria Iruhin neyohur yenek enenyenen anan atun neneken iri mour nyani enyudok enen sakin mour douk yeneken nyatogur patrin aria pakitak yowiyokuk. Aria enyudok mour douk nyeyabigep abom um eik douk yenek Iruhin ananin mour iri. <sup>13</sup> Ipak Korin pani Iruhin ananish arpesh shape kupairubi warub iri douk ihipmorim yenekumep atuh aih meyoh. Kupairubi warubish Iruhin ananish arpesh, eik douk madae inekumesh eneh yopihi aih hishagrakuk ipak uwe, uwok. Ipak Korin douk atuh aih meyoh madae inekumep uwe. Um agundok madae ikep amaen um puke utabor um enyudok yeneken iri mour um uwe atin. Aria eik yenek yoweishi inahos um agundok madae irigep um eshudok uwe, aria douk yarikep um mare pusuwen pupe, uwok. Pukweshihenyuk.

<sup>14</sup> Douk yape yenek gibegabe um inatrip anah shopunek aria hutogur bioh atih. Eik douk ta inaku, aria ta mare ikep amaen um puke enesh ipakish eshudok eneshenesh, uwok. Eik douk yakri uwok um irao enesh ipakish eshudok eneshenesh, yakri uwok. Yakri irao ipak kanak putanamori um Iruhin. Ipak douk padukemesh. Batowish douk madae shurim um eshudok shishubuk um amakenish atish uwe, uwok. Amakenish atish apa shenek eneshenesh shaurimesh um shako batowish. <sup>15</sup> Eik douk kabi ipakin yaken um. Aria douk yanadudareh ikep ihishmori eikish eshudok aria ikep eik kanak. Ikek eik kanak um inek mour dodogoiwe atuwe um itaurum ipak atip. Douk eik yakri namudok. Yakri eik douk yape um urkum manawasham ipak dodogoiwe atuwe yeshagrakuk kabi riguk um. Aria ipak urkwip panawashame atin arigaha aria ta uwok? <sup>16</sup> Ipak douk padukemesh. Abudok nyutob eik yani ipak mape obi nyutob, eik douk madae irikep um puke enesh eshudok eneshenesh uwe, uwok. Aria ipak enep douk peyagwrehume enyudok. Pakri eik douk yokwiraeh kupaihi yah aria yenek rohw yanatrip ipakibor utabor. <sup>17</sup> Riguk eik douk yeshopok amudok hanaku. Hanaku aria madae ikripamugu um hunaku hunek rohwumep hutripari enesh eshudok eneshenesh hunaki huko eikesh uwe, uwok meyoh. <sup>18</sup> Douk yeshopok Taitus nanaku aria yakrip anudok anan apakin um neiranagu. Taitus nanaku, aria anan madae nunek rohwumep nunatripari enesh eshudok eneshenesh uwe, uwok. Anan nani eik douk atip urkwip abom wagipesh atuh aih.

<sup>19</sup> Ipak douk patarih baraen nyetem apudok shup iri aria penek urkum pakri apak miyagwreh um dodogeship miyawiyamuk ipakin baraen um mukri apak douk yopumi armam madae munek yoweihai aih um ipakis nabes. Aria uwok. Apak douk mape Krais ananipari aria Iruhin natrip nadukemesh um apak meyagwreh adurin atin. Eikish arpesh, ihinyumori meneken iri mour douk meneken um mutaurum ipak piyotu dodogowip um bilip. <sup>20</sup> Eik douk yanogugur um yakri ta ikri inak itograru aria itrip um pugipeshuk anah kupaishi aih eik yakri wokumah iri. Namudok aria ipak shopunek ta putiwe igipesh anah kupaishi sikh aih ipak pakri wokumah iri. Um agundok igapesh eshudok shenek yoweishi inahos iri um. Yanogugur um yakri ta itik ehudokmori yoweishi aih hupenyep. Enyudok. Puneshushruk puwisch putogur um, punek nyigya um kupaishi esheshish eshudok eneshenesh um, juwehosip arigas um, punadiyogur um pakri pugipesh ipakip atip urkwip um, piyagwreh agabusin um, punek dehik kupaishi um, pununu ipakish nyeiguhw um, mare pumnek baraen um. <sup>21</sup> Abudok nyutob eik ta wata inaku itik ipak obi nyutob, eik douk yanogugur um eikin Iruhin ta nukeik agab. Nukeik agab ipakis nabes um aria ta iraomep abraen um ipakih penekeh iri aih. Namudok aria ta punek ireh um agundok ipak sabaipari pape um penek wehrur um, penek hanabosusih iri yoweishi abom aih um hani eneshenesh mishish shakitak-umesh iri yoweishi inahos um. Enyudok douk riguk pape um peneken aria madae pukri um pukenyuk agabus uwe, uwok.

## 13

### *Eshesh Korin Ta Gamo Shudukemesh Um Shusuhw Krais Ananin Baraen Dodog Um*

<sup>1</sup> Douk inaku itrip aria ta hutogur biyeh atih. Iruhin ananin baraen nyetem ananik Buk iri nyakri namudok. Nyakri, “Aria biyesh o biyesh atin arpesh shutik enen arpen nyunek enesh yoweishi inahos um, aria enyudok baraen wosik ta pukri adurin aria punek skelumen.” <sup>2</sup> Riguk yanaku yatrip biyeh aria hagiguki douk yakripepuguk dodogowinyi baraen. Douk enyudok yapeik rougun aria yakri gamo inekumepogu enyudok atin baraen. Baraen enyudok. Abudok nyutob ikri inakumagu, eshudok arpesh douk riguk sharik shenek yoweishi inahos iri shani ihishmorim eshudok enesh arpesh, eik ta mare ikri wosik-umesh, uwok. <sup>3</sup> Abudok nyutob ikri wosik-umesh aria igabeyesh obi nyutob, ipak ta putik namudok aria pudukemesh pukri eik adur Krais apa neyohur yeayagwreh ananin baraen. Aria mnek! Krais ta nukwu eik neneke dodogoiwe atuwe aria nugapesh eshudok arpesh douk shenek yoweishi inahos iri. Ta nukwu eik aria niyabige um agundok anan dodogowin atun abom um. <sup>4</sup> Adur, riguk abudok nyutob shan shenek nyiliman rowog kruse obi nyutob, anan douk madae dodogowin uwel, uwok. Aria Iruhin anan douk dodogowin atun abom iri, aria wata nonohur nakitak aria douk nape. Kabi douk Jisas nape agundok atap aria madae dodogowin um uwel, douk apak shopunek matukur anan wata mape agundok atap aria madae dodogowip uwel. Aria abudok nyutob apak munaku agundok Korin obi nyutob, Krais ta nini ipak mupe munoprom aria Iruhin ta nutaurumap dodogowip um mutaurum ipak.

<sup>5</sup> Ipak atin atin ta punek skelum ipak kanak aria punosorik um ipak kanak douk pasuhw Debeini ananin baraen dodog o uwok? Ta punek skelum ipak kanak. Adur, ipak ta pudukemesh um Jisas Krais douk nape ipakiruh aparuh. Douk madae nupenyep akure, ipak ta mare pupe ananish arpesh, ta uwok. <sup>6</sup> Eik yakri ipak ta punek skelum apak aria ta pudukemesh

abom um apak adur abom masuhw Krais ananin mour iri. <sup>7</sup> Apak apa marig Iruhin um nutaurumep aria mare punek enesh yoweishi inahos, uwok. Aria apak douk madae munek enyudok um enesh arpesh shutrup aria shukri apak munek ananin mour wosik iri uwe, uwok. Aria enesh arpesh shutrup shukri apak madae munek mour wosik um uwe, enyudok nyenekesh. Apak douk makri abom um ipak punek yopihi aih. <sup>8</sup> Ipak padukemesh. Apak ta mare dodogowip um munek enesh eshudok um mukenyuk agab adurinyi baraen, uwok. Munek mour mutaurumen um nyutogur dodogowin atin um, douk wosik. <sup>9</sup> Apak douk manadudareh um meibi nyutob apak madae dodogowip obi nyutob uwe, ipak douk patogur dodogowip um bilip. Aria apak douk marig Iruhin um nutaurumep abom putogur yopishi arpesh pishagrakuk kabi riguk parik patogur yopip um. <sup>10</sup> Eik Pol douk Debeini neneke um isuhw enyudok mour aria neke big um ineken. Aria douk watak yapeik rougum um ipak aria yenekumepogu enyudok baraen. Um yakri abudok nyutob ikri inak itogrammepogu obi nyutob, eik yakri uwok um dodogeshiwe atuwe igapesh um ipakih aih, uwok. Debeini neke enyudok big um itaurumep piyotu dodogowip atip um bilip. Madae nukeyen um inekep pubuhuk uwe, uwok.

### *Pol Nenekumesh Yopuhi Nyumnah Eshesh Korin*

<sup>11</sup> O eikishi arpesh, eik douk enyudok yakri iyatak eikin baraen aria yakri ikri, "Yopuhi nyumnah ipak." Ipak ta punek mour dodogowip atip um putogur dodogowip um bilip. Yakri pusuhw eikin baraen abom pupe aturuh aparuh aria aparuh hur wosik. Iruhin anan douk baugos abom um agundok urkwip panawasham kupaishi aria aparuh hor wosik shape wosik um. Ipak punekesh namudok kabi yakri um aria anan ta nini ipak pupe.

<sup>12</sup> Yakri ipak atin ta pugipesh apak Iruhin ananishi apakih aih aria punadudareh punapuprik um.\* <sup>13</sup> Ihishmorim Iruhin ananish arpesh shape agundok iri douk shenemepogu yopuhi nyumnah ipak. <sup>14</sup> Aria yakri Debeini Jisas Krais wosik nutaurumep meyoh. Yakri Iruhin anan urkum munawashamep abom aria ananin Mishin nyutaurum ipak ihishmorim abom um pupe aturuh aparuh.

---

\* **13:12:** Baugenym um baraen nyetem eshesh Grik esheshin baraen iri douk nyakri shanopuprik nuguriruh meyoh.

## Apudok Shup Douk Pol Nenekap Panam Eshesh Galesia Iri Banenyi Baraen Um Enyudok Baraen Pol Neneken Nyanak Um Eshesh Galesia Iri

1:1-5 Pol nakripesch yopinyi baraen um Iruhin nutaurumesh meyoh  
 1:5-2:21 Pol nakrip eshesh Galesia um Iruhin ananin yopinyi baraen atin.  
 Baugenym enyudok Iruhin ananin baraen douk nyakri apak ta munek  
 bilip um Krais atun  
 3:1-4:31 Apak monek bilip um Krais atun aria Iruhin natrup nahwarap  
 yopishi arpesh. Lo seiwok Iruhin nakoguk Moses um uwok  
 5:1-6:10 Krais nenekap matogur wosik atin aria Iruhin ananin Mishin  
 nyataurumap monek yopihi atih aih  
 6:11-18 Pol nakripesch baraen um eshesh ta gamo shudukemesh um  
 enesh arpesh ta shukripesch um shutah esheshiruh yegeshiweruh. Aria  
 nakripesch ananin nyatuh iri baraen shopunek.

<sup>1</sup> Eik Pol anan aposel yenek apudok shup. Madae enesh arpesh shishopoke aria enen arpen nyitiwe um inek enyudok mour aposel uwe, uwok. Yain Iruhin douk nohur Jisas Krais nikitakuk um agundok nagok um iri nani Jisas Krais amam hatiwe um inek enyudok mour. <sup>2</sup> Eik Pol yani ihm ashukenyim owarhim hani eik mape agundok iri moneku apudok shup aria makripepogu um yopuhi nyumnah. Monekap panamagu ipak Iruhin ananish arpesh douk pape sisigirub warub agudok shokugi nahobig Galesia iri. <sup>3</sup> Apak makri apakin Yain Iruhin nini Debeini Jisas Krais wosik hutaurumep meyoh aria ipakiruh aparuh hur wosik. <sup>4</sup> Krais nagipesch apakin Yain Iruhin ananim urkum aria nekesh anan kanak shan nagok nator apakish yoweishi inahos. Nataurumap namulok aria douk nakweshihap um ehudok sabaihi yoweishi aih douk hape agundok atap iri um douk ta mupe wosik. <sup>5</sup> Namudok aria iih nyumneh apak ihishmorim douk mutuk Iruhin ananin nyeigur abom nyuto iruhw. Adur atin.

### *Iruhin Ananin Yopinyi Baraen Douk Atin Arag Abom*

<sup>6</sup> Eik douk yaktak yowiyokuk meyoh abom um ehudok ipak penekah iri aih. Iruhin douk nahwarep panakumori anan um enyudok mour douk Krais neneken um nataurumep meyoh um. Aria madae roubi nyutob uwe aria wata pakri pukutunukuk pugipes enen kupainyi baraen douk shakriep um Krais um. <sup>7</sup> Aria Iruhin ananin yopinyi baraen douk madae enen shopunek nyupe abom uwe, uwok. Eik douk yakri enyudok maren baraen, enesh arpesh douk shape shuaribok um ipakip urkwip shukwiraeh um shububodig um Krais ananin yopinyi baraen. <sup>8</sup> Aria ta apak meyoh o enen nyape iri iruhw heven iri ensel nyunaki nyukriep enen kupainyi baraen douk madae nyudukem enyudok apak marik makripepen iri um uwe, aria enyudok arpen wosik eik yakri Iruhin nishopoken nyunak um nyih hapenyaburi wabur hel aria nyupe ganudok iih nyumneh. <sup>9</sup> Riguk apak douk makriyen aria douk wata ikriyen shopunek. Aria enen arpen nyukriep enen kupainyi baraen douk madae nyudukem enyudok riguk paraen iri um uwe, aria enyudok arpen wosik eik yakri Iruhin nishopoken nyunak um nyih hapenyaburi wabur hel aria nyupe ganudok iih nyumneh.

<sup>10</sup> Eik madae ikri enyudok baraen um inek arpesh shumnek aria shunadudarehume, uwok. Eik yakri Iruhin atun nutruwe nukri wosik. Adur atin, eik douk madae ikri um inek arpesh shunadudarehume, uwok. Aria adur douk eik wata yape um yenekesh namudok akure, aria eik douk madae inek Krais ananin mour abom iri uwe, uwok.

### *Pol Nakripesch Um Agundok Natogur Aposel Um*

<sup>11</sup> Ipak Kristen, wata ikripep. Enyudok Iruhin ananin yopinyi baraen eik yakripen iri douk madae enen arpen meyoh nyunyuhur uwe, uwok.

<sup>12</sup> Madae enen arpen nyukripeyen o enen arpen nyunebreshe-umen uwe, uwok. Jisas Krais anan meyoh neyabigeyen.

<sup>13</sup> Aih riguk yenekehiri, um agundok yagipesh apak Juda apakih aih um douk pemnek baraen. Dodogoiwe atuwe abom yenekeh enenyen eshesh Iruhin ananish arpesh sharaao debeiri eriger. Aria yabisak dodogoiwe atuwe yawkiraeh um inununish meyoh. <sup>14</sup> Agundok douk yagipesh apak Juda apakih eneheneh aih aria yeneh lotu um Iruhin um, eik douk yeshagrakuk abom amudok Juda douk hani eik apak manoprom matogur manakwaram atin kwar um. Dodogoiwe atuwe abom yagipesh ekish popehesh yamehesh esheshih aih. <sup>15</sup> Aria eik douk wata shiyubuki uwe, aria Iruhin douk nagraehe. Anan douk nataurume meyoh abom aria nahware um itogur ananive. Arigha abudok anan nakriyobi nyutob batogur <sup>16</sup> aria neyabige ananin nugarin. Neyabigeyan um inak ikrip kupaishi douk eshesh madae Juda iri uwe um ananin yopinyi baraen. Aria abudok nyutob, eik douk madae inak iyorik enen arpen um ta inekesh mumam uwe, uwok. <sup>17</sup> O shopunek madae ito um Jerusalem ikih itik mamudok douk harik hatogur aposel aria eik yagiguk yatogur aposel iri uwe, uwok. Aria yanak abom um agudok debeigi nahobig Arebia yape aria wata yatanam yanak um Damaskus. <sup>18</sup> Douk arigha biyesh atin kwarahos shanak shadiguk aria ko yato um Jerusalem um ini Pita wiyawreh. Yato aria yani anan wape biyog wlik atuh nyumnah meyoh. <sup>19</sup> Aria douk madae itik anan shopunek aposel uwe, uwok. Yatik Jems, Debeini ananin wanin atun. <sup>20</sup> Iruhin douk natife aria nadukemesh um enyudok yenyemori baraen, um agundok madae inak itik anan shopunek aposel um uwe douk madae inek rohw uwe, uwok. Adurin atin. <sup>21</sup> Douk arigha aria yanak um agusudok biyagos shokugosi nahobigos shahwaragos um Siria iri Silia. <sup>22</sup> Aria eshesh Iruhin ananish arpesh douk shenek bilip um Krais aria shape agudok shokugi nahobig Judia iri douk watak shutik eikig yamag shudukeme uwe, uwok. <sup>23</sup> Eshesh douk shemnek baraen atin shakri, "Anudok arman riguk nenekap enenyen aria marao eriger iri, ahudok nyumnah douk nape nakripesch baraen um enyudok bilip riguk nakri nen nununin iri." <sup>24</sup> Eshesh douk shemnek baraen um Iruhin nenekesh um eik namudok aria shutuk ananin nyeigur nyato iruhw.

## 2

### *Amudok Anam Aposel Hakri Wosik Um Pol Neneken Iri Mour*

<sup>1</sup> Eik yape arigha 14-poreish kwarahos shanak shadiguk, aria yani Barnabas watanam wanak um Jerusalem. Taitus shopunek yaruman nani eik wanak. <sup>2</sup> Eik douk yanak um maresh? Iruhin neyabige nakri eik ta inak. Yanak yani amam debeimi um Iruhin ananish arpesh iri atum mape aria yape yakripam baraen. Yakripam um enyudok Iruhin ananin yopinyi baraen douk riguk yape yakrip kupaishi douk eshesh madae Juda iri uwe. Yakripam namudok um yakri hudukemesh. Uwok um, ta enyudok douk

yeneken iri o riguk yarig yeneken iri mour ta nyunak nyubuhuk meyoh. <sup>3</sup> Taitus anudok neiri eik wanak iri, anan douk anam um eshesh Grik. Aria amam debeimi douk madae hiyawreh um apak ta mutah ananihw yegenyihw uwe, uwok. <sup>4</sup> Adur, anam armam douk henek rohw hakri amam hasuhw Krais ananin bareaen aria hanaki hawishumapari. Amudok armam douk henek rohw hanabeshuk hawisham um hakri hudukemesh um okwudok outuk apak matukur Krais Jisas aria mape wosik atin um. Krais nakweshihapuk jürug um agundok enyudok lo seiwok Iruhin nakoguk Moses enyi nyoweshikap um aria mape fri abom. Aria amudok armam wata hakri hunekap mupe kabi shonoweshik iri arpesh um agundok mugipesh enyudok lo um. <sup>5</sup> Aria apak madae wosik mumnek amamin bareaen uwe, uwok. Um maresh? Apak makri muyoh enyudok adurinyi Iruhin ananin yopinyi bareaen um ipak punek bilip wosik. <sup>6</sup> Mamudok shahwaram debeimi um Iruhin ananish arpesh iri, eik douk yakri madae anam debeimi anam shokumi uwe, uwok. Iruhin madae nutik aduk meyoh arpeshiruh yegeshiweruh aria nukri enesh yopishi enesh yoweishi uwe, uwok. Amudok debeimi douk madae hunaki hukripe enen kupainyi bareaen shopunek um inak ikripesh uwe, uwok. <sup>7</sup> Aria amudok debeimi douk hadukemesh hakri Iruhin adur neke enyudok mour um inak ikrip kupaishi douk eshesh madae Juda iri uwe um ananin yopinyi bareaen. Kabi douk Iruhin nakon mour Pita um nukrip eshesh Juda anan Iruhin ananin yopinyi bareaen um. <sup>8</sup> Iruhin nataurum Pita nenekan dodogowin um nunek enyudok mour aposel nukrip eshesh Juda um anan Iruhin ananin bareaen. Aria namudok atin. Eik douk anan neneke dodogoive um inek enyudok mour aposel um ikrip kupaishi douk eshesh madae Juda iri uwe um ananin bareaen. <sup>9</sup> Jems nani Pita iri Jon douk eshesh Iruhin ananish arpesh shakri nyeiguhw shato umam iri, amam douk hadukemesh hakri eik douk Iruhin nataurume meyoh aria neke enyudok mour. Namudok aria hakohw roguhw ohwak eik yani Barnabas menekesh kabi arpesh shanasupom shenek mour atugun iri um. Aria mabo atin bareaen namudok. Eik ini Barnabas wosik unak uneck mour utaurum kupaishi douk eshesh madae Juda iri uwe aria amam hunak hutaurum eshesh Juda. <sup>10</sup> Aria amam douk hakripohw abom atin bareaen meyoh. Hakri apak ta mupe um mutaurum eshesh Iruhin ananish arpesh Juda douk shape Jerusalem aria shanahwaram um yaruhih arpesh. Aria enyudok, riguk eik douk mishin nyakitakumen abom aria dodogoive atuwe yape yeneken.

### *Pol Nowereh Pita Nenekeh Iri Yoweishi Aih*

<sup>11</sup> Abudok nyutob Pita nanak natograri wabur Antiok obi nyutob, eik douk madae imnek ananin bareaen abom agundok nabesinum. Um maresh? Eneh anan nenekeh iri aih douk madae yopih uwe, uwok. <sup>12</sup> Amudok Jems neshopokam hanaki iri douk watak hunak hutograri uwe, aria abudok nyutob Pita apa nanak nani enesh Iruhin ananish arpesh douk eshesh madae Juda iri uwe shape atugun shape shawok worigun. Aria amam hanak hatograri aria anan neneck yoweishi inahos um wata neyotukuk rougun aria madae nunak nini eshesh shugnoph atugun uwe, uwok. Um maresh? Anan nanogugur um amam shenek bilip iri Juda douk dodogowim atum abom um agundok yegeshiweruh hunatah iri um. <sup>13</sup> Amudok anam henek bilip iri Juda douk hatik Pita namudok, aria amam shopunek heiran henek rohw hape henek ehudok madae yopih aih iri uwe. Henekesh namudok aria hohuran mishin Barnabas shopunek nenekek kabi amam henekesh um.

<sup>14</sup> Douk arigaha aria eik yatik um amam madae henekesh wosik kabi enyudok Iruhin ananin adurinyi yopinyi bareaen nyakrium uwe, uwok.

Namudok aria yakrip Pita um amamis nabes yakri, "Nyak douk enen um Juda, aria nyenekeh iri aih douk kabi eshesh madae Juda iri uwe shenekeh iri um. Madae nyugipesh kabi apak Juda monekesh um uwe, uwok. Namudok aria mumam namudok, um wata ddogowin um kupaihi um shugipesh apak Juda apakih aih um?"

### *Eshudok Douk Shakri Krais Ananin Baraen Adurin Shagipeshen Iri, Iruhin Douk Nahwaresh Yopishi Arpesh*

<sup>15</sup> Adur, shobuki apak iri amakenyish douk Juda. Apak douk madae mukitak eshesh kupaisi áwiros uwe, douk apak Juda makri shenek yoweishi inahos iri uwe, uwok. <sup>16</sup> Aria apak douk madukemesh. Iruhin madae nuhwar enen arpen yopunyi um agundok nyagipesh lo douk seiwok Iruhin nakoguk Moses enyi um uwe, uwok. Arpen nyukri Jisas Krais ananin baraen adurin nyugipeshen iri atin wosik Iruhin ta nuhwaren yopunyi. Apak Juda shopunek makri Jisas Krais ananin baraen douk adurin magipeshen um makri Iruhin wosik nuhwarap yopupari. Ta mare nuhwarap yopipari um agundok mugipesh enyudok lo um, uwok. Um maresh? Iruhin ta mare nuhwar enen arpen yopunyi um agundok nyugipesh enyudok lo um, uwok. <sup>17</sup> Apak douk makri Krais ananin baraen adurin magipeshen aria makri Iruhin nahwarap yopishi arpesh um namudok. Namudok aria abudok nyutob apak mare mugipesh lo aria enesh Juda shutrup shukri apak mape munek yoweishi inahos kabi eshesh madae Juda iri uwe um, namudok apak ta mukri mumam? Aria ta mukri Krais napuhur munek yoweishi inahos aka? Adur atin uwok. <sup>18</sup> Aria ta eik wata ipe ikwiraeh um igipesh enyudok lo riguk yarig yabrigen iri um, namudok douk yanowereh abom um eik adur yenek yoweishi inahos. <sup>19</sup> Aria douk eik urkum morum enyudok lo um, eik douk madae inek debeinyi mour um igipeshen uwe, uwok. Yagipesh Iruhin ananim urkum um. <sup>20</sup> Eik yatukur Krais aria kabi douk yan anan wagok weir kruse um. Namudok aria douk yape um douk madae eik meyoh ipe uwe, uwok. Krais anan napenye. Agundok douk yape agundok atap um douk yakri Iruhin ananin Nuganin ananin baraen adurin yagipeshen aria douk neneke dodogoive yape. Yape kabi douk Iruhin nakri um eik ipeum. Krais anan douk urkum manawasham eik abom aria nagok nataurume. <sup>21</sup> Eik douk madae ikri Iruhin nuhwarap yopupari um agundok apak mugipesh lo um uwe, uwok. Douk ikri namudok akure, namudok douk yekenyuk agab enyudok Iruhin neneken iri mour um nataurumap meyoh aria neshopoki Krais nanaki nataurumap um. Um maresh? Ta Iruhin nuhwar arpesh yopishi um agundok shagipesh ananin lo um akure, aria Krais douk nagok meyoh!

## 3

### *Ehudok Biyeh Aih Um Shagipesh Lo Um Hani Agundok Shenek Bilip Um Krais Um*

<sup>1</sup> Ipak Galesia douk pogugak abom. Eik douk yape yowerehumep baugos abom um agundok Jisas Krais nagok rowog kruse um. Douk yakripeg wosik aria kabi ipak kanak patrun abom ipakis nabes um. Aria omi wata nyenekep pogugak pawish patogur? <sup>2</sup> Yakri iyorigep atin baraen meyoh. Yakri ipak parao Iruhin ananin Mishin um meihi yah, aria ta pagipesh lo douk paraen aka, pumnek Iruhin ananin baraen penek bilip aria douk paraen? <sup>3</sup> Aria ipak douk adur pogugak abom aka? Tik, sagomatin douk Iruhin ananin Mishin nyataurumep pagipesh namuhi yah. Aria douk wata pakri pugipesh ahudok yah arigaha putogur yopipari um ipakin dodog meyoh aka? <sup>4</sup> Ihinyumori riguk nyatogrumepliri amaen douk

nyatogrumeyp meyoh aka? Eik yakri enyudok douk madae nyutogrumeyp meyoh uwe, uwok. <sup>5</sup> Iruhin douk nekep ananin Mishin aria napeum nenek debeinyi mour um Iruhin atun neneken iri mour nyatogur patrin. Aria nenekumep namudok um agundok pemnek ananin yopinyi baraen pasuhwen pagipeshen um o nenekumep um agundok pagipesh lo um?

<sup>6</sup> Ipak douk urkwip purum Abraham. Iruhin ananik Buk douk kwakri, “Anan nenek bilip meyoh um Iruhin aria Iruhin douk nahwaran yopuni arman.” <sup>7</sup> Namudok aria douk pudukemesh. Arpesh shunek bilip um Iruhin iri douk Abraham ananish batowish abom. <sup>8</sup> Seiwok watak, aria Iruhin nadukemesh nakri kweipon eshesh madae Juda iri uwe ta shumnek ananin yopinyi baraen aria shusuhwen dodog. Aria anan douk urkum morum nakri kweipon ta nuhwaresh yopishi arpesh. Namudok aria seiwok nakripan yopinyi baraen Abraham kabi Iruhin ananik Buk kwakri um. Kwakri, “Iruhin nakrip Abraham nakri, ‘Nyak nyenek bilip um eik. Namudok aria kweipon ta inekumesh yopinyi ihish agundok atapishi arpesh.’” <sup>9</sup> Abraham nenek bilip aria Iruhin nenekuman yopipi aih abom. Namudok aria ihish shunek bilip iri arpesh, Iruhin ta nunekumesh yopipi aih namudok atin kabi neneken um Abraham um.

<sup>10</sup> Aria ihish arpesh douk shakri Iruhin ta nuhwaresh yopishi um agundok shagipesh lo um iri, eshesh Iruhin douk nakri um ta shupe yoweishigom abom. Um maresh? Ananik Buk douk kwakri, “Thish arpesh douk madae shupe um shugipesh ihinyumori baraen nyetem ananik Buk lo nyetemok iri um uwe, eshesh Iruhin douk nahwaresh yoweishi aria nakri um shupe yowesh abom.” <sup>11</sup> Baraen douk gamo nyape yopugunum abom um, Iruhin madae nuhwar enen arpen yopunyi um agundok nyagipesh lo um uwe. Um maresh? Iruhin ananik Buk kwakri, “Arpen nyunek bilip iri, Iruhin ta nuhwaren yopunyi aria ta nyupe ihih nyumneh.” <sup>12</sup> Agundok arpesh shagipesh lo um douk madae shunek bilip um Iruhin uwe, uwok. Eshesh kanak ta shugipesh ihinyumori lo wosik atin abom kabi baraen nyetem Iruhin ananik Buk iri nyakrium. Lo nyakri, “Arpen nyugipesh ihinyumori lo nyakriyeh abom iri aih wosik atin um, enyen ta nyupe wosik ihih nyumneh.”

<sup>13</sup> Aria Iruhin ananin lo douk nyakri, “Meishi arpesh shubrig enen lo iri, eshesh douk amaen nyapeyesh aria ta shupe yowesh abom.” Aria apak douk Krais nator apakish yoweishi inahos aria nakweshihap um mupe wosik atin. Um maresh? Iruhin ananik Buk douk kwakri, “Thishmorim arpesh douk shenek nyilimesh sheir rowos iri, eshesh douk Iruhin nahwaresh yoweishi aria nakri um shupe yowesh abom.” <sup>14</sup> Krais nenek enyudok mour um enyudok yopinyi seiwok Iruhin nakrip Abraham um ta nyutogur um kupaishi arpesh douk eshesh madae Juda iri uwe. Nenekesh namudok um apak wosik munek bilip um Krais aria murao Iruhin ananin Mishin kabi seiwok anan nakriyuk adurin atin baraen um.

### *Iruhin Ananin Lo Ta Mare Nyiyatakuk Ananin Adurin Atinyi Baraen, Uwok*

<sup>15</sup> Ipak ashukenyish owashish, douk yakri ikripep enen baraen um agundok apak arpesh mape magipeshen um. Aria biom armam hubo enen adurin atinyi baraen kontrak um hunek enesh eshudok eneshenesh um, enyudok baraen ta mare wata enen arpen nyubrigen o nyuwemaguk enen baraen shopunek, uwok meyoh. <sup>16</sup> Enyudok adurin atinyi baraen, Iruhin douk nakrip Abraham nani enen ananin barhenyin. Iruhin ananik Buk douk madae kwukri um sabaishi arpesh uwe. Madae kwukri, “Nyak nyuni nyakish barheshish” uwe, uwok. Aria Iruhin ananik Buk kwakri, “Nyak nyuni enen nyakin barhenyin.” Enyudok baraen douk nyakri atin arpen.

Aria enyudok arpen douk Krais. <sup>17</sup> Baugenylum um enyudok eikin bareaen douk namudok. Seiwo Iruhin nakri enen adurin atinyi bareaen kontrak nakrip Abraham. Douk arigah 430-poreish kwarahos shanak shadiguk, aria enyudok Iruhin nakoguk Moses enyi lo nyagiguk nyatogur. Enyudok lo douk nyagiguk nyatogur, aria enyen douk madae wosik um nyubrig enyudok kontrak aria nyiyatakuk ananin adurin atinyi bareaen uwe, uwok. <sup>18</sup> Aria ta apak mugipesh lo aria murao eneshenesh yopishi eshudok mugremesh akure, aria apak mudukemesh namudok. Apak douk madae mugipesh enyudok adurin atin bareaen aria muraesh uwe, uwok. Aria Iruhin nakripan enyudok atin adurinyi bareaen Abraham aria natauruman meyoh nakon eshudok eneshenesh. <sup>19</sup> Namudok aria lo douk nyanakumori apak um maresh? Enyen douk Iruhin nagiguk nadrani ananin promis um abudok nyutob munek yoweishi inahos obi nyutob, enyen ta nyeyabigap aria mudukemesh mukri apak munek yoweishi inahos. Aria enyudok lo douk nyape arigaha anudok Abraham ananin barhonin seiwo Iruhin nakriyuk adur atin um ta nutograri iri natogur. Enyudok lo douk Iruhin nakripi enselahos shanaki shakrip Moses. Moses douk nape orokohun um apak mani Iruhin iri, aria Moses nanaki nako apak. <sup>20</sup> Nape orokohun narahaem um bareaen iri ta nurahemen mumam aria wobresh atish arpesh shupe um? Ta uwok. Aria Iruhin douk anan atun meyoh aria madae enesh um shutauruman uwe, uwok. Anan atun wosik nakop ananin adurin atinyi bareaen promis.

### *Enyudok Lo Douk Nyeyabigap Yah Meyoh Um Munak Um Krais*

<sup>21</sup> Enyudok promis douk madae anah yah um Iruhin nuhwar arpesh yopishi aria enyudok lo kupaihi yah uwe, uwok. Iruhin anan madae biyeh yeh um nuhwar arpesh yopishi um uwe, uwok. Anan douk atuh yah meyoh. Douk ta enen lo ta wosik nyutaurumap mupe wosik abom iih nyumneh akure, aria Iruhin ta nuhwarap yopupari um agundok mugipesh enyudok lo um. <sup>22</sup> Aria uwok. Iruhin ananik Buk douk kwakri, "Eneshenesh yoweishi inahos showeshikesh dodog abom agnudok atapishi ihishmorim arpesh." Eshesh showeshikap namudok um apak munek bilip um Jisas Krais iri ta murao yopishi eshudok eneshenesh. Eshudok douk seiwo Iruhin nakri adurin atinyi bareaen um nuko eshesh shenek bilip um Krais iri. <sup>23</sup> Abudok nyutob ahudok yah shenek bilip um watak hutogur obi nyutob um uwe, enyudok lo douk nyoweshikap abom mape arigah arigah ahudok yah shenek bilip um hatogur hanowereh. <sup>24</sup> Lo douk nyape nyeyabigap yah meyoh nyarap arigah arigaha Krais natogur munek bilipuman um Iruhin nuhwarap yopishi arpesh. <sup>25</sup> Douk bilip nyatogur aria lo madae nyupe nyiyabigap yah uwe, uwok.

### *Apak Munek Bilip Um Krais, Aria Douk Matogur Iruhin Ananish Batowish*

<sup>26</sup> Ipak ihishmorim douk pakri Krais Jisas ananin bareaen adurin atin pasuhwen pagipeshen. Namudok aria Iruhin nahwarep ananish batowish. <sup>27</sup> Meishi arpesh ipak douk shenek baptaisumep um Krais ananin nyeigur aria patukur anan iri, ipak douk patogur kabi anan kanak abom um. <sup>28</sup> Namudok aria eshesh Juda madae enesh kupaishi um eshesh madae Juda iri, shape shakammum kupaishi um shenekumesh mour meyoh iri, aria enesh kupaishi shape wosik atin iri, aria enesh kupaishi um armam kupaimi aria armago ono kupaiwari shopunek uwe, uwok. Ipak ihishmorim douk patukur Krais aria patogur atin arpen meyoh abom. <sup>29</sup> Aria ipak pupe Krais ananip um, aria enyudok douk nyenekep pape Abraham ananish barheshish um. Aria kweipon ta pugrem yopishi eshudok eneshenesh douk seiwo Iruhin nakripan adurin atin bareaen Abraham um ta nukepesh iri.

## 4

*Apak Eneshenesh Showeshikap Iri Douk Munek Bilip Um Krais Aria  
Iruhin Nahwarap Ananish Batowish*

<sup>1</sup> Eikin bараen douk namudok. Anan nуганин ta nugrem ihishmorim yakenish eshudok eneshenesh. Ihishmorim eshudok douk adur ananish atish. Aria abudok nyutob anan wata batowin obi nyutob, anan douk wata nape kabi nape shakamum kupaini nenekuman mour meyoh iri um. Anan douk nyeigur wokan. <sup>2</sup> Abudok nyutob watak kupaimi douk yaken nagraeham um hatauruman aria hiyagwreh um hukri ananish eshudok eneshenesh. Ta henekesh-uman namudok arigaha yaken nakriyobi nyutob butogur, aria ta mare wata hiyagwreh um ananish eshudok eneshenesh uwe, uwok. <sup>3</sup> Aria apak douk namudok atin. Riguk apak douk mape kabi batowish um, aria eneshenesh yoweishi shape iruhw atap iri showeshikap dodog mape shakam-umesh. <sup>4</sup> Aria arigaha Iruhin nakriyobi nyutob batogur abom, aria neshopoki ananin nуганин nanaki. Nanaki onok armatok kwanabuki natogur arpen, aria nape shakamum enyudok lo seiwok Iruhin nakoguk Moses um. <sup>5</sup> Iruhin neshopokan nanaki um wata nutor apak douk mape magipesh enyudok lo iri. Natorup um mutogur Iruhin ananish batowish abom.

<sup>6</sup> Ipak douk pape Iruhin ananish batowish. Namudok aria anan neshopoki ananin nуганин ananin Mishin nyanaki nyawish apakiruh aparuh aria nyapuhur mape mahwar makri, “Aba! Yain!” <sup>7</sup> Namudok aria ipak mare pupe kabi arpesh douk shape shakamum kupaishi aria shape shenekumesh mour meyoh iri um uwe, uwok. Ipak douk Iruhin ananish batowish. Namudok aria ta purao ihishmorim yakenish eshudok eneshenesh pugremesh.

*Pol Anan Douk Urkum Yowem Abom Um Eshesh Galesia*

<sup>8</sup> Adur, riguk ipak madae pudukemesh um Iruhin uwe, uwok. Ipak pape shakamum amudok douk amadoum madae adurim god omi iri uwe, aria howeshekip dodog. <sup>9</sup> Aria douk ahudok nyumnah padukemesh um Iruhin. Aria ikri Iruhin nadukemesh um ipak abom. Aria mumam namudok, um wata pakri putanam pugipesh eneshenesh rohwish madae dodogowish iri uwe yoweishi eshudok wata shuweshikep um? <sup>10</sup> Ipak douk pakri Iruhin ta nuhwarep yopipari um agundok pugipesh lo aria urkwip porum eneh debeihi nyumneh hani namubi aub bani namushi kwarahos um. <sup>11</sup> Namudok aria eik apahw yowehw abom um ipak. Yakri yanogugur um ta mour yeneken yataurum ipak um nyunak nyubuhuk meyoh. <sup>12</sup> O eikish ashukenyish owashish, eik douk dodogoiwe atuwe abom um yakri ipak pudukem eik abom. Pudukemesh um pukutukuk ahudok yah shagipesh lo um. Eik douk yadukem ipak. Riguk yani ipak mape um, ipak douk madae punekume eneh yoweishi aih uwe, uwok. <sup>13</sup> Ipak padukemesh, um agundok sagomatin yanaku yakripep Iruhin ananin yopinyi baraan um. Douk arugeh hae aria douk yanaku yape roubi nyutob yape yakripepen. <sup>14</sup> Adur, eik douk arugeh hae yegeniyihw hwape yowehw. Ehudok arugeh hatogrome um hukwiraeh ipak aria henek ipak parao amaen, aria ipak douk madae pukeik agabus pakri arigeh hep pukutukuk eik uwe, uwok. Ipak parae kabi ta purao enen Iruhin ananin ensel um o purao Krais Jisas anan kanak um. <sup>15</sup> Riguk ipak douk panadudareh abom. Aria ahudok nyumnah douk wata mumam? Eik yadukemesh abom um ipakih aih douk yopih abom. Aria abudok nyutob ipak ta wosik putuk ipakis nabes

putaurume akure, ipak ta putukas pukeyas. <sup>16</sup> Aria douk mumam? Aria eik ta yatogur ipakin horin um agundok yakritep adurinyi baraen um aka?

<sup>17</sup> Adur, mamudok anam armam douk hape hakwiraeh um hakri huhurep mishish aria pugipesh amamin baraen. Aria eshudok hakri hunekesh iri ta mare shunekumep eneh yopihi aih, uwok. Amam douk hakri hudiyogur ipak puni eik um ipak pugipeshuk amam atum abom. <sup>18</sup> Aria namudok douk wosik, ta ipak mishish shikitak abom aria dodogowip atip um punek yopihi atih aih um. Aria ipak ta punekih nyumneh. Mare pukri punekih nyutob eik ini ipak mupe obi nyutob atub, namudok uwok. <sup>19</sup> O ipak douk patogur abom kabi eikish batowish-umori, anah shopunek eik yemnek debeiri eriger abom um ipak kabi onok armatok kwomnek eriger um kwubanuh um. Yemnek ipak um ta eriger ta wata rupe namudok arigaha ipak putogur Iruhin ananish batowish abom pudukem Krais anan kanak. <sup>20</sup> Douk ahudok nyumannah yakri adur abom um ini ipak mupe agundok. Yakri ini ipak mupe um ikritep enyudok baraen shokubur meyoh um pumneken aria pudukemesh um agundok eik urkum morumep um. Eik douk madae ipe wosik abom um ipak uwe, uwok. Ta itaurumep mumam?

### *Wobuwobren Baraen Um Bio Armago Sara Kwani Hagar*

<sup>21</sup> Eik yakri iyorik ipak douk pakri pugipesh lo iri. Ipak pemnek aria ta padukemesh aka uwok, um agundok lo nyakrium? <sup>22</sup> Iruhin ananik Buk kwakri Abraham nobuki biom nugamim. Anan Hagar douk kwonekumesh mour meyoh iri kwanabuki. Aria anan Sara okwudok kwape wosik atin iri kwanabuki. <sup>23</sup> Anudok nunganin Ismael douk kwonekumesh mour meyoh kwanabuki, okwok douk kwanabuki ahudok atuh yah kabi shabuki batowish um. Aria Aisak, okwudok kwape fri iri kwanabuki iri, okwok douk kwanabuki kabi seiwok Iruhin nakriyuk adurin atin baraen promis um ta kwanabuki um. <sup>24</sup> Enyudok baraen enyen douk ta mukri wobuwobren baraen. Oudok bio armago weyotu um biyen dodogowin atinyi baraen kontrak. Enen baraen kontrak douk enyudok lo Iruhin nakoguk Moses gani ahwudok yoduhw nyeigurihw um Sainai. Hagar douk kweyotu um enyudok. Arpesh shagipesh enyudok lo Iruhin nakoguk Mosesen iri, eshesh douk shape kabi shonoweshik iri arpesh um agundok shagipesh enyeneyen lo um. <sup>25</sup> Hagar douk kwape kabi wobuwobren baraen um ahwudok yoduhw Sainai douk hwape agudok debeigi nahobig nyeigurig um Arebia. Okwok douk shopunek wobuwobren baraen um abrudok doukibur wabur Jerusalem. Um maresh? Eshesh shape Jerusalem iri douk ihishmorim shape kabi shonoweshik iri arpesh, um enyudok lo nyoweshikesh um. <sup>26</sup> Aria enyudok enen baraen douk enyudok adurin atinyi promis Iruhin nako Abraham um. Sara douk kweyotu um enyudok baraen. Aria okwok douk shopunek kweyotu um abrudok wabur Jerusalem douk bape iruhw heven iri. Okwok douk apakik amakek. Um maresh? Apak douk madae kabi showeshikesh iri arpesh um uwe, uwok. <sup>27</sup> Iruhwibur wabur Jerusalem douk beshagrakuk abrudok doukibur wabur Jerusalem. Baraen nyetem Iruhin ananik Buk iri nyakri namudok. Nyakri, "Nyak armatok nyape kupin iri, nyak wosik nyunadudareh. Nyak armatok madae nyumnek eriger douk wobuki batowish wemnekar iri, nyak nyunadudareh nyuhur nokwat nyupe nyuhwar. Armatok anan neyatok iri douk kwabuki sabaishi batowish kweshagrakuk arman napemok iri okwokwish."

<sup>28</sup> Aria douk, ipak eikish ashukenyish owashish douk padukem Aisak. Ipak douk patogur Iruhin ananish batowish um enyudok anan Iruhin nakri enyi adurin atinyi promis. <sup>29</sup> Seiwo anudok nunganin douk shagipesh

ahudok atuh yah shabuki batowish um shanabuki iri, anan douk nakitak nenenk yoweishi aih um anudok anan douk shape dodogowish um Iruhin ananin Mishin shanabuki iri. Namudok aria ahudok nyumnah douk namudok atin. <sup>30</sup> Aria Iruhin ananik Buk douk kwakri mumam? Okwok douk kwakri, “Dodogowip um Hagar douk kweneukumesh mour meyoh iri kwuni okwokwin nuganin Ismael shunakuk. Um maresh? Okwokwin nuganin ta mare nini Sara, Abraham ananik armatok okwokwin nuganin Aisak hugrem yakenish eshudok eneshenesh uwe, uwok.” <sup>31</sup> Namudok aria ekish ashukenyish owashish, apak douk madae okwudok kweneukumesh mour meyoh iri okwokwish batowish uwe, uwok. Apak douk ananik kwape wosik iri armatok abom okwokwish batowish.

## 5

### *Krais Nakweshihap Aria Madae Wata Mukri Lo Nyuweshikap Shopunek, Uwok*

<sup>1</sup> Riguk douk yoweishi inahos showeshikap aria Krais wata nakweshihap mape wosik. Aria douk pupe dodogowip abom aria mare wata pukri pupe shakamum lo shopunek, uwok. Pupe wosik abom. <sup>2</sup> Mnek! Eik Pol yakriep enyudok! Aria ipak pakri wosik um amam hutah ipakiruh yegeshiweruh um Iruhin nutrip nuhwarep yopipari um, aria Krais ta mare nutaurumep, uwok meyoh. <sup>3</sup> Ipak ihipmorim armam douk pakri wosik um hutah ipakiruh yegeshiweruh iri, eik yakri ipak gamo pumnek. Pakri punek enyudokmori um, aria ipak ta pugipesh ihishmorim abom um Juda esheshin lo shopunek. <sup>4</sup> Ipak douk pakri Iruhin nuhwarep yopipari um agundok pugipesh enyudok lo iri um, ipak douk pakutukuk Krais jurug. Agundok Iruhin nataurumep meyoh um douk pakutunukuk. <sup>5</sup> Aria apak douk Iruhin ananin Mishin dodogowin atin nyapahur munek bilip um Krais. Aria madukemesh abom aria mape matrugun um anan ta nuhwarap yopishi arpesan. <sup>6</sup> Aria arpesan shutukur Krais Jisas um, aria ehudok aih um hutah yegeshiweruh um o madae hutah yegeshiweruh um uwe douk shopunek um rohwin atin. Aria adurin atinyi mour douk apak mukri Iruhin ananin baraen adurin mugipeshen wosik aria apakip urkwip punawasham kupaishi arpesan. <sup>7</sup> Riguk ipak douk pasuhwen pagipeshen wosik abom enyudok adurin baraen. Aria douk omi nyatapokumep yah, um ipak wata pugipesh adurinyi baraen um uwe? <sup>8</sup> Iruhin madae nupuhur um wata punekesh namudok uwe, uwok. Anan douk nahwarep aria nagraehep um pupe ananip iri. <sup>9</sup> Ipak urkwip porum enyudok wobuwobren baraen. Enyudok, “Asudok yis douk shakutus bret takitak debeiti iri, asas douk shakwutu muduk atin aria ihitmoris bret takitak debeiti.” <sup>10</sup> Ipak pani eik douk matukur Debeini. Namudok aria yadukemesh um ipak ta pugipesh amudok eikim urkum. Eik madae idukemesh um anudok arman uwe, douk nape nenenk rohwumep aria nenekep patogur rohwip iri uwe, uwok. Aria douk nyenekan. Kweipon Iruhin ta nuwanaman yoweishi inahos um enyudok anan neneken iri. <sup>11</sup> Ashukenyish owashish, ta adur eik wata yape yakripesha baraen um hutah yegeshiweruh aria Iruhin nutrum nuhwaran yopumi um, aria namudok mumam, um douk wata shape shenek enenyen um? Aria adur eik yakripesha akure, eik ta mare wata shupe shuneke enenyen um agundok yakripesha baraen um Krais nagok rowog kruse um, ta uwok. <sup>12</sup> Mamudok douk honowaribok ipakip urkwip iri douk yakri wosik um amam kanak hunak hutah amamiruh yegeshiweruh aria hukutukuk ipak pupe wosik atin.

<sup>13</sup> Eikish ashukenyish owashish, adur. Iruhin douk nahwarap um mutkeweshih aria mare wata enesh eshudok shuweshikap, uwok. Aria ipak douk mare wata pure urkwip pukri ahudok nyumnah douk putukweshih jurug pape wosik aria harik hapenyep iri yoweih iah wosik ta punekih, namudok uwok. Aria punekesh namudok. Ipak urkwip punawasham kupaishi aria putaurum kupaishi um eneheneh yopihi aih. <sup>14</sup> Ihinyumorim lo douk nyetem enyudok atin baraen. Baraen enyudok, "Nyak ta urkum munawasham kupaishi arpesh kabi nyak urkum munawasham nyak kanak um." <sup>15</sup> Aria ta ipak kanak pikitak punitok o purpak puwish putogur um, namudok douk ipak gamo pudukemesh. Ta ihipmorim punak puwishuk.

*Aih Douk Iruhin ananin Mishin Nyakwarumeh Iri Hani Harik Hapenyep  
iri Yoweih iAh Hakwarumeh Iri*

<sup>16</sup> Eik yakri-enyi baraen douk enyudok. Yakri pupe purahaen o punek enyenyen um, eik yakri pugipesh Iruhin ananin Mishin atin. Punekesh namudok um, harik hapenyep iri yoweih iah ta mare pugipesheh, uwok.

<sup>17</sup> Apak douk madukemesh. Harik hapenyap iri yoweih iah douk hakri hubo Iruhin ananin Mishin nyubuhuk, aria Iruhin ananin Mishin shopunek nyakri nyubo ehudok harik hapenyap iri yoweih iah hubuhuk. Aria ehudok biyeh aih douk ihilmorim yoweih hape namudok. Namudok aria enyudok mukri muneken iri ta mubirak mare muneken, uwok. <sup>18</sup> Aria ta pugipesh Iruhin ananin Mishin um, aria douk madae pupe shakamum lo uwe, uwok. <sup>19</sup> Ipak douk padukemeh ehudok harik hapenyep iri yoweih iah. Eeh douk ehudokmori. Shenek wehrur um, yoweih abraenyih iah, mishish shakitak um shunek dedebeishi atish yoweishi inahos abom um, <sup>20</sup> shunek lotu um madae adurimi god omi um uwe, shunek ouruh o maiyo um, ihishmorim yoweishi um, rupok nitok um, shenek nyigiyahum kupaishi esheshish eshudok eneshenesh um, juwehosish um, urkwip porum shakri shukwarum sabaishi eshudok shishagrakuk kupaishi um, juwehosish shakitak shanadiyogur um, <sup>21</sup> nyurub akasirub um kupaishi shape wosik um, shawok abar shagugak um, sheyorub anahaehiruh yoweiruhi aweruh um hani eneheneh ehudokmori aih. Riguk yakritep aria douk namudok atin wata shopunek ikritep debeiniyi baraen. Ihishmorim arpesh shenek ehudokmori aih iri ta mare shuwish agundok Iruhin nape Debeini um ananish arpesh um, ta uwok.

<sup>22</sup> Aria Iruhin ananin Mishin douk nyokwarum ehudokmori yopihi aih. Urkwip panawasham kupaishi um, shunadudareh um, aparuh hor wosik shape atugun um, madae juwehosish arigas atin um uwe, shataurum kupaishi um, shenek yopihi aih abom um kupaishi um, shape wosik abom um kupaishi shatrish shakri adur um, <sup>23</sup> shape samokwiyaishi um hani ehudok eneh um musuhw merik um apak kanak aria miyotu dodog mare munek yoweishi inahos um. Lo nyakrium mare munek ehudokmori aih iri douk madae enen uwe. <sup>24</sup> Ihishmorim Krais Jisas ananish arpesh douk showeshikeh hagokuk rowog kruse jurug ehudok harik hapenyep iri yoweih iah. Showeshiguk ehudok hani ehudok eneh aih um mishish shakitak um munek eneshenesh yoweishi inahos um. Shaweshikeh hagokuk aria madae shupe shakamum harik hapenyesh iri yoweih aih uwe, uwok. <sup>25</sup> Iruhin ananin Mishin douk nyekap jurug okwudok outuk um mupe wosik abom um. Namudok aria apak ta mugipesh ananin Mishin abom atin. <sup>26</sup> Apak mare mutuk apakish nyeiguw shuto iruhw meyoh aria mahur mukwiraeh um enyenyen o mutuk kupaishi esheshish eshudok eneshenesh aria munek nyigiyaumesh, namudok uwok.

## 6

*Apak Ta Munagapesh Um Mutaurum Kupaishi Atin Atin Um Enenyen*

<sup>1</sup> Eikish ashukenyish owashish, pakri puparug enen arpen nyunek enesh yoweishi inahos um, aria ipak pugipesh Iruhin ananin Mishin wosik abom iri wata putaurumen um enyen mare wata nyunek yoweishi inahos, uwok. Pukripen um, ipak mare pukripen debeg atin, uwok. Shokubur meyoh. Ipak atin atin shopunek ta gamo pudukemesh. Ta enesh eshudok shukwiraeh ipak shopunek. <sup>2</sup> Ipak ta punagapesh um putaurum kupaishi atin atin um agundok pusah enenyen enaen um. Punekesh namudok aria douk ta pugipesh Krais ananin lo abom. <sup>3</sup> Aria enen arpen nyukri enyen douk nyeigur nyato iruhumen, aria enyen nyeigur madae nyuto iruhw umen abom uwe, enyen douk nyenek rohw abom. <sup>4</sup> Ihishmorim atin atin ta shutik enenyen eshesh atin atin sheneken iri aria shukri eshesh shenek yopishi o yoweishi inahos. Aria shenek yopinyi um, aria eshudok arpesh wosik ta shunadudareh um enyudok eshesh kanak sheneken iri. Mare shukri shutik kupainyi arpen enyeniyah aih aria shukri shunek skelumen, uwok. <sup>5</sup> Um maresh? Eshesh atin atin wosik douk shusah enaen um esheshih aih sisigh atin. <sup>6</sup> Eshudok arpesh douk shenek skulum Iruhin ananin yopinyi baraen iri, eshesh ta shisiya ihishmorim esheshish yopishi eshudok eneshenesh aria wobresh shuko esheshin tisa. <sup>7</sup> Ipak mare punek rohw um ipak kanak, uwok. Arpen nyunek rohw um Iruhin iri douk madae enen uwe. Meiguni worigun enen arpen ta nyuwogun iri, enyen ta wata nyutuk agnudok atugun worigun. <sup>8</sup> Aria enyen nyupe um nyunek harik hapenepi iri yoweishi aih um, enyen ta nyutuk yoweiguni worigun namudok. Ta nyunak nyuwishuk abom. Aria ta enyen nyupe um nyunek yopinyi atin kabi Iruhin ananin Mishin nyakrium, enyen adur Iruhin ananin Mishin ta nyutaurumen nyupe wosik abom ihih nyumneh. <sup>9</sup> Namudok aria apak mare arigeh hop um agundok munek yopihi aih um, uwok. Aria apak mare mukutukuk yopihi aih um, nyutob ta butogur um Iruhin ta neneukmap yopinyi kabi worigun yopugun aria monak menekesh um. <sup>10</sup> Namudok aria ta ihih nyumneh eneh yeh hupe um apak munek enen enyudokmori um, apak ta munek yopinyi um ihishmorim arpesh. Aria sagomatian apak ta munek yopinyi um eshudok douk shani apak atup awirop um agundok munek bilip um.

*Pol Neyatak Baraen Nakripesh Enen Dodogowinyi Baraen Aria Neneukumesh Yopuhi Nyumnah*

<sup>11</sup> Ipak putik abudok debeibi behrab eik meyoh yakwu eikis wis yawemumepogu enyudok tukwanin baraen um. <sup>12</sup> Anam armam douk dodogowim hapeimep um hakri hutah ipakiruh yegeshiweruh. Amam douk henek enyudok um hakri kupaishi shutrum aria shutuk amamish nyeiguhw shuto iruhw. Amam hanogugur hakri ta kupaishi shutrum shudukemesh um amam douk henek bilip um Krais nagok rowog kruse um aria shukri shenekam enenyen. <sup>13</sup> Amudok apa hatah yegeshiweruh iri, amam douk madae hugipeshen wosik uwe, enyudok lo seiwok Iruhin nakoguk Moses um, uwok. Aria amam douk hakri ipak pugipesh enyudok lo um hutah ipakiruh yegeshiweruh aria amam hunatuk amamish nyeiguhw. <sup>14</sup> Aria eik douk ta mare inatuk eik kanak o ituk enesh kupaishi eshudok shuto iruhw, uwok. Eik ta ituk Debeini Jisas Krais ananin nyeigur atin nyuto iruhw, um agundok nagok rowog kruse um. Eik urkum morum agundok Jisas nagok kruse um aria yatik agundok atapihi yoweishi aih um douk yakri hugok. Aria eik douk shopunek kabi yagok iri um. Madae

dodogoiwe um inek eneh agundok atapihi aih uwe, uwok. <sup>15</sup> Aria hukri hutah anan arman ananihw yegenyihw o mare hutahohw um, enyudok douk shopunek atin rohwin mour. Aria sagomatinyin abom mour douk Iruhin nunekap mutogur namishi abom arpesh. <sup>16</sup> Ihishmorim arpesh shasuhw enyudok baraen shagipeshen iri, eik yakri Iruhin wosik nenek gihaumesh, nutaurumesh aria aparuh hur wosik shunadudareh. Aria eshesh douk Iruhin ananish abom adurish Israel. <sup>17</sup> Nyagikuk abom iri baraen douk yakri ikri, ipak mare wata enen arpen nyuke enen amaen shopunek, uwok. Riguk shae aria nyubrusug gwape eikihw yegenyihw iri douk gweyabigep abom um eik adur yasuhw Jisas ananin mour iri. <sup>18</sup> O eikish ashukenyish owashish, eik yakri Debeini Jisas Krais wosik nutaurumep meyoh ipak ihishmorim, aria nuneck ipakish mishish shur wosik. Adur atin.

# Apudok Shup Douk Pol Nenekap Panam

## Eshesh Efesus Iri

### Banenyi Baraen Um Enyudok Baraen Pol

### Neneken Nyanak Um Eshesh Efesus Iri

1:1-2 Nyarik iri baraen um Pol nanadudareh um nakri Iruhin nataurum eshesh Kristen Efesus.

1:3-3:21 Seiwok arigaha douk, Iruhin anan urkum manawasham apak. Namudok aria seiwok baugos um anan nanagraehap mape ananish arpesh aria narao sabaishi Juda shani eshesh madae shudukemesh um Iruhin iri uwe shape atish arag.

4:1-6:9 Yopihi aih apak Iruhin ananish arpesh apa mape lait iri ta mugipesheh iri

6:10-20 Apak munek bilip um Krais iri ta murao ahwudok wanohwiw suruhw um murpak aria mubo yoweishi inahos shubuhuk.

6:21-14 Nyatuh iri barea

<sup>1</sup> O ipak Iruhin ananishi arpesh pape Efesus, aria pasuhw Krais Jisas ananin bareaen dodog pagipeshen peyotu dodog iri. Eik Pol douk Iruhin nagraehe um itogur aposel um inek Krais Jisas ananin mour aria inak ikripesh ananin bareaen iri yenekumep-ogu apudok shup ipak. <sup>2</sup> Eik yakri apakini Yain Iruhin nini Debeini Jisas Krais hutaurumep meyoh aria hunek ipakiruh aparuh hur wosik.

*Iruhin Nekep Ihishmorim Yopishi Eshudok Eneshenesh Apak Douk Matukur Krais Iri*

<sup>3</sup> Apak ta mutuk Iruhin ananin nyeigur nyuto iruhw. Anan douk apakin Debeini Jisas Krais ananin Iruhin. Aria shopunek, anan douk ananin Yain. Aria apak douk matukur Krais aria Iruhin nenekeup yopinyi nakop ihishmorim eneshenesh yopishi eshudok shanaki iruhw heven iri. Anan nakopeshi um shutaurum apakip urkwip puni apakash mishish shur wosik. <sup>4-5</sup> Seiwok Iruhin watak nunek agundok atap uwe aria nagraehap um matukur Krais aria mupe ananip atup. Um anan nutrup um, anan mare nutuk enesh yoweishi inahos shupenyap, uwok. Aria ananum urkum douk manawasham apak. Douk namudok aria seiwok sagomatin anan urkum morum nakri nugraehap um mupe kabi ananish batowish um enyudok mour Krais neneken iri. Iruhin douk nagipesh ananum urkum aria nataurumep meyoh. <sup>6</sup> Iruhin douk nenekeh namudok um apak mutuk ananin nyeigur nyuto iruhw aria munek tenkyuman um ananish yopihi aih um nataurumep meyoh um. Aria ehudok ananish yopihi aih douk henek agundok anan natrung abom um natogur yopugunum. Anan douk nataurumep meyoh um nakopari ananin nuganin douk anan urkum manawashaman abom iri um apak douk mutukur anan iri.

<sup>7</sup> Douk Krais atun nagok aria douk nakweshihap mape wosik um enesh-enesh yoweishi inahos douk showeshikap iri. Anan natorup ananibor owishibor aria anan madae nunasuhwesh um yoweishi inahos apak menekesh iri uwe aria nakweshihesh-aguk. Iruhin nenekeup enyudok um nakri niyabigep um agundok anan urkum manawashamep abom aria nataurumep meyoh um. <sup>8</sup> Anan nenek gihau map abom nataurumep meyoh nakop ihinyumorim yopinyi saki nyani enyudok enen saki shopunek um mudukemesh um maroh yopihi aih aria menekeh iri yoweishi

um. <sup>9</sup> Iruhin douk neneck enyudok douk anan kanak nakri ta nuneken iri. Aria ananim manabeshuk iri urkum douk anan urkum morum nuneken iri mour, anan nakri nutaurumap aria neyabigapen um enyudok mour Krais neneken iri. <sup>10</sup> Aria sagomatin Iruhin ananim manabeshuk iri urkum mape um muneken abudok yopubi nyutob iri douk amudok. Anan nakri nurao ihishmorim ananish arpesh shuni ihishmorim shape iruhw atap iri shunak shupe atugun. Aria Krais atun nupe eshesin Debeini.

<sup>11</sup> Iruhin douk neneck ihishmorim eshudok shatogur kabi douk seiwok sagomatin anan nakri ta nunekesh shutograri iri. Aria seiwok anan nagraeh apak Juda um matukur Krais. Um maresh? Anan nagipesh ananim urkum kabi douk seiwok sagomatin anan urkum morumen um. <sup>12</sup> Iruhin douk nagraeh apak Juda abom matogur sagomatinyip marik madukem um Krais douk ta kweipon nunaki iri aria mape matrugun-uman. Aria Iruhin douk nagraehap um mupe namudok um mutuk ananin nyeigur nyuto iruhw aria miyabigesh ananish sabaihi yopihi aih.

<sup>13</sup> Aria ipak pape Efesus iri shopunek pemnek enyudok Iruhin ananin yopinyi adurin baraen um anan ta nuraep putanamori pupe wosik um aria pasuhw Krais ananin baraen pagipeshen aria patukur anan. Aria abudok nyutob ipak penek bilip um Krais obi nyutob, Iruhin nagraehep neneck ananin kak nyape ipak abom um pudukemesh um ipak douk pape ananip. Enyudok kak, enyen douk Iruhin ananin Mishin douk nyekepen nyapenyep iri. Enyen douk seiwok sagomatin Iruhin nakri enen adurin atinyi baraen um ta nukep ananin Mishin um. <sup>14</sup> Douk sagomatin Iruhin nakri enen adurin atinyi baraen um anan ta nukesh eneshenesh yopishi eshudok ananish arpesh. Douk namudok aria enyudok ananin Mishin douk anan narik nakopen iri douk nyeayabigap abom um mudukemesh um apak ta mugrem enesh yopishi eshudok eneshenesh shopunek. Aria shopunek nyeayabigap anob nyutob Iruhin ta nukweshih apak ananishi arpesh abom aria nurap munak muni anan mupe. Aria apak muni kupaishi arpesh mutuk ananin nyeigur nyuto iruhw aria miyabigesh ananish yopihi aih.

### *Pol Neneck Beten Um Arpesh Shape Efesus Iri*

<sup>15-16</sup> Enyudok iganigadae yakriyen iri baraen douk adurin abom. Douk namudok aria hahudok nyumnah eik yemnek baraen um ipak pasuhw Debeini Jisas ananin baraen dodog pagipeshen, aria ipak urkwip panawasham ihishmorim Iruhin ananish arpesh um, eik yape yenek betenumep abom arigaha yatograri um douk. Eik apa urkum morumep aria yenek beten yenek tenkyu um Iruhin um ipak. <sup>17</sup> Eik yape yenek betenumep yarig Iruhin. Anan douk apakini Debeini Jisas Krais ananin Iruhin douk apakin Yaken wosik abom um apak mutuk ananin nyeigur nyuto iruhw iri. Eik yarigan um nukep ananin Yopunyi Mishin douk nyekep yopinyi saki um pudukem um baugeniyum ananin baraen um pugipeshen aria pudukemesh abom um anan wosik. <sup>18</sup> Aria yarigan shopunek um nutaurumep nunekep pudukemesh um yopishi eshudok eneshenesh douk shakusumep iruhw heven iri. Eshudok douk anan nohwarep aria pudukemesh abom aria pape patrugun-umesh iri. Aria shopunek um pudukemesh um agundok Iruhin ta nurao ipak puni ihishmorim ananish arpesh putanam pupe wosik ihih nyumneh um. Aria ipak ta pugrem yopishi atish eshudok eneshenesh douk shakusumep iruhw heven iri. <sup>19-20</sup> Aria eik yenek beten yarigan um nutaurumep nunekep pudukemesh um ananin debeiniyi dodog abom douk apa nyenek mour nyataurum apak munek bilip um Krais iri. Enyudok dodog enyen douk enyudok atin dodog douk Iruhin nakwin um nohuri Jisas watak nikitaki wonugwehw naeum. Aria douk um enyudok atin dodog, Iruhin nanasap nape nunak

um ananin yopunyi rogur ehah um gani iruhw heven. <sup>21</sup> Aria agundok iruhw heven, douk Krais nape Debeini nasuhw merik um eshesh debeishi enselahos shani ihm-morim nyeiguhw shatou-umam iri debeimi hape iruhw utag iri. Aria anan nape Debeini neshagrakuk abom ihishmorim sharao debeishi nyeiguhw iri. Eshudok douk shape iri shuni eshudok douk ta kweipon shutogur hugiguk iri nyumnah shopunek. <sup>22</sup> Aria Iruhin narao ihishmorim eneshenesh eshudok nenekeh shape shakamum Krais. Aria anan nagraeahan um nupe Debeini um ihishmorim eshudok eneshenesh aria nupe sagomatinyin Debeini nusuhw merik um ihishmorim Iruhin ananish arpesh. <sup>23</sup> Iruhin ananish arpesh douk shape kabi Krais ananihw shuknihw yegenyihw um. Aria anan douk nape ihigunmorim um iruhw atap aria nape Debeini iri um ihishmorim eshudok. Aria shopunek, anan nape numun abom um ihishmorim Iruhin ananish arpesh esheshiruh aparuh.

## 2

### *Iruhin Nenekeh Apak Magok Iri Makitak Mani Krais Mape Wosik*

<sup>1</sup> Seiwoh ipak pape penek eneshenesh yoweishi inahos aria eshudok yoweishi shabo ipakish mishish shagok. Um maresh? Ipak pakonuguk agabus Iruhin aria penek yoweishi inahos. <sup>2</sup> Abudok nyutob ipak wata pape pagipesh agundok atapihi yoweishi aih. Ipak pagipesh anudok ddogowini yoweini arman douk nasuhw merik um ihm-morim yoweimi douk hasuhw merik um iruhw utag iri ananih aih. Aria douk anudok yoweini arman douk nape nasuhw merik um eshudok arpesh douk shakonuguk agabus Iruhin iri. <sup>3</sup> Seiwoh apak ihishmorim mape menek yoweishi inahos mani eshudok arpesh douk shakonuguk agabus Iruhin iri. Apak magipesh apakih seiwoh harik hapenyap iri yoweishi aih hani ahahim urkum aria menek eneheneh yoweishi aih apak mishish shakitakumeh iri. Douk namudok aria abudok nyutob apak shopunek, Iruhin ta juwehosin aria nop kabi douk nabo ihishmorim arpesh shape agundok atap iri um.

<sup>4</sup> Aria Iruhin douk apa nenekeh gihauh arpesh iri nakri gihauh map aria anan urkum manawashamap abom. <sup>5</sup> Douk namudok aria abudok nyutob apak watak mape munek eneshenesh yoweishi inahos shabo apakish mishish shagok obi nyutob, anan nataurumap meyoh nenekap matukur Krais aria napuhur makitak mape. Aria anan watak narap matanamori mape wosik. <sup>6</sup> Apak douk matukur Krais Jisas aria Iruhin napuhur mani Krais makitak mape. Aria anan nakop debeishi nyeiguhw aria nenekap mani anan mape debeipari gani iruhw heven. <sup>7</sup> Iruhin douk nenekap namudok um douk arigaha kweipon shopunek, anan niyabig ihishmorim arpesh shuni ihishmorim enselahos um shudukemesh um agundok anan nataurumap meyoh abom um. Aria shopunek, Iruhin ta niyabig ehudok ananih yopih aih um nataurumap meyoh um agundok Krais Jisas ananum urkum manawasham abom apak douk matukur anan iri um. <sup>8</sup> Enyen douk Iruhin nataurumep meyoh um agundok ipak pasuhw Krais ananin baraeen dodog pagipeshen um aria anan naraep patanamori pape wosik. Enyudok enyen douk madae ipak kanak pakri um putanam pupe wosik uwe, uwok. Enyen douk Iruhin kanak nataurumep meyoh naraep patanamori pape wosik. <sup>9</sup> Enyen douk madae ipak punek mour aria douk naraep putanamori pupe wosik uwe, uwok. Douk namudok aria ta mare enen atin arpen nyukri nyutuk enyenyin nyeigur nyuto iruhw, uwok. <sup>10</sup> Um maresh? Iruhin atun nenekap aria mape. Aria apak matukur Krais Jisas aria Iruhin nenekap

matogur namishi arpesh um munek yopih iati ah douk seiwok anan neneke redimehumap um mupe munekah iri.

*Krais Narao Biyos Awirosh Arpesh Nenekesh Shatogur Atup Debeipi Awirop*

<sup>11</sup> Douk namudok aria ipak ta pudukemesh um enyudok. Amam Juda amam kanak hakwu amamis wis hatah amamiruh yegeshiweruh. Douk namudok aria eshesh Juda eshesh kanak shanahwar shakri, "Eshesh shatah yegeshiweruh iri." Aria ipak douk madae Juda iri uwe, eshesh Juda shahwarep shakri, "Ipak madae putah yegeshiweruh iri uwe." <sup>12</sup> Aria ipak ta punek urkwip um riguk abudok nyutob ipak papeik rougun um Krais obi nyutob. Ipak pape kupairubi warubish arpesh aria papeik aduk um Iruhin ananip awirop um eshesh Israel. Aria shopunek, ipak madae pudukemesh um Iruhin uwe aria papeik aduk um enyudok ananin dodogowinyi bareaen kontrak douk anan nakrip eshesh Israel enyi. Enyudok bareaen anan douk nakrip adurin atin um ta nutaurumesh um. Aria ipak madae pupe putrugun um agundok kweipon anan watak nuraep putanamori pupe wosik um uwe. Aria ipak madae pudukemesh um Iruhin uwe. <sup>13</sup> Aria ipak douk seiwok papeik rougun um Iruhin iri, douk anan neneke patukur Krais Jisas. Aria ananibor owishibor douk batourak iri benekep panak pape hurukatin um Iruhin.

<sup>14</sup> Um maresh? Krais anan kanak douk baugos abom um apakiruh aparuh hur wosik um. Aria anan narauri apak Juda mani ipak kupaiapari douk madae pudukemesh um Iruhin iri uwe manaki neneke matogur atup awirop. Anan kanak nabrig arbudok narub douk badiyogur apak Juda mani ipak iri aria nabouk ehudok aih um menenem horim um habuhuk.

<sup>15</sup> Krais nabrig arbudok narub namudok. Anan nagok aria nabo enyudok lo douk seiwok Iruhin nakoguk Moses enyi nyani enen bareaen shopunek douk nyape numun enyudok lo iri nyagokuk. Anan neneke namudok um nunek apak asudok biyos awiros um arpesh mutogur kabi atin namuni arpen um. <sup>16</sup> Aria Krais neneke apakiruh aparuh hur wosik aria mape atugun hurukatin um Iruhin. Krais nagok rowog kruse aria nabouk ehudok aih um apak munenem um horim hagokuk. Aria naraao apak Juda mani ipak douk madae Juda iri uwe neneke masuhw atum urkum aria narap matanamori um Iruhin. <sup>17</sup> Aria Krais nanaki nakripeshe yopinyi bareaen ihishmorim arpesh nakri, "Ipak aparuh hur wosik aria punagabeim um pupe atugun." Anan nakriep enyudok bareaen ipak douk seiwok pape rougun um Iruhin iri pani apak Juda douk mape hurukatin um anan iri shopunek. <sup>18</sup> Aria douk apak biyos awiros matukur Krais aria morao atin Iruhin ananin Mishin nyapenyap aria apak wosik ta munak mutogur um Yain Iruhin.

*Apak Ihishmorim Kristen Douk Mape Kabi Iruhin Ananit Debeiti Urupat Um*

<sup>19</sup> Douk namudok aria ipak douk madae pupe kabi kupairubi warubish arpesh douk amnab wokeshi um uwe, uwok. Douk ipak pawish um eshudok Iruhin ananish arpesh aria pape um ananip awirop. <sup>20</sup> Aria ipak pape kabi douk anat urupat Iruhin narokat iri um. Anan narokat tatem iruhw um apak aposel mani amam profet. Apak aposel aria profet douk mape kabi utabor bosah urupat iri. Aria Jisas Krais anan douk amudok sagomatinyim dodogowimi utom douk apa mosah wobrat um urupat iri. <sup>21</sup> Aria unokiwig-itum atudok urupat douk tanotukur dodog um Krais. Aria douk Iruhin wata apa nape narokat atin. Aria atat ta tutogur yopuyoputi abom aria tupe Debeini ananit atut. Aria apak matukur anan

atun. <sup>22</sup> Aria ipak shopunek douk patukur Krais aria Iruhin naraep pani sabaishi kupaishi ananish arpesh aria nape nenekep patogur kabi douk urupat um 'anan nuwish nupe um. Baugenyum enyudok baraen douk nyakrium Iruhin ananin Mishin.

### 3

#### *Pol Neneck Mour Nakripesh Yopinyi Baraen Eshudok Douk Madae Shudukemesh Um Iruhin Iri Uwe*

<sup>1</sup> Krais douk neneck apak Juda mani ipak douk madae Juda iri uwe matogur atup awirop. Aria douk eik Pol yape yakripesh Krais ananin yopinyi baraen. Douk namudok aria um enyudok atin, douk Krais Jisas nuweshike yape um itaurum ipak douk seiwok madae pudukemesh um Iruhin iri uwe. <sup>2</sup> Adur atin ipak padukemesh um enyudok mour douk Iruhin nataurume meyoh aria nekeyen um itaurum ipak um. <sup>3</sup> Mour douk enyudok. Seiwok ananin baraaen douk wata nyanabeshuk nyape. Aria douk abudok nyutob Iruhin neneken nyatogur yopugunum neyabigeyen yadukemen. Douk namudok aria eik yowemagu enyudok banenyi baraaen yakripep um apudok shup. <sup>4</sup> Ipak ta putarih enyudok baraaen aria ta pudukemesh um eikim urkum um agundok eik yadukemen wosik enyudok nyanabeshuk iri baraaen um Krais um. <sup>5</sup> Seiwok um roubi nyutob, Iruhin madae nunek enyudok nyanabeshuk iri baraaen nyutogur yopugunum aria enesh arpesh shudukemen uwe. Aria douk ananin Mishin nyakripapen yopugunum um apak Iruhin ananishi aposel mani amam profet. <sup>6</sup> Baraen seiwok nyanabeshuk iri douk enyudok. Ipak douk riguk madae pudukem Iruhin iri uwe, douk pemek ananin yopinyi baraaen pasuhwen dodog pagipeshen. Douk namudok aria ipak pani apak Juda matogur atup awirop. Aria apak ta mugrem yopishi eshudok eneshenesh douk Iruhin neneck redimesh shakusumap iri. Aria apak ta murao ihishmorim yopishi eshudok eneshenesh douk Iruhin nakri adurin atinyi baraaen um ta nuko apak douk matukur Krais Jisas iri.

<sup>7</sup> Eik douk Iruhin nataurume meyoh aria neke enyudok mour um ikripesh enyudok yopinyi baraaen. Aria um ananin dodog atin, anan neneke yatogur dodogoive aria douk eik yape yenek enyudok mour.

<sup>8</sup> Adur, eik nyeigur woke aria yape shakam abom um ihishmorim Iruhin ananish arpesh. Aria Iruhin nataurume meyoh aria douk neke enyudok mour um ikripesh enyudok yopinyi baraaen um Krais eshudok douk madae shudukemesh um Iruhin iri uwe. Enyudok baraaen douk nyakrium eneshenesh Krais ananish yopiyopishi eshudok douk arpesh madae wosik um shudukemesh iri uwe. <sup>9</sup> Aria um itaurum ihishmorim arpesh um shudukemesh um ananim urkum iri aih. Seiwok arigaga douk, amudok ananim urkum iri aih douk shanabeshuk shapeum ananim atum urkum.

Aria douk anan neneck iruhw atap nani eneshenesh shape iri neke enyudok mour um ikripesh ananin baraaen um shudukemesh um ananim urkum iri aih. <sup>10</sup> Seiwok anan nabeshuken. Aria douk anan nakop mour apak ihishmorim ananish arpesh mape agundok atap iri. Anan nakopen um nakri miyabig ihishmorim yopishi shuni yoweishi dodogowishi shuni enselahos douk shape shasuhw merik um iruhw atap iri um shudukemesh um enenyenen saki Iruhin ananin. <sup>11</sup> Iruhin douk nagipesh ananim urkum douk mape iih nyumneh iri aria nakop enyudok mour kabi douk seiwok anan neneken um apakin Debeini Krais Jisas ananis wis um. <sup>12</sup> Aria apak mani ipak douk matukur Krais munek bilipman aria ta mare munogugur munak hurukatin um Iruhin um. <sup>13</sup> Douk namudok aria eik yakri ikripep

um arudok eriger douk eik yayar eikihw yegenyihw iri. Ipak mare putruwe um agundok eik yemnek debeiri eriger um aria ipak aparuh yoweruh pukri pukutukuk Iruhin ananin mour um pukripesh ananin bareaen um, uwok. Ipak piyotu dodog. Um maresh? Arudok debeiri eriger, eik douk yemnekar um itaurum ipak um pupe wosik puni Iruhin.

*Pol Neneh Beten Um Arpesh Shape Efesus Iri Um Shudukemesh Um Agundok Krais Urkum Manawashamesh Um*

<sup>14</sup> Eik urkum morum Krais neneh apak Juda mani ipak douk riguk madae pudukemesh um Iruhin iri uwe matogur atup awirop um. Aria douk um enyudok atin, eik yabuh yoduk ohrubus yenek beten yahwar Yain. <sup>15</sup> Eik yahwar anudok Yain douk nodowop nyeiguhw apak ihishmorim arpeshis awiros mape agundok atap iri mani ihishmorim dodogowishi eshudok eneshenesh shani enselahos douk shape iruhw heven iri. <sup>16</sup> Eik yenek beten yarig anan douk baugos abom um ihinyumorim dodog nyani yopihi aih iri um nutaurumep nunekep dodogowip. Aria um ananin Mishin atin, anan nunekep numun ipakiruh aparuh putogur dodogowip atip. <sup>17</sup> Aria shopunek yarigan um enyudok ipakin bilip atin um Krais, iihih nyumneh anan nupe numun abom ipakiruh aparuh. Aria eik yenek beten yarig Iruhin um nutaurumep um pupipesh ehudok aih um ipak urkwip punawasham arpesh abom um. Aria ehudok aih hunekep piyotu dodog abom kabi douk enen rowog enyenyiruh nukwaruh habuh hasuhw atap aria nyatao dodog um. <sup>18</sup> Eik yenek beten namudok um yakri ipak puni ihishmorim Iruhin ananish arpesh purao ananin dodog um pudukemesh um agundok anan urkum manawasham ipak abom um. Pudukemesh um debegun abom nato iruhw um, debegun nabuhukuk atap um, aria agumigun nanak wobuwobur um. <sup>19</sup> Aria yenek beten yarigan um nutaurumep abom pudukemesh um agundok Krais urkum manawasham ipak abom um douk neshagrakuk abom ihishmorim arpeshin saki. Eik douk yenek betenumep namudok um yakri ipak putukur Krais aria puraeh piyateh abom Iruhin ananish aih. Aria anan nupe abom numun ipakiruh aparuh aria ipak pudukem anan.

<sup>20</sup> Iruhin anan douk dodogowin atun iri. Aria enyudok ananin dodog douk nyenek mour numun um apakiruh aparuh iri douk dodogowin atinyi abom. Aria um ananin dodog atin, anan douk wosik abom um nunekep numun ipakiruh aparuh iri. Aria enyudok ananin douk sheshagrakuk abom ihinyumorim bareaen apak munek beten morigan-umenyi nyani enyudok apakip urkwip poromen iri shopunek. <sup>21</sup> Douk namudok aria apak Iruhin ananish arpesh ta mupe um munadudareh um Iruhin aria mutuk ananin nyeigur nyuto iruhw abom iihih nyumneh seiwok arigaha kweipon um Krais Jisas ananin atin nyeigur. Adur.

## 4

*Apak Iruhin Ananishi Arpesh Douk Mape Kabi Krais Ananihw Shukniahw Yegenyihw Um*

<sup>1</sup> Eik Pol douk yape yenek Debeini ananin mour agundok aria douk showeshike yape. Aria eik yakri ikripep um ipuhur um punekesh namudok. Ipak ta pupe wosik punek yopihi atih aih kabi douk sagomatin Iruhin nahwarep um nakri pugipesheh iri. <sup>2</sup> Ipak ta pupe shakam abom um kupaishi arpesh putaurumesh pukripesh shokubur. Aria ipak aparuh mare juwehosiruh arigas um enesh eshudok, uwok. Aria mare juwehosip um pakri puwanamesh yoweishi inahos douk shenek yoweishi inahos um ipak iri. Ipakip urkwip ta punawashamesh aria pusah enyudok amaeen eshes

shukepen iri. <sup>3</sup> Ipak douk Iruhin ananin Mishin nyenekep pasuhw atum urkum. Douk namudok aria ipak ta punek mour dodogowip atip um pugipesih ehudok aih um aparuh hur wosik um. Ehudok aih douk henekep pasuhw atum urkum. <sup>4</sup> Aria apak ihishmorim Iruhin ananishi arpesh douk mape kabi atin arpen um. Aria Iruhin ananin Mishin shopunek, enyen douk atin meyoh. Aria ehudok aih um Iruhin nuhwarep um pugipeshan aria pupe putrugun um kweipon anan nuraep putanam pupe wosik um enyen shopunek douk atin meyoh. <sup>5</sup> Aria Debeini shopunek douk atun meyoh, aria bilip atin meyoh, aria baptais shopunek douk atin meyoh. <sup>6</sup> Aria Iruhin shopunek douk atun meyoh. Anan douk apak ihishmorim apakin Yain. Anan douk Debeini um apak ihishmorim ananishi arpesh aria nae numun abom apakiruh aparuh aria nape neneck mour.

<sup>7</sup> Krais douk nataurumap nakopen meyoh yopinyi presen apak ihishmorim atin atin. Anan nakopen kabi douk anan nagraehan um nakri nukopen um. <sup>8</sup> Enyen douk kabi Iruhin ananin bareaen nyetem ananik Buk iri nyakrium. Bareaen enyudok, "Abudok nyutob anan nato iruhw um, anan neneck uhwinyum ananim horim aria nanaweshik um sabashi arpesh. Aria nekeshen meyoh sabainyi yopinyi presen ananish arpesh." <sup>9</sup> Douk baugeniyum bareaen um enyudok bareaen um "Nato iruhw" um douk nyakri namudok. Sagomatin anan nabuhukuk gani atap um agundok atap amnab. <sup>10</sup> Aria anudok douk nabuhukuk gani atap iri wata anan kanak abom natanam nato. Anan nato nakih neshagrakuk iruhw utag aria nape Debeini abom um nupe ihigunum iruhw atap. <sup>11</sup> Aria enyen douk anan atun nakopen meyoh abom yopinyi sisigin presen. Anan nakopen namudok. Anan nagraeh anam um hutogur aposel. Aria enesh douk profet, aria enesh um shunek enyudok mour um shurahaen shunak shukrip arpesh um Krais ananin yopinyi bareaen um shumneken shusuhwen shugipeshen iri. Aria anam douk pasto iri tisa, um hunek skulum eshesh Kristen um shutogur dodogowish aria shunek yopihi atih aih. <sup>12</sup> Krais nakop enyudok yopinyi presen apak Iruhin ananishi arpesh um munek redi um apak kanak um mupe munek ananin yopinyi mour. Apak munek mour um apak douk mape kabi Krais ananihw shuknihw yegenyihw aria mutogur dodogowip. <sup>13</sup> Aria apak mupe munekesh namudok atin arigaha anah nyumnah apak ihishmorim abom musuhw atum urkum um musuhw Krais ananin bareaen dodog mugipeshen um. Aria um agundok mudukemesh um Iruhin ananin nunganik um. Aria shopunek abom um mutogurum enyudok kak um mugipesh Krais ananah yopihi aih wosik um.

<sup>14</sup> Aria apak mutogur namudok um, apak ta mare mupe kabi shokwishi batowish douk madae enep yopipi urkwip pupenyesh iri uwu um, uwok. Aria ta enesh arpesh douk shadukemesh wosik abom um shenyubumep iri shukri shukripap enen rohwin bareaen um, esheshin bareaen ta mare nyunekap nyupotikap munakuk aria mugipeshesh, uwok. Aria shopunek um esheshin bareaen mare nyunekap mupe kabi enen kanu douk uhwin nyahur nyenek youg gwenyuhur nyanak wobuwobur iri um, uwok. <sup>15</sup> Apak ta mupe dodog aria urkwip punawasham kupaishi aria miyagwreh adurin atinya bareaen. Aria shopunek ta mugipesh ihishmorim Krais ananah yopihi aih. Aria apak munekesh namudok um, apak ta mutogur dodogowip mishagrakuk riguk marik mape menekeh iri aih. Aria apak mupe munekesh namudok abom arigaha mudukem Krais. Anan douk debeini abom um apak Iruhin ananishi arpesh iri.

<sup>16</sup> Anan atun douk debeini um apak ihishmorim Iruhin ananishi arpesh. Aria apak apa mape dodogowip um anan atun kabi douk nyugurish shani meriyu shasuhw roguhw aiyas shani kupaigunum yegenyihw um. Aria ta eshesh shunek mour kabi douk anan nakri um, shuknihw yegenyihw ta hwubiram kupaigunum um ahwudok yegenyihw, aria hwutogur dodogowihwi hwishagrakuk riguk hwarik dodogowihwi um. Aria ipak douk pape kabi ahwudok yegenyihw um. Aria ipak apa patogur dodogowip um agundok ipak urkwip panawasham kupaishi aria panataurum kupaishi um panabiram um.

<sup>17</sup> Douk namudok aria eik yakri ikritep enen baraen. Ipak douk putukur Debeini. Douk namudok aria eik yakri ikritep dodogoive atuwe um ipak mare watak pupe pugipesh eshudok douk madae shudukemesh um Iruhin iri uwe shenekeh iri aih, uwok. Eshudokmori arpesh esheship urkwip douk pape um porum wehinyi rohwin atin baraen. <sup>18</sup> Eshesh saki wokesh aria esheship urkwip porum yoweishi inahos atish kabi douk shape arukwtigun um. Eshesh madae shudukem eneh yopihi aih uwe, uwok. Eshesh baragos seshukesh. Douk namudok aria eshesh shapeik rougun um agundok Iruhin nenekap matogur namupi mape wosik abom ihih nyumneh um. <sup>19</sup> Eshesh abraen madae nyupeyesh atin um eshesihh yoweishi aih uwe, uwok. Eshesh shawish abom um shenek eneheneh yoweishi abraeyihi aih. Aria eshesh shagipesh ihihmorim abom yoweishi aih douk henekesh shabosusih iri. Eshesh shapeum shenek ehudokmori aih aria eshesh mishish shakitak abom um shunekeh ihih nyumneh.

<sup>20</sup> Aria ipak, shenek skulumep um Krais ananih yopihi aih um, eshesh douk madae shunek skulumep um ehudokmori yoweishi aih uwe, uwok.

<sup>21</sup> Adur atin, ipak douk pemnek um Krais aria patukur anan aria shenek skulumep um enyudok adurin baraen douk nyakrium Jisas ananih yopihi aih iri. <sup>22</sup> Seiwoh ipak douk shenek skulumep um pukutukuk ipakih seiwoh harik hapenyepli iri yoweishi aih douk hape hanunip iri. Eheh douk ehudok eneheneh yoweishi aih douk henek rohwumep aria ipak mishish shakitakumeh iri. Douk namudok aria ipak ta pukutihuk pukehuk agabus.

<sup>23</sup> Aria ipakip urkwip ta putogur namipi abom aria purum namihi atih yopihi aih. <sup>24</sup> Ipak ta putogur namipi kabi douk Iruhin nenekep um putogur kabi anan kanak um. Aria pugipesh yopihi atihi abom aih.

<sup>25</sup> Douk namudok aria ipak ihishmorim ta pukutukuk ehudok aih um pape penek rohw um kupaishi Iruhin ananish arpesh um. Ipak ta pukripes h adurin atinyi baraen. Um maresh? Ipak padukemesh, apak ihishmorim douk mape kabi roguhw aiyas um otuhw yegenyihw. Aria apak douk matogur atin arpen. <sup>26</sup> Aria ta ipak juwehosip um, ipak ta gamo pudukemesh um ipak mare punek yoweishi inahos. Aria shopunek, ipak mare juwehosip pupe namudok arigaha aun nubuh, uwok. <sup>27</sup> Ta punekesh namudok aria punekuman anah yah Satan. <sup>28</sup> Eshudok arpesh douk apa shakwuaruh iri eshesh mare watak shukwuaruh, uwok. Eshesh kanak ta shunek mour wosik um eneshenesh eshudok um shukesh um yaruhih.

<sup>29</sup> Ipak mare piyagwreh enenyen yoweiniyi baraen, uwok. Ipak ta piyagwreh yopinyi atin baraen douk wosik um nyutaurum arpesh um shusuhw Iruhin ananin baraen dodog shugipeshen iri. Ipak ta punekesh namudok um putaurum eshudok arpesh douk shemnek ipakin baraen iri. <sup>30</sup> Aria ipak mare punek enesh yoweishi inahos um punek Iruhin ananin Mishin enyeniyihw apahw yowehw, uwok. Enyen douk Iruhin ananin kak um agundok anan nanagraehep um pupe ananip atip abom um. Aria pupe namudok arigaha punak putogur um ahudok nyumnah douk ta anan nukweshihep aria nuraep pupe wosik abom ahi. <sup>31</sup> Ipak ta pukutukuk

ehudok ihihmorim yoweih iah. Ehudok um aparuh juwehosiruh um kupaishi um, huni ehudok um pani kupaishi panitok um. Huni ehudok um pububunum kupaishi um, huni ehudok um juwehosip aria panumogesh kupaishi um, huni ihihmorim yoweih iah. <sup>32</sup> Ipak ta punek yopihi aih um pubiram kupaishi aria punagabe um pupe atugun. Aria ipak mare punasuhw um yoweishi inahos douk kupaishi shenekeh um ipak iri aria pukwreyeshukuk. Ipak punekesh namudok kabi douk Iruhin madae nurik nusuhwesh nupe um ipakish yoweishi inahos uwe aria nakwreyeshuguk um Krais ananin nyeigur um.

## 5

### *Apak Ta Mupe Laitigunum Um Munek Yopihi Aih*

<sup>1</sup> Iruhin ananum urkum douk manawashamep aria pape ananishi batowish. Douk namudok aria ipak ta pugipesh anan punek anan nenekeh iri aih. <sup>2</sup> Ipak ta pugipesh ehudok aih um urkwip panawasham kupaishi um kabi douk Krais urkum manawasham apak aria nagok um nataurumap um. Aria agundok anan nagok aria nakon anan kanak Iruhin um, agagun douk kabi worigun iri mahish douk shenek ofamesh shashaisheh sheisik wosik aria shako Iruhin iri.

<sup>3</sup> Aria ipak mare punek ehudok aih um armam hanuk armago um shenek wehrur um. Aria ipak mare piyagwreh um ehudokmori aih aria ipak urkwip mare purumeh, uwok. Aria ipak urkwip mare purum pakri punek ihihmori eneheneh abraenyihi aih. Aria mare punek nyigiya um kupaishi esheshish eshudok eneshenesh, uwok. Um maresh? Apak Iruhin ananishi arpesh douk madae wosik um munek ehudokmori aih uwe, uwok.

<sup>4</sup> Aria shopunek, ipak mare piyagwreh yoweinyi abraenyinyi baraen nyuni rohwin rihirahaemin baraen nyuni enyudok yoweinyi baunogasin baraen. Enyudokmori baraen enyen douk madae yopinyi um ipak piyagwrehan uwe, uwok. Aria ipak ta punadudareh punek tenkyu um Iruhin. <sup>5</sup> Ipak douk padukemesh um enyudok. Eshudok arpesh douk shenek wehrur um iri, shuni eshudok douk urkwip porum shunek eneheneh abraenyihi aih iri, shuni eshudok douk shenek nyigiya um kupaishi esheshish eshudok eneshenesh iri, eshesh douk kabi shenek lotu um madae adurimi god omi um uwe. Aria eshudokmori arpesh ta mare shuwish shupe agundok douk ta Krais nini Iruhin amamish arpesh shupe um, uwok. <sup>6</sup> Aria ipak ta gamo pudukemesh um ta wosik atin enesh arpesh shunek rohwumep aria ipak pumnek esheshin wehinyi baraen aria shubodig ipakip urkwip punak um yoweih iah. Um maresh? Eheh douk um ehudokmori aih atin, Iruhin apa juwehosin um eshudok arpesh douk shenek ehudokmori aih shakonuguk agabus anan iri. <sup>7</sup> Douk namudok aria ipak mare puni eshesh pupe atugun aria puni eshesh punek ehudokmori yoweih iah, uwok.

<sup>8</sup> Um maresh? Riguk ipak parik pape penek yoweishi inahos aria ipak kabi douk pape arukwutigun um. Aria douk ipak patogur Debeini ananishi arpesh patukur anan aria anan kabi douk nepusop pape laitigunum um. Douk namudok aria ipak ta pupe wosik atin kabi arpesh douk shape laitigunum iri um. <sup>9</sup> Arpesh douk shape laitigunum um iri apa shenek ihihmorim yopihi abom aih hani ehudok um shagipesh adurin atin baraen um. <sup>10</sup> Aria ipak ta pukwiraeh um pudukemesh um ehudok aih douk ta ipak punekesh aria Debeini nutrip nunadudareh-umep iri. <sup>11</sup> Eshudok arpesh douk apa shenek yoweih iah douk madae hukwamori eneh yopihi iri uwe, eshesh kabi douk shape arukwutigun um. Aria eshudokmori arpesh ipak mare puni eshesh punoprom punek mour punak atugun,

uwok. Aria ipak ta dodogowip atip um punek yopih iaih aih um eshesh shutrip aria shudukemesh um ehudokmori aih eshesh shenekeh iri douk yoweih. <sup>12</sup> Um maresh? Eik ta mare iwerah baraen um ehudok eneheneh yoweih aih douk eshesh apa shanabeshuk shape shenekeh iri, uwok. Eik abraen nyapeye um ikriyen um. <sup>13</sup> Aria abudok nyutob eneheneh yoweih aih hutogur yopugunum obi nyutob, baugehum um ihishmorim ehudok aih ta hutogur hupe yopugunum. <sup>14</sup> Um maresh? Meishi eshudok douk shunowereh shutogur yopugunum iri, eshesh kabi douk shakus laitigunum um aria arpesh shatrish. Douk namudok aria Iruhin ananin baraen nyakri namudok.

“Ipak douk pape kabi douk shagok iri um,  
ipak pikitaki wonugwegwiruh aria Krais ta nutaurumep kabi douk lait tabuhumep um.”

<sup>15</sup> Ipak douk pape laitigunum um. Douk namudok aria ipak ta gamo pudukemesh abom um ipak pupe punek iri aih. Ipak mare pupe kabi shagugaki arpesh shapeum, uwok. Ipak ta pupe kabi shadukemesh iri shapeum. <sup>16</sup> Douk ipak sabaihi yeh hapeimep um punek Iruhin ananin mour um. Douk namudok aria ipak mare pupe meyoh, uwok. Ipak ta punek Debeini ananin mour. Um maresh? Douk ehudok nyumneh arpesh apa shenek eneshenesh yoweishi inahos. <sup>17</sup> Douk namudok aria ipak mare urkwip purpur atin kabi douk shagugaki arpesh um. Ipak ta pudukemesh um Debeini ananim urkum morohi aih. <sup>18</sup> Ipak mare puwok sabaibari abar um bunekep pugugak, uwok. Ehudok aih ta hunekep pupe yowep abom. Aria iih nyumneh ipak ta pukutukuk Iruhin ananin Mishin nyupe abom numun ipakiruh aparuh aria enyen nyusuhw merikw-umep. <sup>19</sup> Aria ipak puni kupaishi Iruhin ananish arpesh punakripam um yopinyi baraen douk nyetem Buk Sam iri. Nyuni yopinyi baraen douk nyape arhudok yopuruhi aweruh douk ipak apa peyarubaruh patuk Iruhin ananin nyeigur iri. Huni yopinyi baraen douk nyetem arhudok aweruh douk Iruhin ananin Mishin nyepuhur peyarubaruh iri. Aria ipak ta piyarub arhudokmori aweruh numun ipakiruh aparuh huni ipakig nokwatog um punek lotu um Debeini. <sup>20</sup> Aria iih nyumneh punek tenkyu um Yain Iruhin um ihishmorim eneshenesh eshudok um apakini debeini Jisas Krais ananin nyeigur.

### *Shanaraum Iri Arman Armago Esheshin Baraen*

<sup>21</sup> Ipak douk padukemesh um Krais anan douk ipakin Debeini aria ipak douk pape shakamum anan. Douk namudok aria ipak ta pupe shakamum kupaishi arpesh aria eshesh shopunek shupe shakamum ipak.

<sup>22</sup> Ipak irorihiyeu ta pupe shakamum ipakim rahaem aria pumnek amamin baraen kabi douk pasuhw Debeini ananin baraen pagipeshen um.

<sup>23</sup> Um maresh? Rahaem douk hape debeimium irorihiyeu kabi douk Krais nape Debeini um Iruhin ananish arpesh um. Aria eshesh ihishmorim shape kabi ananihw shuknighw yegenyihw um. Eshesh douk anan kanak nataurumesh naraesh shatanamori shape wosik abom iri. <sup>24</sup> Eshudok Iruhin ananish arpesh douk shape shakamum Krais. Douk namudok aria ipak irorihiyeu shopunek douk namudok atin. Ipak ta pupe shakamum ipakim rahaem aria pumnek amamin baraen um eneshenesh eshudok.

<sup>25</sup> Aria ipak rahaem shopunek ta urkwip punawasham ipakiyu irorihiyeu kabi douk Krais urkum manawasham Iruhin ananish arpesh aria narao esheshiyu outumeb shan nagok aria nataurumesh um. <sup>26</sup> Anan nenekech namudok um nenekech shutogur Iruhin ananish atish abom arpesh. Aria um agundok eshesh shemnek Iruhin ananin baraen atin shagipeshen um,

Krais neshrokuhwesh abar nenekeš shatogur yopish. <sup>27</sup> Anan nenekeš namudok shopunek um nakri nunekesh shutogur ananish atish. Aria nuraeš shupe yopishi abom arpesh aria mare enen baraen nyupenyesh um enesh yoweishi inahos, uwok. <sup>28</sup> Aria ipak rahaem, ipak ta urkwip punawasham abom ipakiyu irorihiyeu namudok atin kabi douk ipak urkwip panawasham ipak kanak um. Anudok arman douk ananim urkum manawasham ananik irohukwik iri, anan douk urkum manawasham anan kanak shopunek. <sup>29</sup> Apak madukemesh um douk madae enen atin arpen apa nyukri uwok um enyenyihw yegenyihw uwe, uwok. Enyen apa nyokohw worigun aria nyanagabeohw yopuhw abom kabi douk Krais nanagabe Iruhin ananish arpesh um. <sup>30</sup> Um maresh? Apak douk mape kabi tokwonihw um Krais ananihw yegenyihw um. <sup>31-32</sup> Aria enen debeiniyi baraen douk seiwok nyape aria arpesh madae shudukemesh um baugeniyum uwe, uwok. Aria douk nyatogur yopugunum kabi douk enen baraen nyetem Iruhin ananik Buk iri nyakrium. Enyen nyakri namudok, “Namudok aria arman ta nukutukuk ananish amakenyish aria nunak nini ananik irohukwik shupe sik. Aria eshesh biyesh ta shutogur atin arpen.” Adur enyudok yopinyi baraen douk nyanabeshuk iri abom. Aria apak douk madae mudukemesh abom um baugeniyum um uwe. Aria eik kanak yakri enyudok baraen douk nyakrium Krais nani Iruhin ananish arpesh douk shatukur Krais iri. <sup>33</sup> Aria enyudok baraen shopunek douk nyakrium ipak atin atin nyakri, “Ipak ihipmorim armam ta urkwip punawasham ipakiyu irorihiyeu kabi douk ipak urkwip panawasham ipak kanak um. Aria ipak ihiyumorim armago shopunek ta pumnek ipakim armam amamin baraen pugipeshen.”

## 6

### *Amakenyish Shuni Batowish Esheshin Baraen*

<sup>1</sup> Ipak batowish ta pumnek ipakish amakenyish esheshin baraen kabi douk pemnek Debeini ananin baraen pagipeshen um. Ehudok douk yopihi aih abom ipak ta punek iri. <sup>2</sup> Enyen douk kabi enen baraen nyetem Iruhin ananik Buk iri nyakrium. Enyen nyakri namudok nyakri, “Ipak ta punek urkum um ipakish amakenyish pakri eshesh douk debeishi um ipak aria pumnek esheshin baraen.” Aria enyudok baraen douk nyetem nyarik abom um ihinyumorim Iruhin ananin lo douk adurin atinyi baraen nyapenyen iri. <sup>3</sup> Aria enyudok adurin baraen douk nyakri namudok nyakri, “Ipak pumnek ipakish amakenyish esheshin baraen um, eneshenesh eshudok ipak punekesher iri ta shutogur wosik aria ta pupe roubi nyutob agundok atap.”

<sup>4</sup> Aria ipak amakenyish mare punek ipakish batowish esheshiruh aparuh juwehosiruh, uwok. Ipak ta punagabe-yesh aria punek skulumesh um Debeini ananin baraen um eshesh shumneken aria shugipeshen.

### *Shape Shakamum Kupaishi Shenekumesh Mour Meyoh Iri Shuni Esheshim Debeimi Um Esheshin Baraen*

<sup>5</sup> Ipak pape shakamum ipakim debeimi penekumam mour meyoh iri ta pumnek amamin baraen aria punek gihauam putuk amamish nyeighuh shuto iruhw. Ipak ta pusuhw atum urkum abom aria pugipeshen wosik amamin baraen aria punek amamin mour yopinyi abom kabi douk peneken um Krais um. <sup>6</sup> Ipak mare pukri punek mour abudok nyutob amam hupe hutrip um atub um pakri kadak amam hutrip aria hunadudreh-umep, uwok. Ipak ta puneken kabi douk pape shakamum Krais aria penek ananin mour meyoh iri um. Douk namudok aria ipak

ta mishish shukitak abom um punek mour kabi douk Iruhin nakri um. <sup>7</sup> Ipak mishish ta shukitak abom um punek mour wosik. Um maresh? Ipak douk madae punek mour um arpesh atish uwe, uwok. Ipak douk penek mour um Debeini. <sup>8</sup> Um maresh? Ipak padukemesh um Debeini ta nutorish nukesh yopishi eneshenesh eshudok arpesh douk shenek mour wosik abom iri. Anan ta nunekesh namudok atin um eshudok douk shape shakamum kupaishi shenekumesh mour meyoh iri shuni eshudok douk shape meyoh iri shopunek.

<sup>9</sup> Aria ipak debeipari douk pape debeipi um eshudok douk shenekumep mour meyoh iri ta punekesh namudok atin um eshesh kabi douk penekesh um Debeini um. Aria ipak ta pukutukuk ehudokmori aih um penekesh shunogugur um. Ipak padukemesh, Debeini nape iruhw heven iri douk nape Debeini um ipak pani eshesh shopunek. Aria anan douk madae nutik arpesh esheshish debeishi o shokwishi nyeiguhw aria douk nuneck skelimesh uwe, uwok. Anan apa neneck skelimum ihishmorim arpesh arag arag atin.

### *Iruhin Ananish Arpesh Shape Kabi Soldia Um*

<sup>10</sup> Aria douk yakri iyatak baraen namudok. Ipak douk putukur Debeini. Douk namudok aria ipak ta pupe dodog aria pupe dodogowip um ananin debeinyi dodog atin. <sup>11</sup> Ipak ta pur ihihmorim rupeh douk amam soldia apa hehur um heneck wanohw um iri. Eheh douk Iruhin nekepeh um pihur aria piyotu dodogowip pubouk Satan ananiih yoweishi rohwih ihih aih hubuhuk iri. <sup>12</sup> Um maresh? Apak douk madae muni arpesh meyoh murpak uwe, uwok. Apak mani ihihmorim yoweishi dodogowishi sagabehos shani yoweishi dodogowishi enselahos shopunek douk shasuhw merik um agundok atap iri marpak. Aria shopunek, mani ihihmorim eneheneh yoweishi dodogowihwi arugeh douk hape debeibi-umori eshudok arpesh douk shape shenek yoweishi inahos agundok atap iri marpak. Aria shopunek, mani ihihmorim eshudok enesh yoweishi dodogowishi enselahos douk shape orokohun um iruhw utag gani atap iri marpak. <sup>13</sup> Douk namudok aria ipak ta pur ihihmorim Iruhin nekepeh iri rupeh douk shenek wanohw um shehur iri. Ipak pihur um ahudok nyumnah yoweishi inahos shutogrumepl um, ipak ta piyotu dodogowip atip aria pubouk yoweishi inahos shubuhuk aria ahwudok wanohw hwutuh, ipak ta watak piyotu dodogowip atip.

<sup>14</sup> Ipak punek redi piyotu aria pur ehudok shenek wanohw shehur iri rupeh namudok. Pusuhw adurin atinyi baraen kabi letog douk pape puwashog iri um. Aria punek yopishi abom aih kabi douk parao atudok dodogowiti kapait siot douk shenek wanohw iri shatur um tishigor ipakish mishish. <sup>15</sup> Aria ipak punek redim um pukripesh Iruhin ananin yopinyi baraen um Iruhin nunekesh aparuh hur wosik um. Ehudok aih puraeh kabi douk su douk ipak powar iri um. <sup>16</sup> Ipak purao ihihmorim eshudok douk shenekesh um shenek wanohw iri um. Aria shopunek purao ehudok aih um pusuhw Krais ananin baraen dodog pugipeshen um. Ehudok aih ipak puraeh kabi douk anap aidap um ipak punasau um aria punek wanohw. Um Satan nuwashaki ananigos burawos douk nyih hanugos juwehosigos iri sunaki sutak supe opudok aidap aria pubuweh-agos. Agusudok burawos douk sakri um eneshenesh yoweishi inahos douk shape shatogrumpap shakwiraehip um punek yoweishi inahos iri. <sup>17</sup> Iruhin douk nataurumep naraep patanamori pape wosik. Aria amudok urkum ipak ta pusuhw kabi douk dodogowiti kapait hat um putem baragos aria punek wanohw um. Aria pusuhw Iruhin ananin baraen douk ananin Mishin nyekepen iri

kabi douk wanohwit bainat um. <sup>18</sup> Aria iih nyumneh ipak ta porig Iruhin ananin Mishin nyutaurumep aria nyiyabige punek anananan beten porig Iruhin. Aria iih nyumneh ipak ta gamo pudukemesh. Ipak mare pupe ba arigeh hep, uwok. Ipak pupe punek anananan beten aria mare pukutunuk pupe meyoh, uwok. Aria shopunek, iih nyumneh ipak punek beten purik Iruhin um nutaurum ihishmorim ananish arpesh.

<sup>19</sup> Aria punek beten um eik shopunek um abudok nyutob ikri iyagwreh um, Iruhin ta niyabige baraen um eik iyagwrehen iri. Aria shopunek um eik mare inogugur aria ikripesh baugennum um Iruhin ananin yopinyi baraen douk seiwok nyanabeshuk nyape iri. <sup>20</sup> Eik douk yape yakripesh enyudok yopinyi baraen aria eshesh shakri uwokumen aria douk shasuhwe showeshike senab yape yonoweshik. Aria eikin mour douk namudok. Eik yarao Krais ananik outuk um ikripesh ananin baraen ihishmorim arpesh. Douk namudok aria ipak punek beten porig Iruhin um nutaurume nuneke dodogoiwe um eik mare inogugur aria ikripesh enyudok baraen kabi Iruhin nakri um.

### *Nyagiguk Iri Baraen*

<sup>21</sup> Anudok apakin arpenyin Tikikus douk apak urkwip panawashaman iri ta nunaku nagundok aria nukritep um agundok eik yape yanak um. Aria anan shopunek douk apa nenek Debeini ananin mour wosik abom iri. <sup>22</sup> Eik yakri ishopokan nunakumagu nukritep um apak mape agundok iri mape manak um. Aria um putrun pumnek ananin baraen aria nyutaurumep piyotu dodogowip um pugipesh Krais ananin baraen um.

<sup>23</sup> Aria eik yakri apakin Yain Iruhin nini Debeini Jisas Krais hunek ipakiruh aparuh hur wosik. Aria hunekep pusuhw Iruhin ananin baraen dodog pugipeshen aria ipak urkwip punawasham kupaishi Kristen. <sup>24</sup> Aria yakri Iruhin nutaurumep meyoh ipak ihishmorim douk iih nyumneh ipakip urkwip pape um panawasham apakin Debeini Jisas Krais iri.

## Apudok Shup Douk Pol Nenekap Panam Eshesh Filipai Iri

### Banenyi Baraen Um Enyudok Baraen Pol Neneken Nyanak Um Eshesh Filipai Iri

1:1-11 Pol neneke beten aria neneke tenkyu um Iruhin um eshesh Kristen shape Filipai iri

1:12-30 Pol nakripesum amae anan nenyusah um neneke Krais ananin mour um

2:1-30 Apak monek bilip um Krais iri ta mupe shakam abom um kupaishi arpesh aria munek yopihi aih miyabig sabaishi arpesh

3:1-21 Pol nekehuk agab ehudok aih um shagipesh lo seiwok Iruhin nakoguk Moses enyi. Aria neneke bilip um Krais atun nagipeshan kabi anan nahur iri neneke debeineyi mour um nishagrakuk kupaishi um

4:1-23 Pol nakripesum nyatuh iri baraen aria neneke tenkyumesh um utabor o eneshenesh eshudok eshesh sharik shakon um

<sup>1</sup> Eik Pol yani Timoti douk wenek Jisas Krais ananin mour abom iri. Ohwak biohw weneku opudok shup um ipak ihipmorim Iruhin ananish arpesh douk patukur Krais Jisas aria pape wabur Filipai iri. Shopunek wenekap panakumagu ipak debeipi um Iruhin ananish arpesh iri pani mamudok douk hataurum ipak debeipari iri. <sup>2</sup> Ohwak wakri apakin Yain Iruhin nini Debeini Jisas Krais hutaurumep meyoh, aria hunekep pupe wosik punadudareh.

#### *Pol Nanadudareh Um Eshesh Filipai Aria Neneke Tenkyu Um Iruhin*

<sup>3</sup> Ihih nyumneh eik urkum morum ipak obi nyutob, eik yanadudareh abom aria yenek tenkyu um Iruhin douk yenek lotuman iri. <sup>4</sup> Aria ihihmorim nyumneh eik yenek betenumep obi nyutob, eik douk yanadudareh abom aria yenek beten. <sup>5</sup> Um maresh? Ipak douk pataurume um makrip kupaishi um Iruhin ananin yopinyi baraen riguk sagomih nyumnah arigaha douk. <sup>6</sup> Aria douk yadukemesh abom. Iruhin douk nahur ananin yopinyi mour numun ipakiruh aparuh, aria ta nuneken nyupe namudok arigaha nuneken niyateneh ahudok nyumnah Krais Jisas nutanamori-ahi. <sup>7</sup>Ihih nyumneh eik douk urkum morum ipak ihihmorim. Namudok aria eik wosik yadukemesh abom um Iruhin neneke ananin yopinyi mour numun ipakiruh aparuh aria nataurumep. Abudok nyutob douk yonoweshik obi nyutob bani rigukib madae inoweshik obi nyutob uwe, eik yakripesum Iruhin ananin yopinyi baraen sabaishi arpesh um iher esheshiruh aparuh um shudukemesh shukri enyudok baraen adurin abom aria shugipeshen. Aria ahudok ihihmorim nyumneh, Iruhin douk nataurumep meyoh aria nenekep dodogowip. Eik yani ipak ihipmorim. <sup>8</sup> Iruhin douk nadukeme, um agundok yakri adur um eik urkum manawasham ipak ihipmorim kabi Krais Jisas anan urkum manawashamep abom um aria yakri itrip.

<sup>9</sup> Aria eik yenek beten namudok. Yakri ihih nyumneh ipak dodogowip atip um agundok ipakip urkwip punawasham Iruhin nini kupaishi um. Yakri punekesh namudok pishagrakuk kabi parik pape penekesh um. Yakri purao yopinyi saki aria pudukemesh abom um meihai aih yopihai aria meihai yoweihai pishagrakuk kabi riguk parik padukemesh um. <sup>10</sup> Um yakri ipak pudukemesh abom um meihai aih eheh yopihai abom heshagrakuk ihihmori

iri yopihi aih um pugipesheh iri. Namudok aria ta pupe wosik abom urkwip purum yopihi atih aih aria Iruhin nutrip mare nutik enesh yoweishi inahos shupenyep ahudok nyumnah Krais nutanamori-ahi. <sup>11</sup> Aria yakri ipak punek yopihi atih aih abom douk Jisas Krais atun ta nunekep punek iri. Ipak puneksh namudok um sabaishi shutrip aria shini ipak putuk Iruhin ananin nyeigur nyuto iruhw pukri anan debeinei abom.

### *Pol Nonoweshik Nape Aria Sabaishi Shemnek Iruhin Ananin Baraen*

<sup>12</sup> Eikim ashukenyim owarhim, eik yakri ipak pudukemesh um enyudok douk nyatogrume iri. Agundok eik yonoweshik um douk neneke sabaishi arpesh abom shakripes Iruhin ananin yopinyi baraen aria sabaishi shemneken. <sup>13</sup> Namudok aria ihim-morim soldia douk heyoh anudok debeinei arman um Sisar ananit urupat iri hani ihishmorim arpesh shape agundok iri douk shadukemesh shakri eik adur yasuhw Krais ananin mour abom iri. Douk namudok aria douk showeshike yape. <sup>14</sup> Sabaimi ashukenyim owarhim hatik agundok eik yonoweshik yape um aria hape ddogowim atum um Debeini. Madae hunogugur abom uwe, aria ddogowim atum hape hakripes Iruhin ananin yopinyi baraen. <sup>15</sup> Adur, anam douk hakripes Krais ananin baraen um maresh? Amam henek nyigiya um eik um agundok yenek Iruhin ananin mour um aria hakri hishagrakuk eik hurao debeishi nyeiguhw um enyudok mour. Aria anam douk yopipi urkwipim hakri hutaurume aria douk hakripes. <sup>16</sup> Amudok armam, amam douk urkwip panawasham eik aria douk hakripes. Um maresh? Amam douk hadukemesh hakri eik adur yape agundok um ikripes Iruhin ananin baraen sabaishi shumneken aria shukri adurin atin abom. <sup>17</sup> Aria anam henek nyigiya um eik iri amamip urkwip douk madae pur wosik aria douk hukripes Krais ananin baraen uwe, uwok. Aria hakripes um hakri hutuk amamish nyeiguhw atish shuto iruhw. Henek rohw um hakri huneke gamo irao debeiri eriger abudok nyutob douk watak yape agundok shunuweshik-ati urupat obi nyutob. <sup>18</sup> Aria nyenekam. Amam douk urkwip por wosik douk hakripes Krais ananin baraen o madae pur wosik douk hukripes um uwe, eik douk yanadudareh. Um maresh, amam douk hakripes enyudok Krais ananin baraen atin. Aria adur ta inadudareh iriguk.

<sup>19</sup> Um maresh? Eik yadukemesh um ipak douk penek betenume aria Jisas Krais ananin Mishin nyataurume. Namudok aria douk yonoweshik yape aria eshudok douk shatogrume iri, eshesh douk Iruhin neneke shatogrume um ipe dodog aria nunarae ipe wosik. <sup>20</sup> Eikim urkum douk yakri adur abom um Iruhin ta nutaurume aria inek ananin mour obi nyutob, abraen ta mare enen nye, uwok. Eik yakri ipe ddogoiwe aria ikripes abom um douk ituk Krais ananin nyeigur nyuto iruhw abom kabi riguk um. Aria eik ipe o igok um, eik yakri abom um ituk Krais ananin debeinyi nyeigur atin nyuto iruhw. <sup>21</sup> Baugos um ipe irahaen inek enenyenag agundok atap um douk Krais atun. Aria ikri igok um, eik ta ini anan uper aria ta ipe wosik abom ishagrakuk kabi douk yape um. <sup>22</sup> Aria watak ipe agundok atap um douk ta inek yopinyi mour abom um nytaurum arpesh abom iri. Aria douk madae idukemesh uwe. Igok um wosik o ipeum wosik? <sup>23</sup> Eik douk yor biyep urkwip. Yakri ikutukuk abom ahwudok yegeniyhw aria inak ini Krais uper um douk wosik abom neshagrakuk kabi douk yape um. <sup>24</sup> Aria ta mare igok um, namudok douk wosik. Um wata ipe aria itaurum ipak. <sup>25</sup> Eik yenek bilip abom um enyudok baraen aria yadukemesh um ta ipe aria mare igok, uwok. Ipeum itaurumep putogur ddogowip um bilip aria punadudareh abom um agundok punek

bilip um Krais pishagrakuk riguk parik penek bilipuman um. <sup>26</sup> Namudok aria nuhut biyen eik wata inaku ini ipak mupe aria itaurumep um, ipak ta punadudareh-ume abom aria ta putuk Krais Jisas ananin nyeigur nyuto iruh aria punadudareh-uman.

### *Iruhin Nenek Yopinyi Um Eshesh Filipai Aria Nenekesh Sharao Eriger Shopunek*

<sup>27</sup> Aria eik yakri douk ipak pupe purahaen punek enenyenen um, eik yakri ipak punek yopinyi abom atin kabi douk Krais ananin yopinyi baraen nyakrium. Punekesh namudok aria eik ikri inaku itrip o ipe agundok imnek baraen atin um, eik yakri imnek baraen um ipak pupe atug barag punataurum punagapesh um pusuhw Iruhin ananin yopinyi baraen atin pupipesen aria dodogowip atip pukrip kupaishi-umen. <sup>28</sup> Ipak mare punogugur um ipakish horik horin, uwok. Thih nyumneh piyotu dodogowip atip um bilip. Punekesh namudok piyabigesh aria ta shudukemesh um eshesh ta shunak shuwishuk, aria ipak ta punek uhwin aria pupe wosik. Um maresh, ipak douk Iruhin nataurumep aria douk ta punek uhwin. <sup>29</sup> Iruhin nenekumep yopinyi um agundok nataurumep penek Krais ananin mour. Madae nataurumep um punek bilipuman um atin uwe, uwok. Aria shopunek nekep enyudok mour um purao debeiri eriger um enyudok Krais ananin mour shopunek. <sup>30</sup> Riguk ipak douk patruhw ahwudok wanohw eik yenekohw iri. Um agundok yenek Krais ananin mour aria shenek enenyenen yarao debeiri eriger um. Aria douk eik watak yape yenekesh namudok atin kabi ipak pemnek baraen jurug um. Aria ipak douk punoprom um ahwudok otuhw wanohw.

## 2

### *Apak Mupe Atug Barag Abom Aria Munek Yopinyi Um Kupaishi*

<sup>1</sup> Ipak patukur Krais aria anan nenekep piyotu dodogowip atip. Anan urkum manawashamep aria nataurumep nenekep panadudareh. Ipak douk pani Iruhin ananin Mishin pape atug barag. Aria douk penenem um yopinyi atin panagapesh. <sup>2</sup> Aria ipak wosik penek enyudokmori um, aria douk yakritep um ipak ta gamo punekne inadudareh abom iriguk um punek enyudokmori shopunek um. Pusuhw atin baraen abom, pusuhw atuh aih um urkwip punawasham arpesh um aria pupe atug barag. <sup>3</sup> Ipakip urkwip mare purum putaurum ipakiruh yegeshiweruh aturuh aria punek mour um putuk ipakish nyeiguhw shuto iruhw, namudok uwok. Aria punih ipak kanak abom aria mare pukri pupe iruhw um kupaishi, uwok. <sup>4</sup> Ipak atin atin ipakip urkwip mare purum punagapesh ipakish atish eshudok wanaruh, uwok. Aria punagapesh um kupaishi kabi agundok punagapesh ipakish eshudok wanaruh um.

### *Krais Naunih Anan Kanak Abom Aria Iruhin Wata Natukan Nato Iruhw*

<sup>5</sup> Ipak pusuhw atum urkum kabi Krais Jisas anan urkum morumen iri um.

<sup>6</sup> Anan douk Iruhin, aria madae nukri abom um nyeigur nyuto iruhuman aria nupe kabi Iruhin um uwe, uwok.

<sup>7</sup> Nekehuk agab ehudok aih natogur adurin arpen aria Maria kwanabuki. Aria natogur abom kabi anan arman meyoh douk nenek mour meyoh um kupaishi iri.

<sup>8</sup> Arpesh shatrun natogur abom adurinyi arpen. Naunih anan kanak abom aria nagipesh Iruhin nakri-enyi atin arighah

arigaha nanak natogurum abudok nyutob douk shan showeshikan neir rowog kruse obi nyutob.

<sup>9</sup> Douk namudok aria Iruhin douk natukan nato natem iruhw abom.

Aria nakon enen debeinyi abom nyeigur douk nyabouk ihishmorim nyeiguhw shabuhuk iri.

<sup>10</sup> Iruhin nenekan namudok um ihishmorim arpesh shape iruhw heven iri, shani ihishmorim shape agundok atap iri, shani eshudok shape shakamum atapig nahobig iri shumnek enyudok nyeigur Jisas

aria shubuh shuduk ohrubus shutuk ananin nyeigur nyuto nyetem iruhw.

<sup>11</sup> Aria ihishmorim arpesh ta shuhur nokwatog shukri,

“Jisas Krais anan Debeini.”

Namudok aria ananin Yaken Iruhin ananin nyeigur ta shutuken nyuto iruhw abom.

*Agundok Arpesh Shape Um, Apak Iruhin Ananip Ta Mupe Kabi Lait Tabuhi Um*

<sup>12</sup> Ipak eikishi abom arpesh, riguk yani ipak mape obi nyutob, ipak pape um pagipesh eikin baraen. Aria douk yapeik rougun um, ipak douk shopunek yakri punekesh namudok atin. Punekesh pishagrak eshudok riguk pape penekesh iri um. Iruhin douk naraep patanamori pape wosik, aria kweipon ta nuraep puto iruhw. Aria ahudok nyumnah douk punogugur-uman abom aria pupe dodogowip atip punek ananin mour um purao yopihai aih. <sup>13</sup> Apak douk madukemesh. Ibih nyumneh anan nenek mour numun ipakiruh aparuh aria nepuhur um punek enenyenen mour douk anan nakriyen abom iri.

<sup>14</sup> Punek enenyenen um, ipak mare punotutukem puwish putogur o punogogonim-umen, namudok uwok. <sup>15-16</sup> Punekesh namudok abom um, ta pupe wosik abom aria mare enen barae nyupenyep, uwok. Um ta pupe Iruhin ananip abom yopiyopishi batowish aria mare punek yoweishi inahos. Aria ipak ta piyabig arpesh um shupe wosik. Aria punekesh namudok um, ipak ta pupe kabi lait um pubuh agundok atapishi arpesh shapeum. EHUDOK nyumneh ipak pupe kabi lait um obi nyutob, ipak douk pukripes enyudok Iruhin ananin baraen um shumneken aria shugipeshen. Aria shugipeshen um, enyen ta nyutaurumesh um shupe wosik agundok atap aria kweipon shopunek ta shupe ibih nyumneh. Agundok atapishi arpesh douk shakri uwok um yopihai aih aria shapeum madae shenek yopihai aih iri uwe. Ipak punekesh namudok um, ahudok nyumnah Krais nutanamori ahi hunak hutograri aria eik ta inadudareh-umep. Aria ta idukemesh namudok. Eik douk yenek enyudok debeinyi mour um yataurumep aria madae nyunak nyuwishuk meyoh uwe, uwok. <sup>17</sup> Ipakin bilip nyani ipakin yopinyi mour douk nyadukemesh abom um enesh eshudok eneshenesh douk shenek ofamesh shako Iruhin um. Douk ta enesh she igok aria shurakuk eikibor owishibor kabi shourakuk wainibar abar enyudok ipakin ofa um akure, ta wosik abom. Eik ini ipak ihipmorim ta munadudareh murguk. <sup>18</sup> Aria namudok atin. Ipak shopunek ta punadudareh aria puni eik munadudareh.

*Pol Nakripesch Um Ta Nishopok Timoti Nunak Filipai Um*

<sup>19</sup> Aria Debeini Jisas nukri wosik um, aria mare roubi uwe ta ishopok-ugu Timoti nunakumepogu. Yakri nunakumagu nutripaguk aria wata nutanamori nukripe um ipak pape mumam, um eik ta inadudarehume.

<sup>20</sup> Eik arman madae anan uwe kabi Timoti um, uwok meyoh. Anan nani eik douk atip urkwip abom aria mishish shakitak abom um nutaurum

ipak pupe wosik. <sup>21</sup> Ihim-morim hape agundok iri armam douk hapeum hanagapesh amamish atish eshudok eneshenesh. Aria mishish douk madae shikitak um husuhw Jisas Krais ananin mour uwe, uwok. <sup>22</sup> Aria Timoti douk madae kabi amam um uwe, uwok. Ipak douk padukeman. Anan yopinyi arpen aria nakri um nataurumep. Anan douk riguk nataurum eik wakripesh Iruhin ananin yopinyi baraen kabi anan nuganin nataurum ananin yaken um mour um. <sup>23</sup> Abudok nyutob ikri idukemesh um eshudok ta shutogrume mumam mumam obi nyutob, eik ta arigas ishopokan nunakumepogu. <sup>24</sup> Eik yenek bilip yakri adur um hurukatin Debeini ta nunekume anah yah um shukweshihe-maguk um showeshike um aria eik kanak shopunek ta inakumepogu.

### *Pol Nakripesch Um Ta Nishopok Epafroditus Nunak Filipai Um*

<sup>25</sup> Eik yakri wosik ta ishopok Epafroditus nutanam nunakumagu ipak. Anan apakin arpen douk nani apak menek bilip iri. Aria douk nani eik wanoprom wenek Iruhin ananin mour. Weneken obi nyutob, ohwak douk warao eriger kabi harpak wanohw iri um. Anan douk riguk peshopokani nanaki nataurume. Anan narao ipakin baraen aria nataurume. <sup>26</sup> Anan douk nakri abom nutik ipak ihishmorim. Ananihw apahw douk yowehw abom um agundok ipak pemnek um anan arugeh han um. <sup>27</sup> Adur, riguk arugeh han aria hurukatin um nugok. Aria Iruhin nakri gihau man aria natauruman. Aria Iruhin douk madae nenek gihau man anan atun uwe, uwok. Eik shopunek nakri nenek gihau me aria madae nunekan nugok abom uwe, um nunek eikihw apahw yowehw hwutar abom uwe, uwok. <sup>28</sup> Namudok aria eik mishin nyakitak abom um ishopokan nunakumepogu um wata putrun aria punadudareh. Namudok um eikihw apahw ta mare apa hwunogugur aria hwur wosik. <sup>29</sup> Namudok aria douk nunak nutograugu aria ipak pukri anan douk Debeini ananin arpen. Aria punadudareh-uman abom puran nunak nini ipak pupe. Aria ihm-mori kabi ananumori armam, ipak ta putuk amamish nyeigu hw shuto iruhw. <sup>30</sup> Um maresh? Anan douk madae urkum murum anan kanak aria nukri um nupe agundok atap uwe, uwok. Anan douk urkum morum nunek Krais ananin mour atin aria douk hurukatin um nugok um agundok nataurume um. Ipak douk papeik rougun, aria anan douk narao ipakiyu outumeb nataurume kabi ipak pupe putaurume um.

## 3

### *Arpen Nyusuhw Krais Ananin Baraen Dodog Iri Douk Yopunyi Abom Arpen*

<sup>1</sup> Eikish arpesh, eik yakri iyatak eikin baraen namudok. Yakri ipak ta punadudareh um Debeini. Eik douk madae arigeh he um agundok yanarubur yowem-agu enyudok atin baraen um ipak uwe, uwok. Enyen douk wosik wata yenyem-agu um nyutaurumep pupe wosik.

<sup>2</sup> Aria ipak gamo pudukemesh um amudok armam douk hape kabi wanarig nubag um. Amam douk hapeum henek yoweishi inahos iri. Amudokmori armam douk hakri huhur ipakip urkwip um putah ipakiruh yegeshiweruh kabi Moses seiwok nakripeshuk-enyi lo nyakrium. <sup>3</sup> Apak kanak douk Iruhin ananish arpesh. Aria apak magipesh ahudok adurihi aih um agundok matah apakiruh yegeshiweruh um. Aria douk uwok. Um maresh? Iruhin ananin Mishin nyapenyap aria nyataurumap munek lotuman matuk Krais Jisas ananin nyeigur nyato iruhw. Apak douk madae munek bilip um agundok shatah yegeshiweruh um ta nataurumap uwe, uwok. <sup>4</sup> Adur, ta eik ikri wosik akure, eik ta wosik inek bilip um ehudok

aih ta hutaurume. Aria yakri uwok. Aria enesh Juda shukri eshesh douk yopishi arpesh aria dodogowish atish um shunek ihihmori apakih aih um agundok yegeshiweruh hunatah um, eik Pol douk anan um Juda aria douk yeshagrak-eshuk um yagipesh ehudokmori aih um.<sup>5</sup> Nubokadae sheyabuki atin aria hakri 8-poreih nyumneh um, eshesh shatah eikihw yegeniyihw. Eik douk anan um Israel aria yakin Benjamin ananip awirop. Yani eshesh Hibru apak atubor owishibor abom. Eik douk anan um Farisi aria yagipeshen wosik abom lo.<sup>6</sup> Eik douk dodogoive atuwe abom um yenek Iruhin ananin mour. Namudok aria riguk, eik douk yape um yenekesh enenyenen eshesh ihishmorim Iruhin ananish arpesh yenekesh sharao debeiri eriger. Douk ta enesh arpesh shukri shudukemesh um agundok yagipesh enyudok lo um akure, eshesh ta mare shukripe shukri anabik nyunyubukuk mare nyigipeshen uwe, uwok. Eik yagipeshen yeayaten.<sup>7</sup> Aria douk, eik urkum morum Krais aria ehudok ihihmori aih riguk yakri ta hutaurume iri, douk eik madae idareheh uwe, uwok.<sup>8</sup> Eik madae ikri um ehudok aih atih uwe, uwok. Eik yadukemesh um Krais Jisas anan douk eikin Debeini aria yadukemesh um enyudok douk adurin atin abom. Eik yarao Krais ananah aih aria ihishmorim eshudok enesh douk madae idarehesh uwe, uwok. Eik yakri inek bilip um Krais atun<sup>9</sup> aria yakri abom um itukur anan. Eik yakri uwok um irao nyeigur yopuni arman um agundok igipesh enyudok lo seiwok Iruhin nakoguk Moses enyi um uwe, uwok. Aria yakri irao nyeigur yopuni arman um douk namudok. Eik inek bilip abom um Krais Jisas aria namudok douk Iruhin natiwe nohware yopuni arman.<sup>10</sup> Eik yakri idukeman wosik abom Krais. Anan douk nagok aria Iruhin dodogowin atun wata nonohur nakitak nape. Eik yatik namudok aria yakri gamo idukemesh um agundok anan dodogowin atun abom um. Yakri ini anan unoprom um agundok umnek eriger um aria shopunek yakri isuhw amudok atum urkum kabi anan nomur um aria douk nakri wosik um eshesh shon nugok um.<sup>11</sup> Eik yakri adur inekesh namudok um idukemesh abom um eik shopunek kweipon Iruhin ta wata niyohur ikitaki wonugwehw.

### *Pol Nahur Dodogowin Atun Um Nunak Nutogur Mak*

<sup>12</sup> Ehudok Krais ananah yopihi aih, eik madae inek urkum ikri eik yaraeh yeayateh uwe, aria douk yatogur yopuni arman uwe, watak. Aria douk watak yape yabisirak um itogur yopuni arman. Um maresh? Krais Jisas nanagraehe aria yape ananiwe.<sup>13-14</sup> Ekish arpesh, eik atin yakri eik watak iraeh iyateh uwe ehudok aih, watak. Eik yasuhw amudok atum urkum. Amudok. Eik yakri uwok um ihishmorim eneshenesh rigukishi eshudok aria yeshubukuk aria urkum makeshukuk. Aria yape um yenek mour dodogoive atuwe yosahur yanak um itogur mak aria irao debeinyi nyeigur. Irao debeinyi nyeigur um douk namudok. Yatukur Krais Jisas, anan nataurume aria Iruhin nahware um ito um iruhw heven ikih ini anan upe wosik abom ihih nyumneh.

<sup>15</sup> Apak ihishmorim douk dodogowip atup abom magipesh Jisas Krais iri, apak ta munek urkwip kabi enyudok baraen eik yakriyen iri nyakrium. Aria ta ipak urkwip purum kupainyi um, Iruhin ta niyabigep pudukemesh wosik.<sup>16</sup> Aria ehudok aih riguk maraeh iri douk mupe um musuweh dodog abom mugipesheh.

<sup>17</sup> Ekish arpesh, riguk eik yarik yeyabigep Krais ananah yopihi aih aria ahudok nyumnah douk yakri ipak ta pugipesh ehudok eikih aih. Yakri putrish duk arpesh douk shagipesh eikih aih iri, um ipak pugipesheh abom.<sup>18</sup> Sabaihi atih eik yakriep enyudok baraen um Jisas ananish

horim. Aria douk namudok atin. Yareh abih atih aria yakritep enyudok barea shopunek. Sabaishi arpesh shagipesh yoweihai aih aria douk shatogur horim um agundok Krais nagok rowog kruse um.<sup>19</sup> Esheship urkwip porum esheshiruh yegeshiweruh aturuh aria eshudok esheship urkwip porumesh iri douk shatogur kabi esheshin god um. Eshesh shapeum shanadudareh um ehudok abraenyihi aih. Esheship urkwip porum agundok atapishi atish eneshenesh. Kweipon eshudokmori arpesh ta shunak shuwishuk abrudok yoweiburi wabur hel.<sup>20</sup> Aria apakiruh aduribur abom wabur douk iruhw heven. Apak douk manadudareh aria mape matrugun abom um anudok arman douk narao apak matanamori um Iruhin iri um nukutukuk iruhw heven aria nubuhi. Anan douk Debeini Jisas Krais.<sup>21</sup> Anan ta nunek arhudok apakiruh yoweiruhi yegeshiweruh hutogur kabi ananihw yopuhwi abom aria bogarohw iri yegenyihw um. Ta nukwu enyudok atin dodog douk anob nyutob ta nukwin um nunek ihishmorim eneshenesh eshudok shupe shakamum anan aria anan nupe debeini-umesh um.

## 4

### *Pol Nakripesh Um Shupe Atug Barag Shunadudareh Aria Shurao Yopumi Urkum*

<sup>1</sup> Namudok aria eikish arpesh, eik urkum manawashamep abom aria yakri itrip abom ini ipak mupe. Bagos um agundok eik inadudareh um douk ipak atip. Ipak douk kabi yopishi eshudok eneshenesh kweipon ta iraesh iri. Ipak douk patukur Debeini aria pupe dodogowip abom atip kabi iganigadae yarig yakritep um.

<sup>2</sup> Nyak Yuodia iri nyak Sintike, ipak bio armago pumnek. Ipak douk panadiyogur um aria eik dodogoiwé atuwe yakri ipak ta pupe atug barag abom um agundok pugipesh Debeini um.<sup>3</sup> Aria nyak, enyudok enen douk nyani eik wanoprom abom um wenek atin mour iri, eik yakri nyak ta nytaurum oudok bio armago. Riguk owo douk wani eik manoprom um munek debeinyi mour aria sabaishi shemnek Iruhin ananin yopinyi bareaen. Mani Klemen iri eshesih ihishmorim douk shani eik manoprom um mour iri. Eshudok arpesh eshesish nyeguhw douk shetem okwudok Iruhin ananik buk. Okwudok buk douk eshudok arpesh ta shupe abom iih nyumneh iri eshesish nyeguhw shetem um.

<sup>4</sup> Iih nyumneh ipak ta punadudareh um Debeini. Wata shopunek ikri, ipak ta punadudareh abom!

<sup>5</sup> Ipak ta pupe samokwiyaish arpesh um ihishmorim arpesh ta shutrip aria shukri ipak douk penek yopihi aih. Um maresh, Debeini douk hurukatin um nunaki.<sup>6</sup> Ipakash mishish mare yowesh um enesh eshudok eneshenesh, uwok. Aria eneshenesh eshudok shukri shutogrumpé um, ipak ta punek beten porik Iruhin. Porigan um ta nutaurumep um eshudok douk ipak pakri nutaurumep-umesh iri. Punek beten porigan aria punek tenkyuman.<sup>7</sup> Iruhin ananih aih um nenekap aparuh hur wosik um douk dedebeh abom atin heshagrakuk arpeshin saki. Apak arpesh douk madae wosik um mudukemeh uwé, uwok. Aria douk ta ipak punek beten namudok um, Iruhin ta nukep ehudok ananih aih aria ta hutaurum ipakip urkwip puni mishish shur wosik. Um maresh, ipak douk patukur Krais Jisas iri.<sup>8</sup> Ekish arpesh, douk eik yakri ikritep enen nyagiguk iri bareaen shopunek. Yakri ipakip urkwip ta pur abom um eneshenesh yopishi shani ehudok eneh aih douk arpesh shatrih aria shatukeh hato iruhw iri. Eheh douk ehudokmori. Ihishmorim adurihi, yopiyopihi, hani ehudok eneh ihishmorih yopihi aih douk arpesh shanadudareh-umeh aria esheship

urkwip porumeh ihih nyumneh. <sup>9</sup> Ihihmorim aih o baraen yenek skulumep aria paraen iri, nyani enyudok douk pemneke yakriyen iri nyani enyudok enen yeneken iri, ipak ta puneken abom ihih nyumneh. Namudok aria Iruhin douk napeum neneh apakish mishish shor wosik manadudareh atin um ta nini ipak pupe.

*Pol Nanadudareh Um Eshesh Filipai Um Shalonari Enesh Yopishi Eshudok Eneshenesh Um*

<sup>10</sup> Riguk ipak douk pokei enesh eshudok eneshenesh. Aria nubokadae, roubi nyutob ipak douk urkwip porome, aria madae puparug anah yah um pukei enesh eshudok eneshenesh um, uwok. Aria douk paparug anah yah, pataurume aria namudok douk peyabige um ipakip urkwip douk panawasham abom eik. Namudok aria eik yanadudareh abom yariguk um Debeini. <sup>11</sup> Enyudok baraen douk madae ikripep um eik eshudok woke um uwe, uwok. Um maresh? Eik douk yenek towin um abudok nyutob inasuhw karowish eshudok obi nyutob o inasuhw sabaishi um, eik ta inadudareh ikri jurug-umesh. <sup>12</sup> Riguk anob nyutob, eik douk yape namudok. Eneh nyumneh eshudok woke. Eneh nyumneh yatik sabaishi eshudok. Eneh nyumneh yawok worigun yariguk aria eneh nyumneh nyurub bae. Aria ehudok biyeh aih um itik sabaishi eneshenesh eshudok um o eneshenesh woke um, eik douk yadukemesh wosik. Ihigun yanak yape um nani ihibmori nyutob yanak yape aria meihi ehudokmori aih hutogrume obi nyutob, eikihw apahw douk madae yowehw uwe, uwok. <sup>13</sup> Krais neneke aria dodogoiwe. Douk eik yape dodogoiwe um anan aria wosik um inek ihihmorim ehudokmori aih.

<sup>14</sup> Aria ipak douk penek yopihu aih abom um agundok pataurume um eshudok eneshenesh abudok nyutob eik woke um eshudok obi nyutob. <sup>15</sup> Ipak Filipai, ipak kanak douk padukemesh abom um riguk abudok nyutob yarig yanaku yakripep Iruhin ananin yopinyi baraen obi nyutob arigha yakutukuk shokugi nahobig Masedonia um. Douk ipak pape Filipai iri atip pataurume um eshudok. Kupairubi warubishi Iruhin ananish arpesh douk madae shunekesh um manoprom um ehudok aih um shekesh eshudok kupaishi um, uwok. Ipak atip. <sup>16</sup> Riguk abudok nyutob yape Tesalonaika obi nyutob, ipak parik pataurume anah aria wata shopunek pataurume sabaihi nyumneh. <sup>17</sup> Aria douk, eik madae ihwarep um pukei enesh yopishi eshudok meyoh uwe, uwok. Aria yakri kweipon itrip um Iruhin nutaurumep aria nuwanam-umep ipakih sabaihi yopihu aih kabi ehudok ipak penek um eik iri um. <sup>18</sup> Ipakish yopishi eshudok pakri Epafroditus nasuwesh-umeri iri douk nekeyesh. Namudok aria douk abudok nyutob, eik douk yasuhw sabaishi eshudok um wosik ume. Enesh douk watak shakus meyoh. Eshudok ipak pekesh iri douk kabi enesh yopishi eshudok douk penek ofamesh peshaisheh pako Iruhin aria nemnek yopuri unar nakri wosik nanadudareh-umesh iri. <sup>19</sup> Eikin Iruhin douk nagrem ihishmorim eneshenesh yopishi eshudok iri. Namudok aria anan ta nukep ihishmorim eshudok ipak wokumes iri. Um maresh? Ipak douk patukur Krais Jisas. <sup>20</sup> Apak ta mupe um mutuk Iruhin apakin Yain ananin nyeigur nyuto iruhw namudok atin ihih nyumneh. Adur atin!

*Pol Nenekumesh Yopihu Nyumnah Eshesh Filipai*

<sup>21</sup> Eik yakri yopihu nyumnah um ihishmorim Iruhin ananish arpesh douk shatukur Krais Jisas iri. Amudok apakimi douk hani eik mape agundok iri shopunek henemepogu yopihu nyumnah ipak. <sup>22</sup> Aria ihishmorim Iruhin ananish arpesh shape agundok iri shenemepogu yopihu nyumnah ipak. Eshudok enesh shenek mour um Sisar douk debeini um gavman iri ananit

urupat iri douk shanadudareh abom shariguk aria shenemepogu yopuhi nyumnah.

<sup>23</sup> Eik yakri Debeini Jisas Krais nutaurum ipakish mishish, nunekumep yopinyi meyoh aria pupe wosik abom punadudareh.

## Apudok Shup Douk Pol Nenekap Panam Eshesh Kolosi Iri Banenyi Baraen Um Enyudok Baraen Pol Neneken Nyanak Um Eshesh Kolosi Iri

1:1-4 Pol nenek tenkyu um Iruhin um eshesh Kolosi aria neneke beten um Iruhin nunekesh shiyotu dodogowish

1:5-2:19 Krais atun dodogowinari nepe narik um sabaishi eneshenesh eshudok shani arpesh Namudok aria douk anan atun nepe narik um ihishmorim Iruhin ananish arpesh.

2:20-4:6 Apak mani Krais magok aria wata shopunek mani anan makitaki aria douk munek yopihi atih aih

4:7-18 Pol nakripes nyatuh iri baraen aria neneke yopuhi nyumnah um eshesh Kolosi

**1-2** O ipak pagipesh patukur Krais iri douk pape wabur Kolosi iri aria pasuhw Iruhin ananin baraen dodog pagipeshen iri. Eik Pol, Krais Jisas ananin aposel douk Iruhin kanak nagraehe um inek ananin mour um inak ikripes ananin baraen aria yenekumepogu apudok shup um ipak. Eik yenekumepogu ipak Iruhin ananish atish arpesh douk dodogowip atip um pasuhw Jisas Krais ananin baraen pagipeshen iri. Aria apakin wanin Timoti shopunek douk nani eik wape agundok. Aria ohwak wakri apakin Yain Iruhin nutaurumep meyoh aria ipakiruh aparuh hur wosik.

### *Iruhin Neneke Eshesh Kolosi Esheshin Bilip Nyatogur Yopugunum*

**3** Ihih nyumneh ohwak wonek beten um ipak um, ohwak apa wenek tenkyu um apakin Debeini Jisas Krais ananin Yain Iruhin um ipak. **4** Um maresh? Ohwak womek baraen um agundok ipak pasuhw Krais Jisas ananin baraen pagipeshen aria ipak urkwip panawasham ihishmorim Iruhin ananish arpesh um. **5** Riguk enyudok adurin atinyi baraen nyanaki nyatogrumeip aria ipak pemneken. Aria ipak pakri adur atin um kweipon ipak ta pupe wosik abom iih nyumneh gani iruhw heven um. Aria ipak douk pape patrugun um agundok ta kweipon punak pupe wosik um. Douk namudok aria ipak pakri Krais Jisas ananin baraen douk adurin aria pagipeshen aria ipak urkwip panawasham Iruhin nani kupaishi arpesh shopunek. **6** Iruhin ananin yopinyi baraen douk nyarahaei ihigunum um agundok atap. Aria enyen nyatogur dodogowin atin aria nyenek yopini aih um sabaishi arpesh esheshiruh aparuh. Aria enyen nyenek yopuni abom nyeshagrakuk riguk nyarik nyape nyeneken um. Enyen nyeneken namudok atin kabi douk hahudok sagomatinyih nyumnah enyen nyeneken um ipak um. Hahudok nyumnah ipak pemnek Iruhin ananin yopinyi baraen aria padukemesh abom um adur Iruhin nataurumap meyoh um. **7** Epafras douk neneke skulumep nakripes enyudok baraen aria ipak padukemen. Anan douk yopuyopuni abom aria nani ohwak manoprom mape munek Krais ananin mour. Aria ohwak douk urkwip panawashaman. Aria anan apa neneken wosik Krais ananin mour. Aria douk ohwak wakri unaku aria anan narao ohwakik outuk aria nanak nataurumep. **8** Aria shopunek, anan nakripohw um agundok Iruhin ananin Mishin nyepuhur nyeneken aria ipak urkwip panawasham ihishmorim Iruhin ananish arpesh um.

*Pol Nenek Beten um Iruhin Nutaurum Eshesh Kolosi iri Um Shupe Dodogowish*

<sup>9</sup> Ohwak douk womnek um enyudok yopinyi mour douk Iruhin neneken numun ipakiruh aparuh iri aria douk hahudok nyumnah abom ohwak wape weneb betenumep. Aria douk shopunek watak wape weneb betenumep atin. Ohwak weneb beten warig Iruhin um nunekep pudukemesh abom um ehudok aih douk anan mishin nyakitakumeh iri. Aria nunekep pudukemesh abom um ihip-morim yopipi urkwip iri saki douk Iruhin ananin Mishin nyekepesh iri. <sup>10</sup> Ohwak weneb betenumep namudok um wakri ipak pugipesh eneheneh yopihi aih douk Debeini ananin mishin nyakitakumeh iri. Anan nutrip um aria nunadudareh-umep. Aria ipak punekesh namudok aria ta punek ihinyumorim ananin yopinyi mour. Aria shopunek, ta pudukemesh abom um Iruhin pishagrakur riguk parik padukeman um. Aria enyudok saki um pudukemesh um Iruhin um ta nyutogur debeinyi. <sup>11-12</sup> Aria ohwak weneb betenumep namudok shopunek um wakri Iruhin nukep ananin yopiyopinyi abom debeinyi dodog. Anan nukepen um nunekep putogur dodogowip um piyotu dodog abudok nyutob enenyenen amaen nyutogrumep um. Aria um ipakiruh aparuh mare yoweruh aria hur wosik. Aria ipak ta punadudareh punek tenkyu um apakin Yain um nenekep patogur yopip aria wosik um purao eneshenesh ipakash yopishi eshudok douk Iruhin neshubukumep lait-igunum iri. Ipak ta puraesh puni ihishmorim ananish arpesh agundok douk shape yopugunum shenek yopihi atih aih iri shapeum. <sup>13</sup> Iruhin douk nakweshihap makutukuk enyudok debeinyi dodog douk nyape arukwut-igunum um eshesh Satan ananish arpesh shapeum. Aria narap mape wosik manak mawish um ananin nugarin douk anan urkum manawashaman abom iri um ananip awirop. <sup>14</sup> Aria douk apak mape matukur Krais aria anan nakweshihap mape wosik atin um agundok anan madae nusuhwesh uwe um apakash yoweishi inahos aria nakwreyeshuk um.

*Baugenym Um Baraen Um Krais Nani Ananin Mour*

<sup>15</sup> Krais douk nadukemesh abom um anudok Iruhin douk apak madae mutrun atin iri uwe. Anan douk nape Debeini aria baugos abom um ihishmorim eneshenesh eshudok shani arpesh douk shape iruhw atap iri. <sup>16</sup> Um maresh? Iruhin nakripan neneb ihishmorim eneshenesh eshudok shape iruhw atap iri shani arpesh shatogur shape. Anan neneb ihishmorim eshudok eneshenesh douk apak matrish iri shani eshudok douk madae mutrish apakis nabes iri uwe. Eshesh shani ihm-morim debeimi, hani ihishmorim dodogowishi enselahos douk shasuhw merik um iruhw atap iri. Aria Iruhin nakrip Krais neneb ihishmorim eneshenesh eshudok shape iruhw atap iri shani ihishmorim arpesh. Anan nenekeb um shupe ananish atish aria shutuk ananin atin nyeigur nyuto iruhw. <sup>17</sup> Seiwoh baugos um, anan atun narik nape. Aria ihishmorim eneshenesh eshudok shani arpesh douk shape iruhw atap iri shagiguk shatogur shape. Aria anan douk anan atun dodogowini abom aria nasuhw ihishmorim eshudok shape esheshiyu outumeb sisigyu kabi douk ahudok nyumnah shapeum. Aria arpesh shopunek, douk anan nasuwesh nape. <sup>18</sup> Anan douk Iruhin ananish arpesh esheshin baragin. Aria eshesh shape kabi ananish roguhw aiyas um. Aria anan atun douk baugos um nutaurum ananish arpesh shutogur namishi aria shupe wosik um. Anan douk sagomatinyin abom debeini um agundok shagok iri arpesh wata shakitaki wonugwegwiruh um. Iruhin douk nonohuri nakitaki wonugwehw um anan atun nutogur debeini abom nusuhw merik um ihishmorim eneshenesh eshudok shuni arpesh shopunek. <sup>19</sup> Um maresh? Riguk Iruhinin mishin nyakitak um

nyakri nyukon ihihmorim ananii aih huni urkum iri saki nyuni ananin dodog ananii Nuganin atun. Douk namudok aria Iruhin nakon ihihmorim eshudok anan atun. <sup>20</sup> Aria Iruhin douk mishin nyakitak um nakri Krais nunek ihihmorim eneshenesh eshudok douk shape iruhw atap iri shuni ihihmorim arpesh shutogur yopish aria naraesh shatanam shupe ananish. Iruhin douk nenekesh namudok um Krais ananibor owishibor douk nagok neir rowog kruse aria batourak iri. Anan nenekesh namudok aria naraao ihihmorim eshudok shape iruhw atap iri shatanam shape ananish atish.

<sup>21</sup> Riguk ipak shopunek pape rougun um Iruhin aria pape ananii horim. Um maresh? Ipakip urkwip pakri uwok-uman aria ipak penek yoweishi inahos. <sup>22</sup> Aria douk Krais naraao arpenyihw yegenyihw aria shan nagok. Aria Iruhin naraep patanam pape ananip um agundok Krais nagok um. Um anan naraep punak um anan naeum aria pupe ananish yopishi arpesh. Aria anan mare nutik enen baraen nyupenyep, uwok. <sup>23</sup> Aria ihih nyumneh ipak ta pupe um pusuhw enyudok ananin yopinyi baraen dodog aria piyotu ddogowip atip abom. Ipak mare pukutukuk enesh eshudok shunekep pukutukuk enyudok Iruhin ananin yopinyi baraen douk seiwok ipak pemneken pasuhwen dodog pagipeshen iri, uwok. Aria mare pukutukuk agundok um pakri adur atin um ta Iruhin nutaurumep wosik um, uwok. Ipak douk pemneken enyudok baraaen douk eik Pol yape yenek Iruhin ananin mour yakripesheri. Aria shopunek, enyudok baraaen douk shakripesher shanak aria ihihmorim arpesh shape agundok atap iri douk hemneken.

### *Pol Nataurum Iruhin Ananish Arpesh Shape Kolosi Iri*

<sup>24</sup> Aria douk eik yanadudareh um agundok yemnek eriger eikihw yegenyihw um yataurum ipak um. Arudok eriger douk yape yemnek kor eikihw yegenyihw iri douk yakri iyatak arudok eriger douk Krais nakri um eik immekor iri. Eik yenekesh namudok um inek ananin mour um itaurum ipak puni Iruhin ananish arpesh. Ipak ihihmorim douk pape kabi Krais ananish roguhw aiyas iri um. <sup>25</sup> Eik Iruhin nanagraehe um inek enyudok mour um itaurum ipak Iruhin ananish arpesh um ikripes baugenum um ihinyumorim ananin yopinyi baraaen. <sup>26</sup> Seiwoh arigaha douk, enyudok baraaen nyanabeshuk nyape um ihihmorim seiwokishi apakish popehesh yamehesh. Aria douk Iruhin nenekesh nyatogur yopugunum aria ananish arpesh shadukemen. <sup>27</sup> Iruhin ananii urkum douk morum nakri nunekesh namudok. Anan nakri niyabig apak ananish arpesh enyudok baraaen douk riguk nyanabeshuk nyape iri. Enyudok baraaen enyen douk yopiyopinyi abom aria nyeigur nyato iruhumen iri. Iruhin douk nakri enyen nyutogur yopugunum nyutaurum ihihmorim awiros-ish arpesh. Baraaen douk enyudok. Krais nape numun ipakiruh aparuh. Aria baugenum um enyudok baraaen nyakri namudok. Adur atin, Iruhin ta nunekep putogur yopiyopipari abom kabi douk anan kanak yopuyopuni abom um. <sup>28</sup> Douk namudok aria apak makripes Krais ananin yopinyi baraaen ihihmorim arpesh. Apak morao sabainyi saki aria munek skulumesh um enyudok baraaen um shudukemen aria shurao ihigos-morim baragos iri saki. Apak makripes wosik um shukeshuk agabus yoweishi inahos eshesh shape shenekesh iri. Aria um makri murao ihihmorim arpesh atin atin douk shatukur Krais iri shunak um Iruhin aria shupe ddogowish um anan aria shutogur ananish atish arpesh abom kabi anan nakri um. <sup>29</sup> Douk namudok aria eik yape yenek mour um itaurum arpesh shutogur kabi douk Krais um, eik yenekken ddogoiwe atuwe. Eik douk anan neke ananin dodog neneke ddogoiwe aria douk yenek enyudok mour ddogoiwe atuwe.

**2***Eshesh Ta Shusuhw Iruhin Ananin Baraen Dodog Shugipeshen Aria Shubo Rohwin Baraen Nyubuhuk*

<sup>1</sup> Douk eik yakri ikripep um enyudok debeinyi mour douk eik yeneken um yataurum ipak um. Eik yeneken dodogoiwe atuwe um yataurum ipak pani armam armago shape Laodisia iri shani ihishmorim eshudok douk wata shutik eikig yamag iri uwe. <sup>2</sup> Eik yeneken namudok um yakri inek eshesi ihishmorim shuni ipak pupe namudok. Yakri ipakip urkwip iri aparuh shupe dodogowish aria ipakip urkwip punawasham kupaishi Iruhin ananish arpesh. Aria shopunek um purao epudok ihipmorim yopipi urkwip iri saki. Aria ipak ta pudukemesh abom um Iruhin ananin baraen douk adurin atin abom. Aria eik yenek enyudok mour um yakri kupaishi shuni ipak pudukemesh abom um baugeniyum um enyudok Iruhin ananin baraen douk seiwok nyanabeshuk nyape iri douk nyakrium Krais atun. <sup>3</sup> Douk Krais anan atun neneh ihm-morim Iruhin ananis yopumi urkum iri saki douk seiwok shanabeshuk shape iri shatogur yopugunum. <sup>4</sup> Aria ipak gamo pudukemesh um ta enen arpen nyunaki nyunek rohwumep nyukripep enen rohwin baraen douk ta arpesh shumneken shukri adurin iri. Douk namudok aria eik douk yakripep enyudok baraen. <sup>5</sup> Adur atin, douk eik madae ini ipak mupe atugun uwe, aria eik urkum mur um ipak kabi douk yani ipak mape atugun um. Aria eik yemnek um agundok ipak pape wosik peyotu dodogowip atip pasuhw Krais ananin baraen dodog pagipeshen um aria eik yanadudareh-umep.

*Apak Ta Mutukur Krais Aria Mupe Wosik Abom Ihih Nyumneh*

<sup>6</sup> Ipak douk pasuhwen dodog Jisas Krais ananin baraen pagipeshen pakri anan douk ipakin Debeini aria paran nawish nape numun ipakiruh aparuh. Aria douk namudok atin, ipak ta pupe um putukur anan dodog aria pupe namudok atin. <sup>7</sup> Ipak ta putukur anan dodog kabi douk enen rowog nyatao dodog atap um, o kabi anohw dodogohwi urohw hwosah urupat tatao dodog um. Aria ipak ta gamo pusuwen dodog pugipeshen wosik enyudok Iruhin ananin yopinyi baraen douk riguk parik paraen iri. Ipak pusuwen dodog abom pishagrakuk riguk parik pasuhwen pagipeshen um aria punek tenkyu um Iruhin.

<sup>8</sup> Aria ipak gamo pudukemesh um mare enen arpen nyunaki nyunek rohwumep nyukripep enen rohwin baraen arpesh meyoh shakriyen iri. Aria shopunek um mare enen arpen nyunek rohwumep nyukripep enen baraen um arpesh shurao saki um pugipeshen aria enyeninbaraen nyuweshikep kabi douk pape shonoweshik iri um, uwok. Enyudok baraen, enyen douk seiwok ipakish popehesh yamehesh shakripepen iri. Eshesh douk shakripep um eshudok debeishi dodogowishi sagabehos shani debeishi yoweishi enselahos douk shasuhw merikwum iruhw atap iri. Eshesh douk madae shukripap um Krais uwe.

<sup>9</sup> Douk namudok aria ipak gamo pumnek. Um maresh? Ipak padukemesh, Krais natogur arman kabi douk apak um. Aria ihinyumorim Iruhin ananin dodog iri saki nyani ihm-morim ananish yopihi aih douk Iruhin nako Krais aria shape abom um anan atun. <sup>10</sup> Aria ipak douk ponohwar abom um arpesh. Um maresh? Ipak douk patukur Krais aria parao ihm-morim Iruhin ananish yopihi aih. Krais anan douk nape debeini nasuhw merik um ihm-morim dodogowishi sagabehos shani king-omi hani ihm-morim debeishi yoweishi enselahos douk shasuhw merik um iruhw atap iri. <sup>11</sup> Aria ipak douk patukur anan. Douk namudok aria ipak douk ta mare parao ehudok aih um patah ipakiruh yegeshiweruh um. Ehudok aih

douk madae arpesh shunekeh-umep adukiruh um ipakiruh yegeshiweruh uwe, uwok. Ipak parao ehudok aih namudok. Ipak patukur Krais aria anan kanak nenekep wosik um pukutukuk harik hapenyep iri aih um penek yoweishi inahos um. <sup>12</sup> Aria ipak patukur Krais aria penek baptais. Aria enyudok enyen kabi douk sharumep pani anan um. Ipak pakri adur Iruhin douk dodogowin aria nohuri Krais nakitaki wonugwehw. Douk namudok aria anan nohur ipak shopunek pani Krais pakitak pape.

<sup>13</sup> Douk riguk ipak pape pagipesh harik hapenyep iri aih um penek yoweishi inahos um. Aria shopunek, ipak douk madae Juda uwe, aria ipak madae pudukemesh um Iruhin nini ananin lo douk seiwok nakoguk Moses enyi uwe, uwok. Douk namudok aria ehudok harik iri yoweishi aih haep pagok. Aria Iruhin nepuhur pakitak pape aria nenekep patukur Krais. Aria Iruhin nakweshih eneshenesh yoweishi inahos apak menekech iri.

<sup>14</sup> Aria enyudok lo seiwok Iruhin nakoguk Moses enyi douk nyape Iruhin ananik Buk iri douk nyape kabi apakim horim um. Enyen nyakrium arudok debeiri eriger douk ta apak mumnegor um eshudok apakish yoweishi inahos douk apak menekech iri shuni enen baraen douk apak madae dodogowip um mugipeschen iri uwe. Aria Iruhin nenek nyilim enyudok ihinyumorim lo iruhw rowog kruse abom aria naen nyabuhuk wouwokuk.

<sup>15</sup> Aria um enyudok mour Krais neneken rowog kruse iri atin, Iruhin nabouk abom ihihmori dodogowihhi arugeh kabi douk yoweinyi dolog um hari eshudok debeishi yoweishi enselahos douk shape iruhw atap iri esheshin dolog nyabuhuk wouwokuk. Anan nenek uhwinyumesh aria noweshikesk kabi douk shonoweshik iri um. Aria anan narik aria eshesh shagiman shanak aria ihihsmorim arpesh shatrish aria shakri eshesh douk madae dodogowish uwe.

### *Apak Mani Krais Magok*

<sup>16</sup> Douk namudok aria ipak mare pukutukuk enen arpen nyunek skelumep nyunumogep baraen um agundok ipak madae pugipesh enyudok lo um worigun iri abar um uwe. O um anah debeihi yopuhi nyumnah douk shenek lotu ahi, o um anagun debeguni worigun douk shenekagun aria shanadudareh um namuni aun natogurum. O um ahudok nyumnah sabat douk eshesh Juda mour uwok shape meyoh ahi. <sup>17</sup> Enyudok ihinyumorim lo douk aboriguh meyoh um eshudok douk ta shutograri iri. Aria eshudok douk shatogur. Aria baugs um ihihsmorim adurishi abom eshudok douk shapeum Krais atun. <sup>18</sup> Aria ta enen arpen nyukri nyukriep um enesh eshudok kabi enyen nyabo yommis nyatrish iri o nyunek rohwumep nyukri ipak punih ipak kanak pupe shakamum enenyen lo aria punek lotu um enselahos um, ipak mare pumneken, uwok. Ipak mare pukutinyuk nyunek rohwumep aria nyunekep mare purao ipakish yopishi eshudok eneshenesh douk shakus shatrugun-umep iruhw heven iri. Enyudok arpen enyenyim urkum douk morum enyen nyutuk enyenyin nyeigur nyuto iruhw um eshudok kabi douk enyen nyabo yommis nyatrish iri um. Aria shopunek, enyenyim urkum douk morum harik hapenyen iri aih um nyenek yoweishi inahos um. <sup>19</sup> Enyudok arpen enyen douk madae nyutukur Krais apakin baragin uwe, uwok. Krais douk nape narik kabi douk barag um. Aria apak ihihsmorim ananish arpesh mape kabi douk roguhw aiyas um. Aria anan nutaurum ihihwumorim yegenyihw hwape dodogowihwi. Aria anan nenek nyugurish iri bishiguh shanakrupam dodog aria shasuhw ihihwumorim yegenyihw hwape atugun. Aria douk Iruhin nenekohw hwatogur debehw aria dodogowihwi. Aria nenek apak ananish arpesh matogur dodogowip meshagrakuk riguk marik mape um.

<sup>20-21</sup> Aria ipak douk pani Krais pagok aria pakutukuk agundok um pape shakamum agundok ipak pagipesh enyudok barea douk nyakrium amudok king-omi hani eshudok dodogowishi sagabehos shani yoweishi enselahos douk shasuhw merik um iruhw atap iri um. Aria douk ipak wata patanam panak pape shakamum eshudok um maresh? Aria shopunek, ipak pape shakamum enyudok lo douk nyakri, "Nyak mare nyusuhwesh o mare nyishoh o mare nyututoruhwesh nyakis wis iri um maresh?"

<sup>22</sup> Enyudok lo douk nyakrium agundok worigun iri abar douk ta apak mishoh aria shunak shuwishuk abom iri. Um maresh? Enyudok lo douk arpesh meyoh urkwip porumen sheneken aria shenek skulumesh. <sup>23</sup> Enyen adur, arpesh shatik enyudok lo um, eshesh shakri enyen kabi douk yopipi urkwip um nyutaurumap aria nyunekap munek lotu um enselahos. Aria nyenek arpesh shaunih eshesh kanak shape shakamum enyenjen lo. Aria nyenekap mabo apakiruh yegeshiweruh um hugipesh apak. Aria douk arpesh shatrin esheshis nabes um, eshesh shakri enyudok lo douk nyape kabi yopipi urkwip um. Aria uwok, enyen douk madae dodogowin um nyutaurumap um mubouk ehudok harik hapenyap iri aih um henekap munek yoweishi inahos iri hubuhuk um uwe, uwok.

### 3

#### *Iruhin Nepuhur Mani Krais Makitak Mape*

<sup>1</sup> Iruhin douk nepuhur pani Krais pakitak pape. Douk namudok aria ipak urkwip ta purum eneheneh aih douk hanaki iruhw heven iri atih. Agundok iruhw heven douk Krais nape debeini aria nape yopunyi rogur ehahum Iruhin napeum. <sup>2</sup> Aria iih nyumneh ipak urkwip ta purum eneheneh aih douk hanaki iruhw heven iri. Ipak urkwip mare purum agundok atapih aih, uwok. <sup>3</sup> Um maresh? Ipak douk pagok jurug pani Krais. Douk namudok aria agundok douk ta ipak pupe wosik iih nyumneh um douk paragun aria nanabeshuk nani Krais nape iruhw heven Iruhin napeum. <sup>4</sup> Krais douk baugos um agundok ta ipak pupe wosik iih nyumneh um. Douk namudok aria kweipon anan nutogur yopugunum shutrun um, ipak shopunek ta puni anan putogur yopugunum. Aria ipak ta purao agundok douk ta anan nutrugun abom um.

#### *Apak Matogur Namishi Arpesh Jurug*

<sup>5</sup> Douk namudok aria ipak ta pubouk abom ihihmoris harik hapenyep iri aih um penek yoweishi inahos um hugokuk. Eik douk yakri ehudok um shenek wehrur um, ehudok habosuh iri aih, ehudok aih um mishish shakitak um shenek yoweishi inahos um, enyudok um urkwip porum eneshenesh yoweishi inahos um, shani ehudok aih um shenek nyigya um kupaishi esheshish eshudok eneshenesh um. Aria ehudok aih um shenek nyigya um, eheh douk kabi shagipesh madae adurimi god omi um uwe. <sup>6</sup> Aria arpesh douk shape shenek ehudokmori yoweishi aih. Douk namudok aria Iruhin douk juwehosin-umesh aria ta nuwanamesh ehudok yoweishi aih eshesh shape shenek iri. <sup>7</sup> Douk riguk ipak pagipesh ihihmoris ehudokmori yoweishi aih obi nyutob, ehudok harik hapenyep iri aih hasuhw merikw-umep aria hepuhur pagipesheh penek.

<sup>8</sup> Aria douk ipak ta pukutukuk ihihmoris ehudok eneh yoweishi aih shopunek. Eik yakri um ehudokmori aih. Ehudok um juwehosish um, huni ehudok um ipakiruh aparuh juwehosiruh abom aria peyagwreh debeg um, huni ehudok um ipak panogugur kupaishi um. Aria shopunek, ehudok um padukemesh rohwin bareaen kupaishi um, huni ehudok um peyagwreh enyenjen yoweinyi bareaen um. <sup>9</sup> Ipak mare punek rohw

um kupaishi Kristen, uwok. Um maresh? Ipak douk pabouk jurug harik iri ihihmorim yoweihai aih douk seiwok ipak pape penekah iri hagokuk. <sup>10</sup> Aria douk Iruhin nenekep patogur namishi arpesh. Aria ihih nyumneh anan nape nenekep patogur namupi padukem anan kanak douk nenekep ihihmorim arpesh iri. Anan douk nenekep namudok um nakri ipak pudukeman wosik abom aria pugipesh anan. <sup>11</sup> Douk namudok aria apak mape Iruhin ananish arpesh aria mape atup awirob. Apak madae murao sisigish nyeiguuh aria mupe sisigis awiros uwe, uwok. Douk namudok aria apak douk makri eshesh Grik douk madae enesh kupaishi uwe aria eshesh Juda douk madae enesh kupaishi uwe, uwok. Aria mamudok hatah amamiruh yegeshiweruh iri madae anam kupaimi uwe aria mamudok douk madae hutah yegeshiweruh iri anam sigim uwe, uwok. Aria eshudok douk sheneyagwreh kupainyi bareaen iri madae kupaishi uwe aria eshudok shape sisigig nahobig, douk madae shudukemesh um eneh yopihi aih iri enesh kupaishi uwe, uwok. Aria eshudok douk shape shakamum kupaishi shenekumesh mour meyoh iri madae enesh sikish aria eshudok douk shape wosik iri madae enesh kupaishi uwe, uwok. Ihishmorim eshudok douk Krais ananish atish. Anan douk baugos um eneheneh yopihi aih hani eneshenesh yopishi eshudok. Aria anan atun nape debeini aria nape numun um apak ihipmorim masuhw Iruhin ananin bareaen iri um apakiruh aparuh.

### *Apak Ta Murao Ehudok Aih Um Mukri Giha Um Kupaishi*

<sup>12</sup> Seiwok sagomatin Iruhin ananim urkum manawashamep abom aria nagraehep pape ananish arpesh. Douk namudok aria ipak ta punek ehudokmori yopihi aih. Punekah kabi por yopihi rupeh um. Ipak ta pukri giha aria putaurum sabaishi arpesh. Aria pupe shakamum kupaishi arpesh aria punekumesh yopihi aih putaurumesh. Ipak mare juwehosip um eshudok douk shunek yoweishi inahos um ipak iri, uwok. Ipak ta pupe putrish meyoh. <sup>13</sup> Aria ta ipak enen arpen enen bareaen nyupenyen um agundok kupainyi nyenek enen yoweinyi um enyen um, enyen ta nyukri wosik um nyusah enyudok amaan. Aria enyen mare nyunasuweh um ehudok yoweishi aih enyudok kupainyi arpen nyenekehumen iri aria nyukwreyehuk. Um maresh? Sagomatin Debeini narik nakweshih apakish yoweishi inahos. Douk namudok aria ipak shopunek ta punekesh namudok atin um kupaishi. <sup>14</sup> Aria ipak ta punek ehudok ihihmorim yopihi aih. Aria sagomatin ipak ta purik punek ehudok yopihi aih um ipak urkwip punawasham kupaishi um. Um maresh? Ehudok yopihi aih um urkwip punawasham kupaishi um ta hutaurumep huweshikep pupe kabi atin arpen um.

<sup>15</sup> Krais douk nenekep apakiruh aparuh hor wosik aria madae juwehosiruh uwe. Douk namudok aria ehudok aih um aparuh hor wosik um ta husuhw merik um ipakiruh aparuh huni ipakip urkwip. Um maresh? Iruhin douk nahwarep um pupe atup awirob aria shopunek um ipakiruh aparuh hur wosik. Aria ipak ta punek tenkyu um Iruhin. <sup>16</sup> Aria Krais ananin bareaen ta nyupe abom numun ipakiruh aparuh. Aria ipak ta punek skulum kupaishi aria putaurumesh um enenyenen ihinyumorim yopinyi saki. Aria shopunek ta punek tenkyu um Iruhin aria piyarub yopuruhi aweruh douk hotem Iruhin ananik Buk iri. Ipak piyarub aruhudok douk pape penek lotu um Iruhin piyarub aruh iri huni aruhudok douk Iruhin ananin Mishin nyepuhur piyarub patuk Iruhin ananin nyeigur nyato iruhw um. Ipak piyarub aruhudok aweruh aria numun ipakiruh aparuh ipak ta punek tenkyu um Iruhin. <sup>17</sup> Aria ihihmorim eshudok ipak punekesh iri, ipak ta

punekesh um putuk Debeini Jisas ananin atin nyeigur. Aria shopunek um ananin atin nyeigur, ipak ta punek tenkyu um apakin Yain Iruhin.

### *Shanaraum Iri Armam Armago Shuni Esheshish Batowish Esheshin Baraen*

<sup>18</sup> Ipak armago ta pupe shakamum ipakim armam. Um maresh? Ehudok aih douk wosik abom um Debeini ananis nabes. <sup>19</sup> Aria ipak armam shopunek, ipak urkwip ta punawasham ipakiyu armago aria mare punek owowiruh aparuh yoweruh, uwok.

<sup>20</sup> Aria ipak esheshish batowish ta pumnek ihinyumorim ipakish amakenyish esheshin baraen pusuwen pugipeshen. Um maresh? Debeini nakri ipak punekesh namudok um, anan ta nunadudareh-umep. <sup>21</sup> Aria ipak amakenyish mare punek ipakish batowish esheshiruh aparuh yoweruh aria juwehosish, uwok. Um maresh? Ta punekesh namudok aria shukri eshesh douk madae yopishi uwe.

### *Shape Shakamum Kupaishi Shenekumesh Mour Meyoh Iri Shuni Esheshim Debeimi Esheshin Baraen*

<sup>22</sup> Ipak pape shakamum kupaishi penekumesh mour meyoh iri ta pugipesih ihinyumorim ipakim hasuhw merikw-umep iri amamin baraen. Ipak mare pukri punek mour abudok nyutob amam hiyotu hutrip um atub um pakri amam hutrip aria hukri ipak yopipari, uwok. Ipak ta pukri adurin atin abom aria ipak urkwip purum Debeini putuk ananin nyeigur nyuto iruhw. Aria ipak mishish shikitak abom um enyudok mour aria puneken wosik. <sup>23</sup> Aria enyenenen mour ipak puneken iri, ipak ta puneken wosik abom kabi douk peneken um Debeini um. Ipak mare puneken kabi douk peneken um arpesan meyoh um, uwok. <sup>24</sup> Um maresh? Kweipon Debeini ta nukep yopishi atish eshudok eneshenesh um nutorip um enyudok mour ipak pape peneken iri. Eshudok yopishi anan douk nagraehesh shakus shatrugun um ipak ananish arpesan. Um maresh? Ipak douk penek Krais, apakin Debeini ananin mour. <sup>25</sup> Aria eshudok meishi arpesan douk shenek yoweishi inahos iri, kweipon Iruhin ta nuwanamesh yoweishi inahos nunekesh shumnek debeiri eriger um enyudok eshesh sheneken iri. Um maresh? Anan ta nunek skelimum ihishmorim arpesan atag atin.

## 4

<sup>1</sup> Aria ipak pasuhw merik um eshesh shenek mourumep meyoh iri ta punek yopihi abom aih um eshesh. Um maresh? Ipak padukemesh, ipakin Debeini douk nasuhw merik um ipak iri shopunek douk nape iruhw heven.

### *Ehudok Aih Um Shunek Beten Aria Shurahaen Wosik Abom Um*

<sup>2</sup> Ipak ta punek beten porik Iruhin ihih nyumneh. Aria punek beten obi nyutob, ipak mare pupe meyoh aria pupe urkwip pushukepuk uwe, uwok. Ipak urkwip ta pur wosik aria punek tenkyu um Iruhin. <sup>3</sup> Aria shopunek, punek beten um Iruhin um nutaurumap nunekumap anah yah um punak pukripesh baugeniyum enyudok baraen um Krais. Seiwoh enyen nyanabeshuk nyape, aria douk nyatogur yopugunum. Aria douk eik showeshike yape um agundok yape yakripesh enyudok baraen um. <sup>4</sup> Aria ipak punek betenume um eik ikripesh enyudok baraen wosik abom kabi douk Iruhin nakri um. <sup>5</sup> Aria abudok nyutob ipak puni eshudok douk madae shugipesih Krais ananin baraen iri uwe pupe um, ipak urkwip ta pur wosik um punek yopihi atih aih. Aria ipak ta punugapesh pupe um piyabig Krais ananih aih. <sup>6</sup> Aria ihinyumorim baraen ipak piyagwrehan

iri, ipak ta piyagwreh enyudok douk wosik um nyutaurum arpesh abudok nyutob iri. Ipak piyagwreh namudok um punekesh shunadudareh um shumnek ipakin baraan. Aria ipak ta pudukemesh um pinyanam-umesh wosik eshesh shurige pumen iri baraan.

### *Pol Neshopok Tikikus Iri Onesimus Hanak*

<sup>7</sup> Apakin wanin Tikikus douk apak urkwip panawashaman iri anan apa neneken wosik Debeini ananin mour. Anan douk nani eik wanoprom wenek enyudok atin mour iri. Aria anan ta nunaku nagundok aria nukriep agundok douk eik yape yanak um. <sup>8</sup> Eik douk yeshopokan nanakumagu ipak um nukriep aria pudukemesh um agundok apak mape manak um. Aria shopunek um nutaurumep pupe dodogowip. <sup>9</sup> Anan ta ninigu apakin wanin Onesimus douk apak urkwip panawashaman iri hunaku. Anan douk nani ipak atubur wabur. Aria anan apa neneken wosik Iruhin ananin mour. Amam biom ta hukriep um eneshenesh eshudok douk shatogur agundok iri.

### *Pol Nenekumesh Yopuhi Nyumnah Eshesh Shape Kolosi Iri*

<sup>10</sup> Aristarkus douk nani eik wonoweshik wape iri nani Barnabas ananin mehinin Mak shopunek henekumepogu yopuhi nyumnah ipak. Aria ta Mak nunaku nutogrume um, ipak ta putauruman wosik kabi douk riguk eik yenemepogu baraan yakriep um. <sup>11</sup> Aria Jisas douk kupainyi nyeigur nanahwar um Jastus iri shopunek nenemepogu yopuhi nyumnah ipak. Aria eshesh Juda douk amudok bimatun meyoh abom hani eik manoprom menek mour um mataurum arpesh um shuwish agundok Iruhin nape Debeini um ananish arpesh um. Aria amam douk hataurume wosik abom um enyudok mour.

<sup>12</sup> Epafra nani ipak douk panaki atubur wabur iri. Aria shopunek, anan douk nape shakamum Krais Jisas nenekuman mour iri. Anan shopunek nenemepogu yopuhi nyumnah ipak. Ihih nyumneh anan nene beten dodogowin abom atun um ipak. Anan nene beten narig Iruhin um nunekep piyotu dodogowip atip kabi douk Iruhin nakri ipak pupe um. Aria nene beten um ipak pudukemesh um Iruhin ananin baraan abom pakri enyen douk adurin atin abom aria pugipesh Iruhin nakriyen iri. <sup>13</sup> Aria eik yadukeman wosik Epafra, douk namudok aria eik yakri ikriep um anan. Douk anan nape nene beten debeini mour um nune beten um Iruhin nutaurum ipak pani eshesh douk shape arbudok biyorub warub, Laodisia bani Hierapolis iri. <sup>14</sup> Aria apakin arpenyin Luk douk nene dokta iri douk apak urkwip panawashaman iri nani Demas amam shopunek henekumepogu yopuhi nyumnah ipak.

<sup>15</sup> Aria ipak pukrip apakish Kristen douk shape Laodisia iri. Pukripesh pukri eik douk yanadudareh-umesh abom aria yenekumeshugu yopuhi nyumnah. Aria pukrip Nimfa kwuni Iruhin ananish arpesh douk apa shantorum shenek lotu shape okwokwit urupat iri. Eik yenekumeshugu yopuhi nyumnah eshesh shopunek.

<sup>16</sup> Aria ipak putik apudok shup jurug aria pushopukop punak um Iruhin ananish arpesh douk shape Laodisia iri shopunek shutrup. Aria shopunek, apudok shup eik yenekap panak um eshesh Laodisia iri ipak shopunek ta putrishap aria putrup. <sup>17</sup> Aria pukrip Arkipus um nuneken niyaten wosik enyudok mour douk Debeini nakonen iri.

<sup>18</sup> Aria douk eik kanak Pol eikis wis yowem enyudok nyagiguk iri atin baraan. Eik yenemepogu yopuhi nyumnah um ipak. Aria ipak mare urkwip pushukepuguk um agundok showeshike senab yape yonoweshik um, uwok. Aria eik yakri Iruhin nutaurumep meyoh ipak.

# Parik Iri Shup Douk Pol Nenekap Panam Eshesh Tesalonaika Iri Banenyi Baraen Um Enyudok Baraen Pol Narik Neneken Nyanak Um Eshesh Tesalonaika Iri

1:1 Pol nakripesh yopinyi baraen um Iruhin nini Jisas Krais ta hutaurumesh

1:2-3:13 Pol nakripesh um yopinyi mour anan neneken um nataurumesh um aria nakri nunak nutrish

4:1-12 Pol nakripesh um yopih iah eshesh ta shugipesheh um shunek Iruhin nunadudareh um

4:13-5:11 Pol nakripesh um ahudok nyumnah apakin Debeini nutanamori ahi

5:12-28 Nyatuh iri baraen douk eshesh ta shugipeshen iri

<sup>1</sup> O ipak Iruhin ananish arpesh pape Tesalonaika iri! Eik Pol yani Sailas iri Timoti mape agundok aria yenekumepogu apudok shup ipak. Ipak douk patukur apakin Yain Iruhin nani Debeini Jisas Krais aria pape amampit atip iri. Apak makri Iruhin nataurumep meyoh aria ipakiruh aparuh hur wosik.

*Kristen Shape Tesalonaika Iri Shasuhw Iruhin Ananin Baraen Dodog Shagipeshen*

<sup>2</sup> Ihih nyumneh apak biom atun apa mape um munek tenkyu um Iruhin um ipak aria mape menek betenumep. <sup>3</sup> Apak menek beten um apakin Yain Iruhin um, apak apa menek urkwip um agundok ipakin bilip nyepuhur penek yopih aih um. Aria shopunek um agundok ipak urkwip panawasham um kupaishi arpesh aria ipak douk peyotu dodogowip penek sabainyi yopinyi mour pataurumesh um. Aria shopunek, menek urkum um agundok ipak padukemesh abom um apakin Debeini Jisas Krais ta wata nunaki nuraep um. Douk namudok aria ipak douk peyotu dodogowip atip pasah enyenenenamaen aria pupe putrugun-uman. <sup>4</sup> O ipak apakish arpesh? Apak madukemesh um Iruhin douk urkum manawashamep abom aria nanagraehep um pupe ananip atip abom.

<sup>5</sup> Um maresh? Riguk apak biom atun manaku makripep Iruhin ananin yopinyi baraen um, ananin Mishin nyataurumap nyenekap dodogowip abom aria douk makripep ananin baraen. Apak madae mukripep kabi douk baraen meyoh um uwe, uwok. Abudok nyutob apak manaku makripep baraen um, apak madukemesh abom um enyudok baraen douk adurin atin abom. Aria ipak douk patrup aria padukemesh um apak menekeh iri aih um agundok makri mutaurumep um purao Iruhin ananin baraen abom um. <sup>6</sup> Aria ipak patrup pagipeshap aria pagipesheh Debeini shopunek. Aria ipakish horim shenekep pemnek debeiri eriger. Aria Iruhin ananin Mishin nyataurumep nyenekap panadudareh um Iruhin ananin baraen aria douk pemneken pasuhwen pagipeshen. <sup>7</sup> Douk namudok aria ihishmorim Kristen shape agusudok biagos shokugosi nahobigos Masedonia nyani Akaia iri shatrip shakri ipak penek yopih iah aria eshesh douk shagipeshep. <sup>8</sup> Aria ipak douk pemnek enyudok baraen um apakin Debeini pasuhwen pagipeshen aria enyen nyaraheha nyeyatagun um agusudok biagos shokugosi nahobigos Masedonia iri Akaia aria shemneken kabi douk nyubrap peyagwreh shemnekap um. Aria enyudok baraen um agundok

ipak pemnek Iruhin ananin baraen pasuhwen pagipeshen um douk madae nyurahaen Masedonia iri Akaia atin, uwok. Enyen douk nyarahaen ihigunum. Douk namudok aria apak mour wokap um mukripesh um. <sup>9</sup> Um maresh? Eshesh kanak shakripap um ehudok yopihai ah riguk ipak penekeh um pataurum apak biom atun abudok nyutob manaku mani ipak mape um. Aria shopunek, shakripap um agundok ipak pekeshuk agabus warehos shani ihm-morim madae adurimi god omi um uwe aria patanam panak um Iruhin penek ananin mour um. Anan douk adurin abom Iruhin douk nape iih nyumneh iri. <sup>10</sup> Aria shopunek, shakripap um agundok pape patrugun um ananin nuganin Jisas um nukutukuk iruhw heven nunaki um. Seiwok eshesh shan nagok aria Iruhin wata nonohur nakitak nape iri. Anan douk nataurumap narap makutukuk agundok ta Iruhin juwehosin nunekumesh kwot shenek yoweishi inahos iri arpesh um.

## 2

### *Pol Nakri Um Iruhin Ananin Mour Anan Neneken Tesalonaika Iri*

<sup>1</sup> O ipak apakish arpesh! Ipak kanak padukemesh um apak manaku makripep Iruhin ananin baraen um, apak madae mukripep aria nyunakuk atap meyoh uwe, uwok. Apak makripep aria pasuhwen dodog pagipeshen. <sup>2</sup> Aria ipak padukemesh, sagomatin apak marik manak makripep Iruhin ananin yopinyi baraen eshesh Filipai aria eshesh shap shawarugap apa shanumogesh apak aria shenekap memnek debeiri eriger. Aria wata manakumagu ipak um, Iruhin nataurumap nenekap dodogowip aria makripep ananin baraen. Sabaishi arpesh shakri uwok um apak mukripep enyudok baraen um aria eshesh shakri shutapokumap yah. Aria apak madae munogugur uwe. <sup>3</sup> Aria baugos um agundok apak makripep um pukutukuk yoweishi inahos putanamori punak um Iruhin um douk enyudok. Apak douk madae mukri um mugiyagimep uwe, uwok. Aria shopunek, apak madae munek urkwip um munek enesh yoweishi inahos um ipak aria munek rohwumep uwe. <sup>4</sup> Apak douk Iruhin kanak natrup nakri wosik um apak munek enyudok mour um murao ananin baraen munak mukrip arpesh. Douk namudok aria apak douk manaku makripepen. Aria apak douk madae mukripep baraen um munek sabaishi arpesh shunadudareh um apak uwe, uwok. Apak makri Iruhin douk nadukemesh nenek skelimap um numun apakip urkwip iri atun nanadudareh-umap. <sup>5</sup> Aria apak madae mukri munyubumep uwe. Aria shopunek, apak madae munyubumep apakip urkwip um mukripep enen baraen um munek nyigiya um ipakish eshudok eneshenesh uwe, uwok. Ipak douk padukemesh um enyudok apakin baraen douk adurin. Aria Iruhin shopunek douk natrup aria nadukemap. <sup>6</sup> Apak douk madae munek mour um mukri ipak o enesh kupaishi arpesh shutuk apakish nyeiguuh shuto iruhw uwe, uwok. <sup>7</sup> Apak douk Krais ananim aposel maraogu ananin baraen manaku makripepen. Douk namudok aria apak ta dodogowip um ipak putuk apakish nyeiguuh shuto iruhw. Aria apak manaku mani ipak mapeum, apak makripep shokubur kabi douk onok yopukwi amakek kwataurum okwokwish batowish wosik um. <sup>8</sup> Apak urkwip douk panawasham abom ipak aria douk madae mukripep Iruhin ananin yopinyi baraen atin uwe, uwok. Apak shopunek manadudareh mani ipak manoprom mape atugun aria madae mubeshukumep eneh apakih aih uwe, uwok. <sup>9</sup> O ipak apakish arpesh! Douk ipak padukemesh um enyudok debeiniy Mour apak biom atun meneken iri. Riguk apak manaku mape mani ipak um, apak menek enyudok biyen mour nyumneh weibus. Apak makripep Iruhin ananin yopinyi baraen aria shopunek menek mour um morao utabor um munator

apakish eshudok eneshenesh um. Um maresh? Apak makri uwok um mukepamaen um pukop ipakigun worigun um. <sup>10</sup> Riguk apak douk mani ipak Kristen mape aria ipak pani Iruhin douk padukemap wosik apak. Ipak padukemap um apak douk yopupari munek yopihai atih aih iri. Aria apak baraen madae enen nyupenyap um munek enesh yoweishi inahos uwe. <sup>11</sup> Aria ipak padukemesh, apak douk mataurum ipak atin kabi douk anan yaken nataurum ananish batowish um. <sup>12</sup> Apak mataurumep um putogor dodogowip um ipakin bilip aria ipakiruh aparuh hur wosik. Aria shopunek, mape um makritep um pupe wosik aria punek yopihai atih aih Iruhin nakriyehi. Anan douk nahwarep um punak puwish agundok anan nape Debeini um ananish arpesh um aria putik agundok anan dodogowin abom atun aria natrugun nyeigur nyato iruh-uman um.

### *Eshesh Kristen Sheyotu Dodogowish Atish Shosah Enyenenen Amaen*

<sup>13</sup> Riguk apak biom atun manaku makritep Iruhin ananin baraen um, ipak penek urkwip pakri enyudok baraen douk madae enesh arpesh esheshin uwe. Ipak pakri enyen douk Iruhin ananin abom. Aria enyen douk adur. Aria ipak pasuhwen pagipeshen aria enyen nyenek yopinyi mour abom numun ipakiruh aparuh. Douk namudok aria iih nyumneh apak munek tenkyu um Iruhin um enyudok yopinyi mour ananin baraen nyeneken um ipak iri. <sup>14</sup> O ipak apakish arpesh! Ipak douk pemnek arudokmori atur eriger douk Iruhin ananish arpesh douk shatukur Jisas Krais shape agudok shokugi nahobig Judia iri shemnegor iri. Eshesh douk Juda eshesh kanak enesh shenekeksh enyenenen aria shenekeksh shemnek debeiri eriger. Aria ipak shopunek douk pemnek eriger namudok atin. Enesh ipak atubur wabur shakri uwok um ipak pupigesh Krais um aria eshesh shenekeksh pemnek debeiri eriger. <sup>15-16</sup> Seiwok eshesh Juda shabo sabaimi profet hagok. Arigaha aria nubokuhien kwar shabo apakin Debeini Jisas nagok. Aria apak biom atun shopunek shakri uwok-umap aria douk shenekap enyenenen aria shahiyahap maruwok manak um kupaignum. Apak manak makritep Iruhin ananin baraen kupaihi arpesh douk madae Juda iri uwe. Apak makri mukritep um shumneken shugipeshen aria anan nunaraesh shutanamori shupe wosik. Aria eshesh Juda shakri uwok aria shakri shutapok apakah yah um mare munak mukritep. Namudok aria eshesh shutapok Iruhin ananim urkum aria shatogur ihishmorim arpesh esheshish horim. Riguk eshesh shape shenek sabaishi yoweishi inahos. Aria douk eshesh shatogur sabaishi abom. Aria anan douk juwehosin-umesh aria nakri jurugish. Aria kweipon anan ta nesh.

### *Pol Nakri Nutanam Nunak Nutik Eshesh Tesalonaika*

<sup>17</sup> O ipak apakish arpesh! Enesh arpesh shahiyahapari aria apak biom atun douk makutipuk banab nyutob manaki mapeik agundok. Apak manaki mape agundok aria apak urkwip porum ipak aria makri abom um munaku mutrip. Aria apak mabirak matik uwok. <sup>18</sup> Sabaihi nyumneh eik Pol yabisrik um yakri apak munaku aria uwok. Yoweini Satan natapokumap yah. <sup>19-20</sup> Apak douk mape munek urkwip um ahudok nyumnah apakin Debeini Jisas Krais nunaki aria apak muni ipak mupe wosik ahi. Ahudok nyumnah, apak ta muni anan mupe atugun aria mupe wosik. Aria douk apak biom atun douk munek urkwip um ipak penek bilip um Krais aria meyotu dodog mape matrugun um Krais nutanamori nunarap um. Aria ahudok nyumnah ta shutik ipak aria ta shudukemesh um apak douk makritep Iruhin ananin baraen aria mabouk yoweishi inahos

shabuhuk. Aria apak ta munadudareh um ipak atip aria punekap mutuk Iruhin ananin nyeigur nyuto iruhw.

### 3

*Pol Neshopok Timoti Nanak Um Nutaurum Eshesh Tesalonaika Shurao  
Iruhin Ananin Dodog*

<sup>1-2</sup> Apak biom atun munek urkwip um ipak aria manakripam makri ipak ta pupe wosik aka, uwok? Apak makri uwok um mupe mutrugun anah shopunek nyumneh um ipakin baraen nyunakumori apak um, uwok. Douk namudok aria ohwak biohw wapeik agundok Atens aria weshopoku ohwakin wanin Timoti atun nanakumogu nutaurumep. Anan nani ohwak apa manoprom munek Iruhin ananin mour um makripesh Krais ananin yopinyi baraen. Ohwak douk weshopokan nanakumogu nutaurumep um pupe dodogowip um Iruhin aria pusuhw ananin baraen dodog pugipeshen.

<sup>3</sup> Um maresh? Ta enesh arpesan shunekap purao debeiniy amaen aria pukutukuk Iruhin ananin baraen. Ipak padukemesh, enyudok amaen douk Iruhin kanak nakri wosik aria enyen douk nyatogrume. <sup>4</sup> Riguk apak manaku mani ipak mape um, abudok nyutob arpesan douk madae shunekap murao enen amaen uwe. Aria apak makripep makri ta mare roubi aria enesh arpesan ta shunek apak muni ipak murao enen amaen. Aria douk ipak padukemesh um apakin baraen douk nyatogur adurin. Eshudok arpesan shenek ipak pani apak morao amaen abom kabi douk riguk apak makripep um. <sup>5</sup> Douk namudok aria eik yakri imnek baraen arigas um agundok ipak pape um aria eik douk yeshopok Timoti nanaku. Anan nanakumogu nutrip aria neneki baraen nyunakumori um eik idukemesh um ipak pasuhw Iruhin ananin baraen dodog aka, uwok? Eik yenek urkum yakri um anudok yoweini douk nagraeh arpesan um shenek yoweishi inahos iri ta nukwiraehep aria ta jurug pukutukuk Iruhin ananin baraen aka, mumam? Aria ta wosik atin enyudok riguk apak meneken iri mour um makripep Iruhin ananin baraen um nyunakuk meyoh.

*Timoti Nakrip Pol Um Eshesh Tesalonaika Shagipeshen Wosik Iruhin  
Ananin Baraen Um Aria Pol Nanadudareh*

<sup>6</sup> Aria douk Timoti ta shopunek nakutupuk nanaki nakriphow yopinyi baraen um ipak. Anan nakri ipak pasuhw Iruhin ananin baraen dodog pagipeshen aria ipak urkwip panawasham ipak kanak pani kupaiishi arpesan pataurumesh. Aria ipak urkwip panawasham eik yani Sailas aria pakri punaki putruh abom. Aria ohwak shopunek urkwip panawashamep abom aria wakri unaku utrip abom. <sup>7</sup> Ipak apakish arpesan. Sabaishi arpesan shape agundok iri shap aria shakop enenyenen amaen aria apak memnek debeiri eriger. Aria apakiruh aparuh madae yoweruh uwe, uwok. Apak memnek um agundok ipak pasuhw Iruhin ananin baraen dodog pagipeshen um aria apak douk meyotu dodogowip atup. <sup>8</sup> Apak manadudareh um maresh? Ipak pape dodogowip um Debeini aria pasuhw ananin baraen dodog pagipeshen.

<sup>9</sup> Aria Iruhin nenekap manadudareh abom um ipak aria apa menek tenkyuman. Aria agundok apak menek tenkyuman um douk debegun abom. <sup>10</sup> Aria nyumneh weibus apak biom atun urkwip por abom um ipak aria menek beten marig Iruhin um apak munaku mutrip anah shopunek. Aria ta ipak pasuhw Iruhin ananin baraen pugipeshen um, enyen douk wosik. Uwok um, apak makri munaku mutaurumep um pusuwen dodog pugipeshen.

*Pol Nene Beten Narig Iruhin Um Anan Nunak Nutik Eshesh Tesalonaika*

<sup>11</sup> Eik yakri apakini Yain Iruhin nini Debeini Jisas hutaurumap aria hunekumap anah yah um munaku mutrip. <sup>12</sup> Aria yakri apakin Debeini nutaurumep aria ipak urkwip panawasham ipak abom atin atin aria punataurum um pishagrakuk abom riguk parik pape peneken um. Aria ipak urkwip punawasham ihishmorim kupaishi arpesh shopunek putaurumesh kabi douk ahudok nyumnah apak biom atun urkwip panawasham abom ipak mataurumep um. <sup>13</sup> Aria shopunek yakri apakin Debeini nutaurumep nunekep dodogowip numun ipakiruh aparuh aria piyotu dodog. Anan nunekep namudok um hahudok nyumnah apakin Debeini Jisas nini ihishmorim ananish arpesh shunaki ahi, Iruhin apakini Yain ta nutrip aria nukri ipak baraen madae enen nyupenyep uwe aria pape ananip atip.

## 4

*Apak Ta Mugipesh Iruhin Ananim Urkum Um Munekan Nunadudareh*

<sup>1</sup> Ipak Kristen ta pumnek enyudok eikin nyatuh iri baraen! Um maresh? Apak douk morao Debeini ananit nokwat aria makripep. Eikin baraen douk enyudok. Riguk apak manakumogu ipak aria menek skulumep um ihihmorim yopihi aih um pugipesheh aria punek Iruhin nunadudareh. Aria douk ehudok aih ipak douk pape penekah. Douk namudok aria apak dodogowip-umeh abom um punekah wosik pishagrakuk riguk parik pape penekah um. <sup>2</sup> Ipak douk mare urkwip pukepukuk um Debeini Jisas ananin baraen douk apak biom atun makripepen iri uwe, uwok. Apak douk ananakop big um mukripen ananin baraen aria apak douk makripepen.

<sup>3</sup> Iruhin ananim urkum douk namudok. Anan nakri ipak ta pupe ananip atip aria pukutukuk abom ehudok aih um shenek wehrur um. <sup>4-5</sup> Aria shopunek nakri ipak armam ta pusuhw merik um ipak kanak um mishish mare shikitak puni kupaiwari armago penek wehrur um\* kabi douk amam haiden douk madae hudukemesh um Iruhin iri uwe hape henekesh um, uwok. Ipak ta pupe Iruhin ananip atip aria punek yopinyi atin. <sup>6</sup> Aria shopunek, nakri ipak armam mare punek eshudok yoweishi inahos um kupaimi Kristen um punatrum amamiyu armago um, uwok. Douk riguk apak makripep dodogowip atup um ehudokmori aih. Um maresh? Apakin Debeini ta nuwanamam eshudokmori yoweishi inahos amam henekesh iri. <sup>7</sup> Aria Iruhin douk madae nuhwarap um munek wehrur uwe, uwok. Anan nahwarap um mupe wosik abom aria mupe ananip atup. <sup>8</sup> Namudok aria shashudok arpesh douk shukri uwok um shumnek enyudok baraen iri douk madae shukop agabus apak arpesh atup uwe, uwok. Eshesh douk shakon agabus Iruhin douk nakop ananin Mishin iri shopunek.

*Apak Ta Urkwip Punawasham Kupaishi Aria Munek Yopih Aih Shopunek*

<sup>9</sup> Eik douk mour woke um ikripep enen baraen um ipak urkwip punawasham kupaishi Kristen aria punataurum um. Um maresh? Iruhin douk nenekep skulumep jurug aria ipak penekah wosik ehudok aih. <sup>10</sup> Aria ipak urkwip douk panawasham ihishmorim kupaishi Kristen douk shape ihigunum um shokugi nahobig Masedonia iri. Aria ipak Kristen! Apak makri mukripep dodogowinyi baraen um ipak urkwip punawasham eshudok arpesh aria putaurumesh pishagrakuk riguk parik pape penekesh um.

\* 4:4-5: baugenjum um enyudok baraen douk biyen. Enen nyetem lain 4-5, aria enen nyakri ipak armam puni ipakiyu armago punaraum iri ta pugipesh yopih aih aih.

<sup>11</sup> Aria shopunek, ipak mishish ta shikitak um pupe wosik abom aria mare piyagwreh sabainyi bareaen um puni kupaishi piyagwreh debeg punitok uwe, uwok. Ipak ta punek urkum um ipak kanak aria punek mour um puparug ipakibor utabor buni worigun ipak pugnoh iri kabi douk riguk apak makripepukum um. <sup>12</sup> Ipak ta punekesh namudok um kupaishi arpesh douk madae shugipesh Krais iri uwe shutrip aria shukri ipak douk yopipari. Aria shopunek um mare puhwar kupaishi um shubiromep, uwok.

### *Apakin Debeini Jisas Ta Wata Nutanamori*

<sup>13</sup> O ipak apakish arpesh! Apak biom atun makri mukripep enen adurin bareaen um eshudok shagok iri arpesh. Eshudok arpesh douk madae shudukemesh um Iruhin iri uwe douk madae shudukemesh um agundok shagok iri shanak shapeum uwe. Douk namudok aria eshesh urkwip yowep aria shereh shanakwukri shanaruwor. Douk namudok aria apak makri ipak mare pureh kabi eshesh shereh um, uwok. <sup>14</sup> Um maresh? Apak munek bilip makri Jisas nagok sharuman aria anan wata nikitak nape. Douk namudok aria apak munek bilip makri ahudok nyumnah Jisas nutanamori ahi, Iruhin ta nuhur shagok iri douk riguk shenek bilip um anan iri shikitak shini Jisas shunaki. <sup>15</sup> Aria enyudok bareaen apakin Debeini nakripen iri douk enyudok ta mukripepen. Baraen enyudok. Kweipon hahudok nyumnah anan nutanamori ahi, eshudok douk wata shupe agundok atap iri ta mare shurik shunak aria shagok iri shugiguk shunak, uwok. <sup>16</sup> Eshudok douk shape agundok atap iri ta shumnek Debeini nuhwar debeg. Aria enselahos eshesin debeinyi ensel ta nyuhwar debeg aria Iruhin ananihw oruhw ta hwiyagwreh. Aria apakin Debeini Jisas ta nukutukuk iruhw heven nunaki. Aria eshudok arpesh douk shenek bilip aria shatukur Krais iri douk riguk shagok iri ta shurik shikitak shupe. <sup>17</sup> Aria hahudok nyumnah apak douk munek bilip aria wata mape iri, Iruhin ta nurap muni eshudok shagok iri munak ahudok atuh. Apak ta munak mutik apakin Debeini gani iruhw utag aria muni anan mupe ihih nyumneh. <sup>18</sup> Douk namudok aria ipak ta punataurum um punakripam enyudok bareaen um puhur ipak atin atin ipakiruh aparuh um piyotu dodogowip.

## 5

### *Apak Ta Mupe Mutrugun um Apakini Debeini Nutanamori um*

<sup>1</sup> O ipak apakish arpesh! Apak biom atun mour wokap um mukripep um meiji nyumnah ta enyudok nyutogur um, uwok. <sup>2</sup> Um maresh? Ipak padukemesh, ahudok nyumnah apakin Debeini nutanamori nunek skelimum arpesh ahi, anan ta nunaki kabi douk nakwuaruh iri nanaki orokohunib um wab um. <sup>3</sup> Abudok nyutob arpesh ta shukri, “Douk apak mape yopuhi nyumnah aria mape wosik.” Aria ahudok nyumnah ta hutogur ahudok atuh kabi armatok kwomnek eriger um kubuki batowin um. Aria eshesh ta mare shuruwok, uwok. Eshesh ta shurao debeiri eriger aria shupe yowesh abom.

<sup>4</sup> Aria ipak Kristen douk madae pupe kabi eshesh shape arukwtigun iri shape shenek urkum um uwe. Douk namudok aria ahudok nyumnah ta hutogrumesh ahudok atuh kabi douk nakwuaruh iri nanaki um. Aria eshesh shikitak yowiyokuk. Aria ipak ta uwok. <sup>5</sup> Ipak ihishmorim pani apak douk Iruhin ananish batowish douk mape bogaragun-umori. Apak douk madae mupe kabi eshudok douk shape arukwtigun iri shapeum um uwe, uwok. Aria apak madae munek yoweishi inahos kabi eshesh shape arukwtigun iri shenekesh um uwe. <sup>6</sup> Douk namudok aria apak ta

mare mupe kabi douk sheshuh iri sheshuh um, uwok. Sheshuh iri madae shudukemesh uwe, eshesh shakri uwok um shumnek Iruhin ananin baraen aria shenek yoweishi inahos. Aria apak mare munek yoweishi inahos kabi eshesh um, uwok. Apak ta mupe musuhw merik um apak kanak aria munek urkum um yopinyi atin aria muneken. <sup>7</sup> Um maresh? Weibus obi nyutob, sheshuh iri arpesan sheshuh. Aria shawok abar iri shawok abar aria shagugak. <sup>8</sup> Aria apak uwok. Apak douk mape bogaragun iri. Douk namudok aria apak ta musuhw merik um apak kanak aria musuhw Iruhin ananin baraen dodog mugipeshen aria apak urkwip punawasham kupaishi. Aria ta munekesh namudok um, apak ta mupe kabi anan nasuhw aidap nanabeshuk ananihw yegenyihw iri nape wosik abudok nyutob nunek wanohw um. Aria apak ta mudukemesh abom um Iruhin ta nunarap mutanamori mupe wosik. Aria apak mudukemesh um enyudok um, apak ta mupe wosik kabi anan nowem um ainit hat iri nape wosik abudok nyutob anan nunek wanohw um. <sup>9</sup> Iruhin douk madae nugraehap um nuwanamap apakish yoweishi inahos uwe, uwok. Anan douk nagraehap um apakin Debeini Jisas Krais nunarap mutanamori mupe wosik atin. <sup>10</sup> Anan douk nagok um nurao apak ihishmorim munak muni anan mupe wosik atin. Aria ta apak mugok o wata mupe um, anan ta wata nunarap. <sup>11</sup> Douk namudok aria ipak ta piyagwreh punakrip um yopinyi atin baraen um punataurum um piyotu dodogowip kabi douk ipak pape peneken um. <sup>12-13</sup> O ipak apakish arpesan, apak makri ipak pumnek enyudok apakin baraen pugipeshen. Baraen enyudok. Ipak ta pupe shakamum ipakim debeimi douk henek debeini mour um hataurumep hakritep Iruhin ananin baraen iri. Amam douk Iruhin nagraeham um hataurumep aria hunabreshep um punek yopihi atih aih. Amam douk hataurumep wosik. Douk namudok aria ipak ta putuk amamish nyeiguhw shuto iruhw aria ipak urkwip punawashammar aria putaurumam. Aria ipak ta piyagwreh atin baraen aria punagabe um pupe atugun.

<sup>14</sup> Ipak apakish arpesan! Apak biom atun makri mukritep enen baraen shopunek um pumneken aria pugipeshen. Baraen enyudok. Ipak enesh douk shape meyoh, madae shunek mour atin uwe. Douk namudok aria ipak pukrip eshudokmori arpesan um mare shupe meyoh, uwok. Aria shopunek, ipak enesh douk shanogugur. Douk namudok aria ipak pukripesh yopinyi baraen um pugabe eshesiruh aparuh um eshesh mare shunogugur. Aria shopunek, ipak enesh douk madae dodogowish uwe. Douk namudok aria ipak ta putaurumesh um shutogur dodogowish. Aria putaurum ihishmorim arpesan aria mare juwehosip pukripesh debeg, uwok. Ipak ta pupe samokwiyaishi arpesan aria pukripesh shokubur. <sup>15</sup> Aria ta enesh arpesan shunek yoweishi inahos um ipak um, ipak mare wata pinyanam-umesh, uwok. Ibih nyumneh ipak ta pukwiraeh um punek yopinyi atin um ipak atin atin puni ihishmorim arpesan shopunek putaurumesh. <sup>16-17</sup> Aria ipak ta pupe um punadudareh namudok atin aria pupe punek beten nyumnah wab. <sup>18</sup> Aria ipak ta punek tenkyu um Iruhin um enenyenen nyutogrumepe iri. Um maresh? Anan douk nakri ipak patukur Jisas Krais iri ta pupe um punek tenkyuman namudok atin. <sup>19</sup> Iruhin ananin Mishin douk nyenek sabaihi yopihi atih aih iri mour. Douk namudok aria ipak mare putapok enenyenih yah um nyunek enenyenih mour um, uwok. <sup>20</sup> Aria enyen douk nyohur enesh arpesan aria shakritep Iruhin ananin baraen. Douk namudok aria ipak mare pukenyuk agabus enyudok baraen, uwok. <sup>21</sup> Aria ipak ta punek skelimum ihinyumorim baraen nyuni aih aria pudukemesh um enyen douk yopinyi o yoweinyi. Aria yopinyi um, ipak ta pusuwen dodog. O ta yoweinyi um, ipak ta pukutinyukuk. <sup>22</sup> Aria

pukutukuk ihihmori yoweishi aih.

<sup>23</sup> Aria eik yakri Iruhin douk baugos um apakiruh aparuh hur wosik um nunekek pupe ananip atip abom um punek ihihmori yopihi atih aih. Aria shopunek, yakri nutaurumep aria mare enesh yoweishi inahos shupenyep ipakiruh yegeshiweruh huni ipakish mishish shuni ipakiruh aparuh ahudok yopuhi nyumnah apakin Debeini Jisas Krais nutanamori ahi aria pupe wosik atin. <sup>24</sup> Aria Iruhin douk nahwarep um pugipesh ananin baraeen aria apa nagipeshen wosik ihinyumorim baraeen anan nakriyen iri. Namudok aria anan ta nutaurumep pupe wosik arigaha ahudok yopuhi nyumnah Debeini Jisas nutanamori ahi.

<sup>25</sup> O ipak apakish arpesh! Ipak ta punek beten porik Iruhin um nyutaurumap. <sup>26</sup> Aria ipak ihipmorim ta urkwip punawasham ipak atin atin aria punapuprikum. <sup>27</sup> Aria eik Pol douk apakini Debeini neke debeiniyi big. Douk namudok aria eik yakri ikritep um putaruh enyudok baraeen nyetem apudok shup iri um ihihmorim Kristen shape ganudok iri shumneken. <sup>28</sup> Aria eik yakri apakin Debeini Jisas Krais nutaurumep meyoh aria nunekek pupe wosik.

## Pagiguk Iri Shup Douk Pol Nenekap Panam Eshesh Tesalonaika Iri Banenyi Baraen Pol Nagiguk Neneken Nyanak Um Eshesh Tesalonaika Iri

1:1-2 Pol nakripesch yopinyi baraen um Iruhin nini Jisas Krais hutaurum eshesh Tesalonaika

1:3-12 Pol neneke tenkyu um Iruhin um eshesh aria neneke betenumesh

2:1-17 Arman ta nukenyuk agab Iruhin ananin baraen iri ta nunaki

3:1-15 Eshesh Kristen mare shupe moyoh, uwok. Eshesh ta shunek mour um shutaurum eshesh kanak shuni kupaishi shopunek

3:16-18 Nyatuh iri baraen

<sup>1</sup> Eik Pol yani Sailas aria Timoti mape agundok aria eik Pol yenem apudok apakip shup panakumogu ipak Iruhin ananish arpesan pape Tesalonaika iri. Apak menekapumagu ipak douk patukur apakin Yain Iruhin nani Debeini Jisas Krais iri. <sup>2</sup> Apak makri apakin Yain Iruhin nini Debeini Jisas Krais hutaurumep moyoh aria ipakiruh aparuh hur wosik.

*Pol Neneke Tenkyu Um Iruhin Um Eshesh Tesalonaika Sheyotu Dodog  
Shosah Enenyen Amaen Um*

<sup>3</sup> O ipak apakish arpesan, riguk ipak pasuhw Iruhin ananin baraen atin. Aria douk, ipak pasuhwen dodog abom pagipeshen peshagrakuk riguk parik pagipeshen um. Aria riguk ipakiruh aparuh hanawasham ipak atin atin um. Aria douk ipak peshagrakuk riguk parik pape peneken um. Douk namudok aria iih nyumneh apak ta urkwip purum ipak aria munek tenkyu um Iruhin. Aria enyen douk wosik um apak menekesh namudok um. <sup>4</sup> Aria ipak douk penekesh namudok aria apak manak sabaignum mani sabaihi Iruhin ananish arpesan mapeum, apak apa makripesch um ipak aria matuk ipakishi nyeiguhw shato iruhw. Apak apa makripesch um sabaihi eneheneh yoweihai aih douk ipakish horik horik shenekeh um ipak iri shani sabainyi amaen douk nyatogrumepe nyeneke pemnek debeiri eriger iri. Aria apak makri ipak apa pasuhw Iruhin ananin baraen dodog pagipeshen aria peyotu dodogowip pasah ihinyumorim amaen douk nyatogrumepe iri.

*Iruhin Ta Nugipes Yopihi Atih Aih Aria Nunek Skelimum Apak Arpesan*

<sup>5</sup> Aria enyudok douk nyatogur um ipak iri douk nyeyabigap um Iruhin apa neneke yopihi atih aih aria neneke skelimum ipakih aih. Aria ipak douk pemnek debeiri eriger. Um maresh, ipak pakri puwish agundok Iruhin nape Debeini um ananish arpesan shupe um. Aria anan ta nunek wosik abom um puwish ganudok. <sup>6</sup> Aria Iruhin ta nunek yopihi atih aih namudok. Anan ta nunek skelimum eshudok arpesan douk apa shenek yoweishi inahos um ipak iri aria nukri eshesh shenek yoweishi inahos. Aria anan ta wata nunyanam-umesh nunekesh shumnek debeiri eriger. <sup>7</sup> Aria anan ta nukweshihep um enyudok amaen aria ta wata pupe um uhwin. Aria apak shopunek, anan ta nunekesh-umap namudok atin. Iruhin ta nunekumap enyudok hahudok nyumnah Debeini Jisas nini ananish dodogowishi enselahos shukutukuk iruhw heven shutogur yopugunum ahi. Aria anan ta shutrun nutrugun abom aria nunaki kabi douk debeiri nyih hatrugun aria bogaragun abom ba nanaki um. <sup>8</sup> Aria hahudok nyumnah anan ta nunaki aria nubo eshudok arpesan douk madae shudukemesh um Iruhin iri uwe

shuni eshudok douk madae shugipesh apakin Debeini Jisas ananin yopinyi baraen iri uwe. <sup>9</sup> Anan ta nesh debeg. Aria anan ta nukri wokumesh aria eshesh ta mare shunak shupe anan napeum aria shutik agundok anan natrugun abom um, uwok. Eshesh ta shunak shupe kupaigunum aria shupe shumnek debeiri eriger aria shupe yowesh abom iih nyumneh. <sup>10</sup> Aria hahudok nyumnah sabaishi ta shutuk ananin nyeigur nyuto iruhw. Aria apak ihpmorim ananish yopishi arpesh abom douk magipesh ananin baraen iri ta mutuk ananin nyeigur nyuto iruhw aria mukri anan douk yopuyopuni Debeini aria munadudareh-uman. Aria ipak shopunek ta putrun aria putuk ananin nyeigur nyuto iruhw. Um maresh? Riguk apak manaku makripep ananin baraen aria ipak pasuhwen pagipeshen.

<sup>11</sup> Douk namudok aria iih nyumneh apak munek beten um apakin Iruhin um nutaurumep. Apak munek beten makri anan douk seiwok nahwarep aria nenekep penek yopihi atih aih anan nahwarep um punekah iri. Aria anan nutaurumep nunekep dodogowip um punek iihmorim yopihi aih ipak mishish shakitakumeh iri. Aria um pusuhw ananin baraen dodog pugipeshen. Namudok aria apak marigan um nupuhur um punek ihnyumorim yopinyi mour iri aih. <sup>12</sup> Apak menek betenumep um makri apakin Iruhin nini Debeini Jisas Krais hutaurumep meyoh hunekah dodogowip aria putuk Debeini Jisas ananin nyeigur nyuto iruhw. Aria Jisas shopunek nutuk ipakash nyeiguw shuto iruhw.

## 2

### *Anan Arman Douk Ta Nununu Iruhin Ananin Baraen Nyubuhuk Iri Ta Nutogur*

<sup>1-2</sup> Ipak apakish arpesh! Eik yakri ikripep enen baraen um hahudok nyumnah apakin Debeini Jisas Krais nutanamori aria apak munak muni anan mupe atugun ahi. Ipak pumnek! Aria enesh arpesh douk shenek rohwumep shakri ahudok nyumnah apakin Debeini nunaki ahi douk hatogur jurug. Aria eik madae idukemesh uwe, meishi arpesh shenek rohwumep shakripep namudok? Enesh shakripesht Iruhin ananin baraen iri shakripep, o enesh kupaishi shakripep? O enesh shenek rohwumep shakripep shakri apak menyemagu anap shup panakumogu ipak? Ipak mare pikitak yowiyokuk aria aparuh mare yoweruh, uwok. <sup>3</sup> Ipak mare pumnek esheshin baraen, uwok. Eshesh douk shenek rohwumep. Ahudok nyumnah douk wata hutogur uwe. Sagomatin sabaishi arpesh ta shurik shukri uwok um Iruhin ananin baraen shukutinyukuk. Aria shopunek anudok yoweinari arman douk ta nununu Iruhin ananin lo nyubuhuk iri ta nurik nutogur yopugunum ba jyoh. Anan ta nurik nunaki aria ahudok nyumnah ta hugiguk hutogur. Aria anan douk Iruhin nagraeihan jurug um nunuk nupe yoweiburi wabur hel. <sup>4</sup> Aria anudok yoweinari anan ta nutuk ananin nyeigur nyuto iruhw aria nukri iihsmorim arpesh ta shukutuk Iruhin nini eneshenesh warehos shuni yoweishi sagabehos shuni warenab douk arpesh shegremab bani rohwimi god omi shape shenek lotumesh iri aria shutuk ananin atin nyeigur nyuto iruhw. Aria anan ta nuwish Iruhin ananit debeiti urupat aria nupe nunek rohwumesh nukri anan atun abom douk Debeini Iruhin.

<sup>5</sup> Aria ipak ta urkwip pushukepuk um enyudok ihnyumorim baraen douk abudok nyutob eik yanaku yani ipak mape aria yakripen iri? Uwok. Ipak douk padukemen enyudok baraen douk nyakrium anudok douk ta nununu Iruhin ananin lo nyubuhuk iri. <sup>6</sup> Aria douk anudok arman douk

wata nunaki uwe. Anan douk enen arpen<sup>\*</sup> nyatapok-uman ananah yah aria anan douk madae nunaki uwe. Aria ipak douk padukemen enyudok arpen. Aria ahudok yopuhi nyumnah Iruhin nakriyah i hutogur aria ahudok atuh anudok arman douk ta nununu Iruhin ananin bараен nyubuhuk iri ta nutogur yopugunum.<sup>7</sup> Aria douk ehudok aih um shakenyuk agabus Iruhin ananin lo um douk hatogur aria hanabeshuk hape. Ihih ta hunabeshuk hupe arigaha abudok nyutob shuwaruguk enyudok arpen nyutapok-uman yah iri.<sup>8</sup> Aria anudok yoweinari douk ta nununu Iruhin ananin bараен nyubuhuk iri ta nutogur yopugunum. Aria Debeini Jisas ta nutogur yopugunum aria ta sabaishi arpesh shutrun nutrugun abom aria nunaki. Aria anan ta nuhaprish anudok yoweinari arman um ananip yap atup aria non nugok. Aria agundok Jisas natrugun abom um ta non nugok abom.<sup>9</sup> Aria Satan ta natauruman nunekan dodogowin aria nunak nupe nunek rohw um sabaishi arpesh. Anan ta nunek sabainyi Iruhin atun neneken iri mour um arpesh shutrin aria shikitak yowiyokuk shukri adur anan douk Iruhin natauruman aria douk neneken.<sup>10</sup> Anan ta nunek eneshenesh yoweishi inahos nunek rohw um eshudok arpesh douk shape shagim ahudok yah um shugok shunak shuwishuk iri. Eshesh ta shutik anudok douk ta nununu Iruhin ananin bараен nyubuhuk nyuni ananin mour aria shusuhw ananin bараен. Aria eshesh ta shugok. Um maresh? Eshesh shakri uwok um shusuhw Iruhin ananin adurin atinyi bараен aria anan wata nuraesh shutanamori shupe wosik uwe.<sup>11</sup> Douk namudok aria Iruhin ta nuhur esheshiruh aparuh um shusuhw anudok douk ta nununu Iruhin ananin bараен nyubuhuk iri ananin rohwinyi bараен shugipeshen.<sup>12</sup> Aria Iruhin ta nunekumesh debeiti kwot eshesh ihishmorim aria ta nesh nuwanumesh eneshenesh yoweishi inahos eshesh shenekesh iri. Um maresh? Eshesh douk madae shusuhw adurin bараен shugipeshen uwe, uwok. Eshesh shanadudareh um shunek eneshenesh yoweishi inahos.

### *Iruhin Douk Seiwok Nagraehep Um Nuraep Pupe Wosik Abom*

<sup>13</sup> Ipak apakish arpesh, apakin Debeini douk urkum manawashamep abom. Douk seiwok baugos um Iruhin nagraehep um nuraep putanamori pupe wosik. Aria ananin Mishin nyawishep aria nyaraep um pupe ananip atip. Aria ipak pasuhw ananin adurin bараен pagipeshen. Douk namudok aria iih nyumneh apak ta munek betenumepe aria munek tenkyu um Iruhin um ipak.<sup>14</sup> Anan douk nahwarep aria nakrip apak manaku makripep ananin yopinyi bараен. Anan nahwarep um puni apakin Debeini Jisas Krais pupe wosik aria puni anan purao agundok anan natrugun abom um nini ananin debeinyi nyeigur. Aria ipak shopunek ta pupe kabi anan um.<sup>15</sup> Douk namudok aria ipak apakish arpesh! Ipak ta piyotu dodogowip aria pusuwen dodog enyudok yopinyi bараен douk riguk apak menek skulumepe makripepen iri nyuni nyanyudok douk apa menyemagu shus iri.

<sup>16-17</sup> Aria apak makri apakin Debeini Jisas Krais anan kanak nini Yain Iruhin hutaurumep. Anan douk urkum manawashamap nataurumap meyoh aria nenekap apakiruh aparuh hur wosik iih nyumneh. Aria mape urkwip porum agundok douk madukemesh abom um kweipon anan ta nunaraep punak pupe wosik um. Aria apak makri Jisas Krais nini Iruhin hunek ipakiruh aparuh hur wosik. Aria hunekep dodogowip um punek eneheneh yopih iatih aih huni mour. Aria shopunek um piyawreheh yopinyi atin bараен.

---

\* **2:6:** Enesh shadukemesh iri arpesh shakri enyudok arpen nyatapok-uman yah anudok arman iri douk Iruhin ananin Mishin. Aria enesh shakri enen Iruhin ananin ensel

## 3

*Ipak Punek Beten Um Iruhin Nutaurum Apak*

<sup>1</sup> O ipak apakish arpesan! Eik yakri ikripep enen nyagiguk iri baraen. Baraen enyudok. Ipak punek beten um apak um apakin Debeini ananin yopinyi baraen nyurahaen nyunak arigaha sabaigunum. Aria nyunek yopinyi mour numun sabaishi arpesan esheshiruh aparuh aria nyurao debeini nyeigur kabi douk enyen nyaraen ganudok orokohun um ipak um. <sup>2</sup> Aria shopunek punek betenumap um amudok henek yoweishi inahos atish iri huni mamudok douk hakri uwok um apak munek Iruhin ananin mour iri mare hunek enesh yoweishi inahos um apak. Um mares? Madae ihishmorim arpesan shusuhw Iruhin ananin baraen shugipeshen uwe, uwok. <sup>3</sup> Aria apakin Debeini apa nagipeshen wosik ihinyumorim ananin baraen. Douk namudok aria anan ta nurokarubep um yoweini arman aria nunekep piyotu dodogowip. <sup>4</sup> Aria apak douk matukur Debeini aria madukemesh abom um ipak douk pape penek ihihmorim aih apak makripep um punekeh iri. Aria ipak ta pupe um punekesh namudok atin. <sup>5</sup> Aria apak makri Debeini nutaurumep aria ipakip urkwip purum enyudok baraen. Baraen enyudok. Ipak ta urkwip punawasham Iruhin. Aria shopunek, ipak urkwip purum agundok ta Krais nutaurumep aria piyotu dodogowip abom abudok nyutob kwiraeh nyukri nyutogramep um.

*Ipak Ihishmorim Ta Punek Mour*

<sup>6</sup> O ipak apakish arpesan! Apak douk Debeini Jisas Krais nakop big um munek ananin mour. Douk namudok aria apak makripep dodogowinya baraen um pugipeshen. Baraen enyudok. Aria ipak enesh shasuhw Krais ananin baraan aria eshesh shape meyoh madae shunek mour iri uwe, ipak mare puni eshesh ponoprom, uwok. Eshesh douk madae shugipeshen enyudok baraen riguk apak makripepen iri uwe. <sup>7-8</sup> Ipak kanak douk padukemesh um agundok riguk apak manaku mani ipak mape um. Apak madae mupe meyoh uwe, uwok. Apak munek mour nyumnah wab aria madae murao ipakigun worigun meyoh uwe, uwok. Apak matorish aria ipak douk pakapesh. Aria apak munek debeini mour nyumneh weibus um makri uwok um mukep amaen um pukop worigun iri utabor, uwok. Douk namudok aria ipak ta pugipesh apakah aih um punek mour dodogowip atip. <sup>9</sup> Aria enyen douk wosik um apak mukripep um pukop utabor iri worigun um. Aria apak makri uwok. Apak makri munek mour dodogowip atup nyumnah wab um miyabigep um pugipesh apak punek mour namudok atin. <sup>10</sup> Riguk abudok nyutob apak manaku mani ipak mape um, apak makripep um eshudok arpesan douk shakri uwok um shunek mour iri. Apak makri ipak mare pukesh anagun worigun shugnoh, uwok.

<sup>11</sup> Aria apak douk memnek um orokohun um ipak, enesh arpesan shape meyoh madae shunek mour uwe. Aria eshesh shape shanumogesh kupaishi eshesh atubur waburish. <sup>12</sup> Aria apak douk apakin Debeini Jisas Krais nakop big um munek ananin mour. Douk namudok aria apak makripep dodogowinya baraen eshudok arpesan um shugipeshen. Apak makri uwok um shurahaen aria shupe shiyagwreh enyudokmori baraan, uwok. Apak makri shupe wosik shunenek eshesin mour um shunou eshesigun worigun. <sup>13</sup> Aria ipak apakish arpesan mare arigeh hep um punek yopihi aih iri mour um, uwok.

<sup>14</sup> Aria eshudok arpesan douk shukri uwok um shugipesh enyudok apakin baraen nyetem apudok shup iri, eshudok ipak pudukemesh um nyeiguwhis um aria mare puni eshesh ponoprom, uwok. Ipak punekesh namudok aria eshesh ta abraen nyesh aria wata shumnek yopinyi baraen

shugipeshen. <sup>15</sup> Aria ipak mare pukri eshesh douk ipakish horik horin, uwok. Ipak ta urkwip pukri eshesh douk ipakish ashukenyish owashish aria pukripesh shokubur um shumnek yopinyi baraen shugipeshen.

*Nyagikuk Iri Baraen*

<sup>16</sup> Debeini anan douk baugos um apak aparuh hur wosik um. Aria apak makri anan kanak nunek ipakiruh aparuh hur wosik iih nyumneh. Aria punak meiguni um aria maren mugu nyutogrumep um, ipak ta mare punogugur, uwok. Aria shopunek makri Debeini nim ipak ihishmorim nupe.

<sup>17</sup> Aria eik Pol eik kanak yowem um enyudok baraen eikis wis. Eik yakri yopuhi nyumnah um ipak ihismorim. Eik kanak apa yowem um eikin nyeigur ihismorim eikis shus namudok um inek eikin kak um putrin pukri adur asas douk eikis shus.

<sup>18</sup> Aria eik yakri apakin Debeini Jisas Krais nutaurumep meyoh ipak ihishmorim.

# Parik Iri Shup Douk Pol Nenekap Panam

## Timoti Iri

### Banenyi Baraen Um Enyudok Baraen Pol

### Narik Neneken Nyanak Um Timoti Iri

1:1-2 Pol nakri Iruhin nini Jisas Krais hutaurum Timoti.

1:3-20 Pol nakrip Timoti um niyotu dodogowin aria mare numnek amam henek rohwumesh iri. Amam douk dodogowim atum hakripesh um shugipesh seiwokih aih.

2:1-15 Yopihi aih eshes Kristen ta shunekah um agundok shunek lotu um

3:16 Debeimi um Iruhin ananish arpesh iri hani amudok hataurumam iri hunekeh iri aih

4:1-6:21 Pol nakrip Timoti um sabaihi yopihi aih anan nenekeh um nutaurum eshes ihishmorim Kristen um

**1-2** O Timoti, eik Pol yenek apudok shup panakumagu nyak. Nyak douk nyatogur kabi eikin nuganin um. Nyak douk nyasuhw enyudok eik yenek skulumen-umen iri Iruhin ananin baraen nyagipeshen aria yohwaren nuganin. Eik douk anudok Iruhin douk narap matanamori mape wosik abom iri nani Krais Jisas hagraehe. Amam hagraehe aria hakripe dodogowinyi baraen um itogur Krais Jisas ananin aposel aria yakripesh ananin yopinhyi baraen. Aria anan douk baugos abom um apak madukemesh um anan ta wata nunaki nurap iri. Eik yakri apakin Yain Iruhin nini apakin Debeini aria Krais Jisas hunek gilhaumen aria hutaurumen meyoh. Aria shopunek, yakri amam hunek nyakihw apahw hwur wosik.

#### *Timoti Ta Nubo Madae Adurinyi Uwe Baraen Nyubuhuk*

**3** Nubokuhi eik yakri ikutinyukuk inak agudok shokugi nahobig Masedonia um, eik yakripeny-umaguk um nyupe Efesus. Aria douk yakri ikripen shopunek um nyupe abom Efesus aria nyukrip amudok armam dodogowinyi baraen um amam mare wata hunek skulumesh um enen rohwinyi baraen shopunek, uwok. Amam ta hukripesh Iruhin ananin baraen atin. **4** Nyak nyukripam dodogowinyi baraaen nyukri, "Ipak mare pukripesh enyudok rohwin sakihasin baraen, uwok. Aria mare pukripesh enyudok seiwokin baraen um seiwokish nyeiguhw douk arpesh shanahwar um. Ipak piyawreh enyudokmori baraen um, ipak ta pupe um punitok atin aria ta mare pugipesi Iruhin ananim urkum, uwok. Enyen douk um apakin bilip atin, Iruhin neyabigap ananim urkum." **5** Aria baugennum baraen um nyukripesh enyudok Iruhin ananin baraaen um, nyak douk nyukripesh um nyishuhur shugipesh ehudok aih um urkwip punawasham Iruhin nini kupaishi arpesh um. Ehudok aih douk hakitaki yopuruhi aparuh hani yopipi urkwip pani adurinyi bilip um Jisas iri. **6** Aria anam amudok armam douk hakutukuk ehudok yopihi aih aria hape heyagwreh wehinyi baraen kabi douk shagugak iri sheyagwrehen iri. **7** Amam hakri hutogur tisa omi um hunek skulumesh um Iruhin ananin lo. Aria hakri, "Apak madukemesh aria douk munek skulumep." Amam douk hakri namudok aria amam madae hudukemesh um Iruhin ananin lo uwe. Aria shopunek amam madae hudukemesh um baugennum um amamin baraen shopunek uwe, uwok.

<sup>8</sup> Apak madukemesh um ta apak mukwu lo nyunek enyudok mour douk Iruhin nakri um enyen nyuneken iri um, lo enyen douk yopinyi. <sup>9-10</sup> Aria apak madukemesh um enyudok lo Iruhin douk madae nuneken nukriyen um yopishi arpesh uwe, uwok. Anan neneken um eshudok douk shenek yoweishi inahos iri um shukutishukuk aria shupe wosik. Iruhin nenek enyudok lo um eshudok douk shakri uwok um ananin lo shakenyuk agabus iri, shani eshudok douk madae shumnek baraen iri uwe, shani eshudok douk shakri uwok um ananin baraen aria shenek ihishumori yoweishi inahos iri. Eshesh shani eshudok douk shakri uwok um shunek lotu um Iruhin aria shenek yoweishi inahos iri, shani eshudok douk shabo esheshish amakenyish shagok iri. Eshesh shani eshudok douk shabo kupaishi arpesh shagok iri, shani eshudok douk shenek wehrur iri, shani amudok douk henek wehrur hani kupaimi armam iri. Anan neneken um eshudok douk shakwumesh aruh kupaishi arpesh sharaesh shanak um kupaishi shutorish iri, shani eshudok douk shenek rohwumesh iri. Eshesh shani eshudok douk shenek kwot obi nyutob eshesh shenek rohwumesh um baraen um kwot. Aria anan neneken um ihishmorim arpesh shopunek douk shakri uwok um Iruhin ananin adurin atinyi baraen shakenyuk agabus aria shenek eneshenesh yoweishi inahos iri. <sup>11</sup> Enyudok baraen douk nyagipesh ananin yopinyi baraen douk anan nagraehe um inak ikripeshen. Enyen douk nyeyabigap um Iruhin douk yopuyopuni dodogowini abom nyeigur nyato iruh-uman iri.

*Pol Nenek Tenkyu Um Jisas Um Iruhin Nenek Gihauan Natauruman Meyoh Um*

<sup>12</sup> Eik yenek tenkyu um apakin Debeini Krais Jisas. Seiwok anan nataurume aria neneke dodogoive um yenek ananin mour. Anan douk nakri eik wosik apa yenek ananin mour wosik abom aria anan douk nakripe yeneken. <sup>13</sup> Aria seiwok sagomatin eik wata imnek Jisas ananin baraen um uwe, eik yabubunim ananin nyeigur aria yakri uwok um anan. Aria yakri uwok um ananish arpesh douk shasuhw ananin baraen iri aria yasuwesh yoweshikesh yenekesh shemnek debeiri eriger. Aria abudok nyutob eik yenekesh namudok um, eik madae idukemesh ikri eik yenek yoweishi inahos uwe, uwok. Eik madae isuhw ananin baraen igipeshen uwe. Namudok aria Iruhin nakri gihauum eik aria madae nuwaname yoweishi inahos eik yape yenekesh iri uwe, uwok. <sup>14</sup> Aria apakin Debeini Krais Jisas nataurume meyoh abom nogabeye yatukur anan aria yape wosik. Namudok aria eik yasuuhw ananin baraen dodog yagipeshen. Aria shopunek, eik urkum manawasham kupaishi arpesh aria yataurumesh.

<sup>15</sup> Enyudok baraen douk adurin atin abom. Douk namudok aria apak ihishmorim ta musuwen dodog mugipeshen. Baraen enyudok. Seiwok Krais Jisas nanaki agundok atap um nutaurum apak menek yoweishi inahos iri um nurap mutanamori mupe wosik abom. Aria kupaishi arpesh shenek yoweishi inahos aria eik Pol douk yoweive iri abom yeshagrakuk eshesh um yenek yoweishi inahos um. <sup>16</sup> Douk namudok aria Krais Jisas nakri gihauum abom aria anan madae juwehosin um eik uwe. Anan nakri gihauum kweipon ihishmorim shusuhw Iruhin ananin baraen shugipeshen iri shudukemesh shukri eik yoweive iri abom. Aria Krais Jisas narae aria nagabeye um eikish yoweishi inahos aria ta shunek urkum shukri, "Krais Jisas nakri gihauan anudok yoweini arman abom aria naran nagabeyan um yoweishi inahos anan nenekesh iri. Douk namudok aria adur atin anan ta nunarao apak shopunek mupe wosik abom ihih nyumneh." <sup>17</sup> Anan atun abom douk Iruhin. Apak madae mutrun apakis nabes uwe, aria anan ta mare nugok atin. Anan nape king ihih nyumneh.

Aria eik yakri apak ihishmorim ta mukri anan douk Debeini aria munek lotuman mutuk ananin nyeigur nyuto iruhw ihih nyumneh. Enyudok bareaen douk adurin atin.

### *Pol Nakrip Timoti Um Nupe Dodogowin Nunek Iruhin Ananin Mour*

<sup>18</sup> Timoti, nyak douk nyenek Iruhin ananin mour aria eik douk yahwaren nugarin. Riguk wata weroroinyi um, amam profet hakripesh um nyak ta nyunek Iruhin ananin mour wosik abom um. Aria eik yakri ikripen enyudok atin kabi seiwok amam hakri um. Aria nyak nyumneken aria nyusuwen nyugipeshen um nyupe dodogowin atin nyunek Iruhin ananin mour. Aria nyubo yoweishi inahos shubuhuk kabi anan soldia nenek mour ami iri neneken aria dodogowin atun um. <sup>19</sup> Nyak nyunek urkum um Iruhin ananin bareaen douk nyasulen aria gamo nyusuwen dodog nyugipeshen. Nyak ta urkum mur wosik aria mare mur um nyukri nyak nyenek yoweishi inahos, uwok. Enesh arpesh douk shakri uwok um esheship urkwip pur wosik um. Eshesh urkwip porum yoweishi inahos aria shenekek abom. Aria eshesh shakutukuk Iruhin ananin bareaen aria shape kabi shagrulkuk shabuh ogumigum young um. <sup>20</sup> Anam um eshudok douk shagrulkuk shabuh ogumigum young iri douk amudok biom Himeneus iri Aleksander. Amam habubunim um Iruhin aria eik Pol yenekumamuk enyudok um yoweini Satan ananis wis. Eik yenekumam enyudok um hunak hur Satan ananis wis um nom aria neneksam hudukemesh um amam mare wata hububunim Iruhin atin um.

## 2

### *Apak Munek Beten Um*

<sup>1</sup> Harik iri aih apak ta munekeh iri douk ehudok. Eik yakri, "Ipak punek beten um Iruhin um. Aria ipak porigan um eshudok ipak eneshenesh wokepumesh iri, aria punek tenkyuman aria shopunek, porigan um nutaurum ihishmorim arpesh. <sup>2</sup> Aria porigan um nutaurum king-omi huni ihishmorim shape debeishi um gavman iri. Ipak punek beten um gavman namudok um apak mupe wosik, apakiruh aparuh hur wosik aria munek yopihai atih aih um munek enenyenen yopinyi Iruhin nakriyenyi. <sup>3-4</sup> Aria ipak punek beten namudok um, ipak ta punek Iruhin douk narap matanamori mape wosik atin aria anan nunadudareh. Aria anan shopunek douk nakri nurao ihishmorim arpesh shatanam shupe wosik aria shudukemesh um adurin atinya bareaen aria shusuhwen shugipeshen iri. <sup>5</sup> Aria apak madukemesh um douk atun abom meyoh Iruhin nape. Aria apak ihishmorim arpesh mape wobur aria anan nape wobur. Aria atun meyoh arman abom nape orokohun um apak aria nonukop manak hurukatin um Iruhin. Anan douk Krais Jisas. <sup>6</sup> Krais Jisas douk nakri wosik aria nagok um nator apak ihishmorim arpesh apakish yoweishi inahos. Aria nakweshihap um apakish yoweishi inahos douk showeshikap iri. Aria ahudok nyumnah Iruhin nakri ahi, Jisas nagok um nukweshihap. Aria Iruhin neyabigap um mudukemesh mukri anan douk nakri nurao apak ihishmorim mutanamori mupe wosik. <sup>7</sup> Douk namudok aria Krais Jisas nagraehe um irao ananin yopinyi bareaen inak ikrip arpesh. Aria shopunek, nagraehe yatogur aposel um inak inek skulum kupaishi arpesh douk madae shudukemesh um Iruhin iri uwe. Eik inek skulumesh um enyudok adurin bareaen um Krais um shudukemesh aria shusuhwen dodog shugipeshen. Aria eik douk madae inek rohwumep uwe, uwok. Eik yakriep adurin atin."

<sup>8</sup> Eik yakri armam hape ihirubmorim warub iri ta hunek beten. Amam mare juwehosim aria hunitok, uwok. Amam ta hunagabe um hupe atugun hunek yopihi atih aih aria hunek beten.

*Armago Ta Umnek Enyudok Baraen Ugipeshen Abudok Nyutob Shunak  
Shupe Shunek Lotu Obi Nyutob*

<sup>9</sup> Aria eik yakri armago shopunek ta upe wosik unawashok yopihi rupeh douk wosik um owo iri aria bane banehi mare wosik um owo ta uhunug iri uwe, uwok. Aria shopunek, mare unaginohw baragos suni yegeshiweru um eshudok yopishi atish eneshenesh douk shatorish debeibori utabor iri, uwok. <sup>10</sup> Aria ipak armago apa pakri ipak pasuhw Iruhin ananin baraen penek lotuman iri ta punek ihinyumori yopinyi mour douk armago apa weneh lotu um Iruhin iri weneken iri. <sup>11</sup> Aria punak pupe punek lotu obi nyutob, armago mare ukripesch Iruhin ananin baraen, uwok. Owo upe mokureg umnek Iruhin ananin baraen aria upe uneck urukwipumen. <sup>12</sup> Eik Pol yakri uwok um ono armago upe debeiwori um armam aria uneck skulumam um Iruhin ananin baraen, uwok. Owo ta upe mokureg. <sup>13</sup> Seiwoh sagomatin Iruhin neneh arpesh um, anan narik neneh arman Adam iyoh aria nagiguk neneh armatok Iv. <sup>14</sup> Aria yoweini Satan douk madae neneh rohw um Adam uwe, uwok. Anan neneh rohw um Iv aria kwakutukuk Iruhin ananin baraen kwenek yoweishi inahos. <sup>15</sup> Aria ta armago umnek Iruhin ananin baraen usuwen dodog ugipeshen aria owo urkwip punawasham kupaishi arpesh utaurumesh, aria upe wosik uneck yopihaih aria mare uni kupaimi shiyagwreh\* um, owo douk wosik weneh yopinyi. Aria ta uneck yopinyi upe wosik namudok aria ubuki batowish um, Iruhin ta nurao utanamori upe wosik ihih nyumneh.

### 3

*Amam Hape Debeimori Um Iruhin Ananish Arpesh Iri*

<sup>1</sup> Enyudok baraen douk adurin. Aria anan nukri nupe debeini um Iruhin ananish arpesh nutaurumesh um, anan douk nakri nurao yopinyi abom sagomatinyin mour. <sup>2-3</sup> Aria nunek enyudok mour iri, anan ta neneh yopihaih aih iri. Anan ta nunek yopinyi atin aria mare enesh arpesh shukri anan yoweini. Anan ta nurao atuk armatok. Aria anan ta nubo yoweipi urkwip pubuhuk aria anan mare urkum mur um nunek yoweishi inahos, uwok. Anan mare nuwok abar nugugak atin. Anan ta nutaurumesh nukesh eshudok eneshenesh um kupaishi arpesh. Anan ta nunek skulumesh nukripesch baraen wosik um shumneken aria shudukemesh. Anan mare juwehosin arigas atin um nini kupaishi shunitok, uwok. Anan nini eshesh shupe atugun. Anan mare nuhesh nukripesch debeg atin, uwok. Aria anan mare nunek urkum um nurao sabaibori utabor buni eneshenesh eshudok, uwok. Aria anan nunek yopinyi namudok um, anan wosik ta nunek enyudok mour. <sup>4</sup> Anan ta nutaurumok wosik ananik armatok kwuni ananish batowish aria nuneksh shumnekk ananin baraen. Aria batowish ta shumnekk ananin baraen aria mare shagogonigan atin, uwok.

<sup>5</sup> Aria ta anan mare nutaurum um ananik armatok kwuni batowish wosik um, anan ta mare wosik um nunek mour um nutaurum Iruhin ananish arpesh. <sup>6</sup> Aria ta anan seiwoh natogur Kristen aria nasuhw Iruhin ananin baraen dodog nagipeshen arigaha douk um, anan wosik ta nupe debeini um Iruhin ananish arpesh. Aria nubokuhi atin natogur Kristen um, anan

\* <sup>2:15:</sup> Enyudok baraen um uni kupaimi shiyagwreh um douk nyakrium mare uni kupaimi shenek wehrur um, uwok.

mare nupe debeini um Iruhin ananish arpesan, uwok. Um mares? Ta anan nunek urkum nukri anan debeini nyeigur nyato iruh-uman nadukemesh um eneshenesh iri aria ta nukutukuk yopinyi baraen. Aria Iruhin ta nunek skeliman aria nukri anan douk yoweini nenek yoweishi inahos kabi douk seiwok anan nenek skelimum Satan um. Aria Iruhin ta nukri uwok abom um anudok arman kabi douk seiwok nakri uwok um yoweini Satan um. <sup>7</sup> Anudok douk nupe debeini um Iruhin ananish arpesan iri ta nunek yopinyi um eshudok douk madae shusuhw Iruhin ananin baraen iri uwe shopunek. Anan nunekesh namudok aria arpesan ta shutrun shukri anan yopuni madae nunek enesh yoweishi inahos iri uwe. Um mares, ta eshesh shukri anan yoweini aria anan nugipes Satan ananin baraen aria Satan nusuwan nuweshikan dodog.

### *Mamudok Douk Hataurum Debeimi um Iruhin Ananish Arpesan Iri*

<sup>8</sup> Mamudok douk hataurum debeimi um Iruhin ananish arpesan iri shopunek ta hunek yopihi aih um ihishmorim arpesan shutrum aria shukri amam yopumi. Amam ta hunek ehudokmori yopihi aih. Amam ta hukripes atin baraen ihishmorim arpesan. Mare hukripaguk enesh enen baraen aria enesh hukripeshuk kupaipyi, uwok. Aria amam mare huwok abar hugugak atin. Aria mare hunek nyigya um kupaishi esheshish eshudok eneshenesh shuni utabor, uwok. <sup>9</sup> Baugenylum um Iruhin ananin baraen seiwok nyanabeshuk, aria douk Iruhin nakrip apak ananip madukemen. Aria amam ta hunek urkum um enyudok atin baraen husuwen dodog hugipeschen. Aria amam ta urkwip pur wosik aria mare purum hunek yoweishi inahos, uwok. <sup>10</sup> Sagomatín ipak Iruhin ananish arpesan ta putik mamudok douk hakri hataurum amam douk hape debeimi um Iruhin ananish arpesan iri. Putrum um hugipesheh wosik ihihmorim aih iganigade yakripepumeh iri um, ipak wosik pukripam um hunek abom. Aria uwok um, ta uwok.

<sup>11</sup> Aria amamiyu armago\* owowin baraen enyudok. Owo ta unek yopihi aih um ihishmorim arpesan um shutru aria shukri owo yopuwori armago. Aria owo mare ukripesh enen rohwinyi baraen kupaishi um kupaishi arpesan shenekesh iri yoweishi inahos, uwok. Owo ta unodukem usu merik um owo kanak aria unek owowin mour wosik abom.

<sup>12</sup> Mamudok douk hataurum amudok hape debeimi um Iruhin ananish arpesan iri ta hurao atuk atuk armago. Aria amam ta husuhw merik um amamiyu armago uni batowish hataurumesh wosik. <sup>13</sup> Amam hataurum wosik amam hape debeimi um Iruhin ananish arpesan iri um, kupaishi arpesan ta shutrum shukri amam yopumi armam. Aria amam ta hukripemesh abom um amam douk hasuwen dodog abom Krais ananin baraen hagipeschen. Aria amam ta mare hunogugur um hukripesh enyudok baraen kupaishi arpesan um.

### *Baugenylum Baraen Um Iruhin Ananin Baraen*

<sup>14</sup> Eik yape yenyem apudok shup um, eik urkum mor yakri eik hurukatin um inaku itrin. <sup>15</sup> Aria ta mare dodogoiwe um inaku arigas um, nyak ta nyutik apudok shup aria putaurumen um nyudukemesh um ehudok yopihi aih douk ipak Iruhin ananish arpesan ta puneket iri. Aria Iruhin douk nape ihih nyumneh iri douk nape numun ipakiruh aparuh. Ipak douk ananip um, atup awiropip douk patogur kabi ananit urupat iri um. Aria ipak douk pasuhw Iruhin ananin baraen dodog pagipeschen aria dodogowip atip

\* <sup>3:11:</sup> baugenylum baraen um oudok armago douk biyen. Enen nyakri hagok um debeimi iri amamiyu armago. Aria enen nyakri wataurum debeimi um Iruhin ananish arpesan iri.

pakripesh enyudok atin adurin baraen kupaishi um enyen mare nyubuhuk abom, uwok. Douk namudok aria ipak patogur kabi uroruh douk hosah urupat tatao dogod iri um. <sup>16</sup> Seiwok baugennum Iruhin ananin baraen um agundok apak munek lotuman um douk nyanaabeshuk abom. Aria ahudok nyumnah douk nyatogur yopugunum. Baraen douk enyudok. Seiwok anan naraao arpeshihw yegenyihw natogur adurin arman kabi apak um.

Aria Iruhin ananin Mishin nyawishan aria Iruhin neyabig sabaishi arpesh shadukemesh shakri anan douk Iruhin ananin nugarin. Aria sabaishi Iruhin ananish enselahos shopunek shatrun. Aria ananish arpesh shanak sabaigosi nahobigos shakripesh ananin baraen ihishmorim arpesh.

Aria enesh shasuhwen dogod shagipeshen.

Aria Iruhin wata naran natoum iruhw heven aria ananin nyeigur nyato iruhw.

## 4

### *Enesh Arpesh Sheneke Skulumesh Aria Sheneke Rohwumesh*

<sup>1</sup> Iruhin ananin Mishin enyenyin baraen nyatogur aria gamo nyakri kweipon eneshenesh yoweishi sagabehos shani warehos ta shuhur arpesh aria shunek rohwumesh. Aria enesh arpesh ta shumnek esheshein baraen shugipeshen. Aria esheshein ta shukri uwok um shusuhw Iruhin ananin baraen shugipeshen um aria shukutinyukuk. <sup>2</sup> Eshudok douk shenek rohwumesh abom iri ta shukripesh shukri esheshein baraen douk adurin abom. Eshesh shenek yoweishi inahos aria esheshein madae shudukemesh shukri esheshein shenek yoweishi inahos uwe, uwok. Um mares, esheship urkwip douk pogugak abom aria madae shudukemesh um maren bareaen douk rohwinyi aria maren bareaen douk adurin uwe. <sup>3</sup> Eshesh ta shunek rohwumesh shukripesh um mare shurao armago, aria enesh mahish aria worigun esheshein shanowishesh. Aria apak masuhw Iruhin ananin baraen dogod magipeshen iri douk madukemesh um adurin baraen. Apak madukemesh um Iruhin neneke shudok worigun iri mahish douk esheshein shakri apak mare mishoh iri. Iruhin neneke shudok mahish iri worigun um apak munek beten munek tenkyuman aria mishoh. <sup>4</sup> Apak madukemesh, ihigunmorim worigun iri mahish Iruhin neneke shudok iri douk yopishi. Aria apak mare mukri wokumesh, uwok. Iruhin nakri apak mishoh. Apak ta munek urkum um ananinbaraen aria munek beten munek tenkyuman um shudok aria mishoh. <sup>5</sup> Um mares? Ananinbaraen nyani apakin beten douk shenekesh shatogur yopish.

<sup>6</sup> Aria ta nyukripesh enyudok bareaen yenyem apudok shup iri um Iruhin ananish arpesh um, nyak douk nyenek yopinyi mour. Nyak nyukripesh namudok um, nyak ta nyupe yopinyi um nyuneken wosik abom iri Krais Jisas ananin mour. Aria nyak nyunek urkum um enyudok adurin bareaen apak munek bilipumen iri nyuni enyudok yopinyi bareaen nyak nyarik nyasuwuen nyagipeshen iri um, enyen ta nyuneken nyutogur dogogowin.

<sup>7</sup> Aria nyak mare nyunek urkum um enyudok seiwokin rohwin bareaen ipakish popehesh yamehesh sheyagwrehenyi, uwok. Enyudok bareaen douk madae nyukripes um Iruhin uwe. Aria ihih nyumneh nyak ta nyupe um nyudukemesh um nyak kanak um nyunek yopihi atih aih Iruhin nakriyeh iri. <sup>8</sup> Nyak nyadukemesh, ta apak mukri munek baunag um munek apakiruh yegeshiweruh hutogur dogogowiruh um, enyudok apa nyataurumap. Aria ta mudukemesh um mutogur dogogowip um munek yopihi atih aih Iruhin nakriyeh iri um, enyen ta nyutaurumap wosik abom.

Enyen ta nyutaurumap douk apak mape agundok atap um aria kweipon iruhw heven shopunek.

<sup>9</sup> Enyudok bараen douk adurin atin abom. Douk namudok aria apak ihishmorim ta musuwen dodog abom mugipeshen. Bараen enyudok. <sup>10</sup> Apak madukemesh abom um kweipon Iruhin douk nape ihih nyumneh iri ta wata nurap um. Douk namudok aria apak munek ananin mour dodogowip atup. Aria memnek debeiri eriger um, apak apa meyotu dodog. Um maresh? Apak madukemesh abom um kweipon anan ta nurap. Adur anan ta nutaurum apak ihishmorim mape agundok atap iri. Aria adur atin anan ta nurao apak douk masuhw ananin bараen dodog magipeshen iri mutanamori mupe wosik.

<sup>11</sup> Enyudok dodogowinyi bараen eik yakripenyen iri nyak ta nyukrip kupaishi arpesh nyunek skulumesh um shudukemen aria ta shugipeshen. <sup>12</sup> Eik yakri mare enesh arpesh shukri nyak weroroinyi aria shukri uwok um shumnek nyakin bараen um, uwok. Nyak ta nyunek ehudokmori yopihi aih. Nyak nyiyagwreh yopinyi atin bараen aria nyupe wosik nyunek yopinyi. Aria nyak ta urkum munawasham kupaishi arpesh aria nyutaurumesh. Aria nyusuhw Iruhin ananin bараen dodog nyugipeshen aria nyunek eneheneh yopihi abom atih aih Iruhin nakriyeh iri. Mare nyunek urkum um nyunek yoweishi aih. Nyak ta nyunek yopihi aih namudok um eshesh Kristen shutrin aria shugipesh hato iruhw iri aih. <sup>13</sup> Aria nyak ta nyunek Iruhin ananin mour dodogowin atin arigaha eik inaku. Aria mour nyak nyunek iri douk enyudok. Nyak nyutarah Iruhin ananin yopinyi bараen yopugunum um sabaishi shumneken. Aria nyukripeshen aria nyunek skulumesh um shudukemen wosik aria nyukripesher um shuktuk yoweishi inahos. <sup>14</sup> Riguk anah nyumnah, amam hakripesher Iruhin ananin bараen iri hakri um agundok ta nyak nyunek Iruhin ananin mour um. Aria hahudok nyumnah, amam hataurum Iruhin ananish arpesh aria howem wis nyakig barag um nyurao enen Iruhin ananin Mishin enyenyin presen um nyutaurum nyukripesher Iruhin ananin bараen um. Aria nyak mare urkum mukenyaguk um enyudok presen, uwok. Nyak ta nyukwu enyudok presen aria nyunek mour wosik kabi douk riguk amam hakri um. <sup>15</sup> Aria nyak ta nyunek urkum um ihinyumorim bараen eik yakripenyen iri aria nyugipeshen dodogowin atin. Aria nyukripesher um abom nyak kanak Iruhin um nyugipesher enyudok atin bараen. Nyak ta nyuneksh namudok um sabaishi arpesh shutrin aria shukri nyak nyenek Iruhin ananin mour dodogowin atin nyeshagrakuk riguk nyarik nyape nyeneken um. <sup>16</sup> Aria nyak ta nyutaurum nyak nyunek iri aih. Aria nyunek skulumesh um, nyak ta nyukripesher adurin atinyi bараen atin um shumneken aria shugipeshen. Aria nyak ta nyupe um nyunek enyudok atin mour. Aria nyuneksh namudok um, Iruhin ta nutaurum nyak nyuni eshudok douk shemnek nyakin bараen iri shopunek nuraep putanamori pupe wosik.

## 5

### *Ehudok Aih Nyak Nyugipesheh Um Nyutaurum Iruhin Ananish Arpesh Um*

<sup>1</sup> Eshudok arpesh douk shenek yoweishi inahos iri nyak nyukripesher um shuktishukuk aria shunek yopihi aih. Aria nyukripesher um, nyak ta nyugipesher ehudok aih namudok. Rowehimi mare nyuhom nyukripam debeg, uwok. Nyukripam shokubur um hukutukuk yoweishi inahos kabi douk nyakripan shokubur nyakin yaken um. Aria weroroimi nyukripam shokubur kabi nyakrip nyakim owarhim um. <sup>2</sup> Aria ruwehew iri nyukripo shokubur um ukutukuk yoweishi inahos. Aria owo shopunek, nyak ta

nyukripo shokubur kabi nyakripo shokubur nyakiyu amakenyiyyu um. Aria weroroiwori nyukripo shokubur um ukutukuk yoweishi inahos kabi nyakrip nyakiyu mohwiyariyu um. Aria nyak ta nyunek urkum um nyunek yopihai atih aih aria nyukripo.

### *Armam Hagok Hawosopuk Iri Armago Owowin Baraen*

<sup>3</sup> Armam hagok hawosopuk iri armago owowin baraen enyudok. Aria ono armago owowim rahaem hagokuk aria owo arpesh uwok um shutaurumo iri um, nyak ta nyutuk shuwish nyeiguhw shuto iruhw aria nyukrip Iruhin ananish arpesh um shutaurumo shuko worigun. <sup>4</sup> Aria ta onok okwokwin raminen nugokuk aria okwokwishes batowish o barheshish shupe um, eshesh ta shutaurumok. Eshesh ta shugipes Iruhin ananin baraen aria shutaurumok um shuwanamok enyudok seiwok okwok kweneken um eshesh iri. Aria shunekes namudok um, eshesh ta shunek Iruhin nunadudareh. <sup>5</sup> Aria wawudok arpesh wokowori douk wasuhw Iruhin ananin baraen dodog wagipeshen wakri Iruhin atun ta nutaurumo, aria wape weneke beten nyumneh weibus. <sup>6</sup> Aria oudok douk weneke yoweishi inahos douk owo kanak urkwip porumen iri, owo douk wawok sabaiguni yopuguni worigun aria wanadudareh wape wosik. Aria owo douk madae ugipesh Iruhin ananish aih uwe. Douk namudok aria owo wape kabi douk owo wagok iri um. <sup>7</sup> Eik yakripen enyudok baraen um nyukrip ihiyumorim armago douk owowim rahaem hagokuk iri. Um maresh, ta kupaishi shutru aria shukri owo yoweiwori armago. <sup>8</sup> Ipak ihishmorim ta putaurum eshudok ipak atup awirop um pukesh eshudok eneshenesh. Aria enesh arpesh mare shutaurum eshesh atup awirop um, eshesh douk shakutukuk Iruhin ananin yopinyi baraen douk shasuhwen shagipeshen iri. Aria eshesh douk shatogur yoweishi arpesh abom sheshagrakuk eshudok douk madae shusuhw Iruhin ananin baraen iri uwe.

<sup>9</sup> Aria nyak nyuwem armam hagok hawosopukuk iri armago owowish nyeiguhw um, nyak ta nyuwem um oudokmori atuw owowish nyeiguhw. Oudok douk owowish kwarahos shenek uhwinyumaguk 59-poreish kwarahos, aria wani owowim atum armam shape aria madae unak uneke wehrur atin uwe uni kupaimi iri. <sup>10</sup> Aria kupaishi arpesh shatru shakri owo yopuwori apa weneke ehudokmori yopihi aih iri. Ehudok. Owo apa wataurumesh wosik owowish batowish aria apa wokesh eshudok eneshenesh kupaishi arpesh shanaki kupairubi warub iri. Aria shopunek, owo apa wakwrup Iruhin ananish arpesh douk shanak owowig urusag iri esheshiruh yeriweruh aria wataurum eshudok douk sharao amaen iri. Aria ihih nyumneh owo wape um weneke eneheneh yopihi aih atih. Nyak nyuwem um oudokmori atuw owowish nyeiguhw. <sup>11</sup> Aria weroroiwori douk owowim hagokuk iri, nyak mare nyuwem um owowish nyeiguhw, uwok. Ta kupaimi urkum mutogurumo um ukri urao kupaimi armam aria owo ukutukuk marik iri urkum wakri uneke Krais ananin atin mour um. <sup>12</sup> Namudok aria owo ta baraen nyupenyo um agundok owo madae ugipesh owowim marik iri urkum um wakri adur um ta uneke Krais ananin atin mour um. <sup>13</sup> Aria shopunek, owo apa arigeh hao wape meyoh aria wape um warahaen atin. Owo wape um weneke uwish togur wanak kupaigwi urusag. Aria watiguk kupaishi aria wata wanak wape wanumogesh eshesh. Ehudokmori aih Iruhin douk nakri uwok abom umeh. <sup>14</sup> Namudok aria eik yakri wosik um weroroiwori douk owowim hagokuk iri wata urao kupaimi armam. Aria owo ubuki batowish aria upe uneke mour um utaurumesh aria upe wosik. Um maresh, ta apakish horim douk shakri uwok um Iruhin ananin baraen iri shukri apak yoweipari. <sup>15</sup> Ono armago douk amam hagok hawosopukuk iri douk wakutukuk jurug yopinyi baraen aria wasuhw

Satan ananin baraen wagipeshen. <sup>16</sup> Aria ta eshesh shasuhw Iruhin ananin baraen iri eshesh atup awirop um ono armago douk amam hagok hawosopukuk iri uni eshesh upé um, eshesh ta shutaurumo shuko worigun nini eshudok douk owo wokumesh iri. Eshesh shunekesh namudok um ipak Iruhin ananip ta mare punek debeinyi mour um putaurum oudok armago um, uwok. Ipak ta putaurum oudok douk owowishi madae enesh shupeik abom um shutaurumo iri uwe atuw.

### *Amam Hape Debeimi um Iruhin Ananish Arpesh Iri Amamin Baraen*

<sup>17</sup> Mamudok douk hape debeimi um ipak Iruhin ananish arpesh aria hataurumep henek mour wosik abom iri, ipak ta putuk amamish nyeiguhw shuto iruhw aria pukomabor wosik utabor buni worigun. Eik yakri um mamudok douk henek mour dodogowim atum um henek skulumep hakriep Iruhin ananin baraen iri atum. Ipak ta putaurumam wosik abom. <sup>18</sup> Um maresh? Baraen nyetem Iruhin ananik Buk iri Iruhin nakri namudok. Nakri, "Shashudok bulmakauhos douk sheyotu shenek mour um sheshish wit um sharumohw urubit iri, ipak mare puweshik eshesig nokwatog, uwok. Eshesh ta shuwok anat ourehit wit." Aria nakri enyudok kupainyi baraen shopunek nakri, "Eshesh shunek mour iri mare shuneken meyoh, uwok. Eshesh ta shurao utabor."

<sup>19</sup> Aria ta enen arpen nyukripen enen baraen um anan nepe debeini um ipak Iruhin ananish arpesh iri neneke enesh yoweishi inahos um, nyak mare nyumneken, uwok. Aria biyesh o biyesh atin shukripen um, nyak wosik ta nyumnek eshesin baraen aria kadak nyukripan um mare wata nuneken atin. <sup>20</sup> Mamudok douk hape debeimi um ipak Iruhin ananish arpesh aria henek yoweishi inahos iri, nyak ta nyuhom um hukutukuk eshudok yoweishi inahos. Nyak nyuhom abudok nyutob sabaishi Iruhin ananish arpesh shunatorum shupe obi nyutob. Abudok nyutob, nyak ta nyikitak aria nyukripan dodogowinyi baraen um amam mare wata hunek yoweishi inahos. Nyak nyunekesh namudok um kupaishi shopunek shunogugur aria mare shunek yoweishi inahos.

<sup>21</sup> Iruhin nani Krais Jisas hani Iruhin ananish enselahos shatruhw esheshis nabes aria eik Pol yakripen dodogowinyi baraen um nyumneken aria nyugipeshen. Baraen enyudok. Nyak ta nyukripesh enyudok atin baraen eik yakripen-enyi. Nyukrip Iruhin ananish arpesh douk shenek yoweishi inahos iri um mare wata shunekesh shopunek. Aria nyukripesh um, nyak mare nyukripeshuk kupainyi nyeiguhw shatoumesh iri arpesh, aria mare nyukripeshuk kupainyi nyeiguhw wokeshi iri uwe, uwok. Nyak ta nyukripesh atin baraen ihishmorim arpesh. <sup>22</sup> Aria nyak mare arigas nyenekesh um nyugraeh anan arman um nunek Iruhin ananin mour, uwok. Ta enesh arpesh shutrin um nyutaurum anan neneke yoweishi inahos iri arman aria shukri nyak shopunek douk yowenyari kabi anan um. Aria sagomatin nyak ta gamo nyudukeman wosik ba iyoh aria nyuwem wis ananig barag aria kadak nyukripan um nunek Iruhin ananin mour. Aria nyak ta mare nyunek urkum um nyunek yoweishi aih aria nyunek eneheneh yopihi abom atih aih Iruhin nakriyehi.

<sup>23</sup> Aria eik yakri ikripen enen baraen shopunek um agundok arugeh atih hen um. Nyak mare nyuwok abar atubar, uwok. Nyak ta nyuwok anabar karoibar wainibar abar shopunek um apahw mare hwunatuken. Aria shopunek um kupaihi arugeh mare hen iih nyumneh.

<sup>24</sup> Anam armam douk henek yoweishi inahos yopugunum iri, apak douk madukemam um amam douk yoweimi. Aria Iruhin ta nunek skelumam nukri amam douk henek yoweishi inahos. Aria kweipon ta nuwanumam yoweishi inahos amam henekesh iri. Aria anam hanabeshuk

henek yoweishi inahos iri, apak madae mudukemam uwe. Aria kweipon amamish yoweishi inahos ta shutogur yopugunum aria Iruhin ta nuwanam yoweishi inahos amam henekesh iri. <sup>25</sup> Aria douk namudok atin. Anam armam henek yopih iah iri mour yopugunum aria sabaishi shatrum aria shadukemam. Aria anam henek yopih iah iri mour habeshukesh aria apak madae mudukemesh uwe. Aria kweipon amam ta hunowereh hutogur yopugunum aria sabaishi shutrum. Aria apak shopunek ta mudukemam.

## 6

### *Shape Shakamum Kupaishi Shenekumesh Mour Meyoh Iri Esheshin Baraen*

<sup>1</sup> Shenekumesh mour meyoh kupaishi iri esheshin baraen enyudok. Eshesh Iruhin ananish arpesh douk shape shakamum kupaishi shenekumesh mour meyoh iri ta shumnek esheshim debeimi amamin baraen shugipeshen. Eshesh ta shukri amam douk debeimi aria shumnekam. Eshesh shunekesh namudok um ta mare enesh arpesh shukri enen yoweiniy baraen um Iruhin nini enyudok baraen apak munek skulumesh-nyyi, uwok. <sup>2</sup> Aria ta enesh Kristen shunek mour meyoh iri esheshim debeimi douk henek bilip iri um, eshesh mare shunek urkum shukri amam hani eshesh douk Iruhin ananish atish aria eshesh mare shumnekam, uwok. Eshesh douk shenek mour um henek bilip iri douk eshesh urkwip panawashamesh iri. Douk namudok aria eshesh ta shunekumam yopinyi mour abom shishagrakuk enyudok douk sheneken um eshudok douk madae shusuhw Iruhin ananin baraen iri uwe. Aria iihih nyumneh nyak ta nyunek skulumesh um enyudok baraen aria nyukripesch dologowin atin um eshesh shugipeshen.

### *Shanagrem Sabaibori Utabor Bani Eneshenesh Eshudok Iri Esheshin Baraen*

<sup>3-4</sup> Apakin Debeini Jisas Krais ananin yopinyi baraen douk nyakripap um musuhw Iruhin ananin baraen dolog mugipeshen aria munek skulum kupaishi um shugipesh ananih aih. Aria eshudok arpesh douk shakutukuk enyudok yopinyi baraen aria shenek skulumesh um kupainyi rohwinyi baraen iri shakri eshesh kanak nyeiguuh shato-umesh aria shadukemesh abom iri. Aria uwok, eshesh douk shagagak abom. Eshesh madae shudukemesh um Iruhin ananin baraen uwe. Eshesh urkwip porum shakri shupe um shuni ipak punitok atin aria shape shanitok um ihinyumorim enyenenen baraen. Namudok aria shaho arpesh aria eshesiruh aparuh juwehosiruh um kupaishi shakri eshesh yoweishi. Aria eshesh urkwip porum kupaishi arpesh shakri eshesh shenek yoweishi inahos. Aria eshesh shenek rohw. Aria shenek nyigya um kupaishi esheshish eshudok enesh-enesh aria shape shani ipak panitok. <sup>5</sup> Eshesh madae shudukemesh abom, shagugak aria shapeum shakri shunitok atin. Eshesh shakutukuk adurin atinyi baraen aria shenek rohw shakri ta eshesh shugipesh Iruhin ananih aih um, eshesh ta shurao sabaibori utabor buni eneshenesh eshudok. Aria esheshin baraen douk madae adurin uwe, uwok. <sup>6</sup> Aria ta apak dologowip atup um mugipesh Iruhin ananih aih aria mukri eneshenesh apakish eshudok shani utabor douk jurugishumap um, apak ta munadudareh abom aria mupe wosik. <sup>7</sup> Seiwoh apakiyu amakeniyiu wopubuki-umori, apak madae musuhwi enesh eshudok eneshenesh uwe, uwok. Aria ta wata namudok atin. Kweipon apak mukutukuk agundok atap um shopunek, apak ta mare munasuhw enesh eshudok munak, uwok. <sup>8</sup> Namudok aria ta apak murao anagun worigun nini rupeh shukusumap um, apak ta mukri eshesh douk wosik-umap. <sup>9</sup> Aria eshudok arpesh douk shakri shunarao

sabaishi eneshenesh eshudok shuni utabor iri Satan ta nukwiraehesh um shunek yoweishi inahos. Aria eshesh ta shunek yoweishi inahos aria ta shupe yowesh abom kabi bur reir maduhw um. Aria eshesh ta mishish shikitak abom um shunek eneshenesh yoweishi inahos douk shagagak iri arpesh shakri shunekesh iri. Aria eshudok yoweishi inahos ta shunekesh shugugak abom aria eshesh ta douk shupe yowesh abom. <sup>10</sup> Aria enesh arpesh douk mishish shakitak abom um shakri shurao sabaibori utabor buni eneshenesh eshudok aria eshesh douk shakutukuk Iruhin ananin bareaen douk eshesh shasuhwen shagipeshen iri aria sharao dedeben atinyi amaeen. Um maresh? Baugos um arpesh shenek yoweishi aih um douk agundok um eshesh mishish shakitak abom um shakri shurao sabaibori utabor buni eneshenesh eshudok um.

### *Nyahur Debeg Um Nyurao Agundok Um Nyupe Wosik Ihih nyumneh Um*

<sup>11</sup> Aria nyak Iruhin ananin nyenek ananin mour iri ta nyuruwokuk um ihishmorim eshudokmori yoweishi inahos. Aria nyak ta dodogowin um nyugipesh ehudok yopihi aih namudok. Numun nyakihw apahw, nyak ta nyupe wosik aria nyunek yopihi aih atih kabi Iruhin nakri um. Nyak nyusuhw ananin bareaen dodog nyugipeshen aria nyak ta urkum munawashan kupaishi arpesh aria nytaurumesh. Aria abudok nyutob nyak nyurao enen dodog um, nyak ta nyupe dodog. Nyak mare juwehosin nyukri nyuho enesh arpesh, uwok. Nyak ta nyukripesch shokubur. <sup>12</sup> Nyak ta nyusuhw Krais ananin bareaen dodog nyugipeshen kabi douk ananin nenen resis iri nahur debeg um. Aria nyak shopunek douk namudok atin. Nyak ta dodogowin abom um nyugipesh Krais ananin bareaen aria nyurao agundok abom um kweipon nyupe wosik abom ihih nyumneh um. Kabi douk seiwok Iruhin nahwaren aria abudok nyutob nyak nyani sabaishi arpesh pape penek lotu aria nyakitak nyakripesch enyudok yopinyi bareaen um. Nyak nyakri Krais Jisas anan douk dodogowini aria nyak nyasuhw ananin bareaen dodog nyagipeshen.

Aria douk abudok nyutob nyak nyakri namudok aria Iruhin naraen nakri nyak nyupe wosik abom ihih nyumneh. <sup>13-14</sup> Seiwoke baugos um, Iruhin nakwarum ihishmorim eneshenesh shape iruhw atap iri aria eshesh douk shape. Aria riguk Krais Jisas douk nakripesch yopinyi bareaen yopugunum aria anudok debeini um gavman iri Pontius Pilat nemneken aria nenen kwotuman. Aria douk anudok Iruhin nani Krais Jisas hatruhw amamis nabes aria eik yakri ikripen enyudok bareaen um nyumneken aria nyugipeshen abom. Nyak ta nyupe wosik um mare enesh arpesh shukri nyak yoweinya, uwok. Aria mare enen bareaen nyupenyen. Nyak nyusuhw dodog abom Iruhin ananin bareaen nyugipeshen aria nyunekesh namudok atin arigaha nyunak nyutogur um ahuddok nyumnah apakin Debeini Jisas Krais nutanamori ahi. <sup>15</sup> Ahudok nyumnah Iruhin nakri ahi, anan ta nishopoki Jisas Krais nunaki nutogur yopugunum. Anudok Iruhin anan douk baugos abom um apak munadudareh um. Anan douk yopuni abom.

Anan douk Debeini abom um apak ihipmorim mape agundok atap iri. Anan nasuhw iruhw atap aria nape Debeini um ihm-morim debeimi hani ihm-morim king douk hape agundok atap iri. <sup>16</sup> Iruhin anan atun ta mare nugok atin, uwok. Anan douk nape ihm nyumneh aria agundok anan napeum douk bogaragun abom aria natrugin abom. Aria apak arpesh douk madae mutrun apakis nabes uwe, uwok. Seiwoke arigaha douk shopunek ta mare enesh arpesh shutrun esheshis nabes. Kweipon shopunek, ta mare enesh arpesh shutrun, uwok. Aria eik yakri apak ihipmorim mutuk ananin nyeigur nyuto iruhw aria mukri anan nupe Debeini ihih nyumneh. Adur atin.

*Shanagrem Sabaibori Utabor Bani Eneshenesh Eshudok Iri Esheshin Baraen*

<sup>17</sup> Nyak ta nyukripesh enyudok dodogowinyi baraen eshudok arpesh douk shanagrem sabaishi eshudok eneshenesh shani utabor iri um shumneken aria shugipeshen. Nyak nyukripesh um eshesh mare shunagunukuk shukri eshesh debeishi shanagrem sabaishi eshudok shani utabor iri, uwok. Aria nyukripesh um eshesh ta mare shukri wosik um eshudokmori douk kweipon ta burukworesh shunak shuwishuk iri. Apak muni ipak ta mukri wosik um Iruhin douk apa nakop abom ihishmorim yopishi eshudok eneshenesh aria nenekap manadudareh iri. <sup>18</sup> Aria nyak ta nyukripesh enyudok dodogowinyi baraen shopunek um shumneken aria shugipeshen. Aria nyukripesh um shunek eneheneh sabaihi yopihai aih. Aria eshesh ta shutaurum kupaishi shukesh eshudok eneshenesh um yaruhih iri. Aria shutaurum kupaishi arpesh shopunek. <sup>19</sup> Aria shunek yopihai aih namudok um, adur atin eshesh ta shunabuk esheshish yopishi eshudok eneshenesh shukus-umesh iruhw heven. Eshesh ta shukus iruhw arigaha ahudok nyumnah hunaki aria Iruhin ta wata nashanam-umesh aria shupe wosik abom iih nyumneh.

*Nyak Ta Gamo Nyurukorubesh Nyakin Mour Wosik Abom*

<sup>20</sup> Timoti, nyak ta gamo nyurukorubesh um enyudok ihinyumorim Iruhin ananin baraen eik yakripen-enyi. Aria nyukutukuk ihinyumorim rohwin baraen enesh arpesh shape sheyagwrehenyi. Enyudok baraen madae nyugipesh Iruhin ananin baraen uwe. Eshesh shenek rohw shakri esheshin saki douk adurin aria yopinyi, aria uwok. Esheshin saki douk nyakri nyubo Iruhin ananiih aih hubuhuk. <sup>21</sup> Aria enesh arpesh shakri eshesh douk sharaao enyudokmori saki aria eshesh shakutukuk jurug Iruhin ananin yopinyi baraen douk eshesh riguk shasuhwen shagipeshen iri.

Aria eik yakri Iruhin nutaurumep meyoh ipak ihipmorim.

## Pagiguk Iri Shup Douk Pol Nenekap Panam

**Timoti Iri**

### Banenyi Baraen Um Enyudok Baraen Pol Nagiguk Neneken Nyanak Um Timoti Iri

1:1-2 Pol nenekuman baraen Timoti nakri Iruhin nini Krais Jisas hutauruman

1:3-2:26 Pol nakrip Timoti um nunek Iruhin ananin mour wosik abom

3:1-17 Eshesh Kristen ta shiyotu dodog shusah amaan abudok nyutob hugiguk iri nyumnah hukri hutogur obi nyutob arpesh ta shukri uwok um Iruhin ananin baraen

4:1-8 Pol dodogowin atun nakrip Timoti um nukripesh Iruhin ananin baraen wosik aria nishuhur um shunek yopihi aih

4:9-22 Enen baraen um Pol nenek kwot um nyani nyatuh iri baraen

**1-2** O Timoti, eik kanak Pol yenek-umenyugu apudok shup um nyak. Eik douk urkum manawashamen abom. Aria nyak nyasuhw Iruhin ananin baraen nyagipeshen aria eik douk yahwaren naganin. Eik douk Iruhin nagipesh ananim atum urkum aria Krais Jisas nagraehe um ipe ananin aposel aria inak ikripesh Iruhin ananin adurin baraen. Enyudok baraen um apak matukur Jisas aria morao agundok um mupe wosik abom iih nyumneh um.

Aria eik yakri Yain Iruhin nini apakin Debeini Krais Jisas hutaurumen meyoh aria nyakihw apahw hwur wosik.

### *Apak Mare Munenek Abraen Um Mukripesh Iruhin Ananin Baraen Kupaishi Arpesh Um*

**3** Eik yenek tenkyu um Iruhin. Anan douk eik yenek ananin mour wosik iri. Eik yenek ananin mour um, eik urkum mor wosik aria madae urkum mur um ikri eik yenek enesh yoweishi inahos uwe, uwok. Eik yeneken wosik kabi seiwok eikim yakenyim babukenyim heneken um. Aria iih nyumneh eik yenek beten um Iruhin um, eik yenek urkum um nyak aria yarigan nyumnah wab um nutaurumen. **4** Riguk ohwak douk wape atugun. Aria douk eik yenek urkum um nahudok nyumnah eik yakutinyukuk ba yanaki ahi, ohwak wonakom roguhw aria nyak nyareh abih nyapeik aria eik yanaki. Douk namudok aria eik yakri abom um wata shopunek itrin aria wata inadudarehumen. **5** Aria shopunek, yenek urkum um agundok nyak nyasuhw Iruhin ananin baraen dodog nyagipeshen abom um. Seiwok nyakik babukek Lois kwarik kwasuwen dodog kwagipeshen. Aria nyakik amakek Yunis shopunek kwasuwen dodog kwagipeshen. Douk namudok aria eik yadukemesh abom um nyak shopunek douk nyasuwen nyagipeshen kabi owo um. **6** Namudok aria eik yakri ikripes enyudok baraen aria nyak mare urkum mukenyaguk. Baraen enyudok. Riguk eik yowem wis um nyakig barag aria Iruhin neken enyudok presen um nyuneken dodogowin atin abom um nyunek ananin mour um. Douk namudok aria nyak ta nyunek urkum um enyudok presen anan nekenyen iri aria nyupe dodogowin atin abom nyunek ananin mour. **7** Um maresh? Iruhin ananin Mishin douk nyape apak ananipari douk madae nyenekap munogugur uwe, uwok. Enyen douk nyenekap morao enyeyin dodog matogur dodogowip aria apak urkwip panawasham sabaishi arpesh

mataurumesh. Aria shopunek douk ananin Mishin atin nyenekap masuhw merik um apak kanak wosik.

<sup>8</sup> Douk namudok aria nyak mare nyunenek abraen um agundok eik yakripesch Iruhin ananin bareaen aria douk yonoweshik um, uwok. Aria shopunek, mare nyunenek abraen um nyukripesch apakin Debeini ananin bareaen um. Nyak ta nyuni eik wiyyotu atugun um ukripesch Iruhin ananin bareaen. Ohwak mare unogugur um agundok arpesh shukri uwok um ukripesch Iruhin ananin bareaen um aria shohw umnek eriger um, uwok. Anan ta nutaurumohw nunekohw wiyyotu dodog. <sup>9</sup> Iruhin douk narap matanamori mape wosik aria nahwarap um mupe ananip atup abom aria mupe yopupari. Anan douk madae nutik eneh yopihi aih apak menekeh iri aria douk nuhwarpap uwe, uwok. Anan nagipesch ananiam atum urkum aria nahwarap meyoh. Um maresh? Seiwok baugos um, Iruhin urkum morum apak aria neshopoki Krais Jisas nanaki nataurumap narap meyoh. <sup>10</sup> Aria douk enyudok seiwok Iruhin nakriyen iri douk nyatogur. Krais Jisas douk nanaki aria narao apak matanamori mape wosik. Aria nabo agundok um apak mugok munak muwishuk abom um nabuhuk. Namudok aria apak ta mare mugok munak muwishuk abom, uwok. Apak ta mupe wosik ihih nyumneh kabi Iruhin ananin yopinyi bareaen nyakripap um. <sup>11</sup> Aria Iruhin nagraeh eik aria neshopoke um inak ikrip arpesh um enyudok ananin bareaen. Douk namudok aria eik douk yanak yakripeschen yenek skulum sabaishi arpesh. <sup>12</sup> Douk yenek skulumesh aria douk eik yape yemnek debeiri eriger. Aria eik madae inenek abraen uwe, uwok. Um maresh? Eik yadukeman wosik abom anudok eik yenek bilipuman iri aria yakan eik kanak abom yani eikin mour yor ananis wis. Aria eik yadukemesh abom um anan ta nutaurume nurukarube ipe wosik aria inek enyudok atin mour arigha inak itogur um ahudok nyumnah anan nutanamori ahi.

<sup>13</sup> Enyudok yopinyi bareaen douk riguk eik yakripeschen iri nyak ta nyusuwen nyugipeschen aria nyukripesch enyudok atin kupaishi arpesh. Aria nyak nyukripesch Iruhin ananin bareaen obi nyutob, nyak ta nyugipesch ehudok aih um nyusuhw ananin bareaen dodog nyugipeschen um, nyuni ehudok um nyak urkum munawashan anan nini ihishmorim arpesh um. Ehudok biyeh aih, eheh douk Iruhin nako apak douk matukur Krais Jisas iri. <sup>14</sup> Aria nyak ta nyutaurumen wosik Iruhin ananin bareaen douk anan nakri nyak wosik um nyukripeschen iri. Aria Iruhin ananin Mishin douk nyape apak iri ta nyutaurumen um nyunek nyak nyutaurumen wosik Iruhin ananin bareaen. <sup>15</sup> Nyak nyadukemesh eshudok ihishmorim arpesh shape agudok shokugi nahobig Esia iri shani amudok biom Figelus iri Hermogenes. Eshesh douk shakri uwok um eik aria shakutuwe-iguk. <sup>16</sup> Aria Onesiforus atun nataurume. Sabaihi nyumneh anan nanaki nataurume aria nenenek eikihw apahw hwor wosik. Eik showeshike senab yape aria anan madae nunenek abraen um agundok eik yonoweshik yape um uwe, uwok. Sabaihi nyumneh anan nanaki nataurume aria neneke yatogur dodogoiwe. Namudok aria eik yakri apakin Debeini nukri gihauum Onesiforus nini ananip awirop aria nutaurumesh. <sup>17</sup> Aria nubokadae sagomatin anan nanaki abrudok debeiburi wabur Rom um, anan nenenek urkum um eik aria naurime nanak arigha nanaki naparuge. <sup>18</sup> Aria nyak nyadukemesh um anan nenenek sabainyi Iruhin ananin yopinyi mour gani Efesus um nataurum sabaishi arpesh aria nataurum eik shopunek. Douk namudok aria eik yakri enyudok. Hahudok nyumnah apakin Debeini Jisas nunaki ahi, anan ta nenenek gihauuman aria natauruman.

## 2

*Timoti Ta Nunek Jisas Krais Ananin Mour Dodogowin Atun Kabi Anan  
Soldia Um*

<sup>1</sup> Nyak eikin nugarin Timoti douk nyani eik watukur Krais Jisas aria anan douk nataurumohw meyoh. Douk namudok aria nyak ta nyurao ddog um agundok anan nataurumohw meyoh um aria nyiyotu dodogowin atin. <sup>2</sup> Riguk apak sabaipari Iruhin ananish arpesh mantorum mape aria eik yakripen enen yopinyi baraan. Aria nyak ta nyukripam enyudok atin baraan mamudok douk henek mour wosik aria gamo hadukemesh um hunek skulum kupaishi arpesh iri. Nyak nyukripam aria amam ta hunek skulumesh wosik um enyudok atin baraan kupaishi arpesh. <sup>3</sup> Aria nyak nyani apak douk matukur Krais Jisas. Douk namudok aria abudok nyutob apak murao amaen aria mumnek eriger obi nyutob, nyak ta nyiyotu ddog aria mare nyunogugur nyuruwok, uwok. Apak ta miyotu ddog kabi anan soldia nemnek eriger aria neyotu ddog um. <sup>4</sup> Nyak nyadukemesh, anan soldia douk nakri nunek ananin debeini soldia nunadudareh-uman. Douk namudok aria anan nakutukuk ihinyumorim kupainyi mour aria napeum nenek nyanyudok amam soldia heneken iri atin mour. <sup>5</sup> Aria shopunek, nyak nyunek urkum um anan nenek resis iri. Aria anan nugipesh lo um resis aria nahur debeg nishagrakuk kupaishi um, anan ta nurao prais. Uwok um ta uwok. <sup>6</sup> Aria nyak nyunek urkum um anan nenek mour nubarig iri. Anan nenek debeiniyi mour arigaha ananigun worigun jurugigun aria enyen douk wosik um anan nurik nunenek sagom-atinigun worigun um. <sup>7</sup> Nyak ta nyunek urkum um enyudok biyen atin baraan iganigadae yarig yenjem iri aria Debeini ta nutaurumen um nyudukemesh um baugenyum um.

<sup>8</sup> Aria nyak ta nyunek urkum um Jisas Krais, king Devit ananin barhonin. Anan douk shan nagok aria Iruhin wata nonohur nikitak nape kabi douk Iruhin ananin yopinyi baraan eik yakripesh-enyi nyakrium. <sup>9</sup> Aria enesh arpesh shakri uwok um eik ikripesh enyudok baraan um aria eshesh sheneke yemnek debeiri eriger. Aria showeshike senab kabi douk showeshik shenek yoweishi inahos iri arpesh um. Eshesh shenekesh namudok aria eshesh madae dodogowish um shubo Iruhin ananin baraan nyubuhuk uwe, uwok. Enyen nyarahaen nyeyatak warub. <sup>10</sup> Douk namudok aria eik yosah ihinyumorim amaen aria yeypotu ddog um itaurum eshudok douk seiwok Iruhin nagraehesh iri. Anan nagraehesh um Jisas Krais nuraesh shutanamori shupe wosik abom agundok bogaragun um ihih nyumneh. <sup>11</sup> Enyudok baraan douk adurin atin aria apak ta munek bilipum. Baraan enyudok.

“Aria apak mutukur anan aria mugok um, apak shopunek ta wata mukitak muni anan mupe atugun.

<sup>12</sup> Aria ta miyotu ddog abudok nyutob amaen nyutogrumpa obi nyutob, apak ta muni anan mupe debeipari. Aria ta apak mukri uwok um anan um, anan shopunek ta nukri uwok um apak shopunek.

<sup>13</sup> Aria ta apak mukutukuk ananin baraan um, anan ta mare nukutinyukuk, uwok. Anan ta nugipeshen wosik abom.”

*Timoti Ta Nunek Mour Um Nutogur Yopuni Nenek Iruhin Ananin Mour Wosik Abom Iri*

<sup>14</sup> Timoti, nyak ta nyupe um nyukripesh enyudok atin baraan eik yakripeny iri. Aria shopunek, nyukripesh wosik enyudok enen baraan shopunek um shumneken. Nyukri, “Iruhin nape natrip aria ipak mare punie rupanitak punotutukem debeg um enyudok sakihasin baraan, uwok.

Ehudokmori aih ta mare hutaurumep um enesh eshudok eneshenesh. Aria eshudok shumnekep iri ta shukutukuk yopinyi baraen aria shupe yowesh abom.” <sup>15</sup> Aria nyak ta dodogowin um nyuneken wosik Iruhin ananin mour um nyuneken nunadudareh-umen. Aria shopunek, nyak ta nyunek skulumesh um ananin adurin atinyi baraen wosik abom um kweipon shopunek anan ta nunadudareh-umen. Aria nyak ta mare nyunenek braen um anan, uwok. <sup>16</sup> Aria nyak mare nyuni kupaishi piyagwreh enenyenen rohwin baraen douk madae nyugipesi Iruhin ananin baraen iri uwe, uwok. Um maresh? Eshudok douk sheneyagwreh enyudokmori baraen iri ta shukutukuk Iruhin aria shunek yoweishi inahos shishagrakuk riguk sharik shape sheneken um. <sup>17</sup> Enyudokmori baraen douk apa nyenek arpesh shape kabi douk sagomatim shokuguni arabigun napenyesh, aria arigaha natogur debeibi arab iri. Aria enyudokmori baraen shopunek douk namudok atin. Sagomatim karowish shemneken, aria arigaha nyatogur debeinya aria sabaishi shemneken aria shakutukuk Iruhin ananin baraen. Aria anam heyagwreh enyudokmori baraen iri douk Himeneus iri Filetus. <sup>18</sup> Amudok biom douk hakutukuk jurug adurin atinyi baraen aria hape henek rohw hakri shagok iri arpesh douk riguk shakitak shape. Amam henek rohwumesh namudok aria henek enesh arpesh shakutukuk agundok shasuhw Iruhin ananin baraen shagipesen um. <sup>19</sup> Aria Iruhin ananish arpesh douk shape dodog kabi douk uroruh hosah urusag iri um. Aria Iruhin nowem enyudok baraen um nakri eshesh shupe ananish atish abom. Baraen enyudok.

“Debeini douk nadukmesh wosik abom um ananish arpesh.”

Aria enen nyakri namudok.

“Eshudok arpesh douk shakrip kupaishi shakri eshesh douk Debeini ananish iri ta shukutukuk ihishmorim yoweishi inahos abom.”

<sup>20</sup> Numun anat debeiti urupat sabaisi marus sani dis iri yaureruh shakus. Enesh shenekesh shakwu gol iri siliwa, aria enesh shabar rowos shenekesh, aria enesh shakwu amnab shenekesh. Aria enesh shenekesh um shuruh yopuguni worigun um, aria enesh um shuruh yoweishi eshudok eneshenesh um. <sup>21</sup> Aria eshudok arpesh douk shakutukuk eneheneh yoweishi aih hani eshudok yoweishi arpesh, aria numun esheshiruh aparuh yopuruh iri douk shape kabi asudok yopusi marus sani dis iri yaureruh douk shakus urupat iri um. Aria eshesh douk wosik um shunek esheshin Debeini ananin mour. Aria eshesh ta shupe ananish atish abom shutrugun um shunek ihinyumorim yopinyi mour.

<sup>22</sup> Aria nyak ta nyukutukuk eshudok eneshenesh yoweishi inahos douk werorowishi apa mishish shakitakumesh aria shenekesh iri aria nyunek yopinyi atin namudok. Nyak ta nyusuhw Iruhin ananin baraen dodog nyugipesen wosik aria nyak urkum ta munawasham kupaishi arpesh aria nyutaurumesh. Aria nyuni eshudok arpesh douk esheship urkwip douk porum yopinyi atin aria shenek beten shorig Iruhin iri um ta punagabe um pupe atugun. <sup>23</sup> Aria nyak ta nyukutukuk wehinyi nyuni rohwish iri sheyagwrehan iri baraen. Um maresh? Nyak nyadukemesh, sheneyagwreh enyudokmori baraen iri apa juwehosishi aria shapeum um shanitok shanatutukem atin. <sup>24</sup> Aria mamudok douk henek apakin Debeini ananin mour iri mare huni kupaishi shunitok shunotutukem uwe, uwok. Amam ta huni eshesh shupe atugun aria hupe shakamum ihishmorim arpesh hutaurumesh aria hukripesh shokubur. Amam ta hukripesh wosik abom Iruhin ananin baraen um eshesh shudukemesh wosik. Aria ta enesh shunek enesh yoweishi inahos um amam um, amam ta hupe hunatrish meyoh. <sup>25</sup> Aria amam ta hupe shakamum eshudok douk shakri uwok

um Iruhin ananin baraen iri aria hukripesh shokubur. Amam hukripesh namudok um Iruhin nutaurumesh aria shukeshuk agabus yoweishi inahos aria shatanam shukon aparuh shudukemesh um ananin adurin baraen aka, uwok? <sup>26</sup> Aria shopunek, hukripesh shokubur um shurao yopipi urkwip um shudukem Iruhin aria anan ta nukweshihesh um agundok Satan noweshikesh dodog aria shape shagipesh ananim urkum um.

### 3

#### *Hugiguk Iri Nyumneh Hutogur Um Ta Shunek Yoweishi Inahos*

<sup>1</sup> Timoti, nyak douk nyadukemesh um enyudok enen baraen shopunek. Baraen enyudok. Hugiguk iri nyumneh hutogram, apak ta mupe yoweishi nyumneh murao enyenenen amae. <sup>2</sup> Ehudok nyumneh arpesh ta shunek urkum um eshesh atish. Aria eshesh ta mishish shukitak um shukri shurao sababiori utabor. Eshesh ta shukri eshesh douk yopishi arpesh aria shenek yopinyi iri. Eshesh ta shunagunukuk aria shutuk esheshish nyeighuh shuto iruhw aria ta shuho kupaishi shukripesh debeg. Aria shopunek, ta mare shumnek esheshish amakenyish esheshin baraen, uwok. Aria eshesh ta mare shunek tenkyu um kupaishi arpesh douk shenek yopinyi um eshesh iri. Aria eshesh ta mare shumnek Iruhin ananin baraen shugipeshen, uwok. <sup>3</sup> Aria eshesh ta mare urkwip punawasham kupaishi arpesh shutaurumesh, uwok. Eshesh ta shuneksh kabi douk bur nubat um. Eshesh madae shukweshih yoweishi inahos kupaishi shenekeshum eshesh iri aria eshesh ta shupe um shunitok atin. Eshesh ta shuhesh aria shukripesh baraen douk madae adurin iri uwe. Aria eshesh ta mare shusuhw merik um eshesh kanak, uwok. Aria eshudok yoweishi inahos douk eshesh urkwip porumesh um shunekesh iri, eshesh ta shunekesh. Eshesh ta shukri shunek wanohw atuhw shupe. Aria eshesh ta shukri uwok abom um yopinyi aria ta shupe um shunek yoweishi inahos atish. <sup>4</sup> Aria ta shiyawreh-pesh rohwinyum baugeshi arpesh aria shiyabig esheshish horim um shunak shusuwesh shesh. Aria arigaha eshesh ta shunek eshudok yoweishi inahos douk eshesh urkwip poromesh iri. Aria ta shunagunukuk shukri eshesh douk yopishi shadukemesh um eneshenesh iri. Aria eshesh urkwip ta mare punawasham Iruhin, uwok. Eshesh ta mishish shikitak abom um shunek ehudok aih douk ta shunekh aria hunekesh shumnek wosik abom atin iri. <sup>5</sup> Aria eshesh ta shukri eshesh douk yopishi shenek lotu iri. Aria eshesh ta shunek lotu meyoh. Eshesh ta shukri Iruhin douk madae dodogowin um nushanam um esheshih yoweishi aih um uwe. Eshudokmori arpesh nyak mare nyuni eshesh nyupe atin, uwok. <sup>6</sup> Eshudokmori arpesh shape shenekesh namudok aria eshesh anam armam apa hape harahe hakripesh amamin baraen. Aria hanabeshuk hanak hawish ono armago owowig urusag aria hape hasumo merik. Aria oudok armago douk madae dodogowiyu um usuhw merik um owowip urkwip uwe. Owo wape um wenek yoweishi inahos atish aria wenek eneheneh yoweishi aih douk owo mishish shakitakumeh um unekeh iri aih. <sup>7</sup> Aria kupaishi arpesh shakripo baraen aria iih nyumneh owo wape um umneken um urao saki aria owo madae udukemesh um Iruhin ananin adurin atinyi baraen uwe, uwok. <sup>8</sup> Aria amudok armam hakri uwok abom um Iruhin ananin adurin atinyi baraen. Douk namudok aria amam douk hakri hen nyubuhuk kabi seiwok amudok biom Janes iri Jambres hakri hubo Moses ananin baraen nyubuhuk um. Aria amam madae hudukemesh um Iruhin ananin baraen uwe, uwok. Amam henek rohw iri abom aria madae husuwen dodog hugipeshen uwe. <sup>9</sup> Aria sabaiishi arpesh ta shudukemesh um shukri amam douk rohwimi kabi seiwok

sabaishi shadukemesh um Janes iri Jambres shakri amam rohwimi um. Namudok aria sabaishi arpesh ta shumnek amamin baraen aria enyen ta mare nyuhur esheshiruh aparuh um shumneken shugipeshen uwe, uwok.

### *Pol Nakripan Dodogowinyi Baraen Timoti Um Nusuhw Iruhin Ananin Baraen Dodog*

<sup>10-11</sup> Riguk ohwak wape atugun um, nyak nyadukemesh abom um eikh aih. Aria shopunek nyadukeme um agundok yenek skulumesh um Iruhin ananin baraen aria yape yenek yopinyi atin mour um. Aria eik yakripen ihinyumorim baraen eik yenek urkum-umen iri. Eik yakripen um agundok yenek Iruhin ananin mour atin um, aria yasuhw ananin baraen dodog yagipeshen um. Aria eik yape shakamum ihishmorim arpesh. Aria meyagwreh baraen um, eik apa yeyagwreh yakripesh shokubur. Aria shopunek, eik urkum manawasham arpesh yataurumesh. Aria arpesh sheneke yemnek eriger um, eik yeyotu dodog yenek Iruhin ananin mour. Aria nyak nyadukemesh um agundok eshesh arbudok biarub atin debeirubi warub Antiok bani Aikoniam aria Listra sheneke yemnek debeiri eriger um. Aria Debeini nataurume um enyenenen amaen douk nyatogrume iri aria nanarae yape wosik. <sup>12</sup> Aria eshudok ihishmorim arpesh douk shatukur Krais Jisas aria shukri shugipesh anan shunek Iruhin nakriyen iri um, kupaishi ta shunekesh shumnek debeiri eriger. <sup>13</sup> Aria eshudok yoweishi arpesh shuni eshudok douk shape shenek rohwumesh iri ta shupe shunek yoweishi inahos shishagrakuk riguk sharik shape shenekesh um. Aria kupaishi ta shunek rohwumesh aria eshesh ta wata shukitak shunek rohw um enesh kupaishi shopunek.

<sup>14</sup> Aria nyak ta nyupe um nyugipesh enyudok atin baraen seiwok shenek skulumen shakrip-enyen aria nyenek bilipumen iri. Um maresh? Nyak nyadukemap apak douk munek skulumen iri. <sup>15</sup> Aria nyak nyadukemesh, seiwok nyak douk wata shokwin aria shakripen Iruhin ananin baraen nyetem ananik Buk iri aria nyak nyadukemen jurug. Enyudok baraen douk wosik um nyutaurumen nyusuhw Krais Jisas ananin baraen dodog nyugipeshen aria Iruhin wata nuraen nyutanamori nyupe wosik abom.

<sup>16-17</sup> Enyudok ihinyumorim baraen nyetem Iruhin ananik Buk iri douk Iruhin ananin abom. Seiwok anan nohur armam henyemaguk. Aria enyen douk yopinyi abom um nyunek skulumap um mudukemen wosik aria nyiyabigap apakish yoweishi inahos mukeshuk agabus. Aria shopunek um nyukrip eshudok douk shakutukuk Iruhin ananin baraen shanak shagipeshuk kupaindyi iri um shutanamori shugipesh ananin adurin baraen. Aria shopunek um nyunek skulumap um mugipesh yopihi atih aih um apak Iruhin ananip miyotu dodogowip aria wosik abom um munek ihinyumorim yopinyi mour.

## 4

### *Timoti Ta Niyotu Dodogowin Aria Nukripesh Iruhin Ananin Baraen Ihih Nyumneh*

<sup>1</sup> Ohwak douk Iruhin nani Krais Jisas hape hatruhw. Krais Jisas anan douk ta kweipon nutanamori aria nunek skelimum ihishmorim shagok iri shuni shape iri arpesh. Aria anan ta nupe Debeini um ihishmorim arpesh. Douk namudok aria eik yakri ikripen enyudok dodogowinyi baraen um nyugipeshen. Baraen enyudok. <sup>2</sup> Nyak ta nyiyotu dodog aria nyupe nyukripesh Iruhin ananin baraen yopugunum. Aria ta eshesh shukri wosik um shumneken o shukri uwok um, nyak ta gamo nyukripesh shopunek atin. Nyak ta nyukripesh um shudukemen aria shukri enyudok baraen

douk adurin. Aria enyen nyiyabigesh um eshesh douk shenek yoweishi inahos abom aria eshesh ta shukutishukuk. Aria nyishuhur nyukripesch wosik Iruhin ananin baraan um shiyotu dodog aria shugipeshen. Aria abudok nyutob nyukripesch obi nyutob, nyak ta nyupe shakamum eshesh aria nyakihw apahw ta hwur wosik aria nyukripesch shokubur. Aria iihh nyumneh nyak ta nyupe um nyunek skulumesh um shudukemen wosik Iruhin ananin baraan. <sup>3</sup> Aria anob nyutob, enesh arpesh ta shukri uwok um shumnek Iruhin ananin adurin baraan um. Eshesh ta shukri shumnek enyudok baraan douk eshesh meyoh shakri shumneken iri. Aria eshesh ta shuhwar sabaishi arpesh um shunaki shunek skulumesh um enyudok atin baraan douk eshesh kanak mishish shakitak abom um shakri shumneken iri. <sup>4</sup> Aria eshesh ta shukri uwok um shumnek Iruhin ananin adurin atinyi baraan aria ta shukutinyuk. Aria eshesh ta shumnek enyudok sakihasin baraan atin. <sup>5</sup> Aria nyak ta nyiyotu dodogowin atin aria nyutaurum nyak kanak. Aria ta enesh arpesh shuneken nyurao enen amaen um, nyak ta nyiyotu dodog. Aria nyukripesch Iruhin ananin baraan eshudok douk wata shutogur Kristen iri uwe um shukon aparuh Iruhin. Aria nyuneken wosik ihinymorim mour douk Iruhin nakripen um nyuneken iri.

### *Pol Ananin Mour Hurukatin Um Nyutuh*

<sup>6</sup> Eik Pol douk hurukatin um she igok. Aria agundok she igok um douk kabi yenek ofa um eik kanak um Iruhin um. Eik yenek ofa um eik kanak kabi eshesh Juda apa shenek ofa um wainibar abar shako Iruhin aria shourak-baruk atap um. <sup>7</sup> Aria eik douk dodogeshiwe yabo yoweihai aih habuhuk kabi douk anan neneb boksen iri neneb uhwin nabo kupaini um. Aria eik douk yenek uhwin, yenek Iruhin ananin mour yeayaten kabi douk anan nahur neneb resis iri neneb uhwin um. Seiwoh arigaha douk, eik yape yasuhw Iruhin ananin baraan dodog yagipeshen. <sup>8</sup> Aria hahudok nyumnah apakin Debeini Jisas nutanamori ahi, anan ta nuneb skelimum arpesh nugipesh ananah yopihai atih aih abom. Aria hahudok nyumnah, anan ta nuke yopunyi mugu kabi douk shenek resis iri shenek uhwin sharaen iri. Enyudok mugu douk enyudok. Anan ta nuhware yopuweiri. Aria anan ta mare nuhwar eik atuwe yopuweiri, uwok. Anan ta nukripesch enyudok atin eshudok douk urkwip panawasham anan aria mishish shakitak abom um shakri shutrun nutanamori iri.

### *Nyatuh Iri Baraen*

<sup>9</sup> Aria nyak ta nyunekesh arigas atin um nyunaki nyutik eik. <sup>10</sup> Um maresh? Demas mishin nyakitak abom um nakri nurao yopishi eshudok eneshenesh um nupe wosik agundok atap. Douk namudok aria anan nakutukuk eik nanak um Tesalonaika. Aria Kresens nanak um shokugi nahobig Galesia, aria Taitus nanak um shokugi nahobig Dalmesia. <sup>11</sup> Aria eik yani Luk atun wapeik agundok. Douk namudok aria nyak nyurauri Mak niren punaki. Um maresh? Anan douk wosik um nutaurume um unek Iruhin ananin mour agundok. <sup>12</sup> Aria Tikikus, eik yeshopokan nanak um Efesus. <sup>13</sup> Aria nyak nyukri nyunakumori, nyak ta nyunak Troas aria nyuhurmeli eikit debeiti saket douk takus Karpus ananit urupat aria nyusuwatume iri. Aria shopunek, eik yakri nyusuhume iri abom oudok bumeb douk shadaresho iri. Aria shopunek, nyak mare urkum mukenyaguk um oudok kupaiwori bumeb shopunek douk sheneko mahishis yegenyihwis iri. Nyak ta nyusuwoume iri.

<sup>14</sup> Anudok Aleksander douk apa nakwu bras neneb eneshenesh eshudok iri apa neneke yarao sabainyi 'amaen. Aria kweipon apakin Debeini ta nuwanaman yoweinyi poe um enyudok anan neneken um eik iri. <sup>15</sup> Aria

nyak shopunek ta gamo nyudukemesh um anan. Um maresh? Riguk apak makripesh Iruhin ananin yopinyi baraen um, anan nakri abom um nubo apakin baraen nyubuhuk.

<sup>16</sup> Aria nubokadae sagomatin eshesh Rom shenekume kwot um, madae enen arpen nyutaurume uwe, uwok. Ihishmorim shanogugur aria shaku-tuweik sharuwok. Aria eik yakri Iruhin mare nuwanamesh yoweinyi poe eshudok arpesh douk sharuwokume iri. <sup>17</sup> Aria apakin Debeini nape nani eik neneke yeotto dodogoiwe aria yakripesh abom um ananin baraen ihishmorim madae shudukemesh um Iruhin iri uwe douk shantorum shape shemnek kwotog iri shemneken. Aria eshesh hurukatin um she igok, aria uwok. Anan nataurume aria eik wata yape wosik. Enyudok kabi narae natriwe iri um debein yi mahin laion enyenit nokwat um. <sup>18</sup> Douk namudok aria yoweishi arpesh shukri she igok um, apakin Debeini ta nutaurume aria nurae inak ipe wosik agundok anan nape Debeini um ananish arpesh um. Aria eik yakri apak mutuk ananin nyeigur nyuto iruhw ihih nyumneh. Adur atin.

<sup>19</sup> Aria nyak ta nyukrip Prisila kwuni okwokwin arman Akwila shuni es-hesh Onesíforus ananip awirop nyukri eik yenemeshugu yopuhi nyumnah eshesh. <sup>20</sup> Aria eik douk yadiguk Erastus napeik Korin aria Trofimus douk arugeh han ganik aria yadiyanuguk napeik Miletus. <sup>21</sup> Aria nyak ta nyunaki arigas. Um maresh? Ta debein yi uhwin nyuhur youg yoweg aria nyak mare nyunaki. Aria Yubulus nani Pudens iri Linus hani okwudok armatok Kłodja shani ihishmorim Kristen shape agundok iri shenek-menyugu yopuhi nyumnah nyak.

<sup>22</sup> Aria eik yakri apakin Debeini nini nyak abom nupe aria nuneken nyiyotu dodogowin atin. Aria shopunek yakri anan nutaurumep meyoh ipak ihishmorim aria nunekep pupe wosik.

# Apudok Shup Douk Pol Nenekap Panam

## Taitus Iri

### Banenyi Baraen Um Enyudok Baraen Pol

### Neneken Nyanak Um Taitus Iri

1:1-4 Pol nakrip Taitus yopinyi baraen um Iruhin nini Jisas Krais hutauruman

1:5-16 Pol nakrip Taitus um nugraeh anam armam hutogur debeimi hutaurum Iruhin ananish arpesh ihirubmorim warub eshesh Kristen shapeum

2:1-3:11 Pol nakrip Taitus um nukripesh baugennum Iruhin ananin adurin atinyi baraen um eshesh Kristen esheshih aih huni bilip

3:12-15 Nyatuh iri bareaen

<sup>1</sup> O Taitus, eik Pol douk yape shakamum Iruhin yenek ananin mour iri yenekumenyugu apudok shup um nyak. Eik Jisas Krais nagraehe aria neshopoke um inak inek enyudok mour aposel um irao ananin bareaen um itaurum ihishmorim arpesh. Eshudok douk Iruhin nagraehesh um shupe ananish atish abom iri um shunek bilip aria shupe dodogowish. Aria shopunek um itaurumesh um shurao ananin adurin atinyibaraen um nyiyabigesh um shugipesh ananah yopuhi yah. <sup>2</sup> Aria baugennum enyudok bareaen douk namudok. Apak madukemesh abom um apak ta mupe wosik ihih nyumneh. Aria seiwok Iruhin douk madae nunek rohw atin uwe wata nunek agundok atap uwe, aria anan nakri enen adurin atinyi bareaen um apak ta mupe wosik um. <sup>3</sup> Aria douk arigaha ahudok nyumnah Iruhin nakriyah iri hatogur aria anan kanak ta neneke ananin bareaen nyatogur yopugunum. Iruhin douk nataurumap matanam um anan nakripe dodogowin atin um inak inek enyudok mour um ikripesh ananin bareaen sabaiishi arpesh.

<sup>4</sup> Eik yenekumenyugu apudok shup um nyak Taitus. Riguk douk eik kanak yenek skulumen um Iruhin ananin bareaen. Douk namudok aria nyak douk nyatogur kabi eikin nugarin um. Aria nyak nyani eik douk wasuhw enyudok atin bareaen douk ihishmorim Kristen shasuhwen iri.

Aria eik yakri Yain Iruhin nini Krais Jisas anudok douk nataurumap narap matanam um Iruhin iri hutaurumen meyoh aria nyakihw apahw hwur wosik.

#### *Iruhin Ananish Arpesh Esheshim Debeimi Amamin Bareaen*

<sup>5</sup> Eik douk yakutinyukuk nyapeik enyudok unai Krit um yakri nyunek enyudok mour douk nyak wata nyuneken nyiyaten iri uwe. Aria nyunak ihirub-morim warub agundok aria nyugraeh anam debeimi Kristen um hutaurum Iruhin ananish arpesh iri kabi douk riguk yakripen um. Aria nyukri nyugraeh debeimi um, nyak ta nyunek urkum um ényudok eikin bareaen. <sup>6</sup> Mamudok armam ta hunek yopihi aih namudok. Amam hupe wosik aria hunek enyudok mour um hupe debeimi um hutaurum eshesh Kristen aria mare hunek enesh yoweishi inahos, uwok. Aria arpesh shutrum aria shukri amam douk yopumi. Aria shopunek, hurao atuk atuk armago aria amamish batowish shunek bilip um Jisas aria esheshish nyeiguhw mare shuto iruhumesh um shunek enesh yoweishi inahos, uwok. Aria shopunek, shupe wosik aria shumnek amakenyish esheshin bareaen shugipeshen um, nyak nyugraeh amudokmori um hupe debeimi

um hutaurum Iruhin ananish arpesh. <sup>7</sup> Nyak nyadukemesh, mamudok douk hape debeimi um Iruhin ananish arpesh iri douk hape debeimi um Iruhin ananin mour. Douk namudok aria mamudok armam hunek yopipi atih aih namudok. Amam yopuyopumi abom aria hunek yopinyi atin um arpesh mare shutik enesh yoweishi inahos amam hunekesh iri, uwok. Amam hunih amam kanak aria hupe shakamum kupaishi arpesh aria mare juwehosim arigas. Aria shopunek, amam mare huwok wainibar abar aria hugugak, uwok. Aria amam mare juwehosim hubo kupaishi arpesh, aria mare urkwip purum hukri amam atum hurao sabaibori utabor iri jah, uwok. <sup>8</sup> Amam ta hutaurum kupairubi warubish arpesh douk shanaki rougun iri. Aria amam urkwip purum yopipi atih aih aria hutaurum amamip urkwip aria aparuh wosik. <sup>9</sup> Aria amam ta hunek bilip aria husuwen dodog enyudok Iruhin ananin adurin baraen douk riguk kupaimi debeimi um Iruhin ananish arpesh iri hakripam-enyi. Douk amam hunekesh namudok um, amam ta hudukemesh wosik abom aria ta hukripesh enyudok baraen kupaishi arpesh. Aria enyudok adurin baraen ta nyutaurumesh shupe dodogowish. Aria shopunek, um eshudok arpesh douk shakenyuk agabus enyudok baraen iri shutrum aria shudukemesh um esheshin baraen douk madae adurin uwe, uwok.

### *Sabaishi Shenek Rohw Iri Shape Enyudok Unai Krit*

<sup>10</sup> Adur, sabaimi armam hekenyuk agabus yopinyi baraen aria hape heyagwreh sabainyi rohwina baraen aria hape henek rohw um enesh arpesh. Sabaimi amudokmori armam douk Juda. Amam douk hakri sabaimi armam hasuhw Iruhin ananin baraen iri ta hugipesh eshesh Juda esheshih aih um hutah amamiruh yegeshiweruh iri. <sup>11</sup> Amudokmori douk henekesh namudok um hakri hunek rohw um sabaimi armam huni amamiyu armago iri batowish shuni sabaishi arpesh. Amam hakripesh enyudok baraen douk madae yopinyi um amam hukripeshen uwe. Amam hakripesh namudok um maresh? Amam hakri hurao utabor aria enesh-enesh eshudok enesh arpesh esheshish. Douk namudok aria nyak nyugah amudokmori armam amamig nokwatog um amam mare hukripesh enyudokmori baraen, uwok. Amam hakripesh enyudok baraen aria henekesh shatanam shakonaguk agabus Iruhin. <sup>12</sup> Seiwok anan nadukemesh abom iri arman nape enyudok unai Krit. Aria eshesh shakri anan douk kabi anan profet um. Anan nakri namudok, "Seiwok arigaha douk, ihishmorim arpesh shape Krit iri douk shenek rohw abom iri. Eshesh douk wanohwish atish aria shapeum shenek eneshenesh yoweishi inahos. Aria shawok sabaiguni worigun aria arigeh atih haesh." <sup>13</sup> Enyudok baraen anan nakriyen iri douk adurin atin abom. Douk namudok aria nyak nyukripesh dodogowin atin um eshesh mare shumnek enyudokmori baraen, uwok. Eshesh ta shunek bilip um enyudok yopinyi adurin atinyi baraen. <sup>14</sup> Nyak nyukripesh dodogowin atin um eshesh mare shumnek eshesh Juda esheshish yoweishi sakihas shuni eshudok douk shakon agabus um enyudok adurin baraen aria esheshin baraen, uwok.

<sup>15</sup> Eshudok arpesh douk esheship urkwip aria aparuh shor wosik abom um shunek yopipi atih aih iri, ihishmorim eshudok douk yopishi. Aria eshudok arpesh douk esheship urkwip yowep aria madae shunek bilip um Jisas iri uwe, ihishmorim eshudok douk yoweishi abom. Esheship urkwip douk yowep abom. Aria eshesh madae dodogowish um shudukemesh um maren yopinyi o maren yoweiniyi um uwe, uwok. <sup>16</sup> Aria eshesh shakri namudok, "Apak madukemesh um Iruhin." Aria eshesh shenekeh iri aih douk shakonuguk agabus abom Iruhin shakri uwok um anan aria anan nakri uwok um eshesh abom. Aria shopunek, eshudok arpesh douk apa

shakon agabus um baraen atin iri ta mare shunek eneh yopih i ah uwe, uwok.

## 2

### *Ruweheshi Arpesh Esheshin Baraen*

<sup>1</sup> Aria nyak ta nyunek skulumesh um enyudok yopinyi baraen kabi douk enyudok adurin yopinyi baraen nyakrium. Nyak nyunek skulumesh um eshesh shumneken aria nyutaurumesh um shunek yopih i ah um shugipesh Iruhin ananin baraen. <sup>2</sup> Nyak nyukripam enyudok atin amam ruwehemi um amam mare huwok abar aria hugugak, uwok. Amam ta urkwip purum adurih yopih i ah aria hutaurumep wosik um amamip urkwip. Aria hupe wosik aria hunek bilip um adurin atinyi baraen aria amam urkwip punawasham Iruhin nini ihishmorim Kristen shopunek. Aria amam hiyotu dodogowim atum um husah enenyenen dodog douk nyutogrammari iri.

<sup>3-4</sup> Aria shopunek, nyak nyukrip owo ruwehew iri armago namudok atin um owo upe Iruhin ananiyu atuw. Owo mare unakripesh agabusin kupaishi. Aria shopunek, mare uwok sabaibari abar aria ugugak, uwok. Owo ta uyabigo yopih i ah aria yopinyi baraen oudok weroroowi um owo urkwip punawasham owowim armam huni owowish batowish. <sup>5</sup> Aria shopunek um utaurum owowip urkwip wosik aria owo urkwip pur wosik um unek yopinyi atin. Aria unek ihinyumorim owowin armagowin mour wosik aria unek yopih i ah um utaurum kupaishi arpesh. Aria owo ta umnek owowim armam amamin baraen. Owo unekesh namudok um kupaishi arpesh ta mare shunumogesh shububunim Iruhin ananin baraen um shen nyubuhuk, uwok.

### *Weroroimi Amamin Baraen*

<sup>6</sup> Aria douk namudok atin, nyak dodogowin um mamudok weroroimi um nyumhur um hutaurumep wosik amamip urkwip. <sup>7</sup> Aria ihinyumorim mour nyak kanak nyuneken iri, nyak ta nyiyabigesh yopih i atih ah um eshesh shutrih aria shugipesheh. Aria nyak nyunek skulumesh um, nyak ta urkum mur um yopih i atih ah aria nyunek enyudok mour. <sup>8</sup> Nyak ta nyiyagwreh yopinyi atin baraen um kupaishi arpesh mare shumnekk enen yoweinyi baraen douk madae adurin iri uwe um enyudok mour nyak nyuneken iri, uwok. Aria nyak nyunekesh namudok um eshudok douk shakri uwok um nyak nyunek Iruhin ananin mour iri ta mare shukri enen yoweinyi baraen um ohwak, uwok. Eshesh ta abraen nyesh.

### *Shape Shakamum Kupaishi Shenekeumesh Mour Meyoh Iri Esheshin Baraen*

<sup>9-10</sup> Aria nyak nyukrip eshudok douk shape shakamum kupaishi shenekeumesh mour meyoh iri um shunek mour wosik. Aria shopunek, shumnek esheshim debeimi douk hekesh mour sheneken iri amamin baraen shugipeshen. Eshesh ta shunek yopinyi mour um shunek esheshim debeimi hunadudareh. Eshesh mare shukri uwok um shumnek amamin baraen, aria mare shutrumb shukwumesh aruh enesh eshudok eneshenesh, uwok. Eshesh ta shuneken wosik abom enyudok mour douk debeimi hekeshen iri um amam hutrish aria hukri Iruhin ananin baraen douk yopinyi. Anudok Iruhin, anan douk nataurumap narap matanamori um anan iri.

### *Apak Mupe Yopupari Aria Mupe Mutrugun Um Ahudok Nyumnah Krais Nutanamori Ahi*

<sup>11</sup> Iruhin douk nataurumap meyoh narap matanamori um anan aria mape wosik. Aria enyudok baraen um agundok Iruhin narap um nyatogur yopugunum aria ihishmorim arpesh shemnekesh-umen. <sup>12</sup> Aria ehudok aih um anan nataurumap meyoh um douk neyabigap um mukehuk agabus yoweihai aih huni eshudok douk agundok atapishi arpesh mishish shakitakumesh um shunekesh iri. Aria douk apak mupe agundok atap obi nyutob um, apak ta mutaurumep wosik apakip urkwip aria mupe munek yopihi atih aih kabi douk Iruhin nakri um. <sup>13</sup> Aria douk abudok nyutob apak mupe munek ehudok yopihi aih obi nyutob, apak munadudareh aria mupe mutrugun um ahudok yopuhi abom nyumnah douk apak madukemesh um ta hutograri iri. Ahudok nyumnah apakin Debeini Iruhin Jisas Krais nunaki ahi, anan ta nutrugun abom aria nutogur yopugunum. Anan douk anudok arman douk nataurumap narap matanamori mape wosik atin iri. <sup>14</sup> Anan kanak nagok um nator apak um nakweshihap um ehudok yoweihai aih douk howeshikap henekap mape mabrig Iruhin ananin lo iri. Aria nenekap matogur yopupari um mutogur ananish arpesh abom aria mishish shakitak um munek eneheneh yopihi aih.

<sup>15</sup> Aria nyak ta nyunek skulumesh um enyudok baraen aria nyataurumesh nyishuhur um eshesh dodogowish um shugipeshen. Aria nyukripesch dodogowin atin um eshudok arpesh douk shakri uwok um shumnek yopinyi baraen iri. Um maresh? Enyudok mour douk Iruhin kanak nakripen um nyuneken. Aria mare enesh arpesh shukri nyak douk anan rohwin arman, uwok.

### 3

#### *Apak Mupe Dodogowip Um Munek Yopihi Atih Aih*

<sup>1</sup> Aria nyishuhur nyukripesch sabaihi nyumneh um eshesh shumnek debeimi armam douk hape debeimi um gavman hataurumesh iri amamin baraen shugipeshen. Aria eshesh shukri wosik um shunek enyenenyen yopinyi mour. <sup>2</sup> Aria shopunek, nyukripesch um eshesh mare shuho enesh arpesh meyoh, uwok. Esheshiruh aparuh ta hur wosik aria mare juwehosish uwe, uwok. Aria shutaurum ihishmorim arpesh shukripesch shokubur.

<sup>3</sup> Riguk apak shopunek douk madae enep yopipi urkwip pupenyap uwe, uwok. Apak madae mugipesen enyudok yopinyi baraen uwe aria Satan neneh rohwumap nenekap makutukuk yopuhi yah aria mabrig Iruhin ananin lo munek yoweishi inahos. Eshudok eneshenesh ihishmorim yoweishi douk apak mishish shakitak umesh aria manadudareh um munekesh iri showeshikap dodog kabi douk mape monoweshik um. Ihih nyumneh apak urkwip porum yoweishi inahos aria mape munek nyigiya um eneshenesh eshudok kupaishi esheshish. Aria kupaishi arpesh shatripukuk yoweisi nabes aria apak shopunek matrishuk yoweisi nabes eshesh.

<sup>4-5</sup> Aria Iruhin nataurumap narap matanamori mape wosik. Aria ananish yopihi aih douk ehudok. Anan urkum manawashamap abom aria nakri giha-umap. Aria douk abudok nyutob ehudok aih hatogur yopugunum aria anan narap matanamori mape wosik. Anan douk madae urkum mur um eneh yopihi aih apak menekeh iri aria douk narap mutanamori uwe, uwok. Anan nakri giha-umap abom aria nataurumap meyoh matanamori mape wosik aria neshrokuhap. Anan neshrokuhap namudok. Ananin Mishin nyenekap matogur ananish namishi arpesh. <sup>6</sup> Aria Jisas Krais douk narap matanamori um Iruhin aria neneh yopinyi mour um apak. Anan nenek enyudok yopinyi mour aria Iruhin nakop ananin Mishin abom. <sup>7</sup> Aria

Iruhin nataurumap meyoh aria nahwarap yopupari mape wosik abom iri arpesh. Aria anan nakri apak ananishi arpesh mupe wosik abom iih nyumneh. Namudok aria apak madukemesh abom um enyudok baraen douk adurin aria mape matrugun um kweipon mupe wosik namudok um.<sup>8</sup> Aria enyudok baraen douk adurin aria apak ihipmorim ta munek bilipumen.

Aria shopunek, yakri nyak nyukripesh enyudok baraen dodogowin atinyum um eshudok arpesh douk shenek bilip um Iruhin iri esheship urkwip ta purum enyudok aria shupe dodogowish um shunek yopihi atih aih. Enyudok baraen douk yopinyi aria enyen ta nyutaurum sabaishi arpesh.

<sup>9</sup> Aria enesh arpesh shanitok shanatutukem um wehinyi baraen nyani baugeniyum baraaen um esheshish popehesh yamehesh esheshish nyeiguhw. Aria shopunek, shape shanogogonim baraaen um enyudok lo douk seiwok Iruhin nakoguk Moses enyi. Enyudokmori baraaen nyak mare nyuni eshesh nyusuwen aria nyuni eshesh punogogonim punitoken, uwok. Um maresh, enyudokmori ta mare nyutaurumap um munek yopihi aih, uwok.

<sup>10</sup> Enesh arpesh shape shorukwesh-eidap aria shadiyogur eshesh shashuh Krais ananin baaen iri aria shenekesh shanasiyam um. Douk namudok aria nyak nyukrip eshudokmori arpesh atuh o biyeh meyoh um eshesh mare shuneken atin enyudokmori. Aria ta eshesh mare shumneken um, nyak nyukeshuk agab. <sup>11</sup> Nyak douk nyadukemesh um eshudokmori arpesh douk shakutukuk yopuhi yah aria esheshih yoweishi aih douk heyabigesh aria shadukemesh um eshesh douk yoweishi arpesh.

### *Nyagiguk Iri Baraen*

<sup>12</sup> Aria meihi nyumlah eik ishopoku Artemas o Tikikus anan nunaku nutogur nupeik ganudok aria nyak ta nyunaki nyuparuge arigas abrudok wabur Nikopolis. Um maresh, eik douk yakri um ipe Nikopolis abudok yoweibi nyutob debeihi eshah atuh hur obi nyutob. <sup>13</sup> Aria nyak nyutaurum Senas douk nadukem um Rom esheshin gavman esheshin lo iri aria nini Apolos um eneshenesh eshudok amam wokes iri um amam ta mare eneshenesh uwok um enesh eshudok um hunak ahudok rouhi yah um.

<sup>14</sup> Aria nyukrip apakish arpesh douk shasuhw Krais ananin baraaen iri um eshesh urkwip pur abom um shunek yopinyi atin mour um shutaurum eshudok yaruhih arpesh. Eshesh mare shupe meyoh, uwok. Eshesh shunek mour um shurao utabor buni jah aria worigun um shutaurum kupaishi shasuhw Krais ananin baraaen iri.

<sup>15</sup> Aria ihishmorim eshudok armam armago douk shani eik mape agundok iri shanadudareh abom aria shenekumen-ugu yopuhi nyumlah nyak. Aria shopunek, nyukrip apakish arpesh douk shasuhw Krais ananin baraaen iri. Shashudok douk shenek bilip um Iruhin shape gagundok iri namudok. Apak shopunek munek bilip um Iruhin iri monekumesh-ugu yopuhi nyumlah eshesh.

Aria eik yakri Iruhin nataurumep meyoh ipak ihipmorim aria pupe wosik abom punadudareh.

# Apudok Shup Douk Pol Nenekap Panam

## Filemon Iri

### Banenyi Baraen Um Enyudok Baraen Pol

### Neneken Nyanak Um Filemon Iri

ves 1-3 Pol nakrip Filemon yopinyi baraen um Iruhin nini Jisas Krais hutauruman

ves 4-7 Pol nenek tenkyu um Iruhin um Filemon aria nenek betenuman

ves 8-22 Pol narig Filemon um nutaurum Onsimus

ves 23-25 Pol neyatok baraen aria nani anam henekuman yopuhi nyumlah Filemon

<sup>1</sup> Eik Pol douk showeshike yape um yenek Jisas Krais ananin yopinyi mour um, yani ohwakin wanin Timoti weneku apudok shup um nyak ohwakin arpen Filemon. Nyak nyari ohwak douk menek Iruhin ananin mour atin iri. <sup>2</sup> Shopunek wenekap panakumagu Iruhin ananish arpesh douk shantorum nyakit urupat shenek lotu um Iruhin iri, shani ohwak mohwukwik Apia kwani ohwakin arpen Arkipus douk nani ohwak manoprom um ahwudok wanohw um agundok munek Iruhin ananin mour um iri.

<sup>3</sup> Ohwak wakri apakin Yain Iruhin nini Debeini Jisas Krais hutaurumep moyoh aria hunekek aparuh hur wosik.

#### *Filemon Nenek Yopihi Aih Aria Pol Nanadudareh*

<sup>4</sup> Eikin arpen Filemon, iih nyumneh eik yenek beten obi nyutob, eik douk yarig eikin Iruhin um nutaurumen aria yenek tenkyuman um nyak.

<sup>5</sup> Um maresh? Eik yemnek um nyak urkum manawasham Debeini Jisas nani Iruhin amamish arpesh aria nyasuhw Debeini Jisas ananin baraen nyagipeshen. <sup>6</sup> Aria douk yenek beten namudok. Yakri nyak nyuni ohwak mupe um munek bilip um Debeini aria munek enenyenen anan nakriyenyi. Munekesh namudok atin aria nyak ta nyudukemesh abom um ihishmorim yopishi eshudok eneshenesh douk Krais nakopesh iri. <sup>7</sup> O eikin arpen Filemon, nyak douk urkum manawasham abom um ihishmorim Iruhin ananish arpesh nyataurumesh nyenekesh shanadudareh shape wosik. Nyenekesh namudok aria nyagabe eikin mishin nyeneke yanadudareh yariguk.

#### *Pol Narig Filemon Um Nuneck Yopinyi Um Onsimus*

<sup>8</sup> Eik douk enen baraen aria ta dodogoive atuwe yakripen dodog um nyunek enesh eshudok eneshenesh um Krais ananin nyeigur um, aria ta mare ikripen dodog, uwok. <sup>9</sup> Nyak douk urkum manawasham Iruhin ananish arpesh aria eik shopunek urkum manawasham nyak abom. Namudok aria douk yakri ikripen shokubur moyoh. Eik Pol douk nyeigur nyato iruhw um yarahaen um Krais Jisas ananin baraen aria ahudok nyumnah douk shopunek enyudok yonoweshik yape um enyudok ananin mour. <sup>10</sup> Aria douk yakri ikripen um nyunek yopinyi um Onsimus. Anan douk natogur kabi eikin nuganin um. Yonoweshik yape aria yatogur ananin yaken um agundok yatauruman nenek bilip um Krais um. <sup>11</sup> Anob nyutob riguk douk madae nunekumen enen yopinyi uwe, uwok. Aria douk natogur enen yopinyi arpen aria ta nutaurum nyak nyuni eik nunekumohw yopinyi atin shopunek.

<sup>12</sup> Aria ahudok nyumnah douk anudok yeshopokan nanakumenyugu. Aria eikin mishin douk shopunek nyanamanagu. <sup>13</sup> Abudok nyutob yonoweshik yape obi nyutob, um agundok yakripes Iruhin ananin yopinyi beraen um, eik douk yakri wosik um nini eik upe. Yakri nini eik upe nutaurume um eshudok kabi nyak nyuni eik upe ba nyutaurume um.

<sup>14</sup> Aria yakri uwok um dodogoiwe-umen. Nyukri nyunekan mumam, nyakin mour. Namudok aria ta mare inek enesh eshudok arigaha nyak ta nyukri wosik.

<sup>15</sup> Aria Iruhin ta neneck Onesimus nuruwok-umenyaguk banab nyutob um ta wata nutanam-menaygu aria nini nyak pupe abom. <sup>16</sup> Aria douk, anan madae kabi riguk um atin uwe, uwok. Um agundok nenemen mour meyoh utabor uwok um. Douk neshagrakuk namudok natogur kabi nyakin wanin abom um. Aria nyak ta urkum munawashaman. Eik adur urkum manawashaman, aria nyak ta nyishagrakuk eik urkum munawasham abom anan. Um mares? Anan ta nunemen mour meyoh aria shopunek natogur abom kabi anan nyakin wanin um agundok pagipes Debeini um.

<sup>17</sup> Namudok aria nyak nyukri eik nyakin arpen abom douk wanoprom um Iruhin ananin mour iri um, aria nunak nutograru aria wata nyuran nini nyak pupe kabi ta eik kanak inak itogrugu ba ta nyunadudareh-ume um. <sup>18</sup> Riguk nanunu enesh eshudok o natrin nakwumabor aruh anabor utabor um, aria eikin nyeigur nyutem um enyudok dinau. <sup>19</sup> Agundok baraenyigun eik Pol eik kanak yenjem um eikis wis iri douk agundok. Eik Pol ta iken ananin dinau. Adur, nyak Filemon nyeneke enen dinau um eik um agundok yataurumen nyenek bilip um Krais nyape wosik um, aria yakri uwok um ikrip. <sup>20</sup> Namudok aria eikin wanin Filemon, eik yakri nyak nyunekume enyudok douk yakripenuum, um Onesimus. Nyunekesh kabi Debeini ananish arpesh shenekesh um. Yakri nyugabeime eikihw apahw um nyunek yopinyi kabi Krais ananish arpesh apa shenekesh um.

<sup>21</sup> Namudok aria ta idukemesh abom. Douk yenekumenyagu apudok shup nyutrup aria ta nyunek enyudok douk yarigen um nyunekeni iri. Adur, ihil aih douk yarigen um nyunekeh um Onesimus iri douk ta nyunekeh nyishagrakuk ehudok douk yarigen um nyunekeh iri. <sup>22</sup> Aria anabik baraenyigun douk agundok. Yakri pugapesh-ume um anam rum mupeme um inaku ishuhum. Um mares? Eik douk yadukemesh um Iruhin ta numnek ipakin beten aria ta nutaurume itanam-umepogu.

### *Anam Hani Pol Henek Atin Mour Iri Heneman Yopuhi Nyumnah Filemon*

<sup>23</sup> Epafras douk nani eik wonoweshik um Krais Jisas ananin mour iri douk nakri anan urkum morum nyak Filemon. Aria douk nenekumenyagu yopuh nyumnah. <sup>24</sup> Amudok anam manoprom menek Debeini ananin mour iri douk shopunek hakri amam urkwip porumen aria douk henemenyagu yopuhi nyumnah. Amam douk amudok. Mak, Aristarkus, Demas iri Luk.

<sup>25</sup> Wosik, eik yakri Debeini Jisas Krais nutaurum ipak ihipmorim meyoh aria ipakish mishish shur wosik.

# Apudok Shup Douk Shenekap Panam Eshesh Hibru Iri

## Banenyi Baraen Um Enyudok Baraen Shenyem Nyanak Um Eshesh Hibru

1:1-3 Iruhin ananin baraen nyatogur nyanawereh yopugunum, um Iruhin ananin atun nunganin Jisas Krais douk nape abom namudok atin kabi Yain Iruhin um

1:4-2:18 Jisas neshagrakuk ihishmorim enselahos

3:1-4:13 Jisas neshagrakuk Moses

4:14-6:20 Jisas anan douk apakin Debeini pris douk neneb ofa um anan kanak um Iruhin

7:1-28 Jisas anan douk nape debeini pris abom neshagrakuk Melkisedek.

8:1-9:28 Jisas anan debeini pris douk nasuhw merik um enyudok Iruhin ananin namunyi baraen kontrak. Aria ananibor owishibor douk benek enyudok kontrak nyatogur ddogowin abom.

11:1-12:29 Sabaishi seiwok shenek bilip um Iruhin iri douk sheyabigap yopihi aih um apak mugipesheh.

13:1-25 Yopihi aih apak ta mugipesheh um munek Iruhin nunadudareh-umap.

### *Iruhin Ananin Nunganin Nanaki Nakripap Iruhin Ananin Baraen*

<sup>1</sup> Seiwok sabaibi nyutob, Iruhin nakrip amam profet douk hakripesch ananin baraaen iri aria hanaki hakrip apakish popehesh yamehesh ananin baraaen. Hakripeshen sabaihi sisigh yeh. <sup>2</sup> Aria douk ehudok hagiguk iri nyumneh, ananin baraaen douk nakripi ananin Nunganin meyoh nanaki nakripapen. Aria douk, Iruhin douk nagraehan um ta nugrem ihishmori eneshenesh eshudok shuni arpesh shopunek. Seiwok baugos um, Iruhin nakrip ananin Nunganin aria neneb iruhw iri atap shani ihishmorim eneshenesh eshudok shani arpesh. <sup>3</sup> Anan douk neyabigap abom um agundok Iruhin ddogowin atun aria natrugun um. Anan douk nadukem Iruhin abom. Mutik anan um obi nyutob douk matik Iruhin abom. Anan douk napeum neyagwreh ddogowinyi baraaen aria agudok nahobig gani iruhw utag iri ihishmorim eneshenesh eshudok shape dodog. Anan douk shan owishibor bakwrrupuk apakish yoweishi inahos matogur yopup. Douk nataurumap namudok aria nato heven nakih nyeigur nyato iruhw nape yopunyi rogor ehahum anudok ddogowin atun abom iri Iruhin.

### *Jisas Douk Nyeigur Nyato Iruhw Uman Neshagrakuk Iruhin Ananish Enselahos Abom*

<sup>4</sup> Iruhin ananin Nunganin douk natogur dedeben atun neshagrakuk es-hesh enselahos douk sharahaen um Iruhin ananin baraaen iri. Um maresh? Agundok Iruhin nahwaran Nunganin um douk neshagrakuk abom agundok nahwar eshesh enselahos um. <sup>5</sup> Seiwok, Iruhin madae nukrip enen atin ensel namudok uwe, uwok. Nakrip ananin Nunganin atun. Nakripan namudok nakri,

“Nyak douk eikin Nunganin.

Doukih eik yawereh baraaen um agundok eik yape nyakin Yain um.”

Shopunek anabik douk nakripan nakri,

“Eik ta itogur ananin Yain, aria anan ta nutogur eikin Nunganin.”

**6** Aria shopunek, abudok nyutob Iruhin nakri nishopoki ananin narik iri Nuganin nubuhi agundok atap obi nyutob, anan douk nakri,  
“Ihishmorim eikish enselahos ta shunek lotuman  
shutuk ananin nyeigur nyuto iruhw.”

**7** Aria eshesh enselahos, Iruhin douk neyagwreh-umesh enyudok nakri,  
“Eik yenek enselahos um shunekume mour shunaki shunak kabi uhwin  
nyahur um  
o kabi nyih purareh hanu hato dodogowih atih um.”

**8** Aria Ananin Nuganin Iruhin douk nakripan namudok nakri,  
“Iruhin, Nyak ta nyupe um nyupe Debeiniyi namudok atin ihih nyumneh.  
Nyasuhw yopihi aih aria ta nyupe Debeini king  
um ihishmorim eneshenesh eshudok shuni arpesh shupe wosik.

**9** Nyak urkum munawasham abom um yopihai aih  
aria yoweihai douk nyakri uwok-umeh abom.  
Namudok aria eik nyakin Iruhin yatrin nyape Debeini abom um  
ihishmorim eshudok douk nyak nyani eshesh pape atugun iri.  
Eik douk yenekesh-umen namudok aria yeneken nyanadudareh nyariguk  
abom”

**10** Shopunek Iruhin nakripan nakri,  
“Debeini, seiwok watak baugos um nyak kanak nyakwarum agundok atap.  
Iruhw utag douk shopunek nyakwu nyakis wis nyenekag.

**11** Iruhw atap aria eneshenesh eshudok  
ta burukworesh shunak shuwishuk, aria nyak uwok.  
Ta nyupe abom namudok atin.  
Iruhw atap aria ihishmorim eneshenesh eshudok ta yowesh kabi rupeh  
yoweh um.

**12** Yoweh aria nyak ta nyudareshuk kabi shadaresh anah debeihi rupah um.  
Ta shunak shuwishuk kabi shawaruk yoweihai rupeh  
aria shor namuhi um.

Aria nyak kanak ta nyupe abom namudok atin ihih nyumneh.”

**13** Shopunek nakrip ananin Nuganin nakri,  
“Nyak poe agundok eikin yopuni rogor ehahum nyupe arigaha eik ibo  
nyakim horim hubuhuk hupe shakamum nyak.”

Enyudokmori baraen, Iruhin douk madae nukripesha atin uwe eshesh  
enselahos, uwok. **14** Namudok aria eshesh enselahos douk meishi? Eshesh  
douk mishish meyoh douk shenekuman mour Iruhin iri. Anan apa  
neshopokesha shanaki shataurum eshudok arpesh douk ta nuraesh aria  
shutanamori shuni anan shupe wosik abom iri.

## 2

### *Agundok Iruhin Wata Narap Um Douk Sagomatin Yopinyi Mour Abom*

**1** Iruhin ananin Nuganin douk nyeigur nyato iruhw abom neshapokesha  
grakuk eshesh enselahos. Namudok aria enyudok apak memneken iri  
baraen, apak ta musuwen dodog mugipeshen. Mare mukri mutanam  
mukutinyukuk uwe, uwok. **2** Seiwok Iruhin nakripi enselahos shanaki  
shakrip Moses enyi lo douk dodogowinyi abom. Namudok aria abudok  
nyutob arpesh shaken agabus enyudok baraen iri, eshesh douk ta sharaao  
debeiri eriger wosik um esheshih yoweihai aih. **3** Namudok aria ta douk apak  
mukri mukenyuk agabus enyudok baraen um enyudok nyarik iri yopinyi  
mour abom douk Iruhin neneken um nurap mutanamori mupe wosik um,  
apak douk yah wakap um muruwok um Iruhin um. Enyudok baraen  
um Iruhin nakri watak nurap mutanamori um, enyen sagomatin douk  
Debeini Jisas narik nakripesha. Aria eshudok douk shemneken iri, eshesh

douk shakripap aria madukemesh um enyen adurin atin abom. <sup>4</sup> Iruhin shopunek nenek enyudok bareaen nyatogur adurin namudok. Anan nohur arpesan shenek sabainy enenyenen anan atun neneken iri mour nyani eneh aih douk shatrih shakitak yowiyokuk um eheh hatogur aria apak matrih. Matrih aria makri Jisas ananin bareaen douk adurin atin abom. Anan douk shopunek nakri aria Ananin Mishin nyagipesh ananim atum urkum aria nyekesh sisigin yopinyi dodog iri saki.

### *Jisas Nenekekumap Yah Um Munak Um Iruhw Heven*

<sup>5</sup> Douk yakri ipak urkwip gamo purum enyudok bareaen. Enyudok, Iruhin douk madae nukri um enselahos ta shupe debesh um eneshenesh douk shupe agudok namugari nahobig douk ta nunekag iri uwe, uwok. Agudok namugari nahobig douk mape makriyag iri, uwok. <sup>6</sup> Aria enen bareaen nyetem Iruhin ananik Buk iri douk nyakri namudok. Nyakri, "O Iruhin, nyak nyakri apak arpesan shouk maresh arpesh, um nyak urkum morumap abom um?" Apak douk arpesan meyoh.

Aria namudok mumam, um nyak nyataurumap um?

<sup>7</sup> Banab nyutob meyoh nyak nyenekap mape shakamum enselahos atin. Aria nyak watak nyakop yopinyi big aria nyatukap mato nyeiguw shato iruhw.

<sup>8</sup> Aria douk nyenekap mape debeipari um ihishmorim eshudok enesh-enesh.

Ihishmorim eshudok eneshenesh douk nyenekesh shape shakamum apak." Enyudok bareaen douk nyakri Iruhin nenek apak arpesan mape debeipari um ihishmorim eneshenesh eshudok. Madae nyukri enen atin anan neneken iri enyudok nyupeik meyoh uwe, uwok. Nyakri ihishmorim eshudok eneshenesh. Enyudok douk wosik, aria douk abudok nyutob douk madae mutik apak arpesan mupe debeipari um ihishmorim eshudok uwe, watak. <sup>9</sup> Aria apak douk matik atun arman meyoh. Anudok arman douk Jisas. Banab nyutob meyoh Iruhin neneken nape shakamum enselahos atin. Iruhin neneken nape namudok aria shan nagok um nutaurumap. Douk shan nagok aria nemnek debeiri eriger. Iruhin nataurum apak arpesan meyoh aria neshopok Jisas nanaki nagok um apak ihishmorim arpesh. Aria douk, Iruhin natuk ananin nyeigur nyato iruhw, neneken dodogowin atin abom aria nyatrugun abom.

<sup>10</sup> Yakri gamo ikripep um enyudok. Iruhin douk nenek ihishmorim eshudok eneshenesh aria nape natrish. Aria douk nape narao ihishmorim ananish batowish shatanamori um shuto iruhw heven shukih shuni anan sharaao debeishi nyeiguw. Douk namudok aria neshopoki Jisas nanaki shan nemnek debeiri eriger. Douk shan nemnek debeiri eriger namudok aria natogur debeini narik nenekumesh yah hato iruhw heven. Iruhin neneken enyudok aria douk wosik um ananish yopihi aih abom. <sup>11</sup> Jisas douk nakwrupuk apakish yoweishi inahos aria nenekap matogur yopupari abom mape Iruhin ananipari atup. Aria anan nani apak douk matogur atup awirop abom meyoh. Namudok aria Jisas douk madae nuneck abraen um nuhwarap ananish owashish um uwe, uwok. <sup>12</sup> Anan douk neyagwreh enyudok bareaen nyetem Iruhin ananik Buk iri. Nakrip ananin Yain Iruhin namudok, nakri,

"Eik douk ta ikrip eikish owashish um nyak.

Abudok nyutob munak munatorum atugun munek lotumen obi nyutob, eik ta ituk nyakin nyeigur nyuto iruhw."

<sup>13</sup> Aria shopunek nakri namudok, nakri,

"Eik ta ipeum inek bilip ipeum Iruhin atun um enenyenen."

Aria shopunek nakri,  
“Eik douk enyudok.  
Batuwish Iruhin nekeyesh iri douk shopunek shani eik mape.”

*Jisas Natogur Adurin Abom Um Nutaurum Apak*

<sup>14</sup> Eshudok arpesh douk Jisas nahwaresh ananish batowish iri, eshesh douk agundok atapishi arpesh meyoh abom. Jisas shopunek douk natogur arpen. Douk nenekeh namudok um shan nagok aria nanunu agundok douk Satan nape dodogowin atun aria nenek arpesh shagok um. <sup>15</sup> Jisas shopunek nenekeh namudok um nukweshih arpesh douk shanogugur um shugok aria esheshih nyumneh shapeum douk ehudok aih howeshikesh dodog abom iri.

<sup>16</sup> Aria douk madukemesh namudok. Jisas douk madae nataurum eshesh enselahos uwe, uwok. Anan douk nataurum Abraham ananish barheshish.\* <sup>17</sup> Jisas douk adur nanamori nutaurum apak arpesh. Douk namudok aria narao arpeniyhw yegeniyhw abom nadukem apak ananishi owashish um ihihmorim aih. Douk nenekeh namudok um nutogur apakini Debeini Pris abom aria nusuhw Iruhin ananin mour nuneken wosik abom. Anan douk nenek gishaumap aria nataurumap namudok um Iruhin nukweshihuk apakash yoweishi inahos. <sup>18</sup> Aria douk, meishi arpesh douk Satan nukwiraehesh um shunek yoweishi inahos iri, apakini Debeini Pris douk ta nataurumesh. Um maresh? Abudok nyutob Satan nukwiraeh anan obi nyutob, anan kanak douk narao debeiri eriger, aria neyotu dodog.

### 3

*Jisas Douk Nyeigur Nyato Iruhw Abom Nyeshagrakuk Moses*

<sup>1</sup> O eikish arpesh douk pape Iruhin ananip iri, ipak douk Iruhin nagraehep aria nahwarep um ta puni ananish arpesh puto um iruhw heven. Douk eik yakri ipak urkwip gamo purum Jisas. Anan douk Iruhin nagraehean aria neshopokan nanaki nakripep enyudok adurinyi baraen douk apak masuhwen magipeshen aria makripeshen iri. Anan douk natogur debeini pris abom aria nape orokohun um apak mani Iruhin. Nape aria nenek mour nataurumap um munak hurukatin um Iruhin. <sup>2</sup> Anan douk Iruhin nagraehean aria nenek enyudok yopinyi mour. Neneken kabi seiwok Moses nenek Iruhin ananin yopinyi mour abudok nyutob nape debeini um ihihsmorim Iruhin ananish arpesh obi nyutob. <sup>3</sup> Jisas anan douk nyeigur nyato iruhw abom neshagrakuk Moses kabi arpesh shatik anat urupat aria shatuk naruk urupat iri ananin nyeigur nyato iruhw um. <sup>4</sup> Ihig urusag douk adur arpesh sharukog. Aria nenek ihihsmorii eshudok iri douk Iruhin. <sup>5</sup> Moses anan douk nenek Iruhin ananin mour neneken yopinyi abom. Anan nasuhw Iruhin ananin baraen aria nape debeini um ihihsmorim Iruhin ananish arpesh nataurumesh. Nataurumesh aria neyagwreh baraen um enyudok mugu kweipon Iruhin ta nuneken nyutografi iri. <sup>6</sup> Aria Krais, anan douk Iruhin ananin nunganin. Anan douk nenek Iruhin ananin yopinyi mour aria nape debeini um Iruhin ananish arpesh nataurumesh. Aria ta apak mupe dodog mupe mutrugun um kweipon murao Iruhin ananish yopishi eshudok eneshenesh um, apak adur abom Iruhin ananishi arpesh.

*Shakonuk Agabus Jisas Iri Ta Mare Shuwish Shuni Iruhin Shupe Shurao Uhwin, Uwok*

\* **2:16:** Baugenylum enyudok baraen um Abraham ananish barheshish douk biyen. Enen nyakri eshudok Abraham ananish barheshish douk eshesh Israel. Enen nyakrium apak munek bilip iri.

<sup>7</sup> Ipak douk pape Iruhin ananishi arpesh namudok aria punek yopihi aih kabi Iruhin ananin Mishin nyakrium. Nyakri namudok,  
“Douk, ta eik Iruhin ikri ikripep enen baraen um,

<sup>8-9</sup> ipak mare pukenyuk agabus  
kabi seiwok ipakish popehesh yamehesh shenekesh um, uwok.  
Eik douk yakri um itaurumesh,  
aria eshesh shakri uwok um shumneke.

Namudok aria sheneke juwehosive atuwe.

Abudok nyutob shape wehigunum arpesh iri urah uwok enesh um uwe obi nyutob,  
eshesh douk shape shokwiraeh eik um eneshenesh shenekesh iri yoweishi inahos.

Shape agundok wehigunum aria shatik sabainyi dodogowinyi mour douk yape yeneken um 40-poreish kwarahos iri.

Eik douk yakri um itaurumesh,  
aria shakri uwok um shumneke.

Shape shokwiraeh eik um eneshenesh shenekesh iri yoweishi inahos.

<sup>10</sup> Douk namudok aria eik juwehosive abom um eshudok arpesh.

Aria douk yakri, ‘Eshudok arpesh douk shagipeshuk kupainyi baraen.  
Namudok aria eshesh madae shudukem ehudok aih eik yakrieh iri uwe,  
uwok.’

<sup>11</sup> Sheneke juwehosive namudok aria yakri um iruhw abom  
yakri adur um, eshesh ta mare shuwish um agundok douk  
esheship urkwip pur wosik aria shupe wosik um.”\*

### *Apak Mare Musuwokuk Iruhin Ananin Baraen Kabi Eshesh Israel Um, Uwok*

<sup>12</sup> Namudok aria eikish arpesh, ipak douk gamo pumnek. Ta enen nyukri urkum mur um eneshenesh yoweishi inahos aria nyukutukuk bilip um nyukon agab anudok Iruhin douk nape iih nyumneh iri, aria namudok ta uwok. <sup>13</sup> Aria douk yakri. Douk, nyutob watak bape um ipak pugipesh ananin baraen um. Eik douk yakri iih nyumneh um ipak punagapeshum piyotu dodogowip pusuhw ananin baraen dodog pugipeshen. Punekesh namudok aria ta mare enen arpen enyenyin mishin nyikitak um nyunek enesh yoweishi inahos, uwok. Ta eshudok yoweishi inahos shunek rohwumen aria enyudok arpen nyukonuk agab abom Iruhin.

<sup>14</sup> Apak miyotu dodog masuhw Jisas ananin baraen mugipeshen kabi riguk makri adurin atin masuhwen magipeshen um. Musuwen dodog arigaha mugok um, apak ta muni Krais munoprom mupe atugun. <sup>15</sup> Baraen nyetem Iruhin ananik Buk iri douk iganigadee yakripen. Nyakri namudok,

“Douk ta eik Iruhin ikri ikripep enen baraen um,  
ipak mare pusuwokuk enyudok baraen

kabi seiwok ipakish popehesh yamehesh shenekesh um, uwok.”

<sup>16</sup> Ipak pakri seiwok douk meishi arpesh shemnek Iruhin ananin baraen aria shasuwoken-ukuk shakon agabus? Eshudok arpesh douk eshudok ihishmorim Moses narikumeshi aria shakutukuk debeigei nahobig Isip shanaki iri. <sup>17</sup> Aria shopunek yakri iyorigep. Ipak pakri meishi arpesh abom shape shenek yoweishi inahos um 40-poreish kwarahos aria shenek Iruhin juwehosin atun abom? Anan douk juwehosin atun um eshudok

---

\* <sup>3:11:</sup> Enyudok baraen douk nyakrium seiwok eshesh Israel madae shuwish shurao uhwin Kenan uwe. Aria douk, Iruhin nakri ananish arpesh ta murao uhwin um mupe wosik douk agundok atap muni gani iruhw heven shopunek.

douk shape shenek yoweishi inahos aria shagok shakusuk wehigunum arpesh uwok um. <sup>18</sup> Aria shopunek yakri iyorigep. Ipak pakri Iruhin nakri um adur iruhw nakri adur atin um meishi arpesh ta mare shunak shuwish shuni anan shupe shurao uhwin? Anan douk nakri um eshudok douk shasuwokan-ukuk um ananin baraen iri. <sup>19</sup> Namudok aria apak madukemesh. Eshesh douk mare ta shunak shuwish shuni Iruhin shupe shurao uhwin uwe, uwok. Um maresh? Eshesh douk madae shusuhw ananin baraen wosik shugipeshen uwe, uwok.

## 4

### *Iruhin Ananish Arpesh Ta Shunak Shuwish Shuni Anan Shupe Shurao Uhwin*

<sup>1</sup> Iruhin ananin adurin atinyi baraen um ananish arpesh shuwish shuni anan shupe shurao uhwin um douk watak dodogowin nyape. Douk namudok aria yakri apak gamo mudukemesh abom um mare enen atin nyupeiguk agundok atap um mare nyunak nyuwish nyuni Iruhin nyupe nyurao uhwin uwe, uwok. <sup>2</sup> Apak douk shopunek memnek Iruhin ananin yopinyi baraen kabi seiwok apakash popehesh yamehesh shemneken um. Eshesh douk shemneken, aria enyen madae nyunekumesh enen yopinyi mugu uwe, uwok. Um maresh? Eshesh madae shusuhw Iruhin ananin baraen dodog abom shugipeshen uwe, uwok.

<sup>3</sup> Douk, apak masuhw Iruhin ananin baraen dodog magipeshen iri, apak douk ta munak muni Iruhin mupe murao uhwin. Kabi baraen nyetem Iruhin ananik Buk iri nyakrium. Iruhin nakri,  
“Eik douk juwehoswi um eshudok shakenyuk agabus eikin baraen iri.  
Shenekesh namudok aria yakri um iruhw abom  
aria yakri adur atin eshesh ta mare shuwish shuni eik  
mupe murao uhwin uwe, ta uwok.”

Iruhin seiwok nakwarum agudok nahobig aria ananin mour nyatuh, aria anan douk watak nakriyuk namudok. <sup>4</sup> Um maresh? Enen baraen nyetem Iruhin ananik Buk iri douk nyakrium ahudok hakri um 7-ih nyumnah. Nyakri, “Iruhin neneh eneshenesh eshudok neyatesh 6-poreih nyumneh. Aria hakri um 7-ih nyumnah um, anan narao uhwin.” <sup>5</sup> Baraen iganigadae yenyem nyetem iruhw iri, Iruhin douk nakri,  
“Eshesh ta mare shuwish shuni eik mupe murao uhwin uwe, ta uwok.”

<sup>6</sup> Enyudok adurin atinyi baraen douk watak nyape namudok, aria douk yah hapeum enesh shuwish shuni anan shupe shurao uhwin. Seiwokishi douk sharik shemnek Iruhin ananin baraen, aria shakenyuk agabus. Namudok aria eshesh madae shunak shuwish shurao uhwin uwe, uwok. <sup>7</sup> Namudok aria Iruhin watak nagraeh kupaibi nyutob aria nohwarab “Douk”. Arigaha sabaiishi kwarahos shanak shadiguk, aria anan Iruhin nohur king Devit aria Devit nakri enyudok atin baraen nyetem nyarik iri. Devit nakri Iruhin neyagwreh enyudok, nakri,  
“Douk ta eik Iruhin ikritep enen baraen um,  
ipak mare pukenyuk agabus uwe, uwok.”

<sup>8</sup> Douk ta Josua nurik um eshesh Israel shunak shuwish shurao uhwin Kenan atugun akure, Iruhin ta mare watak nagraeh kupaibi nyutob shopunek ta uwok. <sup>9</sup> Aria anah nyumnah douk watak hapeum Iruhin ananish arpesh shunak shuwish shurao uhwin um. Kabi seiwok sagomatim narik neneh eneshenesh eshudok neyatesh 6-poreih nyumneh aria hakri um 7-ih um anan nape nurao uhwin um. <sup>10</sup> Meishi eshudok douk shuwish shurao uhwin kabi Iruhin nakri um iri, eshesh douk sheyatok esheshin

mour aria shawish sharao uhwin kabi seiwok Iruhin neyatak ananin mour aria narao uhwin um. <sup>11</sup> Douk namudok aria apak ta dodogowip atup abom um muwish murao uhwin\* namudok. Munekesh namudok um ta mare enesh shupeik agundok atap um mare shuwish shurao uhwin uwe, uwok. Kabi seiwok apakish popehesh yamehesh shakonuk agabus Iruhin ananin baraen aria madae shuwish shupe shurao uhwin um uwe.

<sup>12</sup> Apak mare mukonukuk agabus Iruhin ananin baraen, uwok. Um mares? Ananin baraein douk dodogowin atin abom aria yopunyi mishin nyapenyen ta nyunek eneshenesh yopishi eshudok. Enyen douk wanohwin atin abom nyeshagrakuk ihig bainatog douk shawatog gwenek eres wobuwobur um. Apa nyaduk arpesh nyawish gani numun douk apakip urkwip aria mishish shapeum, nyeshagrakuk abom nyawish nyasuhw gani douk bishiguh shatakum nyawish nyasuhw abar bor bishiguh iri. Nyawish aria nyape nyawerehi enenyenen apakip urkwip poromen iri nyani eshudok apak mishish shakitak-umesh iri. <sup>13</sup> Apak douk madae wosik um mubeshuk enesh eshudok um Iruhin uwe, uwok. Anan kanak nakwarum eneshenesh eshudok aria natrish um douk shanowereh shapei yopugunum iri atish. Kweipon apak ta mukripan um ihihmori eneheneh apak menekeh iri aih.

### *Jisas Anan Douk Debeini Pris Abom Neshagrakuk Ihim-morim Pris*

<sup>14</sup> Apak douk anan debeini pris abom nape orokohun um apak mani Iruhin aria nape nataurumap. Anan douk Iruhin ananin nukanin Jisas. Anan douk nanak nawish heven, agundok Iruhin napeum. Namudok aria apak douk musuhw ananinbaraen dodog abom. Enyudok baraein douk apak mape magipeshen aria meyagwreh arpesh shemnekupum. <sup>15</sup> Apakini debeini abom pris douk adur apa neneh gihauimap aria nataurumap. Abudok nyutob eneshenesh yoweishi inahos shunakumori apak aria mare dodogowip obi nyutob uwe, anan douk nadukem apakip urkwip aria nataurumap abom. Aria anan, Satan douk nakwiraahan um ihih yeh um nunek yoweishi inahos kabi apak um. Aria anan madae nutu nunek enesh yoweishi inahos uwe, uwok. <sup>16</sup> Douk Jisas nape nataurumap namudok aria apak mare munogugur uwe, uwok. Dodogowip atup abom aria munak muwish agundok douk Iruhin nape debeini abom aria nataurum ananish arpesh meyoh um. Munekesh namudok aria abudok nyutob yoweishi inahos shukri shunaki aria apak mare dodogowip obi nyutob, ta bishiguh shutaurumap abom aria ta nutaurumap meyoh.

## 5

### *Jisas Anan Douk Debeini Pris Abom*

<sup>1</sup> Ihim-morim debeimi pris abom douk Iruhin natik arpesh meyoh nagraeiam aria nomusop um hurao esheshiyu outumeb um hunekuman mour anan. Nomusop um htaurum arpesh hukon yopiyopishi eshudok eneshenesh anan Iruhin aria huweh esheshish mahish hukon um anan nukweshih yoweishi inahos eshesh shenekesh iri. <sup>2</sup> Aria amam douk hani apak arpesh atish aria atup awirop. Abudok nyutob eneshenesh yoweishi inahos shunakumori amam obi nyutob, amam douk madae dodogowim uwe, uwok. Namudok aria arpesh douk watak shorshor um, mare shugipesh Iruhin wosik iri uwe, amam douk hadukemesh aria shokubur hataurumesh wosik. <sup>3</sup> Madae dodogowim namudok uwe aria amam douk apa henek ofa um mahish hako Iruhin um anan mare urkum mur um

\* **4:11:** Putik futnot nyape Hibru 3:11 iri.

yoweishi inahos amam henekesh iri ba iyoh, aria kadak henek arpesan esheshin ofa nyugiguk.

<sup>4</sup> Aria arman natogur debeini pris iri douk naraao debeinyi mour abom. Mare anan arman anan kanak nunagraeh aria douk ta nuraen uwe, uwok. Iruhin atun nagraham douk aria heneken. Kabi seiwok nahwar Eron natogur debeini pris um. <sup>5</sup> Aria Krais douk namudok atin. Anan kanak madae nunagraeh um nuraao debeinyi nyeigur um enyudok mour um nutogur debeini pris uwe, uwok. Iruhin meyoh nagraahan. Baraen nyakripan um douk nyakri,  
“Nyak douk Eikin Nuganin.

Douk Eik yawereh baraen um agundok Eik yape Nyakin Yaken um.”

<sup>6</sup> Shopunek enen baraen Iruhin nakri,  
“Nyak ta nyunek pris nyupe namudok ihih nyumneh  
kabi Melkisedek um.”\*

<sup>7</sup> Abudok nyutob Jisas nape agundok atap obi nyutob, anan douk nenen beten narig Iruhin um natauruman. Nareh abih aria nahwar debeg um natauruman. Anan douk nadukemesh um Iruhin ta natauruman aria mare shon nugok, uwok. Aria anan douk nemnek aria natauruman um nenenan dodogowin. Um maresh? Anan douk nape shakamum Iruhin aria nenen lotuman. <sup>8</sup> Anan douk adur Iruhin ananin nugarin, aria naraao debeiri eriger. Namudok aria douk nadukemesh um agundok nusuhw Yain ananin baraen dodog nugipeshen um. <sup>9</sup> Douk nagipesh ananin baraen nenen yopihi atih aih aria natogur sagomin debeini pris. Douk namudok aria natogur debeini um ahudok yah um Iruhin nuraao ihih arpesan douk shasuhw ananin baraen shagipeshen iri aria shutanamori shupe wosik abom ihih nyumneh um. <sup>10</sup> Douk nenen enyudok aria Iruhin nagraahan nape debeini pris abom kabi Melkisedek um.

### *Apak Mare Mudukem Batowish Um Agundok Mugipesh Iruhin Ananin Baraen Um, Uwok*

<sup>11</sup> Eik douk sabainyi baraen nyape, um ta ikripep um agundok Jisas nape kabi Melkisedek um. Aria ta itaurumep ikripep aria mare pumnek, uwok. Um maresh, ipak madae arigas purao baraen aria pudukemen wosik uwe, uwok. <sup>12</sup> Adur, ipak douk patogur Iruhin ananish arpesan roubi nyutob. Douk ta pupe punek skulum kupaishi um enyudok Iruhin ananin baraen. Aria douk watak papeum enesh gamo shukriep nyarik iri Iruhin ananin baraen shopunek. Ipak douk padukem batowish. Dodogowiguni worigun uwok. Watak apa pawok nyumaguhw atin um agundok pape um parao nyarik iri Iruhin ananin baraen atin um. <sup>13</sup> Ipak douk padukemesh. Arpesan shape kabi batowish um douk madae dodogowish uwe aria watak shawok nyumaguhw atuguhw. Eshudokmori arpesan douk madae gamo shudukemesh uwe um meihi aih yopihi aria meihi yoweishi um uwe, uwok. <sup>14</sup> Aria dodogowiguni worigun douk yopugunum shugnol iri. Eshudokmori arpesan douk nubokadae toinyish shadukemesh um meihi aih yopihi aria meihi yoweishi um shugipesh yopihi atih.

## 6

### *Apak Miyotu Dodogowip Atup Abom Um Bilip*

<sup>1-2</sup> Apak ta mugipesh Krais ananin baraen mishagrakuk kabi riguk marik masuhwen magipeshen um. Apak mare watak mupe um munak um nyarik iri baraen um agundok mugipesh Krais um, uwok. Enyen douk

\* <sup>5:6:</sup> Enen baraen um anudok arman Melkisedek douk nyape Stat 14:17-20, Hibrus 7:1-4

enyudokmori. Mukeshuk agabus eneshenesh yoweishi inahos douk ta munekesh aria Iruhin nop mugok um, musuhw Iruhin ananin baraen dodog mugipeshen abom um, munek anas baptaisum, muwemesh wis arpesh aria morig Iruhin um nukesh ananin Mishin um, shagok iri ta watak shukitakumori, Iruhin nunekumesh kwotog aria neshopokesh shunak shupe yopuburi o yoweiburi wabur um ihih nyumneh um. Apak mare mupe um enyudokmori atin, uwok. Douk ta munak um dodogowip um bilip iri esheshin baraen. Mare mupe munekesh kabi arpesh douk shapeum shenek tuk hwao uroruh, aria shabirak madae shuwem urupat iri um uwe, uwok. <sup>3</sup> Enyudokmori Debeini ananin baraen, ta Iruhin nukri wosik um, aria apak wosik ta mutanam mupe miyagwreh aria mugipeshen.

<sup>4</sup> Enesh arpesh douk shemnek Iruhin ananin baraen aria shadukemen wosik kabi shape bogaragun abom um. Shadukemesh um enyudok yopinyi douk nyanaki iruhw heven iri, sharao Iruhin ananin Mishin. Shopunek shadukemesh um agundok Iruhin ananin baraen adur yopinyi abom um, Iruhin nenek enenyenen shatik ananin gobi nyatogur yopugunum abudok yopibi nyutob riguk shakri um ta butograri iri. Namudok aria eshudokmori arpesh shukri shukutukuk bilip aria shukon agabus Iruhin abom um, eshesh douk yah wokesh um watak shutanamori shukon aparuh um. Shakanaguk agabus namudok aria enyudok douk kabi eshesh watak shopunek showeshik Iruhin ananin Nuganin rowog kruse aria shenek arpesh shape shenekan enenyenen um.

<sup>5</sup> Ipak pumnek enyudok wobuwobren baraen. Sabaih atih eshah apa hor habuh anab amnab. Aria ta enesh arpesh shurib shu worigun abudok amnab aria yopuguni worigun nukihumesh um, apak douk mudukemesh um Iruhin ta nunekumab yopinyi abom abudok amnab. <sup>6</sup> Aria ta abudok amnab douk segego watogroruhi madururuhan yoweiruhi utaruh aturuh hukih um, apak ta mukri abudok amnab douk yoweb. Iruhin douk juwehosin atun um abudok amnab aria hurukatin um nuhwarab yoweibi. Aria anob nyutob douk ta nyih hunub hununub.

<sup>7</sup> Ipak eikishi abom arpesh, eik adur yeayagwreh enyudok dodogowinyi baraen, aria yadukemesh um ipak ta mare pugipesh ehudokmori yoweihiaih, uwok. Um maresh? Ipak douk penek sabaihi aih kabi arpesh douk Iruhin naraesh shatanamori shape wosik abom iri shenekeh iri um.

<sup>8</sup> <sup>10</sup> Iruhin anan douk madae anan yoweini arman uwe, uwok. Anan ta mare urkum mukonaguk um yopinyi mour ipak peneken iri, uwok. Ipak douk pataurum ananish arpesh aria namudok douk peyabigan um agundok ipakip urkwip panawasham anan abom um. Aria ipak douk watak pape pataurumesh namudok atin. <sup>11</sup> Namudok aria eik yakri ipak atin punekesh namudok atin arigaha Krais nutanamori. Punekesh namudok um ta pudukemesh abom um Iruhin ta nukep yopishi eshudok eneshenesh douk roubi nyutob pape patrugun um nutogur nukopesh iri. <sup>12</sup> Eik douk yakri uwok um ipak arigeh hep uwe, uwok. Yakri pudukem eshudok arpesh douk seiwok shasuhw Iruhin ananin baraen dodog shagipeshen iri. Eshesh douk shenek bilip aria shape shokubur atin ariga ha sharao eshudok douk Iruhin nakri adurin atin um ta nukeshesh iri.

### *Apak Douk Musuhw Iruhin Ananin Adurin Atinyi Baraen Aria Mukri Anan Ta Nunekesh-umap Kabi Nakri Um*

<sup>13</sup> Seiwock Iruhin nakrip Abraham enen adurin atinyi baraen um ta nunekuman enesh yopishi eshudok eneshenesh. Iruhin nakri uwok um Abraham nukri anan douk nenek rohw. Namudok aria Iruhin nakri um iruhw anan kanak ananin nyeigur um ta nunekeshuman um atin. Iruhin douk nakri anan kanak nyeigur um maresh? Arpen douk madae

enen shopunek nyeigur nyuto iruhw nyishagrakuk anan uwe, uwok.  
<sup>14</sup> Aria nakripan namudok. Nakri, “Adur atin yakripen, eik ta inekumen yopinyi abom aria ta inek nyakish barheshish shutogur sabaishi abom.”  
<sup>15</sup> Abraham nasuhw Iruhin ananin baraen nakri adurin aria nape shokubur atin apa natrugun. Nape natrugun arigah arigaha Iruhin nenekuman enyudok kabi nakripan um.

<sup>16</sup> Apakih aih douk namudok. Enen arpen nyukri enen baraen aria kupaishi shukri enyen nyenek rohw um, enyudok arpen apa nyakri adur atin nyakrium enen nyeigur nyato iruhw enyi arpen enyenin nyeigur. Namudok aria enyen nyagaheshuk eshudok arpeshig nokwatog. <sup>17</sup> Aria Iruhin douk namudok atin. Seiwok nakri adur atin um ta nunekumap yopishi eshudok eneshenesh. Anan douk nakri uwok um apak mukri anan ta wata nuwanam urkum um. Namudok aria naktak nakri um anan kanak ananin nyeigur um enyudok adur ta nuneken atin um. <sup>18</sup> Iruhin nenek enyudok um apak mumnek, miyotu dodogowip um bilip aria mudukemesh um enyudok Iruhin ananin adurin atinyi baraen ta nyutogur adurin atin. Iruhin nakri enyudokbaraen nyankumori apak douk makutukuk yoweishi inahos aria anan nataurumap nahwarap manak um anan iri. Douk biyen baraen nyape. Enyudok anan nakri enyi adurin atinyi baraen nyani enyudok douk nakri um anan kanak ananin nyeigur um. Enyudok biyen baraen ta mare nyunawanam um kupainyi baraen, aria Iruhin ta mare nunek rohw, uwok. <sup>19-20</sup> Douk apak dodogowip atup madukemesh um Iruhin ananin adurin atinyi baraen ta nyutogur adurin atin. Apak douk matukur Jisas kabi douk shakwutu enen anka nyasuhw anat bot teir dodog anagun yopugunum. Apak douk matukur Jisas aria narikumap narik nanak nawish numun ahudok debeihi rupah douk hataur numun Iruhin ananit debeiti urupat gani iruhw heven iri. Anan nenekesh namudok um nutaurumap. Aria douk natogur debeini pris abom jurug nape namudok iih nyumneh kabi Melkisedek um.

## 7

### *Melkisedek Anan Douk Debeini Abom Pris Douk Neneke Mour Um Iruhin Iri*

<sup>1</sup> Anudok arman Melkisedek douk debeini king um wabur nyeiguri-burum Salem. Anan douk shopunek anan pris aria apa nenek ofa enesh-enesh nako anudok Iruhin douk nabouk ihishmori eshudok eneshenesh shabuhuk iri dodogowin atun abom. Seiwok Abraham nanak um wanohw nabouk amudok debeimi armam king hagok aria watak natanamum wabur. Nape nanak aria anudok Melkisedek nanaki naparugan yah. Naparugan aria narig Iruhin um nunekuman yopinyi anan Abraham. <sup>2</sup> Aria Abraham naktak nobuk ihishmori eshudok douk nanak um wanohw neshuhur iri um 10-poreip hip. Aria atup hip douk nako Melkisedek. Baugenym um enyudok nyeigur Melkisedek douk nyakri, “Debeini arman king douk nenek yopihu atih aih iri”. Enyudok baraen um nape king um wabur Salem um, baugenym um enyudok baraen douk nyakri, “Anan nape debeini arman king nataurum ananish arpesh aparuh hur wosik aria wanogwiruh uwok shape wosik shanadudareh.” <sup>3</sup> Anudok arman Melkisedek, baraen nyetem Iruhin ananik buk iri douk madae nyukripap um ananin yain o amakek o enesh ananish popehesh yamehesh uwe, uwok. Shopunek nyutob naktak obi nyutob o nagok obi nyutob apak madae mudukemesh uwe, uwok. Anan douk nenek pris nape namudok atin iih nyumneh kabi Iruhin ananin Nuganin um. Madae jurug uwe.

<sup>4</sup> Aria douk yakri ipak urkwip purum anudok debeini abom arman Melkisedek. Tik, Abraham anan douk apakini nyeigur nyato iruhw iri um sagomin yamenen. Aria anan nasiya yopishi eshudok eneshenesh douk nanak um wanohw neshuhur iri um 10-poreip hip, aria atup hip douk nako Melkisedek. <sup>5</sup> Enyudok lo seiwok Iruhin nakoguk Moses enyi douk nyakri amam hakitak Livai ananip awirop aria hatogur pris iri atum ta hurao enesh eshudok douk eshesh Israel shaparugesh iri. Eshesh douk shani amam apudok awirop Livai atish abom shakitak atun yamenen Abraham. Aria enyudok lo nyakri namudok. "Eshesh asudok anas awiros ta shusiya ihishmori shaparugesh iri eshudok um 10-poreip hip aria atup hip ta shuko amam pris." <sup>6</sup> Anudok Melkisedek, anan douk madae anan um eshesh apudok awirop Livai uwe, uwok. Aria Melkisedek douk narao enesh eshudok eneshenesh um eshudok Abraham neshuhur iri. Naraesh iyoh aria narig Iruhin um nunekuman yopinyi Abraham. Enyudok yopinyi douk seiwok Iruhin nakripan adurin atinyi baraeum ta nunekesh-uman nupe wosik um. <sup>7</sup> Aria apak douk madukemesh. Arpen nyarig Iruhin um nunekumen yopinyi kupainyi iri, enyudok arpen douk enyenin nyeigur nyato iruhw nyeshagrakuk enyudok enen douk enyen nyarig Iruhin um nunekumen yopinyi iri. <sup>8</sup> Amam pris douk harao enesh eshudok um eshudok douk eshesh Israel shaparugesh iri, amam douk madae hupe abom uwe, uwok. Hagok. Aria anudok arman Melkisedek douk narao enesh eshudok um eshudok douk Abraham neshuhur iri, anan douk nape iih nyumneh kabi Iruhin ananik Buk kwakripap um. <sup>9</sup> Livai douk baugos abom um amam pris hakitak ananip awirop iri. Amam douk harao enesh eshudok eneshenesh um eshudok douk eshesh Israel shaparugesh iri. Abudok nyutob Abraham nakon enesh eshudok eneshenesh um neshuhur iri um Melkisedek obi nyutob, apak ta mukri enyudok douk kabi Livai nakon um. <sup>10</sup> Apak ta mukri namudok. Um maresh? Adur abudok nyutob Abraham nakon enesh eshudok eneshenesh neshuhur iri um Melkisedek obi nyutob, Livai douk madae shunabuki uwe, uwok. Aria douk sabaishi kwarahos shanakuk aria anan douk shanabuki apudok Abraham ananip awirop atup.

### *Anan Debeini Pris Abom Douk Nakitak Neshagrakuk Seiwokimi Pris*

<sup>11</sup> Seiwok eshesh Israel sharao lo um agundok shunek lotu um Iruhin um. Aria enyudok lo douk nyakri amam apudok awirop Livai atum husuhw enyudok mour pris. Aria ta enyudok mour nyunek arpesh shutogur yopishi akure, Iruhin ta mare watak nukri um kupaini pris nutogur, aria uwok. Anudok namuni pris douk madae nudukem Eron uwe, uwok. Natogur abom kabi Melkisedek um. <sup>12</sup> Douk anudok namuni pris natogur aria enyudok lo seiwok Iruhin nakoguk Moses enyi ta nyutogur anahaehin. <sup>13</sup> Anudok yakripep-uman iri pris douk kupaipi awiropin. Anan douk madae nukitak apudok awirop Livai uwe, douk apa hasuhw enyudok mour pris aria henek mour alta hakon eshudok eneshenesh Iruhin iri um uwe, uwok. <sup>14</sup> Aria apak douk madukemesh apakin Debeini douk nakitak apudok awirop Juda. Aria seiwok, Moses douk madae nukri um amam Juda husuhw enyudok mour pris uwe, uwok.

<sup>15</sup> Apak douk matik anudok namuni pris natogur nadukemesh abom um Melkisedek. Namudok aria mudukemesh wosik abom um anan douk nyeigur nyatouman iruhw nyeshagrakuk amam pris douk hakitak apudok awirop Livai iri. <sup>16</sup> Anan douk madae nukitak Liyai ananip awirop aria douk nutogur pris uwe, uwok. Anan natogur pris um mumam? Anan douk dodogowin atun abom aria ta nupe iih nyumneh mare nugok, uwok.

Namudok aria anan douk natogur pris. <sup>17</sup> Baraen nyetem Iruhin ananik Buk iri, Iruhin douk nakri namudok. Nakri, "Nyak ta nyunek pris nyupe namudok iihh nyumneh kabi Melkisedek um."

<sup>18</sup> Enyudok baraen douk nyeyabigap wosik. Douk Iruhin nakweshihuk ananik nyarik iri lo. Um mares? Enyen douk madae dodogowin aria wosik um nyutaurumap uwe, uwok.

<sup>19</sup> Arpesh douk shagipesh lo seiwok Iruhin nakoguk Moses enyi aria shenek lotu um Iruhin iri, anan Iruhin douk madae nutrish aria nuhwaresh yopishi uwe, uwok. Namudok aria Iruhin douk nenekeup kupaahi yopuhi yah. Ahah douk heshagraguk harik iri abom um shagipesh lo um. Douk apak mugipesh ahudok namuhi yah aria munak mupe hurukatin um Iruhin.

<sup>20</sup> Seiwo abudok nyutob Iruhin nagraeh Jisas um nutogur debeini pris obi nyutob, anan douk madae nugraehan meyoh uwe, uwok. Nakri um anan kanak ananin nyeigur nakri adurin atin douk nagraehan. Aria kupaaimi amam hatogur pris iri douk madae nugraeham namudok uwe, uwok. <sup>21</sup> Iruhin nakon Jisas um enyudok mour pris obi nyutob, anan douk nanakri um anan kanak ananin nyeigur nakri adurin atin douk nenekean natogur pris. Nenekean um, baraen nyetem Iruhin ananik Buk iri douk nyakri namudok,

"Debeini nakri um anan kanak ananin nyeigur aria nakri adurin atin, nakri,

'Nyak ta nyunek pris nyupe namudok iihh nyumneh.'

<sup>22</sup> Iruhin nakri um ananin nyeigur nakri adurin atin aria nagraeh Jisas natogur pris namudok. Namudok aria apak madukemesh um Jisas natogur debeini arman aria nape orokohun um apak mani Iruhin. Anan douk wosik abom aria neneke enyudok dodogowinyi baraen kontrak nyatogur adurin atin abom. Enyudok kontrak douk nyeshagrakuk nyarik iri lo abom.

<sup>23</sup> Seiwo douk sabaimi armam apa hatogur pris. Um mares? Amam apa hagok aria hatogur kupaaimi. Madae hunek pris hupe namudok atin uwe, uwok. <sup>24</sup> Aria Jisas douk madae namudok uwe. Anan douk nape iihh nyumneh aria nasuhw enyudok mour pris. Ta mare anan nurao ananik outuk, uwok. <sup>25</sup> Namudok aria iihh nyumneh anan douk wosik abom um nurao eshudok arpesh douk shunakumori Iruhin um ananin nyeigur aria nutaurumesh shupe wosik abom iihh nyumneh. Um mares? Anan douk nape iihh nyumneh aria apa neneke beten narig Iruhin um nutaurumesh. <sup>26</sup> Anudokmori debeini pris abom douk wosik abom um nutaurumap. Anan douk yopun abom. Madae nuneke enyeweyi nyupenyen uwe. Iruhin natrun um douk nape yopuyopuni abom. Iruhin naran nakh nape gani iruhw heven nyeigur nyato iruhuman aria napeik sik um eshesh shenek yoweishi inahos iri.

<sup>27</sup> Amudok anam harik iri debeimi pris abom douk mour nyapenyam um hunek ofa um eshudok huko Iruhin iihh nyumneh. Sagomatim amam harik henek ofa um eshudok hako Iruhin um nukweshihuk amamish henekesh iri yoweishi inahos sharik. Aria eshesh armam armago douk henek ofa um eshudok hako Iruhin aria nukweshihuk esheshish shenekesh iri yoweishi inahos. Aria Jisas, enyudokmori mour douk uwok. Anan douk neneke ofa atuh nyumnah meyoh nakon anan kanak um Iruhin aria jurug. <sup>28</sup> Seiwo amudok debeimi pris abom douk henekam kabi lo Iruhin nakoguk Moses enyi nyakrimori, amam kanak madae dodogowim uwe. Aria enyudok adurinyi baraen douk Iruhin nakri um anan kanak nyeigur nagiguk nakriyen nyagimori lo iri, enyen douk nyagraeh Iruhin ananin Nuganin natogur pris. Anudok

debeini pris abom douk yopun abom aria ta nupe abom namudok atin iihih nyumneh.

## 8

### *Jisas Douk Apakin Debeini Pris Abom*

<sup>1</sup> Aria baugenylum um enyudok yakriepen iri baraen douk namudok. Apak douk anan yopuni debeini pris abom nape. Anan douk nape agundok yopuni rogor ehahum anudok dodogowin atun abom iri king ananit wagitur nyeyotu um gani iruhw heven. <sup>2</sup> Douk nape aria nenek enyudok mour pris numun um atudok Iruhin ananit atut abom urupat gani iruhw heven. Madae enesh arpesh shurukat uwe, uwok. Iruhin anan meyoh narukot. <sup>3</sup> Ihim-morim debeimi abom pris douk mour nyapenyam um hurao yopishi eshudok eneshenesh huko Iruhinesh. Eshudok douk arpesh sharaeshuman iri aria shopunek huwah mahish hunekuman ofa. Namudok aria anudok yakriep-umani iri apakin debeini abom pris, anan douk shopunek ta nurao enesh eshudok nunek ofamesh nuko Iruhin. <sup>4</sup> Douk ta anan nupe agundok atap akure, anan ta mare nutogur anan pris, uwok. Um maresh? Amudok anam pris douk hape aria hape henek ofa um eshudok eneshenesh hako Iruhin kabi lo seiwok Iruhin nakoguk Moses enyi nyakrium. <sup>5</sup> Amam douk henek enyudok mour pris numun atudok lotuit urupat tatao agundok atap iri. Atudok urupat douk aborir meyoh um atudok adurit urupat tatao gani iruhw heven iri. Douk namudok aria abudok nyutob Iruhin nakrip Moses um nurok atudok selit urupat obi nyutob, anan douk nakripan dodogowinyi baraen nakri, “Abudok nyutob nyukri nyurok atudok urupat obi nyutob, nyak ta gamo nyudukemesh nyunek ihishmori eshudok wosik atin nyugipesh arudok aborir kabi yeyabigen gani iruhw yoduhw um.” <sup>6</sup> Aria douk enyudok mour pris Jisas neneken iri, enyen douk dedeben abom nyeshagrakuk agundok atapimi pris heneken iri mour. Shopunek enyudok Iruhin neneken iri namunyi abom adurin atinyi baraen kontrak douk nyeshagrakuk abom nyarik iri. Enyudok namunyi kontrak douk Jisas nape orokohun um apak mani Iruhin aria nape nataurumap. Enyudok namunyi kontrak douk nyeshagrakuk abom nyarik iri. Um maresh? Baugenylum enyen douk nyakri adurin atinyi baraen um apak ta mupe wosik abom.

### *Enyudok Namunyi Adurin Atinyi Abom Baraen Kontrak Douk Nyeshagrakuk Abom Nyarik Iri Kontrak*

<sup>7</sup> Douk ta nyarik iri kontrak yopin abom akure, aria Iruhin ta mare watak nukop namunyi uwe, uwok. <sup>8</sup> Aria Iruhin natik ananish arpesh aria nakri yoweishi inahos douk shapenyesh. Aria nakri namudok, nakri,  
“Eik Debeiwé iri douk yakri,  
Nyutob ta butogur um eik ini eshesh Israel  
aria Juda ta mupe atugun  
aria mubo baraen um eikin namunyi adurin atinyi baraen kontrak.”  
<sup>9</sup> Enyudok namunyi kontrak  
ta mare nyudukem enyudok seiwok yani esheshish popehesh yamehesh meneken iri, uwok.  
Eshudok douk abudok nyutob yaraeshi agudok nahobig Isip aria yarik-umeshi manaki iri.  
Yaraeshi aria madae shugipeshen wosik uwe  
enyudok nyarik iri kontrak.  
Namudok aria yatanam yekeshuk agab.  
Eik Debeiwé iri yakri namudok.  
<sup>10</sup> Eik Debeiwé iri yakri kweipon anab butograri iri nyutob,

eik ta ini eshesh Israel  
ta miyagwreh mubo enen eikin adurin atinyi baraen kontrak. Baraen  
enyudok,  
‘Eik ta eiyur ihinyumorim eikin lo nyupe esheship urkwip  
aria shopunek ta inyem nyupe numun esheshiruh aparuh.  
Inekesh namudok  
aria eik ta ipe esheshin Iruhin  
aria eshesh ta shupe eikish arpesh.

<sup>11</sup> Aria abudok nyutob, eshesh ta mare watak shukitak  
shunek skulum um enesheshesh aturub warub um  
o atup awirop um shudukemesh um eik Debeiwé iri, ta uwok.  
Um maresh? Ihishmorim nyeiguhw wokeshi arpesh shuni  
nyeiguhw shato iruhw iri ta shudukeme iri atish.  
<sup>12</sup> Um maresh? Eik ta inek gihau mesh ikweshihuk  
esheshish shenekesh iri yoweishi inahos  
aria mare watak urkum murumesh, uwok.’”

<sup>13</sup> Enyudok baraen, Iruhin douk nakripap um enen namunyi adurin  
atinyi baraen kontrak. Aria namudok douk neyabigap um nakri nyarik iri  
kontrak douk apak magipeshen iri, enyen douk mour woken. Ipak douk  
padukemesh. Ihishmori eneshenesh seiwokishi jugwaishi eshudok, eshesh  
douk mour wokeshi aria hurukatin abom um ta shunak shuwishuk.

## 9

### *Seiwokimi Debeimi Pris Douk Apa Henek Ofa Um Mahishibor Owishibor Hako Iruhin*

<sup>1</sup> Enyudok nyarik iri adurin atinyi baraen kontrak douk Iruhin nani  
ananish arpesh shabo baraen-umen iri, enyen douk nyakri enen lo um  
shugipeshen shunek lotuman iri. Enyudok kontrak nyakripesh um anat  
shunek lotuat iri urupat douk shopunek agundok atapishi arpesh sharukat  
iri. <sup>2</sup> Shosop anat selit urupat meyoh. Mape marik iri rum um atudok selit  
urupat douk shuhwaram, “Iruhin Ananim Atum Rum.” Eshudok shakus  
numun amudok rum iri douk eshudok. Lam nyani tebol aria atudok bret  
douk shako Iruhinat iri. <sup>3</sup> Amudok mape mariki aria mape magiguk iri  
douk shahwaram, “Iruhin Ananim Atum Abom Yopuyopumi Rum.” Aria  
orokohun um epudok biyep rip douk shawaur anah debeihí amaenyihi  
rupah hadiyogurep. <sup>4</sup> Amudok magiguk abom iri rum douk enen alta  
sheneken gol iri nyeyotu. Amam pris apa howem enen paura henye  
aria henek yopuri unar um. Enyudok alta nyani anas bokis shenekas gol  
iri shakus. Numunis um asudok bokis douk shor eshudok eneshenesh.  
Biyobor beriyaibori utabor douk seiwok Iruhin nowem ananin adurin  
atinyi baraen kontrak nyetemabor, bani Eron ananim butum manareh  
marpak namusi shus iri aria anagun worigun douk shahwaresh um mana\*  
iri. <sup>5</sup> Iruhis um asudok bokis douk shenek biyesh kapraigiyohos shapenyesh  
iri eshudok kabi enselahos um shape. Eshudok biyesh douk sheyotu  
shagraeh um agundok Iruhin naope aria natrugun abom um. Eshesh douk  
shenekesh sheyotu shayawiyom asudok bokis. Iruhisum asudok bokis  
douk agundok Iruhin apa nenek gihau mesh arpesh aria nakweshih esheshish  
yoweishi inahos um. Aria douk ta mare ipe iwerekesh-umep abom um  
eshudok, uwok.

\* **9:4:** Agundok worigun shawaragun um mana iri, eshesh douk seiwok Iruhin nako eshesh Israel  
abudok nyutob shape sharahaen wehigunum um. Tik Kisim Bek Septa 16.

<sup>6</sup> Douk shenek eshudok shape esheshiyu outumeb namudok iyoh, aria iih nyumneh amam pris apa hawish hape henek mour numun. Henek witogur amudok mape marik iri atum rum henek amamin mour douk Iruhin nakomen iri. <sup>7</sup> Aria amudok numunim abom rum douk debeini pris atun apa nanak nawish. Ihish kwarahos douk atuh nyumnah meyoh apa nenek wish togur amudok rum. Nawish um douk madae nuwish meyoh atin, uwok. Nasuhw mahishibor owishibor douk nawish nenek ofa-mobor nako Iruhin. Sagomatin douk narik nenekuman ofa Iruhin, um Iruhin nukweshih ananish nenekesh iri yoweishi inahos ba iyoh aria arpeshin ofa kadak. Nagiguk nenekenyu-mesh um Iruhin iri ta nuneguk esheshish yoweishi inahos douk shorshor aria shenekesh iri. <sup>8</sup> Douk shape shenekesh namudok aria Iruhin ananin Mishin douk nyeyabigap namudok. Atudok selit urupat watak teyotu aria amam pris hawish henek mour amudok adukim rum obi nyutob, ahudok yah um muwish munak hurukatinym agundok Iruhin napeum douk watak hunejik uwe, uwok. <sup>9</sup> Atudok selit urupat, atat douk anar aborir meyoh teyabigap um enyudok douk nyatograri iri lotuin mour. Atat douk teyabigap namudok. Arpesh apa shawish shakon meyoh yopishi eneshenesh um eshudok Iruhin aria shopunek shenek ofa um mahish shakon. Shenek enyudokmori, aria enyen douk madae nyugapesh eshudok shenek lotu iri esheshigunum numun yopuyopugun abom uwe, uwok. Eshesh douk watak urkwip porum esheshish shenekesh iri yoweishi inahos. <sup>10</sup> Enyudok douk shagipesh lo meyoh um shishoh iri worigun aria abar o eneheneh aih douk shugipesheh um hunekeh shutogur yopish um. Enyudokmori douk nyakrium adukiruh um yegeshiweruh meyoh. Iruhin nekeshuk enyudok lo um shugipeshen arigaha aria watak nunek namuhi yah. <sup>11</sup> Douk, Krais nanaki natogur debeini abom pris aria nape nataurum um yopishi eshudok douk shatogur jurug shape iri.<sup>†</sup> Anan douk nanak nawish atudok adurit abom selit urupat. Atat douk teshagrakuk abom atudok seiwokit urupat tatao agundok atap iri. Atudok adurit urupat douk madae arpesh shurukat esheshis wis uwe, uwok. Um maresh? Atat douk madae tutao agundok atap iri uwe. <sup>12</sup> Krais nanak nawish atudok urupat, nawish amudok Iruhin ananim atum abom rum. Nawish atuh meyoh aria jurug. Nawish aria madae nusuhw memehosibor o nugaesh kauhosibor owishibor nuwish nunek ofa nuko Iruhin uwe, uwok. Anan douk nawish aria nenek ofa um anan kanak ananibor owishibor nako Iruhin. Nenek ofa aria nator apak nakweshihap um apakish menekesh iri yoweishi inahos um mupe wosik abom iih nyumneh. <sup>13</sup> Seiwok, ta Iruhin nutik enesh arpesh aria nukri eshesh shanabosusih um, eshesh apa shenek eshudok um. Amam pris ta hukitak hubo shuworuhishi bulmakauhos shuni memehos aria husuuh owishibor. Aria hunak huhuri argabus um enyudok aragokwin kau douk haen hashainyeh niyh hanin hanyahuk iri aria hunaki hiyournabas um owishibor. Hiyournabas ba iyoh aria hubusiyarik eshudok shanabosusih iri arpesh. Amam henekesh namudok um Iruhin nutik aduk yegeshiweruh meyoh yopuruh aria nukri eshesh wosik yopish jurug. <sup>14</sup> Aria Krais ananibor owishibor douk beshagrakuk abom ehudok harik iri aih. Enyudok Iruhin ananin Mishin nyape iih nyumneh iri nyakon dodog aria nakon anan kanak um Iruhin kabi enen ofa um. Anan douk madae nunek enesh yoweishi inahos shupenyan uwe, uwok meyoh. Douk namudok aria shan ananibor owishibor bakwrupukuk abom apak menekesh iri yoweishi inahos. Aria apak urkwip porum apak douk madukemesh um apak madae

<sup>†</sup> 9:11: Enesh shakri enyudok baraen douk nyakrium yopishi eshudok douk kweipon ta shutograri iri.

enesh yoweishi inahos shupenyap uwe, uwok. Nataurumap namudok um apak mare watak munek yoweishi inahos aria shop mugok, uwok. Aria apak douk mupe munek anudok Iruhin douk nape iih nyumneh iri ananin mour.

### *Krais Ananibor Owishibor Douk Benek Namunyi Kontrak Nyatogur Dodogowin Abom*

<sup>15</sup> Krais ananibor owishibor douk benekap yopup aria apak makri wosik um munek Iruhin ananin mour. Namudok aria anan Krais douk nape orokohun um apak mani Iruhin um nunek enyudok namunyi dodogowinyi bareaen kontrak nyutogur dodogowin. Krais nenekesh namudok um iih nyumneh arpesh douk shumnek um Iruhin nahwaresh um shunaki shugipeshan iri, eshesh wosik ta shunaki shuwish shupe wosik abom iih nyumneh. Kabi riguk Iruhin nakri adur atin um ta nukrip ananish arpesh shupe um. Um maresh? Krais douk nagok nator arpesh nakweshiheshuk um yoweishi inahos douk shenekesh abudok seiwokib nyutob watak shape shagipesh enyudok nyarik iri kontrak obi nyutob. <sup>16</sup> Ta enen arpen nyukri enen dodogowinyi bareaen aria nyunyem anap shup um kupainyi ta nyirao enyenyen eyshudok eneshenesh abudok nyutob enyen nyugokuk obi nyutob, enyudok kupainyi ta mare arigas nyurao eyshudok, uwok. Ta arigaha enyudok nyugokuk aria enyudok enen ta kadak nyuwish nyiyotu nyunaraesh. <sup>17</sup> Umum maresh? Enyudok dodogowinyi bareaen douk madae dodogowin um nyunek enyudok enen arpen nyunraao eyshudok abudok nyutob nyugremesh iri watak nyupe um. Aria ta enyen nyugokuk ba iyoh, aria enyudok dodogowinyi bareaen douk wosik dodogowin um enyudok enen arpen nyuwish nyiyotu nyunaraao eyshudok eneshenesh. <sup>18</sup> Aria douk namudok atin. Enyudok nyarik iri kontrak douk madae nyutogur dodogowin meyoh uwe, uwok. Amam douk habo mahish shagok owishibor batourak aria beneken nyatogur dodogowin atin. <sup>19</sup> Seiwock Moses douk narik nakripesh ihinyumorim bareaen nyetem Iruhin ananin lo iri. Nakripeshaen iyoh aria nahuri nugaesh bulmakaushos-ibor owishibor aria nabadigobor um abar. Aria noweshik sipsipirub ehirub douk sheshereh-arub owishibor-iti beit iri um onok nyeigurik um enyudok shokwinyi rowog um hisop aria nakutish owishibor. Nakutish douk natuki owishibor aria narik neyarik anabor karowibor um okwudok Buk Iruhin ananin lo nyetemok iri. Aria arpesh kadak nagiguk neyarik-aboresh. <sup>20</sup> Nape nenek enyudok obi nyutob, anan douk nakripesh namudok nakri, "Abrudok owishibor douk benek enyudok kontrak seiwock Iruhin nakri abom um ipak pugipeshen iri nyatogur dodogowin atin." <sup>21</sup> Aria namudok atin. Moses neyarik anabor owishibor um atudok Iruhin ananit selit urupat tani ihishmorim eyshudok douk shokwish um shunek lotu um. <sup>22</sup> Aria douk adur atin. Kabi lo nyakrium, apak douk owishibor atubor apa benek hurukatin um ihishmori eyshudok shatogur yopish. Ta mare shubo enesh eyshudok mahish shugok aria owishibor butourak um, Iruhin ta mare nukweshihuk esheshish shenekesh iri yoweishi inahos, uwok.

### *Krais Nene Ofa Nakon Anan Kanak Um Iruhin Aria Nakweshihuk Apak Arpesh Menekesh Iri Yoweishi Inahos*

<sup>23</sup> Atudok selit urupat tani eneshenesh shakusat iri, eshesh douk anaguh aboriguh meyoh um adurishi eyshudok shakus iruhw heven iri. Iruhin nakrip amam pris um amam ta husuhw mahishibor owishibor um hunek eyshudok shutogur yopish. Aria ahudok yah apak munak muwish iruhw heven um, Iruhin nakri namudok, "Ahudok yah ta hupe hutik um enen yopunyi ofa douk nyeshagrakuk abom enyudok nyarik iri. Hape hatik um

enyudok ofa um nyunekah hutogur yopuh.” <sup>24</sup> Aria Krais douk madae nunak nuwish Iruhin ananit urupat douk arpesh meyoh sharukat iri uwe, uwok. Madae nuwish atudok urupat douk tape anar aborir meyoh um atudok adurit urupat tatao iruhw heven iri uwe, uwok. Anan douk nanak nawish abom um iruhw heven. Aria douk nanak nape agundok Iruhin napeum, nape nenek beten narigan um nutaurum apak. <sup>25</sup> Seiwoh ihish kwarahos, abom debeinei pris apa nasuhw mahishibor owishibor aria atuh nyumnah apa nenek wish togur amudok “Iruhin Ananim Atum Abom Rum.” Nawish nape nenek ofa-mobor nako Iruhin. Abrudok owishibor douk madae anan kanak ananibor uwe, uwok. Aria Jisas madae nunekesh namudok uwe. Madae nuwish heven nunek ofa sabaih atih uwe, uwok. Nawish atuh meyoh aria nenek ofa nakon anan kanak um Iruhin. <sup>26</sup> Aria douk nunek ofa sabaihi atih akure, aria anan ta numnek eriger sabaih atih um seiwoh Iruhin nakwarum agudok nahobig um arigaha douk. Aria uwok. Douk abudok nyutob hurukatin um hagiguk iri nyumnah um, aria Krais natogur agundok atap. Natograri atuh meyoh um nunek ofa nukon anan kanak Iruhin um nukweshihuk arpeshish yoweishi inahos. <sup>27</sup> Ihishmorim arpesh ta shugok atuh meyoh aria ta wata shukitak shiyotu um Iruhin ananit debeiti kwot. <sup>28</sup> Aria Krais douk namudok atin. Anan douk nenek ofa nakon anan kanak um Iruhin atuh meyoh um Iruhin nukweshihuk sabaishi arpeshish yoweishi inahos. Aria anan wata nutograri anah shopunek. Nutogur obi nyutob, anan ta mare nukweshihuk arpeshish yoweishi inahos, uwok. Anan ta nutogur um nurao eshudok douk shape satrugun-uman iri um shutanamori shupe wosik abom.

## 10

### *Seiwokin Ofa Amam Pris Heneken Iri Douk Madae Dodogowin Um Nyukweshihuk Arpeshish Yoweishi Inahos Uwe, Uwok*

<sup>1</sup> Apak madukemesh um enyudok lo seiwoh Iruhin nakoguk Moses um, enyen douk nyeyabigap anar aborir meyoh um adurishi yopishi eshudok eneshenesh douk ta shugiguk shutograri iri. Eshudok seiwokishi douk madae adurish iri uwe, uwok. Douk namudok aria enyudok lo nyakri amam pris ta hunek enyudokmori atin ofa um ihish kwarahos. Namudok aria douk madukemesh. Enyudok lo douk madae wosik um nyugapesh eshudok arpesh douk shanaki hurukatinyum shunek lotu um Iruhin iri uwe, uwok. <sup>2</sup> Ta shugipesh lo aria sheneken iri ofa nyunekesh shutogur yopish akure, eshesh ta mare watak shunek ofa shopunek, uwok. Douk atin ofa meyoh nyenek eshudok shenek lotu iri shutogur yopish abom akure, aria esheship urkwip ta mare watak purum esheshiph yoweishi inahos, aria uwok. <sup>3</sup> Aria ihish kwarahos eshesh apa shenek enyudokmori ofa aria enyen nyape um nyeyabigesh esheshish yoweishi inahos iih nyumneh. <sup>4</sup> Um maresh? Ababish bulmakauhos shani memehosibor owishibor douk madae wosik um bukweshihuk esheshish yoweishi inahos shunakuk uwe, uwok meyoh.

<sup>5</sup> Namudok aria abudok nyutob Krais nakri um nunaki agundok atap obi nyutob, anan douk nakrip Iruhin nakri,  
“Nyak nyakri uwok um shubo mahish

o shurauri eneshenesh eshudok shunaki shunek ofa shuken um, nyakri uwok.

Aria nyak douk nyenekesh nyugamohw-ume um onohw yegenyihw hwakusume um ta watak nyukeyohw.

<sup>6</sup> Nyak douk madae nyunadudareh um shishaisheh iri mahish shani

eneshenesh douk shenek ofamesh um nyak nyukweshihuk esheshish yoweishi inahos iri uwe, uwok.

<sup>7</sup> Aria douk yakri, 'Iruhin tiki.

Eik enyudok yanakumori igipesh nyakim urkum.  
Kabi seiwok howem baraan nyetem nyakik Buk  
aria nyakrium eik iri.'

<sup>8</sup> Aria ipak putik. Sagomatin, Krais douk nakri, "Nyak nyakri uwok um shubo mahish o shurauri eneshenesh eshudok shunaki shunek ofa shuken um nyukweshihuk esheshish yoweishi inahos, nyakri uwok. Nyak douk madae nyunadudareh um shishaisheh iri mahish shani eneshenesh shenek ofamesh um nyak iri uwe, uwok." Aria lo douk nyakri eshesh ta shunek ofa namudok. <sup>9</sup> Douk nakriyuk enyudok aria watak nagiguk nakri, "Iruhin tiki. Eik enyudok yanakumori igipesh nyakim atum urkum." Aria namudok Iruhin douk napotiguk harik iri yah um munek lotuman um aria neneukumap namuhi um apak mugimeh aria mugipesh ananum urkum um. <sup>10</sup> Jisas Krais nagipesh Iruhin ananum urkum aria nene ofa nakon anan kanak um Iruhin. Douk nenek enyudok atuh meyoh aria nenekap matogur yopup abom mape Iruhin ananipari atup.

### *Krais Ananin Ofa Douk Wosik Abom Um Nyukweshih Apakish Yoweishi Inahos*

<sup>11</sup> Amam ihm pris, iih nyumneh amam apa heyotu hape henek Iruhin ananin mour. Amam apa henek enyudokmori atin ofa sabaihi atih. Aria enyudok ofa douk madae dodogowin um nyunek arpeshish yoweishi inahos shunakuk uwe, uwok. <sup>12</sup> Aria Krais douk nenek atin ofa meyoh um nakweshihuk arpeshish yoweishi inahos aria enyudok ofa douk dodogowin atin um nyupe iih nyumneh. Douk nakweshihuk enyudok nyatuh aria nanak nape agundok Iruhin ananin yopunyi rogur ehahum aria nyeigur nyatouman abom iruhw. <sup>13</sup> Nanak nape arigah arigaha douk nape natrugin um Iruhin nunek uhwin um anan Krais ananish horim aria anan Krais netem iruhumesh. <sup>14</sup> Eshudok arpesh douk apa neneke shatogur anan Iruhin ananish atish abom, Jisas douk neneke shatogur yopish abom um enyudok atin ofa aria ta shupe namudok atin iih nyumneh.

<sup>15</sup> Iruhin ananin Mishin douk shopunek nyarik nyakripep baraan namudok. Sagomatin douk nyakri,

<sup>16</sup> "Debeini nakri,  
'Kwepon anab butograri iri nyutob,  
eik ta ini eshesh muweshik enen adurin atinyi baraan kontrak. Baraan enyudok.

Eik ta iwem ihinyumorim eikin lo nyupe esheship urkwip  
aria shopunek ta inyur nyupe numun esheshiruh aparuh.'

<sup>17</sup> Aria Debeini watak shopunek nagiguk nakri enyudok shopunek nakri,  
"Eik ta mare watak urkum mur um  
esheshish eneshenesh yoweishi inahos, uwok."

<sup>18</sup> Namudok aria ta Iruhin nenegek apakish yoweishi inahos um, namudok douk mour madae enen uwe um watak munek ofa aria Iruhin nukweshihuk apakish yoweishi inahos um, uwok.

### *Apak Ta Musuhw Krais Ananin Baraan Dodog Abom Aria Munak Hukukatin um Iruhin*

<sup>19</sup> Ekish arpesh, Jisas ananibor owishibor douk bakweshihuk apakish yoweishi inahos. Namudok aria douk apak wosik dodogowip abom um munak muwisch amudok Iruhin Ananim Atum Abom Rum, muni anan

miyagwreh aria mare munogugur, uwok. <sup>20</sup> Yah mugimah muwish um douk ahudok namuhu yah ta mugipesah aria mupe wosik iih nyumneh um. Ahudok yah douk Jisas anan kanak nenenkah um naworish debeihi rupah aria nawish. Ahudok rupah douk ananihw yegenyihw. <sup>21</sup> Aria douk, apak anan debeihi pris abom, douk nape debeihi um Iruhin ananish arpesh iri. <sup>22</sup> Douk namudok aria apak ta munak huruk um Iruhin. Munak hurukatin um anan obi nyutob, apak douk munek enyudokmori. Ta mukutukuk eneheneh rohwih aih mugipeshan wosik aria musuhw ananin baraeen dodog um mudukemesh abom um ananin baraeen douk adurin. Apak ta urkwip purum Krais um agundok nakwrup apakiruh aparuh ananibor owishibor aria nenekap yopup um. Nenekap enyudok aria apakip urkwip madae pur um enesh apakish yoweishi inahos uwe, aria mukri apak douk munek yoweishi inahos, uwok. Aria shopunek munek urkum um anan douk nakrupap yopupbari abom abar aria matogur yopup. <sup>23</sup> Apak apa makripes yopugunum um apakin bilip nyani yopishi eshudok eneshenesh douk madukemesh abom um ta mutrish shutogur iri. Aria enyudok apak ta musuwen dodog abom aria mare mukri munogugur mutatigos, uwok. Um maresh? Apak douk madukemesh. Ihishmori eshudok Iruhin nakri adur atin um ta nunekeh iri, anan adur ta nunekeh um atin. <sup>24</sup> Apak ta munek urkwip aria murim yeh um munagapesh aria muhur kupaishi esheshiruhu aparuh um eshesh urkwip punawasham kupaishi aria shunekumesh yopipi aih. <sup>25</sup> Aria apak Iruhin ananishi arpesh, apak mare mukutukuk ehudok aih um munak munatorum mupe atugun um, uwok. Mare munekesh kabi enesh shenekesh um, uwok. Ipak douk padukemesh. Nyumnah Krais nutanamori ahi douk hurukatin. Namudok aria apak atin atin ta mupe dodogowip atup um muhur kupaishi um shiyotu dodogowish. Apak douk mutaurumesh mishagrakuk kabi marik mape mataurumesh um.

### *Apak Mare Mukonaguk Agabus Iruhin Ananin Nuganin, Uwok*

<sup>26</sup> Mnek, ta apak madukemesh um Krais ananin adurinyi baraeen aria watak munak abom mugipes apakip atip urkwip aria mupe um munek yoweishi inahos namudok atin um, aria apak ofa douk madae enen shopunek uwe um ta nyukweshihuk apakish yoweishi inahos, uwok. <sup>27</sup> Aria ta apak mupe um munek yoweishi inahos namudok atin um, apak douk ta munogugur abom aria mupe mutrugun um atudok debeiti kwot tuni ahudok juwehosih atihi nyih. Ehudok nyih douk hanu hape hatik um Iruhin ananish horim um hunish. <sup>28</sup> Apak madukemesh. Seiwock meinyi arpen nyubrig lo Iruhin nako Moses iri um aria biyesh o biyesh atin arpesh shutrin shuwerehen um, aria eshesh douk mare shunek gihauum enyudok arpen uwe, uwok. Eshesh ta shen nyugok um atin. <sup>29</sup> Namudok aria ipak pakri mumam, um arpesh douk shukon agabus Iruhin ananin nuganin iri? Eshesh douk ta shurao debeiniyamaen shishagrakuk eshudok seiwock shabrig Iruhin ananin lo ba shareen iri. Krais ananibor owishibor douk benek enyudok Iruhin ananin adurin atinyi baraeen kontrak nyatogur dodogowin. Abrudok owishibor douk benek eshudok arpesh yopish shape Iruhin ananish atish. Aria eshudok arpesh watak shenek abrudok owishibor batogur enesh rohwish muguhwos eshudok. Aria eshesh douk shanumogesh Iruhin ananin Mishin douk nyataurumap meyoh iri. <sup>30</sup> Apak douk madukemesh. Iruhin nakri, "Shuwanamesh yoweishi inahos um, enyudok eikin mour. Eik kanak ta iwanamesh esheshish yoweishi inahos." Aria watak shopunek nakri, "Debeini anan kanak ta nuneck skelimum ananish arpesh um debeiti kwot." <sup>31</sup> Ta anudok dodogowini abom Iruhin

nunasuhw enen arpen ananis wis aria nukri nuwanamen enyenyish yoweishi inahos um, enyudok douk apak ta munogugur abom iri.

### *Apak Ta Musuhw Iruhin Ananin Baraen Aria Miyotu Dodogowip*

<sup>32</sup> Ipak watak urkwip purum rigukib nyutob. Abudok nyutob, ipak douk pemnek Iruhin ananin baraen padukemen kabi ananit yoputi lait tabuhumep um aria panadudareh pasuhwen wosik. Abudok nyutob apa shekep enyenenen debeinyi amaeen parao debeiri eriger, aria ipak peyotu dodogowip abom atip paen nyabuhuk. <sup>33</sup> Anob nyutob douk sheposop peyotu, ihishmorim shape shatrip aria shenekep enyenenen parao debeiri eriger. Anob nyutob douk pani' arpesh shasah enyudokmori amaeen iri panosupom aria pataurumesh. <sup>34</sup> Abudok nyutob ipak enesh shonoweshik shape shunuweshik-ati urupat obi nyutob, ipak douk penek gihaumesh aria panak pataurumesh penekumesh yopinyi. Shopunek abudok nyutob kupaishi shasuhwep dodogeshish shanatrip ipakish eshudok eneshenesh obi nyutob, ipak douk panadudareh pape patrish meyoh aria shanashuhur. Um maresh? Ipak padukemesh um enesh yopishi abom eshudok enesh-enesh ta shukus ihih nyumneh iri douk shakusumep. Eshesh douk yopishi abom sheshagrakuk eshudok shatrip shanashuhur iri. <sup>35</sup> Douk namudok aria yakri ipak piyotu dodogowip atip abom aria mare pukri pukutukuk ipakin bilip, uwok. Ipak ta pusuhwen dodog abom. Um maresh? Ipak kweipon ta purao debeinyi yopiyopinyi abom poe. <sup>36</sup> Ipak ta piyotu dodog abom um pugipesh Iruhin ananim urkum. Punekesh namudok aria ta purao yopishi eshudok eneshenesh douk Iruhin nakri jurug adur atin um ta nukepesh iri. <sup>37</sup> Adur, mare roubi uwe, kabi Iruhin ananik Buk kwakri um,

“Anudok arman douk nakri um nunaki iri ta nunaki.

Ta mare apa nunek pirapirak nupe, uwok.

<sup>38</sup> Aria eikin yopunyi arpen ta nyusuhw eikin baraen dodog nyugipeshen aria ta nyupe wosik.

Aria ta enyen nyukri nyutotigos nyutanam um,  
eik ta mare inadudareh-umen, uwok.”

<sup>39</sup> Aria apak douk madae kabi enesh eshudok arpesh douk shatotigos shatanam aria shanak shawishuk iri uwe, uwok. Apak douk masuhw Iruhin ananin baraen makri adurin aria douk narap matanamori um mupe wosik abom ihih nyumneh.

## 11

### *Baugenyum Baraen Um Bilip*

<sup>1</sup> Baugos um agundok munek bilip um Iruhin um douk namudok. Apak madukemesh abom um Iruhin ta nukop atugun um yopishi eshudok eneshenesh douk nakri adur atin um ta nukopesh iri um. Eshesh douk adur watak mutrish uwe. Shopunek baugeneyum um douk nyakri. Aria Iruhin nukri um enesh eshudok eneshenesh ta shutogurum, apak adur watak mutrish apakis nabes uwe, aria eshesh adur ta shutogurum atugun.

<sup>2</sup> Seiwokimi amam douk hasuhw Iruhin ananin baraen dodog hagipeshen wosik. Douk Iruhin natrum namudok aria nanadudareh-umam nahwaram yopumi armam.

<sup>3</sup> Apak douk masuhw Iruhin ananin baraen dodog makri adurin. Namudok aria madukemesh um anan douk nakwarum iruhw aria atap nani arpesh um agundok neyagwreh ananin baraen atin um. Namudok aria eshudok eneshenesh matrish iri douk nakwu eshudok madae mutrish iri uwre aria nenekeh.

*Abel Nani Enok Aria Noa Douk Hasuhw Iruhin Ananin Baraen Dodog Hagipeshen*

<sup>4</sup> Abel douk nasuhw Iruhin ananin baraen dodog nagipeshen wosik. Namudok aria anan douk nanaki nene ofa um yopishi eshudok enesh-enesh nako Iruhin. Eshudok nako Iruhin um douk yopishi sheshagrakuk eshudok Kein nene ofamesh nakoneshi. Douk Iruhin natik ananin bilip aria nahwaran yopuni arman. Um maresh? Iruhin douk natik eshudok naraeshmoran anan Iruhin iri aria nahwaresh yopishi. Abel douk seiwok nagok. Aria ehudok ananish yopihi aih douk wata hape heyabigap um agundok menek bilip um.

<sup>5</sup> Enok douk nasuhw Iruhin ananin baraen dodog nagipeshen wosik. Namudok aria anan madae nugok uwe. Iruhin naran nato iruhw heven. Arpesh shape shauriman, aria madae shuparugan uwe, uwok. Um maresh? Iruhin douk naran. Iruhin ananik Buk douk kwakri abudok nyutob Iruhin madae nurao Enok obi nyutob uwe, anan Iruhin natik Enok ananish aih um douk nanadudareh-uman. <sup>6</sup> Aria enen arpen madae nyusuhw Iruhin ananin baraen dodog nyugipeshen wosik um, namudok enyen ta mare ddogowin um nyunekan nunadudareh, uwok. Namudok aria meinyi arpen douk nyukri nyunak hurukatin um Iruhin iri, enyen ta nyukri Iruhin adur nape aria apa nenekumesh yopinyi eshudok arpesh douk shapeum shauriman iri.

<sup>7</sup> Noa douk nasuhw Iruhin ananin baraen dodog nagipeshen wosik. Namudok aria Iruhin nakripa nadukemesh um enyudok amaaen douk ta nyutogur iri. Enyen douk madae nyutogur nutrin uwe, watak. Namudok aria Noa nasuhw Iruhin ananin baraen nagipeshen aria nakitak nene onok debeikwi korohuk. Nenek aria anan nani armatok aria batowish shawish shape wosik aria enyudok amaaen madae nyutogrumesh uwe, uwok. Noa douk nasuhw Iruhin ananin baraen dodog nagipeshen wosik. Namudok aria enyudok douk neyabig ihish doukish atapishi arpesh um eshesh douk shenek yoweishi inahos um agundok madae shumnek Iruhin um uwe. Noa nene bilip um Iruhin. Namudok aria Iruhin nahwaran yopuni arman kabi anan apa nenekesh um eshudok apa shasuhw ananin baraen shakri adurin iri.

*Abraham Nani Sara Douk Shasuhw Iruhin Ananin Baraen Dodog Shagipeshen Wosik*

<sup>8</sup> Abraham douk nasuhw Iruhin ananin baraen dodog nagipeshen wosik. Namudok aria abudok nyutob Iruhin nahwaran um, Abraham douk nagipesh anan Iruhin ananin baraen aria nakutukuk ananibur wabur nanak um anab amnab. Nanak um abudok amnab douk Iruhin nukri um ta nukonab butogur ananib abom iri. Abraham nakitak nanak aria anan madae nudukem um agundok douk ta nunak nupe um uwe, uwok. Aria anan douk nasuhw Iruhin ananin baraen nakri adurin aria nanak.

<sup>9</sup> Anan douk nasuhw Iruhin ananin baraen nagipeshen aria nanak nape abudok amnab riguk Iruhin nakri adurin atinyi baraen um ta nukonab iri. Nanak nape agundok kabi anan kupaiabi amnabin nanak napeum. Aria narok selig urusag napenyog nanak. Nani Aisak iri Jekop. Enyudok adurin atinyi baraen Iruhin nakrip Abraham um nukon amnab um douk shopunek nakriyen nyanak um Aisak iri Jekop. <sup>10</sup> Abraham douk nasuhw enyudok baraen aria nape natrugun um abrudok debeiburi abom wabur. Abrudok wabur douk Iruhin meyoh nape aria urkum morum agundok ta nurukog-abur bupe mumam um aria douk narukog-abur bape dodog abom iih nyumneh iri.

<sup>11</sup> Abraham anan douk ruwogin. Ananik irohukwik Sara shopunek ruwogik aria shopunek douk kwape kupik. Aria anan douk nasuhw Iruhin ananin baraan dodog nakri adurin aria Iruhin nakok dodog Sara aria kwabuki anan nuganin. Anan Abraham douk nadukemesh abom um Iruhin ta nunekumesh kabi riguk nakripesh adurinyi baraan um.

<sup>12</sup> Abraham douk ruwogin abom hurukatin um nugok, aria anan douk nakwarmori sabaishi barheshish shagiguk shakitak. Shakitak shatogur sabaishi abom kabi unib weir utag iri o kabi arukot takus anagas um youg iri. Arpesh douk madae wosik um shudarehesh uwe, uwok.

<sup>13</sup> Eshudok ihishmorim arpesh shasuhw Iruhin ananin baraan iri douk shape dodog arigah arigaha shagok. Abudok nyutob eshesh watak shape atap obi nyutob, eshesh douk madae shurao yopishi eshudok eneshenesh douk Iruhin nakri adur atin um ta nukeshesi iri uwe, uwok. Eshesh douk kabi sheyotu rougun meyoh aria shatigu yopishi eshudok eneshenesh aria shanadudareh um shutrish um. Aria eshesh shakri eshesh douk kupaibi amnabishi shanaki shape banab nyutob meyoh agundok atap. <sup>14</sup> Apak madukemesh. Arpesh shiyagwreh enyudokmori baraan iri, eshesh douk adur shakri um shutik anab esheshib adurib abom amnab. <sup>15</sup> Douk ta eshesh urkwip purum agudok nahobig douk sharik shakutuguk shanak iri, aria eshesh ta wata shatanam um abudok amnab. <sup>16</sup> Aria uwok. Eshesh douk madae urkwip purum abudok esheshib barik iri amnab uwe, uwok. Eshesh douk mishish shakitak abom um shurao abudok anab amnab. Abudok amnab douk yopubi abom beshagrakuk abudok barik iri amnab. Abudok amnab douk bape iruhw heven. Namudok aria Iruhin madae nunek baraan um agundok shahwaran esheshin Iruhin um uwe, uwok. Um maresh? Anan douk nenek garibog anabur wabur bapeumesh um shunak shupeum.

<sup>17-18</sup> Iruhin nakripan adurin atinyi baraan Abraham namudok nakri, "Sabaishi nyakish barheshish ta shukitak um anudok nyakin nuganin Aisak atun." Aria abudok nyutob Iruhin nakwiraeh Abraham aria nakripan um nubo anudok ananin atun nuganin nenek ofa nukon um, anan Abraham douk nasuhw Iruhin ananin baraan nakri adurin aria nakri wosik um nukon Aisak. <sup>19</sup> Abraham douk nenek urkum nakri, "Aria Aisak nugok um, Iruhin douk dodogowin um ta wata nunohur nukitak." Namudok aria enyudok adur um apak ta mukri, "Aisak douk nagok aria Iruhin wata nunohur nukitak aria nakonan."

### *Aisak Nani Jekop Iri Josep Douk Hasuhw Iruhin Ananin Baraan Dodog Hagipeshen Wosik*

<sup>20</sup> Aisak douk nasuhw Iruhin ananin baraan dodog nagipeshen wosik aria narig Iruhin um nunekumam yopinyi Jekop iri Iso um hupe wosik. Enyudok baraan douk nakripam um eshudok eneshenesh kweipon ta shutogramam iri. <sup>21</sup> Jekop namudok. Anan douk nasuhw Iruhin ananin baraan dodog nagipeshen wosik. Namudok aria abudok nyutob ruwogin abom aria nukri um nugok obi nyutob, anan douk madae dodogowin uwe. Namudok aria nanakusim neyotu, nowem barag ananim butum aria nakripamuk yopinyi baraan amudok Josep ananin biom nugamim um Iruhin nunekumam yopinyi. Aria shopunek nanakusim neyotu aria nenek lotu um Iruhin.

<sup>22</sup> Josep namudok. Anan douk nasuhw Iruhin ananin baraan dodog nagipeshen wosik. Namudok aria abudok nyutob hurukatinum nugok obi nyutob, anan douk nakriyuk nakri kweipon eshesh Israel ta shukutukuk Isip shunak. Aria shopunek nakripeshuk um agundok nugok aria ananish bishiguh ta shuraesh shunak shurumesh agundok eshesh shunak shupeum.

### *Moses Douk Nasuhw Iruhin Ananin Baraen Dodog Nagipeshen Wosik*

<sup>23</sup> Moses ananish amakenyish douk shasuhw Iruhin ananin baraen dodog shagipeshen wosik. Namudok aria abudok nyutob amakek kwabuki Moses obi nyutob, eshesh amakenyish douk shabeshukan nape biyab atun aub. Um maresh? Eshesh shatrun um anan douk yopuni nugarin abom aria madae shunogugur um shubrig anudok debeini king Fero ananin lo uwe, uwok.

<sup>24</sup> Moses douk nikitak yopun aria nasuhw Iruhin ananin baraen dodog nagipeshen wosik. Namudok aria anan douk nakri uwok um shuhwaran king Fero ananik nugawik okwokwin nugarin, nakri uwok. <sup>25</sup> Anan douk nakri nutanam um Iruhin ananish arpesh shusah enenyenen amaen. Nakri uwok um nuginpesh eneshenesh yoweishi inahos aria nunadudareh banab nyutob meyoh, uwok. <sup>26</sup> Anan douk neneck urkum aria nakri ta nurao abraen um agundok nusuhw Krais ananin mour um, nakri enyudok douk nyeshagrakuk abom ihish jah o utabor shakus Isip iri. Um maresh? Anan douk urkum morum enyudok ananin yopinyi poe douk Iruhin nakri ta nukonen iri. <sup>27</sup> Moses douk nasuhw Iruhin ananin baraen dodog nagipeshen wosik. Namudok aria nikitak nakutukuk Isip nanak. Eshesh Isip esheshin debeini king douk juwehosin um Moses, aria Moses douk madae nunogugur uwe, uwok. Adur, apak arpesh douk madae wosik um mutik Iruhin apakis nabes uwe, uwok. Aria Moses douk neyotu dodogowin atun kabi natik Iruhin abom iri um. <sup>28</sup> Moses douk nasuhw Iruhin ananin baraen dodog nagipeshen wosik. Namudok aria anan nakrip eshesh Israel shabo sipsipahos shatahesh shashoh ahudok nyumnah Iruhin nataurumesh shape wosik ahi. Aria sipsipibor owishibor douk shobrayok duahas um ensel ta nyubo Isip esheshim sagomim nugarim aria nyunaki aria nyishagrakuk mare nyubo anam eshesh Israel esheshim, uwok.

### *Sabaishi Israel Douk Shasuhw Iruhin Ananin Baraen Dodog Shagipeshen Wosik*

<sup>29</sup> Eshesh Israel douk shasuhw Iruhin ananin baraen dodog aria shadukemesh um Iruhin ta nataurumesh. Namudok aria nataurumesh shabrig youg nyeigur um Retsi kabi sharahaen shanak atap meyoh um. Aria abudok nyutob eshesh Isip shakri shugipeshesh obi nyutob, eshesh douk youg gwaesh gweyawi-yeshek.

<sup>30</sup> Eshesh Israel douk shasuhw Iruhin ananin baraen dodog aria shadukemesh abom um Iruhin ta nataurumesh nidigwur-umesh narub um abrudok wabur Jeriko. Namudok aria shape sheyor sharih narub um 7-poreih nyumneh arigah hatuh aria arbudok dodogo-irubi narub batu.

<sup>31</sup> Okwudok kweyotu yeh iri armatok Rahap, okwok douk kwasuhw Iruhin ananin baraen dodog aria kwataurum amudok biom douk hanabeshuk hanaki hatiguk abrudok wabur Jeriko iri. Douk namudok aria okwok kwape wosik madae kwuni shakon agabus Iruhin ananin baraen iri shugok uwe, uwok.

<sup>32</sup> Aria douk ta mare wata ikripesh um enesh shopunek, uwok. Nyutob batuh um ikripep um Gideon nani Barak iri Samson, Jepta, Devit, Samuel aria amudok amam profet. Nyutob uwok um ikripep um.

<sup>33</sup> Eshudok armam armago douk shasuhw Iruhin ananin baraen dodog aria shadukemesh um anan ta nataurumesh. Namudok aria enesh shabo sabaimi debeimi king hani amamin ami shakam agabus. Enesh shatogur jas aria shenek adurigwi kwotog shataurumesh shape wosik. Enesh sharao eshudok eneshenesh douk Iruhin nakri adurin atinyi baraen um ta nukeshesh iri. Enesh shogah nokwatog um eshudok wanohwishi mahish

laion. <sup>34</sup> Enesh shaboweh debeihi juwehosih atihi nyih hagok. Enesh sharuwok aria madae shubrei bainatog uwe. Enesh madae dodogowish uwe arigaha wata shutogur dodogowish abom. Enesh shanak shani esheshim horim sharpak aria shatogur dodogowish atish abom um wanogwiruh. Enesh shehiyah kupairubi warubish esheshin debeinyi ami sharuwok. <sup>35</sup> Enesh douk amakeniyu wata wanarao owowim nugamim douk hagok wata shopunek hakitaki. Enesh douk esheshim horim showeshikesh aria shanak shanunu esheshiruh yegeshiweruh abom arigaha shagok. Esheshim horim shakri ta eshesh shukanakuk agabus Iruhin um, eshesh ta wata shukweshihesh shunak. Aria eshesh douk shakamuk agabus um horim esheshin barea. Um maresh? Eshesh shakri ta horim shesh shugok um, eshesh ta wata shopunek shukitaki aria shupe wosik abom iih nyuneh shishagrakuk kabi sharik shapeum. <sup>36</sup> Enesh douk sharaoamaen um horim shenekesh enenyenen aria shawkumesh eshudok wanohwishi. Aria enesh shaesh shaprakesh senab aria showeshikesh shape shunuweshik-ati urupat. <sup>37</sup> Enesh horim shawkumesh utabor. Enesh shakwu so shenek so-umesh arigaha tukaresh um biyeh shagok. Enesh douk shaesh shagok bainatog. Enesh shor eshudok mahish sipsip iri memehosis yegeshiweruh-is um rupeh aria sharahaen shanak. Eshesh douk shatogur yaruhih abom. Kupaishi shekesh debeinyi amaen abom aria shenekumesh yoweishi aih abom. <sup>38</sup> Namudok aria douk shanabeshuk shanak yodururuuh hani agundok wehigunum arpesh uwok um. Shanak aria shanabeshuk shape shanak nuwagos o hurupiruh. Agundok atapishi arpesh douk yowesh abom. Namudok aria eshudokmori shenek bilip iri arpesh douk madae wosik um shuni eshesh shupe uwe, uwok.

<sup>39</sup> Eshudok ihishmorim arpesh douk shasuhw Iruhin ananin bareaen shakri adurin. Aria anan douk natrish nahwaresh yopishi arpesh. Aria nyutob eshesh watak shape atap obi nyutob, eshesh douk madae shurao yopishi eshudok eneshenesh uwe, douk Iruhin nakri adurin atinya bareaen um nukeshesh iri, uwok. <sup>40</sup> Um maresh? Seiwok Iruhin kanak neneh garibog um enen yopinyi abom enyudok um apak. Anan douk nakri uwok um eshudok seiwokishi arpesh shurik shutogur yopishi aria apak kadak, uwok. Anan douk nakri um apak muni eshesh ta mutogur yopup ahudok atuh.

## 12

### *Apakis Nabes Ta Sutak Supe Jisas Aria Musuhw Ananin Baraen Dodog Mugipeshen*

<sup>1</sup> Eshudok sabaishi shenek bilip iri seiwokishi arpesh douk sheyotu shersharihap kabi onog debeigwi orug aria sheyabigap agundok munek bilip um. Namudok aria apak ta mukutukuk ihishmori amaenyishi eshudok eneshenesh douk ta shenekap mare mahur dodogowip muni ihishumori showeshikap iri yoweishi inahos. Apakish mishish mare yowesh, aria apak ta dodogowip mahur asudok resis douk Iruhin nakri um apak mahuras iri um. <sup>2</sup> Apakis nabes ta sutak supe Jisas. Anan douk baugos um apakin bilip, aria ta nutaurumap musuhw Iruhin ananin bareaen wosik mutogur dodogowip. Jisas douk nadukemesh. Nakri ta nugipesh Iruhin ananin bareaen um, kweipon anan ta nupe wosik nunadudareh nuriguk. Urkum morum enyudok aria nape dodogowin atun nemnek debeiri eriger aria shan nagok neir kruse. Narao abraen um maresh? Arpesh shakri arpen nyugok nyir abom enen rowog kruse iri, enyen douk yoweiniy arpen abom aria nyaraao takweinyi abraen. Aria Jisas douk madae urkum yowem um ta

nurao enyudok abraen um uwe, aria shan nagok. Aria douk nepe yopunyi rogor ehahum enyudok Iruhin ananin debeinyi wagitur king ananin.

*Iruhin Douk Nahap Nenekop Wosik Um Murao Ananin Aih*

<sup>3</sup> Ipak douk urkwip gamo purum Jisas. Amam henek yoweishi inahos iri armam douk hatogur abom ananim horim anabik sik um anahaeh, aria anan neyotu dodogowin atun um amaen. Ipak urkwip purum enyudok aria mare pukri urkwip yowep aria arigehip um agundok piyotu dodogowip um bilip um, uwok. <sup>4</sup> Adur, ipak douk pani yoweishi inahos parpok abom, aria watak shep piyarik onobor owishibor uwe, uwok. <sup>5</sup> Ipak ta urkwip pukepukum um enyudok bareaen douk Iruhin nakriyen um nunekep pupe dodogowip um aka? Anan douk nahwarep ananishi batowish nakri, “Eikin batowin, aria Debeini nukri nuhen neneck skulumen um enesh eshudok um, nyak mare nyukri enyudok douk enen rohwin meyoh, uwok. Nyakihw apahw mare yowehw aria nyukri nahen nakwumen wagun aria nyumnek eriger um, uwok.

<sup>6</sup> Um maresh? Debeini apa naheesh eshudok arpesh douk anan urkum manawashamesh iri.

Aria ta nurao enen arpen nuhwaren ananin batowin um, anan apa nahaen neneck skulumen shopunek.”

<sup>7</sup> Abudok nyutob ipak pumnek eriger obi nyutob, ipak ta piyotu dodogowip pukri anan nakri nugabeyep. Anan douk nenekumep ehudok aih kabi yakenyim apa henekeh um amamish batowish haesh henek skulumen um. Ihish shape iri batowish, esheshim yakenyim douk apa haesh.

<sup>8</sup> Aria ihishmorim Iruhin ananish batowish apa naesh neneck skulumen um. Aria anan mare neneck skulumen um, aria ipak douk madae ananishi adurish batowish uwe, uwok. Ipak douk kabi birokish batowish um. <sup>9</sup> Ipak urkwip porum enyudok shopunek. Apakim yakenyim apa hap henek skulumen um. Aria apak ta mupe shakam abom um anudok Yain douk nasuhw apakish mishish iri. Munekesh namudok aria ta mupe wosik abom ihih nyumneh.

<sup>10</sup> Apakim yakenyim douk hap henek skulumen um. Aria Iruhin apa nap neneck skulumen um nutaurumap abom aria mudukem anan mupe yopupari abom. <sup>11</sup> Abudok nyutob meishi shukri shop shutaurumap um shugabeyap um, abudok nyutob douk mare munadudareh atin uwe, uwok. Memnek eriger. Aria eshesh shap shenek skulumen um jurug, aria apak ta munek yopihai aih aria aparuh hur wosik ba manadudareh.

*Apak Ta Dodogeship Atup Miyotu Dodogowip Um Bilip*

<sup>12-13</sup> Douk namudok aria ta ipakish roghuw shagok sheir meyoh um, ipak wata pishuhur punek Iruhin ananin mour. O ta ipakigas aiyas sagok seir meyoh um, nyenekesh. Ipak ta pikitak punek Iruhin ananin mour piyotu pugapesh ahudok durdurih yopuhi yah. Penekesh namudok aria ipakigas aiyas ta mare sugok abom, uwok. Ta wata shopunek dodogowigas.

<sup>14</sup> Ipak ta dodogowip atip um puni arpesh pupe wosik aria aparuh hur wosik. Shopunek ipak ta dodogowip atip um purao Debeini ananish yopihai aih um pupe ananip atip abom. Arpesh douk madae shurao ehudok ananish aih iri uwe ta mare shutik anan, uwok. <sup>15</sup> Ipak douk gamo pudukemesh. Ta enen nyutograguk um agundok Iruhin neneck gihaucep aria nape nataurumap meyoh um. Gamo pudukemesh um ta ipak enen nyunek eneh yoweihai aih nyuket amaen aria nyunek sabaipari Iruhin nutrip nukri pape penek yoweihai aih aria pape yoweipi abom. <sup>16</sup> Gamo pudukemesh um

ta enen arpen nyugipesh ehudok yoweishi aih um shenek wehrur um o nyukanuk agab Iruhin kabi seiwok Iso nenekeh um. Anan douk bahan aria ta nurao yakenish eshudok eneshenesh. Aria uwok. Nakitak nawanam um ananish eshudok nator worigun douk nagnoh natuhuk atub nyutob meyoh iri. <sup>17</sup> Ipak douk padukemesh. Douk napeik arigaha wata nakri um nurao yakenish eshudok eneshenesh aria Iruhin nakri uwok. Nabirak nareh abih um nurao eshudok yopishi eneshenesh, aria yah wokan um nuwanam um eshudok yoweishi inahos sagomatin narik nenekeh iri um.

### *Apak Douk Manak Matograri Abrudok Debeiburi Wabur Bape Iruhw Heven Iri*

<sup>18</sup> Ipak douk madae punak putograri um eshudok douk ta putrishi aria pusuwesh wis iri uwe, uwok. Kabi seiwok eshesh Israel shenekesh um. Eshesh douk shanaki shape hurukatin um ahwudok yoduhw Sainai aria shatik debeihi atihi nyih hanu aria shopunek shatik debeigini arukwtigun abom um nani dodogowinyi uhwin aria shanogugur. <sup>19</sup> Shatik eshudok aria shemnek onohw oruhw hwuno-hwapur aria anan arman neyagwrehi dodogowinyi baraen nakripesi. Eshesh shemnek enyudok baraen aria shanogugur abom. Aria shakrip Moses shakri, "Apak makri uwok um wata mumnek enen baraen shopunek." <sup>20</sup> Shakripan namudok Moses um maresh? Eshesh douk shanogugur abom um enyudok baraen Iruhin nakripesh-enyi. Nakripeshi namudok, nakri, "Aria enen arpen o enen mahin nyunak nyutowi ahwudok yoduhw, aria ipak ta pukwumen utom pen nyugok." <sup>21</sup> Eshesh douk shanogugur abom um eshudok shatrish iri. Namudok aria Moses shopunek nakri, "Eik yanogugur abom aria eik yikitak yowiyokuk um eshudok anahaehish eneshenesh."

<sup>22</sup> Aria douk, ipak madae punak putograri um enen enyudok-morim mugu uwe, uwok. Ipak douk panak patograri um ahwudok yoduhw nyeigurihw um Saion hwani anudok dodogowini abom Iruhin ananibur debeiburi wabur. Abrudok wabur Jerusalem douk bape iruhw heven. Ipak douk panak patogrumori agundok sabaibi tauzenabish um enselahos shantorum aria shanadudareh shapeum. <sup>23</sup> Ipak douk panak patogrumori Iruhin ananish sagomish batowish shantorum shapeum. Eshudok batowish douk Iruhin nowem esheshish nyeiguhw ananik buk gani iruhw heven. Panak patogrumori um anan debeini jas abom douk nasuhw kwotog iri. Anan douk Iruhin, douk nenek skelum apak ihishmorim arpesh iri. Ipak douk shopunek panak patogrumori um seiwok shagok iri arpesh esheshish mishish. Eshesh douk Iruhin nahwareh yopishi aria shatogur yopishi abom. <sup>24</sup> Ipak douk shopunek panak patogrumori Jisas. Anan douk nape orokohun um apak arpesh mani Iruhin aria nenek enyudok namunyi adurin atinyi baraen kontrak nyatogur dodogowin iri. Panak patogrumori Jisas ananibor owishibor douk riguk nobruyarik aria nenek enyudok namunyi kontrak nyatogur dodogowin iri. Douk ahudok atuh nyumnah Iruhin natik abrudok owishibor aria nakweshihuk apakish yoweishi inahos. Anudok Jisas ananibor owishibor douk beshagrakuk abom abrudok Abel ananibor owishibor douk bape bahwar um shuanam yoweishi inahos iri.

### *Apak Ta Gamo Mudukemesh Um Mare Mukonuk Agabus Iruhin*

<sup>25</sup> Ipak ta gamo pudukemesh um. Ta pakri putapok arigos aria pukenyuk agabus Iruhin ananin baraen. Seiwoke Iruhin douk nakripesh enen dodogowinyi baraen apakish yamehesh agundok atap. Nakripesh aria eshesh shakri uwok um shumneken. Namudok aria eshesh madae shuni anan shupe uwe, uwok. Nasuwesh nekesh yoweishi inahosin poe um

esheshish yoweishi inahos. Aria douk apak, Iruhin douk nape iri iruhw heven aria nakopari ddogowinyi baraen. Douk mukri mukonaguk agabus um, aria pakri ta muruwokuk aria mare nukop yoweishi inahos poe um apakash yoweishi inahos, aka? Adur atin uwok.<sup>26</sup> Abudok nyutob neyag-wrehi nakripeshi baraen obi nyutob, agundok atap douk krutukarogun. Aria ahudok nyumnah douk nakri adurin atinyi baraen um ta nunek enen enyudok shopunek. Nakri, “Anah shopunek ta igwragworish agundok atap. Aria ta mare igwragworish atap atin uwe, uwok. Ta igwragworish atap nini iruhw utag shopunek.”<sup>27</sup> Enyudok baraen, “Anah shopunek”, enyen douk nyeyabigap um ihishmorim eshudok anan nenekeh iri ta nugwragworish-esh aria niyateshuk. Nugwragworish-esh namudok um eshudok shupe dodog abom iri atish ta shupeik.

<sup>28</sup> Namudok aria apak ta munadudareh munek tenkyu um Iruhin. Um maresh? Anan douk narapari aria naposop agundok anan nape debeini um ananish arpesh um, aria ta mare enesh eshudok shuhekishap aria apak ta mutotigos uwe, uwok. Namudok aria apak ta munek lotuman aria mutuk ananin nyeigur nyuto iruhw. Apak ta munogugur um anan aria mupe shakamaum anan.<sup>29</sup> Munekesh namudok um maresh? Apakin Iruhin douk kabi eneh juwehosih abom atihi nyih douk apa hanu eshudok hashahuk atin iri.

## 13

### *Apak Atin Atin Ta Urkwip Punawasham Abom Kupaishi Arpesh*

<sup>1</sup> Ipak ashukenyish owashish, iih nyumneh ipak ta urkwip punawasham kupaishi Kristen kabi ipakip urkwip panawasham enesh ipakishi um.

<sup>2</sup> Abudok nyutob kupairubi warubish arpesh shukri shunakumori ipak um, ipak ta puraesh um ipakig urusag putaurumesh. Seiwok aria douk namudok. Enesh arpesh shakri ta sharauri arpesh meyoh shape shataurumesh, aria uwok. Madae shudukemesh uwe aria sharauri Iruhin ananish enselahos shataurumesh.<sup>3</sup> Ipak ta urkwip purum Iruhin ananish arpesh douk shonoweshik shape shunuweshik-ati urupat iri. Ipak douk puni eshesh pusah amaeen kabi ipak shopunek pani eshesh ponoweshik pape um. Arpesh douk horim shenekesh enenyenen sharao eriger iri, eshudok ipak ta urkwip purumesh aria putaurumesh. Ipak ta punek urkwip pakri enyudok douk kabi ipak pani eshesh pemnek eriger um.<sup>4</sup> Panaraum iri armam armago ta gamo pudukemesh wosik um ipak punaraum um. Pupeik yopip abom. Ipak padukemesh. Iruhin ta nuwanamesh yoweishi inahos eshudok douk apa shenek wehrur iri shuni eshudok douk shanaraum aria wata shanak shenek wehrur shani kupaimi o kupaiwori iri.<sup>5</sup> Ipak mare mishish shikitak abom um purao sabaibori utabor, uwok. Karowibor o sabaibori ipak punasubor iri, ipak punadudareh pakri jurugibor um ipak. Um maresh? Iruhin seiwok nakri,

“Ta mare ikwutipokuk, uwok.

Ta mare ikwutipokuk ipak atin pupeik, uwok.”

<sup>6</sup> Namudok aria apak mare aparuh yoweruh aria ddogowip aria mukri, “Debeini apa nataurume aria eik ta mare inogugur. Arpesh ta mare shuneke mumam, uwok.”

### *Apak Mare Munek Abraen Um Mugipesh Jisas*

<sup>7</sup> Ipak ta urkwip purum ipakim debeimi douk heyotu harik-umep aria hakriep Iruhin ananin baraen iri. Ipak ta urkwip purum yopihi aih douk amam hagipesheh arigah hagok um. Aria ipak pugipesh ehudok aih abom um hasuhw Iruhin ananin baraen dodog hagipeshen um.<sup>8</sup> Riguk seiwok

Jisas Krais douk nataurum amam. Aria douk nenekesh namudok atin nepe nataurum apak. Aria shopunek ta nupeum nataurumap namudok atin iih nyumneh.

<sup>9</sup> Ipak mare pumnek enenyenek kupaingyi baraen nyunaki nyunekip pokutukuk ahudok yah um punek bilip um Krais um, uwok. Enyudok douk wosik, um apak ta mukutuk Iruhin nataurumap meyoh aria apakigun um numun nrao ananin dodog. Apakigun um numun ta mare nrao dodog um agundok mugipesh lo um mishoh iri o mare mishoh iri worigun um, uwok. Ehudok aih douk madae hutaurumesh uwe eshudok shagipesheh iri, uwok. <sup>10</sup> Apak douk enen alta Jisas nene ofa um nyape. Amam pris douk hagipesh seiwokin lo aria henek mour atudok seiwokit selit urupat iri, amam ta mare hurao enesh yopishi eshudok um Jisas ananin ofa, uwok.

<sup>11</sup> Seiwo, eshesha Juda eshesha debeini pris abom apa nrao mahishi-bor owishibor nawish Iruhin Ananim Yopuyopumi Abom Rum. Nawish aria nene ofamobor nako Iruhin um Iruhin nene gihau arpesh aria nukweshih eshesha yoweishi inahos. Aria eshudok shuknishi mahish douk apa sharaesh shatograkuk aduk agundok shapeum aria shesheh nyih hanishuk. <sup>12</sup> Douk namudok aria Jisas shopunek nemnek eriger aria nagok adukibur um abrudok debeiburi wabur. Nagok um ananibor owishibor bunek arpesh yopish abom aria shupe Iruhin ananish atish abom. <sup>13</sup> Namudok aria apak mare mugipesh lo, uwok. Apak shopunek ta munak um Jisas agundok adukibur um abrudok wabur aria murao abraen kabi anan nraen um. <sup>14</sup> Apak ta munekesh namudok um maresh? Agundok atap apak douk madae anabur wabur bupe iih nyumneh abom iri uwe, uwok. Apak douk mape matrugun um abrudok wabur douk ta butograri iri.

<sup>15</sup> Namudok aria iih nyumneh apak ta mutuk Iruhin nuto iruhw um Jisas ananin nyeigur. Apak ta mutuk ananin nyeigur mupe namudok kabi enen ofa douk apa maraen mako Iruhin um. Adur, iih nyumneh apakig nukwatog ta gwereh um ananin nyeigur nyuto iruhw. <sup>16</sup> Aria shopunek ipak ta punek yopinyi um arpesh. Ta enesh yaruhih um enesh eshudok eneshenesh um, ipak ta putaurumesh pukesh enesh ipakish um yaruhih. Ipak mare urkwip pukepuk um punek enyudokmori um, uwok. Iruhin nanadudareh-umen abom iri ofa douk enyudokmori.

### *Iruhin Ta Nataurumap Mupe Wosik*

<sup>17</sup> Ipakim heyotu harikumep iri douk hakritep Iruhin ananin baraen hakri hutaurumep. Amam apa heyohep iih nyumneh aria kweipon amam ta hukrip Iruhin um ihinyumori mour amam heneken iri. Namudok aria ipak ta pugipesh amamin baraen aria pupe shakamum amam. Punekesh namudok um, amam ta hunadudareh aria hunek amamin mour. Aparuh ta mare yoweruh, uwok. Aria ta amam aparuh yoweruh aria hutaurum ipak um, enyudok ta mare nyutaurumep, uwok. <sup>18</sup> Aria yakri ipak ta punek beten porig Iruhin um nataurumep. Apak madukemesh um, apakip urkwip douk por wosik abom aria madae purum munek yoweishi inahos uwe, uwok. Aria abudok nyutob mupe o murahaen um, apak makri mupe wosik abom. <sup>19</sup> Aria eik kanak douk yarigep abom um porik Iruhin um nataurume aria wata itanam-agu um ipak arigas.

<sup>20-21</sup> Iruhin douk nohur apakini Debeini Jisas wata naktaki wanugwehw. Jisas anan douk debeini abom neyoh apak iri apa neyoh Iruhin ananish arpesh iri. Anan douk nagok aria ananibor owishibor benek enyudok namunyi adurin atinyi baraen kontrak nyatogur dodogowin atin. Enyudok kontrak douk ta nyupe iih nyumneh. Anudok Iruhin douk baugos abom

um agundok apakiruh aparuh hur wosik munadudareh um. Aria eik yakri anan wosik ta nunek ihihmori yopihu aih hutogur dodogowih atih um ipak. Um yakri ipak pugipesh abom ananim atum urkum. Aria douk yakri anan nukri aria Jisas Krais nutaurum ipakigun numun um ipak punek eneheneh anan nanadudareh-umeh iri aih. Ihih nyumneh apak ihihsromim ta mutuk ananin nyeigur nyuto iruhw. Adur atin.

*Nyagiguk Abom Iri Baraen*

<sup>22</sup> Eikish arpesh, eik yakri ipak ta gamo pubuk arigos um enyudok baraen douk yenjem-umepogu pumneken aria piyotu dodogowip atip um. Um maresh? Enyudok baraen yenjemagu shup iri douk banen meyoh. <sup>23</sup> Aria douk yakri ikripep namudok um pudukemesh. Apakin wanin Timoti douk shakweshihan natograri. Madae nunuweshik nupe uwe. Aria ta nukri nunak nutogrume arigas um, ohwak biyohw ta unaku utrip. <sup>24</sup> Ipak punekume yopuhi nyumnah um ihm-morim amudok heyotu harikumep iri huni ihihsromim Iruhin ananish arpesh. Eshudok enesh Iruhin ananish arpesh douk shakutukuk agudok nahobig Itali shanaki iri, eshesh douk shopunek shenemepogu yopuhi nyumnah ipak. <sup>25</sup> Eik yakri Iruhin wosik nutaurumep meyoh ipak ihipmorim aria pupe wosik.

## Apudok Shup Douk Jems Nenekap Iri Banenyi bараен um enyudok bараен Jems nenyem iri

1:1-18 Enenyenken kwiraeh apa nyatogrumap iri

1:19-27 Apak mare mumnek Iruhin ananin bараен meyoh, uwok. Apak ta mumneken aria mugipeshen.

2:1-26 Apak ta munek yopihi aih um muyabigesh apakin bilip.

3:1-12 Apak ta musuhw merik um apakin bараен

3:13-18 Yopunyi saki douk nyanaki iруhw heven iri

4:1-12 Apak ta mupe shakamum Iruhin.

5:1-20 Sabaihi yopihi aih apak ta mugipesheh iri

<sup>1</sup> O ipak Iruhin ananish arpesh, ipak Juda. Ipak asudok 12-poreis debeisi awiros douk pakutukuk ipakirub warub panaku pape panakumaguk kupairubi warub iri. Eik Jems douk yenek Iruhin ananin mour yape shakamum anan nani Debeini Jisas Krais iri yenekumepogu apudok shup ipak. Eik yenemepogu yopuhi nyumnah ipak.

### *Kwiraeh Nyutogurumap Um Ta Nyunekap Mutogur Dodogowip*

<sup>2</sup> O ipak Kristen. Meibi nyutob ihinyumori enenyenken kwiraeh nyutogur aria nyikwiraeh um, ipak ta punadudareh aria pukri enyen douk yopinji.

<sup>3</sup> Um maresh? Ipak padukemesh, abudok nyutob kwiraeh nyutogur nyukwiraeh ipakin bilip obi nyutob, enyen ta nyutaurumep nyunekap putogur dodogowip um pusah amaan um. <sup>4</sup> Douk namudok aria ipak ta piyotu dodogowip atip pupe namudok atin. Um arigaha ipak punek sabaihi yopihi atih aih shopunek aria ehudok aih um piyotu dodogowip um pusah amaan um ta nyufogur dodogowin um ipak. Ipak punekesh namudok um putogur yopipari kabi douk Iruhin nakri um. Aria anan nutrip um, anan mare nutik enesh yoweishi inahos shupenyep. Aria ipak ta mare urkwip pushukep-ukuk um eneh Iruhin ananish aih.

### *Eshudok Douk Urkwip Pushukesh-ukuk Um Yopipi Urkwip Iri Ta Shunek Beten Shorik Iruhin*

<sup>5</sup> Aria enen arpen enyenyim urkum munak mutuhukuk um yopumi urkum um, enyen ta nyunek beten nyirig Iruhin aria anan ta nuken anam shopunek. Um maresh? Anan apa nekeshesh meyoh sabaihi eshudok eneshenesh um sabaihi arpesh aria anan madae juwehosin nuhesh atin uwe, uwok. <sup>6</sup> Aria abudok nyutob enyen nyunek beten nyirig Iruhin um, enyen ta nyunek bilip abom nyukri adur aria nyunek beten nyirigan. Enyen mare nyusuhw biyep urkwip aria nyukri, "Iruhin ta numnek eikin beten aria nuke eshudok eik yarigan-umesh iri aka, uwok?" Enyen urkum mare mur namudok, uwok. Um maresh? Enyudok arpen douk enyenyim urkum mur namudok iri, enyenyim urkum douk mape kabi youg morub batuk um. Uhwin nyahuri aria nyenek youg gwokitak gwahur gwagipesh uhwin nyahur nyanak um. <sup>7</sup> Aria enyudok arpen mare nyukri Debeini ta nuken enesh eshudok eneshenesh, uwok. <sup>8</sup> Um maresh? Enyen nyere biyep urkwip aria ihinyumorim mour enyen nyeneken iri, enyen madae nyusuhw atum urkum aria nyuneken wosik uwe.

### *Yaruhih Shani Shanagrem Sabaishi Eshudok Eneshenesh Iri*

<sup>9</sup> Eshudok Kristen douk yaruhibh iri, eshesh ta shunadudareh. Um maresh? Iruhin douk natuk esheshish nyeiguhw shato iruhw. <sup>10</sup> Aria eshudok douk shanagrem sabaishi eshudok eneshenesh iri shopunek ta shunadudareh um agundok Iruhin naunih esheshish nyeiguhw um. Um maresh? Esheshish eshudok eneshenesh ta shunak shuwishuk kabi douk aruruhibh douk shatogur ushap patogur urah iri um. Eshesh douk shape banab meyoh nyutob aria wata shopunek yarish. <sup>11</sup> Ipak padukemesh, douk wah hatao habo ushap yarip aria apapish yopishi aruruhibh shopunek yarish shanak shuwishuk. Aria eshudok arpesh douk shanagrem sabaishi eshudok eneshenesh iri, anah nyumnah esheshish sabaishi eshudok eneshenesh ta shunak shuwishuk namudok atin. Abudok nyutob eshesh ta shupe shunek mour bisnis um shurao utabor, eshesh ta shugok. Aria esheshish eshudok eneshenesh ta shunak shuwishuk.

### *Kwiraeh Nyutogur Nyukwiraeh Arpesh Um*

<sup>12</sup> Arpen douk nyiyotu dodogowin abudok nyutob um enenyenen kwiraeh nyutogrumen nyukwiraehen obi nyutob, enyen ta nyunadudareh. Um maresh? Abudok nyutob enyen nyiyotu dodogowin nyunek uhwin um enyudok ihinyumorim kwiraeh um, kweipon enyen ta nyupe wosik abom ihih nyumneh. Enyen ta nyupe wosik kabi douk Iruhin nutuk ananin nyeigur nyuto iruhw um. Iruhin douk nakri enyudok adurin atinyi baraen um eshudok arpesh douk urkwip punawasham anan iri ta shupe wosik abom ihih nyumneh. <sup>13</sup> Aria meibi nyutob enen kwiraeh nyutogur nyukwiraeh enen arpen um nyunek yoweishi inahos um, enyen mare nyukri, "Iruhin nenekeh aria douk yenek yoweishi inahos." Uwok. Um maresh? Iruhin douk mishin madae nyukitak atin um nunek yoweishi inahos uwe. Aria shopunek, anan douk madae nukri um nukwiraeh enen arpen um nuneken nyunek yoweishi inahos uwe, uwok. <sup>14</sup> Abudok nyutob kwiraeh nyutogrumep aria nyukwiraehep um punek yoweishi inahos um, abab douk apakip yoweipi urkwip atip penekap aria apakiruh aparuh hapuhur aria henekap munek yoweishi inahos. <sup>15</sup> Aria apak urkwip porum yoweishi inahos aria penekap abom um munek yoweishi inahos. Aria arigaha eshudok yoweishi inahos ta shutogur debesh aria ta shop abom mugok munak muwishuk.

<sup>16</sup> O ipak Kristen, eik douk urkum manawashamep abom. Douk namudok aria yakri ipak gamo pudukemesh um mare pukutukuk enen enyudokmori yoweiniyi baraen nyunek rohwumep, uwok. <sup>17</sup> Ihishmorim eneshenesh yopishi eshudok sharaesh meyoh kabi presen um iri douk shanaki iruhw heven. Eshudok yopishi eshesh douk anudok apakin Debeini Yain Iruhin douk neneh ihishmorim eneshenesh eshudok douk shabuh iruhw utag iri nakapesh iri. Anan douk madae nububodigen atin uwe. Ananah aih madae kabi douk aboriguh um uwe, uwok. Aboriguh apa hwanabadig, anabik um hwatogur rouguhwi, aria anabik um hwatogur banaguhw. Aria Iruhin douk madae nunobubodig atin uwe. Anan nape namudok atin. <sup>18</sup> Aria anan kanak nagipesh ananim atum urkum aria nenekap matogur abom sharik iri awiropish batowish um ihishmorim arpesh shani eneshenesh eshudok anan nenekeh iri. Anan nenekap mape namudok um ananin adurin atinyi baraen atin.

### *Apak Ta Mumnek Iruhin Ananin Baraen Aria Mugipeshen*

<sup>19</sup> O ipak Kristen douk eik urkum manawashamep abom iri! Ipak ta urkwip purum enyudok baraen. Ipak ihishmorim ta pubuk arigos um pumnek baraen aria ipak mare puwanom-umesh baraen arigas. Aria shopunek, ipak mare juwehosip arigas. <sup>20</sup> Um maresh? Ehudok aih

um arpesh juwehosish um ta hukwarmorih yoweishi aih. Eheh ta mare hukwarmorih ehudok Iruhin nakriyeh iri yopihi aih, uwok. <sup>21</sup> Douk namudok aria douk ipak ta pukutukuk ihishmorim shabo susih iri yoweishi shuni eshudok ihishmorim yoweishi inahos douk arpesh shenekesh sabaihi atih iri. Aria ipak ta pupe shakamum Iruhin nini arpesh aria purao Iruhin ananin baraan douk riguk anan nawen nyape numun ipakiruh aparuh iri. Enyudok baraan douk dodogowin um nyutaurumep nyurep putanam punak um anan pupe wosik atin.

<sup>22</sup> Aria ipak mare pumneken meyoh um Iruhin ananin baraan, uwok. Ipak ta pumneken aria pugipeshen. Aria ipak pumneken meyoh um, ipak douk penek rohw um ipak kanak. <sup>23</sup> Eshudok arpesh douk shemneken meyoh aria madae shugipeshen iri uwe, eshesh douk kabi arpen douk nya-natik enyenyig yamag wenyir iri um. <sup>24</sup> Enyen nyanatik jurug aria nyanak. Aria ahudok atuh enyen urkum mekenyuk um enyenyig yamag gape um. <sup>25</sup> Aria Iruhin ananin lo douk nyakweshihap um ehudok haweshikap iri yoweishi aih aria nyenekap mape wosik atin douk abom um sagom-atinyin yopunyi lo. Aria enyudok arpen douk iih nyumneh nyape um nyatrin wosik baugeniyum enyudok lo aria enyen mare urkum mukenyuk-umen aria nyagipeshen iri, Iruhin ta nunekumen yopunyi enyudok arpen um nuneken nyunadudareh um ehudok aih enyen nyenekeh iri.

<sup>26</sup> Aria ta enen arpen nyukri, "Eik yasuhw Krais ananin baraan dodog aria yenek lotu um Iruhin," aria enyen mare nyusuhw merik um enyenyit nokwat um, enyen douk nyape nyenek rohw um enyen kanak. Douk namudok aria agundok enyen nyape nyanak um lotu um nyuni enyenyin bilip ta mare amu nyutaurumen, uwok. <sup>27</sup> Douk yopihi aih um munek lotu aria apakin Yain Iruhin nutrup nukri apak yopipari baraan uwok-umap um, apak ta munekesh namudok. Aria enesh batowish esheshish amakenyish shugokuk, aria eshesh atish shupeik o ta anan arman nugokuk aria armatok otuk kwupeik um, apak ta mutaurumesh um enenyenen. Aria mutaurumesh mukesh eneshenesh eshudok yaruish iri. Aria shopunek, apak ta mupe yopup aria ahudok atapihi yoweishi aih ta mare hunek apakiruh aparuh hubosusih.

## 2

### *Apak Ta Urkwip Punawasham Ihishmorim Arpesh Shopunek Atin*

<sup>1</sup> O ipak Kristen douk pasuhw apakin Debeini Jisas Krais ananin baraan pagipeshen iri. Anan douk nape Debeiniye nyatoum aria natrugin abom kabi douk Iruhin natrugin um. Douk namudok aria ipak mare punadudareh um eshudok arpesh douk nyeiguhw shato iruh-umesh iri atish aria pukeshuk agabus yoweishi nyeiguhw wokeshi, uwok. Ipak ta punadudareh um ihishmorim arpesh shopunek atin. <sup>2</sup> Aria anan nanagrem sabaishi eshudok eneshenesh iri nur enen ring douk sheneken gol iri ananah hah, aria nurari yopihi atih rupeh nunak nuwishi ipak pape penek lotuat iri urupat, aria ta anan wokan um eshudok iri nere iri tutukarehi rupeh iri shopunek nunak nuwishi um, ipak ta punekesh mumam? <sup>3</sup> Ipak ta pukrip anudok nor yopihi rupeh iri pukri, "Nyak nyunak nyupe nyanyi yopunyi wagitur." Aria anudok nor tutukareh iri pukripian pukri, "Nyak nyunak nyiyotu gani o nyunaki nyupe atap hurukatin um eikiruh yeriweruh," aka uwok? Ipak mare punekesh namudok, uwok. <sup>4</sup> Aria ipak punekesh namudok um, ipak ta baraan nyupenyep. Um maresh? Ipak pagipesh ipakip yoweipi urkwip aria madae punek skelimum kupaishi Kristen shopunek atin uwe.

<sup>5</sup> O ipak Kristen! Ipak pumnek! Eshudok douk utabor bani jah wokesh iri, eshesh douk Iruhin nanagraehesh um shusuhw ananin bareaen dodog shugipeshen aria shupe kabi debeishi um. Aria kweipon, eshudok arpesh douk eshesh urkwip panawasham anan iri ta shugrem eneshenesh yopishi eshudok douk shakus agundok douk ta Iruhin ananish arpesh shunak shupe um. Eshesh ta shugremesh kabi douk seiwok anan nakri enen adurin atinyi bareaen um. <sup>6</sup> Aria ipak apa patuk eshudok douk shanagrem sabaibori utabor bani jah iri esheshish nyeiguhw shato iruhw. Aria pahao eshudok douk utabor bani jah wokesh iri. Aria ipak pakri meishi arpesh apa shekep enenyenen amaen aria sharaep shanak shenekumep kwotog? Eshesh douk eshudok shanagrem sabaibori utabor bani jah iri. <sup>7</sup> Seiwoh Krais douk narao yopunyi nyeigur aria enyudok ananin nyeigur douk nyape ipak aria ipak ananish atish iri. Aria eshudok arpesh douk shanagrem sabaishi eshudok eneshenesh iri douk shape sheneyagwreh enenyenen yoweinyi bareaen abom um enyudok nyeigur.

<sup>8</sup> Aria apakin Debeini king douk nasuhw merik um apak ihishmorim iri neneuk enen lo nyatemaguk Iruhin ananik Buk. Enyudok lo douk nyakri namudok, "Ipak ta urkwip punawasham eshudok douk shape hurukatin um ipak iri kabi douk ipak urkwip panawasham ipak kanak aria panagapesh ipak kanak um." Aria ipak pugipesh enyudok lo um, ipak douk penek yopihi aih. <sup>9</sup> Aria ta ipak putaurum debeishi arpesh douk shanagrem sabaibori utabor bani jah iri atish, aria pukeshuk agabus yaruhih arpesh iri um, ipak douk penek yoweishi inahos pabrig lo abom. Aria enyudok lo atin ta nyunek kwotumep. <sup>10</sup> Um maresh? Aria enen arpen nyugipesh ihinyumorim Iruhin ananin lo douk nyetem ananik Buk iri, aria enyen nyubrig atin meyoh um, enyen douk kabi nyabrig ihinyumorim lo um. <sup>11</sup> Um maresh? Anudok atun neneuk enyudok lo iri nakri, "Ipak mare punek wehrur," aria shopunek nakri, "Ipak mare pubo kupaishi arpesh shugok." Aria ta ipak mare punek wehrur, aria pubo kupaishi arpesh shugok um, ipak douk pabrig lo. <sup>12</sup> Aria kweipon Iruhin nunek skelimep um, anan ta nugipesh enyudok ananin lo douk nyakweshihap mape wosik iri aria nunek skelimap. Douk namudok aria ipak ta piyagwreh yopunyi adurinyi atin bareaen aria punek yopihi atih aih. <sup>13</sup> Um maresh? Eshudok arpesh douk madae shukri shenek gihauum kupaishi arpesh iri uwe, kweipon Iruhin ta nunek skelimesh aria ta mare nukri gihaumesh. Aria eshudok douk shakri gihauum kupaishi arpesh iri, kweipon anan ta nukri gihaumesh aria shunek uhwin um ananit kwot.

### *Bilip Douk Yopihi Aih Madae Hupeyen Iri Uwe, Douk Nyagok Kabi Douk Nyagok Iri Arpen um*

<sup>14</sup> O ipak eikishi arpesh, ta enen arpen nyukri, "Eik yasuhw Krais ananin bareaen dodog yagipeshen," aria enyen mare nyunek yopihi aih hupeyen hiren um enyenyin bilip um, enyudokmori bilip ta mare nyuraen nyutanamori nyupe wosik abom uwe, uwok. <sup>15-16</sup> Aria enesh ipakish ashukenyish owashish shunare tutukarehi rupeh, aria shopunek eshesh worigun wokesh aria ipak enen nyunak nyukripesh nyukri, "Eik yakri Debeini nunekumep yopihi aih aria ipak punak punare rupeh aria puwok yopuguni worigun?" Douk ipak ta pukripesh namudok aria mare putaurumesh uwe, aria enyudok ipakin bareaen ta nyutaurumep mumam? <sup>17</sup> Aria bilip shopunek douk namudok atin abom. Aria enen arpen nyunek bilip meyoh aria mare nyunek yopihi aih hupeyen hiren um enyenyin bilip um, enyudok arpen enyenyin bilip douk nyagok kabi douk nyagok iri arpen um.

<sup>18</sup> Aria enen arpen ta nyukri, “Eik yeneb bilip aria nyak nyenek yopihi aih.” Aria eik yakri ikrip enyudok arpen namudok, “Nyak nyiyabige nyakin bilip douk madae nyunek yopihi aih hiren iri uwe. Aria eik ta inek yopihi aih aria iyabigen baugenym um eikin bilip.”

<sup>19</sup> Nyak nyenek bilip nyakri atun Iruhin nape. Aria enyudok douk wosik. Aria yoweishi sagabehos shopunek douk shenek bilip namudok, aria eshesh shanogugur abom aria krukruk shape. <sup>20</sup> Nyak nyor nyor nyenek rohw iri. Douk eik yakri ikripen enen baraen um nyakin bilip. Aria nyak nyunek bilip meyoh, aria mare nyunek yopihi aih hiren um nyakin bilip um, enyudok nyakin bilip ta mare nyunek eneh yopihi aih uwe, uwok. Enyen douk wehinyi abom. <sup>21</sup> Nyak nyadukemesh, seiwok apakin yamenen Abraham nakri nuwem ananin nunganin Aisak enyudok alta douk showem um eshudok shenek ofamesh shako Iruhin um aria nunek ofaman nako Iruhin. Douk namudok aria abudok nyutob Iruhin natrun namudok aria nahwaran yopuni arman. <sup>22</sup> Douk namudok aria nyak tik, Abraham neneb bilip um Iruhin aria nunyanuh Aisak um ehudok aih um nakri nunek ofa um ananin nunganin nuko Iruhin um. Aria ananah aih henek ananin bilip nyatogur adurin. <sup>23</sup> Aria enyudok baraen douk nyetem Iruhin ananik Buk iri nyatogur adurin atin. Baraen douk enyudok, “Abraham nasuhw Iruhin ananin baraen dodog nagipeshen aria Iruhin douk nahwaran yopuni arman.” Aria Iruhin nakri, “Abraham douk eikin arpen.” <sup>24</sup> Douk namudok aria enyudok baraen nyetem Iruhin ananik Buk iri douk nyeyabigep um Iruhin douk madae nuhwar arpesh yopishi um agundok shusuhw ananin baraen meyoh um atin uwe, uwok. Aria eshesh shugipeshen shunek yopihi aih shopunek um, anan wosik ta nuhwaresh yopishi arpesh.

<sup>25</sup> Aria okwudok armatok Rahap douk kwonek wehrur iri shopunek douk kwasuhw Iruhin ananin baraen dodog kwagipeshen aria kwenek yopihi aih shopunek. Okwok douk kwataurum amam Juda douk hanabeshuk hanakum hutik okwokwibur wabur iri aria kwataurumam haruwok hanak kupaihi yah. Aria Iruhin natik ehudok yopihi aih okwok kwenekeh um amudok armam iri aria nahwarok yopukwi armatok.

<sup>26</sup> Aria enyudok arpen douk mishin madae nyupenyen iri uwe douk nyagok. Aria bilip douk madae shunek yopihi aih hiren iri uwe shopunek douk nyagok jurug kabi enyudok nyagok iri arpen um.

### 3

#### *Apak Ta Gamo Mudukemesh Um Apak Miyagwrehen Iri Baraen*

<sup>1</sup> O ipak Kristen! Ipak gamo pudukemesh um ipak mare sabaipari pukri putogur tisa omi um punek skulum kupaishi, uwok. Um maresh? Ipak padukemesh, kweipon Iruhin ta nunek skelimap um, apak tisa douk makripesher Iruhin ananin yopinyi baraen iri ta miyotu um debeiti kwot. Aria eshudok douk shape Kristen meyoh iri ta shiyou um shokwuti kwot. <sup>2</sup> Ihih nyumneh apak ihipmorim apa matu munek enesh yoweishi inahos. Aria ta enen arpen nyiyagwreh yopunyi atin baraen um, enyen douk yopunyi abom arpen. Douk namudok aria enyen wosik ta nyusuhw merik um enyen kanak nyuni enyenyim urkum shopunek.

<sup>3</sup> Ipak padukemesh, apak apa menyigur shokubi ainab bawish hwosahos esheshig nokwatog um munekesh shugipesher apakin baraen shunak agundok apak makri munak um. <sup>4</sup> Aria shopunek, ipak punek urkwip um debeiwori kroruhiyor. Kroruhiyor owo douk debeiwori, aria debeineyi uhwin apa nyahur aria nyeneko wahur wanak youg. Aria owowin badaeg

douk shokwinyi meyoh. Aria ta nasuhw korohuk iri nukri nunak anagun um, anan ta nuwanam um agudok shokugi badaeg aria okwok ta kwunak agundok anan nakri nunak um. <sup>5</sup> Aria apakig nokwatog douk namudok atin kabi hwosahos shani kroruhiyor um. Ogwog douk shokugi aria gwape orokohun um apakiruh yegeshiweruh. Aria ogwog apa gwanagunukuk gwariguk gweyagwreh enenyenen yopinyi mour nyani aih ogwog gwakri gwunekesh iri.

Ipak padukemesh, enen shokwinyi nyabahasin ta nyukwarum debeishi nyih. Aria eheh ta hunu sabaisi debeishi rowos satao urah iri hiyatagos. <sup>6</sup> Aria apakig nokwatog douk gwape kabi nyih um. Ogwog gwape orokohun um apakiruh yegeshiweruh aria apa gwakwarumori eneheneh yoweishi aih. Aria ogwog apa gwenek apak ihishmorim arpesh matogur yoweishi. Aria ogwog apa gwenek ihinyumorim apakin bareaen nyani aih iri mour yowen abom kabi douk nyih hanu eneshenesh eshudok hanununish um. Ehudok nyih douk hanuwi abrudok yoweiburi wabur hel.

<sup>7</sup> Aria arpesh douk dodogowish um shusuhw ihishmorim wanarish mahish shuni armiguhw iri yuguhw shuni ihishmorim eshudok shape shakam youg iri aria shunak shukesh shunobresh-esh um shugipesh es-heshin bareaen. Aria ehudok aih arpesh douk shenekeh jurug aria shopunek shenekeh douk.

<sup>8</sup> Aria arpesig nokwatog ta mare enesh arpesh dodogowish um shusuhw merikw-umog, uwok. Ihih nyumneh ogwog apa gwape um gwakri yoweiniyti atin. Ogwog douk yoweg abom aria shuknig um eneshenesh yoweishi abom inahos kabi douk yoweini marasin um.

<sup>9</sup> Apak apa makwu apakig nokwatog um matuk apakini Debeini Yain ananin nyeigur nyato iruhw. Aria wata shopunek makwu ogwudok atug nokwatog um meyagwreh yoweigwi nubug um makri yoweishi inahos shutogurum kupaishi arpesh douk Iruhin nenekesh shadukemesh abom um anan kanak iri. <sup>10</sup> Douk ogwudok atug nokwatog apak matuk Iruhin ananin nyeigur nyato iruhw. Aria wata shopunek makri nubug um makri yoweishi inahos shutogurum kupaishi arpesh. Aria ipak Kristen mare piyagwreh namudok uwe, uwok. <sup>11-12</sup> O ipak Kristen, eik yakri ikrippep enyudok binyatin wobuwobren bareaen. Bareaen enyudok. Ta mare anabar yopubari abar buni anabar nubutibari bukih bur atug waiyag, uwok. Aria shopunek, ta mare anep shuruwep nyeigurip um oliv iri pir enen rowog nyeigur-inyum fik iri. Aria shopunek, ta mare anep shuruwep fik iri ta pir enen rowog nyeigur-inyum wain iri, uwok. Aria douk namudok atin, ta mare anabar yougibar nubutibari abar butanam bunenek um yopubari uwe, uwok.

### *Iruhin Atun Apa Nakop Yopipi Urkwip Iri Saki*

<sup>13</sup> Ipak meinyi arpen douk yopunyi saki nyapenyen aria nyadukemesh wosik iri, enyen ta nyunekesh namudok. Enyenyih aih huni mour iri bareaen ta nyiyabig kupaishi arpesh um enyenyin saki nyuni enyenyih yopipi aih aria nyupe shakamum eshesh. Aria ehudok yopipi aih um arpesh shupe shakamum kupaishi arpesh um douk hatograri enyudok yopunyi saki. <sup>14</sup> Aria ta ipak punek nyigya abom um kupaishi esheshish eshudok eneshenesh, aria ipak urkwip porum pakri ipak atip purao sabaibori utabor buni jah aria kupaishi shutuk ipakish atish nyeiguhw shuto iruhw um, ipak mare putuk ipakish nyeiguhw shuto iruhw aria punek rohw pukri ipak pagipesw Iruhin ananin adurin atinyi bareaen, uwok. <sup>15</sup> Aria enyudok saki douk madae nyunaki iruhw heven iri uwe, uwok. Enyen douk agundok atapinyi. Enyen douk nyatograri harik hapenyep iri yoweishi aih douk henekep pape penek yoweishi inahos iri. Enyudok saki

douk eshudok Satan ananish enselahos esheshin. <sup>16</sup> Aria eshudok arpesh douk shunek nyigiya um kupaishi arpesh esheshish eshudok eneshenesh, aria eshesh urkwip porum shukri eshesh atish shurao sabaibori utabor buni jah aria kupaishi shutuk esheshish atish nyeiguhw shuto iruhw um, eshesh ta mare shupe wosik shuni kupaishi arpesh, uwok. Eshesh ta shupe um shunotutukem shurpak shunitok aria ta shunek eneshenesh yoweishi inahos shopunek.

<sup>17</sup> Aria enyudok saki douk nyanaki iruhw heven iri apa nyakwarum ehudokmori yopihai aih. Harik iri aih douk ehudok um arpesh shupe wosik aria eshesh urkwip purum yopunyi atin. Aria sabaihi yopihai aih shopunek douk ehudok. Arpesh esheshiruh aparuh hur wosik aria yopuruh um kupaishi. Aria eshesh shiyagwreh shokwin baraan aria shukri gihaum kupaishi aria shunek ehudok yopihai aih shutaurum kupaishi. Eshesh ta mare shiyagwreh biyog nokwatog um shunek rohw um kupaishi, uwok. Aria shopunek, ta mare shukri shunadudareh um enesh arpesh aria shukeshuk agabus kupaishi, uwok. Eshesh ta urkwip purum ihishmorim arpesh shukri eshesh douk shopunek atin abom. <sup>18</sup> Aria eshudok arpesh esheshiruh aparuh hor wosik aria aparuh yopuruh um kupaishi, aria shutaurumesh, enyudok eshesh douk kabi shawu worigun um. Ehudok aih ta hunekesh shutogur yopishi arpesh kabi douk moneki yopuguni worigun nubarig um.

## 4

### *Eshudok Arpesh Douk Esheship Urkwip Panawasham Agundok Atapihi Aih Iri Douk Iruhin Ananish Horim*

<sup>1</sup> Ehudok yoweishi aih um ipak panoguganim aria parpok panitok um douk paraehi agunum? Eheh douk ehudok harik hapenyep iri aih um penek yoweishi inahos um hohur ipakiruh aparuh aria henekep pape parpok panitok. <sup>2</sup> Ipak pakri purao sabaishi eneshenesh eshudok aria ipak madae puraesh atin uwe. Douk namudok aria ipak pakri pubo kupaishi arpesh shugok. Ipak penek nyigiya abom um enesh eshudok eneshenesh aria ipak madae dodogowip um puraesh uwe, uwok. Douk namudok aria ipak pape um rupok nitok atin. Aria ipak madae puraesh uwe. Um maresh, ipak madae punek beten porik Iruhin um nukepesh uwe. <sup>3</sup> Aria shopunek, abudok nyutob ipak penek beten parigon um, ipakip urkwip madae pur wosik uwe, uwok. Ipak parigon um nukep eshudok um pugipesh ipakih harik iri yoweishi aih hape numunipum iri. Douk namudok aria ipak madae puraesh atin uwe.

<sup>4</sup> Ipak pakutukuk Iruhin ananish yopihai aih aria panak penek yoweishi inahos. Enyudok ipak peneken iri douk kabi armam armago shakutukuk yopihai aih aria shenek wehrur um. Aria ta enen arpen urkum munawasham abom agundok atapih aih um, enyen douk nyakanaguk agab Iruhin aria nyatogur ananin horin. Aria douk ipak padukemen enyudok aka uwok? Douk meinyi arpen enyeniyim urkum munawasham agundok atapih aih iri douk nyatogur Iruhin ananin horin. <sup>5</sup> Enen Iruhin ananin baraan nyetem ananik Buk iri douk nyakri namudok, “Eshudok apakish mishish douk Iruhin nakepesh shape numun apakiruh aparuh iri

ihih nyumneh shapeum shenek nyigiya um eneshenesh eshudok.” Aria ipak mare pukri enyudok baraan douk enen rohwin, uwok. Enyen douk adurin atin abom.

<sup>6</sup> Aria Iruhin nataurumap abom meyoh aria nenekap mape dodogowip kabi enyudok baraan nyetem Iruhin ananik Buk iri nyakrium. Baraan

enyudok, "Iruhin apa nekesh agab eshudok douk shatuk eshesh kanak esheshish nyeiguhw shato iruhw aria shakri eshesh atish yopishi iri. Aria anan apa nataurumesh meyoh eshudok douk shape shakamum anan iri."

<sup>7</sup> Douk namudok aria ipak ta pupe shakamum Iruhin pugipesh ananin baraen. Aria mare pumnek Satan, uwok abom. Ipak pukanaguk agabus abom aria anan ta nukutipukur nuruwok. <sup>8</sup> Aria ipak punak hurukatin abom um Iruhin aria anan ta nunaki hurukatin um ipak. Ipak douk pape penek yoweishi inahos iri, ipak pukutishuk aria putanam putogur yopishi arpesh. Aria ipak peyagwreh biyog nokwatog iri ta pukutukuk eshudok yoweishi inahos aria punek ipakip urkwip putogur yopip. <sup>9</sup> Ipakiruh aparuh ta yoweruh abom aria pakri uwok abom um eshudok eneshenesh yoweishi inahos ipak pape penekesh iri. Ipak pureh punakwukri debeg um eshudok yoweishi inahos aria pukutishuk. Aria ipak ahudok nyumnah douk pape pagukoruh iri shopunek, ipakiruh aparuh ta yoweruh aria pureh um eshudok yoweishi inahos ipak pape penekesh iri aria pukutishuk. Aria ipak ahudok nyumnah douk ta panadudareh iri, ipak shopunek aparuh ta yoweruh aria pakri uwok um eshudok yoweishi inahos ipak pape penekesh iri. <sup>10</sup> Ipak ta pupe shakamum Debeini aria anan ta nataurumep nunadudareh-umep nukri ipak yopipari.

### *Apak Mare Munek Skelim Um Kupaishi Kristen*

<sup>11</sup> O ipak Kristen! Eik yakri uwok um ipak piyagwreh agabusin baraen um, uwok. Um maresh? Ta enen arpen nyunumugesh kupaishi Kristen o nyunek skelimesh um, enyen douk nyenek skelimum Iruhin ananin lo nyakri enyen douk yoweinyi. Aria eshudok arpesh douk shenek skelimum Iruhin ananin lo iri douk madae shugipes ananin lo uwe. Eshesh douk shape kabi debeimi jas douk hasuhw kwotog iri aria shenek skelimum enyudok lo. <sup>12</sup> Anan douk Iruhin atun abom nakop enyudok lo aria anan atun nape debeini jas um nunek skelimum ihishmorim arpesh. Aria douk anan atun abom wosik um nataurumap nurapi mukutukuk yoweishi inahos mupe wosik atin. Aria shopunek, anan atun ta nunek skelimap aria nop nununup mugok abom munak muwishuk. Douk namudok aria ipak maresh arpesh aria douk ipak pakri punek skelimum kupaishi arpesh douk shani ipak pape atugun iri? Ipak mare punekesh namudok, uwok.

### *Apak Mare Mutuk Apakish Nyeiguhw Shuto Iruhw Um Eshudok Douk Ta Apak Munekesh Iri*

<sup>13</sup> Ipak enep apa pakri namudok, "Doukih o nuhutih, apak ta munaku um babri debeiburi wabur munak mupe atin kwar aria mupe munek bisnis aria murao sabaibori utabor." Aria ipak pumnek enyudok baraen. <sup>14</sup> Baraen enyudok. Ipak douk madae gamo pudukemesh um eshudok douk o nuhut ta shutogrume p iri uwe. Ipakish kwarahos um ipak pupe um douk kabi nyugus douk sakih sato sape banab meyoh nyutob, aria ahudok atuh wata sanak suwishuk iri. <sup>15</sup> Aria ipak ta pakri namudok, "Ta Debeini urkum mukri wosik um, apak ta mupe aria munek enyudok mour o kupainyi." Ipak pakri namudok um, enyen douk wosik. <sup>16</sup> Aria douk ipak pakri ipak atip ddogowipari padukemesh um eneshenesh iri aria patuk ipakish nyeiguhw shato iruhw. Enyudok ipak douk penek yoweishi inahos abom. <sup>17</sup> Douk namudok aria ipak ta pudukemesh. Meinyi arpen douk nyadukemesh um nyunek yopipi aih, aria enyen madae nyunekeh iri uwe, enyen douk nyenek yoweishi inahos.

## 5

*Shogrem Sabaishi Eshudok Eneshenesh Iri Esheshin Baraen*

<sup>1</sup> Douk ipak ponogram sabaishi eshudok eneshenesh iri pumnek. Ipak urkwip purum enyudok debeini amaen douk ta ipak puraen iri aria pureh debeg. Ipak pureh punakwukri punoruwor. <sup>2</sup> Kweipon ipakih jah huni eneshenesh eshudok ta tutukresh. Aria ipakih rupeh ta tutubrugos sutupeh. <sup>3</sup> Abrudok ipakibor utabor, aria gol iri siliwi douk ros satowabor aria ta yowebor. Asudok ros ta siyabigep um ahudok yah douk ta kweipon Iruhin nep um. Iruhin ta nunek asudok ros sunek ipakiruh yegeshiweruh humnek debeiri eriger kabi douk nyih hanip um. Ipak panabuk ipakibor utabor bakusumep atugun aria hagiguk iri nyumneh douk hanaki hurukatin. Aria ehudok nyumneh, Iruhin ta nunek kwotumep aria ta nunekep pumnek debeiri eriger. <sup>4</sup> Aria ipak pumnek. Ipak madae pukom utabor mamudok armam douk pahwarom hanaki henekumep mour hape hatuk-umepe worigun um ipakig nubarig iri uwe. Aria eshudok ipak penekesh iri yoweishi inahos douk shape showerehep kabi douk enen arpen nyowereh ipakish yoweishi inahos um. Aria ipak ta pumnek amam hape hereh debeg harigep um amamibor utabor um. Debeini douk nasuhw iruhw atap iri nabo ihishmorim shabuhuk iri douk nemnekam jurug. <sup>5</sup> Aria abudok nyutob ipak pape agundok atap um, ipak pape wosik aria ponogram yopishi atish eshudok eneshenesh. Aria ipak pawok sabaiguni worigun patogur takweipari. Ipak douk pape penekesh namudok aria pudukemesh um ahudok nyumnah Debeini nunek skelimep aria nukri ipak baraen nyapenyep um. <sup>6</sup> Aria ipak penekumesh kwotog yopishi arpesh aria paesh shagok aria eshesh madae shatanam shukriep enen baraen uwe o shini ipak purpak uwe, uwok.

*Apak Mupe Dodogowip Aria Mupe Mutrugun Um Debeini Nutanamori Um*

<sup>7</sup> O ipak ekish arpesh. Ipak ta piyotu dodogowip, aparuh hur wosik aria pupe putrugun um ahudok nyumnah Debeini nutanamori ahi. Ipak urkwip purum anan arman nagrem anag nubarig iri. Anan apahw hwor wosik aria nape natrugun um ananigun yopuguni worigun douk nawogun ananig nubarig iri um arigaha yopugun. Anan apahw hwor wosik aria nape natrugun um harik iri huni hugiguk iri eshah hurauri. Ahah hutuhuk aria wah hutao hesh shus suhwesh aria anan kadak nunak nutukagun. <sup>8</sup> Aria ipakiruh aparuh shopunek ta hur wosik aria piyotu dodogowip pupe putrugun um ahudok nyumnah hutogur. Umum maresh? Ahudok nyumnah Debeini nutanamori ahi ta hutogur. <sup>9</sup> Ipak ekish arpesh, ipak mare pukesh baraen kupaishi pukri eshesh shenekep parao amaeen, uwok. Aria ipak punekesh namudok um, kweipon Iruhin, anudok debeini jas ta nusuhw ipakig kwotog aria nukri enyudok ipak penek yoweishi inahos. Anan douk hurukatin um nunaki nunek skelimum ipak ihipmorim. <sup>10</sup> Aria ipak urkwip purukuk um amam seiwokimi profet douk hanak hakriepes Iruhin ananin baraen um Debeini ananin nyeigur iri. Amamiruh aparuh hor wosik aria heyotu dodogowim hosah enenyenen amaeen nyatogruman nyenekam hemnek debeiri eriger iri. Aria ipak shopunek ta pupipes amamih aih. <sup>11</sup> Aria ipak douk padukemesh um apak makri amudok profet douk heyotu dodogowim hosah enenyenen amaeen douk nyatogruman iri. Aria apak matrum makri amam douk hanadudareh. Aria ipak shopunek padukemesh um anudok seiwokini arman Jop. Anan neyotu dodogowin atun um nasah enenyenen amaeen douk nyatogruman iri. Anan nape dodogowin arigaha Debeini nagipesh ananim atum urkum aria

natauruman. Aria ipak padukemesh, Debeini apa urkum manawasham apak aria anan apa nenen gishaumap nenen yopinyi um apak.

### *Apak Mare Mukri Iruhw Um, Uwok*

<sup>12</sup> O ipak eikish arpesh, baraen douk sagom-atinayin abom nyeshagrakuk enyudok eik yarig yakripen iri douk enyudok. Ipak pakri enen adurin baraaen um, ipak mare porik iruhw heven o agundok atap o enesh kupaishi eshudok um putaurum ipakin baraaen um puneken nyupe dodogowin, uwok. Ta pukri, "Adur" um, pukri, "Adur." O ta pukri, "Uwok" um, pukri, "Uwok." Um maresh? Ta ipak pukri iruhw um, Iruhin ta nuneckwotumep um enyudok baraaen nukri ipak yoweipari.

### *Yopishi Abom Arpesh Shenekan Iri Beten Douk Dodogowin*

<sup>13</sup> Aria ipak enen arpen enen amaeen nyutogramen um, enyen ta nyunek beten nyuhwar Iruhin. O ta enen nyunadudareh um, enyen ta nyiyarub nyutuk Iruhin ananin nyeigur nyuto iruhw. <sup>14</sup> Aria ta enen eneh arugeh hen um, enyen ta nyuhwar Iruhin ananish arpesh esheshim debeimi um hunak hurak yopuri wel hurayok enyenyihw yegenyihw aria hunek betenumen huhwar Debeini um nugabeyen. <sup>15</sup> Aria ta amam hunek bilip hukri adur, Iruhin douk dodogowini abom um nugabeyen aria hunek beten horigan um, Debeini ta nugabeyen nyukitak nyupe. Aria ta enyen nyunek enesh yoweishi inahos um, Iruhin ta nukweshih-esruk. <sup>16</sup> Douk namudok aria sagomatik ipak ta puwerekh ipak penekesh iri yoweishi inahos pukrip kupaishi Kristen aria eshesh shopunek shuwereh shukriep um esheshin. Aria ipak punagapesh um punek beten puhwar Iruhin um nunekep yopip pukitak pupe. Yopishi abom arpesh shenekan iri beten douk dodogowin abom aria ta nutaurum arpesh. <sup>17</sup> Anudok seiwokini profet Ilaija, anan douk arman kabi apak um. Aria anan neneckwotumep atun nahwar Iruhin um eshah mare hurari aria bishatin shuknishi enen tukwaninyi kwarahos eshah madae anah hurari esheshib amnab uwe. <sup>18</sup> Arigaha douk wata shopunek neneckwotumep beten nahwar Iruhin aria eshah wata harari henek worigun natogur wosik.

### *Aria Enen Arpen Nyukutukuk Iruhin Um, Apak Ta Mutaurumen Munyanam-ori*

<sup>19-20</sup> O ipak eikish arpesh. Aria ipak enen nyukutukuk Iruhin ananin adurin baraaen aria mare nyusuwen dodog nyugipeshen, aria kupainityi arpen wata nyutaurumen nyunyanam-ari um, apak urkwip purum enyudok baraaen. Baraen enyudok. Meinyi arpen nyutaurum kupainityi arpen nyukutukuk yoweishi inahos aria wata nyutanam nyunek yopunyi um, enyen douk nyataurumen um mare nyugok nyunak nyuwishuk, uwok. Aria Iruhin ta nukweshih yoweishi inahos enyen nyenekesh iri.

## **Parik Iri Shup Douk Pita Nenekap Iri Banenyi Baraen Um Enyudok Baraen Pita Narik Nenyem Iri**

1:1-2 Pita nanadudareh um eshesh Kristen aria nakripesh Iruhin ananin baraen

1:3-2:10 Iruhin nenekap um mupe wosik iih nyumneh. Namudok aria apak ta munek yopih iatih aih

2:11-5:9 Apak ta mupe shakamum Iruhin nini arpesh aria mupe dodogowip mumnek eriger

5:10 Nyagiguk iri baraen

<sup>1</sup> O ipak Iruhin nagraehesh iri arpesh douk pakutukuk ipakirub warub panaku pape arbudok sabairubi warub bape shokugosi nahobigos nyeigur-igosum Pontus, Galesia, Kapadosia, Esia sani Bitinia iri. Eik anan Jisas Krais ananin aposel yenekumepogu apudok shup ipak. <sup>2</sup> Ipak douk Yain Iruhin nanagraehep kabi seiwok anan nagipesh ananum urkum aria nakri um. Aria shopunek, ananin Mishin nyenekep patogur ananish atish arpesh um pugipesh Jisas Krais ananin baraen. Aria um nishrokuhep ananibor owishibor um bunekep pupe Iruhin ananipari atip. Aria eik yakri Iruhin nunek ehudok biyah aih um anan nutaurumep meyoh um, huni ehudok um nunek ipakiruh aparuh hur wosik um hupenyep abom aria hutogur debeihi numun ipakiruh aparuh.

### *Apak Mupe Wosik Abom Um Douk Nape Natrugunumap Iruhw Heven*

<sup>3</sup> Iruhin anan douk apakin Debeini Jisas Krais ananin debeini Iruhin aria shopunek, anan douk ananin Yaken. Apak ta mutuk ananin nyeigur nyuto iruhw. Anan nenek gishaumap abom aria nohuri Jisas Krais naktaki wonugwehw nakitak nape. Iruhin nenekesh namudok aria anan nenekap matogur namupari. Apak madae mugok uwe, uwok. Apak mape manadudareh aria madukemesh abom um kweipon apak ta munak muni Iruhin mupe. <sup>4</sup> Aria shopunek, apak mape matrugun um kweipon apak mugrem eneshenesh yopishi eshudok douk Iruhin neshubuk shakus um nuko ananish arpesh iri um. Anan neshubuk shakusumep iruhw heven. Aria ganudok eshesh ta mare yowesh o mare shubosusih o shunak burukworeshuk, uwok. Eshesh ta shukus iih nyumneh. <sup>5</sup> Eshesh douk shakus um ipak. Ipak douk pakri Iruhin ananin baraen adurin pagipeshen aria ananin dodog nyataurumep aria douk pape wosik. Aria arigaha punak putogur um agundok anan nutaurumep nuraep pupe wosik um nutogur yopugunum ahudok hugiguk iri nyumnah.

<sup>6</sup> Aria ipak panadudareh abom um ipakish yopishi eshudok aria douk banrah nyutob meyoh, aria ta sabainyi enenyenen amaen nyatogrume nyenek ipakiruh aparuh yoweruh. <sup>7</sup> Enyudok enenyenen amaen nyatogrume um, Iruhin nakri nukwiraeh um ipakin bilip um nunek nyutogur dodogowin. Ipak punek urkum um gol, gol arpesh apa shatorur debeibori utabor. Aria ipakin bilip douk nyeshagrakuk abom arudok gol douk ta kweipon yower iri. Aria arpesh apa shoreh nyih um shunegor rutorogur yopur abom. Aria Iruhin douk nokwiraeh ipakin bilip kabi douk gol um nyutogur adurin atin abom aria arpesh shutrin. Aria hahudok nyumnah Jisas Krais nutogur yopugunum ahi, Iruhin ta nukriep nukri ipak yopipari aria nutuk ipakish nyeighw shuto iruhw. <sup>8</sup> Riguk ipak madae putik

Jisas uwe aria ipak urkwip panawashaman. Aria douk shopunek ipak madae putrun uwe aria ipak pemnek ananin bareaen atin aria penek bilipman. Douk namudok aria douk ipak panadudareh. Aria agundok ipak panadudareh um douk nanaki iruhw heven. Aria apak bareaen douk madae enen abom uwe um wosik mukripesh aria shudukemesh um agundok ipak panadudareh um uwe. Adur atin, uwok.<sup>9</sup> Ipak panadudareh abom namudok um maresh? Ipak penek bilip um Jisas Krais aria kweipon Iruhin ta wata nutaurumep nuraep putanamori pupe wosik abom.<sup>10</sup> Amam seiwokimi profet henek urkwip dodogowim atum abom henek debeinyi mour um hakri hudukemesh um agundok um kweipon Iruhin nutaurumap nurap mupe wosik um. Amam hakripesh enyudok bareaen um Iruhin nutogrumep nutaurumep meyoh nunarep pupe wosik um.<sup>11</sup> Krais ananin Mishin douk nyape numun amamiruh aparuh iri nyakri enen bareaen um kweipon ta anaranar yoweiri eriger rürük rutogur um Krais runegon numnek debeiri eriger aria ta wata shutuk ananin nyeigur nyuto iruhw um. Namudok aria amam atun atun hape hanasorim um hakri, "Enyudok ta nyutogur meibi nyutob?"<sup>12</sup> Iruhin neyabig amam profet hadukemesh um amam douk madae hunek enyudok mour um hutaurum amam kanak uwe, uwok. Amam douk heneken um hataurum ipak. Seiwo amam hakripesch abom um eshudok atish douk amam hakripesch Iruhin ananin yopinyi bareaen iri hakripep-umeshi. Amam douk Iruhin ananin Mishin douk Iruhin neshopkenyi nyanaki iruhw heven iri nyataurumam dodogowim atum aria douk hakripep enyudok yopinyi bareaen. Aria douk madae amam atum hukri um hudukemesh um enyudok bareaen uwe, uwok. Iruhin ananish enselahos shopunek shakri shudukemen.

### *Iruhin Nahwarap Um Mupe Ananip Atup Abom*

<sup>13</sup> Douk namudok aria abudok nyutob ipak ta urkwip gamo pur wosik um punek yopinyi atin mour. Ipak ta gamo pudukemesh um ipak kanak aria ipak urkwip mare purum eneshenesh yoweishi inahos, uwok. Aria pupe putrugun abom um Iruhin nutaurumep meyoh nuraep pupe wosik ahudok nyumnah Jisas Krais nutogur yopugunum-ahi.<sup>14</sup> Ipak ta pumnek Iruhin ananin bareaen pugipesen kabi batowish shemnek amakenyishin bareaen shagipesen um. Riguk ipak madae pudukemesh um enyudok Iruhin ananin yopinyi bareaen uwe aria ipak apa penek eneshenesh yoweishi inahos kabi douk ipak mishish shakitak aria penekesh um. Aria douk uwok.<sup>15</sup> Ipak ta pupe wosik abom um enenyenen ipak puneken iri kabi Iruhin douk nahwarep iri um douk wosik yopinyi abom um.<sup>16</sup> Aria Iruhin ananik Buk kwakri namudok, "Eik douk yopuwe iri abom, douk namudok aria ipak shopunek ta pupe eikish yopishi abom arpesh."

### *Iruhin Neneke Debeinyi Mour um Nator Apak Um*

<sup>17</sup> Ipak apa pahwar Iruhin pakri Yain. Anudok Yain anan douk madae nukri nutrur um agundok apak nyeiguhw shatoumap um o nyeiguhw wokap um aria nunek skelimap uwe, uwok. Anan apa neneke skelimap shopunek atin um ihihmoris eneheneh aih apak atin atin menekeh iri um. Namudok aria abudok nyutob ipak pupe abudok amnab douk madae ipakib abom iri uwe um, ipak ta punogugur um Iruhin aria pupe punek lotuman.<sup>18</sup> Um maresh? Ipak padukemesh, seiwo ipak pape pagipesh eneheneh yoweishi rohwih aih douk panarao-wehuk ipakim yamehem babukenyim iri. Aria douk Iruhin nanotorip aria nakweshihep pape wosik atin um eshudokmori aih. Anan douk madae nutorip enesh eshudok douk ta kweipon yowesh shunak shuwishuk iri uwe, kabi douk abrudok utabor gol rani siliwa um uwe, uwok.<sup>19</sup> Anan nakwu Krais ananibor owishibor

natorip aria nakweshihep nenekep pape wosik atin. Aburdok owishibor douk beshagrakuk abom eneshenesh eshudok douk shatorish debeibori utabor iri. Krais anan douk kabi enen yopuny abom nugaen sipsip douk seiwok eshesha shaen shenek ofamen shako Iruhin iri um. Enyen arab uwok anab bupenyen uwe aria madae nyunenek nyubrusug uwe, uwok. <sup>20</sup> Douk seiwok Iruhin wata nunek agundok atap uwe aria anan nograehaguk Krais um nugok um nuraep putanam pupe wosik. Aria ahudok hagiguk iri nyumneh anan nutogur yopugunum um nutaurum ipak. <sup>21</sup> Aria douk anan nataurumep aria ipak penek bilip um Iruhin douk nohuri Krais nikitaki wonugwehw aria natuk ananin nyeigur nyato iruhw iri. Namudok aria ipak douk penek bilip abom um Iruhin padukemesh um anah nyumnah anan atun ta wata nuraep pupe wosik atin.

### *Apak Ta Urkwip Panawasham Kupaishi Kristen*

<sup>22</sup> Ipak douk pagipesh enyudok adurin atinyi baraen um Krais nagok natorip um. Douk namudok aria ipak penek ipakiruh aparuh hatogur yopuruh. Aria douk ipak ta urkwip punawasham kupaishi Kristen jurug. Aria ipak mare punek rohw punek ehudok aih adul yegeshiweruh aturuh, uwok. Ipak ta urkwip punuwashamesh abom. <sup>23</sup> Um maresh? Ipak douk madae putogur namipi kabi batowish agundok atapish amakeniyish sheshubuki iri douk apa shagok iri uwe, uwok. Ipak douk enyudok Iruhin ananin baraen douk nyape iih nyumneh iri nyenekep patogur namipi. Enyudok baraen, enyen douk apa nyenek arpesh shape wosik abom iih nyumneh iri. <sup>24</sup> Aria Iruhin ananik Buk douk kwakri um enyudok baraen kwakri, “Ihishmorim arpesh shape banab nyutob kabi wishap um. Agundok esheshish nyeiguw shato iruh-umesh um douk kabi aruruish um. Aria wishap apa yarip aria aruruish shopunek apa tutukaresh shabuh. <sup>25</sup> Aria Debeini ananin baraen apa nyape iih nyumneh.”

Enyudok baraen douk Iruhin ananin yopinyi baraen douk armam apa hakripepen iri.

## 2

### *Debeini Jisas Douk Iruhin Norukwon Yapis Aria Nape Iih Nyumneh Iri. Anan Douk Kabi Anam Yopumi Utom Sharok Urusag Omi*

<sup>1</sup> Ipak douk patogur namipi, douk namudok aria ipak ta pukutukuk abom ihishmorim eneshenesh yoweishi inahos. Eik yakri enyudokmori um peyagwreh biyog nokwatog penek rohw um kupaishi arpesh um, nyuni penek nyigya um kupaishi esheshish eshudok um, nyuni panumogesh kupaishi um. <sup>2</sup> Ipak mishish ta shikitak abom um purao Iruhin ananin yopinyi atinyi baraen kabi douk weshubuk iri batowish apa shapeum shakri shuwok nyumeb atib um. Ipak punekesh namudok um, enyudok baraen ta nyutaurumep nyunekep putogur dodogowip punek yopihi aih pishagrakuk riguk parik pape penekeh iri. Aria Iruhin ta wata nataurumep nuraep pupe wosik iih nyumneh <sup>3</sup>kabi douk baraen nyetem Iruhin ananik Buk iri nyakrium. Baraen enyudok, “Ipak pokwiraeh jurug um Debeini ananah aih aria padukeman um anan douk yopuyopuni abom.”

<sup>4</sup> Aria ipak ta punakumori Debeini. Anan douk Iruhin norukwon yapis aria nape iih nyumneh kabi anam yopumi utom douk sharok urusag omi. Amam douk arpesh shakri uwok-umom aria shamuhur shamubukuk anagas. Aria Iruhin douk nagraeham jurug nakri amam douk yopumi abom. <sup>5</sup> Aria ipak douk Iruhin norukwep yapis aria pape kabi yopubori utabor sharok urusag abori. Aria ipak ta punakumori anan aria nupe

nunekep putogur yopishi arpesh kabi ananit debeiti urupat um. Iruhin ta nunekep namudok um pupe ananim pris aria punek ofa pukon ipakiruh aparuh huni ipakip urkwip anan um Jisas Krais ananin nyeigur. Ipak punek enyudok aria Iruhin ta nutrip nukri ipak yopipari.<sup>6</sup> Seiwok Iruhin nakriyen aria henyem nyetem ananik Buk'iri bareaen nyakri namudok, "Ipak mnek, eik yagraeh anam yopumi abom utom<sup>\*</sup> douk shatorum debeibori utabor iri. Aria douk yamubuk makus abrudok wabur Saion aria matogur sagomim ddogowimi utom um mosah wobrat um urupat tatao ddog. Aria eshudok arpesh douk shasuhw ananin bareaen shagipeshen iri esheshiruh aparuh ta mare yoweruh, uwok."

<sup>7</sup> Ipak penek bilip um Krais iri douk pakri amudok utom douk nyeigur nyato iruh-umom. Aria eshudok douk madae shunek bilipuman iri uwe, enyudok bareaen nyetem Iruhin ananik Buk'iri douk nyank um eshesh. Bareaen enyudok, "Amudok utom douk harok urusag iri hakri uwok-umom aria hamuhur hamubukuk anagas iri wata matogur sagomim utom um mosah urupat tatao ddog."

<sup>8</sup> Aria enen shopunek bareaen nyakri namudok, "Kweipon arpesh ta shunotutuk amudok utom aria ta shutu shubuh atap."

Eshesh ta shutu um maresh? Eshesh shemnek Iruhin ananin bareaen aria madae shusuhwen shugipeshen uwe. Eshesh shenyubukuk aria douk shatu kabi seiwok Iruhin nakri um.

### *Apak Mape Iruhin Ananip Awirop*

<sup>9</sup> Aria ipak seiwok Iruhin nagraehep aria narep pape ananip awirop. Ipak pasuhw anudok Debeini King Jisas ananin mour aria pape kabi pris um. Aria ipak patogur anap debeipi awiropish arpesh, Iruhin ananishi. Ipak douk Iruhin nagraehep aria pape ananip atip um pukripes um enyudok yopinyi mour douk anan neneken um ipak iri. Anan douk nahwarep pakutukuk arukwtigun um aria panakumori yopugunum natrugun abom um.<sup>10</sup> Seiwok ipak pape meyohishi arpesh, aria ahudok nyumnah douk pape Iruhin ananish arpesh. Seiwok ipak madae pudukemesh um agundok Iruhin nakri nenek gihaucep um uwe, uwok. Aria douk ipak padukemesh.

### *Apak Ta Mupe Shakamum Iruhin Aria Munekuman Mour Meyoh*

<sup>11</sup> Eik dodogoive atuwe abom um yakri ikrip ipak ekish arpesh. Ipak kabi douk kupairubi warubish arpesh douk panaki pape banab nyutob meyoh agundok atap iri um. Douk namudok aria eik yakri ipak pukeshuk agabus abom eneshenesh yoweishi inahos douk ipak mishish shakitak um pakri punekesh iri. Ehudokmori aih apa hanunu ipakish mishish.

<sup>12</sup> Aria agundok eshudok douk madae shudukemesh um Iruhin iri uwe shupe um, ipak ta punek yopihai atih aih. Um meibi nyutob eshesh shukri shuduk-umep bareaen shukri ipak penek yoweishi aih um, eshesh ta shutik ipakih yopihai aih aria ta shutuk Iruhin ananin nyeigur nyuto iruhw ahudok hugiguk iri nyumnah anan nunakumori-ahi.

<sup>13</sup> Ipak urkwip ta purum Debeini aria punih ipak kanak aria pupe shakamum ihishmorim debeishi shosah lo iri douk shape agundok atap iri. Aria pupe shakamum debeini king shopunek douk nape debeini abom um ihinyumori gavman iri.<sup>14</sup> Aria shopunek, pupe shakamum eshesh debeishi um gavman iri. Eshesh douk Iruhin neshusop shapeum um shuwanamesh yoweishi inahos eshudok arpesh douk shenek yoweishi inahos iri um shunekesh shugipes yopinyi atin. Aria shopunek um shutuk eshudok douk shenek yopishi inahos iri eshesish nyeiguhw shuto iruhw.

\* **2:6:** 2:6 Tik Matyu 21:42

**15** Iruhin nakri ipak punek yopinyi atin um eshudok arpesh douk madae shudukemesh um anan iri uwe. Aria eshesh shukriep enen rohw in wehinyi baraen um, eshesh ta shutik ipakihi aih aria enyen ta nyutapok esheshig nokwatog. **16** Krais douk nakweshihep pape wosik atin aria mare puuhur ehudok aih um pape wosik um puhemaguk iruhw um punashigor aria punabeshuk pupe punek yoweishi inahos, uwok. Ipak ta punek yopuni atin kabi douk pape shakamum Iruhin aria penekuman mour meyoh iri um. **17** Ipak ta punek yopihai um ihishmorim arpesh aria putuk esheshish nyeiguuhw shuto iruhw. Aria shopunek, ipak ta urkwip punawasham ihishmorim Kristen aria punogugur um Iruhin aria punek lotuman wosik. Aria ipak ta putuk debeini king ananin nyeigur nyuto iruhw.

### *Apak Ta Mugipesh Krais Ananih Aih Um Mumnek Debeiri Eriger Um*

**18** Ipak douk pape shakamum kupaishi penekumesh mour meyoh iri ta pupe shakamum ipakish debeishi aria putuk esheshish nyeiguuhw shuto iruhw. Ipak mare punekesh namudok um eshudok douk shenek yopinyi um ipak iri atish, uwok. Ipak ta punek ehudok aih um eshudok douk shenek yoweishi inahos um ipak iri shopunek. **19** Aria ipak piyotu dodogowip pugipesh Iruhin ananin baraen aria kupaishi shukep amaen meyoh um, Iruhin ta nunadudareh-umep nukriep nukri ipak yopipari. **20** Aria ta enesh shep um enesh yoweishi inahos ipak penekesh iri, aria ipak piyotu dodog mare puwanamumesh wanohw um, ta mare enesh arpesh shutuk ipakish nyeiguuhw shuto iruhw, uwok. Aria ta ipak punek yopinyi aria eshesh shukep amaen aria ipak piyotu dodogowip aria mare wata punyanam-umesh um, Iruhin ta nunadudareh-umep nukriep nukri ipak yopipari. **21** Iruhin douk nahwarep um pugipesh ehudok aih um pumnek eriger um yopihai aih ipak penekeh iri. Um maresh? Krais anan kanak nemnek debeiri eriger um nataurum ipak aria neyabigep-aguk ahudok yopihai aih um ipak pugipesheh.

**22** “Anan madae nunek enesh yoweishi inahos uwe, o madae nunek rohw niyagwreh enen baraen nyutograri ananit nokwat uwe, uwok.”

**23** Abudok nyutob eshesh shenekan enenyenen um, anan madae nutanam nukripesha enenyenen eshesh uwe, uwok. Aria eshesh shenekan nemnek debeiri eriger um, anan madae nuhesh uwe. Anan nakon anan kanak abom nanak um anudok yopuni arman douk apa nenek skelimum arpesh wosik abom iri um ananis wis. **24** Krais anan kanak narao apakish yoweishi inahos neshusah ananihw yegenyihw aria nagok neir rowog kruse. Anan nenekeh namudok um apak mupe kabi eshudok arpesh douk shagok aria shakutukuk ihishmorim yoweishi inahos iri um. Aria mupe munek yopinyi atin. Eshesh shan shenekan nemnek debeiri eriger. Aria douk um enyudok atin, anan wata nenekap matogur yopupari. **25** Seiwoh ipak pakutukuk yah pagipeshuk kupaihi kabi douk sipsip shakutukuk esheshih yah shagimaguk kupaihi um. Aria douk ipak patanamori panakumori Debeini Krais douk apa nataurum ipakish mishish wosik kabi anan arman nataurum ananish sipsip iri um.

## 3

### *Shanaraum Iri Arman Armago Esheshin Baraen*

**1** Douk nyarik iri baraen nyakriep um pupe shakamum debeishi um gavman iri shuni ipakish debeishi douk ipak penekumesh mour iri. Aria ipak armago ta punekesh namudok atin abom um pupe shakamum ipakim armam. Um anam douk madae husuhw Iruhin ananin baraen iri uwe

hutik ipakih yopihi aih aria eheh ta hutaurum amam hutanam husuhw Krais ananin baraen hugipesen. Aria ipakih aih atih ta hutaurumam aria ipak ta mour uwok um pukripam enen baraen um. <sup>2</sup> Um maresh? Amam ta hutrip um ipak punogugur um Iruhin penek lotuman aria penek eneheneh yopihi atih aih. <sup>3</sup> Aria ipak pakri putogur yopuwori armago um, ipak urkwip mare purum pakri puginohw adukiruh um ipakiruh yegeshiweruh, uwok. Ipak urkwip mare purum pakri puginohw ipakigos baragos aria purao ahwudok suruhw kabi douk yopubi weiyoub um buni yopihi atih rupeh, uwok. <sup>4</sup> Aria ipak ta urkwip purum punoginohw numun ipakiruh aparuh huni ipakip urkwip. Aria ipakiruh aparuh ta hur wosik aria pupe anahaehiyu yopuwori armago. Douk ehudokmori aih ta mare hutuh, uwok. Eheh ta hupe iih nyumneh. Aria ehudok aih Iruhin nutrih ananis nabes um, eheh douk yopihi abom heshagrakuk agundok paginohw adukiruh um yegeshiweruh um. <sup>5</sup> Seiwokiwori armago douk wape Iruhin ananiyu atuwori wenek bilipuman aria wadukemesh wakri adurin anan ta nugipesh ananin adurin atinyi baraen. Aria owo wagipesh ehudok aih aria wenek owo kanak watogur yopu um agundok wape shakamum owowim armam um. <sup>6</sup> Sara douk kwenekeh namudok atin abom. Okwok kwomnek Abraham ananin baraen kwagipesen aria kwahwaran kwakri okwokwin debeini. Aria douk ta ipak punek yopihi abom aih aria mare punogugur um enesh eshudok um, ipak douk kabi Sara okwokwiwu nugariyu um.

<sup>7</sup> Ipak armam shopunek puni owo pupe um, ipak ta punek yophi atih aih um owo. Aria ipak ta pudukemesh um owoviruh yegeshiweruh douk madae dodogowiruh uwe. Namudok aria ipak ta punadudareh-umo aria putuk owo wish nyieguh shuto iruhw. Um maresh? Owo shopunek uni ipak ta purao agundok um pupe wosik abom ihih nyumneh um. Agagun Iruhin ta nukepagun meyoh kabi douk presen um. Aria ipak ta punekesh namudok um mare enesh eshudok shutapok yah um ipakin beten, uwok.

## *Apak Ta Munagabe Um Mupe Atugun*

<sup>8</sup> Baraen nyutuh iri douk enyudok. Ipak ihishmorim ta punagabe um pupe atugun aria ipak urkwip punawasham kupaishi putaurumesh aria pupe shakamum ihishmorim arpesh. <sup>9</sup> Ipak mare puwanamesh yoweishi inahos eshudok douk shenekesh um ipak iri, uwok. Aria eshesh shuhep shukriep enen yoweinyi baraen um, ipak mare wata punyanam-umesh, uwok. Eshesh shunek yoweishi inahos um ipak um, ipak ta punekumesh yopinyi aria pukripesh um Iruhin ta nunekumesh yopinyi. Um maresh? Riguk Iruhin douk nahwarep um pupigesp anan aria nakri nukep enesh-enesh yopishi eshudok. <sup>10</sup> Enyudok kabi douk baraen nyetem Iruhin ananik Bük iri nyakri um. Baraen enyudok, "Enyudok arpen douk nyukri nyunadudareh um agundok um shupe wosik um aria nyukri nyutik yopihu nyumneh um, enyen mare nyiyagwreh enen yoweinyi baraen enyeniyit nokwat. Aria mare nyunek rohw nyiyagwreh enen rohwin baraen, uwok.

<sup>11</sup> Enyen ta nyukutukuk yoweishi inahos aria nyunek yopinyi atin. Aria enyeniyin mishin ta nyikitak abom um nyurao ehudok aih um enyeniyihw apahw hwur wosik aria nyuni Iruhin nini arpesh shupe atugun um. <sup>12</sup> Um maresh? Debeini apa nape natik yopishi arpesh douk shenek yopihu aih atih iri aria apa nemnek esheshin beten. Aria ananihw apahw apa yowehw, aria madae nunadudareh um eshudok douk shenek yoweishi inahos iri uwe."

*Ipak Ta Pumnek Eriger Um Yopinyi Mour Ipak Puneken Iri*

**13** Aria ipak punek mour dodogowip atip um punek yopihai atih aih um, ta mare enen arpen nyunek enesh yoweishi inahos um ipak. **14** Aria

ta ipak pumnek eriger um agundok ipak penek yopihi aih um, ipak ta punadudareh. Ipak mare punogugur um arpesh aria ipakiruh aparuh mare yoweruh, uwok. <sup>15</sup> Numun ipakiruh aparuh, ipak ta punek Krais atun nupe Debeini abom aria punék lotuman. Aria ta meifi nyumann enesh arpesh shukri shurigepong um pukripesch um baugenylum bareaen um agundok ipak pasuhw Krais ananin bareaen dodog pagipeschen um, ipak ta pukri wosik um pukripesch enyudok bareaen. <sup>16</sup> Aria ipak pukripesch um, ipak ta pupe shakamum eshesh shuni Iruhin aria pukripesch shokubur. Ipak ta punek yopihi aih um ipak urkwip mare yowep pukri ipak penek yoweishi inahos, uwok. Ipak punekesh namudok, aria ta enesh arpesh shukri shuhep shukripesch enen yoweinyi bareaen um agundok ipak putukur Krais aria penek yopinyi um, eshesh ta abraen nyesh um esheshin yoweinyi bareaen. <sup>17</sup> Aria ta Iruhin nukri wosik um ipak pumnek eriger um yopinyi ipak peneken iri um, enyen douk wosik. Aria ipak pumnek eriger um yoweishi inahos ipak penekesh iri um, enyen shopunek douk wosik. Aria ta Iruhin nukri wosik aria ipak pumnek eriger um yopinyi ipak peneken iri um, enyudok douk yopinyi abom.

### *Krais Nagok Um Nogabeyap Um Apakish Yoweishi Inahos*

<sup>18</sup> Ipak urkwip porum Krais shopunek. Anan yopuni abom arman aria anan nagok um nagabeyep um ipakish yoweishi inahos. Anan nagok atuh meyoh um nataurmori ihishmorim shenek yoweishi inahos iri um nuraesh shunak um Iruhin. Um ananihw yegeniyihw eshesh shan nagok, aria um ananin mishin, anan wata nakitak nape. <sup>19</sup> Um ananin mishin, Krais nakitak nape aria nanak nakripesch bareaen um arpeshish mishish douk shonoweshik shape iri. <sup>20</sup> Eshudok mishish eshesh douk eshudok arpesh douk seiwok shakon agabus Iruhin iri esheshish. Abudok nyutob Noa nape neneh korohuk obi nyutob, Iruhin nape mokareg apa natrish nanabukesh arigos um nakri shatanam shukon aparuh anan. Aria okwudok korohuk karowish meyoh arpesh 8-poreish atish shawish shape numun. Aria Iruhin nataurmash shape wosik aria abar madae besh shugok uwe. <sup>21</sup> Abrudok abar douk bagraeh um agundok shenek baptaisumesh um. Aria Jisas Krais douk nagok aria Iruhin wata nonohur nakitak nape. Douk namudok aria douk um agundok ipak penek baptaisum atin, Iruhin wata nanaraep patanamori pape wosik. Aria baugenylum bareaen um abrudok abar douk madae nyukripep um bukwurup aduk ipakiruh yegeshiweruh aturuw uwe, uwok. Ababar douk bagraeh um enyudok adurin atinyi bareaen douk ipak pakripan um Iruhin um nunekenyumep iri. Ipak douk pakripan aria anan nakwurup ipakip urkwip aria epep madae purum pukri ipak penek enesh yoweishi inahos uwe, uwok. <sup>22</sup> Aria anan douk nato iruhw heven aria nape yopuni roturehah um Iruhin. Aria ihishmorim ensel shani ihmori debeimi hani eshudok dodogowishi shasuhw merik um iruhw utag iri shape shakamum anan atun.

## 4

### *Apak Ta Mumnek Debeiri Eriger Aria Mukutukuk Yoweishi Aih*

<sup>1</sup> Krais nemnek eriger ananihw yegeniyihw aria ipak shopunek ta dodogowip um pugipesch amudokmori ananim atum urkum. Um maresh? Meinyi arpen douk nyemnek eriger enyenyihw yegeniyihw iri douk nyakri uwok um nyunek yoweishi inahos um. <sup>2</sup> Aria douk abudok nyutob ipak pupe agundok atap obi nyutob, ipak mare pugipesch eshudok yoweishi inahos douk agundok atapishi arpesh mishish shakitak-umesh um shunekesh iri, uwok. Ipak ta pugipesch Iruhin ananim urkum atum arigaha pugok.

<sup>3</sup> Seiwok ipak pape penek ehudok aih um eshesh douk madae shudukemesh um Iruhin iri uwe mishish shakitak um shenekesh iri. Aria douk ipak mare wata punekesh atin, uwok. Eik yakri um ehudokmori aih um shenek wehrur um, hani ehudok um mishish shakitak um shunek yoweishi inahos um, huni ehudok um shawok abar shagugak aria shenek yoweishi inahos um Huni ehudok um shape shawok debeguni worigun aria shawok dodogowibari abar, aria shape shenek yoweishi inahos shakon agabus Iruhin aria shenek lotu um madae adurimi god omi um uwe. Abudok nyutob um ipak pape pagipesheh ehudokmori aih um douk batuh jurug.

<sup>4</sup> Aria douk eshudok madae shudukemesh um Iruhin iri uwe shatrip um ipak madae putaurumesh punekesh atish uwe eshudokmori yoweishi inahos aria eshesh shakitak yowiyokuk. Douk namudok aria eshesh douk shahep shanumogep. <sup>5</sup> Aria Iruhin douk nenen gibegabe naapeum nusuhw ihishmorim shagok iri shuni shape iri arpesh esheshig kwotog. Douk namudok aria eshudok arpesh douk shahep iri ta shiyotu um kwot shukrip Iruhin um eshudok yoweishi inahos eshesh shenekesh iri. <sup>6</sup> Douk namudok aria seiwoh Krais nanak nakripesheh Iruhin ananin yopinyi bareaen eshesh shagok iri shemneken shopunek. Aria Iruhin nasuhw esheshig kwotog kabi douk ta kweipon nusuhw ihishmorim arpesh esheshig kwotog um. Aria agundok um esheshiruh yegeshiweruh, eshesh douk shagok. Aria anan douk nakripesheh enyudok yopinyi bareaen um eshesh shumneken aria esheshish mishish wata shupe kabi douk Iruhin douk madae nugok iri uwe naapeum.

### *Apak Murao Yopinyi Presen Iruhin Nakopen Meyoh Iri Aria Munek Mour Wosik*

<sup>7</sup> Abudok nyutob um eneshenesh eshudok shutuh um douk banaki hurukatin. Douk namudok aria ipak ta pusuhw merik um ipak kanak wosik aria pupe gamo pudukemesh um punek beten. <sup>8</sup> Aria ehudok aih douk heshagrakuk abom sabaihi ihihmori aih iri douk ehudok. Ipak urkwip ta punawashamesh dodog kupaishi Kristen. Um maresh? Ehudok aih apa habouk sabaihi yoweishi aih habuhuk. <sup>9</sup> Aria ipak ta putaurumesh wosik eshudok douk shunakumori ipakig urusag iri. Ipak putaurumesh aria ipak aparuh mare juwehosiruh, uwok. <sup>10</sup> Iruhin ananin Mishin douk nyataurumep nyekepen meyoh yopinyi presen ipak atin atin. Douk namudok aria ipak ta pukwu ipakin presen sisigin aria pupe punek garibog um punek yopinyi mour um putaurum kupaishi arpesh. <sup>11</sup> Aria enen arpen nyurao enyudok presen um nyukripesheh Iruhin ananin bareaen um, enyen ta nyukripesheh Iruhin ananin bareaen atin. Aria ta enen arpen nyurao enyudok presen um nyutaurum kupaishi arpesh um, enyen ta nyuneken kabi douk Iruhin nataurumen neneken dodogowin nyeneken um. Ipak punekesh namudok um, ihishmorim arpesh ta shutik enyudok ihinyumorim yopinyi mour aria ta shutuk Iruhin ananin nyeigur nyuto iruhw um Jisas Krais ananin nyeigur Debeiniyi nyeigur nyani debeiniyi dodog douk shapeum um Krais atun ihih nyumneh. Adur atin.

### *Apak Ta Mumnek Eriger Kabi Douk Jisas Nemnegor Um*

<sup>12</sup> O ipak eikish arpesh, ipak roguhw mare shikitak yowiyokuk abom um enyudok debeiniyi kwiraeh douk nyatogrump nyenekep pemnek debeiri eriger iri. Ipak mare pukri enyudok shokwiraehesh um douk enen kupaainyi abom, uwok. <sup>13</sup> Enyen douk ipak ponoprom Krais pemnek arudok eriger. Aria ipak ta punadudareh. Um hahudok nyumnah ananin debeiniyi nyeigur nyutogur yopugunum ahi, ipak ta punadudareh puriguk. <sup>14</sup> Aria arpesh shutrip um agundok ipak pasuhw Krais ananin bareaen dodog pagipeshen

um aria shuhep shunumogep um, ipak wosik ta punadudareh. Um maresh? Iruhin ananin Mishin douk nyeigur nyato iruhumen iri nyape ipak. <sup>15</sup> Aria ipak ta gamo pudukemesh um ipak mare punek enesh yoweishi inahos eshesh ta shunek pumnek eriger, uwok. Ipak mare pubo enen arpen nyugok o pukwuaruh o punak orokohun ponukesh kupaishiyen mour, o punek enesh kupaishi yoweishi inahos, uwok. <sup>16</sup> Aria ta ipak pumnek eriger um agundok ipak pagipesh Krais um, ipak mare abraen nyep, uwok. Ipak ta punek tenkyu um Iruhin um agundok ipak pasuhw Krais ananin nyeigur um.

<sup>17</sup> Nyutob douk batogur, aria Iruhin ta nurik nusuhw apak mape ananip awirop iri apakig kwotog gwurik. Aria ta anan nurik nusuhw apakig kwotog gwurik aria anan kadak nusuhw eshudok arpesh douk shakenyuk agabus ananin yopinyi baraen iri esheshev kwotog um, eshesh ta shupe mumam mumam? Eshesh ta shunomnek debeiri eriger. <sup>18</sup> Kabi douk Iruhin ananin baraen nyetem ananik Buk iri nyakrium. Baraen enyudok. "Aria yopishi arpesh shumnek eriger iyoh aria wata shupe wosik um, eshudok shakon agabus Iruhin iri ta shupe mumam? Eshesh ta shunomnek dedeber aturi eriger."

<sup>19</sup> Douk namudok aria eshudok arpesh douk Iruhin nukri wosik um eshesh shumnek eriger aria eshesh shumnegor um, eshesh ta shunek yopipi aih abom aria shukon eshesh kanak anan. Anan douk seiwok neneh ihishmorim arpesh aria nagipesh ananin baraen wosik abom iri.

## 5

### *Ipak Debeipi Um Iruhin Ananish Arpesh Ta Putaurumesh Wosik*

<sup>1</sup> Douk eik yakri ikrip ipak Krais ananish arpesh esheship debeipari um enyudok baraen um pugipeshen. Eik kanak shopunek douk yape debeiweiri yani ipak. Riguk eik yeyotu yatik Krais eikis nabes um agundok narao debeiri eriger um. Aria eik yakripesh enyudok baraen um anan. Aria kweipon eik shopunek ta ini ipak miyotu atugun aria mutik agundok ta Krais nutrugun abom aria nutogur yopugunum um. Aria douk eik yakri ikrip ipak debeipari namudok. <sup>2</sup> Ipak ta putaurumesh wosik eshudok armam armago douk Iruhin nekepesh um putaurumesh iri. Putaurumesh wosik kabi douk neyoh um sipsip iri nataurum sipsip wosik um. Punek enyudok mour um, ipak putaurumesh wosik aria pigipesh Iruhin ananik urkum aria pukri wosik. Ipak punek ananin mour wosik aria ipak urkwip mare purum agundok ta purao utabor um aria douk puneken aka, uwok. Ipak mishish ta shikitab abom um punek enyudok Iruhin ananin mour. <sup>3</sup> Aria ipak mare pukri pupe debeipari purao debeishi nyeiguw aria pusuwokes-ukuk um eshudok Iruhin ananish armam armago douk ipak pataurumesh iri, uwok. Ipak ta pupe wosik um eshesh shutik ipak aih aria shugipeshep shudukem ipak. <sup>4</sup> Aria hahudok nyumnah anudok Debeini douk apa nenekeh um neyoh arpesh douk shape kabi Iruhin ananish sipsip iri um nutogur yopugunum ahi, ipak ta purao debeishi abom nyeiguw douk ta shupe ihih nyumneh iri.

### *Apak Munak Mur Iruhin Ananis Atus Wis Abom*

<sup>5</sup> Ipak weroroimi armam shopunek ta punih ipak kanak aria pupe shakamum ipakim debeimi douk hataurumep iri. Aria ipak punih ipak kanak pupe shakamum kupaishi atin atin Kristen aria punagapesum. Um maresh? Baraen nyetem Iruhin ananik Buk iri douk nyakri namudok, "Iruhin apa nekeshuk agab eshudok arpesh douk eshesh kanak apa shanatuk esheshish nyeiguw shato iruhw iri. Aria anan apa nataurumesh

meyoh eshudok douk apa shaunih eshesh kanak aria shape shakamum kupaishi iri."

<sup>6</sup> Douk namudok aria ipak ta punih ipak kanak aria pupe shakamum debeini dodogowini Iruhin. Punekesh namudok um arigaha hahudok nyumnah anan kanak nakriyoh iri hutogur aria anan ta nutuk ipakish nyeiguwsh shuto iruhw.

<sup>7</sup> Aria ipak puhwar Iruhin pukripan um ihinyumorim enenyenen ipakin amaen douk apa nyenek ipakiruh aparuh yoweruh iri. Um maresh? Anan douk yopuni dodogowini douk apa nataurumep wosik iri.

<sup>8</sup> Ipak gamo pudukemesh aria pusuhw merik um ipak kanak wosik. Anudok ipakin horin Satan douk nape narahaen nanak kabi enen dodogowinyi wanohwinyi mahin laion gruruhuren nyanaki nyanak um. Enyen nyape nyarahaen um nyakri nyurim um enesh eshudok um nyesh nyishoh iri. Aria anan apa narahaen nanaki nanak um nakri nununu enesh arpesh. <sup>9</sup> Ipak ta pusuhw bilip piyotu dodogowip atip aria pukonaguk agabus Satan. Um maresh? Ipak padukemesh, kupaishi Kristen shape ihigunmorim agundok atap iri shopunek douk sharao amaen shemnek debeiri eriger namudok atin kabi douk ipak um. <sup>10</sup> Aria Iruhin douk baugos um agundok anan nataurumep meyoh um. Ipak douk patukur Krais aria douk um enyudok atin, douk Iruhin nahwarep panaki um pupe ananigun yopugunum bogaragunum douk ta nupe iih nyumneh iri. Aria douk banab nyutob meyoh ipak pemnek eriger, aria anan kanak ta nunekep pupe wosik aria putogur yopipari abom. Aria ta nataurumep nunekep piyotu dodogowip kabi douk utabor apa bosah urupat iri um. <sup>11</sup> Aria Iruhin atun douk nape dodogowini aria nape Debeini iih nyumneh iri. Adur atin.

### *Nyagiguk Iri Baraen*

<sup>12</sup> Apudok shup, baraen eik kanak yakriyen aria Sailas nenyemagu. Anudok Sailas, eik douk yatrun yakri anan apakin wanin douk neneck Krais ananin mour wosik abom iri. Eik yakritep baraen apudok banapi shup ipak douk pape kupairubi warub iri um yakri ipak pupe dodogowip. Aria yakri ikritep um enyudok baraen um Iruhin nataurumep meyoh um douk adurin atin abom. Douk namudok aria ipak piyotu dodogowip punek bilipumen pusuwen pugipeshen.

<sup>13</sup> Iruhin ananish arpesh shape abrudok wabur Babilon iri douk Iruhin nanagraehesh shani ipak iri shanadudareh aria shenekumepogu yopuhi nyumnah ipak. Aria eikin nukanin Mak shopunek nanadudareh aria nenemepogu yopuhi nyumnah ipak. Anan douk nemnek eikin baraen nasuhw Iruhin ananin baraen aria eik douk yahwaran nukanin. <sup>14</sup> Aria ipak puni kupaishi Kristen punapuprik um puneyabigum um ipak agundok ipak urkwip panawasham ipak atin atin um.

Eik yakri Iruhin nuneck ipak ihipmorim patukur Krais iri ipakiruh aparuh hur wosik.

## **Pagiguk Iri Shup Douk Pita Nenekap Iri Banenyi Baraen Um Enyudok Baraen Pita Nagiguk Nenyem Iri**

**1:1-2** Pita nanadudareh um eshesh Kristen aria nakripesch Iruhin ananin baraen.

**1:3-21** Iruhin nanagraehap mape ananip atup um douk mupe munek ananih sabaihi yopihi aih mishagrakuk riguk marik mape menekeh um

**2:1-22** Amam henek rohwumesh iri profet apa henek yoweishi aih. Namudok aria Iruhin ta nuwanom-umom yoweishi inahos amam henekesh iri aria hurao debeiri eriger

**3:1-16** Debeini ananih nyumnah ta hutogur aria ihishmorim eneshenesh eshudok ta shunak shuwishuk. Namudok aria apak ta munek yopihi aih mupe mutrugun-umah

**3:17-18** Pita nakripesch nyatuh iri baraen um nyunekesh shupe dodogowish um bilip

**1** Eik Saimon Pita douk yape shakammum Jisas Krais yenek ananin mour aria nagraehe um inek mour aposel um inak ikripesch ananin baraen aria yenekumepogu apudok shup ipak. Eik yenekapumagu ipak arpesh douk parao enyudok atin dodogowinyi bilip kabi douk apak maraen iri um. Jisas Krais apakin Iruhin douk nataurumap narapi mape wosik iri nenek yopihi atih aih aria nataurumep pemnek ananin baraen pasuhwen dodog.

**2** Ipak douk padukemesh um Iruhin nani apakin Debeini Jisas Krais. Douk namudok aria eik yakri um agundok ipak padukemesh um amam um hunek ehudok aih um amam hataurumep meyoh um huni enyudok um henekep ipakiruh aparuh hur wosik um hutogur debeh abom um ipak.

### *Iruhin Nahwarap Aria Nanagraehap Abom Um Mupe Ananish Atish Arpesh*

**3** Krais douk nahwarep um punaki puni anan purao ananih yopihi aih huni ananin debeinyi yopinyi dodog. Anan douk narao Iruhin ananin dodog aria nakop eneshenesh yopishi eshudok douk apak wokap-umesh um mupe wosik aria mugipesh Iruhin ananih aih um. Apak madukemesh um Krais aria anan douk nahwarap um nini apak murao ananin natrugin abomum iri nini ananih yopihi aih. **4** Aria um enyudok Jisas ananin debeinyi dodog atin, anan nakopesh jurug yopishi abom eshudok eneshenesh douk anan nakri adurin atinyi baraen um ta nukapeshi iri. Eshudok anan nakapesh iri ta shutaurumep pupe wosik. Ipak ta pupe namudok atin puni Iruhin aria pugipesh ananih yopihi aih. Um ipak puruwok-umaguk eneshenesh yoweishi inahos shape agundok atap iri douk apa shenek arpesh esheshish mishish shikitak-umesh um shunek yoweishi inahos iri.

**5** Douk namudok aria ipak ta gamo pudukemesh abom um punek yopihi atih aih. Aria pihanuh um enyudok um pasuhw Jisas ananin baraen dodog pugipesen um. Aria purao yopinyi saki pinyanuh um yopihi aih. **6** Aria enyudok um pusuhw merik um ipak kanak um pinyanuh um yopinyi saki. Aria enyudok um piyotu dodogowip pusah enenyenien dodog um pinyanuh um enyudok um pusuhw merik um ipak kanak um. Aria enyudok um pugipesh Iruhin ananih aih um pihanuh um enyudok um piyotu dodogowip um. **7** Aria enyudok um punek urkwip um kupaishi Kristen putaurumesh um pinyanuh um enyudok um pugipesh Iruhin ananih aih um. Aria

enyudok um ipak urkwip punawasham ihibhormim arpesh um pinyanuh um enyudok um punek urkwip um kupaishi Kristen putaurumesh um.

<sup>8</sup> Ipak padukemesh um apakin Debeini Jisas Krais anan douk baugos abom um ehudok iganigadae yarig yakriyeh iri aih. Aria ta ipak pugipesh ehudokmori aih aria pishagrakuk riguk pape penekeh um, ipakin saki um padukem um Jisas Krais um ta mare nyupe meyoh, uwok. Enyen ta nyuk-warmori sabaihi yopihi aih. Aria shopunek ta punek Krais ananin mour nyutogur wosik. <sup>9</sup> Meinyi arpen douk ehudokmori aih madae hupenyen iri uwe ta mare nyutik eshudok douk shape rougun iri nyudukemesh, uwok. Enyen kabi douk enen nabes seshukenyi arpen um. Enyen douk urkum mekenyaguk um agundok Krais neshurokuhen aria neneken nyatogur yopin um.

<sup>10</sup> Douk namudok aria ipak Kristen, ipak ta punek mour dodogowip atip pishagrakuk seiwok pape peneken iri um pugipesh agundok douk Iruhin nahwarep um pupe ananip atip um. Aria ta ipak punekesh namudok um, ipak ta mare putu punek yoweishi inahos, uwok. <sup>11</sup> Aria shopunek, kweipon Iruhin ta nunadudareh-umep nukri wosik abom um ipak punak puwish pupe agundok douk ta apakin Debeini Jisas Krais nupe debeini king ihih nyumneh um. Abrudok wabur ababur douk apakin Debeini Jisas Krais douk narap mape wosik atin iri napenyaburi.

<sup>12</sup> Adur, ipak padukemesh um enyudok baraen aria pasuhwen dodog enyudok adurin atinyi baraen. Aria eik ta wata ipeum ikripep atin um ipuhur um urkwip purum enyudok baraen. <sup>13</sup> Eik yakri enyen douk wosik um agundok eik wata yape agundok atap obi nyutob um ihur ipak um urkwip purum enyudok baraen um. <sup>14</sup> Um maresh, eik yadukemesh, eik douk hurukatin um igok. Enyudok enyen douk apakin Debeini Jisas Krais nakripe. <sup>15</sup> Douk namudok aria eik ta inek mour dodogoiwe atuwe um inekumepoguk anah yah hupeimepaguk um eik igokuk um, ipak ta urkwip purum enyudok baraen eik yakripen iri.

### *Apak Matik Agundok Krais Natrugun Abom Um*

<sup>16</sup> Apak douk makripen um agundok apakin Debeini Jisas Krais ta wata nutanamori um nyanti agundok anan dodogowin abom um. Aria enyen douk madae mukripen enen sakihasin baraen douk shadukemesh iri arpesh shakripap-enyuk iri uwe, uwok. Apak matrun abom apakis nabes um agundok anan dodogowin abom natrugun um aria apak makripen.

<sup>17</sup> Apak douk mani Krais mape aria matrun abom um agundok Yain Iruhin natuk ananin nyeigur nyato iruhw aria natauruman nenekan dodogowin natrugun abom um. Aria abudok nyutob anah mah hatograri gani dodogowini natrugun iri Iruhin napeum hanakumori Krais aria Iruhin nakri, “Anudok eikin Nuganin abom douk eik urkum manawashaman abom iri. Aria eikihw apahw shopunek douk hwanawashaman abom.”

<sup>18</sup> Abudok nyutob apak kanak mani Krais mape ahwudok yopuhwi yoduhw douk Iruhin ananihw aria memnek ahudok mah hanaki gani iruhw heven.

<sup>19</sup> Aria apak urkwip pormoguk enyudok baraen douk seiwok amam profet hakriyenyuk iri madukemen makri enyen douk adurin atin abom. Aria ta ipak pumnek amamin baraen pusuwen um, namudok douk wosik. Um maresh, amamin baraen douk nyape kabi enen lam hanin nyabuh nyakus arukwutigunum iri. Enyen ta hunin nyukus arigaha Debeini nunaki. Anan douk kabi okwudok unuk shuduwi douk apa kwakihi gagrukibus iri. Okwok ta kwukihi aria kwutrugun numun ipakip urkwip.

<sup>20</sup> Aria sagomatin ipak ta pudukemesh um douk madae anan atan profet anan kanak urkum mur um enen baraen nukriyen aria nunyem fruhin

ananik Buk uwe, uwok. <sup>21</sup> Um maresh, seiwok douk madae enen baraen amam profet hakriyen iri nyutograri amam kanak amamip urkwip uwe. Amam douk Iruhin ananin Mishin atin nyawishom nyomuhur aria hakri eyudok Iruhin ananin baraen.

## 2

### *Heneh Rohwumesh Iri Profet Amamih Yoweihai Aih*

<sup>1</sup> Seiwoh anam heneh rohwumesh iri profet hatogur hape orokohun um eshesh Israel aria hape heneh rohwumesh. Aria douk shopunek ta namudok atin. Anam heneh rohwumesh iri tisa omi ta hutogur hupe orokohun um ipak aria hunabeshuk hupe hukriep enenyen madae adurin iri uwe baraen. Aria ta ipak pugipesh amamin baraen um, ipak ta punak puwishuk yoweiburi wabur. Douk Debeini nagok um amam nator eneshenesh yoweishi inahos amam henekesh iri aria amam wata hakanuguk agabus henek yoweishi inahos. Amam hape henekesh namudok aria Iruhin ta ahudok atuh nunekam hurao debeiri eriger aria nom hugok. <sup>2</sup> Amam ta hunek yoweishi inahos aria sabaishi arpesh ta shugipesh amamih yoweihai aih. Aria kupaishi ta shutik amamih abraeniyh aih aria ta shukanuk agabus um Jisas Krais ananin yopinyi adurin atinyi baraen aria kupaishi shukri Jisas ananih yah yoweihai. <sup>3</sup> Amudok armam heneh nyigya um hakri amam atum hurao sabaishi eshudok eneshenesh. Douk namudok aria amam ta hukriep enen rohwin baraen douk amam kanak urkwip poromen hakriyen iri um hunatrip ipakibor utabor buni eneshenesh eshudok ipakish shopunek. Aria seiwok douk Iruhin naduke-mam aria nakri amam henek yoweishi inahos aria nagraeh anah nyumnah um nusuhw amamit kwot aria amam ta hunak huwishuk abom. Aria shopunek, anudok douk nakri nunemam kwot iri douk wata nape natrugun aria nununum.

<sup>4</sup> Ipak padukemesh, seiwok enesh Iruhin ananish enselahos shenek yoweishi inahos aria Iruhin madae nupe nutrish meyoh uwe, uwok. Anan neshopokesh shanak shape yoweiburi abom wabur. Aria gagundok eshesh shonoweshik shape arukwutigun um shape shatrugun um nyumnah douk ta Iruhin nusuhw esheshig kwotog ahi. <sup>5</sup> Ipak padukemesh, seiwok Iruhin madae nupe nutrish mokureg uwe seiwokishi arpesh douk shakon agabus anan iri, uwok. Anan neneh debeihii eshah hor aria abar bakih atap aria baesh shagok shatuh. Aria anan nataurum Noa atun douk nakripesh um shugipesh Iruhin ananih yopihi aih iri nani 7-poreish arpesh shopunek naraesh shape wosik. <sup>6</sup> Aria shopunek, anan neneh kwot um eshudok sabaishi arpesh shape arbudok biarub debeirubi warub Sodom bani Gomora iri aria nakri eshesh shenek yoweishi inahos. Aria anan naesh neneh debeihii nyih hanish hashahuk aria argabus atubus sakusuk. Enyudok anan douk neneken um neyabigap um anan ta nunekesh namudok atin um eshudok arpesh douk shape shakon agabus anan iri kabi douk seiwok nenekeh um eshesh Sodom iri Gomora um. <sup>7</sup> Ipak padukemesh, seiwok shopunek Iruhin nataurum anan yopuni arman nanahwarum Lot iri naran nape wosik. Lot ananihw apahw douk yowehw abom aria nakri uwok um ehudok yoweihai aih um shenek wehrur um. <sup>8</sup> Anudok yopuni arman Lot nani eshesh shape aria iih nyumneh anan natrish aria nemnekesh um eneshenesh yoweishi inahos eshesh shenekesh iri. Aria ananihw apahw yowehw abom aria nakri uwok abom um esheshih aih. <sup>9</sup> Debeini Iruhin douk nenekeh namudok um eshesh, douk namudok aria apak madukemesh um anan apa nataurum ananish arpesh douk shagipesh anan iri naraesh shape wosik. Douk namudok aria

meihi nyumnah enen amaen o kwiraeh nyutogrumesh um, Debeini douk nadukemesh um meihi yah ta anan nuraesh shupe wosik um. Aria kwiraeh ta mare nyunek uhwinyumesh, uwok. Aria shopunek, nadukemesh um meihi yah um nusuhw eshudok arpesh douk shakon agabus Iruhin iri um shupe shumnek debeiri eriger um. Aria nusuhwesh shupe shutrugun um hahudok nyumnah douk ta nusuhw eshesig kwotog ahi. <sup>10</sup> Enyudok baraen douk adurin abom. Aria eshudok arpesh douk shape shenek eneshenesh yoweishi inahos abom um shenek wehrur iri ta shumnek abom debeiri eriger. Eshudok arpesh, eshesh douk shakri uwok um Iruhin nupe debeini um eshesh iri.

Amudok henek rohwumesh iri armam douk madae hunogugur uwe. Amam hakri hutuk amamish atish nyeiguhw shuto iruhw aria madae hunogugur uwe um hiyangwreh-umesh enenyen yoweinyi baraen eshudok douk shape kabi enselahos douk shape iruhw iri um uwe, uwok. <sup>11</sup> Aria Iruhin ananish enselahos douk dodogowish abom sheshagrakuk amudok henek rohwumesh iri. Aria eshesh madae shatanam shiyotu shakon yomogos um Debeini aria shukripesh enenyen yoweinyi baraen eshudok shape iruhw iri uwe, uwok.

<sup>12</sup> Aria amudok armam hakripesh enenyen eshudok douk amam madae hudukemesh iri uwe. Amam hagugak kabi douk wanarish mahish shape debeihi urah iri um. Eshudok mahish douk madae enep yopipi urkwip pupenyesh uwe. Esheshish amakenyish douk sheshubuki um arpesh shunak shurimesh shuparugesh aria shesh shugok. Aria amudok armam shopunek douk namudok atin. Amam ta hugok hunak huwishuk kabi eshudok wanarish mahish um. <sup>13</sup> Amudok henek rohwumesh iri henek kupaishi arpesh sharao debeiri eriger. Aria kweipon Iruhin ta wata nuwanam amamish yoweishi inahos aria nenekam hurao debeiri eriger namudok atin. Amam hanadudareh um hawok sabaiguni worigun aria hagipesh yoweishi harik hapenyam iri aih henek eneshenesh yoweishi inahos yopugunum atugun. Aria amam hani ipak pape pawok debeguni worigun um, amam hanadudareh um agundok amam hape henek rohw aria henek amamih yoweishi aih um. Aria ehudok aih douk henekam hape kabi enen yoweinyi behrabinyi kak orokohun um ipak. <sup>14</sup> Ihih nyumneh amamis nabes sape um satak sape weyotu yeh iri armago atuw. Ihih nyumneh amam hapeum hani owo shenek wehrur um. Amam madae hukri um hukutukuk ehudok yoweishi aih uwe, uwok. Amam honokunem um kupaishi arpesh douk madae shusuhw Krais ananin baraen dodog iri uwe um honukesh shugipesham shunek yoweishi inahos. Amam douk hadukemesh abom um hunek nyigiya um kupaishi eshesish eshudok eneshenesh. Aria Iruhin douk juwehosin naapeum nunekam hurao debeiri eriger. <sup>15</sup> Amam hakutukuk yopuhi yah aria douk hagugak atin. Amam hagipesh Beor ananin nunganin Balam um ananiih yoweishi aih. Balam ananim urkum mor abom um utabor aria nakri nunek yoweishi inahos um nurao sabaibori utabor. <sup>16</sup> Adur, donkihos madae shiyagwreh atin uwe. Aria enen donki nyeyagwreh aria enyeniyah mah nyeyagwreh kabi arpeniyah mah um. Enyen nyaho anudok profet Balam nyatap-uman yah um ehudok rohwih aih anan nakri nunek iri. Ehudok aih douk eshesh shagugak iri atish shenekeh.

<sup>17</sup> Amudok henek rohwumesh iri armam hape kabi agusudok waiyas douk abar boragasi. Aria shopunek, amam hape kabi orug douk debeinya uhwin nyahur aria nyaraog gwanak sisiguk iri. Iruhin douk nogabe-imom anagun arukwtigun abom um amam kweipon hunak hupe um. <sup>18</sup> Amam hanadudareh heyagwreh wehinyi rohwinyi baraen um hutuk amamish

nyeiguhw shuto iruhw. Aria honokunem um enesh arpesh um hohur esheshiruh aparuh um shugipesh yoweishi harik hapenyesh iri aih. Aria douk esheship urkwip por abom um ehudok aih um shenek wehrur um. Eshudok arpesh, eshesh douk shape shenek mour um shakri shukutukuk eshudok arpesh douk shenek yoweishi inahos aria madae shudukemesh um Iruhin iri uwe.<sup>19</sup> Amam hakripesh hakri amamin baraen douk adurin atin aria hakri, "Aria ipak pugipesh apakin baraen um, ipak ta mare enesh eshudok shuweshikep. Ipak ta pupe wosik atin." Aria amam kanak douk amamih yoweishi aih howeshikam dodog aria hape shakamum eheh. Um maresh, aria eneh aih hunek uhwinyum enen arpen aria hasuhw merikwumen um, enyudok arpen ta nyupe shakamum ehudok aih.<sup>20</sup> Aria ta enesh arpesh shudukemesh um apakin Debeini Jisas Krais douk nataurumap narap iri um, eshesh douk shakutukuk jurug agundok atapih yoweishi aih. Aria ta ehudok aih wata hapeum huweshikesh dodog um, eshesh ta shupe yowesh abom. Sagomatin eshesh shape shenek yoweishi inahos um, eshesh shape yowesh wosik atin. Aria douk eshesh shape yowesh abom sheshagrakuk sagomatin sharik shapeum.<sup>21</sup> Aria eshesh madae shudukemesh um ahudok yopuhi yah um shunek yopihi aih um, ehudok douk yoweishi. Aria ta eshesh shudukemesh um ahudok yah huni Iruhin ananin yopinyi lo, aria eshesh wata shukon agabus Iruhin um, ehudok douk yoweishi aih abom.<sup>22</sup> Aria enen baraen douk arpesh shakriyen iri douk nyatogur adurin um eshesh. Baraen douk enyudok, "Nubat tagwugrakwesh aria wata tatanam tanak teshuhur tashoh." Aria enen shopunek baraen douk nyakri namudok, "Bur reshrokuhwi jurug aria wata ratanam ranak ranawatom."

### 3

#### *Adur Atin Debeini Ta Wata Nutanamori*

<sup>1</sup> O ipak ekish arpesh douk eik urkum manawashamep abom iri. Apudok shup douk yenekap-umepegou iri douk pagimagu papudok eik yarig yenekap-umepegou iri. Baraen eik yanyemagu asudok bias shus iri, eik yenyemagu um yakri ipuhur um ipak urkwip purum enyudok yopinyi atin baraen.<sup>2</sup> Eik yakri ipak punek urkwip abom um enyudok baraen douk seiwok Iruhin ananim profet hakriyenyuk iri. Nyuni enyudok dodogowinyi baraen apakin Debeini douk nataurumap narap mape wosik atin iri ananin douk apak ananip aposel makripepen iri.

<sup>3</sup> Sagomatin ipak ta pudukemesh um enyudok. Abudok nyutob ahudok hugiguk iri nyumneh hutogurum, anam armam douk ta hunekep enenyen iri ta hutogur. Amam ta hutogur aria hugipesh harik hapenyam iri yoweishi aih aria ta hunek eneshenesh yoweishi inahos.<sup>4</sup> Amam ta hunumugep hukri, "Anan nakri adurin atin baraen um anan ta wata nutanamori aria anan douk madae nunaki uwe! Anan nape agunum? Apakim popehem yamehem hagok hanaki arigaha douk aria ihishmorim eshudok douk shape namudok atin kabi douk seiwok sagomatin agundok atap natogur napeum!"<sup>5</sup> Aria amam kanak urkwip pakomuk um agundok seiwok Iruhin neyagwreh baraen atin aria neneh iruhw atap natogur napeum. Anan narik neneh abar bor aria amnab bakih bape orokohun um abar.<sup>6</sup> Aria Iruhin nakwu abar atubar nenekabar hurigasarubar bato aria babo ihishmorim arpesh shape abudok nyutob iri shani eneshenesh eshudok shape agundok atap iri shagok shatuh.<sup>7</sup> Aria douk enyudok Iruhin ananin baraen atin abom nyasuhw iruhw atap nani eneshenesh douk shape iruhw atap iri shapeum kweipon nyih hunish. Iruhin nasuhw shapeum kweipon ahudok nyumnah anan nusuhw eshudok arpesh douk

shakonuguk agabus anan iri esheshig kwotog ahi. Aria eshesh ta shunak shuwishuk abom.

<sup>8</sup> Aria ipak eikish arpesh abom douk eik urkum manawashamep abom iri mare urkwip pukepaguk um enyudok: Debeini nakri atuh nyumnah ahah douk kabi eshudok sabaishi 1,000-poreish kwarahos um. Aria 1,000-poreish kwarahos douk nakri kabi atuh nyumnah um. <sup>9</sup> Debeini douk madae nukri um nunek mour shokubur atin um nunek eshudok anan nakri adurin baraen um ta nunekesh iri uwe. Anan douk madae kabi enesh arpesh douk shakri shunek mour shokubur um uwe, uwok. Aria anan nakri uwok um enen arpen nyunak nyuwishuk. Anan nakri ihishmorim shukeshuk agabus yoweishi inahos aria shatanam shukon aparuh anan. Douk namudok aria douk anan urkum morum ipak aria wata nepe natrugun-umep um putanam punak um anan.

### *Kweipon Iruhw Atap Ta Nunak Nuwishuk*

<sup>10</sup> Aria kweipon hahudok nyumnah Debeini nunaki ahi ta hutogur kabi douk nakwuaruh iri nanaki um. Aria hahudok nyumnah, utag ta giyagwreh debeg aria tukurag gunak guwishuk. Aria ihishmorim eshudok douk shape utag iri ta nyih hunish shunak shuwishuk. Aria agundok atap shopunek nini ihishmorim eshudok arpesh shenekesh iri ta nyih hunish shunak shuwishuk. <sup>11-12</sup> Douk namudok aria ipak ta punek mared aih? Ipak pupe putrugun um ahudok Iruhin ananah debeihi nyumnah um hutogur obi nyutob, ipak ta pupe wosik abom pupe Iruhin ananip atip. Aria ipak pupe wosik pugipesh Iruhin ananah atih aih um punek ahudok nyumnah hutogur arigas. Hahudok nyumnah, debeihi nyih ta hunu utag gunak guwishuk. Aria ihishmorim eshudok shape iruhw utag iri ta nyih hukiyokes hunish huyatesh aria shunenem um abar. <sup>13</sup> Aria apak douk mape matrugun um eshudok douk Iruhin nakri enen adurin atinyi baraen um ta nunekesh iri. Kweipon anan ta nunek namugi utag guni namubi amnab um arpesh douk shenek yopih abom aih iri atish shueum.

### *Apak Ta Gamo Mudukemesh Aria Mupe Mutrugun Um Ahudok Nyumnah Debeini Nunaki Ahi*

<sup>14</sup> Aria ipak eikish arpesh douk eik urkum manawashamep abom iri douk pape patrugun um eshudok. Douk namudok aria ipak ta punek mour dodogowip atip um Iruhin nutrip um, anan mare nutik enesh yoweishi inahos shupenyep aria nukri ipak yopipari. Aria puni anan pusuhw atum urkum aria ipakiruh aparuh hur wosik. <sup>15</sup> Aria ipak ta urkwip purum Debeini aria pudukemesh um anan douk wata nepe natrugun um apak um nakri mutanam mukon aparuh aria kweipon anan wata nunarap munak mupe wosik abom. Enyudok baraen enyen douk kabi apakin ashukan Pol douk apak urkwip panawashaman iri nenyemori iri. Anan douk Iruhin nakon yopinyi saki aria nowem-umepaguk enyudok baraen ipak.

<sup>16</sup> Ihismorim shus Pol nenekas iri, anan nakripap enyudok atin baraen. Anan nakripap um mupe wosik aria mupe mutrugun um ahudok nyumnah Debeini nutanamori ahi. Aria baugenym um enen baraen nyape ananis shus iri douk madae nyonowereh uwe, uwok. Apak matarihen aria mabirak madae mudukem um baugenym uwe. Aria shashudok arpesh douk madae gamo shudukemesh wosik uwe aria madae shiyotu dodogowish um bilip iri uwe shenek rohw um enyudok baraen. Aria eshesh shenek rohw um sabainyi kupainyi baraen shopunek douk nyetem Iruhin ananik Buk iri. Eshesh shenekesh namudok aria kweipon eshesh ta shunak shuwishuk abom.

<sup>17</sup> Aria ipak eikish arpesan, ipak douk padukemesh um eshudok douk ta kweipon shutograri iri. Douk namudok aria ipak ta gamo pudukemesh. Um maresh, ta wosik atin amudok henek rohwumesh iri armam douk hekenyuk agabus Iruhin ananin yopinyi lo iri honukep putanam punek yoweishi inahos. Aria ta pukutukuk agundok douk ipak peyotu dodog aria pasuhw Krais ananin barae pagipeshen um. <sup>18</sup> Aria ipak douk padukemesh um apakin Debeini Jisas Krais anan douk nataurumap meyoh aria narap mape wosik abom iri. Douk namudok aria ipak ta pupe um punek enyudok saki nyuni ananin dodog douk anan nekepen iri nyutogur deben atin abom um ipak. Aria douk arigaha kweipon, debeini nyeigur nyuni debeiniy dodog ta nyupe um anan atun iih nyumneh. Adur atin.

## Parik Iri Shup Douk Jon Nenekap Iri Banenyi Baraen Um Enyudok Baraen Jon Narik Neneken Iri

1:1-4 Jon nakripesh Iruhin ananin baraen aria neshuhur um shunadudareh.

1:5-2:29 Iruhin anan douk natrugun abom iri. Aria apak ta mupe bogaragun um, um agundok munek yopihi aih aria urkwip punawasham ihishmorim arpesan um.

3:1-24 Apak douk mape Iruhin ananish batowish. Aria douk apak ta urkwip punawasham apakish ashukenyish owashish. Aria shenek yoweishi inahos iri arpesan douk Satan ananish aria shape shenek yoweishi inahos namudok atin.

4:1-6 Apak ta munek skelim ihishmorim arpesan aria mudukemesh um es-hesh Iruhin ananin Mishin nyapenyesh aka Satan ananin nyapenyesh.

4:7-5:21 Iruhin neshopoki ananin Nuganin nanaki agundok atap um nuyabigap ehudok aih um urkwip punawasham arpesan um. Apak ta munek bilip um anan aria mutukur anan atun um nunekap mupe wosik abom ihih nyumneh.

### *Krais Anan Douk Baugos Um Arpesan Shupe Wosik Abom Ihih Nyumneh Um*

<sup>1</sup> Apak menekumep baraen apudok shup aria makritep um anudok arman douk nanahwar um Baraen iri. Anudok arman Baraen, arpesan douk ta shuran shunek bilip aria shupe wosik abom ihih nyumneh. Seiwo sagomatin watak baugos um anudok arman Baraen douk nape. Aria apak douk memnek um agundok anan neyagwreh um aria matrun apakis nabes. Adur apak douk matrun aria masuhwan apakis wis. <sup>2</sup> Anan douk natogur yopugunum aria matrun. Aria apak douk meyagwreh adurin atin baraen um anan aria makrip ipak um anan douk baugos um arpesan shupe wosik abom ihih nyumneh um. Seiwo nani Yain hape aria douk natogur yopugunum matrun. <sup>3</sup> Apak douk matrun, memnekan um neyagwreh um aria douk makrip ipak shopune. Makritep um ipak puni apak mupe atugun abom musuhw atin. Aria apak muni apakin Yain Iruhin nini ananin Nuganin Jisas Krais mupe atugun musuhw atin. <sup>4</sup> Apak mowem enyudok baraen um apak muni ipak ta munadudareh abom muriguk.

### *Apak Ta Mupe O Murahaen Bogaragun Um Atugun*

<sup>5</sup> Enyudok baraen douk apak memnekan nakriyen iri douk enyudok douk makritep-umen. Baraen enyudok. Iruhin anan douk kabi lait um. Yopuyopun abom aria madae karowih um anah arukwutigun aih hupenyan um, aria ta mare neneke yoweishi inahos uwe, uwok meyoh. <sup>6</sup> Aria apak mukri apak mani Iruhin mape atugun masuhw atin, aria abudok nyutob apak mupe arukwutigun um agundok munek eneshenesh yoweishi inahos um, namudok douk munek rohw. Madae mugipesh adurin atinyi baraen uwe, uwok. Aria enenyenen mape meneken iri madae adurin uwe, uwok. <sup>7</sup> Aria ta apak murahaen bogaragun um, um agundok munek enenyenen yopuyi kabi anan nape bogaragun um yopun abom um, namudok adur apak mape atugun masuhw atin abom. Aria ananin nuganin Jisas ananibor owichibor bakrup apakiruh aparuh

aria nenekap matogur yopupari madae enesh yoweishi inahos shupenyap uwe, uwok.

<sup>8</sup> Aria apak mukri apak eneshenesh yoweishi inahos uwok enesh shupenyap um uwe, namudok douk munek rohw abom um apak kanak. Munek rohw aria adurinyi bараen douk madae enen nyupenyap uwe, uwok. <sup>9</sup> Aria ta apak muwerek eneshenesh apakish yoweishi inahos mukrip Iruhin um, anan douk yopini aria ta nugipesh ananin adurin atinyi bараen seiwok nakriyen iri. Ta nunek yopinyi mour abom um nukweshih apakish yoweishi inahos aria nugabeyap nunekap mutogur yopishi arpesh abom. <sup>10</sup> Aria apak mukri apak madae munek enesh yoweishi inahos um uwe, namudok douk makri Iruhin anan napeum neneke rohw iri. Aria ananin bараen douk madae nyupe apakiruh aparuh uwe, uwok.

## 2

### *Krais Anan Douk Yopuni Nataurum Apak Abom Iri*

<sup>1</sup> Ipak eikipari douk pape kabi eikish batowishumori, eik urkum manawashamep iri. Eik yenekumepogu bараen apudok shup um putrup aria mare punek enesh yoweishi inahos, uwok. Aria ta apak enen arpen nyunek enesh yoweishi inahos um, aria apak douk wosik anan nataurum ap iri douk narig Yain um Yain neneke gishaumap. Anan douk anudok yopuyopuni abom arman Jisas Krais. <sup>2</sup> Krais anan kanak nagok aria neneke Iruhin madae juwehosin um yoweishi inahos apak menekeh iri uwe, uwok. Nakwreyeshuguk nakri nyenekesh. Enyudok mour douk madae nuneken um nutaurum apak atup uwe, uwok. Neneken um nutaurum ihishmorim arpesh shape agundok atap iri.

<sup>3</sup> Aria apak mukri mugipesh Iruhin ananin lo um, namudok douk mudukemesh abom namudok. Apak adur madukeman wosik abom um Iruhin. <sup>4</sup> Aria enen arpen nyukri enyen wosik nyadukemesh um Iruhin wosik, aria enyen mare nyugipesh ananin lo um uwe, namudok douk nyenek rohw. Aria adurinyi bараen douk madae nyupe enyenyihw apahw uwe, uwok. <sup>5-6</sup> Aria arpen douk nyugipesh Iruhin ananin bараen iri, enyudok arpen douk urkum manawasham Iruhin abom nyeshagrakuk riguk nyarik urkum manawashaman um. Aria enen arpen nyukri enyen nyani Iruhin nyape um, aria enyen ta nyunek eneheneh yopihu aih kabi Jisas Krais nenekeh iri um. Douk munekesh namudok aria ta mudukemesh mukri apak adur matukur Iruhin mape.

### *Arpesh Urkwip Panawasham Esheshish Arpesh Iri Douk Shape Bogaragun um*

<sup>7</sup> Eikish arpesh, enyudok lo yenjemagu um ipak iri douk madae enen namunyi uwe, uwok. Enyen douk watak sagomatit paraen iri. Enyudok lo enyen douk enyudok bараen ipak seiwok pemneken iri. <sup>8</sup> Aria enyudok lo douk yenjemagu um ipak iri douk namunyi. Apak douk matik abom Krais nagipeshen wosik. Aria ipak shopunek namudok pagipeshen um kupaihi shutrip. Um maresh? Douk arukwutigunih douk hakri hunak huwishuk aria adurit lait douk tatogur tape.

<sup>9</sup> Aria enen arpen nyukri enyen douk nyape agundok lait tabuh um, aria enyen douk nyekenyuk agab enen enyenyin arpen um, enyen douk watak nyape arukwutigunum. <sup>10</sup> Aria arpen douk enyenyim urkum munawasham enen enyenyin arpen iri, enyen douk adur nyape agundok lait tabuh um. Namudok aria enyudok arpen douk madae enesh yoweishi inahos shupenyen uwe, um ta shuneken nyunek yoweishi inahos iri, uwok. <sup>11</sup> Aria enyudok arpen douk nyekenyuk agab enen enyenyin arpen iri,

enyen douk nyape arukwutigunum. Enyen nyape nyarahaen arukwutigunum atih aria madae nyudukem um agundok douk enyen nyanakum uwe, uwok. Um maresh, arukwutigunih heneken aria madae nyutrugun wosik uwe, uwok.

<sup>12</sup> Ipak eikish arpesh douk pape kabi eikish batowish-umori, Iruhin anan douk urkum morum agundok Krais nagok nator apak um aria anan madae nusuhwesh nupe um yoweishi inahos apak menekesh iri uwe, uwok. Nakwreyeshuk. Douk namudok aria eik yenekumepogu baraen um apudok shup. <sup>13</sup> Ipak douk kabi eikim arhim-umori, ipak padukeman wosik anudok arman douk seiwok wata sagomatin baugosum nape aria douk watak nape iri. Ipak weroroimi armam, ipak douk pabouk Satan nabuhuk. Namudok aria eik douk yenekumepogu baraen um apudok shup.

<sup>14</sup> Ipak batowish, ipak douk padukeman wosik apakin Yain. Namudok aria eik douk yenekumepogu baraen um apudok shup. Ipak arhim, ipak douk padukeman wosik anudok arman douk seiwok wata sagomatin baugos um nape aria douk wata nape iri. Namudok aria eik douk yenekumepogu baraen apudok shup. Ipak weroroimi armam, ipak douk wosik dodogowip um agundok ipak madae punek yoweishi inahos um uwe. Iruhin ananin baraen adur nyapenyep aria ipak pabouk anudok yoweini Satan nabuhuk. Namudok aria eik douk yenekumepogu baraen um apudok shup.

### *Apak Ta Mukehuk Agabus Ehudok Atapihi Yoweihai Aih*

<sup>15</sup> Ipak mare urkwip punawasham yoweihai eneheneh agundok atapihi aih hani eneshenesh shape agundok atap iri, uwok. Aria enen arpen urkum munawasham yoweihai eneheneh agundok atapihi aih um, aria enyen douk madae urkum munawasham Yain uwe, uwok. <sup>16</sup> Apak douk madukemesh. Ihihmori yoweihai aih douk agundok atapishi arpesh ihih nyumneh mishish shakitak um shunekeh iri douk ehudokmori. Shatik eneshenesh eshudok mishish shakitakumesh um shunek yoweishi inahos, shatik kupaishi eshudok shanawash-umesh, shanagunukuk um esheshish sabaishi eshudok eneshenesh um. Ehudokmori aih douk madae Iruhin nukepah uwe, uwok. Ehee douk agundok atapihi abom aih. <sup>17</sup> Agundok atap pani eneshenesh douk arpesh shapeum shatrish mishish shakitakumesh aria shanawash-umesh iri, eshesh douk ta shunak shuwishuk. Aria eshudok arpesh douk shugipesh Iruhin ananin urkum iri, eshesh ta shupe ihih nyumneh.

### *Jisas Ananin Horin Douk Natogur Jurug*

<sup>18</sup> Ipak eikish arpesh douk patogur kabi eikish batowish-umori, hagiguk abom iri nyumnah douk hurukatin um hutogur. Riguk douk pemneken baraen um Krais ananin horin ta nutogur. Aria Krais ananish horim, douk shatogur sabaishi. Namudok aria madukemesh um, hagiguk iri nyumnah douk hurukatin um hutogur. <sup>19</sup> Eshudok arpesh douk shakutup-ukuk. Aria riguk douk shanaki sheirap obi nyutob, abudok nyutob shopunek madae apakish abom uwe, uwok. Douk apakish abom akure, douk ta shuni apak abom mupe. Aria shakutup-ukuk aria madukemesh abom um eshudok ihishmorim arpesh douk madae apakish uwe, uwok.

<sup>20</sup> Aria Krais douk nakapari Iruhin ananin Mishin nyabuhi nyawishep aria ipak ihishmorim douk padukemesh um Iruhin ananin adurin atinyi baraen. <sup>21</sup> Eik madae inekumepogu baraen apudok shup um Ikripep enen adurin atinyi baraen douk madae pudukemen iri uwe, namudok uwok. Ipak douk padukeman enyudok adurinyi baraen. Aria douk shopunek Padukemesh um adurinyi baraen douk madae nyugremen atin

uwe rohwinyi Baraen, uwok. Namudok aria douk yenekumepogu bareaen um apudok shup.

<sup>22</sup> Arpesh douk sheneyagwreh rohwinyi bareaen iri douk meishi arpesh? Eshudokmori arpesh douk shakri Jisas anan madae Krais uwe, douk Iruhin nagraehan aria neshopokan nanaki iri uwe, uwok. Eshudokmori arpesh douk shakanuk agabus apakin Yain nani ananin Nuganin. Aria namudok douk shatogur Krais ananish horim abom. <sup>23</sup> Meishi arpesh douk shukon agabus Nuganin iri, eshesh douk shopunek shakon agabus Yain. Eshudok douk shukon aparuh Nuganin iri, eshesh douk shopunek shakon aparuh ananin Yaken.

### *Iruhin ananin Mishin Apa Nyeyabigap Adurinyi Baraen*

<sup>24</sup> Enyudok bareaen douk riguk wata sagomatin pemneken iri, ipak douk pusuwen dodog abom ipakigos baragos. Aria pusuwen dodog abom namudok um, ipak ta putukur nukanin nini Yaken iih nyumneh. <sup>25</sup> Aria Krais anan kanak douk nakripep enyudok adurin atinyi bareaen. Nakriipum ta nunekap mupe wosik abom iih nyumneh um.

<sup>26</sup> Eik yenekumepogu bareaen apudok shup um iwerehumesh bareaen eshudok arpesh douk shakri shunek rohwumep pugipesh kupainyi bareaen iri. <sup>27</sup> Aria ipak douk Krais nakepari Iruhin ananin Mishin nyawishep aria douk nyapenyep. Aria ta mare enesh arpesh shiyabigep um pudukemesh um enesh eshudok eneshenesh, uwok. Iruhin ananin Mishin ta nyiyabigep iihishmorim eshudok. Aria enyudok bareaen douk enyen nyeyabigep-enyi, enyen douk adurin atin abom. Madae rohwin uwe. Namudok aria ipak pugipesh enyenyin bareaen abom aria putukur Krais pupe dodogowip atip.

<sup>28</sup> Ipak eikish arpesh douk pape kabi eikish batowish-umori, douk ipak putukur abom Krais pupe namudok. Um ahudok nyumnah anan nukri nutogur yopugunum-ahi, apak ta dodogowip mupe. Ta mare abraen nyop aria munogugur mukri munak munabeshukuk um anan, uwok.

<sup>29</sup> Ipak douk wosik padukemesh um Krais anan douk yopuni arman abom. Namudok aria ipak douk pudukemesh namudok. Ihishmorim arpesh shunek yopinyi atin iri, eshesh douk shatogur Iruhin ananish batowish abom.

## 3

### *Douk Apak Mape Iruhin Ananish Batowish*

<sup>1</sup> Yaipo, ipak ta pure urkwip aria punek urkwip um agundok douk Iruhin anan urkum munawasham apak abom um. Ananim urkum manawasham apak abom aria douk nahwarap ananish batowish. Namudok aria adur atin, apak douk Iruhin ananish batowish. Agundok atapishi arpesh douk madae shudukemesh um apak uwe, uwok. Umum maresh, eshesh madae shudukemesh um Iruhin uwe. <sup>2</sup> Eikish arpesh, douk apak mape Iruhin ananish batowish. Aria Iruhin douk watak neyabigap um agundok kweipon ta mupe mumam abom um uwe, watak. Aria apak douk madukemesh um abudok nyutob Krais nutogur obi nyutob, apak ta mutogur mupe kabi anan um. Um maresh? Apak ta mutrun wosik abom kabi anan nape abom um. <sup>3</sup> Aria ihishmorim arpesh apa shape shatrugun um Krais iri, eshesh apa shanagapesh um eshesh kanak aria shape yopiyopishi meyoh abom kabi Krais anan yopuyopuni abom um.

<sup>4</sup> Enyudok arpen nyenek yoweishi inahos iri, enyen douk nyabrig Iruhin ananin lo. Um maresh? Agundok shenek yoweishi inahos um douk baugos abom um shabrig Iruhin ananin lo um. <sup>5</sup> Ipak padukemesh. Krais douk natogur nator apak aria nenek Iruhin madae nunasuhwesh nupe um

yoweishi inahos apak menekesh iri uwe, uwok. Anan Krais douk madae enesh yoweishi inahos abom shupenyan uwe, uwok meyoh. <sup>6</sup> Namudok aria eshudok arpesh douk shatukur Krais iri, eshesh douk madae shupe um shunek yoweishi inahos namudok atin uwe, uwok. Aria eshudok douk shapeum shenek yoweishi inahos iri, eshesh douk madae shutik Krais o shudukeman uwe, uwok.

<sup>7</sup> Ipak eikish arpesh douk patogur kabi eikish batowish-umori, ipak gamo pudukemesh. Ta enen arpen nyunek rohwumep aria pugipeshuk kupainyi bараен. Arpesh shapeum shenek yopinyi atin iri, eshesh douk yopishi abom kabi Krais anan yopuni abom um. <sup>8</sup> Seiwok wata sagomatin Satan nenen yoweishi inahos. Namudok aria eshudok arpesh douk shapeum shenek yoweishi inahos namudok atin iri, eshesh douk Satan ananish arpesh. Aria baugenyum um bараен um agundok Iruhin ananin Nuganin natogurum, anan douk natogurum nununu Satan ananin yoweiniy mour. <sup>9</sup> Enyudok arpen douk nyatogur Iruhin ananin batowin iri, enyen douk madae nyupe um nyunek yoweishi inahos namudok atin uwe, uwok. Um maresh? Enyen douk ehudok Iruhin ananin aih abom hapenyen iri. Enyenyin Yaken douk Iruhin aria ta mare nyupe um nyunek yoweishi inahos namudok atin, uwok. <sup>10</sup> Aria apak mukri mudukemesh um Iruhin ananish arpesh meishi aria Satan ananish meishi um, apak ta mudukemesh namudok. Arpen douk madae nyunek yopihi aih iri uwe o enyen madae urkum munawasham enyenyinyi arpen iri uwe, enyen douk madae Iruhin ananin batowin uwe, uwok.

### *Apak Atin Atin Ta Urkwip Punawasham Abom Kupaishi Arpesh*

<sup>11</sup> Riguk wata sagomatin douk pemneken enyudok bараен. Bараен enyudok. Apak atin atin ta urkwip punawasham abom kupaishi. <sup>12</sup> Apak mare mudukem anudok arman Kein, uwok. Anan douk Satan ananin Nuganin aria nabo ananin wanin nagok. Anan Kein ananin mour douk yoweiniy. Aria ananin wanin Abel ananin mour douk yopinyi. Namudok aria douk nan nagok.

<sup>13</sup> Namudok aria eikish arpesh, ta agundok atapishi arpesh shukri uwok-umep aria shukep agabus um, ipak douk mare mishish shikitak yowiyokuk, uwok. <sup>14</sup> Apak douk wosik urkwip panawasham apakishi arpesh. Namudok aria madukemesh um apak makutukuk ahudok shagok-ahi yah aria matogur ahudok anah douk shape wosik abom iih nyumneh um. Enyudok arpen douk enyenyim urkum madae munawasham enyenyishi arpesh iri uwe, enyen douk watak nyape ahudok shagok-ahi yah. <sup>15</sup> Enyudok arpen douk nyutik nabes yowes um enen enyenyin arpen iri, enyen douk kabi nyaen nyagok abom um. Aria ipak douk padukemesh. Arpen nyabo kupainyi nyagok iri, enyen douk madae nyurao okwudok outuk um ta nyupe wosik iih nyumneh um nyupenyok uwe, uwok.

<sup>16</sup> Jisas douk nagok um nutaurum apak. Douk namudok aria apak madukemesh um agundok apakip urkwip punawasham arpesh um. Aria apak douk shopunek mukri wosik abom um kupaishi shop mugok um mutaurum apakishi arpesh. <sup>17</sup> Aria ta enen arpen nyunosuh sabaishi eneshenesh agundok atapishi eshudok, aria enyudok arpen nyutik enen enyenyin yaruhi arpen um eshudok aria madae nyukri giha-umen um uwe, enyen douk mare nyukri enyen urkum munawasham Iruhin, uwok. Enyen douk nyenek rohw. <sup>18</sup> Eikish batowish, apak madae mukri urkwip punawasham arpesh um agundok miyagwreh wehinyi bараен atin um, uwok. Apak mukri apakip urkwip panawasham arpesh um, namudok douk munekumesh abom yopihi aih o mour.

*Iruhin Ananish Arpesh Douk Madae Shunogugur Um Shunak Hurukatin  
Um Anan Uwe, Uwok*

<sup>19</sup> Munekesh namudok um agundok apakip urkwip punawasham apakish arpesh um, namudok ta mudukemesh mukri apak adur madukemesh um adurinyi baraen magipeshen. Munekesh namudok aria apakish mishish ta yopiyopish mupe dodogowip abudok nyutob apak munek beten munak hurukatin um anan obi nyutob. <sup>20</sup> Aria abudok nyutob apakip urkwip purum enesh apak menekesh iri yoweishi inahos um, aria apak ta mudukemesh abom namudok. Anan douk debeini abom neshagrakuk apakip urkwip nadukemesh abom um eneshenesh. <sup>21</sup> Namudok aria ekish arpesh, ta apakip urkwip mare purum eshudok yoweishi inahos douk apak menekesh iri aria mare mukri apak yoweipi um, namudok douk meyotu dodogowip atup abom manak hurukatin um anan. <sup>22</sup> Aria apak mukri munek beten morigan um enesh eshudok eneshenesh um, anan ta nukapesh. Um maresh? Apak douk magipesh ananin lo munek enenyenen anan nakri-enyi. <sup>23</sup> Ananin lo douk enyudok. Apak munek bilip abom um ananin Nuganin Jisas Krais aria urkwip punawasham apakish atin atin arpesh. Munekesh kabi Krais nakripap dodogowinyi baraen um. <sup>24</sup> Aria enen arpen nyugipesh Iruhin ananin lo um, enyen douk nyape Iruhin aria anan nape enyen. Iruhin douk nakapari ananin Mishin aria enyen nyataurumap madukemesh um Iruhin douk nape apak.

## 4

*Arpesh Douk Iruhin ananin Mishin Nyapenyesh Iri Shani Eshudok Enesh  
Nyeneck Rohwumesh Iri Mishin Nyapenyesh Iri*

<sup>1</sup> Ekish arpesh, sabaimi henek rohwumesh iri profet douk hape harahe hanak ihigunum agundok atap. Namudok aria ipak mare punek bilip um ihm-morim profet douk hukri amam douk Iruhin ananin Mishin nyapenyam iri, uwok. Aria ipak punek skelimam ihm-morim um pudukemesh um amam adur Iruhin ananin Mishin nyapenyam o enen kupainyi. <sup>2</sup> Pakri pudukemesh um Iruhin ananin Mishin um, ipak douk ta pudukemesh namudok. Ihishmorim arpesh ta shukri, "Jisas Krais douk natogur adurin arpen." Arpesh shukri namudok iri douk Iruhin ananin Mishin nyapenyesh. <sup>3</sup> Aria ihishmorim arpesh douk shakenyuk agabus enyudok baraen um Jisas iri, eshesh douk madae Iruhin ananin Mishin nyupenyesh uwe, uwok. Eshesh douk kupainyi mishin nyapenyesh. Enyudok kupainyi mishin douk Krais ananin horin ananin. Anan douk pemnek baraen um ta nunaki iri. Aria douk natogur nape agundok atap.

<sup>4</sup> Aria ipak ekish arpesh, ipak douk pape Iruhin ananip. Aria ipak douk pam habuhuk amudok rohwimi profet. Um maresh? Enyudok nyapenyep iri Mishin douk dodogowin atin abom nyabouk enyudok enen mishin nyape agundok atapishi arpesh iri nyabuhuk. <sup>5</sup> Amudok armam, amam douk agundok atapimi meyoh. Namudok aria amam douk hapeum heyagwreh um agundok atapishi eneshenesh atish. Heyagwreh aria agundok atapishi arpesh shemnek amamin baraen. <sup>6</sup> Aria apak douk Iruhin ananip. Eshudok arpesh shadukemesh um Iruhin iri, eshesh douk shemnek apakin baraen. Aria eshudok madae Iruhin ananish iri uwe, eshesh douk madae shumneken atin uwe apakin baraen, uwok. Aria yah douk ahudok, um mudukemesh um enyudok Iruhin ananin Mishin douk nyape um nyeyagwreh adurin atin baraen iri meinyi aria enyudok enen nyape um nyenek rohwumesh iri mishin meinyi um.

### *Iruhin Anan Urkum Manawasham Apak Abom*

<sup>7</sup> Ekish arpesh, apak atin atin ta urkwip punawasham apak kanak abom um. Um maresh? Ehudok aih um urkwip panawasham kupaishi um douk Iruhin ananiih abom um. Arpesh urkwip punawasham kupaishi iri, eshesh douk Iruhin ananish batowish abom. Aria eshesh douk shadukeman wosik abom Iruhin. <sup>8</sup> Iruhin anan douk baugos um agundok urkwip panawasham kupaishi um. Namudok aria meinyi arpen douk enyen madae urkum munawasham enyenyish arpesh iri uwe, enyen douk madae nyudukem Iruhin uwe, uwok. <sup>9</sup> Namudok aria Iruhin neyabigap um agundok anan urkum manawasham apak abom um. Neyabigap namudok. Anan douk atun nugarin meyoh. Aria neshopokan nanakumori agundok atap um nutaurumap murao okwudok outuk um mupe wosik abom iih nyumneh um.

<sup>10</sup> Baugos um agundok Iruhin ananiih urkum manawashamap um douk namudok. Apak madae murik urkwip punawasham Iruhin uwe, uwok. Aria douk anan narik urkum manawasham apak aria neshopoki ananiih Nuganin nanaki nataurumap. Nataurumap nagok aria nenen Iruhin madae juwehosin um apak aria nukri um nunasuhwesh nupe um yoweishi inahos apak menekeh iri uwe, uwok nakwreyeshuk. <sup>11</sup> O ekish arpesh, enyudok mour abom um Iruhin neshopoki ananiih nuganin nanaki neneken um nutaurum apak um, enyen douk nyeyabigap abom um agundok Iruhin anan urkum manawashamap abom um. Namudok aria apak ihishmorim atin atin shopunek apakip urkwip ta punawasham ihishmorim abom um. <sup>12</sup> Madae enen arpen nyutik Iruhin uwe, uwok. Aria apak ihishmorim atin atin apakip urkwip punawasham ihishmorim abom um, Iruhin ta nupe apak atin atin abom. Namudok aria ehudok ananiih aih um urkwip panawasham um kupaishi um ta hutogur dodogowih abom um apak.

<sup>13</sup> Anan douk nakop ananiih Mishin nyapenyap. Namudok aria madukemesh um, apak douk mani anan Iruhin mape aria anan shopunek nani apak mape. <sup>14</sup> Yain Iruhin neshopoki ananiih Nuganin nanaki aria nataurum apak ihishmorim mape agundok atap iri narap matanamori mape wosik atin abom. Apak matik namudok aria douk makrip arpesh enyudok baraen. <sup>15</sup> Aria enen arpen nyukri Jisas anan douk Iruhin ananiih Nuganin um, enyen douk nyani fruhin nyape aria Iruhin nani enyen nape. <sup>16</sup> Aria apak kanak douk madukemesh um agundok Iruhin anan urkum manawashamap abom um. Madukemesh aria munek bilip makri adur um anan douk urkum manawashamap abom.

Iruhin anan douk baugos abom um agundok urkwip punawasham kupaishi um. Namudok aria shashudok arpesh douk shupe um urkwip punawasham kupaishi iri, eshesh douk shape Iruhin aria Iruhin nape eshesh. <sup>17</sup> Baugeniyum um baraen um agundok Iruhin nuhur apakip urkwip aria panawasham abom apakish arpesh um, douk um apak ta mare munogugur ahudok nyumnah debeiti kwot tunenek-ahi. Um maresh? Apak wata mape agundok atap obi nyutob, apak douk madukem Krais abom. Namudok aria apak ta mare munogugur, uwok. <sup>18</sup> Arpen douk enyenyim urkum manawasham abom enyenyishi arpesh shani Iruhin wosik iri, enyen douk madae nyunogugur atin uwe, uwok. Aria ehudok aih hutogur dodogowih atih um, enyen douk ta nyihiyahuk agundok shanogugur um. Baugos um agundok arpesh shanogugur um douk namudok. Shanogugur um Iruhin nunekumesh kwotog um esheshish yoweishi inahos aria nunekesh shurao debeiri eriger. Aria arpen douk nyanogugur

iri, enyen douk madae dodogowin abom um urkum munawasham Iruhin nini enyenyish arpesh uwe, uwok.

<sup>19</sup> Iruhin anan narik urkum manawasham apak. Namudok aria douk, apak shopunek wata urkwip panawasham anan nani apakish arpesh.

<sup>20</sup> Aria enen arpen nyukri enyen urkum manawasham Iruhin, aria enyen douk nyekenyuk agab enen enyenyinyi arpen um, enyen douk nyenek rohw. Aria enyen urkum madae munawasham enyudok arpen douk nyatrin abom enyenyis nabes iri um uwe, namudok enyen ta urkum munawasham Iruhin mumam, douk enyen madae nyutrun enyenyis nabes iri uwe? Uwok meyoh. Enyen douk nyenek rohw abom. <sup>21</sup> Lo douk Krais nakopen iri enyudok. Meinyi arpen douk enyenyim urkum munawasham Iruhin iri, namudok atin enyenyim urkum ta munawasham enyenyish arpesh shopunek.

## 5

### *Iruhin Ananish Arpesh Douk Dodogowish Abom Um Shubouk Agundok Atapihi Yoweihai Aih Hubuhuk*

<sup>1</sup> Ihishmorim arpesh douk shunek bilip shukri Jisas anan Krais, douk Iruhin nagraehan aria neshopokan nanakumori nunarao arpesh iri um, eshudokmori arpesh douk shape Iruhin ananish batowish abom. Ihish arpesh douk esheship urkwip panawasham anan yaken iri, eshesh douk shopunek apa urkwip panawasham ananin batowin shopunek. <sup>2</sup> Aria apak urkwip punawasham Iruhin aria mugipesh ananin lo um, namudok douk mudukemesh mukri apakip urkwip adur panawasham ananish batowish abom shopunek. <sup>3</sup> Baugos um agundok apakip urkwip punawasham Iruhin um douk namudok. Apak magipesh ananin lo. Aria ananin lo douk madae debeinyi mour abom um apak mugipeshen um uwe, uwok. <sup>4</sup> Um maresh? Ihishmorim arpesh shape Iruhin ananish batowish iri douk wosik dodogowish shabo agundok atapihi yoweihai aih habuhuk. Baugos um apak munek uhwinyum ahwudok wanohw, um mubo eneshenesh agundok atapishi yoweishi inahos shubuhuk um douk namudok. Apak musuhw Iruhin ananin baraeen dodog aria mugipeshen wosik. <sup>5</sup> Meishi arpesh ta wosik dodogowish um shubouk agundok atapihi yoweihai aih hubuhuk? Eshudok arpesh douk eshudok shunek bilip shukri Jisas anan douk Iruhin ananin Nuganin iri atish.

### *Iruhin Nakripap Baraen Um Gamo Mudukemesh Abom Um Ananin Nunganin*

<sup>6</sup> Jisas Krais douk anudok arman abom douk nanaki agundok atap iri. Nanaki neneb baptais arigaha aria shan nagok ananibor owishibor bau babuhi atap. Anan douk madae nunakumori agundok nunek baptais abar atubor um uwe, uwok. Aria douk nanakumori nunek baptais aria shon nugok owishibor butourak buh bubuhi atap shopunek. Iruhin ananin Mishin douk nyape um nyeyagwreh adurin atin baraeen iri, enyen douk nyakripap nyakri enyudok baraeen douk adurin. Enyudok baraeen um Krais neneb baptais aria eshesh shan nagok um. <sup>7-8</sup> Biyesh atin eshudok douk shawereh abom baugeniyum um enyudok adurin atinyi baraeen um Krais. Eshesh douk eshudok. Iruhin ananin Mishin nyani abar iri owishibor. Eshesh douk shakri abom atin baraeen. <sup>9</sup> Apak douk memnek baraeen arpesh shakripap-nyi aria munek bilipumen. Aria baraeen douk Iruhin nakripap-nyi douk dedeben atin abom nyeshagrakuk arpesh shakripap nyi. Aria enyudok Iruhin nakripap-nyi baraeen, anan douk nakripap

enyudok baraen um ananin Nuganin. <sup>10</sup> Namudok aria eshudok arpesan douk shapeum shenek bilip um Iruhin ananin Nuganin iri, eshesh douk sharao enyudok Iruhin nakripap-enyi adurinyi baraen nyape esheshiruh aparuh. Aria eshudok arpesan douk madae shunek bilip um Iruhin iri uwe, eshesh douk shahwar Iruhin shakri napeum neneh rohw atin iri. Um maresh, eshesh douk madae shunek bilip um enyudok baraen uwe, douk Iruhin nakripap um ananin Nuganin um, uwok. <sup>11</sup> Aria enyudok adurinyi baraen douk Iruhin nakripap-enyi douk enyudok. Iruhin douk neneh kap um mupe wosik abom iih nyumneh. Aria baugos um agundok mupe wosik iih nyumneh um douk nyape um ananin Nuganin atun. <sup>12</sup> Meinyi arpen douk nyutukur ananin Nuganin iri, enyen douk ta nyupe wosik abom iih nyumneh. Aria arpen douk madae nyutukur Iruhin ananin Nuganin iri uwe, enyen ta uwok meyoh.

### *Iruhin Neneh kap Um Mupe Wosik Abom Iih Nyumneh*

<sup>13</sup> Eik yenekumepogu enyudok baraen ipak douk penek bilip um Iruhin ananin nyeigur iri. Yenekenyumagu yakri ipak putrin aria pudukemesh um, ipak Iruhin douk neneh kap um pupe wosik abom iih nyumneh. <sup>14</sup> Aria apak mugipesh enenyen Iruhin ananin urkum makriyen iri atin aria munek beten morigan um enesh eshudok eneshenesh um, anan ta numnek apakin beten. Namudok aria abudok nyutob munak abom hurukatin um anan aria munek beten obi nyutob, apak douk ta dodogowip aria mare munogugur um anan, uwok. <sup>15</sup> Aria apak madukemesh um anan apa nemeh iihnmorim beten apak marigan um. Namudok aria apak douk mudukemesh um enyudok. Abudok nyutob munek beten morigan um nukop enesh eshudok eneshenesh obi nyutob, apak ta munare urkwip mukri eshudok munek beten marigan-umesh iri douk adur kabi nakopesh masuhwesh um.

<sup>16</sup> Aria enen arpen nyutik enen enyenyin arpen nyunek enesh yoweishi inahos douk madae wosik um shuneken nyunak um yoweiburi wabur um nyugok abom um uwe, enyudok arpen ta nyunek beten nyorik Iruhin um nutaurum enyudok nyenek yoweishi inahos iri, um enyen nyupe wosik abom iih nyumneh. Enyudok baraen douk yakriyen um eshudok arpesan douk shenek eshudok yoweishi inahos douk madae wosik um shunekesh shunak yoweiburi wabur um shugok abom iri uwe. Aria enesh arpesan shenekesh iri yoweishi inahos, eshesh adur ta shunekesh shunak um yoweiburi wabur um shugok abom. Aria eik douk madae ikri um punek beten um eshudokmori arpesan uwe, uwok. <sup>17</sup> Iihnmorim madae yopihi aih iri uwe, Iruhin douk natrih nakri yoweishi inahos. Aria enesh arpesan shenekesh iri yoweishi inahos, eshesh douk madae wosik um shunek arpesan shunak yoweiburi wabur uwe, uwok.

<sup>18</sup> Apak douk madukemesh. Eshudok arpesan douk shape Iruhin ananish batowish iri, eshesh douk madae shupe um shunek yoweishi inahos namudok atin uwe, uwok. Um maresh? Iruhin ananin Nuganin narokarubesh shape wosik aria yoweishi Satan ta nubirak aria mare nunekumesh enesh yoweishi inahos, uwok. <sup>19</sup> Apak douk madukemesh. Apak douk mape Iruhin ananish batowish aria Satan douk nape debeini um iihnmorim shape shagipesh agundok atapihi atih aih iri. <sup>20</sup> Aria apak douk madukemesh. Iruhin ananin Nuganin douk nanaki neyabigap madukemesh um anudok adurin Iruhin. Apak douk matukur anudok adurin Iruhin aria matukur ananin Nuganin Jisas Krais. Jisas Krais anan douk adurini Iruhin. Anan douk baugos um agundok apak mupe wosik abom iih nyumneh um.

21 Eikish arpesan douk pape kabi eikish batowish-umori, eik yakri ipak pukomuk agabus abom ihm madae adurim iri uwe god omi.

## Pagiguk Iri Shup Douk Jon Nenekap Iri Banenyi Baraen Um Enyudok Nyagiguk Iri Baraen Jon Neneken Iri

ves 1-3 Jon nanadudareh um eshesh Kristen aria nakripeshe Iruhin ananin yopinyi baraen um nutaurumesh  
ves 4-11 Adurihi aih hani ehudok aih um apak urkwip apa panawasham kupaishi um  
ves 12-13 Nyatuh iri baraen

**1** Eik debeiwe iri um ipak pasuhw Iruhin ananin baraen iri yeneku baraen um apudok shup. Yenekapumagu um nyak armatok\* douk Iruhin nana-graehen nyape ananin iri nyani nyakish batowish. Eik adur urkum manawashamep abom. Aria douk madae eik atuwe urkum munawashamep uwe, uwok. Ihishmorim shadukemesh um adurinyi baraen shagipeshen iri douk shopunek urkwip panawashamep. **2** Um maresh? Enyudok adurin atinyi baraen douk nyape apak aria ta nyupe abom iih nyumneh. **3** Aria apak miyagwreh adurin atinyi baraen aria urkwip punawasham kupaishi um, Yain Iruhin nini Jisas Krais apakin Yain ananin Nuganin ta henek gishaumap hutaurumap meyoh aria hunekap aparuh hur wosik.

### *Apak Ta Mugipesh Ehudok Aih Um Urkwip Punawasham Kupaishi Um*

**4** Eik yanadudareh abom um agundok yemnek um enesh nyakish batowish shagipeshe adurinyi baraen um. Shagipeshen kabi Yain nakripap dodogowinyi baraen um mugipeshen um. **5** Aria douk eik yakri iwe-mum enen baraen aria ikripen namudok nyak yopukwi armatok abom. Apak ihipmorim atin atin ta urkwip punawasham um. Enyudok lo douk yakripenyumen iri, enyen douk madae ikripen enen namunyi lo uwe, uwok. Enyen douk seiwok wata sagomatir maraen madukemen iri. **6** Baugos um agundok apak urkwip punawasham kupaishi um douk namudok. Apak mupe um mugipesh Iruhin ananin lo. Enyudok lo douk watak sagomatir ipak ihipmorim pemneken iri. Enyen douk nyakri namudok. Ipak ta urkwip punawasham abom kupaishi.

### *Apak Musuhw Krais Ananin Baraen Dodog Abom*

**7** Sabaimi armam harahe hanak sabaigunum agundok atap iri, amam douk hakri hunek rohwumap. Amam douk hapeum hakri Jisas Krais anan douk madae nutogur adurinyi arpen uwe, uwok. Amudokmori armam douk hapeum henek rohw iri. Aria amam douk Krais ananim horim. **8** Ipak gamo pudukemesh um ta mare purao yopishi eshudok enesheneshep douk penek mour um kweipon ta puraesh iri. Aria puraesh piyatesh abom um douk ta wosik. **9** Meishi arpesh douk madae shusuhw Krais ananin baraen dodog abom aria shakutinyukuk shagipeshe kupainyi iri, eshesh douk madae Iruhin nupenyesh uwe, uwok. Aria eshudok douk apa shasuhw abom enyudok yopinyi baraen dodog iri, douk Yain nani Nuganin douk hapenyesh. **10** Meishi arpesh shunakumogu ipak aria madae shusuhw enyudok baraen iri uwe, ipak mare puraesh shini ipak pupe ipakig urusag o pukri pukesh roguhw punadudareh-umesh, uwok. **11** Meishi arpesh douk

---

\* **1:1:** Enyudok baraen, enesh shakri adurik armatok kwani okwokwishes batowish. Aria enesh shakri Iruhin ananish arpesh douk apa shantorum shenek lotu anabur wabur iri.

shukri shukesh roguhw aria shunadudareh um eshudok-mori arpesh iri, eshesh douk ta shuni eshesh atin baraeen. Aria ta shuni eshesh shanoprom um yoweishi inahos eshesh shenekesh iri.

*Nyagikuk Iri Baraen*

<sup>12</sup> Eik sabainyi baraeen douk yakri inyemepogu um ipak apudok shup iri. Aria yakri uwok um inyemagu shup meyoh, uwok. Yakri inaku itrip aria mupe atugun miyagwreh meyoh um douk ta munadudareh abom muriguk.

<sup>13</sup> Nyakik wawik<sup>†</sup> douk Iruhin nagraehok um kwupe ananik nugawik iri, okwokwish batowish douk shenemenyagu yopuhi nyumnah nyak.

---

<sup>†</sup> **1:13:** Tik futnot um 2 Jon 1:1

## Panenem Bisotup Iri Shup Douk Jon Nenekap Iri Banenyi Baraen Um Enyudok Binyatin Baraen Jon Neneken Iri

ves 1-4 Jon nanadudareh um Gaius aria nakripan Iruhin ananin yopinyi  
baraen um nutauruman  
ves 5-8 Jon nenek tenkyu um Gaius um nenek yopihi aih  
ves 9-10 Diotrefes nenek yoweishi inahos  
ves 11-12 Demitrius nenek yopihi aih  
ves 13-15 Tukwanin um nyatuh iri baraen

<sup>1</sup> Eik debeiwe iri um Iruhin ananish arpesh iri yenekumenyugu apudok shup um nyak eikin abom arpen Gaius. Nyak douk adur eikim urkum manawashamen abom iri.

<sup>2</sup> Eikin arpen, eik yenek beten yarig Iruhin um ihinyumori nyak nyuneken iri ta nyutogur wosik abom. Aria shopunek yenek betenumen um arugeh mare eneh hen aria nyupe wosik abom. Kabi yadukemesh um nyakin mishin nyor wosik aria nyanadudareh abom um Iruhin um.

<sup>3</sup> Nubokadae anam eikim arpeshim hanaki hatogrwmori eik. Hanaki aria hakripe hakri nyak nyagipesh adurin atinyi baraen abom aria nyenek adurih atih aih. Douk yemnek namudok aria yanadudareh abom. <sup>4</sup> Aria eik imnek baraen um agundok eikish arpesh pugipesh adurin atinyi baraen um, eik douk apa yanadudareh yariguk yeshagrakuk agundok yanadudareh um kupaishi eshudok eneshenesh um.

### *Gaius Nenek Yopinyi Mour*

<sup>5</sup> Eikin arpen Gaius, nyak nyagipesh yopihi aih abom aria nyenek ihinyumori mour um nyataurum amam apakimi armam um. Amam douk kupaimi madae nyudukemam iri uwe, aria nyenekumam ehudok atih yopihi aih. <sup>6</sup> Amam hanaki agundok aria hakrip ihishmorim Iruhin ananish arpesh um agundok nyakim urkum manawasham amam aria nyataurumam um. Aria yarigen um nyataurumam um utabor o eneshenesh eshudok um amam hunak ahudok rouhi yah hunek Iruhin ananin mour um. Nyugipesh kabi Iruhin nakri um aria nyataurumam. <sup>7</sup> Enyudok hanamen iri mour douk hanakum huneken um hutuk Krais ananin nyeigur nyuto iruhw. Aria amam douk madae hutrish enesh eshudok um eshesh madae shudukem um Iruhin iri uwe, kabi utabor um. Uwok abom.

<sup>8</sup> Namudok aria apak ta mutaurum amudokmori armam. Munekesh namudok um apak ta muni amam manoprom munek enyudokmori atin um mutaurumam mukripesh adurin atinyi baraen.

### *Diotrefes Nenek Yoweishi Aih*

<sup>9</sup> Eik douk yenekumepogu anap banapi shup ipak Iruhin ananish arpesh. Aria Diotrefes douk nakri nupe nurik abom nupe debeini. Anan douk madae numneken atin uwe apakin baraen, uwok. <sup>10</sup> Namudok aria abudok nyutob ikri inak itogragu obi nyutob, eik wosik ta ikripesh um ihihmori anan nenekeh iri aih. Anan neyagwreh-umep enenyenen yoweinyi baraen. Aria neyagwreh-umep rohwin baraen nakrip sabashi arpesh. Aria douk madae nunek enyudok atin uwe, uwok. Aria amudok apakim douk hanakum hunek Krais ananin mour iri, anan douk madae nukri um nuram

huwish hupe ananit urupat uwe, uwok. Arpesh douk shakri um shuram um esheshig urusag iri douk shopunek nanak nakri wokumesh. Aria eshudok arpesh shakri shurao amudok arman iri douk nohiyahesh nakri mare shiron shupe Iruhin ananish arpesh, uwok.

### *Demitrius Nenek Yopihai Aih*

<sup>11</sup> Eikin arpen, nyak mare nyugipesh yoweihai aih, uwok. Nyugipesh yopihai atih abom. Meinyi arpen douk nyunek yopihai aih iri, enyen douk Iruhin ananin arpen. Aria arpen nyenek yoweihai atih iri, enyen douk madae nyadukemesh um Iruhin uwe, uwok.

<sup>12</sup> Ihishmorim arpesh shakri Demitrius anan douk yopuni arpen. Aria Iruhin ananin adurinyi baraen enyen kanak douk shopunek nyawereh um agundok anan douk yopini arman um. Eik shopunek yakri anan douk yopuni arpen abom. Nyak douk nyadukemesh, um eikin baraen douk adurin.

### *Nyagiguk Iri Baraen*

<sup>13</sup> Eik yakri ikripen sabainyi baraen, aria yakri uwok um inyemagu shup meyoh, uwok. <sup>14</sup> Hurukatin um yakri inaku itrin aria upe atugun uneyagwreh.

<sup>15</sup> Eik yakri nyakin mishin nyur wosik aria nyunadudareh. Apakish arpesh shape agundok iri douk shenekumenyugu yopuhi nyumnah nyak. Wosik eik yakri nyak nyunek yopuhi nyumnah um ihishmorim apakish arpesh atin atin douk shape nagundok iri.

## Apudok Shup Douk Jut Nenekap Iri Banenyi Baraen Um Enyudok Baraen Jut Neneken Iri

ves 1-2 Jut nowem yopinyi baraen um Iruhin nini Jisas Krais hutaurum eshes Kristen

ves 3-16 Anam armam henek rohwumesh iri hawish um eshes Kristen aria hape henek rohwumesh um shunek yoweishi inahos. Aria Iruhin ta nuwanam um yoweishi inahos amam henekesh iri

ves 17-23 Jut nahwarap um miyotu dodog aria munek yopihi atih aih

ves 24-25 Jut natuk Iruhin ananin nyeigur nyato iruhw

<sup>1</sup> Eik Jut, Jems ananin wanin douk yape shakamum Jisas Krais yenek ananin mour iri yenekeupogu apudok shup ipak armam armago douk Iruhin nahwarep um pupe ananip atip iri. Ipak douk apakin Yain Iruhin urkum manawashamp aria Jisas Krais narokarubep pape wosik iri. <sup>2</sup> Eik yakri ehudok aih um Iruhin nenek gihaucep um huni ehudok um ipak urkwip punawasham kupaishi um huni ehudok um ipakiruh aparuh hur wosik um hutogur dedebeh atih um ipak.

### *Heneh Rohwumesh Iri Armam Amamin Baraen*

<sup>3</sup> O ipak eikish abom arpeshi! Sagomatin eik yape urkum morum yakri iwemepogu um ipak enen baraen um agundok Iruhin nataurum apak ihishmorim narap matanamori mape wosik abom um. Aria douk eik yemnek um eik ta iwemepogu um ipak enyudok enen baraen. Baraen enyudok. Eik yakri ipuhur um piyoh enyudok Iruhin ananin adurin baraen douk apak Iruhin ananish arpesh makri adurin masuhwen magipeshen iri. Aria piyotu dodog pubo Krais ananim horim douk henek rohw hakripesch kupainyai baraen iri amamin baraen nyubuhuk. Enyudok baraen douk apak makri adurin magipeshen iri, Iruhin douk nakopen atuh meyoh apak ananish arpesh. <sup>4</sup> Um maresh? Anam armam henek rohw hatogur kabi Iruhin ananim um aria hanabeshuk hawishi um ipak Iruhin ananipi. Aria enen baraen douk seiwok nyetem Iruhin ananik Buk iri douk nyakrium amudokmori armam. Enyen nyakri Iruhin douk juwehosin-umam aria ta nusuhw amamig kwotog aria nukri amam henek yoweishi inahos iri. Amam douk madae hudukemesh um Iruhin uwe aria henek rohwumesh hakripesch hakri baugenymu baraen um Iruhin nataurumap meyoh um douk namudok. Hakri, “Aria eshesh wata shupe shunek yoweishi inahos um, Iruhin ta neneh gihaucep aria mare nunekesh shumnek eriger, uwok.” Amam hakripesch enyudok baraen um nyutaurum amamih eneheneh yoweishi aih um shenek wehrur um. Aria amam hakonaguk agabus Jisas Krais douk anan atan abom Dodogowini Debeini.

<sup>5</sup> Adur, ipak padukemen enyudok baraen um seiwok Debeini nataurum eshesh Israel um. Anan naraesh shakutukuk agudok debeigi nahobig Isip shanak shape wosik. Aria madae roubi uwe, anan nabo shashudok Israel douk madae shumnek ananin baraen shugipeshen iri uwe shagok. Aria douk eik yakri gamo ikritep um ipuhur um ipak urkwip purum enyudok Debeini neneken um eshesh Israel iri. <sup>6</sup> Ipak urkwip purum eshudok enselahos shopunek douk seiwok madae shupe shakamum Iruhin shiyoh enyudok mour nyani debeishi nyeiguhw anan nekeshesh iri uwe. Eshesh shakutukuk esheshibur wabur. Douk namudok aria Iruhin noweshikesh dodog abudok dodogowibi senab douk bape iih nyumneh iri aria douk

shape arukwutigunum. Eshesh shape shatrugun um ahudok debeihi nyumnah douk ta anan nusuhw eshesh shuni ihishmorim arpesh esheshig kwotog ahi. <sup>7</sup> Aria ipak urkwip purum eshudok arpesh douk seiwok shape arbudok biarub yoweirubi warub Sodom iri Gomora bani arbudok bape hurukatin iri. Eshesh shenek eneshenesh yoweishi inahos abom um shenek wehrur um. Aria seiwok arigaha douk, eshesh douk shani eshudok enselahos shape shatrugun um ahudok nyumnah um Iruhin nusuhw esheshig kwotog ahi. Eshesh shenekesh namudok aria Iruhin nawanam-umesh eshudok yoweishi inahos nenek debeihi nyih douk hanu hape iih nyumneh iri hanish aria shemnek debeiri eriger shape iih nyumneh. Anan nenek enyudok nyatogrumeš um apak mutrish aria munogugur mare mugipesh esheshih yoweishi aih, uwok.

<sup>8</sup> Mamudok armam douk hanabeshuk hawish um ipak Iruhin ananish arpesh iri, amam apa henek ehudokmori aih eshesh Sodom iri Gomora shenekeh iri. Ihismorim yomnis amam hatrus iri douk sohur amamip urkwip um hunek yoweishi aih um amamiruh yegeshiweruh. Aria amam hekenyuk agabus Iruhin ananin dodogowinyi baraeñ aria heyagwreh-umesh enyenenen eshudok nyeiguw shatoumeshi kabi enselahos um. <sup>9</sup> Seiwoł enyudok ensel douk debeiniyi abom um ihishmorim enselahos iri nyonahwar um Maikel iri nyani Satan shanogogonim um ta omi nyurao Moses ananit mukwut um, Maikel madae nukri anan douk dodogowini aria nukri niyagwreh-uman enyenenen Satan uwe, uwok. Anan nakripan nakri, "Debeini anan kanak ta wosik nuhen!"

<sup>10</sup> Aria mamudok douk hanabeshuk hani ipak pape iri heyagwreh-umesh enyenenen ihishmorim eshudok eneshenesh douk amam madae hudukmesh iri uwe. Aria ehudok aih amam hadukemeh aria hagipeseh iri, eheh douk kabi wanarish mahish eshesh kanak shadukemeh shenekeh um. Amam henek ehudok yoweishi aih aria ta ehudok aih atin ta hunekam yowem abom.

<sup>11</sup> Adur, kweipon amam ta humnek debeiri eriger! Amam douk hagipeshuk Kein\* ananit yoweishi aih. Aria amam urkwip por abom um utabor atubor aria hagipesh abom Balam† nenekeh iri yoweishi aih. Aria amam hakonaguk agabus Iruhin kabi douk seiwoł Kora‡ nakonaguk agab um. Amam douk henekeh namudok aria amam ta douk yowem abom kabi douk seiwoł Kora yowen abom um.

<sup>12</sup> Babudok nyutob ipak pani kupaishi Iruhin ananish arpesh urkwip por arag atin aria pantorum pape pawok worigun obi nyutob, amudok armam shopunek hani ipak pape hataurumep pagnoh. Amam hani ipak hapeum, amam henek yoweishi aih um Iruhin ananis nabes. Madae abraenyim um agundoki worigun amam urkwip porum amam kanak atin. Amam abraen madae nyom um amamih yoweishi aih amam hape henekeh iri uwe. Amam hani ipak pape pawok worigun aria amam madae urkwip purum hukri hubiram kupaishi arpesh uwe. Amam urkwip porum amam atum. Amam douk hape kabi onog orug.§ Agudok orug douk uhwin nyaragwi

---

\* **1:11:** Seiwoł Kein neneke yoweishi inahos namudok. Anan juwehosin um ananin wanin aria nan nagok. Ipak putik Jenesis 4:1-5. † **1:11:** Seiwoł Balam nakri nutogur Iruhin ananin profet aria kupaimi hunokuneman um utabor um nunek Iruhin ananish arpesh shunek yoweishi inahos. Ipak putik Namba 22:5-41. ‡ **1:11:** Kora neneke yoweishi inahos nekenyuk agab Iruhin ananin baraeñ namudok. Anan narao anam armam hagipesan hakanuguk agabus Moses nani ananin big Iruhin nakonen iri. § **1:12:** Amamin baraeñ madae nyutaurum arpesh uwe. Enyen kabi orug douk madae gwunek eshah hurari iri uwe o kabi rowos douk shuruwep madae enep pir um uwe.

aria eshah madae anah hurari uwe. Aria shopunek, amam kabi douk shuruwep peiragosi rowos. Douk nyutob um shuruwep pir um banaki aria shuruwep madae enep pir uwe. Agagos douk shatukagos um baugos aria yarigos abom. <sup>13</sup> Amam henek abraenyihi aih aria ehudok aih hatogur kabi young debeibi morub batuk aria benek ahwas sanaki sakus anagas um. Aria shopunek, amam hape kabi unib douk wakutukuk owowih yeh wanarahe wanak hwaroh iri um. Aria Iruhin douk neneb anabur arukwtigun-iburi wabur bape um ta kweipon hunak hupe iih nyumneh um.

<sup>14-15</sup> Adam ananip awirop sharik shape aria awiros sakitak sanaki aria sakri um namba 7-ip um shabuki anudok arman Inok. Aria seiwok Inok nakripesh enen baraen um eshudok douk ta kweipon shugik shutograri iri. Anan nakriyen um amudokmori henek rohwumesh iri armam nakri namudok, "Ipak mnek! Kweipon Debeini ta nini ananish sabaishi tausenish enselahos shunaki. Eshesh ta shunaki um anan nusuhw ihishmorim arpesh esheshig kwotog. Aria nuwanamesh yoweishi inahos yoweishi arpesh nunekesh shumnek debeiri eriger um nuyabigesh shudukemesh um eshesh douk shenek yoweishi inahos aria eshesh douk shemnek debeiri eriger. Aria anan ta nuwanamesh esheshih yoweishi aih um shakon agabus Iruhin um aria sheyagwreh-uman enenyenen yoweinyi baraen um." <sup>16</sup> Amudok henek rohw iri armam amamiruh aparuh madae hur wosik aria hupe wosik atin uwe, uwok. Amam apa henek sousunash hariguk um eneshenesh eshudok douk shatograram iri. Aria amam apa heyagwreh hariguk um eneshenesh eshudok. Amam hagipesh yoweishi harik hapeum iri aih um henek yoweishi inahos um. Amam hapeum hakri hutuk amamish atish nyeiguhw shuto iruhw aria hakripesh yopinyi atin baraen kupaishi um huhur esheshiruh aparuh um shugipesham shunek eneshenesh yoweishi inahos amam hakriyesh iri.

### *Ipak Ta Pupe Dodogowip Atip Abom*

<sup>17</sup> Aria ipak eikish arpesh abom! Ipak ta urkwip purum enyudok baraen um eshudok douk riguk Debeini Jisas Krais ananik aposel hakripesh-umesh um ta shutograri iri. <sup>18</sup> Amam hakritep hakri, "Hugik iri nyumneh hutogurum, anam armam douk ta hunumogesh Iruhin ananik aih iri ta hutogur. Amam ta hukon agabus Iruhin aria ta hugipesh yoweishi harik hapenyam iri aih aria hunek eneshenesh yoweishi inahos." <sup>19</sup> Aria douk amudok atum armam hape henek ipak Iruhin ananish arpesh panadi-yogurum pape sisiguk. Amam douk hagipesh yoweishi harik hapenyam iri aih aria henek eneshenesh yoweishi inahos amam kanak hakri hunekesh iri. Amam douk madae Iruhin ananik Mishin nyupenyam uwe, uwok.

<sup>20</sup> Aria ipak eikish arpesh ta pusuhw Iruhin ananik baraen dodog pugipeshen. Iruhin douk baugos um ehudok yopihi aih um ipak penek bilipuman um. Aria putogur dodogowip abom um ehudok aih um penek bilipuman um. Aria ipak ta pugipesh Iruhin ananik Mishin nyupuhur um punek beten um aria ta punek beten. <sup>21</sup> Aria Iruhin douk urkum manawashamep aria ipak ta pupe hurukatin um anan. Aria ipak pupe putrugun um apakin Debeini Jisas Krais douk neneb gihaumep iri um nunekep pupe wosik abom iih nyumneh.

<sup>22</sup> Ipak penek gihaum eshudok arpesh douk shasuhw Iruhin ananik baraen aria eshesh madae shusuhwen dodog abom shugipeshen iri uwe. Aria putaurumesh um punekesh shusuhwen dodog shugipeshen. <sup>23</sup> Aria enesh douk hurukatin um shakri shukonaguk agabus Iruhin iri, eshesh kabi douk shagrukuk orokohunih um nyih um. Douk namudok aria ipak ta putaurumesh putukeshi um ehudok nyih puraesh shutanamori shupe wosik. Aria ipak pukri gihaumesh eshudok enesh douk wata shatanam

shagipesh yoweih i harik hapenyesh iri aih um shenek yoweishi inahos um aria putaurumesh. Aria pukri putaurumesh um, ipak ta gamo pudukemesh um ta wosik atin ipak pugipesh esheshih yoweih i aih. Ipak ta pukri uwok-umeh abom.

### *Apak Ta Mutuk Iruhin Ananin Nyeigur Nyuto Iruhw*

<sup>24</sup> Apak mutuk Iruhin ananin nyeigur nyuto iruhw. Um maresh? Anudok Iruhin anan douk dodogowini aria wosik um nutaurumep nunekek piyotu dodog aria mare putu punek enesh yoweishi inahos. Aria shopunek, anan douk dodogowini aria wosik um nunekek pupe wosik aria mare enen baraen nyupenyep um enesh yoweishi inahos. Aria punadudareh abom abudok nyutob anan nuraep punak ganudok anan natrugun abom aria napeum. <sup>25</sup> Anan douk anan atun abom nape apakin Iruhin douk nataurumap narap matanamori mape wosik atin iri. Aria enyen douk um enyudok mour apakin debeini Jisas Krais neneken iri atin aria Iruhin narap mape namudok. Douk namudok aria agundok natrugun abom um nini debeinyi nyeigur nyuni debeinyi big nyuni agundok Iruhin dodogowinari nape debeini um eneshenesh eshudok um douk shupe um anan atun. Seiwo baugos um arigaha douk, arigaha kweipon shopunek ta shupe um anan atun iih nyumneh! Adur atin.

## **Baraen Douk Jisas Krais Nakrip Jon-enyi Banenyi Baraen Um Enenyenan Jisas Krais Neyabig Jon Um**

- 1:1-8 Jon kabi nanabek yomnis um aria natik eneshenesh eshudok aria nowem enyudok baraen 7-poreis awiros um Iruhin ananish arpesh aria natuk Jisas Krais ananin nyeigur nyato iruhw.
- 1:9-3:22 Jon natik Jisas Krais natrugun abom aria ananin baraen nyanam eshesh sabaishi Kristen shape 7-poreirub warub iri.
- 4:1-8:1 Jon natik iruhw heven aria natik Jisas Krais nani ananin Yaken Iruhin, hani sabaishi enselahos aria natik Jisas nakweshih 7-poreis kendelis gris douk soweshik apudok shup douk shadareshap iri.
- 8:2-11:19 Jon natik 7-poreish enselahos atin atin shasuhw aruruh aria shahaprisharuh
- 12:1-13:18 Satan ta nini Iruhin ananish sabaishi enselahos shurpak aria shuhiyahan nugruki agundok atap
- 14:1-15:8 Jon natik Jisas natogur kabi douk nugaen sipsip um aria nani bishatin enselahos shabo eshudok arpesh douk shakon agabus abom Iruhin iri
- 16:1-21 Jon natik enesh kupashi 7-poreish enselahos. Eshesh atin atin shasuhw marus.
- 17:1-19:21 Iruhin ta nuwanamesh yoweishi inahos eshudok arpesh shape wabur Babilon shenekesh iri, aria Krais ta nutogur kabi douk arman netem shigorihwinyi hos um aria nunaki.
- 20:1-15 Satan ta nunuweshik nupeik namudok agudok gagari nuwag gabuh gani atap iri nuwag aria Iruhin ta nuneck skelimaguk ihishmorim arpesh ba iyoh
- 21:1-27 Namuburi wabur Jerusalem
- 22:1-6 Worubibar abar bani shuruwepigos rowos douk ta arpesh shishoh aria shupe wosik abom ihih nyumneh iri.
- 22:7-21 Jisas Krais ananin nyatuh iri baraen douk nahwar sabaishi arpesh um shunakumori anan.

### *Baraen Jon Nenyem Nyakri Um Okwudok Buk Iri*

<sup>1</sup> Seiwok enyudok baraen um Jisas Krais nyanabeshuk. Aria douk abudok nyutob enyen nyatogur yopugunum. Iruhin douk nakon enyudok baraen Jisas um nukrip shenek Iruhin ananin mour iri um nuyabigesum shanabeshuk iri eshudok eneshenesh hurukatin um shutogur. Anan douk neyabigap namudok. Anan neshopoki ananin ensel nyanakumori eik Jon douk yenek Iruhin ananin mour iri aria nyakripe enyudok baraen. <sup>2</sup> Aria eik yatik eshudok ihishmorim eneshenesh jurug aria eik yawereh enyudok baraen yakriep yopugunum. Enyudok baraen douk Iruhin ananin nyani enyudok adurin baraen Jisas Krais nakripenyi. <sup>3</sup> Enyudok baraen nyetem okwudok buk iri douk nyakrium eshudok douk ta shutograri iri. Aria ihishmorim arpesh douk shutarih enyudok baraen debeg um kupaishi shumneken iri, eshesh wosik shanadudareh. Aria eshudok douk shumneken aria shusuhwen dodog shugipeshen iri eshesh shopunek douk shanadudareh. Um maresh? Abudok nyutob um eshudok ihishmorim shutogurum douk banaki hurukatin.

*Baraen Jon Nenyem Nyunam Iruhin Ananish Arpesh Shape 7-poreirub Warub Iri*

<sup>4-5</sup> O ipak Iruhin ananishi arpesh pape arbudok 7-poreirub warub douk bape shokugi nahobig Esia iri. Eik Jon yenekumepogu apudok shup ipak. Eik yakri Iruhin douk seiwok nape, aria kweipon shopunek ta nupe arigaha hugiguk iri nyumnah hutograri nutaurumep meyoh. Aria anan nutaurumep pupe dodogowip aria ipakiruh aparuh hur wosik. Aria shopunek, yakri eshudok 7-poreish yopishi mishish\* douk shape hurukatin um Iruhin ananin debeinyi wagitur iri shuni Jisas Krais shopunek shutaurumep meyoh aria ipakiruh aparuh hur wosik. Jisas Krais douk neyotu dodogowin atun nagipesh ananin baraen wosik iri nakripep ihinymorim Iruhin ananin adurin atinyi yopinyi abom baraen. Aria sagomatin Iruhin narik nohur anan nakutukuk wonugwehw aria watak nakitak nape. Aria anan douk abom nape debeini um ihm-morim debeimi king douk hape agundok atap iri.

Anan douk urkum manawashamap aria ananibor owishibor botourak babuh aria bokweshihap aria mape wosik um eneshenesh apakash yoweishi inahos. <sup>6</sup> Aria douk anan nenekap mape debeipi um sabaishi arpesh kabi douk king-omi um. Aria shopunek, anan nenekap mape pris kabi amam seiwok hape henek ofa um eneshenesh eshudok hako Iruhin iri um. Aria apak munek mour um Iruhin douk Jisas Krais nenek lotuman iri. Aria anan shopunek douk ananin Yain. Aria eik yakri debeinyi nyeigur nyuni ihinymorim dodog abom shupeum anan atun iih nyumneh! Adur atin.

<sup>7</sup> Ipak tik! Anan ta nini orug nunaki. Aria ihishmorim arpesh shuni eshudok douk seiwok shan nagok iri ta shutrun esheshis n̄abes. Aria ihismorim debeisi awirosish arpesh douk shape agundok atap iri ta shurepan abom. Adur atin eshudok ta shutogur namudok atin. Adur atin.

<sup>8</sup> Aria debeini dodogowini abom Iruhin douk seiwok nape, aria douk shopunek nape, aria kweipon ta nunaki iri nakri namudok, "Seiwo baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek, abudok nyutob ihishmorim eshudok shunak shutuhuk um eik ta ipe."

*Jon Natik Krais Douk Iruhin Nagraehan Neshopokan Nanaki Iri*

<sup>9</sup> Eik ipakin ashukan Jon douk yani ipak munoprom Jisas atun iri. Eik douk yani ipak memnek eriger aria meyotu dodogowip um musah enenyenen amaen douk ta nyutogrumpa iri. Aria douk shopunek, eik ta ini ipak um muwish agundok Iruhin nape Debeini um ananish arpesh um. Eik douk yakripes Iruhin ananin baraen nyani enyudok adurin atinyi baraen um Jisas. Douk namudok aria eshesh shasuhwe sharawe shanaki sheyosop yapeik enyudok unai nyeigurinyum Patmos iri. <sup>10</sup> Anah nyumnah douk apak apa mape munek lotu um Debeini ahi, Iruhin ananin Mishin nyatogrume dodogowin atin aria nyeyabige eshudok yatrish kabi yabo yomnis yatrish um. Aria yemnek anah debeihi mah agabiwe um kabi douk shahapur oruhw um. <sup>11</sup> Aria enyudok arpen nyeiyagwrehi iri nyakripe nyakri, "Nyak wem eshudok douk ta nyutrish iri anap shup aria nyukeshop punak um Iruhin ananish arpesh shape arbudok 7-poreirub warub iri. Nyeiguhwirub um warub douk arbudok. Efesus, Smerna, Pergamum, Taiataira, Sardis buni Filadelfia iri Laodisia."

\* **1:4-5:** Enesh shakri eshudok 7-poreish yopishi mishish douk shakri um Iruhin ananin Mishin.

<sup>12</sup> Aria eik yatanam um itik enyudok douk nyakripe enyudok baraen iri aria yatik 7-poreish eshudok shenekesh gol iri shatao. Eshesh douk shenekesh um showem lamhos shetem um. <sup>13</sup> Aria anan arman neyotu orokohun um eshudok 7-poreish shenekesh gol iri. Anan nor anah rouhi rupuh habuh heyawiamokuk ananiruh yeriweruh aria nawashak anat let douk shenekat gol iri um ananin mishin. Anan douk kabi Anudok Arman douk natogur adurinyi arpen iri um. <sup>14</sup> Aria ananig barag douk gatogur shigorihwig abom kabi ehirub douk batogur sipsip iri o kabi shigorihwisi ais um. Aria ananis nabes satrugun kabi douk debeihi nyih hanu aria bogaragun um. <sup>15</sup> Aria ananiruh yeriweruh hatrugin abom kabi enyudok brasin kapa iri um douk shashainyeh debeihi nyih aria nyatrugun um. Aria ananih mah heyagwreh debeg kabi worub batogur banaki um. <sup>16</sup> Anan nasuhw 7-poreiyu unib um ananin yopunyi rogor, aria anat wanohwiti bainat douk wanohwit eresit wobuwobur iri tatograri ananit nokwat. Aria ananig yamat bogagrag abom kabi wah hatao nyumnah iri hatrugin um.

<sup>17</sup> Douk yatrun aria yanak yabuh yakus hurukatin um ananiruh yeriweruh kabi anan nagok iri arman um. Aria anan nowem ananin yopunyi rogor eik aria nakripe nakri, "Nyak mare nyunogugur, uwok! Eik douk seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek abudok nyutob ihishmorim eshudok shunak shutuhuk um, eik ta ipe. <sup>18</sup> Eik douk madae igok iri uwe, uwok. Eik yape iri! Seiwoh yagok aria douk yape, aria shopunek ta ipe ihih nyumneh. Aria eik douk yarao debeiinyi big aria dodog um ipe debeiwe iri um agundok arpesh shugok um. Um ikri esheshe shunak um yoweiburi wabur o shunak um yopuburi.

<sup>19</sup> Douk namudok aria nyak wem eshudok iganigadae nyatrish iri shuni eshudok douk shape shatogur agundok atap iri shuni eshudok douk ta kweipon shugiguk shutograri iri nyakip shup. <sup>20</sup> Aria baugennum baraen riguk nyanabeshuk um oudok 7-poreiyu unib douk nyatik yasuhwo eikin yopunyi rogor iri douk namudok. Oudok unib douk wagraeh um 7-poreish enselahos douk shape sheyoh Iruhin ananish arpesh shape arbudok 7-poreirub warub iri. Aria baugennum baraen um eshudok 7-poreish shenekesh gol iri um shuwem lamhos um douk nyakrium Iruhin ananish arpesh douk shape arbudok 7-poreirub warub iri."

## 2

### *Baraen Nyanak um Iruhin Ananish Arpesh Shape Efesus Iri*

<sup>1</sup> Aria Jisas ta apa nakripe nakri, "Jon, nyak wemen enyudok baraen anap shup nyunak um enyudok ensel douk nyape nyeyoh Iruhin ananish arpesh shape Efesus iri. Eik Jisas eikin baraen douk enyudok. 'Eik douk yasuhw 7-poreiyu unib eikin yopunyi rogor aria yape yarahaen orokohun um 7-poreish eshudok douk shenekesh gol iri um shape showem lamhosum iri yenekumep-ogu enyudok baraen ipak. <sup>2</sup> Eik yadukemep um ihihmorim aih hani enyudok debeiinyi mour' ipak pape peneken iri. Aria yadukemep um agundok peyotu dodogowip atip um enyenenen amaen douk nyatogrump iri. Aria ipak pakri uwok abom um eshudok shenek yoweih aih iri arpesh. Aria shopunek, yadukemep um ipak douk pokwiraeh amudok armam douk henek rohw hakri amam douk aposel douk hakripesch Iruhin ananin baraen iri. Aria ipak padukemam um amam douk madae aposel omi uwe, uwok. Amam douk henek rohwumes iri. <sup>3</sup> Aria shopunek, eik yadukemep um agundok arpesh shatrisp um pasuhw eikin baraen pagipeshen um aria shenek yoweih aih um ipak um. Aria

ipak peyotu dodogowip aria madae juwehosip uwe. Aria shopunek, eik yadukemep um ipak douk madae arigeh hep um punek enyudok debeiniy mour um pugipes. Ipak peyotu dodogowip atip.

<sup>4</sup> Aria douk eik yakri ikripep enen baraen um eshudok yoweishi inahos douk ipak pape penekesh iri. Sagomatin ipak urkwip panawashame dodog abom aria pagipeshe. Aria douk uwok. <sup>5</sup> Aria eik yakri ipak urkwip purum agundok riguk ipak papeum. Sagomatin ipak pape wosik, aria douk ipak patu pagrukuk rougunum. Ipak urkwip douk madae punawashame dodog uwe, uwok. Aria douk eik yakri ipak ta pukutukuk ipakish yoweishi inahos aria watak putanam puke aparuh eik. Aria ipak urkwip punawashame dodog abom kabi sagomatin ipak urkwip panawashame um. Uwok um, eik ta inaku itukuk ipakin enyudok douk shape showem lam um agundok douk enyen nyape nyataum. <sup>6</sup> Aria douk ipak watak panasuhw ehudok yopihi aih abom um pakri uwok um ehudok aih douk apudok awirop douk shanahwar um Nikolas\* iri shenekesh iri. Eik shopunek douk yakri um uwok abom.

<sup>7</sup> Aria douk ipak arigos sapenyep iri ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipesen! Eshudok arpesh douk shiyotu dodogowish atish shunek wanohw shubo yoweiniy nyubuhuk iri, eik ta ikesh yopinyi big um eshesh shuwok epudok shurkwip douk peir enyudok rowog douk nyatao Iruhin ananig nahobig ganahwar um Paradais iri. Aria eshudok arpesh shuwok epudok shurkwip iri ta shupe wosik abom iih nyumneh.”

### *Baraen Nyanak Um Iruhin Ananish Arpesh Shape Smerna Iri*

<sup>8</sup> Aria Jisas watak shopunek nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Smerna iri. Eik Jisas eikin baraen douk enyudok. ‘Seiwo baugos um, ihishmorim eneshenesh eshudok watak enesh shupe uwe aria eik yape. Aria kweipon shopunek, abudok nyutob ihishmorim eshudok shunak shutuhuk um, eik ta ipe. Douk seiwok shae yagok aria douk watak yikitak yape. <sup>9</sup> Eik douk yadukemesh um enenyen amaan douk nyatogur um ipak iri. Aria shopunek, yadukemesh um ipak eneshenesh eshudok wokep. Aria uwok. Ipak douk pogrem sabaihi yopishi eneshenesh eshudok shakusumep iruhw heven. Aria eik douk yadukemesh um enyudok yoweiniy baraen douk eshudok arpesh douk shenek rohwumep shakripepen iri. Eshesh shakri eshesh douk Juda aria eshesh madae Juda abom uwe, uwok. Eshesh douk Satan ananish. <sup>10</sup> Aria ipak mare punogugur um enenyen amaan douk ta nyutogrume aria nyunekep pumnek debeiri eriger iri. Ipak pumnek! Satan ta nunek anep punuk punuweshik pupe um nukwiraehep punek yoweishi inahos. Aria ipak ta pumnek eriger banab nyutob meyoh kabi 10-poreih nyumneh meyoh um. Douk enesh shukri shep pugok um, ipak ta pusuhw eikin yopinyi baraen dodog aria piyotu dodogowip atip. Aria eik ta ituk ipakish nyeiguhw shuto iruhw aria ta inekep pupe wosik iih nyumneh. Eik ta itaurumep pupe wosik.

<sup>11</sup> Aria douk ipak arigos sapenyep iri ta pumnek enyudok baraen douk Iruhin ananin Mishin nyakrip ananish arpesh enyi aria pusuwen dodog pugipesen! Eshudok arpesh douk shiyotu dodogowish atish shunek

---

\* **2:6:** Apudok awirop Nikolas apa shani eshesh Kristen shape Efesus bani Pergamum iri shape shenek lotu. Aria eshesh apa shenek skulumesh um shunek eneshenesh yoweishi inahos.

wanohw shubo yoweishi inahos shubuhuk aria eshesh ta mare shugok anah shopunek,<sup>†</sup> uwok.’”

### *Baraen Nyanak Um Iruhin Ananish Arpesh Shape Pergamum Iri*

**12-13** Aria Jisas nakripe shopunek nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Pergamum iri. Eik Jisas eikin baraen douk enyudok. ‘Eik douk yasuhw atudok wanohwiti bainat douk wanohwit wobuwobur iri yenekumep-ogu enyudok baraen ipak. Eik douk yadukemep um ipakibur wabur. Satan douk nape debeini um ipakibur wabur. Aria eik yadukemep um ipak pasuhw eikin baraen dodog pagipesh eik atuwe. Aria eshesh shabo anudok yopuni arman Antipas douk nasuhw eikin baraen dodog abom nakripeshen iri nagok ipakibur wabur douk Satan napenyabur. Aria abudok nyutob eshesh shan nagok um, ipak shopunek peyotu dodogowip aria madae pukri punyukur-ukuk eikin baraen uwe, uwok.

**14** Aria douk eik yakri ikripep enen baraen ipak um enesh yoweishi inahos douk ipak pape penekesh iri. Ipak anep douk wata pasuhweh dodog ehudok Balam ananih yoweih iah. Ananih iah douk ehudok. Seiwoh anan neyabigan ehudok yoweih iah Balak aria Balak neneh rohw um eshesh Israel shenek yoweishi inahos um shakonuguk agabus Iruhin. Balak douk nakripesha shawok eshudok mahish iri worigun douk sharik shenek ofamesh shako amudok madae adurimi god omi iri uwe. Aria shopunek, nakripesha shenek wehrur um. **15-16** Aria douk shopunek namudok atin. Ipak anep douk pasuhw ehudok yoweih iah ehudok apudok awiropish arpesh shahwaresh um Nikolas<sup>‡</sup> iri esheshih. Douk namudok aria ipak ta pukeshuk agabus yoweishi inahos ipak pape penekesh iri aria watak putanam pukon aparuh Iruhin. Uwok um, eik ta hurukatin um inaku aria ini eshudok douk shagipesh ehudok eshesh Nikolas esheshih iah iri murpak. Aria ta ikumesh atudok bainat douk tatograri eikit nokwat iri. **17** Aria douk ipak arigos sapenyep iri ta pumnek enyudok baraen Iruhin ananin Mishin nyakrip ananish arpesh-nyi aria pusuwen dodog pugipeshen! Eshudok arpesh douk shiyotu dodogowish atish shunek wanohw shubo yoweishi inahos shubuhuk iri, kweipon eik ta ikesh anagun worigun douk shahwaragun um mana douk nyanabeshuk nyakus iri. Aria shopunek, eik ta iwem esheshish namushi nyeiguuh anabor shigorilwi-bori utabor aria ta ikesh aburdok utabor eshesh atin atin. Aria kupaishi arpesh ta mare shudukem eshudok namushi nyeiguuh, uwok. Eshudok douk sharao aburdok utabor iri atish ta shudukemesh.”

### *Baraen Nyanak Um Iruhin Ananish Arpesh Shape Taiataira Iri*

**18** Aria Jisas nakripe nakri, “Jon, nyak wem enyudok baraaen anap shup punak um enyudok ensel douk nyape nyataurum Iruhin ananish arpesh shape Taiataira iri. Eik Jisas eikin baraen douk enyudok. ‘Eik Iruhin ananin nunganin douk eikis nabes satrugun kabi debeihi nyih hanu aria bogaragun um. Aria eikiruh yeriweruh hatrugun kabi enyudok bras kapa douk shishainyeh debeihi nyih iri nyatrugun um. Eik yenekumepogu enyudok baraaen ipak.

**19** Eik yadukem ehudok yopihu aih ipak pape penekeh iri um agundok ipak urkwip panawasham Irühin nani kupaishi arpesh um. Aria pasuhw

<sup>†</sup> **2:11:** Jisas watak nutanamori ahi, shagok iri ta watak shukitak aria shiyotu um kwot. Aria eshudok douk madae shunek bilip iri uwe ta shunak um yoweiburi wabur aria ta shugok anah shopunek. <sup>‡</sup> **2:15-16:** Putik futnot nyape Revelesen 2:6 iri.

eikin baraen dodog pagipeshen aria douk penek yopinyi mour um putaurum sabaishi arpesh um. Aria shopunek, ipak peyotu dodogowip atip abudok nyutob amaen nyatogrumepl um. Aria eik yadukemesh um ehudok yopihaih douk ipak pape penekeh iri douk heshagrakuk ehudok yopihaih riguk ipak parik penekeh iri.

<sup>20</sup> Aria douk eik yakri ikripep enen baraen um eshudok yoweishi inahos douk ipak pape penekeh iri. Ipakish yoweishi inahos douk eshudok. Ipak pakri wosik aria pape patruk meyoh okwudok yoweikwi armatok Jesebel aria okwok douk kwani ipak kwape. Okwok douk kwenek rohw kwakri okwok douk onok profet douk kwakripesh Iruhin ananin baraen iri. Aria okwok douk kwenek rohw iri. Okwok kwenek rohw um eshudok shenek eikin mour iri kwakripesh shenek wehrur um. Aria shopunek, shawok agundok worigun douk shenek ofamogun um amudok madae adurimi god omi iri uwe. <sup>21</sup> Aria eik douk yakutukuk kwape anah nyumneh shopunek um yakri kwukeshuk agab okwokwish yoweishi inahos um agundok kwani kupaishi shenek wehrur um. Aria yakri watak kwutanam kwunakumori eik, aria uwok. <sup>22</sup> Douk namudok aria eik ta inekok kwishuh kwutuwatagun um kwumnek debeiri eriger. Aria ta eshudok arpesh douk shani okwok shenek wehrur iri mare shukeshuk agabus esheshish yoweishi inahos aria shatanam shunakumori eik um, eik ta inekesh namudok. Eik ta inekesh shumnek debeiri eriger abom. <sup>23</sup> Aria shopunek, eik ta ibo eshudok douk shagipesh okwokwin baraen iri shugok. Eik ta inekesh namudok aria ihishmorim Iruhin ananish arpesh ta shudukemesh shukri eik douk yadukemesh wosik abom um ihishmorim arpesh esheshish mishish aria aparuh shor shanak um. Aria eik ta iwanamep eneshenesh wosikumep atin atin um ihishmorim aih ipak pape penekeh iri.

<sup>24</sup> Aria douk eik yakri ikrip ipak anep douk pape Taiataira iri. Ipak madae pugipesh enyudok okwokwin yoweiniy baraen uwe. Aria shopunek, ipak madae pugipesh ehudok aih douk enesh kupaishi shahwareh shakri, “Satan ananiih aih douk hanabeshuk atin abom iri.” Aria eik ta mare watak ikripep enen kupainyi baraen shopunek um ipak pugipesen iri, uwok. <sup>25</sup> Aria eik yakri ipak ta pusuhw ehudok ihishmorim yopihaih iri baraaen douk ipak paraen iri. Aria piyotu dodogowip atip arigaga eik watak itanamori.

<sup>26-27</sup> Aria eshudok arpesh douk shugipesh eikim urkum aria shiyotu dodogowish atish shunek wanohw shubo yoweishi inahos shubuhuk arigaha esheshib nyutob um shugok um butogur um, eik ta inekesh namudok. Eik ta ikesh debeishi dodogowishi nyeiguhw um shupe debeishi um sabaishi arpesh douk shape ihigos nahobigos iri. Aria eshesh ta shupe debeishi shusuhw merikw-umesh namudok atin kabi douk seiwok eikin Yain neke debeinyi nyeigur aria yape debeiwe iri yasuhw merik um sabaishi arpesh um. Enyudok ta nyutogur kabi Iruhin ananin baraen douk nyetem ananik Buk iri nyakrium. Iruhin nakri namudok, “Anan ta nupe dodogowin atun abom aria ta nusuhw anam ainim butum aria nupe nusuhw merikw-umesh. Anan ta nunekesh kabi anan arman douk nawor marus shenekas amnab iri pupuwaros shokugun atugun um.”

<sup>28</sup> Aria eik ta ikesh okwudok unuk douk kwanahwar um shuduwi iri. <sup>29</sup> Aria douk ipak arigas sapenyep iri ta pumnek enyudok baraen Iruhin ananin Mishin nyakrip ananish arpesh-nyei aria pusuwen dodog pugipesen!”

<sup>1</sup> Aria Jisas nakripe nakri, "Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Sárdis iri. Eik Jisas eikin baraen douk enyudok. 'Eik douk yasuhw Iruhin ananish 7-poreish yopishi mishish<sup>\*</sup> shani 7-poreiyu unib aria yenekumep-ogu enyudok baraen ipak.

Eik douk yadukemesh um ihihmorim eneheneh aih ipak pape penekeh iri. Arpesh shatrip um, eshesh shakri ipak madae pugok iri uwe. Aria uwok, ipak nubokadae pagok iyoh. <sup>2</sup> Douk namudok aria ipak pikitak pukutukuk agundok ipak peshuh um. Aria ihihmorim ipakih yopihi aih douk ipak wata pasuweh iri, eheh douk hurukatin um hugok. Douk namudok aria ipak ta pikitak aria punekah dodogowih abom atih. Um maresh? Eikin debeini Iruhin natik ipak penekeh iri aih jurug aria nakri eheh douk madae yopih uwe, uwok. <sup>3</sup> Douk namudok aria ipak wata urkwip purum enyudok baraen douk seiwok ipak pemneken iri aria wata pugipeshen. Aria putanam pukeshuk agabus yoweishi inahos aria wata punakumori eik. Uwok um, eik ta inaku kabi anan nakwuaruh iri nanakumagu aria ipak ta mare pudukemesh um abudok nyutob eik inaku itogrume obi nyutob.

<sup>4</sup> Aria ipak karowip pape Sardis iri madae pugipesen yoweishi aih uwe. Aria enyudok enyen douk kabi ipak madae punek ipakih rupeh hubosusih um uwe. Aria ipak atip ta pur ehudok shigorihwihi rupeh aria puni eik munak atugun. Um maresh? Ipak douk yopishi arpesh aria ipak douk wosik um puni eik munak atugun um. <sup>5</sup> Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta ikesh ehudokmori shigorihwihi rupeh shihur. Eshesh ta shihur kabi ipak karowip pape Sardis iri pehur um. Aria eik ta mare itorihuk esheshish nyeiguhw douk shatem okwudok buk douk eshudok arpesh ta shupe wosik ihih nyumneh iri esheshish nyeiguhw shatemokwi, uwok. Aria eik ta ikrip eikin Yain nini ananish enselahos yopugunum um eshudok arpesh ikri eshesh douk eikish arpesh. <sup>6</sup> Aria douk ipak arpesh arigos sapenyep iri ta pumnek enyudok baraen Iruhin ananir Mishin nyakrip ananish arpesh-enyi aria pusuwen dodog pugipesen. <sup>'</sup>

### *Baraen Nyanak Um Iruhin Ananish Arpesh Shape Filadelfia Iri*

<sup>7</sup> Aria Jisas nakripe nakri, "Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Filadelfia iri. Aria eik Jisas eikin baraen douk enyudok. 'Eik douk yopuweiri abom douk aria eikin baraen douk adurin atin yasuhw ki† um atudok wit douk seiwok King Devit nasuwen iri. Aria ta eik ijik wit um, ta mare enen arpen dodogowin um nyutaru. Aria shopunek, ta eik itaru um, ta mare enen arpen dodogowin um nyijikat. <sup>8</sup> Eik douk yadukemesh um ihihmorim aih ipak pape penekeh iri. Aria shopunek, eik yadukemesh um ipak douk madae dodogowip um punek eikin mour wosik um uwe. Aria ipak pagipesh ihinyumorim eikin baraen aria madae pubeshuk eikin nyeigur uwe, uwok. Aria ipak tik. Eik yejik anat wit tanejik tapeimep. Aria ta mare enen arpen dodogowin um nyutaru, uwok. <sup>9</sup> Aria ipak pumnek! Ipak douk padukemesh eshudok Satan ananish arpesh. Eshesh shenek rohw shakri eshesh douk Juda, aria eshesh douk madae Juda abom uwe. Eshesh douk shenek rohw iri. Douk namudok aria eik ta inekesh shunaki shubuh shuduk ohribus hurukatin um ipakiruh yeriweruh. Aria abudok nyutob

\* <sup>3:1:</sup> Putik futnot nyape Revelesen 1:4 iri. † <sup>3:7:</sup> Enyudok baraen nyakri Jisas Krais atun narao big um nukri meishi arpesh shuwish numun Iruhin ananibur namuburi wabur Jerusalem douk ta bukutukuk iruhw heven bubuhi iri (Revelesen 21:2).

eshesh ta shudukemesh shukri adur atin eik douk urkum manawashamep ipak Iruhin ananish arpesh pape Filadelfia iri. <sup>10</sup> Ipak douk pagipesh eikin baraen wosik peyotu dodogowip aria madae juwehosip arigas uwe um enyenyen amaeñ douk nyatogrumpemepari. Namudok aria abudok nyutob eneheneh kwiraeh hutogur um hukwiraeh ihishmorim arpesh shape agundok atap iri um, eik ta itaurumep piyotu dodogowip atip aria pupe wosik.

<sup>11</sup> Aria eik douk hurukatin um inaku. Douk namudok aria ehudok yopuhi aih ipak pagipesheh penekeh iri ipak ta gamo pusuweh dodog. Ta wosik atin enesh kupaishi arpesh shutrip shuraoukuk enyudok ipakin yopinyi prais douk ta ipak puraen iri. <sup>12</sup> Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta inekesh shiyotu dodogowish atish kabi anohw urohw douk hwatao hwosah eikin debeini Iruhin ananit debeiti urupat iri. Aria eshesha ta mare wata shukutukuk shutogur shunak, uwok. Eik ta iwem eikin Iruhin ananin nyeigur nyuni ananibur namuburi wabur Jerusalem ababurin nyeigur nyutem eshudok arpesh esheshiruh yegeshiweruh. Abrudok wabur ta bukutukuk iruhw heven douk eikin Iruhin napeum bubuhi iri. Aria eik shopnek ta iwem eikin naminyi nyeigur nyutem esheshiruh yegeshiweruh. <sup>13</sup> Aria douk ipak arigos sapenyepi um ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen.”

### *Baraen Nyanak Um Iruhin Ananish Arpesh Shape Laodisia Iri*

<sup>14</sup> Aria Jisas nakripe nakri, “Jon, nyak wem enyudok baraen anap shup nyunuk um enyudok ensel douk nyape nyeoyoh Iruhin ananish arpesh shape Laodisia iri. Eik Jisas eikin baraen douk adurin. Enyen douk enyudok. ‘Eik douk yeyotu dodogoiwe atuwe abom yakripesheh yopinyi abom wosik Iruhin ananin adurin atinyi baraen iri. Aria eik douk baugos um ihishmorim eshudok eneshenesh douk Iruhin neneke shape iruhw atap iri shani ihishmorim arpesh. Eik yenekumepogu enyudok baraen ipak. <sup>15</sup> Eik yadukemesh um ehudok aih ipak pape penekeh iri um pape penek eikin mour um. Ipak douk madae nyumanugasip abom uwe aria shopunek, madae juwehosip abom uwe. Aria eik yakri ipak ta nyumanugasip abom o juwehosip abom. <sup>16</sup> Aria uwok. Ipak madae juwehosip abom uwe o madae nyumanugasip abom uwe. Ipak juwehosip karowih atin. Douk namudok aria eik ta igugurukwep putograri eikit nokwat! <sup>17</sup> Aria ipak pakri, “Apak manabuk sabaibori utabor bani sabaishi eshudok eneshenesh. Apak madae yaruhibum eneshenesh uwe.” Aria ipak pape yowep abom. Aria arpesh ta shutrip aria shenek gishaumep. Eik yatrip um, ipak douk kabi yaruhibum eneshenesh yopishi eshudok iri um. Ipak kabi douk nabes seshukeshi arpesh um. Ipak kabi douk rupeh wokeyp aria pagor pape um. Aria ipak douk madae pudukemesh uwe. <sup>18</sup> Douk namudok aria eik yakri ikiipeh enyudok baraen. Eikir gol douk debeihi nyih hanur aria henekar ratogur yopur abom. Douk namudok aria ipak putor arudok gol um, ipak ta putogur debeipari kabi shogrem sabaibori utabor iri um. Aria punator shigorihwihi rupeh aria pihur um punoshigar ipakiruh yegeshiweruh um arpesh mare shutrip pugor pupe aria abraen nyupeyep, uwok. Aria shopunek, ipak putor marasin aria punayok nabes um ipak wata putrugun wosik. <sup>19</sup> Eshudok arpesh douk eik urkum manawashamesh iri, eik ta ihesh um inekesh shutogur yopishi arpesh abom. Douk namudok aria ipak urkwip ta purum ipakih aih aria pukeshuk agabus yoweishi inahos aria ukon aparuh Iruhin abom. <sup>20</sup> Ipak pumnek! Eik yeyotu wit aria yape yarigep. Aria meinyi arpen douk

nyumneke aria nyijikume wit iri, eik ta iwish ini enyen upe numun. Aria ohwak ta upe uwok worigun atugun.

<sup>21</sup> Aria eshudok douk shiyotu dodogowish atish shunek wanohw shubo yoweishi inahos shubuhuk iri, eik ta ikesh debein yi nyeigur um shupe debeishi aria shuni eik mupe eikin debein yi wagitur. Kabi douk seiwo eik yeyotu dodo goiwe yenek wanohw yabo yoweishi inahos shabuhuk aria douk yape debeiwei ri yani eikin Yain wape anan in debein yi wagitur um. <sup>22</sup> Aria douk ipak arigos sapenyep iri um ta pumnek enyudok barea n Iruhin anan in Mishin nyakrip anan ish arpesh-éni aria pu suwen dodog pugipeshen!"

## 4

### *Shenek Lotu Um Iruhin Gani Iruhw Heven*

<sup>1</sup> Douk enyudok nyanakuk aria eik yatik anat wit tanajik tape iruhw heven. Aria yemnek anah mah. Aria enyudok arpen nyeyagwreh debeg kabi shahapur oruhw-umori douk iganigadae yemneken nyeyagwreh iri nyakripe nyakri, "Nyak nyutowo agundok iruhw aria iyabigen eshudok eneshenesh douk ta shutogur iri." <sup>2</sup> Aria ahudok atuh Iruhin anan in Mishin nyatogrumé dodo goiwin atin aria yatigu enen debein yi wagitur douk king-omi atum hapeneyen iri nyakus iruhw heven. Aria anan arman nape enyudok wagitur. <sup>3</sup> Anan natrugun kabi anam yopumi abom utom nyeigurim um jaspa iri um mani kupaimi owishiborimi nyeigurim um konilian iri batrugun um. Aria enen renbo nyakus aria enyenyir yamuger rakih rananug enyudok debein yi wagitur. Enyudok renbo douk yopin abom kabi anam yopumi grinporeim utom nyeigurim um emeral iri um. <sup>4</sup> Aria 24-poreish debeishi wagiturasos shopunek shakus shersharih um enyudok debein yi wagitur. Aria anam debeimi armam 24-poreim hatem eshudok wagiturasos. Amam hore shigorilwhi rupeh aria howem yopugwi hatog shenekog gol iri douk king-omi atum hogwem iri. <sup>5</sup> Aria utag bogaragi gani enyudok debein yi wagitur nyakus um aria utag brereyarog geyagwreh debeg. Aria hurukatin um enyudok debein yi wagitur 7-poreish ourelish douk hanish atish iri shakus. Eshudok ourelish douk shakri wobuwobren barea um Iruhin anan ish 7-poreish yopishi mishish.\* <sup>6</sup> Aria hurukatin um enyudok debein yi wagitur, enen enyudok kabi douk debeigwi yong um nyakus. Enyen nyatrugun abom nyape kabi wenyr um. Aria eshudok 4-poreish dodo goiwhi eshudok douk mishish shoresh iri shape orokohun aria shape shersharih um enyudok debein yi wagitur. Aria sabaisi nabes sape yamagosish um shani aparuhish um shani agabusish um. <sup>7</sup> Aria nyarik iri dodo goiwhi douk mishish nyoren iri douk nyape kabi enen debein yi wanohwinyi mahin nyeigurinum laion iri. Aria nyagiguk iri nyape kabi enen abonin bulmakau um. Aria binyatin iri enyenyig yamag gape kabi arpenyig yamag um. Aria nubatin-enyi nyape kabi anan debeini kumun nehuru nanak iruhw iri um. <sup>8</sup> Aria eshudok nubatish, eshesh atin atin douk anawipish kapraigiyohos shapenyesh. Aria numuniruh um hani adukiruh um esheshiruh yegesihweruh ihi ruhmorim douk shukniruh abom um nabes atus. Aria nyumneh weibus eshesh shapeum shakri, "Debeini Iruhin douk dodo goiwhi abom.

Anan douk yopuni abom, anan douk yopuni abom,  
anan douk yopuni abom.

Seiwo nape, aria douk shopunek nape,  
aria kweipon shopunek ta nunaki."

\* **4:5:** Putik futnot nyape Revelesen 1:4 iri.

Eshesh madae shupe um shurao uhwin atin um shakri enyudok baraen um uwe. <sup>9-11</sup> Eshesh shape shatuk Iruhin douk nape enyudok debeinyi wagitur iri ananin nyeigur nyato iruhw. Anan douk nape iih nyumneh iri. Eshesh shanadudareh-uman shenek tenkyuman shakri anan yopuni. Aria abudok nyutob eshudok nubatish dodogowishi douk mishish shoreshi shenekesh namudok um, amudok 24-poreim debeimi habuh hoduk ohrubus hurukatin um Iruhin douk nape wosik abom iih nyumneh iri douk nape enyudok debeinyi wagitur iri aria hape henek lotuman. Amam honik amamig yopugwi hatog douk king-omi atum hogwem iri hawashog hurukatin um enyudok debeinyi wagitur aria hakri,  
“Apakin debeini Iruhin, nyak douk  
dodogowinyi yopunyi abom.

Aria ihibishmorim arpesh ta shutuk nyakin atin nyeigur nyuto iruhw. Um maresh? Nyak nyagipesh nyakim atum urkum  
aria nyenek ihibishmorim eneshenesh eshudok shatogur shape aria ny-orukesh yapis.

Eshesh douk nyakim urkum atum morumesh nyakriyesh  
aria eshesh shatogur shape.”

## 5

### *Jon Natik Onok Buk Douk Shaweshigok Iri*

<sup>1</sup> Aria eik Jon yatik anudok arman douk natem enyudok debeinyi wagitur iri nasuhw onok buk ananin yopunyi rogur. Okwudok buk okwok douk kabi anap roupi shup um. Okwok douk shadareshok aria showeshigok. Aria baraan shenyem nyape numunik um kwani aduk shopunek. Aria showeshigok 7-poreih shakwu kendelis gris. <sup>2</sup> Aria eik yatik enen dodogowinyi ensel nyape nyeyagwreh debeg nyakri, “Meinyi arpen douk yopin abom aria wosik um nyubahiguk asudok kendelis gris douk showeshik okwudok buk um aria nyukweshihok?” <sup>3</sup> Aria madae shutik enen atin arpen nyape iruhw heven iri o agundok atap iri o shakatum agundok atap iri douk ta wosik um nyukweshih okwudok buk aria nyutik numunik um iri. <sup>4</sup> Aria douk yatik um madae shuparug enen arpen uwe douk wosik um nyukweshih okwudok buk aria nyutik numunik um iri. Douk namudok aria eik yereh debeg. <sup>5</sup> Aria anan um amudok 24-poreim debeimi nanaki nakripe nakri, “Kwamnek! Nyak mare nyureh! Anan arman um apudok awirop nyeigurip um Juda iri douk nikitak Devit ananip awirop iri douk dodogowin kabi enen wanohwiny mahin nyeigurinyum laion iri. Anan douk neyotu dodogowin atun nenek wanohw nabo yoweishi inahos shani ihibishmorim ananish horim shabuhuk. Douk namudok aria anan douk dodogowin aria wosik um nubahiguk asudok 7-poreis kendelis gris douk showeshik okwudok buk um aria nukweshihok.”

### *Jon Natik Enen Nugaen Sipsip*

<sup>6</sup> Aria yatigu enen Nugaen Sipsip nyeyotu hurukatin um enyudok debeinyi wagitur. Aria eshudok nubaish dodogowishi douk mishish shoreshi iri shani amudok 24-poreim debeimi sheyotu shersharih enyudok Nugaen Sipsip. Enyen nyubrug gwapenyan kabi shaen nyagok iri um. Enyen 7-poreiruh shuwaruh hakih enyeniyig barag aria 7-poreis nabes sapenyan. Asudok nabes douk sakri wobuwobren baraan um Iruhin ananish 7-poreish mishish\* douk anan neshopokesh shanak ihigunmorim um agundok atap iri. <sup>7</sup> Aria enyudok Nugaen Sipsip nyanaki nyatrun

\* **5:6:** Putik futnot nyape Revelesen 1:4 iri.

okwudok buk anudok douk nasuok yopunyi rogur aria nape debeinyi wagitur iri. <sup>8</sup> Douk enyen nyatrunok aria eshudok nubatish dodogowishi douk mishish shoresh iri shani amudok 24-poreim debeimi shabuh shaduk ohrubus shakus hurukatin um Nugaen Sipsip aria shenek lotumen. Aria ihm-morim amudok debeimi hasuhw sisigish atish enesh eshudok kabi gitahas um shani anas dis douk shenekas gol iri. Asudok dis douk shuknis um enyudok paura douk enyenigus nyugus seisik wosik iri. Enyudok paura douk nyakri wobuwobren baraen um beten douk Iruhin ananish arpesh shape shenekan iri. <sup>9</sup> Aria eshesh shape sheyarub onohw namuhwi avehw shakri,

“Nyak douk yopuni abom aria wosik um nyutrun okwudok buk aria nyukweshih ihismorim kendelis gris douk showeshigok um.

Um maresh? Eshesh shaen nyagok

aria nyakibor owishibor batourak bator

ihismorim awirosish arpesh

aria bakweshihesh shape Iruhin ananish atish.

Eshesh douk shape ihismorim sisigis debeisi awiros

aria sheneyagwreh sabainyi kupainyi baraen iri.

Eshesh douk sabairuhi sisigiruh yegeshiweruh-ish arpesh douk shape ihirubmorim debeirubi warub nahobigos  
abudok amnab agundok atap iri.

<sup>10</sup> Nyak douk nyenekam hatogur pris douk hape henek ofa um  
eneshenesh eshudok hako apakin Debeini Iruhin iri.

Aria anan ta nupe Debeini nusuhw merikw-umesh

aria kweipon eshesh ta shupe debeishi

kabi douk debeimi king-omi

aria shusuhw merik um ihishmorim arpesh shape agundok atap iri.”

### *Eshesh Shatuk Nugaen Sipsip Enyenin Nyeigur Nyato Iruhw*

<sup>11</sup> Aria wata shopunek yatrugunugu aria yemneku eshudok sabaishi Iruhin ananish enselahos esheshih meh. Shadarehesh um douk shatogur sabaishi abom. Sabaibi tausenab bani sabaibi milionab. Eshudok sabaishi enselahos sheyotu shersharih enyudok debeinyi wagitur nyani eshudok nubatish dodogowishi douk mishish shoresh iri shani amudok 24-poreim debeimi armam. <sup>12</sup> Aria eshudok enselahos sheyarub debeg shakri,  
“Enyudok Nugaen Sipsip douk seiwok shaen nyagok iri douk yopunyi abom.  
Douk namudok aria enyen douk wosik um nyirao debeinyi nyeigur  
nyuni utabor buni eneshenesh yopishi eshudok  
shuni debeinyi dodog.

Aria shopunek enyen douk wosik um nyirao yopinyi saki

aria wosik um apak mutuk enyenin atin nyeigur nyuto iruhw.

Aria enyen douk wosik um apak munadudareh-umen abom aria mutuk  
enyenin atin nyeigur nyuto iruhw  
aria munek lotumen.”

<sup>13</sup> Aria eik yemnek ihishmorim eshudok douk Iruhin nenekesh shape iruhw atap iri shani eshudok douk shape shakam agundok atap iri shani ihishmorim shape shakam debeigwi youg iri shape sheyarub onohw avehw shakri,

“Apak makri ihishmorim eneshenesh eshudok shunadudareh um  
anudok nape debeinyi wagitur iri nini Nugaen Sipsip.

Aria shutuk esheshish nyeiguhw shuto iruhw

aria shunek lotumesh ihih nyumneh.

Aria makri ihinyumorim debeinyi dodog nyuni agundok natrugun aria  
nape dodogowini um shupe um

eshesh biyesh ihih nyumneh!"

<sup>14</sup> Aria eshudok nubatish dodogowishi douk mishish shoresh iri shakri, "Adur atin!" Aria amudok 24-poreim debeimi armam habuh hoduk ohrubus atap aria henek lotu um Iruhin nani Nugaen Sipsip.

## 6

### *Nugaen Sipsip Nyabrig Kendelis Gris Soweshik Buk Iri*

<sup>1</sup> Aria yatigu Nugaen Sipsip nyohur okwudok buk douk shadareshok showeshigok 7-poreis kendelis gris iri nyasuok aria nyabahiguk sarig iri kendelis gris. Aria eik yemnek enen sagomatin um eshudok nubatish dodogowishi douk mishish shoresh iri nyeyagwreh. Aria enyenyih mah heyagwreh um kabi douk utag pogarog um. Aria enyen nyakri, "Nyak yowi." <sup>2</sup> Aria yatigu enen shigorihwinyi hos nyanaki. Aria anudok arman natem enyudok hos iri nasuhw enen kein. Aria shopunek, shakon anat yoputi hat douk eshudok arpesh douk shenek uhwinyum wanohw iri shogur iri. Aria abudok nyutob anan natem hos nanak kabi anan nenek uhwinyum wanogwiruh aria nakri nunek onohw shopunek wanohw nunek uhwinyumoh iri. <sup>3</sup> Aria Nugaen Sipsip nyabahiguk sagiguk iri kendelis gris aria eik yemnek enyudok nyagiguk iri dodogowinyi douk mishin nyoren iri nyakri, "Nyak yowi!" <sup>4</sup> Aria yatigu enen owishiborinyi nyatrugun iri hos nyanaki. Aria anudok arman natem enyudok hos iri narao dodog um nuhur shape agundok atap iri arpesh esheshiruh aparuh um shurpak aria shubo kupaishi shugok. Aria shakon anat debeiti bainat.

<sup>5</sup> Aria Nugaen Sipsip nyabahiguk binyatinis kendelis gris aria eik yemnek binyatin-in enyudok dodogowinyi douk mishin nyoren iri nyakri, "Nyak yowi!" Aria eik yatrugunugu aria yatigu enen behrabinyi hos nyanaki. Aria anudok arman natem enyudok hos iri nasuhw enen skel douk shape shenek skelum eshudok eneshenesh um ananis wis.

<sup>6</sup> Aria yemnek enen enyudok kabi douk enen arpen enyenyih mah um. Enyen nyeyagwrehi agundok eshudok nubatish dodogowishi douk mishish shoresh iri shapemori. Aria enyudok nyeyagwrehi iri nyakri, "Nyak nyunak nyunek nyakin mour aria arpesh ta shugok um nyurub. Wit iri bali ta karowish atish aria ta shutoumesh um debeibori utabor. Douk namudok aria shunek mour atuh nyumnah shurabor iri utabor ta wosik um shutor atup shokupi marup um wit, o bias atup shokusi marus um bali kabi douk rais um. Aria agusudok rowos douk shape shenek wel-agos iri sani agosudok douk shadi wainip shuruwep-agosi nyak mare nyununugos!"

<sup>7</sup> Aria Nugaen Sipsip nyubahiguk nubatis kendelis gris soweshik okwudok buk iri. Aria eik yemnek nyagiguk iri nubatin dodogowinyi enyudok mishin nyoren iri nyakri, "Nyak yowi!" <sup>8</sup> Aria eik yatigu enen akitohinyi hos nyanaki. Aria anudok natemori enyudok hos iri ananin nyeigur douk nanahwar Gok. Aria anudok anan douk debeini nasuhw merik um abrudok wabur douk shagok iri shapenyaburi nagimani. Aria arpesh shape agundok atap iri shenesiyao um nubatus awiros. Aria amam harao dodog um hubo anap awiropish eshudok arpesh shugok. Enesh hakwumesh bainatog haesh shagok, aria enesh shagok um nyurub. Aria enesh yoweihai arugeh haesh aria shagok, aria enesh wanohwishi wanarish mahish shaesh shagok. <sup>9</sup> Aria Nugaen Sipsip nyabahiguk anas wisish kendelis gris soweshik okwudok Buk iri. Aria eik yatigu eshudok arpesh douk seiwok abom shasuhw Iruhin ananin baraeen dodog shakripesh um agundok Jisas nataurumesh um aria kupaishi arpesh shaesh shagok iri eshesish mishish. Eshesh shape shakam enyudok alta douk shape showem

eshudok um shenek ofamesh shako Iruhin iri um. <sup>10</sup> Aria eshesh shahwar debeg shakri, "Dodogowini Debeini, nyak douk adurinyi yopunyi abom nyasuhw iruhw atap iri! Ta makwunih nyumneh hunak hudiguk aria nyak kadak nyunekumesh kwotog agundok atapishi arpes um nyuwanamesh yoweishi inahos um agundok shabo apak magok um?"

<sup>11</sup> Aria Iruhin nekesh rouhi shigorihwi rupeh um atin atin eshudok arpeshish mishish aria nakripesh namudok nakri, "Ipak pupe pishukabar banab nyutob shopunek um arigaha shubo ipakish ashukenyish owashish douk shani ipak panuboum penek atin mour iri shugok kabi douk shabo ipak pagok um ba iyoh. Douk eshesh shesh shugok arigaha shunak shutogurum enyudok namba eik yakriyen iri aria eik ta kadak iwanom-umep ereb."

<sup>12</sup> Aria yatigu Nugaen Sipsip nyabahiguk anawipis kendelis gris douk soweshik okwudok buk iri aria debeikwi enyik kwatuk agundok atap. Aria nyumnahin aun natogur behrabin kabi anah yoweishi behrabihi rupah um. Aria wabin aun natogur owishiborin kabi owishibor um. <sup>13</sup> Aria unib wape iruhw utag iri wanatuk wagruki atap kabi enep watakipi fikip shuruwep douk dodogowinyi uhwin nyasusuep tutukarep pagruk-umori um. <sup>14</sup> Aria iruhw utag ganak gawishuk kabi shadaresh anap jarukwip um. Aria ihiruhmorim yodururuh hani unaihos shanak abom shapeik kupaignum.

<sup>15</sup> Aria amudok hape king um agundok atap iri hani anam debeimi nyeiguw shatoumami, hani amudok debeimi hasuhw merik um ami iri, hani eshudok douk shanagrem sabaibori utabor bani jah iri, shani eshudok dodogowishi arpesh, shani ihishmorim arpesh douk shape shakamum kupaishi shenekumesh mour meyoh iri, shani eshudok douk shape wosik iri, eshesh ihishmorim shanak shawish shanabeshuk shape hurupiruh hani debeiwori burbudugiyu douk watao yodururuh iri. <sup>16</sup> Aria eshesh shahwar yodururuh hani debeibori utabor shakri, "Ipak pubuh pishapomapuk um anudok nape debeinyi wagitur iri um mare nutrup. Aria shopunek um pubeshukapaguk um Nugaen Sipsip juwehosin um mare nyunekumap kwotog aria nyunekap murao debeiri eriger. <sup>17</sup> Um maresh? Ahudok debeihi nyumnah um anudok nape debeinyi wagitur iri nini Nugaen Sipsip amam juwehosim um huwanamesh eneshenesh yoweishi inahos eshesh shape shenekesh iri um douk hatogur. Douk namudok aria omi ta dodogowin um nyunek uhwinyumam? Adur atin ta uwok."

## 7

### *Sabaishi Israel 144,000-Poreish Sharao Iruhin Ananin Kak*

<sup>1</sup> Douk enyudok nyanakuk aria eik yatrugunugu aria yatigu nubatish enselahos sheyotu anagas um nubatin kona um agundok atap um agudok nahobig. Aria eshesh shasuhuk uhwin douk nyahur nubatin kona iri um mare nyahur agundok atap o nyahur youg o nyahur nyususuhw enen rowog. <sup>2</sup> Aria wata yatigu kupainyi ensel nyatowi nyanaki iruhw gani aun nakihumori. Enyen nyasuhwi enen enyudok douk Iruhin nape abom iih nyumneh iri ananin kak nyapeyenyi. Aria nyahwaresh debeg eshudok nubatish enselahos douk Iruhin nekesh dodog um shununu agundok atap nini youg iri. <sup>3</sup> Enyen nyakri, "Ipak mare arigas pununu agundok atap nini youg iri rowos, watak. Apak makri muwem-umesh Iruhin ananin kak nyupe yomogos um eshudok arpesh douk shenek apakin Iruhin ananin mour iri ba iyoh aria ipak kadak pununu eshudok eneshenesh."

<sup>4</sup> Aria eik yemnek um shadareh eshudok arpesh douk sharao Iruhin ananin kak iri. Eshesh shadarehesh shanak shatogur sabaishi um 144,000-poreish. Eshudok sabaishi arpesh douk shanaki asudok ihismorim 12-poreis debeisi awiros um eshesh Israel. <sup>5</sup> Apudok awirop shahwarop um Juda iri, sharao kak aria shatogur 12,000-poreish. Aria apudok anap awirop shahwarop um Ruben iri 12,000, aria apudok shahwarop um Gat iri 12,000. <sup>6</sup> Aria apudok shahwarop um Aser iri 12,000, aria apudok shahwarop um Naptali iri 12,000. Aria apudok shahwarop um Manase iri 12,000. <sup>7</sup> Aria apudok shahwarop um Simeon iri 12,000, aria apudok shahwarop um Livai iri 12,000. Aria apudok shahwarop um Isakar iri 12,000. <sup>8</sup> Aria apudok shahwarop um Sebulun iri 12,000, aria apudok shahwarop um Josep iri 12,000. Aria apudok shahwarop um Benjamin iri 12,000. Asudok awirosish arpesh sharao Iruhin ananin kak.

### *Sabaishi Arpesh Shenek Lotu Um Iruhin*

<sup>9</sup> Douk enyudok nyanakuk aria eik yatrugunugu aria yatigu sabaishi sisigiruh yegeshiweruh-ish arpesh. Eshudok arpesh douk madae wosik um shudarehesh uwe, uwok. Eshesh douk ihismorim debeisi awirosish arpesh douk sheneyagwreh sabainyi kupainyi barea iri. Eshesh douk shanaki ihigos-morim nahobigos douk sape agundok atap iri shantorum shape. Eshesh shore shigorihwihi rupeh aria shasuhw palmenis shus esheshis wis aria sheyotu hurukatin um enyudok debeiniyi wagitur nyani Nugaen Sipsip.

<sup>10</sup> Aria eshesh shahwar debeg shakri,

“Apakin Iruhin douk nape debeiniyi wagitur iri  
nani Nugaen Sipsip amam atum abom hanarap  
matanamori mape wosik.”

<sup>11</sup> Aria ihismorim enselahos sheyotu shersharih enyudok debeiniyi wagitur nyani amudok 24-poreim debeimi hani eshudok nubatish dodogowishi douk mishish shoresh iri shabuh shaduk ohrubus hurukatinum enyudok debeiniyi wagitur aria shape shenek lotu um Iruhin. <sup>12</sup> Shakri,  
“Adur atin! Apak manadudareh um apakin Iruhin  
aria matuk ananin nyeigur nyato iruhw  
aria makri anan yopuyopuni.

Aria apak ta munek tenkyuman iih nyumneh.

Aria debeiniyi nyeigur nyuni yopipi urkwip

puni saki iri dodog ta shupe abom um anan atun iih nyumneh. Adur atin!”

### *Arudok Eriger Douk Eshudok Arpesh Shemnegor Iri Douk Ratuh*

<sup>13</sup> Aria anan um amudok 24-poreim debeimi narige nakri, “Eshudok arpesh shor rouhi shigorihwihi rupeh iri douk meishi? Eshesh shanaki meigunum iri?”

<sup>14</sup> Aria eik yakripan yakri, “Debeini, nyak kanak douk nyadukemesh, eik uwok.” Aria anan nakripe nakri, “Eshudok arpesh seiwok shape agundok atap aria eshudok douk shakanup agabus Iruhin iri shenekesh shemnek debeiri eriger. Aria eshesh shakwrup esheshih rupeh Nugaen Sipsip enyenyibor owishibor aria hatogur shigorihwihi. <sup>15</sup> Douk namudok aria eshesh douk sheyotu hurukatin um Iruhin ananin yopunyi wagitur. Aria nyumneh weibus eshesh shape shenek ananin mour numun ananit debeiti urupat. Aria anudok douk nape enyudok wagitur iri ta nini eshesh nupe aria nutaurumesh. <sup>16</sup> Aria nyurub ta mare wata besh atin aria abar shopunek ta mare besh atin, uwok. Aria debeihi wah shopunek ta mare wata hutao hesh shumnek debeiri eriger, uwok. <sup>17</sup> Um maresh? Nugaen Sipsip douk nyeyotu orokohun hurukatin um debeiniyi wagitur iri ta nyupe nyutaurumesh wosik kabi anudok nataurum sipsip wosik iri um. Aria

enyen ta nyuraesh shunak shuwok abrudok abar shubaroh aria bunekesh shupe wosik abom iih nyumneh iri. Ababar douk bakih atap meyoh bor iri. Aria Iruhin ta nubatikumesh ihihmorim abih aria eshesh ta mare wata shureh atin, uwok.”

## 8

### *Nugaen Sipsip Nyabahigeshuk Namba 7 Kendelis Gris Soweshik Buk Iri*

<sup>1</sup> Douk Nugaen Sipsip nyabahigeshuk namba 7 kendelis gris douk soweshik okwudok buk shadareshok iri gani iruhw heven. Aria madae enesh eshudok shiyagwreh o shubirak uwe, uwok. Ihishmorim eshudok shape mukareg banab nyutob hurukatin um tukwanin aua. <sup>2</sup> Aria yatigu eshudok 7-poreish enselahos douk sheyotuwi hurukatin um Iruhin iri sharao 7-poreiruh aruruh.

<sup>3</sup> Aria kupainyi ensel nyasuhw anas dis douk shenekas gol iri um shure paura douk shashainyeh nyenek nyugus seisik wosik iri um. Enyen nyasuhw asudok dis aria nyanaki nyeyotu hurukatin um alta douk showem eshudok shenek ofamesh shako Iruhin iri um. Aria sheken sabainyi paura um nyinyanuh um ihishmorim Iruhin ananish arpesh esheshin beten douk shape shenekan iri. Aria nyeshem enyudok alta douk shenekan iri nyatao hurukatin um debeineyi wagitur iri aria nyenek ofamesh um Iruhin. <sup>4</sup> Aria nyih hanu enyudok paura douk enyudok ensel nyasuwen enyenyis wis iri aria nyugus sani Iruhin ananish arpesh esheshin beten shakitak shato um agundok Iruhin naapeum. <sup>5</sup> Aria enyudok ensel nyasuhw asudok dis enyudok paura nyor um aria nyanak hurukatin um enyudok alta aria nyonik nyih nyehur dis shukunis aria nyawasgeh hagruki agundok atap. Douk enyen nyawasgeh hagruki aria utag brereyarog gatrugun abom aria gezagwreh debeg aria debeikwi enyik kwatuk.

### *Nubatish Enselahos Shahapurish Aruruh*

<sup>6</sup> Aria eshudok 7-poreish enselahos shasuhw 7-poreiruh aruruh iri shenek redi um shahapuruh. <sup>7</sup> Aria nyarik iri ensel nyahapurish enyenyihw oruhw aria shigorihwisi ais douk dodogowis kabi utabor-umori sani nyih douk shenenek um owishibor iri shagruki agundok atap. Aria shasiya agundok atap nani rowos um biwotuk outume. Aria ehudok nyih hanu onok outuk aria hanu ihigos-morim rowos iri wishap heyateshuk. Aria bio outume wapeik, nyih madae hunu uwe.

<sup>8</sup> Aria nyagiguk iri ensel nyahapurish enyenyihw oruhw aria shawashak enen enyudok kabi douk onohw debeihwi nyih hanuhw iri yoduhw hwagrukuk youg. Aria shasiyauk youg um biwotuk outume. Aria onok outuk youg gwanenem um owishibor. <sup>9</sup> Aria shasiya ihishmorim eshudok eneshenesh shape youg iri um bibatun lainab aria anan lain shagok shatuh. Aria shopunek, shasiya ihiyumorim kroruhiyor douk wor youg iri um bibatun lainab aria anan lain yoweu abom gririgar watush.

<sup>10</sup> Aria binyatin iri ensel nyahapurish enyenyihw oruhw aria onok takweikwi unuk douk hanuk nyih jorarehok kabi hanu arkirub um aria kwakutukuk iruhw aria kwanatuk kwagrukuk agundok atap. Aria shadareh ihibusmorim worubus um bibatun lainab aria okwudok unuk kwagrukuk kwabo anan lain um worubus sani ihibarmorim abar douk bakih atap meyoh iri. <sup>11</sup> Aria anan lain senenem um nubutiabari abar. Aria sabaishi arpesh shawok abrudok abar aria baesh shagok shatuh. Nyeigurik um okwudok unuk douk Nubutini Marasin.

<sup>12</sup> Aria nubatin iri ensel nyahapurish enyenyihw oruhw aria shasiya nyumnahin nani wabin aub bani ihiyumorim unib um biwotuk outume.

Aria eshesh shanunu onok outuk um anudok nyumnahin aun nani onok outuk um wabin aun aria onok outuk um oudok unib aria shatogur arukwutigunish. Aria shatupak nyumnah um bibatin nyutob aria wab um bibatin. Douk namudok aria nyumnah biyab nyutob batrugun um aria anob nyutob arukwutigun. Aria wab shopunek namudok atin, biyab nyutob wanyukeh aria anob nyutob arukwutigun.

<sup>13</sup> Aria yatrugunugu aria yatigu anar debeiri armir kabi douk kumun um rehuru ranak iruhw. Aria yemnek um arar reyagwreh debeg rakri, "Gihaumesh arpesh shape agundok atap iri. Um maresh? Hurukatin um eshudok bishatin enselahos ta shihapurish esheshiruh aruruh aria enenyen-enamaen ta nyutogur um eshudok atapishi arpesh aria ta nyunekesh shunamnek debeiri eriger."

## 9

### *Anas Wisin Ensel Nyahapurish Enyeniyihw Oruhw*

<sup>1</sup> Douk anas wisin ensel nyahapurish enyeniyihw oruhw aria yatik onok unuk kwanatuki kwakutukuk iruhw kwagruki jurug agundok atap. Okwudok unuk douk shakok enyudok ki um agudok nuwag douk gagor gabuhuk gani atap aria atapig um madae gubuh giyotu anabik iri uwe. <sup>2</sup> Aria abudok nyutob enyen nyejik agudok nuwag obi nyutob, sabaiwusi nyugwus sakih sato abom kabi douk debeihi nyih hanu um. Aria agwusudok nyugwus sato aria sakih seyawiyamuk nyumnahin aun aria aun nani iruhw shopunek arukwutigun abom. <sup>3</sup> Aria sabaishi eshudok kabi douk debeishi gormish um iri shakutukuk ogwusudok nyugwus shagruki agundok atap. Eshesh douk sharao dodog aria wanohwish kabi douk pupiyak um. <sup>4</sup> Aria Iruhin nakripesch um eshesh mare shubo wishap puni eneshenesh douk shatogur agundok atap aria shuni rowos shugok, uwok. Eshesh ta shubo eshudok arpesh douk madae shurao Iruhin ananin kak nyupe esheshis domaesh iri uwu atish shunekesh shumnek debeiri eriger.

<sup>5</sup> Aria eshudok kabi douk gormish um iri shape shanatuk eshudok arpesh um anas wisib aub. Aria eshesh shape shemnek debeiri eriger kabi douk pupiyagwihiyar wanatukesh shemnek um. Aria eshesh madae shurao dodog um shubo eshudok arpesh shugok uwe, uwok. <sup>6</sup> Aria abudok nyutob eshesh ta shurim yeh um shugok um. Aria shopunek, eshesh ta shukri abom um shugok um atin aria ta uwok. Gok ta nyuruwok-umeshuk.

<sup>7</sup> Aria yatik eshudok gormish shape kabi douk hwosahos um shape shenek redi um shunak um wanohw. Esheshigos baragos douk enesh eshudok kabi douk yopugwi hatog shenekog gol iri gwatem um aria esheshigos yamagos sape kabi arpeshigos um. <sup>8</sup> Aria esheshigos baragos sape kabi armago-wigos um. Aria esheshiruh naruh hape kabi enen debeinya wanohwinyi mahin nyeigurin um laion iri enyeniyiruh hapeum.

<sup>9</sup> Aria mishish um, eshesh shor onog siotog douk dodogowig kabi douk ainab um. Aria esheshish kapraigiyohos shenekoh iri mah douk kabi hwosahos shanuk sabaishi wilkarahos shahur shanak um wanohw iri shenekoh iri mah. <sup>10</sup> Aria esheshis honus sape kabi douk pupiyagwihiyar um aria sanatuk arpesh. Aria esheshin dodog douk nyape asudok honus um sunatuk eshudok arpesh um abudok anas wisib aub. <sup>11</sup> Aria eshesh douk enyudok ensel, douk nyasuhw merik um agudok nuwag douk gagor gabuh gani atap iri nyape debeinya king um eshesh nyasuhw merikwumesh. Enyudok ensel enyeniyin nyeigur douk shahwaren eshesh Hibru esheshin baraan um douk shakri, "Abadon." Aria eshesh Grik esheshin shakri,

“Apollyon.” Aria apak ta mukri “Anudok arman douk nape nanunu ihish eneshenesh iri.”

<sup>12</sup> Eneshenesh sagomatinyish eshudok douk shenek arpesh shemnek debeiri eriger iri douk shatogur shanak shatuh douk. Aria pumnek, biyesh yoweishi abom kabi douk enyudok nyarik iri douk wata shape, aria eshesh ta shuguk shutogur.

### *Anawipin Ensel Nyahapurish Enyeniyihw Oruhw*

<sup>13</sup> Aria anawipin iri ensel nyahapurish enyeniyihw oruhw aria eik yem-nek anah mah. Enyudok arpen douk nyeyagwrehi gani anagas um nubatin kona um enyudok alta douk sheneken gol iri. Enyudok alta showem eshudok shenek ofa shako Iruhin um, enyen douk nyatao hurukatin um Iruhin napeum. <sup>14</sup> Aria enyudok nyeyagwrehi iri nyakrip enyudok anawipin ensel nyasuhw oruhw iri nyakri, “Nyak nyukweshih eshudok nubatish enselahos douk shonoweshik shape abudok debeibi worub nyeiguribum Yufretis iri shunak wosik!”

<sup>15</sup> Aria enyen nyukweshih-esh aria eshesh shasiya ihishmorim arpesh shape agundok atap iri um bisatup awiros. Aria eshesh shabo anap awirop um eshudok arpesh shagok. Eshudok enselahos eshesh douk Iruhin nenekeh shenek garibog abom shapeum abudok atub nyutob, ahudok atuh nyuminah, anudok atun aun aria enyudok atin kwar um eshesh shunek enyudok mour. <sup>16</sup> Aria eik yemnek shadareh amudok soldia douk hatem hwosahos aria hanak henek wanohw iri um douk sabaimi abom hatogur 200 milion.

<sup>17</sup> Aria eik kabi douk yabo yomnis um aria yatik amudok soldia hatem hwosahos iri hore siotog douk shenekog ainab iri um amamish mishish. Agwudok siotog onog douk owishiborig kabi douk nyih hanu um. Aria onog behrabig, aria onog akitohig kabi douk amudok utom nyeigurim um salfa iri. Aria hwosahos esheshigos baragos sape kabi enesh debeishi wanohwishi mahish nyeigurish um laion iri esheshigos um. Aria nyugwus sani nyih douk hanuwi amudok akitohimi utom nyeigurim um salfa iri shatograri eshudok hwosahos esheshig nokwatog. <sup>18</sup> Aria eshesh shasiya ihishmorim arpesh um bisatin awiros aria eshesh shabo anap awiropish arpesh shagok. Eshesh douk eshudok bishatin yoweishi abom eshudok, nyih, nyugwus aria ehudok juwehosih nyih douk hanuwi amudok utom salfa iri douk shatograri hwosahos esheshig nokwatog iri shaesh shagok.

<sup>19</sup> Eshudok hwosahos esheshin dodog douk nyape esheshig nokwatog gwani honus. Esheshis honus douk sape kabi yuguhw um, aria baragos sapenyesh. Aria eshesh shakwu esheshis honus um shabo arpesh shenekesh sharao debeiri eriger.

<sup>20</sup> Aria ihishmorim shapeik iri arpesh douk madae shugok abudok nyutob eshudok yoweishi shatogrumeabum um obi nyutob, eshesh madae shukutukuk yoweishi inahos uwe, uwok. Eshesh madae shukehuk agabus ehudok aih um shape shenek lotu um sagabehos shani amudok madae adurimi god omi um uwe, uwok. Amudok god omi douk eshesh kanak shenekam esheshis wis iri. Eshesh shenekam shakwu gol rani siliwa iri akitohinyi kapa douk shahwaren um bras iri nyani utabor bani rowos iri. Amam douk madae hutrugun o humnek o hurahaen iri uwe. <sup>21</sup> Aria shopunek, eshesh madae shukehuk agabus ehudok yoweishi aih um shabo kupaishi shakwumesh eshudok eneshenesh aria shaesh shagok um uwe, shani ehudok um shenek ouruh um, shani enyudok um shenek enenyenen um subagwiruh um, nyani enyudok um shape shenek wehrur um, nyani

enyudok um shakwuaruh um uwe, uwok. Eshesh madae shukutinyukuk aria shatanam shukon aparuh Iruhin uwe.

## 10

### *Ensel Nyakon Buk Jon Nakwoh*

<sup>1</sup> Enyudok nyanak nyatuhuk aria eik yatigu enen kupainyi dodogowinyi ensel nyakutukuk iruhw heven nyabuhi. Orug gweyor-gwarih enyeniyhw yegeniyhw. Aria enen renbo nyato iruhw aria enyeniyig yamuger rakih rananug, ratem iruhw enyeniyig barag. Aria enyeniyig yamag gatrugun kabi douk wah hatao hatrugunuk um. Aria enyeniyigas aiyas sape kabi douk nyih hanu jurareh iri um. <sup>2</sup> Aria enyen nyasuhw onok shokukwi buk douk shadareshok iri enyeniyis wis. Okwudok buk douk kwanejik kwape aria enyen nyasuhwok. Enyeniyig yopugi aiyang nyagur gor youg, aria anag nyeshishuk amnab. <sup>3</sup> Aria enyen nyogao aria nyahwar debeg kabi enen debeinnyi wanohwinyi mahin nyeigurinyum laion iri nyahwar um. Enyen nyahwar jurug aria utag pogarög 7-poreih. Aria utag geyagwreh kabi douk arpeniyih mah um. <sup>4</sup> Douk utag geyagwreh 7-poreih jurug, aria eik yenek redi um yakri iwem enyudok baraen um anap shup. Aria eik yemnek anah mah hanaki iruhw heven. Aria enyudok nyeyagwrehi iri nyakri, “Enyudok baraen douk utag geyagwreh 7-poreih gakriyen iri, nyak mare nyunyem, uwok. Enyudok baraen nyumneken nyupe um nyak atin!” <sup>5</sup> Aria enyudok ensel douk yatrin nyeyotu youg gwani amnab iri nyatuk enyeniyin yopunyi rogor nyato iruhw. <sup>6</sup> Aria enyen nyakri iruhw um anudok douk nape ihih nyumneh iri ananin nyeigur. Anan douk neneh iruhw atap nani ihishmorim eneshenesh eshudok douk shape iruhw atap iri. Aria shopunek, neneh youg gwani eneshenesh shape shakam-igum iri.

Aria enyen nyakri, “Nyutob batuh, aria Iruhin ta mare nukri nusuhwesh nupe, uwok.” <sup>7</sup> Aria enyudok ensel wata shopunek nyakri, “Abudok nyutob douk namba 7 ensel nyahapurish enyeniyhw oruhw obi nyutob, eshudok douk seiwok Iruhin nabeshukesh iri ta shunowerah nunekesh shutogur yopugunum. Anan ta nunekesh shutogur yopugunum kabi douk seiwok anan nakripuk amam profet douk henek ananin mour iri um.”

<sup>8</sup> Aria eik wata yemnek ahudok atuh mah. Aria enyudok arpen douk iganigadae yemneken nyeyagwreh iruhw heven iri wata shopunek nyakripe nyakri, “Nyak nyunak nyutrin okwudok buk douk kwanajik kwor enyudok ensel douk nyeshish youg gwani amnab iri enyeniyis wis iri.”

<sup>9</sup> Aria eik yanak yarigen um nyuke apudok shokwupi shup shadareshap iri. Aria enyen nyakripe nyakri, “Nyak suwap aria nyupoh. Nyupoh pur nokwat um, apap ta ekehip kabi douk araruh um. Aria pubuh pur apahw um ta nyumnek nubut.” <sup>10</sup> Aria eik yatrinyp aria yapoh. Aria yapoh por nokwat um, eik yemnek ekehip kabi douk araruh um. Aria yapoh pubuh por apahw um, apap wata nubutip. <sup>11</sup> Aria yemnek enen arpen nyakripe nyakri, “Nyak ta nyukripesh enyudok baraen Iruhin nakripen-nyi shopunek. Enyudok baraen douk nyakrium eshudok douk ta kweipon shutogurum sabaishi arpesh douk shape ihigosmorim nahobigos douk sape agundok atap iri. Eshesh shuni sabaishi sisigiruh yegeshiweruh-ish arpesh shuni sabaishi sheneyagwreh kupainyi baraen iri, shuni sabaimi king-omi.”

## 11

### *Biom Armam Hakripesh Yopinyi Baraen Iri*

<sup>1</sup> Aria enyudok ensel nyeke enen rowog douk shape shasuhw wigah um eshudok eneshenesh iri aria nyakripe nyakri, "Nyak kakitak suh wigah um Iruhin ananit urupat<sup>\*</sup> tuni alta douk showem um eshudok shenek ofamesh shako Iruhin iri um. Aria shopunek, nyudareh ihishmorim arpesh douk shape shenek lotu numun ananit urupat iri. <sup>2</sup> Aria arbudok narub douk bapeik adukehahitam agundok wit um atudok urupat iri nyak mare nyusuhw wigahumat, uwok. Um maresh? Arbudok narub Iruhin nako eshudok arpesh douk madae shudukem Iruhin iri uwe. Aria eshesh ta shushish Iruhin ananibur yopuburi wabur Jerusalem shupeum um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. <sup>3</sup> Aria eik Iruhin ta ishopok eikim biom armam inekam dodogowim atum hunak hukripes eikin yopinyi baraen. Amam ta hur yoweih i rupeh kabi douk yoweigosi begos<sup>†</sup> um. Eik ta ikripam eikin baraen aria amam ta hunak hukripes 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos." <sup>4</sup> Amudok biom armam amam douk shakri wobuwobren baraen um eshudok biyesh rowos nyeiguwhish um oliv iri shani biyesh eshudok douk showem lamhos shetem um douk shakus hurukatin um Debeini douk nasuhw ihibarmorim amnab iri. <sup>5</sup> Aria ta enesh arpesh shukri shom o shuham um, nyih ta hutograri amamig nokwatog aria hunu amamish horim hiyatesh. Douk namudok aria meishi arpesh shukri shom o shunekam mumam iri, eshesh ta mare shuruwok, uwok. Eshesh shopunek ta ehudok nyih hunish aria shugok shutuh. <sup>6</sup> Amudok biom douk harao big aria dodog um hunek eshah mare hurauri abudok nyutob amam hukripes Iruhin ananin baraen obi nyutob um. Aria shopunek, amam douk dodogowim um hunek ihibarmorim abar douk bakih atap meyoh iri buni bor worubus sani youg iri um bunenek um owishibor. Aria amam douk dodogowim um hunek eneshenesh yoweishi abom eshudok shutogurum ihishmorim arpesh shunekesh shurao debeiri eriger. Aria douk meibi nyutob amam hukri hunekesh namudok um, amam ta hugipesh amamip atip urkwip.

<sup>7</sup> Douk kweipon amam ta hukripes Iruhin ananin baraen hiyaten aria enyudok debeinyi wanohwinyi mahin ta nyukutukuk agudok nuwag douk gagor gabuhuk gani atap iri nyutowi. Enyen ta nyutowi aria nyuto iruhw nyuni amudok biom armam shurpak aria enyen ta dodogowin atin nyom hugok. <sup>8</sup> Aria amam ta hukusuk abrudok debeiburi wabur ababih debeihi yah douk seiwok shabo amamin Debeini showeshikan shanaur neir rowog kruse nagok aburi. Abrudok wabur ababish biyesh wobresh nyeiguwh douk Sodom iri Isip. <sup>9</sup> Aria bihotih shuknih anah tukwanih nyumneh, sabaishi arpesh shanaki ihismorim awiros douk shape ihigos-mórim na-hobigos agundok atap iri ta shutrum. Eshesh douk sisigiruh yegeshiweruhish douk sheneyagwreh sabainyi kupainyi baraen iri. Aria eshesh ta mare shukri wosik um enesh arpesh shumuhur shunak shurumam, uwok. <sup>10</sup> Aria shape agundok atap iri arpesh ta shunadudareh um agundok amudok biom hagok um. Eshesh ta shunadudareh aria shupe shukesh yopinyi presen um esheshish atin atin arpesh. Um maresh? Amudok biom wata hapeum, amam apa henek sabaishi arpesh shape agundok atap iri shemnek debeiri eriger. <sup>11</sup> Douk bihotih shuknih anah tukwanih nyumneh hunak hudiguk, aria ta Iruhin ananip yap wata panak pawisham aria amam ta wata

\* <sup>11:1:</sup> Atudok Iruhin ananit urupat douk takri um Iruhin ananish arpesh. † <sup>11:3:</sup> Amudok biom profet hagipesh eshesihaih hore yoweigosi begos sanahwaram um rupeh um huyabiges um amam hakri uwok abom um eneshenesh yoweishi inahos eshesh shenekesh iri aria hape hereh.

hukitak hiyotu. Aria arpesh ta shutrum aria shunogugur abom. <sup>12</sup> Aria abudok nyutob, amudok biom ta humnek anah mah. Aria enyudok arpen nyiyagwrehi iruhw heven iri ta nyukripam debeg nyukri, "Ipak putowi agundok iruhw!" Aria amamish horim ta shiyotu shupe shutrum meyoh aria amam ta huwish onog orug aria hupe huto um iruhw heven.

<sup>13</sup> Aria ta abudok atub nyutob abom, takweikwi enyik ta kwutuk aria sabaishi 7,000-poreish arpesh ta shugok. Aria agundok onok outuk abrudok wabur ta buwishuk aria 9-poreiyu outumeb upeik. Aria eshudok douk shupeik iri ta shutik namudok aria eshesh ta shunogugur abom aria ta shupe shutuk Iruhin douk nepe iruhw heven iri ananin nyeigur nyuto iruhw. <sup>14</sup> Eshudok biyesh yoweishi abom douk shenek arpesh shemnek debeiri eriger iri douk eshudok shatuh. Aria ipak pumnek! Douk ta mare roubi nyutob aria eshudok bishatin yoweishi abom douk ta shunek arpesh shunumnek debeiri eriger iri ta shutogur.

### *Namba 7 Ensel Nyahapurish Enyeniyhw Oruhw*

<sup>15</sup> Douk namba 7 ensel nyahapurish enyeniyhw oruhw aria enesh arpesh sheyagwrehi debeg iruhw heven iri shakri,  
"Amudok douk riguk hape debeimi king um agundok atap iri amamih nyumneh douk hatuh.

Douk abudok nyutob apakin Debeini nani Krais,  
anudok douk Iruhin nagraehan neshopokan nanaki iri douk  
hatogur dodogowim atum um hupe king um agundok atap.  
Aria Krais ta nupe Debeini nupe nusuhw merik um agundok atap iih nyumneh."

<sup>16</sup> Aria amudok 24-poreim debeimi douk hetem amamish debeishi wagituh  
rahos hurukatin um Iruhin iri habuh hakus atap aria hape henek lotu um Iruhin. <sup>17</sup> Aria hakri,

"Debeini dodogowini Iruhin douk seiwok nyape  
aria douk shopunek nyape!

Apak manadudareh-umen aria menek tenkyumen.

Um maresh? Nyak douk nyarao nyakin debeinyi dodog  
aria douk nyananubur nyape king um ihishmorim arpesh  
shani eneshenesh eshudok.

<sup>18</sup> Eshudok douk madae shudukemesh um nyak iri uwe,  
eshesh juwehosish aria agundok nyak juwehosin um douk natogur.  
Aria ahudok nyumnah douk hatogur um shagok iri  
wata shukitaki aria nyak nyusuhw esheshig kwotog um.  
Aria shopunek um nyukom yopishi eshudok eneshenesh  
um amam profet.

Amam huni ihishmorim nyakish arpesh nyeiguhw shato-umesh iri  
shuni nyeiguhw wokeshi douk shanogugur um nyak aria shenek lotumen  
iri.

Aria um nyununu eshudok arpesh douk  
shape shanunu abudok amnab iri!"

<sup>19</sup> Douk amudok 24-poreim debeimi hakriyuk namudok jurug aria Iruhin  
ananit debeiti urupat tatao iruhw heven iri tanajik. Aria asudok bogis douk  
dodogowinyi baraen kontrak Iruhin nakrip eshesh Israel enyi nyor um  
sakusi yopugunum gani numun urupat. Aria utag pogarog geyagwreh aria  
gatrugun abom. Aria eik yemrek anah debeihi mah. Aria enyik kwatuk  
aria sabaisi debeisi shigorihwisi ais kabi douk utabor-umori sagruki atap.

## 12

### *Armatok Kwani Debeiri Yur*

<sup>1</sup> Aria shatik um enen dodogowinyi abom kak um shutrin aria shudukemesh shukri enen dodogowinyi arpen hurukatin um nyutogur. Enyudok kak nyanakwarum nyatogur nyape iruhw heven. Aria nyatograri iri kak douk enyudok. Onok armatok kwape aria okwok kwashok nyumnahin aun kabi douk rupah um. Aria wabin nepe shakameruh um okwokwiruh yeriweruh. Aria kowem anat yoputi hat douk 12-poreiyu unib wapenyat iri kabi douk debeiwori otu wogwem iri um okwokwig barag. <sup>2</sup> Aria okwok douk kwonarahaen aria kwape kwabirak um kwakri kwubanuh aria kwareh kwahwar debeg. <sup>3</sup> Aria wata shopunek, kupainyi dodogowinyi kak nyanakwarum nyatogur nyape iruhw heven. Aria nyatograri douk enyudok. Enen dedebeinyi owishiborinyi mahin kabi douk anar takweiri yur um nyanakwarum nyatogur nyape. Enyen 7-poreigos baragos seiren aria 10-poreiruh shuworuh hakiheruh barag. Aria 7-poreig yopugwi hatog douk debeimi atum hogwem iri gwatem atug atug um enyenigos baragos. <sup>4</sup> Aria enyen nyakwu enyeniyip honup nyogat unib douk wape atugun um onok outuk iri gani iruhw utag aria nyawasho wagrukuki atap. Aria bio outumeb um unib wapeik iruhw utag. Aria enyen nyanak nyeyotu apahwik um okwudok armatok douk hurukatin um kubuki batowin iri um nyakri kadaok okwok kwunyubuki atin aria enyen arigas nyunyuhur nyunyoh. <sup>5</sup> Aria okwok kwabanuh kwabuki armanin batowin. Anudok arman kweipon ta nupe dodogowin atun aria ta nusuhw ainim butum aria nupe debeini um ihishmorim arpesh douk shape ihigos-morim nahobigos iri. Douk okwok kwanabuki aria eshesh shatrukwani sharan shanak um Iruhin um ananin debeinyi yopunyi wagitur douk anan napenyen iri. <sup>6</sup> Aria okwok kwaruwok kwanak um anabik wehigunum arpesh uwok um. Okwok kwanak um agundok douk Iruhin nenebagun-umok um kwunak kwupeum. Aria agundok eshesh ta shupe shataturumok kwupe 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.

<sup>7</sup> Aria debeihwi wanohw hwatogur iruhw heven. Enyudok debeini Iruhin ananin ensel douk nyanahwar um Maikel iri nyani enyeniyish enselahos shabo arudok debeiri yur. Aria arudok yur shopunek rani ararish yoweishi enselahos wata shatanam shawanam wanohw. <sup>8</sup> Douk eshesh sharpak aria yur rani ararish enselahos madae dodogowish uwe. Aria eshesh madae anabik uwe um shupe iruhw heven um. <sup>9</sup> Aria Iruhin ananish enselahos shasuhwesh shawashesh shabuhi atap. Arudok yur douk seiwok rape aria douk shopunek rape iri. Arar douk shahwaror um yoweini sagaben o Satan. Anan douk nape neneb rohw um ihishmorim arpesh douk shape agundok atap iri. Anan nani ananish yoweishi enselahos, eshesh douk showashesh shagruki agundok atap.

<sup>10</sup> Aria eik yemnek anah debeihi mah. Aria enyudok arpen nyeyagwrehi debeihi mah gani iruhw heven iri nyakri,  
*"Douk agundok um Iruhin narap  
 matanamori mape wosik um douk nanaki.  
 Aria Iruhin neyabigap um anan douk dodogowini abom  
 aria ta nupe king um apak ihih nyumneh!  
 Aria douk Krais, Iruhin nagraehan  
 aria neshopukan nanakumori nurao arpesh iri douk  
 neyabigap um anan douk dodogowini  
 aria ananin big nyatogur deben."*

Um maresh? Arudok yur douk reyotu rape renekumesh rohwin bareaen  
eshesh Kristen,

rakrip apakin Iruhin nyumnah wab  
rakri eshesh shenek yoweih iah iri arar douk  
Iruhin ananish enselahos shawashor  
rakutukuk iruhw heven ragruki agundok atap.

<sup>11</sup> Aria apakish ashukenyish owashish douk shagipesh Krais iri  
shenek uhwinyumor.

Um maresh? Eshesh shape dodogowish um  
enyudok Nugaen Sipsip douk  
seiwok shaen nyagok iri enyeniyibor owishibor  
bani enyenyn adurin bareaen douk eshesh shakripesken iri.  
Esheship urkwip douk por abom um shakri  
shukripesken enyudok adurin bareaen  
aria eshesh madae urkwip purum shukri  
shupe wosik agundok atap um uwe.

Aria shopunek, eshesh madae shunogugur um kupaishi arpesh douk  
shakon agabus Iruhin iri shesh shugok um uwe.

<sup>12</sup> Douk namudok aria ipak pape iruhw heven iri puni iruhw utag, ipak ta  
punadudareh.

Aria ipak pape atap pani youg iri eik yakri giha-umep,  
ipak ta pumnek debeiri eriger.

Um maresh? Satan douk nagrukugu um ipak.

Aria anan douk juwehosin abom. Um maresh?

Anan nadukemesh um anan nupe nurahaen obi nyutob douk banab abom  
meyoh.”

<sup>13</sup> Aria douk arudok debeiri yur ratik um eshesh shawashor ragruki agundok atap um, aria arar rape rahiyyah okwudok armatok douk kwabanuh kwabuki nunganir iri. <sup>14</sup> Aria eshesh shokok biyesh debeishi kumanish kapraigiyohos um kwehuru. Aria okwok kwanadudareh kwanak gani wehigunum arpesh uwok um. Okwok kwanak agundok um eshesh shupe shutaurumok eshudok bishatin shuknish aria enen tukwanian kwarahos um arudok yur mare rok. <sup>15</sup> Aria sabaibari abar batograri ararit nokwat aria batogur banak. Ababar bagipesok banak kabi douk worub batogur banak um. Um arar rakri kadak abrudok abar bunak aria buraok bunak bok kwugok. <sup>16</sup> Aria amnab bataurumok. Aria amnab puwarob banak tukwtotukwan aria abrudok abar bagrukuk atap. <sup>17-18</sup> Aria arar juwehosir abom um okwudok armatok aria ranak um rakri runi ihishmorim okwok-wish batowish aria barheshish shurpak. Eshesh douk eshudok ihishmorim arpesh douk shagipesh Iruhin ananin lo aria shakripesken Jisas ananin adurin atinyi bareaen aria shagipeshen iri.

## 13

<sup>1</sup> Aria arar ranak reyotu anagas um youg.

### *Biyesh Debeishi Wanarish Mahish*

Aria eik yatigu enen debeiniyi mahin nyape urah iri nyakutukuk youg nyakitak nyape nyatowi. Enyen 10-poreiruh shuworuh hakihen aria 7-poreigos baragos seiren. Aria 10-poreig yopugwi hatog douk debeimi atum hogwem iri gwatem otuhw otuhw um arhudok shuworuh. Aria enen yoweiniyi nyeigur nyetem enyudok mahin enyeniyigos baragos. Baugennum bareaen um enyudok nyeigur douk shabubunim um Iruhin. <sup>2</sup> Enyudok mahin douk nyape kabi enen debeiniyi wanohwinyi mahin douk shahwaren um lepat iri. Aria enyeniyigas aiyas sape kabi enen debeiniyi

wanohwinyi mahin shahwaren um bea iri. Aria enyenyit nokwat kabi douk enyudok debeinyi wanohwinyi mahin douk nyanahwar um laion iri enyenyit um. Aria arudok yur reken ararin dodog aria big nyani ararin debeinyi yopunyi wagitur um enyudok debeinyi mahin.<sup>3</sup> Aria anag um enyudok mahin enyenyig barag, takweibi arab bapenyag kabi douk shaen nyagok um. Aria enyen douk madae nyugok uwe, uwok. Abab wata banakawis. Douk namudok aria ihishmorim arpesh shape agundok atap iri shakitak yowiyokuk um enyudok mahin aria shagipeshen.<sup>4</sup> Aria arudok yur douk reken ararin big um enyudok mahin. Douk namudok aria ihishmorim arpesh shenek lotu um arudok yur. Aria eshesh shenek lotu um enyudok mahin shopunek shakri, "Arpen douk madae enen dодоговин kabi douk enyudok mahin um uwe, uwok. Enyen atin douk dодоговин abom. Aria ta omi dодоговин um nyuni enyen shurpak?"

<sup>5</sup> Aria Iruhin nakri wosik nape natrin meyoh enyudok mahin um enyen nyupe debeinyi um sabaishi arpesh um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. Aria enyen nyape nyeyagwreh enyenyen yoweinyi abom baraen aria nyape nyatuk enyenyin nyeigur nyato iruhw.<sup>6</sup> Aria enyen nyanonubur nyape nyabubunim um Iruhin. Enyen nyabubunim um ananin nyeigur nyani ananibur wabur bani eshudok arpesh douk shape iruhw heven iri.<sup>7</sup> Aria Iruhin neken dodog aria enyen nyani Iruhin ananish arpesh sharpak aria enyen nyaesh nyahiyahesh. Aria enyen nyarao debeinyi big um nyupe king um ihishmorim arpesh shape ihigos-morim nahobigos iri. Shuni ihismorim debeisi awirosish, shuni ihishmorim sheneyagwreh ihin kupainyi baraen iri, shuni ihishmorim ihiruh sisigiruh yegeshiweruhish arpesh.<sup>8</sup> Aria ihishmorim arpesh douk shape agundok atap iri ta shunek lotu um enyudok mahin. Ihishmorim eshudok arpesh douk seiwok Iruhin madae nunek agundok atap uwe, aria anan madae nuwem um esheshish nyeiguhw shutem okwudok buk douk eshudok arpesh ta shupe wosik ihih nyumneh iri esheshish nyeiguhw shutemokwi. Okwudok buk douk enyudok Nugaen Sipsip douk seiwok shaen nyagok iri enyenyik.<sup>9</sup> Aria douk ipak argos sapenyep iri um, ta gamo pumnek enyudok baraen!

<sup>10</sup> Eshudok arpesh douk Iruhin nukri wosik um kupaishi shusuhwesh shuweshikesh shuraesh um shunuweshik iri, eshesh ta shunuweshik.

Aria eshudok douk Iruhin nukri wosik um kupaishi shukwumesh bainatog iri,

eshesh ta shukwumesh bainatog aria shesh shugok.

Adur atin, enyudok kweipon ta nyutogur.

Namudok aria ipak Iruhin ananish arpesh ta pusuhw ananin baraen dodog pugipesen aria piyotu dодоговип atip abudok nyutob enyudokmori amaen nyutogrumeq um.

<sup>11</sup> Aria eik yatigu enen kupainyi debeinyi wanarin mahin shopunek. Enyen douk nyape iri gani atap nuwag iri nyakitak nyapa nyatowi. Enyen bioruh shuworuuh kabi douk hatogur nugaen sipsip iri hakih baragenyum. Aria enyen nyeyagwreh kabi douk yuguuhw hweyagwreh um.<sup>12</sup> Aria enyen nyakwu enyudok nyarik iri mahin enyenyin big aria dodog um nyupe debeinyi um ihishmorim arpesh. Aria shopunek um nyupe dодоговин atin aria nyunek agundok atap nini ihishmorim arpesh shunek lotu um enyudok nyarik iri mahin douk takweiti nyubrut tape anag enyenyig barag kabi douk shaen nyagok iri um. Aria enyen madae nyugok uwe, uwok. Aria abab banakawis.<sup>13</sup> Enyudok nyagiguk iri mahin nyenek enen mour douk Iruhin atun neneken iri agundok nabesish um ihishmorim arpesh.

Enyen nyeneken iri douk enyudok. Enyen nyenek nyih hakutukuk iruhw heven hagruki agundok atap. <sup>14</sup> Aria Iruhin nakri wosik aria enyen nyenek sabainyi Iruhin atun nenenken iri mour agundok nabesin um enyudok nyarik iri mahin. Douk enyen nyenekesh namudok aria enyen nyape nyenek rohw um ihishmorim arpesh shape agundok atap iri. Aria enyen nyape dodogowin atin aria nyakripesh um shunek enyudok nyarik iri mahin enyenyir aborir aria shupe shutuk enyenyin nyeigur nyuto iruhw. Enyen douk seiwok shaen shawkumen bainat aria enyen madae nyugok iri uwe. Enyen wata nyape. <sup>15</sup> Aria Iruhin nakri wosik aria enyudok nyagiguk iri mahin nyahapurish enyenyip yap pawish enyudok nyarik iri mahin enyenyir aborir douk eshesh shenegor iri aria nyorukar yapis. Enyen nyenekar namudok um riyaghreah aria runek eshudok arpesh douk shakri uwok um shunek lotumar iri shugok. <sup>16</sup> Aria enyen dodogowin atin abom um nyakri ihishmorim arpesh, nyeiguhw shato-umesh iri,\* shuni nyeiguhw wokeshi, shuni shanagrem sabaishi eshudok eneshenesh iri, shuni yaruuhish iri, shuni shape shakamum kupaishi shenekumesh mour meyoh iri, shuni shape wosik iri um shurao enen kak nyupe esheshish domaesh o esheshish yopishi roguhw. <sup>17</sup> Enyen nyenekesh namudok um meinyi arpen douk mare nyurao enyudok kak o enyudok namba iri, enyen ta mare nyutor eshudok eneshenesh o nyunek salimesh um kupaishi shutorish, uwok. Enyudok namba o kak douk nyakri wobuwobren bareaen um enyudok mahin enyenyin nyeigur.

<sup>18</sup> Apak ta murao saki um mudukemesh um baugeneyum bareaen um enyudok namba. Enyudok arpen douk nyudukemesh abom iri enyen ta nyudukemesh um baugeneyum bareaen um enyudok namba. Um mares? Enyudok namba douk nyakrium anan arman ananin nyeigur. Aria enyudok namba douk 666.

## 14

### *Sabaishi 144,000-poreish Arpesh Sheyarub Onohw Namuhwi Awehw*

<sup>1</sup> Aria eik Jon wata yatrugunugu aria yatigu nugaen Sipsip nyeyotu ahwudok yoduhw douk shahwarohw um Saion iri. Enyen nyani sabaishi 144,000-poreish armam armago douk enyudok Nugaen Sipsip nyani enyenyin Yain amamish nyeiguhw shetem esheshish domaesh iri sheyotu. <sup>2</sup> Aria eik yemnek anah mah hanaki iruhw heven kabi douk debeibi worub batogur debeg um. Aria shopunek, ahah kabi douk utag pогарог debeg um. Ahudok mah eik yemnekah iri ahah douk kabi yopuhi mah douk shabirak eshudok kabi gitahas um iri shabirakesh shenekah iri. <sup>3</sup> Aria eshudok sabaishi 144,000-poreish arpesh sheyotu hurukatin um Iruhin ananin debeiniyi wagitur nyani amam debeimi hani eshudok nubatish dodogowishi douk mishish shoresh iri shapeum. Aria eshesh sheyarub onohw namuhwi awehw douk eshesh Jisas Krais nagraehesh aria naraesh shakutukuk agundok atap iri atish shadukemohw iri. <sup>4</sup> Anam armam um eshudok arpesh douk henek yopinyi atin iri. Enesh douk armam henek yopishi inahos atin iri. Amam madae hunek yoweihai aih um huni armago shenek wehrur atin uwe, uwok. Amam hape yopumi armam. Aria hagipesh Nugaen Sipsip hanak ihigunum enyen nyananak um. Aria orokohun um eshudok arpesh shape agundok atap iri, Iruhin nator amudok harik iri armam naram hanakum anan nani Nugaen Sipsip kabi douk ofa um. <sup>5</sup> Amam madae enen bareaen nyupenyam um henek eneh yoweihai aih um uwe. Aria shopunek, amam madae hunek rohw atin uwe, uwok.

\* **13:16:** Putik futnot nyape Revelesen 11:18 iri.

### *Iruhin Ananish Bishatin Enselahos Shenyagwreh Shakri Enen Baraen*

**6** Aria eik yatik enen ensel nyehwuru nyanak gani iruhw iri nyasuhw Iruhin ananin yopinyi baraen douk ta nyupe iih nyumneh iri um nyukrip ihishmorim arpesh shape agundok atap iri. Enyen ta nyukrip ihihormorim sisigiruh yegeshiweruhish arpesh, shuni ihismorim sisigs awirosish arpesh, shuni ihishmorim shenyagwreh kupainyi baraen iri, shuni ihishmorim arpesh douk shape ihigosmorim nahobigos iri. **7** Aria enyen nyahwar debeg nyakri, "Nyutob banaki um Iruhin anudok debeini jas um nunek skelimum ihishmorim arpesh um. Namudok aria ipak punogugur um anan aria putuk ananin nyeigur nyuto iruhw! Ipak punek lotu um Iruhin douk neneh iruhw heven nani agundok atap nani youg gwani ihibarmorim abar douk batogur atap meyoh iri." **8** Aria nyagiguk iri nyehwuru nyananik aria nyakri, "Abrudok debeiburi wabur nyeigur nyato iruhw aburi Babilon bananukuk jurug! Adur ababur bananukuk iyoh! Arpesh shape Babilon iri riguk shenek ihishmorim arpesh shape ihigosmorim nahobigos iri shenek wehrur um aria shenek eneheneh yoweihai aih. Eshesh shenek ehudok yoweihai aih kabi douk eshesh shape Babilon iri shekesh dodogowibari wainbar abar shaboroh shagugak aria shenekeh iri um." **9-10** Aria enyudok binyatin iri ensel douk nyagipesh eshudok biyesh sharik iri enselahos iri nyahwar debeg nyakri, "Ihishmorim arpesh douk shenek lotu um enyudok debeinyi mahin nyani enyenyir aborir aria sharao enyenyin kak nyape esheshish domaesh o esheshish roguhw iri ta shuwok anan kupaini wain. Anudok wain douk nakri wobuwobren baraen um agundok Iruhin anan juwehosin um douk ta nunekeh shumnek debeiri eriger iri. Aria anan ta mare nukri neneh gihau mesh, uwok. Anan ta juwehosin-umesh abom aria nunekeh shumnek debeiri eriger um nuwanamesh eneshenesh yoweishi inahos eshesh shape shenekesh iri. Aria Iruhin ananish enselahos shuni Nugaen Sipsip ta shiyotu shutrish aria eshesh ta debeibi nyih hunish. Ehudok nyih douk hanuwi anab akitohibi amnab nyeigurib um salfa iri. **11** Aria nyugus douk sakih ehudok nyih douk hanu eshudok arpesh shemnek debeiri eriger iri ta sukih suto iih nyumneh. Aria eshudok arpesh douk shenek lotu um enyudok debeinyi mahin nyani enyenyir aborir aria sharao enyenyin kak douk nyakrium enyenyin nyeigur iri, nyumneh weibus eshesh ta mare shupe um shurao uhwin, uwok. Eshesh ta shupe um shumnek debeiri eriger namudok atin."

**12** Namudok aria Iruhin ananishi arpesh douk shagipesh ananin lo aria shenek bilip dodogowish atish um Jisas iri, eshesh ta shiyotu dodogowish atish abudok nyutob eshesh shumnek debeiri eriger obi nyutob um.

**13** Aria yemneku anah mah. Aria enyudok arpen nyeyagwrehi iruhw heven iri nyakri, "Nyak wem enyudok baraan anap shup um eshudok douk shasuhwen dodog Debeini ananin baraen shagipeshen iri. Baraen enyudok, 'Eshudok douk shatukur Debeini aria shugok shunak iri shuni eshudok douk ta kweipon shugok iri, eshesh ta shupe wosik aria ta shunududareh!'

Aria Iruhin ananin Mishin shopunek nyakri, "Adur, eshesh ta shukutukuk ihinyumorim debeinyi mour eshesh shape sheneken iri aria ta wata shupe um shurao uhwin shupe meyoh. Um maresh? Eshesh ta mare shunak meyoh, uwok. Ehudok yopihaih aria mour eshesh shape sheneken iri ta nyunamesh nyunak. Aria Iruhin ta nukesh enesh yopishi eshudok eneshenesh um ehudok aih aria mour eshesh sheneken iri."

### *Shaurimori Worigun Agundok Atap Um*

**14** Aria wata shopunek yatrugunugu aria yatik onog shigorihwigwi orug. Aria enen arpen nyetemori ogwudok orug. Enyen nyape kabi "Anudok

Arman douk natogur adurinyi arpen iri.” Anan nowem anat yoputi hat shenekat um gol iri douk debeimi atum hogwem iri amamigos baragos. Aria nasuhw anap wanohwip atupi ponodaresh iri nogwotep ananis wis. <sup>15</sup> Aria kupainyi ensel nyatograri atudok Iruhin ananit debeiti urupat aria nyahwaran debeg anudok natem ogwudok orug iri nyakri, “Nyak nyukwu nopudok nogwotep nyurimori worigun. Um maresh? Ahudok nyumnah um worigun nunourimori um agundok atap um douk hatogur.”

<sup>16</sup> Aria anudok arman natem ogwudok orug iri nawashak ananip nogwotep pabuhi agundok atap aria nabre ihigunmorim worigun.

<sup>17</sup> Aria kupainyi ensel nyatograri atudok Iruhin ananit debeiti urupat gani iruhw heven. Aria enyen shopunek nyasuhw anap wanohwip atupi ponodaresh iri nogwotep. <sup>18</sup> Aria enen kupainyi ensel shopunek douk nyape nyasuhw merik um nyih iri nyatograri gani enyudok alta douk showem eshudok shako Iruhin iri um nyakus um. Aria enyen nyahwaren debeg enyudok douk nyasuhw wanohwipi nogwotep iri nyakri, “Nyak nyukwu nyakip nogwotep nyubre epudok wainip shuruwep douk peir anaruh madururuh douk hanahwar um wain iri um agundok atap. Um maresh? Epep douk buwarep!” <sup>19</sup> Aria enyudok ensel nyawashak enyenyip nogwotep pabuhi um agundok atap aria nyabre epudok ihpmorim shuruwep. Aria nyepuhur nyanak nyowashep pabuhuk anag debeigi tenk douk shenekag utabor iri um shumakwiyeshep aria shunek wainibar abar. Enyudok wobuwobren bareaen douk nyakrium agundok Iruhin anan juwehosin um eshudok arpesh douk shape shenek yoweih iah iri. <sup>20</sup> Aria anudok wain eshesh shanak shamakwiyeshan agudok tenk adukehahibur um abrudok debeiburi wabur. Aria sababiori owishibor douk batograri adukehahig um agudok tenk iri bawori banak rougun wosik um 300 kilomita. Aria abrudok sababiori owishibor hurigasarubor bato um douk wosik hurukatin um 2 mita. Enyudok wobuwobren bareaen douk nyakrium agundok Iruhin anan juwehosin um eshudok arpesh douk shape shenek yoweih iah iri.

## 15

### *Iruhin Ananish 7-poreish Enselahos Shasuhw Eshudok Douk Shenek Arpesh Shemnek Debeiri Eriger Um*

<sup>1</sup> Aria eik wata shopunek yatik kupainyi debeiniyi kak nyatogr iruhw heven. Enyen douk nyatogr um nyiyabig arpesh um agundok douk Iruhin dodogowin um nini agundok anan juwehosin um eshudok yoweishi inahos arpesh shenekesh iri um. Aria eik yape yanasorik um enyudok kak. Kak douk enyudok. Eik yatik 7-poreish Iruhin ananish enselahos douk shasuhw 7-poreish shagiguk abom iri eshudok eneshenesh um shunek arpesh shumnek debeiri eriger iri. Eshudok yoweishi eneshenesh, eshesh douk shagiguk abom iri. Um maresh? Abudok nyutob ta shubo eshudok arpesh douk shape agundok atap iri ba iyoh, aria agundok Iruhin anan juwehosin abom um ta nutuh. <sup>2</sup> Aria eik yatik enen enyudok douk nyape kabi youg-mori um. Enyen nyape kabi wenyir, douk shenegor rani nyih iri. Aria shopunek, eik yatik enesh arpesh sheyotu anagas um youg. Eshudok arpesh eshesh douk sheyotu dodogowish shenek uhwinyum wanohw shabo enyudok debeiniyi mahin iri. Aria shopunek, eshesh shenek uhwinyum enyenyir aborir rani namba douk nyakri wobuwobren bareaen um enyenyin nyeigur iri. Aria eshesh shasuhw eshudok kabi gitahas um douk Iruhin nekeshesh iri. <sup>3</sup> Aria eshesh shape sheyarub ahwudok awehw douk neneh Iruhin ananin mour iri Moses nani Nugaen Sipsip amamihw. Ahwudok awehw douk sheyarub shakri namudok,

“Debeini Iruhin, nyak douk dodogowinyi abom  
aria nyabo ihishmorim eneshenesh shabuhuk iri.

Nyakih aih douk yopiyopihi abom.

Aria nyakin mour douk dodogowinyi abom  
aria arpesh shatrin aria mishish shakitak yowiyokuk!  
Nyak nyape King um ihigos-morim nahobigos douk  
sape agundok atap iri.

Aria nyak nyenekeh iri aih aria mour douk adurin atin abom!

<sup>4</sup> Debeini, ta omi mare nyunogugur um nyunek lotumen?

Aria ta omi nyukri uwok um  
nyutuk nyakin debeinyi nyeigur nyuto iruhw?

Nyak atin yopunyi abom.

Aria ihishmorim arpesh shape ihigos-morim nahobigos iri  
ta shunaki shunek lotu um nyak atin.

Um maresh? Nyakin ihinyumorim yopinyi mour iri aih douk shatogur  
yopugunum.”

<sup>5</sup> Douk enyudok nyanakuk aria yatigu atudok Iruhin ananit debeiti urupat gani iruhw heven tanajik. Aria eik yatigu numunitum atudok selit urupat douk Iruhin napenyot iri. <sup>6</sup> Aria Iruhin ananish 7-poreish enselahos douk shasuhw 7-poreish yoweishi eshudok eneshenesh iri shakitak shatograri atudok urupat. Eshudok yoweishi douk ta shunek arpesh shumnek debeiri eriger iri. Eshesh shorari yopihai atih hatrugun iri shigorihwihi rupeh. Aria shawashak iri letog douk shenekog gol iri um esheshish mishish. <sup>7</sup> Aria enen um eshudok nubatish dodogowishi douk mishish shoresh iri nyekesh 7-poreis dis douk shenekas gol iri um eshudok enselahos. Asudok dis douk shishuknis um Iruhin douk nape iih nyumneh iri um anan juwehosin um. <sup>8</sup> Aria atudok Iruhin ananit debeiti urupat shuknit um ogwsudok yopugwusi nyugwus douk satograri agundok douk Iruhin dodogowin aria natrugun abom um. Aria abudok nyutob, madae enen arpen ta dodogowin um nyunak nyuwish um uwe, uwok. Enyen ta nyupe arighaga eshudok 7-poreish enselahos shiyatak enyudok mour um eshudok 7-poreish yoweishi douk shenek arpesh shemnek debeiri eriger iri ba iyoh, aria enyen wosik ta kadak nyunak nyuwish.

## 16

### *7-poreis Dis Douk Shukunis Um Eshudok Douk Iruhin Juwehosin-umesh Abom Um*

<sup>1</sup> Aria eik yemnek anah mah. Aria enen arpen nyeyagwrehi atudok Iruhin ananit debeiti urupat. Aria enyudok nyeyagwrehi iri nyakrip eshudok 7-poreish enselahos debeg nyakri, “Ipak punak purak Iruhin anan juwehosin um nyor ipakis dis iri nyubuhukuk atap!”

<sup>2</sup> Aria nyarik iri ensel nyanak nyourak eshudok shor enyenis dis iri shabuhukuk atap. Aria takwetakweibi yoweibi ereb batogur um enesh arpesh. Ebeb douk batogur um ihishmorim douk sharao enyudok debeiniyi mahin enyenyin kak nyape esheshish roguhw shani domaesh aria shenek lotu um enyenyir aborir iri. <sup>3</sup> Aria nyagiguk iri ensel nyaurak eshudok shor enyenis dis iri shabuhukuk youg aria youg gwatanam gwanenem um owhibor kabi douk shagok iri arpesh esheshibor um. Aria ihishmorim eshudok shape youg iri shagok. <sup>4</sup> Aria binyatin iri ensel nyaurak eshudok shor enyenis dis iri shabuhukuk woribus aria ihibarmorim abar douk batogur atap meyoh iri batanam banenem um owhibor atubor. <sup>5</sup> Aria eik yemnek enyudok ensel douk nyasuhw merik um ihibarmorim abar iri nyakri,

“Nyak adurinyi. Seiwok baugos abom um nyak nyape,  
aria douk shopunek nyape.

Baraen nyak nyeneken um eshudok arpesh douk  
shenek yoweishi inahos iri douk yopin abom.

Eshesh shemnek debeiri eriger wosik um  
yoweishi inahos eshesh shenekesh iri.

<sup>6</sup> Um maresh? Eshesh shabo nyakish arpesh shani amam profet  
douk Iruhin nakripam baraan hakrip arpesh iri shagok  
aria esheshibor owishibor batourak.

Aria ahudok nyumnah douk nyak nyuwanan-umesh  
eshudok shenek yoweishi inahos iri shaboroh.

Abrudok owishibor douk bakri wobuwobren baraan um  
arudok debeiri eriger douk Iruhin neneke shemnegor iri.

Aria arar douk renekesh-umesh wosik um  
eshudok yoweishi inahos eshesh shape shenekesh iri.”

<sup>7</sup> Aria eik yemneku enen arpen nyeyagwrehi enyudok alta douk shape  
showem eshudok shenek ofamesh shako Iruhin iri nyataoum. Aria  
enyudok arpen nyeyagwrehi iri nyakri,  
“Debeini, nyak douk Dodogowini abom Iruhin.

Nyak nyeneken um arpes iri baraan douk yopin abom!”

<sup>8</sup> Aria enyudok nubatin iri ensel nyaurak eshudok shor enyenis dis iri  
um nyumnahin aun. Aria Iruhin nakri wosik aria wah hatao juwehosih  
atuh habo arpesh aria nyih hanish. <sup>9</sup> Aria ahudok wah hatao juwehosih  
atuh abom aria habo enesh arpesh aria shanomnek abom um debeihi nyih  
hanishuk. Aria eshesh shape shahao Iruhin shabubuniman anan douk  
nasuhw merik um eshudok yoweishi douk shenek arpesh shemnek debeiri  
eriger iri. Aria eshesh shakri uwok abom um shatanam shukon aparuh  
Iruhin aria shutuk ananin nyeigur nyuto iruhw um. <sup>10</sup> Aria enyudok  
anas wisin iri ensel nyaurak eshudok shor enyenis dis iri shanak um  
enyudok debeinyi mahin nyapenyen iri wagitur nyakus um. Aria wab  
babuh beyawiyamuk agundok ihishmorim arpesh douk enyen nyasuhw  
merikw-umesh iri shapeum. Eshesh shapeum arukwutigun abom. Aria  
eshesh shemnek debeiri eriger aria sabaibi erek bapenyesh aria shape  
shanatuk esheship yehep. <sup>11</sup> Aria shape shabubunim Iruhin douk nape  
iruhw heven iri. Aria eshesh madae shukehuk agabus ehudok yoweishi aih  
eshesh shape shenekeh iri uwe, aria shatanam shukon aparuh Iruhin uwe,  
uwok.

<sup>12</sup> Aria enyudok anawipin iri ensel nyaurak eshudok shor enyenis  
dis iri um abudok debeihi worub nyeiguribum Yufretis iri. Aria abar  
bogerukuk abom um shugabemam yah amam king-omi douk ta hunaki  
gani aun nakihumori. <sup>13</sup> Aria eik yatigu bishatin shanabosuh iri yoweishi  
sagabehos douk shape kabi makihos um. Eshesh shatograri arudok debeiri  
yur rani enyudok debeinyi mahin shani anudok neneke rohwumesih  
iri profet eshesig nokwatog. <sup>14</sup> Eshesh douk bishatin eshudok yoweishi  
abom sagabehos douk shape shenek enyenyen mour kabi douk Iruhin  
atun nape neneken iri. Aria eshudok bishatin iri yoweishi sagabehos ta  
shunak shurauri ihm-morim king douk hape ihigunum um agundok atap  
iri um hunaki hupe atugun aria huni dodogowini Iruhin douk nasuhw  
ihiyumorim dodog iri hurpak ahudok ananah debeihi nyumnah.

<sup>15</sup> Aria Jisas Krais nakri, “Ipak mnek, eik ta wata inaku itogrumeep kabi  
douk nakwuaruh iri nanakumogu. Douk namudok aria eshudok arpesh  
douk mare shishuh aria shugabe shunabuk esheshih rupeh wosik iri,

eshesh ta shunadudareh shupe wosik. Um maresh? Eshesh ta mare shugar shupe shurahaen shunak yopugunum aria abraen nyesh, uwok!"

<sup>16</sup> Aria eshudok yoweishi sagabehos sharauri amudok debeimi king hanaki hape agundok douk barea Hibru shahwaragun um Amagedon iri.

<sup>17</sup> Aria namba 7 ensel nyaurak eshudok shor enyenis dis iri shanak um utag. Aria eik yemnek anah mah. Enyudok arpen nyeyagwrehi numun Iruhin ananit debeiti urupat douk Iruhin ananin yopunyi wagitur nyakus um. Aria enyudok arpen nyeyagwrehi iri nyahwar debeg nyakri, "Douk eshudok shatuh!" <sup>18</sup> Aria utag pregar geyagwreh debeg aria gatrugun abom. Aria debeikwi enyik kwtuk. Douk seiwok agundok atap arpesh shape shanaki arigaha douk aria madae onok okudokmori debeikwi enyik kwutuk uwe! <sup>19</sup> Aria abrudok debeiburi wabur banasiya um bihatuh-igunum. Aria ihirubmorim debeirubi warub bape ihigos-morim nahobigos agundok atap iri bananukuk. Aria Iruhin urkum morum eshesh shape abrudok debeiburi wabur Babilon iri aria nekesh anudok wain douk shakri wobuwobren bareaen um anan juwehosin abom um aria shanoh. <sup>20</sup> Aria ihishmorim unaihos shani ihiruhmorim yodururuh burukwaresh-ukuk aria shanak shawishuk abom. <sup>21</sup> Aria shigorihwi ais kabi douk utabor um sagruki iruhw utag kabi douk eshah harari um aria sabuhi saesh. Abrudok aisibor utabor douk amaenyibor abom. Ababor atum atum douk 50 kilogram. Aria douk enyudok yoweinyi abom um abrudok aisibor utabor babuhi baesh shemnek debeiri eriger um nyenekesh aria shape shabubunim um Iruhin. Um maresh? Enyen douk yoweinyi abom.

## 17

### *Debeiki Armatok Douk Kwani Kupaimi Shenek Wehrur Iri Kwonmek Debeiri Eriger*

<sup>1</sup> Aria enen um eshudok 7-poreish enselahos douk shasuhw asudok 7-poreis dis douk shuknis um Iruhin anan juwehosin-umesh abom um nyanakumori eik aria nyakripe nyakri, "Nyak yowi aria iyabigen um agundok ta okwudok debeikwi armatok douk kwani kupaimi shenek wehrur iri kwumnek debeiri eriger um okwokwihi yoweihai aih um. Okwok douk kwape hurukatin um sabaibusi debeibusi worubus. <sup>2</sup> Aria king omi\* douk hape agundok atap iri hani okwok shenek wehrur um. Aria sabaishi arpesh shape agundok atap iri shawok okwokwin wain aria shagugak. Anudok wain douk shakri wobuwobren bareaen um okwokwihi yoweihai aih."

<sup>3</sup> Aria Iruhin ananin mishin nyatogrume dodogowin atin. Aria enyudok ensel nyarae nyanak anagun wehigunum arpesh uwok um. Aria agundok eik yatik onok armatok kwatem iruhw um enen debeinyi owishiborinyi wanarin mahin. Enyudok mahin 7-poreigos baragos seiren aria 10-poreiruh shuworuh hakihen. Aria sabaishi nyeiguhw shatem ihihwmorim enyenyihw yegenyihw. Eshudok nyeiguhw douk shabubunim um Iruhin.

<sup>4</sup> Aria okwudok armatok kwenek biyeh yomogih owishiborihi rupeh. Okwok kwanaginohw okwokwihih yegenyihw um sabaibi yamayamagib batrugun iri weiyoub douk shenekab gol iri. Aria shopunek, anab douk shenekab anabor yopubori utabor bani anab weiyoub douk shatorub debeibori utabor iri. Aria kwasuhw anap kap shenekab gol iri okwokwis wis. Aria eneheneh yoweihai aih douk Iruhin nakri wokumeh abom iri

\* **17:2:** Enyudok bareaen um king-omi hani okwudok armatok shenek yowesh inahos um douk nyakrium agundok arpesh shakutuk Iruhin shanak shenek lotu um madae adurimi god omi um uwue.

hani eneheneh yoweihai aih um shani okwudok armatok shenek wehrur um hor apudok kap shuknip. <sup>5</sup> Aria okwokwin domaen enen nyeigur nyetem. Baugenyum baraan um enyudok nyeigur douk nyanabeshuk. Enyudok baraan douk nyakri namudok,

"Nyeigur nyuto-umaburi wabur Babilon baugos abom um ihiyumorim armago douk wape wani kupaimi shenek wehrur um wani ihihmorim yoweihai abraenyihi aih douk agundok atapishi arpesh shape shenekeh iri."

<sup>6</sup> Aria eik yatik okwudok armatok kwape kwabo sabaishi Iruhin ananish arpesh douk shenek bilip dodogowish atish um Jisas aria shakripesh ananin baraan kupaishi iri. Okwok kwaesh shagok aria kwogugak abom kabi douk kwawok esheshibor sabaibori owishibor aria kwogugak um. Aria douk yatiguk namudok aria eik mishin nyakitak yowiyokuk. <sup>7</sup> Aria enyudok ensel nyarige nyakri, "Nyak mishin nyakitak yowiyokuk um maresh? Eik ta ikripen um baugenyum baraan um enyudok nyanabeshuk iri baraan um okwudok armatok kwuni enyudok debeini wanarin mahin douk okwok kwatemen kurahenyen iri. Enyen douk 7-poreigos baragos seiren aria 10-poreiruh shuworuh hakihen iri. <sup>8</sup> Enyudok nyatrin iri mahin douk seiwok nyape aria douk madae nyugok. Aria enyen ta nyukutukuk agudok nuwag douk gagor gabuhuk gani atap abom iri nyuto iruhw aria ta nyunak nyuishuk.

Aria onok buk kwakus. Okwok douk eshudok arpesh douk ta shupe wosik atin ihih nyumneh iri esheshish nyeiguhw shetemokwi. Aria enesh arpesh douk seiwok Iruhin wata nunek agundok atap uwe, aria madae nuwem esheshish nyeiguhw okwudok buk iri uwe ta shutik enyudok mahin aria ta shukitak yowiyokuk. Um maresh? Seiwok enyen nyape aria douk uwok, enyen nyagok. Aria anah nyumnah enyen ta wata nyukitak nyupe.

<sup>9</sup> Aria meinyi arpen douk nyadukemesh abom iri enyen wosik ta nyudukemesh um baugenyum baraan um okwudok armatok kwani enyudok debeiniyi mahin. Agusudok 7-poreigos baragos sape enyudok mahin iri douk shakri wobuwobren baraan um 7-poreiruh yodururuuh douk okwudok armatok kwatemaruh iri. Aria shopunek, agagos douk shakri wobuwobren baraan um 7-poreim king-omi. <sup>10</sup> Amam 5-poreim douk hagok, aria anan douk wata nape dodogowini king. Aria anan wata nutogur nupe king uwe. Aria anan ta nutogur aria ta nupe banab meyoh nyutob. <sup>11</sup> Aria enyudok debeiniyi mahin douk seiwok nyape aria douk madae enen nyupe iri uwe, enyen douk shakri wobuwobren baraan um anan king douk natogur nape nani amudok anam 7-poreim aria hatogur 8-poreim iri. Aria anan ta wata nunak nuwishuk abom.

<sup>12</sup> Aria aruhudok 10-poreiruh shuworuh nyak nyatriruh iri douk shakri wobuwobren baraan um 10-poreim king-omi douk wata hutogur hupe debeimi iri uwe. Amam ta hurao debeiniyi big um hupe king-omi huni enyudok mahin. Aria eshesh ta shupe debeishi banab nyutob, atin aua meyoh. <sup>13</sup> Aria amudok 10-poreim king ihm-morim hasuhw atin baraan. Amam hakri hupe dodogowim aria huken amamin debeiniyi big nyu dodog enyudok debeiniyi mahin um ihishmorim arpesh shumnek enyenyin baraan shugipeshen. <sup>14</sup> Aria amam king-omi huni enyudok mahin ta shuni Nugaen Sipsip nyuni enyenyishi douk enyen nyagraehesh aria nyahwaresh shasuhw enyenyin baraan sheyotu dodogowish atish iri ta shubo amudok king huni enyudok mahin shiiyahesh. Um maresh? Enyudok Nugaen Sipsip douk Debeiniyi abom um ihm-morim debeimi aria nyape king abom um ihm-morim king. <sup>15</sup> Aria enyudok ensel wata shopunek nyakripien nyakri,

"Abusdok worubus nyak nyatik okwudok yoweikwi armatok kwapenyabus iri douk shakri wobuwobren bараen um sabaishi arpesh. Eshudok arpesh douk shape sabaigosи nahobigos iri. Eshesh douk sisigiruh yegeshiweruh aria sheneyagwreh sabainyi kupainyi bараen iri. <sup>16</sup> Aria aruhudok 10-poreiruh shuworuh nyak nyatruh iri huni enyudok debeiniy mahin ta juwehosin um okwudok yoweikwi armatok. Aria eshesh ta shok kwugok aria shutruk shuwaruk owokwih rupeh aria okwok ta kwugor kwupe aria kwukus. Aria eshesh ta shupe shutah eibug-ikwum shugwoh aria okwok ta shukuhur shukweh nyih aria hunuk hiyatokuk. <sup>17</sup> Um maresh? Eshesh douk Iruhin neshuhur um shugipesh ananim atum urkum. Namudok aria anan nakri wosik um amam husuhw atin bараen aria enyudok amamin dodog douk amam haraen um hupe king iri um ta wata huko enyudok mahin. Aria enyen ta nyupe ddogowini king arigaha abudok nyutob Iruhin ananin bараen nyutogur adurin abom obi nyutob butogur. <sup>18</sup> Aria okwudok armatok nyak nyatruk iri douk shakri wobuwobren bараen um abrudok debeiburi wabur. Ababur douk bape kabi anan debeini nyeigur nyato iruh-uman iri arman douk nape debeini um ihm-morim king hape agundok atap iri um.

## 18

### *Debeiburi Wabur Babilon Bananukuk Jurug*

<sup>1</sup> Douk enyudok nyanakuk aria eik yatigu kupainyi ensel nyakutukuk iruhw heven nyabuhi. Enyen douk nyarao debeiniy big aria enyenyih rupeh hatrugun abom aria ihigunum agundok atap gor nakusuk. <sup>2</sup> Aria enyen nyahwar debeg nyakri,

"Abrudok wabur Babilon nyeigur nyato iruhw aburi douk bananukuk jurug! Ababur bananukuk!

Aria douk ababur batogur yoweiburi wabur um  
eshudok ihmishmorim sagabehos shuni warehos shuni ogwuhudok  
yoweiguhwi hwanabosusih abom iri armiguhw hwupeum.

<sup>3</sup> Um maresh? Sabaishi arpesh shape ihigos-morim nahobigos iri shawok okwokwibar wainibar abar.

Abrudok abar douk shakri wobuwobren bараen um  
okwokwih yoweih iah um shani okwok shenek wehrur um.

Eshesh douk shatik arpesh shape Babilon iri esheshih yoweih iah aria shagipeshesh shenekeh.

Aria amudok ihm-morim king hape agundok atap iri  
hani abrudok waburishi arpesh shenek wehrur um.

Aria eshudok douk shenek bisnis agundok atap iri  
sharao debeibori utabor um ehudok yoweih iah douk  
eshudok shape abrudok wabur iri shape shenekeh iri."

<sup>4</sup> Aria eik yemnek kupaihi mah gani iruhw heven. Aria enyudok nyeigwrehi iri nyakri,

"Ipak eikishi arpesh, ipak pukutukuk abrudok wabur  
aria putogrukuk um mare puni  
abrudok waburishi arpesh punek eshudok yoweishi inahos eshesh shape  
shenekeh iri.

Ipak pukutubur-ukuk um ipak mare pumnek debeiri eriger douk ta eshesh shumnekar iri.

<sup>5</sup> Um maresh? Eneshenesh yoweishi inahos  
eshesh shape shenekeh iri douk  
sabaishi abom shape kabi waripak kwagit nyubuhas kwoshem um.  
Aria eshesh shakus shato gani iruhw heven

aria Iruhin natrish aria anan urkum moromesh.

<sup>6</sup> Ipak padukemesh eshudok eneshenesh yoweishi inahos okwok kwape kwenekesh iri douk sabaishi abom.

Douk namudok aria ipak ta pushanom-umok wosik atin okwokwish yoweishi inahos aria peshopokesh shutoumok.

Okwok kwabadig nubutibari abar bor kap aria ipak pabarh.

Douk namudok aria ipak wata pubodig nubutibari abar

namudok atin aria pukok kwubarah um

kwumnek arudokmori atin debeiri eriger

okwok kwenek ipak pemnekar iri.

Aria pushopokor rutoomuk shopunek.

<sup>7</sup> Okwok douk kwatuk okwokwin nyeigur nyato iruhw

aria kwenek eneshenesh yoweishi inahos douk

okwok mishin nyakitak um kwunekesh iri.

Aria okwok nyeigur nyato iruhw kworao debeinyi amaen wosikumok um  
eshudok yoweishi inahos douk

riguk okwok kwape kwenekesh iri.

Aria okwok numun nanagunukuk aria kwakri,

‘Eik yape debeikwi kwin!

Eik kabi douk raminen madae nugokuk uwe um.

Aria eik ta mare enen amaen nyutogrume aria nyuneke ireh.

Adur atin ta uwok!

<sup>8</sup> Douk namudok aria atuh nyumnah meyoh

sabaishi yoweishi abom eshudok ta shutogurum abrudok wabur. Eshudok  
yoweishi inahos douk eshudok.

Eneheneh yoweih arugeh ta hutogrumesh aria ta shureh debeg.

Aria debeirubi nyurub ta besh aria nyih shopunek ta hunish.

Um maresh? Debeini Iruhin apa nenen skelumesh

aria nawanamesh eneshenesh yoweishi inahos

esheshe shenekesh iri douk dodogowini abom.

<sup>9</sup> “Aria amudok king hape agundok atap iri hani okwudok armatok shenek wehrur um aria shenek sabaishi eneshenesh yoweishi shopunek. Aria amam ta hutiku nyih hunuk aria nyugus supe sukih aria amam ta hurepok yowiyokuk. <sup>10</sup> Amam ta hunogugur abom um arudok debeiri eriger douk okwok kwemmekor iri aria ta hiyotu rougun aria hupe hukri, ‘O giha-mobur abrudok nyeigur nyato iruhw maburi wabur Babilon!

Giha-umep ipak arpesh pape abrudok dodogowiburi wabur iri! Douk  
banab nyutob, atin aua meyoh

aria ipak pemnek debeiri eriger jurug um

eneshenesh yoweishi inahos ipak pape penekesh iri!”

<sup>11</sup> “Aria eshudok arpesh douk shape shenek bisnis agundok atap iri ta urkwip purum abrudok wabur aria esheshiruh aparuh ta yoweruh aria shupe shureh. Um maresh? Ta mare wata enesh kupaishi arpesh shutor anah esheshih jah, uwok. <sup>12</sup> Ta mare enesh arpesh shutor ahudokmori jah. Gol iri siliwa, shuni yopubori utabor, buni yopubi abom weiyoub douk shatarub debeibori utabor iri. Shuni yopihhi abom shigorihwihi rupeh huni eneh biyag yomogih owishiborihi rupeh, huni eneh yopihhi abom wogeruhiji rupeh. Huni ihigosmorim rowos douk seisik yopuri unar wosik iri, suni ihishmorim eshudok douk shenekesh enen mahin douk shahwaren um elefan iri enyeniruh naruh iri. Shuni eshudok douk shenekesh agusudok rowos douk shatoragos debeibori utabor iri, shuni eshudok douk shenekesh enen akitohinyi kapa nyeigurinum bras iri. Shuni eshudok douk shenekesh ainab iri, shuni eshudok yopishi abom douk shenekesh anabor yopubori utabor iri. <sup>13</sup> Eshudok shuni ahudokmori jah

shopunek. Enyudok shanyoh iri rowog sinamon, nyuni enesh eshudok kabi douk yabro um, shuni enesh eshudok douk shesheh sheisik wosik iri. Shuni enyudok yopinyi sanda douk shahwaren um mer iri, shuni anas gris douk shahwaras um frankinsens iri. Eshudok shuni wain iri arudok sharah iri wel, shuni sabainyi abom plaua, shuni wit douk kabi douk rais um. Shuni bulmakauhos iri sipsip iri hwosahos shuni wilkarahos, shuni arpesh douk wata shape sharahaen iri. Eshudok douk shape shakamum kupaishi shenekumesh mour meyoh iri. Eshudok ihishmorim shuni arpesh\* ta mare wata shutorish atin, uwok.

<sup>14</sup> “Aria eshudok douk shenek bisnis iri ta shukripok namudok shukri, ‘Eshudok eneshenesh ihishmorim douk nyak mishin nyakitakumesh um nyuraesh iri douk shanak shawishuk. Aria nyakish yopishi eshudok douk shatorish debeibori utabor iri shani eneshenesh yopishi eshudok douk shatrugun abom iri shopunek douk shanak shawishuk. Aria nyak ta mare wata nyutrish atin!’ <sup>15</sup> Aria eshudok douk shenek bisnis um shonakam um eneshenesh eshudok aria shatorish sabaibori utabor eshudok arpesh shape abrudok wabur Babilon iri ta shunogugur abom um arudok debeiri eriger douk ta abrudok waburishi arpesh shumnekar iri. Aria eshesh ta shunak shiyotuwi rougun aria ta shupe shurepobur. <sup>16</sup> Aria ta shukri, ‘O giha mobur atubur abrudok nyeigur nyato iruhw mobur iri wabur!

Séiwok ababur bananek yopihai abom shigorihwihi rupeh hani sabaihi owishiborihi rupeh shopunek.

Aria banaginohw gol rani yopubori abom utabor  
bani weiyoub douk shatorish debeibori utabor iri!  
Eshudok eshesh douk shatrugun abom iri.

<sup>17</sup> Aria wata shopunek banab meyoh nyutob, atin au meyoh  
aria ihishmorim eneshenesh eshudok douk  
shatorish debeibori utabor iri wata shanak shawishuk.’”

“Aria sabaimi hasuhw bodaeg kroruhiyor douk wahur youg iri hani sabaihi pasindia douk shatorish kroruhiyor aria sharahaen shanak kupairubi warub iri, hani amudok henek mour kroruhiyor iri, shani ihishmorim arpesh douk apa shenek eshesin mour youg iri eshesh ihishmorim ta shiyotuwi rougun um abrudok wabur Babilon. <sup>18</sup> Aria abudok nyutob ta shiyotu shutik wabur nyih hunubur aria nyugwus sukitak suto obi nyutob, eshesh ta shukri, ‘Douk madae anabur wabur bape agundok atap iri bupe kabi abrudok nyeigur nyato iruhw aburi wabur um uwe, uwok meyoh!’

<sup>19</sup> Aria eshesh ta shuhur nyupruk† shunuwatom baragos aria ta shupe shureh debeg shukri,

‘O giha-mobur atubur abrudok wabur!

Eshudok ihishmorim arpesh douk shogrem kroruhiyor iri  
sharao sabaibori utabor abrudok wabur.

Ipak pakri giha mobur abrudok wabur. Um maresh?

Douk banab nyutob, atin au meyoh abrudok waburish  
ihishmorim eneshenesh yopishi eshudok shanak shawishuk!

<sup>20</sup> Aria ipak enselahos pape iruhw heven iri

puni ipak Iruhin ananish arpesh,  
puni ipak aposel douk Iruhin nagraehep um

---

\* **18:13:** Enesh arpesh shape shakamum kupaishi shenekumesh mour meyoh iri. Kupaishi arpesh apa shatorish utabor kabi douk apak mator enesh eshudok shakus stuahas iri um. † **18:19:** Enyudok baraen um shunuwatom nyupruk barag um douk sheneken um shakri shiyabigesh um esheshiruh aparuh yoweruh abom um agundok abrudok wabur bananukuk um.

punak pukripesh ananin baraen iri,  
 puni ipak profet douk pakripesh  
 Iruhin nakripep-enyi baraen iri,  
 ipak ihishmorim ta punadudareh.  
 Um maresh? Iruhin nenen kwotimabur  
 aria nawananamobur yoweishi inahos abrudok wabur  
 aria bemnek debeiri eriger um agundok  
 seiwok ababur barik benek ipak pemnek debeiri eriger um.”

<sup>21</sup> Douk enyudok baraen nyanak nyatuhuk aria eik yatik enen  
 dodogowinyi abom ensel nyohur onok debeikwi burbuduk<sup>‡</sup> nyawashok  
 kwagrukuk youg aria nyakri,  
 “Ta shuwashak abrudok debeiburi wabur Babilon bugrukuk debeg atin  
 gani atap

kabi eik yawashok okwudok burbuduk kwagrukuk um.  
 Aria arpesh ta mare wata shutruber atin, uwok.

<sup>22</sup> Aria eshudok kabi douk gitahas-umori esheshih meh  
 huni eneshenesh douk shabirakesh shenek yopugi musik iri,  
 shuni buwaen iri aruruh esheshih meh  
 ta mare wata shumnekeh atin abrudok wabur, uwok!  
 Aria shopunek, eshudok douk shadukemesh um  
 shunek enyenenen mour iri ta mare wata shutrisher atin.

Aria amudok utom douk arpesh shape shakwum shaworish urubit wit iri  
 shopunek

ta mare wata shumnekeh miyagwreh atin abrudok wabur, uwok.

<sup>23</sup> Aria nyih lamhosih ta mare wata shutrisher atin.

Aria eshudok arpesh douk shakri shunaraum iri esheshih meh shopunek  
 ta mare shumnekeh atin.

Aria riguk arpesh shape shenek bisnis abrudok wabur

aria sharao sabaibori utabor

aria shatogur debeishi nyeiguhw abom shato-umeshi.

Aria douk uwok. Aria eshudok arpesh shape abrudok wabur iri  
 shenek anaruh subagwiruh aria shenek rohw um  
 ihishmorim arpesh douk shape ihigos-morim nahobigos iri.

<sup>24</sup> Aria Iruhin natik um abrudok wabur benek yoweishi inahos  
 babo amam profet hani sabaishi Iruhin ananish arpesh shagok.

Douk namudok aria baraen abrudok wabur banasuwen.

Aria ihishmorim arpesh douk

kupaishi shaesh shagok iri shopunek,

baraen douk nyanak um abrudok atubur wabur banasuwen.”

## 19

### *Iruhin Ananish Arpesh Shanadudareh Um Agundok Babilon Bananukuk*

<sup>Um</sup>

<sup>1</sup> Douk enyudok nyanakuk aria yemnek enen arpen nyeyagwrehi debeibi  
 mah kabi douk sabaishi arpesh shape sheneyagwreh iruhw heven iri um  
 nyakri,

“Apak mutuk Iruhin ananin nyeigur nyuto iruhw!

Apakin Iruhin anan atun narap matanamori mape wosik.

Aria agundok anan dodogowin natrugun abom um douk  
 nape abom um anan atun.

---

<sup>‡</sup> **18:21:** Enyudok baraen douk nyakrium okwudok debeikwi burbuduk iri douk nyakrium anam takweimi utom douk eshesh shape shemakwiyesh urubit wit um shaworishat um.

<sup>2</sup> Anan neneken um arpesan iri bareaen um  
nasuhw eshesig durdurig kwotog um douk yopug wosik abom aria adurig  
atug!

Aria okwudok armatok douk kwani kupaimi shenek wehrur um  
kwenek sabaishi arpesan shape agundok atap iri  
shakutukuk yopihi aih aria shagipesh okwokwihi yoweihai aih.  
Douk namudok aria Iruhin nenek kwotumok nakri okwok yoweikwi.  
Aria shopunek, okwok kwabo eshudok arpesan douk  
shenek ananin mour iri shagok aria douk  
anan douk nawanamok enyudok yoweinyi poe.  
Okwudok armatok douk shakri wobuwobren bareaen um  
abrudok wabur Babilon.”

<sup>3</sup> Aria sabaishi shape iruhw heven iri shape shahwar debeg shakri,  
“Apak mutuk Iruhin ananin nyeigur nyuto iruhw!  
Aria ogwsudok nyugwus douk sakih ehudok nyih douk hanu  
abrudok debeiburi wabur iri ta sukih suto iih nyumneh!”

<sup>4</sup> Aria amudok 24-poreim debeimi armam hani eshudok nubatish  
dodogowishi douk mishish shresh iri shabuh shoduk ohrubus aria shenek  
lotu um Iruhin douk nape ananin debeinya wagitur iri aria shahwar shakri,  
“Adur atin, apak mutuk Iruhin ananin nyeigur nyuto iruhw!”

<sup>5</sup> Aria eik yemnek anah mah agundok enyudok debeinya wagitur nyakus  
um. Aria enyudok arpen nyeyagwrehi iri nyakri,  
“Ipak ihishmorim penek Iruhin ananin mour iri puni  
ipak nyeiguhw shatoumep iri,\*  
puni nyeiguhw wokepari douk punogugur um Iruhin penek lotuman  
aria pusuhw ananin bareaen pugipeshen iri  
putuk ananin nyeigur nyuto iruhw!”

### *Nugaen Sipsip Ta Nyurao Enyenyik Irohukwik Aria Ta Shunek Debeguni Worigun*

<sup>6</sup> Aria eik yemnek enen arpen nyeyagwrehi debeihi mah kabi douk  
sabaishi arpesan shape sheyagwrehi um. Ahah douk kabi worub batogur  
beyagwreh um aria kabi utag pogarog debeg um. Aria eik yemnek hakri,  
“Apak mutuk Iruhin ananin nyeigur nyuto iruhw!  
Apakin Debeini douk anan atan Dodogowini Iruhin abom.  
Anan douk nape debeini um ihishmorim arpesan shani  
eneshenesh eshudok!

<sup>7</sup> Anan douk dodogowini arman abom.  
Aria douk apak ta aparuh yopuruh  
aria munadudareh-uman aria mutuk ananin nyeigur nyuto iruhw!  
Nyumnah douk hanaki um Nugaen Sipsip nyurao enyenyik irohukwik.†  
Baugenyum bareaen um Nugaen Sipsip enyenyik irohukwik douk nyakrium  
Krais ananish arpesan.”

Okwok douk kwenek garibog kwape um eshesh biyesh shunaraum um.

<sup>8</sup> Okwok douk shokok anah yopihi hatrugun abom iri  
shigorihwihi rupah kwohur.”

Ehudok rupeh iih douk shakri wobuwobren bareaen um ehudok yopihi  
abom aih douk Iruhin ananish arpesan shape shenekeh iri. <sup>9</sup> Aria enyudok  
ensel nyakripe nyakri, “Nyak wem enyudok bareaen. Bareaen enyudok.  
‘Eshudok arpesan douk Iruhin nahwaresh um shunaki um  
agundok debeguni worigun douk shenekagun um  
Nugaen Sipsip nyurao okwok iri um,

\* **19:5:** Putuk futnot nyape Revelesen 11:18 iri. † **19:7:** Putuk futnot nyape Revelesen 11:18 iri.

douk eshesh wosik shanadudareh.’ ”

Aria enyudok ensel wata shopunek nyakripe nyakri, “Enyudok Iruhin ananin bareaen douk adurin abom atin.”

<sup>10</sup> Aria eik yabuh yoduk ohrubus hurukatin um enyenyeriuh yeriweruh um yakri inek lotuman. Aria enyen nyakripe nyakri,

“Nyak mare nyunek lotu um eik, uwok.

Nyak nyunek lotu um Iruhin atun.

Eik yani nyak wani eshesh Kristen,

apak ihishmorim douk munek Iruhin ananin mour iri atup.

Ipak douk pasuhw enyudok bareaen Jisas nakripen pagipeshen iri.

Enyen douk enyudok atin bareaen nyohur

amam profet amamiruh aparuh

aria hakripesh Iruhin nakripam-enyi bareaen.”

### *Arman Netem Shigorihwinyi Hos Iri Anan Douk Krais*

<sup>11</sup> Aria ogwudok orug douk gweshiguk iruhw heven iri tukarog gwanak gweyatuk tukwotukwan aria eik yatigu enen shigorihwinyi hos nyeyotu numun heven. Aria anudok arman netem enyudok hos iri douk nanahwar namudok. Anan neyotu dodogowin atun nagipesh ananin bareaen wosik aria neyagwreh adurin atinyi bareaen iri. Aria douk anan nasuhw arpeshig kwotog nenekek wosik atin. Aria anan nenek wanohw um, anan apa nagipesh ananah yopih abom aih atin. <sup>12</sup> Ananis nabes sape kabi nyih hanu jurareh iri um. Aria anan nowem um sabaigwi yopugwi hatog douk king-omi atum hogwem iri um ananig barag. Aria shopunek, enen nyeigur nyetem ananihw yegeniyihw. Kupaishi mare shudukem um baugeniyum bareaen um enyudok nyeigur uwe, uwok. Anan atun nadukemen. <sup>13</sup> Aria ahudok rouhi rupah anan nohur iri douk shosegruh owishibor aria owishibor atubor bakrupoh. Aria eshesh shahwaran enyudok nyeigur shakri, “Iruhin Ananin Baraen.” <sup>14</sup> Aria eshudok ami douk shape iruhw heven iri shenek yopih abom shigorihwih rupeh aria shetem esheshish shigorihwishi hwosahos aria shape shagipeshan. <sup>15</sup> Aria anat wanohwit bainat tatograri anudok arman ananit nokwat. Aria anan ta nukwu atudok bainat um nubo sabaishi arpesh douk shape sabaigosi nahobigos iri. Aria anan ta nusuhw anam butum douk shenekam ain iri aria nupe debeini um ihishmorim arpesh. Aria anan ta nushish wainip shurkwip agudok debeigari tenk douk shenekag utabor iri. Enyudok douk shakri wobuwobren bareaen um agundok Dodogowini abom Iruhin nabo ihishmorim eshudok shabuhuk iri juwehosin abom um. <sup>16</sup> Aria enen bareaen nyetem anudok arman ananin mib nyani ananah rupah. Enyudok bareaen douk nyakri namudok,

“Debeini um ihm-morim king aria shopunek Debeini um ihm-morim  
debeimi”

<sup>17</sup> Aria eik yatigu enen ensel nyeyotwi nyumnahin aun aria nyah-warugu debeg ogwuhudok ihiguhw-umorim armiguhw douk hwanadudareh hwanak iruhw iri nyakri, “Ipak ihiguhw-morim punakumori Iruhin nenekagun iri debeguni worigun! <sup>18</sup> Ipak punaki puwok amudok king-omi huni amudok douk hape debeimi um amam soldia iri huni amudok dodogowimi armam amamiruh yegeshiweruh. Aria shopunek, puwok hwosahos shuni amudok douk hetem hwosahos iri, huni ihishmorim arpesh. Eshudok douk shape shakamum kupaishi shenekumesh mour meyoh iri, shuni eshudok douk shape wosik iri, shuni ihishmorim

nyeiguhw shato-umesh iri,<sup>‡</sup> shuni nyeiguhw wokeshi esheshiruh yegeshiweruh!"

<sup>19</sup> Aria eik yatik um enyudok debeinyi mahin nyani amudok agundok atapim king hani esheshim soldia shanak sheyotu atugun. Eshesh shanak sheyotu um shuni anudok arman douk netem enyudok hos iri nini ananim soldia shurpak. <sup>20</sup> Aria eshesh shasuhw enyudok debeinyi mahin nyani anudok nenek rohwumesh iri profet showeshikesh. Anudok profet douk nenek enenyen Iruhin atun neneken iri mour agundok enyudok mahin nyape um. Riguk anudok profet douk nenek sabainyi mour kabi Iruhin atun neneken iri um aria nenek rohw um eshudok arpesh douk sharao enyudok mahin enyenyin kak aria shenek lotu um enyenyir aborir iri. Aria enyudok mahin nyani anudok profet eshesh mishish wata shoresh aria showashesh shagrulkuk agudok nuwag douk nyih hanuwi amudok utom douk shahwaram salfa iri hanu um. <sup>21</sup> Aria anudok arman douk netem hos iri nabo enyudok mahin nyani anudok profet esheshim soldia hagok hatuh. Anan makwumam atudok bainat douk tatograri ananit nokwat iri. Douk amam hagok aria ihiguhw-umorim armiguhw hwanaki hwape hwawok amamiruh yegehiweruh aria ogwoguh dugaroguh abom wosik atin.

## 20

### *Satan Nanaweshik Nape Sabaishi Um 1,000-poreish Kwarahos*

<sup>1</sup> Aria wata shopunek yatigu kupainyi ensel nyakutukuk iruhw heven nyabuhi. Enyen nyasuhwi anan debeini sen nani ki um agudok nuwag douk gagor gabuhuk gani atap aria atapig um madae gubuh giyotu anabik iri uwe. <sup>2</sup> Aria enyudok ensel nyasuwor dodog arudok debeiri yur aria nyoweshikor anudok sen um nyuweshikor rupe um 1,000-poreish kwarahos. Arudok yur douk shahwaror um seiwokiri yur iri. Aria shopunek, arar douk shahwaror um renek rohw um arpesh rakri eshesh shenek yoweishi inahos atish iri o Satan. <sup>3</sup> Aria enyudok ensel nyawashak arudok debeiri yur Satan rabuhukuk agudok nuwag douk gagor gabuhuk gani atap iri aria nyawarukuk wit dodog. Enyen nyawarukuk wit um arudok yur mare wata runak runek rohw um arpesh douk shape ihigos-morim nahobigos iri. Arar ta rupe arigha 1,000-poreish kwarahos shunak shudiguk aria ensel ta wata nyijikumar wit aria arar ta wata rutogur rupe meyoh rupe runarahaen banab meyoh nyutob.

<sup>4</sup> Aria eik yatigu enesh debeishi wagiturahos douk king-omi atum hapenyesh iri shakus. Aria enesh arpesh shatem eshudok wagiturahos. Eshesh douk Iruhin nekesh debeinyi big um shusuhw arpesh esheshig kwotog. Aria shopunek, yatik sabaishi arpesh douk shasuhw Iruhin anan baraeen dodog shagipeshen iri esheshish mishish. Eshesh douk eshudok shakripesh baraeen kupaishi um Jisas, aria horim shatupok esheshigos baragos aria shaesh shagok iri. Eshesh douk madae shurao enyudok debeinyi mahin enyenyin kak nyupe esheshish domaesh aria esheshish roguuh aria shunek lotu um enyen nyuni enyenyir aborir iri uwe. Eshesh wata mishish shawishesh aria shakitaki shani Krais shape debeishi um eshudok 1,000-poreish kwarahos. <sup>5</sup> Aria abudok nyutob eshesh shakitaki um, ahah douk sagomih nyumnah abom um shagok iri shakitaki wonugwegwiruh um. Ihishmorim shagok iri arpesh yapis madae suwishesh abudok nyutob uwe, watak. Eshesh ta eshudok 1,000-poreish kwarahos shunak shudiguk aria eshesh ta kadak yapis suwishesh aria shikitaki. <sup>6</sup> Aria eshudok arpesh douk shikitaki wonugwegwiruh ahudok sagomih nyumnah iri, eshesh ta

<sup>‡</sup> 19:18: Putik futnot nyape Revelesen 11:18 iri.

shunadudareh aria shupe Iruhin ananish yopishi abom arpesh. Aria Iruhin nunek yopishi abom um eshesh. Aria agundok um shugiguk shugok um ta mare dologowigun um nesh shugok anah shopunek, uwok. Eshesh ta shupe kabi pris douk hape henek ofa um eneshenesh eshudok hako Iruhin nani Krais iri um. Aria eshesh ta shuni Krais shupe debeishi shusuhw merik um sabaishi arpesh um eshudok sabaishi 1,000-poreish kwarahos.

### *Satan Nemnek Debeiri Abom Eriger*

<sup>7</sup> Douk eshudok 1,000-poreish kwarahos shunak shudiguk aria Satan ta wata jurug um shunuweshik um aria ta shijikuman wit agudok nuwag aria nutograri aduk. <sup>8</sup> Anan ta nutograri um nunak nupe nunek rohw um sabaishi arpesh douk shape ihigosmorim nahobigos douk sape ihigunum agundok atap iri. Eshesh douk shape Gok nani Magok iri. Aria Satan ta nuraesh shunak shupe atugun um shupe shurpak. Eshesh douk sabaishi abom kabi douk sabaiti arukot douk takus anagas um youg iri um. <sup>9</sup> Eshesh shanak ihigunum agundok atap aria sheyotu shersharih Iruhin ananish arpesh shapeum. Eshesh douk shape abrudok wabur douk Iruhin urkum manawasham-abur abom iri. Aria nyih hagruki iruhw heven aria habuhi hanu eshudok Satan ananish soldia heyatesh. <sup>10</sup> Aria eshesh shawashak Satan douk nape nenek rohwumes iri nagrukuk kupaigi debeigi nuwag douk juwehosih nyih hanuw amudok utom douk shahwaram um salfa iri hape hanumi um. Enyudok debeinyi mahin nyani anudok nenek rohwumes iri profet douk sharik showashesh shabuh shor agudok nuwag. Aria agundok eshesh bishatin ta shupe shunomnek debeiri eriger nyumneh weibus ihih nyumneh.

### *Debeiti Kwot Tatogur*

<sup>11</sup> Aria eik yatigu enen debeinyi shigorihwinyi wagitur king-omi atum hapenyen iri nyakus. Aria anan debeini netem enyudok wagitur. Aria agundok atap nani iruhw heven sharuwokuk shanak shawishuk. <sup>12</sup> Aria eik yatik eshudok ihishmorim shagok iri. Eshudok douk nyeiguhw shatoumesh iri\* shani nyeiguhw wokeshi sheyotu hurukatin um enyudok debeinyi wagitur nyakus um. Aria ono bumeb wanajik. Aria okwudok onok buk douk eshudok arpesh douk ta shupe wosik ihih nyumneh iri esheshish nyeiguhw shatemokwi shopunek kwanajik. Aria anudok netem enyudok debeinyi wagitur iri natik eneheneh aih hatem ouduk bumeb iri douk eshudok arpesh shape shenekeh iri. Aria anan nenekumesh bareaen wosik-umesh um ihih morim eneheneh aih douk eshesh shape shenekeh iri. <sup>13</sup> Aria ihishmorim shagok iri douk seiwock shagok youg aria esheshiruh yegeshiweruh horukuk youg iri wata shakutukuk youg shakitak shatowi. Aria ihishmorim shagok iri douk shagok shanak shape agundok shagok iri shanak shapeum iri wata shakitak shatowi. Eshesh shakitaki shape aria anudok netem wagitur iri nenekumesh bareaen ihishmorim atin atin wosik-umesh abom um eneheneh aih iri mour eshesh shape shenekeh iri. <sup>14</sup> Aria gok nyani agundok shagok iri shapeum nanawashak nagrukuk agudok nuwag douk nyih hape hanug iri. Agudok nuwag agag atug douk shakri nyagiguk iri gok ta arpesh shabuh aria mare shugok anah shopunek um. <sup>15</sup> Aria ta enesh arpesh esheshish nyeiguhw madae shutem okwudok buk douk eshudok arpesh douk ta shupe ihih nyumneh iri esheshish nyeiguhw shetemok iri um, eshesh ta shunawashak shugrukuk agudok nuwag douk nyih hanug iri.

\* **20:12:** Putik futnot nyape Revelesen 11:18 iri.

## 21

### *Namuburi Wabur Heven Aria Namubi Amnab*

<sup>1</sup> Douk enyudok nyanakuk aria eik yatigu namuburi wabur heven bani namubi amnab shape. Barik iri wabur heven bani barik iri amnab shani youg shanak shawishuk abom aria madae enesh shupe uwe. <sup>2</sup> Aria eik yatigu abrudok yopuburi wabur Jerusalem. Ababur douk bape iri agundok Iruhin napecum aria bakutukuk iruhw heven bape babuhi. Abrudok wabur douk shaginohwobur kabi douk onok armatok douk kwanaginohw kwenek yopihi atih rupeh aria kwape um kwuni okwokwin raminen shunaraum iri. <sup>3</sup> Aria eik yemnek anah mah agundok enyudok debeinyi wagitur nyakus um. Aria enyudok arpen nyeyawrehi iri nyakri debeg, "Ipak pumnek! Douk Iruhin nani arpesh shape atugun! Aria anan ta nini eshesh shupe aria eshesh ta shupe ananish atish arpesh. Aria anan ta nupe esheshin debeinei Iruhin. <sup>4</sup> Aria anan ta nubatikumesh abih esheshis nabes aria eshesh ta mare wata shugok atin, uwok. Aria esheshiruh aparuh ta mare wata yoweruh aria shumnek anar eriger aria shureh, uwok. Ihinyumorim enenyenen douk seiwok nyape nyatogur um arpesh iri douk nyanak nyawishuk abom."

<sup>5</sup> Aria anudok nape enyudok debeinyi wagitur iri nakri, "Ipak pumnek! Douk eik yenek ihishmorim eneshenesh eshudok shape iruhw atap iri shatogur namushi!" Aria anan wata shopunek nakripe nakri, "Nyak nyuwem um enyudok baraen douk iganigadae nyemneken iri anap shup. Um maresh? Enyudok baraen douk adurin abom aria wosik um arpesh shumneken aria shusuhwen dodog shugipeshen." <sup>6</sup> Aria anan nakripe shopunek nakri, "Eshudok eneshenesh douk shatogur shatuh! Seiwok baugos um ihishmorim eneshenesh eshudok watak enesh shutogur shupe uwe aria eik yape. Aria kweipon shopunek ta ipe arigaha hugikug iri nyumnah hutogur. Aria meinyi arpen abar baen iri, eik ta iken anabar abar nyubroh moyoh. Enyen mare nyutorabar, uwok. Abrudok abar douk bakih atap moyoh iri. Ababar douk ta arpesh shubroh aria shupe wosik abom ihih nyumneh iri. <sup>7</sup> Aria meinyi arpen douk nyiyotu dodogowin atin nyunek wanohw nyubo yoweishi inahos shubuhuk iri, enyen ta nyugrem ihishmorim eikish yopishi eshudok eneshenesh. Aria eik ta ipe enyen nyenek lotume iri Iruhin, aria enyen ta nyupe eikin batowin. <sup>8</sup> Aria eshudok douk shanogugur aria wata shatanam shenek yoweishi inahos iri, shuni eshudok douk madae shusuhw eikin baraen dodog shugipeshen iri uwe, shuni eshudok douk shenek eneshenesh yoweishi inahos iri, shuni eshudok douk shabo kupaishi arpesh shagok iri, shuni eshudok douk shenek wehrur um iri, shuni eshudok douk shenek ouruh iri, shuni eshudok douk shenek enenyenen um yoweiruhi subagwiruhi iri, shuni eshudok douk shenek lotu um eshudok douk madae adurimi god omi iri uwe, shuni eshudok douk shenek rohwumesh iri, eshesh ihishmorim ta shunak shupe agudok nuwag douk juwehosih iyi hape hanu agari. Agudok nuwag agag douk ta arpesh shubuh aria mare shugok anah shopunek um."

### *Namuburi Wabur Jerusalem*

<sup>9</sup> Aria enen ensel um eshudok 7-poreish enselahos douk shasuhw shagiguk abom iri 7-poreish yoweishi abom eshudok eneshenesh iri nyanaki aria nyakripe nyakri, "Nyak yowi aria iyabigen nugaen Sipsip enyenyik irohukwik." <sup>10</sup> Aria Iruhin ananin Mishin nyatogrume dodogowin atin aria agundok eik kabi douk yabo yomnis um. Aria enyudok ensel nyare wanak wato onohw debeihwi rouhwu yoduhw. Aria enyen nyeyabige abrudok Iruhin ananibur yopuburi wabur Jerusalem. Ababur douk

baperi agundok Iruhin neapeum aria bakutukuk iruhw heven bape babuhi. <sup>11</sup> Aria agundok douk Iruhin dodogowin abom aria natrugun abom um natrugun numun abrudok wabur. Aria ababur babuhi anabik sik kabi douk anam yopumi utom douk shatorum debeibori utabor iri mabuhi um. Aria shopunek, ababur babuhi kabi douk anam utom jaspa mani wenyir shabuhi um. <sup>12</sup> Aria arbudok narub douk sharukarubi narub um abrudok debeiburi wabur iri douk debeirubi abom aria rourourubi bato gani iruhw. Aria 12-poreish duahas shape arbudok narub. Aria shopunek, 12-poreish enselahos sheyotu sheyoh um eshudok 12-poreish duahas. Aria asudok 12-poreis awirosish arpesh douk shakitaki Israel iri esheshish nyeiguhw shetem eshudok 12-poreish duahas. <sup>13</sup> Aria bishatin duahas shape gani wobrehah-irub um narub douk bape batik aun nakihumori um. Aria bishatin shape shatik saut, bishatin shape shatik not, aria bishatin shape shatik aun nabuh um. <sup>14</sup> Abrudok debeiburi waburirub narub agundok atapirub um douk betem um 12-poreibor utabor um busuwobur batao dodog iri. Aria enyudok Nugaen Sipsip enyenym 12-poreim aposel douk riguk enyen nyograeham um hunak hukripesch Iruhin ananin bareaen iri amamish nyeiguhw shatem abrudok 12-poreibor utabor.

<sup>15</sup> Aria enyudok ensel douk nyani eik weyagwreh iri nyasuhw anam butum douk shenekam gol iri um shape shasuhw wigah um eshudok eneshenesh-am iri. Enyen nyakri nyusuuhw wigah um abrudok debeiburi wabur buni arbudok debeirubi narub buni eshudok duahas douk shape narub iri. <sup>16</sup> Abrudok debeiburi wabur roubur um bani agundok debebur um douk arag atin abom. Aria enyudok ensel nyakwu enyenym butum aria nyasuhw wigah um abrudok wabur. Aria douk enyen nyasuhw wigah aria ihiburmoris agundok roubur um bani debebur um bani agundok atap bato iruhw um douk aragum atin abom. Aria shasuhw wigah um, ababur douk rourouburi abom hurukatin um 2,200 kilomita. <sup>17</sup> Aria enyen nyasuhw wigah um narub shopunek. Aria agundok atap bato iruhw um douk hurukatin um 144 mita. Amudok butum enyen nyasuhw wigah um arbudok narub iri douk amudokmori um douk arpesh apa shasuhw wigah um eshudok eneshenesh iri um. <sup>18</sup> Aria arbudok narub douk shenekarub abrudok utabor atubor douk shahwarabor um jaspa iri. Aria wabur ababur kanak shenekarub shakwu yopuri gol douk rabuhi aria ratrugun kabi wenyirumori. <sup>19</sup> Atapirub um arbudok narub douk shenekarub um shunek narub um abrudok wabur iri douk shenekarub dodog. Aria shaginohwarub sabaibori sisigbor yopubori utabor douk shatorabor debeibori utabor iri.

Marik iri utom douk

makus atap um masuhw arbudok narub iri douk jaspa.

Aria magiguk iri douk bluporeimi douk shahwaram um sapαιa iri.

Aria biobor atum iri douk shigorihwimi douk shahwaram um aget iri, aria nubatibor iri douk grinporeim douk shahwaram um emeral iri.

<sup>20</sup> Aria anas wisi-ibor iri douk anabigim um owishiborim aria anabigim um shagarihwim.

Amam douk shahwaram um sadonikis iri.

Aria anas wisi-ibor iri douk owishiborimi douk shahwaram um konilian iri.

Aria namba 7-im douk akitohimi douk shahwaram um krisolait iri,

aria namba 8-im douk sikim grinporeim douk shahwaram um beril iri.

Aria namba 9-im douk anam sikim akitohimi douk shahwaram um topas iri,

aria namba 10-im douk anabigim um grinporeim  
aria anabigim um akitohimi iri.

Aria amam douk shahwaram um krisopres iri.

Aria namba 11-im douk anam sikim bluporeimi douk  
shahwaram um haiyasin iri,  
aria namba 12-im douk anam sikim owishiborimi utom  
shahwaram um ametis iri.

<sup>21</sup> Aria eshudok 12-poreish duahas douk shenekesh shakwu 12-poreib  
shigorihwibi debeibi weiyoub douk shatarub debeibori utabor iri. Aria  
eshudok duahas atin atin shenekesh shakwu atut atut um debeigwi weiy-  
oubig natog douk shahwarog um pel iri. Aria ahudok debeihi yah douk  
hape abrudok debeiburi wabur iri douk shenekah yopiri gol aria aahah hape  
kabi wenyir\* um.

<sup>22</sup> Aria eik madae itik Iruhin ananit debeiti urupat tutao abrudok wabur  
uve, uwok. Um maresh? Debeini Iruhin anan douk Dodogowin abom  
nabo ihishmorim eshudok shabuhuk iri nani Nugaen Sipsip amam kanak  
hape kabi Iruhin ananit urupat um. <sup>23</sup> Aria abrudok wabur mour ta mare  
enén um wah hutao hobur um o wabin aun wanyukehin aria nutrugun  
um, uwok. Um maresh? Agundok douk Iruhin dodogowin aria natrugum  
abom um, agagun kanak ta nunek ihigunmorim um abrudok wabur  
butrugun aria bogaragun. Aria shopunek, enyudok Nugaen Sipsip enyen  
kanak nyabuhi kabi douk lam um aria nyenekagun bogaragun abrudok  
wabur. <sup>24</sup> Aria ihishmorim arpesh shape sabaigosи nahobigos iri ta abrudok  
wabur butrugun-umesh aria eshesh ta shunatrugun aria shurahaen. Aria  
amam king douk hape agundok atap iri ta hurao amamibor utabor buni  
ihishmorim eneshenesh amamish yopishi eshudok hunak huwish abrudok  
wabur um hakri hutuk Iruhin ananin nyeigur nyuto iruhw. <sup>25</sup> Aria  
nyumneh, abrudok waburish duahas ta shunejik shupe namudok atin. Um  
maresh? Agundok weibus ta mare anabus, uwok. <sup>26</sup> Aria ihishmorim  
arpesh shape ihigos-morim nahobigos iri ta shurac esheshibor utabor buni  
yopihu jah shuwish abrudok wabur um shutuk Iruhin ananin nyeigur nyuto  
iruhw. <sup>27</sup> Aria ihishmorim eneshenesh shabosusih iri yoweishi eshudok  
shuni eshudok arpesh douk shenek eneshenesh yoweishi inahos iri, shuni  
eshudok douk shenek abraenyih aih iri, shuni eshudok douk shenek rohw  
um kupaishi iri ta mare shuwish abrudok wabur, uwok. Aria eshudok  
arpesh douk esheshibh nyeiguhw shetem Nugaen Sipsip enyeniyuk buk  
iri eshesh atish ta shuwish abrudok wabur. Okwudok buk okwok douk  
eshudok arpesh douk ta shupe wosik abom ihih nyumneh iri esheshibh  
nyeiguhw shetemokwi.

## 22

*Worubibar Abar Bani Shurkwip Peir Rowog Iri Douk Ta Arpesh Shishoh  
Aria Shupe Wosik Abom Iri Ihih Nyumneh*

<sup>1</sup> Aria enyudok ensel wata shopunek nyeyabige anab debeibi worub.  
Abudok worub shopunek douk bogarab abom kabi douk wenyir ratrugun  
um. Aria arpesh shuwok abar abudok worub iri ta shupe wosik abom  
ihih nyumneh. Abudok worub douk batobe iri agundok enyudok debeihi  
wagitur douk Iruhin nani Nugaen Sipsip hatemenyi nyakus um. <sup>2</sup> Aria abab  
bau banak orokohunih um ahudok debeihi yah douk hape abrudok wabur

\* <sup>21:21:</sup> Arudok gol arar douk anar siker. Arpesh shutrur um, esheshis nabes ta sunak dukwotis  
sunakuk kabi shape numun urupat shenek narubumat glas iri shatik glas nabes arukwutis shatik  
aduk um.

iri. Aria enesh rowos shatao wobuwobur abudok worub. Aria eshudok arpesh douk shuwok shurkwip peir eshudok rowos iri ta shupe wosik abom iihlh nyumneh. Aria shurkwip apa peir ihibmorim aub enen kwar. Aria esheshis shus ta sunek ihihmorim eneheneh arugeh henekesh iri arpesh douk shape ihigosmorim nahobigos iri shutogur yopish.<sup>3</sup> Aria ihihmorim eneshenesh yoweishi inahos eshudok shuni arpesh douk Iruhin nakri adur iruhw abom um nakri wokumesh iri ta mare enesh shukus abrudok debeiburi wabur, uwok.

Aria Iruhin nini Nugaen Sipsip amamin debeinyi wagitur ta nyukus abrudok wabur. Aria eshudok douk shenek Iruhin ananin mour iri ta shupe shunek lotuman.<sup>4</sup> Eshesh ta shutik ananig yamag aria ananin nyeigur ta nyutem esheshish domaesh.<sup>5</sup> Aria agundok weibus ta mare anabus aria eshesh ta mare shuhem enesh lamhos, uwok. Aria mour ta mare enen um wah hutao um hunekagun juwehos-igun um, uwok. Um maresh? Agundok douk Debeini Iruhin natrugun abom um ta nutrugum-umesh. Aria eshudok douk shenek ananin mour iri ta shupe debeimi king-omi iihlh nyumneh.

### *Jisas Hurukatin Um Nunaki*

<sup>6</sup> Aria enyudok ensel nyakripe nyakri, "Enyudok ihinyumorim baraen douk nyak nyenyem okwudok buk iri douk adurin atin abom. Aria enyen douk wosik abom um ihihmorim arpesh shumneken aria shusuhwen dodog shugipeshen. Aria debeini, anan douk Iruhin douk apa nohur amam profet um hunak hukripesch ananin baraen iri. Anan neshopok ananin ensel nyanaki um nyiyabig ihihmorim shenek ananin mour iri um ihihmorim eshudok eneshenesh douk hurukatin um shutogur iri."

<sup>7</sup> Aria Jisas nakri, "Mnek, eik douk hurukatin um inaku itogrume! Aria eshudok arpesh douk shugipesch Iruhin ananin baraen nyetem okwudok Buk iri douk nyakrium eshudok douk ta shutogur iri, eshesh ta shunadudareh."

<sup>8</sup> Aria eik Jon, eik kanak yemnek ihinyumorim baraen aria yatik ihihmorim eshudok douk yeshem okwudok Buk iri. Aria douk yemnek enyudok baraen aria shopunek yatik eshudok ihihmorim eneshenesh iyoh aria yabuh yoduk ohrubus hurukatin um enyudok ensel douk iganigadae nyape neyabige ihihmorim eshudok iri enyenyiruh yeriweruh aria yakri inek lotuman.<sup>9</sup> Aria enyen nyakripe nyakri, "Nyak mare nyunek lotu um eik, uwok! Eik yani nyak wani nyakim ashukenyim amam profet, mani ihihmorim arpesh douk apa shagipesch enyudok baraen douk nyetem okwudok Buk iri, apak ihihmorim douk munek atin mour iri. Douk namudok aria nyak nyunek lotu um Iruhin atun!"

<sup>10</sup> Aria enyen nyakripe nyakri, "Nyak mare nyubeshuk enyudok Iruhin ananin baraen douk nyetem okwudok buk iri, uwok. Um maresh? Abudok nyutob douk Iruhin nakri nunek eshudok douk shetem okwudok buk iri shutogurum douk banaki hurukatin.<sup>11</sup> Douk namudok aria eshudok arpesh douk shenek yoweishi inahos iri ta shupe um shunek yoweishi inahos namudok atin. Aria eshudok douk shenek eneshenesh shanabosusih abom iri yoweishi inahos iri ta shupe um shunek yoweishi inahos namudok atin. Aria eshudok arpesh douk shenek yopihi aih iri ta shupe um shunek yopihi aih namudok atin. Aria eshudok arpesh douk shape Iruhin ananish atish iri ta shupe ananish atish abom."

<sup>12</sup> Aria Jisas nakri, "Mnek! Eik douk hurukatin um inaku. Aria eik ta iraougu eshudok um iko ihihmorim arpesh atin atin um iwanamesh ihihmorim eneheneh yopihi o yoweishi aih eshesh riguk shape shenekeh iri.<sup>13</sup> Douk seiwok baugos um ihihmorim eneshenesh eshudok madae

enesh shupe uwe, aria eik yape. Aria kweipon shopunek eik ta ipe arigaha hugiguk iri nyumnah hutogur.

<sup>14</sup> Aria eshudok arpesh douk apa shanokwrup esheshih rupeh hatogur yopih iri, eshesh wosik ta shunadudareh. Um maresh? Eshesh ta shurao big um shuwok epudok shurkwip douk peir enyudok rowog douk ta shupoh aria shupe wosik abom iihih nyumneh iri. Aria shopunek, eshesh wosik ta shunak shuwish abrudok waburish duahas aria shuwish shupe numun.

<sup>15</sup> Aria eshudok douk shenek yoweishi abraenyih aih iri shuni eshudok douk shenek ouruh aturuuh iri, shuni eshudok douk shenek enenyenen um sabagwiruh iri, shuni eshudok douk apa shenek wehrur um iri, shuni eshudok douk shabo kupaishi shagok iri, shuni eshudok douk shenek lotu um madae adurimi god omi iri uwe, shuni ihishmorim arpesh douk esheship urkwip panawasham um ehudok aih um shunek rohw um kupaishi arpesh um aria shagipesheh shenekeh iri, eshesh ta mare shuwish abrudok wabur, uwok. Eshesh ta shupeik aduk.

<sup>16</sup> Aria douk eik Jisas yeshopoku enyudok eikin ensel nyanakumogu ipak aria nyakriep um enyudok enenyenen douk nyetem okwudok buk iri um ipak Iruhin ananish arpesh. Eik douk Devit ananin barhonin douk yikitaki ananip awirop iri. Aria eik douk okwudok unuk douk kwanahwar um shuduwi kwatrugun abom iri."

<sup>17</sup> Aria Iruhin ananin Mishin nyani Nugaen Sipsip enyenyik irohukwik\* shakri, "Yowi!" Aria eshudok arpesh douk shumnek enyudok bareaen iri shopunek ta shukri, "Yowi!" Aria eshudok arpesh douk abar baesh iri ta shunaki aria shuwok abrudok abar douk ta arpesh shubroh aria shupe wosik abom iihih nyumneh iri. Ababar Iruhin ta nukeshabar meyoh. Eshesh ta mare shutorabar, uwok.

### *Nyagiguk Iri Bareaen*

<sup>18</sup> Aria eik Jon yakri ikripesh enyudok dodogowinyi bareaen ihishmorim arpesh douk shemnek Iruhin ananin bareaen douk nyetem okwudok buk iri. Enyudok bareaen douk nyakrium eneshenesh eshudok douk ta shutogur iri. Bareaen enyudok. Ta enen arpen nyuwem enen kupainyi bareaen shopunek um enyudok bareaen douk eik yenjem nyetem okwudok buk iri um, Iruhin ta nunek yoweishi abom eshudok shutogrumen namudok. Eneshenesh yoweishi eshudok douk okwudok buk kwakriyesh iri ta shunek arpesh shumnek debeiri eriger iri, Iruhin ta wata nenekeh um enyudok arpen enyenyin yoweini poe aria ta shutogurum enyen atin. <sup>19</sup> Aria shopunek, ta enen arpen nyukri nyukutukuk enen Iruhin ananin bareaen douk eik yenjem nyetem okwudok buk iri um, Iruhin ta mare nukri wosik um enyen nyunak nyuwish nyunadi anep shuruwep douk peir enyudok rowog douk ta arpesh shupoh aria shupe wosik abom iihih nyumneh iri, uwok. Aria enyen ta mare nyuwish nyupe abrudok ananibur yopuburi wabur douk bareaen nyetem okwudok buk iri nyakriabur iri.

<sup>20</sup> Aria anudok arman douk nakripap um ihishmorim eneshenesh eshudok douk shetem okwudok buk iri nakri, "Adur atin, eik douk hurukatin um inaku!"

Adur, Debeini Jisas, nyak nyunaki!

<sup>21</sup> Aria eik yakri Debeini Jisas nini ipak ihishmorim Iruhin ananish arpesh pupe aria nutaurumep meyoh. Adur.

---

\* <sup>22:17:</sup> Enyudok bareaen um Nugaen Sipsip enyenyik irohukwik douk nyakri wobuwobren bareaen um Iruhin ananish arpesh.

## Read the New Testament daily

*January*

| date | Scripture         |
|------|-------------------|
| 1    | Matyu 1:1-2:12    |
| 2    | Matyu 2:13-3:6    |
| 3    | Matyu 3:7-4:11    |
| 4    | Matyu 4:12-25     |
| 5    | Matyu 5:1-26      |
| 6    | Matyu 5:27-48     |
| 7    | Matyu 6:1-24      |
| 8    | Matyu 6:25-7:14   |
| 9    | Matyu 7:15-29     |
| 10   | Matyu 8:1-17      |
| 11   | Matyu 8:18-34     |
| 12   | Matyu 9:1-17      |
| 13   | Matyu 9:18-38     |
| 14   | Matyu 10:1-23     |
| 15   | Matyu 10:24-11:6  |
| 16   | Matyu 11:7-30     |
| 17   | Matyu 12:1-21     |
| 18   | Matyu 12:22-45    |
| 19   | Matyu 12:46-13:23 |
| 20   | Matyu 13:24-46    |
| 21   | Matyu 13:47-14:12 |
| 22   | Matyu 14:13-36    |
| 23   | Matyu 15:1-28     |
| 24   | Matyu 15:29-16:12 |
| 25   | Matyu 16:13-17:9  |
| 26   | Matyu 17:10-27    |
| 27   | Matyu 18:1-22     |
| 28   | Matyu 18:23-19:12 |
| 29   | Matyu 19:13-30    |
| 30   | Matyu 20:1-28     |
| 31   | Matyu 20:29-21:22 |

*February*

| date | Scripture         |
|------|-------------------|
| 1    | Matyu 21:23-46    |
| 2    | Matyu 22:1-33     |
| 3    | Matyu 22:34-23:12 |
| 4    | Matyu 23:13-39    |
| 5    | Matyu 24:1-28     |
| 6    | Matyu 24:29-51    |
| 7    | Matyu 25:1-30     |
| 8    | Matyu 25:31-26:13 |
| 9    | Matyu 26:14-46    |
| 10   | Matyu 26:47-68    |
| 11   | Matyu 26:69-27:14 |
| 12   | Matyu 27:15-31    |
| 13   | Matyu 27:32-66    |
| 14   | Matyu 28:1-20     |
| 15   | Mak 1:1-28        |
| 16   | Mak 1:29-2:12     |
| 17   | Mak 2:13-3:6      |
| 18   | Mak 3:7-30        |
| 19   | Mak 3:31-4:25     |
| 20   | Mak 4:26-5:20     |
| 21   | Mak 5:21-43       |
| 22   | Mak 6:1-29        |
| 23   | Mak 6:30-56       |
| 24   | Mak 7:1-23        |
| 25   | Mak 7:24-8:10     |
| 26   | Mak 8:11-9:1      |
| 27   | Mak 9:2-29        |
| 28   | Mak 9:30-10:12    |

| date | Scripture       |
|------|-----------------|
| 1    | Mak 10:13-31    |
| 2    | Mak 10:32-52    |
| 3    | Mak 11:1-26     |
| 4    | Mak 11:27-12:17 |
| 5    | Mak 12:18-37    |
| 6    | Mak 12:38-13:13 |
| 7    | Mak 13:14-37    |
| 8    | Mak 14:1-21     |
| 9    | Mak 14:22-52    |
| 10   | Mak 14:53-72    |
| 11   | Mak 15:1-47     |
| 12   | Mak 16:1-20     |
| 13   | Luk 1:1-25      |
| 14   | Luk 1:26-56     |
| 15   | Luk 1:57-80     |
| 16   | Luk 2:1-35      |
| 17   | Luk 2:36-52     |
| 18   | Luk 3:1-22      |
| 19   | Luk 3:23-38     |
| 20   | Luk 4:1-30      |
| 21   | Luk 4:31-5:11   |
| 22   | Luk 5:12-28     |
| 23   | Luk 5:29-6:11   |
| 24   | Luk 6:12-38     |
| 25   | Luk 6:39-7:10   |
| 26   | Luk 7:11-35     |
| 27   | Luk 7:36-8:3    |
| 28   | Luk 8:4-21      |
| 29   | Luk 8:22-39     |
| 30   | Luk 8:40-9:6    |
| 31   | Luk 9:7-27      |

| date | Scripture       |
|------|-----------------|
| 1    | Luk 9:28-50     |
| 2    | Luk 9:51-10:12  |
| 3    | Luk 10:13-37    |
| 4    | Luk 10:38-11:13 |
| 5    | Luk 11:14-36    |
| 6    | Luk 11:37-12:7  |
| 7    | Luk 12:8-34     |
| 8    | Luk 12:35-59    |
| 9    | Luk 13:1-21     |
| 10   | Luk 13:22-14:6  |
| 11   | Luk 14:7-35     |
| 12   | Luk 15:1-32     |
| 13   | Luk 16:1-18     |
| 14   | Luk 16:19-17:10 |
| 15   | Luk 17:11-37    |
| 16   | Luk 18:1-17     |
| 17   | Luk 18:18-43    |
| 18   | Luk 19:1-27     |
| 19   | Luk 19:28-48    |
| 20   | Luk 20:1-26     |
| 21   | Luk 20:27-47    |
| 22   | Luk 21:1-28     |
| 23   | Luk 21:29-22:13 |
| 24   | Luk 22:14-34    |
| 25   | Luk 22:35-53    |
| 26   | Luk 22:54-23:12 |
| 27   | Luk 23:13-43    |
| 28   | Luk 23:44-24:12 |
| 29   | Luk 24:13-53    |
| 30   | Jon 1:1-28      |

| date | Scripture       |
|------|-----------------|
| 1    | Jon 1:29-51     |
| 2    | Jon 2:1-25      |
| 3    | Jon 3:1-21      |
| 4    | Jon 3:22-4:3    |
| 5    | Jon 4:4-42      |
| 6    | Jon 4:43-54     |
| 7    | Jon 5:1-23      |
| 8    | Jon 5:24-47     |
| 9    | Jon 6:1-21      |
| 10   | Jon 6:22-40     |
| 11   | Jon 6:41-71     |
| 12   | Jon 7:1-29      |
| 13   | Jon 7:30-52     |
| 14   | Jon 7:53-8:20   |
| 15   | Jon 8:21-30     |
| 16   | Jon 8:31-59     |
| 17   | Jon 9:1-41      |
| 18   | Jon 10:1-21     |
| 19   | Jon 10:22-42    |
| 20   | Jon 11:1-53     |
| 21   | Jon 11:54-12:19 |
| 22   | Jon 12:20-50    |
| 23   | Jon 13:1-30     |
| 24   | Jon 13:31-14:14 |
| 25   | Jon 14:15-31    |
| 26   | Jon 15:1-27     |
| 27   | Jon 16:1-33     |
| 28   | Jon 17:1-26     |
| 29   | Jon 18:1-24     |
| 30   | Jon 18:25-19:22 |
| 31   | Jon 19:23-42    |

| date | Scripture          |
|------|--------------------|
| 1    | Jon 20:1-31        |
| 2    | Jon 21:1-25        |
| 3    | Aposel 1:1-26      |
| 4    | Aposel 2:1-47      |
| 5    | Aposel 3:1-26      |
| 6    | Aposel 4:1-37      |
| 7    | Aposel 5:1-42      |
| 8    | Aposel 6:1-15      |
| 9    | Aposel 7:1-29      |
| 10   | Aposel 7:30-50     |
| 11   | Aposel 7:51-8:13   |
| 12   | Aposel 8:14-40     |
| 13   | Aposel 9:1-25      |
| 14   | Aposel 9:26-43     |
| 15   | Aposel 10:1-33     |
| 16   | Aposel 10:34-48    |
| 17   | Aposel 11:1-30     |
| 18   | Aposel 12:1-23     |
| 19   | Aposel 12:24-13:12 |
| 20   | Aposel 13:13-41    |
| 21   | Aposel 13:42-14:7  |
| 22   | Aposel 14:8-28     |
| 23   | Aposel 15:1-35     |
| 24   | Aposel 15:36-16:15 |
| 25   | Aposel 16:16-40    |
| 26   | Aposel 17:1-34     |
| 27   | Aposel 18:1-21     |
| 28   | Aposel 18:22-19:12 |
| 29   | Aposel 19:13-41    |
| 30   | Aposel 20:1-38     |

| date | Scripture          |
|------|--------------------|
| 1    | Aposel 21:1-16     |
| 2    | Aposel 21:17-36    |
| 3    | Aposel 21:37-22:16 |
| 4    | Aposel 22:17-23:10 |
| 5    | Aposel 23:11-35    |
| 6    | Aposel 24:1-27     |
| 7    | Aposel 25:1-27     |
| 8    | Aposel 26:1-32     |
| 9    | Aposel 27:1-20     |
| 10   | Aposel 27:21-44    |
| 11   | Aposel 28:1-31     |
| 12   | Romans 1:1-17      |
| 13   | Romans 1:18-32     |
| 14   | Romans 2:1-24      |
| 15   | Romans 2:25-3:8    |
| 16   | Romans 3:9-31      |
| 17   | Romans 4:1-12      |
| 18   | Romans 4:13-5:5    |
| 19   | Romans 5:6-21      |
| 20   | Romans 6:1-23      |
| 21   | Romans 7:1-14      |
| 22   | Romans 7:15-8:6    |
| 23   | Romans 8:7-21      |
| 24   | Romans 8:22-39     |
| 25   | Romans 9:1-21      |
| 26   | Romans 9:22-10:13  |
| 27   | Romans 10:14-11:12 |
| 28   | Romans 11:13-36    |
| 29   | Romans 12:1-21     |
| 30   | Romans 13:1-14     |
| 31   | Romans 14:1-23     |

| date | Scripture           |
|------|---------------------|
| 1    | Romans 15:1-21      |
| 2    | Romans 15:22-16:7   |
| 3    | Romans 16:8-27      |
| 4    | 1 Korin 1:1-17      |
| 5    | 1 Korin 1:18-2:5    |
| 6    | 1 Korin 2:6-3:4     |
| 7    | 1 Korin 3:5-23      |
| 8    | 1 Korin 4:1-21      |
| 9    | 1 Korin 5:1-13      |
| 10   | 1 Korin 6:1-20      |
| 11   | 1 Korin 7:1-24      |
| 12   | 1 Korin 7:25-40     |
| 13   | 1 Korin 8:1-13      |
| 14   | 1 Korin 9:1-18      |
| 15   | 1 Korin 9:19-10:13  |
| 16   | 1 Korin 10:14-11:1  |
| 17   | 1 Korin 11:2-16     |
| 18   | 1 Korin 11:17-34    |
| 19   | 1 Korin 12:1-26     |
| 20   | 1 Korin 12:27-13:13 |
| 21   | 1 Korin 14:1-17     |
| 22   | 1 Korin 14:18-40    |
| 23   | 1 Korin 15:1-28     |
| 24   | 1 Korin 15:29-58    |
| 25   | 1 Korin 16:1-24     |
| 26   | 2 Korin 1:1-11      |
| 27   | 2 Korin 1:12-2:11   |
| 28   | 2 Korin 2:12-17     |
| 29   | 2 Korin 3:1-18      |
| 30   | 2 Korin 4:1-12      |
| 31   | 2 Korin 4:13-5:10   |

| date | Scripture         |
|------|-------------------|
| 1    | 2 Korin 5:11-21   |
| 2    | 2 Korin 6:1-13    |
| 3    | 2 Korin 6:14-7:7  |
| 4    | 2 Korin 7:8-16    |
| 5    | 2 Korin 8:1-15    |
| 6    | 2 Korin 8:16-24   |
| 7    | 2 Korin 9:1-15    |
| 8    | 2 Korin 10:1-18   |
| 9    | 2 Korin 11:1-15   |
| 10   | 2 Korin 11:16-33  |
| 11   | 2 Korin 12:1-10   |
| 12   | 2 Korin 12:11-21  |
| 13   | 2 Korin 13:1-14   |
| 14   | Galesia 1:1-24    |
| 15   | Galesia 2:1-16    |
| 16   | Galesia 2:17-3:9  |
| 17   | Galesia 3:10-22   |
| 18   | Galesia 3:23-4:20 |
| 19   | Galesia 4:21-5:12 |
| 20   | Galesia 5:13-26   |
| 21   | Galesia 6:1-18    |
| 22   | Efesus 1:1-23     |
| 23   | Efesus 2:1-22     |
| 24   | Efesus 3:1-21     |
| 25   | Efesus 4:1-16     |
| 26   | Efesus 4:17-5:2   |
| 27   | Efesus 5:3-33     |
| 28   | Efesus 6:1-24     |
| 29   | Filipai 1:1-26    |
| 30   | Filipai 1:27-2:18 |

| date | Scripture               |
|------|-------------------------|
| 1    | Filipai 2:19–3:6        |
| 2    | Filipai 3:7–4:1         |
| 3    | Filipai 4:2–23          |
| 4    | Kolosi 1:1–20           |
| 5    | Kolosi 1:21–2:7         |
| 6    | Kolosi 2:8–23           |
| 7    | Kolosi 3:1–17           |
| 8    | Kolosi 3:18–4:18        |
| 9    | 1 Tesalonaika 1:1–2:9   |
| 10   | 1 Tesalonaika 2:10–3:13 |
| 11   | 1 Tesalonaika 4:1–5:3   |
| 12   | 1 Tesalonaika 5:4–28    |
| 13   | 2 Tesalonaika 1:1–12    |
| 14   | 2 Tesalonaika 2:1–17    |
| 15   | 2 Tesalonaika 3:1–18    |
| 16   | 1 Timoti 1:1–20         |
| 17   | 1 Timoti 2:1–15         |
| 18   | 1 Timoti 3:1–16         |
| 19   | 1 Timoti 4:1–16         |
| 20   | 1 Timoti 5:1–25         |
| 21   | 1 Timoti 6:1–21         |
| 22   | 2 Timoti 1:1–18         |
| 23   | 2 Timoti 2:1–21         |
| 24   | 2 Timoti 2:22–3:17      |
| 25   | 2 Timoti 4:1–22         |
| 26   | Taitus 1:1–16           |
| 27   | Taitus 2:1–14           |
| 28   | Taitus 2:15–3:15        |
| 29   | Filemon 1:1–25          |
| 30   | Hibru 1:1–14            |
| 31   | Hibru 2:1–18            |

| date | Scripture         |
|------|-------------------|
| 1    | Hibru 3:1-19      |
| 2    | Hibru 4:1-13      |
| 3    | Hibru 4:14-5:14   |
| 4    | Hibru 6:1-20      |
| 5    | Hibru 7:1-19      |
| 6    | Hibru 7:20-28     |
| 7    | Hibru 8:1-13      |
| 8    | Hibru 9:1-10      |
| 9    | Hibru 9:11-28     |
| 10   | Hibru 10:1-18     |
| 11   | Hibru 10:19-39    |
| 12   | Hibru 11:1-16     |
| 13   | Hibru 11:17-31    |
| 14   | Hibru 11:32-12:13 |
| 15   | Hibru 12:14-29    |
| 16   | Hibru 13:1-25     |
| 17   | Jems 1:1-18       |
| 18   | Jems 1:19-2:17    |
| 19   | Jems 2:18-3:18    |
| 20   | Jems 4:1-17       |
| 21   | Jems 5:1-20       |
| 22   | 1 Pita 1:1-12     |
| 23   | 1 Pita 1:13-2:10  |
| 24   | 1 Pita 2:11-3:7   |
| 25   | 1 Pita 3:8-4:6    |
| 26   | 1 Pita 4:7-5:14   |
| 27   | 2 Pita 1:1-21     |
| 28   | 2 Pita 2:1-22     |
| 29   | 2 Pita 3:1-18     |
| 30   | 1 Jon 1:1-10      |

| date | Scripture          |
|------|--------------------|
| 1    | 1 Jon 2:1-17       |
| 2    | 1 Jon 2:18-3:2     |
| 3    | 1 Jon 3:3-24       |
| 4    | 1 Jon 4:1-21       |
| 5    | 1 Jon 5:1-21       |
| 6    | 2 Jon 1:1-13       |
| 7    | 3 Jon 1:1-14       |
| 8    | Jut 1:1-25         |
| 9    | Revelesen 1:1-20   |
| 10   | Revelesen 2:1-17   |
| 11   | Revelesen 2:18-3:6 |
| 12   | Revelesen 3:7-22   |
| 13   | Revelesen 4:1-11   |
| 14   | Revelesen 5:1-14   |
| 15   | Revelesen 6:1-17   |
| 16   | Revelesen 7:1-17   |
| 17   | Revelesen 8:1-13   |
| 18   | Revelesen 9:1-21   |
| 19   | Revelesen 10:1-11  |
| 20   | Revelesen 11:1-19  |
| 21   | Revelesen 12:1-18  |
| 22   | Revelesen 13:1-18  |
| 23   | Revelesen 14:1-20  |
| 24   | Revelesen 15:1-8   |
| 25   | Revelesen 16:1-21  |
| 26   | Revelesen 17:1-18  |
| 27   | Revelesen 18:1-24  |
| 28   | Revelesen 19:1-21  |
| 29   | Revelesen 20:1-15  |
| 30   | Revelesen 21:1-27  |
| 31   | Revelesen 22:1-21  |